


Yaubada wasana: Buka
Hauhauna tupwana



The Message about God: The New Testament in the Saliba
language of Papua New Guinea

Yaubada wasana: Buka Hauhauna tupwana
The Message about God: The New Testament in the Saliba language of Papua New Guinea
Nupela Testamen long tokples Saliba long Niugini

copyright © 2007, 2013, 2017, 2021 Wycliffe Bible Translators, Inc.

© Wycliffe Bible Translators, Inc.

Language: Saliba

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2023-12-15

PDF generated using Haiola and XeLaTeX on 15 Dec 2023 from source files dated 15 Dec 2023

a38b418f-b400-5c73-b231-ea8af9b0924a

Contents

Hedehedede bagubagunana	1
Mataiyo	5
Maleko	65
Luka	100
Yowane	161
Apostolo	206
Loma	260
1 Kolinito	286
2 Kolinito	313
Galatiya	329
Epeso	339
Pilipi	348
Kolose	355
1 Tesalonika	362
2 Tesalonika	368
1 Timoti	372
2 Timoti	380
Taitasi	386
Pilemona	390
Hebelu	392
Yamesi	411
1 Petelo	418
2 Petelo	426
1 Yowane	431
2 Yowane	438
3 Yowane	440
Yuda	442
Hemasalaha	445
.	476

Hedehedede bagubagunana

Teina buka ta ta katai ede “Yaubada yona talam hauhauna bukana”. Unai gonowana mauli nige kana siga kabahaina kedana ku lobai. Yo hinage Yaubada yona paisowa tanoubu ta unai yo kana kao saesaena mamohoina kabo ku nuwatulobai. Iya ye saekalili, iya tanoubu ta yo galewa ne tauhetubudi yo kita tamowai hinage tauginaulida. Iya ye a'a yo ye didigakalili, yo yona kabikabi yo yona hekasa maudoidi se dudulaikalili. Yaubada ye henuwakalili taba maiyada ta miyamiya. Iyamo tamowai bagubagunadi Yaubada se sigisuwalaei, iya ede se kawayagala na ba'aya se ginauli. Debanaena ede Yesu ye dobima tanoubu ta unai. Iya Yaubada Natuna. Yoda ba'aya kabahededegigilidi ye ginauli. Huyana sataulo unai ye boita meta yoda ba'aya maisana ye hemaisa, yo diyabolo yona gigibwali unai ye yailihaida. Bena iya ta sunumaei, meta kabo mauli nige kana siga kita yoda.

Talam Hauhauna bukana huyakulina meta bolimai 48 yo 95 AD luwadiyena. Na nige tamowai yodi nuwatuyena se kuli, na Yaluwa Tabuna ye woyaidi, ye henuwa-masalahadi, yo ye hekatadi. Unai ta hedede ede, teina ta Yaubada kalinana. Buka ta taukulina bagubagunadi meta nige tamowai kesega, na se bado, doha ede, Yesu yona hekahekatao haiyona, Mataiyo, Yowane, yo Petelo. Na taukulikuli labui meta Yesu kana kahao mamohoidi, siya ede Yuda yo Yamesi. Yo hekadi ede apostolo Paulo, doketa Luka, yo Petelo tausaguina Maleko.

Buka ta luwana ne unai yodi kulikuli o buka badodi 27. Buka hasi meta Yesu wasana, siya ede Mataiyo, Maleko, Luka, yo Yowane. Buka hehaligigina meta Apostolo Yodi Paisowa bukana. Na buka gehegehena meta Hemasalahana bukana, iya ede huya gehegehedi ne udiyedi Yaubada yona hineli ne ye hemasalahadi. Na buka hekadiyo ne meta apostolo yodi kulikuli se lau dubu udoi'udoi udiyedi. Yodi nuwatu ede bena ekalesiya bodadi se saguidi yodi sunuma yo yodi miyamiya dudulaidi udiyedi.

Huyana Talam Hauhauna bukadi wa se kulidi meta nimadiyena se kulidi. Na yodi pepwa meta lohalohadi na se nokudi. Muliya tamowai se bado yodi kulikuli wa se kulihekawadi pepwa hekadiyo udiyedi. Bukadiyao ne ta kataidi “nimakulikuli pepwadi” yo “kulikuli beyabeyadi”. Yoda huyaena tausonoga nimakulikuli pepwadi tausani hisa se lobaidiko. Pepwa hekadiyo udiyedi ede buka kesega maudoudoina, na hekadiyo lausoi soi hisahisadi mo. Taukulihekawa hekadiyo yodi kulihekawa unai kulikuli gagilidi se kosobuidi. Bwagana Apostolo yodi kulikuli pepwadi bagubagunadi wa se taukwadaleleko, iyamo tausonoga kulikuli maudoidi se hekaigonogonowaidi na se lobai kaiteya kulikuli se dudulai. Na ena tausonoga yodi lobai ne udoi'udoi yo nige se masalahakalili, kabo pepwa gunina ne unai ka kulihemasalaha, doha Mataiyo 6:13 yo 8:28 udiyedi.

Buka Tabuna kulibuina kalina Saliba unai

Bolimai 1891 mesinale Dimdim se lage Kwato bwanabwanaluwana unai, siya ede Charles Abel ma mwanena yo natudi. Na Saliba bwanabwanaluwana unai hinage se paisowa na tamowai se nuwabui. Mesinale kalina Suau se hepaisowa na Riba Harihariuna hinage se kulibui. Bolimai 1962 unai kabo buka wa bagubagunadi se ginaulidi, Charles Abel natuna yona kitahetete unai. Na mulinawai kabo Saliba tamowaidiyao se bado Riba Harihariuna se hepaisowa.

Bolimai 1993 unai Saliba bwanabwanaluwana unai dubu tautolobagunaedi se hineli bena ta bom kalinadaena Talam Hauhauna bukana se kuli. Ede leta se kulilaei SIL (*Summer Institute of Linguistics*) udiyedi bena tausaguidi se hetamalidima. Bolimai 1996 unai SIL taupaisowaina se lagema na se hetubu kalina Saliba se kaipatei. Ye lau ee, kabo SIL taupaisowaina yo Saliba tamowaidi hekadi kulibui paisowana se

hetubu bolimai 1998 unai. Bolimai 2001 unai kabo tamowai haiyona se sikulu *National Translators Course* unai. Na kabo boda haiyona se hetubudi na udiyedi ka paisowa kulibui wa unai, siya ede United, Kwato maiyadi SDA, yo Ketiliki. Na bolimai se lohakalili, ede taukulibui hekadi se boita, hekadi se pesa, na gehegehena ta unai taukulibui bodadi labui mo kulibui paisowana wa se laei se hegehe.

Ka gwauyalalakalili meta buka ta iya ede nimadaena! Yaubada ka lautokiyei yona kabinamwa, yona sagu, yona kitahetete, yona hesonoga, yo yona hebayao maudoina hesabana!

Kulibui nuwanuwatuna

Yaubada hekasisina yo gadosisina debanaena ede ka henuwakalili taba yoma kulibui maudoidi se dudulai yo kalina Saliba heguhegulina unai. Yo hinage ka henuwa taba tauhasili gonowana se hasililobai. Debanaena ede bolimai se loha na ka kaikaipate buka ta ka bui kita Saliba kalinadaena.

Paisowa wa ye pilipili, matawuwuna ede buka ta taukulidi bagubagunadi, siya se kulidi kalina Giliki unai. Yo ginauli sahasahadi se kulidi wa meta beyabeyana se tubu Isalaela yo teha hekadi udiyedi. Tenem huyana ne unai tamowai yodi mauili nige doha kita, yodi koya yo kadi paisowa udoi, yo laulau se kitahesaedi wa meta nige doha kita, yo yodi taba'ohu kabikabidi udoi. Debanaena bolimai se loha na ka kaipate buka ta ka bui kita Saliba kalinadaena.

Hedehedede pilipilidi hedehemasalahadi

Beyabeyana, huyana Talam Hauhauna bukana ta taukulina bagubagunadi se kulikuli meta nige kita se nuwatuida, na siya yodi huyaena tamowaidi mo se nuwatuidi. Unai nige ginauli maudoidi se hedehemasalahanamwanamwaedi na ta nuwatulobaidi. Ede yodi hedehedede hekadi yo ginauli hekadi yo kabikabi hekadi nige kabidi ta kata, yo yodi heyaheyasoni hekadi nige se masalaaha kalidaena.

Unai heyaheyasoni ena nige se masalaaha kabo lausoiso udiyedi heyaheyasoni ne nuwanuwatuna ka kuli, na pepwa guninaena kabo heyaheyasoni hedehededena ka kuli.

Hinage ginauli yo kabikabi yo tamowai hekadi ka kulihemasalahadi pepwa guninaena yo buka ta tupwana gehegehena ne unai, hesana ede, “Buka Tabuna hedehededena lakilakidi hedehemasalahadi”. Hedehedede ka kulihemasalahadi wa hekihekinoidi ede teina: [], doha, Keliso yo Taukiuli henuwaisinina.

Basileiya yo magari tautaudi (Dimdimyena ta wane, *map*) hinage ka kulidi buka ta unai, udiyedi kabo magari yo teha ku lobaidi.

Lausoiso hekadiyo udiyedi hedehedede haghagadi ka kulidi na hekihekinoidi ede teina: []. Yoma nuwatu ede taba kowa tauhasihasi bena ka saguigo na lausoiso ne se masalaaha kalimwai. Doha ede, Mataiyo, Maleko, Luka, Yowane, yo Apostolo Yodi Paisowa bukadi udiyedi meta tamowai yodi hedehedede se kulidi. Na hedehedede hekadi se lohakalili na madai tauhasihasi nuwana ye luluhi tauhedehedede ne kaiteya. Unai kabo tauhedehedede hedehemasalahana ka kuli'uyoi, doha Mataiyo 6:14 yo 11:27 yo 12:43 udiyedi. Na hinage, lausoiso hekadiyo udiyedi meta kabanuwa-masalaaha hedehedededi udiyedi ka kulitubeidi. Unai kabo lausoiso ne kaniyona ye masalaaha na taba nige ta nuwapwanopwano. Doha Mataiyo 6:15 yo 12:5 yo Luka 17:33 udiyedi.

Lauhasili kabalobaidi kulikulidi idohagi ta hasilidi

Teina buka ta tupwana hinage ta kataidi “buka”, siya ede Mataiyo yo Maleko yo ye lau ee Hemasalahana bukana. Hesadi yo yodi kabalobaidi pepwadi numeladi meta buka ta kabahetubuna ne unai ku lobaidi.

Buka kesega luwana ne unai meta peina. Peina meta numela ta tole: 1, 2, 3, yo ye lau.

Peina kesega hinage se hineli'uyoi ede lausoiso, meta hinage numela se tole. Peina yo lausoiso duwaduwalidiyena *colon* “:” ta kuli. Peina yo lausoiso numeladi meta nige kulikuli bagubagunadi udiyedi se kulidi, na bolimai 1272 unai peina se hekasadi na bolimai 1551 unai lausoiso se hekasadi, ede se kulidi buka unai.

Buka yo peina yo lausoiso ne kulikulidi doha teina:

Mataiyo 1 :1 ta hasili ede, Mataiyo peina bagubagunana (o, peina one), lausoiso one. *Colon* “:” kaniyona ede “lausoiso”.

Loma 2:1 -3 ta hasili ede “Loma peina helabuina (o, peina two), lausoiso one *ye lau three*”. *Dash* “-” kaniyona ede “*ye lau*”.

Loma 5:1,5 ta hasili ede “Loma peina five, lausoiso one *yo five*”. *Comma* “,” ne kaniyona ede “*yo*”.

Loma 5:1 –8:39 ta hasili ede “Loma peina five, lausoiso one, *ye lau peina eight*, lausoiso 39”. *Dash* lohalohana ne “-” kaniyona ede “*ye lau peina*”.

Kulikuli kao udoi'udoi hekihekinoidi

Hasihasi unai kabakaiyawasi hekihekinoina

Ta hasili meta nige kulikuli maudoina ta hasilikesegai, na bena ta kaikaiyawasi na yawasida ta hai. Hekihekinoidi ede “.” (*fullstop*), iya ede kabakaiyawasi lohalohana, yo “,” (*comma*), iya ede kabakaiyawasi kubwakubwana. Na ena henamai, kabo nige fullstop, na “?” (question mark). Na ena yoga, kabo “!” (*exclamation mark*). Henamai yo yoga bena hinage ta hasilinamwanamwaedi.

Kulikuli ne hinage ta hinelidi tupwadiyao udiyedi, Dimdimyena hesadi ede *paragraph*. Na haedi tupwa kesega ye gehe meta bena ta kaiyawasi musamusana.

Hedehemasalaha pepwa guninaena

Ena lausoiso hesau unai na kipwala gagilidi labui ku lobaidi doha teina, **, meta hedehemasalahana ede pepwa gunina ne unai.

Hedehemasalaha hekadiyo udiyedi nige lausoiso hedehedena maudoina ka kataidi, na duwaduwalina ne unai hedehedede hekadi ka kulikamposidi. Kabo hekihekinoina meta “...”, doha Mataiyo 18:6 hedehemasalahana unai. Yoda hasihasilina ne unai hekihekinoi “...” ta hasilikamposidi.

18:6 Tamowai ... dobidobidi: Kalina Giliki unai hedehedede ta kaniyona labui: ...

Tamowai yodi hedehedede hekihekinoidi

Tamowai yodi hedehedede kabahetubudi udiyedi “ o ‘ (*double or single opening quotation mark*) ku lobai, na yodi kabagehe ne unai kabo ’ o ” (*single or double closing quotation mark*). Doha Mataiyo 4:4 unai:

Na Yesu ye wane, “Yaubada kalinana unai ta hasili ye wane,

‘Tamowai nige pwalawa mo unai ye maumauli, na Yaubada yona hedehedede maudoidi udiyedi hinage ye maumauli. ’ ” (*Dutelonomi 8:3*)

Huyana tamowai hesau yona hedehedede ta hasili ye gehe, kabo bena hinage musamusana ta kaiyawasi. Kabo taulapulapui ne se lapulobai meta teina ta tamowai ne yona hedehedede wa kana siga ede.

Kulikuli gonogonowadi kabalobaidi

Mataiyo, Maleko, Luka, yo Yowane Yesu yona mauli wasana se kuli. Unai kulikuli hekadiyo gonogonowadi. Ena doha tenem, kabo kulikuli lakilakidi kewa ne udiyedi gunidiyena ka kulihemasalahadi, doha Mataiyo 4:12 kewanaena:

Yesu ye hetubu ye lauguguya

(*Maleko 1:14-15; Luka 4:14-15*)

Buka kabalobaidi lausoiso udiyedi

Buka hekadiyo udiyedi meta Talam Bagubagunana Bukana unai lausoi hekadi se kataidi. Ena doha tenem, meta hedehede se katai ne mulinaena kabo kabalobaina bukana ka kuli, doha teina:

Mataiyo

Yesu wasana Mataiyo ye kuli wa

Buka ta hededehehemalahana

Buka ta taukulina meta Mataiyo, iya Yesu yona hekahekata hesau, na hesana bagubagunana Lewi. Iya Dius tamowaina na yona magari meta Kapelenauma. Kana paisowa takisi tautanotano, na kabo Yesu iya ye lobai na ye yoganei bena iya ye hemuliwatani (Mataiyo 9:9). Yesu wasana bukana ta Mataiyo ye kuli nuwana bolimai 60 ye lau 85 AD luwadiyena.

Mataiyo buka ta ye kuli meta Dius tamowaidiyao hesabadi. Dius tamowaidi wa Yaubada yona hededehehesunuma beyabeyadi wa se sunumaeidi na yona basileiya se nayai bena ye masalaha tanoubu ta unai. Mataiyo ye hekitadi meta Yesu Yaubada yona basileiya ye leyama (Mataiyo 4:17).

Yesu iya Dius kadi mumuga Abelahama kana isimulita (Mataiyo 1:1). Yesu hinage Mose lauhedamaina (Dutelonomi 18:15), na gonogonowana doha Mose, Yesu hinage ye sae kuduli unai na laugagayo hauhauna ye leyama yo laulau dudulaidi ye hekatadi (Mataiyo 5–7). Yesu hinage Dawida kana isimulita, iya nabada wa unai Dius yodi wasawasa saesaena wa (Mataiyo 1:6,17), yo Yesu Isalaela (o gonowana ta wane, Yaubada yona basileiya) yodi wasawasa (Mataiyo 21:5, 27:11). Yesu meta peloweta yodi hedehedede wa ye hemamohoiyeidi (Mataiyo 1:23, 2:15,17,23, 4:14, 8:17, yo hekadiyo). Yona boita unai tamowai maudoidi ye hemaisahaidi na se hemala Yaubada yona tamowai (Mataiyo 1:21, 26:28). Na kabo Yaubada iya ye hetolo'uyoi (Mataiyo 17:9, 20:19, 28:7) na unai ye hemamohoiyei meta Yesu mamohoi Yaubada Natuna.

Teina maudoina ta ye hemasalaha meta Yesu iya Yaubada yona hededehehesunuma tamowaina yo Dius yodi Mesaiya o Keliso (Mataiyo 11:2-6, 16:16,20, 23:10), yo iya taugilihaidi. Na Yesu nige Dius se bom mo yodi Mesaiya, na dagela tamowaidi hinage (Mataiyo 2:1-12, 28:18-20).

Kabahetubu unai Mataiyo ye kuli bena Yesu hesana iya Imanuwela, kaniyona ede “*Yaubada maiyada*” (Mataiyo 1:23), na gehegehena ne unai Yesu ye hededehehesunuma meta iya maiyada (Mataiyo 28:20).

Buka ta hedehededena lakilakidi

- Yesu kana mumuga yo yona huyalabasi wasana 1:1–2:23
- Yowane Babatiso wasana 3:1-12
- Yesu babatiso ye hai na laukita ye hekalo 3:13–4:11
- Yesu Galili unai ye paisowa 4:12–18:35
- Yesu ye sae Yelusalema 19:1–20:34
- Yesu yona mauli mayadaidi gehegehedi, se helauhetala na se unuhemwaloi 21:1–27:66
- Yesu ye tolo'uyo na yona hekahekatao ye hetamalidi yona tautauwasa 28:1-20

Yesu Keliso kana kulutubuwo
(Luka 3:23-38)

¹ Teina ta Yesu Keliso kana kulutubuwo. Abelahama unai ye hetubu ye dobi Dawida iya wasawasa, na kabo ye dobi ede Yesu unai.

² Abelahama natuna Isako,
Isako natuna Yakobo,
Yakobo natuna Yuda ma kana kahao.

³ Yuda natunao Pelesi yo Sela, sinadi ede Tamala.
Pelesi natuna Heselona,
Heselona natuna Lama.

⁴ Lama natuna Aminadaba,
 Aminadaba natuna Nasona,
 Nasona natuna Salamona.
⁵ Salamona natuna Bowasi, na sinana ede Lahaba.**
 Bowasi natuna Obedi, sinana ede Luti.
 Obedi natuna Yese,
⁶ Yese natuna Dawida, iya ede wasawasa.

Dawida natuna Solomona, sinana ede Bateseba,** iya meta Ulaiya kwabulina.

⁷ Solomona natuna Lehobowama,
 Lehobowama natuna Abiya,
 Abiya natuna Asa.

⁸ Asa natuna Yehosapata,
 Yehosapata natuna Yeholama,
 Yeholama natuna Usiya.

⁹ Usiya natuna Yotama,
 Yotama natuna Ahasa,
 Ahasa natuna Hesekeya.

¹⁰ Hesekeya natuna Manase,
 Manase natuna Amona,
 Amona natuna Yosiyana.

¹¹ Yosiyana natuna Yekoniya** ma kana kahao. Siya yodi huya unai Babiloni** yona tau'iyala se laoma Yudeya tanona tamowaidiyao se haidi se laeidi Babiloni.

¹² Na muliyena kabo Yekoniya natuna Seyalatiyela,
 Seyalatiyela natuna Selubabela.

¹³ Selubabela natuna Abiuda,
 Abiuda natuna Eliyakima,
 Eliyakima natuna Asowa.

¹⁴ Asowa natuna Sadoka,
 Sadoka natuna Akima,
 Akima natuna Eliuda,

¹⁵ Eliuda natuna Eleyasala,
 Eleyasala natuna Matana,

Matana natuna Yakobo,

¹⁶ Yakobo natuna Yosepa.

Yosepa mwanena Maliya. Maliya natuna ede Yesu, iya ta katai ede Keliso.

¹⁷ Unai, Abelahama kana isimulitao ye dobi Dawida unai meta isi saudoudoi-hasi (14), yo Dawida unai ye dobi huyana se laeidi Babiloni, isidiyao meta saudoudoi-hasi (14), na kabo ye dobi Keliso unai meta hinage isi saudoudoi-hasi (14).

Yesu Keliso huyalabasina

(Luka 2:1-7)

¹⁸ Yesu Keliso huyalabasina wasana ede doha teina: Maliya Yesu sinana se hedede-hepatulaei Yosepa unai, na sola nige se miyakesega, na ye masalaha na kabina se kata meta Maliya ye diyaka Yaluwa Tabuna logulogunaena.

¹⁹ Na Yosepa meta tamowai namwanamwana na nige ye henuwa Maliya ye hemwawadine tamowai matadiyena. Unai yona nuwatu ye ginawu bena wadawadamyena ye

** **1:5:** Lahaba wasana ede Yosuwana 2 yo 6:25 udiyedi ku hasili.

** **1:6:** Bateseba wasana ku hasili 2 Samuwela

11–12 unai. ** **1:11:** Yekoniya hesana hesau ede Yehoyakina.

** **1:11:** Babiloni meta basileiya yo hinage

magai lakilakina teha Pesiya unai, wauta iya ede *Irak* basileiyana.

inawasei.** 20 Sola ye nuwanuwatu, na Guiyau yona anelu ye laoma kenosuwaiyena ye hededelau unai ye wane, “Yosepa, Dawida natuna,** tabu ku matausi na Maliya ku tawasolai. Iya natuna meta Yaluwa Tabuna unai ye tubuma. 21 Iya kabo natuna loheya ye labasi, na hesana kabo ku tole Yesu,** matawuwuna iya boda Isalaela yodi yababa udiyedi kabo ye gilihaidi.”

22 Ginauli maudoidi ta se tubu bena Guiyau yona hedehehede peloweta kawanaena ye hededenonohaiyako wa ye hemamohoiyei:

23 “Hasala nuwanuwasupuna kabo ye diyaka, na kabo natuna loheya ye labasi. Iya kabo hesana se tole ede Emanuwela.” *(Aisaiya 7:14)*

Emanuwela kaniyona ede *Yaubada maiyada*.

24 Yosepa ye kenotolo ede Guiyau yona anelu yona hedehehede wa ye lauwatani na Maliya ye woyaiyama yona magaiyena ye kitahetete. 25 Na sola Maliya ma nuwanuwasupuna ye lau ee kana siga natuna ye labasi. Na hesana Yosepa ye tole ede Yesu.

2

Tamowai sibasibadiyao teha kaluwabu unai se laoma

1 Yudeya magaina gagilina hesau hesana Betelehema unai Yesu se labasi, Heloda** yona huyawasawasa unai. Na tamowai sibasibadiyao kipwala taukitahekasadi teha kaluwabu unai se laoma ee Yelusalema unai se lage, 2 na se henahenamai se wane, “Komi Dius yomi wasawasa hauhauna se labasiyako wa, iya ede haedi? Yona huyalabasi kipwalana teha kaluwabu unai ye sae ka kita, ede ka laoma ta bena iya ka taba'ohui.”

3 Heloda wasawasa hedehehede ta ye lapui meta ye siliyata, unai nuwana ye mod-ekalili, yo Yelusalema tamowaidi maudoidi hinage. 4 Na taukaitalasam tauwoyaidi yo laugagayo taulauhekataedi ye yogagogoidima na ye henamaiyeidi, “Haedi kabo Keliso se labasi?” 5 Na se wane, “Yudeya magaina Betelehema unai, matawuwuna ede peloweta ye kulinonohaiyako ye wane,

6 ‘Na kowa, Betelehema Yudeya** tanona unai, kowa nige ku dobikalili Yudeya magaidiyao udiyedi, matawuwuna kowa kalimyena kabo tauwoyawoya ye laoma na yogu tamowai Isalaela ye kitahetetedi.’ ” *(Maika 5:2)*

7 Na kabo Heloda tamowai sibasibadiyao wa ye yogahesuwaladi na ye henamaiyeidi kipwala wa yona huyamasalaha mayadaina mamohoina bena kabina ye kata. 8 Na kabo ye hetamalidi se lau Betelehema yo ye wane, “Kwa lau wawaya ta kwa loyanamwanamwaei. Ena kwa lobai kabo kwa uyoma yogu kwa hedehehede-namwanamwa, na kabo yau hinage ya laowa unai ya taba'ohu.”

9-10 Wasawasa wa kalinana se lapui na kabo se lau, na kipwala ye woya'useidima wa se kita'uyoi meta se gwaualakalili. Na ye kedabagunaidi ye lau wawaya wa yona kabamiya wa unai. 11 Se mwalaesae numa kalona wa unai na wawaya wa ma sinana

** **1:19:** Unai yona nuwatu ye ginauli bena wadawadamyena ye inawasei: Dius yodi kabikabi unai waihiu se hedehehepatulaei tau hesau unai ede se kitadi doha se tawasolako, unai tamowai matadiyena meta Maliya ye ganawali. Na Yosepa meta laulau dudulaidi tamowaina, ede nige gonowana Maliya ye tawasolai, matawuwuna ye ganawaliko. Na iyamo nige ye henuwa bena Maliya ye hemwadinekaliliyei tamowai matadiyena, unai ye nuwatu bena kabo wadawadamyena ye laugabaei na Maliya kabo natuna ne tamana ye tawasolai. ** **1:20:** Dawida natuna: Dawida meta Yosepa kana mumuga, na anelu wa Dius yodi hedehehede unai Yosepa ye yoganei ye wane, Dawida natuna. ** **1:21:** Yesu kaniyona meta Yaubada Tauhemaulida. Kalina Hebelu yo Alamaiki udiyedi se katakatai ede Yeshua, na kalina kesega kesega katakatana udoi'udo. ** **2:1:** Heloda: Wasawasa ye hetahetala'usei ta meta iya Heloda bagubagunana, hesana se katai ede Heloda Lakilakina. ** **2:6:** Yudeya meta tano ne hesana, na yona kabahaina ede kadi mumuga Yuda.

Maliya se kitadi, se tulibono yo wawaya wa unai se taba'ohu. Yodi kainauya se haidi na se kainauyaidi, gole yo inisenisi yo mulo.**

¹² Na kabo kenosuwaiyena Yaubada ye hededelau udiyedi tabu se uyo Heloda unai. Ede keda hesau se hai na se uyo yodi magai.

Yosepa ma mwanena yo natudi se wasabu se lau Aikupito

¹³ Tamowai sibasibadiyao wa se dalahaiko, na kabo Guiyau yona anelu kenosuwaiyena ye taumasalaha Yosepa unai ye wane, “Ku tolo wawaya ta ma sinana ku woyaidi kwa wasabu kwa lau Aikupito. Menai kabo kwa miya ye lau ee kana siga ya hededelaowa'uyo. Matawuwuna Heloda wawaya ta ye wasewasenei bena ye unui.”

¹⁴ Ede boniyaina ne unai Yosepa ye tolo na wawaya wa ma sinana ye wasabuyeyidi se lau Aikupito. ¹⁵ Unai se miya ye lau ee Heloda ye boita. Teina unai Guiyau yona hededepeloweta saha ye hededenonohaiyako wa ye laoma ye mamohoi:

“Aikupito unai natugu tau ya yoganei'uyoiyama.” *(Hoseya 11:1)*

Heloda yona tau'iyala wawayao se unuidi

¹⁶ Heloda wasa ye lapui meta tamowai sibasibadiyao wa iya se lupoi, unai ye kouyalayalakalili. Ede yona tau'iyala ye hetamalidi se lau Betelehema maudoina unai wawayao tatao yodi bolimai labui sola nige se haidi maudoidi se unuidi. Matawuwuna ede tausibasiba wa ye henamaiyeyidi na kipwala yodi huyakitana wa unai ye laoma meta sola nige bolimai labui ye lobai. ¹⁷ Teina unai peloweta Yelemaiya saha ye hededeyako wa ye laoma ye mamohoi, ye wane,

¹⁸ “Kalina lakilakina Lama** unai ye laoma, nuwayababa yo doulakilaki daguguna.

Lahela** natunao sabidi ye dou na nige ye henuwa nuwana se hededehetalu, matawuwuna ede natunao se boitako.” *(Yelemaiya 31:15)*

Aikupito unai se uyoma Isalaela

¹⁹ Heloda yona boita mulinaena, Aikupito unai Guiyau yona anelu kenosuwaiyena ye taumasalaha Yosepa unai ²⁰ ye wane, “Ku tolo wawaya ta ma sinana ku woyaidi kwa uyo Isalaela tanona unai, matawuwuna wawaya ta bena tau'unuina wa se boitako.”

²¹ Unai Yosepa ye tolo wawaya wa ma sinana ye woyaidi na se uyo Isalaela. ²² Na wasa ye lapui meta Heloda natuna Alekelau iya tamana lauhedamaina Yudeya yodi wasawasa, unai ye matausikalili na nige ye henuwa ye lau Yudeya. Na kenosuwaiyena hededehebasiba ye haidi, unai ye lau Galili ²³ na magai hesau hesana Nasaleta unai se miya. Unai peloweta yodi hedehede hesau hinage ye laoma ye mamohoi:

“Iya kabo hesana se katai Nasaleta tauna.”

3

Yowane Babatiso yona lauguguya balabalaena

(Maleko 1:1-8, Luka 3:1-9, Yowane 1:19-28)

¹ Bolimai hisa se lau mulidi ne unai** Yowane Babatiso Yudeya balabalanaena ye hetubu ye lauguguya ye wane, ² “Kwa nuwabui! Matawuwuna ede Galewa basileiyana

** **2:11:** Inisenisi yo mulo meta mulamula panepanedi. Kainauya haiyona wa kaniyodi ede teina: Gole unai se hemasalaha meta Yesu se kita iya wasawasa. Inisenisi meta taukaitalam tamowaidi se gabugabu na kasuna ye sae Yaubada unai, unai inisenisi kainauyana wa ye hemasalaha meta tausonoga wa Yesu se kita iya Yaubada. Mulo meta kamkamna tauhekaiyawasidi yo hinage tauboiboita sinaledi kabaheyausidi, unai ye hemasalaha meta Yesu kabo ye kamkamna yo ye boita. ** **2:18:** Lama meta magai hesau Yelusalema dedekanaena. Hedehede ta unai Mataiyo ye hai Betelehema unai ye heyaheyasoniyei. ** **2:18:** Lahela meta Dius kadi mumuga Yakobo mwanena. Mataiyo ye hai ye heyaheyasoniyei sina maudoidi Betelehema unai natudiyao se boitako wa udiyedi. ** **3:1:** Bolimai hisa se lau mulidi ne unai meta Mataiyo yona kulikuli kalina Giliki unai ye kuli, Tenem mayadaidi ne udiyedi.

ye hanahanaumako!” ³ Yowane meta iya tamowaina ede Aisaiya peloweta ye hedede-hemasalaha'usei wa ye wane,

“Tamowai hesau balabala unai ye yogayoga ye wane,

‘Guiyau yona keda kwa kabinonohai,

yo yona kabalau kwa hedudulai!’ ”

(Aisaiya 40:3)

⁴ Yowane kana kaleko meta kamela wiyana unai se ginauli, na kana dagilolo meta suisui hesau dahina,** na kana kai ede mwadimwadi yo kamwakamwa. ⁵ Yelusalema, Yudeya yo Yolidani tehana maudoina tamowaidiyao se laoma iya kalinawai ⁶ na yodi yababa se hededehemasalahadi, ede Yowane ye hebabatisoidi Yolidani sagasagana unai.

⁷ Kabo Paliseya yo Sadusiya tamowaidiyao gwaudi se laoma Yowane unai babatiseo hesabana. Ye kitadi ede ye dilaidi ye wane, “Komiu mwata natunao! Kaiteya ye hededelaowa bena kabo Yaubada yona hekamkamna kwa yabubugabaei? ⁸ Bena nuwabui kaniyona kwa miyahemasalahadi! ⁹ Na tabu kwa nuwatui meta kabo [kwa bom kwa hemaui'uyoigomiu na] kwa wane, ‘Kama kulutubu meta Abelahama!’** Ya hededelaowa, Yaubada gonowana weku ne udiyedi Abelahama kana isimulitao ye ginaulidi. ¹⁰ Kilam meta ye nonohaiyako na kaiwa wuwuna unai ye tole. Ena kaiwa hesau nige ye kaniyonamwanamwa meta kabo ye koigabaei yo ye gabalaei kaiwa kalakalasinu luwanaena.

¹¹ Yau waila unai ya hebabatisoigomiu, yomi nuwabui kabakitana. Na tamowai hesau ede sola kabo ye laoma. Iya yona gigibwali meta ye saekalili na kabo yau. Yau nige ya namwakalili taba iya kana sendolo ya baheidi.** Iya kabo Yaluwa Tabuna yo kaiwa kalakalasinu udiyedi ye hebabatisoigomiu. ¹² Yona kabahesuhesulisini kaikaiwana iya nimanaena, na kabo witi ye hesulisinidi yo ye hinelidi. Na kabo kaniyodi ye toledi sanalaena, na mosomosodiyao kabo ye gabudi kaiwa kalakalasinu nige yona kababoso unai.”

Yesu yona babatiseo

(Maleko 1:9-11, Luka 3:21-22, Yowane 1:32-34)

¹³ Kabo Yesu Galili unai ye laoma Yolidani sagasagana unai, bena Yowane unai babatiseo ye hai.

¹⁴ Na Yowane ye kaipate bena Yesu ye hededehekaiyawasi ye wane, “Idohagi to kowa ku laoma yau kaliguyena? Ye namwa mo taba kowa ku hebabatisoigau!” ¹⁵ Na Yesu ye hededebui ye wane, “Nige, teina mahana ta unai meta kowa bena ku hebabatisoigau. Taba Yaubada yona nuwatu mo ta lauwatani.” Ede Yowane ye talam na Yesu ye hebabatisoi.

¹⁶ Ye hebabatisoi ye gehe kabo Yesu waila ne unai ye gayo ye saesae, na mahanana ne unai galewa ye tasoke, na Yesu Yaubada Yaluwana** ye kita ye dobima doha bunebune na ye talu iya unai. ¹⁷ Na kalina hesau galewa ne unai ye wane, “Teina yau Natugu. Iya ya gadosisiyei, yo ya gwauyalalalili iya unai.”

4

Diyabolo Yesu ye nohoi

(Maleko 1:12-13, Luka 4:1-13)

** **3:4:** Kaleko yo dagilolo: Yowane kana kaleko meta gonogonowana doha peloweta Ilaisa kana kaleko (2 Kin 1:8).

** **3:9:** Kama kulutubu meta Abelahama: Abelahama meta iya Yaubada yona kaisunuwa tamowaina, yo iya unai Dius bodana se tubuma. Paliseya yo Sadusiya tamowaidiyao wa se tolobayao kadi kulutubu ne unai na se bom se kita'uyoidi meta siya Yaubada kana bodao.

** **3:11:** Kana sendolo ya baheidi: Teina ta meta heyayai tauhaina kana paisowa hesau, meta tamowai se saguidi kadi sendolo bikibikidi ne mainadi se yailidi na sendolo ne se haigabaeidi.

** **3:16:** Yaubada Yaluwana meta Yaluwa Tabuna.

1 Na kabo Yaluwa Tabuna Yesu ye laei balabalaena bena diyabolo iya ye nohoi.
 2 Menai ye kaihudi ye lau mayadai 40 yo boniyai 40, ede ye hasali. 3 Na taunohonoho wa ye laoma kalinaena ye wane, “Ena kowa Yaubada Natuna, ku hededelau weku ta udiyedi se hemala pwalawa.” 4 Na Yesu ye wane, “Yaubada kalinana unai ta hasili ye wane,

‘Tamowai taba nige pwalawa mo unai ye maumauli, na Yaubada yona hedehedede maudoidi udiyedi hinage ye maumauli.’ ” *(Dutelonomi 8:3)*

5 Na kabo diyabolo wa Yesu ye laei magai lakilakina tabuna** unai na ye saei Numa Tabuna kewana tehana saesaekalilina unai ye hetolo, 6 na ye hededelau unai ye wane, “Ena kowa Yaubada Natuna, kabo ku kamposidobi. Matawuwuna buka tabuna unai se kuli se wane,

‘Yaubada kabo ye hededelau yona anelu udiyedi na se kitahetete,

kabo nimadiyena se kabisinigo, na taba nige gonowana kaem ne ku koiyedi weku udiyedi.’ ” *(Same 91:11-12)*

7 Na Yesu ye hededebui ye wane, “Na hinage buka tabuna unai ta hasili meta ye wane, ‘Tabu Guiyau yom Yaubada ku lautonogi.’ ” *(Dutelonomi 6:16)*

8 Na kabo diyabolo wa Yesu ye laei kuduli saesaekalilina unai na tanoubu ta basileiyana maudoidi yodi namwanamwa saesaedi ye hekita 9 na ye wane, “Ena ku tulibono yo ku taba'ohu kaliguwai, kabo ginauli maudoidi ta ya haidiwa.”

10 Na Yesu ye wane, “Satani, ku tausuwala! Matawuwuna buka tabuna unai ye wane, ‘Guiyau yom Yaubada ye bom mo ku hekasisiyei, yo iya ye bom mo unai ku taba'ohu.’ ” *(Dutelonomi 6:13)*

11 Ede diyabolo wa Yesu ye laugabaei, na anelu se laoma Yesu se kitahetete.

Yesu ye hetubu ye lauguguya
(Maleko 1:14-15, Luka 4:14-15)

12 Huya hesau Yesu wasa ye lapui meta Yowane se haiyako na numatutugudu unai se tole. Ede Yudeya ye laugabaei na ye uyo Galili. 13 Nige ye uyo yona magai Nasaleta, na ye lau Kapelenauma unai ye miya, Galili Gabwana dedekanaena, meta Sebulona yo Napatali tehadiyena. 14 Unai saha Aisaiya peloweta ye hededeyako wa ye hemamohoiyei:

15 “Sebulona tanona yo Napatali tanona,

tanodiyao udiyedi keda ye dobi gabwa,

tano Galili Gabwana dedekanaena,

Yolidani sagasagana hali sanakawasina,

Galili tanona dagela tamowaidiyao yodi kabamiya,**

16 siya masigili unai taumiya wa meta mala lakilakina se kita, yo mwaloi logulogunaena taumiya kalidiyena mala ye sina.” *(Aisaiya 9:1-2)*

17 Tenem huyana ne unai Yesu ye hetubu ye lauguguya ye wane, “Kwa nuwabui, matawuwuna ede galewa basileiyana ye hanahanaumako.”

Yesu yona hekahekatao bagubagunadi ye yoganeidi
(Maleko 1:16-20, Luka 5:1-11, Yowane 1:35-51)

18 Huya hesau Yesu ye yona ye laulau Galili Gabwana dedekanaena ede tauyamayama labui ye kitadi yodi hinaya udiyedi se yamayama. Tamowaidiyao ede Simona – hesana hesau ede Petelo – ma kana kaha Andeleya. 19 Na ye yogadobi udiyedi ye wane, “Kwa saema kwa hemuliwatanigau, na kabo ya hekatagomiu tamowai tauyamayamaidi.”

20 Ede mahanana ne unai yodi hinaya wa se laugabaeidi na se saema se hemuliwatani.

** 4:5: Magai lakilakina tabuna ne meta Yelusalema.

** 4:15: Sebulona tanona yo Napatali tanona yo tano hedehedede maudoidi ne kaniyodi ede teha Galili tanona, na peloweta Aisaiya Galili tanona hesadiyao beyabeyadi udoi'udo'i ye kataidi.

²¹ Se tausigilau, na kabo Sebedaiyo ma natunao Yamesi yo Yowane ye kitadi yodi waga unai, yodi hinaya se polapolaidi. Na Yamesi ma kana kaha Yowane ye yoganeidi. ²² Mahanana ne unai tamadi yo yodi waga wa se laugabaeidi, na Yesu se hemuliwatani.

*Yesu taukasiyebwa ye henamwanamwadi
(Maleko 1:39 yo 3:7-12, Luka 6:17-19)*

²³ Yesu Galili maudoina ye tauhetakikili na yodi sunago udiyedi ye lauhekata. Yaubada yona basileiya wasana namwanamwana ye hededehehemasalahan, yo hinage tamowai kadi kasiyebwa udoi'udo'i ye henamwanamwadi. ²⁴ Yesu wasana Galili tehana maudoina ye tauhetakikili, yo hinage ye lau ee Siliya tanona maudoina unai. Na tamowai kadi kasiyebwa udoi'udo'i se laedima Yesu unai, kasiyebwa doha ta ukamkamna, yo yaluwa yabayababadi tamowai se luwuidi, yo ta ukikikikiwasi, yo hinage taubuni-buni, na ye henamwanamwadi. ²⁵ Na teha Galili, Dekapolisi,** Yelusalema, Yudeya, yo Yolidani sagasagana hali sanakawasina udiyedi bodalakilaki se laoma Yesu se hemuliwatani.

Yesu ye lauguguya kuduliyena

5

Mataiyo 5–7

*Tamowai yodi kabagwayuala mamohoidi
(Luka 6:20-23)*

¹ Na Yesu boda wa ye kitadi se laolaoma, ede maiyanao hekahekatao se sae kuduli hesau unai. Kabo ye tuli ² na ye hetubu ye hekatadi ye wane,

³ “Kaiteyadi se kitalau Yaubada yona sagu unai,**
siya gonowana se gwayuala,

matawuwuna galewa basileiyana meta siya yodi.

⁴ Kaiteyadi se doudou yo se nuwanuwayababa,

siya gonowana se gwayuala,

matawuwuna ede Yaubada kabo nuwadi ye hededehetaludi.

⁵ Kaiteyadi se nuwatalu,

siya gonowana se gwayuala,

matawuwuna ede tanoubu maudoina ta kabo siya yodi.

⁶ Kaiteyadi laulau namwanamwadiyao se henuwakaliliyeidi,

siya gonowana se gwayuala,

matawuwuna saha se henuwa wa kabo se lobai.

⁷ Kaiteyadi tamowai hekadiyo se katekamkamnaeidi,

siya gonowana se gwayuala,

matawuwuna Yaubada kabo ye katekamkamnaeidi.

⁸ Kaiteyadi nuwadi udiyedi se a'a,

siya gonowana se gwayuala,

matawuwuna ede Yaubada kabo se kita.

⁹ Kaiteyadi siya tamowai tauhenuhenuwadaumwalidi,

siya gonowana se gwayuala,

matawuwuna ede Yaubada kabo ye kawanatuyeidi.

¹⁰ Kaiteyadi siya laulau namwanamwadi debadiyena se hekamkamnadi,

siya gonowana se gwayuala,

** **4:25:** Dekapolisi kaniyona ede magari lakilakidi saudoudoi, yo iya hinage magari ne tehadi hesana. ** **5:3:** Se kitalau Yaubada yona sagu unai: Yesu yona hedehedede wa Mataiyo kalina Giliki unai ye kuli ye wane, Kaiteyadi se deha yaluwadiyao udiyedi. Teina meta Dius yodi hedehedede ye hededewatani. Kaniyona hesau ede, Kaiteyadi siya taunuwadobidobi, na kaniyona hesau ede lausoi ne unai ku hasili.

matawuwuna ede galewa basileiyana meta siya yodi.

¹¹ Ena tamowai se dilamataigomiu yo se hekamkamnagomiu yo hededelupolupo yabayababadi udoi'udo udiyedi se hededeheyababagomiu yau debaguyena, meta gonowana kwa gwauyala. ¹² Nuwamiu bena se namwa yo kwa gwauyala matawuwuna ede yomi kainauya ye lakikalili galewa ne unai. Kaniyona ede peloweta bagubagunadiyao wa se hekamkamnadi gonogonowana doha se hekamkamnagomiu ta.”

Kalita yo mala

(Maleko 9:50, Luka 14:34-35)

¹³ “Komiu tanoubu ta kalitana ede. Taba kalita ne kamnana ye gehe, meta nige gonowana ta hekalita'uyoi, yo nige kana paisowa hesau. Unai kabo se inigabae na tamowai se sae se dobi na se utu'utui.

¹⁴ Komiu tanoubu ta malana ede. Magai lakilakina hesau kuduli kewanaena malana nige gonowana se tolewadam. ¹⁵ Yo hinage taba lampa ta hekalasi, meta nige gonowana gulewa unai ta hebilikoi. Na ta tolesaei lampa kabatolena unai na numakalo ne unai tamowai maudoidi dawayana ne se kita. ¹⁶ Unai bena tamowai yomi laulau namwanamwadi se kitadi doha mala wa, yo tamamiu galewa ne unai se hedebasaei.”

Yesu laugagayo kaniyodi mamohoidi ye hededehemasalahadi

¹⁷ “Tabu yomi nuwatu ya laoma ta laugagayo yo peloweta yodi hedehedede wa bena ya hekaiyawasidi. Nige! Na ya laoma ta bena ya hemamohoiyeidi. ¹⁸ Ya hedede-mamohoi kalimiuyena: Galewa yo tanoubu kabo se gehe, na [*Yaubada yona*] laugagayo [*se kulidiko*] wa nige gonowana kulikulidi gagilina hesau ye taukwadalele, kana siga laugagayo hedehededen maudoidi se laoma se mamohoi. ¹⁹ Ena tamowai hesau laugagayo ta gagilina hesau ye utusi yo tamowai hekadi ye hekatadi bena laugagayo ta se utusi, Yaubada kabo iya ye tolehemulita galewa basileiyana unai. Na ena kaiteya laugagayo ta ye miyamiyaei yo tamowai hekadi ye hekatadi na se miyawatani, Yaubada kabo iya ye tolehebaguna galewa basileiyana unai. ²⁰ Ya hededelaowa kalimiuyena: Yomi laulau bena se dudulai yo se namwakalili na kabo siya Paliseya yo laugagayo taulauhekataedi. Ena nige, meta nige gonowana kwa lusae galewa basileiyana unai.”

Kouyalayala lauhekata

²¹ “Kwa lapuiyako meta Mose ye hededelau kada mumugao udiyedi ye wane, ‘Tabu ku kaiunu’,** yo hinage, ‘Ena tamowai hesau ye kaiunu meta iya kabo se laei tautolehedudulai tamowaidiyao udiyedi na se hekamkamna.’ ²² Na yau ya hededelaowa, ena hesau kana kaha ye kouyalayalaei meta iya taba se helauhetala. Na ena tamowai hesau kana kaha ye kawayauyaulei ye wane, ‘Kulum ne nige kaniyona!’, meta iya taba se laei Sunedeli bodana unai na se hekilaino. Na taba hesau kana kaha ye hededeheyababa ye wane, ‘Kowa tamowai yauyaulekalilina, yo Yaubada kana waiunu mamohoi!’, meta iya kabahekilainona ede kaiwa kalakalasina unai.

²³ Unai, ena kowa yom kainauya ku baheiyamako bena ku kaitalasamyei na nuwamyena ye saema meta [*kowa yom yababa hesau*] kam kaha hesau unai na ye kouyalayalaei, ²⁴ yom kainauya wa ku laugabaei kaitalasam kabagabuna dedekanaena, na ku lau kam kaha wa unai yom teha ku tolehedudulai na kabo ku uyoma yom kainauya wa ku kaitalasamyei.

²⁵ Ena [*kam hagahaga debanaena na*] kam waiunu ye koipiliyeigo na ye laego bena ku lauhetala, meta bena yomi lau ne unai na maidam kwa tolehedudulaimwamwayauei. Ena nige, kabo ye laego tauhelauhetala unai. Yo tauhelauhetala wa kabo ye moselaego yona taupaisowa unai na ye tolego numatutuguduyena. ²⁶ Ya hededemamohoi: Taba

** 5:21: Tabu ku kaiunu: laugagayona ne ede Esodo 20:13 unai.

nige se hepesago ye lau ee kana siga kam hagahaga monina gagilina** gehegehena ku hemaisagabaei.”

Ganawali lauhekata

²⁷ “Kwa lapuiyako meta beyabeyana Mose yona laugagayo unai ye wane, ‘Tabu ku ganawali.’** ²⁸ Na ya hededelaowa kalimiuwai: Ena kaiteya waihiu hesau ye kita na nuwanaena ye gadosisiyei bena taba maidana se keno, meta iya nuwana ne unai ye ganawaliko. ²⁹ Ena matakahatum ye woyalaego yababa unai, ku lamohai na ku gabaei. Ye namwa mo taba yaum hesau nigele na kabo taum maudoudoina ye lau kaiwa kalakalasina unai. ³⁰ Yo hinage ena nimakahatum ye woyalaego yababa unai meta ku bolihai ku gabaei. Ye namwa mo taba yaum hesau nigele na kabo taum maudoudoina ye lau kaiwa kalakalasina unai.”

Inawase lauhekata

(Mataiyo 19:9, Maleko 10:11-12, Luka 16:18)

³¹ “Mose ye wane, ‘Ena tamowai hesau mwanena bena ye inawasei meta kabo inawase pepwana ye kuli na ye mosei.’ ³² Na yau ya hededelaowa: Ena tamowai hesau mwanena nige ye ganawali na ye inawasegaibui, meta iya waihiu ne ye heganawali. Na ena tamowai hesau waihiu ina'inawasena ye tawasolai, meta iya hinage ye ganawali.”

Kaigwala lauhekata

³³ “Doha hinage kwa lapuiyako meta Mose ye hededelau kada mumugao udiyedi ye wane, ‘Tabu yom hededekaigwala hesau ku utusi, na yom kaigwala ku hededediko Yaubada unai meta bena ku ginauliwatanidi.’** ³⁴ Na yau ya hededelaowa: Tabu ku kaigwala! Tabu galewa hesanaena ku kaikaigwala, matawuwuna galewa meta Yaubada yona kabatuli. ³⁵ Yo tabu ku kaikaigwala tanoubu hesanaena, matawuwuna tanoubu ta iya Yaubada kaena kabatolena. Yo tabu ku kaikaigwala Yelusalema hesanaena, matawuwuna Yelusalema meta wasawasa saesaena yona magari. ³⁶ Tabu ku kaikaigwala kulum ne unai,** matawuwuna nige gonowana kulum ne maiyawana hesau ku heposiposi o ku hedubaduba. ³⁷ Ye namwa mo taba ku talam ku wane ‘Aa’, o ku uhala ku wane ‘Nige’. Ena saha hesau ku hededehagahagai'uyoi meta tauyababa unai ye laoma.”

Haigum lauhekata

(Luka 6:29-30)

³⁸ “Yo hinage kwa lapuiyako yomi taulauhekata se wane, ‘Ena matam kesega se koi-hegibu, kabo hinage taukoihegibuna ne matana kesega ku koihegibu, yo ena mwakam kesega se koihuhuhai hinage taukoihuhuhaina ne mwakana kesega ku koihuhuhai.’** ³⁹ Na yau ya hededelaowa: Tabu yababa tauginaulina ku laukwatakwataei. Ena tamowai hesau papalikahatum ne unai ye koi meta ku tolobui na teha hesau ne unai hinage ye koi. ⁴⁰ Ena tamowai hesau ye laego kwa lauhetala na kam luwuluwu nimakubwakubwana ne ye hai meta hinage kam luwuluwu nimalohalohana** ku mosei. ⁴¹ Ena iyala tamowaina hesau ye lauheliligo bena yona gogo ku baheidi keda

** **5:26:** Hagahaga monina gagilina meta kalina Giliki unai se wane, kodalansi. ** **5:27:** Tabu ku ganawali: Esodo 20:14 ku hasili. ** **5:33:** Kaigwala hedehededena meta Numela 30:2, Lewitikasi 19:12, Dutelonomi 23:21 udiyedi. ** **5:36:** Ku kaikaigwala kulum ne unai: Ena tamowai hesau kulunaena ye kaigwala, kaniyona meta yona mauli kabo ye mosegabaei, ena yona hedehedede ne nige ye mamohoi. ** **5:38:** Haigum hedehededena ede Esodo 21:24, Lewitikasi 24:20, yo Dutelonomi 19:21 udiyedi ku hasilidi. ** **5:40:** Luwuluwu nimakubwakubwana ye luwuluwu nimalohalohana: Yesu yona huyaena kwama labui se likwalikwadi. Luwuluwu nimakubwakubwana se likwabagunai, na luwuluwu nimalohalohana kewanaena se likwa na hinage se hepaisowa yodi kabobo.

kubwakubwana mo, ** meta bena ku baheidi ku lau kedalohaloha. ** 42 Ena tamowai hesau saha ye kaibwadai kalimyena meta bena ku mosei. Na ena tamowai hesau saha kalimyena ye sagenahagahagai meta tabu ku nuwahi, na bena ku mosei.”

Waiunu gadosisiyeina lauhekata
(Luka 6:27-36)

43 “Yo hinage kwa lapuiyako yomi taulauhekata se wane, ‘Keham ku gadosisiyei ** na kam waiunu ku hewaiunu.’ 44 Na yau ya hededelaowa kalimiuyena: Kami waiunu kwa gadosisiyeidi yo hinage tauhekamkamnagomiu yodi kwa tapwalolo. 45 Teina laulau ta unai kabo kwa hemala tamamiu galewa ne unai natunao mamohoidi, matawuwuna ede mahana ye hesina tamowai yabayababadi yo tamowai namwanamwadi udiyedi, yo hinage nabu ye hetalu tamowai namwanamwadi yo tamowai yabayababadi udiyedi. 46 Ena taugadosisiyeigomiu se bom mo kwa gadosisiyeidi, kabo kaniyona ede saha? Takisi tautanotano hinage se gadogadosisihineli. 47 Ena kehamiyao mo se bom kwa lautokihinelidi meta idohagi, bena yomi laulau ne se namwa na kabo tamowai hekadiyo ne? Matawuwuna dagela tamowaidiyao teina miya ta hinage se miyamiyaei. 48 Yomi miyamiya ne udiyedi bena kwa namwa yo kwa dudulaikalili, doha tamamiu galewa ne unai iya ye namwa yo ye dudulaikalili.”

6

Kaikainauya lauhekata

1 “Bena kwa kitanamwanamwa, tabu tamowai matadiyena yomi laulau namwanamwadi kwa ginaginulidi bena kabo se kitahenamwagomiu. Ena yomi laulau doha teina, meta tamamiu galewa ne unai taba nige kainauyana ye haiyawa.

2 Unai ena yomi kainauya kwa moseidi deha tamowaidiyao udiyedi meta tabu bwagigina kwa yuhi doha taukailupolupo yodi laulau sunago yo keda udiyedi, yodi kainauya se moseidi tamowai matadiyena bena kabo se kitadi yo se nokoedi. Ya hededemamohoi kalimiuyena: Siya yodi kainauya maisana ede se haiyako. 3 Ena yom kainauya ku mosei deha tamowaina hesau unai meta tabu ku hedede'uyoigo kam kaha hesau unai na bena kabim ye kata. 4 Na yom kainauya meta bena ku mosewadam. Na Tamam ginauli wadawadamdi taukitadi, iya kabo ye kainauyaigo.”

Tapwalolo lauhekata
(Luka 11:2-4)

5 “Na ena kwa tapwalolo, tabu yomi laulau doha taukailupolupo. Se henuwa bena kabo tamowai se kitadi, unai sunago kalodiyena yo hinage keda dedekadiyena se tolo na se tapwatapwalolo. Ya hededemamohoi kalimiuyena: Siya yodi tapwalolo maisana ede se haiyako. 6 Na ena ku tapwalolo, meta ku mwalae yom numa kalonaena, keda ku gudu na ku tapwalolo Tamam unai, iya ede teha wadawadamnaena yo teha maudoidi udiyedi taumiya. Na Tamam ginauli wadawadamdi taukitadi, iya kabo ye kainauyaigo.

7 Na ena kwa tapwalolo, tabu yomi hedehedede kwa laulaubodai'uyoidi, doha Yaubada nige kabina taukata yodi tapwalolo. Siya yodi nuwatu meta bena tapwalolo se heloha, na kabo yodi yaubada ye lapuidi. 8 Unai komiu yomi tapwatapwalolo tabu doha siya, matawuwuna ede ginauli sahasahadi udiyedi kwa deha ne Tamamiu kabidi ye katako na kabo kwa kaibwadaidi.

9 Unai taba komiu kwa tapwalolo doha teina:

‘Tamamai galewa ne unai! Kowa hesam ka hededetausaei.

** 5:41: Keda kubwakubwana mo: Loma yodi tau'iyala yodi dudulai meta gonowana tamowai se lauhelilidi bena yodi gogo se baheidi keda kubwakubwa. Keda ne lohana ede maela kesega, iya ede 1.5 kilomita. ** 5:41: Kedalohaloha: Yesu yona hedehedede wa meta maela labui. ** 5:43: Keham ku gadosisiyei: Hedehedede ta Lewitikasi 19:18 unai ku hasili.

¹⁰ Yom basileiya bena ye laoma. Yom nuwatu bena ka ginauliwatanidi tanoubu ta unai, doha galewa ne unai yom nuwatu se ginauliwatanidi.

¹¹ Mayadai ta kaina ku leyama.

¹² Yoma yababa ku nuwatugabaeidi, doha hinage kai tauheyababagai yodi yababa ka nuwatugabaeidi.

¹³ Bena ku kitahetetegai na taba nige ka lulau noho luwanaena, na tauyababa yona nuwatu udiyedi ku gilihaigai.' ” **

¹⁴ [*Tapwalolo wa ye hekatadi ye gehe kabo ye hedehehede'uyo ye wane,*] “Tauheyababagomiu yodi yababa bena kwa nuwatugabaeidi, kabo Tamamiu galewa ne unai hinage yomi yababa ye nuwatugabaeidi. ¹⁵ Na ena yodi yababa nige kwa nuwatugabaeidi meta hinage Tamamiu [*galewa ne unai*] taba nige yomi yababa ye nuwatugabaeidi.”

Kaihudi lauhekatana

¹⁶ “Ena kwa kaihudi, tabu kami kao doha taukailupolupo yodi laulau. Siya kadi kao se heyababadi bena tamowai se kitadi meta se kaihudi. Ya hededemamohoi kalimiuyena: Siya yodi kainauya ede se haidiko. ¹⁷ Na kowa huyana ku kaihudi meta bena ku matakabi, kulum ne ku heyausi yo ku suwali. ¹⁸ Unai kabo tamowai hekadi nige gonowana se kitalobaigo meta ku kaihudi, na Tamam teha wadawadamyena taumiya, iya ye bom mo kabim ye kata. Na Tamam ginauli wadawadamdi taukitadi, iya kabo ye kainauyaigo.”

Gogo lauhekatadi

(Luka 12:22-36 yo 16:13)

¹⁹ “Tanoubu ta unai tabu kwa kaipate bena taba kwa gogokalili. Gogo ne kabo se pwasa yo se tatagwaligwali, yo hinage taukaiwahali kabo se kaiwahalidi. ²⁰ Na taba kwa kaipate bena galewa ne unai kwa gogokalili. Temenai nige gonowana sulasula se kapulapaidi yo taba nige masi ye heyababadi, yo hinage taukaiwahali taba nige se kaiwahalidi. ²¹ Matawuwuna ede kaiteya teha unai yom gogo se miyamiya, meta nuwam ede temenai.

²² Matada meta siya tauda ta malana ede. Ena matada se dawaya meta kabo tauda maudoina ta ye dawaya. ²³ Ena matada se yababa ** meta tauda maudoina ta kabo ye masigili. Na ena ku nuwatui meta mala ede nuwamyena, na mala ne meta ye masigili, masigilina ne meta ye lakikalili.

²⁴ Nige gonowana tamowai hesau tanuwaga labui yodi ye paisowa. Hesau kabo ye subu na hesauna wa kabo ye henuwa. O nuwana bagubagunana wa yona nuwatu ye ginauliwatanidi ma nuwakohihaina, na hesauna wa ye kitadobidobiyei. Unai nige gonowana Yaubada yo moni yodi kwa paisowa.

²⁵ Unai ya hededelaowa kalimiuyena: Tabu kwa nuwanuwatukalili yomi mauli hesabana, bena saha kabo kwa kai yo kwa numa, yo taumi ta hesabana, saha kabo kwa likwa. Mauli ye saekalili na kabo kai, yo taumi ta ye saekalili na kabo kaleko! ²⁶ Hage, manuwa ne sola kwa kitadi, siya nige se kumakuma, yo nige se kelikeli, na nige kadi kai se tole sanalaena, na Tamamiu galewa ne unai, iya ye hekahekaidi. Na komiu meta kwa saekalili na kabo manuwa ne. ²⁷ Luwamiu ne unai kaiteya ye nuwanuwatukalili na unai gonowana kabo mahana kesega ye tolelaei yona mauli ne unai na ye heloha'uyoi?

²⁸ Na idohagi to kaleko kwa nuwanuwatukaliliyeidi? Sola koya pasadiyao ne kwa kitadi. Nige se paipaisowa yo nige kaleko se laulauginauli. ²⁹ Ya hededelaowa

** **6:13:** Kulikuli beyabeyadi hekadiyo lausoi 13 se tubei se wane, Matawuwuna ede basileiya kowa yom, yo gigibwali kowa yom, yo didiga kowa yom. Mamohoi! Nimakulikuli pepwadi bagubagunadi udiyedi hedehehede ta nige se kulidi. Iyamo huyana tapwalolo ta ta katai dubuyena kabo hedehehede ta hinage ta katai. ** **6:23:** Matada se yababa: Ena tamowai hesau ye bom mo ye nuwatu'uyoi, meta Dius tamowaidiyao se wane, iya matana se yababa.

kalimiuyena: Solomona yona wasawasa kalekodiyo nige hesau kana kao yona didiga doha tenem pasa ne. ³⁰ Ena Yaubada lagau ne kadi kao ye henamwadi, siya ede wau se lala na malaitom [*se wowoya na*] se gabudi se kalasi, meta iya gonowana kabo kaleko namwanamwadi udiyedi komiu ye hekalekogomiu. Komiu sunuma gagilidi tamowaidiyao! ³¹ Tabu nuwamiu se mode na kwa wane, ‘Malaitom kabo saha ka kai? O saha ka numa? Yo saha ka likwa?’ ³² Matawuwuna nige Yaubada tausunumaeina, siya meta kai yo gogo se henuwakaliliyeidi, na kami henuhenuwa maudoidi ta tamamiu galewa ne unai kabidi ye katako.

³³ Na komiu bena Yaubada yona basileiya nuwanuwatuna kwa tolebagunai yo hinage yona miyamiya dudulaidi kwa miyamiyaidi, na kabo ginauli maudoidi ta hinage ye haidiwa.

³⁴ Unai tabu malaitom modena unai kwa nuwanuwatukalili, matawuwuna malaitom kabo ye bom modena ye mode'uyo. Mayadai kesega kesega ye bom mo polohena.”

7

Kitahineli lauhekatana (Luka 6:37-38,41-42)

¹ “Tabu kitahekasa ku ginauli o kowa hinage kabo kam hekasa ku lobai. ² Matawuwuna Yaubada kabo ye hineligo doha tamowai hekadi ku hinelidi ne, na laugagayo saha ku hepaisowa kalidiyena wa kabo hinage Yaubada ye hepaisowa kalimwai.

³ Ye saha to kam kaha matana mukalina ku kaikaikewai, na kowa matam ne unai kaiwa mwayana ne nige ku modei? ⁴ Idohagi to ku hededelau kam kaha unai bena matana mukalina ku haigabaei, na matam ne unai kaiwa mwayana ede sola ma miyana? ⁵ Kowa taukailupolupo mamohoi, matam ne unai kaiwa mwayana ne ku haigabaeibagunai na matam ne ye nega, kabo kam kaha matana mukalina ne ku kitanamwanamwaei na ku haigabaei.

⁶ Ginauli tabudi tabu kwa moselaeidi kedewa udiyedi yo yomi giniuba tabu kwa gabalaeidi puwaka udiyedi. Ena ku gabalaeidi, kabo puwaka wa giniuba ne se utukalalateidi bwatano ne unai, yo kedewa wa kabo se gelobui na se kalasigomiu.”

**

Kaibwada Yaubada unai (Luka 11:9-13)

⁷ “Kwa kaibwada [*Yaubada unai*], kabo saha kwa kaibwadai wa ye leyawa. Kwa wase, na kabo [*saha kwa wasewasenei wa Yaubada ye saguigomiu na*] kwa lobai. Yo hinage [*keda guduna unai*] kwa koikoi, kabo keda ye sokeyawa. ⁸ Matawuwuna ede taukaikaibwada saha se kaibwadai wa kabo se hai, yo tauwasewase saha se wasenei wa kabo se lobai, yo taukoikoi ne kalinawai meta keda kabo ye soke.

⁹ Komiu [*sina yo tama*], ena natumiye ye kaibwada pwalawa kabo weku kwa mosei? ¹⁰ O ena ye kaibwada yama, kabo mwata kwa mosei? ¹¹ Komiu tamowai yabayababadi, iyamo gonowana kabo ginauli namwanamwadiyo kwa moseidi natumiyao udiyedi. Na tamamiu galewa ne unai ye nonohakalili kabo kainauya namwanamwadi ye moseidi taukaibwada ne udiyedi.”

Mose yona laugagayo maudoina kaniyona

¹² “Unai, laulau sahasahadi kwa henuwadi bena tamowai se ginaulidi kalimiuyena meta komiu hinage kwa ginaulidi siya kalidiwai. Teina ta Mose yo peloweta yodi lauhekata maudoina kaniyona ede.”

** **7:6:** Ginauli tabudi yo giniuba meta Yaubada yona hedehedede namwanamwadi, na kedewa yo puwaka ne, siya ede tamowai nige gonowana Yaubada yona hedehedede ne se hekasisiyeidi.

Keda labui hedeheedededi
(Luka 13:24)

¹³ “Kawakeda gagilina unai kwa lusae. Matawuwuna keda ye lau kabakamkamna magaina unai meta ye masalaha yo kawakedana ye laki, unai tamowai se bado keda ne se hemuliwatani. ¹⁴ Na mauli kedana meta ye giligili yo kawakedana ye gagili, unai tamowai hisa mo se lobai na unai se lau.”

Pelowetalupolupo kadi kao
(Luka 6:43-44)

¹⁵ “Kwa kitanamwanamwakalili pelowetalupolupo udiyedi. Mamoe kadi kaoyena se laowa kalimiuyena, na iyamo kadi kao mamohoina meta siya doha kedewanukula kaikaikalasidiyao. ¹⁶ Siya laulau saha se miyamiyaedi ne udiyedi kabo kwa kitalobaidi. Nige gonowana tamowai hesau maimaina gwaligwalina unai wine kaniyona ye gigi, yo hinage nige gonowana kaiwa gwaligwalidi udiyedi bosibosi kaniyona ye gigi. ¹⁷ Yo hinage kaiwa yababana kaniyona meta kaikailewa, na kaiwa namwanamwana kaniyona meta kaikaina. ¹⁸ Kaiwa namwanamwana unai taba nige kaiwa yababana kaniyona ta lobai, yo hinage kaiwa yababana unai taba nige kaiwa namwanamwana kaniyona ta lobai. ¹⁹ Ena taba kaiwa hesau kaniyona nige se namwa meta kabo se koigabaei na se tulaei kaiwa kalakalasina unai. ²⁰ Unai kaiwa kabakitalobaina ede kaniyona udiyedi.

²¹ Tamowai se bado se hededelaoma kaliguwai se wane, ‘Guiyau, Guiyau!’, na iyamo nige gonowana maudoidi se lusae galewa basileiyana, na tamagu galewa ne unai yona nuwatu kaiteyadi se ginauliwatanidi, siya se bom mo kabo se lusae. ²² Hekasa mayadaina ne unai meta boda kabo se wane, ‘Guiyau, Guiyau, hesamyena ka hede-edepeloweta, yo hesamyena demoni ka hedehepesadi, yo hinage hesamyena laulau gigigigibwalidi ka ginaulidi.’ ²³ Kabo ya hededelau kalidiyena ya wane, ‘Nige kabimiu ya kata, kwa tausuwala, komiu yomi laulau se yababakalili.’ ”

Kabakabinuma labui hedeheedededi
(Luka 6:46-49)

²⁴ “Unai, kaiteya yogu hedeheededede ta ye lapuidi na ye miyawatanidi meta iya doha tamowai sibasibana weku kewanaena ye kabinuma. ²⁵ Na kabo nabu ye talu, kabaita ye didi, yo hinage yaumai ye towa na numa wa ye nukunuku, na nige ye guli, matawuwuna ede numa wa weku kewanaena ye hetolo. ²⁶ Na kaiteya yogu hedeheededede ta ye lapuidi na nige ye miyawatanidi meta iya doha tamowai yaulyaulena, malanaganagaliyena yona numa ye hetolo. ²⁷ Na kabo nabu ye talu, kabaita ye didi yo yaumai ye towa ede numa wa ye nukuhuguli yo ye tatagwaligwali.”

²⁸ Yesu yona lauhekata maudoidi wa gehediyena meta boda wa se noko, ²⁹ matawuwuna ede yona lauhekata wa meta ma gigibwalina, nige doha laugagayo taulauhekataeina tamowaidiyao.

8

Yesu taulepela ye henamwanamwa
(Maleko 1:40-45, Luka 5:12-16)

¹ Yesu kuduli wa unai ye lauhekatagehe ede maiyana hekahekatao se lidi se dobi na boda se laoma se hemuliwatani. ² Na kabo tamowai hesau lepela kalinawai ye laoma ye tulibono na ye hededelau Yesu unai ye wane, “Guiyau, ena ku henuwa, kabo yom gigibwali unai gonowana ku he'a'agau.” ³ Na Yesu ye kabilau tamowai wa unai na ye wane, “Ya henuwa, ku a'a!” Mahanana ne unai lepela wa ye ulugehe na tamowai wa ye a'a. ⁴ Kabo Yesu ye hededelau unai ye wane, “Tabu tamowai hesau yona ku hedeheededede! Na ku lau, yom kaitalasam ku hai doha Mose yona laugagayo unai ye hededeyako wa

na ku bahelaei taukaitalasang unai ku mosei yo hinage ye kitago, ** unai kabo tamowai se kitalobai meta ku namwanamwako.”

*Iyala taubagunaena tamowaina yona sunuma
(Luka 7:1-10, Yowane 4:43-54)*

⁵ Huyana Yesu ye lage Kapelenauma unai meta Loma yodi iyala taubagunaena tamowaina hesau ye laoma Yesu unai ye kaibwadasagu ⁶ ye wane, “Guiyau, yogu taupaisowa hesau meta ye kasiyebwa na tauna meta se kamkamnakalili nige gonowana tauna ye hetetelidi, iya ede numaena ye kenokeno.” ⁷ Ede Yesu ye wane, “Kabo ya laowa ya henamwanamwa.” ⁸ Na iyala taubagunaena tamowaina wa ye wane, “Guiyau, nige ya namwa na bena ku laoma yogu numaena. ** Na taba ku hedehedede mo kabo yogu taupaisowa ne ye namwanamwa. ⁹ Matawuwuna yau hinage meta kagu tanuwaga yona gigibwali gunina unai, yo yau hinage tau'iyala tauwoyaidi. Ya hededelau hesau unai ya wane, ‘Ku lau’, meta ye lau. Na hesau unai ya wane, ‘Ku laoma’, meta kabo ye laoma. Yo ya hededelau yogu heyayai tauhaina unai ya wane, ‘Paisowa ne ku ginauli’, meta ye ginauli.”

¹⁰ Yesu hedehedede wa ye lapuidi meta ye nokokalili. Na ye hededelau tauhemuliwatanina bodana wa udiyedi ye wane, “Mamohoikalili, ya hededelaowa kalimiuyena, Isalaela unai nige tamowai hesau ya kita yona sunuma bayabayaona doha teina! ¹¹ Na ya hededelaowa kalimiuyena, teha bolime yo teha yalasi udiyedi boda ** kabo se laoma na Abelahama, Isako yo Yakobo maiyadiyao se tuli galewa basileiyana kaikaigogona unai. ¹² Na galewa basileiyana ne [*Yaubada ye kabinonohai meta Isalaela tamowaidiyao hesabadi, na iyamo*] tamowaidi kabo ye tolelaeidi masigili magaina unai. Temenai kabo se doudou yo kawadi se kapuyahisidi.” ¹³ Na Yesu kabo ye hededelau iyala taubagunaena wa unai ye wane, “Yom sunuma ne debanaena yom taupaisowa ne kabo ye namwanamwa, na ku lau yom magari.” Mahanana ne unai yona taupaisowa wa ye namwanamwa.

*Yesu taukasiyebwa ye henamwanamwadi
(Maleko 1:29-34, Luka 4:38-41)*

¹⁴ Na kabo Yesu ye lau Petelo yona numa unai na Petelo bwasiyana sinebada ye kita meta tauna se gwagwama yo ye kasiyebwa na ye kenokeno. ¹⁵ Ye kabilau sinebada wa nimana unai meta kasiyebwa wa ye gehe na sinebada wa ye namwanamwa, ede ye kabinonoha na Yesu ye haitalai.

¹⁶ Meimeilahina ne unai mahana ye dui na kabo tamowai yaluwa yabayababadi se tanuwagaidi wa se woyaidima na yaluwa yabayababadi wa ye hededehepesadi. Yo taukasiyebwa maudoidi ye henamwanamwadi. ¹⁷ Teina laulau gigigigibwalidi ye ginaulidi ta unai meta Yaubada kalinana peloweta Aisaiya ye hededediko wa ye hemamohoiyeidi doha ye wane,

“Iya meta yoda basabasa maudoidi ye haigabaeidi
na kada kasiyebwa ye henamwanamwadi.”

(Aisaiya 53:4)

*Tamowai labui bena Yesu se hemuliwatani
(Luka 9:57-62)*

¹⁸ Yesu boda wa ye kita meta ye laki ye laulau, unai ye hededelau yona hekahekatao wa udiyedi meta bena se kawasilau Galili Gabwana hali sanakawasina ne unai. ¹⁹ Na kabo laugagayo taulauhekataena hesau ye laoma Yesu unai na ye wane, “Taulauhekata,

** **8:4:** Henamwanamwa laugagayona ta hasili Lewitikasi 14:2-4 unai. ** **8:8:** Nige ya namwa na bena ku laoma yogu numaena: Iyala taubagunaena tamowaina wa, iya nige Dius tamowaina, na Dius yodi lauhea'a kabikabidi kabidi ye kata. Yodi laugagayo hesau ede, ena Dius tamowaina ye lulau dagela tamowaina yona numa unai, kabo ye biki. Na hekasisidi debanaena ede ye hedede, nige ya namwa bena ku laoma kaliguwai. ** **8:11:** Boda ta, siya meta dagela tamowaidiyao, nige Dius tamowaidiyao.

yom kabalau maudoidi udiyedi yau kabo ya hemuliwatanigo.”²⁰ Na Yesu ye hededebui ye wane, “Kedewa nukula yodi duha, yo hinage manuwa yodi noi, na Tau Natuna nige yona kabakaiyawasi mamohoina hesau.”

²¹ Na tauhemuliwatanina hesau ye hededelau Yesu unai ye wane, “Guiyau, taba gonowana ya uyo magari na tamagu toletoletauna ya kitabagunaei?”^{**} ²² Na Yesu ye hededelau unai ye wane, “Kowa ku hemuliwatanigau, na kaiteyadi se boitako meta siya bena kehadi tauboita ne se lae bwayabwaya unai se tole.”^{**}

Yesu wowoli ye hededebedaumwali

(Maleko 4:35-41, Luka 8:22-25)

²³ Na kabo Yesu maiyana hekahekatao se dobi wagaena se gelu na Galili Gabwana wa unai se kawasi. ²⁴ Yesu waga wa unai ye kenoko na makesega kabo wowoli ye lage na waga wa bagodu se ini'inipuluhi. ²⁵ Unai yona hekahekatao wa iya se hanoi na se wane, “Guiyau, ku hesaguhaida! Nige bayaona kabo ta yoli!” ²⁶ Na Yesu ye hededelau udiyedi ye wane, “Idohagi to kwa matausi? Yomi sunuma taki se gagili!” Ede ye tolo na ye hededebayao yaumai yo bagodu wa udiyedi, meta yaumai wa ye kaiyawasi na gabwa wa ye daumwali. ²⁷ Unai yona hekahekatao wa meta se nokokalili na se wane, “Teina meta tamowai sahasahana? Ede yaumai yo bagodu, iyamo iya se kawakabiyei.”

Tamowai labui udiyedi yaluwa yabayababadi Yesu ye hededehepesadi

(Maleko 5:1-20, Luka 8:26-39)

²⁸ Kabo Yesu ye dunasae Gadala^{**} tamowaidiyao yodi teha unai. Tenem teha ne unai meta tamowai labui, yaluwa yabayababadi siya se luwuidi. Yodi laulau se yababakalili ede nige gonowana tamowai hesau ye lau temenai. Yodi kabamiya meta tamowai yodi kabatoletedi duhadiyao, udiyedi se pesa se laoma Yesu se hailobai. ²⁹ Se yogalau unai se wane, “Yaubada Natuna, saha ku henuwa kalimaiyena? Yaubada yona kaisunuwa mayadaina meta sola nige ye lage, na ku laoma ta bena ku hekamkamnanonohaigai?”

³⁰ Na tehalaudi wa unai meta puwaka yawoina se dumudumuli. ³¹ Ede demoni wa se wane, “Ena ku hededehepesagai, taba gonowana ku hetamaligai na ka lau puwaka ne udiyedi ka luwu?” ³² Unai Yesu ye hededelau demoni wa udiyedi ye wane, “Kwa lau!” Ede tamowai wa se pesagabaeidi na puwaka wa udiyedi se luwu. Kabo puwaka wa padipadi wa unai se heloigogoi se dobi Galili Gabwana wa unai se mwaloigogoi. ³³ Na puwaka wa taukitahetedi se wasabu se lau Gadala magaina lakilakina unai na saha ye tubu wa yo hinage tamowai labui wa wasadi se hedehedeidi. ³⁴ Ede magari wa tamowaidiyao maudoidi se laoma Yesu unai. Na huyana iya se kita meta se kaibwadai bena taba yodi magari tanona ne ye laugabaei.

9

Yesu taubunibuni hesau ye henamwanamwa

(Maleko 2:1-12, Luka 5:17-26)

¹ Yesu waga hesau unai ye gelu na ye kawasi'uyo yona magari Kapelenauma. ² Menai tamowai hekadiyo tau hesau bunibunina diyadiyali unai se baheiyama iya unai. Yesu yodi sunuma ye kita na ye hededelau taubunibuni wa unai ye wane, “Natugu! Ku nuwabayao, yom yababa ya nuwatugabaeidi.”

³ Na laugagayo taulauhekataedi hekadiyo se bom se gadigadigugu se wane, “Teina tamowai ta meta Yaubada ye hededeheyaheyababa.”

^{**} **8:21:** Tamagu toletoletauna ya kita: Toletoletau hededehehemalahana ku hasili. ^{**} **8:22:** Kaiteyadi se boitako: Siya ede yaluwadiyena se boitako, kaniyona ede nige se modelau Yaubada unai yo Yesu nige se sunumaei. Kehadi tauboita ne meta bulumaena tauboita. ^{**} **8:28:** Gadala: Kulikuli beyabeyadi hekadi hesa udoi se kuli, iya ede Gelasa (doha Maleko 5:1 yo Luka 8:26 udiyedi). Gadala yo Gelasa magaidi meta Galili Gabwana teha yawana unai, Gadala gabwa dedekanaena, na Gelasa kedaloa.

⁴ Yodi nuwanuwatu wa Yesu kabidi ye kata ede ye hededelau udiyedi ye wane, “Idohagi na nuwanuwatu yababadi kwa nuwanuwatuidi. ⁵ Hedehedede sahasahana ye biga ede, ya wane, ‘Yom yababa wa ya nuwatugabaeidi’, o, ya wane, ‘Ku tolo na ku laulau’? ⁶ Ya henuwa bena kabina kwa kata meta Tau Natuna iya kaiyaulina ta unai yona gigibwali gonowana yababa ye nuwatugabaeidi.” Ede ye hededelau taubunibuni wa unai ye wane, “Ku tolo, yom dam ne ku bahei na ku lau yom numa.” ⁷ Ede tamowai wa ye tolo na ye lau yona magari.

⁸ Laulau saha ye tubu wa boda se kita meta se silyata na Yaubada se hedebasaei, matawuwuna gigibwali wa ye mosei tamowai udiyedi.

Yesu Mataiyo ye yoganei
(Maleko 2:13-17, Luka 5:27-32)

⁹ Yesu magari wa ye laugabaei ye laulau, na takisi tautanotano hesau hesana Mataiyo ye kita takisi kabatanotano numana unai ye tutuli. Ye hededelau unai ye wane, “Ku hemuliwatanigau.” Ede Mataiyo ye tolo na ye hemuliwatani.

¹⁰ Na muliyena ede se lau Mataiyo yona numa unai na se kaikai. Na takisi tautanotano bodadi yo hinage yababa tamowaidi hekadiyo se laoma Yesu yo yona hekahekatao wa maiyadiyao se kaikaigogoi. ¹¹ Paliseya tamowaidiyao se kitadi ede yona hekahekatao wa se henamaiyeidi, “Idohagi to tauhekatagomiu ne takisi tautanotano yo yababa tamowaidi ne maidanao se kaikaigogoi?” ¹² Yodi hedehedede wa Yesu ye lapui na ye hededebui ye wane, “Taukasikasiyebwa mo se henuwa doketa, na tamowai namwanamwadi meta nige. ¹³ Na kwa lau teina hedehedede ta kaniyona kwa wasenei: ‘Katekamkamna mo ya henuwa,

na nige kaitalagam.’

(Hoseya 6:6)

Yogu laoma ta meta nige tamowai yodi miyamiya dudulaidi hesabadi, na yababa tamowaidi bena ya yogaisinidi.”

Kaihudi henamaina
(Maleko 2:18-22, Luka 5:33-39)

¹⁴ Na kabo Yowane Babatiso yona hekahekatao se laoma Yesu se henamaiyei, “Idohagi to kai yo Paliseya tamowaidiyao ka kaihuhudi, na tauhemuliwatanigo nige se kaihuhudi?” ¹⁵ Yesu ye hededebui ye wane, “Idohagi to tautawasola kana taumana yona tawasola kaikaigogona unai bena se nuwadubu? Iyamo sola mayadaina kabo ye laoma tautawasola kabo kalidiyena se laeihesuwala na kehanao ne kabo se kaihudi.

¹⁶ Nige gonowana tamowai hesau kaleko hauhauna tupwana unai kwama beyabeyana ye polai, matawuwuna kaleko hauhauna tupwana ne kabo kwama beyabeyana ne ye tabepulisi na tapulisina ne meta kabo ye lakikalili.

¹⁷ Yo hinage tamowai nige gonowana waina hauhauna se ini waina pakuna beyabeyana unai. Taba waina hauhauna se ini paku beyabeyana unai, kabo paku ne ye tapulisi, na waina wa kabo ye bwalili. Unai waina hauhauna ta ini waina pakuna hauhauna unai, kabo se namwanamwalabulabui.”

Yesu sinebada yo sinekuku ye henamwanamwadi
(Maleko 5:21-43, Luka 8:40-56)

¹⁸ Yesu sola ma hedehededena, na magari wa yodi sunago badana hesau ye laoma Yesu matanaena ye tulibono na ye wane, “Natugu waihiu kaboina ta ye boita, na ku laoma nimam ku tolesae iya kewanaena, kabo ye mauli.” ¹⁹ Ede Yesu yo yona hekahekatao wa se tolo na maiyadi se lau.

²⁰ Se laulau, na kabo sinebada hesau kwasina ye miyamiyagabaei bolimai saudoudoi-labui, iya Yesu dagelana ne unai ye laoma na kana kwama sinosinona ye kabitonogi.

²¹ Yona nuwanuwatu unai ye wane, “Taba kana kwama mo ya kabitonogi, kabo ya namwanamwa.” ²² Na Yesu ye kitabui sinebada wa ye kita ede ye hededelau unai

ye wane, “Natugu, nuwam ye bayao! Yom sunuma ta ye henamwanamwago.” Na mahanana ne unai waihiu wa ye namwanamwa.

²³ Sunago badana wa yona numa unai se lage ede tauhigohigo** yo taudoudou bodadi se kitadi, ²⁴ na Yesu ye hededelau udiyedi ye wane, “Kwa pesa! Sinekuku me nige ye boita, na ye keno mo.” Na se talatalawasiyei.

²⁵ Boda wa ye hetamalidi se pesagehe kabo Yesu ye mwalaie sinekuku wa yona kabakeno wa unai na ye kabilau nimana wa unai, ede ye tolo. ²⁶ Na wasana wa ye lau tenem teha ne maudoina unai.

Yesu taumatagibugibu labui ye henamwanamwadi

²⁷ Yesu sunago badana yona numa wa ye laugabaei ye laulau na taumatagibugibu labui se tolo na se hemuliwatani na se yogayoga se wane, “Dawida natuna! Ku katekamkamnaegai!” ²⁸ Na ye mwalaesae yona kabamiya numana unai na taumatagibugibu wa se laoma iya unai. Na ye henamaiyeidi ye wane, “Kwa kawamamohoi meta gonowagu ya henamwanamwagomiu?” Se wane, “Guiyau, ka kawamamohoi!” ²⁹ Kabo matadi ye kabitonogidi na ye wane, “Saha kwa kawamamohoiyei wa kabo ye tubu kalimiuyena.” ³⁰ Ede matadi wa se lala. Na Yesu ye laugagayoidi ye wane, “Tabu tamowai hesau yona kwa hedehehede!” ³¹ Na iyamo muliyena se lau ede Yesu wasana wa se helaki tenem teha maudoina ne unai.

Yesu tamowai una'unana ye henamwanamwa

³² Taudi labui wa se hetubu se dalahai, na tatao hekadi kadi kaha hesau se woyaiyama Yesu unai. Yaluwa yabayababana meta ye luwu tamowai wa unai, ede ye una'unana. ³³ Na Yesu yaluwa yabayababana wa ye hedehehepesa, ede tamowai una'unana wa ye hedehehede. Na boda se noko se wane, “Nige sola laulau hesau doha teina ka kita Isalaela unai!” ³⁴ Na Paliseya tamowaidiyao se wane, “Yaluwa yabayababadi kadi tanuwaga yona gigibwaliyena yaluwa yabayababadi ye hedehehepesadi.”

Yesu tamowai ye katekamkamnaedi

³⁵ Kabo Yesu ye lau magari lakilakidi yo kasa gagilidi ye tauhetakikilidi. Na ye lauhekata yodi sunago udiyedi yo Yaubada yona basileiya wasana namwanamwana ye wasaduwayei, yo hinage tamowai kadi kasiyebwa udoi'udoj ye henamwanamwadi. ³⁶ Na boda wa ye kitadi ede ye katekamkamnaedi, matawuwuna pilipili udoi'udoj se hekalodi na nige tausaguidi, kadi kao doha mamoe nige taukitahetetedi. ³⁷ Na ye hededelau yona hekahekatao wa udiyedi ye wane, “Koya ne ye masulikalili, na taupaisowa meta nige se bado. ³⁸ Unai kwa kaibwadalau masuli guiyauna unai na kabo koya ne taupaisowaina ye hetamalidima.”

10

Yesu yona hekahekatao saudoudoi-labui ye hetamalidi se lau se lauwasi (Maleko 3:13-19 yo 6:7-13, Luka 6:12-16 yo 9:1-6)

¹ Yesu yona hekahekatao saudoudoi-labui wa ye yogagogoidima na gigibwali ye mo-seidi bena yaluwa bikibikidi se hedehehepesadi yo tamowai kadi kasiyebwa udoi'udoj se henamwanamwadi. ² Taupaisowa ye hetamalidi wa hesadiyao ede teina:

Bagubagunana ede Simona, hesana hesau meta Petelo, yo kana kaha Andeleya.
Yamesi Sebedaiyo natuna, yo kana kaha Yowane.

³ Pilipo yo Batolomaiyo,
Tomasi yo Mataiyo, iya takisi tautanotano,
Yamesi Alepaiya natuna, yo Tadaiyo,

⁴ Simona Tauhaikabi, yo Yudasi Isakaliyota, Yesu kana tauwalohai.

** 9:23: Tauhigohigo: Dius yodi kabikabiyena higo se yuhidi meta huyagwayala yo huyanuwadubu udiyedi.

⁵ Tatao saudoudoi-labui wa Yesu ye guguyaidi na ye hetamalidi ye wane, “Tabu kwa laulau dagela tamowaidiyao yo Samaliya tamowaidi yodi magari udiyedi, ⁶ na kwa lau Isalaela tamowaidiyao mo udiyedi, siya doha mamoe gegegegediyao. ⁷ Kwa lau na kwa wasaduwai kwa wane, ‘Galewa basileiyana ye hanahanaumako.’ ⁸ Taukasikasiyebwa kwa henamwanamwadi, tauboiboita kwa hemaui'uyoidi, taulepelepela kwa he'a'adi,** yo yaluwa yabayababadi kwa hededehepesadi. Kainauya ta kwa haimoei nige maisana, unai kwa kainauyaei, tabu maisana. ⁹⁻¹⁰ Tabu moni gole o siluba o kopa kwa baheidi, yo tabu tobwa, kwama, buti, yo tuke kwa laulaubaheidi yomi lau ne unai. Matawuwuna taupaisowa yona dudulai ede taba tamowai iya se sagui kai [yo gogo] udiyedi.

¹¹ Ena magari hesau unai kwa lage meta tamowai namwanamwana hesau kwa wasenei na yona numa unai kwa miya kana siga kwa dalahai. ¹² Huyana kwa mwalaesae numa ne unai meta yomi lautoki kwa mosei kwa wane, ‘Nuwadaumwali kwa hai!’ ¹³ Ena numa ne tamowaidiyao se namwa, meta yomi nuwadaumwali ne kwa tole kalidiyena. Ena nige se namwa, meta yomi nuwadaumwali ne kwa hai'uyoi. ¹⁴ Ena magari hesau nige se yogaisinigomiu o se lapulaowa kalimiuyena, meta kaemiu mukalidi kwa koinihinihiyeidi** na numa o magari ne kwa laugabae. ¹⁵ Ya hededemamohoi kalimiuyena: Yaubada yona hekasa mayadaina ne unai meta kadi hekamkamna se lakikalili, na kabo Sodoma yo Gomola.”

Huya matada ne unai kabo hewaiunu kwa hekalo

(Maleko 13:9-13, Luka 21:12-17)

¹⁶ “Ya hetamaligomiu ta kami kao doha mamoe se lulau kedewa kaikaikalasidiyao udiyedi. Unai bena kwa sonoga doha mwata, yo tabu yababa hesau kalimiuyena, doha bunebune. ¹⁷ Bena kwa kitakitanamwanamwa, tamowai kabo se laegomiu magari babadadiyao udiyedi, yo sunago udiyedi kabo se pidiligomiu. ¹⁸ Yau debaguyena kabo se haigomiu na se laegomiu gabana yo wasawasa matadiyena, bena kwa hemala [galewa basileiyana wasana] tauhededehemasalahana siya yo dagela tamowaidiyao udiyedi. ¹⁹ Na huyana se haigomiu na se helauhetalagomiu meta tabu kwa mode bena saha yo idohagi kabo yomi hedehedede. Huyana ne unai kabo hedehedede se masalaha. ²⁰ Matawuwuna hedehedede kwa hedededi ne meta nige komiu, na Tamamiu Yaluwana ye hemasalahadi kalimiuyena na kwa hedededi.

²¹ Tamowai kabo yona saeya kana ye walohai, yo tama kabo natuna kana ye walohai. Natu kabo se tolo na sinadiyao yo tamadiyao se hewaiunudi na se mosegabaeidi na se unuhemwaloidi. ²² Tamowai mauidi kabo se subugomiu yau debaguyena. Na kaiteya ye miyatahitahi kana siga gehena unai, iya kabo maui ye lobai. ²³ Ena magari hesau unai se hewaiunugomiu meta kwa yabubu kwa lau magari hesau. Hedehedede ta meta mamohoi, yo hinage ya hededelaowa meta nige gonowana Isalaela magariyao kwa lauhegehedi na kabo Tau Natuna ye uyoma. ²⁴ Nige gonowana wawaya hesau ye saekalili na kabo tauhekatana. Yo hinage nige gonowana taupaisowa ye saekalili na kabo kana tanuwaga. ²⁵ Ena wawaya ye sonoga doha tauhekatana meta ye namwa, yo ena taupaisowa se kabi doha kana tanuwaga, meta ye namwa. Ena numa tanuwagana** se hedede meta iya yaluwa yabayababadi kadi tanuwaga Belesebulu, kabo yona numa tamowaidiyao ne** hinage se hededeheyababakaliliyeidi.”

Kaiteya bena kwa mausiyei

(Luka 12:2-9)

** **10:8:** Taulepelepela hededehehemasalahanana meta Lepela hedehededena ku hasili. ** **10:14:** Kaemiu mukalidi kwa koinihinihiyeidi hededehehemasalahanana ede mukali hedehededena unai. ** **10:25:** Numa tanuwagana meta Yesu ye bom ye hedehedede'uyoi. ** **10:25:** Yona numa tamowaidiyao ne, siya ede Yesu yona hekahekatao yo tauhemuhemuliwatanina hekadiyo.

²⁶ “Unai, tabu kwa matausiyeidi! Ginauli wadawadamdi maudoidi meta kabo se masalaha, yo nuwanuwatu wadawadamdi maudoidi Yaubada kabo ye tolehemasalaha. ²⁷ Boniyaiyena saha ya hedededi wa kabo kwa hedede'uyoidi mayadaiyena, yo saha beyamiuyedi ya hededegadigadiguguyedi wa kabo numa kewadi udiyedi kwa hededehelakidi.

²⁸ Tabu buluma tauhemwaloina kwa matausiyeidi, na siya nige gonowana yaluwa se hemwaloi. Na Yaubada mo bena kwa matausiyei, matawuwuna iya gonowana buluma yo yaluwa ye unuhemwaloidi kaiwa kalakalasina unai.

²⁹ Pene kesega** unai gonowana pekopeko labui ta hemaisadi. Iyamo Tamamiu galewa ne unai, iya ye nuwatukaliliyeidi. Taba hesau ye beku, meta kabina ye kata.

³⁰ Yo hinage kulumiu maiyawadi meta ye hasilidiko. ³¹ Unai tabu kwa matausi. Komiu kwa saekalili na kabo pekopeko yawoina.

³² Kaiteya ye hededehehemasalaha'uyoi tamowai matadiyena meta iya tauhemuliwatanigau, kabo yau hinage ya hededehehemasalaha Tamagu galewa ne unai matanaena meta iya yogu tamowai. ³³ Na kaiteya ye uhalaegau boda udiyedi, kabo hinage yau ya uhalaei Tamagu galewa ne unai matanaena.

³⁴ Tabu yomi nuwatu bena ya laoma ta nuwadaumwali ya laeyama kaiyaulina ta unai. Nige! Na ya laoma ta meta kelepa** ya baheyama. ³⁵ Ya laoma ta bena ‘tau kabo tamana ye hewaiunu, sine kabo sinana ye hewaiunu, yo sinehelam kabo lawana ye hewaiunu.

³⁶ Tamowai kana waiunu ede kabo yona numakalo tamowaidiyao.’ (*Maika 7:6*)

³⁷ Ena kaiteya tamana yo sinana ye gadosisikaliliyeidi na kabo yau, iya nige gonowana yau yogu. Yo ena kaiteya natuna tau o sine ye gadosisikaliliyeidi na kabo yau, iya nige gonowana yau yogu. ³⁸ Yo kaiteya nige ye henuwa yona sataulo ye bahei yo ye hemuliwatanigau** meta iya nige gonowana yau yogu. ³⁹ Kaiteya yona mauli [*tanoubu ta unai*] ye nuwatukaliliyei meta kabo yona mauli [*nige kana siga*] ye kabisapuli. Na kaiteya yona mauli [*tanoubu ta unai*] ye mosegabaei yau debaguyena, iya kabo mauli [*nige kana siga*] ye lobai.

⁴⁰ Kaiteya ye yogaisinigomiu, yau hinage ye yogaisinigau. Yo kaiteya ye yogaisinigau meta tauhetamaligau wa hinage ye yogaisini. ⁴¹ Kaiteya peloweta hesau ye yogaisini matawuwuna iya peloweta, yona kainauya kabo gonogonowana doha peloweta. Yo kaiteya tamowai dudulaina hesau ye yogaisini matawuwuna iya tamowai dudulaina, iya yona kainauya kabo gonogonowana doha tamowai dudulaina yona kainauya. ⁴² Yo hinage ena tamowai hesau yona sagu gagilina doha waila kaputina ye mosei tamowai dobidobina hesau ta unai, matawuwuna iya tauhemuliwatanigau, ya hededemamohoi: Iya yona kainauya kabo ye hai.”

11

Yowane Babatiso yona henamai (*Luka 7:18-23*)

¹ Yesu yona hekahekatao saudoudoi-labui wa ye hededehasahasaidi ye gehe, na kabo ye dalahai ye lau Galili magaidi udiyedi ye lauhekata yo ye lauguguya.

² Na Yowane Babatiso meta numatutugudu unai, na Keliso yona paisowa wa wasana ye lapui na ye nuwalabulabui. Ede yona hekahekatao ye hetamalidi se lau Yesu

** **10:29:** Pene kesega meta asaliyona. ** **10:34:** Kelepa meta hewahewaiunu heyaheyasonina. ** **10:38:** Kaiteya nige ye henuwa yona sataulo ye bahei yo ye hemuliwatanigau: Huyana Loma tamowai hesau se woyai bena kabo se hesataulo meta kabo kana sataulo se hebahei. Unai lausoi ta kaniyona ede teina: Kaiteya nige ye henuwa bena tamowai iya se hekamkamna doha Yesu se hekamkamna, meta nige gonowana iya Yesu yona tamowai.

unai ³ bena se henamaiyei se wane, “Mamohoina kowa Kelisona ede ka nayanayai wa, o sola tamowai hesau ka nayanayai kabo ye laoma?” ⁴ Yesu ye hededebei ye wane, “Kwa uyo na saha kwa lapuidi yo kwa kitadi wa Yowane yona kwa hedehede, ⁵ meta taumatagibugibu matadi se lala, taubunibuni se laulau, taulepelepela se namwanamwa, taubeyakolakola se lapulapui, tauboiboita se tolo'uyo, yo taudehadeha wasa namwanamwana se lapulapui. ⁶ Na kaiteya nige ye nuwalabulabuiyeigau, meta iya gonowana ye gwauyala.”

*Yesu Yowane ye hededehe masalaha
(Luka 7:24-35)*

⁷ Yowane yona hekahekatao wa se dalahai se lau, na kabo Yesu ye hetubu Yowane hedehededenena ye hedehededei boda wa udiyedi, ye wane, “Ginauli saha hesabana kwa lau balabala ne unai bena kwa kita? Nuwana didiyali yaumai ye yuhisaei yo ye yuhidobiyei?*** ⁸ Ena nige meta saha hesabana kwa lau bena kwa kita? Yomi nuwatu bena tamowai hesau yona kaleko wasawasadi kwa kita? Nige! Kaiteyadi kaleko wasawasadi se likwalikwadi, siya wasawasa yodi numa udiyedi se miyamiya. ⁹ O nuwana kwa lau bena peloweta hesau kwa kita? Mamohoi, ya hededelaowa Yowane meta ye saekalili na kabo peloweta. ¹⁰ Iya tamowaina ede wasana [*peloweta Malakai*] ye kulinonohaiyako buka tabuna unai:

‘Kabo yogu tautauwasa ya hetamali bena ye kedabagunaego.

Iya kabo yom keda ye kabinonohai.’

(Malakai 3:1)

¹¹ Ya hededemamohoi kalimiuyena: Tanoubu ta tamowaidi** maudoidi luwadiyena meta nige hesau ye saekalili na kabo Yowane Babatiso. Na tamowai hesau galewa basileiyana unai ye dobikalili, meta tamowaina ne ye saekalili na kabo Yowane. ¹² Yowane yona huyaena ye hetubu ye laoma teina huya ta meta galewa basileiyana wa ye laki ye lau ma bayaona, na tamowai se bado se kaipatekalili bena se lusae basileiya ne unai. ¹³ Mose yona laugagayo yo peloweta maudoidi ye lau ee Yowane yona huyaena, siya Galewa basileiyana wasana se hedehededei. ¹⁴ Na ena taba yodi hedehedede wa kwa kawamamohoiyeidi, kabo kwa nuwatulobai meta Yowane iya ede Eliya se hededeyako meta kabo ye laoma. ¹⁵ Kaiteyadi gonowana se lapulapui bena se lapulapuinaamwanamwa!”

¹⁶ [*Na Yesu yona hedehedede ye tubei ye wane,*] “Teina isi ta tamowaidiyao,** saha unai kabo ya hekaigonogonowaidi? Siya doha wawayao bakubakuyena se tutuli na se yogayogalau kadi kahao udiyedi se wane,

¹⁷ ‘Higo ka yuhidi,

na nige kwa sobu.

Siyayau wanadi ka wanaidi,

na nige kwa dou.’

¹⁸ Yowane ye laoma na ye kaihudi na numanuma bayabayaodi nige ye numadi, na se wane, ‘Yaluwa yabayababana hesau meta iya kalinawai.’ ¹⁹ Tau Natuna ye laoma ede ye kaikai yo waina ye numanuma, na se wane, ‘Sola kwa kita, ye kaimuyomuyou yo ye numanumayauyaule! Yo iya takisi tautanotano yo yababa tamowaidiyao kadi kaha!’ Na iyamo Yaubada yona sibasiba kabahemamohoiyeina ede tamowai yona laulau dudulaidi.”

*Yesu tamowai nige se nuwabui ye guguyaidi
(Luka 10:13-15)*

*** **11:7:** Didiyali meta tamowai ye nuwalabulabui heyaheyasonina. ** **11:11:** Tanoubu ta tamowaidi Mataiyo ye kuli, Sinesineo tamowai se labasidi. ** **11:16:** Teina isi ta tamowaidiyao ta, siya ede Paliseya yo Sadusiya kadi bodao na Yesu se kawayababaei yo se subu.

²⁰ Na Yesu Isalaela magaidiyao hekadiyo ye dilaidi, matawuwuna ede laulau gigigibwalidi se bado udiyedi ye ginaulidi, na nige se nuwabui. Ye wane, ²¹ “Ahani mo komiu, Kolasini tamowaidiyao! Ahani mo komiu Betesaida tamowaidiyao! [*Yababa lakilakina kabo kwa hekalo.*] Laulau gigigibwalidi ya ginaulidi kalimiuyena wa, taba ya ginaulidi magai yabayababadi Taiya yo Sidona udiyedi, meta tamowaidiyao ne kabo se nuwabuiko, na yodi nuwabui ta unai meta kabo nuwadubu kalekodiyo se luwuidi yo taudi maudoidi se hekahusadi. ²² Unai ya hededelaowa kalimiuyena: Yaubada yona hekasa mayadaina ne unai kamkamna lakilakina kabo kwa lobai, na kabo Taiya yo Sidona tamowaidiyao.

²³ Na komiu Kapelenauma tamowaidiyao, bena kabo Yaubada ye lausinigomiu kwa sae galewa ne? Taba nige! Kabo kwa dobi Hade unai! Laulau gigigibwalidi ya ginaulidi kalimiuyena wa, taba ya ginaulidi Sodoma** unai, meta teina mayadai ta unai kabo Sodoma sola ma miyana. ²⁴ Unai ya hededelaowa kalimiuyena: Yaubada yona hekasa mayadaina ne unai kamkamna lakilakina kabo kwa lobai, na kabo Sodoma tamowaidiyao.”

*Kaiteya gonowana Yaubada kabina ye kata
(Luka 10:21-22)*

²⁵ Mahanana ne unai Yesu ye gwayuwa na ye tapwalolo Tamana unai ye wane, “Tamagu, kowa galewa yo tanoubu Guiyauna. Ya hedebasaego matawuwuna ginauli maudoidi ta ku tolewadamdi na tausonoga yo tausibasiba nige gonowana se nuwatulobaidi. Na tamowai supusupudi** udiyedi ginauli ta ku tolehemasalahadi na se nuwatulobaidi. ²⁶ Mamohoi, tamagu, teina ta yom nuwatu mamohoina yo yom kabagwayuwa ede.”

²⁷ [*Na kabo ye hededelau boda wa udiyedi ye wane,*] “Tamagu meta tanuwaga gigibwalina maudoina ye leyama kaliguwai.** Iya ye bom mo kabigu ye kata, na yau ya bom mo tamagu kabina ya kata, yo hinage yogu kaisunuwa tamowaidi udiyedi tamagu ya hededehehemasalahadi na kabina se kata.”

Kabakaiyawasi ede Yesu

²⁸ Kabo Yesu ye hededelau udiyedi ye wane, “Yomi taulauhekata laugagayo bayabayaodi se hekatagomiu, na laugagayo ne miyawatanidi meta doha bahebahe polopolohedi. Ena kwa kaikaipatekalili bena laugagayo ne kwa miyawatanidi na unai kamnamiu se yababa, meta kwa laoma kaliguwai, kabo kabakaiyawasi kwa lobai. ²⁹ Yau ya nuwabiga yo ya nuwadobidobi, unai yogu lauhekata kwa haidi na kwa miyawatanidi, kabo nuwamiu se talu, ³⁰ matawuwuna yogu lauhekata ne ye biga, yo kabo bahebahe malamalaena ya leyawa kwa bahei.”**

12

*Sabatiyena Yesu yona hekahekatao witi kaniyodi se gigidi
(Maleko 2:23-28, Luka 6:1-5)*

** **11:23:** Sodoma meta magai yabayababakalilina Yaubada ye heyababa wa. Wasana ku hasili Genese 19 unai.

** **11:25:** Tamowai supusupudi: Mataiyo yona kulikuli kalina Giliki unai kaniyona bagubagunana meta, wawayao gagilidi, Hedehedede ta kaniyona hekadi hinage, doha, tamowai supusupudi, o, nige se sikulunamwanamwa, o, nige sonoga tauhaina. ** **11:27:** Tamagu meta tanuwaga gigibwalina maudoina ye leyama kaliguwai: Kalina

Giliki unai Mataiyo ye kuli, Tamagu ginauli maudoidi ye ledima kaliguwai. ** **11:30:** Lausoiso ta udiyedi Yesu yona hedehedede wa kaniyona ku hasili. Ena Yesu yona hedehedede wa ta kulibui hedehedede kesega kesega unai, kabo doha teina: 28 Kaiteyadi kamnamiu se yababa yo yomi bahebahe se polohe, meta kwa laoma kaliguwai, kabo kaiyawasi ya leyawa. 29 Yogu bulumakau kabakaulabulabuiyeidi yo yogu lauhekata kwa haidi, matawuwuna yau meta ya nuwabiga yo ya nuwadobidobi, na nuwamiu kabo se talu yo se kaiyawasi. 30 Matawuwuna yogu bulumakau kabakaulabulabuiyeidi ne meta ye biga, yo bahebahe kabo ya leyawa ne malamalaena.

¹ Sabati hesau unai Yesu maiyana hekahekatao se laulau kabo witi koyana hesau se tauduwaduwali se lau. Na se hasali ede se hetubu witi kaniyodiyao se huhudi na se kaidi. ² Na Paliseya tamowaidi hekadi se kitadi ede se hededelau Yesu unai se wane, “Ku kita ne! Yom hekahekatao meta Sabati laugagayona se utusi!” ³ Na Yesu ye hededelau udiyedi ye wane, “Huyana Dawida ma kana hewahewaliyo se hasali na saha ye ginauli wa wasana kwa hasali o nige? ⁴ Ye lusae Yaubada yona Logulogu Tabuna unai na pwalawa hetahetabudi ye haidi ede se kaidi. Unai laugagayo se utusi matawuwuna ede iya yo kana hewahewaliyo maidanao wa pwalawa tabudi ta se kaidi, na taukaitalasam mo gonowana se kaidi.** ⁵ Yo [Mose yona] laugagayo kwa hasali o nige? Ye hedede meta taukaitalasam Numa Tabuna unai Sabati maudoina yodi paisowa se ginaginauli na unai Sabati laugagayona se utusi, na iyamo nige kadi gilulu. ⁶ Unai ya hededelaowa kalimiuyena: Tamowai hesau iya ede inai meta ye saekalili na kabo Numa Tabuna laugagayona. ⁷ Yaubada yona hedehedede ye wane,

‘Katekamkamna mo ya henuwa, na nige kaitalasam.’ (Hoseya 6:6)

Taba hedehedede ta kaniyona kabina kwa kata, meta nige gonowana tamowai ta kwa hegilugaibuidi. ⁸ Matawuwuna ede Tau Natuna iya Sabati guiyauna ede.”

*Yesu tamowai nimana basabasana ye henamwanamwa Sabati unai
(Maleko 3:1-6, Luka 6:6-11)*

⁹ Tenem teha ne ye laugabae kabo ye lau na ye mwalaesae yodi sunago unai. ¹⁰ Menai meta tamowai hesau nimana ye giligili yo ye basabasa. Na Paliseya tamowaidiyao wa se kaipate bena Yesu se hegilu, unai iya se henamaiyei se wane, “Taba Sabatiyena tamowai hesau ta kabihenamwanamwa, kabo laugagayo ta utusi o nigele?” ¹¹ Yesu ye hededelau udiyedi ye wane, “Ena taba luwamiuyena hesau yom mamoe kesega, na mayadai Sabati unai ye bekudobi duhaena, kabo ku lau ku tabeisini'uyoi o nige? ¹² Na tamowai meta ye saekalili na kabo mamoe! Unai ye namwa mo taba Sabatiyena laulau namwanamwana ta ginauli.”

¹³ Na kabo ye hededelau tamowai wa unai ye wane, “Nimam ku tuuhedudulai!” Ede nimana wa ye tuuhedudulai, na ye namwanamwa doha nimana hesauna wa. ¹⁴ Ede Paliseya tamowaidiyao wa se pesa na se koitalaliu taba idohagi na Yesu bena se unuhemwaloi.

Yesu Yaubada yona kaisunuwa tamowaina ede

¹⁵ Yesu yodi nuwatu wa kabina ye kata, unai magari wa ye laugabaei. Bodalakilaki iya se hemuliwatani na yodi taukasikasiyebwa maudoidi ye henamwanamwadi. ¹⁶ Na ye guguyaidi bena tabu se hedehedehemasalaha meta iya kaiteya. ¹⁷ Teina unai Yaubada kalinana peloweta Aisaiya ye hedededi wa se laoma se mamohoi, doha ye wane,

¹⁸ “Teina ta yogu kaisunuwa tamowaina, yo iya yogu heyayai tauhaina tamowaina ede. Iya ya gadosisiyei, yo ya gwauyalakalili kalinawai.

Yaluwagu kabo ya mosei iya unai

na yogu kabihemauli wasana kabo ye hededehemasalaha dagela tamowaidiyao udiyedi.

¹⁹ Iya taba nige ye haikawayagala, yo taba nige ye kalinalakilaki.

Hinage tamowai keda udiyedi nige gonowana kalinana se lapui.

²⁰ Tamowai basabasadi taba nige ye heyababadi,

yo yodi sunuma gagilidi taba nige ye haigabaeidi**

kana siga yodi dudulai ye moseidi.

** **12:4:** Pwalawa laugagayodi ede Lewitikasi 24:5-9 udiyedi. Na Dawida wasana ne, iya ede 1 Samuwela 21:1-6 unai. ** **12:20:** Peloweta Aisaiya hedehedede ta meta heyaheyasoni unai ye kuli, iya ede doha teina: “Didiyali welawelaina taba nige ye kabigodu, na lampa wikina nige ye kalasinamwanamwa taba nige ye kabihebo.”

²¹ Kabo tamowai maudoidi yodi sunuma se tole iya hesanaena.” (*Aisaiya 42:1-4*)

Kaiteya yona gigibwaliyena Yesu ye paipaisowa
(*Maleko 3:20-30, Luka 11:14-23*)

²² Na kabo tamowai hesau se woyaiyama Yesu unai. Tamowai wa matagibugibuna yo una'unana, matawuwuna yaluwa yabayababana iya ye luwui. Na Yesu ye henamwanamwa, kabo ye hedehedede yo matana se lala. ²³ Na boda wa se siliyata na se henahenamai'uyoidi se wane, “Teina ta nuwana Dawida Natuna?”

²⁴ Na huyana Paliseya boda yodi hedehedede wa se lapui ede se wane, “Teina tamowai ta meta nige yona gigibwali, na yaluwa yabayababadi kadi tanuwaga Belesebulu ye bom mo yona gigibwaliyena yaluwa yabayababadi ye hededehepesadi.”

²⁵ Na Yesu yodi nuwanuwatu wa kabina ye kata ede ye hededelau udiyedi ye wane, “Taba basileiya hesau ye bom ye lulululu'uyoi, meta taba nige yona namwa hesau ye lobai. Yo taba magai hesau o numa hesau tamowaidiyao se bom se haihaitoledagela'uyoidi, meta taba nige se tolokesege. ²⁶ Taba Satani yona taupaisowa yaluwa yabayababadi ye hepesadi, meta iya ye bom ye hewahewaiunu'uyoi na yona basileiya kabo idohagi na ye tolobayao?”

²⁷ Ena taba yau Belesebulu yona gigibwaliyena yaluwa yabayababadi ya hededehepesadi, meta tauhemuliwatanigomiu** kabo kaiteya yona gigibwaliyena yaluwa yabayababadi se hededehepesadi? Unai siya kabo se hegilugomiu meta kwa laupwano. ²⁸ Na ena yau Yaubada Yaluwana yona gigibwaliyena yaluwa yabayababadi ya hededehepesadi, meta Yaubada yona basileiya ye laomako.

²⁹ Yo hinage nige gonowana taukaiwahali hesau ye mwalae tamowai yasiyasiyalana yona numa unai na yona gogo ye haigaibuidi. Yasiyala wa bena ye paibagunai, na kabo gonowana yona gogo wa ye kaiwahali.

³⁰ Kaiteya nige ye hemuhemuliwatanigau, iya meta tauhewaiunugau. Yo kaiteya nige ye saguigau na tamowai ka woyagogoidima, iya meta tauhetatagwaligwali. ³¹ Unai ya hededelaowa, Yaubada kabo yababa maudoidi yo hinage Yaubada hededeheyababana maudoidi ye nuwatugabaeidi, na ena tamowai hesau Yaluwa Tabuna ye hededeheyababa, taba nige yababa ne nuwatugabaena. ³² Hinage ena kaiteya Tau Natuna ye hededeheyababa, Yaubada kabo yona yababa ne ye nuwatugabaei. Na ena kaiteya Yaluwa Tabuna ye hededeheyababa, meta taba nige yona yababa ne nuwatugabaena teina huya ta unai yo huya kabo se laoma ne udiyedi.

³³ Kaiwa namwanamwana meta kaniyona namwanamwadi, yo kaiwa yababana meta kaniyona yababadi. Kaiwa kabakitalobaidi ede kaniyodi udiyedi. ³⁴ Komiu meta doha mwata yabayababadi! Idohagi to bena hedehedede namwanamwadi kwa hedededi? Matawuwuna nuwanuwatu saha nuwada ne unai ye mwayau meta kabo kawadaena ta hededegabaeidi. ³⁵ Tamowai namwanamwana nuwana meta nuwanuwatu namwanamwadi udiyedi ye mwayau, unai iya yona hedehedede yo yona kabikabi kabo se namwa. Yo tamowai yababana nuwana ne meta nuwanuwatu yababadi udiyedi ye mwayau, unai iya yona hedehedede yo yona kabikabi kabo se yababa. ³⁶ Na ya hededelaowa, Yaubada yona hekasa mayadaina ne unai kabo tamowai maudoidi se tolo Yaubada matanaena na yodi hedehedede yabayababadi saha se hededediko wa maudoidi kabo se hededehehemasalahadi. ³⁷ Yomi hedehedede ne udiyedi kabo ye hegilugomiu, yo yomi hedehedede ne udiyedi kabo yailihai kwa lobai.”

Peloweta Iyona hekihekinoina
(*Mataiyo 16:1-4, Maleko 8:11-12, Luka 11:29-32*)

** **12:27:** Tauhemuliwatanigomiu: Mataiyo ye kuli, natumiyao. Siya meta Paliseya tamowaidiyao hekadiyo yo yodi hekahekatao, na kadi paisowa yaluwa yabayababadi se hedehededehepesadi Yaubada hesanaena.

³⁸ Na kabo Paliseya tamowaidiyao yo laugagayo taulauhekataena hekadiyo se laoma Yesu unai se wane, “Taulauhekata, ka henuwa bena laulau gigigigibwalina hesau ku ginauli na ka kita.” ³⁹ Na Yesu ye hededebui ye wane, “Teina isi ta tamowaidiyao se yababa na Yaubada nige se sunumaei** na se henuwa bena hekihekinoi hesau ya hekitadi. Na taba nige hekihekinoi hesau se kita, na hekihekinoi kesega mo, kabo unai kwa kitalau ede peloweta Iyona hekihekinoina. ⁴⁰ Iya meta mayadai haiyona yo boniyai haiyona yama lakilakina boganaena ye miyamiya. Doha hinage Tau Natuna kabo mayadai haiyona yo boniyai haiyona bwayabwayaena ye miya.

⁴¹ Yaubada yona hekasa mayadaina ne unai Ninewa tamowaidiyao kabo se tolo na teina isi ta tamowaidiyao se hegiludi, matawuwuna ede Iyona yona lauguguyaena Ninewa tamowaidiyao wa se nuwabui. Na mayadai ta unai tamowai hesau ye saekalili na kabo Iyona, iya ede maidamiu ta.

⁴² Hekasa mayadaina ne unai magai Siba** yodi wasawasa waihiuna kabo hinage ye tolo na teina isi ta tamowaidiyao ye hegiludi, matawuwuna kedalohalohaena ye laoma bena Solomona yona hededesonoga ye lapuidi.** Na tamowai hesau iya ede inai, ye sonogakalili na kabo Solomona.”

*Yaluwa yabayababadi yodi kabikabi
(Luka 11:24-26)*

⁴³ [Kabo Yesu yona hedehehede ye tubei ye wane,] “Huyana yaluwa bikibikina tamowai hesau ye pesagabaei meta ye lau balabalagaibuyena na yona kabakaiyawasi ye wase, na nige hesau ye lobai. ⁴⁴ Kabo ye wane, ‘Hage, ya uyo numa ya laugabaei usei wa unai.’ Ye lage uyo numa wa ye kita meta se kuyahe'a'a yo se gwaugogonamwanamwaei, na nige taumiyaina. ⁴⁵ Kabo ye lau yaluwa yabayababadi haligigi-labui ye woyaidima. Siya se yababakalili na kabo iya, na numa wa unai se lusae na se miya. Ede tamowai wa yona mauli ye yababakalili na kabo yona mauli bagubagunana wa. Teina isi yababana ta yodi mauli kabo hinage gonogonowana doha tenem.”

*Yesu kehanao
(Maleko 3:31-35, Luka 8:19-21)*

⁴⁶ Numakaloyena, Yesu sola ma hedehehedena boda wa udiyedi, na sinana yo kana kahao se laoma ede dagela wa unai se nayanayai, bena kabo iya maiyadi se hedehehede. ⁴⁷ Na tamowai hesau ye hededelau Yesu unai ye wane, “Sinam yo kam kahao ede dagela ne unai, se henuwa bena se kitago.” ⁴⁸ Kabo Yesu ye hededelau tauhedehede wa unai ye wane, “Kaiteya iya sinagu, yo kaiteyadi kagu kahao ede?” ⁴⁹ Ye nimahelalelau yona hekahekatao udiyedi na ye wane, “Ku kitadi, teina sinagu yo kagu kahao ede. ⁵⁰ Matawuwuna kaiteya Tamagu galewa ne unai yona nuwatu ye miyawatani meta iya kagu kaha, lougu, yo sinagu ede.”

13

*Bwatano udoi'udo'i heyaheyasonidi
(Maleko 4:1-9, Luka 8:4-8)*

¹ Mayadai kesekesegana ne unai Yesu numa wa unai ye pesa ye dobi Galili Gabwana dedekanaena ye tuli. ² Kabo bodalakilaki se tupagogoima iya unai, ede ye gelu waga hesau unai na ye tuli, na boda maudoidi se totolo nagali wa unai. ³ Na kabo ginauli gwaudi heyaheyasoniyena ye hedededi. Ye wane, “Tamowai hesau ye lau yona witi

** **12:39:** Yaubada nige se sunumaei: Tamowaidiyao ne Yesu ye heyaheyasoniyeyidi tauganaganawali udiyedi, na kalina Giliki unai yona hedehehede wa meta, Isi yababana yo ganaganawalina ta ye henuwa bena hekihekinoi hesau se kita. ** **12:42:** Siba meta basileiya beyabeyana hesau, na tausonoga se kaimasi Siba tanona nuwana Itiyopiya unai. Hekadi se wane bena Alabiya unai teha yawana ne unai. ** **12:42:** Wasana ta hasili 1 Kin 10 yo 2 Kolonikele 9 udiyedi.

koyana unai na witi likena tumadiyao ye hesulu. ⁴ Ye hesuhesulu ede like wa hekadi se bekudobi kedaena. Na manawa se laoma ede se kaidi. ⁵ Like wa hekadi se beku tano maladebadebana unai. Tano wa nige ye buluma, unai like wa se kinimwamwayau. ⁶ Na mahana ye dalasae na gigibwalina wa unai ede like wa se wowoya, matawuwuna like wa lamdi nige se dobi. ⁷ Hekadi se beku lagau gwaligwalidi luwadiyena. Lagau wa se kini ede like wa se yahaidi. ⁸ Yo hinage hekadi se beku bwatano namwanamwana unai, ede like wa se kini yo se kaniyo, hekadi kaniyodi badodi 100, hekadi 60, yo hinage hekadi 30. ⁹ Kaiteyadi gonowana se lapulapui bena se lapulapuinamwanamwa!”

*Matawuwuna saha to Yesu heyaheyasoni mo udiyedi ye laulauhekata
(Maleko 4:10-12, Luka 8:9-10)*

¹⁰ Muliyena kabo Yesu yona hekahekatao se laoma iya se henamaiyei se wane, “Ido-hagi to heyaheyasoni ku hepaisowadi na ku hedehededelau tamowai udiyedi?” ¹¹ Unai Yesu ye hededelau udiyedi ye wane, “Galewa basileiyana nuwanuwatuna saesaedi ya hededehemasalahadi komiu kalimiuyena, na siya meta nige ya hedededi udiyedi.

¹² Kaiteyadi yogu lauhekata ta se lapulobaidi, siya galewa basileiyana nuwatulobaina kalidiyena kabo ye lakikalili. Na kaiteyadi yogu lauhekata nige se lapulobaidi meta saha se lapui wa kabo se nuwaluluhiyei yo ye gehe kalidiyena. ** ¹³ Heyaheyasoni yogu hepaisowadi kalidiyena kaniyona ede

‘se kaikaikewa, na nige saha se kitalobai,
yo se lapulapui, na nige se lapulobai.’

(Yelemaiya 5:21)

¹⁴ Yodi laulau ta udiyedi meta peloweta Aisaiya yona hedehedede wa ye laoma ye mamohoi, doha ye wane,

‘Yogu hedehedede kabo kwa lapulapuidi,
na taba nige kwa lapulobaidi.

Yogu kabikabi kabo kwa kitadi,
na taba nige kwa kitalobaidi.

¹⁵ Matawuwuna tamowai ta nuwadiyao meta se kwailokalili,
yo beyadi se kolakola,
yo matadi se gibu.

Na taba matadi se lala, kabo se kitalobai,
yo taba beyadi se malapai, kabo hedehedede se lapulobaidi,
yo taba nuwadi se masalaha, kabo se nuwatulobai,
iyamo nigele.

Unai nige gonowana se nuwabui na ya henamwanamwadi.” *(Aisaiya 6:9-10)*

¹⁶ [Kabo Yesu yona hedehedede wa ye tubei ye wane,] “Na komiu meta gonowana kwa gwauyala matawuwuna matamiyao udiyedi kwa kaikaikewa na beyamiyao udiyedi kwa lapulapui. ¹⁷ Ya hededemamohoi kalimiuyena: [Huya bagubagunana unai,] peloweta yo laulaududulai tamowaidi se henuwakalili saha kwa kitadi ta bena se kitadi, yo saha kwa lapuidi ta bena se lapuidi, na iyamo nige se kitadi yo nige se lapuidi.”

*Yesu bwatano heyaheyasonina kaniyona ye hededehemasalaha
(Maleko 4:13-20, Luka 8:11-15)*

¹⁸ “Kwa lapulapui, teina ta like tauhesuhesulu heyaheyasonina wa kaniyona ede: ¹⁹ Kaiteyadi galewa hedehededena ta se lapui na nige se nuwatulobai, kabo tauyababa ye laoma na saha namwanamwana nuwadiyena wa ye haigabaei. Siya nuwadi kadi kao meta doha keda kalona. Tuma wa se bekudobi unai na manawa se laoma ede se kaidi.

²⁰ Maladebadeba unai like se hesulu wa kaniyona ede tamowai hedehedede wa ye lapui na ye haimoei ma gwauyalana. ²¹ Iyamo like ne nige lamna, unai yona miya

** **13:12:** Lausoiso ta Yesu heyaheyasoni unai ye hededegabaei, iya ede teina: “Kaiteya ginauli saha gagilina kalinawai meta Yaubada kabo ye helaki yo kalinawai kabo ye badokalili. Na kaiteya nige saha hesau gagilina kalinawai meta gagilina ne kalinawai kabo ye haigabaei.”

nige ye loha. Na huyana pilipili yo hewahewaiunu ye hekalodi yogu hedehedede ta debanaena meta ye nuwagwagwama na ye lausuwala.

²² Na tamowai hesau hedehedede wa ye lapui na kaiyaulina ta nuwamodemodena udoi'udo'i yo gogo gadosisidi nuwana ne se hemwayau, ede hedehedede wa kalinawai nige kaniyona. Iya meta doha tano lagau gwaligwalina luwanaena na tuma se bekudobi unai.

²³ Na like hekadi se bekutalu bwatano namwanamwana unai na kabo hekadi kaniyodi tumadiyao 100 se toledi, hekadi 60, yo hekadi 30. Teina meta doha tamowai hesau hedehedede wa ye lapui yo ye nuwatulobai, ede kaniyona se masalaha.”

Witi yo lagau heyaheyasonidi

²⁴ Yesu heyaheyasoni hesau ye hedede'uyoi ye wane, “Galewa basileiyana meta doha tamowai hesau yona koya unai witi likena namwanamwadi ye hesuludi. ²⁵ Na boniyaiyena tamowai maudoidi se kenoko, na kana waiunu ye laoma ede lagau likedi ye hesuludi like namwanamwadi wa luwadiyena, na koya wa ye laugabaei. ²⁶ Huyana like namwanamwadi wa se kini na se hetubu se kaniyo meta lagau wa hinage se kini.

²⁷ Koya tanuwagana yona taupaisowa se laoma unai na se wane, “Tanuwaga, like namwanamwadi ku kumaidi yom koya ne unai, na lagau ne haedi se laoma ede se kini ne?” ²⁸ Ede koya tanuwagana wa ye wane, ‘Waiunu lagau me ye hesulu, ede se kini.’ Yona taupaisowa wa se wane, ‘Gonowana ka lau lagau ne ka upadi?’ ²⁹ Na koya tanuwagana wa ye wane, ‘Taba nige, matawuwuna ena lagau ne kwa upadi, kabo witi ne kwa upahaikesegaidi. ³⁰ Kwa toledi na se kinigogoi kana siga kelikeli kana huya, kabo ya hedede na witi tautanogogoidi lagau ne se tanobagunaedi se kuinidi na se gabudi, na kabo witi ne se tanogogoidi na se baheidima yogu sanalaena se toledi.’ ”

Tuma gagilidi yo yisti heyaheyasonidi

(Maleko 4:30-32, Luka 13:18-21)

³¹ Yesu heyaheyasoni hesau ye hedede'uyoi tamowai wa udiyedi ye wane, “Galewa basileiyana meta doha kaiwa tumana gagilina** tamowai hesau ye hai na yona koyaena ye kumai. ³² Like maudoidi ne udiyedi iya meta tuma gagilikalilina, na ena ye kini koyaena meta iya kabo ye hemala kaiwa lakilakina, na manawa se laoma lagana ne udiyedi se kabinoi.”

³³ Hinage Yesu heyaheyasoni hesau ye hedede'uyoi ye wane, “Galewa basileiyana meta doha yisti gagilina. Waihiu hesau yisti ne ye hai na pwalawa disina lakilakina unai ye yebwali kabo yisti ne pwalawa maudoina wa ye hesese.”

Yesu heyaheyasoni ye hasilidi meta peloweta yodi hedehedede wa ye hemamohoiyeidi *(Maleko 4:33-34)*

³⁴ Yesu ginauli maudoidi ta ye hedededi boda wa udiyedi meta heyaheyasoni udiyedi ye hedehededeidi. Na nige hedehedede dudulaidiyao udiyedi ye hedehedede.

³⁵ Kaniyona ede peloweta hesau** yona hedehedede wa ye hemamohoiyei, “Kabo kawaguyena heyaheyasoni ya hedededi.

Yo hinage kaiyaulina yona huyatubu unai na ye laoma, hedehedede saha Yaubada ye tolewadamdi wa kabo ya hemasalaha.” *(Same 78:2)*

Yesu witi yo lagau heyaheyasonidi kaniyona ye hededehemasalaha

³⁶ Yesu boda wa ye laugabaeidi na ye mwalae numakaloyena. Na yona hekahekatao wa se laoma iya unai se wane, “Witi koyana unai lagau heyaheyasonina wa kaniyona ku hededehemasalaha kalimaiyena.” ³⁷ Ye wane, “Like namwanamwana tauhesuluna, iya ede Tau Natuna. ³⁸ Na witi koyana meta kaiyaulina, na like namwanamwadi

** **13:31:** Kaiwa tumana gagilina: Kaiwa ne Dimdim unai hesana se katai ede mustard. ** **13:35:** Peloweta wa hesana ede Asapa. Same badodi 12 ye kulidi, na tamowai se hedede meta iya hinage peloweta hesau (2 Kolonikele 29:30).

ede Yaubada yona basileiya tamowaidiyao, na lagau meta tauyababa yona tamowai,³⁹ na waiunu ede diyabolo iya meta lagau likena tauhesuluna. Na kelikeli huyana meta kaiyaulina kana siga, na taukelikeli meta Yaubada yona anelu.⁴⁰ Lagau ta se upadi na se gabudi meta kabo doha kaiyaulina yona huyagehe unai.⁴¹ Tau Natuna yona anelu kabo ye hetamalidi se lau yona basileiya unai, na tamowai kadi kahao se woyalaeidi yababa unai, yo yababa tauginaulidi maudoidi se haigabaeidi,⁴² na kabo se tuudobiyeidi kaiwa kalakalasina gigigigibwalikalilina unai. Temenai kabo se doudou yo kawadi se kapuyahisidi.⁴³ Na siya taukawamamohoi yo yodi laulau se dudulai kadi kao kabo se namanamali doha mahana, Tamadi yona basileiya unai. Kaiteyadi gonowana se lapulapui bena se lapulapuinamwanamwa!”

Wasawasa wadawadamna yo giniuba matapouna heyaheyasonidi

⁴⁴ “Galewa basileiyana meta doha ginauli wasawasana hesau se tolewadam koyaena. Na tamowai hesau ye lobai bwatano luwanaena, ede ye puluhiwadam'uyoi, na ma gwauyalana ye lau yona gogo maudoidi ye lokunegabaeidi na monina wa unai tano wa ye hemaisahai.

⁴⁵ Yo hinage galewa basileiyana meta doha gogo taulokulokune tamowaina hesau giniuba matapoudi namwanamwadi ye wasewase.⁴⁶ Ena giniuba matapouna namwanamwakalilina hesau ye lobai, kabo ye lau yona gogo maudoidi ye lokunegabaeidi na monina wa unai giniuba matapouna wa ye hemaisahai.”

Hinaya heyaheyasonina

⁴⁷ “Hinage galewa basileiyana meta doha hinaya se galaei gabwaena, na yama kadi kao udoi'udo se hekonadi.⁴⁸ Hinaya wa yama ye mwayau ede tauyamayama hinaya wa se gayosaei salagomgom wa unai na yama wa se hekasadi, namwanamwadi se usaidi bosaena na yababadi se gabaeidi.⁴⁹ Kaiyaulina kana siga kabo doha teina: Anelu kabo se dobima tamowai yodi miyamiya dudulaidiyao luwadiyena tamowai yababadi se tolehesuwaladi.⁵⁰ Na ba'aya tamowaidiyao kabo se tuudobiyeidi kaiwa kalakalasina gigigigibwalikalilina unai. Temenai kabo se doudou yo kawadi se kapuyahisidi.”

⁵¹ Yesu yona hekahekatao wa ye henamaiyeidi ye wane, “Teina ginauli maudoidi ya hedededi ta kwa nuwatulobaidi?” Se wane, “Aa, ka nuwatulobaidi.”⁵² Ye hededelau udiyedi ye wane, “Unai, ena laugagayo taulauhekataena tamowaina hesau, na galewa basileiyana lauhekataena ye haidi, meta iya kana kao ede doha numa hesau tanuwagana yona gogo wasawasadi hauhaudi yo hinage beyabeyadi** ye bahehepesadima na ye toledi tamowai matadiyena.”

Nasaleta unai Yesu se subu (Maleko 6:1-6, Luka 4:16-30)

⁵³ Yesu heyaheyasoni wa udiyedi ye lauhekatagehe ede magari wa ye laugabaei⁵⁴ na ye lau yona magari mamohoina Nasaleta. Na yodi sunago unai ye lauhekata ede tamowai wa se siliyata na se wane, “Teina tamowai ta yona sibasiba ta haedi ye hai? Yo yona gigigibwali ne haedi ye hai na laulau gigigigibwalidi ye ginaulidi?”⁵⁵ Na hinage se wane, “Iya kabina ta katako meta kapenta Yosepa natuna, na sinana ede Maliya, yo kana kahao ede Yamesi, Yosepa, Simona, yo Yuda.⁵⁶ Na lounao maudoidi, siya ede maiyadao ta miyamiya! Na haedi sonoga ta ye haidi?”⁵⁷ Unai Yesu se kouyalayalaei.

Na ye hededelau udiyedi ye wane, “Magai maudoidi kabo peloweta se hekasisiyei, na yona magari mamohoina yo yona numa tamowaidiyao meta taba nige se hekasisiyei.”⁵⁸ Na Yesu laulau gigigigibwalidi hisa mo ye ginaulidi, matawuwuna tamowai wa nige se sunumaei.

** 13:52: Gogo wasawasadi hauhaudi yo hinage beyabeyadi meta Galewa basileiyana lauhekataena yo lauhekata beyabeyana heyaheyasonidi.

14

Yowane Babatiso yona boita (Maleko 6:14-29, Luka 9:7-9)

¹ Huyana ne meta Heloda Antipasi yona huyawasawasa Galili unai. Yesu yona paisowa wasana ye lapuidi ² ede ye hededelau yona taupaisowa udiyedi ye wane, “Teina meta Yowane Babatiso boita unai ye tolo'uyoma, unai ede gigibwali kalinawai na laulau gigigibwalidi ye ginaulidi ta.”

³⁻⁴ Heloda meta kana kaha Pilipo mwanena Helodiyasi ye kwayai. Na Yowane ye hedehedelau unai ye wane, “Kowa laugagayo ku utusi, taba tabu kam kaha mwanena ne ku tawatawasolai!” Ede Heloda ye hedede na Yowane se hai se pai na se tole numatutuguduyena. ⁵ Ye henuwa bena ye unuhemwaloi, na Yudeya tamowaidiyao ye matausiyeidi, matawuwuna ede se hedede meta iya peloweta.

⁶ Na Heloda yona huyalabasi mayadaina henuwaisinina kaikaigogona unai, ede Helodiyasi natuna waihiu meta Heloda ma kana taumana kadi ye sobu. Yona sobu wa unai Heloda nuwana ye namwakalili ⁷ ede ye hededekaigwala unai ye wane, “Ena kaliguyena ginauli saha hesau ku kaibwadai meta kabo ya haiyawa.” ⁸ Na sinana iya ye guguyaiyako, ede ye hededelau Heloda unai ye wane, “Ya henuwa Yowane Babatiso kulukuluna ku usai gaeba unai na ku haiyama.” ⁹ Heloda ye nuwayababa, na iyamo kana taumana matadiyena ye hededekaigwalako. Unai waihiu wa yona nuwatu ye ginauli ¹⁰ ede ye hedede na Yowane Babatiso gadona se boli, ¹¹ na kuluna wa se usai gaebaena na se baheyama se mosei hasala wa unai, ede ye bahelaei sinana wa unai.

¹² Yowane yona hekahekatao se laoma ede sinalena wa se hai na se laei bwayabwayaena se tole. Na saha ye tubu wa wasana Yesu yona se hedehedede.

Pwalawa haligigi yo yama labui (Maleko 6:30-44, Luka 9:10-17, Yowane 6:1-14)

¹³ Yesu Yowane wasana wa ye lapui ede ye dobi wagaena ye gelu na ye kawasi ye lau balabala hesau unai, matawuwuna ye henuwa bena siya se bom mo. Magai maudoidi tamowaidiyao wa Yesu yona kabalau wasana se lapui ede se hemuliwatani na se yona se lau. ¹⁴ Na huyana Yesu ye dunasae meta bodalakilaki ye kitadi se nayanayaei. Na boda wa ye katekamkamnaedi ede taukasikasiyebwa maudoidi ye henamwanamwadi.

¹⁵ Ye hetubu ye meimeilahi ede Yesu yona hekahekatao se laoma iya unai se wane, “Teina meta balabalagaibuyena, yo mahana ye laoko. Boda ta ku hetamalidi se lau magari udiyedi kadi se lokune.” ¹⁶ Na Yesu ye wane, “Taba nige kwa hetamaligwaligwalidi, na komiu kai kwa moseidi se kai.” ¹⁷ Ede se wane, “Teina kalimaiyena ta meta pwalawa haligigi yo yama labui mo.” ¹⁸ Ede Yesu ye wane, “Kwa baheidima kaliguwai.” ¹⁹ Na ye hedede boda wa se tuli lagau wa unai. Pwalawa haligigi yo yama labui wa ye haidi ede ye kitasae galewa ne na ye lautoki Yaubada unai, kabo pwalawa wa ye kihidi na ye moseidi yona hekahekatao wa udiyedi, na yona hekahekatao pwalawa yo yama wa se soiyedi boda wa udiyedi. ²⁰ Tamowai maudoidi wa se kaikai meta bogadi se sese. Na kaitole wa se tanogogoidi meta bosa saudoudoi-labui se hemwayaudi. ²¹ Taukaikai bodana wa unai meta tatao badodi 5,000, na sinesineo yo wawayao nige se hasilikesegaidi.

Yesu gabwaena ye laulau (Maleko 6:45-52, Yowane 6:15-21)

²² Na kabo Yesu yona hekahekatao wa ye hegelumwamwayaueidi se baguna se lau hali sanakawasi ne, na iya boda wa ye hetamaligwaligwalidi. ²³ Se dalahaigwaligwali, na kabo iya ye bom ye sae kuduliyena bena ye tapwalolo. Na ye meimeilahi meta iya ye bom mo menai.

²⁴ Waga wa meta gabwa duwaduwalinaena na yaumai se taumatai ede bagodu waga wa se koikoinuwahi.

²⁵ Malatomtom gagilina sola ma masimasigilina** Yesu ye dobi gabwa ne, na gabwa kewanaena ye laulau ye lau yona hekahekatao wa udiyedi. ²⁶ Yona hekahekatao wa iya se kita gabwa kewanaena ye laolaoma hesabadi meta se matausikalili, ma matausidi na se yogahi se wane, “Aiyoi! Teina ta yaluyaluwa.” ²⁷ Na Yesu ye yogalau udiyedi ye wane, “Kwa nuwabayao! Yau Yesu! Tabu kwa matausi!”

²⁸ Ede Petelo ye hededelau iya unai ye wane, “Guiyau, ena mamohoina kowa, ku hedede na gabwa ta unai ya laowa kalimwai.” ²⁹ Ye wane, “Ku laoma!” Kabo Petelo waga wa unai ye pesa na gabwa wa unai ye laulau ye lau Yesu hesabana. ³⁰ Ye laulau na yaumai yo bagodu wa ye kitadi ede ye matausi na ye hetubu ye yoli, ede ye yogalau ye wane, “Yesu, ku saguigau!” ³¹ Na Yesu nimana ye helelelaei na Petelo ye kabihekahini, na ye hededelau unai ye wane, “Yom sunuma taki ye gagili! Idohagi to ku nuwalabulabui?” ³² Na se laoma waga wa unai se gelu meta yaumai wa ye motu. ³³ Ede taumiyamiya waga wa unai Yesu se kaihelahui yo se wane, “Mamohoikalili, kowa Yaubada Natuna!” ³⁴ Na kabo se kawasi se lau Genesaleta unai se duna.

³⁵ Magai wa tamowaidiyao Yesu se kitalobai ede wasa se hetamali ye lau magai maudoidi wa udiyedi. Ede taukasikasiyebwa maudoidi se laedima Yesu unai, ³⁶ na se kaibwadakatekamkamna taba kana kwama sinosinona mo se kabitonogi. Na kana kwama taukabitonogina maudoidi se namwanamwa.

15

Yaubada yona hedehedede bena ta tolebagunaedi (Maleko 7:1-13)

¹ Paliseya yo laugagayo taulauhekataena hekadiyo Yelusalema unai se laoma na Yesu se henamaiyei se wane, ² “Idohagi to yom hekahekatao kada kulutubu yodi kabikabi laugagayona se utusi? Nimadiyao meta nige se deulidi na se kaikai.” ³ Yesu ye hededelau udiyedi ye wane, “Na idohagi to komiu kami kulutubu yodi kabikabi debanaena Yaubada yona laugagayo kwa utusi? ⁴ Doha Mose yona laugagayo unai Yaubada ye wane,

‘Tamam yo sinam ku hekasisiyeidi.’

(Esodo 20:12, Dutelonomi 5:16)

Yo ye wane,

‘Ena kaiteya tamana yo sinana ye hededeheyababadi meta bena kwa unuhemwaloi.’

(Esodo 21:17, Lewitikasi 20:9)

⁵ Na komiu kwa hedede kwa wane, ‘Gonowana tamowai hesau ye hededelau tamana yo sinana udiyedi ye wane, “Yogu kainauya bena ya haiyawa kabasaguigomiu wa meta ya talamyeyako Yaubada unai.”’ ⁶ Kabikabi ta kwa talamyeyi, na tama yo sina hekasisidi meta nige! Yomi lauhekata ta unai kwa laupwanokalili. Kami kulutubu kabikabidiyao debadiyena ede Yaubada yona laugagayo wa kwa tolebasiyeidi. ⁷ Komiu taukailupolupo! Komiu hedehededemi Aisaiya ye hededenonohaiyako wa meta mamohoi, doha ye wane,

⁸ “Teina tamowai ta sopagaibudi mo udiyedi se hekasisiyeigau

na nuwamamohoidiyao udiyedi meta Yaubada nuwanuwatuna nigele.

⁹ Se kaihelahuigau meta nige kaniyona,

matawuwuna tamowai yodi laugagayo meta se laulauhekataeidi.’ ”

(Aisaiya

29:13)

Ginauli saha tamowai ye hebiki (Maleko 7:14-23)

** **14:25:** Malatomtom gagilina sola ma masimasigilina: Mataiyo ye kuli, boniyai wa tupwana hehasina unai. Mahana wa meta 3 kiloki yo 6 kiloki duwaduwalidiyena.

¹⁰ Kabo Yesu boda wa ye yogagogoidima na ye hededelau udiyedi ye wane, “Kwa lapulapui na saha ya hedededi ta bena kwa nuwatulobaidi. ¹¹ Ginauli saha kawamyena ku kai na ye dobi meta iya nige gonowana ye hebikigo, na saha luwam ne unai ye saema kawam ne unai ye pesa meta kabo ye hebikigo.”

¹² Kabo Yesu yona hekahekatao se laoma iya unai se wane, “Yom hedehedede ta unai meta Paliseya bodadi se kouyalalayalakalili.” ¹³ Ede Yesu ye hededelau udiyedi ye wane, “Tamagu galewa ne unai taumiya, iya kaiwa sahasahadiyao nige ye kumaidi meta kabo ma lamdi ye suluhihaidi. ¹⁴ Kwa laugabaeidi se miyawa, siya tauwoyawoya matagibugibudiyao. Ena taba taumatagibugibu hesau yona hali taumatagibugibu ye woyai, meta kabo se bekulabulabuidobi duhaena.”

¹⁵ Na Petelo ye hededelau Yesu unai ye wane, “Taba gonowana kabahebikida heyahayasonina wa kaniyona ku hededeheemasalaha kalimaiyena?” ¹⁶ Ede Yesu ye hededelau udiyedi ye wane, “Idohagi, sola ma nuwapwanopwanomiu? ¹⁷ Nige kwa nuwatulobai? Saha kawada ta unai ta kai meta ye dobi bogada ne unai na kabo ta miyagabaei. ¹⁸ Na hedehedede saha kawamiuyena se pesama meta nuwamiuyena se masalahama, teina ta tauhebikigomiu ede. ¹⁹ Matawuwuna ede nuwada ta udiyedi kabo nuwatu yabayababadi se masalahama, doha kaiunu, ganawali, laulau bikibikidi udoi'udo, kaiwahali, hedehedelupolupo, yo hinage tamowai hededeheyahayababana. ²⁰ Teina laulau ta, siya tamowai tauhebikina ede. Na ena nimamiu ma bikidi na kai kwa hai kwa kai meta nige gonowana ye hebikigomiu.”

Kanana waihiuna yona sunuma
(Maleko 7:24-30)

²¹ Kabo Yesu teha Galili ye laugabaei na ye sae teha Taiya yo Sidona udiyedi. ²² Na Kanana waihiuna hesau temenai taumiya ye laoma Yesu unai ye kaibwadalakilaki ye wane, “Guiyau, Dawida natuna, ku katekamkamnaegau! Yaluwa yababana hesau meta ye luwu natugu sinesinekukuna unai na ye hekasiyebwakaliliyei.” ²³ Na Yesu nige saha hesau ye hedede waihiu wa unai. Kabo yona hekahekatao wa se wane, “Waihiu ta ku hetamali ye tausuwala, matawuwuna ede ye dahikwatakwatakalili.” ²⁴ Ede Yesu ye hedehedede ye wane, “Tamagu ye hetamaligauma ta meta Isalaela mo tamowaidi hesabadi, siya doha mamoe se laulau kadi heyababa hesabana.” ²⁵ Kabo waihiu wa ye laoma ye tulibonodobi Yesu matana wa unai na ye kaibwada ye wane, “Guiyau, ku saguigau!” ²⁶ Yesu ye hededebui ye wane, “Nige ye dudulai bena wawayao kadi kai ta haidi na ta gabalaedi kedewa udiyedi.”** ²⁷ Na waihiu wa ye wane, “Guiyau, mamohoi, na iyamo kedewa kadi tanuwaga yona hatahataena kana kai mapuladi se bekudobi meta kabo kedewa ne se laoma se kaidi.” ²⁸ Unai Yesu ye hededelau unai ye wane, “Waihiu, yom sunuma meta ye lakikalili! Unai saha ku kaibwada meta kabo ye masalahama.” Mahanana ne unai waihiu wa natuna sinekuku wa ye namwanamwa.

Yesu tamowai kasikasiyebwadi ye henamwanamwadi

²⁹ Yesu teha Taiya yo Sidona ye laugabaeidi na ye uyo Galili, na Galili Gabwana dedekanaena ye yona ye lau. Kabo ye sae kuduli gagilina hesau unai na ye tuli. ³⁰ Kabo bodalakilaki se laoma na taukasikasiyebwa se laeidima, kasiyebwa doha taubunibuni, taumatagibugibu, tamowai kae yo nima yabayababadiyao, una'unadi yo taukasikasiyebwa hekadi hinage se laeidima Yesu unai, ede maudoidi ye henamwanamwadi. ³¹ Unai boda wa se nokokalili, matawuwuna ede matadiyena tau'una'una se hedehedede, taubunibuni ye henamwanamwadi, tamowai kae

** 15:26: Kedewa kaniyona ede, Dius tamowaidiyao se hedede ede siya wawayao na dagela tamowaidi siya kedewa. Unai Yesu yona hedehedede ta kaniyona ede, “Nige gonowana Isalaela tamowaidiyao udiyedi yogu sagu ya haigabaei na ya saguigo, matawuwuna kowa dagela sinena.”

yabayababadiyao se laulau yo taumatagibugibu matadiyao se lala na se kaikewa. Na Isalaela yodi Yaubada se hedebasaei.

*Yesu bodalakilaki ye hekaidi
(Maleko 8:1-10)*

³² Yesu yona hekahekatao wa ye yogagogoidima na ye hededelau udiyedi ye wane, “Tamowai ta ya katekamkamnaedi, matawuwuna ede mayadai haiyona inai maiyadao na nige sola kai hesau se kai, unai nige ya henuwa ma hasalidi na ya hetamalidi se lau. Taba ma hasalidi na se lau kabo kedaena hasahasali ye haidi na se guli.” ³³ Na se hededebui se wane, “Teina balabalagaibu ta unai kabo haedi kai ta hai na bodalakilaki ta ta hekaidi?” ³⁴ Yesu ye henamaiyeidi ye wane, “Pwalawa hisa kalimiuyedi?” Ede se wane, “Pwalawa haligigi-labui yo yama habuhabuludiyao hisa ede teinai.” ³⁵ Ede ye hededelau boda wa se tulidobi bwatano wa unai. ³⁶ Kabo pwalawa yo yama wa ye haidi na ye hededelautokisae Yaubada unai, ye kihidi na ye moseidi hekahekatao wa kalidiyena, na se soiyedi boda wa udiyedi. ³⁷ Boda wa se kaikai meta maudoidi bogadi se sese. Na kadi kaitole wa hekahekatao wa se tanoi na se usagogoi meta bosa haligigi-labui se hemwayaudi. ³⁸ Taukaikai bodana wa unai meta tatao badodi 4,000, na sinesineo yo wawayao nige se hasilikesegaidi. ³⁹ Kabo Yesu boda wa ye hetamaligwaligwalidi. Na yawalana ye lau kabo waga hesau unai ye gelu na se lau teha Magadani.

16

*Paliseya yo Sadusiya se henuwa bena galewa hekihekinoina hesau se kita
(Maleko 8:11-13, Luka 12:54-56)*

¹ Paliseya yo Sadusiya tamowaidiyao hekadi se laoma Yesu unai bena se lautonogi. Na se kaibwadai taba bena galewa hekihekinoina hesau ye ginauli se kita.

² Ye hededelau udiyedi ye wane, “Meimeilahiyena kwa wane, ‘Huya kabo ye namwa, matawuwuna ede mahana ye dui na yada ne ye pululu.’ ³ Na malatomtomyena kwa wane, ‘Mayadai ta kabo huya ne ye yababa, matawuwuna ede mahana ye dalasae na yada ne ye pululu yo huya ne ye toleyaloyalohi.’ Huya kadi kao gonowana kwa hededehehemasalahadi, na idohagi to teina saha se tubutubu ta meta nige gonowana kaniyodi kwa nuwatulobaidi. ⁴ Komiu yomi nuwanuwatu se yababa na Yaubada nige kwa kawamamohoiyei, na kwa henuwa bena taba hekihekinoi hesau kwa kita. Na taba nige hesau kwa kita, na kesega mo kabo ya hekitagomiu, iya ede saha ye tubu Iyona peloweta unai wa.” Kabo Yesu ye laugabaeidi na ye lau.

*Paliseya yo Sadusiya yodi yisti
(Maleko 8:14-21)*

⁵ Galili Gabwana unai se kawasi se lau na Yesu yona hekahekatao wa se nuwaluluhi ede nige pwalawa se bahei.

⁶ Yesu ye hededelau udiyedi ye wane, “Paliseya yo Sadusiya yodi yisti udiyedi bena kwa kitakitanamwanamwa.”

⁷ Hekahekatao wa se bom nuwatu wa se hetahetala se wane, “Yona hedehedede ta kaniyona ede nige pwalawa ta bahei.”

⁸ Saha se hetahetala wa meta Yesu kabina ye kata ede ye hededelau udiyedi ye wane, “Idohagi to yomi sunuma se gagili na kwa bom pwalawa hedehededena kwa hedehededei? ⁹ Nuwana sola nige kwa nuwatulobai? Hage, pwalawa haligigi wa kwa nuwatuidi, ya soiyedi boda 5,000 se kai na kadi kaitole kwa tanoi na kwa usagogoidi meta bosa badona hisa? ¹⁰ Yo hinage taba pwalawa haligigi-labui wa kwa nuwatuidi! Ya soiyedi boda 4,000 se kai na kadi kaitole kwa tanoi na kwa usagogoidi meta bosa hisa? ¹¹ Idohagi to nige kwa nuwatulobai meta yau nige pwalawa ya hetahetala? Na bena

Paliseya yo Sadusiya yodi yisti unai komiu kwa kitahetete'uyoigomiu.”¹² Unai kabo se nuwatulobai meta iya nige pwalawa kadi yisti ye hetahetala, na Paliseya yo Sadusiya yodi lauhekata udiyedi bena se kitakitanamwanamwakalili.

Petelo Yesu ye hededehehemasalaha

(Maleko 8:27-30, Luka 9:18-21)

¹³ Yesu maiyana hekahekatao se lage wasawasa Pilipi yona magai Sisaliya unai, kabo yona hekahekatao wa ye henamaiyeidi ye wane, “Tamowai se hedede Tau Natuna meta iya kaiteya?”¹⁴ Ede se wane, “Hekadi se hedede meta kowa Yowane Babatiso, hekadi se wane kowa Eliya, hekadi se wane kowa Yelemaiya, yo hekadi se wane kowa peloweta hesau.”¹⁵ Na Yesu ye henamaiyeidi ye wane, “Na komiu? Kwa hedede ede yau kaiteya!”¹⁶ Ede Simona Petelo ye hededelau unai ye wane, “Kowa meta Keliso, Yaubada maumaulina natuna.”¹⁷ Kabo Yesu ye hededelau unai ye wane, “Simona, Iyona natuna, kowa gonowana ku gwauiyala! Teina nuwatu ta meta kowa nige ku bom yom sonoga unai ye laoma, na nuwatu ta meta tamagu galewa ne unai ye hehemasalaha kalimwai.¹⁸ Unai ya hededelaowa, kowa meta Petelo,** na teina weku ta kewana ne unai kabo yogu dubu ya kabi. Na boita nige gonowana ye hekaiyawasi.**¹⁹ Gigibwali ya leyawa na bena Yaubada yona tamowai ku kedabagunaidi. Laulau sahasahadi ku laugagayoidi tanoubu ta unai, meta Yaubada hinage ye laugagayoidi galewa ne unai. Na laulau sahasahadi ku kitahenamwadi, meta Yaubada hinage ye kitahenamwadi.”**²⁰ Kabo ye hededelau yona hekahekatao wa udiyedi ye wane, “Tabu tamowai hesau yona kwa hedehedede meta yau Kelisona ede.”

Yesu yona boita ye hededenonohai

(Maleko 8:31-33, Luka 9:22)

²¹ Huyana ne unai Yesu ye hetubu yona hekahekatao ye hekatadi na ye hededehehemasalaha meta bena taba ye lau Yelusalema. Temenai Dius babadadiyao yo taukaitalasam tauwoyaidi yo laugagayo taulauhekataena kabo iya se hekamkamna kabikabi udoi'udo udiyedi yo kabo se unuhemwaloi, na mayadai hehaiyonana unai kabo Yaubada iya ye hetolo'uyoi na ye mauli.²² Kabo Petelo Yesu ye woyahesuwala na ye hededebayao unai ye wane, “Guiyau, teina ginauli ta taba tabu se tubutubu kalimyena.”²³ Yesu ye kitabui Petelo ye kaikewai na ye hededelau unai ye wane, “Ku tausuwala, kowa Satani! Kowa ku hemala yau yogu kabakalabesibesi. Kowa nige Yaubada yona nuwanuwatu ku nuwatu, na tamowai mo yodi nuwanuwatu udiyedi ku nuwanuwatu.”

Yesu idohagi hemuhemuliwatanina

(Maleko 8:34–9:1, Luka 9:23-27)

²⁴ Na kabo Yesu ye hededelau yona hekahekatao wa udiyedi ye wane, “Ena taba hesau ye henuwa bena ye hemuliwatanigau, meta iya bena ye bom ye nuwagabae'uyoi na yona sataulo ye bahei** na ye hemuliwatanigau.²⁵ Kaniyona ede ena hesau ye henuwa bena yona mauli ye bom ye kitahetete, meta kabo yona mauli ye kabisapuli. Na ena debaguyena hesau yona mauli ye nuwagabaei, kabo yona mauli ye lobai'uyoi.²⁶ Yo ena tamowai hesau tanoubu ta maudoudoina bena iya yona, na ye bom yaluwana ye unui, kabo saha namwanamwana ye hai? Saha unai kabo yaluwana ne ye hemaisahai'uyoi? ²⁷ Matawuwuna ede Tau Natuna kabo ye uyoma Tamana yona didigaena,

** **16:18:** Petelo kaniyona ede weku. ** **16:18:** Na boita nige gonowana ye hekaiyawasi kaniyona ede, tamowai se hewaiunu na se boita, iyamo Yaubada yona basileiya nige gonowana ye gehe. ** **16:19:** Lausoiso unai Yesu yona hedehedede kaniyona ku hasili. Mataiyo kalina Giliki unai ye kuli ye wane, Kabo galewa basileiyana kana kii ya haiyawa kalimwai. Na saha ku kauhekahini tanoubu ta unai, meta galewa ne unai hinage se kauhekahini. Na saha ku yailigabaei tanoubu ta unai, kabo galewa ne unai hinage se yailigabaei. ** **16:24:** Yona sataulo ye bahei: Hedehedede ta kaniyona meta bena ye talamgabaei'uyoi gonowana Yesu debanaena ye boita.

maidanao yona anelu. Huyana ne unai tamowai kesega kesega yona mauliyena saha ye ginauliyako wa unai kabo maisana ye mosei. ²⁸ Ya hededemamohoi: Hekadiyo inai tautotolo ta meta taba nige se boita ye lau ee Tau Natuna se kita ye laoma iya wasawasa yona basileiya unai.”

17

Yaubada Yesu yona didiga ye hemasalaha (Maleko 9:2-13, Luka 9:28-36)

¹ Mayadai haligigi-kesega mulidiyena kabo Petelo, Yamesi, yo Yamesi kana kaha Yowane, Yesu ye woyaidi se sae kuduli kewana saesaena hesau unai. Menai se bom mo, ² na matadiyena Yesu kana kao ye bui ye namanamali doha mahana yo kana kaleko se posi yo se dawayakalili. ³ Mahanana ne unai menai Mose yo Eliya se taumasalaha na Yesu maiyadi se hedehedede.

⁴ Na Petelo ye hededelau Yesu unai ye wane, “Guiyau, ye namwa mo taba inai ta miya. Ena ku henuwa, kabo inai gwau haiyona ya kabidi, hesau kowa yom, hesau Mose yona, yo hesau Eliya yona.”

⁵ Sola ma hedehededen, na kabo yalohi dawadawayana ye laoma ye gawuidi, na kalina hesau yalohi wa unai ye wane, “Teina yau Natugu ya gadosisiyei. Iya unai ya gwaualakalili. Kwa lapulapulau unai!”

⁶ Hekahekatao wa hedehedede ta se lapui ede se guliyaboyabomdobi bwatano wa unai ma matamatausidi. ⁷ Na Yesu ye laoma ye kabilau udiyedi na ye wane, “Kwa tolo. Tabu kwa matausi.” ⁸ Se tamaisima na se kaikewasae meta nige tamowai hesau se kita, na Yesu ye bom mo.

⁹ Kuduli wa unai se lidi se dobidobi na Yesu ye hededelau udiyedi ye wane, “Saha kwa kita wa meta tabu tamowai hesau yona kwa hedehedede, kana siga Yaubada Tau Natuna boita unai ye hetolo'uyoi.”

¹⁰ Na hekahekatao wa Yesu se henamaiyei se wane, “Idohagi to laugagayo taulauhekataena se hedede meta taba bena Eliya yona uyoma ye baguna na kabo Keliso?” ¹¹ Yesu ye wane, “Mamohoi, Eliya ye uyoma kabo ginauli maudoidi ye tohedudulai'uyoidi. ¹² Na ya hededelaowa kalimiuyena: Eliya ede ye laomako, na nige se kitalobai. Na yodi nuwatu saha se henuwa iya unai se ginauli meta se ginaulidiko. Teina kabikabi ta gonogonowana unai kabo Tau Natuna se hekamkamna.” ¹³ Kabo hekahekatao wa se nuwatulobai meta Yesu Yowane Babatiso ye hetahetala.

Yesu wawaya loheya ye henamwanamwa (Maleko 9:14-29, Luka 9:37-43)

¹⁴ Huyana se dobima boda luwadiyena kabo tamowai hesau ye laoma Yesu unai na ye tulibonodobi matana wa unai ¹⁵ ye wane, “Guiyau, natugu tau ku katekamkamnaei. Ye kikikiwasi, na kasiyebwa ta unai ye kamkamnakalili. Na huya hekadi ye bekudobi kaiwa kalakalasidi kewadiyena yo waila kalodiyena hinage. ¹⁶ Ya laeyama yom hekahekatao udiyedi na nige gonowana se henamwanamwa.”

¹⁷ Na Yesu ye hededelau udiyedi ye wane, “Komiu nige yomi sunuma, yo nuwatu yabayababadi tamowaidiyao! Kabo ya miya'uyo lohana doha saha kalimiuyena? Kwa kamnayabayababa! Wawaya me kwa baheiyama kaliguwai.” ¹⁸ Yesu yaluwa yabayababana wa ye hededehepesa, ede demoni wa wawaya wa ye pesagabaei. Mahanana ne unai wawaya wa ye namwanamwa.

¹⁹ Muliyena kabo hekahekatao wa se bom se laoma Yesu unai se henamai se wane, “Matawuwuna saha to kai nige gonowana yaluwa yababana wa ka hededehepesa?” ²⁰⁻²¹ Ye hededebui ye wane, “Nige gonowamiu matawuwuna yomi sunuma se gag-ilikalili. Ya hededemamohoi kalimiuyena: Taba yomi sunuma lakina doha kaiwa

tumana gagilina,** gonowana kabo kwa hededelau kuduli ne unai, 'Ku sigi ku lau menai!', gonowana kabo ye lauwatani. Nige gonowana ginauli hesau kalimiuyena paisowana ye laki.”**

Yesu yona boita hedehedena ye hedede'uyoi
(Maleko 9:30-32, Luka 9:43b-45)

²² Se laomagogoi Galili unai na Yesu ye hededelau yona hekahekatao udiyedi ye wane, “Tau Natuna kabo kana se walohai na tamowai yabayabadiyao kabo iya se hai. ²³ Kabo se unuhemwaloi, na mayadai hehaiyonana unai kabo Yaubada iya ye hetolo'uyoi na ye mauli.” Ede yona hekahekatao wa se nuwayababakalili.

Numa Tabuna takisina

²⁴ Yesu maiyana hekahekatao se lage Kapelenauma, na kabo Numa Tabuna takisina** tautanotano se lau Petelo unai se wane, “Kami tanuwaga hinage takisi ye toletole o nige?” ²⁵ Ye wane, “Aa, takisi ye toletole.”

Petelo ye uyo numa ede Yesu ye hededebagunalau unai ye wane, “Simona, hage, yom nuwatu idohagi? Tanoubu ta wasawasadiyao kaiteyadi udiyedi takisi se tanotano? Se bom yodi magai tamowaidiyao udiyedi, o hali magai tamowaidiyao udiyedi?” ²⁶ Petelo ye wane, “Tamowai hekadiyao udiyedi.” Na Yesu ye hededelau unai ye wane, “Unai yodi magai tamowaidiyao meta taba nige takisi se tole. ²⁷ Na takisi tautanotano wa bena tabu ta henuwapilipilidi. Unai ku lau gabwa ne unai ku huku. Yama bagubagunana ku katuni meta kawana ne ku gasi, kabo unai moni kesega lakina ede dalakama hasi ku lobai. Ku hai na kowa yo yau yoda takisi monina ku tole.”

18

Kaiteya ye saekalili galewa basileiyana unai
(Maleko 9:33-37,42-48, Luka 9:46-48 yo 17:1-2)

¹ Huyana ne unai hekahekatao wa se laoma Yesu unai se henamai se wane, “Galewa basileiyana unai meta kaiteya ye saekalili?” ² Yesu wawaya gagilina hesau ye yoganeiyama na luwadi wa unai ye hetolo, ³ na ye wane, “Ya hededemamohoi kalimiuyena: Nige gonowana kwa lau galewa basileiyana unai kana siga kwa buigomiu kwa hemala doha wawaya gagilina ta. ⁴ Unai, kaiteya ye nuwadobidobi doha wawaya ta meta iya ye saekalili galewa basileiyana unai. ⁵ Na ena tamowai hesau wawaya gagilina doha teina wawaya ta ye yogaisini yau hesaguyena meta ye yogaisinigau. ⁶ Na ena tamowai hesau teina tausunumaegau tamowaidi dobidobidi** ta hesau ye woyalaei yababa unai, meta ye namwa mo taba weku lakilakina gadona ne unai se paihekahini na se tuudobiyei gabwatum ne unai ye yoli.

⁷ Ahani mo siya tanoubu ta tamowaidiyao, kabo kamkamna se hekaloi, matawuwuna ede tamowai se woyahesuwalalaeidi yababa unai. Huya maudoina noho se laolaoma, na ahani mo siya noho ne yodi kabalaoma tamowaidiyao ne, kabo se kamkamnakalili. ⁸ Ena nimam o kaem ye woyahesuwalalaeigo yababa unai, taba ku bolihai na ku gabaei. Ye namwa mo taba ku bunibuni o nimam o kaem kesekesega unai na ku lau ku mauli, na kabo ma tau'udo'udoim na ku lau kaiwa kalakalasina nige kana siga. ⁹ Na ena matam ye woyalaeigo yababa unai, ku lamohai na ku gabaei. Ye namwa mo taba

** **17:20-21:** Kaiwa tumana gagilina meta Dimdimyena se wane mustard tumana. ** **17:20-21:** Kulikuli beyabeyadiyao hisahisadi mo lausoiso 21 se tubei se kuli, Na yaluwa yabayabadi doha teina meta nige gonowana se pesa kana siga ta kaihuudi yo ta tapwalolo. ** **17:24:** Numa Tabuna takisina meta moni Dios babadiyao se tanotano yodi hali Dios tamowaidiyao udiyedi, Numa Tabuna kabasaguina. Tamowai kesega kesega meta dalakama labui ye hemaissa, iya ede moni kesega hesana didalakama, ede Mataiyo kalina Giliki unai moni lakina ye kuli ede didalakama (Moni). ** **18:6:** Tamowai dobidobidi: Kalina Giliki unai hedehehede ta kaniyona labui: Wawaya, yo, tamowai dobidobina, siya ede tamowai lakilakidi se kitadobidobiyeidi, yo hinage wawayao.

matakesekesegam unai ku lau ku mauli, na kabo ma matalabulabuim na se gabalaego kaiwa kalakalasina unai.”

*Mamoe gegegegena pilipilidaina
(Luka 15:3-7)*

¹⁰⁻¹¹ Na kabo Yesu ye hedede ye wane, “Tamowai dobidobidi ta, tabu kwa kitadobido-biyeidi. Ya hededehemasalahala kalimiuyena meta galewa ne unai yodi anelu, siya huya maudoina yodi se kaikaibwada Tamagu unai.**

¹² Yomi nuwatu idohagi? Taba tamowai hesau yona mamoe badodi handele kesega, na hesau ye taukwadalele, kabo hekadiyo wa ye tolenamwanamwaedi kuduli wa udiyedi na ye lau kesega ye taukwadalele wa ye wasenei, e nige? ¹³ Ya hededemamohoi kalimiuyena: Ena ye lobai, kabo kesega ta gwauyalana ye lakikalili, na kabo mamoe 99 maidanao wa. ¹⁴ Gonogonowana doha, Tamamiu galewa ne unai nige ye henuwa bena taba tamowai dobidobidi ta hesau ye taukwadalele yababa unai.”

Taulaupwano idohagi kabo ta sagui

¹⁵ “Ena kam kaha saha hesau yababana ye ginauli kalimyena, meta ku lau unai na kowa yo iya yomi labui mo matamiuyena yona laupwano ne ku hededehemasalahala. Ena ye lapulaowa kalimwai, meta yababa yona teha unai ku gilihaiyako. ¹⁶ Na ena nige ye lapulaowa kalimwai, kabo tamowai kesega o labui ku haidi na maidamwao kwa lau iya unai. Unai kabo yom hedehedede maudoidi se hemamohoiyedi, doha Buka Tabuna ye hekatada ye wane, ‘Pilipili maudoidi tolehedulaidi udiyedi meta tamowai labui o haiyona yodi hemamohoi ne unai kabo ta tolehedulaidi.’ *(Dutelonomi 19:15)*

¹⁷ Ena nige ye henuwa ye lapulau udiyedi, kabo kwa laei dubu bodana udiyedi. Na ena nige ye lapulau udiyedi, meta iya kabo kwa kabi doha dagela tamowaina o yababa tauginagulina o takisi tautanotano yomi kabikabidi.

¹⁸ Hedehedede ta meta mamohoi, na hedehedede hesau ya hedede'uyoi kalimiuyena: Laulau saha kwa kawanamwanamwaei tanoubu ta unai, Yaubada kabo hinage ye kawanamwanamwaei, na laulau saha kwa kitaheyababadi, Yaubada hinage ye kitaheyababadi.** ¹⁹ Yo ya hedede'uyo kalimiuyena doha teina: Ena yomi labui tanoubu ta unai saha kwa talamyeyi na kwa kaibwadai, Tamagu galewa ne unai kabo ye ginauli yomiu. ²⁰ Matawuwuna, ena tamowai labui o haiyona se laomagogoi yau hesaguyena, meta yau ede siya luwadiyena.”

Kada kaha yona yababa nuwatugabaena

²¹ Kabo Petelo ye laoma Yesu unai ye henamai ye wane, “Guiyau, ena kaliguyena kagu kaha hesau yababa saha hesau ye ginauli, kabo ma hisa yona yababa ne ya nuwatu-gabaei? Ma kesega o ma haligigi-labui o ma hisa?” ²² Yesu ye hedede bui ye wane, “Ya hededelaowa, nige bena ma haligigi-labui (7) mo, na bena ma 77. ²³ Matawuwuna galewa basileiyana kana kao ede doha teina:

Wasawasa hesau yona taupaisowa siya yona gogo taukitahetedi ye yogagogoidi na ye henuwa bena yodi paisowa kaniyodi se tolehemasalahadi. ²⁴ Yona hekasa ye hetubu ede moni baikidi 10,000 taukabihagahagaina tamowaina se woyaiyama kalinawai. ²⁵ Nige gonowana ye hemaisa, ede wasawasa wa ye hedede bena taba tamowai wa ma mwanena yo natudiyao maudoidi, yo yona gogo maudoidi se lokunegabaeidi na monina wa unai kana hagahaga wa se hededulaidi. ²⁶ Tamowai wa ye tulibonodobi matana wa unai na ye kaibwadabigabigalau unai ye wane, ‘Ku katekamkamnaegau, na

** **18:10-11:** Kulikuli beyabeyadi hekadiyo lausoi 11 hinage se kuli doha Luka 19:10: Matawuwuna ede Tau Natuna ye laoma bena tamowai gegegedi ye waseneidi yo ye gilihaidi. Na nimakulikuli bagubagunadi nige se kuli.

** **18:18:** Hedehedede ta gonogonowana doha Mataiyo 16:19 unai. Ena ta kulibui hedehedede kesega kesega unai meta kaniyona ede teina: Saha tanoubu ta unai kwa kauhekahini, kabo galewa ne unai hinage se kauhekahini. Na saha inai kwa yailigabaei, kabo galewa ne unai hinage se yailigabaei.

kagu hagahaga ta maudoidi kabo ya hedudulai'uyoidi.' ²⁷ Wasawasa wa tamowai wa ye katekamkamnaei ede kana hagahaga wa ye hededegabaeidi na ye kabigabaei ye lau.

²⁸ Na huyana tamowai wa ye pesa ye lau ede yona hali heyayai tauhaina hesau ye kita kana hagahaga meta nige ye lakikalili.** Gadona unai ye kabihekahini ye nukugwadagwadai na ye hededekasokaso ye wane, 'Kam hagahaga kaliguwai wa ku hedudulaiyama!' ²⁹ Kana kaha wa ye tulibonodobi matana wa unai na ye kaibwadakatekamkamna ye wane, 'Ku katekamkamnaegau, na kagu hagahaga ta kabo ya hemaisa'uyoidiwa.' ³⁰ Nige ye kitalau tamowai ne yona kaibwada wa unai, na ye laei ye hedede se tole numatutuguduyena kana siga kana hagahaga maudoidi wa ye hedudulaihegehedi.

³¹ Kana kahao hekadi se kita meta se nuwayababakalili, ede se lau wasawasa wa unai na saha ye tubu wa yona se hedehedede. ³² Kabo wasawasa wa taukaihagahaga kalinaena tamowaina wa ye yoganei'uyoi na ye hededelau unai ye wane, 'Kowa tamowai yabayababana! Ku kaibwadalaoma kaliguwai, unai kam hagahaga maudoina ya hededegabaei. ³³ Idohagi to nige gonowana kam kaha ne ku katekamkamnaei doha yau ya katekamkamnaego wa?' ³⁴ Wasawasa wa ye kouyalayalakalili ede tamowai wa ye moselaei numatutugudu taukitahetetena udiyedi na se tole numatutugudu unai na se hekamkamna ye lau ee kana hagahaga maudoidi ye hedudulaidi.

³⁵ Ena nige nuwamiu mamohoidi udiyedi kami kahao yodi yababa kwa nuwatu-gabaeidi, meta kabo Tamagu galewa ne unai yona kabikabigomiu ede doha teina."

19

Inawase lauhekataana (Maleko 10:1-12, Luka 16:18)

¹ Yesu yona hedehedede ta se gehe, kabo Galili ye laugabaei na ye lau Yudeya ye lage Yolidani sagasagana hali sanakawasina unai. ² Na bodalakilaki se hemuliwatani, na menai ye henamwanamwadi.

³ Na Paliseya tamowaidiyao hekadi se laoma bena Yesu se lautonogi, na se henamaiyei se wane, "Gonowana taba tamowai hesau mwanena nuwatu saha hesau debanaena ye inawasei, o ye inawasegaibuimoei?" ⁴ Yesu ye hededebui ye wane, "Buka Tabuna unai kwa hasili meta tanoubu huyahetubuna unai Tauginaulida 'tau yo sine ye ginaulidi' (Genese 1:26), o nige kwa hasili?" ⁵ Na ye

hedede ye wane, 'Teina debanaena kabo tau tamana yo sinana ye laugabaeidi na ye lau mwanena maidana se miyakesega. Na kabo taudi labui se hemala buluma yo kwasina kesega.' (Genese 2:24) ⁶ Unai siya nige tamowai labui, na se hemalako tamowai kesega. Unai, Yaubada saha ye tubeikesegai meta tabu tamowai hesau ye hetatagwaligwali."

⁷ Kabo Paliseya wa se wane, "Matawuwuna saha to Mose ye hedede meta gonowana tau hesau inawase pepwana ye kuli na ye mosei mwanena unai na ye hetamali ye lau?" ⁸ Yesu ye wane, "Mose ye talamyeigomiu bena kwa inawase matawuwuna ede kwa nuwakwailokalili. Na iyamo tanoubu yona huyatubu unai meta nige doha teina. ⁹ Ya hededelaowa kalimiuyena: Ena tau hesau mwanena yona tawasola miyana ye kabinamwanamwaei na nige ye ganawali, na iyamo ye inawasegaibui na waihiu hesau ye tawasolai, meta tau ne ye ganawali."

¹⁰ Ede yona hekahekatao wa se hededelau unai se wane, "Ena teina ta tawasola miyamiyana ede, ye namwa mo taba tabu ta tawatawasola."

¹¹ Yesu ye hededebui'uyo ye wane, "Teina hedehedede ta meta nige gonowana tamowai maudoidi se miyawatani, na siya kaiteyadi Yaubada ye hebayaodi meta kabo hedehedede ta se miyawatani. ¹² Tatao hekadi nige se tawasola matawuwuna

** **18:28:** Hagahaga nige ye lakikalili: Hagahaga wa lakina ede denali 100, meta nawalai hasi koya paisowana maisana, mayadai kesega denali kesega.

se labasidi meta kobokobosidi, na hekadiyo meta tamowai siya se hekobosidi, na hekadiyo meta yodi talam se ginaulidi Yaubada yona paisowa unai, debanaena ede nige gonowana se tawasola. Unai kaiteyadi gonowana hedehedede ta se hai meta bena se hai.”

*Yesu wawayao gagilidi ye hededehenamwadi
(Maleko 10:13-16, Luka 18:15-17)*

¹³ Tamowai hekadi wawayao se laedima Yesu unai bena nimana ye tolesae kewadiyena yo yodi ye tapwalolo. Na yona hekahekatao tamowai wa se hededehekaiyawasidi bena tabu Yesu se hemohemode. ¹⁴ Na Yesu ye wane, “Wawayao me bena se laoma kaliguyena, na tabu kwa hededeguduguidi. Matawuwuna ede tamowai yodi sunuma kadi kao doha teina wawayao ta meta galewa basileiyana siya yodi.” ¹⁵ Ede nimana ye tolesaedi wawayao wa kewadiyena yo ye hededehenamwadi. Kabo magai ne ye laugabaei ye lau.

*Tamowai wasawasana hesau yona henamai Yesu unai
(Maleko 10:17-31, Luka 18:18-23)*

¹⁶ Kabo tamowai hesau ye laoma Yesu unai ye henamai ye wane, “Taulauhekata, taba laulau saha namwanamwana ya ginauli kabo mauli nige kana siga ya lobai?” ¹⁷ Na Yesu ye hededelau tamowai wa unai ye wane, “Idohagi to laulau namwanamwadiyao hesabadi ku henamaiyeigau? Yaubada ye bom mo ye namwa. Ena ku henuwa bena mauli nige kana siga ku hai, meta laugagayo ku miyawatanidi.” ¹⁸ Na hewali wa ye henamai ye wane, “Laugagayo sahasahadiyao?” Ede Yesu ye wane, “Tabu ku kaiunu, tabu ku ganawali, tabu ku kaiwahali, tabu tamowai hesau ku hegilugaibui ¹⁹ yo tamam yo sinam ku hekasisiyeidi, hinage kam kaha hesau ku gadosisiyei doha kowa ku bom ku gadosisiyei'uyoigo.” ²⁰ Hewali wa ye hededebui ye wane, “Laugagayo maudoidi ta meta ya miyawatanidiko, na saha hesau bena nige sola ya miyawatani?” ²¹ Ede Yesu ye wane, “Ena ku henuwa bena ku dudulai meta ku lau yom gogo maudoidi ku lokunegabaeidi na monidiyao ku moseidi taudehadeha udiyedi, na galewa ne unai kabo yom wasawasa gogodiyao ku lobaidi. Na kabo ku laoma ku hemuliwatanigau.” ²² Na hewali wa hedehedede ta ye lapui ede ye nuwayababa na ye dalahai, matawuwuna yona gogo meta se badokalili.

*Kaiteya kabo ye mauli
(Maleko 10:23-31, Luka 18:24-30)*

²³ Unai kabo Yesu ye hededelau yona hekahekatao wa udiyedi ye wane, “Ya hedede-mamohoi kalimiuyena meta tamowai gogogodiyao yodi lusolalau galewa basileiyana unai meta ye pilipikalili. ²⁴ Na ya hedede'uyo kalimiuyena: [*Ye masalahakalili meta*] kamela nige gonowana ye lusola diu duhana unai. Gonogonowana doha, tamowai gogogogona hinage nige gonowana ye lusolalau Yaubada yona basileiya unai.”

²⁵ Yesu yona hekahekatao wa hedehedede wa se lapui meta se siliyata ede se henamai se wane, “Kaiteya kabo gonowana mauli nige kana siga ye hai?”

²⁶ Yesu ye kitadudulailau kalidiyena na ye wane, “Tamowai se bom mo nige gonowana mauli se lobai, na Yaubada unai ginauli maudoidi meta gonowana.”

²⁷ Kabo Petelo ye hededelau unai ye wane, “Kai meta hemuliwatanigo ta unai ede yoma ginauli maudoidi ka laugabaeidiko. Na saha meta kabo iya yomai?”

²⁸ Yesu ye hededelau udiyedi ye wane, “Ya hededemamohoi kalimiuyena: Ginauli maudoidi huyahehauhau'uyoidi mayadaina ne unai kabo Tau Natuna yona telona saesaena unai ye tuli, meta komiu tauhemuliwatanigau ta kabo hinage telona badodi saudoudoi-labui udiyedi kwa tuli na Isalaela tamowaidiyao boga saudoudoi-labui ta kwa kitahetetedi. ²⁹ Yo kaiteyadi siya yodi numaa, kadi kahao, loudiyao, tamadiyao, sinadiyao, natudiyao yo yodi tano se laugabaeidi yau debaguyena, meta kabo se

hai'uyoidi se laki yo se badokalili, yo hinage mauli nige kana siga meta kabo siya yodi.
³⁰ Na tamowai se bado ta kitahesae'useidi wa meta kabo se laoma se dobi, na tamowai se bado ta kitadobidobiyei'useidi wa meta kabo se laoma se sae.”

20

Taupaisowa wine koyana unai

¹ Na Yesu ye wane, “Galewa basileiyana heyaheyasonina hesau ede doha teina: Koya tanuwagana hesau malatomtomyena ye lau yona taupaisowa ye haidi se laoma bena yona wine koyana unai se paisowa. ² Yona talam ye ginauli kalidiyena meta mayadai kesega paisowana ne unai kabo ye hemaisadi denalikesega. Kabo ye hetamalidi se lau se paisowa. ³ Mahana 9 kiloki tehana unai ye uyo kabalokulokune bakubakuna wa unai. Menai tamowai hekadi ye kitadi se totologaibu nige kadi paisowa. ⁴ Ye hededelau udiyedi se lau yona wine koyana wa unai se paisowa yo kalidiyena ye wane, ‘Maisa dudulaina unai kabo ya hemaisagomiu.’ Ede se lau se paisowa. ⁵ Mayamayadailaki unai yo 3 kiloki meimeilahi unai hinage ye uyo na laulau kesekesegana wa ye ginauli'uyoi.

⁶ Meimeilahi 5 kiloki unai ye uyo na tamowai hekadi ye lobai'uyoidi se totologaibu. Ede ye henamaiyeidi ye wane, ‘Idohagi to mayadai udo'udoina ta inai kwa totologaibu na nige saha hesau kwa ginauli?’ ⁷ Se wane, ‘Matawuwuna ede nige tamowai hesau ye haigai bena taba yona ka paisowa.’ Kabo ye wane, ‘Komiu hinage kwa lau yogu wine koyana unai taupaisowa ne kwa paisowasaguidi.’

⁸ Huyapaisowakaiyawasi mahanana unai koya tanuwagana wa ye hededelau yona taupaisowa kadi tanuwaga wa unai ye wane, ‘Yogu taupaisowa maudoidi ku yogagogoidima na yodi paisowa maisana ku moseidi. Taupaisowamulita udiyedi ku hetubu ku lau ee taupaisowabaguna udiyedi ku kaiyawasi.’ ⁹ Taupaisowamulita awa kesega mo se paisowa wa se laoma ede maisadi denali kesega se hai. ¹⁰ Na taupaisowa ye haibagunai'useidi wa yodi nuwatu meta bena kabo siya maisa lakilakina se hai, na iyamo maudoidi wa meta hinage denali kesega se hai. ¹¹ Maisadi wa se haidi na se kitadi meta denali kesega kesega ede se hetubu se hetalapili koya tanuwagana wa unai, ¹² se wane, ‘Teina tamowai ta ku haimulita'useidi ta meta se paisowa awa kesega mo, na kai meta ka paisowa mahana gigibwalina wa unai yo paisowa lakilakina ka ginauli mayadai udo'udoina wa unai, na iyamo ku hemaisadi meta gonogonowana doha kai ku hemaisagai ta.’ ¹³ Na koya tanuwagana wa ye hededelau kadi kaha hesau unai ye wane, ‘Kehagu, nige hekasa yababana hesau ya ginauli o ya kaolupolupo kalimwai. Wau ku yali meta kabo denali kesega paisowana ku paisowa. ¹⁴ Maisam ta ku hai na ku lau, yogu hekasa ya ginauliyako meta kabo taupaisowamulita maisadi ya moseidi doha kowa taupaisowa bagubagunana maisam ta. ¹⁵ Teina moni ta yau yogu, unai yogu dudulai gonowana saha ya hekasa meta kabo ya ginauli. O nuwana ku kaikalomagigiliyeidi matawuwuna ede ya kabinamwanamwaeidi?”

¹⁶ [Yesu yona hedehedede wa gehena unai ede ye wane,] “Tamowai ta kitadobidobiyei'useidi wa meta kabo se laoma se sae, na tamowai ta kitahesae'useidi wa meta kabo se laoma se dobi.” **

Yesu yona boita hedehedena ye hedede'uyoi

(Maleko 10:32-34, Luka 18:31-34)

¹⁷ Huyana Yesu maiyana hekahekatao saudoudoi-labui wa se saesae Yelusalema meta keda wa unai ye woyahesuwaladi na ye hededelau udiyedi ye wane, ¹⁸ “Kwa lapulapuinanamwanamwa! Teina yoda sae Yelusalema ta unai meta Tau Natuna kabo se mosegabaei taukitalasam tauwoyaidi yo laugagayo taulauhekataena udiyedi. Siya

** **20:16:** Lausoiso ta Mataiyo yona kulikuli unai ye kuli: Unai taumulita kabo se baguna, na taubaguna kabo se mulita. Teina unai Dius yo Dagela tamowaidiyao Yesu ye heyaheyasoniyeidi. Dius meta taubaguna se mulita, na Dagela tamowaidiyao ede taumulita se baguna ne.

kabo se hegilu yo se hetamalilaei ye boita. ¹⁹ Yo kabo se moselaei dagela tamowaidiyao udiyedi kabo se talatalawasiyei, se pidili** yo se laei se hesataulo. Na mayadai hehaiyonana unai kabo Yaubada iya ye hetolo'uyoi.”

*Yamesi yo Yowane sinadi yona kaibwada Yesu unai
(Maleko 10:35-45)*

²⁰ Na kabo Sebedaiyo natunao ma sinadi se laoma Yesu unai na sinadi wa ye tuli-bonodobi na ye hededelau Yesu unai taba gonowana yona kaibwada ye ginauliwatani.

²¹ Yesu ye wane, “Yom kaibwada ede saha?” Sinebada wa ye wane, “Taba gonowana ku hededenonohai meta yom basileiya unai kabo natuguwao labui ta hesau tehatutum ne unai ye tuli yo hesau tehaseuseulim ne unai ye tuli.” ²² Yesu ye hededelau udiyedi

ye wane, “Saha kwa kaikaibwadai ta meta nige kabina kwa kata! Keyaka** unai kabo ya numa meta gonowamiu kabo unai kwa numa?” Ede se wane, “Kai gonowamai.”

²³ Na Yesu ye hededelau udiyedi ye wane, “Kagu keyaka ta kabo komiu hinage unai kwa numa, na bena tehatutugu o tehaseuseuliguyena kwa tuli meta yau nige gonowana ya hekasa. Teina kabatuli ta meta tamagu ye kabinonohaidiko yona kaisunuwa tamowaidiyao siya yodi.”

²⁴ Yamesi yo Yowane yodi hedehedede wa hekahekatao hekadiyo wa se lapui ede se kouyalayala. ²⁵ Ede Yesu ye yogagogoidima na ye hededelau udiyedi ye wane, “Kabina kwa kata meta dagela tamowaidiyao yodi tauwoyawoya tamowaidi lakilakidiyao yodi lolina gigibwalina yo bayabayaona unai yodi tamowai se linaedi. ²⁶ Na komiu yodi laulau ta tabu kwa laulauyeidi. Na ena hesau luwamiuyena ye henuwa bena hesana ye sae yo ye laki meta iya bena ye hemala heyayai tauhaina tamowaina. ²⁷ Yo luwamiuyena kaiteya ye henuwa bena ye baguna, meta iya taba ye hemala yomiu taupaisowa tamowaina. ²⁸ Doha ede Tau Natuna ye laoma nige bena tamowai iya yona se paisowa, na iya bena tamowai yodi ye paisowa yo kabo yona mauli ye mosegabaei na unai tamowai maudoidi ye hemaisahaidi na se mauli.”

*Taumatagibugibu labui matadi se lala
(Maleko 10:46-52, Luka 18:35-43)*

²⁹ Huyana Yesu maiyana hekahekatao Yeliko se laugabaei meta bodalakilaki se hemuliwatanidi. ³⁰ Keda wa dedekana unai meta taumatagibugibu labui se tutuli.

Wasa se lapui meta Yesu kabo keda ne unai ye laoma ye lau, ede kalinalakilaki unai se yogayoga se wane, “Guiyau, Dawida Natuna, ku katekamkamnaegai.” ³¹ Na boda wa taumatagibugibu labui wa se dilaidi se wane, “Kwa taumodimodiya, kwa kaiyawasi!”

Na nige se modelau udiyedi, na se yogahilakilaki'uyo se wane, “Guiyau, Dawida Natuna ee, ku katekamkamnaegai!” ³² Kalinadi wa Yesu ye lapui ede ye kaiyawasi na ye yoganeidi na ye henamaiyeidi ye wane, “Saha kwa henuwa bena yomiu ya ginauli?”

³³ Ede se hededelau iya unai se wane, “Guiyau, ka henuwa bena matamai ta se lala yo ka kaikewa.” ³⁴ Yesu ye katekamkamnaedi ede ye kabilau matadiyao wa udiyedi,

na mahanana ne unai matadiyao wa se lala yo se kaikewa, na se tolo ede Yesu se hemuliwatani.

21

*Yesu yona sae Yelusalema unai bodalakilaki se hailobai
(Maleko 11:1-11, Luka 19:28-40, Yowane 12:12-19)*

¹ Huyana se laoma Yelusalema se hanahanawui na se lage Betepage Olibe koyana unai, kabo Yesu yona hekahekatao labui ye hetamalidi se lau ² na ye hededelau udiyedi ye wane, “Kwa lau magai matamiu ne unai. Menai kabo donki ma natuna se

** **20:19:** Se pidili meta wipi unai. ** **20:22:** Keyaka meta kamkamna lakilakikalilina kabo unai ye lulau ne heyaheyasonina.

paihekahinidi kwa kitadi. Kwa yailihaidi na kwa laedima kaliguwai. ³ Ena tamowai hesau saha ye hedede kalimiuyena, meta kwa hededelau unai kwa wane, 'Guiyau ye henuwadi.' Kabo mahanana ne unai ye talamgabaeidi."

⁴ Teina laulau ta ye tubu bena peloweta saha ye hededenonohaiyako wa ye laoma ye mamohoi. ⁵ Ye wane,

"Kwa hededelau Saiyona natunao udiyedi,

'Kwa kita, yomi wasawasa ye laolaoma kalimiuwai, ye nuwadobidobi yo donki unai ye gelu,

na donkina ne meta donki natuna.' "

(Sakaliya 9:9)

⁶ Hekahekatao labui wa se lau ede saha Yesu ye hedede kalidiyena wa se ginauli-watani. ⁷ Donki wa ma natuna se laedima kabo kadi kwama se haigabaeidi na se yesedi donki wa kewadiyena kabo Yesu ye tulisae donki natuna wa kewana ne unai. ⁸ Bodalakilaki kadi kwama se haigabaeidi na se yesedi keda wa unai yo hekadi se lau kaiwa lagadiyao gagigagilidi ma lugulugudi se bolihaidi na se laoma keda wa unai se yesedi. ⁹ Kabo bodalakilaki wa se baguna yo se mulita na se heyoheyoga se wane,

"Hosana, ** Dawida Natuna!"

"Ka hedebasaego, kowa Guiyau hesanaena ku laoma!"

"Hosana saesaekalilina!"**

¹⁰ Huyana Yesu ye mwalaesae Yelusalema meta magari wa tamowaidiyao maudoidi se siliyata na se henahenamai'uyoidi se wane, "Teina kaiteya tamowai ina?" ¹¹ Boda wa se hededelau udiyedi se wane, "Teina ta Yesu, iya peloweta, Nasaleta tamowaina, Galili unai ye laoma."

Yesu taulokulokune Numa Tabuna bakubakuna unai ye henakuhepesadi

(Maleko 11:15-19, Luka 19:45-48, Yowane 2:13-16)

¹² Yesu ye lusae Numa Tabuna [*bakubakuna*] unai na taulokulokunegabae yo tauhemahemaisa ye henakuhepesadi yo moni taulaulauhedudu** yodi hatahata ye buikahalaidi yo bunebune taulokulokunegabaedi yodi kabatuli ye buikahalaidi. ¹³ Ye hededelau udiyedi ye wane, "[*Peloweta Yaubada kalinana*] se kulihemasalahayako meta, 'Yogu numa kabo hesana se katai ede kabatapwalolo numana' *(Aisaiya 56:7)*, iyamo yomi kabikabina ta meta doha 'taukaiwahali yodi duha.'" *(Yelemaiya 7:11)*

¹⁴ Taumatagibugibu yo tamowai kaediyao yabayababadi se laoma Numa Tabuna wa unai na Yesu ye henamwanamwadi. ¹⁵ Na Numa Tabuna bakubakuna wa unai wawayao Yesu se nokonokoei se wane, "Hosana Dawida Natuna!" Na taukaitalasang tauwoyaidi yo laugagayo taulauhekataena laulau gigigigibwalidi yo namwanamwadi Yesu ye ginaulidi wa se kitadi yo wawayao yodi hedebasae wa se lapui meta se kouyalayalakalili. ¹⁶ Se henamaiyei se wane, "Wawayao ta saha se hedehedede ta ku lapui, o nige?" Yesu ye wane, "Aa, na komiu sola nige kulikuli tabuna unai kwa hasili? Doha ye wane,

'Wawayao yo wawayao bedabedalidi ku hepaisowadi

na kabo sopadiyena kowa se nokoeigo yo se hedebasaego.' "

(Same 8:2)

¹⁷ Kabo boda wa ye laugabaeidi na magari lakilakina wa ye pesagabaei ye lau Betaniya unai ye kenokwaduwali.

Yesu kaiwa hesau ye kawagulaiyei

(Maleko 11:12-14,20-24)

** **21:9:** Hosana: Kalina Hebelu unai hedehedede hosana kaniyona bagubagunana ede, Ku gilihaigai. Hedehedede ta unai Yesu se hedebasaei se wane iya meta taugilihaidi yo yodi wasawasa. ** **21:9:** Hosana saesaekalilina kaniyona ede, Yaubada galewa saesaena unai ta hedebasae. ** **21:12:** Moni taulaulauhedudu wa yodi paisowa meta dagela monidiyao se hai na yodi moni unai se hedudu, iya ede sekeli yo lepetona.

¹⁸ Malatomtom gagilina unai Yesu yona seuyo magari lakilakina wa hesabana na keda wa unai ye tauhasahasali. ¹⁹ Na kaiwa hesau hesana ede bosibosi keda wa dedekanaena ye totolo ye kita ede ye lau kaiwa wa unai na ye kita meta kaiwa wa lugugaibuna ye kuyawa na nige kaniyona. Ede ye hededelau kaiwa wa unai ye wane, “Kowa taba nige huya hesau ku kaniyo'uyo.” Mahana ne unai kaiwa wa ye wowoya. ²⁰ Yona hekahekatao saha ye tubu wa se kita meta se nokokalili. Se henamai se wane, “Idohagi na kaiwa ta ye wowoyamwamwayau?” ²¹ Yesu ye hededebui ye wane, “Ya hedede-mamohoi kalimiuyena: Ena kwa sunuma na nige unai kwa nuwalabulabui, kabo laulau saha kaiwa ne unai ye tubu ta hinage gonowana kwa ginauli. Nige ye bom mo, na hinage gonowana kwa hededelau kuduli ne unai kwa wane, ‘Ku tuudobiyei'uyoigo gabwa ne unai!’, meta gonowana kabo ye tubu. ²² Ena kwa kawamamohoi, kabo ginauli sahasahadi tapwaloloyena kwa kaibwadaidi ne meta kabo kwa haidi.”

Yesu yona dudulai henamaina
(Maleko 11:27-33, Luka 20:1-8)

²³ Yesu ye seuyo Numa Tabuna wa unai na bakubakuna unai ye hetubu ye lauhekata, na taukaitalasam tauwoyaidi yo magari babadadiyao se laoma iya se henamaiyei se wane, “Gigibwali sahasahana unai teina laulau ta ku ginaulidi, yo kaiteya yom dudulai ne ye haiyawa?” ²⁴ Yesu ye hededelau kalidiyena ye wane, “Yau hinage kabo henamai hesau ya henamaiyeigomiu. Ena yogu henamai ta kwa bui, kabo ya hededeheemasalaha kalimiuwai kaiteya yona gigibwaliyena teina laulau ta ya ginaulidi. ²⁵ Hage, Yowane yona hebahebatiso paisowana meta haedi ye laoma, [o kaiteya ye mosei]? Yaubada ye mosei o tamowai se mosei?” Se bom kalidiyena se hetahetala se wane, “Taba ta wane, ‘Yaubada unai ye laoma’, kabo iya ye wane, ‘Idohagi to nige kwa kawamamohoiyei?’ ²⁶ Ena taba ta wane, ‘Tamowai udiyedi ye laoma’, meta boda ta ta matausiyeidi matawuwuna ede siya se kawamamohoi meta Yowane iya peloweta.” ²⁷ Unai ede se hededelau Yesu unai se wane, “Nige kabina ka kata.” Unai ye hededelau udiyedi ye wane, “Kabo yau hinage taba nige yomiu ya hedehehede gigibwali saha unai na laulau ta ya ginaulidi.”

Natu labui heyaheyasonidi

²⁸ Kabo Yesu ye hedehehede'uyo babadao wa udiyedi ye wane, “Hage kwa nuwatuhekasa, taubada hesau meta natunao labui. Huya hesau kabo ye hededelau taubaguna wa unai ye wane, ‘Natugu, ku lau yoda wine koyana unai ku paisowa.’ ²⁹ Ye wane, ‘Taba nige ya lau.’ Iyamo muliyena nuwana ye bui ede ye lau ye paisowa. ³⁰ Kabo tamadi wa ye lau natuna helabuina wa unai ye wane, ‘Ku lau yoda wine koyana unai ku paisowa.’ Natuna wa ye wane, ‘Aa, tamagu, kabo ya lau.’ Na iyamo nige ye lau.” ³¹ Kabo Yesu ye henamaiyeidi ye wane, “Natunao labui ne udiyedi, kaiteya iya tamana yona nuwatu ye lauwatani?” Se wane, “Natuna taubaguna wa.” Ede Yesu ye hededelau udiyedi ye wane, “Ya hedede-mamohoi kalimiuyena: Yababa tamowaidi doha takisi tautanotano yo sinesineo taudiyao se lokulokunegabaeidi moni hesabana, siya kabo se lusolabagunalau Yaubada yona basileiya unai na kabo komiu. ³² Matawuwuna Yowane ye laoma kalimiuyena mauli dudulaina kamwasana ye hekitagomiu, na nige kwa kawamamohoiyei, na takisi tautanotano yo sinesineo taudiyao se lokulokunegabaeidi moni hesabana, siya se bom mo se kawamamohoiyei. Yodi nuwabui ta kwa kita, na iyamo nige kwa nuwabui yo kwa kawamamohoi.”

Wine koyana taukitahetetena heyaheyasonidi
(Maleko 12:1-12, Luka 20:9-19)

³³ [Kabo Yesu yona hedehehede babadao wa udiyedi ye tubei ye wane,] “Teina hinage heyaheyasoni hesau ta kwa lapui. Tano hesau tanuwagana yona wine koyana ye kumai, ye ganahetakikili, yo yona wine kaniyodi kabatamtam yo koya yona kabayaiyaiwaina

numana ye ginaulidi. Kabo yona wine koyana wa ye moselaei tamowai hekadiyo udiyedi bena se kitahetete, na ye lau ye kadau. ³⁴ Wine huyagigidi nawalaina ye lage ede yona heyayai tauhaidi ye hetamalidi se lau wine koyana taukitakitahetetena wa udiyedi bena koya tanuwagana yona lausoiso se haidi. ³⁵ Na koya taukitahetetena wa heyayai tauhaidi wa se kabihekahinidi, hesau se bibigwadagwadai na hesau se koihemwaloi yo hesau se hekalaweku ede ye mwaloi. ³⁶ Koya tanuwagana wa yona heyayai tauhaidi katubadodi ye hetamalidi se lau, na koya taukitahetetena wa hinage laulau kesekesegana wa se ginauli kalidiyena. ³⁷ Unai gehegehena meta iya ye bom natuna ye hetamalilaei kalidiyena, na ye wane, 'Natugu ta kabo se hekasisiyei [*na yoma lausoiso dudulaina se mosei*].' ³⁸ Huyana koya taukitakitahetetena wa koya tanuwagana natuna wa se kita meta se wane, 'Teina tau ta meta iya tamana lauhedamaina ede, kwa laoma ta unuhemwaloi na yona gogo maudoidi ta haidi ta tanuwagaidi.' ³⁹ Ede se hai na koya ganana wa unai se gabahepesa na se koihemwaloi.

⁴⁰ Unai hage kwa nuwatui, ena wine koyana tanuwagana ye uyoma meta kabo saha ye ginauli wine koyana taukitahetetena ne udiyedi?" ⁴¹ Boda wa se wane, "Teina tamowai ta yodi laulau yabayababadi ta kabo ye haidi na ye unuhemwaloidi. Na wine koyana ne kabo ye mosehekawalaei taukitakitahetete hekadiyo udiyedi. Ena wine kaniyodi huyagigidi nawalaina ye lage, siya kabo gonowana wine kaniyodi wa yona teha se moselaei koya tanuwagana wa unai."

⁴² Yesu ye hededelau udiyedi ye wane, "Kulikuli tabudiyao udiyedi teina hedehegede ta kwa hasili o nige?"

'Taukabinuma weku se subu'usei wa

meta ye hemala kabakabinuma wekuna namwanamwana yo saesaekalilina.

Teina ta meta Yaubada ye ginauli,

na matadaena kitakitana meta ye namwakalili.'

(*Same 118:22, 23*)

⁴³ Unai ya hededelaowa kalimiuyena: Yaubada yona basileiya meta kabo kalimiuyena ye haigabaei na ye moselaei tamowai hekadiyo udiyedi, siya kabo se paisowai na kaniyo namwanamwadi se masalaha. ⁴⁴ Ena hesau ye bekudobi weku ne unai kabo ye talugodugodu, na ena weku ne ye bekudobi tamowai hesau kewanaena meta kabo ye kaihesolusolu."

⁴⁵ Taukaitalam tauwoyaidi yo Paliseya tamowaidiyao Yesu yona heyaheyasoni wa se lapuidi ede kabina se kata meta siya kadi hedehegede. ⁴⁶ Unai kamwasa se wase kabo taba idohagi na Yesu se hai, na iyamo boda wa se matauseidi matawuwuna ede siya se hedede meta iya peloweta.

22

Hetahetawasola kaikaigogona heyaheyasonina

(*Luka 14:15-24*)

¹ Kabo Yesu heyaheyasoni hesau ye hedede'uyoi tamowai lakilakidiyao wa kalidiyena ye wane, ² "Galewa basileiyana kana kao ede doha wasawasa hesau natuna yona tawasola kabinonohana ye kabinonoha. ³ Kabo yona heyayai tauhaina ye hetamalidi se lau kana taumana udiyedi na se hededelau udiyedi bena se laoma tawasola kaikaigogona ne unai, na iyamo se laukwatakata. ⁴ Ede yona heyayai tauhaina hekadiyo hinage ye hetamalidi se lau na ye wane, 'Kwa hededelau taulaoma ne kalidiyena meta kai yo yogu bulumakau sinisinibudi namwanamwadiyao ya ligadi yo ya kabinonohaidiko. Unai bena taba kwa laoma hetahetawasola kaikaigogona ta unai.' ⁵ Na taumana ne nige se lapulau tautauwasa wa udiyedi na se bom mo yodi nuwatu se lauwatanidi, hekadi se lau yodi koya na hekadi se lau yodi sitowa. ⁶ Yo hekadiyo heyayai tauhaidi wa se kabihekahinidi na se bibidi yo se koihemwaloidi. ⁷ Na wasawasa wa saha ye tubu

wa wasana ye lapui meta ye kouyalayalakalili. Unai yona tau'iyala tamowaidiyao ye hetamalidi se lau taukaiunu wa se koihemwaloidi yo yodi magari wa se gabu.

⁸ Kabo wasawasa wa ye hededelau yona heyayai tauhaidi wa udiyedi ye wane, 'Hetahetawasola kaina wa se kabinonohaiyako, na taumana ya hededelau udiyedi wa nige se mode, unai ede nige se laoma. ⁹ Unai kwa lau yoda magari ta kedana udiyedi na tamowai kwa kitadi ne meta kwa hededelau udiyedi bena se laoma hetahetawasola kaikaigogona ta unai.' ¹⁰ Kabo heyayai tauhaidi wa se lau magari lakilakina kedana maudoidi udiyedi tamowai namwanamwadi yo yabayababadi maudoidi se woyagogoidima ede kabahetahetawasola numana wa se hemwayau.

¹¹ Na kabo wasawasa wa ye laoma ye mwalae numa wa unai bena taumana wa ye kitadi, na luwadiyena tamowai hesau ye kita meta nige hetahetawasola kwamana ye likwa. ¹² Ede ye henamaiyei ye wane, 'Kehagu, idohagi to ku laoma teinai na hetahetawasola kwamana nige ku likwa?' Na tamowai wa nige saha hesau ye hedede. ¹³ Kabo wasawasa wa ye hededelau yona heyayai tauhaina hekadiyo udiyedi ye wane, 'Tamowai ta nimana yo kaena kwa paide na kwa gabahepesa masigili ne unai, temenai kabo ye doudou yo gadigadina ye kapuyahisidi.' ¹⁴ [Yesu yona hedehehede wa ye hegehe ye wane], "Yaubada tamowai ye yoganeidi wa se bado, na hisahisadi mo se talam ede se laoma."**

Takisi tolona henamaina unai Paliseya se kaipate bena Yesu se lupohai
(Maleko 12:13-17, Luka 20:20-26)

¹⁵ Na kabo Paliseya bodana wa se laomagogo na se koitalaliu bena taba idohagi na kabo Yesu se lupoi na yona hedehehede ye laupwano, na unai kabo se hegilu.

¹⁶ Kabo Paliseya bodana kadi hewahewaliyo yo Heloda kana boda tamowaidiyao se hetamalidi se lau Yesu unai, se wane, "Taulauhekata, kabina ka kata meta kowa laulau dudulai tamowaina yo mamohoi yo dudulaiyena Yaubada yona laulau miyamiyadi ku laulauhekataedi, matawuwuna tamowai maudoidi ku hekasisigogoidi na nige ku modelau kadi kao yo yodi laulau udiyedi. ¹⁷ Hage, ku hedede kalimaiyena yom nuwanuwatu ede saha: Gonowana takisi ka tole Sisa unai, o nige?"**

¹⁸ Na yodi nuwatu yababana wa Yesu kabina ye katako ede ye hededelau udiyedi ye wane, "Komiu taukailupolupo tamowaidiyao. Idohagi to kwa kaipate bena kwa lupohaigau? ¹⁹ Hage, takisi kabahemahemaisana monina hesau kwa hekitagau." Ede denali kesega iya se hekita. ²⁰ Na ye henamaiyeidi ye wane, "Teina kaiteya kana kao tautauna yo hesana?" ²¹ Se wane, "Sisa." Kabo ye hededelau udiyedi ye wane, "Saha Sisa yona meta kwa mosei Sisa unai, na saha Yaubada yona meta kwa mosei Yaubada unai." ²² Yesu yona hedehehede wa se lapui meta se nokokalili. Na kabo se laugabaei se lau.

Boita tolo'uyona hedehehedena
(Maleko 12:18-27, Luka 20:27-40)

²³ Mayadai kesekesegana ne unai Sadusiya bodana se laoma Yesu unai. Sadusiya tamowaidiyao meta boita tolo'uyona nige se kawamamohoiyei. Na se henamaiyei se wane, ²⁴ "Taulauhekata, Mose ye hedede meta ena tamowai hesau ye tawasola na nige natuna na ye boita, meta kana kaha kabo kwabuli ne ye tawasolai. Na ena natuna kabo se hedede ede iya meta kana kaha wa natuna. ²⁵ Sinebada hesau natunao tatao badodi haligigi-labui. Taubaguna ye tawasola nige natuna, na ye boita, ede kana kaha helabuina kwabuli wa ye tawasolai. ²⁶ Laulau kesekesegana ta ye tubu kalinawai ye

** **22:14:** Hisahisadi mo se talam ede se laoma: Yesu yona hedehehede meta ye wane, hisahisadi mo ye kaisunuwaidi. ** **22:17:** Yodi henamai wa unai Yesu se lupoi matawuwuna ede, ena Yesu ye hedede bena takisi se hemaisa Sisa unai, meta kabo Dius tamowaidiyao se koipiliyei, kaniyona ede Loma se subudi. Na ena ye wane, nige gonowana Sisa unai takisi se hemaisa, kabo Heloda kana bodao iya se koipiliyei, matawuwuna siya Sisa yona tamowai.

lau hehaiyonadi wa unai ye lau ye dobi ee gehena hehaligigi-labuidi wa unai, ²⁷ kabo waihiu wa hinage ye boita. ²⁸ Unai [*hage ku hedede na ka lapui:*] Tolo'uyo unai meta waihiu ta kaiteya mwanena ede? Matawuwuna ede tatao haligigi-labui wa waihiu ta se tawasolai.”

²⁹ Yesu ye hededelau udiyedi ye wane, “Yomi nuwanuwatu ne ye helaupwanogomiu, kaniyona ede kulikuli tabudi yo Yaubada yona gigibwali meta nige kabidi kwa kata. ³⁰ Matawuwuna ede tolo'uyo huyana unai meta taba nige tamowai se tawasola'uyo, yo taba nige natudiyao se hetawasola'uyoidi, na tautolo'uyo meta siya kabo kadi kao ede doha galewa aneludiyao. ³¹ Na boita tolo'uyona hedehededenana unai meta Yaubada kalinana kulikuli tabudi udiyedi kwa hasilidi e nige, ³² doha ye wane, ‘Yau meta Abelahama yona Yaubada, Isako yona Yaubada, yo Yakobo yona Yaubada hinage.’ (*Esodo 3:6*) [*Tenem huyana ne unai tamowai haiyona ta buluma unai se boitako.*] Na Yaubada meta nige tauboiboita yodi Yaubada, na iya taumaumauli yodi Yaubada. [*Unai ye masalaha meta tamowai haiyona ta siya ede sola se maumauli Yaubada matanaena.*]” ³³ Yona lauhekata hedehedededi boda wa se lapuidi meta se siliyatakalili.

Laugagayo saesaekalilina

(*Maleko 12:28-34, Luka 10:25-28*)

³⁴ Paliseya bodadi se lapui meta Sadusiya bodana wa Yesu ye hededehemwanoudiko ede se laomagogoi, ³⁵ na luwadi ne unai hesau meta iya laugagayo kabina taukatakilili na ye henuwa bena henamai hesau unai Yesu ye lupoi. ³⁶ Ede ye wane, “Taulauhekata, laugagayo sahasahana meta iya laugagayo lakilakikalilina ede?”

³⁷ Yesu ye hededelau unai ye wane, “Guiyau yom Yaubada ku gadosisiyei ma nuwam maudoina, yaluwam maudoina, yo yom nuwanuwatu maudoina hinage. ³⁸ Teina meta iya laugagayo bagubagunana yo lakilakikalilina ede. ³⁹ Yo helabuina ede doha bagubagunana ne: Kam kaha hesau ku gadosisiyei doha kowa ku bom ku gadosisiyei'uyoigo. ⁴⁰ Mose yona laugagayo yo peloweta yodi kulikuli maudoidi wuwudi ede teina laugagayo labui ta.”

Keliso meta iya kaiteya natuna?

(*Maleko 12:35-37, Luka 20:41-44*)

⁴¹ Yesu Paliseya wa ye kitadi se totolo ede ye henamaiyeidi ye wane, ⁴² “Yomi nuwatu ede saha, Keliso meta iya kaiteya? Yo iya kaiteya natuna?” Se wane, “Iya meta Dawida natuna.” ⁴³ Yesu ye hededelau udiyedi ye wane, “Idohagi to Yaluwa Tabuna yona gigibwaliyena Dawida ye hedehedede na Keliso ye kawaguiyauyei? Doha ye wane,

⁴⁴ ‘Guiyau ye hededelau yogu guiyau unai ye wane,

“Nimatutugu unai ku tuli

kana siga kam waiunu ya toledi

kaem guninaena se hemala kaem kabatoledi.”

(*Same 110:1*)

⁴⁵ Ena taba Dawida ye kawaguiyauyei, idohagi to bena iya Dawida natuna?” ⁴⁶ Nige gonowana hesau ye hededebui Yesu unai, na tenem mayadaina ne unai na ye lau meta nige tamowai hesau ye nuwabayao na henamai hesau unai bena Yesu ye lupoi'uyoi.

23

Yesu tamowai ye guguyaidi tauwoyawoya yodi kailupolupo tabu se miyamiyaedi

(*Maleko 12:38-40, Luka 11:43,46, Luka 20:45-47*)

¹ Na kabo Yesu ye hededelau boda yo yona hekahekatao wa udiyedi ye wane, ² “Laugagayo taulauhekataena yo Paliseya bodana, siya meta Mose yona kulikuli tabudiyao taukitahekanamwanamwaedi yo taulauhekataedi. ³ Unai saha se hededededi ne bena kwa miyawatanidi, na laulau saha se ginaulidi meta tabu kwa laulauyeidi, matawuwuna ede saha se laulauhekataedi meta nige se

miyamiyawatanidi. ⁴ Laugagayo bayabayaodi se ginaulidi bena taba tamowai se miyawatanidi, siya meta doha bahebahe polopolohedi se tolesaedi tamowai kewadiyena na se baheidi, iyamo siya nige gonowana nimadi se helelelaedi bena se saguidi.

⁵ Ginauli maudoidi se ginaulidi meta bena kabo unai tamowai se kitahenamwadi. Laugagayo hedehededediyao kulikulidi kaba'usaidi ne se helakigaibuidi na se paihepatudi debadi yo nimadi udiyedi,** yo kadi kwama sinosinodi se helohagaibuidi, ⁶ yo kaikaigogo lakilakidiyao yo sunago udiyedi meta se henuwa bena kabatuli namwanamwadi udiyedi se tuli. ⁷ Na ena se lau kabalokulokune bakubakudi udiyedi meta se henuwa bena tamowai se laoma ma hekasisidi se lautokiyeidi na se kawayauwedo yo se kawatanuwaga** udiyedi.

⁸ Na komiu tabu se kawatanuwaga kalimiuyena, matawuwuna kami tanuwaga kesega ede yau, na komiu meta doha boga kesega. ⁹ Tabu tanoubu ta tamowaina hesau kwa katai meta iya tamamiu, matawuwuna tamamiu kesega ede galewa ne unai. ¹⁰ Yo hinage komiu tabu hesamiu se katai meta taulauhekata, matawuwuna tauhekatagomiu kesega ede Keliso. ¹¹ Kaiteya luwamiuyena ye saekalili meta iya bena ye hemala yomi heyayai tauhaina. ¹² Kaiteya ye bom ye hesae'uyoi meta Yaubada kabo ye toledobiyei, na kaiteya ye nuwadobidobi meta Yaubada kabo iya ye toleisini.”

*Yesu tauwoyawoya ye guguyaidi
(Maleko 12:40, Luka 11:39-52 yo 20:47)*

¹³⁻¹⁴ [Kabo Yesu ye wane,] “Ahani mo komiu, Mose yona laugagayo taulauhekataena bodana yo Paliseya bodana, komiu meta taukailupolupo tamowaidiyao! Kabo kamkamna lakilakina kwa hekalu! Tamowai yodi lulau galewa basileiyana meta kwa gudukaliliyei. Komiu taba nige kwa lulau galewa basileiyana, na kaiteyadi se henuwa bena se lusolalau meta kwa hekahekaiyawasidi.**

¹⁵ Ahani mo komiu, Mose yona laugagayo taulauhekataena bodana yo Paliseya bodana, komiu meta taukailupolupo tamowaidiyao! Kabo kamkamna lakilakina kwa hekalu! Kwa lau teha maudoina kwa tauhetakikilidi bena tamowai kwa nuwakoidi, na ena hesau ye nuwabui na ye hemala kami kaha hesau, yona laulau kabo se yababakalili na kabo komiu, na iya kabo ye lau kaiwa kalakalasina doha komiu.

¹⁶ Ahani mo komiu, tauwoyawoya matagibugibudi! Kwa hedede kwa wane, ‘Ena tamowai hesau ye kaigwala Numa Tabuna ne unai meta yona kaigwala ne nige mamohoina, na ena tamowai hesau ye kaigwala Numa Tabuna golena ne unai meta nige gonowana ye bui'uyoi.’ ¹⁷ Komiu taumatagibugibu yo tamowai yauyaulediyao! Ginauli saha meta ye saekalili, gole ne o Numa Tabuna? Matawuwuna Numa Tabuna debanaena ede gole ne ye a'a.** ¹⁸ Yo hinage kwa hedede kwa wane, ‘Ena tamowai hesau ye kaigwala kaitalasam kabagabuna ne unai meta nige mamohoi, na ena tamowai hesau ye kaigwala kaitalasam udiyedi meta yona kaigwala ne nige gonowana ye bui'uyoi.’ ¹⁹ Komiu tamowai matagibugibudiyao! Kaitalasam gogodiyao kaba-hetabudi** ede kaitalasam kabagabuna. Unai kaitalasam kabagabuna ye saekalili na

** **23:5:** Laugagayo hedehededediyao kulikulidi kaba'usaidi ... se paihepatudi debadi yo nimadi udiyedi: Kabikabi ta laugagayona meta Yaubada unai ye laoma. Dutelonomi 6:8 unai ta hasili. ** **23:7:** Kawatanuwaga meta kalina Giliki unai Mataiyo ye kuli, Labi, iya ede Dius kalinadi Alamaiki unai ye hai. ** **23:13-14:** Kulikuli beyabeyadi hekadiyo lausoi 14 hinage se kuli doha tenem: Ahani mo komiu, Mose yona laugagayo taulauhekataena bodana yo Paliseya bodana, komiu meta taukailupolupo tamowaidiyao! Wabuwabu kwa lupoidi na yodi numa kwa haidi kwa tanuwagaidi. Na kabo kwa lau tamowai matadiyena yomi tapwalolo kwa helohadi. Unai hekamkamna lakilakikalilina kabo kwa lobai. ** **23:17:** Ye a'a kaniyona hesau ede, Yaubada yona. Dimdimyena se kuli, *holy*. Tabu hededehemasalahana ku hasili. ** **23:19:** Kaitalasam gogodiyao kabahetabudi kaniyona ede, kaitalasam kabagabuna debanaena kaitalasam gogodiyao ne ede Yaubada yona. Hetabu hededehemasalahana ku hasili.

kabo kaitalasang gogodiyao. ²⁰ Unai ede ena tamowai hesau ye kaigwala kaitalasang kabagabuna ne unai, meta hinage ye kaigwala ginauli maudoidi kewana ne unai se toledi wa udiyedi. ²¹ Na ena kaiteya ye kaigwala Numa Tabuna ne unai, meta hinage ye kaigwala Yaubada unai, iya meta Numa Tabuna ne unai taumiya. ²² Yo ena kaiteya ye kaigwalasae galewa ne unai meta ye kaigwala Yaubada yona telona unai, yo hinage telona ne unai tautuli ne.

²³ Ahani mo komiu, Mose yona laugagayo taulauhekataena bodana yo Paliseya bodana, komiu meta taukailupolupo tamowaidiyao! Laugagayo lakilakidi kwa tolehesuwaladi, na laugagayo gagigagilidi kwa toleisinidi. Doha yomi koya uwa'uwadi gagilidiyao** udiyedi yomi taiti kwa toledi, na laugagayo nuwanuwatudi lakilakidi nige kwa lauwatanidi, siya ede laulaududulai, katekamkamna, yo sunuma. Taba laugagayo gagilidi ne tabu kwa nuwaluluhiyeidi na hinage laugagayo lakilakidi ta bena kwa miyawatanidi. ²⁴ Komiu tauwoyawoya matagibugibudiyao! Kami waila udiyedi nabugala kwa hekonagabaeidi na iyamo kamela meta kwa tonoli.**

²⁵ Ahani mo komiu, Mose yona laugagayo taulauhekataena bodana yo Paliseya bodana, komiu meta taukailupolupo tamowaidiyao! Kami keyaka yo gaeba** dageladiyao kwa deulinamwanamwaedi, na kalodiyao ne udiyedi meta mahimahihi yo nuwatu'uyo se mwayau. ²⁶ Komiu Paliseya matagibugibudiyao! Kami keyaka yo gaeba kalodiyao ne kwa deulibagunaeidi na dageladiyao ne kabo hinage se a'a.

²⁷ Ahani mo komiu, Mose yona laugagayo taulauhekataena bodana yo Paliseya bodana, komiu meta taukailupolupo tamowaidiyao! Matawuwuna ede kami kao meta doha bwayabwaya dagelana se deulihe'a'a na se pokahuheposiposi na iyamo kalona ne unai meta boha yo tauboiboita siliyadi yo ginauli bikibikidi udoi'udo'i ye mwayau. ²⁸ Unai, komiu kami kao ede doha bwayabwaya ne: Tamowai se kitagomiu meta bena komiu miyamiya dudulaidi tamowaidiyao, na iyamo nuwakalomiu yena meta laulaulupolupo yo nuwatu yabayababadiyao se mwayau.

²⁹ Ahani mo komiu, Mose yona laugagayo taulauhekataena bodana yo Paliseya bodana, komiu meta taukailupolupo tamowaidiyao! Peloweta bwayabwayadi kwa kabinamwanamwaedi yo hekihekinoidiyao kwa hetolodi, yo laulaududulai tamowaidiyao bwayabwayadi kwa hepasanamwanamwaedi. ³⁰ Na kwa wane, 'Taba kama kulutubu maidamaiyao ka miya meta peloweta yodi hekamkamnadi ne unai taba nige ka kabisagusaguidi.' ³¹ Yomi hedehedede ta unai kwa bom kwa hededehemasalaha'uyoigomiu meta komiu peloweta taukoihemwaloidi wa kadi isimulitao ede. ³² Kulutubumiyao laulau yababadi saha se ginaultoledi wa, taba kwa laedi kwa hegehemolosiyeidi! ³³ Komiu mwata yo mwata yabayababadi natudiyao! Idohagi kabo [Yaubada yona] hekamkamna magaina kwa wasabugabaei? ³⁴ Unai kabo peloweta yo tamowai sibasibadiyao yo taulauhekata ya hetamalidiwa kalimiuwai. Hekadi kabo kwa koihemwaloidi yo kwa hesataulodi, na hekadi kabo sunago kalodiyena kwa sapidi yo kwa henakuhepesadi se lau teha udoi'udo'i udiyedi. ³⁵ Teina laulau ta debanaena laulaududulai tamowaidiyao kaiyaulina ta unai se unuidi wa kwasinadi giludi kabo se dobima kewamiuyena, laulaududulai tamowaina Abela kwasinana unai ye hetubu ye dobima ee Belakiya natuna Sakaliya unai, iya ede kabakaitalasang yo Numa Tabuna duwaduwalidiyena kwa koihemwaloi'usei wa. ³⁶ Ya hededemamohoi kalimiu yena: Ginauli maudoidi ta giludi kabo se dobima kewamiuyena na kamkamna lakilakina kabo kwa lobai."

** **23:23:** Koya uwa'uwadi gagilidi meta siya ede kai kabahepanedi. ** **23:24:** Kamela kwa tonoli: Kamela meta laugagayo, Dius tamowaidi nige gonowana se kaidi (Lewitikasi 11:4). Nabugala yo kamela hedehedede ta kaniyona ede, Yababa gagilidi kwa kaihaleidi, na yababa lakilakidi kwa ginaultidi. ** **23:25:** Keyaka yo gaeba, siya ede nuwadi yo yodi mauli heyahayasonidi.

*Yesu Yelusalema tamowaidi ye katekamkamnaedi
(Luka 13:34-35)*

³⁷ [Kabo Yesu ye wane,] “Ae Yelusalema! Yelusalema ee! Kowa peloweta taukoi-hemwaloidi yo tamowai Yaubada ye hetamalidi kalimyena meta ku hekalawekudi. Huya maudoina meta ya henuwa bena natumwao ya kabigogoidima doha kamkam sinadi natunao ye kabigogoidi pepenao gunidiyena, na iyamo komiu nige kwa henuwa. ³⁸ Unai sola kwa kita, ‘Yaubada kabo yomi magai ye nuwagabaei na nige tamowaina.’ (Yelemaiya 22:5, Same 69:26) ³⁹ Na ya hededelaowa kalimiuwai ta, nige gonowana kwa kita'uyoigau kana sigana ee kwa wane, ‘Ka hedebasaego, kowa Guiyau hesanaena ku laoma!’”

Huya gehegehedi hedehedededi

24

Mataiyo 24 yo 25

*Numa tabuna kabo ye ulugwaligwali
(Maleko 13:1-2, Luka 21:5-6)*

¹ Numa tabuna bakubakuna wa unai Yesu ye dalahai ye laulau na yona hekahekatao wa se laoma ede se yogahekaiyawasi na se hededelau unai se wane, “Sola Numa Tabuna yo numana hekadiyo ne yodi kabikabidi yo kadi wawali ne ku kitadi!” ² Na ye hededelau udiyedi ye wane, “Ginauli maudoidi ta kwa kitadiko. Ya hededemamohoi kalimiuyena: Taba nige weku hesau ye miya yona hali weku kewanaena, na maudoidi meta kabo se ulugwaligwali.” **

*Kamkamna huyahetubudi
(Maleko 13:3-13, Luka 21:7-19)*

³ Se lau Olibe koyana unai se lage, ede Yesu ye lau ye tuli na yona hekahekatao wa se bom se laoma iya unai na se henamaiyei se wane, “Taba yomai ku hedehedede, kaiuyana kabo laulau ku hededededi wa se tubu, na yom uyoma yo tanoubu yona huyagehe hekihekinoidi ede saha?”

⁴ Yesu ye hededelau udiyedi ye wane, “Bena matamiyao se nega na tabu tamowai hesau ye lupohaigomiu. ⁵ Tamowai se bado kabo hesaguyena se laoma na se hedehedede meta siya Keliso, na tamowai se bado kabo se lupohaidi. ⁶ Iyala wasadiyao yo hinage iyala wasalupolupodiyao kabo kwa lapuidi, na tabu udiyedi kwa matausi. Ginauli doha teina kabo se tubu na nige gonowana ta kaihaleidi, na iyamo tanoubu ta yona huyagehe meta sola. ⁷ Magai hesau bodana yo magai hesau bodana kabo se haihewahewaiunu'uyoidi. Basileiya hesau yo basileiya hesau kabo hinage se iya'iyala'uyoidi. Yo hinage hasahasali lakilakidi yo mwanikuniku kabo se tubu teha udoi'udoi udiyedi. ⁸ Ginauli saha se tubu ne meta ginauli nuwamatamatausidiyao sola kabo se laoma ne yodi kabahetubu ede.” **

⁹ Na kabo se hekamkamnagomiu yo se unuhemwaloigomiu, yo magai maudoidi bodadiyao kabo se subugomiu yau debaguyena. ¹⁰ Tenem huyana ne unai boda hekana kabo Guiyau sunumana se laugabaei, ede kadi kahao se hewaiunudi yo kadi se walohai. ¹¹ Pelowetalupolupo se bado kabo se masalaha na bodalakilaki kabo se lupohaidi. ¹² Yababa udoi'udoi se lakikalili, debanaena tamowai kadi kahao gadosisidi nuwadiyena kabo se gagili yo se gehe. ¹³ Na ena kaiteya ye tolobayao ye lau ee pilipili maudoidi sigadi ne unai, meta Yaubada kabo ye hemaui. ¹⁴ Na basileiya

** 24:2: Weku maudoidi kabo se ulugwaligwali: Yelusalema hededehe masalahana ku hasili. ** 24:8: Lausoisoi ta Mataiyo kalina Giliki unai heyaheyasoni unai ye kuli, Teina ginaulidiyao ta meta doha sine diyadiyakana ye kamkamna huyana ye hetubu bena ye labalaba.

wasana namwanamwana se lauguguyaei kaiyaulina teha maudoina unai na tamowai maudoidi se lapui, na kabo huya gehegehena ye laoma.

¹⁵ Na Numa Tabuna unai kabo ginauli nuwamatamatausina kwa kita ye totolo, iya magai tauheyababana, na iya ede peloweta Daniyela ye hededehehemasalah'a'usei wa** – lausoiso ta tauhasilina meta kaniyona bena ye nuwatulobai. Na huyana ginauli ne ye tubu ¹⁶ kabo kaiteyadi teha Yudeya unai taumiya bena se yabubu se sae kuduli ne. ¹⁷ Tabu tamowai hesau numa kewana unai na ye pesadobi yona numa kalona unai gogo saha hesau ye hai na ye wasabu. ¹⁸ Yo ena tamowai hesau yona koya unai meta tabu ye uyo magai kana kwama nimalohalohana hesabana. ¹⁹ Na sinesineo diyadiyakadi yo sinesineo labalabahauhaudi ya nuwanuwatuidi, [*matawuwuna tenem mayadaina ne kabo ye pilipikalili kalidiyena.*] ²⁰ Na kwa tapwalolo [*Yaubada unai*] yomi huyawasabu meta tabu huyagwagwama o Sabatiyena.** ²¹ Matawuwuna kamkamna ye tubu ne kabo ye lakikalili, nige doha beyabeyana tanoubu yona huyatubu unai ye laoma teina huya ta, yo mulina ne unai hinage taba nige ye tubu'uyo. ²² Ena Yaubada tenem mayadaidi ne nige ye hekubwadima, meta nige gonowana tamowai hesau mauli ye lobai. Na iyamo yona kaisunuwa tamowaidi debadiyena tenem huya ne ye hekubwadi. ²³ Tenem huyana ne unai, ena tamowai hesau ye hededelaowa kalimiuwai ye wane, 'Kwa kitalaoma, Keliso ede inai!', o hesau ye wane, 'Iya ede temenai!', meta tabu kwa kawakawamamohoiyeidi. ²⁴ Kabo keliso lupolupodi yo pelowetalupolupo udoi'udo'i se masalahama na laulau gigigigibwalidi yo kabanoko saesaedi se ginaulidi bena kabo tamowai se lupohaidi. Yo hinage se kaipate bena Yaubada yona kaisunuwa tamowaidiyao se lupohaidi, na iyamo nige gonowadi. ²⁵ Teina ta meta ya hededehesi-basibanonohaigomiu.

²⁶ Unai, ena tamowai hesau ye hededelaowa meta Keliso ede balabalagaibu ne unai, tabu kwa laulau menai. Yo ena ye hededelaowa meta bena iya ede numa hesau dahalana wadawadamna unai, tabu kwa kawakawamamohoiyei. ²⁷ Matawuwuna Tau Natuna yona laoma doha namanamali, ye sili teha kaluwabu ne unai na dawayana gonowana ye masalahama teha yalasi unai. ²⁸ Gonogonowana doha, kaiteya teha unai suisui boiboitana panena, kabo manuwa kaikaitaudi se lagegogoi menai.

²⁹ Nuwadubu mayadaidi ne se gehe na nige bayaona
'kabo mahana ye masigili

yo waikena kabo nige ye dawaya,
galewa ne kipwaladi kabo se beku,

yo galewa ginaulidi yodi kabamiya Yaubada kabo ye nukuidi.** (*Aisaiya 13:10 yo 34:4*)

³⁰ Na kabo huyagehena ne unai Tau Natuna yona laoma hekihekinoidi kabo se taumasalahama galewa ne unai, yo tanoubu tehana maudoina tamowaidiyao se dousiyasiyayau, na kabo Tau Natuna se kita ye lagema galewa yadana udiyedi ma gigibwalina yo ma didigana saesaena. ³¹ Na bwagigi kabo se yuhi na daguguna ne unai kabo yona anelu ye hetamalidi se lau bena teha hasi yaumaidi yodi kabatowalaoma udiyedi yo tanoubu ta maudoina unai yona kaisunuwa tamowaidiyao se laedima.”

³² [*Yesu ye hedede'uyo ye wane,*] “Kwa kitalau kaiwa ne** unai, iya heyaheyasonina ta kabo ye hekatagomiu: Ena lagadi ne udiyedi lugudi hauhaudi se kini meta kabina kwa kata ede huyamahamahana ye hanahanauma. ³³ Gonogonowana doha huyana ginauli maudoidi ta kwa kitadi se tubu, kabo kabina kwa kata meta [*Tau Natuna*] ye

** **24:15:** Hededepeloweta wa Daniyela 9:27 yo 11:31 yo 12:11 udiyedi ta hasilidi. ** **24:20:** Huyagwagwama unai meta nabu yo kabaita, unai ye pilipikalili taukadau udiyedi. Na Sabatiyena nige gonowana se kadau.

** **24:29:** Galewa ginaulidi yodi kabamiya Yaubada kabo ye nukuidi: Hedehedede ta Mataiyo yona kulikulina meta ye kuli, galewa gigibwalidi kabo ye nukuidi. ** **24:32:** Kaiwa ne meta Isalaela yodi *fig* kaiwana. Bosibosi hededehehemasalahana ku hasili.

hanahanaumako, iya ede kawakeda ne unai. ³⁴ Ya hededemamohoi kalimiuwai: Teina isi ta taba nige ye gehe ye lau ee ginauli maudoidi ta se tubu. ³⁵ Galewa yo tanoubu kabo se gehe, na yogu hedehedede meta taba nige se gehe.”

Mayadaina yo mahanana nige kabina ta kata
(Maleko 13:32-37, Luka 17:26-30,34-36)

³⁶ [Kabo Yesu ye wane], “[Tau Natuna yona huya'uyoma] mayadaina yo mahanana nige hesau kabina ye kata, galewa aneludi hinage nige kabina se kata, Natuna hinage nige kabina ye kata,** na Tamana iya ye bom mo. ³⁷ Tau Natuna yona laoma ne meta gonogonowana doha [beyabeyana] Nowa yona huya mayadaidi wa udiyedi. ³⁸ Huyana sola nige dibwali'utu'utu ye tubu meta tamowai se kaikai yo se numanuma, yo hinage tatao yo sinesineo se tawatawasola ye lau ee kana siga Nowa [ma natunao] se mwalaesae waga wa unai. ³⁹ Tamowai wa nige se nuwatulobai saha kabo ye tubu kalidiyena kana siga dibwali'utu'utu wa ye dididobima ede ye yaluhaidi. Na Tau Natuna yona huya'uyoma kana kao kabo doha tenem mayadaidi ne. ⁴⁰ Huyana ne unai tatao labui se paipaisowa koya kesega unai. Yaubada kabo kesega ye hai na kesega kabo ye laugabaei. ⁴¹ Sinesineo labui witi kabagiligiliyena se paipaisowalabulabui meta hesau kabo Yaubada ye haigabaei, na hesau kabo ye miya.

⁴² Unai bena kwa silasilawa yo kwa nonoha matawuwuna ede yomi Guiyau yona uyoma mayadaina meta nige kabina kwa kata. ⁴³ Ginauli kesega ye masalahakalili: Ena taba numa tanuwagana kabina ye kata boniyaiyena mahana saha unai kabo taukaiwahali ye laoma bena ye kaiwahali, kabo ye silasilawa yo yona numa ye kitahetete na taukaiwahali tabu ye lusae yona numaena. ⁴⁴ Unai komiu hinage bena kwa nonoha, matawuwuna Tau Natuna yona uyoma mahanana kabo ye hesiliyatagomiu.”

Numa taukitahetetena sibasibana
(Luka 12:42-48)

⁴⁵ “Hage, heyayai tauhaina laulaududulaina yo sibasibana yona kabikabi kwa nuwautidi. Kana tanuwaga iya ye kaisunuwai yona numa kalonawai heyayai tauhaidi maudoidi taukitahetetedi yo kadi kai ye mosemoseidi kaikai mahanana dudulaina unai. [Na kabo kana tanuwagaye dalahai ye lau ye kadau.] ⁴⁶ Yona huya'uyoma unai, ena yona heyayai tauhaina wa ye lobai yona paisowa unai ye paipaisowanamwanamwa, kabo heyayai tauhaina ne gonowana ye gwauyala. ⁴⁷ Ya hededemamohoi kalimiuvena: Heyayai tauhaina ne kabo ye hai na ye tole yona gogo maudoidi taukitahetetedi.

⁴⁸ Na taba heyayai tauhaina ne yona nuwanuwatu se yababa na ye wane, ‘Kagu tanuwaga taba nige ye lagemwamwayauma’, meta idohagi? ⁴⁹ Nuwana ye hetubu yona hali heyayai tauhaidi wa ye kabihenayaidi yo hinage numanuma bayabayaodi taunumanumadi maiyanao se kaikai yo se numanuma. ⁵⁰ Kana tanuwaga ne kabo ye lage'uyoma na yona heyayai tauhaina wa kabo [ye siliyata, matawuwuna] kana tanuwaga yona uyoma mayadaina yo mahanana meta nige ye nuwatu. ⁵¹ Tanuwaga wa yona heyayai tauhaina wa ye hekamkamkaliliyei yo ye hai ye tolelaei taukailupolupo yodi kabakamkamna magaina unai kabo ye doudou yo gadigadina ye kapuyahisidi.”

25

Hasahasalao saudoudoi heyahayasonidi

¹ [Yesu yona hedehedede wa ye tubei ye wane,] “Galewa basileiyana heyahayasonina hesau ede doha teina: Hasahasalao saudoudoi yodi lampa se haidi na se lau tautawasola

** 24:36: Natuna hinage nige kabina ye kata: Teina hedehedede ta kulikuli bagubagunadi udiyedi nige se kuli. Iyamo pepwa kulikulidiyao beyabeyadi se bado udiyedi hedehedede ta se kuli, yo hinage Maleko 13:32 unai ta lobai. Unai kabina ta kata meta teina mamohoi Yesu kalinana.

tamowaina se launayanayai bena se hailobai. ² Taudi haligigi meta naganagadi na hinage taudi haligigi meta se sibasiba. ³ Naganagadiyao wa yodi lampa se baheidi na nige yodi kelesini hetulanidi se baheidi. ⁴ Na sibasibadiyao wa yodi lampa se baheidi yo yodi kelesini initoledi hinage.

⁵ Tautawasola tamowaina wa yona laoma ye pahili ede hasahasalao maudoidi wa kamnadi se yababa yo matadi se kenokeno ede se keno.

⁶ Boniyai duwaduwalina unai tamowai hesau ye heyoheyoga ye wane, 'Tautawasola tamowaina wa ye lagemako, kwa laoma kwa hailobai!'

⁷ Hasahasalao saudoudoi wa se kenotolo ede yodi lampa se nukutonogidi. ⁸ Kabo naganagadiyao wa se hededelau sibasibadiyao wa udiyedi se wane, 'Kelesini teuna unai kwa saguigai! Yoma lampa ta bena se boso.' ⁹ Na sibasibadiyao wa se wane, 'Nigele, yoma kelesini ta gonogonowamai, nige gonowana ka saguigomiu. Na kwa lau kabalokulokune unai yomi kelesini kwa hemaisadi.' ¹⁰ Naganagadiyao haligigi wa se lauko bena yodi kelesini se hemaisadi, na kabo tautawasola tamowaina wa ye lage. Ede sibasibadiyao haligigi se nonohako wa maidanao se lau hetahetawasola kaikaigogona unai. Se lusae, na kabo keda taुकitahetetena keda wa ye gudui.

¹¹ Muliyena kabo hasahasalao hekadi wa se lage ede se yogalau tautawasola tamowaina wa unai se wane, 'Taubada, taubada, keda ku soke na ka mwalaewa!' ¹² Na ye hededelau udiyedi ye wane, 'Ya hededemamohoi: Nige kabimiu ya kata.' "

¹³ [Na Yesu ye hededehasahasaidi ye wane,] "Unai bena kwa silasilawa, matawuwuna ede Tau Natuna yona laoma mayadaina yo mahanana meta nige kabina kwa kata."

Heyayai tauhaina haiyona heyahayasonidi

(Luka 19:11-27)

¹⁴⁻¹⁵ [Yo hinage Yesu heyahayasoni hesau ye hedede ye wane,] "Galewa Basileiyana meta doha tamowai hesau bena ye kadau ye lau kedalohaloha, na yona heyayai tauhaidi ye yogagogoidima na kesega kesega yona paisowa kana kaoyena yona moni ye soiyeidi kalidiyena. Heyayai tauhaina tamowaina bagubagunana unai moni baikidi haligigi ye mosei, helabuina moni baikidi labui ye mosei, na hesau unai moni baikidi kesega ye mosei. Unai yodi paisowa ye moseidi na yona kabakadauyena ye kadau. ¹⁶ Heyayai tauhaina bagubagunana wa yona moni baikidi haligigi wa ye hepaisowa na ye helaki'uyoi ede baikidi haligigi ye lobai'uyoi. ¹⁷ Na taupaisowa hesau yona moni baikidi labui ye hai wa ye lau ye hepaisowa na ye helaki'uyoi ede baikidi labui ye lobai'uyoi. ¹⁸ Na heyayai tauhaina hesau wa yona moni baikidi kesega wa ye hai na ye lau, bwatano unai duha ye sala na kana tanuwaga yona moni wa ye tolewadam.

¹⁹ Hualohaloha mulinaena heyayai tauhaidi kadi tanuwaga wa ye uyoma na ye yogagogoidima na ye henamaiyeidi idohagi yona moni wa yodi hepahepaisowadi. ²⁰ Kabo moni baikidi haligigi tauhaina wa ye laoma ye wane, 'Guiyau, moni baikidi haligigi ku haidima wa ya hepaisowadi ede hinage hagahagana baikidi haligigi ya lobai.' ²¹ Kana tanuwaga wa ye wane, 'Kowa heyayai tauhaina namwanamwana, ya sunumaego matawuwuna moni gagilina gonowana ku kitahetete. Unai kabo ya tolego ginauli lakilakidi ku kitahetetedi. Ku laoma yo yogu gwayuaya ta unai ta gwayalakesega.'

²² Kabo moni lakina baikidi labui tauhaina wa hinage ye laoma ede ye wane, 'Guiyau, moni baikidi labui ku haidima wa ya hepaisowadi ede hinage hagahagana baikidi labui ya lobai.' ²³ Kana tanuwaga ye wane, 'Kowa heyayai tauhaina namwanamwana, ya sunumaego, matawuwuna moni gagilina gonowana ku kitahetete. Unai kabo ya tolego ginauli lakilakidi ku kitahetetedi. Ku laoma yo yogu gwayuaya ta unai ta gwayalakesega.'

²⁴ Na kabo moni lakina baikidi kesega tauhaina wa ye laoma ede ye wane, 'Guiyau, kabim ya kata meta kowa tamowai yona laulau yabayababana, matawuwuna ede

haedi nige saha hesau ku kumai meta kabo unai ku kelikeli, yo haedi nige witi likena ku hesulu meta kabo unai kaniyona ku tanogogo. ²⁵ Unai ya matausi ede ya lau bwatanoyena yom moni wa ya puluhiwadam, unai saha kowa yom wa meta iya ede teina.' ²⁶ Ede kana tanuwaga wa ye hededelau unai ye wane, 'Kowa tamowai yababana yo miyamiyagaibuna! Ku hedede meta kabigu ku kata ena haedi nige saha hesau ya kumai meta unai ya kelikeli, yo haedi nige witi likena ya hesulu meta udiyedi kaniyodi ya tanotanogogo?' ²⁷ Idohagi to yogu moni ne nige ku lau ku tole moni taukitakitahetetedi udiyedi na yogu uyoma ta unai kabo ya hai'uyoi yo hagahagana hinage?' ²⁸ [*Kabo ye hededelau yona heyayai tauhaidi hekadiyo udiyedi ye wane,*] 'Moni ne kalinawai kwa haigabaei na kwa moselaei moni baikidi saudoudoi tauhaina ne unai. ²⁹ Kaiteyadi saha kalidiyena meta kabo se koihepwata'uyoidi na ginauli saha kalidiyena wa kabo ye lakikalili. Na kaiteyadi nige saha kalidiyena meta kabo ginauli saha gagilina kalidiyena ne se haigabaei.' ³⁰ Na ye wane, 'Teina tamowai ta, iya heyayai tauhaina yababakalilina, kwa gabahepesadobiyei masigili ne unai! Menai kabo ye doudou yo gadigadina ye kapuyahisidi.' "

Yaubada yona hekasa mayadaina

³¹ "Huyana Tau Natuna kabo ye uyoma ma didigana yo ma namanamalina, yo yona anelu maudoidi maidanao, meta kabo yona telona wasawasana yo saesaekalilina unai ye tuli yo ye hemala wasawasa. ³² Na basileiya maudoidi tamowaidiyao kabo se laomagogo kalinawai na tamowai wa ye hekasadi, doha suisui taukitahetetedi yona suisui ye hekasadi, mamoe teha hesau unai ye toledi yo gouti teha hesau unai. ³³ Mamoe kabo ye toledi tehatutuna unai, yo gouti ye toledi tehaseuseulina unai.

³⁴ Na kabo wasawasa wa ye hededelau nimatutuna tamowaidiyao wa udiyedi ye wane, 'Kwa laoma, komiu tamagu yona hededehehenamwa tamowaidiyao! Huyana sola nige tanoubu ye tubu meta tamagu galewa basileiyana ye ginaulinonohaiyako komiu hesabamiu. Kwa laoma na unai kwa miya. ³⁵ Huyana ya hasali meta kai kwa haiyama ya kai, yo gadogu ye magu meta waila kwa haiyama ya numa, na yau laolaoma, iyamo kwa yogaisinigau yomi numaena. ³⁶ Huyana nige yogu kaleko meta kaleko yogu kwa haidima, ya kasiyebwa meta kwa kitahetetegau, yo hinage numatutuguduyena se tolegau meta kwa laoma kwa kaitaumaigau.'

³⁷ Kabo miyamiyadudulai tamowaidiyao wa se hededelau unai se wane, 'Guiyau, kaiuyana ka kitago ku hasali na kai ka haiyawa, gadom ye magu na waila ka haiyawa ku numa? ³⁸ Yo kaiuyana ka kitago kowa laolaoma na ka yogaisinigo, yo nige yom kaleko na kaleko yom ka haidiwa? ³⁹ Hinage kaiuyana ka kitago ku kasiyebwa o numatutuguduyena na ka laowa ka kaitaumaigo?' ⁴⁰ Wasawasa wa kabo ye hedede bui kalidiyena ye wane, 'Mamohoi, na ya hedede'uyo kalimiuyena: Ena teina laulau ta hesau kwa ginauli kagu kahao dobidobidi ta hesau unai meta kwa ginauli yau kaliguwai.'

⁴¹ Kabo ye hededelau tehaseuseulina unai tautolo wa udiyedi ye wane, 'Kwa tausuwala kaliguwai, komiu tamagu yona hededeheyababa tamowaidiyao. Kwa lau kaiwa kalakalasina nige yona kababoso ne unai, tamagu ye kabinonohai diyabolo yo yona anelu hesabadi. ⁴² Matawuwuna ede ya hasali na nige kai kwa haiyama ya kai, gadogu ye magu na nige waila kwa haiyama ya numa. ⁴³ Yau laolaoma na nige kwa yogaisinigau, nige yogu kaleko, na nige kwa hekalekogau, ya kasiyebwa yo numatutuguduyena se tolegau na nige kwa laoma kwa kaitaumaigau.'

⁴⁴ Na kabo se wane, 'Guiyau, kaiuyana ka kitago ku hasali, gadom ye magu, kowa laolaoma, nige yom kaleko, ku kasiyebwa, yo se tolego numatutuguduyena, na nige ka saguigo?' ⁴⁵ Ede ye hededelau udiyedi ye wane, 'Ya hededemamohoi kalimiuyena: Ena nige laulau ta hesau kwa ginauli tamowai dobidobidi ta hesau unai meta hinage nige

saha hesau kwa ginauli yau kaliguwai.’ ⁴⁶ Kabo se lau kamkamna nige yona kabagehe unai, na miyamiyadudulai tamowaidiyao wa kabo se lau mauli nige kana siga unai.”

26

Yesu unuina koitalaliuna

(Maleko 14:1-2, Luka 22:1-2, Yowane 11:45-53)

¹ Yesu yona lauhekata hedehedededi wa mulidi ne unai kabo ye hededelau yona hekahekatao wa udiyedi ye wane, ² “Kabina kwa kata meta mayadai labui mo na kabo Taukiuli Henuwaisinina, na tenem mayadaidi ne udiyedi Tau Natuna kabo se mosegabaei na se hesataulo.”

³ Na taukaitalasam tauwoyaidi yo magai wa babadadiyao se lagegogoima taukaitalasam saesaena hesana Kaiyapasi yona numa unai, ⁴ na se koitalaliu idohagi kabo lupu hesau se ginauli na unai kabo Yesu se hai na se unuhemwaloi. ⁵ Na se wane, “Nige teina Taukiuli Henuwaisinina huyana ta unai, matawuwuna ede boda ta yo kita kalidaena kabo hetalagegagega lakilakina ye tubu.”

Waihiu hesau Betaniya unai Yesu ye heyausi

(Maleko 14:3-9, Yowane 12:1-8)

⁶ Huya hesau Betaniya unai, Yesu meta tamowai hesau hesana Simona yona numana. Simona hesana hesau ede Taulepela. ⁷ Yodi huyakaikai unai meta waihiu hesau yausi panena namwanamwana yo maisana lakilakina ye bahei na ye laoma ede Yesu kuluna kewanaena ye ini.

⁸ Yona hekahekatao wa se kita meta se kouyalayala yo se hetalapili, se wane, “Idohagi to yausi ta ku kaiheyagaibui. ⁹ Teina yausi ta taba ta lokunei kabo moni lakilakina ta hai na ta mosei deha tamowaidiyao udiyedi.”

¹⁰ Yodi nuwatu wa Yesu kabina ye kata ede ye hededelau udiyedi ye wane, “Idohagi to waihiu ta kwa hemohemode. Teina ta meta laulau namwanamwana ye ginauli kaliguyena. ¹¹ Deha tamowaidiyao kabo huya maudoina maidamiyao, na yau meta nige gonowana huya maudoina maidamiu. ¹² Taugu ta ye heyausi meta ye kabinonohaigau toletotetau hesabana. ¹³ Ya hededemamohoi: Kaiyaulina maudoina ta unai, ena haedi wasa namwanamwana ta se lauguguyaei, meta waihiu ta saha ye ginauli ne wasana kabo hinage se hasili iya kabahenuhenuwaisinina.”

Yudasi Yesu kana ye walohai

(Maleko 14:10-11, Luka 22:3-6)

¹⁴ Tenem huyana ne unai kabo saudoudoi-labui wa luwadiyena hesau hesana Yudasi Isakaliyota ye lau taukaitalasam tauwoyaidi ¹⁵ ye henamaiyeidi ye wane, “Moni lakina saha kabo kwa haiyama, ena Yesu ya mosegabaeiyawa kalimiuyena?” Unai moni siluba badona ede 30** se mosei. ¹⁶ Huyana ne unai ye lau meta ye hetubu ye kaikewasipwa na taba kamwasa saha unai kabo Yesu ye mosegabaei kalidiyena.

Yesu maiyana hekahekatao Taukiuli kaina se kai

(Maleko 14:12-21, Luka 22:7-13,21-23, Yowane 13:21-30, 1 Kolinito 11:23-26)

¹⁷ Pwalawa Nige Yistina Henuwaisinina mayadaina bagubagunana unai, hekahekatao wa se laoma Yesu se henamaiyei se wane, “Kaiteya tupwa ku henuwa kabo unai Taukiuli kaina ka kabinonohai?” ¹⁸ Ede ye hededelau udiyedi ye wane, “Kwa lau magailaki ne** unai tamowai hesau ya hededeyako kalimiuyena wa kabo kwa lobai. Kwa hededelau unai kwa wane, “Taulauhekata ye wane, “Yogu huya ye hanahanauma. Unai yau yo yogu hekahekatao kabo yom numaena Taukiuli kaikaigogona ka kai.” ’ ’ ”

** **26:15:** Moni siluba meta sekeli (moni). Moni lakina wa Sakaliya 11:12 unai ta hasili.

** **26:18:** Magailaki

ne, iya ede Yelusalema.

¹⁹ Unai hekahekatao wa se lau na saha Yesu ye hedede wa se ginauliwatani na Taukiuli Henuwaisinina kaina wa se kabinonohai.

²⁰ Ye meimeilahi ede Yesu yo yona hekahekatao saudoudoi-labui wa se laomakesega na se kaikaigogoi. ²¹ Yodi kaikai wa unai Yesu ye hededelau udiyedi ye wane, “Ya hededemamohoi kalimiuyena: Kesega luwamiu ta unai kabo kagu ye walohai.” ²² Yona hedehede wa unai nuwadiyao se yababakalili ede kesega kesega ye henahenamailau Yesu unai ye wane, “Guiyau, yau, e nigele?” ²³ Yesu ye hededebui ye wane, “Yoda kaikaigogo ta unai luwamiuyena kaiteya nimanaena pwalawa ye hai na ye hedakwado-biyei kada gaeba ta unai meta iya kabo kagu ye walohai.” ²⁴ [*Hinage ye wane,*] “Tau Natuna yona boita kulikuli tabuna unai se kulinonohaiyako wa meta kabo ye laoma ye mamohoi. Na ahani mo tauwalohai tamowaina ne, kabo kamkamna lakilakikalilina ye hekalu. Taba ye namwa mo sinana iya tabu ye labasi.” ²⁵ Ede Yudasi iya kabo Yesu kana ye walohai wa ye wane, “Labi, ku nuwatui meta yau, e nige?” Na Yesu ye hededelau unai ye wane, “Kowa ku bom ku hedede'uyoigo.”

²⁶ Yodi kaikaigogo wa unai, Yesu pwalawa ye hai, ye lautoki, ye kihi, na ye mosei yona hekahekatao wa udiyedi na ye wane, “Kwa hai kwa kai, teina ta yau taugu.”

²⁷ Waina keyakana ye hai, ye lautoki, na ye mosei yona hekahekatao wa udiyedi na ye wane, “Maudoimiu ta kwa numa. ²⁸ Teina ta yau kwasinagu, na unai kabo Yaubada yona talam hauhauna ye ginauli kalimiuwai. Kwasinagu ta kabo ye didi tamowai maudoidi yodi yababa nuwatugabaedi hesabana. ²⁹ Ya hededelaowa kalimiuyena, taba nige wine kaniyona masina ta ya numa'uyoi kana sigana ee Tamagu yona basileiya unai komiu yo yau kabo ta numa'uyoi.”

³⁰ [*Yodi kaikaigogo gehena wa unai*] wanalautoki hesau se wanai na kabo se pesa se lau Olibe koyana unai.

Yesu ye hededenonohai meta Petelo kabo iya ye uhalaei

(Maleko 14:27-31, Luka 22:31-34, Yowane 13:36-38)

³¹ Na Yesu ye hededelau udiyedi ye wane, “Teina boniyai ta unai saha kabo ye tubu kaliguyena debanaena maudoimiu kabo kwa wasabugabaigau, kaniyona ede kulikuli tabuna unai se kulinonohaiyako ye wane,

‘Mamoe taukitahetedi kabo ya unuhemwaloi,

na yona mamoe yawoina kabo se wasabugwaligwali.’

(Sakaliya 13:7)

³² Na yogu tolo'uyo mulina ne unai kabo ya bagunalau Galili [*na kwa laowa kabo menai ta hailobai*].”

³³ Petelo ye hededebui ye wane, “Ena kagu kahao ta maudoidi se laugabaego, iyamo yau taba nige.”

³⁴ Ede Yesu ye hededelau unai ye wane, “Ya hededemamohoi kalimyena: Teina boniyai ta unai sola nige kamkam hakiyana ye dou, na ma haiyona kowa kabo ku uhalaeigau.”

³⁵ Na kabo Petelo ye hedehede'uyo ye wane, “Ena kowa to yau bena kabo ta boita, iyamo yau taba nige ya uhalaeigo!” Hinage hekahekatao hekadi wa yodi hedehede meta gonogonowana.

Getesemani unai Yesu ye tapwalolo

(Maleko 14:32-42, Luka 22:39-46)

³⁶ Na kabo Yesu maiyana hekahekatao wa se lau Getesemani.** Menai ye hededelau udiyedi ye wane, “Inai kwa babawa na yau ya lau temenai ya tapwalolo.” ³⁷ Ede Petelo yo Sebedaiyo natunao labui ye woyaidi na se lau. Menai kabo Yesu ye hetubu ye nuwakamkamna yo ye nuwanuwatukalili. ³⁸ Na kabo ye hededelau udiyedi ye wane,

** 26:36: Getesemani koyana meta Olibe kudulina dedekana unai.

“Nuwagu ta ye kamkamnakalili gonowana kabo unai ya boita, unai inai kabo komiu yo yau ta silasilawa.”

³⁹ Yesu ye tausigilau kabo ye guliyaboyabomdobi tano ne unai na ye tapwalolo ye wane, “Tamagu, taba gonowana teina kamkamna keyakana ta kaliguyena ku haigabaei. Na tabu yau yogu nuwatu ya lauwatani, na kowa yom nuwatu mo bena ya lauwatani.”

⁴⁰ Ye uyoma meta yona hekahekatao wa ye lobaidi se kenoko, ede ye hededelau Petelo unai ye wane, “[*Kagu kahao,*] idohagi to nige gonowana komiu yo yau ta silasilawa awa kesega? ⁴¹ Kwa silasilawa yo kwa tapwatapwalolo, kabo taba nige noho kwa hekalo na unai kwa beku. Yaluwamiu ta se talam, na iyamo taumiyo ta se basabasa.”

⁴² Helabuina ye uyo ye tapwalolo ye wane, “Tamagu, ena nige kamwasa hesau unai bena kamkamna keyakana ta ku haigabaei, na ku henuwa bena ya numa, takiyede yom nuwatu kabo ya lauwatani.”

⁴³ Ye uyoma ye lobai'uyoidi ma kenodi, matawuwuna ede matadiyao wa se kenokenokalili. ⁴⁴ Ede ye laugabaeidi na ye uyo na huya hehaiyonana ye tapwalolo, yona tapwalolo wa meta hedehedededi kesekesegadi udiyedi ye tapwalolo'uyo.

⁴⁵ Ye uyo yona hekahekatao wa udiyedi na ye hededelau udiyedi ye wane, “Komiu sola kwa kenokeno yo kwa kaikaiyawasi? Kwa kita, mahanana ede ye hanahanaumako, na Tau Natuna kabo se moselaei yababa tamowaidiyao nimadiyena. ⁴⁶ Kwa tolo na ta lau, kagu tauwalohai wa ye lageko.”

Yesu huyahaina

(Maleko 14:43-50, Luka 22:47-53, Yowane 18:1-12)

⁴⁷ Yesu sola ma hedehededena, na Yudasi ye lage, iya meta saudoudoi-labui wa hesauna. Bodalakilaki maiyanao se laoma ma kekelepadi yo yodi kepata hinage se baheidi. Boda ta meta taukaiyalasam tauwoyaidi yo magari babadadiyao se hetamalidima.

⁴⁸ Na tauwalohai wa meta maiyadi se koitalaliuko kabo hekihekinoi saha ye ginauli na tamowaina ne unai se kitalobai na se hai, ye wane, “Kaiteya tamowai ya sumtai ne meta iya bena kwa hai'usei ede.” ⁴⁹ Yudasi ye laududulai ye lau Yesu unai na ye wane, “Labi, yauwedo!” na kabo ye sumtai. ⁵⁰ Yesu ye hededelau unai ye wane, “Kehagu, saha hesabana ku laoma ta meta ku ginauli!” Kabo boda wa se lau Yesu se hai.

⁵¹ Temenai Yesu kana kahao wa hesau yona kelepa ye hai ede taukaiyalasam saesaena yona heyayai tauhaina tamowaina hesau beyana ye bolihai. ⁵² Yesu ye hededelau unai ye wane, “Yom kelepa ne ku tole'uyoi yom kabahaina ne unai, matawuwuna ede kaiteyadi kelepa se hepaisowa unai se lulu meta kabo hinage kelepaena se boita. ⁵³ Nige ku nuwatulobai meta gonowana ya yogasae Tamagu unai na anelu bodadiyao** saudoudoi-labui ye hetamalidima? ⁵⁴ Na idohagi kabo kulikuli tabudi hedehededediyao se laoma se mamohoi, matawuwuna se hededenonohai meta teina laulau ta kabo ye tubu.”

⁵⁵ Mahanana ne unai Yesu ye hededelau boda wa udiyedi ye wane, “Ma kekelepamiyo yo kepata kwa baheidi na kwa laoma, kana kao doha bena taukaiunu kwa kelebese. Huya maudoina meta Numa Tabuna bakubakuna unai ya laulauhekata na nige kwa kabihekahinigau. ⁵⁶ Na teina ginauli maudoidi se tubu ta udiyedi meta Peloweta yodi kulikuli kabo se laoma se mamohoi.”

Na kabo hekahekatao wa Yesu se wasabugabaei.

Sunedeli unai Yesu se helauhetala

(Maleko 14:53-65, Luka 22:54,63-71, Yowane 18:13-14,19-24)

** **26:53:** Anelu bodadiyao hedehededena mamohoina meta legiyona, iya ede Loma yodi tau'iyala bodadi, na unai tau'iyala badodi 6,000. Unai Yesu gonowana anelu badodi 72,000 ye yoganeidi.

⁵⁷ Boda wa Yesu se hai na se laei taukaitalasam saesaena hesana Kaiyapasi yona numaena. Menai meta laugagayo taulauhekataena yo magari babadadiyao** se laom-agogoiko na se nayanaya. ⁵⁸ Na Petelo meta Yesu yo taulaeina wa ye hemuliwatanidi kana siga se lage taukaitalasam saesaena yona numa bakubakuna unai. Ye mwalaesae na heyayai tauhaidi hekadi maidanao se tuli, na Petelo ye kaikaikewa kabo saha ye tubu Yesu unai.

⁵⁹ Taukaitalasam tauwoyaidi yo Sunedeli tamowaidi maudoidi, siya Yesu kana mata se wasenei na hedehede lupolupodiyao udiyedi se hegilu na unai bena kabo se unuhemwaloi. ⁶⁰ Na tauhededelupolupo se bado yodi hedehede se hedede, na iyamo nige kana mata hesau se lobai kabo unai se hegilu. ⁶¹ Na gehena ne unai kabo tauhedehede labui se wane, “Teina tamowai ta ye wane, ‘Yaubada yona Numa Tabuna yau gonowana ya hetatagwaligwali na mayadai haiyona unai kabo ya kabi'uyoi.’”

⁶² Na kabo taukaitalasam saesaena wa ye tolo na ye hededelau Yesu unai ye wane, “Kabo hedehede saha hesau ku hedede o nige? Teina tamowai ta kam hedehede maudoidi se hedede ta mamohoidi o nige?” ⁶³ Na Yesu nige saha hesau ye hedede. Ede taukaitalasam saesaena wa ye hededelau Yesu unai ye wane, “Yaubada maumaulina hesanaena ku kaigwala na ku hededelaoma kalimaiyena: Kowa Keliso, Yaubada Natuna, o nige?” ⁶⁴ Yesu ye talam ye wane, “Aa, saha ku hedede ne meta mamohoi, na ya hededelaowa maudoimiu kalimiuyena, huya matada ne unai kabo Tau Natuna kwa kita Yaubada Saesaekalilina nimakahatuna unai ye tutuli na galewa yadana kewanaena ye laolaoma.” ⁶⁵ Kabo taukaitalasam saesaena wa ye bom kana kwama ye pulisidi na ye wane, “Teina tamowai ta meta Yaubada ye hededeheyababa! Taba nige tamowai hesau ta wasenei'uyoi na bena tamowai ta hedehedena hesau ye hedede'uyoi. Yona hededeheyababa meta kwa lapuidiko. ⁶⁶ Unai yomi hineli ede saha?” Boda wa se wane, “Ye namwa mo taba ye boita.”

⁶⁷ Na kabo debana wa se kaikaisoi yo nimadiyena se biteli, yo hekadi se laupapali ⁶⁸ na se wane, “Keliso, ku hededepeloweta kalimaiyena, kaiteya ye biteligo?”

Petelo Yesu ye uhalaei

(Maleko 14:66-72, Luka 22:55-62, Yowane 18:15-18,25-27)

⁶⁹ Na Petelo meta ye tutuli bakubaku wa unai, kabo heyayai tauhaina waihiu hesau ye laoma iya unai na ye wane, “Kowa hinage Yesu Galili tamowaina tauhemuliwatanina hesau.” ⁷⁰ Na boda wa matadiyena ye uhala ye wane, “Saha ku hetahetala me nige kabina ya kata.”

⁷¹ Ede ye lau gana kedana wa unai, na menai heyayai tauhaina waihiuna hesau Petelo ye kita na ye hededelau tamowai hekadi udiyedi ye wane, “Teina tamowai ta meta Yesu Nasaleta tauna tauhemuliwatanina hesau.” ⁷² Na kabo ye kaigwala na ye uhala'uyo ye wane, “Temeta tamowai ne meta nige kabina ya kata.”

⁷³ Yawalana ye lau na temenai tautotolo wa se lau Petelo unai na se wane, “Yom hedehede daguguna meta doha Galili tamowaina, unai kabina ka kata meta kowa kadi kaha hesau.” ⁷⁴ Kabo Petelo ye bom ye hededeheyababa'uyoi yo ye kaigwala na ye wane, “[Ena ya uhalalupolupo meta giluna Yaubada kabo ye tole kaliguyena.] Temeta tamowai me nige kabina ya kata!” Na mahanana ne unai kamkam hakiyana ye dou.

⁷⁵ Ede Petelo Yesu yona hedehede wa ye nuwatuidi ye wane, “Sola nige kamkam hakiyana ye dou na ma haiyona kabo ku uhalaeigau.” Unai nuwana wa ye yababakalili na ye pesa ye lau dagela wa unai ye doumwalomwaloi.

** **26:57:** Taukaitalasam yo laugagayo taulauhekataena yo magari babadadiyao, siya meta Sunedeli tamowaidiyao.

27

*Yesu se laei Pilato matanaena
(Maleko 15:1, Luka 23:1-2, Yowane 18:28-32)*

¹ Malatomtom gagilina unai taukaitalasam tauwoyaidi maudoidi yo magari babadadiyao yodi hineli se ginauli bena kabo idohagi na Yesu se mosegabaei se unuhemwaloi. ² Ede se pai na se woyai se lau na se moselaei Gabana Pilato unai.

*Yudasi ye hegadosoha'uyoi
(Apostolo 1:18-19)*

³ Huyana ne unai Yesu kana tauwalohai Yudasi ye kita meta Yesu kabo se unuhemwaloi, ede ye nuwakuhali na moni siluba badona 30 wa ye mose'uyoidi taukaitalasam tauwoyaidi yo magari babadadiyao wa udiyedi. ⁴ Na ye wane, "Mamohoi, laupwano ya ginauli, matawuwuna ede tamowai ta nige kana mata hesau na kana ya walohai." Se hededelau unai se wane, "Nige ka modeigo, temeta kowa yom pilipili." ⁵ Unai Yudasi moni wa ye tuusaedi Numa Tabuna kalona wa unai na ye dalahai ye lau ede ye gadosoha.

⁶ Taukaitalasam tauwoyaidi moni wa se haidi na se wane, "Yoda laugagayo unai ye hedede meta nige gonowana moni ta ta usaidi moni kabatoledi unai, matawuwuna ede moni ta tamowai kwasinana maisana." ⁷ Se koitalaliu na moni wa se hai ede walata taulaulauginauli yona tano se hemaisa na ye hemala laolaoma tamowaidiyao yodi bwayabwaya. ⁸ Tenem debanaena ede huyana ne unai na ye laoma ee teina mayadai ta meta tano wa hesana se tole ede Kwasina Tanona. ⁹ Ede Peloweta Yelemaiya yona hedehedede wa ye laoma ye mamohoi, ye wane,

"Moni siluba badona 30 Isalaela tamowaidiyao se talamyeyi tamowai maisana, ¹⁰ se hai na walata taulaulauginauli yona tano se hemaisa. Saha se ginauli ta unai meta Yaubada saha ye hedede kaliguwai wa ye laoma ye mamohoi." (*Sakaliya 11:12-13, Yelemaiya 19:1-3 yo 32:6-9*)

*Pilato Yesu ye helauhetala
(Maleko 15:2-5, Luka 23:3-5, Yowane 18:33-38)*

¹¹ Yesu se woyalaei Gabana Pilato unai na ye henamaiyei ye wane, "Kowa Dius yodi wasawasa?" Ede Yesu ye wane, "Aa, saha ku hedede ne mamohoi." ¹² Na kabo taukaitalasam tauwoyaidi yo magari babadadiyao yodi hedehedede udiyedi se hegilukaliliyei, na iyamo nige saha hesau ye hedede. ¹³ Na Pilato Yesu ye henamaiyei ye wane, "Teina kam hedehedede maudoidi ta ku lapuidi, o nige?" ¹⁴ Na iyamo Yesu nige saha hesau ye hedede, unai Pilato ye siliyata yo ye nokokalili.

¹⁵ Na bolimai kesega kesega, Taukiuli Henuwaisinina unai, gabana yona kabikabi meta numatutuguduyena taumiya tamowaina hesau kabo Dius tamowaidiyao se kaisunuwai na ye yailigabaei. ¹⁶ Tenem huyana ne unai wasalaulau tamowaina hesau hesana Balabasi numatutuguduyena ye miyamiya. ¹⁷ Na huyana boda wa se laomagogoi ede Pilato ye henamaiyeidi ye wane, "Kaiteya tamowai kwa henuwa kabo ya yailigabaei, Balabasi o Yesu, iya hesana kwa katai ede Keliso?" ¹⁸ Matawuwuna Pilato kabina ye kata meta kaikalomagigili debanaena na Yesu se moselaei iya kalinawai.

¹⁹ Na Pilato tauhelauhetala yona kabatuli unai ye tutuli na mwanena wasa ye hetamalilaei unai ye wane, "Tamowai me nige kana giluhesau, unai tabu saha hesau ku ginauli kalinawai. Matawuwuna boni iya ya kenosuwaiyei, na kenosuwaigu wa unai ya matausikalili."

²⁰ Na taukaitalasam tauwoyaidi yo magari babadadiyao bodadi wa se nuwakoidi na se kaibwada Pilato unai taba Balabasi ye yailigabaei na Yesu se unuhemwaloi. ²¹ Na Gabana boda maudoidi wa ye henamaiyeidi ye wane, "Teina taudi labui ta, kaiteya kwa henuwa kabo ya yailigabaei?" Ede se wane, "Balabasi." ²² Ede Pilato ye henamaiyeidi ye

wane, “Na saha kabo ya ginauli Yesu unai, iya hesana hesau ede Keliso?” Na boda wa se yogasae se wane, “Ku hesataulo.” ²³ Pilato ye henamaiyeidi ye wane, “Kana mata saha, o yababa saha ye ginauli?” Na boda wa ma kalinalakilakidi se wane, “Ku hesataulo.”

²⁴ Na Pilato ye nuwatulobai meta nige gonowana dudulai hesau ye lobai, na boda wa se hetubu se hetalagegaga. Unai waila gaebana ye hai na boda wa matadiyena ye nimadeuli na ye wane, “Tamowai ta kwasinana giluna meta yau nige kagu giluna. Na polohena maudoina meta komiu kalimiuwai.” ²⁵ Na boda wa se wane, “Kwasinana giluna meta kai ma natumaiyao kewamaiyena.”

²⁶ Ede Pilato Balabasi ye yailigabaei na ye hededelau tau'iyala tamowaina hesau wipiyena Yesu ye pidili na kabo se laei bena se hesataulo.

Tau'iyala Yesu se talatalawasiyei
(Maleko 15:16-20, Yowane 19:2-3)

²⁷ Na kabo gabana wa yona iyala tamowaidiyao Yesu se hai se laei yodi kabamiya numana lakilakina unai. Kabo tau'iyala bodana maudoina se yogagogoidima na Yesu se tolohetakikili. ²⁸ Kana kwama se haigabaeidi na wasawasa kwamana pulupululuna se heluwui. ²⁹ Na kabo kaiwa gwaligwalina laganao se heidi doha kolona na se tolesaei kuluna ne unai, yo kaikaiwa se mosei nimatutuna ne unai ye kabi, na se tulibono matanaena na se talatalawasiyei se wane, “Yauwedo, Dius yodi wasawasa!” ³⁰ Yo hinage se kaikaisoi na kaikaiwa wa se hai na kuluna wa unai se koikoieyi. ³¹ Se talatalawasiyei ye gehe, kabo kwama pulupululuna wa se haigabaei na iya kana kwama wa se heluwui'uyoi. Na kabo se woyalaei bena se hesataulo.

Yesu se hesataulo
(Maleko 15:21-32, Luka 23:26-43, Yowane 19:17-21)

³² Yelusalema bena kabo se pesagabaei na Sailini tamowaina hesau hesana Simona se lobai, na se lauhelili ede Yesu yona sataulo wa ye bahei. ³³ Se lau magai hesau hesana Golagota unai se lage. Golagota kaniyona ede mwayalu magaina. ³⁴ Temenai waina yo mulamula nisanisana se hebwali na se mosei Yesu bena ye numa. Na ye numatonogi ede nige ye henuwa ye numa. ³⁵ Na kabo Yesu se hesataulo, na mulina ne unai kana kwama wa se kaiheyaidi na se soiyeidi. ³⁶ Kabotaki se tuligogoi na Yesu se kitahetete. ³⁷ Kabahegiluna hedehededenana se kuli [molumolu** hesau unai] na kulubawana ne unai se tutuhepatu, ye wane, “TEINA TA YESU, DIUS YODI WASAWASA.”

³⁸ Laulau yabayababadi tauginaginulidi labui** maidanao se hesataulodi, hesau tehatutuna unai na hesau tehaseuseulina ne unai.

³⁹ Tamowai se sae se dobi meta se kulukulukwade na se hagahagasiyei yo se wane, ⁴⁰ “Kowa Numa Tabuna bena ku hetatagwaligwali na mayadai haiyona unai kabo ku kabi'uyoi, hage, ku hemaui'uyoigo. Ena kowa Yaubada Natuna, sataulo ne unai ku pesadobima!”

⁴¹ Taukaitalasam tauwoyaidi, laugagayo taulauhekataedi, yo magai babadadiyao hinage hedehedede wa kesekesegana unai se hagahagasiyei. ⁴² Se wane, “Tamowai hekadiyo ye saguidi na nige gonowana iya ye bom ye sagui'uyoi. Na ye hedede bena iya kita Isalaela yoda wasawasa! Taba sataulo ne unai ye pesadobima kabo ka kawamamohoiyei. ⁴³ Yona maui maudoina unai Yaubada ye sunumaei, na hinage ye wane, ‘Yau Yaubada Natuna.’ Na ena mamohoi Yaubada iya ye gadosisiyei meta taba ye hesaguhai!” ⁴⁴ Na laulau yabayababadi tauginaginulidi labui wa hinage Yesu se hagahagasiyei.

** **27:37:** Molumolu meta kaiwa tupwana se tadihetabataba. Yodi kabakuli gogona Mataiyo nige ye kulihe-masalaha, nuwana pepwa se hepaisowa. ** **27:38:** Laulau yabayababadi tauginaginulidi labui ta yababa saha se ginauli meta nige ye masalaha. Nuwana kedaena tamowai se lauguduguidi na yodi gogo se kaiwahlidi, o nuwana Loma yodi loina se haikawayagalaai.

*Yesu yona boita**(Maleko 15:33-41, Luka 23:44-49, Yowane 19:28-30)*

⁴⁵ Mayamayadailaki unai magai wa maudoina ye masigili ye lau ee meimeilahi awa hehaiyonana unai. ⁴⁶ Tenem mahanana ne unai Yesu ye yoga ma kalinalakilakina ye wane, “*Eloi, eloi, lama sabatani?*” Kaniyona ede, “Yogu Yaubada, yogu Yaubada, idohagi to ku nuwagabaeigau ta?”

⁴⁷ Na temenai tautotolo hekadiyo kalinana wa se lapui ede se wane, “Eliya ye yogayoganei.”

⁴⁸ Dedekana ne unai tautotolo wa yona hedehedede ta se lapupwanoli, ede hesau ye heloi ye lau balo ye hai, ye hedakwa winega unai na ye paihepatu kaikaiwa hesau unai na ye helelesaei Yesu bena ye numa. ⁴⁹ Na maudoidi wa se wane, “Ku laugabaei! Hage ta kita, kabo Eliya ye laoma ye sagui?”

⁵⁰ Kabo Yesu ye yoga'uyo ma kalinalakilakina, na yawasina ye mosegabaei.

⁵¹ Tenem mahanana ne unai meta Numa Tabuna woyona kalekona** ye taigalilabuiyei kewa unai ye dobi guni, yo tano ye tabutabubu yo weku se taigali.

⁵² Bwayabwaya se tasoke na Yaubada yona tamowai se boitako wa meta se bado se tolo'uyo. ⁵³ Kadi bwayabwaya se pesagabaeidi na Yesu yona tolo'uyo mulina ne unai se lusae Yelusalema na se taumasalaha tamowai gwaudi udiyedi.

⁵⁴ Huyana iyala taubagunaena tamowaina yo yona tau'iyala maidanao Yesu se kitakitahetete wa mwanikuniku yo ginauli saha se tubu wa se kitadi ede se matausikalili na se wane, “Mamohoi, iya Yaubada Natuna!”

⁵⁵ Sinesinebadao bodana kedalohalohawai se totolo na se kaikaikewa. Siya ede sinesineo maiyadi Yesu Galili unai se laoma wa, na yona paisowa ne unai saha udiyedi ye deha, kabo udiyedi se sagui. ⁵⁶ Bodadi wa unai meta Maliya Magadala waihiuna, yo Maliya Yamesi yo Yosepa sinadi, yo hinage Sebedaiyo natunao sinadi.

*Yesu se tole bwayabwayaena**(Maleko 15:42-47, Luka 23:50-56, Yowane 19:38-42)*

⁵⁷ Ye hetubu ye meimeilahi ede Yosepa Alimatiya tamowaina, iya tau gogogogona yo Yesu tauhemuliwatanina hesau, ⁵⁸ ye lau Pilato ye kaibwada taba Yesu sinalena ye hai na ye tole bwayabwayaena. Ede Pilato ye hedede na sinale wa se mosei Yosepa unai. ⁵⁹ Ede Yosepa sinale wa ye hai na kaleko posiposina hauhauna unai ye suma, ⁶⁰ na yona bwayabwaya hauhauna weku unai ye salanonohaiyako wa unai ye tole. Na kabo weku lakilakina ye builaei bwayabwaya wa kedana ye buigudui na ye laugabai. ⁶¹ Bwayabwaya wa tehalauna ne unai Maliya Magadala waihiuna yo Maliya hesauna wa se tutuli na se kaikaikewa.

Tau'iyala tamowaidiyao Yesu bwayabwayana se kitahetete

⁶² Na kabinonoha mayadaina mulina ne unai** mala ye tom kabo taukaitalasang tauwoyaidi yo Paliseya tamowaidiyao se lau Pilato unai ⁶³ na se wane, “Tanuwaga, teina taukailupolupo ta yona hedehedede hesau ka nuwatui. Huyana sola ma maumaulina meta ye hedede ye wane, ‘Mayadai haiyona mulidi ne unai kabo ya tolo'uyo.’ ⁶⁴ Unai ku hededelau yom tau'iyala tamowaidiyao udiyedi bena bwayabwaya ne se kitahetete-namwanamwaei kana siga mayadai hehaiyonana ne unai, madai yona hekahekatao se laoma na sinalena ne se hai se laei na se hededelau tamowai udiyedi meta bena ye tolo'uyoko. Na yodi kailupolupo mulimulitana ne kabo ye yababakalili na kabo

** **27:51:** Numa Tabuna woyona kaleko meta Numa Tabuna duwaduwalina unai se hekabasi na unai bili labui se ginaulidi. Bili bagubagunana hesana se tole Teha tabuna, na helabuina ede Teha tabukalikalilina. Hebelu 9:1-15 ye hededehemasalahanamwanamwa. ** **27:62:** Kabinonoha mayadaina mulina ne unai: Mayadaina ne, iya ede

Dius yodi Sabati yo Taukiuli Henuwaisinina mayadaina bagubagunana.

bagubagunana wa.”** 65 Ede Pilato ye talam ye wane, “Tau'iyala tamowaidi kwa haidi na kwa lau bwayabwaya ne se kitahetetenamwanamwaei.” 66 Unai se lau bwayabwaya wa kawamatana buiguduna wa se dedeligudugudui na tau'iyala tamowaidiyao se toledi bwayabwaya wa se kitahetete.

28

Yesu yona tolo'uyo

(Maleko 16:1-8, Luka 24:1-12, Yowane 20:1-10)

¹ Sabati mayadaina wa ye gehe na mayadaina bagubagunana** unai mala ye hetubu ye uyali na Maliya Magadala waihiuna maiyana Maliya hesauna wa se lau bena bwayabwaya wa se lohei. ² Mahanana ne unai meta mwanikuniku lakilakina, na Guiyau yona anelu galewa ne unai ye dobima na bwayabwaya buiguduna wekuna wa ye buihesuwala na kewana ne unai ye tuli. ³ Kana kao meta ye namanamali na yona kaleko se posiposikalili. ⁴ Tau'iyala tamowaidiyao bwayabwaya se kitakitahetete wa se matausi ede se tabutabubu na se gulidobi doha tauboiboita.

⁵ Anelu wa ye hededelau sinesinebadao wa udiyedi ye wane, “Tabu kwa matausi! Kabina ya kata meta Yesu se hesataulo'usei wa kwa wasewasenei. ⁶ Iya nige inai, na Yaubada iya ye hetolo'uyoiyako, doha saha ye hededeyako wa. Kwa laoma kabalolena ne kwa kita. ⁷ Na kwa laumwayamwayau na kwa hededehemasalaha yona hekahekatao udiyedi meta iya boita unai ye tolo'uyoko, na kabo ye baguna ye lau Galili na menai kabo iya kwa kita. Teina yomi wasa ya haiyawa ede.”

⁸ Ede sinesinebadao wa se lau ma matamatausidi na iyamo ma gwaugwauyaladi, na se heloi se lau bena anelu yona wasa wa se hededegabaei hekahekatao wa udiyedi. ⁹ Se laulau na kamwasa wa unai Yesu ye hailobaidi na ye lautokiyedi ye wane, “Yauwedo!” Ede se laoma iya unai, se tulibonodobi, se kabilau kaena wa udiyedi na se taba'ohui. ¹⁰ Kabo Yesu ye hededelau udiyedi ye wane, “Tabu kwa matausi! Na kwa lau kwa hededelau kagu kahao ne udiyedi na se lau Galili, kabo menai se kitagau.”

Dius yodi tauwoyawoya yodi kailupolupo

¹¹ Sinesinebadao wa sola ma laudi na tau'iyala bwayabwaya taukitahetetena wa hekadi se baguna se lau Yelusalema na saha yo saha se tubu wa taukaitalasam tauwoyaidi yodi se hedehehede. ¹² Ede taukaitalasam tauwoyaidi yo magai babadadiyao se laomagogoi se koitalaliu ede tau'iyala tamowaidiyao wa monilakilaki unai se hemaisadi ¹³ na se hededelau udiyedi se wane, “Kabo kwa hedede kwa wane, ‘Boniyaiyena ka kenoko na yona hekahekatao wa se laoma ede Yesu sinalena wa se kaiwahali se laei.’ ¹⁴ Ena teina wasa ta Gabana ye lapui kabo ka lausabilauyeigomiu na taba nige ye hekamkamnagomiu.” ¹⁵ Unai tau'iyala tamowaidiyao wa moni wa se hai na hedehehede saha unai se guguyaidi wa se hededewatanidi. Na teina wasalupolupo ta ye lau Dius tamowaidiyao maudoidi udiyedi, na teina mayadai ta unai sola se hedehehedei.

Yesu yona hekahekatao ye hededehetamalidi

(Maleko 16:14-18, Luka 24:36-49, Yowane 20:19-23, Apostolo 1:6-8)

¹⁶ Na kabo Yesu yona hekahekatao saudoudoi-kesega wa se lau Galili, na kuduli Yesu ye hedede wa se lau unai. ¹⁷ Menai se kita ede se taba'ohui, na iyamo hekadi se nuwalabulabui. ¹⁸ Yesu ye laoma udiyedi na ye wane, “Gigibwali maudoina galewa yo tanoubu ta unai meta Tamagu ye haidimako kaliguwai. ¹⁹ Unai kwa lau basileiya maudoidi udiyedi tamowai kwa guguyaidi na se hemala yogu hekahekatao. Kwa

** 27:64: Kailupolupo bagubagunana se hedehehedei ta, iya ede Yesu tauhemuliwatanina yodi hedehehede meta Yesu iya Kelisona ede. ** 28:1: Sabati mayadaina bagubagunana, iya ede Dimdimyena ta wane, *Sunday*.

hebabatisoidi Tamana, Natuna yo Yaluwa Tabuna hesadiyena, ²⁰ yo ginauli maudoidi ya hedehededeidi kalimiuyena wa bena kwa hekatadi na se miyawatanidi. Na mamohoikalili, yau kabo huya maudoina maidamiu, ye lau ee tanoubu ta yona huyagehe.”

Maleko Yesu wasana Maleko ye kuli wa Buka ta hededehemasalahana

Teina buka ta taukulina ede Maleko, hesana hesau Yowane (Apostolo 12:12,25). Iya Yelusalema tamowaina na apostolo Paulo yo Banaba maiyanao se paisowa (Apostolo 12:12,25, 13:13, yo 15:37-39 yo teha hekadiyo). Maleko nige Yesu yona hekahekatao hesau, na iyamo huya hekadi nuwana Yesu maiyana se taihile yo nuwana iya Yesu maiyana Getesemani koyana unai, huyana Yudasi Yesu kana ye walohai (Maleko 14:51). Gehegehena unai Petelo maiyana se miya (1 Petelo 5:13) na se lau Loma magaina lakilakina. Tausonoga se kaimasi bena Loma unai, Petelo yona lauguguya ye buidi kalina Giliki unai na tamowai se lapuidi. Na Petelo yona boita mulina ne unai, nuwana bolimai 65 AD unai, Yesu wasana buka ta unai ye kulidobiyei Loma tamowaidiyao hesabadi.

Maleko Yesu wasana ye hasili na ye hetubu Yesu yona huyababatiso unai. Yesu yona laulau gigigigibwalidi se bado ye hasilidi, idohagi tamowai gwaudi ye henamwanamwadi. Teina unai ye masalaha meta Yaubada yona gigibwaliwai ye paisowa.

Dius tamowaidi maudoidi Yesu se henuwa, iyamo kadi tanutanuwagao yo yodi tamowai lakilakidiyao wa Yesu maiyana se haikawayagala (Maleko 2:6-7,24) na keda se wasewase idohagi kabo se unuhemwaloi (Maleko 3:6 yo 11:18)

Maleko yona hasihasili unai Yesu nige ye bom ye hemasalaha'uyoi boda udiyedi meta iya Keliso, na tamowai hisahisadi mo udiyedi (Maleko 8:30). Yesu iya Yaubada yona basileiya ye baheiyama (Maleko 1:15) na iya Yaubada yona hetamali tamowaina. Iyamo Yesu yona basabasawai na ye kamkamna yo ye boita sataulo unai (Maleko 8:31, 9:31, 10:33-34). Iya hemuliwatanina meta ta nonoha bena ta boita iya debanawai (Maleko 8:34-38). Maleko dagela tamowaidi hesabadi ye kuli, unai dagela tamowaidi hekadi wasadi ye hasili, doha Penisaiya sinena natuna ye henamwanamwa (Maleko 7:24-30), yo Loma yodi tau'iyala taubagunaedi sataulo dedekanawai ye tolo na Yesu ye hedede-hemasalaha meta iya Yaubada Natuna (Maleko 15:39). Teina unai ye hemasalaha meta Yaubada yona basileiya kedana sokesokena dagela tamowaidi kalidiwai.

Buka ta hedehededena lakilakidi

- Yowane Babatiso yona hedehedede 1:1-13
- Yesu yona paisowa teha Galili unai 1:14–9:50
- Yesu Galili ye laugabaei ye lau Yelusalema 10:1-52
- Yesu yona sabati gehegehena yo yona huyaboita Maleko 11:1–15:47
- Yesu ye tolo'uyo yo ye tautauwasalaha 16:1-18
- Yesu ye sae galewa 16:19-20

Yowane Babatiso kana paisowa

(Mataiyo 3:1-12, Luka 3:1-18, Yowane 1:19-28)

¹ Yesu Keliso Yaubada Natuna wasana namwanamwana ye hetubu doha teina:

² Yaubada yona hedehedede wa Aisaiya peloweta yona buka unai, ye wane,

“Kabo yogu tautauwasa ya hetamali bena ye kedabagunaego.

Iya kabo yom keda ye kabinonohai.”

(Malakai 3:1)

³ “Tamowai hesau balabala unai ye yogayoga ye wane,

‘Guiyau yona keda kwa kabinonohai, yo yona kabalau kwa hedudulai!’ ” *(Aisaiya 40:3)*

⁴ Unai Yowane ye laoma. Balabala unai ye miyamiya na ye hebahebabatiso. Ye laulauguguya bena tamowai se nuwabui na babatiso se hai, yodi yababa nuwatu-gabaedi hesabana. ⁵ Teha Yudeya yo magai Yelusalema udiyedi taumiya maudoidi se lau iya unai. Yodi yababa se hededehehasalahadi na Yolidani sagasagana unai ye hebabatisoidi.

⁶ Yowane kana kwama kamela wiyana unai se ginauli na kana dagilolo meta suisui dahina. Na kana kai meta mwadimwadi yo kamwakamwa. ⁷ Ye hededehehasalaha ye wane, “Tamowai hesau kabo ye mulitama. Iya ye saekalili na kabo yau. Na nige gonowagu taba ya dunedobi iya kana sendolo mainadi ya yailidi.” ⁸ Yau waila unai ya hebabatisoigomiu, na iya kabo Yaluwa Tabuna unai ye hebabatisoigomiu.”

Yesu yona babatiso yo yona laukita

(Mataiyo 3:13–4:11, Luka 3:21-22 yo 4:1-13, Yowane 1:32-34)

⁹ Tenem huyana ne unai Yesu teha Galili magaina hesau hesana Nasaleta unai ye laoma ede Yowane ye hebabatiso Yolidani sagasagana unai. ¹⁰ Waila wa unai ye gayo ye sae na ye kitasae ede galewa ye kita ye taigali, na Yaluwa Tabuna kana kao doha bunebune ye dobima iya kewana ne unai. ¹¹ Na kalina hesau galewa ne unai ye laoma na ye wane, “Kowa Natugu! Ya gadosisikaliliyeigo, yo nuwagu ku henamwakaliliyei!”

¹² Mahanana ne unai Yaluwa Tabuna Yesu ye hetamali ye lau balabala unai. ¹³ Mayadai 40 balabala unai suisui kaikaikalasidi luwadiyena ye miya. Na Satani Yesu ye laukita, na kabo anelu iya se kitahetete.

Yesu tauyamayama hasi ye yoganeidi

(Mataiyo 4:12-22, Luka 4:14-15 yo 5:1-11)

¹⁴ Huya hesau Heloda wasawasa Yowane ye gudui numatutugudu unai. Kabotaki Yesu ye lau Galili na Yaubada wasana namwanamwana ye lauguguyaei, ¹⁵ ye wane, “Huyana ye lagemako, Yaubada yona basileiya ye hanahanaumako. Nuwamiu kwa buidi yo wasa namwanamwana ta kwa kawamamohoiyei.”

¹⁶ Huya hesau Yesu Galili Gabwana dedekana wa unai ye yona ye laulau ede tauyamayama labui ye kitadi, Simona ma kana kaha Andeleya, yodi hinaya unai se yamayama. ¹⁷ Na kabo ye yoganeidi ye wane, “Kwa saema kwa hemuliwatanigau, na kabo ya hekatagomiu tamowai tauyamamayamaidi.” ¹⁸ Na mahanana ne unai yodi hinaya wa se laugabaeidi na Yesu se hemuliwatani.

¹⁹ Yesu ye taulau na kabo Sebedaiyo natunao labui Yowane yo Yamesi ye kitadi yodi waga unai yodi hinaya se polapolaidi. ²⁰ Na ye yogalau yodi labui wa udiyedi ede waga wa se pesagabaei na tamadi Sebedaiyo ma kana hewahewaliyo se laugabaeidi na Yesu se hemuliwatani.

Yesu Kapelenauma unai yaluwa yabayababana ye hededehepesa

(Luka 4:31-37)

²¹ Kabo Yesu yona hekahekatao maiyanao se lau se lage Kapelenauma unai, na kabo Sabati unai ye mwalaesae sunago unai na ye hetubu ye lauhekata. ²² Yona lauhekata wa se nokoei, matawuwuna ye hededehasahasaidi ma gigibwalina, nige doha laugagayo taulauhekataena tamowaidi.

²³ Yodi sunago wa kalonawai tamowai hesau yaluwa bikibikina iya ye luwui na ye yogayoga ²⁴ ye wane, “Saha ku henuwa kalimayena, Yesu Nasaleta tamowaina? Ku laoma bena ku heyababagai? Kabim ya kata kowa kaiteya: Kowa Tabuna Yaubada unai ku laoma.” ²⁵ Na Yesu ye hededebayao iya unai ye wane, “Ku mwanou na tamowai me ku pesagabaei!” ²⁶ Yaluwa bikibikina wa tamowai wa ye nukui na ye yogahi yo ye pesagabaei.

** 1:7: Sendolo mainadi ya yailidi: Teina meta heyayai tauhaidi dobidobidi yodi paisowa.

²⁷ Siya maudoidi se noko na se henahenamai'uyoidi se wane, “Teina ta saha? Teina ta meta lauhekata hauhauna yo ma gigibwalina! Ye hededelau yaluwa bikibikidi udiyedi, na se kawakabiyei!” ²⁸ Nige bayaona iya wasana ye lau Galili maudoina ye hetakikili.

Yesu tamowai gwaudi ye henamwanamwadi
(Mataiyo 8:14-17, Luka 4:38-41)

²⁹ Sunago wa unai se pesa se lau Simona ma kana kaha Andeleya yodi numa unai se mwalae, Yamesi yo Yowane maiyadiyao. ³⁰ Simona bwasiyana sinebada tauna se gwagwama yo ye kasiyebwa na ye kenokeno, na wasana se hededelau Yesu unai. ³¹ Ede ye laoma na ye kabilau nimana unai na ye kabihetolo. Na sinebada wa ye namwanamwa, ede ye tolo na ye haitalaidi.

³² Mahana wa ye dui** kabo taukasikasiyebwa gwaudi yo hinage tamowai yaluwa yabayababadi siya se luwuidi wa se woyaidima Yesu unai. ³³ Magai tamowaidiyao bodalakilaki se lagegogoi numa kawamatana wa unai. ³⁴ Tamowai kadi kasiyebwa udoi'udoj ye henamwanamwadi. Yo yaluwa yabayababadi gwaudi ye hededehepesadi na ye hededehekaiyawasidi tabu se hedehedede, matawuwuna ede iya kabina se katako.

Yesu Galili unai ye lauguguya
(Luka 4:42-44)

³⁵ Malatomtom gagilina, huyana sola ma masimasigilina, na Yesu numa wa ye laugabaei na ye lau balabala hesau unai ye tapwalolo. ³⁶ Na Simona ma kana kahao se lau iya se wasenei. ³⁷ Yesu se lobai ede se hededelau unai se wane, “Tamowai maudoidi se wasewaseneigo!” ³⁸ Na ye hededelau udiyedi ye wane, “Taba ta lau magai hekadiyo udiyedi hinage ya lauguguya, matawuwuna teina hesabana ede ya laoma ta.” ³⁹ Galili se tauhetakikili na Yesu ye lauguguya sunago udiyedi, yo hinage yaluwa yabayababadi ye hededehepesadi.

Yesu taulepela hesau ye henamwanamwa
(Mataiyo 8:1-4, Luka 5:12-16)

⁴⁰ Na temenai tamowai hesau kana kasiyebwa meta lepela. Ye laoma Yesu unai ye tulibono na ye kaibwadakatekamkamna ye wane, “Ena ku henuwa, kabo gonowana ku he'a'agau.” ⁴¹ Yesu tamowai wa ye katekamkamnaei na nimana ye helelelaei ye kabilau unai, na ye hededelau unai ye wane, “Ya henuwa, ku a'a.” ⁴² Na mahanana ne unai kasiyebwa lepela wa ye ulugehe na tamowai wa ye namwanamwa. ⁴³ Kabo Yesu ye hededebayao iya unai ye wane, ⁴⁴ “Tabu tamowai hesau yona ku hedehedede. Na ku lau taukaitalasam unai ku hemasalahago na ye kitasipwaigo. Na kabo he'a'a kaitalasamdi Mose ye hedede wa** ku ginaulidi, na kabo tamowai se kitalobai meta ku namwanamwako.” ⁴⁵ Na tamowai wa ye pesa ede ye lau wasana wa ye hededehe-masalaha yo ye helaki. Unai Yesu nige gonowana ye taumasalaha magai udiyedi, na balabalagaibu udiyedi ye miya. Na teha maudoina tamowaidi se laoma iya unai.

2

Yesu tamowai bunibunina hesau ye henamwanamwa
(Mataiyo 9:1-8, Luka 5:17-26)

¹ Mayadai hisa se lau, na kabo Yesu ye uyo Kapelenauma. Wasana se lapui ede ² tamowai gwaudi se laoma Yesu yona kabamiya unai. Na numa wa nige solasolana hesau, gonogonowana doha hinage dagela ne. Na Yesu Yaubada wasana ye lauguguyai udiyedi. ³ Na tamowai hasi se laoma taubunibuni hesau se baheiyama Yesu unai. ⁴ Boda

** **1:32:** Mahana wa ye dui hededehe-masalahana ku hasili Sabati hededehe-masalahana unai. ** **1:44:** He'a'a kaitalasamdi laugagayona ne meta Lewitikasi 14:2-4 unai ta hasili. Lepela hededehe-masalahana hinage ku hasili.

ye lakikalili to nige gonowana se sae Yesu unai. Ede gatowa se bolilapai na taubunibuni wa ma diyadiyalina se hedelolodobiyei Yesu unai. ⁵ Yesu tamowai wa yodi sunuma ye kita, unai ye hededelau taubunibuni wa unai ye wane, “Natugu, yom yababa ya nuwatugabaeidi.”

⁶ Na laugagayo taulauhekataena hekadiyo se tutuli temenai na se bom se nuwanuwatu se wane, ⁷ “Tamowai ne tabu tenem doha ye hedehehede! Yaubada ye hedeheyaheyababa! Yaubada ye bom mo gonowana yababa ye nuwatugabaeidi!”

⁸ Na Yesu saha se nuwanuwatui wa kabina ye kata, unai ye hededelau udiyedi ye wane, “Idohagi na teina nuwanuwatu ta nuwamiu ne udiyedi kwa nuwanuwatuidi?”

⁹ Hedehehede sahasahana ye biga kabo ya hedede taubunibuni ta unai, ya wane, ‘Yom yababa ya nuwatugabaeidi’, o ya wane, ‘Yom dam ku bahei na ku laulau?’ ¹⁰ Ya henuwa bena kwa nuwatulobai meta Tau Natuna yona gigibwali kaiyaulina ta unai meta gonowana yababa ye nuwatugabaeidi.” Na ye hededelau taubunibuni wa unai ye wane, ¹¹ “Ku tolo, yom dam ne ku bahei na ku lau yom numa.” ¹² Mahanana ne unai ye tolo na yona dam wa ye bahei na maudoidi matadiyena ye dalahai ye lau. Ede maudoidi wa se nokoei yo Yaubada se hedebasaei se wane, “Teina laulau ta sola nige huya hesau ta kita!”

Lewi kana yoga

(Mataiyo 9:9-13, Luka 5:27-32)

¹³ Yesu ye uyo Galili Gabwana dedekana unai, na bodalakilaki se lagegogoma iya unai, na ye hekatadi. ¹⁴ Ye gehe na ye taulau ede Lewi Alepaiya natuna ye kita ye tutuli takisi kabatanotano numana unai. Kabo ye hededelau iya unai ye wane, “Ku hemuliwatanigau!” Ede Lewi ye tolo na Yesu ye hemuliwatani.

¹⁵ Kabotaki Yesu maiyana hekahekatao se kaikai Lewi yona numa unai. Na takisi tautanotano yo yababa tamowaidi** gwaudi Yesu se hemuliwatani wa maiyanao se kaikai-gogoi. ¹⁶ Laugagayo taulauhekataena tamowaidi hekadiyo, siya Paliseya tamowaidi, Yesu se kita yababa tamowaidi yo takisi tautanotano ne maiyadi se kaikaigogo, na se hededelau yona hekahekatao udiyedi se wane, “Iya idohagi to takisi tautanotano yo yababa tamowaidiyao maidanao se kaikaigogoi?” ¹⁷ Yesu yodi hedehehede wa ye lapui na ye hededelau udiyedi ye wane, “Tamowai namwanamwadi doketa nige se nuwatuidi, na tamowai kasikasiyebwadi mo. Yau ya laoma nige tamowai yodi miyamiya dudulaidi hesabadi, na yababa tamowaidi bena ya yogaisinidi.”

Lauhekata hauhauna yo kabikabi beyabeyadi

(Mataiyo 9:14-17, Luka 5:33-39)

¹⁸ Huya hesau Yowane Babatiso yona hekahekatao yo Paliseya yodi hekahekatao se kaihudi. Mayadaina ne unai tamowai hekadiyo se laoma Yesu unai se wane, “Yowane yona hekahekatao yo Paliseya yodi hekahekatao se kaikaihudi. Na kowa yom hekahekatao idohagi to nige se kaihudi?” ¹⁹ Yesu ye henamaiyeidi ye wane, “Huyana tautawasolahauhau ma kana taumanao se miyamiya, kabo se kaihudi e nige? Nige! Huyana ne unai taba nige se kaihudi. ²⁰ Na mayadaina kabo ye lagema, iya kabo se laehesuwala. Tenem mayadaina ne unai kehanao kabo se kaihudi.

²¹ Nige gonowana tamowai hesau kaleko hauhauna tupwana ye hai na kwama beyabeyana tapulisina unai ye polai. Taba tenemdohagi ye polai, kabo kaleko hauhauna ne kwama beyabeyana ye tabepulisi na tapulisina wa kabo ye lakikalili. ²² Hinage nige tamowai hesau waina hauhauna ye ini waina pakuna beyabeyana kalona unai. Taba doha temeta, waina hauhauna kabo waina pakuna ye hesese na

** **2:15:** Yababa tamowaidi: Paliseya takisi tautanotano yo tamowai hekadiyo doha tauganaganawali yo taukaikawaiwahali se hedehehede siya yababa tamowaidi, matawuwuna teina tamowaidi ta dagela tamowaidi yodi se paipaisowa yo Dius yodi laugagayo se utu'utusidi.

ye tapulisi, yo waina wa ye bwalili. Na waina hauhauna mo ye ini waina pakuna hauhauna ne unai.”

*Yesu meta iya Sabati guiyauna ede
(Mataiyo 12:1-8, Luka 6:1-5)*

²³ Sabati mayadaina hesau unai Yesu maiyana hekahekatao witi koyana hesau se tauduwaduwali se lau, na yona hekahekatao wa ma laulaudi na se hetubu witi kaniyodi se huhudi. ²⁴ Kabo Paliseya tamowaidi se hededelau Yesu unai se wane, “Ku kita ne! Idohagi to mayadai Sabati laugagayona se utusi?” ²⁵ Na ye hededelau udiyedi ye wane, “Huyana Dawida ma kana hewahewaliyo se hasali na saha ye ginauli wa wasana kwa hasili o nige?**” ²⁶ Abiyata iya taukaitalasang saesaena, na yona huya unai Dawida ye lusae Yaubada yona Logulogu Tabuna unai pwalawa hetahetabudi wa ye kaidi, na hekadi hinage ye moseidi kana kahao se kaidi. Tenem pwalawa ne meta kai tabuna, na nige tamowai hesau yona dudulai bena ye kai, na taukaitalasang se bom mo kabo se kai.” ²⁷ Kabo ye wane, “Yaubada Sabati ye ginauli tamowai yodi namwanamwa hesabana. Tamowai nige Sabati yona. ²⁸ Unai Tau Natuna iya Sabati guiyauna ede.”

3

*Sabati unai Yesu ye kabihenamwanamwa
(Mataiyo 12:9-14, Luka 6:6-11)*

¹ Sabati hesau Yesu ye mwalaesae sunago unai, na tamowai hesau nimana basabasana temenai. ² Paliseya tamowaidiyao hekadi Yesu kana mata se wasenei, unai iya se kitasipwainamwanamwaei, kabo Sabati unai tamowai ne ye henamwanamwa e nige. [Ena ye henamwanamwa, kabo unai se hegilu.] ³ Kabo Yesu ye hededelau tamowai nimabasabasana wa unai ye wane, “Ku toloma tamowai matadiyena.” ⁴ Na ye henamaiyeidi ye wane, “Laulau saha ye namwa ede mayadai Sabati unai: namwa ta ginauli o yababa, ta kabihenamwanamwa o ta kaiunu?” Maudoidi wa se mwanouhai. ⁵ Ye kitahetakikilidi, na ye kouyalayala yo nuwana ye yababa, matawuwuna ede se nuwakwailolokalili. Na ye hededelau tamowai wa unai ye wane, “Nimam ku tuuhedudulai.” Kabo nimana wa ye tuuhedudulai, ede ye namwanamwa. ⁶ Na mahanana ne unai kabo Paliseya tamowaidi se lau Heloda kana bodao maiyadiyao se koitalaliu idohagi Yesu bena kabo se unuhemwaloi.

*Bodalakilaki Yesu se hemuliwatani
(Mataiyo 12:15,16, Luka 6:17-19)*

⁷ Na kabo Yesu maiyana hekahekatao se dalahai se lau Galili Gabwana unai, na Galili yo Yudeya tamowaidi gwaudi se hemuliwatani. ⁸ Yesu saha ye ginauli wa wasana se lapui meta bodalakilaki teha Yudeya yo Yelusalema yo Idumeya yo Yolidani teha kaluwabu udiyedi yo hinage Taiya yo Sidona magaidi udiyedi se laoma iya unai. ⁹ Boda ye lakikalili unai madai Yesu se dudukahalai, ede Yesu ye hededelau yona hekahekatao udiyedi bena waga gagilina se kabinonohai, unai bena kabo ye gelu. ¹⁰ Na taukasiyebwa gwaudi ye henamwanamwadiko, unai kabo tamowai kasikasiyebwadi maudoidi se dudu se lau bena se kabilau Yesu unai. ¹¹ Na tamowai yaluwa bikibikidi kalidiyena wa iya se kita ede se gulidobi talanuwana unai, na yaluwa bikibikidi wa se yogayoga se wane, “Kowa Yaubada Natuna ede!” ¹² Na Yesu ye guguyaidi tabu se hededehehemasalahan iya kaiteya.

*Yesu yona hekahekatao saudoudoi-labui ye kaisunuwaidi
(Mataiyo 10:1-4, Luka 6:12-16)*

** **2:25:** Dawida wasana ta, iya ede 1 Samuwela 21:1-6 unai, yo pwalawa wa laugagayodi ede Lewitikasi 24:9 unai ku hasili.

¹³ Yesu ye sae kuduli hesau unai. Temenai kaiteyadi ye henuwadi wa ye yoganeidi na se laoma iya unai. ¹⁴ Na saudoudoi-labui ye kaisunuwaidi na ye kataidi apostolo. Bena maiyanao se miya, yo bena kabo ye hetamalidi se lau se lauguguya. ¹⁵ Na gigibwali ye mosei siya udiyedi, kabo bena yaluwa yabayababadi se hededehepesadi.

¹⁶ Teina saudoudoi-labui ye yoganeidi wa hesadi ede:

Simona, hesana hesau ye tole Petelo,

¹⁷ Yamesi ma kana kaha Yowane, Sebedaiyo natunao, hesadi ye tole Bowanele, meta kaniyona ede tulutululu natunao,

¹⁸ yo Andeleya,

Pilipo,

Batolomaiyo,

Mataiyo,

Tomasi,

Yamesi Alepaiya natuna,

Tadaiyo,

Simona Tauhaikabi,

¹⁹ yo Yudasi Isakaliyota, iya ede Yesu kana tauwalohai.

Yesu kana bogao iya bena se woyahai

²⁰ Kabo Yesu ye mwalaesae numa hesau kalona unai, na hinage bodalakilaki se lagegogoma. Na iya maiyana hekahekatao nige yodi solasola bena se kaikai. ²¹ Na Yesu kehanao wasana se lapui meta Yesu nige ye kaikai, unai se lau iya bena se woyahai, matawuwuna ede se nuwatui se wane, “Iya bena ye bwadebwade!”

*Laugagayo taulauhekataena Yesu yona gigibwali se hededeheyababa
(Mataiyo 12:25-29, Luka 11:14-23)*

²² Laugagayo taulauhekataena hekadi Yelusalema unai se dobima se wane, “Belesebulu iya ye tanuwagai! Yaluwa yabayababadi ye hededehepesadi kadi tanuwaga yona gigibwaliyena.” ²³ Yesu ye yoganeidi na heyahayasoni hekadi ye hedededi kalidiwai, ye wane, “Satani kabo idohagi na Satani ye hededehepesa? ²⁴ Taba basileiya kesega se haitoledagela, kabo basileiya ne nige gonowana ye tolobayao. ²⁵ Taba numa hesau tamowaidiyao se haitoledagela, kabo numa ne nige gonowana se tolobayao. ²⁶ Taba Satani yona taupaisowa yaluwa yabayababadi ye hewaiunudi, kabo nige gonowana ye tolobayao, na ye kaiyawasi. ²⁷ Nige gonowana tamowai hesau ye mwalae tamowai yasiyasiyalana yona numa unai yona gogo ye haidi. Tamowai yasiyasiyalana wa taba ye paibagunai, na kabo yona numa gogodi ye haidi. ²⁸ Ya hededemamohoi: Yababa maudoidi yo Yaubada hededeheyababaina Yaubada kabo ye nuwatugabaeidi. ²⁹ Na taba tamowai hesau Yaluwa Tabuna ye hededeheyababa, kabo yona yababa wa taba nige ye nuwatugabaei. Kana gilukabo ye bawahai ye lau ee nige kana siga.”

³⁰ Yesu yona hedehedede ta matawuwuna ede se wane, “Yaluwa bikibikina ye luwu iya unai.”

*Yesu kana boga mamohoidi
(Mataiyo 12:46-50, Luka 8:19-21)*

³¹ Na Yesu sinana yo kana kahao se lagema dagela wa unai se totolo, na tamowai hesau se hetamali ye sae bena ye woihai. ³² Boda Yesu se tulihetakikili wa se hededelau iya unai se wane, “Sinam yo kam kahao yo loumwao, siya ede dagela ne unai na se henuwago.” ³³ Na ye henamai ye wane, “Sinagu kaiteya? Yo kagu kahao kaiteyadi?” ³⁴ Tamowai iya se tulihetakikili wa ye kaikewaidi na ye wane, “Sinagu yo kagu kahao ede teina! ³⁵ Kaiteya Yaubada yona nuwatu ye ginauliwatani meta iya kagu kaha ede, lougu ede, yo sinagu ede.”

4

Tuma tauhesuhesulu heyaheyasonina (Mataiyo 13:1-9, Luka 8:4-8)

¹ Na Yesu ye uyo Galili Gabwana dedekana unai na ye lauhekata. Bodalakilaki se lagegogoma iya unai, ede Yesu waga hesau unai ye gelu, na ye kahaisuwala musamusana, na boda wa nagali unai se totolo. ² Na kabo ginauli gwaudi ye hekatadi heyaheyasoni udiyedi. Yona lauhekata wa unai ye wane, ³ “Kwa lapulapui! Tamowai hesau ye lau yona koya, bena witi likena tumadiyao ye hesuludi. ⁴ Na ye hesuhesulu ede hekadi se bekudobi keda kalonawai, na manawa se laoma ede se kaidi. ⁵⁻⁶ Hekadi se bekudobi tano maladebadewanawai na nige bayaona se kini. Na mahana ye dalasae ede ye sinahewowoyadi, matawuwuna bwatano ye yaloyalo na lamdi nige se dobikalili. ⁷ Hekadi se bekudobi gwaligwali luwadiwai. Gwaligwali kabo se kinipuluhidi, ede tuma wa nige se kininamwanamwa, unai nige se kaniyo. ⁸ Tuma hekadi hinage se bekudobi bwatano namwanamwana unai, na se kini yo se kaniyo: Witi kewa kesega kesega hekadi kaniyodi badodi 30, 60 o 100.” ⁹ Na Yesu ye hededelau udiyedi ye wane, “Kaiteyadi gonowana se lapulapui bena se lapulapuinamwanamwa!”

Yesu palabole yona hepaisowadi wuwuna ye hemasalaha (Mataiyo 13:10-17, Luka 8:9-10)

¹⁰ Boda wa se tatagwaligwali, na mulina ne unai yona hekahekatao saudoudoi-labui yo tamowai hekadiyo Yesu maiyanao se tuligogoi, na palabole kaniyona se henamaiyei iya unai. ¹¹ Na Yesu ye hededelau udiyedi ye wane, “Yaubada yona basileiya nuwanuwatuna saesaedi kabo ya hemasalahadi kalimiuwai. Na kaiteya Yaubada yona basileiya dagelanawai, kabo palabole mo udiyedi ya hekatadi, ¹² to bena

‘se kitakita,

na taba nige se kitalobai,

se lapulapui,

na taba nige se lapulobai,

madai nuwadi se buidi,

na Yaubada yodi yababa kabo ye nuwatugabaeidi.’ ”

(Aisaiya 6:9-10)

Yesu tuma tauhesuhesulu palabolena ye hededehemasalaha (Mataiyo 13:18-23, Luka 8:11-15)

¹³ Na Yesu ye hededelau udiyedi ye wane, “Ena palabole ta nige kwa nuwatulobai, kabo idohagi na palabole hekadi ne bena kwa nuwatulobaidi? ¹⁴ Tuma tauhesuhesulu meta Yaubada wasana ye hesulu. ¹⁵ Tamowai hekadi nuwadi kadi kao doha keda kalona tuma se bekudobi unai. Yaubada yona hedehedede se lapui, na mahanana ne unai Satani ye laoma ede hedehedede wa ye haigabaei. ¹⁶ Tamowai hekadi nuwadi doha maladebadeba tuma se bekudobi unai. Hedehedede wa se lapui yo se hai ma nuwanamwanamwadi. ¹⁷ Na hedehedede wa nige ye dobi nuwadi ne udiyedi, unai ede yodi sunuma se basabasa. Na huyana pilipili yo hewahewaiunu se hekalo yogu hedehedede ta debanawai, meta se nuwagwagwama na se lausuwala. ¹⁸ Tamowai hekadi nuwadi doha gwaligwali tuma se bekudobi udiyedi. Siya hedehedede wa se lapuimoei. ¹⁹ Na kaiyaulina ta nuwamodemodena yo gogobadobado nuwadi se kaidi yo ginauli hekadi gadosisidi udiyedi hedehedede wa se kinipuluhidi na nige ye kaniyo. ²⁰ Na hekadiyo nuwadi doha bwatano namwanamwana tuma se bekudobi unai. Hedehedede wa se lapui na se kawamamohoiyei, kabo se kaniyo, hekadi 30, 60 o 100.”

Lampa palabolena (Luka 8:16-18)

²¹ Na Yesu yona hedehedede ye tubei ye wane, “Taba lampa ta gabu, kabo gulewa unai ta buikasini o kabakeno guninaena ta tole? Nige! Ta tolesae kabatolena unai. ²² Gonogonowana doha hinage Yaubada yona basileiya ginaulina wadawadamdi maudoidi kabo ye hemasalahadi, yo ginauli maudoidi Yaubada ye toletolewadamdi wa kabo hinage ye tolehemasalahadi. ²³ Kaiteyadi gonowana se lapulapui bena se lapulapuinanwanamwa!”

²⁴ Na kabo ye wane, “Saha kwa lapui ta bena kwa lapunamwanamwaeidi. Ena kwa lapulapuinanwanamwa, kabo kwa nuwatulobainamwanamwaei. Na kabo Yaubada yomi sibasiba ye helakidi. ²⁵ Kaniyona ede kaiteya yogu lauhekata udiyedi ye lapulapuinanwanamwa, kabo yona sibasiba ye helaki. Na kaiteya nige ye lapulapuinanwanamwa, saha gagilina ye lapulobaiyako wa kabo ye nuwaluluhiyei.” **

Tuma yona kinikini palabolena

²⁶ Na Yesu ye wane, “Yaubada yona basileiya meta doha teina: Tamowai hesau witi tumana ye hesulu yona koya unai. ²⁷ Boniyai huyadi ye keno, na mala ye tom ye tolo, meta nige ye mode na tuma wa se bom se kini kabo se tubu. Tuma yodi kinikini meta tamowai wa nige ye nuwatulobai idohagi. ²⁸ Na bwatano ye bom ye hekinidi: se kinibaguna, kabo se kinilakilaki yo se kaniyo. ²⁹ Witi wa kaniyodi se suna, kabo tamowai wa ye bolidi, matawuwuna ede masuli wa ye lage.”

Kaiwa hesau tumana palabolena

(Mataiyo 13:31-35, Luka 13:18-19)

³⁰ Yesu ye wane, “Yaubada yona basileiya kana kao kabo idohagi yoda hedehededena? O palabole saha unai kabo ta hekaigonogonowaei? ³¹⁻³² Basileiya ne doha kaiwa hesau tumana ** ye gagilikalili tuma maudoidi udiyedi. Tumana ta kumai bwatano unai, kabo ye kinilakilaki na kabo koya kaiwadi hekadiyo. Lagana lakilakidi se kini, na manuwa kabo se kabinoi loguloguna ne unai.”

³³ Yona lauhekata maudoidi udiyedi palabole unai ye hekatadi yodi nuwatulobai gonogonowana unai. ³⁴ Palabole mo ye hepaisowadi yona lauhekata udiyedi. Na yona hekahekatao maiyanao se bom mo, kabo palabole kaniyodi wa ye hemasalahadi udiyedi.

Yesu wowoli ye hedehededaumwali

(Mataiyo 8:23-27, Luka 8:22-25)

³⁵ Meimeilahina ne unai, Yesu ye hededelau yona hekahekatao udiyedi ye wane, “Ta kawasilau hali sanakawasi ne.” ³⁶ Na tamowai maudoidi wa se laugabaeidi, na Yesu yona hekahekatao waga wa unai hinage se gelu na Yesu maiyanao se lau, yo waga hekadi hinage se hemuliwatanidi. ³⁷ Kabo yaumai lakilakina ye lotalu yo bagodu se ini'inisae waga wa kalona unai, na musamusana kabo se yoli.

³⁸ Na Yesu waga yiuna wa unai kunuwa unai ye kenokeno. Na se hanoi se hededelau unai se wane, “Taulauhekata, kabo ta mwalo, na idohagi to nige ku mode?” ³⁹ Yesu ye tolo ede ye hededelau yaumai yo bagodu wa udiyedi ye wane, “Kwa kaiyawasi yo kwa daumwali!” Kabo yaumai yo bagodu wa se kaiyawasi na ye daumwalikimkim. ⁴⁰ Na ye hededelau yona hekahekatao wa udiyedi ye wane, “Idohagi to kwa matausi? Sola nige yomi sunuma?” ⁴¹ Na se siliyata yo se matausikalili, unai se henahenamai'uyoidi, “Teina tamowai ta tamowai sahasahana? Yaumai yo bagodu hinage iya se kawakabiyei!”

** **4:25:** Lausoiso 24 yo 25 Yesu heyaheyasoni unai ye hededegabaei, doha teina: Na Yesu ye hedehededelau udiyedi ye wane, “Kwa kitakitanamwanamwa saha bena kwa lapui. Kabanowonowoi saha ku hepaisowa ne unai Yaubada kabo yom ye nowonowoyawa, na kabo ye koihepwata'uyoi. ²⁵ Matawuwuna kaiteya saha hesau kalinawai, meta kabo ginauli hesau ye mosehelaki, na kaiteya nige saha hesau kalinawai meta ginauli saha kalinawai wa kabo hinage ye haigabaei.” ** **4:31-32:** Kaiwa hesau tumana hedehemasalahana ede mustard unai.

5

Gelasa tehadiwai, tamowai hesau unai Yesu yaluwa yabayababadi ye hededehepesadi (Mataiyo 8:28-34, Luka 8:26-39)

¹ Siya kabo se dunasae hali sanakawasi wa unai, Gelasa** tamowaidi yodi tano unai. ² Yesu waga wa ye pesagabaei, na bwayabwaya unai tamowai hesau ye laoma Yesu ye hailobai. Yaluwa bikibikina tamowai wa ye luwui ³ na bwayabwaya duhadi udiyedi ye miyamiya, yo tamowai hekadi nige gonowana seniyena se paihekahini. ⁴ Huya hekadi iya nimana yo kaena seni udiyedi se paidi, meta ye utusidi, na nige gonowana se hekaiyawasi. ⁵ Mayadai yo boniyai bwayabwaya wa unai yo kuduli udiyedi ye sae ye dobi na ye yogayogahi, yo sapakila ye haidi na tauna wa ye sasagwadagwadaidi. ⁶ Yesu sola kedalahawai na tamowai wa iya ye kita ede ye heloi ye lau ye tulibono talanuwana wa unai. ⁷ Ye yogahilakilaki ye wane, “Yesu, Yaubada Saesaekalilina natuna, saha ku henuwa kaliguyena? Yaubada hesana unai ya kaibwadaigo tabu ku hekamkamnagau.” ⁸ Matawuwuna ede Yesu ye hededelauko iya unai ye wane, “Yaluwa bikibikina, kowa tamowai me ku pesagabaei.”

⁹ Na kabo Yesu ye henamai ye wane, “Hesam ede saha?” Na ye hededebui ye wane, “Yau hesagu ede Legiyona,** kaniyona ede ka bado.” ¹⁰ Na ye kaibwadakalili ye wane, “Tabu ku hetamaligai ka lau kedalahaloha.”

¹¹ Kuduli hesau papalina unai meta puwaka yawoina lakilakina se dumudumuli. ¹² Yaluwa yababadi wa se kaibwadalau Yesu unai se wane, “Ku hetamaligai ka lulau tenem puwaka ne yawoina ne udiyedi.” ¹³ Yesu ye talamyeyidi ede yaluwa bikibikidi wa kabo se pesa na se lulau puwaka wa udiyedi. Na se heloilidilidi padipadi wa unai se dobi ede se bekudobi gabwa wa unai se yoligogoi na se mwaloi. Na puwaka wa badodi ede nuwana 2,000. ¹⁴ Puwaka wa taukitahettedi kabo se wasabu se lau, wasa wa se helaki magai lakilakina yo tenem teha ne kasadi gagilidi udiyedi. Magai wa tamowaidiyao kabo se lau bena laulau wa se kita. ¹⁵ Se lage Yesu unai na tamowai yaluwa yabayababadi legiyona se luwui'usei wa se kita ye tulitautaubigai, ma kalekalekona yo ma nuwanamwanamwana. Unai se matausi. ¹⁶ Na ginauli maudoidi wa taukitadi meta taulaoma yodi se hedehedede, saha ye tubu tamowai wa unai, yo puwaka wasadi hinage. ¹⁷ Siya kabo se kaibwadalau Yesu unai bena yodi magai tanona ne ye laugabaei.

¹⁸ Yesu waga wa unai ye gelu, na tamowai yaluwa yababadi se luwui'usei wa ye kaibwadalau bena iya maiyana se lau. ¹⁹ Yesu nige ye henuwa na ye hededelau iya kalinawai ye wane, “Ku lau yom magai yo kehamwao udiyedi na Guiyau yona katekamkamna yo yona gigibwali ye hemasalahadi kowa kalimwai wa, wasana yodi ku hedehedede.” ²⁰ Iya kabo ye lau Dekapolisi** tehana unai Yesu saha ye ginauli iya unai wa ye hewasa, ede tamowai maudoidi se nokokalili.

Yesu waihiu hesau ye henamwanamwa yo Yailo natuna waihiu boita unai ye het-olo'uyoi

(Mataiyo 9:18-26, Luka 8:40-56)

²¹ Yesu ye gelu waga wa unai na ye uyo hali sanakawasi wa. Ye duna kabo ye pesa nagali wa unai, na bodalakilaki temenai se tupagogoima iya unai. ²² Kabo sunago badana hesau, hesana ede Yailo, iya ye laoma na Yesu ye kita ede ye gulidobi talanuwanawai. ²³ Na ye hedekatekamkamnalau iya unai, ye wane, “Natugu waihiu

** **5:1** Gelasa: Kulikuli beyabeyadi hekadi hesa udoi se kuli, iya ede Gadala (doha Mataiyo 8:28). Gadala yo Gelasa magaidi meta Galili Gabwana teha yawana unai, Gadala gabwa dedekanaena, na Gelasa kedalo. ** **5:9** Legiyona meta Loma yodi tau'iyala bodana lakina, meta tatao 6,000, na inai kaniyona ede bodalakilaki. ** **5:20** Dekapolisi kaniyona ede magai lakilakidi badodi saudoudoi, na iya meta magai ne tehadi hesana.

gagilina ye kasiyebwakalili. Taba gonowana ku laoma ku kabilau unai to bena ye namwanamwa'uyo na ye mauli.” ²⁴ Unai Yesu maiyana se lau, na bodalakilaki wa se hemuliwatanidi na yodi lau wa unai meta Yesu unai se heduheduna.

²⁵ Waihiu hesau temenai, kana kasiyebwa meta kwasina ye miyamiyagabaei bolimai saudoudoi-labui. ²⁶ Bolimai ne luwadiyena doketa maudoidi yodi sagu kalinawai meta nige gonowana, na waihiu wa meta ye kamkamnakalili. Na hemaisadi mo udiyedi yona moni maudoina ye hegehe, na kana kasiyebwa wa kabo ye helahelaki mo ye lau. ²⁷ Iya Yesu yona laoma wasana ye lapui ede boda luwadiyena ye laoma Yesu dagelana unai na kana kwama ye kabitonogi, ²⁸ unamo ede yona nuwatu ye wane, “Taba kana kwama mo ya kabitonogi, kabo ya namwanamwa.” ²⁹ Mahanana ne unai kwasina kasiyebwana wa ye kaiyawasi, na tauna kamnana ye lapui meta kasiyebwa wa ye kaiyawasi.

³⁰ Na Yesu kamnana ye lapui meta gigibwali ye pesagabaei, unai ye kitabui boda wa udiyedi na ye henamai ye wane, “Kaiteya kagu kwama ta ye kabitonogi?” ³¹ Yona hekahekatao se hededelau unai se wane, “Boda wa ku kitadi se heduheduna kalimwai, na ye saha to ku henamai ku wane, ‘Kaiteya ye kabilaoma kaliguwai?’ ” ³² Na Yesu ye kaikewatakikili taba bena laulau ne tauginaulina wa ye kita. ³³ Waihiu wa ye nuwatulobai saha ye tubu iya kalinawai wa, unai ye matausitabutabubu. Kabo ye laoma ye gulidobi Yesu talanuwana wa unai na saha ye ginauli wa ye hededehehemasalaha. ³⁴ Yesu kabo ye wane, “Natugu, yom sunuma ta ye henamwanamwago. Ku lau ma nuwadaumwalim, kam kasiyebwa ye kaiyawasiko.”

³⁵ Yesu sola ma hedehededena na sunago badana Yailo yona numa unai tamowai hekadi se laoma na se hededelau iya unai se wane, “Natum waihiu wa meta ye boitako! Taulauhekata me tabu ku hemohemode.” ³⁶ Yodi hededegadigadigugu wa Yesu ye lapui na ye hededelau sunago badana wa unai ye wane, “Tabu ku matausi, na ku kawamamohoiyeigau mo.” ³⁷ Na kabo boda wa ye hededenuwahidi, na Petelo yo Yamesi ma kana kaha Yowane mo se hemuliwatani. ³⁸ Se lage sunago badana wa yona numa unai na tamowai se lapuidi se doudou numakalo wa unai. ³⁹ Yesu ye mwalaesae numakalo wa unai na ye hededelau udiyedi ye wane, “Saha kwa doudouyei? Wawaya me nige ye boita na ye kenokeno.” ⁴⁰ Na siya Yesu se talawasiyei. Yesu kabo ye hedede se pesa dagelawai, na kabo wawaya wa tamana yo sinana ye woyaidi na maiyana hekahekatao haiyona wa se lusae wawaya wa yona bili unai. ⁴¹ Kabo Yesu ye kabilau sinekuku wa nimana unai na ye hededelau unai ye wane, “*Talita koum!*”, kaniyona meta, “Wawaya waihiu, ku tolo!”** ⁴² Ede wawaya wa ye tolo na ye laulau. Wawaya wa yona bolimai ede saudoudoi-labui. Na kabikabi ne taukitana meta se siliyata. ⁴³ Na kabo Yesu ye guguyaedi tabu saha ye ginauli wa se hewahewasa, na ye hededelau udiyedi bena wawaya wa kai se mosei ye kai.

6

Yesu Nasaleta unai se laukwatakwataei (Mataiyo 13:53-58, Luka 4:16-30)

¹ Yesu tenem tupwa ne ye laugabaei kabo maiyana hekahekatao se uyoma yona magari Nasaleta unai. ² Sabati mayadaina unai kabo ye hetubu ye lauhekata yodi sunago unai. Na boda ye laki yona hedehedede se lapui ede se nokoei. Se henahenamai'uyoidi se wane, “Nuwanuwatu ta meta haedi ye haidi? Yo yona sibasiba ta haedi ye hai, to laulau gigigigibwalidi hinage ye ginaulidi? ³ Iya meta kapenta yo hinage Maliya natuna, na kana kahao ede Yamesi, Yosepa,** Yudasi yo Simona. Na lounao hinage maiyadao ta miyamiya.” Unai ede se kouyalayalaei.

** **5:41:** Talita koum: Teina hedehedede ta meta kalina Alamaiki, iya Yesu kalinana. Giliki unai se kuli ede Yosese.

** **6:3:** Yosepa meta kalina

⁴ Na Yesu ye hededelau udiyedi ye wane, “Magai maudoidi peloweta se hekasisiyei, iyamo yona magari tamowaidi yo kana bogao yo kehanao nige se hekasisiyei.” ⁵ Ede magari wa unai nige gonowana laulau gigigigibwalina hesau ye ginauli, na nimana ye tolesae tamowai kasikasiyebwadi hisa mo udiyedi na se namwanamwa. ^{6a} Yesu ye nokokalili, matawuwuna ede yona magari tamowaidi nige se sunumaei.

Yesu Saudoudoi-labui ye hetamalidi
(*Mataiyo 10:1,5-15, Luka 9:1-6*)

^{6b} Na Yesu ye lau magari gagilidi udiyedi tamowai ye hekatadi. ⁷ Na kabo Saudoudoi-labui wa ye yogagogoidima bena labui labui ye hetamalidi. Gigibwali ye moseidi bena yaluwa bikibikidi se hededehepesadi. ⁸ Na kabo ye guguyaidi ye wane, “Tabu ginauli hesau kwa laubahei yomi kabalau ne unai, na tuke mo. Tabu kami kai, yomi tobwa, yo moni kwa bahebaheidi. ⁹ Na gonowana mo buti kwa likwadi, na tabu kami kwama hagahagadi kwa baheidi.” ¹⁰ Na ye hedede'uyo ye wane, “Kaiteya numa unai [*se yoganeigomiu na*] kwa mwalaesae, meta unai kwa miya ye lau ee magari me kwa laugabaei. ¹¹ Ena magari hesau nige se yogaisinigomiu yo yomi hedehedede nige se lapuidi, meta kwa laugabaei na kaemiu mukalidi mo kwa koinihinihiyedi. Temeta ye hemala magari ne yodi kabakitalobai meta Yaubada kabo ye hekamkamnadi.”

¹² Yesu yona hekahekatao wa se pesa se lau se lauguguya bena tamowai nuwadi se buidi. ¹³ Yaluwa yabayababadi gwaudi se hededehepesadi, na bunama unai taukasikasiyebwa gwaudi se heyausidi yo se henamwanamwadi.

Yowane Babatiso se unui wa wasana
(*Mataiyo 14:1-12, Luka 9:7-9*)

¹⁴ Heloda wasawasa Yesu wasana ye lapui, matawuwuna Yesu hesana wa tamowai maudoidi kabina se kata. Hekadi se wane, “Nuwana Yowane Babatiso iya boita unai ye tolo'uyoma, unai ede gigibwalina ne kalinawai na laulau gigigigibwalidi ye ginaginaulidi.” ¹⁵ Hekadi se wane, “Nuwana Eliya”, yo hekadi se wane, “Nuwana peloweta hesau, yo doha peloweta bagubagunadi wa hesau.” ¹⁶ Na huyana Heloda wasa wa ye lapui meta ye wane, “Yesu meta Yowane. Iya gadona ya boliyako, na boita unai ye tolo'uyoma.”

¹⁷⁻¹⁸ [*Yowane yona boita wasana ede teina:*] Heloda meta kana kaha Pilipo mwanena ye tawasolai, na Yowane ye hedehedede ye wane, “Kowa laugagayo ku utusi, taba tabu kam kaha mwanena ku tawatawasolai!” Na Heloda ye henuwa bena Helodiyasi nuwana ye henamwa, unai ye hedede na Yowane se hai se pai na se tole numatutugudu unai.

¹⁹ Na Helodiyasi Yowane ye kouyalayalakaliliyei, na ye henuwa bena ye unuhemwaloi. Iyamo nige gonowana, ²⁰ matawuwuna Heloda kabina ye kata meta Yowane tamowai dudulaina yo Yaubada yona taupaisowa, na ye hekasisiyei. Yowane yona hedehedede debadiwai Heloda nuwagwali ye hai, ede nuwana ye haikabi, na iyamo huya maudoina ye lapulapulau Yowane yona hedehedede udiyedi.

²¹ Nige bayaona kabo Helodiyasi yona nuwatu wa mayadaina ye lage. Heloda yona huyalabasi mayadaina unai kaikaigogo ye ginauli maiyanao tamowai lakilakidi yo iyala babadadi yo Galili babadadi. ²² Helodiyasi natuna waihiu kabo ye laoma na siya matadiwai ye sobu. Heloda yo kana taumana wa nuwadi se namwakalili, unai ye hededelau hasala wa unai, ye wane, “Kowa kam henuhenuwa saha kabo ya leyawa.” ²³ Na ye heddekaigwala ye wane, “Ginauli saha ku kaibwadai meta kabo ya leyawa yom. Gonogonowana doha yogu basileiya ta tehana, ena ku henuwa.”

²⁴ Hasala wa kabo ye lau sinana unai ye henamai ye wane, “Saha kabo ya kaibwadai?” Helodiyasi ye wane, “Yowane Babatiso kulukuluna.” ²⁵ Ede ye laumwanwayau ye uyo

wasawasa wa unai na ye kaibwadalau unai ye wane, “Yau yogu kaibwada ede teina: Mahana ta unai Yowane Babatiso kulukuluna ku usai gaeba unai na ku haiyama.”

²⁶ Wasawasa wa nuwana ye yababakalili, na nige saha hesau ye hedede, matawuwuna kana taumanao yona hededekaigwala wa se lapuiyako. ²⁷ Unai wasawasa wa taukaiunu ye yoganei na ye hedede bena Yowane kulukuluna ye bolihai na ye baheiyama. Ede ye lau numatutugudu unai na Yowane gadona ye boli'utusi ²⁸ na kulukuluna wa gaeba unai ye usaei na ye baheiyama ye mosei hasala wa unai, na ye bahelaei sinana wa unai.

²⁹ Huyana Yowane yona hekahekatao wasa se lapui ede se laoma, taugaibuna mo se bahei se laei bwayabwaya unai se tole.

*Yesu tamowai 5,000 ye hekaidi
(Mataiyo 14:13-21, Luka 9:10-17, Yowane 6:1-14)*

³⁰ Apostolo wa yodi paisowa wa unai se uyoma na se lagegogoima Yesu unai na yodi paisowa yo yodi lauhekata wa wasadi yona se hedehedede. ³¹ Na tamowai se badokalili se hemohemode, unai nige gonowana bena se kaikai. Ede Yesu ye wane, “Kwa laoma, kita ta bom ta lau teha hesau unai. Temenai kabo ta kaiyawasi huyakubwakubwa.” ³² Na kabo se bom waga unai se gelu se lau balabala hesau unai.

³³ Yodi kabalau ne meta tamowai se kitayako na tamowai gwaudi se kitalobaidi. Unai magari maudoidi tamowaidi se tolo na se heloi se lau na se lagebaguna Yesu yona kabalage wa unai. ³⁴ Yesu kabo ye dunasae na bodalakilaki ye kitadi ede ye katekamkamnaedi, matawuwuna siya doha mamoe nige taukitahetedi. Unai kabo ye hetubu nuwatu se bado ye hekatadi.

³⁵ Mahana ye talukeo, ede yona hekahekatao wa se lau iya unai na se wane, “Teina ta balabalagaibuyena, yo mahana ye laukalili. ³⁶ Taba ku hetamalidi se lau dedekawai kasa gagilidi yo magari udiyedi na kadi kai se hemaisadi.” ³⁷ Na Yesu ye hededelau udiyedi ye wane, “Komu kadi kai kwa moseidi.” Kabo se henamaiyei se wane, “Haedi kabo denali 200** ka hai na kadi kai ka hemaisadi yo ka hekaidi?” ³⁸ Unai kabo ye wane, “Hage, kwa kita, pwalawa hisa kalimiuyena?” Apostolo kabo se lau pwalawa [se wase na] se lobaidi ede se uyoma Yesu unai na se wane, “Pwalawa haligigi yo yama labui.” ³⁹ Kabo ye hededelau udiyedi ye wane, “Tamowai maudoidi kwa hedede bena se hebodahegagagili na se tulidobi lagau ne unai.” ⁴⁰ Kabo se tulinamwanamwa, boda hekadi 100 yo boda hekadi 50. ⁴¹ Yesu kabo pwalawa haligigi yo yama labui wa ye haidi, ye kitasae galewa unai, na Yaubada ye lautokiyei. Na kabo pwalawa ye kihihagahegagilidi na ye moseidi yona hekahekatao kalidiwai. Siya kabo se soiyei tamowai wa kalidiwai. Na hinage yama labui wa ye kihihagahegagilidi na ye moseidi se kai. ⁴² Na maudoidi se kaikai yo bogadi se sese.

⁴³ Yesu yona hekahekatao pwalawa yo yama kaitoledi wa se tanogogoidi, meta bosa saudoudoi-labui se hemwayaudi. ⁴⁴ Na taukaikai badodi meta 5,000.

*Yesu Galili Gabwana kewanawai ye laulau
(Mataiyo 14:22-33, Yowane 6:15-21)*

⁴⁵ Kabo Yesu yona hekahekatao ye hegelumwamwayaueidi bena se kawasibaguna se lau Betesaida, na iya kabo boda wa ye hetamalidi se lau. ⁴⁶ Na kabo ye sae koya tupina hesau unai ye tapwalolo. ⁴⁷ Boniyaina ne unai meta waga wa sola Galili Gabwana duwaduwalina unai ye laulau, na Yesu ye bom mo tano wa unai ye miyamiya. ⁴⁸ Na ye kitadi wose unai se kabikabi'useidi, matawuwuna ede yaumai ye bayao yo hinage se wosematai.

** 6:37: Denali 200 unai gonowana tamowai 2,000 kadi kai se hemaisadi mayadai kesega hesabana. Ena tamowai haligigi-labui (7) se paisowa nawalai kesega, kabo moni ne se lobai.

Malatomtom gagilina** Galili Gabwana kewana ne unai ye laulau na ye lau udiyedi, na bena kabo ye laugabaeidi. ⁴⁹ Na huyana se kita gabwa kewanaena ye laolaoma hesabadi meta yodi nuwatu bena yaluyaluwa na se yogahi, ⁵⁰ matawuwuna se matausikalili. Na ye hededelau udiyedi ye wane, “Kwa nuwabayao! Doha yau Yesu! Tabu kwa matausi!” ⁵¹ Na kabo ye gelusae waga wa unai maiyanao, na yaumai wa ye kaiyawasi. Siya kabo se nokokalili, ⁵² matawuwuna pwalawa haligigi laulauna wa nige se nuwatulobai, na nuwadi se kwailolo.

*Genesaleta unai Yesu tamowai ye henamwanamwadi
(Mataiyo 14:34-36)*

⁵³ Se kawasilau ede se duna Genesaleta unai, na menai yodi waga se lowoni. ⁵⁴ Huyana waga se pesagabaei meta tamowai hekadi Yesu se kitalobai, ⁵⁵ ede magai wa maudoina se tauhetakikili na taukasikasiyebwa se baheidima diyadiyali udiyedi, na ena Yesu wasana se lapui yona kabalau haedi meta kabo se laedi temenai. ⁵⁶ Yesu yona kabalau maudoidi ne udiyedi, magai gagilidi yo magai lakilakidi udiyedi, tamowai kasikasiyebwadi se toledi yodi magai bakubakudiyao udiyedi. Se kaikaibwadai bena kana kwama sinosinona se kabitonogi, na taukabitonogina maudoidi wa se namwanamwa.

7

*Kulutubu laugagayodi lauwatanina unai tamowai Yaubada yona laugagayo se utusi
(Mataiyo 15:1-9)*

¹ Paliseya tamowaidi yo laugagayo taulauhekataena hekadiyo Yelusalema unai se laoma na se lagegogoma Yesu unai. ² Yona hekahekatao hekadi se kitadi ma nimabikibikidi na se kaikai, na nige se nimadeuli [doha kadi kulutubu yodi kabikabi mamohoina unai.] ³ Paliseya tamowaidi yo Dius tamowaidi maudoidi kadi kulutubu miyamiyadi se hekasisiyeidi, unai taba nige se kaikai kana siga nimadi se deulidi doha kulutubu yodi kabikabi mamohoina unai. ⁴ Ena yodi kabalokulokune unai se uyoma meta se nimadeulibaguna na kabo se kaikai. Kulutubu yodi kabikabi yo laugagayo se bado bena se hekasisiyeidi. Hinage kabikabi hekadi doha kaputi yo waila kabayaiyai yo gulewa deudeulidi udiyedi.

⁵ Unai Paliseya tamowaidi yo laugagayo taulauhekataena wa Yesu se henamaiyei se wane, “Idohagi to kowa yom hekahekatao kulutubu miyamiyadi nige se miyawatanidi, na ma nimabikibikidi se kaikai?” ⁶ Na Yesu ye hededelau udiyedi ye wane, “Komiu taukailupolupo hedehedemi Aisaiya ye hededepelowetai wa meta mamohoi, doha ye kuliyako ye wane,

‘Teina tamowai ta kawadi mo udiyedi se hekasisiyeigau, na nuwamamohoidiyao udiyedi meta Yaubada nuwanuwatuna nigele.

⁷ Yodi kaihelahugau meta nige kaniyona, matawuwuna tamowai yodi laugagayo mo se hekahekataidi.’ *(Aisaiya 29:13)*

⁸ Yaubada yona laugagayo kwa tolehesuwaladi, na tamowai yodi laugagayo kwa kabihekahinidi.”

⁹ Na kabo ye wane, “Komiu laugagayo tolebuina unai kwa katakalili! Yaubada yona laugagayo kwa tolehesuwala na komiu kami kulutubu kabikabidiyao mo kwa lauwatanidi. ¹⁰ Mose ye hededeyako ye wane,

‘Tamam yo sinam ku hekasisiyeidi.’ *(Esodo 20:12)*

Yo ye wane,

‘Ena hesau tamana yo sinana ye hededeheyababadi, iya kabo kwa unuhemwaloi.’

(Lewitikasi 20:9)

** **6:48:** Malatomtom gagilina: Maleko ye kuli, boniyai wa tupwana hehasina unai. Mahana wa meta 3 kiloki yo 6 kiloki duwaduwalidiyena.

¹¹ Iyamo komiu kwa wane, Ena tamowai hesau sinana yo tamana yodi kainauya ye kabinonohai na nige ye mosei udiyedi na ye mosei Yaubada unai, ¹² kwa hedede temeta laulau ne bena ye dudulai. ¹³ Unai komiu kami kulutubu kabikabidiyao mo kwa lauwananidi na Yaubada yona laugagayo kwa tolehesuwala. Yo Yaubada yona laugagayo hekadi hinage kwa tolebuidi gonogonowana doha teina.”

*Ginauli sahasahadi tamowai se hebikidi
(Mataiyo 15:10-20)*

¹⁴ Na kabo Yesu boda wa ye yogagogoidima na ye hededelau udiyedi ye wane, “Komiu maudoimiu, yogu hedehedede ta kwa lapunamwanamwaei yo bena kwa nuwatulobai. ¹⁵⁻¹⁶ Tamowai saha ye kai na ye dobi bogana luwanawai meta nige ye hebiki Yaubada matanawai. Na ginauli saha nuwanawai ye pesama meta iya ye hebiki ede.” **

¹⁷ Kabo Yesu maiyana hekahekatao boda wa se laugabaeidi na se mwalaesae numa hesau unai, na kabo palabole kaniyona wa se henamaiyei. ¹⁸ Iya ye hededelau udiyedi ye wane, “Idohagi to nige kwa nuwatulobai? Komiu taba kabina kwa kata saha tamowai ye kai na ye dobi bogana luwanawai meta nige gonowana ye hebiki. ¹⁹ Kana kao ede nige ye dobi nuwana unai, na ye dobi bogana luwanawai, na kabo ye miyagabaei.” Teina hedehedede ta unai Yesu ye hededehehemasalah meta kai maudoidi se a'a. ²⁰ Kabo ye wane, “Saha tamowai nuwanawai ye pesama meta iya ye hebiki ede, ²¹ matawuwuna saha nuwanawai se pesama wa, siya ede teina: nuwatu yabayababadi, laulaubik-ibiki,** kaiwahali, kaiunu, ²² ganawali, samagogo, henunu, kailupolupo, matabado, kaikalomagigili, monunu, nuwasaesae, yo walobayao. ²³ Teina ginauli yabayababadi maudoidi ne meta tamowai nuwana unai se laoma yo siya tauhebikina ede [*Yaubada matanawai*].”

*Dagela waihiuna yona sunuma
(Mataiyo 15:21-28)*

²⁴ Temenai kabo Yesu ye dalahai ye lau Taiya** tehana unai. Na ye mwalaesae numa hesau kalona unai. Yona nuwatu meta bena tabu iya se kita. Na iyamo nige gonowana ye tauwadam.

²⁵⁻²⁶ Magai wa unai waihiu hesau, iya dagela waihiuna teha Siliya tupwana Penisiya unai ye laoma. Natuna sinekuku meta yaluwa bikibikina ye luwu iya unai. Na waihiu wa Yesu wasana ye lapui ede ye laoma ye tulibono iya talanuwana unai na ye kaibwada Yesu unai taba yaluwa bikibikina wa natuna wa unai ne ye hededehepesa. ²⁷ Na Yesu ye hededelau iya unai ye wane, “Sola wawayao ya hekaibagunaedi, matawuwuna nige ye dudulai bena wawayao kadi kai ta haidi na ta gabalaedi kedewa** udiyedi.” ²⁸ Waihiu wa ye hededebui ye wane, “Guiyau, mamohoi! Na iyamo wawayao saha se kaidi na mapuladi se bekudobi hatahata gunina ne unai meta kedewa kabo se kaidi.” ²⁹ Na kabo Yesu ye hededelau unai ye wane, “Yom hedehedede ta ye namwakalili. Unai ku lau yom numa. Yaluwa yabayababana wa natum ye pesagabaeyako.” ³⁰ Waihiu wa kabo ye uyo numa. Metai natuna wa ye kita ye kenokeno, na yaluwa yabayababana wa ye pesagabaeyako.

*Yesu tamowai beyakolakolana yo una'unana ye henamwanamwa
(Mataiyo 15:29-31)*

** **7:15-16:** Kulikuli beyabeyadi hekadi lausoiso 16 se kuli doha teina: 16 Ena hesau beyana udiyedi ye lapui, bena ye lapulapuamwanamwaei. ** **7:21:** Laulaubikibiki kaniyona ede tau yo sine nige se tawasola na yababa se ginauli, yo hinage hewali yo hasala yodi kaiheya, yo laulauna kadi kao udoi'udo. ** **7:24:** Taiya meta magai lakilakina teha Penisiya unai. ** **7:27:** Kedewa: Heyaheyasoni ta unai meta Dius tamowaidi siya ede wawayao. Siya se nuwatu'uyoidi bena se namwa, na kabo dagela tamowaidi. Unai huya hekadi se kataidi ede kedewa.

³¹ Yesu Taiya kana sigasiga ye laugabaei na ye lau Sidona yo ye dobi Galili Gabwana, na kabo ye lage Dekapolisi tehanawai. ³² Temenai tamowai beyakolakolana yo ye una'una se woyaiyama Yesu unai. Na se kaibwada Yesu unai bena nimana ye tolesae iya unai. ³³ Boda wa luwadiyena Yesu tamowai wa ye woyahesuwala. Kabo ye kabilau beyana duhadi udiyedi, yo ye kaiso nimana unai na ye kabilau memenana unai. ³⁴ Ye kitasae galewa ne unai na katekamkamna nuwana ne ye hemwayau, na ye hededelau tamowai wa unai ye wane, “Epata!”, ** kaniyona ede, “Ku malapai!” ³⁵ Mahanana ne unai beyana se malapai yo memenana unai gonowana ye hedehededenamwanamwa.

³⁶ Yesu boda wa ye guguyaidi tabu wasana se hededeheleki. Iyamo nige gonowana se lapulau unai, na huya maudoina hedehededenwa wa se helaki mo ye lau. ³⁷ Tamowai maudoidi se nokokalili se wane, “Ginauli maudoidi ye ginaulidi meta se namwa. Tamowai beyakolakoladi beyadi ye hemalapai, yo tamowai una'unadi ye saguidi na se hedehede.”

8

Yesu tamowai 4,000 ye hekaidi (Mataiyo 15:32-39)

¹ Huya hesau boda se tupagogoi'uyoma na nige kadi kai. Ede Yesu yona hekahekatao ye yoganeidi na ye hededelau udiyedi ye wane, ² “Bodalakilaki ta ya katekamkamnaedi, matawuwuna mayadai haiyona maiyaguwao ka miyamiya na nige kai hesau kalidiwai bena taba se kai. ³ Ena taba ma hasalidi na ya hetamalidi, meta kabo keda ne unai matadi se kamumu na se guli, matawuwuna hekadiyo kedalohaloha udiyedi se laoma.” ⁴ Na yona hekahekatao se hededelau unai se wane, “Teina balabalagaibu. Haedi kabo kai ta hai na boda ta ta hekaidi?” ⁵ Yesu ye henamailau udiyedi ye wane, “Kalimiuyena pwalawa hisa?” Siya se wane, “Haligigi-labui.” ⁶ Na ye hedede boda wa se tuli bwatano unai. Na kabo pwalawa haligigi-labui wa ye haidi na Yaubada ye lautokiyei, na kabo ye kihidi na ye moseidi yona hekahekatao udiyedi, na se soiyeidi boda wa udiyedi. ⁷ Yo hinage yona hekahekatao yama gagilidi hekadi kalidiwai. Ede Yesu ye lautoki hesabadi, na kabo ye moseidi na se soiyeidi. ⁸ Maudoidi se kaikai na bogadi se sese. Kabo Yesu yona hekahekatao kaitole wa se tanogogoidi, meta bosa haligigi-labui se hemwayaudi. ⁹ Taukaikai wa badodi ede nuwana 4,000. Na kabo ye hetamalidi se lau. ¹⁰ Na yona hekahekatao wa maiyanao se gelumwamwayau se lau magari Dalemanuta tehana unai.

Paliseya tamowaidi hekihekinoi se kaibwadai (Mataiyo 16:1-4)

¹¹ Kabo Paliseya tamowaidi se laoma na se hetubu Yesu maiyadi se haikawayagala. Se henuwa bena Yesu se lautonogi, unai se kaibwadai bena galewa hekihekinoi na hesau ye ginauli na se kita. ¹² Yesu nuwana ye kamkamna na ye wane, “Matawuwuna saha to teina isi ta hekihekinoi se kaibwadai? Ya hededemamohoi: Taba nige hekihekinoi hesau ya ginauli teina komiu kalimiuwai.” ¹³ Na kabo ye laugabaeidi na waga wa unai ye gelu'uyo na ye lau hali sanakawasi ne.

Paliseya yo Heloda yodi yisti debanawai Yesu yona hekahekatao ye guguyaidi (Mataiyo 16:5-12)

¹⁴ Yesu yona hekahekatao nuwadi se luluhi na nige kai se bahei, na pwalawa kesega mo waga wa unai. ¹⁵ Yesu ye guguyaidi ye wane, “Kwa nanabu'uyoigomiu! Tabu Paliseya yo Heloda yodi yisti** udiyedi se lupohaigomiu!” ¹⁶ Na siya se bom yodi se hedehede se wane, “Doha teina ye hedehede matawuwuna ede nige pwalawa ta

** **7:34:** Epata meta kalina Alamaiki, iya Yesu kalinana. ** **8:15:** Yisti: Dius tamowaidi yisti se heyaheyasoniyei lauhekata unai, matawuwuna lauhekata se tadada tamowai udiyedi doha yisti pwalawa ye hesese.

bahei.”¹⁷ Yodi hedehehede wa Yesu ye lapui ede ye wane, “Idohagi to kwa wane, ‘Nige pwalawa ta bahei?’ Nuwana sola nige kwa kitalobai yo nuwamiu sola nige se masalaha? Idohagi to kwa nuwakwailolo?”¹⁸ Idohagi to matamiu udiyedi nige kwa kita yo beyamiu udiyedi nige kwa lapui? Taba saha ye tubutubu wa kwa nuwatui!¹⁹ Huyana pwalawa haligigi ya kihidi na tamowai 5,000 ya hekaidi meta kaitoledi wa bosa badona hisa kwa usahemwayaudi?” Siya se wane, “Saudoudoi-labui.”²⁰ “Yo pwalawa haligigi-labui ya kihidi na tamowai 4,000 ya hekaidi, na kaitoledi wa meta bosa hisa kwa usahemwayaudi?” Se wane, “Haligigi-labui.”²¹ Kabo Yesu ye hededelau udiyedi ye wane, “Unai yisti hedehehedena wa taba kwa nuwatulobai!”

Yesu tamowai matagibugibuna hesau ye henamwanamwa

²² Na kabo Yesu maiyana hekahekatao se lage Betesaida. Temenai tamowai hesau matagibugibuna se woyaiyama Yesu unai na se kaibwadai bena ye kabilau iya unai.²³ Yesu tamowai matagibugibuna wa nimana unai ye kabi na ye woyalae magai dagelana unai. Na kabo ye kaisolau tamowai wa matana unai na nimana ye tolesae unai na ye wane, “Saha hesau ku kita e nige?”²⁴ Tamowai wa ye kaikewatakikili na ye wane, “Tamowai ya kitadi kadi kao doha kaiwa se taitaihile'usi.”²⁵ Yesu nimana ye tolesae'uyoi tamowai wa matana unai. Na matana wa se lala yo se nega. Ede kabo ginauli maudoidi ye kitanamwanamwaedi.²⁶ Na Yesu tamowai wa ye hetamali ye lau yona magai na ye wane, “Tabu ku uyo magai ne unai.”

Petelo Yesu ye hedehehemasalaha meta iya Keliso

(Mataiyo 16:13-20, Luka 9:18-21, Yowane 6:67-69)

²⁷ Na kabo Yesu maiyana hekahekatao se lau wasawasa Pilipi yona magai Sisaliya dedekana magaidiyao udiyedi. Yodi kabalau ne unai Yesu ye henamaiyeidi ye wane, “Tamowai se hedede yau meta kaiteya?”²⁸ Siya Yesu kalinana se bui se wane, “Hekadi se wane kowa bena Yowane Babatiso, na hekadi se wane, Eliya, yo hekadi se wane bena kowa peloweta hesau.”²⁹ Na kabo Yesu ye henamaiyeidi ye wane, “Na komiu? Kwa hedede meta yau kaiteya!” Na Petelo ye wane, “Kowa meta Keliso.”³⁰ Ede Yesu ye hedehebaya udiyedi bena tabu tamowai hesau yona se hedehehede.

Yesu yona boita yo tolo'uyo ye hedehehemasalaha

(Mataiyo 16:21-23, Luka 9:22)

³¹ Na kabo Yesu ye hetubu yona hekahekatao ye hekatadi meta Tau Natuna kabo hekamkamna udoi'udo udiyedi ye kamkamna. Na Dius babadadiyao yo taukaitalasang tauwoyaidi yo laugagayo taulahekataena iya kabo se subu yo se unuhemwaloi, na mayadai haiyona mulidiwai kabo ye tolo'uyo.³² Yesu yona hedehehede wa ye masalahakalili, unai Petelo Yesu ye woyahesuwala na ye hetubu hedehehede bayabayaodi udiyedi ye hedehehekaiyawasi.³³ Na Yesu ye tolobui ye kitalau yona hekahekatao wa udiyedi na ye hedehebaya Petelo unai ye wane, “Ku tausuwala, kowa Satani. Kowa nige Yaubada yona nuwanuwatu ku nuwatuidi, na tamowai mo yodi nuwanuwatu udiyedi ku nuwanuwatu.”

Yesu idohagi hemuhemuliwatanina

(Mataiyo 16:24-28, Luka 9:23-27)

³⁴ Na kabo boda wa ye yoganeidi se laoma yona hekahekatao maiyadiyao na ye hededelau udiyedi ye wane, “Ena hesau ye henuwa bena ye hemuliwatanigau, meta taba ye bom ye nuwagabae'uyoi na yona sataulo ye bahei** na ye hemuliwatanigau.³⁵ Ena yona nuwatu bena yona mauli tanoubu ta unai ye kabihekahini, meta yona mauli mamohoina kabo ye hetaukwadalele. Na ena tanoubu ta maulina ye nuwagabaei

** **8:34:** Yona sataulo ye bahei: Hedehehede ta kaniyona meta bena ye talamgabaei'uyoi gonowana Yesu debanaena ye boita.

yau yo wasa namwanamwana debamaiyena, kabo mauli nige kana siga ye lobai. ³⁶ Taba tamowai hesau tanoubu ginaulidi maudoidi ye haidi, na ye bom yaluwana ye heyababa'uyoi, meta yona namwa saha? ³⁷ Saha namwanamwana unai kabo yaluwana ne ye hai'uyoi? ³⁸ Ena hesau teina isi ganaganawalina** yo yabayababana ta matadiwai ye mwadineigau yo yogu hedehedede ta ye mwadineidi, Tau Natuna hinage kabo ye mwadinei huyana Tamana yona didiga unai ye uyoma maiyana yona anelu tabudiyao.”

[(9:1)]** Na kabo Yesu ye hededelau udiyedi ye wane, “Ya hededemamohoi: Hekadi inai taba nige se boita kana siga Yaubada yona basileiya se kita ye lagema ma gigibwalina.”

9

Yaubada Yesu yona didiga ye hemasalaha (Mataiyo 17:1-8, Luka 9:28-36)

1-2** Mayadai haligigi-kesega se lau, na kabo Petelo, Yamesi, yo Yowane Yesu ye woyaidi se sae kuduli lakilakina hesau kewanawai. Siya se bom mo menai. Hekahekatao matadiwai na Yaubada Yesu kana kao ye bui. ³ Na kana kwama ye bui ye posi na ye namanamalikalili, yona posiposi ne nige gonowana tamowai hesau ye deulilobai kaiyaulina ta unai. ⁴ Na kabo Eliya maiyana Mose se taumasalaha na Yesu maiyadi se hedehedede. ⁵ Kabo Petelo ye hededelau Yesu unai ye wane, “Labi, ye namwakalili to kita inai. Unai taba gwau haiyona ka kabidi, hesau kowa yom, hesau Mose yona, yo hesau Eliya yona.” ⁶ Hedehedede wa ye hedede matawuwuna taudi haiyona wa se matausikalili, unai nige kabina ye kata saha dudulaina kabo ye hedede. ⁷ Na kabo yada ye taumasalaha ede ye sumadi. Na yada wa unai kalina hesau se lapui ye laoma ye wane, “Teina yau Natugu ya gadosisiyei. Kwa lapulau iya unai!” ⁸ Nige bayaona na se kaikewatakikili meta Mose yo Eliya nige se kitadi, na Yesu ye bom mo.

Hekahekatao Yesu unai Eliya se henamaiyei (Mataiyo 17:9-13)

⁹ Yesu maiyadi kuduli wa unai se lidi se dobidobi na ye guguyaidi ye wane, “Saha wau kwa kita wa tabu tamowai hesau yona kwa hedehedede ye lau ee kana siga Tau Natuna boita unai ye tolo'uyo.” ¹⁰ Siya se bom hedehedede wa se nuwanuwatui yo hinage se hedehededei se wane, “Boita tolo'uyona meta kaniyona ede saha?” ¹¹ Na kabo se henamaiyei se wane, “Matawuwuna saha to laugagayo taulauhekataena se wane, Eliya** taba ye uyomabaguna?” ¹² Yesu ye hededelau udiyedi ye wane, “Mamohoi, Eliya ye laomabaguna na ginauli maudoidi ye kabinonohaidi. Yo hinage Buka Tabuna unai se kuliyako meta Tau Natuna kabo ye kamkamnakalili yo tamowai iya se laukwatak-wataei. ¹³ Na ya hededelaowa, Eliya ye laomako,** na saha yababadi se nuwatuidi na se henuwadi wa tamowai se ginaulidiko iya unai, doha iya wasana unai se kuliyako.”

Yesu wawaya ye henamwanamwa (Mataiyo 17:14-21, Luka 9:37-43)

¹⁴ Na kabo se lage hekahekatao hekadiyo wa udiyedi. Na bodalakilaki se kitadi meta kadi kahao wa se tolohetakikilidi, yo hinage laugagayo taulauhekataena hekadi maiyadiyao se haihaikawayagala. ¹⁵ Na tamowai wa Yesu se kita meta kaluwadi se loi na se heloi se lau iya se lautokiyei. ¹⁶ Na Yesu ye henamaiyeidi ye wane, “Komiu saha kwa haihaikawayagalaie?” ¹⁷ Boda wa luwadiwai tamowai hesau ye wane,

** **8:38:** Isi ganaganawalina hededehehemasalaha ede ganawali unai. ** **8:38:** Na kabo... meta peina 9:1 unai ka hesigiyama. ** **9:1-2:** Lausoiso 1 ka hesigi ka tole peina 8 gehegehena ne unai. ** **9:11:** Eliya: Dius yodi nuwatu bena peloweta Eliya kabo se kita ye baguna ye uyoma tanoubu ta, na kabo Keliso. Yo se nuwatui Eliya yona uyoma ne unai taba nige kamkamna ye hekalo. ** **9:13:** Eliya ye laomako: Yesu iya Yowane Babatiso ye hedehededei, yona laulau yo yona paisowa doha Eliya. Eliya hedehededena hinage Mataiyo 11:14 unai ku hasili.

“Tanuwaga, natugu ya woyaiyama kalimwai. Yaluwa yabayababana iya ye luwui, unai nige gonowana ye hedehehede. ¹⁸ Ena yaluwa yabayababana iya ye hai, kabo ye gabadobiyei bwatano ne unai, na kawana ne unai kabo gwasapulo se pesa, yo hinage kawana ye kapuyahisi yo tauna se todi. Yom hekahekatao ya kaibwadaidi bena yaluwa yababana ne se hedehehepesa, na nige gonowadi.” ¹⁹ Na kabo Yesu ye hededelau udiyedi ye wane, “Komiu isi ta meta nige yomi sunuma! Kabo ya miya'uyo lohana doha saha kalimiuyena? Kwa kamnayabayababa! Wawaya me kwa baheiyama kaliguwai.” ²⁰ Na kabo wawaya wa se woyalae Yesu unai. Huyana yaluwa yabayababana Yesu ye kita ede wawaya wa ye gulidobi bwatano unai na ye tapitapipili yo gwasapulona se pesa. ²¹ Yesu gama wa tamana ye henamaiyei ye wane, “Kaiuyana teina kasiyebwa ta ye tubu iya unai?” Tamana wa ye wane, “Ma gagilina unai. ²² Huya se bado iya ye gabadobiyei kaiwa kalakalasina yo waila unai bena kabo ye unuhemwaloi. Na ena kowa gonowam, kabo ku katekamkamnaegai yo ku saguigai.” ²³ Yesu ye wane, “Ye saha to ku wane, ‘Ena kowa gonowam?’ Ginauli maudoidi kabo se masalaha taukawamamohoiyeigau** unai.” ²⁴ Na gama wa tamana ma kalinalakilakina ye hededebui ye wane, “Ya kawamamohoiyego! Na yogu sunuma gagilina ta unai ku saguigau.” ²⁵ Na Yesu boda wa ye kitadi se heloi se laoma iya unai, ede ye hededebayao yaluwa bikibikina wa unai ye wane, “Yaluwa beyakolakolana yo una'unana, yau ya hededelaowa, wawaya me ku pesagabae na tabu ku luwu'uyo iya unai.” ²⁶ Na yaluwa yababana wa ye yogahi ede wawaya wa ye nukui na ye laugabaei. Na gama wa kana kao doha tamowai boiboitana, unai boda wa yodi nuwatu bena ye boitako. ²⁷ Na Yesu ye kabilau wawaya wa nimana unai ye kabihetolo, ede ye tolo.

²⁸ Na kabo Yesu maiyana hekahekatao se mwalaesae numa kalona unai. Metai siya se bom na se henamaiyei se wane, “Matawuwuna saha to nige gonowamai wawaya ne unai yaluwa yababana ne ka hedehehepesa?” ²⁹ Yesu ye hededelau udiyedi ye wane, “Yaluwa kana kao doha teina ta, meta tapwalolo mo unai** kabo kwa hedehehepesa.”

*Yesu yona boita yo tolo'uyo ye hededehemasalaha'uyoi
(Mataiyo 17:22-23, Luka 9:43-45)*

³⁰ Kabo Yesu maiyana hekahekatao magai wa se laugabae na Galili unai se laulau. Yesu nige ye henuwa bena tamowai kabina se kata meta siya ede haedi, ³¹ matawuwuna yona hekahekatao wa ye hekatadi. Ye hededelau udiyedi ye wane, “Tamowai hesau kabo Tau Natuna kana ye walohai na ye moselaei tamowai hekadi nimadiwai na se unuhemwaloi. Kabo ye boita, na mayadai haiyona mulidiwai kabo ye tolo'uyo.” ³² Na Yesu saha ye hedehehedeidi ta meta yona hekahekatao wa nige se nuwatulobai. Iyamo nige se henamaiyei, matawuwuna ede se matausi.

*Kaiteya ye saekalili Yaubada matanawai?
(Mataiyo 18:1-5, Luka 9:46-48)*

³³ Na kabo se lage Kapelenauma unai. Siya numa hesau kalona unai, na Yesu ye henamaiyeidi ye wane, “Komiu saha kwa hetahetala keda ne unai?” ³⁴ Siya nige kalinadi, matawuwuna keda wa unai se bom se henahenamai'uyoidi luwadi ne unai kaiteya ye saekalili. ³⁵ Yesu ye tulidobi na Saudoudoi-labui wa ye yogagogoidima na ye wane, “Yaubada matanaena kaiteya tamowai ye henuwa bena ye baguna, taba ye lau ye mulitamolosi, yo ye hemala tamowai maudoidi yodi heyayai tauhaina.”

³⁶ Na kabo Yesu ye kabilau wawaya gagilina hesau [nimana] unai. Ye kabihetolo matadiyena na ye labasiyama na ye wane, ³⁷ “Taba kaiteya wawaya gagilina hesau doha

** **9:23:** Taukawamamohoiyeigau: Yesu yona hedehehede Maleko ye kuli meta, “Taukawamamohoi kalinawai ginauli maudoidi gonowana.” ** **9:29:** Tapwalolo mo unai: Kulikuli beyabeyadi hekadi se kulitubei doha teina: tapwalolo yo kaihudi mo unai.

teina ye yogaisini yau hesaguwai, meta yau ye yogaisinigau. Yo kaiteya ye yogaisinigau meta nige yau mo ya bom ye yogaisinigau, na tauhetamaligau wa ye yogaisini.”

Kaiteya nige ye guduguduida meta iya kada kaha hesau

(Mataiyo 18:6-9, Luka 9:49-50 yo 17:1-2)

³⁸ Na Yowane ye hededelau Yesu unai ye wane, “Taulauhekata, tamowai hesau ka kita hesamyena yaluwa yababadi tamowai udiyedi ye hededehepesadi. Na ka hededelau unai taba ye kaiyawasi, matawuwuna iya nige kada kaha hesau.” ³⁹ Yesu ye wane, “Tabu kwa hekahekaiyawasi, matawuwuna kaiteya laulaugigibwali ye ginauli yau hesaguwai, iya taba nige gonowana ye tolobuimwamwayau na ye hededeheya-heyababagau tenem huyana ne unai. ⁴⁰ Kaiteya nige ye guduguduida, iya meta tausaguida hesau. ⁴¹ Ya hededemamohoi: Kaiteya waila kaputina ye leyawa yau hesaguwai matawuwuna kowa Keliso yona, meta unai maisana kabo ye hai.”

Tabu yababa kedadi udiyedi ta laulau

(Mataiyo 18:6-9, Luka 17:1-2)

⁴² “Tausunumaegau tamowaina dobidobina** hesau, ena tamowai hesau iya ye woyahesuwala na yababa ye ginauli, meta ye namwa mo taba weku lakilakina gadonawai se kau na se tuudobiyei gabwawai. ⁴³⁻⁴⁴ Ena nimam hesau ye woyahesuwalago na yababa ku ginauli, ku bolihai. Ye namwa mo taba nimam kesega unai mauli nige kana siga ku hai, na kabo ma nimalabulabuim na ku lau kaiwa kalakalasina nige yona huyaboso unai.** ⁴⁵⁻⁴⁶ Yo ena kaem hesau ye woyahesuwalago na yababa ku ginauli, meta ku bolihai. Ye namwa mo kaem kesega unai mauli nige kana siga ku hai, na kabo ma kaelabulabuim na Yaubada ye gabalaego kaiwa kalakalasina unai.** ⁴⁷ Yo hinage ena matam hesau ye woyahesuwalago yababa unai, ku lamohai na ku gabaei. Ye namwa mo taba matam kesega na Yaubada yona basileiya unai ku lage, na kabo ma matalabulabuim na Yaubada ye gabalaego kaiwa kalakalasina unai,

⁴⁸ “temenai mwatamwata buluma taukaikaidi taba nige se mwaloi, yo kaiwa nige yona kababoso.’

(Aisaiya 66:24)

⁴⁹ Yaubada kabo ye hekalitagomiu kaiwa kalakalasina unai.** ⁵⁰ Kalita meta ye namwa, na taba ye tomatoma, kabo idohagi na ye kalita'uyo? [*Nige gonowana!*] Taba kalita** kalimiuwai yo kwa hainuwakesega na kwa miya.”

10

Paliseya tamowaidi Yesu unai inawase laugagayona se henamaiyei

(Mataiyo 19:1-12)

¹ Yesu ye dalahai ye lau Yudeya tehana hesau unai ye lage, iya ede Yolidani sagasagana hali sanakawasina ne unai. Na kabo Yolidani wailana unai ye kawasi. Temenai hinage bodalakilaki se lagegogoma Yesu unai na ye hekatadi. Iya yona laulau doha tenem. ² Huyana ne unai Paliseya tamowaidi hekadi se laoma iya unai bena se laukita ede se henamaiyei se wane, “Taba tamowai hesau mwanena ye inawasei, meta ye dudulai?” ³ Na Yesu ye henamaiyeidi ye wane, “Mose yona laugagayo sahasahana

** **9:42:** Tausunumaegau tamowaina dobidobina: Kalina Giliki unai hedehedede ta kaniyona labui: Tamowai gagilina, o, wawaya, yo, tamowai dobidobina, siya ede tamowai lakilakidi se kitadobidobiyeidi, yo hinage wawayao.

** **9:43-44:** Nimakulikuli beyabeyadi hekadiyo se kuli doha teina lausoi 44 unai: Temenai mwatamwata buluma taukaikaidi taba nige se mwaloi, yo kaiwa nige yona kababoso. ** **9:45-46:** Lausoi 46 hinage

kulikuli beyabeyadi hekadiyo se kuli doha lausoi 44 wa. ** **9:49:** Ye hekalitagomiu kaiwa kalakalasina unai: Kalita meta Isalaela unai se tole kai hekadiyo udiyedi na bena ye bawa ye loha na tabu ye pwasa, yo kalita hinage kaitalam kabahe'a'adi (Lewitikasi 2:13). Hedehedede hekalitagomiu kaiwa kalakalasina unai ne kaniyona nuwana hekamkamna unai Yaubada yona tamowai ye kabinonohaidi na se a'a yo se namwa iya matanawai.

** **9:50:** Kalita meta hinage kawakeha yo nuwadaumwali miyamiyadi heyahayasonidi.

ye leyawa?” ⁴ Se wane, “Mose ye talam bena tamowai ye inawase, na ye wane bena inawase pepwana** ye kulibagunai, kabo gonowana mwanena ye hetamali ye lau.” ⁵ Na Yesu ye hededelau udiyedi ye wane, “Teina laugagayo ta Mose ye kuli komiu yomiu, matawuwuna nuwamiu se kwailolokalili. ⁶ Huyana Yaubada tanoubu ta ye hetubu meta loheya yo waihiu ye ginaulidi.** ⁷ Unai ede loheya kabo tamana yo sinana ye laugabaeidi na ye patulau mwanena unai, ⁸ na siya taudi labui se hemala buluma kesega.** Unai siya nige tamowai labui, na se hemala tamowai kesega. ⁹ Unai Yaubada saha ye tolekesegai meta tabu tamowai hesau ye hetatagwaligwali.”

¹⁰ Huyana se uyo numa kalona unai ede yona hekahekatao Yesu yona hedehedede wa se henamaiyei. ¹¹ Na ye hededelau udiyedi ye wane, “Kaiteya tamowai mwanena ye inawasei na waihiu hesau ye tawasolai, meta iya ye ganawali. ¹² Yo kaiteya waihiu iya mwanena ye inawasei na loheya hesau ye tawasolai, meta iya hinage ye ganawali.”

*Yesu ye kaibwada Yaubada unai kabo wawayao ye kitahetetedi
(Mataiyo 19:13-15, Luka 18:15-17)*

¹³ [Huya hesau,] tamowai hekadi wawayao gagilidi se woyalaedi Yesu unai bena kabo ye kabilau udiyedi [yo ye hededehenamwadi]. Na yona hekahekatao wa tamowai wa se hededehekaiyawasidi. ¹⁴ Yesu ye kitadi na ye koipili ede ye hededelau yona hekahekatao wa udiyedi ye wane, “Wawayao gagilidi ne bena se laoma kaliguwai, na tabu kwa guduguidi, matawuwuna tamowai yodi sunuma doha teina wawayao ta meta Yaubada yona basileiya ne siya yodi. ¹⁵ Ya hededemamohoi: Tamowai nige gonowana ye lusola Yaubada yona basileiya unai kana siga yona sunuma doha wawayao gagilina ta.” ¹⁶ Na kabo wawayao wa ye labasidi na nimana ye tolesaedi kewadiwai na ye hededehenamwadi.

*Tamowai gogogogona Yesu unai mauli nige kana siga henamaina ye henamaiyei
(Mataiyo 19:16-30, Luka 18:18-30)*

¹⁷ Yesu ye hetubu bena ye dalahai, na tamowai hesau ye heloi ye laoma ye tulibono Yesu talanuwana wa unai na ye henamaiyei ye wane, “Taulauhekata namwanamwana, taba saha ya ginauli kabo mauli nige kana siga ya hai?” ¹⁸ Yesu ye hededelau unai ye wane, “Ye saha to ku wane yau ya namwa? Nige tamowai hesau ye namwa, na Yaubada ye bom mo. ¹⁹ Laugagayo kabidi ku kata: Tabu ku kaiunu, tabu ku ganawali, tabu ku kaiwahali, tabu lauhetala unai ku hededelupolupo, tabu tamowai hesau ku lupohai, yo hinage tamam yo sinam ku hekasisiyeidi.” ²⁰ Tamowai wa ye wane, “Taulauhekata, ma gagiligu unai ye laoma teina meta laugagayo maudoidi ta ya miyawatanidi.” ²¹ Yesu ye kitalau ma gadosisina na ye wane, “Ginauli kesega mo sola nige ku ginauli. Yom gogo maudoidi ku lokunegabaeidi, na monidi ne ku moseidi taudehadeha yodi, na kabo galewa ne unai ku wasawasa. Na kabo ku laoma ku hemuliwatanigau.” ²² Hedehedede wa ye lapui ede ye siliyata na ye dalahai ye lau ma nuwakamkamnana, matawuwuna ede ye gogokalili.

²³ Kabo Yesu yona hekahekatao ye kitahetakikilidi na ye hededelau udiyedi ye wane, “Tamowai gogogogodi bena se lusola Yaubada yona basileiya unai meta ye pilipikalili.” ²⁴ Yona hedehedede wa unai se siliyata. Na ye hedede'uyo ye wane, “Natuguwao, Yaubada yona basileiya lusolana meta ye pilipikalili. ²⁵ Doha kamela nige gonowana diu duhanawai ye lusola, gonogonowana doha tamowai gogogogona meta iya hinage nige gonowana ye lusola Yaubada yona basileiya unai.” ²⁶ Yesu yona hekahekatao wa kabo se siliyatalilili na se henahenamai'uyoidi se wane, “Kaiteya kabo mauli nige kana siga ye hai?” ²⁷ Yesu ye kitalau udiyedi na ye wane, “Tamowai kalidiwai nige gonowana,

** **10:4:** Inawase pepwanahedehededenana ede Dutelonomi 24:1 unai ku hasili. ** **10:8:** Hedehedede ta meta Genese 2:24 unai ku hasili.

** **10:6:** Wasana meta Genese 1:27 unai

na Yaubada [*gonowana tamowai ye haidi se lau yona basileiya unai.*] Matawuwuna Yaubada ginauli maudoina gonowana ye ginaulidi.”

²⁸ Na Petelo ye hededelau Yesu unai ye wane, “Kai kabo idohagi? Yoma gogo maudoidi ka laugabaeidiko na ka hemuliwatanigo.” ²⁹ Yesu ye hededelau udiyedi ye wane, “Ya hededemamohoi: Kaiteya yona numa, kana kahao, lounao, tamana, sinana, natunao, yo yona koya ye laugabaedi yau debaguwai yo wasa namwanamwana debanawai, ³⁰ teina huya ta unai Yaubada kabo ginauli maudoidi udiyedi ye kinauyakaliliyei, yona numa, kana kahao, lounao, sinana, natunao, yo yona koya kabo se badokalili. Yo hinage pilipili kabo ye hekalodi, na malaitom huya kabo mauli nige kana siga ye hai. ³¹ Na tamowai ta kitahesae'useidi meta se bado kabo se laoma se dobi, na tamowai ta kitadobidobiyei'useidi wa meta se bado kabo se laoma se sae.” **

*Yesu yona boita hedehedena hehaiyonana
(Mataiyo 20:17-19, Luka 18:31-34)*

³² Yesu yona hekahekatao ye bagunaedi se laulau Yelusalema. Yona hekahekatao wa se siliyata yo tauhemuliwatanina hekadiyo wa se matausi. Iya kabo yona hekahekatao wa ye woyahesuwaladi na ye hededehemasalaha udiyedi saha kabo ye tubu iya unai. ³³ Ye wane, “Kwa lapulapuinamwanamwa! Teina ta saesae Yelusalema. Na temenai kabo tamowai hesau Tau Natuna kana ye walohai taukaitalasam tauwoyaidi yo laugagayo taulauhekataena udiyedi. Kabo se koitalaliu na se hekasa bena se unui, na kabo se moselaei dagela tamowaidiyao kalidiwai. ³⁴ Na siya kabo iya se talatalawasiyei yo se kaikaisoi yo se pidili yo kabo se unuhemwaloi. Na mayadai hehaiyonana unai kabo ye tolo'uyo.”

*Yamesi yo Yowane yodi kaibwada
(Mataiyo 20:20-28)*

³⁵ Sebedaiyo natunao Yamesi yo Yowane se laoma Yesu unai se wane, “Tanuwaga, saha ka kaibwadai ne, ka henuwa bena ku ginauli yomai.” ³⁶ Yesu ye henamaiyeidi ye wane, “Komiu saha kwa henuwa bena ya leyawa?” ³⁷ Na se wane, “Ku hededehe-sunumagai taba yom basileiya unai kai tauma labui kabo teha saesaena unai ka tuli, hesau kowa nimakahatum na hesau seuseulim unai.” ³⁸ Na Yesu ye hededelau udiyedi ye wane, “Komiu saha kwa kaikaibwadai ta meta nige kabina kwa kata. Keyakana yau kabo unai ya numa ne, gonowamiu kabo kwa numa? Yo hinage babatiso kabo ya hai ne ** gonowamiu kabo kwa hai?” ³⁹ Na se wane, “Kai gonowamai.” Na Yesu ye wane, “Mamohoi! Komiu kabo kagu keyaka ne unai kwa numa, yo yogu babatiso ne unai kabo kwa babatiso. ⁴⁰ Na yau nige gonowana ya hineli kaiteya kabo kahatugu unai ye tuli yo kaiteya seuseuligu unai ye tuli. Teina kabatuli ta tamagu ye hinelinonohaidiko kaiteyadi kabo udiyedi se tuli.”

⁴¹ Yamesi yo Yowane yodi hedehedede wa hekahekatao hekadiyo wa se lapui ede se koipili. ⁴² Kabo Yesu ye yogagogoidi na ye wane, “Komiu kabina kwa kata meta dagela tamowaidi yodi wasawasa yodi lina bayabayaona unai yodi tamowai se tanuwagaidi, yo idohagi yodi tauwoyawoya yodi gigibwali unai se loinaedi. ⁴³ Na komiu tabu doha tenem. Kaiteya ye henuwa bena yomi bada, iya taba yomi heyayai tauhaina. ⁴⁴ Yo kaiteya ye henuwa bena ye baguna luwamiuyena, meta iya tamowai maudoidi yodi heyayai tauhaina. ⁴⁵ Matawuwuna Tau Natuna ye laoma nige bena tamowai iya yona

** **10:31:** Lausoiso ta meta Maleko yona kulikuli wa unai ye kuli, Na taubaguna se bado kabo se mulita, na taumulita se bado kabo se baguna. Teina unai Yesu tauhemuliwatanina, siya tanoubu ta unai tamowai dobidobidi yo dehadehadi, yo Dius yodi tauwoyawoya tamowaidi ye heyaheyasoniyeidi. ** **10:38:** Keyakana yau kabo unai ya numa ne, yo, babatiso kabo ya hai ne: Teina hedehedede labui ta kaniyodi ne meta kesega, iya ede Yesu hekamkamna kabo ye hekalo ne heyaheyasonina.

se paisowa, na iya bena tamowai yodi ye paisowa na yona mauli ye mosegabaei na unai tamowai maudoidi ye hemaisahaidi na se mauli.”

*Yesu Batimaiyo matana ye helaladi
(Mataiyo 20:29-34, Luka 18:35-43)*

⁴⁶ Yodi kabalau wa unai kabo se lage Yeliko unai. Na Yesu maiyana hekahekatao yo bodalakilaki maiyadiyao magai wa se laugabae, na tamowai matagibugibuna hesau hesana Batimaiyo, Timaiyo natuna, keda dedekanawai ye tutuli na ye kaikaibwada moni. ⁴⁷ Na huyana Batimaiyo wasa ye lapui meta Yesu Nasaleta tamowaina ye laolaoma dedekana ne unai, kabo ye yogalau unai ye wane, “Yesu, Dawida Natuna, ku katekamkamnaegau!” ⁴⁸ Na tamowai gwaudi iya se dilai se wane, “Ku mwanou!” Na iya kabo ye yogalakilaki na ye wane, “Dawida Natuna, ku katekamkamnaegau!” ⁴⁹ Ede Yesu ye talutolo na ye hededelau yona hekahekatao wa udiyedi ye wane, “Tamowai ne kwa yoganeiyama.” Ede se yogalau unai se wane, “Nuwam ye talu na ku tolo! Yesu ye yoganeigo!” ⁵⁰ Taumatagibugibu wa kana kwama ye haigabaei na ye kamposi na ye lau Yesu unai. ⁵¹ Yesu iya ye henamaiyei ye wane, “Saha ku henuwa bena ya ginauli kalimwai?” Tamowai matagibugibuna wa ye wane, “Labi, ya henuwa taba matagu ku helaladi.” ⁵² Yesu ye hededelau unai ye wane, “Ku lau, yom sunuma debanawai ku namwanamwa.” Na mahanana ne unai tamowai wa matana se lala ede Yesu ye hemuliwatani na keda wa unai se lau.

11

*Yesu se hailobai yo se hedebasaei doha wasawasa Yelusalema unai
(Mataiyo 21:1-11, Luka 19:28-38, Yowane 12:12-19)*

¹ Yesu ma kana bodao Yelusalema se hanahanawui, na se lage Betepage yo Betaniya dedekadiwai, Olibe koyana unai. Na kabo yona hekahekatao labui ye hetamalidi se lau ² na ye hededelau udiyedi ye wane, “Kwa lau na magai ne unai kabo donki natuna kwa kita se paihekahini duu unai, sola nige tamowai hesau ye tulisae unai. Kwa yailihai na kwa woyaiyama. ³ Ena tamowai hesau ye henamaiyeigomiu ye wane, ‘Saha temeta kwa ginaginauli?’, kabo kwa wane, ‘Guiyau ye henuwa na mahana kubwakubwa mo unai kabo ye hetamali'uyoiyama.’”

⁴ Se lau ede donki natuna wa se kita duu unai se paihekahini. Se yaiyaili, ⁵ na tamowai hekadi temenai se totolo se hededelau kalidiwai se wane, “Ye saha to donki natuna ne kwa yaili?” ⁶ Yesu saha ye hedede kalidiwai wa gonogonowana hinage se hedede udiyedi ede suisui wa se talamyeyi. ⁷ Donki natuna wa se woyai se laeyama Yesu unai. Na kadi kwama se tolesaedi kewana ne unai, na Yesu ye tulisae unai. ⁸ Tamowai hekadi kadi kwama se yesedi keda wa unai, na hekadi hinage kaiwa lagadi se bolidi na keda wa unai se yesedi. ⁹ Kaiteyadi se baguna yo se mulita na Yesu maiyadi se laulau meta se heyoheyoga se wane,

“Hosana!”**

“Ka hedebasaego, kowa Guiyau hesanawai ku laoma!”**

¹⁰ “Ka hedebasaego, kowa kama kulutubu Dawida kana isimulita. Ku laoma ku tanuwagaigai!”

“Hosana saesaekalilina!” **

¹¹ Na kabo Yesu ye lusae Yelusalema na ye mwalae Numa Tabuna bakubakuna unai na ginauli maudoidi ye kitasipwaidi. Na ye hetubu ye meimeilahi, unai Numa Tabuna bakubakuna wa ye pesagabae, na maiyana hekahekatao se uyo Betaniya.

** **11:9:** Hosana: Kalina Hebelu unai hedehedede hosana kaniyona ede, Ku gilihagai. Hedehedede ta unai Yesu se hedebasaei se wane iya meta taugilihaidi yo yodi wasawasa. ** **11:9:** Hedehedede ta unai Same 118:25-26 se katai.

** **11:10:** Hosana saesaekalilina kaniyona ede, Yaubada galewa saesaena unai ka hedebasaei.

*Yesu kaiwa ye kawagulaiyei
(Mataiyo 21:18-19)*

¹² Mala ye tom kabo Betaniya se laugabae se laulau na Yesu ye tauhasahasali.
¹³ Kedalohawai ye kitalau bosibosi hesau ye kita, ede kaniyona hesabana ye lau. Na ye kita wa meta lugugaibuna, matawuwuna kaiwa wa nige yona huyakaniyo. ¹⁴ Ede Yesu kaiwa wa ye kawagulaiyei ye wane, “Taba nige tamowai hesau kaniyom ye kai'uyoi.” Yona hekahekatao hedehedede wa se lapui.

*Yesu taulokune ye henakuhepesadi Numa Tabuna bakubakuna unai
(Mataiyo 21:12-17, Luka 19:45-48, Yowane 2:13-22)*

¹⁵ Na kabo se lage Yelusalema ede Yesu ye mwalae Numa Tabuna bakubakuna unai. Na ye hetubu taulokulokune yo tauhemahemaisa ye henakudi se pesa. Yo hinage moni taulauluhedudu** yodi hatahata yo kaitalasang bunebunediyao taulokunedi yodi kabatuli ye buikalalaidi. ¹⁶ Na ye laugagayoidi tabu tamowai hesau lokune ye bahei na ye mwalae Numa Tabuna bakubakuna unai. ¹⁷ Yona lauhekata wa unai ye hededelau udiyedi ye wane, “Se kuliyako se wane, ‘Yogu numa meta tamowai maudoidi yodi kabatapwalolo numana.’ (Aisaiya 56:7) Iyamo komiu kwa hai ye hemala taukaikawaihali yodi duha.”

¹⁸ Taukaitalasang tauwoyaidi yo laugagayo taulauhekataena hekadi yona hedehedede se lapui ede keda se wase bena taba idohagi kabo se unui. Na Yesu se matausiyei, matawuwuna ede tamowai gwaudi yona lauhekata wa se nokoei.

¹⁹ Ye meimeilahi ede Yesu maiyana hekahekatao Yelusalema se laugabaei.

*Sunuma gigibwalina Yesu ye lauhekataei
(Mataiyo 21:20-22)*

²⁰ Malatomtomyena se uyo Yelusalema na se laulau ede kaiwa wa se kita meta ye wowoya yo ye pogi. ²¹ Saha ye tubu wa Petelo nuwana ne unai ye sae ede ye hededelau Yesu unai ye wane, “Labi, ku kitalau! Lahi kaiwa wa ku kawagulaiyei wa ye pogi.” ²² Kabo Yesu ye hededelau udiyedi ye wane, “Yaubada kwa sunumaei. ²³ Ya hededemamohoi: Ena hesau ye hededelau teina kuduli ta unai ye wane, ‘Ku tuudobiyego gabwa ne unai’, na nige ye nuwalabulabui, na ye sunuma mo bena yona kaibwada ne Yaubada kabo ye ginauli, meta kabo ye ginauli. ²⁴ Unai ya hededelaowa, tapwalolo unai saha kwa kaibwadai na kwa sunumaei meta kwa hai, kabo Yaubada ye leyawa. ²⁵⁻²⁶ Na yomi huyatapwalolo unai, na ena yomi pilipili kami kahao hekadi udiyedi, bena kwa nuwatugabaeidi, metai kabo tamamiu galewa ne unai yomi yababa hinage ye nuwatugabaeidi.”**

*Yesu yona gigibwali se henamaiyei
(Mataiyo 21:23-27, Luka 20:1-8)*

²⁷ Kabo se lage'uyo Yelusalema unai na Yesu Numa Tabuna bakubakuna unai ye taitaihile ede taukaitalasang tauwoyaidi yo laugagayo taulauhekataena yo tamowai lakilakidi se laoma iya unai ²⁸ na se henamaiyei se wane, “Gigibwali sahasahana unai teina laulau ta ku ginaulidi, yo kaiteya yom dudulai ne ye haiyawa?” ²⁹ Yesu ye hededebui ye wane, “Kabo hinage henamai kesega ya henamaiyeigomiu. Na ena yogu kwa hedehedede, kabo hinage ya hedehemasalaha gigibwali sahasahana unai teina ginauli ta ya ginaulidi. ³⁰ Yowane yona gigibwali haedi ye hai na ye hebahebatiso? Yaubada unai o tamowai udiyedi? Hage, yogu kwa hedehedede.”

** **11:15:** Taulauluhedudu wa yodi paisowa meta dagela monidiyao se haidi na Yelusalema yodi moni unai se hedududi. ** **11:25-26:** Lausoisoi 26 meta kulikuli beyabeyadi hekadiyo mo se kuli doha teina: “Ena taba komiu yodi yababa ne nige kwa nuwatugabaeidi, meta hinage tamamiu galewa ne unai yomi yababa taba nige ye nuwatugabaeidi.”

³¹ Siya se bom se henahenamai'uyoidi se wane, "Taba ta wane, 'Yaubada unai ye hai', iya kabo ye wane, 'Ede ye saha to nige kwa kawamamohoiyei?' ³² O taba ta wane, "Tamowai udiyedi', kabo boda se heyababada." Na boda se matausiyeidi, matawuwuna maudoidi Yowane se kitayako meta iya peloweta mamohoina. ³³ Unai kabo se hededelau Yesu unai se wane, "Nige kabina ka kata." Ede Yesu ye wane, "Unai yau hinage taba nige yomiu ya hedehehede gigibwali sahasahana unai ginauli ta ya ginaulidi."

12

Taukitakitahetete yababadi palabolena (*Mataiyo 21:33-46, Luka 20:9-19*)

¹ Na kabo Yesu ye hetubu ye hededepalabole [*tamowai lakilakidiyao wa*] kalidiwai ye wane, "Tamowai hesau wine koyana ye kumai, na ye ganahetakikili, wine kaniyodi kabatamtam ye ginauli, yo kabayaiyaiwa numana ye kabi. Na kabo yona wine koyana ye mosei taukitakitahetete hekadiyo kalidiwai na ye lau magai hesau keda lohaloha unai. ² Wine yona huyakaniyo ye lage ede yona heyayai tauhaina hesau ye hetamali ye lau taukitakitahetete wa kalidiwai bena koya tanuwagana yona wine kaniyodi ye haidi. ³ Taukitakitahetete wa heyayai tauhaina wa se kelebese yo se pidili, na se hetamali ye uyo ma nimagaibuna.

⁴ Heyayai tauhaina hesau ye hetamali'uyoi. Iya kuluna se koilapai yo se kabi-henayaikaliliyei. ⁵ Hinage hesau ye hetamali'uyoi. Iya se koihemwaloi. Na gwaudi kabo ye hetamalidi se lau, meta hekadiyo se pidilidi yo hekadiyo se koihemwaloidi. ⁶ Laulau ta ye lau ee iya natuna tahunuwana ye bom mo maiyana se miyamiya. Na ye hetamalimulitai na ye nuwatui ye wane, 'Yau natugu, unai kabo se hekasisiyei.' [*Na ye lau.*] ⁷ Taukitakitahetete wa se kita ye laolaoma ede se koitalaliu se wane, 'Teina ta koya tanuwagana natuna tahunuwana. Kwa laoma ta koihemwaloi, na yona gogo kabo ta hai yoda.' ⁸ Na se kelebese yo se koihemwaloi na se gabadikwaei gana dagelana wa unai.

⁹ Koya tanuwagana kabo saha ye ginauli? Iya kabo ye laoma koya taukitakitahetetena wa ye unuhemwaloidi, na kabo wine koyana wa ye moselaei tamowai hekadi se kitahetete. ¹⁰ Komiu taba kabina kwa kata Buka Tabuna unai saha se kuli wa, 'Taukabinuma weku se subu'usei wa meta ye hemala kabakabinuma wekuna namwanamwana yo saesaekalilina.

¹¹ Teina ta meta Guiyau ye ginauli, na matadaena kitakitana meta ye namwakalili.'" (*Same 118:22-23*)

¹² Yesu yona palabole wa Dius yodi tamowai lakilakidiyao wa se nuwatulobai meta siya kadi hedehehede, unai bena se kabihekahini. Iyamo boda wa se matausiyeidi, unai ede se laugabaei.

Takisi monina hedehehedena (*Mataiyo 22:15-22, Luka 20:20-26*)

¹³ Kabo Paliseya tamowaidi yo Heloda** yona tamowai hekadi se hetamalidi se lau Yesu unai yona hedehehede unai bena se hekalabesibesi. ¹⁴ Se lage iya unai kabo se wane, "Taulauhekata, kabina ka kata meta kowa ku dudulai. Tamowai nige ku matausiyeidi, matawuwuna tamowai nige ku hekasisigaibuidi. Na Yaubada yona keda mamohoina mo ku lauhekataei. Ye dudulai kabo takisi ka mosei Sisa unai o nige? ¹⁵ Kabo ka tole o tabu ka toletole?"

Yodi kailupolupo Yesu ye kita na ye wane, "Idohagi to bena kwa lautonogigau? Hage, denali hesau kwa leyama ya kita." ¹⁶ Ede denali hesau se mosei Yesu unai. [*Ye kaikewai*] na ye wane, "Teina kaiteya kana kao yo hesana?" Se wane, "Sisa." ¹⁷ Kabo Yesu ye

** 12:13: Heloda ta, iya wasawasa Heloda Antipasi.

hededelau udiyedi ye wane, “Saha Sisa yona, kwa mosei Sisa unai, na saha Yaubada yona, kwa mosei Yaubada unai.” Hedehedede wa se lapui ede se nokoeikaliliyei.

Tautolo'uyo meta nige se tawatawasola
(Mataiyo 22:23-33, Luka 20:27-40)

¹⁸ Sadusiya tamowaidi yodi nuwatu tauboiboita taba nige se tolo'uyoma. Na se laoma Yesu se henamaiyei se wane, ¹⁹ “Taulauhekata, Mose yona kulikuli unai ye wane, ena tamowai hesau ye boita, na mwanena ye miyamiya, na nige natunao, meta bena kana kaha hesau kwabulina ne ye tawasolai na natunao ye labasidi, kabo se hemala kana kaha wa natunao.” ²⁰ Huya hesau tamowai hesau natunao loheloheyao badodi haligigi-labui. Taubaguna ye tawasola, nige natunao, na ye boita. ²¹ Kana kaha helabuina kwabuli wa ye tawasolai. Iya hinage nige natunao, na ye boita. Na hehaiyonadi ye tawasolai wa gonogonwana. ²² Yodi haligigi-labui waihiu kesegana wa se tawasolai, na nige natudiyao. Waihiu wa kabo hinage ye boita. ²³ [Unai yoma henamai ede teina:] Badodi haligigi-labui wa meta waihiu wa se tawasolai, na tolo'uyoma unai waihiu wa kabo kaiteya mwanena?” ²⁴ Yesu ye hededelau udiyedi ye wane, “Komiu kwa nuwapwanopwanokalili matawuwuna kulikuli tabudi yo Yaubada yona gigibwali nige kabidi kwa kata. ²⁵ Huyana tauboiboita se tolo'uyoma taba nige se tawasola yo taba nige se hetahetawasola. Na siya kadi kao kabo doha galewa aneludiyao. ²⁶ Na tauboiboita yodi tolo'uyoma Mose yona buka unai saha ye kuli wa kwa hasili e nige? Temenai, Yaubada ye taumasalaha kaiwa hesau unai [na kana kao doha kaiwa ye kalapulupululu]. Na ye hededelau Mose unai ye wane,

‘Yau Abelahama yona Yaubada, yo Isako yona Yaubada, yo Yakobo yona Yaubada.’
(Esodo 3:6)

²⁷ Yaubada ta iya nige tauboiboita yodi Yaubada, na iya taumaumauli mo yodi Yaubada. Komiu nuwamiu se pwanopwanokalili.”

Laugagayo saesaekalilidi
(Mataiyo 22:34-40, Luka 10:25-28)

²⁸ Na laugagayo taulauhekataena hesau ye laoma ede saha se hetahetaladi wa ye lapuidi. Ye nuwatulobai meta Yesu hedehedede namwanamwadi ye hededededi udiyedi, ede ye henamai Yesu unai ye wane, “Mose yona laugagayo maudoidi udiyedi meta sahasahana ye baguna ede?” ²⁹ Yesu ye wane, “Teina laugagayo saesaekalilina ede:

‘Isalaela tamowaidi, kwa lapulapui! Guiyau yoda Yaubada, iya Guiyau kesega mo.

³⁰ Guiyau yom Yaubada ku gadosisiyei ma nuwam maudoina, ma yaluwam maudoina, yom nuwanuwatu maudoina unai, yo ma bayaom maudoina.’ (Dutelonomi 6:4-5)

[Teina ta laugagayo bagubagunana.] ³¹ Helabuina ede teina:

‘Kowa helem taumiya tamowaina ku gadosisiyei, doha ku bom ku gadosisiyeigo.’
(Lewitikasi 19:18)

Teina laugagayo labui ta se saekalili na kabo hekadi wa.” ³² Na kabo laugagayo taulauhekataena wa ye wane, “Tanuwaga, saha ku hedede wa meta ye dudulai. Ye mamohoikalili meta Yaubada kesega mo, na nige Yaubada hesau, iya ye bom mo Yaubada. ³³ Yaubada bena ta gadosisiyei ma nuwada maudoina, yo ma sonogada maudoina, yo ma bayaoda maudoina. Yo heleda taumiya tamowaina bena ta gadosisiyei, doha ta bom ta gadosisi'uyoida. Teina laugagayo ta se saekalili ede, na kabo kaitalasangabugabudi yo kaitalasangabugabudi.” ³⁴ Yesu ye kita meta tamowai wa ye sibasiba, unai ye wane, “Kowa Yaubada yona basileiya ku hanahanawuiyako.”

Mulina ne unai nige hesau ye nuwabayao bena kalinawai henamai hesau ye henamai'uyoi.

** 12:19: Tawasola laugagayona ta meta Dutelonomi 25:5-6 unai ku hasili.

Dawida natuna hedehedena
(Mataiyo 22:41-46, Luka 20:41-44)

³⁵ Kabo Yesu Numa Tabuna bakubakuna unai ye laulauhekata na ye henamaiyeidi ye wane, “Matawuwuna saha to laugagayo taulauhekataena se hedede bena Keliso meta Dawida natuna? ³⁶ Yaluwa Tabuna yona gigibwali unai Dawida ye hedede ye wane, ‘Guiyau ye hededelau yogu guiyau unai ye wane, “Nimatutuguyena ku tuli** ye lau ee kam waiunu ya toledi kaem guninaena na se hemala kaem kabatoledi.” ’ (Same 110:1)

³⁷ Dawida Keliso hesana ye katai Guiyau. Na komiu yomi nuwatu saha, idohagi na iya hinage Dawida natuna?” Bodalakilaki wa se lapui meta nuwadi se namwa.

Yesu laugagayo taulauhekataena ye hededeheyababadi
(Mataiyo 23:1-36, Luka 11:37-54, 20:45-47)

³⁸ Yona lauhekata wa unai Yesu hinage ye wane, “Laugagayo taulauhekataena bena kwa kitanamwanamwaedi. Yodi taitaihile udiyedi se henuwa bena kwama lohalohadi** se luwuidi yo kabalokulokune bakubakudi udiyedi bena tamowai se lautokiyeidi ma hekasisidi, ³⁹ yo hinage sunago yo kabakaikaigogo udiyedi kabatuli saesaedi se henuwadi. ⁴⁰ Na kwabukwabuli yodi numa se lupohaidi, yo yodi tapwalolo se helohadi bena kabo tamowai se nokoeidi. Tamowaidiyao ne Yaubada kabo ye hekamkannakaliliyeidi.”

Kwabuli dehadehana yona kainauya
(Luka 21:1-4)

⁴¹ Kabo Yesu ye tuli moni kaba'usa'usa dedekadiwai na ye kaikaikewa na boda se monimonitole. Tamowai monimonidi yodi moni lakilakidi se usaidi kaba'usa'usa wa udiyedi. ⁴² Na kabo kwabuli dehadehana hesau ye laoma, na pene gagilidi labui ye usaidi. Pene labui wa lakidi meta se gagilikalili.** ⁴³ Yesu yona hekahekatao ye yoganeidima na ye hededelau udiyedi ye wane, “Ya hededemamohoi: Teina kwabuli dehadehana ta kainauya lakilakikalilina ye tole, na kabo maudoidi ne. ⁴⁴ Matawuwuna ede siya yodi moni lakilakidi udiyedi na kabo hisa mo se haidi na se toledi, na iya yona deha unai yona moni maudoina kalinawai wa ye tolehegehe.”

13

Yesu Numa Tabuna koigwaligwalina ye hededenonohai
(Mataiyo 24:1-2, Luka 21:5-6)

¹ Yesu maiyana hekahekatao Numa Tabuna unai se pesa, na yona hekahekatao wa hesau ye hededelau unai ye wane, “Tanuwaga, numa lauyahidi ne wekudi woiyawa'udoidi ne sola ku kitadi yo hinage numa namwamuyomuyoudi ne!” ² Yesu ye wane, “Teina numa yo woyo lakilakidi maudoidi ta kwa kitadi. Taba nige weku hesau ye kaitalae yona hali weku kewanaena na maudoidi ne kabo se ulugwaligwali.”

Tanoubu yona huyagehe hekihekinoina
(Mataiyo 10:16-25 yo 24:3-14, Luka 21:7-19)

³ Muliyena kabo Olibe koyana unai Yesu maiyana hekahekatao se tutuli na Numa Tabuna se kaikaikewalaei. Na Petelo, Yamesi, Yowane yo Andeleya se bom se laoma Yesu unai na se henamaiyei se wane, ⁴ “Taba yomai ku hedehedede, teina ginauli ta kaiuyana kabo se tubu, yo hekihekinoidi saha udiyedi bena ka kitalobai meta

** 12:36: Nimatutuguyena ku tuli: Guiyau nimatutuna unai kabatulina ne meta tamowai saesaedi yodi kabatuli.

** 12:38: Kwama lohalohadi meta tamowai saesaedi kabakitalobaidi, na tamowaigaibu nige gonowana kwama lohalohadi se likwadi. ** 12:42: Pene meta Maleko kalina Giliki unai ye kuli, Na kwabukwabuli hesau dehadehana ye laoma na lepetona labui ye usaidi, iya ede kodalansi kesega.

kabo se masalaha?” ⁵ Yesu ye wane, “Kwa kitakitanamwanamwa! Tabu tamowai se lupohaiyomi. ⁶ Tamowai se bado kabo hesaguyena se laoma na se wane, ‘Yau Keliso ede,’ na tamowai gwaudi se lupohaidi. ⁷ Huyana iyala wasadiyao yo hinage iyala wasalupolupodiyao kwa lapuidi, tabu kwa matausi. Teina ginaulidi ta kabo se tubu, na tanoubu ta yona huyagehe meta sola. ⁸ Boda hesau kabo boda hesau se lulululu'uyoidi, basileiya hesau yo basileiya hesau kabo se hai'iyala'uyoidi. Yo mwanikuniku teha udoi'udoi udiyedi yo hasahasali hinage. Hekihekinoi ta yodi tubutubu meta kana kao doha sine diyadiyakana ye hetubu bena ye labalaba. ⁹ Komiu kwa kitakitanamwanamwaegomiu! Tamowai kabo se laegomiu magai babadadiyao udiyedi, yo sunago kalodiyena kabo se pidiligomiu. Yau debaguwai kabo se woyalaegomiu kwa tolo gabana yo wasawasa matadiyena, na bena kabo [*Yaubada yona basileiya wasana*] kwa hededehe masalaha siya kalidiwai. ¹⁰ Na bagubaguna teina wasa namwanamwana ta bena kwa lauguguyaei basileiya maudoidi udiyedi, na kabo tanoubu yona huyagehe. ¹¹ Na huyana se kabihekahinigomiu yo se laegomiu kabalauhetala udiyedi, meta tabu kwa nuwanuwatu kabo hedehedede saha udiyedi kwa hedehedede, na saha Yaubada ye leyawa ne unai kwa hedehedede, matawuwuna komiu taba nige kwa bom yomi nuwanuwatuyena kwa hedehedede, na Yaluwa Tabuna kabo ye hekatagomiu na kwa hedehedede.

¹² Tamowai kabo yona saeya kana ye walohai, yo tama kabo natuna kana ye walohai. Natu kabo se tolo na sinadiyao yo tamadiyao se hewaiunudi na se mosegabaeidi tau'unuhemwaloidi udiyedi. ¹³ Tamowai maudoidi kabo se subugomiu yau debaguwai. Na kaiteya ye tolobayao ye lau ee pilipili ne sigadi unai, Yaubada iya kabo ye hemaui.”

*Kamkamnalakilaki huyana
(Mataiyo 24:15-28, Luka 21:20-24)*

¹⁴ [*Na kabo Yesu ye wane,*] “Ginauli hesau nuwamatamatausina, iya magai tauheyababana,** kabo kwa kita ye totolo nige yona kabatolo mamohoina unai – kulikuli ta tauhasilina bena ye nuwatulobai! Huyana ne unai teha Yudeya unai taumiya taba se wasabu se lau kuduli udiyedi [*se kenowadam*]. ¹⁵ Kaiteya yona numa kewana unai na ye pesadobi bena ye yabubu meta tabu ye mwalaesae numa kalona unai bena gogo hesau ye hai. ¹⁶ Hinage kaiteya yona koya unai ye paipaisowa, tabu ye uyo yona numa unai kana kwama hesabana. ¹⁷ Tenem huyana ne unai sinesineo diyadiyakadi yo labalabahauhaudi ya katekamkamnaedi matawuwuna kabo ye pilipikalilili kalidiwai! ¹⁸ Na taba kwa tapwatapwalolo bena yomi huyawasabu ne tabu huyagwagwama unai. ¹⁹ Matawuwuna tenem mayadaidi ne udiyedi kabo kamkamna lakilakina ye tubu. Yaubada tanoubu yona huyaginaulina wa unai na ye laoma ee teina nige kamkamna hesau doha tenem, yo hinage taba nige ye tubu'uyo. ²⁰ Tenem mayadaidi ne, ena Guiyau nige ye hekubwadi, taba nige tamowai hesau gonowana maui ye lobai. Na yona kaisunuwa tamowaidi hesabadi kabo huya ne ye hekubwadi. ²¹ Tenem huyana ne unai, ena tamowai hesau ye hededelaowa kalimiuwai ye wane, ‘Kwa kaikewa inai! Keliso ede teinai!’, o ‘Kwa kaikewalau, Keliso ede temenai!’, yona hedehedede ne tabu kwa kawakawamamohoiyeidi. ²² Matawuwuna ede Keliso lupolupodi yo peloweta lupolupodi kabo se masalahama. Siya kabo hekihekinoi yo laulau gigigigibwalidi se ginaulidi na udiyedi bena tamowai se lupohaidi, yo hinage se kaipate bena Yaubada yona kaisunuwa tamowaidi se lupohaidi, iyamo nige gonowadi. ²³ Unai kwa kitakitanamwanamwa! Ginauli maudoidi ta ya hededenonohaidiko kalimiuwai, unai kwa lapulapuinamwanamwa!”

** **13:14:** Ginauli hesau nuwamatamatausina, iya magai tauheyababana, meta peloweta Daniyela yona kulikuli unai hinage ta lobai (Daniyela 9:27, 11:31, yo 12:11).

*Keliso yona uyoma**(Mataiyo 24:29-31, Luka 21:25-28)*

²⁴ [Na kabo Yesu ye wane,] “Kamkamnalakilaki mayadaidi ne gehedi ne unai kabo mahana ye masigili
yo waikena kabo nige ye dawaya,

²⁵ galewa ne kipwaladi kabo se beku,
yo galewa ginaulidi yodi kabamiya Yaubada kabo ye nukuidi.’** *(Aisaiya 13:10 yo 34:4)*

²⁶ Na tamowai maudoidi kabo Tau Natuna se kita yada ne unai ye laoma ma gigibwalina yo ma didigana. ²⁷ Iya yona anelu kabo ye hetamalidi se lau yaumai hasi yodi kabalaoma udiyedi, yo tanoubu yo galewa kadi sigasiga udiyedi kabo yona kaisunuwa tamowaidi se woyagogoidima.”

*Yesu yona huya'uyoma kaiwa unai ye heyaheyasoniyei**(Mataiyo 24:32-35, Luka 21:29-33)*

²⁸ [Na kabo Yesu ye wane,] “Bosibosi heyaheyasonina hedehededena ne kwa kitalau unai, kabo ye hekatagomiu. Huyana lagadi ne udiyedi se bwagu, kabo lugudi se laukaladi, meta kabina kwa kata ede yaikini huyana ye hanahanauma. ²⁹ Doha hinage, huyana teina ginauli maudoidi ta kabo kwa kitadi se tubu, meta kwa nuwatui yo kabo kabina kwa kata meta [Tau Natuna] ye hanahanaumako, iya ede kawakeda ne unai. ³⁰ Ya hededemamohoi: Teina isi ta taba nige ye gehe ye lau ee teina ginauli maudoidi ta se tubu. ³¹ Galewa yo tanoubu kabo se gehe, na yogu hedehedede ta taba nige se gehe.”

*Bena ta nononoha**(Mataiyo 24:36-44, Luka 21:34-36)*

³² [Na kabo Yesu ye wane,] “Mayadaina yo mahanana** ne nige hesau kabina ye kata. Galewa aneludi yo Natuna hinage nige kabina se kata, na Tamana ye bom mo. ³³ Komiu bena kwa kitanamwanamwa yo kwa nononoha, matawuwuna [Yaubada yona kaisunuwa] mahanana ne nige kabina kwa kata.

³⁴ Iya ede doha teina: Tamowai hesau yona numa ye laugabaei ye lau magari kedalohaloha unai. Yona heyayai tauhaidi ye toledi yona numa se kitahetete. Hesau to hesau yodi gigibwali yo yodi paisowa ye moseidi, na keda taukitahetetena ye hededelau unai bena ye silasilawa.

³⁵ Unai bena huya maudoina kwa silasilawa, matawuwuna numa tanuwagana yona huya'uyoma nige kabina kwa kata, nuwana kabo meimeilahi, o boniyai duwaduwalina, o pwaole se doudou, o malatomtom gagilina unai. ³⁶ Yona uyoma ne unai tabu bena ye lobaigomiu kwa kenokeno. ³⁷ Hedehedede ta ya hedede kalimiuwai yo tamowai maudoidi udiyedi ya hededelau ya wane, ‘Bena kwa silasilawa yo kwa nononoha!’ ”

14*Dius babadadiyao se koitalaliu idohagi bena Yesu se unui**(Mataiyo 26:1-5, Luka 22:1-2, Yowane 11:45-53)*

¹ Mayadai labui mo na kabo Taukiuli yo Pwalawa Nige Yistina Henuwaisinidi, na taukaitalam tauwoyaidi yo laugagayo taulauhekataena keda se wasenei meta kailupolupo sahasahana unai kabo Yesu se hai bena se unuhemwaloi. ² Na se wane, “Tabu henuwaisini mayadaidi ne udiyedi, madai boda se luluida.”

** **13:25:** Galewa ginaulidi yodi kabamiya Yaubada kabo ye nukuidi: Hedehedede ta Maleko yona kulikulina meta ye kuli, galewa gigibwalidi kabo ye nukuidi. ** **13:32:** Mayadaina yo mahanana: Iya ede tanoubu ta yona huyagehe yo Yesu yona huya'uyoma mayadaina yo mahanana. Lausoiso 29 yo 31 ku hasili.

*Waihiu hesau Yesu ye heyausi Betaniya unai
(Mataiyo 26:6-13, Yowane 12:1-8)*

³ Tenem huyana ne Yesu Betaniya unai. Simona hesana hesau Taulepela yona numa unai se kaikaigogo. Na waihiu hesau ye laoma yausi panepanena pakuna alabasata unai se ginauli ye bahei. Yausi panepanena wa nadi unai se ginauli yo maisana ye lakikalili. Waihiu wa yausi pakuna wa kabo gadona ye kesihai na yausi wa ye ini Yesu kuluna unai. ⁴ Na tamowai hekadi se koipili, unai se gadigadigugu se wane, “Idohagi to yausi ne ye kaiheyai? ⁵ Taba ye lokunei, denali badodi 300** ye haidi, kabo ye moseidi tamowai dehadehadi yodi.” Na waihiu wa se dilai. ⁶ Na Yesu ye wane, “Waihiu me kwa kitagabaei! Ye saha to kwa kitaheyababa? Iya laulau namwanamwana ye ginauli kaliguwai. ⁷ Huya badobado tamowai dehadehadi kabo maiyamiu, unai huya hekadi kabo kwa nuwatuidi na kwa kainauyaidi. Na yau meta huya badobado taba nige maiyamiu. ⁸ Laulau saha gonowana ye ginauli meta ye ginauli, na ye namwa. Taugu ye heyausi meta ye kabinonohaigau yogu huyaboita hesabana. ⁹ Ya hededemamohoi: Kaiyaulina maudoina ta unai, ena haedi wasa namwanamwana ta se lauguguyaei, meta waihiu ta saha ye ginauli ta wasana kabo hinage se hedehededei, iya kabanuwanuwatuina.”

*Yudasi Isakaliyota Yesu kana ye walohai
(Mataiyo 26:14-16, Luka 22:3-6)*

¹⁰ Na Yudasi Isakaliyota, iya Saudoudoi-labui wa hesau, kabo ye lau taukitalasam tauwoyaidi udiyedi bena Yesu kana ye walohai. ¹¹ Yona hedehedede se lapui meta se gwayuala, na se hededehesunuma kabo moni se mosei. Unai kabo Yudasi ye hetubu keda ye wase idohagi kabo Yesu ye moselaei kalidiwai.

*Yesu yona hekahekatao Taukiuli kaina se kabinonohai
(Mataiyo 26:17-19, Luka 22:7-14)*

¹² Na kabo Pwalawa Nige Yistina Henuwaisinina mayadaina bagubagunana unai Dius yodi laulau bena Taukiuli mamoena se kaitalasangyei, unai Yesu yona hekahekatao se henamaiyei se wane, “Haedi ku henuwagai bena kabo kada Taukiuli kaina ka kabinonohai?” ¹³ Unai yona hekahekatao labui ye hetamalidi se lau Yelusalema, na ye hededelau udiyedi ye wane, “Kwa lau magailaki ne unai, kabo loheya hesau ye lobaigomiu, iya waila pakuna ye bahei. Tamowai ne kwa hemuliwatani ¹⁴ ee ye mwalaesae numa hesau unai. Temeta numa ne tanuwagana kabo kwa henamaiyei kwa wane, “Tanuwaga taumana dahalana ye henamaiyei bena unai maiyana hekahekatao Taukiuli kaina se kai.” ¹⁵ Iya kabo numa heisi helabuina unai dahala lakilakina hesau ye hekitagomiu. Dahala ne unai ginauli maudoidi ede nonohadi. Temenai kada kai kwa kabinonohai.” ¹⁶ Yona hekahekatao wa se lau magari wa unai se lage, na Yesu saha ye hedededi wa meta se lobaidi gonogonowana. Unai kabo Taukiuli kaina se kabinonohai.

*Yesu kana tauwalohai ye hededenonohai
(Mataiyo 26:20-25, Luka 22:21-23, Yowane 13:21-30)*

¹⁷ Meimeilahina ne unai Yesu maiyana Saudoudoi-labui wa se lagelau numa wa unai. ¹⁸ Siya sola ma kaikaidi na Yesu ye hededelau udiyedi ye wane, “Ya hededemamohoi kalimiuiwai: Luwamiu ta unai hesau maiyagu ka kaikaikesega, iya kabo kagu ye walohai.” ¹⁹ Kabo se nuwayababakalili na kesega kesega Yesu se henamaiyei se wane, “Nuwana yau?” ²⁰ Na ye hededelau udiyedi ye wane, “Iya meta Saudoudoi-labui ta luwamiu ne unai. Tamowaina ede maiyagu kama pwalawa ka hedakwadobiyei gaeba kesega unai. ²¹ Tau Natuna kabo ye boita doha se kuliyako wa. Na yababa mo kabo ye talu Tau Natuna kana tauwalohaina ne unai. Taba ye namwa mo iya tabu se labasi.”

** **14:5:** Denali badodi 300 meta taupaisowa bolimai kesega ye paisowa na maisana, meta moni lakilakikalilina.

*Yesu yona hekahekatao maiyanao yodi kaikaigogo gehegehena
(Mataiyo 26:26-30, Luka 22:15-20, 1 Kolinito 11:23-25)*

²² Sola ma kaikaidi na Yesu pwalawa ye hai, Yaubada ye lautokiyeyi, na kabo ye kibi na ye moseidi yona hekahekatao kalidiwai na ye wane, “Kwa hai na kwa kai! Teina ta yau taugu.” ²³ Na kabo waina keyakana hinage ye hai, Yaubada ye lautokiyeyi, na ye mosei kalidiwai. Na maudoidi unai se numa. ²⁴ Na Yesu ye wane, “Teina ta yau kwasinagu ye didi tamowai maudoidi hesabadi. Kwasinagu unai Yaubada yona talam hauhauna ye hemamohoyeyi. ²⁵ Ya hededelaowa kalimiuyena: Wine kaniyona masina taba nige ya numa'uyoi ye lau ee Yaubada yona basileiya unai kabo waina hauhauna ya numa'uyoi.”

²⁶ Kabo wanalautoki hesau se wanai, na kabo se dalahai se lau Olibe koyana unai.

*Yesu Petelo yona uhala ye hededenonohai
(Mataiyo 26:31-35, Luka 22:31-34, Yowane 13:36-38)*

²⁷ Kabo Yesu ye hededelau yona hekahekatao udiyedi ye wane, “Maudoimiu kabo kwa laugabaegau, matawuwuna Buka Tabuna unai se kuliya, ‘Mamoe taukitahetedi kabo ya unuhemwaloi,

na yona mamoe yawoina kabo se wasabugwaligwali.’ *(Sakaliya 13:7)*

²⁸ Na yogu tolo'uyo mulina ne unai kabo ya bagunaegomiu ya lau Galili.” ²⁹ Na Petelo ye hededelau Yesu unai ye wane, “Nuwana maudoidi kabo se laugabaego, na yau taba nige.” ³⁰ Yesu ye hededelau unai ye wane, “Ya hededemamohoi: Teina boniyai ta unai kabo ku uhalaegau ma haiyona, na kabo pwaole hakiyana ye dou helabuina.” ³¹ Na Petelo ye hedehededebayao ye wane, “Ena yau maiyam kabo ta boita, iyamo taba nige ya uhalaego.” Na yona hekahekatao maudoidi wa yodi hedehedede kesega.

*Yesu Getesemani unai ye tapwalolo
(Mataiyo 26:36-46, Luka 22:39-46)*

³² Na kabo se lage teha hesau unai hesana ede Getesemani, na Yesu ye hededelau yona hekahekatao udiyedi ye wane, “Teinai kwa babawa, na ya lau ya tapwalolo.”

³³ Na Petelo, Yamesi yo Yowane ye yoganeidi na maiyanao se lau, na kabo ye hetubu ye nuwakamkamna yo nuwana ye dagugu ³⁴ na ye wane, “Nuwagu ta ye kamkamnakalili gonowana kabo unai ya boita. Teinai kwa miyamiya na kwa silasilawa!”

³⁵ Yesu ye tausigilau na ye guliyaboyabomdobi bwatano unai na ye tapwalolo taba kamkamna mahanana ne tabu ye hekalu. ³⁶ Na ye wane, “Aba, Tamagu, kowa gonowam ginauli maudoidi ku ginaulidi. Teina kamkamna keyakana ta ku laehesuwala. Iyamo yogu nuwanuwatu ta tabu ku ginauli, na kowa yom nuwanuwatu mo ku ginauli.” ³⁷ Na kabo Yesu ye uyoma na ye lobaidi meta se kenoko. Na ye hededelau Petelo unai ye wane, “Simona, nige gonowana awa kesega ku silasilawa? ³⁸ Kwa silasilawa yo kwa tapwatapwalolo, na taba nige noho kwa hekalu na unai kwa beku. Yaluwamiu ta se talam, na iyamo taumi ta se basabasa.”

³⁹ Yesu kabo ye uyo ye tapwalolo na yona kaibwada wa kesekesegana mo. ⁴⁰ Na ye uyoma ye lobai'uyoidi ma kenodi, matawuwuna ede kannadi se yababakalili na nige kabina se kata kabo saha se hedede iya unai. *[Kabo Yesu ye uyo ye tapwalolo'uyo.]*

⁴¹ Na hehaiyonana unai Yesu ye uyoma na ye hededelau udiyedi ye wane, “Komiu sola kwa kenokeno yo kwa kaikaiyawasi? Nabada! Mahana ye lageko! Tau Natuna kana tauwalohai kabo iya ye moselaei yababa tamowaidiyao nimadiyena. ⁴² Kwa tolo na ta lau! Kagu tauwalohai meta ye lageko.”

*Yudasi Yesu ye moselae Dius babadadiyao yodi tau'iyala udiyedi
(Mataiyo 26:47-56, Luka 22:47-53, Yowane 18:1-11)*

⁴³ Yesu sola ma hedehededenana, na Yudasi, iya Saudoudoi-labui wa hesau, ye laoma na bodalakilaki maiyanao. Siya taukaitalasam tauwoyaidi yo laugagayo taulauhekataena yo magari babadadiyao se hetamalidi se lau ma kekelepadi yo yodi kepata se baheidi.

⁴⁴ Bagubaguna, tauwalohai wa hekihekinoi ye hededehehesisibanonohaidiko ye wane, “Tamowai ya simtai ne meta iya yomi tamowai. Kwa hai na kwa kitahetete na kwa woyahesuwala.”

⁴⁵ Yudasi kabo ye dudulai ye lau Yesu unai na ye wane, “Labi!”, na ye simtai. ⁴⁶ Na kabo boda wa Yesu se hai. ⁴⁷ Na tamowai hesau Yesu maiyana se totolo wa kelepa ye niusi na ye heguli ede taukaiitalasam saesaena yona heyayai tauhaina hesau beyana ye bolihai.

⁴⁸ Yesu ye hededelau boda wa udiyedi ye wane, “Yau doha taukaikaigahu, na kelebesigau hesabana kwa laoma meta ma kelekelepamiu yo kepata kwa baheidi?

⁴⁹ Mayadai badobado yau maiyamiu ta miyamiya yo Numa Tabuna bakubakuna unai ya laulauhekata, na nige kwa kabihekahinigau. Na saha se kuliyako Buka Tabuna unai, taba ye laoma ye hemamohoiyei.”

⁵⁰ Na Yesu yona hekahekatao maudoidi wa se laugabaei na se wasabugwaligwali.

⁵¹ Hewali hesau temenai, kaleko maisa lakilakina ye likwa na iya Yesu ye hemuhemuli-watani. Iya hinage bena se kabihekahini, ⁵² na kana kaleko wa nimadiwai se kabikabi, na iya ma taugaibuna ye wasabu.

Sunedeli bodana Yesu se helauhetala

(Mataiyo 26:57-68, Luka 22:54-55,63-71, Yowane 18:13-14,19-21)

⁵³ Na kabo Yesu se woyalaei taukaiitalasam saesaena yona numa unai. Menai taukaiitalasam tauwoyaidi, tamowai lakilakidi yo laugagayo taulauhekataena maudoidi se koigogo. ⁵⁴ Boda wa dageladi unai Petelo ye laoma ede ye mwalaesae taukaiitalasam saesaena yona numa wa bakubakuna unai. Menai taukaiitalasam saesaena yona taupaisowa tamowaidi maiyanao se tuligogoi na se kaimwaiga.

⁵⁵ Na kabo taukaiitalasam tauwoyaidi yo Sunedeli tamowaidi maudoidi Yesu kana mata se wasenei na bena se unuhemwaloi. Iyamo nige kana mata saha hesau se lobai.

⁵⁶ Tamowai se bado se hededelupolupo na Yesu se hegilu, na yodi hedehedede wa nige kesega. ⁵⁷ Na kabo hekadi se tolo Yesu kana gilulu se hededelupolupo na se wane, ⁵⁸ “Iya doha teina ye hedede na ka lapui ye wane, “Teina Numa Tabuna tamowai nimadiyena se ginauli ta, yau kabo ya koigwaligwali, na mayadai haiyona unai kabo hesau ya hetolo'uyoi, iya nige tamowai nimadiyena se ginauli.’ ” ⁵⁹ Na iyamo yodi hedehedede wa nige gonogonowadi.

⁶⁰ Na kabo taukaiitalasam saesaena wa ye tolo duwaduwalidiwai na Yesu ye henamaiyei ye wane, “Nige gonowana ku hededebei? Teina tamowai ta kam hedehedede maudoidi se hededei ta mamohoidi o nige?” ⁶¹ Na Yesu ye mwanomwanou na nige saha hesau ye hedede. Taukaiitalasam saesaena kabo ye henamai'uyoi ye wane, “Kowa Keliso, Saesaekalilina natuna?” ⁶² Kabo Yesu ye hededebei ye wane, “Yau Kelisona ede. Na Tau Natuna kabo kwa kita Yaubada Saesaekalilina nimatutuna unai ye tutuli yo hinage galewa yadadi udiyedi ye laoma.” ⁶³ Kabo taukaiitalasam saesaena wa ye bom kana kwama ye pulisidi na ye wane, “Taba nige tamowai hesau ta wasenei'uyoi na bena ye hedehedede teina tamowai ta hesabana! ⁶⁴ Yona hededeheyababa kwa lapuidiko. Na yomi hineli doha saha?” Na maudoidi se talam meta iya yababa ye ginauli, unai taba ye boita. ⁶⁵ Na kabo hekadi iya se kaikaisoi yo matana se suma kabo nimadi se nokudi na se biteli na se wane, “Hage, ku hededehehemasalahan [kaiteya ye biteligo]?” Na kabo taukaiitalasam saesaena yona taupaisowa Yesu se hai na hinage se biteli.

Petelo Yesu ye uhalaei

(Mataiyo 26:69-75, Luka 22:55-62, Yowane 18:15-18,25-27)

⁶⁶ Petelo sola numa bakubakuna wa unai na taukaiitalasam saesaena yona heyayai tauhaina waihiuna hesau ye laoma. ⁶⁷ Na Petelo ye kita ye kaikaimwaiga ede ye kitanamwanamwaei na kabo ye hededelau unai ye wane, “Kowa hinage Yesu Nasaleta

tamowaina wa maiyam.” ⁶⁸ Na Petelo ye uhala ye wane, “Saha ku hedehedede me nige kalikalili kabina ya kata.”

Na kabo ye sigilau gana kawamatana dedekanawai. Na pwaole hakiyana ye dou. ⁶⁹ Na temenai heyayai tauhaina waihiuna wa ye kita'uyoi ede ye hededelau tautotolo wa udiyedi ye wane, “Teina tamowai ta meta siya kadi kaha hesau.” ⁷⁰ Na iya ye uhala'uyo.

Huyakubwakubwa mo kabo tautotolo temenai wa se hededelau unai se wane, “Mamohoi, kowa kadi kaha hesau, matawuwuna kowa Galili tamowaina.”** ⁷¹ Petelo kabo ye bom ye hededeheyababa'uyoi na ye kaigwala ye wane, “Temeta tamowai me yau nige kabina ya kata.” ⁷² Na kabo pwaole hakiyana ye dou helabuina. Mahanana ne unai Yesu yona hedehedede wa Petelo nuwana ne unai ye sae, doha teina, “Sola nige kamkam hakiyana ye dou ma labui, na kowa kabo ku uhalaeigau ma haiyona.” Unai nuwana ye kamkamnakalili na ye doumwalomwaloi.

15

Yesu se hetolo Pilato matana unai

(Mataiyo 27:1-2,11-14, Luka 23:1-5, Yowane 18:28-38)

¹ Malatomtom gagilina unai kabo taukaitalasam tauwoyaidi maiyadi tamowai laki-lakidi yo laugagayo taulauhekataena yo Sunedeli maudoidi yodi hineli se ginauli. Na kabo Yesu nimana se paidi na se woyai se lau na se moselaei Pilato unai. ² Pilato Yesu ye henamaiyei ye wane, “Kowa Dius tamowaidi yodi wasawasa?” Yesu ye hededebui ye wane, “Aa, saha ku hedede ne mamohoi.” ³ Na kabo taukaitalasam tauwoyaidi yodi hedehedede udoi'udoi udiyedi Yesu se hegilukaliliyei. ⁴ Unai Pilato Yesu ye henamai'uyoi ye wane, “Kowa nige kalinam? Siya hedehedede udoi'udoi udiyedi se hegilugo.” ⁵ Yesu nige saha hesau ye hedede, unai Pilato ye nokokalili.

Dius se henuwa bena Yesu ye boita

(Mataiyo 27:15-26, Luka 23:13-25, Yowane 18:39–19:16)

⁶ Bolimai badobado Taukiuli Henuwaisinina huyana unai Pilato yona laulau meta taba Dius tamowaidi numatutugudu tamowaina hesau se kaibwadai, kabo ye yailigabaei. ⁷ Tenem huyana ne unai taukaiunu hesau hesana Balabasi numatutugudu unai ye miyamiya. Iya ma kana kahao maiyadi gabemani se haikabi, na tamowai hekadi se koihemwaloidi. ⁸ Bodalakilaki se lagegogoi Pilato unai na se kaibwadai bena Taukiuli Henuwaisinina unai na laulau saha ye ginaginauli wa bena ye ginauli. ⁹ Pilato ye henamaiyeidi ye wane, “Kwa henuwa bena Dius yodi wasawasa ya yailigabaei kalimiuwai?” ¹⁰ Na ye henamaiyeidi, matawuwuna ye nuwatulobaiyako meta taukaitalasam tauwoyaidi wa Yesu se kaikalomagigiliyei na debanawai se moselaei iya unai. ¹¹ Taukaitalasam tauwoyaidi boda se henuwasaedi na se kaibwada Pilato unai bena Balabasi ye yailigabaei. ¹² Na Pilato ye henamaiyeidi ye wane, “Saha kabo ya ginauli teina tamowai ta unai, iya kwa katai ede Dius yomi wasawasa?” ¹³ Na se yogasae se wane, “Ku hesatauloyawa!” ¹⁴ Pilato kabo ye henamai'uyo ye wane, “Matawuwuna saha? Yababa sahasahana ye ginauli?” Siya kabo se yogalakilaki se wane, “Ku hesatauloyawa!” ¹⁵ Pilato ye henuwa bena boda wa ye henuwanamwadi, unai Balabasi ye yailigabaei. Na kabo ye hedede yona iyala tamowaidi Yesu se pidili wipi unai na mulinaena kabo ye moselaei na se hesataulo.

Iyala tamowaidi Yesu se talatalawasiyei

(Mataiyo 27:27-31, Yowane 19:2-3)

** **14:70:** Kowa Galili tamowaina: Kulikuli beyabeyadi hisa mo lausoisoi 70 gehegehena ne se kuli doha teina: kowa Galili tamowaina, yo hinage kalinamiu kesega.

¹⁶ Na kabo iyala tamowaidi Yesu se woyalaei Pilato yona numa bakubakuna** unai na kadi kahao se yogagogoidima. ¹⁷ Siya kabo kwama pulupululuna [*kana kao doha wasawasa kana kwama*] se baheiyama na Yesu se heluwui na kaiwa gwaligwalina laganao se heidi doha kolona na se henabai. ¹⁸ Na se laulautokiyei se wane, “Dius yodi wasawasa miyamiyahaina, yauwedo!” ¹⁹ Kuluna ne didiyali unai se pidili yo se kaikaisoi, na se tulibono iya talanuwana ne unai na se talatalawasiyei. ²⁰ Se talawasikaiyawasi kabo kwama pulupululuna wa se haigabaei na kana kwama wa se helikwa'uyoidi. Na kabo se woyalaei Yelusalema dagelanawai bena se hesataulo.

Yesu se hesataulo

(Mataiyo 27:32-44, Luka 23:26-43, Yowane 19:17-27)

²¹ Yelusalema se hetubu bena se laugabaei na tamowai hesau hesana Simona se lobai koya unai ye uyoma. Iya Sailini tamowaina, Alekisenda yo Lupuso tamadi. Iyala tamowaidi wa Simona se lauhelili ede Yesu yona sataulo ye bahei. ²² Yesu se woyai se laei teha hesau hesana Golagota, kaniyona ede mwayalu magaina. ²³ Kabo mulo yo waina se hebwalikesegaidi na se mosei bena ye numa, na ye laukwatakwata. ²⁴ Na kabo se hesataulo. Tauhesataulona wa Yesu yona kaleko se hinelidi na se kaiheyaidi kaiteya kabo yona saha ye hai.

²⁵ Malatomtom awa hehaligigi-hasina unai Yesu se hesataulo. ²⁶ Yodi kabahegiluna hedehededenena wa se kuli [*molumolu** hesau unai*] na se pawatisae kulubawana wa unai. Kulikuli wa doha teina, “DIUS YODI WASAWASA.”

²⁷⁻²⁸ Laulau yabayababadi tauginaginalidi labui** se hesataulodi iya maiyanao, hesau kahatuna unai na hesau seuseulina unai.** ²⁹ Keda unai tamowai se sae yo se dobi na se hagahagasiyei yo se kulukulukwadei na se wane, “Amokisa! Kowa bena Numa Tabuna tauhetatagwaligwalina, na mayadai haiyona unai kabo ku hetolo'uyoi wa! ³⁰ Hage, ku hemaui'uyoigo na sataulo me unai ku pesadobima!” ³¹ Yo hinage taukaiyalasam tauwoyaidi yo laugagayo taulauhekataena iya se talatalawasiyei se wane, “Tamowai hekadi ye saguidi, na nige gonowana ye bom ye sagu'uyoi! ³² Ye hedehedede bena iya Keliso, yo kita Isalaela yoda wasawasa. Taba sataulo ne unai ye pesadobima, kabo ka kita yo ka kawamamohoiyei.” Tamowai labui maiyanao se hesataulodi wa Yesu hinage se hagahagasiyei.

Yesu ye boita

(Mataiyo 27:45-56, Luka 23:44-49, Yowane 19:28-30)

³³ Mayamayadailaki unai magai wa maudoina ye masigili ye lau ee meimeilahi awa hehaiyonana unai. ³⁴ Mahanana ne unai Yesu ye yoga ma kalinalakilakina ye wane, “*Eloi, eloi, lama sabatani?*”, kaniyona ede, “Yogu Yaubada, yogu Yaubada, idohagi to ku nuwagabaegau ta?” ³⁵ Na dedekana unai tautotolo hekadi kalinana se lapui ede se wane, “Kwa lapui! Iya Eliya ye yogayoganei.” ³⁶ Kabo tamowai hesau ye heloi ye lau balo ye hedakwa winega unai, na ye paihepatu didiyali unai, na kabo ye helelesae Yesu unai bena ye numa, na ye wane, “Hage ta kita, kabo Eliya ye laoma na sataulo unai ye haigabaei.” ³⁷ Yesu ye yoga ma kalinalakilakina, na kabo yawasina ye pito.

** **15:16:** Pilato yona numa bakubakuna meta tau'iyala yodi kabamiya. ** **15:26:** Molumolu meta kaiwa tupwana se tadihetabataba. Yodi kabakuli gogona Maleko nige ye kulihemasalaha, nuwana pepwa tupwana se hepaisowa. ** **15:27-28:** Laulau yabayababadi tauginaginalidi labui ta yababa saha se ginauli meta nige ye masalaha. Nuwana kedaena tamowai se lauguduguidi na yodi gogo se kaiwahalidi, o nuwana Loma yodi loina se haikawayagalaei. ** **15:27-28:** Kulikuli beyabeyadi hisa mo lausoi 28 se kuli: Na teina saha se ginauli ta meta peloweta ye kuliyako wa ye wane, “Yodi kabikabina meta doha iya yababa tauginaulina hesau.” (Aisaiya 53:12)

³⁸ Tenem mahanana ne unai meta Numa Tabuna woyona kaleko** ye taigalilabuiyei kewa unai ye dobi guni.

³⁹ Iyala taubagunaena tamowaina Yesu yona sataulo dedekana ne unai ye totolo, na huyana kalinana ye lapui yo ye kita idohagi ye boita meta ye wane, “Mamohoi, teina tamowai ta iya Yaubada Natuna!”

⁴⁰ Waiwaihiuwo hekadi kedalahawai se kitakitalau. Luwadi ne unai meta Maliya, Magadala waihiuna, yo Maliya Yamesi gagilina maiyana Yose sinadi, yo Salome. ⁴¹ Huyana Yesu Galili unai meta se hemuliwatani yo se kitahetete. Yo sinesineo gwaudi Yesu maiyanao se saema Yelusalema wa, siya hinage temenai.

Yosepa Yesu ye tole bwayabwaya unai

(Mataiyo 27:57-61, Luka 23:50-56, Yowane 19:38-42)

⁴²⁻⁴³ Yelusalema unai Alimatiya tamowaina hesau hesana Yosepa. Iya Sunedeli kadi boda saesaena hesau yo Yaubada yona basileiye ye nayanayai.

Yesu yona huyaboita mayadaina ne meta kabinonoha mayadaina,** na mulina ne unai kabo Sabati. Mahana ye duitalu [*na sola kabo Sabati hekasisina ye hetubu*] na Yosepa ma nuwabayaona ye lau Pilato unai na Yesu tauna ye kaibwadai. ⁴⁴ Yesu yona boita wa wasana Pilato ye lapui meta ye siliyata na nige ye kawamamohoi. Unai iyala taubagunaena tamowaina wa ye yoganei na ye henamaiyei. ⁴⁵ Pilato hedehedede wa ye lapui meta mamohoi, unai Yesu tauna ye talamgabaei kabo Yosepa ye hai.

⁴⁶ Yosepa kabo kaleko posiposina ye hemaisa na kabo ye lau Yesu tauna ye taluhido-biyei na kaleko wa unai ye suma, na ye tole bwayabwaya unai. Na kabo weku lakilakina ye builae bwayabwaya duhana wa ye buigudui. ⁴⁷ Maliya Magadala waihiuna maiyana Maliya Yose sinana se kita haedi Yosepa Yesu tauna ye tole.

16

Yaubada Yesu ye hetolo'uyoi

(Mataiyo 28:1-8, Luka 24:1-12, Yowane 20:1-10)

¹ Sabati mayadaina gehena unai Maliya Magadala waihiuna, Maliya Yamesi sinana, yo Salome se lau yausi panepanedi se hemaisadi bena kabo Yesu se heyausi. ² Sabati hauhauna ne mayadaina bagubagunana unai, malatomtom mahana ye dalasae kabo se dalahai se lau Yesu bwayabwayana unai. ³ Na se bom se henahenamai'uyoidi se wane, “Bwayabwaya kawamatana unai kabaguduna wekuna wa kabo kaiteya ye buihesuwala?” ⁴ Na bwayabwaya wa unai se lage na se kitalau ede bwayabwaya guduna weku lakilakina wa se kita meta kawamata wa dedekanawai. ⁵ Na kabo se lusae bwayabwaya kalona wa unai na hewali hesau se kita, meta se matausi. Kana kwama posiposina na ye tutuli tehakahakahatu unai. ⁶ Na ye hededelau udiyedi ye wane, “Tabu kwa matausi! Yesu Nasaleta tamowaina se hesatauloyako wa kwa wasewasenei. Yaubada ye hetolo'uyoiyako. Sola kabatolena wa kwa kita, iya nige inai. ⁷ Na kwa lau yona hekahekatao yo Petelo yodi kwa hedehedede kwa wane, ‘Yesu kabo ye baguna ye lau Galili. Temenai kabo iya kwa kita doha ye hededenonohaiyako.’ ” ⁸ Waiwaihiuwo wa se matausikalili yo se tabutabubu, unai bwayabwaya wa se pesagabae na se wasabu se lau. Na nige tamowai hesau yona se hedehedede, matauwuna ede se matausikalili.**

Yesu ye taumasalaha Maliya Magadala waihiuna unai

(Yowane 20:11-18)

** **15:38:** Woyona kaleko: Teina woyo kaleko ta tamowai ye gudugudui bena tabu se mwalamwalaesae teha tabukalilina unai (Hebelu 9:2-4). ** **15:42-43:** Kabinonoha mayadaina unai meta Dius se kabinonoha Sabati hesabana. Teina meta Palaide ye lau mahana ye dui. ** **16:8:** Kulikuli beyabeyadi hekadi lausoi 8 unai se kaiyawasi na lausoi 9 ye lau 20 nige se kulidi.

⁹ Sabati wa mayadaina bagubagunana malatomtom gagilina unai Yesu ye tolo'uyo na ye taumasalahabaguna Maliya Magadala waihiuna unai. Huya bagubagunana unai yaluwa yabayababadi haligigi-labui Yesu ye hededehepesadi waihiuna ne unai.

¹⁰ Maliya kabo ye lau Yesu yona hekahekatao wa yodi ye hedehedede. Siya meta sola ma nuwadubudi yo ma doudoudi. ¹¹ Na wasa wa se lapui meta Yesu ye mauli'uyoko na Maliya iya ye kitayako, na iyamo nige se kawamamohoiyei.

Yesu ye taumasalaha tauhemuliwatanina labui udiyedi
(Luka 24:13-35)

¹² Na kabo Yesu kana kao udoi unai ye taumasalaha tauhemuliwatanina labui udiyedi huyana se laulau magari hesau unai. ¹³ Siya kabo se uyo Yelusalema unai kadi kahao wa yodi se hedehedede, na hinage nige se kawamamohoiyeidi.

Yesu ye taumasalaha yona hekahekatao wa udiyedi na yodi paisowa ye moseidi
(Mataiyo 28:16-20, Luka 24:36-49, Yowane 20:19-23)

¹⁴ Na huyana Saudoudoi-kesega wa ma kaikaidi kabo Yesu ye taumasalaha udiyedi. Na ye dilaidi, matawuwuna se nuwakwailolo yo nige se kawamamohoi taukitana wa udiyedi. ¹⁵ Na ye hededelau udiyedi ye wane, “Kwa lau magari maudoidi kaiyaulina ta unai na wasa namwanamwana ta kwa lauguguyaei tamowai maudoidi kalidiwai.

¹⁶ Kaiteya ye kawamamohoiyeigau yo babatiso ye hai meta Yaubada kabo iya ye hemaui. Na kaiteya nige ye kawamamohoiyeigau, Yaubada kabo ye hekamkamna.

¹⁷ Taukawamamohoiyeigau ne kabo teina laulau ta se ginaulidi Yaubada yona gigibwali unai: Yau hesaguwai kabo yaluwa yabayababadi se hededehepesadi tamowai udiyedi. Yo kalina hekadi nige kabidi se kata kabo udiyedi se hedehedede. ¹⁸ Siya kabo mwata kaikaikalasidi nimadi udiyedi se haidi, yo ena kaikailewa se numa, taba nige se boita. Yo ena nimadi se tolesaedi taukasikasiyebwa udiyedi, kabo se namwanamwa.”

Yaubada Yesu ye hai ye sae galewa
(Luka 24:50-53)

¹⁹ Guiyau Yesu yona hedehedede gehena unai meta kabo Yaubada iya ye hai ye saei galewa. Temenai Yaubada nimatutuna unai ye tuli.

²⁰ Yesu yona hekahekatao kabo se lau magari maudoidi se tauhetakikilidi na se lauguguya tamowai maudoidi kalidiwai. Na Guiyau maiyadi, yo yodi lauguguya ye hemamohoiyedi laulau gigigibwalidi udiyedi.

Luka **Yesu wasana Luka ye kuli wa** **Buka ta hededehemasalahana**

Teina buka ta taukulina meta Luka. Iya nige Dius tamowaina, na nuwana magai Antiyokiya unai ye laoma, iya ede teha Siliya unai. Kana paisowa meta iya doketa, yo iya hinage apostolo Paulo tausaguina hesau (Kolose 4:14, Apostolo 16:10, Pilemona 24, 2 Timoti 4:11). Na Yesu wasana ta yo hinage Apostolo Yodi Paisowa bukana ye kulidi taubada lakilakina hesau hesana Teopilo yona (Luka 1:1, Apostolo 1:1). Hesa ta kaniyona ede Yaubada taugadosisiyeina.

Luka yona buka labui ta nige ye kuligaibuidi, na Yesu wasana ye wase-namwanamwaei. Yesu yona hekahekatao yo iya sinana Maliya yo Yesu maiyana taumiya hekadi ye henamaiyeidi yo hinage Yesu wasana pepwadi hekadi kabidi ye kata (Luka 1:1-4). Na Paulo yona kadau hekadiyo udiyedi Luka iya maiyana (Apostolo 16:10, 20:6–21:15, 27:1–28:16).

Yesu wasana bukana ta Luka ye kuli nuwana bolimai 60 ye lau 65 AD luwadiyena.

Luka yona buka helabuina Apostolo unai meta Yesu wasana bukana ta ye tubei. Teina buka ta unai Yesu wasana ye hasili, Yowane Babatiso yo Yesu yona huyalabasi unai ye hetubu na ye lau ee Yesu ye tolo'uyo na ye seuyo galewa. Na Apostolo yodi Paisowa Bukadi unai meta Yesu yona seuyo galewa ne unai ye hetubu na dubu yodi kabahetubu wasana yo Paulo yona paisowa wasana ye kuli ye lau ee Paulo ye lage Loma magaina unai.

Yesu wasana yona hasihasilina unai Luka yona nuwatu saesaedi meta teina:

- (1) Yaubada yona gadosisi meta tamowai maudoidi ye haihegehedi (Luka 2:30-32, 3:6).
- (2) Yaluwa Tabuna yona paisowa tamowai udiyedi (Luka 1:15,35, 4:1,14,18, 10:21, 11:13).
- (3) Idohagi Yesu ye tapwalolo (Luka 3:21, 6:12, 9:18, 23:34,46) yo yona tapwalolo lauhekata (Luka 11:5-9, 18:1-8,9-14).
- (4) Idohagi taudehadeha ye saguidi (Luka 4:18, 6:20, 7:33, 12:33, 14:13,21, 16:20,22).

Buka ta hedehedena lakilakidi

- Matawuwuna saha to Luka teina buka ta ye kuli 1:1-4
- Yowane Babatiso yo Yesu yodi huyalabasi wasadi 1:5–2:52
- Yowane Babatiso yona hedehedede 3:1-20
- Yesu babatiso ye hai na laukita ye hekalu 3:21–4:13
- Yesu yona paisowa teha Galili unai 4:14–9:50
- Yesu ye kadau ye lau Yelusalema 9:51–19:27
- Yesu yona mauli sabatina gehegehena, yona lauhetala yo yona boita 19:28–23:56
- Yesu ye tolo'uyo 24:1-12
- Yesu ye tautauasalaha na ye seuyo galewa 24:13-53

¹ Taubada Teopilo!

Tamowai gwaudi se kaipate bena ginauli Yaubada ye ginaulidi luwadaena wa se kuli-dobiyeidi. ² Saha se kuli wa meta iya ede huya bagubagunana unai ginauli maudoidi taukitadi wa se wasaduwayei na se hekawa ye dobima kalidaena. ³ Na yau ginauli maudoidi ta ya kitahekasadiko, kabahetubu unai ye lau gehena. Unai ya nuwatui ye namwa mo taba yau hinage wasa ta ya kulihekasa kowa yom, taubada saesaekalilina, ⁴ to bena kabina ku kata ginauli saha se hekatago wa meta se mamohoikalili.

Yowane Babatiso yona labasi hededenonohaina

⁵ Heloda yona huyawasawasa Yudeya tanona unai meta taukaitalasam hesau hesana Sakaliya. Iya meta taukaitalasam kadi boda gagilina hesana Abidiya** tamowaina hesau. Sakaliya ma mwanena Elisabeta kadi mumuga ede Aloni. ⁶ Taudi labui wa yodi miyamiya se dudulai Yaubada matanaena, yo Guiyau yona laugagayo yo kabikabi maudoidi se miyawataninamwanamwaedi. ⁷ Na nige natudi, matawuwuna Elisabeta ye kobosi yo ye sinesinebadako, yo hinage Sakaliya ye tautaubadako.

⁸ Huya hesau Sakaliya kana boda yodi huyapaisowa Numa Tabuna unai, na iya kaitalasam paisowana ye ginauli Yaubada matanaena. ⁹ Taukaitalasam wa kadi kulutubu kabikabina unai yodi kaisunuwa se ginaginauli,** ede Sakaliya ye hai bena kabo ye lusae Guiyau yona Numa Tabuna kalona ne unai na inisenisi ye gabu.

¹⁰ Na inisenisi huyagabuna unai bodalakilaki Numa Tabuna bakubakuna wa unai se tapwatapwalolo. ¹¹ Na Guiyau yona anelu ye taumasalaha iya unai, na inisenisi kabagabuna tehakahatuna unai ye totolo. ¹² Huyana Sakaliya anelu wa ye kita meta ye siliyata yo ye matausikalili. ¹³ Na anelu wa ye hededelau unai ye wane, “Sakaliya, tabu ku matausi! Yaubada yom tapwalolo ye lapuidiko. Unai mwanem Elisabeta kabo natumi loheya ye labasi, na kabo hesana ku tole Yowane. ¹⁴ Iya kabo nuwam ye henamwakaliliyei, na yona huyalabasi ne debanaena kabo tamowai gwaudi se gwauyala, ¹⁵ matawuwuna iya meta ye saekalili Guiyau matanaena. Iya nige gonowana waina yo numanuma bayabayaodi ye numadi. Sola nige se labasi na Yaluwa Tabuna iya ye hemwayau. ¹⁶ Na Isalaela tamowaidi bodalakilaki kabo ye woyaidi se uyoma Guiyau yodi Yaubada unai. ¹⁷ Na Yaubada yaluwana yo yona gigibwali kabo Yowane unai gonogonowana doha Eliya, na unai kabo Guiyau yona keda ye bagunaei. Yona paisowa meta kabo tamadiyao ye henuwabuidi na se kitalau natudiyao udiyedi, yo kaiteyadi Yaubada taukawayagalaena kabo ye henuwatulobaidi na se lapulau tamowai dudulaidi yodi nuwatu sibasibadi udiyedi. Teina laulau ta ye ginaulidi bena tamowai gwaudi ye nonohaidi Guiyau yona laoma hesabana.”

¹⁸ Sakaliya ye hededelau anelu wa unai ye wane, “Idohagi na kabo kabina ya kata meta teina ta mamohoi? Yau meta ya tautaubadako, yo mwanegu meta ye sinesinebadako.” ¹⁹ Anelu wa ye hededebui ye wane, “Yau Gabileli, Yaubada matanaena ya totolo, na ye hetamaligau ya laoma bena wasa namwanamwana ta yom ya hedehede. ²⁰ Na kowa meta kalinagu nige ku kawamamohoiyeidi, unai kabo ku mwanou na nige gonowana ku hedehede, kana siga yogu hedehede ta se laoma se mamohoi yodi huya dudulaina unai.”

²¹ Mahanana ne unai boda wa Sakaliya se nayanayai yo se nuwapwanopwano idohagi to ye miya huyalohaloha Numa Tabuna wa unai. ²² Yona huyapesa ne unai meta nige gonowana ye hedehedelau udiyedi. Se nuwatulobai meta Yaubada tautau hesau ye hekitayako Numa Tabuna kalona ne unai. Hekihekinoi nimana udiyedi ye ginaulidi, na nige saha hesau ye hedede.

²³ Sakaliya yona paisowa mayaidi wa se gehe ede ye uyo yona magari. ²⁴ Mulina ne unai kabo Elisabeta ye diyaka, na yona numa kalona ne unai ye miya nawalai

** **1:5:** Boda gagilina hesana... Abidiya: Taukaitalasam meta se badokalili, unai nige gonowana maudoidi se paisowagogo Numa Tabuna unai. Na wasawasa Dawida ye hebodahegagagilidi (1 Kolonikele 24:1-19). Boda wa hesadi ede kadi kulutubuwaso hesadi. Boda kesega kesega yodi huyapaisowa Numa Tabuna unai meta sabati kesega, na kabo se uyo yodi magari udiyedi se miya ye lau ee nawalai haligigi-kesega se gehe. ** **1:9:** Kulutubu kabikabina unai yodi kaisunuwa se ginaginauli: Kabikabina wa meta tamowai hesadi o numela se kulidi weku gagilidi o kaikaiwa tupwadiyao kubwakubwadi udiyedi na kabo se hebekudi na unai yodi hineli se ginauli. Na se nuwatulobai ede teina ta Yaubada yona hineli.

haligigi,²⁵ na ye wane, “Teina ta Guiyau ye ginauli kaliguyena! Teina huya ta unai yona kabinamwa unai ye kitagau na kagu mwadine** tamowai matadiyena ne ye haigabaei.”

Yesu yona labasi hededenonohaina

²⁶ Elisabeta yona diyaka nawalaina haligigi-kesega (6), kabo Yaubada yona anelu hesana Gabileli wa ye hetamali ye lau teha Galili magaina hesau, hesana ede Nasaleta. ²⁷ Temenai hasala hesau nuwanuwasupuna. Iya se hededehepatuyako bena kabo tamowai hesau hesana Yosepa ye tawasolai, iya Dawida kana isimulita hesau. Hasala nuwanuwasupuna wa hesana ede Maliya. ²⁸ Anelu wa ye lau iya unai ye wane, “Yauwedo! Guiyau ede maiyam yo yona kabinamwa ye lakikalili kalimwai.”

²⁹ Maliya nuwana ye dagugukalili yona hedehedede wa unai, yo ye nuwanuwatu lautoki ta kaniyona ede saha. ³⁰ Na anelu wa ye hededelau unai ye wane, “Maliya, tabu ku matausi! Yaubada yona kabinamwa unai ye kaisunuwaigo. ³¹ Kabo ku diyaka na natum loheya ku labasi, na hesana ku tole Yesu. ³² Iya kabo ye saekalili yo se katai Yaubada Saesaekalilina Natuna. Na Guiyau Yaubada kabo iya kana kulutubu Dawida yona kabatuli saesaena ye mosei, ³³ na kabo Yakobo kana isimulitao ye kitahettedi ye lau ee nige kana siga, yo yona basileiya nige yona kabagehe.”

³⁴ Maliya ye henamai anelu wa unai ye wane, “Teina ta kabo idohagi? Yau meta waihiu nuwanuwasupuna, sola nige loheya hesau maiyagu ka hailobai.” ³⁵ Na anelu wa ye wane, “Yaluwa Tabuna kabo ye laowa kalimyena, yo Yaubada Saesaekalilina yona gigibwali kabo ye helogulogugo. Unai wawaya ku labasi ne meta iya Tabuna, yo iya kabo se katai Yaubada Natuna. ³⁶ Keham Elisabeta ku kita! Iya ye sinesinebadako na iyamo ye diyaka na kabo natuna loheya ye labasi. Tamowai se hedede meta iya bena ye kobosi, na iyamo ye diyaka yona nawalai haligigi-kesega. ³⁷ Matawuwuna nige saha hesau ye bayao Yaubada kalinawai.”

³⁸ Kabo Maliya ye wane, “Yau Guiyau yona heyayai tauhaina. Saha ku hedede me bena ye tubu kaliguyena.” Na kabo anelu wa ye laugabaei.

Maliya Elisabeta ye kaitaumanai

³⁹ Nige bayaona na Maliya ye kabinonoha na ye laumwamwayau ye lau teha Yudeya magaina hesau unai, iya ede teha kudukudulina unai. ⁴⁰ Temenai ye mwalae Sakaliya yona numa unai na Elisabeta ye hailobai. ⁴¹ Huyana Elisabeta Maliya yona lautoki ye lapui meta wawaya wa bogana luwanaena ye teteli. Yaluwa Tabuna Elisabeta ye hemwayau, ⁴² na ma kalina lakilakina unai ye wane, “Sinesineo maudoidi luwadiyena kowa meta Yaubada ye hededehenamwakaliliyeigo, yo natum bogam luwanaena ne Yaubada ye hededehenamwa! ⁴³ Na yau yogu namwa saha, na yogu Guiyau sinana ye laoma ye kaitaumaiga! ⁴⁴ Huyana yom lautoki wa ya lapui ede wawaya bogagu luwana unai ye teteli ma gwauyalana. ⁴⁵ Kowa gonowana ku gwauyala, matawuwuna ku kawamamohoi meta Yaubada yona hedehedede kalimyena wa kabo ye hemamo-hoiyeidi.”

Maliya yona wanahedebasae

⁴⁶ Na Maliya ye wane,
 “Nuwagu ta unai Guiyau ya hedebasaei ⁴⁷ na yaluwagu ta ye gwauyala Yaubada taugilihaigau debanaena,
⁴⁸ matawuwuna Yaubada iya yona heyayai tauhaina ta ye kita meta ya dobikalili.
 Huya ta yo huya matada ne unai tamowai maudoidi kabo se hedede meta yau gonowana ya gwauyala,

** **1:25:** Kagu mwadine: Ena waihiu ye tawasola na nige natudi, kabo Dius tamowaidiyao se kitadobidobiyei na se hegilu yo se hedede iya yababa saha hesau debanaena na Yaubada ye hekamkamna.

49 matawuwuna Yaubada Gigigigibwalina ginauli saesaedi ye ginaulidi yau kaliguyena.

Iya tabuna.**

50 Isina to isina udiyedi yona katekamkamna ye hemasalaha tauhekasisiyeina udiyedi.

51 Iya yona gigibwaliyena ginauli saesaedi ye ginaulidi, na kaiteyadi se nuwasaesae meta ye hetatagwaligwalidi.

52 Wasawasa saesaedi yodi kabatuli udiyedi ye toledobiyeidi, na tamowai dobidobidi ye lausinidi.

53 Tauhasahasali nimadi ye hemwayaudi ginauli namwanamwadi udiyedi, na taugogogogo ye hetamalidi se dalahai ma nimagaibudi.

54-55 Yona heyayai tauhaidi, siya ede Isalaela tamowaidi, ye saguidi, na yona hededehesunuma kada kulutubu kalidiyena ye nuwatui meta yona katekamkamna kabo ye hemasalaha kada mumuga Abelahama yo kana isimulita maudoidi udiyedi ye lau ee nige kana siga.”

56 Maliya Elisabeta maiyana se bawa nawalai haiyona, na kabo ye uyo yona magai.

Yowane Babatiso yona huyalabasi

57 Na Elisabeta yona huyalabalaba mayadaina ye lage, ede natuna loheya ye labasi.

58 Dedekadiyena taumiya yo kehanao se lapui meta Guiyau yona katekamkamna lakilakina unai Elisabeta ye sagui, na maiyadi se gwauyalalakili.

59 Wawaya wa ye labasi sabati kesega ye lau kabo se laoma bena se hepelitome. Na se henuwa bena hesana se tole Sakaliya, tamana yona heliyam. 60 Na sinana ye wane, “Nige! Hesana ede Yowane.”

61 Se hededelau Elisabeta unai se wane, “Khamwao udiyedi nige hesau hesana Yowane!”

62 Ede hekihekinoi se ginaulidi tamana wa unai na se henamaiyei kabo wawaya ne hesana saha ye henuwa bena ye tole. 63 Sakaliya ye kaibwada bena kabakulikuli se mosei na ye kuli, “Hesana ede Yowane.” Na maudoidi wa se siliyata. 64 Mahanana ne unai Yaubada Sakaliya kawana ye soke na ye hedehehede'uyo, na Yaubada ye hedehebasaei. 65 Na dedekadiyena taumiya maudoidi se siliyatakalili, na Yudeya teha kudukudulina maudoina unai taumiya ginauli maudoidi ta se hetahetaladi. 66 Wasa wa taulapuina maudoidi nuwadi udiyedi se nuwanuwatuidi na se henahenamai'uyoidi se wane, “Wawaya ne ye tubusae kabo iya tamowai sahasahana?” Matawuwuna se kita meta Yaubada yona gigibwali ede iya unai.

Sakaliya yona hedepeloweta

67 Yowane tamana Sakaliya Yaluwa Tabuna ye hemwayau na ye hedepeloweta, ye wane,

68 “Guiyau ta hedebasaei, iya Isalaela yoda Yaubada!

Matawuwuna ede ye laoma yona tamowai ye gilihaida.

69 Taugilihaida gigigigibwalina ye haiyama, iya ede yona heyayai tauhaina Dawida kana isimulita hesau.

70 Teina ta ye hededehehemalahayako yona peloweta tabudiyao udiyedi huya bagubagunana unai na se hedepelowetaiyako.

71 Kabo ye gilihaida kada waiunu udiyedi, yo tauhewaiunu maudoidi nimadiyena ye saguhaida.

72 Laulau ta ye ginaulidi meta yona katekamkamna ye hemasalaha kada mumuga udiyedi yo yona talam tabuna ye nuwatui,

** 1:49: Iya tabuna: Kalina Giliki unai Luka ye kuli, Hesana ede tabuna. Hedehede hesana unai, Isalaela tamowai udo'udoina se hetala. Lausoi ta unai Sakaliya Yaubada hedehedena ye hededehehemalahaha meta iya ye namwa yo ye a'a yo ye didigakalili.

⁷³ iya ede yona kaigwala kada mumuga Abelahama unai.

⁷⁴⁻⁷⁵ Ye kaigwala kabo kada waiunu nimadiyena ye gilihaida, yo ye hebayaoda bena ma nuwa'a'ada yo miyamiya dudulaidi udiyedi iya ta taba'ohui yoda mauli mayadaidi maudoidi udiyedi, na nige gonowana ta matausi.

⁷⁶ Na kowa, natugu, kabo se kataigo Yaubada Saesaekalilina yona peloweta, matawuwuna kabo Guiyau ku kedabagunaei

beni yona kamwasa ku kabinonohai,

⁷⁷ yo yona tamowai ku hekatadi meta Yaubada yona kabagilihaidi kedana ede yodi yababa nuwatugabaedi unai.

⁷⁸ Yona katekamkamna nuwabigabigana debanawai Yaubada kabo ye saguida na Mesaiya galewa ne unai ye hetamaliyama kalidawai doha malatomtom unai mahana ye dalasae,

⁷⁹ na mala ye hesina kaiteyadi masigili unai taumiya yo boita taumatausiyeina kalidiyena, na ye woyaida nuwadaumwali unai.”

⁸⁰ Wawaya wa ye tubusae yo yaluwa unai ye bayao, na balabalagaibuyena ye miya kana siga ye taumasalaha Isalaela udiyedi ye lauguguya.

2

Yesu yona huyalabasi (Mataiyo 1:18-25)

¹ Tenem mayadaidi ne udiyedi Sisa Agastasi hekasa ye ginauli meta bena hasiliyawasi se ginauli Loma yodi kabatanuwaga magaina maudoina unai. ² Tenem meta hasiliyawasi bagubagunana. Yodi huyahaina ne unai meta Kiliniusi iya yona huyatanuwaga teha Siliya unai. ³ Na tamowai maudoidi se uyo yodi magari mamohoidi udiyedi na hesadi se mosemoseidi hesa taukuliyawasidi udiyedi.

⁴ Ede Yosepa maiyana Maliya hinage se dalahai na teha Galili magaina Nasaleta se laugabae se lau teha Yudeya magaina Betelehema unai. Matawuwuna Yosepa iya Dawida kana isimulita hesau, yo Betelehema iya ede wasawasa Dawida yona kabalaoma. ⁵ Se lau menai bena Maliya maiyana hesadi se kulidi hasiliyawasi bukana unai. Na Maliya meta se hededehepatuyako Yosepa unai, iyamo sola nige se tawasola, na iya meta ye diyakako. ⁶ Sola menai ma miyamiyadi na wawaya wa huyalabasina mayadaina ye lage, ⁷ na natuna taubaguna ye labasi meta loheya. Kaleko udiyedi ye suma na suisui yodi kabakaikai hesau unai ye hekeno, matawuwuna nige dahala hesau ye miyagaibu numa wa unai.**

Anelu se taumasalaha mamoe taukitakitahettedi udiyedi

⁸ Mamoe taukitakitahettedi hekadi se miyamiya magari wa dedekanaena, na yodi mamoe se kitakitahettedi boniyaina wa unai. ⁹ Na Guiyau yona anelu ye taumasalaha udiyedi na Guiyau didigana dawayana ye sinahetakikilidi, ede se matausikalili. ¹⁰ Na anelu wa ye hededelau udiyedi ye wane, “Tabu kwa matausi. Wasa namwanamwana ya baheyama kalimiuyena, iya kabo tamowai maudoidi ye hegwaualakaliliyedi. ¹¹ Mayadai ta unai Dawida yona magari ta unai taugilihaigomiu se labasi, iya ede Keliso,

** **2:7:** Dahala... numa wa unai: Yesu yodi kabalabasina numana Betelehema unai meta hededehehemalahana udoi'udo. Tausonoga hekadi yodi nuwatu meta suisui yodi kabakeno numana unai se labasi. Na hekadi se wane duhaena Betelehema dedekanawai menai se labasi. Na hinage hekadi yodi nuwatu meta Yosepa kana bogao yodi numa hesau unai se miyamiya na temenai Yesu se labasi, na nige yodi solasola hesau taumana yodi dahala unai, na Maliya suisui yodi kabakaikai hesau ye lobai numa wa unai, ede wawaya wa temenai ye hekeno. Na teina nuwanuwatu ta ede ka lauwatani.

yomi Guiyau. ¹² Wawaya ne yomi kabakitalobaina ede kabo kwa lobai kaleko udiyedi se suma na suisui yodi kabakaikai unai ye kenokeno.”

¹³ Na makesega galewa aneludi se taumasalaha anelu bagubagunana wa maiyadi. Yaubada se hedebasaei se wane,

¹⁴ “Hedebasae maudoina ye lau Yaubada galewa ne unai,

yo tanoubu ta unai nuwadaumwali ye lau yona gadosisi tamowaidiyao udiyedi.”

¹⁵ Anelu wa se laugabaeidi se uyo galewa, na kabo mamoe taukitakitahetete wa se bom se hedehedede se wane, “Kwa laoma ta lau Betelehem, na saha ye tubu na Yaubada yoda ye hedehedede wa ta kita.” ¹⁶ Na se laumwamwayau se lau, Maliya yo Yosepa se lobaidi yo wawaya wa se kita suisui yodi kabakaikai unai ye kenokeno.

¹⁷ Wawaya wa se kita na mulinawai hedehededenana anelu ye hedehedede wa se hedehedehemasalahadi, ¹⁸ na wasa wa taulapuina maudoidi se noko yodi hedehedede wa unai.

¹⁹ Ginauli maudoidi wa Maliya nuwana ne unai ye toledi na ye nuwanuwatuidi.

²⁰ Na mamoe taukitakitahetete wa se uyo yodi mamoe udiyedi. Yaubada se hedehedetausae yo se hedehedebasae, matawuwuna ginauli maudoidi se lapuidi yo se kitadi wa meta gonogonowana doha saha anelu ye hedehedede wa.

²¹ Sabati kesega mulinaena kabo wawaya wa huyahepelitomena mayadaina, na hesana se tole Yesu. Hesa ta anelu ye mosei sinana unai na kabo ye diyaka.

Yesu se laei Numa Tabuna unai

²²⁻²⁴ Maliya yona lauhe'a'a kaitalasangna huyana** ye laoma ede Yosepa yo Maliya Yesu maiyadi se lau Yelusalema, bena Yesu se mosei Guiyau unai, yo Maliya yona lauhe'a'a kaitalasangna se ginauli. Kabikabi ta udiyedi Guiyau yona laugagayo se ginauliwatani, ye wane, “Natumiyao loheloheyao bagubagunadi, siya bena Guiyau yona.”** (Esodo 12:1) Yo hinage ye wane, “Ena waihiu hesau ye labalaba kabo bunebune labui o gabubu labui” (Lewitikasi 12:8) ye baheidima Numa Tabuna unai na yona lauhe'a'a kaitalasangna ye ginauli.

Simiyona yona hededepeloweta

²⁵ Huyana ne unai meta tamowai hesau hesana Simiyona Yelusalema unai ye miyamiya. Iya meta laulaududulai tamowaina yo Yaubada yona laugagayo taulauwatanidi, yo Isalaela saguhaina ye nayanayai, yo Yaluwa Tabuna iya maiyana.

²⁶ Na Yaluwa Tabuna ye hemasalayahayako iya unai meta taba nige ye boita kana siga Guiyau yona kaisunuwa tamowaina** ye kita.

²⁷ Yaluwa yona woya unai Simiyona ye lusae Numa Tabuna bakubakuna unai. Na Maliya yo Yosepa natudi wa se baheiyama Numa Tabuna unai bena laugagayo kabikabina se ginauli iya hesabana. ²⁸ Kabo Simiyona wawaya wa ye hai ye labasi na Yaubada ye lautokiyeyi ye wane,

²⁹ “Guiyau, yom hededehesunuma yom heyayai tauhaina unai wa ye masalahako. Unai gonowana kabo ya boita ma nuwadaumwaligu.

³⁰⁻³¹ Matawuwuna ede teha maudoina tamowaidiyao matadiyena yom kabihemauli ku kabinonohai wa meta yau matagu ta udiyedi ya kitayako:

³² Iya dawayana kabo yom nuwatu ye hemasalaha dagela tamowaidiyao udiyedi, yo kam bodao Isalaela hekasisidi ye helaki tamowai matadiyena.”

** **2:22-24:** Maliya yona lauhe'a'a kaitalasangna huyana: Yaubada yona laugagayo Mose unai ye laoma wa ye wane, Ena waihiu hesau natuna loheya ye labasi, meta kabo mayadai 40 nige gonowana ye laulau Numa Tabuna, na ena natuna waihiu ye labasi, kabo mayadai 80. Mayadai 40 o 80 ne mulidiyena kabo ye lau yona lauhe'a'a kaitalasangna ye ginauli. ** **2:22-24:** Guiyau yona: Tabu hededehehemasalahanana ku hasili. ** **2:26:** Guiyau yona kaisunuwa tamowaina meta Giliki kalinadi unai ede Keliso.

³³ Wawaya hedehedena wa sinana yo tamana se lapui meta se noko. ³⁴ Na Simiyona ye hededehenamwadi na ye hededelau Maliya Yesu sinana unai ye wane, “Wawaya ta Yaubada ye kaisunuwai bena iya debanaena Isalaela tamowaidiyao se bado kabo Yaubada se laugabaei, yo se bado kabo se uyoma Yaubada unai. Iya Yaubada yona hineli tauhededehemasalahadi,** iyamo tamowai kabo se laukwatakwataei. ³⁵ Teina unai ede tamowai yodi nuwanuwatu wadawadamdi kabo ye hemasalahadi. Na nuwakamkana kana kao doha kelepa matamatana kabo kowa nuwam ne ye gwali.”

Ana yona hededepeloweta

³⁶ Temenai hinage peloweta hesau sinesinebadana, hesana ede Ana, Penuweli natuna, na Penuweli kana kulutubu ede Asa.

Ana meta ye tawasola na ma mwanena se miya bolimai haligigi-labui (7), na kabo mwanena ye boita, ³⁷ na ye kwabuli ye miya ye lau yona bolimai 84. Iya Numa Tabuna nige ye laulaugabaei, na mayadai yo boniyai Yaubada ye hedehedebasaei kaikaihudi yo tapwalolo udiyedi.

³⁸ Yosepa yo Maliya siya sola menai na Ana ye laoma kalidiwai. Yona lautoki ye mosei Yaubada unai, na wawaya wa hedehedena ye hedehededei tamowai maudoidi, siya kaiteyadi Yelusalema tauyailigabaeina se nayanayaei wa udiyedi.

³⁹ Huyana Yosepa yo Maliya ginauli maudoidi Guiyau yona laugagayo ye hedehededei wa se ginaulihegehedi meta se uyo yodi magai Nasaleta teha Galili unai. ⁴⁰ Wawaya wa ye tubusae yo ye bayao, yo sibasiba ye hemwayau. Na Yaubada yona kabinamwa meta iya unai.

Yesu yona bolimai 12 na yona sibasiba ye hemasalaha Numa Tabuna unai

⁴¹ Bolimai kesega kesega Yesu tamana yo sinana se laulau Yelusalema Taukiuli Henuwaisinina hesabana. ⁴² Huyana Yesu yona bolimai 12, ede kadi kulutubu kabik-abina wa unai iya maiyadi se lau henuwaisini ne hesabana.

⁴³ Taukiuli Henuwaisinina mayadaidi se gehe ede tamana yo sinana se dalahai bena se uyo yodi magai, na nige kabina se kata meta wawaya wa ye babawa Yelusalema unai.

⁴⁴ Yodi nuwatu bena iya kadi kahao wa maiyanao se lau. Mayadai lohaloha se lauyei, na kabo se hetubu kehadiyao yo kadi kahao udiyedi se wasenei. ⁴⁵ Na nige se lobai, ede se uyo Yelusalema na temenai se wasenei.

⁴⁶ Mayadai hehaiyonana unai Yesu se lobai Numa Tabuna bakubakuna unai taulauhekata maiyanao se tutuli, na ye lapulapulau udiyedi yo ye henahenamaiyeidi.

⁴⁷ Taulapulapui maudoidi wa se silyata yona nuwatulobai yo yona hededebui wa udiyedi.

⁴⁸ Huyana tamana yo sinana iya se lobai meta se nokokalili. Sinana ye hededelau unai ye wane, “Natugu, idohagi to teina doha ku ginauli kalimaiyena? Tamam yo yau meta ka nuwanuwatukalili yo ka wasewaseneigo.” ⁴⁹ Na Yesu ye wane, “Matawuwuna saha to kwa wasewaseneigau? Bena kabina kwa kata meta yau taba Tamagu yona numaena.”

⁵⁰ Na yona hedehedede wa kaniyona nige se nuwatulobai.

⁵¹ Na kabo Yesu tamana yo sinana maiyanao se uyo Nasaleta, na yona kawakabi wa se miyakesegaidi. Na Yesu saha ye ginaulidi yo ye hedededi wa meta sinana nuwana ne unai ye nuwanuwatuidi.

⁵² Yesu ye tubusaema bayao yo sibasiba udiyedi na Yaubada yo tamowai iya se kitahenamwa.

3

Yowane Babatiso yona lauguguya (Mataiyo 3:1-12, Maleko 1:1-8, Yowane 1:19-28)

** 2:34: Yaubada yona hineli tauhededehemasalahadi meta Simiyona ye hedede ede, iya hekihekinio.

¹ Loma yodi Sisa Taibilyasi yona huyawoyawoya bolimaina 15 ye lagema, iya ede huyana Pontiusi Pilato iya teha Yudeya yodi gabana, yo Heloda** iya wasawasa teha Galili unai, yo kana kaha Pilipo iya wasawasa Ituliya yo Talakoniti tehadi udiyedi, yo Lisaniyasi meta teha Abilene yodi wasawasa,² na Dius yodi taukaitalasam saesaedi ede Anase yo Kaiyapasi. Tenem huyana ne unai Yowane Sakaliya natuna balabalagaibu unai ye miyamiya na Yaubada ye hededelau iya unai.³ Ede ye lau Yolidani sagasagana tehana maudoina ye tauhetakikili na ye lauguguya meta tamowai bena se nuwabui na babatiso se hai, yodi yababa nuwatugabaedi hesabana.

⁴ Doha Aisaiya peloweta yona buka unai ye kulinonohaiyako ye wane, “Tamowai hesau balabalagaibu unai ye yogayoga ye wane, ‘Guiyau yona keda kwa kabinonohai!

Yona kabalau kwa kabihedudulaidi.

⁵ Gonu maudoidi kwa hemwayaudi,
yo kuduli maudoidi kwa kelihedudulaidi.
Keda youyoudi bena kwa hedudulaidi,
yo keda tupitupidi kwa hesapusapudi.

⁶ Na tamowai maudoidi kabo Yaubada yona kabihemauli se kita.’ ” *(Aisaiya 40:3-5)*

⁷ Bodalakilaki se lage Yowane unai bena ye hebabatisoidi, na ye hededelau udiyedi ye wane, “Komiu mwata natunao! Kaiteya ye hededelaowa bena kabo Yaubada yona hekamkamna kwa yabubugabaei? ⁸ Taba nuwabui kaniyona kwa miyahemasalahadi! Na tabu kwa wane, ‘Kama kulutubu meta Abelahama.’ Yomiu ya hedehedede: Yaubada gonowana weku ne udiyedi Abelahama kana isimulita ye hetubudi. ⁹ Na kilam ye nonohaiyako na kaiwa wuwuna unai ye tole. Ena kaiwa hesau nige ye kaniyonamwanamwa kabo ye koigabaei na ye tulaei kaiwa kalakalasina unai.”

¹⁰ Boda wa Yowane se henamaiyei se wane, “Saha kabo ka ginauli?” ¹¹ Yowane ye hededebui ye wane, “Ena hesau kalimwai lulu labui meta bena hesau ku mosei tamowai hesau iya nige yona lulu unai. Yo ena kai kalimyena bena hinage ku kainauya.”

¹² Takisi tautanotano hekadi hinage se laoma Yowane unai bena se babatiso. Na se henamai se wane, “Taulauhekata, saha kabo ka ginauli?” ¹³ Yowane ye hededelau udiyedi ye wane, “Tabu tamowai udiyedi takisi kwa tanotanodikwa.”

¹⁴ Na kabo tau'iyala hekadiyo hinage iya se henamaiyei se wane, “Na kai kabo saha ka ginauli?” Na ye wane, “Tabu tamowai kwa hegilugaibuidi na kwa lauhelilidi bena moni se haidiwa, na nuwamiu mo se namwa maisamiu ne unai.”

¹⁵ Tamowai maudoidi wa Keliso yona huyalaoma se nayanayakaliliyei, na se hetubu se nuwanuwatu nuwana Yowane iya Keliso ede. ¹⁶ Na Yowane ye hededelau maudoidi wa udiyedi ye wane, “Yau waila unai ya hebabatisoigomiu. Na tamowai hesau kabo ye laoma, iya yona gigibwali ye saekalili na kabo yau, na yau nige yogu namwa gonogonowana bena kana sendolo mainadi ya yailidi.** Iya kabo Yaluwa Tabuna yo kaiwa kalakalasina udiyedi ye hebabatisoigomiu. ¹⁷ Yona kabahehesulisini kaikaiwana meta iya nimanaena, bena witi ye hesulisinidi yo ye hinelidi. Kaniyona kabo ye toledi sanalaena, na mosomosodiyao kabo ye gabudi kaiwa kalakalasina unai nige yona kababoso.”

¹⁸ Hedehedede kadi kao udoi'udoi udiyedi Yowane ye guguyaidi yo wasa namwanamwana ye duwai tamowai udiyedi. ¹⁹ Yo wasawasa Heloda ye dilai, matawuwuna kana kaha mwanena Helodiyasi ye kwayai, yo yababa hekadi ye ginaulidi wa debadiyena. ²⁰ Na Heloda yona yababa kabahelakidi ede Yowane ye tole numatutugudu unai.

** **3:1:** Heloda ta, iya meta Heloda Antipasi. tauhaidi dobidobidi yodi paisowa.

** **3:16:** Kana sendolo mainadi ya yailidi: Teina meta heyayai

*Yowane Yesu ye hebabatisoi
(Mataiyo 3:13-17, Maleko 1:9-11)*

²¹ Tamowai se bado Yowane ye hebabatisoidi, yo hinage Yesu ye hebabatisoi. Huyana ne unai Yesu ye tapwatapwalolo na galewa ye tasoke ²² na Yaluwa Tabuna ye dobima kewana ne unai kana kao doha bunebune, yo kalina hesau galewa ne unai ye dobima ye wane, “Kowa Natugu! Ya gadosisikaliliyeigo yo nuwagu ku henamwakaliliyei!”

*Yesu kana kulutubu
(Mataiyo 1:1-17)*

²³ Huyana Yesu yona paisowa ye hetubu meta yona bolimai 30 ye hanahanawui. Na tamowai yodi nuwatu ede Yesu iya Yosepa natuna.

Na Yosepa tamana ede Heli. ^{**} ²⁴ Heli tamana ede Matati,
Matati tamana ede Lewi, Lewi tamana ede Meleki,
Meleki tamana ede Yanai, Yanai tamana ede Yosepa,
²⁵ Yosepa tamana ede Matatiyasi, Matatiyasi tamana ede Amosi,
Amosi tamana ede Nahuma, Nahuma tamana ede Esili,
Esili tamana ede Nagai, ²⁶ Nagai tamana ede Mati,
Mati tamana ede Matatiyasi, Matatiyasi tamana ede Semeina,
Semeina tamana ede Yoseki, Yoseki tamana ede Yoda,
²⁷ Yoda tamana ede Yowanani, Yowanani tamana ede Lesa,
Lesam tamana ede Selubabela, Selubabela tamana ede Seyalatiyela,
Seyalatiyela tamana ede Neli, ²⁸ Neli tamana ede Meleki,
Meleki tamana ede Adi, Adi tamana ede Kosam,
Kosam tamana ede Elimadam, Elimadam tamana ede Elu,
²⁹ Elu tamana ede Yosuwam, Yosuwam tamana ede Eliyesa,
Eliyesa tamana ede Yolim, Yolim tamana ede Matati,
Matati tamana ede Lewi, ³⁰ Lewi tamana ede Simiyona,
Simiyona tamana ede Yuda, Yuda tamana ede Yosepa,
Yosepa tamana ede Yonam, Yonam tamana ede Eliyakima,
³¹ Eliyakima tamana ede Meleya, Meleya tamana ede Mena,
Mena tamana ede Matati, Matati tamana ede Natani,
Natani tamana ede Dawida, ³² Dawida tamana ede Yese,
Yese tamana ede Obedi, Obedi tamana ede Bowasi,
Bowasi tamana ede Salamona, ^{**} Salamona tamana ede Nasona,
³³ Nasona tamana ede Aminadaba, Aminadaba tamana ede Lam, ^{**}
Lam tamana ede Heselona, Heselona tamana ede Pelesi,
Pelesi tamana ede Yuda, ³⁴ Yuda tamana ede Yakobo,
Yakobo tamana ede Isako, Isako tamana ede Abelahama,
Abelahama tamana ede Tela, Tela tamana ede Nahola,
³⁵ Nahola tamana ede Seluga, Seluga tamana ede Leu,
Leu tamana ede Pelega, Pelega tamana ede Ebeli,
Ebeli tamana ede Sela, ³⁶ Sela tamana ede Kainani,
Kainani tamana ede Apasada, Apasada tamana ede Sema,
Sema tamana ede Nowa, Nowa tamana ede Lameka,
³⁷ Lameka tamana ede Metusela, Metusela tamana ede Enoka,
Enoka tamana ede Yaledi, Yaledi tamana ede Mahalalela,

^{**} **3:23:** Tamana ede: Luka yona kulikuli kalina Giliki unai ye kuli, Yosepa iya Heli natuna, ²⁴ iya Matati natuna, iya Lewi natuna, iya Meleki natuna, yo ye lau tenem doha. Na kalinadaena hedehedede ta daguguna nige ye dudulaikalili, unai ka tolebui. ^{**} **3:32:** Salamona: Kalina Giliki unai Luka ye kuli ede Sala, iya ede teha Siliya unai hesa ne yodi katakatana. ^{**} **3:33:** Aminadaba tamana ede Lam: Kulikuli beyabeyadi hekadiyo se kuli, Aminadaba tamana ede Edimina, Edimina tamana ede Ani, Ani tamana ede Heselona. Yoda kulikuli ta unai New International Version (NIV) ta lauwatani.

Mahalalela tamana ede Kenani, ³⁸ Kenani tamana ede Enosi,
Enosi tamana ede Seta, Seta tamana ede Adama,
na Adama tamana ede Yaubada.

4

Yesu yona laukita

(Mataiyo 4:1-11, Maleko 1:12-13)

¹ Yesu Yaluwa Tabuna ye hemwayau, na Yolidani sagasagana ye laugabaei na Yaluwa Tabuna iya ye woyalaei balabalagaibuyena. ² Na temenai mayadai 40 luwadiyena diyabolo Yesu ye laukita. Mayadaidi ne udiyedi meta nige saha hesau ye kai, na mulina ne unai ye hasali.

³ Na diyabolo ye hededelau Yesu unai ye wane, “Ena kowa Yaubada Natuna, ku hededelau weku ta unai bena ye hemala pwalawa.”

⁴ Na Yesu ye hededebui ye wane, “Buka tabuna unai se kuliako meta tamowai nige gonowana pwalawa mo unai ye maumauli.”

⁵ Na kabo diyabolo Yesu ye woyasaei kuduli hesau unai na mahana kubwakubwa unai tanoubu ta yona basileiya maudoidi ye hekita. ⁶ Na ye hededelau unai ye wane, “Yau kabo wasawasa gigibwalina yo didigana ya lediwa kalimyena na basileiya maudoidi ta ku kitahettedi. Matawuwuna ginauli maudoidi ta Yaubada ye ledimako yau yogu, na gonowana ya mosegabaedi yogu kaisunuwa tamowaina unai. ⁷ Ena ku taba'ohu kaliguwai, kabo ginauli maudoidi ta kowa yom.”

⁸ Yesu ye hededebui ye wane, “Buka tabuna unai se kuliako meta, ‘Guiyau yom Yaubada ye bom mo ku hekasisiyei, yo iya ye bom mo unai ku taba'ohu.’ ” **

⁹ Na kabo diyabolo Yesu ye woyalaei Yelusalema. Na Numa Tabuna isuna sae-saekalilina unai ye hetolo na ye hededelau unai ye wane, “Ena kowa Yaubada Natuna, kabo inai ku kamposidobi. ¹⁰ Matawuwuna Buka Tabuna unai se kuli se wane, ‘Yaubada kabo ye hededelau yona anelu udiyedi na se kitahettedi.”

¹¹ Kabo nimadiyena se kabisinigo, na nige gonowana kaem ku koiyedi weku udiyedi.” *(Same 91:11-12)*

¹² Na Yesu ye hededebui ye wane, “Buka Tabuna ye wane, ‘Tabu Guiyau yom Yaubada ku lautonogi.’ ” *(Dutelonomi 6:16)*

¹³ Diyabolo laukita maudoidi ta ye hegehedi ede Yesu ye laugabaei na huya namwanamwana hesau ye nayanayai.

Yesu yona paisowa ye hetubu Galili unai

(Mataiyo 4:12-17, Maleko 1:14-15)

¹⁴ Yaluwa Tabuna yona gigibwali Yesu ye hemwayau na ye uyo Galili. Na Yesu wasana magai maudoina wa ye hetakikili. ¹⁵ Na ye lau yodi sunago udiyedi ye lauhekata na boda maudoina iya se hededetausaei.

Nasaleta unai Yesu se subu

(Mataiyo 13:53-58, Maleko 6:1-6)

¹⁶ Yesu ye lau yona kabatubusae magaina Nasaleta na yona kabikabi unai Sabatiyena ye lusae sunago unai na ye tolo bena Buka Tabuna ye hasili. ¹⁷ Na peloweta Aisaiya yona buka** se mosei na ye soke ede kulikuli ta ye lobai:

** **4:8:** Guiyau ... ku hekasisiyei, yo ... unai ku taba'ohu: Luka kalina Giliki unai ye kuli, na kalinadiyena hedehedede hekasisiyei kaniyona bagubagunana meta tulibono, iya ede hekasisi kabikabina. Yo yoda hedehedede taba'ohu meta hedehededen kalina Giliki unai kaniyona mamohoina. Dimdimyena se kuli, “serve”, na ena hedehedede ta Yaubada unai ta hepaisowa, kabo kaniyona lakilakina ede taba'ohu. ** **4:17:** Peloweta Aisaiya yona buka, iya ede pepwa lohlohana se nokunoku, nige doha huya ta bukadiyao.

18 “Guiyau yaluwana, iya ede yau kaliguyena,
matawuwuna iya [*ye kaisunuwaigau yo*] ye heyausigau
bena wasa namwanamwana ya hededehehemasalaha taudehadeha udiyedi.
Ye hetamaligau bena yailihai hedehededena ya hedehededei kaukau tamowaidiyao
udiyedi,
yo taumatagibugibu yodi ya hedehedede meta matadi bena se lala,
yo tamowai se kabihenayaidi bena ya gilihaidi,
19 yo bena ya hededehehemasalaha meta Guiyau yona katekamkamna bolimaina ede
ye lageko. **,” *(Aisaiya 61:1-2)*

20 Yesu buka wa ye noku na ye mose'uyoi sunago taukitahetetena wa unai na ye tuli.
Sunago wa unai tamowai maudoidi matadiyao meta se tolekesegaidi iya unai. 21 Na
Yesu ye hededelau udiyedi ye wane, “Kulikuli ya hasili kwa lapui wa meta mayadai ta
unai ye masalaha matamiuyena.”

22 Maudoidi wa iya se hededehehenamwa yo yona hedehedede namwanamwadi wa
udiyedi meta se siliyata yo se nokokalili na se henahenamai'uyoidi se wane, “Iya Yosepa
natuna o nige?”

23 Na Yesu ye hededelau udiyedi ye wane, “Ya nuwatui kabo hededesonoga kwa
hedede kaliguwai kwa wane, ‘Doketa, ku henamwanamwa'uyoigo!’ Kabo hinage kwa
hededelaoma laulau saha ya ginaulidi wasadi kwa lapuidi Kapelenauma unai wa, bena
hinage ya ginaulidi teina yogu magai mamohoina ta unai.”

24 Na Yesu ye wane, “Ya hededemamohoi kalimiuyena: Peloweta yona magai mamohoina
unai nige gonowana se hailobai. 25 Mamohoi, peloweta Eliya yona huya unai
meta kwabukwabuli se badokalili Isalaela unai. Tenem huyana ne unai meta nige
nabu ye talu bolimai haiyona yo tehana, na Isalaela maudoina hasalilakilaki se hekalo.
26 Na iyamo Yaubada nige Eliya ye hetamali ye lau Isalaela yodi kwabuli hesau unai,
na ye lau dagela waihiuna hesau kwabukwabulina unai, iya teha Sidona magaina
Salepata unai ye miyamiya. 27 Yo hinage peloweta Elisa yona huyaena meta Isalaela
unai taulepelepela se bado, iyamo nige hesau ye henamwanamwa, na Naman iya teha
Siliya tamowaina ye bom mo.”

28 Huyana sunago unai na tamowai maudoidi hedehedede wa se lapui meta se
koipilikalili. 29 Se tolo ede Yesu magai wa unai se hepesa na se woyalae kuduli
padipadina unai bena se gabadobiyei. 30 Na iya meta boda wa luwadiyena ye solahai
ede ye laugabaeidi na ye lau.

*Yesu yaluwa bikibikina ye hededehepesa
(Maleko 1:21-28)*

31 Na kabo ye dobi Galili magaina hesau hesana Kapelenauma. Na Sabatiyena [*ye lau
sunago unai na*] tamowai ye hekatadi. 32 Yona lauhekata wa unai meta se nokokalili,
matawuwuna yona gigibwali unai ye hedehedede.

33 Sunago wa luwana ne unai meta tamowai hesau, yaluwa bikibikina iya ye luwui, na
kalina lakilakina unai ye yogahi ye wane, 34 “Aiyoi! Saha ku henuwa kalimaiyena, Yesu
Nasaleta tamowaina? Ku laoma bena ku heyababagai? Kabim ya kata kowa kaiteya:
Kowa Tabuna, Yaubada unai ku laoma.”

35 Na Yesu ye hededebayao yaluwa bikibikina wa unai ye wane, “Ku mwanou na
tamowai me ku pesagabaei!” Ede yaluwa bikibikina tamowai wa ye tuudobiyei boda
wa luwadiyena na ye pesagabaei, na nige ye hekamkamna.

** 4:19: Guiyau yona katekamkamna bolimaina, iya ede laugagayo unai Yaubada ye hedede wa, meta bolimai
hehaligigi-labuidi (7th) udiyedi Isalaela tamowaidi kadi hagahaga maudoidi se boligabaeidi (Dutelonomi 15:1-3)
yo ena yodi hali Isalaela kadi hagahaga debadiwai se haidi se hemala yodi heyayai tauhaidi, kabo se kabigabaeidi
(Lewitikasi 25:39-55).

³⁶ Tamowai maudoidi wa se noko na se bom yodi se hedehedede se wane, “Teina hedehedede ta kaniyona ede saha? Yona gigibwali yo yona bayao unai ye hededelau yaluwa bikibikidi udiyedi, ede se pesa.” ³⁷ Na Yesu wasana meta magai maudoina wa ye tauhetakikili.

*Kapelenauma unai Yesu boda ye henamwanamwadi
(Mataiyo 8:14-17, Maleko 1:29-34)*

³⁸ Yesu sunago wa ye laugabaei na ye lau Simona yona numa unai. Na Simona bwasiyana sinebada ye kasiyebwakalili, tauna meta se gwagwama. Na Yesu se kaibwadai bena ye henamwanamwa. ³⁹ Ede ye lau kalinawai na ye dunedobi na ye hedede meta gwagwama wa ye pesagabaei, na kasiyebwa wa ye gehe. Na mahanana ne unai ye tolo ede ye haitalaidi.

⁴⁰ Mahana wa ye dui na mulina ne unai tamowai maudoidi kehadiyao kasiyebwa udoi'udoitauhaidi se woyaidima Yesu unai. Na Yesu nimana ye tolesaedi kesega kesega kewana ne unai na maudoidi wa ye henamwanamwadi. ⁴¹ Yo hinage tamowai se bado udiyedi yaluwa yabayababadi se pesapesa na se yogayogahi se wane, “Kowa Yaubada Natuna.” Na Yesu ye dilaidi na ye hededehekaiyawasidi tabu se hedehedede, matawuwuna kabina se kata iya meta Keliso.

⁴² Malatomtomyena Yesu magai wa ye laugabaei na ye lau balabala hesau unai. Na boda wa se hetubu se loyai. Huyana se lobai meta se hededelau unai bena tabu ye laulaugabaeidi. ⁴³ Na Yesu ye hededelau udiyedi ye wane, “Taba hinage Yaubada yona basileiya wasana namwanamwana ta ya lauguguyaei magai hekadi udiyedi, matawuwuna Yaubada ye hetamaligau ne kaniyona ede.” ⁴⁴ Ede Galili ye laugabae na ye lau Yudeya unai yodi sunago udiyedi ye lauguguyatakikili.

5

*Yesu hekahekatao bagubagunadi ye yoganeidi
(Mataiyo 4:18-22, Maleko 1:16-20, Yowane 1:35-51)*

¹ Huya hesau Yesu ye totolo Galili Gabwana dedekana unai na boda se haiyahiyahi'uyoidi bena Yaubada wasana se lapui. ² Na tauyamayama yodi waga labui ye kitadi se hetausinidi salagomgom wa unai na se pesagabaeidiko na se lau yodi hinaya se deudeulidi. ³ Yesu waga wa hesau unai ye gelu, iya meta Simona yona. Na ye hededelau iya unai bena waga wa ye hesigidobiyei. Na kabo ye tuli waga wa unai na boda wa ye hekatadi.

⁴ Yona hedehedede wa ye gehe ede ye hededelau Simona unai ye wane, “Yom waga ta ku hesigidobiyei gabwagabwatumna ne unai, na ma kam kahao yomi hinaya kwa gabaeidi.” ⁵ Na Simona ye hededebui ye wane, “Tanuwaga, boniyai lohaloha ka kaipatekalili na nige saha hesau ka hinayai, na yom hedehedede unai kabo hinaya ne ya gabadobiyeidi.”

⁶ Hinaya wa se gabadobiyeidi na yama se hekonadi. Na se badokalili ede hinaya wa se hetubu bena se tapulisi. ⁷ Unai kadi kahao waga hesau unai wa se nimakoidi se laoma se saguidi. Na waga labui wa yama unai se hemwayaudi, ede se yoliyolisapuli.

⁸ Huyana Simona Petelo laulau wa ye kita meta ye gulidobi Yesu talanuwana unai na ye wane, “Guiyau, ku laugabaegau, yau yababa tamowaina.” ⁹ Matawuwuna Petelo ma kana kahao yama wa se hinayai na yona bado wa se kita meta se siliyatakalili, ¹⁰ gonogonowana doha Yamesi yo Yowane, Sebedaiyo natunao, siya Simona kana kahao yodi yamayama paisowana unai.

Na Yesu ye hededelau Simona unai ye wane, “Tabu ku matausi, mayadai ta unai na ye lau ne kabo tamowai ku hinayaidi.” ¹¹ Ede waga wa ma gogodi se niulisinidi nagali wa unai se laugabaeidi na Yesu se hemuliwatani.

*Yesu tamowai lepelepelana ye henamwanamwa
(Mataiyo 8:1-4, Maleko 1:40-45)*

¹² Huyana Yesu magai hesauna unai meta tamowai hesau ye laoma, iya tauna lepela se hemwayau. Tamowai wa Yesu ye kita ede ye guliyaboyabomdobi iya talanuwana unai na ye kaibwada ye wane, “Guiyau, ena ku henuwa, kabo gonowana ku he'a'agau.”

¹³ Ede nimana ye helelelaei tamowai wa ye kabitonogi na ye wane, “Ya henuwa. Ku a'a.” Mahanana ne unai kasiyebwa wa ye ulugehe.

¹⁴ Kabo Yesu ye hedehegedelau unai ye wane, “Tabu tamowai hesau yona ku hedehegede, na ku lau taukaitalasam unai ku hemasalahago, na he'a'a kaitalasamdi Mose ye hedede wa ku ginulidi. Kabo tamowai se kitalobai meta ku namwanamwako.”

¹⁵ Na iyamo Yesu wasana wa ye laki ye lau, ede bodalakilaki se laoma bena yona lauhekata se lapulidi yo bena kadi kasiyebwa ye henamwanamwadi. ¹⁶ Na huya se bado Yesu ye dalahaigabaedi na ye bom ye lau balabalagaibu udiyedi na ye tapwalolo.

*Yesu tamowai bunibunina ye henamwanamwa
(Mataiyo 9:1-8, Maleko 2:1-12)*

¹⁷ Mayadai hesau Yesu ye laulauhekata, na Paliseya yo laugagayo taulauhekataena tamowaidiyao hekadi dedekana wa unai se tutuli. Siya meta Yudeya yo Galili magaidiyao maudoidi udiyedi se laoma, yo Yelusalema unai taulaoma siya hinage menai. Na Guiyau yona gigibwali ede Yesu kalinawai bena taukasikasiyebwa ye henamwanamwadi.

¹⁸ Tenem huyana ne unai meta tamowai hekadi tamowai hesau bunibunina diyadiyali unai se baheiyama na se kaipate bena se bahehemwalae numa kalona ne unai na se tole Yesu talanuwana unai. ¹⁹ Na boda wa ye lakikalili ede nige gonowadi, unai se mwalaesae numa wa kewanaena, gatowa wa unai duha se ginauli na taubunibunini wa ma diyadiyalina se hedadolodobiyei boda wa luwadiyena Yesu talanuwana ne unai. ²⁰ Yodi sunuma Yesu ye kita ede ye hedehegedelau taubunibunini wa unai ye wane, “Kagu kaha, yom yababa ya nuwatugabaedi.”

²¹ Laugagayo taulauhekataena yo Paliseya wa se bom se nuwanuwatu se wane, “Teina tamowai ta meta kaiteya na Yaubada ye hedeheyaheyababa? Yaubada ye bom mo gonowana yababa ye nuwatugabaedi!”**

²² Yodi nuwanuwatu wa Yesu kabidi ye kata ede ye henamaiyeidi ye wane, “Idohagi na teina nuwanuwatu ta nuwamiu ne udiyedi kwa nuwanuwatuidi? ²³ Hedehegede sahasahana ye biga, kabo ya hedede taubunibunini ta unai ya wane, ‘Yom yababa ya nuwatugabaedi’, o ya wane, ‘Ku tolo na ku laulau?’ ²⁴ Ya henuwa bena kwa nuwatulobai meta Tau Natuna yona gigibwali kaiyaulina ta unai gonowana yababa ye nuwatugabaedi.” Na ye hedehegedelau taubunibunini wa unai ye wane, “Ku tolo, yom kabakeno me ku hai na ku lau yom numa!”

²⁵ Mahanana ne unai matadiyena ye tolo na yona kabakeno wa ye hai ede ye lau yona magai na Yaubada ye hedehegedebasaei. ²⁶ Tamowai maudoidi se nokokalili na Yaubada se hedehegedebasaei. Yo Yaubada hekasisina ye hemwayaudi na se hedehegedede se wane, “Mayadai ta unai meta kabikabi saesaekalilidi ta kitadi.”

*Yesu Lewi ye yoganei
(Mataiyo 9:9-13, Maleko 2:13-17)*

²⁷ Mulina ne unai Yesu ye dalahai ye lau na takisi tautanotano hesau hesana ede Lewi ye kita ye tutuli takisi kabatanotano numana unai. Na ye hedehegedelau unai ye wane, “Ku hemuliwatanigau!” ²⁸ Ede Lewi ye tolo, yona paisowa gogodi maudoidi ye laugabaedi na Yesu ye hemuliwatani.

** **5:21:** Yaubada ye hedeheyaheyababa: Paliseya yo laugagayo taulauhekataena wa Yesu se kita meta iya doha tamowaigaibu hesau, na iyamo yababa ye nuwatugabaedi gonogonowana doha Yaubada. Unai se hedede bena Yesu Yaubada ye toledobidobiyei yo ye hedeheyaheyababa.

²⁹ Kabo Lewi yona numa unai kai lakilakina ye ginauli Yesu hesabana. Na takisi tautanotano bodalakilaki yo tamowai hekadiyo maiyadiyao se kaikaigogoi.

³⁰ Paliseya kadi bodao wa luwadi ne unai laugagayo taulauhekataena hekadi, na Paliseya hekadiyo maiyadiyao [*se laoma*] se hetalapili Yesu yona hekahekatao wa udiyedi se wane, “Idohagi to takisi tautanotano yo yababa tamowaidiyao ne maidamiyao kwa kaikaigogoi?”

³¹ Yesu yodi bui ye moseidi ye wane, “Tamowai namwanamwadiyao nige se henuwa doketa, na tamowai kasikasiyebwadi mo. ³²Yogu laoma ta nige tamowai yodi miyamiya dudulaidi hesabadi, na yababa tamowaidi ya yoganeidi bena se nuwabui.”

Kabikabi beyabeyadi yo hauhaudi hedehedededi
(*Mataiyo 9:14-17, Maleko 2:18-22*)

³³ Kabo se hededelau Yesu unai se wane, “Yowane yona hekahekatao se kaikaihuudi yo se tapwatapwalolo, gonogonowana doha Paliseya yodi hekahekatao hinage, na yom hekahekatao ne se kai yo se numa, [*na nige se kaikaihuudi*].”

³⁴ Na Yesu ye hededelau udiyedi ye wane, “Tawasola kaikaigogona unai, ena tautawasola maiyadi, meta kabo kana taumana se kaihuudi o nige? ³⁵Na mayadaina ye lage kabo tautawasola se haigabaei, na kabo kehanao ne se kaihuudi.”

³⁶ Na kabo Yesu teina heyahayasoni ta ye hedede udiyedi ye wane, “Nige gonowana tamowai hesau kaleko hauhauna tupwana ye pulisihai na kaleko beyabeyana tapulisina unai ye polai. Taba ye ginauli, meta kaleko hauhauna kabo ye heyababa, na kaleko hauhauna tupwana wa maiyana kaleko beyabeyana wa taba nige kadi kao ne gonogonowadi.

³⁷ Nige gonowana tamowai hesau waina hauhauna ye ini waina pakuna beyabeyana unai. Taba ye ginauli, kabo waina pakuna wa ye tapulisi, matawuwuna waina hauhauna kabo ye sese. Kabo waina wa ye bwalili, na pakuna wa kabo ye yababa.

³⁸ Waina hauhauna bena ta ini waina pakuna hauhauna unai.

³⁹ Ena tamowai hesau waina beyabeyana ye numatonogi, kabo waina hauhauna nige ye henuwa, na ye wane, ‘Waina beyabeyana meta ye namwa ede.’ ”

6

Yesu meta Sabati guiyauna ede
(*Mataiyo 12:1-8, Maleko 2:23-28*)

¹ Sabati hesau unai Yesu maiyana hekahekatao se laulau kabo witi koyana hesau se tauduwaduwali se lau. Ede yona hekahekatao wa witi kaniyodi se gigidi na nimadi udiyedi se kutudi na se kaikai. ²Na Paliseya tamowaidi hekadiyo se hededelau udiyedi se wane, “Idohagi to Sabati laugagayona kwa utusi?”

³ Na Yesu ye hededelau udiyedi ye wane, “Huyana Dawida ma kana hewahewaliyo se hasali na saha ye ginauli wa wasana kwa hasili o nige? ⁴Ye lusae Yaubada yona Logulogu Tabuna unai na pwalawa hetahetabudi ye haidi ye kaidi, na hekadi ye moseidi kana hewahewaliyo wa se kaidi. Tenem unai meta laugagayo se utusi, matawuwuna pwalawa ne nige gonowana tamowai gaibu se kai, na taukaitalasam se bom mo kabo se kai.” ⁵Na Yesu yona hedehedede ye tubei ye wane, “Tau Natuna iya Sabati guiyauna ede.”

⁶ Sabati hesau unai ye lusae sunago unai ye lauhekata. Na temenai tamowai hesau nimakahakahatuna ne ye basabasa [*na nige gonowana ye hepaisowa*]. ⁷Laugagayo taulauhekataena yo Paliseya tamowaidi meta yodi kabahegiluna se wasewasenei, unai Yesu se kaikewakaliliyei, mamohoi kabo Sabati unai tamowai ne ye henamwanamwa o nige. ⁸Yodi nuwanuwatu wa Yesu kabina ye kata, unai ye hededelau tamowai nimabasabasana wa unai ye wane, “Ku saema na matadi ne unai ku tolo.” Ede matadi wa unai ye tolo.

⁹ Kabo Yesu ye hededelau Paliseya tamowaidi wa udiyedi ye wane, “Ya henamaiyeigomiu: Laulau saha ye dudulai ede mayadai Sabati unai: namwa ta ginauli o yababa, tamowai yona mauli ta sagui o ta heyababa?”

¹⁰ Na ye kaikewatakikili maudoidi wa kalidiyena na kabo ye hededelau tamowai wa unai ye wane, “Nimam ne ku tuuhedudulai!” Tamowai wa nimana ye tuuhedudulai ede ye namwanamwa. ¹¹ Na Paliseya yo laugagayo taulauhekataena wa meta se koipilikalili, ede se bom yodi se koitalaliu saha kabo se ginauli Yesu unai.

*Yesu yona apostolo ye kaisunuwaidi
(Mataiyo 10:1-4, Maleko 3:13-19)*

¹² Tenem mayadaidi ne udiyedi Yesu ye lau kuduli hesau unai bena ye tapwalolo. Menai ye bawa ye lau mala ye tom, na ye tapwatapwalolo Yaubada unai. ¹³ Malatomtomyena yona hekahekatao ye yogagogoidi se laoma iya unai na luwadiyena badodi 12 ye kaisunuwaidi na ye kataidi apostolo. Hesadi ede teina:

¹⁴ Simona, iya hesana ye tole Petelo,
yo kana kaha Andeleya,
yo Yamesi,
Yowane,
Pilipo,
Batolomaiyo,

¹⁵ Mataiyo,
Tomasi,
Yamesi Alepaiya natuna,
Simona, iya se katai Tauhaikabi,

¹⁶ Yudasi Yamesi natuna,
yo Yudasi Isakaliyota, iya ye hemala Yesu kana tauwalohai.

*Yesu ye lauhekata yo tamowai ye henamwanamwadi
(Mataiyo 4:23-25)*

¹⁷ Yesu yona hekahekatao maiyanao kuduli wa unai se dobi'uyoma na malakotana unai se totolo, na tauhemuhemuliwatanina bodalakilaki wa menai, yo hinage tamowai hekadi bodalakilaki, siya ede Yudeya yo Yelusalema tamowaidiyao, yo Taiya yo Sidona teha gabwa udiyedi taulaoma. ¹⁸ Siya se laoma bena Yesu yona lauhekata se lapui, yo bena ye henamwanamwadi kadi kasiyebwa udiyedi. Yo kaiteyadi yaluwa bikibikidi udiyedi se kamkamna, meta hinage ye henamwanamwadi. ¹⁹ Maudoidi se kaipate bena Yesu se kabitonogi, matawuwuna iya unai gigibwali ye pesapesama na maudoidi wa ye henamwanamwadi.

*Gwayyala yo nuwadubu hedehedededi
(Mataiyo 5:1-12)*

²⁰ Yesu ye kitalau yona hekahekatao udiyedi na ye hededelau udiyedi ye wane, “Komiu kaiteyadi taudehadeha

meta gonowana kwa gwayyala,
matawuwuna Yaubada yona basileiya komiu yomiu.

²¹ Komiu mayadai ta unai tauhasahasali,
meta gonowana kwa gwayyala,
matawuwuna kabo kwa bogasese.

Komiu mayadai ta unai taudoudou,
meta gonowana kwa gwayyala,
matawuwuna kabo nuwamiu se namwa.

²² Ena Tau Natuna debanaena na tamowai se subugomiu yo se tolehesuwalagomiu yo se hedeheheyababagomiu yo se hedede bena kwa yababa,
meta gonowana kwa gwayyala.

- ²³ Yomi kamkamna mayadaina ne unai bena kwa nuwanamwa yo gwauyala sobuna kwa sobu,
matawuwuna yomi kainauya galewa ne unai kabo ye lakikalili.
Tamowai wa saha se ginaulidi kalimiuwai meta gonogonowana doha kadi kulu-
tubu se ginaulidi peloweta udiyedi wa.
- ²⁴ Na ahani mo komiu taugogogogo,
matawuwuna yomi miya namwanamwana meta kwa haiyako.
- ²⁵ Ahani mo komiu bogamiu se sesekalili,
matawuwuna kabo kwa hasali.
Ahani mo komiu mayadai ta unai taugwaugwauyala,
matawuwuna kabo kwa nuwadubu yo kwa dou.
- ²⁶ Ahani mo komiu, ena tamowai maudoidi se hededehenamwagomiu,
matawuwuna kadi kulutubu hinage pelowetalupolupo se hededehenamwadi.”

Bena kada waiunu ta gadosisiyeidi
(Mataiyo 5:38-48, 7:12)

²⁷ Na kabo Yesu ye wane, “Komiu taulapulapui, ya hededelaowa kalimiuyena doha teina: Kami waiunu bena kwa gadosisiyeidi, yo kaiteyadi se subugomiu bena yomi laulau se namwa kalidiyena, ²⁸ yo kaiteyadi se kawagulaiyeigomiu meta kwa hedede-
henamwadi, yo taukabihenayaigomiu yodi kwa tapwalolo. ²⁹ Ena kaiteya papalim ne unai ye koi, meta ku tolobui na teha hesau ne unai hinage ye koi. Ena kaiteya kam lulu nimalohalohana ye hai, meta kam lulu nimakubwakubwana hinage ku mosei. ³⁰ Ena tamowai hesau kalimyena ginauli hesau ye kaibwadai, meta bena ku mosei, na ena tamowai hesau yom ginauli hesau ye hai, meta tabu ku hetala'uyoi. ³¹ Yomi laulau tamowai udiyedi taba gonogonowana doha kwa henuwa bena se ginauli kalimiuyena.

³² Ena taugadosisiyeigomiu se bom mo kwa gadosisiyeidi, unai kabo kainauya saha hesau kwa lobai, e nige? Taba nige, matawuwuna yababa tamowaidiyao hinage taugadosisiyeidi se gadosisi'uyoidi. ³³ Na ena tamowai hesau yona laulau se namwa kalimiuyena, na ye bom mo unai yomi laulau se namwa, unai kabo kainauya saha hesau kwa lobai, e nige? Taba nige, matawuwuna yababa tamowaidiyao teina miya ta hinage se miyamiyaei. ³⁴ Ena tamowai hesau moni unai ku sagui na yom nuwatu ede kabo ye hemaisa'uyoi, unai kabo kainauya saha hesau kwa lobai, e nige? Taba nige, matawuwuna yababa tamowaidiyao hinage moni se mosei yababa tamowaidiyao hekadiyo udiyedi na yodi nuwatu ede yodi moni ne dudulaina kabo se hemaisa'uyoi.

³⁵ Na kami waiunu bena kwa gadosisiyeidi, yo yomi laulau bena se namwa kalidiwai, yo yomi sagu kwa mosei udiyedi, na tabu yomi nuwanuwatu bena maisana kwa hai'uyoi kalidiyena. Na kabo yomi kainauya ye lakikalili, na komiu kabo Yaubada Sae-saekalilina natunao, matawuwuna iya yona laulau se namwa nige taulaulautokiyeina yo yababa tamowaidi udiyedi. ³⁶ Bena katekamkamna kalimiuyena, doha Tamamiu iya taukatekamkamna.”

Kitahineli hedehedena
(Mataiyo 7:1-5)

³⁷ [Yesu yona hedehedede ye tubei ye wane,] “Tabu tamowai kwa hekasadi, kabo Yaubada taba nige ye hekasagomiu. Tabu tamowai kwa hegiludi, kabo Yaubada taba nige ye hegilugomiu. Tamowai yodi yababa kalimiuyena kwa nuwatugabaedi, kabo Yaubada yomi yababa ye nuwatugabaedi. ³⁸ Kwa kaikainauya, kabo Yaubada ye kain-
auyaigomiu. Kana kao doha kabanowonowoi kaputina ye hemwayau na kewana ne unai ye inihepwata'uyoi na ye sae ye mwayaubwalibwalili na ye lediwa kalimiuyena. Matawuwuna nowonowoi sahasahana kwa hepaisowa tamowai udiyedi meta Yaubada kabo ye hepaisowa kalimiuyena.”

³⁹ Yesu heyaheyasoni hesau ye hedede kalidiyena, ye wane, “Nige gonowana tau-matagibugibu hesau yona hali taumatagibugibu ye woyai. Ena ye woyai, kabo se bekulabulabuidobi duhaena. ⁴⁰ Lauhekata tauhaina meta nige hesau ye sonogakalili na kabo tauhekatana ne. Na ena hesau lauhekata maudoina ye hai, meta yona taulauhekata ne maiyana kabo gonogonowadi.

⁴¹ Ye saha to kam kaha matana mukalina ku kaikewai, na matam ne unai kaiwa mwayana nige ku modei? ⁴² Idohagi na ku hededelau kam kaha unai ku wane, ‘Kagu kaha, ku laoma matam mukalina ya haigabaei,’ iyamo kaiwa mwayana matam ne unai nige ku kita? Kowa taukailupolupo mamohoi! Matam ne unai kaiwa mwayana ku haigabaeibagunai na matam ne ye nega, kabo kam kaha matana mukalina ku kitanamwanamwaei na ku haigabaei!”

Kaiwa kaniyodi hedehedena
(Mataiyo 7:17-20, 12:33-35)

⁴³ [Na Yesu yona hedehede ye tubei ye wane,] “Kaiwa namwanamwana nige gonowana kaniyona yababadi ye toledi, yo kaiwa yababana nige gonowana kaniyona namwanamwadi ye toledi. ⁴⁴ Kaiwa kesega kesega kaniyona unai ta kitalobai. Nige gonowana bosibosi kaniyodi ta gigidi kaiwa gwaligwalidi udiyedi, yo wine kaniyodi nige gonowana ta gigidi maimaina gwaligwalidi udiyedi. ⁴⁵ Tamowai namwanamwana nuwana meta nuwanuwatu namwanamwadi udiyedi ye mwayau, unai iya yona hedehede yo yona kabikabi kabo se namwa. Yo tamowai yababana nuwana meta nuwanuwatu yababadi udiyedi ye mwayau, unai iya yona hedehede yo yona kabikabi kabo se yababa. Matawuwuna tamowai nuwana ne unai saha ye miyamiya, meta kawana ne unai kabo ye hedehedei.”

Taukabinuma labui
(Mataiyo 7:24-27)

⁴⁶ [Kabo Yesu ye wane,] “Kwa kataigau ‘Guiyau, Guiyau!’, na idohagi to yogu hedehede nige kwa ginauliwatanidi? ⁴⁷ Kaiteya ye laoma kaliguyena na ye lapulapulaoma yo yogu hedehede ye kawakabiyedi, iya kana kao kabo ya hedehemasalaha kalimiuyena: ⁴⁸ Iya doha taukabinuma bwatano ye sala ye dobi na numa sowona ye hetolo weku kewanaena. Huyana kabaita ye didima na numa ne ye koiyei, meta nige gonowana ye nukui, matawuwuna numa wa ye ginaulinamwanamwaei. ⁴⁹ Na kaiteya kalinagu ye lapui na yogu hedehede nige ye miyawatanidi, iya meta doha taukabinuma nige ye saladobi, na bwatano kewagaibuna unai yona numa ye hetuli. Huyana kabaita numa ne ye koiyei meta ye koiheguli na ye hetatagwaligwalikaliliyei.”

7

Iyala taubagunaena tamowaina yona sunuma
(Mataiyo 8:5-13, Yowane 4:46-54)

¹ Yesu boda wa udiyedi ye lauhekata ye gehe na ye lusae Kapelenauma. ² Temenai Loma yodi iyala taubagunaena tamowaina hesau, na yona heyayai tauhaina hesau ye gadosikaliliyei meta ye kasiyebwa sabi boitana. ³ Iyala taubagunaena tamowaina wa Yesu wasana ye lapui ede Dius yodi tamowai lakilakidi hekadiyo ye hetamalidi se lau Yesu unai se kaibwadai bena ye laoma na yona heyayai tauhaina wa ye henamwanamwa. ⁴ Se laoma Yesu unai na se kaibwadabayabayao se wane, “Teina tamowai ta ye namwa mo ku sagui, matawuwuna iya tamowai namwanamwana. ⁵ Kita Dius tamowaidiyao ye gadosisiyeida, yo hinage yoda sunago ye ginauli.” ⁶ Ede Yesu maiyanao se lau.

Numa wa se hanahanawuiyako na iyala taubagunaena tamowaina wa kana kahao hekadiyo ye hetamalidi se lau Yesu unai bena kalinana se hedede. Se wane, “Guiyau,

tabu ku mode, matawuwuna nige ya namwa na bena ku laoma yogu numaena.**
⁷ Temeta debanaena ede yau hinage nige gonowana bena ya laowa kalimyena. Na taba ku hedehedede mo, kabo yogu taupaisowa ne ye namwanamwa. ⁸ Matawuwuna yau hinage kagu tanuwaga yona gigibwali gunina unai, yo yau tau'iyala tauwoyaidi. Ya hededelau hesau unai ya wane, 'Ku lau!', meta kabo ye lau. Yo hesau unai ya wane, 'Ku laoma!', meta kabo ye laoma. Na ya hededelau yogu heyayai tauhaina unai ya wane, 'Paisowa ne ku ginauli!', meta ye ginauli."

⁹ Yesu hedehedede wa ye lapui meta ye nokokaliliyei. Ede ye tolobui na ye hededelau boda se hemuhemuliwatani wa udiyedi ye wane, "Ya hededelaowa, sola nige sunuma hesau doha teina ya lobai Isalaela tamowaidiyao udiyedi." ¹⁰ Na tautauwasaina wa se uyo iyala taubagunaena tamowaina yona numa, na yona heyayai tauhaina wa se kita meta ye namwanamwako.

Yesu kwabuli natuna ye hetolo'uyoi boitaena

¹¹ Nige huyana ye loha, na Yesu ye lau magai hesau hesana Naina unai, na yona hekahekatao yo bodalakilaki maiyanao se lau. ¹² Magai wa ganana kedana ye hanahanawui na taubaita hesau se bahehepesa. Taubaita wa meta sinebada hesau natuna loheya kesega mo, na sinebada wa meta kwabukwabulina. Na magai wa bodana iya maiyanao. ¹³ Huyana Guiyau sinebada wa ye kita meta ye katekamkamnaei na ye wane, "Tabu ku doudou!" ¹⁴ Na ye lau diyadiyali wa ye kabilau unai, ede taubaheina wa se talutolo. Na ye wane, "Hewali, ya hededelaowa, ku tolo!" ¹⁵ Na hewali wa ye tolo ye tuli na ye hetubu ye hedehedede. Ede Yesu ye mose'uyoi sinana wa unai.

¹⁶ Maudoidi wa se nokokalili na Yaubada se hedebasaei, se wane, "Peloweta saesaena hesau ye taumasalaha luwadaena!" Yo hinage se wane, "Yaubada ye laoma bena yona tamowai ye saguidi." ¹⁷ Yesu yona kabikabi ta wasana ye lau Yudeya tehana maudoina ye hetakikili yo dedekana ne unai teha hekadiyo hinage.

Yowane Babatiso yona henamai Yesu unai (Mataiyo 11:1-19)

¹⁸ Yowane Babatiso yona hekahekatao ginauli maudoidi Yesu ye ginaginulidi wa yona se hedehedede. Unai ede yona hekahekatao labui ye yoganeidi ¹⁹ na ye hetamalidi bena se lau Guiyau unai se henamai se wane, "Mamohoina kowa Kelisona ede ka nayanayai wa, o sola tamowai hesau ka nayanayai kabo ye laoma?"

²⁰ Taudi labui wa se lau Yesu unai se lage ede se hededelau unai se wane, "Yowane Babatiso ye hetamaligai ka laoma ka henamaiyeigo: 'Mamohoina kowa Kelisona ede ka nayanayai wa, o sola tamowai hesau ka nayanayai kabo ye laoma?'"

²¹ Mahanana ne unai Yesu tamowai se badokalili kadi kasiyebwa udoi'udo'i ye henamwanamwadi, yo yaluwa yabayababadi ye hededehepesadi, yo hinage tamowai matagibugibudi matadi ye helaladi. ²² Unai ye hededebui ye wane, "Kwa uyo na saha kwa lapuidi yo kwa kitadi wa Yowane yona kwa hedehedede, kwa wane, Taumatagibugibu matadi se lala, taubunibuni se laulau, taulepelepela se namwanamwa, taubeyakolakola se lapulapui, tauboiwoita se tolo'uyo, yo taudehadeha wasa namwanamwana se lapui. ²³ Na kaiteya nige ye nuwalabulabuiyeigau, iya gonowana ye gwauyala!"

²⁴ Yowane yona tautauwasa wa se dalahai, na kabo Yesu ye hetubu Yowane hedehedena ye hedehededei boda wa udiyedi, ye wane, "Ginauli saha hesabana kwa lau balabala ne unai bena kwa kita? Nuwana didiyali yaumai ye yuhisaei yo ye yuhidobiyei? Nige! ²⁵ O yomi nuwatu bena tamowai hesau yona kaleko wasawasadi

** **7:6:** Nige ya namwa na bena ku laoma yogu numaena: Iyala taubagunaena tamowaina wa, iya nige Dius tamowaina, na Dius yodi lauhe'a'a kabikabidi kabidi ye kata. Yodi laugagayo hesau ede, ena Dius tamowaina ye lulau dagela tamowaina yona numa unai, kabo ye biki. Na hekasisidi debanaena ede ye hedede, nige ya namwa bena ku laoma kaliguwai.

kwa kita? Nige! Na tamowai kadi leli didididigadi yo nonohana unai se miyamiya, siya meta wasawasa yodi numa udiyedi. ²⁶ O nuwana kwa lau bena peloweta hesau kwa kita? Mamohoi, Yowane iya peloweta hesau. Na ya hededelaowa meta ye saekalili na kabo peloweta hekadiyo. ²⁷ Yowane iya tamowaina ede kulikuli tabuna unai se hetahetala se wane,

‘Kabo yogu tautauwasa ya hetamali bena ye kedabagunaego.

Iya kabo yom keda ye kabinonohai.’

(Malakai 3:1)

²⁸ Na ya hededelaowa kalimiuyena: Tamowai tanoubu ta unai se labasi meta nige hesau ye saekalili na kabo Yowane. Iyamo Yaubada yona basileiya unai, tamowai hesau, ena ye dobikalili, meta tamowaina ne ye sae na kabo Yowane.”

²⁹ Huyana tamowai mauidi yo hinage takisi tautanotano Yesu yona hedehedede se lapui, ede se hedede meta Yaubada yona hineli se dudulaikalili, matawuwuna siya meta Yowane yona babatizo se haiyako. ³⁰ Na Paliseya yo laugagayo taulauhekataena Yaubada yona nuwanuwatu siya hesabadi wa se laukwatakwataei, matawuwuna nige Yowane unai babatizo se hai.

³¹ [*Kabo Yesu ye hedehedede'uyo ye wane,*] “Teina isi ta tamowaidiyao kabo saha unai ya heyaheyasoniyedi? Kadi kao kabo doha saha? ³² Siya doha wawayao, kabaloku-lokune bakubakuna unai se tuli na se yogayogalau kadi kahao udiyedi se wane,

‘Higo ka yuhidi,

na nige kwa sobu.

Siyayau wanadi ka wanai,

na nige kwa dou.’

³³ Yowane Babatizo ye laoma ye kaihudi yo nige waina ye numanuma na kwa hedede bena yaluwa yabayababana iya unai. ³⁴ Na Tau Natuna ye laoma meta ye kaikai yo waina ye numanuma na kwa wane, ‘Sola kwa kita, ye kaimuyomuyou yo ye numayauyaule! Yo iya takisi tautanotano yo yababa tamowaidiyao kadi kaha!’ ³⁵ Na Yaubada yona sibasiba ye dudulaikalili. Kabakitalobaina ede taulauwatanina yodi miyamiya udiyedi.”

Yababa waihiuna Yesu ye heyausi

³⁶ Paliseya tamowaina hesau Yesu ye yogaisini bena maiyana se kaikaigogoi. Ede Yesu ye lau tamowai wa yona numa unai ye mwalae na ye kenodobi kabakaikai hatana unai bena ye kaikai.

³⁷ Magai ne unai meta waihiu hesau mauli yabayababana unai ye miyamiya. Na wasa ye lapui meta Yesu Paliseya tamowaina wa yona numa unai ye kaikai, ede yausi panepanena botolona** ye baheiyama. ³⁸ Ye mwalaesae na ye tolo Yesu kaena dedekadi udiyedi na ye doudou. Matasuluna se dididobi na Yesu kaena se heduwabwadi, na waihiu wa kuluna ne unai Yesu kaena wa ye saudi yo ye sumtaidi, na yausi wa unai ye heyausidi.

³⁹ Paliseya tamowaina Yesu tauyogaisinina laulau wa ye kita ede ye bom yona ye hedehedede ye wane, “Ena teina tamowai ta iya peloweta, kabo kabina ye kata meta tauskabitonogina ne iya kaiteya yo waihiu sahasahana. Iya meta waihiu yababana!”

⁴⁰ Na Yesu ye hededelau unai ye wane, “Simona, ya henuwa bena ginauli hesau ya hedede kalimyena.”

Ye talam ye wane, “Taulauhekata, yogu ku hedehedede.”

⁴¹ Na Yesu ye wane, “Tamowai labui se kaihagahaga tamowai monimonina hesau unai. Hesau kana hagahaga meta denali 500, na hesau 50. ⁴² Taudi labui nige gonowadi moni wa se hedudulai'uyoidi, ede moni tanuwagana kadi hagahaga wa ye nuwatu-gabaeidi. Na yodi labui ne, kaiteya kabo moni tanuwagana wa ye gadosisikaliliyei?”

** 7:37: Botolona ne weku alabasata unai se tadi.

⁴³ Na Simona ye hededebeui ye wane, “Ya nuwatui meta kaiteya kana hagahaga ye lakikalili ne ye nuwatugabaei.”

Yesu ye wane, “Yom nuwatu ne ye dudulai.”

⁴⁴ Na kabo ye kaikewabui waihiu wa unai na ye hededelau Simona unai ye wane, “Waihiu ta ku kita? Huyana ya mwalaema yom numa ta unai meta nige waila ku haiyama kaegu kabadeulidi. Na iya matasuluna udiyedi kaegu ye deulidi yo kuluna unai ye saudi. ⁴⁵ Kowa nige sumta unai ku lautokiyeigau, na iya kaegu sumtaidi nige ye hekaiyawasi yogu mwalaesaema ta unai. ⁴⁶ Kowa nige kulugu ku heyausi, na iya kaegu ye heyausidi yausi panapanena unai. ⁴⁷ Unai ya hededelaowa: Yona yababa se badokalili na ya nuwatugabaeidiko, unai ede ye gadosisikaliliyeigau. Na kaiteya yona yababa gagilina ya nuwatugabaei meta yona gadosisi kaliguwai ne ye gagili.”

⁴⁸ Kabo ye hededelau waihiu wa unai ye wane, “Yom yababa ya nuwatugabaeidi.”

⁴⁹ Taukaikai hekadiyo se hetubu se bom yodi se hedehedede se wane, “Teina tamowai ta meta kaiteya na yababa ye nuwatugabaedi?”

⁵⁰ Na Yesu ye hededelau waihiu wa unai ye wane, “Yom sunuma ye hemauligo. Ku lau ma nuwadaumwalim.”

8

Waiwaihiuwo Yesu se sagui

¹ Mulina ne unai Yesu ye lau magai lakilakidi yo gagilidi udiyedi na Yaubada yona basileiya wasana namwanamwana ye laulauguguyai. Yona hekahekatao saudoudoi-labui wa maiyanao, ² yo hinage sinesineo hekadi yaluwa yabayababadi yo kasiyebwa udiyedi ye henamwanamwadi wa: Maliya, iya se katai Magadala** waihiuna, na unai meta yaluwa yabayababadi badodi haligigi-labui Yesu ye hededehepesadi, ³ yo Yowana, iya ede Heloda yona numa taukitahetetena hesana Kusa mwanena, yo Susana, yo sinesineo hekadi hinage. Siya meta se bom yodi gogo se hepaisowadi na Yesu maiyana hekahekatao wa se saguidi.

Bwatano udoi'udoi heyaheyasonidi

(Mataiyo 13:1-9, Maleko 4:1-9)

⁴ Bodalakilaki se lageko na magai udoi'udoi udiyedi tamowai hekadiyo sola se laolaoma Yesu unai, na heyaheyasoni ta ye hedede, ⁵ ye wane, “Koya taupaisowaina hesau ye lau yona koyaena witi likena tumadiyao ye hesuludi. Na hekadi se bekudobi kedaena. Tamowai yodi kabalau udiyedi se lau ede se utu'utuidi, yo manawa se laoma se kaidi. ⁶ Like hekadi tano maladebadebana unai se talu na se kini. Iyamo se wowoya, matawuwuna bwatano ne ye pitalikalili. ⁷ Like hekadi se bekudobi maimaina gwaligwalidi luwadiyena. Se kinilabulabui na maimaina wa se yahaidi. ⁸ Na hekadi se bekudobi bwatano namwanamwana unai. Se kinilakilaki na se kaniyo, meta kewa kesega unai kaniyona badodi 100.”

Na Yesu yona hedehedede gehena unai ye wane, “Kaiteyadi gonowana se lapulapui bena se lapulapuinamwanamwa!”

Matawuwuna saha to Yesu heyaheyasoni mo udiyedi ye laulahekata

(Mataiyo 13:10-17, Maleko 4:10-12)

⁹ Yesu yona hekahekatao wa se henamaiyei meta heyaheyasoni wa kaniyona ede saha. ¹⁰ Na ye hededebeui udiyedi ye wane, “Yaubada yona basileiya nuwanuwatuna saesaedi kabo ya hededehemasalahadi kalimiuyena. Na tamowai hekadiyo ya hededelau udiyedi meta heyaheyasoni mo udiyedi, unai kabo 'se kaikaikewa, na taba nige se kitalobai,

yo se lapulapui, na taba nige se nuwatulobai.’

(Aisaiya 6:9)

** 8:2: Magadala meta magai hesau Galili Gabwana dedekanaena.

*Bwatano heyaheyasonidi kaniyona
(Mataiyo 13:18-23, Maleko 4:13-20)*

¹¹ Heyaheyasoni wa kaniyona ede teina: Like kaniyona ede Yaubada wasana. ¹² Tamowai hekadi nuwadi kadi kao doha keda. Wasa wa se lapui, na kabo diyabolo ye laoma na nuwadi wa unai ye haigabaei, bena tabu se kawamamohoi yo Yaubada ye hemauidi. ¹³ Tamowai hekadi nuwadi kadi kao doha tano maladebadebana. Huyana Yaubada wasana se lapui meta se hai ma gwaugwauyaladi, na iyamo hedehedede wa nige ye miya nuwadi ne unai, matawuwuna nige lamna. Huyakubwakubwa mo Yaubada se sunumaei, na huyana laukita se hekalo meta se beku. ¹⁴ Tamowai hekadi nuwadi kadi kao doha tano maimaina gwaligwalidi luwadiyena. Wasa wa se lapui, na kabo tanoubu maolina nuwanuwatuna yo tanoubu gwauyalana yo gogona meta wasa wa se taugudugudui, na nige gonowana ye kaniyo. ¹⁵ Na tamowai hekadi nuwadi kadi kao doha bwatano namwanamwana, siya ede tamowai namwanamwadi yo nuwadi mamohoidi. Hedehedede wa se lapui na nuwadi udiyedi se toledi na se tolokesegai ma taubigadi na kabo se kaniyo.”

*Lampa heyaheyasonina
(Maleko 4:21-25)*

¹⁶ [Kabo Yesu heyaheyasoni hesau ye hedede ye wane,] “Tamowai lampa se gabu meta taba nige walata unai se buikasini o kabakeno guninaena se tole. Bena lampa kabatolena unai se tole, to tamowai se mwalai kabo gonowana dawayana se kita. ¹⁷ Gonogonowana doha hinage Yaubada yona basileiya ginaulina wadawadamdi maudoidi kabo ye hemasalahadi, yo ginauli maudoidi toletolewadamdi wa kabo hinage ye tolehemasalahadi. ¹⁸ Unai bena kwa kitanamwanamwa yomi lapulapui udiyedi, matawuwuna kaiteyadi nuwatulobai saha kalidiyena, Yaubada yodi nuwatulobai ne kabo ye helaki'uyoidi. Na kaiteyadi se nuwatui bena nuwatulobai kalidiyena, na iyamo nige, Yaubada kabo yodi nuwatulobai gagilina ne ye haigabaei.”

*Yesu sinana yo kana kahao mamohoidi
(Mataiyo 12:46-50, Maleko 3:31-35)*

¹⁹ Yesu sinana yo kana kahao se laoma bena se kita, na nige gonowana se lau unai matawuwuna boda ye lakikalili. ²⁰ Ede tamowai hesau ye hededelau Yesu unai ye wane, “Sinam yo kam kahao ede dagela ne unai se totolo bena se kitago.” ²¹ Na Yesu ye hededebui ye wane, “Sinagu yo kagu kahao ede kaiteyadi Yaubada yona hedehedede se lapui yo se lauwatani.”

*Yesu wowoli ye hededehekaiyawasi
(Mataiyo 8:23-27, Maleko 4:35-41)*

²² Mayadai hesau unai Yesu ye hededelau yona hekahekatao udiyedi ye wane, “Ta kawasilau hali sanakawasi ne unai.” Ede wagaena se gelu na se hetubu se kawasi. ²³ Yodi kadau ne unai Yesu ye kenodobi ede ye keno. Na kabo yaumai bayabayaona ye yuhidobima Galili Gabwana unai. Na bagodu se ini'inidikwa waga wa unai na yababa lakilakina se hekalo. ²⁴ Hekahekatao wa se lau Yesu se hanoi na se wane, “Tanuwaga! Tanuwaga! Nige bayaona kabo ta yoli!”

Kabo Yesu ye tolo na ye hededelau yaumai yo bagodu wa udiyedi meta se kaiyawasi, ede ye daumwali. ²⁵ Na kabo ye hedehedelau yona hekahekatao wa udiyedi ye wane, “Yomi sunuma, o nige?” Na se matausi yo se nokokalili na se bom se henahenamai'uyoidi se wane, “Teina tamowai ta meta kaiteya? Ye hededelau yaumai yo bagodu udiyedi na se kawakabiyei.”

*Gelasa tehana unai Yesu yaluwa yabayababana ye hededehepesa
(Mataiyo 8:28-34, Maleko 5:1-20)*

²⁶ Yesu maiyana hekahekatao Galili Gabwana unai se kawasilau Gelasa** tehana unai, iya ede Galili tanona teha kwasina ne unai. ²⁷ Huyana Yesu waga wa ye pesagabaei na ye gayosae nagali wa unai meta magari wa tamowaina hesau ye laoma iya unai. Tamowai wa meta yaluwa yabayababadi se luwui na huyalohaloha meta ma taugaibuna yo nige numaena ye miyamiya, na bwayabwaya duhadi udiyedi. ²⁸ Huyana Yesu ye kita meta ye dou na ye gulidobi kaena wa unai na kalinalakilaki unai ye hedehehede ye wane, “Yesu, Yaubada Saesaekalilina natuna, saha ku henuwa kaliguyena? Ya kaibwadaigo, tabu ku hekamkamnagau.” ²⁹ Hedehehede ta ye hedehehede matawuwuna Yesu ye hedehehede yaluwa bikibikina ne unai bena ye pesa. Yaluwa ne kana paisowa huya badobado meta tamowai wa ye tanutanuwagai, kabo nimana yo kaena seni unai se paipaihekahekahinidi na se kitahetete, iyamo seni wa ye utusidi na yaluwa yabayababana iya ye woyawoyai ye lau balabalagaibuyena.

³⁰ Yesu ye henamaiyei ye wane, “Hesam ede saha?” Na ye wane, “Hesagu ede Legiyona.”** Matawuwuna yaluwa yabayababadi meta se badokalili se luwu iya unai. ³¹ Na yaluwa yabayababadi wa se kaikaibwadalau Yesu unai se wane, “Tabu ku hetamaligai ka laulau ebisi unai.”

³² Na puwaka yawoina meta se dumudumuli kuduli dedekana ne unai. Ede yaluwa yabayababadi wa se kaibwadalau Yesu unai bena taba ye hetamalidi se lau udiyedi se luwu, na ye talamyeyidi. ³³ Na yaluwa yabayababadi tamowai wa se pesagabaei ede se lau se luwu puwaka wa udiyedi, na maudoidi padipadi wa unai se heloigogoi se dobi ede gabwa wa unai se yoli.

³⁴ Huyana puwaka taukitakitahetetededi saha ye tubu wa se kita meta se wasabu se lau magari lakilakina yo magari gagilidi dedekanawai na tamowaidiyao yodi se hedehehede. ³⁵ Na tamowai wa se lau saha ye tubu wa bena se kita. Se laoma se lage Yesu unai meta tamowai yaluwa yabayababadi se pesagabaei'usei wa se kita Yesu kaena dedekana unai ye tutuli ma kalekalekona, yo yona nuwanuwatu se dudulai. Na maudoidi wa se matausi. ³⁶ Ginauli maudoidi taukitadi meta tamowai yodi se hedehehede idohagi na ye namwanamwa. ³⁷ Kabo Gelasa tehana ne unai taumiya maudoidi se hedehehede Yesu unai taba ye laugabaedi, matawuwuna se matausikalili. Ede Yesu wagaena ye gelu na ye dalahai.

³⁸ Tamowai yaluwa yabayababadi se pesagabaei wa ye kaibwada Yesu unai bena maiyana se lau. Na Yesu iya ye hetamali, ye wane, ³⁹ “Ku uyo yom magari na saha Yaubada ye ginauli kalimyena wa ku hedehehemasalahan.” Ede tamowai wa ye lau magari na saha Yesu ye ginauli iya unai wa ye hewasa tamowai maudoidi udiyedi.

*Yailo natuna yo sinebada kasikasiyebwana wasadi
(Mataiyo 9:18-26, Maleko 5:21-43)*

⁴⁰ Huyana Yesu ye uyo Galili tehana unai ye lage meta boda se hailobai, matawuwuna maudoidi wa iya se nayanayai. ⁴¹ Na kabo tamowai hesau hesana Yailo ye laoma. Iya sunago badana hesau. Ye gulidobi Yesu talanuwana na ye kaibwada bena maiyana se lau yona numa, ⁴² matawuwuna natuna waihiu kesega mo, yona bolimai 12, iya meta sabi boitana.

Na Yesu yona lau ne unai meta boda ye lakikalili na se haihaiyahiyahi'uyoidi Yesu unai. ⁴³ Luwadi ne unai sinebada hesau ye kasiyebwa bolimai 12, kwasina ye miyamiyagabaei, na nige tamowai hesau gonowana kabo ye henamwanamwa.**

** **8:26:** Gelasa: Kulikuli beyabeyadi hekadi hesa udoi se kuli, iya ede Gadala (doha Mataiyo 8:28 unai). Gadala yo Gelasa magaidi meta Galili Gabwana teha yawana unai, Gadala gabwa dedekanaena, na Gelasa kedalohe.

** **8:30:** Legiyona meta Loma yodi tau'iyala bodana lakina, meta tatao 6,000, na inai kaniyona ede bodalakilaki.

** **8:43:** Nige tamowai hesau gonowana kabo ye henamwanamwa: Kulikuli beyabeyadi hekadi hedehehede hesau se kuli'uyoi se wane, Yona gogo maudoidi ye gabaeidi doketa udiyedi na nige tamowai hesau gonowana kabo ye henamwanamwa.

⁴⁴ Yesu dagelana wa unai ye saema na kana kwama sinosinona ye kabitonogi. Mahanana ne unai kana kasiyebwa wa ye namwanamwa. ⁴⁵ Ede Yesu ye henamai ye wane, “Kaiteya ye kabitonogigau?” Maudoidi se uhala. Na Petelo ye wane, “Tanuwaga, tamowai maudoidi meta se hetakikiligo na se kaiyahiyahi.” ⁴⁶ Na Yesu ye wane, “Tamowai hesau ye kabitonogigau, matawuwuna kamnana ya hai meta gigibwali ye pesagabaegau.” ⁴⁷ Na sinebada wa ye nuwatui meta Yesu kabo kabina ye kata, ede ye sae ma tabutabubuna na ye gulidobi Yesu talanuwana wa unai. Na boda maudoidi matadiyena ye hededehehemasalaha'uyoi, matawuwuna saha to Yesu kana kwama ye kabitonogi, yo idohagi na kana kasiyebwa wa ye namwanamwa. ⁴⁸ Kabo Yesu ye hededelau unai ye wane, “Natugu, yom sunuma ta ye henamwanamwago. Ku lau ma nuwadaumwalim.”

⁴⁹ Yesu sola ma hedehededena na sunago badana wa yona numa unai tamowai hesau ye laoma ede ye hededelau unai ye wane, “Natum waihiu wa ye boitako, na tabu taulauhekata ne ku hemohemode.” ⁵⁰ Na Yesu hedehedede wa ye lapui ede ye hededelau Yailo unai ye wane, “Tabu ku matausi, na ku kawamamohoiyeigau, na kabo natum ne ye namwanamwa.”

⁵¹ Huyana se lage numa wa unai, Yesu nige ye henuwa bena tamowai hesau maiyana se mwala, na Petelo, Yowane, Yamesi, yo sinekuku wa tamana yo sinana mo. ⁵² Boda temenai meta se doudou yo se nuwanuwadubu wawaya wa hesabana. Na Yesu ye wane, “Tabu kwa doudou! Wawaya ne nige ye boita, na ye kenokeno.” ⁵³ Ede boda wa Yesu se talawasiyei, matawuwuna kabina se kata meta sinekuku ne ye boitako. ⁵⁴ Na Yesu sinekuku wa nimana unai ye kabi na ye hededelau unai ye wane, “Natugu, ku tolo!” ⁵⁵ Ede yawasina ye uyoma na ye tolo. Na Yesu ye hededelau udiyedi bena kai se mosei ye kai. ⁵⁶ Tamana yo sinana wa se siliyata. Na Yesu ye hededelau udiyedi meta saha ye tubu wa tabu tamowai hesau yona se hedehedede.

9

Yesu yona hekahekatao badodi 12 ye hetamalidi (Mataiyo 10:5-15, Maleko 6:7-13)

¹ Yesu yona hekahekatao badodi 12 wa ye yogagogoidima na bayao yo gigibwali ye moseidi bena kabo yaluwa yabayababadi maudoidi se hededehepesadi yo kasiyebwa maudoidi se henamwanamwadi. ² Na ye hetamalidi se lau bena Yaubada yona basileiya wasana se duwai yo taukasikasiyebwa se henamwanamwadi, ³ na ye guguyaidi ye wane, “Yomi lau ne unai tabu saha hesau kwa bahei, nige tuke, nige tobwa, nige moni, nige kai, yo nige lulu hagahagana. ⁴ Ena numa hesau unai kwa mwalaesae meta numa me unai kwa miya ye lau ee kana siga magari me kwa laugabaei. ⁵ Na ena magari hesau tamowaidiyao nige se yogaisinigomiu, magari me kwa laugabaei na kaemiu mukalidi kwa koinihinihiyedi, ye hemala yodi kabakitalobai meta Yaubada kabo ye hekamkamnadi.” ⁶ Ede hekahekatao wa se dalahai se lau magari kesega kesega udiyedi wasa namwanamwana se duwai yo taukasikasiyebwa se henamwanamwadi.

Heloda yona nuwapwanopwano (Mataiyo 14:1-12, Maleko 6:14-29)

⁷ Heloda [*Antipasi*], iya Galili yodi wasawasa, ginauli maudoidi se tubutubu wa wasadi ye lapuidi meta ye nuwapwanopwanokalili, matawuwuna tamowai hekadi se hedede bena Yowane Babatiso boita unai ye tolo'uyo, ⁸ na hekadi se hedede meta Eliya ye taumasalaha, yo hekadiyo yodi nuwatu bena nabada wa unai peloweta hesau ye tolo'uyo. ⁹ Na Heloda ye hedede ye wane, “Yowane Babatiso gadona ya boli'utusiyo, na teina tamowai ta meta kaiteya, wasana ya lapulapui ta?” Na ye henuwakalili bena Yesu ye kita.

*Yesu tatao badodi 5,000 ye hekaidi
(Mataiyo 14:13-21, Maleko 6:30-44, Yowane 6:1-14)*

¹⁰ Apostolo wa se uyoma na yodi paisowa maudoina wasana Yesu yona se hedehede. Kabo ye woyaidi se lau magari hesau hesana Betesaida, bena se bom mo menai se miyasuwala. ¹¹ Na yodi kabalau wasana wa boda se lapui ede se hemuliwatanidi. Yesu ye kitadi ede ye yogagogoidima na Yaubada yona basileiya wasana yodi ye hedehede, yo kaiteyadi se kasiyebwa meta ye henamwanamwadi.

¹² Na mahana wa ye hetubu bena ye dui ede yona hekahekatao 12 wa se laoma iya unai se wane, “Tamowai ta ku hetamalidi se lau kasa dedeka ta udiyedi yo magari hekadiyo udiyedi na kai yo kabakeno se wase, matawuwuna kita balabalagaibuyena.”

¹³ Na Yesu ye hededelau udiyedi ye wane, “Komiu kai kwa moseidi se kai.” Na se wane, “Kalimaiyena meta pwalawa haligigi yo yama labui mo. Na ku henuwa bena ka lau kai ka hemaisadi boda ta hesabadi?” ¹⁴ Boda ne meta loheloheyao nuwana badodi 5,000.** Na Yesu ye hededelau yona hekahekatao udiyedi ye wane, “Kwa hededelau udiyedi se tuligogoi, boda kesega kesega luwadi ne unai badodiyao 50.” ¹⁵ Hekahekatao wa yona hedehede wa se ginauliwanani ede maudoidi se tuli. ¹⁶ Na Yesu pwalawa haligigi yo yama labui wa ye haidi na ye kaikewasae galewa ne, na Yaubada ye lautokiyei. Na kabo ye kihidi na ye moseidi yona hekahekatao wa udiyedi, na se moselaeidi boda wa udiyedi. ¹⁷ Maudoidi se kaikai meta bogadi se sese. Na hekahekatao kaitole wa se tanogogoi, meta bosa badona 12.

*Petelo ye hedehemasalaha meta Yesu iya kaiteya
(Mataiyo 16:13-19, Maleko 8:27-29, Yowane 6:67-69)*

¹⁸ Huya hesau Yesu ye tapwatapwalolo na yona hekahekatao se bom mo maiyanao, na ye henamaiyeidi ye wane, “Tamowai se hedede meta yau kaiteya?”

¹⁹ Se wane, “Hekadi se hedede meta kowa Yowane Babatiso, hekadi se hedede bena kowa Eliya, yo hekadiyo se wane, nuwana nabada wa unai peloweta hesau boita unai ye tolo'uyoma.”

²⁰ Na kabo Yesu ye henamaiyeidi ye wane, “Na komiu? Kwa hedede meta yau kaiteya!”

Kalinana wa Petelo ye bui ye wane, “Kowa Keliso, Yaubada yona kaisunuwa tamowaina!”

²¹ Na Yesu hedehede bayabayaona ye moseidi bena tabu tamowai hesau yona se hedehede.

*Yesu yona kamkamna yo yona boita hedehedena
(Mataiyo 16:21-23, Maleko 8:30-31)*

²² Na hinage ye hedehedelau yona hekahekatao wa udiyedi ye wane, “Tau Natuna kabo ye kamkamna kabikabi udoi'udo'i udiyedi. Dius babadadiyao yo taukitalasam tauwoyaidi yo laugagayo taulauhekataena kabo se subu, yo se unuhemwaloi, na mayadai hehaiyonana unai kabo Yaubada iya ye hetolo'uyoi.”

*Yesu idohagi hemuhemuliwatanina
(Mataiyo 16:24-28, Maleko 8:34–9:1)*

²³ Na kabo ye hedehedelau boda maudoidi wa udiyedi ye wane, “Ena kaiteya ye henuwa ye hemuliwatanigau, meta iya bena ye bom ye nuwagabae'uyoi yo mayadai badobado yona sataulo ye bahei** na ye hemuliwatanigau. ²⁴ Matawuwuna kaiteya ye henuwa bena ye bom yona mauli tanoubu ta unai ye kitahetete, meta kabo yona mauli nige kana siga ne ye kabisapuli. Na kaiteya yona mauli tanoubu ta unai ye

** **9:14:** Loheloheyao nuwana badodi 5,000: Sinesineo yo wawayao nige se hasilidi. ** **9:23:** Yona sataulo ye bahei: Hedehede ta kaniyona meta bena ye talamgabae'uyoi gonowana Yesu debanaena ye boita.

nuwagabaei yau debaguyena, iya kabo yona mauli nige kana siga ne ye kabihekahini ede. ²⁵ Kaniyona ede, ena tamowai hesau tanoubu ta yona namwa maudoina ye hai, na unai ye bom ye heyababa'uyoi o yona mauli ye gabagaibui, meta ginauli maudoidi ne udiyedi nige gonowana sagu ye lobai. ²⁶ Ena kaiteya ye mwadineigau yo yogu hedehedede ye mwadineidi, meta hinage Tau Natuna kabo iya ye mwadinei yona huya'uyoma ne unai. Huyana ne unai kabo ye laoma ye bom yona didiga yo tamana yo anelu tabudi yodi didiga udiyedi. ²⁷ Ya hededemamohoi kalimiuyena: Tamowai hekadiyo inai se totolo ta meta taba nige se boita ye lau ee Yaubada yona basileiya se kita.”

*Yaubada Yesu yona didiga ye hemasalaha
(Mataiyo 17:1-8, Maleko 9:2-8)*

²⁸ Hedehedede wa mulidiyena mayadai haligigi-haiyona se lau, na kabo Petelo, Yowane, yo Yamesi, Yesu ye woyaidi se sae kuduli hesau unai bena menai ye tapwalolo. ²⁹ Huyana Yesu ye tapwatapwalolo meta kana kao ye bui, na yona kaleko se buidi se posi yo se sidosidoli. ³⁰⁻³¹ Na tamowai labui, siya ede Mose yo Eliya, ma didididigadi se taumasalaha na Yesu maiyadi se hedehedede. Na Yesu tanoubu yona laugabaeina hedehededena se hedehededei, iya ede Yesu kabo ye hemamohoiyei Yelusalema unai.

³² Petelo ma kana kahao wa matadiyao se kenokenokalili. Na se kenotolo'uyo meta Yesu ma didigana se kita, yo tatao labui maiyanao se totolo. ³³ Tatao wa se daladalalahai na Petelo ye hededelau Yesu unai ye wane, “Guiyau, ye namwa mo taba inai ta babawa. Taba logulogu haiyona ka ginaulidi, hesau yom, hesau Mose yona, yo hesau Eliya yona.” Na iyamo nige kabina ye kata saha ye hedehededei.

³⁴ Sola ma hedehededena na yada ye laoma na ye sumadi, ede se matausi. ³⁵ Na yada ne unai kalina hesau ye masalaha ye wane, “Teina yau Natugu, yogu kaisunuwa tamowaina. Kwa lapulau iya unai!” ³⁶ Kalina wa ye kaiyawasi, na mahanana ne unai meta Yesu ye bom mo se kita. Na mayadaidi ne udiyedi hekahekatao haiyona saha se kita wa nige se hededehehemasalaha tamowai hesau unai.

*Yesu wawaya loheya ye henamwanamwa
(Mataiyo 17:14-21, Maleko 9:14-29)*

³⁷ Mala ye tom na Yesu yona hekahekatao haiyona wa maiyanao kuduli wa unai se lidi se dobi ede bodalakilaki se lobaidi. ³⁸ Boda wa luwadi ne unai tamowai hesau ye yogalau Yesu unai ye wane, “Taulauhekata, ya kaibwadaigo bena natugu loheya ta ku kita! Iya natugu kesega mo. ³⁹ Yaluwa hesau kana paisowa iya ye luwui na ye yogahi, yo ye kikikiwasi na kawana ne unai gwasapulo se pesapesa. Yaluwa yabayababana wa wawaya ne nige ye laulaugabaei na ye hekamkamnakaliliyei. ⁴⁰ Yom hekahekatao ya kaibwadaidi bena se hededehepesa, na nige gonowadi.” ⁴¹ Yesu ye wane, “Komiu isi ta meta nige yomi sunuma, yo nuwatu yabayababadi tamowaidiyao. Kabo ya miya'uyo lohana doha saha kalimiuyena? Kwa kamnayabayababa! Na natum me ku woyaiyama!”

⁴² Loheya wa ye laolaoma na yaluwa bikibikina iya ye tuudobiyei bwatano wa unai na ye kikikiwasi. Yesu ye hededeabayao yaluwa bikibikina wa unai na loheya wa ye henamwanamwa na ye mosei'uyoi tamana unai. ^{43a} Na boda maudoidi wa se nokokalili Yaubada yona gigibwali saesaena wa unai.

*Yesu yona boita hedehededena helabuina
(Mataiyo 17:22-23, Maleko 9:30-32)*

^{43b} Tamowai wa sola ma nokonokodi Yesu yona laulau maudoidi udiyedi, na Yesu ye hededelau yona hekahekatao udiyedi ye wane, ⁴⁴ “Yogu hedehedede ta kwa lapunamwanamwaedi: Tamowai hesau kabo Tau Natuna kana ye walohai na ye mose-laei tamowai nimadiwai.” ⁴⁵ Na hedehedede wa kaniyona nige se nuwatulobai,

matawuwuna Yaubada ye tolewadam kalidiyena, na tabu se nuwatulobai. Na se matausi, ede nige se henamaiyei.

Kaiteya ye saekalili?

(Mataiyo 18:1-5, Maleko 9:33-37)

⁴⁶ Huya hesau Yesu yona hekahekatao se bom se haihaikawayagala'uyoidi, matawuwuna ede luwadi ne unai kaiteya ye saekalili. ⁴⁷ Na yodi nuwanuwatu wa Yesu kabidi ye katako, ede wawaya hesau ye hai na dedekana wa unai ye hetolo. ⁴⁸ Na ye hededelau udiyedi ye wane, “Ena kaiteya wawaya gagilina ta ye yogaisini yau debaguyena, meta yau ye yogaisinigau. Yo kaiteya ye yogaisinigau, meta hinage tauhetamaligau ye yogaisini. Luwamiu ne unai kaiteya se kitadobidobiyei, meta iya ye saekalili Yaubada matanawai.”

Kaiteya nige ye gudugudu meta iya kada kaha hesau

(Maleko 9:38-40)

⁴⁹ Yowane ye hedehedede ye wane, “Tanuwaga, tamowai hesau ka kita hesamyena yaluwa yabayabadi ye hededehepesadi, na ka hededehekaiyawasi, matawuwuna iya nige kada kaha hesau kada boda ta unai.” ⁵⁰ Na Yesu ye wane, “Tabu kwa hededehekaiyawasi, matawuwuna ena kaiteya nige ye haikabi kalimiuyena, meta iya tausaguigomiu hesau.”

Samaliya magaina hesau unai Yesu se subu

⁵¹ Yesu yona sae galewa mayadaina ye hanahanau ede nuwana ye tolekesegai na ye dalahai ye lau Yelusalema. ⁵² Na tautauwasa hekadiyo ye hetamalidi se baguna se lau Samaliya magaina hesau unai bena ginauli maudoidi se nonohaidi iya hesabana. ⁵³ Na magari wa tamowaidi Yesu nige se yogaisini, matawuwuna ye laulau Yelusalema hesabana. ⁵⁴ Yona hekahekatao Yamesi yo Yowane saha ye tubu wa se kita ede Yesu se henamaiyei se wane, “Guiyau, ku henuwa bena ka yogasae galewa ne unai kaiwa kalakalasina ye dobima ye heyababadi?” ⁵⁵ Na Yesu ye tolobui ede ye hededebayao kalidiyena na ye hekaiyawasidi, ^{**} ⁵⁶ na kabo se dalahai'uyo se lau magari hesau.

Kaiteya gonowana Yesu ye hemuliwatanani

(Mataiyo 8:19-22)

⁵⁷ Keda wa unai se laulau, na tamowai hesau ye hededelau Yesu unai ye wane, “Yom kabalau maudoidi udiyedi yau kabo ya hemuliwatanigo.” ⁵⁸ Yesu ye hededebui ye wane, “Kedewa nukula yodi duha, yo hinage manuwa yodi noi, na Tau Natuna nige yona kabakaiyawasi mamohoina hesau.”

⁵⁹ Yesu ye hededelau tamowai hesau unai ye wane, “Ku hemuliwatanigau!” Na tamowai wa ye wane, “Guiyau, taba gonowana ya uyo magari na tamagu toletoletauna ya kitabagunai.” ⁶⁰ Na Yesu ye wane, “Kaiteyadi se boitako meta siya bena kehadi tauboita ne se lae bwayabwaya unai se tole, ^{**} na ku lau Yaubada yona basileiya wasana ku hededehemasalaha.”

⁶¹ Yo hinage tamowai hesau ye wane, “Guiyau, kabo ya hemuliwatanigo, na taba ya uyo kagu bodao ya laukaiyoniyedi.” ⁶² Yesu ye hededebui unai ye wane, “Kaiteya ye hetubu ye paisowa na sola ye kitakitabui, meta nige gonowana Yaubada yona basileiya paisowana ye ginauli.”

^{**} **9:55:** Kulikuli beyabeyadi hisahisadi mo lausoisoi 55 yo 56 se kulitubei: Na Yesu ye tolobui ede ye hededebayao ye wane, “Idohagi, nige kabina kwa kata meta komiu kaiteya yaluwa natunao? ⁵⁶ Tau Natuna ye laoma nige bena tamowai ye heyababadi, na bena ye gilihaidi.” Na kabo se dalahai'uyo se lau magari hesau. ^{**} **9:60:** Kaiteyadi se boitako: Siya ede yaluwadiyena se boitako, kaniyona ede nige se modelau Yaubada unai yo Yesu nige se sunumaei. Kehadi tauboita ne meta bulumaena tauboita.

10

*Yesu yona tautauwasa badodi 72 ye hetamalidi
(Mataiyo 9:37-38, 10:7-16, 11:20-24, Maleko 6:7-13)*

¹ Mulina ne unai Guiyau tauhemuhemuliwatanina hekadiyo badodi 72 ye kaisunuwaidi na ye hetamalidi labui labui se bagunalau yona kabalau ne magaidiyao lakilakidi yo gagilidi udiyedi. ² Ye hededelau udiyedi ye wane, “Koya ye masulikalili, na taupaisowa meta nige se bado. Unai kwa kaibwadalau koya tanuwagana unai kabo taupaisowa ye hetamalidima. ³ Kwa lau, na bena kwa kitakitanamwanamwa! Ya hetamaligomiu ta kana kao doha mamoe se lau kedewa nukula kaikaikalasidi luwadiyena. ⁴ Tabu moni tobwana, yomi tobwa, yo kami buti kwa bahebaheidi, yo tabu mahana kwa gabagabai kedaena tamowai hailobaidi udiyedi. ⁵ Huyana kwa mwalaesae numa hesau unai meta yomi hedehehede bagubagunana kwa wane, ‘Taba Yaubada nuwadaumwali ye tole numa ta unai!’ ⁶ Ena numa me unai tamowai hesau nuwadaumwali ye henuwa, kabo nuwadaumwali kwa mosei wa ye miyamiya iya unai. Ena nige, meta nuwadaumwali ne kabo ye uyowa kalimiuyena. ⁷ Ena se yogaisinigomiu, meta numa ne unai kwa miya na saha se haiyawa meta kwa kai yo kwa numa. Matawuwuna taupaisowa yona dudulai ede taba yona paisowa maisana ye hai. Na tabu kwa lau numa hesau yo hesau unai. ⁸ Ena magari hesau unai kwa lage na se yogaisinigomiu na kai saha se haiyawa meta kwa kai. ⁹ Magaina ne unai taukasikasiyebwa kwa henamwanamwadi yo kwa hededelau udiyedi kwa wane, ‘Yaubada yona basileiya ye hanahanaumako kalimiuyena.’** ¹⁰ Na ena magari hesau unai kwa lage na nige se yogaisinigomiu meta kwa lau magari ne kedana unai na kwa wane, ¹¹ ‘Yomi magari mukalidi se kalapatu kaemaiyao udiyedi kabo ka saugabaedi,** ye hemala yomi kabakitalobai meta Yaubada kabo ye hekamkamnagomiu. Na iyamo bena kabina kwa kata meta Yaubada yona basileiya ye hanahanaumako.’ ¹² Ya hededelaowa kalimiuyena: Yaubada yona hekasa mayadaina ne unai taesubugomiu ne kabo ye hekamkamnakaliliyeidi, na kabo Sodoma tamowaidiyao.

¹³ Ahani mo komiu Kolasini tamowaidiyao! Ahani mo komiu Betesaida tamowaidiyao! Yababa lakilakina kabo kwa hekalolo! Laulau gigigigibwalidi ya ginaulidi kalimiuyena wa, taba ya ginaulidi magari yabayababadi Taiya yo Sidona udiyedi, meta tamowaidiyao kabo se nuwabuiko, na yodi nuwabui ta unai meta kabo nuwadubu kalekodiyo se luwuidi yo taudi maudoidi se hekahusadi. ¹⁴ Yaubada yona hekasa mayadaina ne unai kabo kwa kamkamnakalili na kabo Taiya yo Sidona. ¹⁵ Na komiu Kapelenauma tamowaidiyao, yomi nuwatu bena kabo Yaubada ye lausinigomiu kwa sae galewa? Taba nige! Kabo kwa dobi Hade unai.

¹⁶ Kaiteya ye lapulaowa kalimiuyena meta ye lapulaoma kaliguyena. Yo kaiteya ye subugomiu meta ye subugau. Na kaiteya ye subugau meta hinage tauhetamaligau ye subu.”

Tautauwasa wa se uyoma Yesu unai

¹⁷ Yesu tauhemuhemuliwatanina badodi 72 wa se uyoma ma gwaugwauyaladi, se wane, “Guiyau, huyana hesamyena ka hedehehede meta yaluwa yabayababadi hinage se kawakabiyegai.”

¹⁸ Kabo Yesu ye hededelau udiyedi ye wane, “Satani galewa ne unai ye bekudobima ya kita kana kao doha namanamali. ¹⁹ Kwa lapui, gigibwali ya haiyawa ede gonowana mwata yo gigidonadona kewadiyena kwa utu, yo hinage waiunu yona gigibwali maudoina kwa saedikwai. Na nige gonowana saha hesau ye heyababagomiu. ²⁰ Iyamo tabu

** **10:9:** Taukasikasiyebwa se henamwanamwa ne meta Yaubada yona basileiya hekihekinoina, matawuwuna teina Keliso kana paisowa (Luka 7:18-23). ** **10:11:** Magari mukalidi ka saugabaedi: Hededehehede masalahana ede mukali unai.

kwa gwauyala matawuwuna yaluwa yabayababadi se kawakabiyeigomiu. Na bena kwa gwauyala matawuwuna Yaubada hesamiyao ye kulidiko galewa ne unai!”

*Yesu yona lautoki tamana unai
(Mataiyo 11:25-27, 13:16-17)*

²¹ Tenem mahanana ne unai Yaluwa Tabuna Yesu ye hegwauyalaliliyei na ye hededelau tamana unai ye wane, “Tamagu, kowa galewa yo tanoubu Guiyauna, ya hedebasaego matawuwuna ginauli maudoidi wa** ku tolewadamdi na tausonoga yo tausibasiba nige gonowana se nuwatulobaidi. Na tamowai supusupudi** udiyedi ginauli ta ku tolehemasalahadi na se nuwatulobaidi. Mamohoi, tamagu, teina ta yom nuwatu mamohoina yo yom kabagwauyala ede.

²² Tamagu tanuwaga gigibwalina maudoina ye leyama kaliguwai, na iya ye bom mo natuna kana kao kabina ye kata, na natuna ye bom mo tamana kana kao kabina ye kata, yo kaiteyadi natuna ye kaisunuwaidi bena tamana kana kao ye hemasalah siya udiyedi.”

²³ Na Yesu ye tolobui yona hekahekatao udiyedi na se bom yodi ye hedehedede ye wane, “Komiu gonowana kwa gwauyala matawuwuna ginauli maudoidi ta kwa kitadi. ²⁴ Na ya hededelaowa kalimiuyena: [*Huya bagubagunana unai,*] peloweta yo wasawasa se badokalili ginauli saha kwa kitadi ta se henuwa bena se kitadi, yo saha kwa lapuidi ta hinage bena se lapuidi. Na iyamo siya nige gonowana se kitadi yo se lapuidi.”

Heleda taumiya tamowaina gadosisina

²⁵ Laugagayo taulauhekataena hesau ye henuwa bena Yesu ye lautonogi, ede ye henamaiyei ye wane, “Taulauhekata, taba saha ya ginauli, kabo mauli nige kana siga ya hai?”

²⁶ Yesu ye hededebui ye wane, “Laugagayo bukana unai saha se kuli? Yom nuwatu-lobaina kana kao doha saha?”

²⁷ Ede tamowai wa ye hededebui ye wane, “Kulikuli tabuna unai se kuliyako ede, ‘Guiyau yom Yaubada ku gadosisiyei ma nuwam maudoina, ma yaluwam maudoina, yom bayao maudoina yo yom nuwanuwatu maudoina unai’ *(Dutelonomi 6:5)*, yo hinage: ‘Kowa helem taumiya tamowaina ku gadosisiyei kana kao doha ku bom ku gadosisi’uyoigo.” *(Lewitikasi 19:18)*

²⁸ Yesu ye wane, “Ku hedededudulai, na teina laulau ta ku miyawatanidi, kabo mauli nige kana siga ku hai.”

²⁹ Na laugagayo taulauhekataena wa ye henuwa bena ye bom ye hededehesae'uyoi meta iya laulaududulai tamowaina, ede Yesu ye henamaiyei ye wane, “Helegu taumiya tamowaina ede kaiteya?”

³⁰ Yesu ye hededebui ye wane, “Huya hesau unai tamowai hesau Yelusalema unai ye dobidobi Yeliko na taukaiwahali se kabihekahini, yona kaleko se pulisihaidi, se biteliyababai na se laugabaei ye miyamiya sabi boitana. ³¹ Keda kesekesegana unai taukaitalasam hesau ye dobi na huyana tamowai wa ye kita meta ye kawasilau keda wa dedekana hesau unai ye lau. ³² Keda kesekesegana wa unai hinage Lewi tamowaina** hesau ye dobima ye lau na tamowai wa ye kita meta keda wa teha hesau ye hai na ye laugabaei. ³³ Na Samaliya tamowaina yona kabalauyena ye lage tamowai wa unai na ye kita meta ye katekamkamnaei. ³⁴ Ye lau unai, olibe yausina yo waina ye inidobiyedi kana gai wa udiyedi na ye sumadi. Na kabo tamowai wa ye hetulisaei yona donki unai na ye laei taukadau yodi kabakeno numana hesau na menai ye kitahetete. ³⁵ Mala ye

** **10:21:** Ginauli maudoidi wa, siya ede Yesu yona hedehedede lausoisoi 18-20 udiyedi. ** **10:21:** Tamowai supusupudi: Kalina Giliki unai Luka yona kulikuli kaniyona ede, tamowai supusupudi, o, nige se sikulunamwanamwa, o, nige sonoga tauhaina. ** **10:32:** Lewi tamowaina: Lewi kana isimulitao kadi paisowa meta siya taukaitalasam yodi tauhaiwawali.

tom ede denali labui ye haidi na ye moseidi numa wa taukitakitahetetena unai na ye wane, ‘Tamowai ta ku kitahetete na yom gabae saha iya unai, yogu uyoma ne unai kabo ya hedudulai.’ ”

³⁶ [Na Yesu laugagayo taulauhekataena wa ye henamaiyei ye wane,] “Yodi haiyona ta udiyedi meta kaiteya yona kabikabi taukaiboita ne unai doha iya helena taumiya tamowaina?”

³⁷ Laugagayo taulauhekataena wa ye wane, “Taukatekamkamnaena wa.”

Ede Yesu ye wane, “Ku lau na laulau gonogonowana ne ku ginauliwatani!”

Maleta yo Maliya yodi numa unai

³⁸ Yesu maiyana hekahekatao se dalahai se lau ee magari hesau unai se lage. Na sinebada hesau hesana Maleta Yesu ye yogaisini yona numa wa unai. ³⁹ Kana kaha hesana Maliya, iya ye tulidobi Guiyau kaena dedekanawai na ye lapulapulau yona hedehedede wa udiyedi. ⁴⁰ Maleta ye modekalili kana taumana wa kana kai kabinonohaina hesabana. Ede ye laoma Yesu unai ye wane, “Guiyau, idohagi to nige ku mode meta kagu kaha ye kitagabaegau na paisowa maudoidi ne ya bom ya ginaulidi? Ku hedede na ye laoma ye saguigau!”

⁴¹ Guiyau yona bui ye mosei ye wane, “Maleta, Maleta, kowa meta ku nuwanuwatu yo ku nuwamodemodekalili ginauli se badokalili udiyedi. ⁴² Na ginauli kesega mo ye saekalili ede Maliya ye kaisunuwai ta, na taba nige gonowana ya haigabaei kalinawai!”

11

Tapwalolo lauhekataena (Mataiyo 6:9-13, 7:7-11)

¹ Mayadai hesau Yesu ye tapwatapwalolo teha hesau unai. Huyana ye tapwalolo ye gehe ede yona hekahekatao wa hesau ye hededelau unai ye wane, “Guiyau, tapwalolo kabikabina ku hekatagai, gonogonowana doha Yowane yona hekahekatao ye hekatadi.”

² Na Yesu ye hededelau udiyedi ye wane, “Yomi huyatapwalolo unai meta kwa hedede kwa wane,

Tamamai,

Kowa hesam ka hededetausaei.

Yom basileiya bena ye laoma.

³ Mayadai kesega kesega kaina kamai ku ledima.

⁴ Yoma yababa ku nuwatugabaedi matawuwuna kai hinage tauheyababagai yodi yababa ka nuwatugabaedi.

Bena ku kitahetetegai na taba nige ka lulau noho luwanaena.”

⁵ Na Yesu yona hedehedede wa ye tubei ye wane, “Nuwana boniyai duwaduwalina unai na ku lau kam kaha yona numa unai na ku wane, ‘Kagu kaha, gonowana pwalawa tupi haiyona ku haidima? ⁶ Kehagu hesau yona kabakadau unai ye lagema yogu numaena, na nige kai hesau kaliguyena kabo ya mosei.’ ⁷ Nuwana kabo numa kalona unai kam kaha ne ye hededebui ye wane, ‘Tabu ku hemohemodegau. Keda ya guduiyako na yau yo natuguwao meta ka kenokeno. Nige gonowana ya tolo na saha hesau ya haiyawa.’

⁸ Na ya hededelaowa kalimiuyena: Nuwana kam kaha ne nige ye henuwa bena ye tolo na saha hesau ye leyawa kawakeha debanaena. Iyamo hesana hekasisina debanaena** ede kabo ye tolo na saha ku kaibwadai wa kabo ye leyawa.

⁹ Ede ya hededelaowa kalimiuyena: Kwa kaibwada Yaubada unai, kabo saha kwa kaibwadai wa ye leyawa. Kwa wase, na kabo saha kwa wasewasenei wa Yaubada

** **11:8:** Iyamo hesana hekasisina debanaena: Hedehedede ta kulibuina hesau hinage, iya ede, Iyamo yom kaibwada unai ku muyoukesegai wa debanaena.

ye saguigomiu na kwa lobai. Yo hinage keda guduna unai kwa koikoi, kabo keda ye sokeyawa. ¹⁰ Matawuwuna ede taukaikaibwada saha se kaibwadai wa kabo se hai, yo tauwasewase saha se wasenei wa kabo se lobai, yo keda kabo ye soke kaiteyadi taukoikoi wa udiyedi.

¹¹ Kowa kaiteya tama, ena natum loheya ye kaibwada yama, kabo mwata ku mosei? ¹² O ye kaibwada pou, kabo gigidonadona ku mosei? ¹³ Komiu tamowai yabayababadi, na iyamo kabina kwa kata meta ginauli namwanamwadi bena kwa moseidi natumiyao udiyedi. Na Tamamiu galewa ne unai meta ye namwakalili, unai kabo Yaluwa Tabuna ye mosei siya kaiteyadi taukaikaibwadaina udiyedi.”

Kaiteya gigibwali ye mosei Yesu unai, yaluwa yabayababadi kadi tanuwaga Belesebulu, o Yaubada?

(Mataiyo 12:22-30,43-45, Maleko 3:22-27)

¹⁴ Huya hesau Yesu tamowai una'unana unai yaluwa yabayababana ye hededehepesa, na huyana ye pesa meta tamowai una'unana wa ye hedehedede. Boda wa se nokokalili, ¹⁵ na iyamo tamowai hekadi se hedede se wane, “Yaluwa yabayababadi kadi tanuwaga Belesebulu yona gigibwaliyena yaluwa yabayababadi ye hededehepesadi.”

¹⁶ Na hekadiyo se henuwa bena Yesu se lautonogi, unai se kaibwadai bena galewa hekihekinoina hesau ye ginauli se kita.

¹⁷ Na yodi nuwanuwatu wa Yesu kabidi ye kata. Unai ye hededelau udiyedi ye wane, “Taba basileiya hesau ye bom ye lulululu'uyoi, meta kabo se heyababa'uyoidi. Yo taba numa hesau tamowaidiyao se bom se haitoledagela'uyoidi, kabo se bom se hetatagwaligwali'uyoidi.

¹⁸ Taba Satani yona taupaisowa yaluwa yabayababadi ye hewaiunudi, meta yona basileiya kabo idohagi bena ye tolobayao? Doha teina ya hedede, matawuwuna kwa wane bena Belesebulu yona gigibwaliyena yaluwa yabayababadi ya hepesadi.

¹⁹ Na yomi nuwatu saha, ena yau Belesebulu yona gigibwaliyena ya hepesadi, meta tauhemuliwatanigomiu** kabo kaiteya yona gigibwaliyena se paisowa? Unai siya kabo se hegilugomiu meta kwa laupwano. ²⁰ Na ena Yaubada yona gigibwaliyena yaluwa yabayababadi ya hededehepesadi, meta Yaubada yona basileiya ye laomako kalimiuwai.

²¹ Na taba tamowai bayabayaona yona iyala gogodi ye nonohaidi na yona numa ye kitahetete, meta yona gogo maudoidi kabo se namwanamwa. ²² Na taba tamowai hesau bayabayaokalilina ye lagema maiyana se lulu na numa tanuwagana wa ye saedikwai, ede numa tanuwagana yona iyala gogodi ye sunumaeidi bena kabo se sagui wa ye haigabaeidi yo yona gogo maudoidi ye soiyeidi.

²³ Kaiteya nige ye hemuhemuliwatanigau, iya meta tauhewaiunugau. Yo kaiteya nige ye saguigau na tamowai ka woyagogoidima, iya meta tauhetatagwaligwali.

²⁴ Huyana yaluwa bikibikina tamowai ye pesagabaei, meta kabo ye lau balabala-gaibuyena yona kabakaiyawasi ye wasenei, na nige hesau ye lobai. Kabo ye wane, ‘Ya uyo numa ya laugabaei'usei wa unai.’ ²⁵ Ye lage'uyo numa wa ye kita meta se kuyahe'a'a yo se gwaugogonamwanamwaei. ²⁶ Kabo ye lau yaluwa yabayababadi haligigi-labui ye woyaidima. Siya se yababakalili na kabo iya, na numa wa unai se lusae na se miya. Ede tamowai wa yona mauli ye yababakalili na kabo yona mauli bagubagunana wa.”

Kabagwauyala mamohoina

²⁷ Yesu ye hedehededegehe ede sinebada hesau boda wa unai ye yogalau Yesu unai ye wane, “Sinam taulabasigo yo tauhesusugo, iya gonowana ye gwauyala!” ²⁸ Na Yesu

** **11:19:** Tauhemuliwatanigomiu: Luka ye kuli, natumiyao. Siya meta Paliseya tamowaidiyao hekadiyo yo yodi hekahekatao, na kadi paisowa yaluwa yabayababadi se hedehededehepesadi Yaubada hesanaena.

yona bui ye mosei ye wane, “Nigele! Na kaiteyadi Yaubada kalinana se lapui yo se kawakabiyei, meta siya gonowana se gwauyala.”

*Peloweta Iyona heyaheyasonina
(Mataiyo 12:38-42)*

²⁹ Boda wa ye laki ye lau na Yesu se tolohetakikili na ye hedehedede ye wane, “Teina isi ta meta isi yabayababana. Se henuwa bena hekihekinoi ya ginauli se kita [*yodi kabahemamohoiyeigau*]. Na taba nige hekihekinoi hesau se kita, na Iyona hekihekinoi mo ye bom. ³⁰ Iyona meta Ninewa tamowaidiyao yodi hekihekinoi, na gonogonowana doha Tau Natuna teina isi ta yodi hekihekinoi.

³¹ Yaubada yona hekasa mayadaina ne unai magari Siba yodi wasawasa waihiuna** kabo ye tolo na teina isi ta tamowaidiyao ye hegiludi, matawuwuna kedalohaloha unai ye laoma bena Solomona yona hededesonoga ye lapuidi. Na tamowai hesau iya ede inai, ye sonogakalili na kabo Solomona.

³² Hekasa mayadaina ne unai Ninewa tamowaidiyao kabo hinage se tolo na teina isi ta tamowaidiyao se hegiludi, matawuwuna ede Iyona yona lauguguyaena Ninewa tamowaidiyao wa se nuwabui. Na mayadai ta unai tamowai hesau ye saekalili na kabo Iyona, iya ede maidamiu ta.”

*Yesu yona lauhekata ye hemala tamowai yodi dawaya
(Mataiyo 6:22-23)*

³³ [*Kabo Yesu ye wane,*] “Nige tamowai hesau lampa ye gabu na ye tolewadam o walata unai ye buikasini, na lampa kabatolena unai ye tole, to tamowai se mwalai kabo gonowana dawayana se kita. ³⁴ Matada meta siya tauda ta malana ede. Ena matada se nega meta kabo tauda maudoina ta ye dawaya. Na ena matada se yababa meta tauda maudoina ta kabo ye masigili. ³⁵ Bena kwa kitanamwanamwa meta dawaya ne kalimiyuena, na tabu masigili. ³⁶ Ena taum maudoina ne dawaya ye hemwayau, na nige teha hesau ye masigili, meta kabo dawaya lakilakina kalimiyena, doha lampa dawayana ye talu kalimiyena.”

*Yesu Paliseya yo laugagayo taulauhekataena tamowaidi ye hegiludi
(Mataiyo 23:1-36, Maleko 12:38-40, Luka 20:45-47)*

³⁷ Huyana Yesu ye hedehededegehe meta Paliseya tamowaina hesau ye kaibwadai ye lau maiyana se kaikai. Ede ye mwalae na ye kenodobi kabakaikai hatana unai bena ye kaikai. ³⁸ Na Paliseya tamowaina wa ye kita meta Yesu nige nimana ye deulibagunaeyidi doha kadi kulutubu yodi kabikabi mamohoina unai. Ede ye siliyata.

³⁹ Na Guiyau ye hededelau iya unai ye wane, “Komiu Paliseya tamowaidiyao kami keyaka yo gaeba dageladiyao ne kwa deulihe'a'adi, na luwamiyao ne meta mahimahihi yo miyamiya yabayababadi se mwayau! ⁴⁰ Komiu meta kwa yauyaulekalili! Yaubada taumiu ye ginaulidi wa, iya nuwamiu hinage ye ginaulidi. ⁴¹ Ginauli saha yomi gaeba ne udiyedi, kwa kainauyaidi taudehadeha udiyedi, na kabo nuwamiu yo taumiu se a'a Yaubada matanaena.**

⁴² Ahani mo komiu Paliseya tamowaidiyao, matawuwuna yomi koya udiyedi lugu-lugu gagilidi kai kabahepahepanedi udiyedi taiti kwa toletole, na laulau dudulaidi yo Yaubada gadosisina nige kwa modelau udiyedi. Taba laugagayo maudoidi kwa miyawatanidi, yo hinage laulau namwanamwadi hekadi wa tabu kwa kitagabaedi.

** **11:31:** Magai Siba yodi wasawasa waihiuna wasana meta 1 Kin 10:1-3 yo 2 Kolonikele 9:1-12 udiyedi ku hasili. Kalina Giliki unai Luka ye katai meta iya teha yawana yodi wasawasa waihiuna. ** **11:41:** Kabo nuwamiu yo taumiu se a'a Yaubada matanaena: Kalina Giliki unai Luka ye kuli, na kabo ginauli maudoidi se a'a kalimiyau.

⁴³ Ahani mo komiu Paliseya tamowaidiyao. Matawuwuna sunago udiyedi kabatuli saesaedi kwa henuwadi, yo kwa henuwa bena tamowai se lautokiyeigomiu ma hekasi-sidi kabalokulokune udiyedi.

⁴⁴ Ahani mo komiu. Komiu kami kao doha bwayabwaya nige udiyedi hekihekinoi se toledi, na kewadiyena tamowai se sae se dobi na nige kabina se kata meta saha luwadi ne udiyedi.”

⁴⁵ Laugagayo taulauhekataena tamowaina hesau ye hededelau Yesu unai ye wane, “Taulauhekata, yom hedehedede ne udiyedi kai hinage ku hededeheyababagai!”

⁴⁶ Yesu ye hededebui ye wane, “Na komiu laugagayo taulauhekataena tamowaidiyao, ahani mo komiu. Matawuwuna laugagayo se badokalili kwa moseidi tamowai udiyedi. Kadi kao doha bahebahe polopolohekalilidi, na nige gonowana se lauwatanidi. Na komiu nige yomi sagu gagiina unai kwa saguidi.

⁴⁷ Ahani mo komiu. Matawuwuna peloweta bwayabwayadi kwa kabinamwanamwaedi yo hekihekinoidiyao kwa hetolodi, na kami kulutubuwaos siya se unuidi. ⁴⁸ Laulau ta unai kwa hemasalaha meta kami kulutubuwaos maidamiyao nuwamiu kesega. Siya peloweta wa se unuidi, na komiu kwa saguidi na bwayabwayadi hekihekinoidiyao kwa ginaulidi. ⁴⁹ Unai ede Yaubada yona sibasiba unai ye hedede ye wane, ‘Kabo peloweta yo apostolo ya hetamalidi se lau kalidiyena. Hekadi kabo se unuhemwaloidi na hekadi se hewaiunudi!’ ⁵⁰ Unai Yaubada teina isi ta ye hegiludi peloweta kwasinadi maudoidi tamowai se hebwalilidi wa debadiyena, tanoubu yona huyahetubu unai ye laoma ye lau ee teina mayadai ta, ⁵¹ yo Abela kwasinana unai ye hetubu na ye laoma ye lau ee Sakaliya, iya ede kabakaitalasam yo Numa Tabuna duwaduwalidiyena se koihemwaloi'usei wa. Mamohoi, yomiu ya hedehedede, yababa maudoidi ta giludi meta huya ta tamowaidi kabo se bahei.

⁵² Ahani mo komiu laugagayo taulauhekataena. Matawuwuna ede sonoga kabahaina kedana wa kwa gudui na kana kii kwa haigabaei. Komiu nige kwa henuwa bena kwa mwalaie na sonoga kwa hai, na kaiteyadi se henuwa bena se mwalaie meta kwa hekaiyawasidi.”

⁵³ Huyana Yesu numa wa ye laugabae ede Paliseya yo laugagayo taulauhekataena tamowaidi se hetubu iya se hewaiunukaliliyei, yo henamai udoi'udo'i udiyedi se lautonogi ⁵⁴ taba idohagi na yona hededebui unai ye hededepwano na unai kabo se hegilu.

12

Tabu tamowai ta matausiyeidi (Mataiyo 10:26-27)

¹ [Paliseya yo laugagayo taulauhekataena tamowaidi yodi henahenamai wa sola se laulau na] boda lakikalilina se lagegogoi meta se haiheduheduna'uyoidi. Iyamo Yesu ye hedehededebaguna yona hekahekatao udiyedi ye wane, “Bena kwa kitanamwanamwa Paliseya yodi yisti** udiyedi, teina ta meta yodi kailupolupo kabikabidi. ² Ginauli wadawadamdi maudoidi meta kabo se masalaha, yo nuwanuwatu wadawadamdi maudoidi Yaubada kabo ye tolehemasalahadi. ³ Saha boniyaiyena kwa hedehededei meta kabo mayadaiyena se hededehehemasalaha, na numakalo unai saha tamowai beyadi udiyedi kwa gadigadigugulau meta kabo boda matadiyena se hededehehemasalahadi.”

Yaubada ye kitakitahetteda (Mataiyo 10:28-31)

⁴ [Na Yesu yona hedehedede ye tubei ye wane,] “Kagu kahao, ya hededelaowa, tabu buluma tauhemwaloina kwa matausiyeidi, na nige gonowana saha hesau se ginauli'uyoi.

** **12:1:** Yisti: Yesu yona hedehedede ta unai meta yisti iya lauhekata yabayababana heyaheyasonina.

⁵ Na kabo yomiu ya hedehedede meta kaiteya bena kwa matausiyei: [*Yaubada*] bena kwa matausiyei. Iya gonowana ye kaiunu yo hinage yona gigibwali gonowana unai ye gabalaegomiu kaiwa kalakalasina unai. Ya hededelaowa kalimiuwai: [*Yaubada*] bena kwa matausiyei! ⁶ Hage, ta nuwatulau pekopeko udiyedi. Maisadi se gagilikalili, na badodi haligigi meta se lokuneidi moni gagilidi labui** mo udiyedi. Na iyamo Yaubada nige hesau ye nuwaluluhiyei. ⁷ Yo hinage kulumiu maiyawadi meta ye hasilidiko. Unai tabu kwa matausi. Komiu kwa saekalili na kabo pekopeko yawoina.”

Bena ta hedehemasalaha'uyoida meta kita Yesu yona tamowai
(*Mataiyo 10:32-33, 12:32, 10:19-20*)

⁸ [*Kabo Yesu ye wane,*] “Ya hededelaowa kalimiu yena: Kaiteya boda matadiyena ye hedehemasalaha'uyoi meta iya tauhemuliwatanigau, Tau Natuna hinage kabo ye hedehemasalaha Yaubada yona anelu udiyedi. ⁹ Na kaiteya ye uhalaegau boda matadiyena meta hinage kabo ya uhalaei Yaubada yona anelu matadiyena.

¹⁰ Ena kaiteya Tau Natuna ye hededeheyababa meta Yaubada kabo yona yababa ne ye nuwatugabaei. Na ena kaiteya Yaluwa Tabuna ye hededeheyababa meta Yaubada taba nige yona yababa ne ye nuwatugabaei.

¹¹ Huyana se woyalaegomiu sunago babadadiyao yo magari tanuwagadiyao yo tamowai lakilakidi hekadiyo udiyedi bena se helauhetalagomiu, meta tabu kwa mode kabo idohagi yodi bui kwa moseidi o saha kwa hedede, ¹² matawuwuna mahanana ne unai Yaluwa Tabuna kabo ye hekatagomiu na saha kwa hedede.”

Tamowai gogogogona palabolena

¹³ Kabo tamowai hesau boda wa luwadiyena ye hededelau Yesu unai ye wane, “Taulauhekata, ku hededelau kagu kaha ne unai taba gonowana tamamai yona gogo ye boitagabaeidi wa ye hekasadi na yogu ye haidima.”

¹⁴ Yesu ye hededebui ye wane, “Kehagu, teina gogo ta udiyedi yau nige yomi tauhekasa o tautolehedudulai.” ¹⁵ Na ye hededelau maudoidi kalidiyena ye wane, “Kwa kitahetetenamwanamwaegomiu na mahimahihi kabikabidi udoi'udo'i bena kwa kai-haleidi. Matawuwuna mauli kaniyona mamohoina meta nige yomi gogo badobadodi ne udiyedi.”

¹⁶ Na kabo Yesu palabole hesau ye hedede udiyedi ye wane, “Taubada hesau gogogogona yona tano unai meta witi masulina ye lakikalili. ¹⁷ Ye nuwanuwatu na ye wane, ‘Yogu witi masulina maudoina ta nige yogu kabagwaugogoina. Saha kabo ya ginauli?’

¹⁸ Na ye bom yona ye hedehedede ye wane, ‘Teina doha kabo ya ginauli: Kabo yogu like kabagwaugogoina bagubagunadi wa ya haigabaeidi na lakilakidi ya ginaulidi. Na udiyedi kabo yogu witi masulina ta yo yogu gogo namwanamwadi maudoidi ya gwaugogoidi. ¹⁹ Na kabo ya bom ya hedede ya wane, “Taubada gogogogona, yom kabagwaugogo udiyedi meta ginauli namwanamwadi ku gwaugogoidi, na kabo ku hepaisowadi bolimai lohaloha. Unai kabo paisowa maudoidi udiyedi ku kaiyawasi, na ku kai, ku numa, yo ku gwauyala mo.”

²⁰ Na Yaubada ye hededelau kalinawai ye wane, ‘Kowa yauyaule! Teina boniyai ta unai kabo yom mauli ya haigabaei, na yom gogo ku gwaugogoidi kowa hesabam ta kabo kaiteya ye haidi?’ ”

²¹ [*Kabo Yesu ye hedede ye wane,*] “Teina laulau ta kabo se tubu kaiteyadi yodi gogo se gwaugogoidi siya se bom hesabadi, na nige gogo siya ede Yaubada kalinawai se saekalili wa se gwaugogoidi.”

Tabu ta nuwamodemode
(*Mataiyo 6:25-34*)

** 12:6: Moni gagilidi labui meta asaliyona labui.

²² Kabo Yesu ye hedede'uyo yona hekahekatao wa udiyedi ye wane, “Unai ya hededelaowa kalimiuyena: Tabu kwa nuwanuwatukalili yomi mauli hesabana, bena saha kabo kwa kai, yo taumiu ta hesabana, saha kabo kwa likwa. ²³ Mauli ye saekalili na kabo kai, yo taumiu ta ye saekalili na kabo kaleko! ²⁴ Hage, ao'ao kwa nuwatuidi: Nige se kumakuma, yo nige se kelikeli, yo nige yodi sanala o kabagwaugogo numadi. Na Yaubada ye hekahekaidi. Na komiu meta kwa saekalili na kabo manuwa! ²⁵ Luwamiu ne unai kaiteya ye nuwanuwatukalili na unai gonowana kabo mahana kesega ye tolelaei yona mauli ne unai na ye heloha'uyoi? ²⁶ Na komiu nige gonowana teina ginauli gagilina ta kwa ginauli, unai ede tabu kwa nuwamodemode ginauli hekadiyo ne udiyedi.

²⁷ Taba pasa gagilidi kwa nuwatuidi idohagi yodi kinikini. Nige se paisowa, nige kadi kwama se ginaulidi, na ya hededelaowa kalimiuyena: Solomona yona wasawasa kalekodiyo nige hesau kana kao ye didiga doha tenem pasa ne. ²⁸ Ena Yaubada lagau ne kadi kao ye henamwadi, siya ede wau se lala na malaitom se gabudi se kalasi, meta iya gonowana kabo kaleko namwanamwadi udiyedi komiu ye hekalekogomiu. Mamohoi, komiu sunuma gagilidi tamowaidiyao! ²⁹ Unai huya maudoina nuwamiu tabu kwa hemodedi kabo saha kwa kai o kwa numa, yo tabu udiyedi kwa nuwanuwatukalili. ³⁰ Teina ginaulidi ta meta Yaubada nige tausunumaena tanoubu ta unai se henuwakaliliyeidi. Na kami henuhenuwa maudoidi ta tamamiu kabidi ye katako. ³¹ Na komiu bena Yaubada yona basileiya nuwanuwatuna kwa tolebagunai, na kabo ginauli maudoidi ta hinage ye lediwa kalimiuwai.”

Gogo galewa ne unai
(Mataiyo 6:19-21)

³² [Kabo Yesu ye wane,] “Komiu yogu hekahekatao bodana gagilina ta, tabu kwa matausi. Matawuwuna tamamiu ye henuwakalili bena yona basileiya unai maiyamiu kabo kwa tanuwaga. ³³ Yomi gogo kwa lokuneidi na monidi kwa moseidi taudehadeha udiyedi. Ena doha teina kwa ginauli meta yomi wasawasa galewa ne unai kwa helakidi, na nige gonowana se beyabeya yo se pwasa. Teina wasawasa ta taukaiwahali nige gonowana se kaiwahalidi yo sulasula nige gonowana se kaidi. ³⁴ Matawuwuna ede kaiteya teha unai yomi wasawasa se miyamiya, meta nuwamiu ede temenai.”

Bena ta nonoha
(Mataiyo 24:42-44)

³⁵ [Yesu yona hedehedede ye tubei ye wane,] “Yomi kaleko bena kwa likwadi na kwa nonoha paisowa hesabana yo yomi lampa bena se kalakalasi. ³⁶ Kami kao doha heyayai tauhaidi kadi tanuwaga tawasola kaikaigogona unai ye uyoma na se nayanayai. Na huyana ye lage na yona numa kawakedana unai ye koikoi, siya kabo gonowana keda se sokemwamwayauyei. ³⁷ Heyayai tauhaidi ena kadi tanuwaga ye lobaidi se silasilawa yona huyalagema ne unai, meta kabo gonowana se gwayuala. Ya hededemamohoi kalimiuwai: Kadi tanuwaga kabo kaleko ye likwadi doha heyayai tauhaina na ye yoganeidi se laoma se tuli na ye hekaidi. ³⁸ Taba boniyai duwaduwalina o malatomtom gagilina unai ye lage'uyoma na heyayai tauhaidi kadi tanuwaga ne ye lobaidi meta se silasilawa kabo gonowana se gwayuala.

³⁹ Ginauli kesega ye masalahakalili: Ena taba numa tanuwagana kabina ye kata mahana saha unai kabo taukaiwahali ye laoma meta kabo ye silasilawa na taukaiwahali nige gonowana ye lusae yona numa unai. ⁴⁰ Unai komiu hinage bena kwa nononoha, matawuwuna Tau Natuna yona lage mahanana ne nige kabina kwa kata.”

Numa taukitahetetena sibasibana
(Mataiyo 24:45-51)

⁴¹ Kabo Petelo Yesu ye henamaiyei ye wane, “Guiyau, palabole hedehedena ta kai ka bom kama hedehede o tamowai maudoidi?”

⁴² Guiyau ye hededebui ye wane, “Hage, numa taukitahetena sibasibana kwa nuwatui. Kana tanuwaga iya ye sunumaei na ye tole bena yona heyayai tauhaidi maudoidi mahana dudulaidi udiyedi kabo kadi kai ye moseidi. ⁴³ Kana tanuwaga yona huya'uyoma ne unai, ena yona heyayai tauhaina ta ye lobai yona paisowa wa ye ginaginauli, meta iya gonowana kabo ye gwauyala. ⁴⁴ Ya hededemamohoi kalimiuyena: Kana tanuwaga yona gogo maudoidi kabo ye moseidi bena ye kitahetedi. ⁴⁵ Na ena heyayai tauhaina wa ye bom yona ye hedehede na ye wane, ‘Kagu tanuwaga yona lage'uyoma ye pahilikalili,’ na ye hetubu heyayai tauhaidi hekadi wa sinesineo yo tatao ye kabihenayaidi na ye kai yo ye numa yo ye numayauyaule, ⁴⁶ meta kana tanuwaga kabo ye uyoma na mayadaina yo mahanana meta yona heyayai tauhaina wa nige kabidi ye kata. Na kabo ye hekamkamnakaliliyei na ye tolelae Yaubada nige tausunumaena yodi teha wa unai.

⁴⁷ Ena heyayai tauhaina hesau kana tanuwaga yona nuwanuwatu kabina ye kata, na nige ye nonohawatani yo nige ye ginauli, meta kana tanuwaga kabo iya ye hekamkamnakaliliyei. ⁴⁸ Na ena kana tanuwaga yona nuwanuwatu nige kabidi ye kata, na ginauligaibu ye ginaulidi, kabo kana tanuwaga nige gonowana iya ye hekamkamnakaliliyei.

Kaiteyadi Yaubada ye kinauyaidi na yona hedehede se nuwatu-lobainamwanamwaeidi meta ye henuwakalili bena se ginauliwataninamwanamwaeidi. Na kaiteyadi ye kinauyakaliliyeidi meta ye henuwa bena yona hedehede se ginauliwataninamwanamwakaliliyeidi.”

Hewaiunu Yesu debanaena
(*Mataiyo 10:34-36*)

⁴⁹ “Ya dobima ta bena kaiwa ya yuhi tanoubu ta unai,** na ya henuwakalili bena iya ede ye kalakalasi. ⁵⁰ Kamkamna lakilakikalilina** kabo ya lulau unai na ya nuwanuwatukalili ye lau ee kana siga yogu kamkamna ne ye gehe. ⁵¹ Yomi nuwatu bena nuwadaumwali ya baheiyama tanoubu ta unai? Nige! Ya hededelaowa kalimiuwai meta haitolebilibili ya baheiyama. ⁵² Mayadai ta unai ye hetubu na ye lau meta numa kesega unai tamowai badodi haligigi kabo se haihaitolebilibili'uyoidi yau debaguwai, taudi haiyona kabo labui se hewaiunudi yo labui kabo haiyona se hewaiunudi. ⁵³ Tama kabo natuna loheya ye hewaiunu, yo loheya kabo tamana ye hewaiunu. Sina kabo natuna waihiu ye hewaiunu, yo waihiu kabo sinana ye hewaiunu. Na sina kabo natuna loheya mwanena ye hewaiunu, yo waihiu kabo lawana ye hewaiunu.”

Huya kaimasidi
(*Mataiyo 16:1-4, Maleko 8:11-13*)

⁵⁴ Yesu yona hedehede wa ye tubei na boda wa udiyedi ye wane, “Ena yalohi kwa kita teha yalasi ne unai ye saesaema, kwa wane, kabo nabu ye talu, na ye talu. ⁵⁵ Yo ena yawana ye lotalu kamnana kwa lapui meta kwa wane, kabo ye gigibwali, na mamohoi kabo ye tubu. ⁵⁶ Komiu taukailupolupo! Tanoubu yo yada kadi kao gonowana kwa kitalobaidi. Na idohagi to saha se tubutubu teina mayadai ta udiyedi nige gonowana kwa kitalobaidi?

⁵⁷ Idohagi to nige gonowana kwa bom kwa kitahekasa meta saha ye namwa yo ye dudulai [*teina huya ta unai*]? [*Hage, teina heyahasoni ta kwa nuwatui*.] ⁵⁸ Ena tamowai hesau [*kam hagahaga debanawai*] bena ye woyalaego kabalauhetala unai, meta keda ne unai kwa laulau na ku kaipatebayao bena yom teha ku hedudulai. Ena

** **12:49:** Ya dobima ta bena kaiwa ya yuhi tanoubu ta unai: Kaiwa ne kana paisowa ede metolo doha gole o siluba ye gabuhe'a'adi. Na Yesu ye henuwa bena yona tamowai se a'a na tamowai yabayababadi ye tolehesuwaladi.

** **12:50:** Kamkamna lakilakikalilina Yesu ye heyasoniyei babatiso unai, na kalina Giliki unai Luka ye kuli ye wane, Kabo ya lulau babatiso hesau unai.

nige, kabo ye woyalaego tauhelauhetala matanawai. Na tauhelauhetala wa kabo ye tolelaego yona taupaisowa unai, na iya kabo ye tolego numatutugudu unai. ⁵⁹ Ya hededemamohoi: Taba nige se hepesago ye lau ee kana siga kam hagahaga maudoidi ku hedudulaihegehedi.” **

13

Bena nuwamiu kwa buidi

¹ Huyana ne unai tamowai hekadiyo se laoma Yesu unai na Galili tamowaidi hekadi wasadi yona se hedehedede. Siya yodi kaitalasam se ginauli Numa Tabuna unai, na Pilato yona tau'iyala se koihemwaloidi ede kwasinadiyao se bwalilidobi yodi kaitalasam suisuidi kwasinadi wa udiyedi. ² Yesu ye hededebui ye wane, “Galili tamowaidi ta se kamkamna doha tenem na unai yomi nuwatu idohagi, bena siya se yababakalili na kabo Galili tamowaidi hekadiyo? ³ Na ya hededelaowa kalimiuyena, teina ta nige! Na ena nige nuwamiu kwa buidi, komiu hinage kabo kwa boita. ⁴ Na huyana Silowama unai numa kewana saesaena ye guli na tamowai badodi 18 ye koihemwaloidi meta nuwanuwatudi doha saha? Yomi nuwatu bena siya se yababakalili na kabo Yelusalema unai taumiya maudoidi? ⁵ Ya hededelaowa kalimiuyena, teina ta nige! Na ena nige nuwamiu kwa buidi, kabo komiu hinage kwa boita.”

⁶ Na kabo Yesu teina palabole ta ye hedede kalidiyena: “Tamowai hesau yona wine koyana, na unai meta bosibosi ye kumai. Na ye lau kaniyona ye loya na nige kaniyona hesau ye lobai. ⁷ Ede ye hededelau koya taupaisowaina wa unai ye wane, ‘Bolimai haiyona ya laolaoma inai kaiwa ta kaniyona ya tautaulalakaidi na nige kaniyona hesau ya lobai. Unai ku koiheguli. Nige gonowana bwatano ye hepahepaisowagaibui.’

⁸ Na koya taupaisowaina wa ye wane, ‘Tanuwaga, taba gonowana ku kitagabaei bolimai kesega, na yau kabo wuwuna ne ya kelihetakikili na bwatano kabahemasulina ya tole. ⁹ Ena bolimai hesau ne unai na ye kaniyo meta ye namwa, ena nige, kabo gonowana ku koigabaei.’ ”

Sabati unai Yesu sinebada hesau ye henamwanamwa

¹⁰ Na Sabati mayadaina hesau unai Yesu ye lau sunago hesau unai ye lauhekata. ¹¹ Na temenai meta sinebada hesau yaluwa yabayababana ye hebunibuni bolimai 18, yo dagelana ye you na nige gonowana ye tolodudulai'uyo. ¹² Huyana Yesu sinebada wa ye kita ede ye yoganeyama na ye wane, “Kam kasiyebwa ne unai ya yailihaigo.” ¹³ Na nimana ye tolesaedi iya kewana unai na mahanana ne unai ye tolodudulai na Yaubada ye hedebasaei.

¹⁴ Sunago wa badana ye koipili matawuwuna mayadai Sabati unai Yesu henamwanamwa paisowana ye ginauli, ede ye hedehedelau tamowai wa udiyedi ye wane, “Sabati kesega unai mayadai badona haligigi-kesega udiyedi gonowana ta paisowa. Tenem mayadaidi ne udiyedi bena kwa laoma henamwanamwa kwa lobai, na nige Sabati unai.”

¹⁵ Guiyau ye hededebui iya unai ye wane, “Komiu sunago babadadiyao meta tauskailupolupo. Mamohoi, komiu nige Sabati mayadaina unai yomi bulumakau yo donki yodi kabamiya udiyedi kwa yailihaidi na kwa woyalaedi waila se numa? ¹⁶ Na teina sinebada ta meta Abelahama kana isimulita hesau, na bolimai 18 Satani ye kabikabihekahini kana kasiyebwa unai. Na idohagi to ku hekaiyawasigau tabu Sabati unai iya kana kaukau unai ya yailihai?”

¹⁷ Na yona hedehedede ta unai meta kana waiunu maudoidi ye hemwadinedi. Na bodalakilaki wa se gwauyalalakalili laulau namwanamwadi maudoidi ye ginaulidi wa udiyedi.

** **12:59:** kam hagahaga maudoidi ku hedudulaihegehedi: Luka ye kuli kalina Giliki unai, ye lau ee lepetona gegehena ku hemaisa.

*Tuma gagilidi yo yisti heyaheyasonidi
(Mataiyo 13:31-33, Maleko 4:30-32)*

¹⁸ Na Yesu ye henamai ye wane, “Yaubada yona basileiya meta kana kao doha saha? Saha unai kabo ya hekaigonogonowai? ¹⁹ Iya kana kao doha kaiwa tumana gagilina** tamowai hesau ye hai na yona koyaena ye kumai. Like ne kabo ye kini ye hemala kaiwa lakilakina, kabo manuwa se laoma lagana ne udiyedi se kabinoi.”

²⁰ Yesu ye hedehedede'uyo ye wane, “Saha unai kabo Yaubada yona basileiya ya hekaigonogonowai? ²¹ Iya ede doha waihiu hesau yisti ye hai na pwalawa disina lakilakina unai ye hebwali. Kabo yisti ne pwalawa maudoina wa ye hesese.”

*Kawakeda gagilina
(Mataiyo 7:13-14,22-23 yo 8:11-12)*

²² Yesu ye laulau Yelusalema hesabana na magari lakilakidi yo gagilidi udiyedi ye laulauhekata. ²³ Na tamowai hesau iya ye henamaiyei ye wane, “Guiyau, tamowai hisahisadi mo kabo mauli nige kana siga se hai?” Ede Yesu ye hededebui ye wane, ²⁴ “Kwa kaipatebayao bena kawakeda gagilina unai kwa lusae, matawuwuna tamowai se bado kabo se kaipate bena se lusae na iyamo nige gonowadi. ²⁵ Huyana numa tanuwagana ye tolo na ye lau keda ye gudui, komiu kabo dagela ne unai kwa tolo na kwa koikoi yo kwa kaikaibwada kwa wane, ‘Tanuwaga, keda ku sokeyama na ka mwalaewa!’

Kabo ye hededelaowa kalimiuyena ye wane, ‘Nige kabimiu ya kata o haedi kwa laolaoma.’

²⁶ Na kabo kwa hededelau kwa wane, ‘Kowa yo kai ta kaikai yo ta numagogoi, yo yoma magari kedadiyao udiyedi ku lauhekata.’

²⁷ Na kabo ye hedehedede'uyo kalimiuyena ye wane, ‘Nige kabimiu ya kata o haedi kwa laolaoma. Kwa tausuwala, komiu maudoimiu laulau yabayababadi tauginaulidi!’

²⁸ Huyana Abelahama, Isako yo Yakobo yo peloweta maudoidi kwa kitadi Yaubada yona basileiya unai, na komiu dagela ne unai, meta kabo kwa dou yo kawamiu kwa kapuyahisidi. ²⁹ Tamowai kabo teha bolime, teha yalasi, teha yawana, yo teha bwauli udiyedi se laoma na se tuli Yaubada yona basileiya kaikaigogona unai. ³⁰ Mamohoi! Hekadi mayadai ta unai se mulita kabo se baguna, na hekadi mayadai ta unai se baguna meta kabo se mulita.”

*Yesu Yelusalema ye katekamkamnaei
(Mataiyo 23:37-39)*

³¹ Huyana ne unai Paliseya tamowaidi hekadiyo se laoma Yesu unai na se hededelau unai se wane, “Bena magari ta ku laugabaei na ku lau teha hesau, matawuwuna Heloda ye henuwa bena ye unuhemwaloigo.”

³² Yesu ye hededebui ye wane, “Kwa lau kwa hededelau teina kedewa nukula** ta unai: Madai yo malaitom kabo yaluwa yabayababadi ya hededehepesadi yo tamowai ya henamwanamwadi, na mayadai hehaiyonana ne unai kabo yogu paisowa ya hegehe.

³³ Iyamo madai, malaitom yo itenai meta yogu keda ta unai ya laulau Yelusalema hesabana, matawuwuna nige gonowana peloweta hesau Yelusalema dagelana ne unai se unuhemwaloi.

³⁴ Yelusalema, Yelusalema! Kowa peloweta taukoihemwaloidi yo tamowai Yaubada ye hetamalidiwa kalimyena meta ku hekalawekudi. Huya maudoina meta ya henuwa bena natumwao ya kabigogoidima doha kamkam sinadi natunao ye kabigogoidi pepe-nao gunidiyena, na iyamo komiu nige kwa henuwa.

** 13:19: Kaiwa tumana gagilina ne Dimdim unai hesana se katai ede mustard. Tamowaidi ne, siya meta se sonoga, iyamo nige yodi gigibwali, unai se matamatausigaibu. Dimdim unai se wane fox.

** 13:32: Kedewa

³⁵ Unai sola kwa kita, Yaubada yomi magai kabo ye nuwagabaei na nige tamowaina. Na ya hededemamohoi kalimiuyena: Nige gonowana kwa kita'uyoigau kana siga kwa wane, 'Ka hedebasaego, kowa Guiyau hesanawai ku laoma!' ”

14

Yesu Paliseya tamowaina hesau yona numa unai

¹ Sabati hesau unai Yesu ye lau Paliseya tamowaina saesaena yona numa unai se kaikai, na temenai Paliseya tamowaidiyao yo laugagayo taulauhekataena hekadi iya se kaikewasipwanamwanamwaei. ² Na tamowai hesau kasikasiyebwana meta kaena yo nimana se loloni, na ye laoma Yesu talanuwana unai ye tolo. ³ Yesu Paliseya tamowaidi yo laugagayo taulauhekataedi ye henamaiyeidi ye wane, “Gonowana kabo tamowai sabati unai ta henamwanamwa o nige?” ⁴ Na se mwanomwanou. Unai Yesu tamowai wa ye kabilau unai, na ye henamwanamwa na ye hetamali ye lau.

⁵ Kabo ye henamaiyeidi ye wane, “Ena kowa hesau natum o yom bulumakau mayadai Sabati unai ye bekudobi wailakeli duhana unai, kabo ku laumwamwayau ku tabeisini o nige?” ⁶ Na nige gonowana yona henamai wa se bui.

⁷ Huyana ne unai Yesu ye kitalobai meta taumana hekadi kabatuli namwanamwadi se kaikaisunuwaidi, ede teina palabole ta ye hedede udiyedi na ye wane, ⁸ “Huyana tamowai hesau ye kaibwadaigo ku lau hetahetawasola kaikaigogona unai, tabu kabatuli saesaena unai ku tuli, madai tamowai hesau saesaena ye kaibwadaiyako na kabo kowa. ⁹ Ena mamohoi, kabo tauyogaisinigo wa maiyana kana taumana saesaena se laoma na ye hededelaowa kalimwai ye wane, ‘Teina tamowai ta yom kabatuli me ku mosei unai ye tuli.’ Kowa kabo ma mwadimwadinem na kabatuli dobidobina unai ku tuli. ¹⁰ Na huyana se yogaisinigo na kabatuli dobidobina ku hai, tauyogaisinigo wa kabo ye laowa ye hededelaowa kalimwai ye wane, ‘Kehagu, ku tulisae kabatuli namwanamwana ne unai.’ Na tenem unai tauyogaisinigo wa ye hekasisiyeigo taumana maudoidi matadiwai. ¹¹ Ya hededelaowa kalimiuwai: Kaiteya ye bom ye hesae'uyoi, Yaubada kabo ye henuwadobidobiyei, yo kaiteya ye nuwadobidobi, Yaubada kabo ye hesaei.”

¹² Kabo Yesu ye hededelau tauyogaisinina wa unai ye wane, “Huyana mayadailaki kaina o boniyai kaina ku ginauli, meta tabu yom labini o kam kahao o kehamwao o helem taumiya gogogodiyao ku kaikaibwadaidi. Ena doha teina ku yogaisinidi, nuwana siya hinage kabo se kaibwadaigo, na teina unai kabo se hemaisago. ¹³ Na huyana kaikaigogo lakilakina ku ginauli, meta taudehadeha, taubuni-buni, kaeyabayababa yo taumatagibugibu ku yogaisinidi. ¹⁴ Unai kabo gonowana ku gwayyala, matawuwuna siya nige gonowana yom kainauya buina se haiyawa, na tamowai laulaududulaidi yodi huyatolo'uyo mayadaina ne unai Yaubada kabo yom kainauya buina ye haiyawa.”

Kaikaigogo lakilakina palabolena (Mataiyo 22:1-10)

¹⁵ Taumana hesau Yesu maiyana se tutuli wa yona hedehedede ta ye lapui ede ye hededelau unai ye wane, “Siya kaiteyadi Yaubada yona basileiya kaikaigogona ne unai se kaikai meta gonowana kabo se gwayyala.”

¹⁶ Kabo Yesu [*palabole ta ye hedede udiyedi*] ye wane, “Tamowai hesau kaikaigogo lakilakina ye kabinonohai, na tamowai gwaudi ye kaibwadaidi. ¹⁷ Kaikaigogo mahana ye lage, ede tamowai wa yona heyayai tauhaina ye hetamali ye lau kaiteyadi ye kaibwadaidi wa hesabadi na ye hededelau udiyedi ye wane, ‘Kwa laoma, ginauli maudoidi se kabinonohaidiko.’

18 Na hesau to hesau yona kabatolo unai ye hedehehede. Tamowai bagubagunana ye wane, 'Yau tano kaboina ya hemaisa, na bena ya lau ya kita. Yauwedo! Unai taba nige ya laowa.'

19 Na hesau ye wane, 'Kaboina bulumakau badodi saudoudoi** ya hemaisadi, na bena ya lau ya kitadi na ya lautonogidi. Yauwedo! Unai taba nige ya laowa.'

20 Na hinage hesau ye wane, 'Yau kaboina ta ya tawasola, tenem unai taba nige ya laowa.'

21 Heyayai tauhaina wa ye uyoma na kana tanuwaga yona ye hedehehede, ede numa tanuwagana wa ye koipikalili na ye hededelau yona heyayai tauhaina wa unai ye wane, 'Ku laumwamwayau ku lau keda lakilakidi yo gagilidi magailaki ta udiyedi meta tamowai dehadehadi, taubunibuni, taumatagibugibu, yo kae daedaelodi ku woyaidima.'

22 Heyayai tauhaina wa [*ye lau, na ye uyoma ede*] ye wane, 'Tanuwaga, saha ku hedededi wa ya ginaulidiko, na iyamo yom numa sola nige ye mwayau.'

23 Kabo numa tanuwagana ye hededelau yona heyayai tauhaina wa unai ye wane, 'Ku lau magailaki ta dagelana udiyedi keda lakilakidi yo gagilidi, metai tamowaidiyao ku hededebyao kalidiyena bena se laoma, to yogu numa ne ye mwayau. 24 Ya hededelaowa, siya kaiteyadi ya kaibwadabagunaidi wa taba nige yogu kaikaigogo unai se kaikai.' "

Yesu hemuliwatanina meta ma maisana

25 Yesu maiyanao bodalakilaki se laulau, na ye tolobui na ye hededelau udiyedi ye wane, 26 "Ena tamowai hesau ye henuwa bena ye hemuliwatanigau, na iyamo tamana, sinana, mwanena, natunao, kana kahao yo lounao, yo hinage yona mauli ye nuwatukaliliyeidi, kabo iya nige gonowana yogu hekahekata. 27 Yo kaiteya nige yona sataulo ye bahei** na ye hemuliwatanigau, meta iya nige gonowana yogu hekahekata.

28 Taba ku henuwa bena numa kewana saesaena ku ginauli, bagubaguna ku tulibigabiga na maisana lakina ku kaimasiyei meta gonowana kabo numa ne ku hegehe. 29 Taba numa ne ku hetubu ku ginauli na nige gonowana ku hegehe, siya kaiteyadi numa ne taakitana kabo se talatalawasiyeigo 30 se wane, 'Teina tamowai ta ye hetubu numa ne ye kabi, na nige gonowana ye hegehe.'

31 Taba wasawasa hesau bena wasawasa hesau ye iyalai, bagubaguna ye tulibigabiga na ye kitasipwai'uyoi meta yona iyala tamowaidi badona 10,000 ne kabo gonowana wasawasa hesauna yona tau'iyala badona 20,000 ne ye iyalaidi, o nige. 32 Ena nige gonowana, na wasawasa hesauna wa sola kedalohalohawai, kabo yona tautauwasa ye hetamalidi bena nuwadaumwali se kaibwada. 33 Gonogonowana doha teina, komiu kaiteyadi nige yomi gogo maudoidi kwa nuwagabaedi meta nige gonowana kwa hemala yau yogu hekahekatao.

34 Kalita meta ye namwa, na taba kamnana ye gehe, taba nige gonowana kamnana ye hai'uyoi.** 35 Unai ede nige gonowana ta hepaisowa bwatano unai o tano kabahenamwana unai, na iya kabo se gaba. Kaiteyadi gonowana se lapulapui bena se lapulapuinamwanamwa!"

** 14:19: Bulumakau badodi saudoudoi: Luka ye kuli, bulumakau kabakaulabuiyedi haligigi ya hemaisadi, siya ede bulumakau badodi saudoudoi. Kaniyona ede, bulumakau labui labui se hepaisowadi yodi koyapaisowa udiyedi. Kabakaulabuiyedi se tole gadodi udiyedi na kabo bwatano kabagiyagiyali se niuniuli o witi kaniyona kabakabiyawasidi unai se paisowa, o paisowa saha hesau se ginauli. ** 14:27: Yona sataulo ye bahei: Hedehehede ta kaniyona meta bena ye talangabaei'uyoi gonowana Yesu debanaena ye boita. ** 14:34: Hedehehede ta hinage Maleko 9:50 yo Mataiyo 5:13 udiyedi ku hasili.

15

Mamoe ye taukwadalele palabolena (Mataiyo 18:10-14)

¹ Takisi tautanotano yo ba'aya tamowaidi se laomagogoi bena Yesu saha ye hedededi wa se lapuidi. ² Na Paliseya yo laugagayo taulauhekataena tamowaidi se gadigadigugu se wane, “Teina tamowai ta yababa tamowaidi ye hailobaidi yo maiyanao se kaikai.”

³ Ede Yesu teina palabole ta ye hedede kalidiyena ye wane, ⁴ “Taba luwamiu ne unai tamowai hesau yona mamoe badodi 100 na kesega ye taukwadalele, kabo 99 wa tenem teha ne unai ye laugabaedi na kesega ye taukwadalele wa ye wasenei kana siga ye lobai. ⁵ Na huyana ye lobai meta ye gwauyalakalili na ye tolesae dabayalona unai ⁶ na ye lau magai. Kabo kehanao yo helena taumiya ye yogagogoidi na ye hededelau kalidiwai ye wane, ‘Kwa laoma ta gwauyalagogoi, matawuwuna yogu mamoe ye taukwadalele wa ya lobaiyako.’

⁷ Ya hededelaowa kalimiuwai: Gonogonowana doha, ena ba'aya tauginaulina kesega ye nuwabui, meta galewa ne unai gwauyalalakilaki, na kabo laulaududulai tamowaidi badodi 99, siya nige bena taba se nuwabui ne kalidiyena.”

Siluba kesega ye taukwadalele palabolena

⁸ [Yesu yona hedehedede ye tubei ye wane,] “Yo taba sinebada hesau yona moni meta siluba saudoudoi, na kesega ye taukwadalele, kabo saha ye ginauli? Lampa ye gabu na yona numa ne ye kuya na ye wasetaubigai kana siga ye lobai. ⁹ Ena ye lobai kabo kana kahao yo helena taumiya ye yogagogoidima na ye hededelau udiyedi ye wane, ‘Kwa laoma ta gwauyalagogoi, matawuwuna yogu moni kesega ye taukwadalele wa ya lobaiyako.’

¹⁰ Ya hededelaowa kalimiuwai: Gonogonowana doha, ena ba'aya tauginaulina kesega ye nuwabui, meta galewa ne unai Yaubada yona anelu se gwauyalakalili.”

Tamowai natunao labui palaboledi

¹¹ Na Yesu yona hedehedede wa ye tubei ye wane, “Tamowai hesau natunao lohelo-heyao labui. ¹² Natuna taumulita wa ye hededelau tamana unai ye wane, ‘Tamagu, yom gogo maudoidi udiyedi yogu tupwa ku leyama.’ Ede yona gogo wa ye soiyei natunao wa udiyedi.

¹³ Mayadai hisa se lau na kabo taumulita wa yona gogo maudoidi ye lokunegabaeidi, na monidi wa ye haidi ede magai wa ye laugabaei ye lau magai hesau kedaloha unai. Menai kabo yona moni wa ye hepaisowagaibuidi laulau yabayababadi udiyedi. ¹⁴ Yona moni maudoina ye hepaisowahegehe, na kabo hasahasali lakilakikalilina ye lage tenem magai ne ye haihegehe. Tenem huyana ne unai meta nige saha hesau kalinawai. ¹⁵ Ede ye lau magai wa tamowaina hesau yona ye paisowa. Tamowai wa ye hetamali ye lau yona puwaka ye kitakitahetedi yo ye hekahekaidi. ¹⁶ Ye henuwa bena puwaka wa kadi kai ne ye kaidi, iyamo nige tamowai hesau ye talamyeyi taba saha hesau ye kai.

¹⁷ Huyana nuwatusibasiba ye uyoma kalinawai ede ye wane, ‘Tamagu yona tau-paisowa meta kadi kai se kaitoledi, na yau teinai ya hasalikalili nige bayaona kabo ya boita. ¹⁸ Unai kabo ya dalahai ya uyo tamagu unai, na ya hededelau unai ya wane, “Tamagu, ya ba'aya Yaubada matanaena yo kowa hinage matamyena. ¹⁹ Yau nige ya namwa bena ku kata'uyoigau yau natum, na taba ku kabigau doha yau yom taupaisowa hesau.”’ ²⁰ Unai ye dalahai ye uyo tamana unai.

Iya sola kedalohaloha unai ye laolaoma na tamana wa ye kitalau natuna ye kita meta nuwana ye kamkamnakalili. Na ye heloi ye lau natuna wa hesabana, ede ye haitalagadoi yo ye sumtai.

²¹ Na natuna wa ye hededelau tamana unai ye wane, ‘Tamagu, ya ba'aya Yaubada matanaena yo kowa hinage matamyena. Yau nige ya namwa bena ku kata'uyoigau natum.’

²² Na tamana wa ye yogalau yona heyayai tauhaidi udiyedi ye wane, ‘Mwamwayau! Kaleko namwanamwana kwa baheiyama kwa helikwa, na nimana unai lin kwa tole, yo hinage buti kwa helikwa. ²³ Na kwa lau bulumakau natuna sinisinibuna ne kwa koihemwaloi na ta gwauyala yo ta kaikaigogoi. ²⁴ Matawuwuna natugu ta kana kao doha ye boitako, na mahana ta unai ye mauli'uyo, ye taukwadalele na ta lobai'uyoi.’ Ede yodi gwauyala lakilakina wa se ginauli.

²⁵ Tenem mahanana ne unai natuna taubaguna wa koya unai ye paipaisowa. Huyana ye uyoma numa dedekanawai meta tamowai se wana yo se sobusobu dagugudi ye lapui. ²⁶ Ede heyayai tauhaina hesau ye yoganei ye laoma na ye henamaiyei meta teina saha ye laulau.

²⁷ Heyayai tauhaina wa ye hededebui ye wane, ‘Kam kaha wa ye uyoma magari. Ede tamam bulumakau natuna sinisinibuna wa ye koihemwaloi, matawuwuna natuna ye uyoma ma namwanamwana.’ ²⁸ Na taubaguna wa ye koipili na nige ye henuwa ye mwalaesae. Ede tamana ye pesa ye lau na ye kaibwada bena maiyana se mwalaesae. ²⁹ Na taubaguna wa ye hededelau tamana unai ye wane, ‘Ku kita ne! Bolimai hisa yom ya paipaisowa doha yom heyayai tauhaina hesau yo sola nige huya hesau ya kawagabaeigo. Na iyamo nige gouti natuna ku leyama bena unai kagu kahao maiyaguwao ka kaikaigogoi. ³⁰ Na teina natum ta yom moni ye gabagaibuidi sinesineo yabayababadi udiyedi, na ye uyoma magari, ede bulumakau natuna sinisinibuna ku koihemwaloi iya hesabana.’

³¹ Na tamana ye hededelau unai ye wane, ‘Natugu, huya maudoina kowa maidagu, yo yogu gogo maudoidi meta kowa yom. ³² Na teina kam kaha ta kana kao doha ye boitako na mahana ta unai ye mauli'uyo, ye taukwadalele na ta lobai'uyoi. Unai ye namwa mo taba ta kaikaigogoi yo ta gwauyala.’”

16

Taukitakitahetete sonosonogana palabolena

¹ Yesu ye hededelau yona hekahekatao wa udiyedi ye wane, “Tamowai gogogogona hesau iya yona gogo taukitakitahetetena se hegilu meta yona gogo ye kaiheyagaibuidi.

² Unai tamowai gogogogona wa yona taukitakitahetete ye yoganei na ye hededelau unai ye wane, ‘Na wasam ya lapui ta meta mamohoi? Tenem unai ya henuwa bena yogu moni kitakitahetetena bukadi ku ledima na ya kitadi, matawuwuna nige gonowana kitakitahetete paisowana ta ku ginauli'uyoi.’

³ Kobo taukitakitahetete wa ye bom yona ye hedehehede ye wane, ‘Saha kobo ya ginauli? Kagu tanuwaga yogu paisowa ta unai kobo ye hepesagau, na yau nige yogu bayao gonowana kobo bwatano ya keli, yo kaibwada hinage kagu mwadimwadine. ⁴ Kabina ya kata saha kobo ya ginauli na tenem unai tamowai gonowana kobo se yogaisinigau yodi numa udiyedi, huyana paisowa ta unai kagu tanuwaga ye hepesagau.’

⁵ Unai ede kana tanuwaga yona gogo udiyedi taukaihagahaga kesega kesega ye yoganeidi. Na bagubagunana wa ye henamaiyei ye wane, ‘Kowa kam hagahaga lakina doha saha kagu tanuwaga unai?’ ⁶ Tamowai wa ye wane, ‘Kagu hagahaga meta olibe bunamana lakina ede 3,000 lita.’ Na taukitakitahetete wa ye wane, ‘Yom hagahaga pepwana ku hai, mwamwayau ku tuli na 1,500 lita ku kulidi.’

⁷ Na tamowai helabuina ye henamaiyei ye wane, ‘Na kowa kam hagahaga hisa?’ Ede taukaihagahaga wa ye wane, ‘Kagu hagahaga meta witi baikidi badodi 100.’ Taukitakitahetete wa ye wane, ‘Yom hagahaga pepwana ku hai na baiki badodi 80 ku kulidi.’

⁸ Unai tanuwaga wa yona taukitakitahetete nige dudulaina wa ye hededehehenamwa yona kabikabi sonosonogadi wa debadiwai.

Ya hededelaowa kalimiuwai: Tanoubu ta tamowaidiyao yodi kabikabi tamowai hekadi udiyedi meta se sonogakalili, na kabo Yaubada yona mala unai taumiyamiya yodi kabikabi. ⁹ Unai taba tanoubu ta gogodiyao kwa hepaisowanamwanamwaedi na udiyedi tamowai kwa saguidi, na siya kabo se hemala kehamiyao. Na huyana yomi wasawasa ne se gehe meta kabo se yogaisinigomiu na maiyamiyao kwa miya.

¹⁰ Iya kaiteya ginauli gagilidi ye kitahetetenamwanamwaedi meta hinage ginauli lakilakidi kabo ye kitahetetenamwanamwaedi. Yo kaiteya ginauli gagilidi nige ye kitahetetenamwanamwaedi meta hinage ginauli lakilakidi nige gonowana ye kitahetetenamwanamwaedi. ¹¹ Ena komiu tanoubu ta ginaulidiyao udiyedi yomi kitakitahetete nige se dudulai, kaiteya kabo ye sunumaeigomiu na wasawasa mamohoidi ye lediwa bena kwa kitahetetedi? ¹² Yo ena tamowai hesau yona gogo nige kwa kitahetetenamwanamwaei, kaiteya kabo ye sunumaeigomiu na gogo ye mosegabaeidi kalimiukena?

¹³ Heyayai tauhaina meta nige gonowana tanuwaga labui yodi ye paisowa. Hesau kabo ye subu na hesauna wa kabo ye henuwa, o bagubagunana wa yona nuwatu ye ginauliwatanidi ma nuwakohihaina, na hesauna wa ye kitadobidobiyei. Unai nige gonowana Yaubada yo moni yodi kwa paisowa.”

¹⁴ Paliseya tamowaidi, siya moni taugadosisiyeidi, hedehedede ta se lapui meta Yesu se kaoyababaei. ¹⁵ Yesu ye hededelau udiyedi ye wane, “Tamowai matadiyena kwa hededehehesae'uyoigomiu meta komiu laulaududulai tamowaidi, na Yaubada nuwamiu kabidi ye katako. Ginauli saha tamowai se kitahesaekaliliyeidi meta Yaubada matanawai se yababakalili.”

Lauhekata hekadiyo

¹⁶ [Yesu ye hededetubei ye wane,] “Mose yona laugagayo yo peloweta yodi hedehedede wa se wasaduwaiyeidi ye lau ee Yowane ye laoma. Muliyea Yaubada yona basileiya wasana namwanamwana yau ya hededehehemasalaha, na tamowai maudoidi ya kaibwadakaliliyeidi bena se lusae basileiya wa unai.

¹⁷ Galewa yo tanoubu ta kabo se taukwadalele, na [Mose yona] laugagayo maudoidi udiyedi taba nige kulikuli gagilina hesau ye taukwadalele. ¹⁸ [Doha hinage] inawase laugagayona ta [nige gonowana ta bui]:** Ena loheya hesau mwanena ye inawasei na waihiu hesau ye tawasolai, meta ye ganawali. Na ena loheya hesau waihiu ina'inawasena ye tawasolai, meta iya hinage ye ganawali.”

Tamowai gogogogona yo Lasalo

¹⁹ “Tamowai gogogogona hesau iya meta kaleko maisa lakilakidi ye likwadi yo huya badobado meta nige saha hesau ye wasenei na ye gwaugwauyala mo. ²⁰ Na yona numa kawamatana unai meta taukaikaibwada tamowaina hesau se tole, hesana ede Lasalo, iya meta tauna bonu se laugilihai ²¹ yo ye henuwakalili bena tamowai gogogogona wa yona hatahata unai kana kai mapuladi se beku wa ye kaidi. Na kedewa se laoma meta bonuna wa se namosidi.

²² Huyana taukaikaibwada wa ye boita meta anelu se bahelaei se hetuli Abelahama dedekanawai. Tamowai gogogogona wa hinage ye boita ede bwayabwaya unai se tole. ²³ Na iya Hade luwana unai meta ye kamkamnalakilaki, na matana ye tuusaedi meta Abelahama ye kita kedalahawai maiyana Lasalo se tutuli. ²⁴ Unai ye yogasae kalinawai ye wane, “Tamagu Abelahama, ku katekamkamnaegau na Lasalo ku hetamali ye lau

** **16:18:** Yesu inawase laugagayona hedehededena ye hedehededei matawuwuna Paliseya yo laugagayo taulauhekataena wa laugagayo ta se bui na inawase se kawanamwanamwaei (Mataiyu 19:1-12). Ganawali meta laugagayo, unai Yesu yona hedehedede ta kaniyona meta tabu ta ina'inawase.

waila unai nimagigina ye hedakwa na memenagu ye hegwagwama, matawuwuna kaiwa ta unai ya kamkamnakalili.’ ²⁵ Na Abelahama yona bui ye mosei ye wane, ‘Natugu, ku nuwatui, yom mauli mayadaidi udiyedi yom ginauli namwanamwadi ku haidiko, na Lasalo ginauli yababadi ye haidi, na mayadai ta unai kamnana se namwa na kowa ku kamkamnakalili. ²⁶ Yo hinage kowa yo kai duwaduwalida ne unai meta duha lohalohana, unai ede nige gonowana kabo hesau inai ye kawasilaowa metai yo nige gonowana hesau metai ye kawasilaoma kalimaiwai.’

²⁷ Ede tamowai gogogogona wa ye wane, ‘Tamagu, ya kaibwadaigo, Lasalo ku hetamali ye lau yogu numa bodana udiyedi, ²⁸ kagu kahao haligigi ne ye hededebayao udiyedi, na taba nige se laoma kabakamkamna magaina ta unai.’

²⁹ Abelahama yona bui ye mosei ye wane, ‘Mose yo peloweta bukadi wa siya ede temenai, na taba yodi hedehedede ne udiyedi se lapulau.’

³⁰ Na tamowai gogogogona wa ye wane, ‘Nige! Tamagu Abelahama, taba tamowai hesau boita unai ye tolo'uyo na ye dobi udiyedi, kabo se nuwabui.’

³¹ Ye hededelau unai ye wane, ‘Ena nige se lapulapulau Mose yo peloweta udiyedi, meta tamowai hesau boita unai ye tolo'uyo wa taba nige gonowana ye henuwabuidi.’ ”

17

Yababa nuwatugabaeina yo sunuma hedehededei (Mataiyo 18:6-7 yo 18:15 yo 18:21-22, Maleko 9:42)

¹ Yesu ye hededelau yona hekahekatao wa udiyedi ye wane, “Mamohoi, tamowai yodi kabakalabesibesi kabo se hekalodi, na ahani mo iya kalabesibesi tauhetubudi ne.

² Ye namwa mo taba iya gadona ne unai weku lakilakina se pai na se heyoli gabwa ne unai, na nige ye namwa taba teina tamowai dobidobidi** ta hesau ye woyasapuli na yababa ye ginauli. ³ Unai kwa kitahetetenamwanamwaeigomiu. Ena kam kaha o loum ba'aya ye ginauli, ku guguyai. Ena ye nuwabui, yona ba'aya kalimwai ku nuwatugabaei. ⁴ Ena mayadai kesega unai yababa ye ginauli kalimwai ma haligigi-labui, yo ma haligigi-labui ye uyoma ye wane, ‘Ya nuwabui’, meta taba yona ba'aya kalimwai ne ku nuwatugabaeidi.”

⁵ Apostolo wa se hededelau Guiyau unai se wane, “Yoma sunuma ku helakidi.” ⁶ Na Guiyau ye hededebui ye wane, “Taba yomi sunuma se gagili doha kaiwa tumana gagilikalilina** meta gonowana kabo kwa hededelau kaiwa ne unai, ‘Ku suluhahaigo na gabwa ne unai ku kumaigo’, kabo ye kawakabiyeigomiu.

⁷ Taba komiu luwamiuyena hesau yona heyayai tauhaina koya ye paipaisowai o mamoe ye kitakitahetetededi na ye uyoma magai, meta kana tanuwaga taba nige ye hededelau unai ye wane, ‘Ku laoma ku tuli na ku kaikai!’ ⁸ Na ye hededelau unai ye wane, ‘Ku dui ku kabinonoha na kabo kagu kai ku nonohai na ku suwayama ya kaikai yo ya numa. Muliyena kabo hinage ku kaikai yo ku numa.’ ⁹ Saha ye hededei ne yona heyayai tauhaina wa ye ginauliwatanidi, iyamo kana tanuwaga taba nige ye lautokiyei. ¹⁰ Gonogonowana doha komiu hinage, ena ginauli maudoidi Yaubada ye hededei wa kwa ginaulidi, kabo kwa wane, ‘Kai meta heyayai tauhaidi dobidobidi mo, na kama paisowa mo ka ginaulidi.’”

Yesu tamowai saudoudoi lepela udiyedi ye henamwanamwadi

¹¹ Na Yesu yona lau Yelusalema ne hesabana meta Samaliya yo Galili kadi sigasiga duwaduwalina ye tauwatani na ye lau. ¹² Na huyana ye lusae magai hesau unai,

** **17:2:** Tamowai dobidobidi: Kalina Giliki unai hedehedede ta kaniyona labui: Tamowai gagilina, o, wawaya, yo, tamowai dobidobina, siya ede tamowai lakilakidi se kitadobidobiyeidi, yo hinage wawayao. ** **17:6:** Kaiwa tumana gagilikalilina ne Dimdim unai hesana se katai ede mustard. Like maudoidi ne udiyedi iya meta tumana se gagilikalili.

meta lepela tamowaidi badodi saudoudoi iya se hailobai. Na yodi kabatolo ne meta musamusana ye loha ¹³ na se yoga ma kalinalakilakidi Yesu unai se wane, “Yesu, Tanuwaga, ku katekamkamnaegai!”

¹⁴ Yesu ye kitalau na ye kitadi meta ye wane, “Kwa lau yo kwa hemasalaha'uyoigomiu taukaitalasam tamowaidi udiyedi.” Na se laulau taukaitalasam hesabadi na keda wa unai se namwanamwa.

¹⁵ Na kadi kaha hesau ye kita meta ye namwanamwako, ede ye uyo na kalinalakilaki unai Yaubada ye hedebasaei. ¹⁶ Na ye guliyaboyabomdobi Yesu kaena udiyedi na ye lautokiyei. Na iya meta Samaliya tamowaina.

¹⁷ Yesu ye hedede ye wane, “Taudi saudoudoi se namwanamwa. Na haligigi-hasi wa meta haedi? ¹⁸ Idohagi to nige tamowai hesau ye laoma bena Yaubada ye lautokiyei, na teina laolaoma tamowaina ta ye bom mo?” ¹⁹ Kabo ye hededelau kalinawai ye wane, “Ku tolo na ku lau, yom sunuma wa ye henamwanamwago.”

*Yaubada yona basileiya yona huyalaoma
(Mataiyo 24:23-28 yo 24:36-41)*

²⁰ Mayadai hesau unai Paliseya hekadi Yesu se henamaiyei se wane, “Kaiuyana kabo Yaubada yona basileiya ye laoma?” Yesu ye hededebui ye wane, “Yaubada yona basileiya yona laoma ne meta nige gonowana matamiuyena kwa kita, ²¹ yo nige gonowana tamowai hesau ye wane, ‘Kwa kita, iya ede teina,’ o ‘Iya ede tenem!’ Matawuwuna Yaubada yona basileiya meta ye laomako luwamiuyena.”

²² Kabo Yesu ye hededelau yona hekahekatao wa udiyedi ye wane, “Huyana ye laolaoma kabo kwa henuwakalili bena Tau Natuna yona tanuwaga mayadaina hesau kwa kita, na iyamo nige gonowana kwa kita. ²³ Tamowai kabo yomiu se hedehede se wane, ‘Iya ede temenai!’ o ‘Iya ede teinai!’ Na tabu kwa lau kwa hemuliwatanidi. ²⁴ Matawuwuna Tau Natuna yona huya'uyoma mayadaina ne unai meta doha namana-mali ye sili na dawayana meta yada ne maudoina kabo ye hedawaya. ²⁵ Na bagubaguna kabo ginauli hekadi udiyedi ye kamkamna yo teina isi ta iya kabo se subu.

²⁶ Tau Natuna yona laoma ne meta gonogonowana doha Nowa yona huya mayadaidi wa udiyedi. ²⁷ Tamowai se kaikai, se numanuma yo se tawatawasola ye lau ee kana siga Nowa ye mwalaesae ake wa unai. Kabo dibwali'utu'utu ye laoma yo tamowai maudoidi wa ye unuhemwaloihegedi.

²⁸ Na hinage gonogonowana doha Lota yona mayadai wa unai. Tamowai se kaikai yo se numanuma, se hemahemaisa yo se kunekune, se kumakuma yo se kabikabinuma. ²⁹ Na mayadaina Lota Sodoma ye laugabaei meta kaiwa yo salpa kalakalasi galewa ne unai se taludobima na tamowai maudoidi wa se kalamwaloigehe.

³⁰ Gonogonowana doha Tau Natuna yona huyataumasalaha ne unai. ³¹ Tenem mayadaina ne unai tamowai yona numa kewana unai taba nige ye pesadobi yona numa kalonawai bena yona gogo ye haidi. Gonogonowana doha, tamowai yona koya unai ye paipaisowa meta taba nige ye uyo yona numa, yona gogo hesabadi. ³² Hage, Lota mwanena kwa nuwatui!** ³³ Kaiteya yona mauli [*tanoubu ta unai*] ye nuwataliliiyei meta nige gonowana mauli [*nige kana siga*] ye lobai. Na kaiteya yona mauli [*tanoubu ta unai*] ye nuwagabaei yau debaguyena, iya kabo mauli [*nige kana siga*] ye lobai. ³⁴ Ya hededelaowa kalimiuwai: Tenem boniyaina ne unai tamowai labui kabakeno kesega unai se kenokeno. Yaubada kabo hesau ye hai na hesau ye laugabaei. ³⁵⁻³⁶ Waiwaihiuwo labui meta witi se gilgililabulabui. Yaubada kabo hesau ye hai na hesau ye laugabaei.”

**

** **17:32:** Lota mwanena wasana ede Genese 19:26 unai ku hasili. ** **17:35-36:** Pepwa kulikulidi bagubagunadi udiyedi lausoiso 36 nige se kuli, na muliyena kulikuli hekadiyo udiyedi lausoiso ne se kuli doha teina: Tamowai labui kabo koya unai se paisowagogo. Yaubada kabo hesau ye hai na hesau ye laugabaei.

³⁷ Yona hekahekatao wa se henamaiyei se wane, “Guiyau, teina ta meta kabo haedi se tubu?” Yodi bui ye moseidi ye wane, “Hage, manuwa kaikaitaudi kwa nuwatuidi. Siya gonowana suisui sinaledi se lobaidi na temenai kabo se lagegogoi. [*Gonogonowana doha, komiu hinage kabo kwa kitalobai meta teina ginaulidi ta haedi se tubu ne.*]

18

Kwabuli yona kaibwada palabolena

¹ Kabo Yesu yona hekahekatao udiyedi palabole hesau ye hedede, unai ye hemasalaha kalidiwai meta huya maudoina bena se tapwatapwalolo, na tabu se nuwabasabasa. ² Ye wane, “Magai hesau unai meta tauhekasa hesau, iya Yaubada nige ye matausiyei yo tamowai hinage nige ye hekasisiyeidi. ³ Na magaina ne unai meta kwabuli hesau, huya badobado ye laolaoma kalinawai yo ye wane, ‘Kagu waiunu ne unai ku saguigau na yogu dudulai ku leyama.’

⁴ Huya lohaloha yona kaibwada wa meta nige ye modei, na mulinawai kabo ye bom yona ye hedehedede ye wane, ‘Yaubada nige ya matausiyei yo tamowai nige ye hekasisiyeidi, ⁵ na teina kwabuli ta huya maudoina ye hemohemodegau, unai yona dudulai kabo ya mosei. Ena nige, kabo yona kaibwadamuyomuyou ta unai kamnagu ye heyababa!’ ”

⁶ Ede Guiyau ye wane, “Tauhekasa nige dudulaina wa yona hedehedede kwa nuwatu-idi. ⁷ Na ena Yaubada yona kaisunuwa tamowaidi mayadai yo boniyai yodi kaibwada se tole iya kalinawai meta kabo yodi dudulai ye moseidi o nige? Kabo yodi kaibwada ne ye hehuhehuyalaei? ⁸ Ya hededelaowa kalimiuwai: Iya kabo mwamwayau yodi dudulai ye moseidi. Na huyana Tau Natuna ye uyoma, kabo kaiyaulina ta unai tausunuma hekadi ye lobaidi o nige?”

Paliseya tamowaina yo takisi tautanotano palaboledi

⁹ Tamowai hekadi yodi nuwatu bena yodi miyamiya se namwakalili, ede tamowai hekadiyo se kitadobidobiyeidi. Yesu kabo kadi heyaheyasoni hesau ye hedede ye wane, ¹⁰ “Tamowai labui se lusae Numa Tabuna unai se tapwalolo, hesau Paliseya tamowaina yo hesau takisi tautanotano. ¹¹ Paliseya tamowaina wa ye tolo na ye bom yona ye tapwalolo ye wane, ‘Yaubada, ya lautokiyeigo! Yau meta nige doha tamowai hekadi ne, siya ede taukaikaiwahali, yababa tauginaginaulidi, tauganaganawali tamowaidi - yo doha takisi tautanotano ne. ¹² Sabati kesega unai meta ma labui ya kaihudi, yo yogu gogo maudoidi udiyedi meta taiti ya leyawa.’

¹³ Na takisi tautanotano wa kedalohawai ye tolo. Nige gonowana ye kaikewasae galewa, na nuwapouna unai ye koi na ye wane, ‘Yaubada, ku katekamkamnaeigau, yau tamowai ba'aba'ayana.’

¹⁴ Ya hededelaowa kalimiuwai: Teina takisi tautanotano ta yona ba'aya meta Yaubada ye nuwatugabaeidi na ye uyo yona numa. Na Paliseya tamowaina yona ba'aya nige ye nuwatugabaeidi. Matawuwuna siya kaiteyadi se hededetausae'uyoidi meta kabo Yaubada ye toledobidobiyeidi, yo siya kaiteyadi se nuwatudobidobiyei'uyoidi meta kabo Yaubada ye hesaedi.”

Wawayao gagilidi Yesu ye hededehenamwadi (Mataiyo 19:13-15, Maleko 10:13-16)

¹⁵ Huya hesau tamowai hekadi wawayao gagilidi se baheidima Yesu unai bena nimana ye tolesaedi kewadi ne udiyedi na ye hededehenamwadi. Na huyana yona hekahekatao tamowai wa se kitadi meta se dilaidi. ¹⁶ Na Yesu wawayao wa ye yoganeidi se laoma iya kalinawai na ye wane, “Wawayao gagilidi bena se laoma kaliguwai, na tabu kwa hekahekaiyawasidi, matawuwuna tamowai yodi sunuma doha teina wawayao ta meta galewa basileiyana siya yodi. ¹⁷ Ya hededemamohoi kalimiuwai: Tamowai nige

gonowana se lusola Yaubada yona basileiya unai kana siga yodi sunuma doha wawaya gagilidi ta.”

*Tamowai gogogodi yo Yaubada yona basileiya lusolana
(Mataiyo 19:16-30, Maleko 10:17-31)*

¹⁸ Dius yodi tauwoyawoya hesau Yesu ye henamaiyei ye wane, “Taulauhekata namwanamwana, saha kabo ya ginauli unai kabo mauli nige kana siga ya lobai?”

¹⁹ Yesu ye hededebui ye wane, “Idohagi to ku kataigau meta yau ya namwa? Nige tamowai hesau ye namwa, na Yaubada ye bom mo. ²⁰ Laugagayo kabidi ku kata: ‘Tabu ku ganawali, tabu ku kaiunu, tabu ku kaiwahali, tabu ku hededelupolupo, yo tamam yo sinam ku hekasisiyeidi.’”

²¹ Tamowai wa ye wane, “Huyana yogu huyatubusaema unai meta laugagayo ta ya lauwatanidi.”

²² Huyana Yesu hedehedede wa ye lapui ede ye hededelau unai ye wane, “Ginauli kesega mo sola nige ku ginauli. Yom gogo maudoidi ku lokunegabaeidi na monidi ne ku moseidi tamowai dehadehadiyao udiyedi, na kabo galewa ne unai ku wasawasa. Na kabo ku laoma ku hemuliwatanigau.”

²³ Huyana tauwoyawoya wa Yesu yona hedehedede ye lapui meta nuwana ye yababakalili, matawuwuna iya tamowai gogogogona. ²⁴ Yesu ye kaikewalau unai na ye wane, “Tamowai gogogodi bena se lusola Yaubada yona basileiya unai meta ye pilipikalili. ²⁵ Doha kamela nige gonowana diu duhana unai ye lusola, gonogonowana doha tamowai gogogogona meta iya hinage nige gonowana ye lusola Yaubada yona basileiya unai.”

²⁶ Hedehedede ta taulapuidi se wane, “Unai kaiteyadi kabo gonowana mauli nige kana siga se hai?”

²⁷ Yesu yodi bui ye moseidi ye wane, “Saha tamowai nige gonowana se ginaulidi meta Yaubada gonowana ye ginaulidi.”

²⁸ Na Petelo ye hededelau Yesu unai ye wane, “Kai kabo idohagi? Yoma gogo maudoidi ka laugabaeidiko na ka hemuliwatanigo.”

²⁹ Yesu ye hededelau udiyedi ye wane, “Ya hededemamohoi kalimiuwai: Ena tamowai hesau yona numa o mwanena o kana kaha o sinana yo tamana o natunao ye laugabaedi Yaubada yona basileiya debanawai ³⁰ meta iya teina huya ta unai yona gogo se badokalili kabo ye haidi yo huya matada ne unai kabo mauli nige kana siga ye hai.”

*Yesu yona boita hedehededena hehaiyonana ye hededehemasalaha
(Mataiyo 20:17-19, Maleko 10:32-34)*

³¹ Yesu yona hekahekatao saudoudoi-labui wa ye woyahesuwaladi na ye hededelau udiyedi ye wane, “Kwa lapulapuinanamwanamwa! Ta saesae Yelusalema, na ginauli maudoidi peloweta se kulidiko Tau Natuna hesabana wa kabo se tubu. ³² Iya kabo se moselaei dagela tamowaidiyao udiyedi. Siya kabo se kabihenayaei, se talatalawasiyei, yo se kaikaisoi, ³³ yo kabo wipi unai se pidili, yo se unuhemwaloi. Na mayadai hehaiyonana unai kabo ye tolo'uyo.”

³⁴ Na yona hekahekatao wa teina hedehedede ta unai nige saha hesau se nuwatulobai. Hedehedede wa kaniyona Yaubada ye tolewadam kalidiwai ede saha Yesu ye hedehededeidi ta nige kabidi se kata.

*Yesu tamowai matagibugibuna ye henamwanamwa
(Mataiyo 20:29-34, Maleko 10:46-52)*

³⁵ Huyana Yesu Yeliko magaina lakilakina ye hanahanawui meta menai tamowai hesau matagibugibuna keda dedekanawai ye tutuli na ye kaikaibwada. ³⁶ Boda wa se laulau na kalikalinadi ye lapuidi ede ye henamaiyeidi ye wane, “Saha ye laulau?”

³⁷ Yona se hedehedede se wane, “Yesu Nasaleta tamowaina wa ye laoma ye lau.”

³⁸ Kabo ye yogalakilaki ye wane, “Yesu, Dawida Natuna, ku katekamkamnaegau!”
³⁹ Na kaiteyadi keda unai se bagubaguna wa se dilai bena ye mwanou. Iyamo ye yogalakilakikalili ye wane, “Dawida Natuna, ku katekamkamnaegau!”
⁴⁰ Yesu ye talutolo na ye hedede bena tamowai wa se woyalaeiyama kalinawai. Huyana ye lage iya dedekanawai ede ye henamaiyei ye wane,
⁴¹ “Saha ku henuwa bena yom ya ginauli?” Taumatagibugibu wa ye wane, “Guiyau, ya henuwa bena matagu ta ku helaladi.”
⁴² Yesu ye hededelau unai ye wane, “Matam kabo se lala. Yom sunuma ne ye henamwanamwago.”
⁴³ Mahanana ne unai matana wa se lala ede Yesu ye hemuliwatani, yo Yaubada ye hedebasaei. Huyana tamowai maudoidi saha ye tubu wa se kita meta hinage Yaubada se hedebasaei.

19

Sakiusa Yesu ye hailobai

¹ Yesu ye lage Yeliko na magari duwaduwalina unai ye laulau. ² Tamowai hesau menai hesana ede Sakiusa. Iya meta takisi tautanotano kadi tanuwaga saesaena, yo tamowai gogogogona. ³ Ye henuwa bena Yesu ye kita, Yesu meta tamowai sahasahana. Iyamo saliyana meta ye kubwa, unai nige gonowana boda luwadiyena Yesu ye kita. ⁴ Ede ye heloibaguna ye lau kaiwa hesana sikamona ye mwalaei bena kabo Yesu ye kita, matawuwuna Yesu kabo tenem teha ne unai ye lau.

⁵ Na huyana Yesu ye lage yona kabamwalae wa unai ede ye tamaisi na ye hede-sae kalinawai ye wane, “Sakiusa, ku pesamwamwayauma. Matawuwuna teina mayadai ta kabo ya laowa yom numa ne unai ya hemala kam taumana.”
⁶ Unai ye pesamwamwayau na Yesu ye hailobai ma gwauyalana.

⁷ Tamowai maudoidi saha ye tubu wa se kita na se hetubu se gadigadiguguyei se wane, “Iya ba'aya tamowaina, na Yesu ye lau kalinawai ede ye hemala kana taumana.”

⁸ Na Sakiusa ye tolo ede ye hededelau Guiyau unai ye wane, “Guiyau! Yogu gogo tehana kabo ya moseidi tamowai dehadehadi udiyedi, yo ena ginauli hesau tamowai hesau unai ya kabihagahagai meta kabo ma hasi maisana ne ya koihepwatalaei.”

⁹ Kabo Yesu ye hededelau unai ye wane, “Teina mayadai ta, gilihai ye laoma teina numa ta unai, matawuwuna teina tamowai ta meta hinage Abelahama natuna.”**

¹⁰ Matawuwuna Tau Natuna ye laoma bena tamowai gegegegedi ye waseneidi yo ye gilihaidi.”

Saha ta haiyako bena ta hepaisowanamwanamwaei (Mataiyo 25:14-30)

¹¹ Tamowai wa sola se lapulapui Yesu yona hedehedede wa udiyedi na heyaheya-soni hesau ye hedede kalidiyena, matawuwuna ede Yelusalema ye hanahanawui na tamowai yodi nuwatu ede huyana ye lage Yelusalema, kabo Yaubada yona basileiya ye masalaha. ¹² Ede ye wane, “Tamowai saesaena hesau ye lau magari hesau kedalo-halohawai bena wasawasa gigibwalina ye hai na kabo ye uyoma yona tamowai yodi wasawasa. ¹³ Unai yona heyayai tauhaidi luwadiyena saudoudoi ye yogagogoidima na kesega kesega denali 100 ye moseidi. Na ye hededelau kalidiwai ye wane, ‘Teina moni ta kwa hepaisowadi na kwa helakidi ye lau ee kana siga ya uyoma.’

¹⁴ Na yona magari tamowaidi meta iya se subu na tautauwasa se hetamalidi se hemuliwatani se lau magari ne unai na se wane, “Tamowai ta nige ka henuwa bena yoma wasawasa!”

** **19:9:** Abelahama natuna kaniyona se bado. (1) Iya Abelahama kana isimulita yo Dius tamowaina hesau. (2) Yona sunuma doha Abelahama. (3) Yona nuwabui unai ye hemasalaha'uyoi meta iya Yaubada yona tamowai hesau doha Abelahama.

¹⁵ Na iyamo tamowai wa wasawasa gigibwalina ye hai na kabo ye uyo yona magai. Yona heyayai tauhaidi saudoudoi wa ye yoganeidi bena moni yodi hepahepaisowana na hisa unai se lobai wa ye henamaiyeidi.

¹⁶ Bagubagunana ye laoma ye wane, 'Guiyau, yom denali 100 unai meta denali 1,000 ya lobaidi.'

¹⁷ Kana tanuwaga ye hededelau kalinawai ye wane, 'Ye namwakalili! Kowa meta yogu heyayai tauhaina namwanamwana! Ginauli gagilina unai yom kitakitahetete ye namwa, unai kabo ya tolego magai lakilakidi saudoudoi ku tanuwagaidi.'

¹⁸ Helabuina ye laoma ye wane, 'Guiyau, yom denali 100 wa unai meta denali 500 ya lobaidi.'

¹⁹ Kana tanuwaga wa ye wane, 'Kowa kabo magai lakilakidi haligigi ku tanuwagaidi.'

²⁰ Kabo heyayai tauhaina hesauna wa ye laoma ye wane, 'Guiyau, yom denali 100 wa siya ede teina. Kaleko teuna unai ya suma na ya tolewadam se miyamiya, ²¹ kaniyona ede ya matausiyeigo, matawuwuna kowa tamowai kabiyabayababana. Ginauli saha nige ku toledi meta ku haidi, yo like saha nige ku kumaidi meta ku tanogogoidi.' ²² Kana tanuwaga ye wane, 'Kowa heyayai tauhaina yababana! Yom hedehe dede ta unai kabo ya hekasago! Kabina ku kata meta yau tamowai kabiyabayababana, ginauli saha nige ya toledi meta ya haidi, yo like saha nige ya kumaidi ne meta ya tanogogoidi. ²³ Ye saha to yogu moni nige ku tole banka unai? Na huyana ya uyoma kabo yogu moni ya hai'uyoi yo hagahagana ne hinage.'

²⁴ Kabo ye hededelau yona heyayai tauhaidi siya menai tautotolo wa udiyedi ye wane, 'Moni iya kalinawai ne kwa haigabaei na kwa mosei iya denali 1,000 tauhaina ne kalinawai.'

²⁵ Na se wane, 'Guiyau, iya denali 1,000 ye haidiko!'

²⁶ Na kadi tanuwaga yodi bui ye moseidi ye wane, 'Ya hededelaowa kalimiuwai: Kaiteyadi saha se haiyako na se hepaisowanamwanamwaei meta kabo yodi gogo ya helakidi. Na kaiteyadi saha se haiyako na nige se hepaisowanamwanamwaei meta saha yodi wa kabo ya haigabaei. ²⁷ Na kagu wai'unuwao, siya nige se henuwagau yodi wasawasa ne, meta kwa woyaidima inai na mataguyena kwa koihemwaloidi.' "

*Yesu Yelusalema unai se hailobai doha wasawasa
(Mataiyo 21:1-11, Maleko 11:1-11, Yowane 12:12-19)*

²⁸ Yesu yona hedehe dede ta mulidiwai kabo ye bagunaidi se sae Yelusalema. ²⁹ Magai Betepage yo Betaniya se hanahanawuidi na kuduli hesau hesana Olibe Kudulina unai se lage. Temenai kabo yona hekahekatao labui ye hetamalidi ³⁰ ye wane, "Kwa lau magai matamiu ne unai, na huyana kwa lagelau meta kabo donki natuna se paipaihekahini kwa kita, sola nige tamowai hesau ye tulisae kewana ne unai. Kwa yailihai yo kwa woyaiyama inai. ³¹ Ena tamowai hesau ye henamaiyeigomiu ye wane, 'Ye saha to kwa yaiyaili?', kwa wane, 'Guiyau ye henuwa.' "

³² Se lau na saha ye hedededi wa se lobaidi. ³³ Donki natuna mainana se yaiyaili, na tanuwaganao se henamaiyeidi se wane, "Ye saha to donki natuna me kwa yaiyaili?"

³⁴ Yodi bui se moseidi se wane, "Guiyau ye henuwa."

³⁵ Kabo se woyai se laei Yesu unai, na kadi kwama se tolesaedi donki natuna wa kewanaena na Yesu ye tulisae unai. ³⁶ Iya ye laulau na tamowai kadi kwama se yesedi keda wa unai.

³⁷ Huyana Olibe Kudulina kedana kabalidilididobina ye hanahanawui kabo yona hekahekatao bodalakilaki wa se gwayuala yo kalinalakilaki unai Yaubada se hede-basaei laulau gigigibwalidi maudoidi se kitadi wa debadiwai, se wane,

³⁸ "Yoma wasawasa, ka hede-basaego, Guiyau hesanawai ku laoma!"

"Yaubada nuwadaumwali ye leyama kalidawai

yo hede-basae maudoina ye lau Yaubada Saesaekalilina unai!"

³⁹ Na Paliseya hekadi boda wa luwadiwai se hededelau Yesu unai se wane, “Taulauhekata, yom hekahekatao ne ku dilaidi!” ⁴⁰ Na ye hededebui ye wane, “Yomiu ya hedehedede: Ena se mwanomwanou, kabo weku ne se yogayogahi!”

⁴¹ Yesu Yelusalema ye hanahanawui na magari lakilakina wa ye kita ede sabina ye dou, ⁴² na ye wane, “Taba bena kowa hinage teina mayadai ta unai ku nuwatulobai meta idohagi kabo nuwadaumwali ku hai. Na Yaubada nuwadaumwali matamiu ne udiyedi ye tolewadam.

⁴³ Huyadi se laolaoma kabo kam waiunu gana lakilakina yo bayabayaona se ginauli** na ye hetakikiligo teha maudoina udiyedi, na yom kabapesa maudoidi se guduidi. ⁴⁴ Siya kabo se hetatagwaligwalihegehego yo hinage yom taumiyamiya ma natudiyao se unuhemwaloidi. Na taba nige weku hesau kabo ye miyamiya yona hali weku kewanaena, matawuwuna Yaubada ye laomako bena ye gilihaigomiu, iyamo gilihai mahanana ta nige kwa kitalobai.”

*Yesu taulokulokune numa tabuna bakubakuna unai ye henakuhepesadi
(Mataiyo 21:12-17, Maleko 11:15-19, Yowane 2:13-16)*

⁴⁵ Kabo Yesu ye mwalaesae Numa Tabuna bakubakuna unai na taulokulokune ye henakuhepesadi. ⁴⁶ Ye hededelau kalidiwai ye wane, “Kulikuli tabuna unai se kuliyako se wane, ‘Yogu numa meta kabatapwalolo numana’ (Aisaiya 56:7), na komiu kwa hai ye hemala ‘taukaikawaiwahali yodi duha’ (Yelemaiya 7:11).”

⁴⁷ Na kabo mayadai kesega kesega Numa Tabuna wa unai ye laulauhekata. Na taukaitalam tauwoyaidi yo laugagayo taulauhekataedi yo Dius yodi babadao se henuwa bena se unui. ⁴⁸ Na iyamo nige keda hesau se lobai kabo unai se unui, matawuwuna tamowai maudoidi meta yona hedehedede wa se henuwadi.

20

*Yesu yona tanuwaga gigibwalina se henamaiyei
(Mataiyo 21:23-27, Maleko 11:27-33)*

¹ Mayadai hesau Yesu Numa Tabuna bakubakuna unai ye laulauhekata yo wasa namwanamwana ye laulauguguyaei tamowai udiyedi. Na taukaitalam tauwoyaidi yo laugagayo taulauhekataedi tamowaidi yo magari babadadiyao maiyadiyao se laoma ² na se hedehedelau Yesu unai se wane, “Yomai ku hedehedede: Gigibwali sahasahana unai teina laulau ta ku ginaulidi, yo kaiteya yom dudulai ye haiyawa?”

³ Yesu ye hededebui udiyedi ye wane, “Kabo yau hinage ginauli hesau ya henamaiyeigomiu na yogu kwa hedehedede: ⁴ Yowane yona dudulai ye hebaheba-batiso ne meta Yaubada unai ye laoma o tamowai udiyedi ye laoma?”

⁵ Na se hetubu se bom se henahenamai'uyoidi se wane, “Saha kabo ta hedede? Taba ta wane, Yaubada unai ye laoma, kabo ye wane, ‘Na idohagi to nige kwa kawamamohoiyei?’ ⁶ Na taba ta wane, tamowai udiyedi, meta boda maudoidi ta kabo se hekalawekuda, matawuwuna ede yodi nuwatulobai meta Yowane iya peloweta.”

⁷ Ede se wane, “Nige kabina ka kata haedi ye laoma.”

⁸ Unai Yesu ye hededelau udiyedi ye wane, “Kabo yau hinage taba nige ya hededehe-masalaha haedi yogu gigibwali yo yogu dudulai ta ya haidi na laulau ta ya ginaulidi.”

*Koya taukitakitahetetena palaboleli
(Mataiyo 21:33-46, Maleko 12:1-12)*

** **19:43:** Gana lakilakina yo bayabayaona se ginauli: Yelusalema meta ganana bayabayaona weku unai se ginauli. Na huyana Loma yodi tau'iyala Yelusalema se iyalaei meta gana helabuina se ginauli bwatano unai, gana bagubagunana wa dagelana unai. Yodi nuwatu bena tabu Yelusalema tamowaidi se wasabu, yo tabu tamowai hesau kadi kai ye baheiyama, na bena hasahasali ye haidi na se boita. Laulau maudoidi ta meta bolimai 70 AD unai se tubu.

⁹ Kabo Yesu teina palabole ta ye hedede tamowai udiyedi ye wane, “Tamowai hesau wine koyana ye kumai na kabo ye moselaei taukitakitahetete udiyedi na ye lau ye kadau huyalohaloha. ¹⁰ Wine huyagigidi nawalaina ye lage ede yona heyayai tauhaina hesau ye hetamali ye lau wine koyana taukitakitahetetedi wa udiyedi kabo wine gigigiginonohadi wa udiyedi koya tanuwagana yona lausoiso bena ye haidi. Na taukitakitahetete wa heyayai tauhaina ne se biteli na se hetamali ma nimagaibuna ye uyo. ¹¹ Ede yona heyayai tauhaina hesau ye hetamali, na hinage taukitakitahetete wa se biteli yo se kabihenahenayai na se hetamali ma nimagaibuna ye uyo. ¹² Ede yona heyayai tauhaina hehaiyonana ye hetamali'uyoi. Na taukitakitahetete wa se hekaiboita na se tuuhepesa.

¹³ Ede koya tanuwagana wa ye wane, ‘Kabo saha ya ginauli? Natu kesekesegagu ya gadosisikaliliyei ta ya hetamali. Nuwana kabo se hekasisiyei.’

¹⁴ Na huyana taukitakitahetete wa natuna se kita meta se bom yodi se hedehedede se wane, ‘Teina ta meta koya tanuwagana lauhedamaina. Kwa laoma ta koihemwaloi, na yona gogo ne kabo yoda!’ ¹⁵ Ede koya wa unai se tuuhepesa na se koihemwaloi.” [Na Yesu ye henamai ye wane,] “Koya tanuwagana kabo saha ye ginauli taukitakitahetete wa udiyedi? ¹⁶ Kabo ye laoma ye koihemwaloidi na koya ne ye moselaei tamowai hekadi udiyedi.”

Na taulapulapui wa se wane, “Teina ta taba tabu ye tubu!”

¹⁷ Yesu ye kaikewalau udiyedi na ye wane, “Unai hage, kulikuli tabudiyao udiyedi teina hedehedede ta kabina kwa kata o nige?

‘Taukabinuma weku se şubu'usei wa meta

ye hemala kabakabinuma wekuna namwanamwana yo saesaekalilina.’ (Same 118:22)

¹⁸ Ena hesau ye bekudobi weku ne unai kabo ye talugodugodu, na ena weku ne ye bekudobi tamowai hesau kewanaena meta kabo ye kaihesolusolu.”

¹⁹ Laugagayo taulauhekataedi yo taukaitalasam tauwoyaidi wa se nuwatulobai meta palabole ta siya kadi hedehedede. Na tenem mahanana ne unai se henuwakalili bena Yesu se hai se kabihekahini, na boda wa se matausiyeidi.

Sisa unai takisi tolena e nige?

(Mataiyo 22:15-22, Maleko 12:13-17)

²⁰ Na kabo Yesu se kaikewasipwanamwanamwaei na taukaikewasipwa se hetamalidi se lau na kadi kao se ginaulidi doha siya tamowai dudulaidi. Yodi nuwatu bena Yesu se hekalabesibesi yona hedehedede udiyedi, na unai kabo se moselaei Loma yodi gabana yona tanuwaga gigibwalina unai. ²¹ Na se henamaiyei se wane, “Taulauhekata, kabina ka kata meta saha ku hedehededeidi yo yom lauhekata meta se dudulai. Yo hinage kabina ka kata meta tamowai nige ku gadosisihinelidi, na mamohoiyena laulau saha Yaubada ye henuwa bena ta miyawatanidi meta ku lauhekataedi. ²² Unai ka henamaiyeigo na yomai ku hedehedede: Ye dudulai kabo takisi ka mosei Sisa unai o nige?”

²³ Yodi kailupolupo Yesu ye kita na ye wane, ²⁴ “Hage, denali hesau kwa leyama ya kita. Teina kaiteya kana kao yo hesana?”

Se wane, “Sisa.”

²⁵ Ye hededelau udiyedi ye wane, “Saha Sisa yona meta kwa mosei Sisa unai, na saha Yaubada yona meta kwa mosei Yaubada unai.”

²⁶ Na tenem unai nige gonowana iya se hekalabesibesi yona hedehedede udiyedi boda matadiwai. Na yona hededebui unai se siliyatakalili, ede se mwanouhai.

Tautolo'uyoma meta nige se tawatawasola

(Mataiyo 22:23-33,46, Maleko 12:18-27,34)

²⁷ Sadusiya tamowaidi yodi nuwatu tauboiboita taba nige se tolo'uyoma. Na se laoma Yesu se henamaiyei se wane, ²⁸ “Taulauhekata, Mose yona kulikuli unai ye wane, ‘Ena tamowai hesau ye boita, na mwanena ye miyamiya, na nige natunao, meta bena kana kaha hesau kwabulina ne ye tawasolai na natunao ye labasidi, kabo natudi loheya taubaguna ye hemala kana kaha wa natuna.’ ²⁹ Huya hesau meta tamowai hesau ma kana kahao, badodi haligigi-labui. Taubaguna ye tawasola, nige natunao, na ye boita. ³⁰ Na kana kaha helabuina kwabuli wa ye tawasolai, na hinage ye boita. ³¹ Na kabo hinage kana kaha hehaiyonana iya ye tawasolai. Laulau wa kesekesegana ye tubu badodi haligigi-labui wa udiyedi. Nige natudiyao na se boita. ³² Gehegehena kwabuli wa hinage ye boita. ³³ Badodi haligigi-labui wa meta waihiu wa se tawasolai, na tolo'uyoma unai waihiu wa kabo kaiteya mwanena?”

³⁴ Yesu ye hededelau udiyedi ye wane, “Tanoubu ta tamowaidiyao se tawasola yo natudiyao se hetawasoladi. ³⁵ Na kaiteyadi Yaubada ye kitahenamwadi meta boita unai se tolo'uyo na huya matada ne unai kabo se miyamiya, kabo taba nige se tawasola o se hetawasoladi. ³⁶ Siya kabo doha anelu yo nige gonowana se boita. Siya Yaubada natunao, matawuwuna ede boita unai se tolo'uyoko. ³⁷ Mose hinage ye hededehehemasalahan meta tauboiboita kabo se tolo'uyo. Matawuwuna huyana Guiyau ye taumasalahan kalinawai kaiwa kalakalasina wa unai, meta ye katai, ‘Abelahama yona Yaubada, yo Isako yona Yaubada, yo Yakobo yona Yaubada.’ (Esodo 3:6) ³⁸ Yaubada ta iya nige tauboiboita yodi Yaubada, na iya taumaumauli mo yodi Yaubada. Matawuwuna iya kalinawai tamowai maudoidi se maumauli.”

³⁹ Na laugagayo taulauhekataedi hekadiyo se talam se wane, “Taulauhekata, yom hedehedede me se namwakalili!” ⁴⁰ Na nige hesau ye nuwabayao bena ye henamai'uyoi.

Keliso meta kaiteya natuna?

(Mataiyo 22:41-46, Maleko 12:35-37)

⁴¹ Na kabo Yesu ye hededelau udiyedi ye wane, “Idohagi to se hedede meta Keliso iya Dawida natuna? ⁴²⁻⁴³ Na Dawida meta Same bukana unai ye kulihemasalahayako ye wane,

‘Guiyau ye hededelau yogu Guiyau unai ye wane,

“Nimatutuguyena ku tuli** ye lau ee kam waiunu ya toledi kaem guninaena

na se hemala kaem kabatoledi.” ’

(Same 110:1)

⁴⁴ Dawida meta Keliso ye kawaguiyauyei. Idohagi na iya bena Dawida natuna?”

Hedehedede bayabayaona ye lau laugagayo taulauhekataedi udiyedi

(Mataiyo 23:1-36, Maleko 12:38-40, Luka 11:37-54)

⁴⁵ Tamowai maudoidi wa sola ma lapulapuidi Yesu unai, na ye hededelau yona hekahekatao wa udiyedi ye wane, ⁴⁶ “Bena kwa kitanamwanamwa laugagayo taulauhekataedi udiyedi. Yodi taitaihile udiyedi se henuwa bena kwama lohalohadi se luwuidi yo kabalokulokune udiyedi bena tamowai siya se laulautokiyeyidi ma hekasisidi, yo hinage sunago yo kabakaikaigogo udiyedi kabatuli saesaedi se henuwadi. ⁴⁷ Na kwabukwabuli yodi numa se lupohaidi, yo yodi tapwalolo se helohadi bena kabo tamowai se nokoeidi. Tamowaidiyao ne Yaubada kabo ye hekamkamnakaliliyeyidi.”

21

Kwabuli dehadehana yona kainauya

(Maleko 12:41-44)

** **20:42-43:** Nimatutuguyena ku tuli: Guiyau nimatutuna unai kabatulina ne meta tamowai saesaedi yodi kabatuli.

¹ Yesu [sola Numa Tabuna unai, na] ye kaikewasae ede tamowai gogogodi ye kitadi yodi moni se toletoledi moni kaba'usa'usa wa kalodi udiyedi. ² Yo hinage kwabuli hesau dehadehana ye kita meta pene gagilidi** labui ye usaidi. ³ Na ye wane, “Ya hededemamohoi kalimiuyena: Teina kwabuli dehadehana ta kainauya lakilakikalilina ye tole na kabo maudoidi ne. ⁴ Matawuwuna ede siya yodi moni lakilakidi udiyedi na kabo hisa mo se haidi na se toledi, na iya yona deha unai yona moni maudoina kalinawai wa ye tolehegehe.”

*Numa tabuna hetatagwaligwalina yo huya gehegehedi hekihekinoidi
(Mataiyo 24:1-28, Maleko 13:1-23)*

⁵ Yesu yona hekahekatao hekadi Numa Tabuna lauyahina wekudi taditadidi yo kaba-hepasadi tamowai se moseidi Yaubada unai wa meta se hetahetaladi. Na Yesu ye wane, ⁶ “Mahanana ye laolaoma, kabo ginauli maudoidi kwa kitadi ta se ulugwaligwaligehe, na taba nige weku hesau kabo ye miyamiya yona hali weku kewanaena.”**

⁷ Kabo Yesu se henamaiyei se wane, “Taulauhekata, kaiuyana kabo laulau ne se tubu, na yodi huyatubu ne hekihekinoidi saha?”

⁸ Yesu ye wane, “Kwa kitakitanamwanamwa! Tabu tamowai se lupohaigomiu. Tamowai se bado kabo se laoma hesaguyena se hedehehede se wane, ‘Yau ede iya,’ yo se wane, ‘Mahanana ye hanahanaumako.’ Na tabu kwa hemuhemuliwatanidi. ⁹ Huyana iyala yo haikabi wasadi kwa lapuidi meta tabu kwa matausi. Matawuwuna ginaulidi ta kabo se tububaguna, na mulinawai tanoubu yona huyagehe taba nige ye laumwamwayauma.”

¹⁰ Na yona hedehehede ye tubei ye wane, “Boda hesau kabo ye tolo boda hesau ye iyalai, yo basileiya hesau kabo basileiya hesau ye hewaiunu. ¹¹ Kabo mwanikuniku lakilakidi, hasahasali yo kasiyebwa teha udoi udoi udiyedi, yo kabikabi nuwamata-matausidi, yo hekihekinoi saesaedi galewa ne unai se masalaha.

¹² Teina ginaulidi ta sola nige se tubu, na tamowai se haigomiu na se hekamkam-nagomiu. Na kabo se woyalaegomiu yodi sunago babadadiyao udiyedi na se tolegomiu numatutugudu udiyedi. Yo se woyalaegomiu wasawasa yo gabana matadiyena, matawuwuna yomi sunumaegau ne debanawai. ¹³ Na tenem mahanana ne kabo yomi huya namwanamwana bena kwa hedehehemasalahagau kalidiwai. ¹⁴ Na yomi nuwahineli kwa ginaulidi meta taba nige kwa nuwamode saha kabo kwa hedede tauhegilugomiu ne udiyedi. ¹⁵ Matawuwuna ede, hedehehede yo sibasiba kabo ya haidiwa, unai kami waiunu nige gonowana se tolobayao na se hedehebui. ¹⁶ Sinamiyao yo tamamiyao, kami kahao yo loumiyao yo kehamiyao kabo kami se walohai [na se moselaegomiu tauhekilaino udiyedi] na hekamiu kabo se unuhemwaloigomiu. ¹⁷ Tamowai maudoidi kabo se subugomiu yau debaguyena. ¹⁸ Na iyamo nige gonowana kulumiu ne maiyawana kesega ye taukwadalele.** ¹⁹ Yomi tolobayao ne unai kabo mauli nige kana siga kwa hai.”

*Yelusalema yona huyatatagwaligwali mayadaina
(Mataiyo 24:15-21, Maleko 13:14-19)*

²⁰ “Huyana kabo kwa kita iyala tamowaidiyao Yelusalema se tolohetakikili, ede kabina kwa kata meta nige bayaona kabo hetatagwaligwalina mayadaina ye lage. ²¹ Na kaiteyadi teha Yudeya unai se miyamiya, bena se wasabu se lau kuduli udiyedi. Na kaiteyadi magailaki ta unai taumiya bena se pesahai se laugabaei. Yo kaiteyadi magailaki ta dagelana unai se miyamiya, tabu se lusaema. ²² Tenem huyana ne meta

** **21:2:** Pene gagilidi meta lepetona. ** **21:6:** Luka 19:43-44 hinage ku hasili. ** **21:18:** Lausoiso ta meta heyaheyasoni. Na kaniyona ede, Yaubada taba nige ye kitagabaeidi, na ye kitahetetedi na nige gonowana mauli nige kana siga se haigabaei kalidiyena. Iyamo tanoubu ta unai gonowana se unuhemwaloidi.

hekamkamna huyana. Ede saha kulikuli tabuna unai se kuliyo wa kabahemamo-hoiyena. ²³ Ahani mo kaiteyadi taudiyadiyaka yo kaiteyadi natudiyao se hesuhesusudi tenem mayadaidi ne udiyedi! Matawuwuna pilipili lakilakina kabo ye laoma teina tano maudoina ta unai na [*Yaubada yona*] kouyalayala lakilakina kabo ye talu teina tamowai maudoidi ta udiyedi. ²⁴ Kabo iyala kelepana unai se unuhemwaloidi o se haidi na se woyalaedi dagela tamowaidiyao yodi basileiya maudoidi udiyedi. Na Yelusalema kabo dagela tamowaidiyao se saedikwai na se tanuwagai ye lau ee kana siga dagela tamowaidi wa yodi huya ye lau ye gehe.”

Tau Natuna yona huya'uyoma
(*Mataiyo 24:29-31, Maleko 13:24-27*)

²⁵ “Hekihekinoi kabo se tubu mahana, waikena yo kipwala udiyedi. Yo tanoubu ta unai tamowai gabwa dagugudi yo bagodu balamumudi udiyedi se matausikalili. ²⁶ Tamowai nuwadi se pwanopwanokalili saha kabo ye tubu tanoubu ta unai, na se matausikalili, ede se guli. Matawuwuna Yaubada galewa ginaulidi yodi kabamiya kabo ye nukuidi**.” ²⁷ Tenem mahanana ne unai kabo Tau Natuna se kita yada luwanawai ye laolaoma ma gigibwalina yo ma didigasaesaekalilina. ²⁸ Huyana teina ginauli ta se tubu meta bena kwa tolo ma nuwabayaomiu, matawuwuna yomi yailihai mayadaina meta ye hanahanaukaliliko.”

Huya hekihekinoidiyao
(*Mataiyo 24:32-35, Maleko 13:28-31*)

²⁹ Kabo teina palabole ta ye hedede udiyedi ye wane, “Hage, kwa kitalau bosibosi yo kaiwa maudoidi udiyedi. ³⁰ Huyana lugudi se kini kabo kwa kitadi yo kabina kwa kata meta gigibwali huyana ye hanahanauma. ³¹ Gonogonowana doha, huyana teina ginaulidi ta se tubutubu na kwa kitadi, kabo kwa nuwatulobai meta Yaubada yona basileiya ye hanahanauma.

³² Ya hededemamohoi kalimiuyena: Teina isi ta taba nige ye gehe kana siga teina ginauli maudoidi ta se tubu. ³³ Galewa yo tanoubu kabo se gehe, na yogu hedehedede ta meta nige gonowana se gehe.”

Bena ta nononoha
(*Mataiyo 24:36-44, Maleko 13:32-37*)

³⁴ “Kwa kitahetete'uyoigomiu! Nuwamiyao taba tabu se lau gwauyala yabayababadi, numayauyaule yo teina tanoubu ta nuwamodemodedi udoi'udoj udiyedi. Madai tenem mayadaina ne ye hesiliyatagomiu doha sipwasipwa. ³⁵ Matawuwuna mayadaina ne kabo tanoubu ta taumiyaidi maudoidi ye hesiliyatadi. ³⁶ Bena huya badobado kwa nonoha yo kwa tapwatapwalolo meta tenem ginauli maudoidi kabo se tubu ne kwa wasabugabaeidi na Tau Natuna matanawai kabo gonowana kwa tolo.”

³⁷ Mayadai kesega kesega Yesu Numa Tabuna unai ye laulauhekata, yo boniyai kesega kesega ye pesa ye lau kuduli hesana Olibe Kudulina unai. ³⁸ Yo malatomtom gagilidi udiyedi tamowai maudoidi se laoma kalinawai bena yona lauhekata wa se lapuidi Numa Tabuna bakubakuna wa unai.

22

Yudasi yona hineli ye ginauli bena Yesu kana ye walohai
(*Mataiyo 26:1-5, Maleko 14:1-2, Yowane 11:45-53*)

** **21:26:** Yaubada galewa ginaulidi yodi kabamiya kabo ye nukuidi: Kalina Giliki unai Luka ye kuli, Galewa gigibwalidi kabo ye nukuidi.

¹ Pwalawa Nige Yistina Henuwaisinina mayadaina ye hanahanauma, mayadaina bagubagunana ede Taukiuli Henuwaisinina. ² Na taukaitalam tauwoyaidi yo laugayo taulauhekataedi keda se wasewase bena Yesu se unuhemwaloi. Iyamo boda wa se matausiyeidi.

³ Kabo Satani ye luwu Yudasi unai. Iya saudoudoi-labui wa hesau, yo hesana hesau ede Isakaliyota. ⁴ Yudasi ye lau taukaitalam tauwoyaidi yo Numa Tabuna yona polisi kadi tanuwagao maiyanao se koitalaliu idohagi kabo Yesu kana ye walohai yo ye moselaei udiyedi. ⁵ Siya nuwadi se namwa yo yali se ginauli meta kabo moni se mosei unai. ⁶ Yudasi yodi nuwanuwatu wa unai ye yali, ede ye hetubu keda ye wase bena Yesu ye moselaei kalidiyena huyana boda wa nige temenai.

*Kaikaigogo gehegehena kabinonohana
(Mataiyo 26:17-19, Maleko 14:12-16, Yowane 13:21-30)*

⁷ Kabo Pwalawa Nige Yistina Henuwaisinina mayadaina bagubagunana ye lage, unai kabo Dius tamowaidi Taukiuli mamoeni se unuidi se hemala yodi kaitalam. ⁸ Yesu kabo Petelo yo Yowane ye hetamalidi ye wane, “Kwa lau Taukiuli kaina kada kwa kabinonohai.” ⁹ Se henamaiyei se wane, “Haedi kabo ka kabinonohai?” ¹⁰ Ye hededelau kalidiyena ye wane, “Huyana magailaki ne unai kwa lage, loheya hesau waila pakuna ye bahebahe kabo ye lobaigomiu. Kwa hemuliwatani na numa saha unai ye mwalaesae ne meta unai kwa mwalaesae ¹¹ yo kwa hededelau numa tanuwagana ne unai kwa wane, ‘Taulauhekata ye henamai: Taumana dahalana meta haedi na kabo yogu hekahekatao maiyaguwao Taukiuli kaina ka kai?’ ¹² Iya kabo numa heisi helabuina unai dahala lakilakina hesau ye hekitagomiu. Dahala ne unai ginauli mauidi ede nonohadi. Temenai kada kai kwa kabinonohai.” ¹³ Se lau na saha ye hedededi wa meta se lobaidi. Ede unai Taukiuli kaina se kabinonohai.

*Yesu yona hekahekatao maiyanao yodi kaikaigogo gehegehena
(Mataiyo 26:20-30, Maleko 14:17-21, Yowane 13:21-30)*

¹⁴ Mahanana ye lage ede Yesu maiyana apostolo wa se laoma na se tulidobi kabakaikai hatana dedekana wa unai. ¹⁵ Na ye hededelau udiyedi ye wane, “Ya henuwakalili bena Taukiuli kaina ta komiu yo yau ta kai, na mulina ne unai kabo ya kamkamna. ¹⁶ Teina yomiu ya hedehedede ta: Taba nige ya kai'uyoi ye lau ee kana siga Taukiuli kaina kaniyona kabo ye laoma ye mamohoi Tamagu yona basileiya unai.”

¹⁷ Kabo waina keyakana ye hai, ye lautoki yo ye wane, “Teina ta kwa hai na maudoimiu unai kwa numa. ¹⁸ Ya hededelaowa ta taba nige wine kaniyona masina ya numa'uyoi, ye lau ee kana siga Yaubada yona basileiya ye lagema.”

¹⁹ Yo pwalawa ye hai ye lautoki na kabo ye kihi na ye moseidi udiyedi na ye wane, “Teina ta meta yau taugu ya mosegabaei hesabamiu. Teina kwa ginauli meta kabahenuhenuwaisinigau.”

²⁰ Se kaikaigehe, na gonogonowana doha, waina keyakana wa ye hai na ye wane, “Teina ta yau kwasinagu kabo ye didi hesabamiu, na unai kabo Yaubada yona talam hauhauna ye ginauli kalimiuwai. ²¹ Iyamo kaiteya kabo kagu ye walohai ne meta maiyagu hatahata ta unai. ²² Tau Natuna kabo ye boita doha Yaubada ye nuwatunonohaiyako, na ahani mo kana tauwalohai tamowaina ne!” ²³ Ede se bom se henahenamai'uyoidi meta luwadi ne unai kaiteya kabo doha teina ye ginauli.

Yesu yona hedehedede gehegehedi

** 22:14: Se tulidobi kabakaikai hatana dedekana wa unai: Kaikaigogo hededehemasalahana ku hasili.

** 22:16: Yesu yona hedehedede ta tausonoga hekadi se hededehemasalahana se wane, Taukiuli kaina meta henuwaisini idohagi Yaubada yona tamowai ye yailihaidi Aikupito unai. Na huyana Yaubada yona basileiya kabo ye masalaha tanoubu ta unai, meta tamowai ye yailihaidi ba'aya kaukauna udiyedi.

²⁴ Na kabo siya se bom se haikawayagala meta luwadi ne unai kaiteya kabo ye saekalili. ²⁵ Na Yesu ye hededelau udiyedi ye wane, “Dagela tamowaidi yodi wasawasa meta yodi gigibwali bayabayaona unai yodi tamowai se tanuwagaidi, na se katai'uyoidi taukitahetete namwanamwadi. ²⁶ Na komiu meta tabu doha tenem. Kaiteya ye saekalili luwamiu ne unai meta iya taba ye hemala doha taumulita, yo kaiteya iya tanuwaga meta taba ye hemala doha heyayai tauhaina. ²⁷ Kaiteya ye saekalili, hatahata unai taukaikai, o heyayai tauhaina? Iya hatahata unai taukaikai ne meta ye saekalili. Na yau luwamiu ta unai meta yomi heyayai tauhaina.

²⁸ Komiu huya badobado maiyaguwao kagu noho maudoidi udiyedi. ²⁹ Tamagu basileiya ye leyamako yogu, na yau kabo ya leyawa yomiu, ³⁰ unai yogu basileiya unai komiu kabo yogu hatahata unai kwa kaikai yo kwa numanuma yo telona udiyedi kwa tuli na Isalaela tamowaidiyao boga saudoudoi-labui ta kwa hekasadi.

³¹ Simona, Simona, ku kitanamwanamwa! Satani ye kaibwadakalili bena maudoimiu ta ye lautonogigomiu doha witi se koinihinihiyei. ³² Na Simona, yom ya tapwaloloko bena yom sunuma tabu ye basabasa. Na huyana ku uyoma kaliguwai kabo kam kahao ku hebayaodi.” ³³ Na Petelo ye hededebui ye wane, “Guiyau, yau ya nonohakalili kabo ya hemuliwatanigo ta lau numatutugudu unai yo ta lau ta boita.” ³⁴ Yesu ye wane, “Petelo, ya hededelaowa: Teina boniyai ta unai sola nige kamkam hakiyana ye dou, na ma haiyona kowa kabo ku hedede meta nige kabigu ku kata.”

³⁵ Na Yesu yona hekahekatao ye henamaiyeidi ye wane, “Huyana ya hetamaligomiu kwa lau, na nige moni tobwana o yomi tobwa kwa baheidi o buti kwa likwadi meta saha hesau unai kwa deha o nige?” Se wane, “Nige!” ³⁶ Ye wane, “Na teina huya ta doha teina bena kwa ginauli: Ena yom moni tobwana kalimwai, bena ku bahei, yo ena yom tobwa kalimwai, bena hinage ku bahei. Na ena nige yom iyala kelepana, bena kam kwama ku lokunegabaei na iyala kelepana ku hemaisa. ³⁷ Ya hededelaowa kalimiuwai: Kulikuli tabuna unai se kuliyako se wane, ‘Iya se kita meta iya hinage laugagayo tau'utu'utusidi tamowaina hesau,’ *(Aisaiya 53:12)* na teina hedehedede ta kabo ye laoma ye masalaha kaliguwai. Hedehedede kulikuli tabuna unai wa meta hemamohoiyeina mahanana ye lagemako.” ³⁸ Ede yona hekahekatao wa se wane, “Guiyau, ku kita, iyala kelepadi labui ede teina.” Na ye hededelau kalidiwai ye wane, “Kwa hekaiyawasi. Nabada!”

*Yesu Olibe Kudulina unai ye tapwalolo
(Mataiyo 26:36-46, Maleko 14:32-42)*

³⁹ Kabo Yesu Yelusalema ye laugabaei na ye lau Olibe Kudulina unai doha huya badobado yona laulau wa, na yona hekahekatao wa iya se hemuliwatani. ⁴⁰ Huyana temenai se lage ede ye hededelau kalidiwai ye wane, “Kwa tapwalolo meta taba nige noho kwa hekalo.” ⁴¹ Na ye laugabaeidi ye tausigilau lohana doha weku ta tuu, ye tulibonodobi na ye tapwalolo ye wane, ⁴² “Tamagu, ena ku henuwa, teina kamkamna keyakana ta ku lahesuwala kaliguwai. Na nige yogu nuwatu, na kowa yom nuwatu bena se tubu kaliguwai.” ⁴³ Kabo anelu galewa ne unai ye taumasalaha kalinawai na ye hebayao. ⁴⁴ Iya nuwana meta ye kamkamnakalili na ye tapwalolobayaokalili, ede hamumuna wa doha kwasina kwasidi se talutaludobi bwatano ne unai. ⁴⁵ Huyana ye tapwalolokaiyawasi kabo ye tolo na ye uyo yona hekahekatao wa udiyedi, na ye lobaidi meta se nuwakamkamnakalili na se kenokeno. ⁴⁶ Ede ye hededelau kalidiwai ye wane, “Saha kenona? Kwa tolo na kwa tapwalolo meta taba nige noho kwa hekalo.”

*Yudasi Yesu kana ye walohai
(Mataiyo 26:47-56, Maleko 14:43-50, Yowane 18:1-11)*

⁴⁷ Yesu sola ma hedehededena na bodalakilaki se lage. Yudasi, iya saudoudoi-labui wa hesau, ye kedabagunaidi na ye sae Yesu ye sumtai. ⁴⁸ Na Yesu iya ye henamaiyei ye

wane, “Yudasi, idohagi to teina sumta ta unai Tau Natuna kana ku walohai?” ⁴⁹ Yesu yona hekahekatao se kita kabo Yesu se unui, ede se wane, “Guiyau, iyala kelepadi ta bena ka hepaisowadi?” ⁵⁰ Kabo hekahekatao wa hesau yona kelepa wa ye hekwade na taukaitalasam saesaena yona heyayai tauhaina beyakahatuna ye bolihai. ⁵¹ Na Yesu ye wane, “Nabada! Tabu saha hesau ku ginauli'uyoi!” Na ye kabilau tamowai wa beyana unai ede ye henamwanamwa.

⁵² Boda wa maidadiyao meta hinage taukaitalasam tauwoyaidi yo Numa Tabuna yona polisi yo babadao hekadi se laoma Yesu hesabana. Kabo Yesu ye hededelau kalidiwai ye wane, “Idohagi, yau tauhaihaikabi, to kelepa yo kepata kwa baheidi na kwa laoma hesabagu?” ⁵³ Mayadai kesegakesega yau meta maidamiu Numa Tabuna bakubakuna wa unai, na nige kwa kabilaoma kaliguwai. Iyamo yomi huya ede teina. Iya ede masigili gigibwalina yona huyatanuwaga.”

Petelo Yesu ye uhalaei

(Mataiyo 26:57-58,69-75, Maleko 14:53-54,66-72, Yowane 18:12-18,25-27)

⁵⁴ Kabo Yesu se hai na se woyalaei taukaitalasam saesaena yona numa unai. Na Petelo meta dagela wa unai ye hemuhemuliwatanidi. ⁵⁵ Na [taupaisowa hekadi] kaiwa se yuhi numa wa bakubakuna duwaduwalina unai na se tulihetakikili, na Petelo hinage ye tulidobi maiyanao. ⁵⁶ Heyayai tauhaina waihiuna hesau iya ye kita kaiwa kalakalasina dawayana unai ye tutuli. Ye kitanamwanamwaei na ye wane, “Teina tamowai ta meta hinage iya maiyana.” ⁵⁷ Na Petelo ye uhala ye wane, “Waihiu, temeta tamowai me meta nige kabina ya kata.”

⁵⁸ Yawalana wa ye lau kabo tamowai hesau iya ye kita na ye wane, “Kowa meta kadi kaha hesauna.” Na Petelo ye wane, “Taubada, yau nige!”

⁵⁹ Na awa kesega ye lau kabo tamowai hesau ye hededebayao kalinawai ye wane, “Mamohoi, teina tamowai ta meta iya maiyana, matawuwuna iya hinage Galili tamowaina.” ⁶⁰ Na Petelo yona bui ye mosei ye wane, “Taubada, saha ku hetahetala me nige kabina ya kata!” Sola ma hedehedena na pwaole hakiyana ye dou. ⁶¹ Guiyau ye kitabui yo ye kaikewalau Petelo unai, na Petelo Guiyau yona hedehedede wa ye nuwatuidi doha ye wane, “Teina boniyai ta unai sola nige kamkam hakiyana ye dou na ma haiyona kowa kabo ku uhalaeigau.” ⁶² Ede Petelo ye pesa dagela wa unai na ye doukalikalili.

Yesu se talawasiyei

(Mataiyo 26:67-68, Maleko 14:65)

⁶³ Tamowai Yesu se kitakitahetete wa iya se talatalawasiyei yo se biteli. ⁶⁴ Na matana se suma yo se henahenamaiyei se wane, “Ku hededepeloweta! Kaiteya ye biteligo?” ⁶⁵ Yo hinage hedehedede yabayababadi hekadiyo udiyedi se hededeheyaheyababa.

Yesu se woyalaei Sunedeli bodana udiyedi

(Mataiyo 26:59-66, Maleko 14:55-64, Yowane 18:19-24)

⁶⁶ Mala ye tom kabo Dius tamowaidi yodi babadao se koigogo maiyadiyao taukaitalasam tauwoyaidi yo laugagayo taulauhekataedi.** Na kabo Yesu se woyalaeiyama kalidiwai. ⁶⁷ Na se henamaiyei se wane, “Ena kowa Kelisona ede, hage, yomai ku hedehedede.” Yesu yodi bui ye moseidi ye wane, “Ena yomiu ya hedehedede, komiu taba nige kwa kawamamohoiyeigau, ⁶⁸ yo ena ya henamaiyeigomiu, komiu taba nige yogu bui kwa leyama. ⁶⁹ Na teina mayadai ta unai yo ye lau ne, Tau Natuna kabo Yaubada Gigibwalikalilina nimakahatuna unai ye tuli.” ⁷⁰ Maudoidi se henamaiyei se wane, “Unai kowa meta Yaubada Natuna?” Yodi bui ye moseidi ye wane, “Kwa

** 22:66: Teina bodadi ta, siya ede Sunedeli bodana.

hededemamohoi meta yau ede iya.” ⁷¹ Kabo se wane, “Taba nige kabahegiluna hesau ta wasenei'uyoi. Iya ye bom yona hedehedede ne unai ta lapuiyako.”

23

Yesu se woyalaei Pilato unai

(Mataiyo 27:1-2,11-14, Maleko 15:1-5, Yowane 18:28-38)

¹ Kabo Sunedeli bodana maudoidi wa se tolo na Yesu se woyalaei Pilato unai ² na se hetubu se hegilu, se wane, “Tamowai ta ka lobai meta kai Dius ye woyapwanoligai bena tabu Sisa unai takisi ka toletole yo ye hededehemasalaha'uyoi meta iya Keliso yo iya wasawasa.” ³ Unai Pilato Yesu ye henamaiyei ye wane, “Kowa Dius tamowaidi yodi wasawasa?” Yesu yona bui ye mosei ye wane, “Aa, saha ku hedede ne mamohoi.”

⁴ Kabo Pilato ye hededelau taukaitalasam tauwoyaidi yo boda wa udiyedi ye wane, “Teina tamowai ta nige yona yababa hesau ya lobai kabo unai ya hegilu.”

⁵ Na se muyoukalili se wane, “Iya yona lauhekata udiyedi meta Yudeya teha maudoina tamowaidi ye woyapwanolidi. Galili unai ye hetubu na ye lau ee ye lagema inai.”

Pilato Yesu ye hetamali ye lau Heloda unai

⁶ Pilato hedehedede wa ye lapui, ede ye henamaiyeidi ye wane, “Teina tamowai ta meta iya Galili tamowaina?” ⁷ Yona se hedehedede meta Yesu Heloda yona kabatanuwaga unai ye laoma, ede ye hetamali ye lau Heloda kalinawai. Tenem huyana ne unai iya hinage Yelusalema unai ye miya.

⁸ Huyana Heloda Yesu ye kita meta nuwana ye namwakalili, matawuwuna huyalohalo ha ye henuwakalili bena ye kita. Iya wasana ye lapuiyako na ye henuwa bena laulau gigigigibwalidi hekadi ye ginaulidi na ye kitadi. ⁹ Unai Heloda henamai udoi'udoi ye henamaiyei, na Yesu nige saha hesau ye hedede. ¹⁰ Taukaitalasam tauwoyaidi yo laugagayo taulauhekataedi siya hinage temenai na Yesu se hegilukaliliyei. ¹¹ Kabo Heloda maiyanao iyala tamowaidi iya se talatalawasiyei na kwama didididigana se heluwui doha iya wasawasa hesau, na se hetamali ye uyo Pilato unai. ¹² Tenem mayadaina ne unai Heloda yo Pilato se kawakeha, na huya bagubagunana unai meta se haihewahewaiunu'uyoidi.

Pilato Yesu ye talamgabaei boda wa udiyedi bena se hesataulo

(Mataiyo 27:15-26, Maleko 15:6-15, Yowane 18:39–19:16)

¹³ Kabo Pilato taukaitalasam tauwoyaidi, tauwoyawoya yo magari wa tamowaidiyao ye yogagoidima, ¹⁴ na ye hededelau kalidiwai ye wane, “Teina tamowai ta kwa woyaiyama kaliguwai na kwa hegilu meta tamowai ye woyawoyapwanolidi. Matamiuyena ya henamaiyeiyako, na yomi kabahegiluna wa unai meta nige giluhesau ya lobai kalinawai. ¹⁵ Doha hinage Heloda nige kana mata ye lobai, unai ye hetamali'uyoiyama kalidawai. Ye masalaha meta teina tamowai ta nige saha hesau yababana ye ginauli kabo unai ye boita. ¹⁶⁻¹⁷ Unai kabo se sapi na ya hetamali ye lau.” **

¹⁸ Na bodalakilaki wa se yogalau se wane, “Teina tamowai ta ku unui! Na Balabasi ku yailihaiyama!” ¹⁹ Balabasi meta numatutugudu unai se tole, matawuwuna ma kana kahao magailakilaki wa unai maiyadi gabemani se haikabi, na tamowai hekadi ye koihemwaloidi.

²⁰ Pilato ye henuwa bena Yesu ye yailigabaei, unai boda wa ye henamai'uyoidi. ²¹ Na kabo se yogahilakilaki se wane, “Ku hesatauloyawa! Ku hesatauloyawa!”

²² Hehaiyonana unai ye hededelau udiyedi ye wane, “Ye saha? Ba'aya saha ye ginauli? Nige kana giluhesau ya lobai kabo unai ye boita. Unai kabo yogu taupaisowa ya

** **23:16-17:** Kulikuli beyabeyadi hekadi hinage lausoiso 17 se kuli, iya ede, Taukiuli Henuwaisinina unai gabana yona laulau meta numatutugudu unai tamowai kesega ye kabigabaei ye uyo yona tamowai udiyedi.

hededelau udiyedi na wipi unai se sapiheyababakaliliyei, na kabo se hetamali ye lau.”
²³ Na kabo se yogahi ma kalinalakilakidi bena Yesu ye hesataulo, na se muyoukalili.
²⁴ Ede yodi kaibwada wa unai Pilato yona yali ye ginauli ²⁵ na tamowai se kaibwada'usei wa ye yailigabaei. Iya ede numatutugudu unai se tole matawuwuna ma kana kahao maiyadi gabemani se haikabi na tamowai hekadi ye koihemwaloidi wa. Na Yesu ye moselaei yona iyala tamowaidi kalidiyena bena boda wa yodi nuwatu se ginauliwatani.

Yesu se hesataulo

(Mataiyo 27:32-44, Maleko 15:21-32, Yowane 19:17-27)

²⁶ Iyala tamowaidi Yesu se woyai se laulau kabahesataulona magaina hesabana, na Simona, iya Sailini tamowaina, koya unai ye uyoma, na se lauhelili ede sataulo wa se tolesae dabayalona unai na Yesu ye hemuliwatani. ²⁷ Bodalakilaki iya se hemuhemuliwatani, na sinesineo hekadi luwadi wa udiyedi meta sabina se nuwadubu yo se doudou. ²⁸ Ede Yesu ye tolobui na ye hededelau udiyedi ye wane, “Yelusalema natunao sinesineo, tabu sabigu kwa doudou, na komiu kwa bom sabimiu yo natumiyao sabidi kwa dou. ²⁹ Matawuwuna huya [*yababakalilidi*] kabo se laoma, ** na udiyedi kabo [*kwa kamkamnakalili*] na kwa wane, ‘Waiwaihiuwo kobokobosidi, yo siya kaiteyadi nige se labalaba, yo siya nige se hesuhesusu, meta gonowana se gwauyala.’

³⁰ Kabo tamowai se hededelau koya tupidi udiyedi se wane, ‘Kwa bekudobima kewamai ne udiyedi.’

Yo koya tupidi gagilidi udiyedi se wane, ‘Kwa puluhigai.’ *(Hoseya 10:8)*

³¹ Matawuwuna tamowai se kabiyababaigau doha teina, na yau doha kaiwa kidakidaina. Na komiu ede doha kaiwa pogipogina. Unai yodi kabigomiu ne kabo ye yababakalili.”**

³² Tamowai yabayababadi labui siya hinage se woyalaedi Yesu maiyadi bena se unuhemwaloidi. ³³ Na se lage kabahesataulona Mwayalu Magaina unai. Temenai iya yo tamowai yabayababadi labui wa se hesataulodi, hesau nimakahatuna unai yo hesau nimaseuseulina unai. ³⁴ Na Yesu ye wane, “Tamagu, yodi yababa ne ku nuwatugabaeidi, matawuwuna nige kabina se kata saha se ginaginauli.”** Kabo yona kaleko se tolehekasadi na se kaiheyaidi na se soiyeidi.

³⁵ Boda wa se totolo na se kaikaikewa, na tanutanuwagao wa Yesu se talatalawasiyei se wane, “Tamowai hekadi ye hemauidi. Ena iya Keliso, Yaubada yona kaisunuwa tamowaina, meta taba ye bom ye hemaui'uyoi!”

³⁶ Iyala tamowaidi hinage se saema na se talatalawasiyei. Yo winega se mosei bena ye numa ³⁷ na se wane, “Ena kowa Dius yodi wasawasa, hage, ku bom ku hemaui'uyoigo.”

³⁸ Yo kulubawana wa unai kulikuli hesau se kuli doha teina: “TEINA TA DIUS YODI WASAWASA.”

³⁹ Tamowai yabayababadi labui menai se kabakabasi wa hesau Yesu ye hededeheyababa ye wane, “Kowa Keliso, e nige? Hage, ku hemaui'uyoigo yo ku hemaui'uyoigo!”

⁴⁰ Na hesauna wa kana kaha ye dilai ye wane, “Yaubada nige ku matausiyei? Kowa hinage meta iya maidam kabo kwa boita. ⁴¹ Kita yoda boita ta meta ye dudulai, matawuwuna yoda laulau yabayababadi maisana ta hai. Na teina tamowai ta meta nige yababa hesau ye ginauli.”

⁴² Kabo ye wane, “Yesu, huyana ku lau yom basileiya unai meta ku nuwatuigau.”

⁴³ Yesu yona bui ye mosei ye wane, “Ya hededemamohoi kalimwai: Teina mayadai ta kowa kabo maidagu paladaisi unai.”

** **23:29:** Huya yababakalilidi: Luka 21:20-24 ku hekaigonogonowaiyei lausoiso ta udiyedi. ** **23:31:** Kaiwa kidakidaina meta Yesu heyaheyasonina, kaniyona ede iya nige yona ba'aya hesau. Na kaiwa pogipogina ede siya Dius heyaheyasonidi, matawuwuna yodi ba'aya se lakikalili. ** **23:34:** Yesu yona hedehedede ta meta kulikuli bagubagunadiyao nige se kuli, na muliyena kabo se kulihemasalaha.

*Yesu yona boita**(Mataiyo 27:45-56, Maleko 15:33-41, Yowane 19:28-30)*

⁴⁴⁻⁴⁵ Mayamayadailaki unai meta mahana ye sinakaiyawasi na masigililakilaki ye laoma na teha maudoina ye sumapwaike ye lau ee meimeilahi tili (3) koloki unai. Kabo Numa Tabuna woyona ye taigalilabuiyei. ⁴⁶ Na Yesu ye yogahi ma kalinalakilakina, ye wane, “Tamagu, yaluwagu ta ya tolegabaei nimamyena.” Yona hedehedede wa gehena ne unai kabo yawasina ye pito.

⁴⁷ Iyala taubagunaena tamowaina saha ye tubu wa ye kita meta Yaubada ye hede-basaei na ye wane, “Mamohoi, iya meta tamowai dudulaina.” ⁴⁸ Tamowai se bado se laoma bena hesataulona wa se kaikewai. Na huyana saha ye tubu wa se kita, ede [se nuwamasalaha na] nuwapoudi udiyedi se koikoi na se uyo yodi magai. ⁴⁹ Na Yesu kabina taukata yo sinesineo siya Galili unai se hemuliwataniyama wa, kedalohawai se totolo na ginauli saha se tubutubu wa se kaikaikewalaedi.

*Yesu bwayabwaya unai se tole**(Mataiyo 27:57-61, Maleko 15:42-47, Yowane 19:38-42)*

⁵⁰ Na menai meta tamowai hesau, hesana ede Yosepa, iya Dius yodi tauhelauhetala bodana saesaena** tamowaina hesau yo yona laulau meta se namwa yo se dudulai. ⁵¹ Teha Yudeya magaina Alimatiya unai ye laoma. Iya Yaubada yona basileiya ye nayanayai. Na huyana Sunedeli bodana yodi yali se ginauli kabo Yesu se unui, meta iya nige ye talam yodi nuwatu yo kabikabi wa udiyedi. ⁵² Iya ye lau Pilato unai na Yesu sinalena ye kaibwadai. ⁵³ Kabo sinalena wa ye taluhidobiyei, na kaleko posiposina unai ye suma na ye tole bwayabwaya unai. Bwayabwaya wa meta weku duhana na se tadi, na unai meta sola nige tamowai hesau se tole. ⁵⁴ Na teina ta meta Sabati kabinonohana mayadaina, na nige bayaona kabo Sabati hekasisina ye hetubu.

⁵⁵ Waiwaihiuwo Yesu maiyadi Galili unai se laoma wa Yosepa se hemuliwatani se lau bwayabwaya wa unai na idohagi sinalena yodi toletolena wa se kita. ⁵⁶ Kabo se uyo magai na yausi panepanediyo udoi'udo'i se kabinonohaidi. Na Sabati unai yodi laugagayo hekasisina debanaena ede se kaiyawasi.

24*Yesu yona tolo'uyo**(Mataiyo 28:1-10, Maleko 16:1-8, Yowane 20:1-10)*

¹ Sabati ne mayadaina bagubagunana malatomtomna gagilina unai sinesineo gin-auli panepanedi se kabinonohaidiko wa se baheidi na se lau bwayabwaya wa unai. ² Na se kita meta bwayabwaya wa kabaguduna wekuna wa se buihesuwala, ³ na se mwalaesae meta Guiyau Yesu sinalena wa nige se kita. ⁴ Siya ma nuwanuwatudi na ma kesega loheloheyao labui kadi kwama namanamalidi se taumasalaha na dedekadi wa unai se totolo. ⁵ Waiwaihiuwo wa se matausi ede se dunedobi bwatano unai, na loheloheyao labui wa se hededelau kalidiwai se wane, “Matawuwuna saha to tamowai maumaulina kwa wasewasenei tauboiboita luwadiwai? ⁶ Iya nige inai, na Yaubada iya ye hetolo'uyoiyako! Huyana iya maiyamiu Galili unai, na saha ye hededededi kalimiuwai wa kwa nuwatuidi: ⁷ ‘Tau Natuna kabo se moselaei tamowai ba'aba'ayadi nimadiwai bena se hesataulo, na mayadai hehaiyonana unai kabo ye tolo'uyo.’” ⁸ Kabo sinesineo wa yona hedehedede wa se nuwatuidi.

⁹ Huyana bwayabwaya wa se laugabaei na se uyo meta teina ginauli maudoidi ta se hedehemasalahadi yona hekahekatao saudoudoi-kesega yo tauhemuliwatanina hekadiyo wa udiyedi. ¹⁰ Waiwaihiuwo wa siya ede Maliya iya Magadala waihiuna,

** 23:50: Dius yodi tauhelauhetala bodana saesaena meta Sunedeli.

Yowana, Maliya Yamesi sinana yo sinesineo hekadi, siya maiyadiyao meta teina ginaulidi ta se hededededi apostolo wa udiyedi. ¹¹ Na apostolo sinesineo yodi hedehedede wa nige se kawamamohoiyeidi, matawuwuna yodi hedehedede ta kadi kao doha hedehedede gaibu. ¹² Na Petelo ye tolo na ye heloi ye lau bwayabwaya wa unai. Ye dunedobi na ye kaikewalau meta kaleko posiposina tupwatupwadiyao lohalohadi wa se balabala ye kitadi, na ye uyo, na saha se tubu wa ye nuwanuwatuidi.

*Yesu Imausa kedana unai ye lau
(Maleko 16:12-13)*

¹³ Na tenem mayadai kesekesegana ne unai Yesu tauhemuliwatanina labui se laulau magai hesau hesana Imausa hesabana. Yelusalema na ye lau magai wa meta lohana ede kilomita saudoudoi-kesega (11). ¹⁴ Siya ginauli maudoidi se tubu wa udiyedi yodi se tautauhedehehede. ¹⁵ Na se bom teina ginaulidi ta udiyedi se hedehedede yo se hetahetaladi, na Yesu ye laoma kalidiwai ede maiyanao se lau. ¹⁶ Na matadi wa Yaubada ye gawuidi ede iya nige se kitalobai.

¹⁷ Kabo Yesu ye henamaiyeidi ye wane, “Yomi kabalau ta unai meta saha kwa hetahetala?” Ede se talutolo na kadi kao wa meta se nuwadubu. ¹⁸ Na taudi labui wa hesau, hesana Kilipasi, ye henamaiyei ye wane, “Nuwana Yelusalema unai taumana maudoidi luwadiyena kowa ku bom mo nige kabina ku kata saha se tubu mayadai hisa se laoko wa udiyedi ne?”

¹⁹ Ye henamaiyeidi ye wane, “Ginaulidi ne meta saha?” Taudi labui wa se hedede bui se wane, “Yesu Nasaleta tamowaina wasana. Iya peloweta na yona hedehedede yo yona kabikabi se gigibwalikalili Yaubada yo tamowai maudoidi matadiyena. ²⁰ Na taukaitalasam tauwoyaidi yo kama tanutanuwagao se mosegabaei. Se helauhetala na se hekasa meta kabo ye boita, ede se hesataulo. ²¹ Na ka nuwatui meta iya Isalaela tauyailigabaeidi ede. Na ginauli maudoidi se tubu wa meta mayadai haiyona se lau ko wa udiyedi. ²² Yo hinage sinesineo hekadi kama boda ta unai meta se hesiliyatagai. Malatomtom gagilina unai se lau bwayabwaya wa unai, ²³ na iya sinalena wa nige se lobai, ede se uyoma na yomai se hedehedede bena anelu tautaudi se kitadi, na se hedede meta iya ye mauli'uyoko. ²⁴ Kabo kama kahao hekadi se lau bwayabwaya wa na saha sinesineo se hedehededei wa meta se lobai gonogonowana, na iya nige se kita.”

²⁵ Kabo Yesu ye hededelau udiyedi ye wane, “Komiu yauyaule, yo yomi nuwatulobai ne se pahili, ede peloweta yodi hedehedede maudoidi nige kwa kawamamohoiyeidi! ²⁶ Se hededenonohaiyako meta teina ginaulidi ta udiyedi Keliso kabo ye kamkamna, na kabo ye seuyo yona didiga ye hai'uyoi.”

²⁷ Na kabo Mose unai ye hetubu na ye lau peloweta maudoidi udiyedi na iya hedehedena saha se kuliyako kulikuli tabudi udiyedi wa meta ye hedede hemasalahadi siya kalidiwai.

²⁸ Yodi kabalau magaina se hanahanawui, na Yesu kana kao ye ginauli doha bena ye taukalili ye lau. ²⁹ Na se hededenuwahi se wane, “Ku laoma, kabo inai ta keno. Matawuwuna ye meimeilahikaliliko yo nige bayaona kabo ye masigili.” Ede Yesu ye hemuliwatanidi se lau yodi numa.

³⁰ Kabo huyana se tuli na se kaikai meta Yesu pwalawa ye hai, ye lautoki, ye kihi, na ye moseidi kalidiwai. ³¹ Kabo matadi wa se lala yo se kitalobai meta iya Yesu, na matadiyena ye tauwadam. ³² Kabo se bom yodi se hedehedede se wane, “Huyana iya maiyada keda wa unai na yoda ye hedehedede na kulikuli tabudi ye hedede hemasalahadi kalidawai meta nuwakamnana ta haiyako. [Iyamo nige ta kitalobai!]” ³³ Kabo se dalahai na se laumwamwayau se uyo Yelusalema. Temenai hekahekatao saudoudoi-kesega yo kaiteyadi maiyadiyao wa se lobaidi se hebodakesegaidiko. ³⁴ Hekahekatao wa se hededelau taudi labui wa udiyedi se wane, “Mamohoi! Guiyau meta ye tolo'uyoko

yo ye taumasalaha Simona unai.” ³⁵ Kabo taudi labui wa saha ye tubu keda wa unai meta yodi se hedehedede, yo idohagi Yesu se kitalobai huyana pwalawa ye kihi wa unai.

Yesu ye taumasalaha yona hekahekatao wa udiyedi

(Mataiyo 28:16-20, Maleko 16:14-18, Yowane 20:19-23, Apostolo 1:6-8)

³⁶ Siya saha se tubu wa sola unai se hedehedede na Yesu ye taumasalaha kalidiwai na ye hededelau udiyedi ye wane, “Nuwadaumwali kwa hai!” ³⁷ Na se siliyata yo se matausi, matawuwuna yodi nuwatu bena yaluyaluwa se kita. ³⁸ Yesu ye hededelau udiyedi ye wane, “Idohagi to kwa matausi, yo idohagi na kwa nuwalabulabui? ³⁹ Ede doha yau! Sola nimagu yo kaegu ta kwa kitadi. Kwa kabitonogigau yo kwa kita. Yaluyaluwa meta nige bulumana yo siyadana, na kwa kita yau meta bulumagu yo siyadagu.”

⁴⁰ Ye hedehedekaiyawasi, na kabo nimana yo kaena ye hekitadi. ⁴¹ Na siya meta sola nige se kawamamohoi, matawuwuna se gwaunya yo se nokokalili, unai Yesu ye wane, “Kai saha kwa kabinonohai e nige?” ⁴² Ede yama gabugabuna tehana se mosei, ⁴³ na ye hai ede matadiyena ye kai. ⁴⁴ Na kabo ye hededelau udiyedi ye wane, “Teina hedehedede ta ya hededediko kalimiuwai huyana sola yau maiyamiu: Hedehedede maudoidi se kulidiko Mose, peloweta yo Same bukadi udiyedi wa bena se tubu yo se masalaha.”

⁴⁵ Kabo kulikuli tabudi wa ye hededehehemalahadi na unai nuwadi se masalaha. ⁴⁶ Yodi ye hedehedede ye wane, “Teina ta meta saha se kuliyako wa: Keliso kabo ye kamkamna yo mayadai hehaiyonana unai kabo ye tolo'uyo. ⁴⁷⁻⁴⁸ Na iya hesanaena kabo wasa ye lau tamowai maudoidi udiyedi meta gonowana se nuwabui, yodi ba'aya nuwatugabaedi hesabana. Na komiu teina ginaulidi ta tauhedehededeidi ede. Yelusalema unai kwa hetubu na kwa laei tanoubu maudoina udiyedi. ⁴⁹ Yau kabo Yaluwa Tabuna ya hetamaliyawa kalimiuwai. Iya ede Tamagu ye hededehe-sunumayako wa. Na komiu bena magari lakilakina ta unai kwa miyakesegai kana siga galewa ne unai Yaluwa Tabuna yona gigibwali ye taludobima kalimiuwai.”

Yesu yona seuyo galewa

(Maleko 16:19-20, Apostolo 1:9-11)

⁵⁰ Kabo Yesu yona hekahekatao ye woyahesepadi se lau Betaniya kana siga unai, na nimana ye lausinidi na ye hededehehenamwadi. ⁵¹ Na yona hededehehenamwa wa sola ye laulau na Yaubada ye kabisini ye sae galewa. ⁵² Ede se kaihelahui na se uyo Yelusalema ma gwaualalakilakidi. ⁵³ Mayadai badobado se lau Numa Tabuna bakubakuna wa unai na Yaubada se hedehedebasaei.

Yowane **Yesu wasana Yowane ye kuli wa** **Buka ta hedehemasalahana**

Buka ta taukulina meta apostolo Yowane, Yamesi kana kaha (Mataiyo 4:21). Iya Betesaida tamowaina, Galili Gabwana dedekanaena. Na buka ta ye kuli nuwana bolimai 85 AD unai, Epeso magaina lakilakina unai.

Yowane Yesu wasana bukana ta ye kuli na kaniyona ye hedehemasalaha ye wane, “bena kabo kwa kawamamohoi meta Yesu iya Keliso, iya Yaubada Natuna. Na yomi sunuma debadiwai kabo iya hesanawai mauli kwa hai.” (Yowane 20:31).

Teina buka ta unai Yowane Yesu kana kao ye hedehemasalaha:

- (1) Yesu meta Yaubada tanoubu ta yona kabahetubu hedehedena (Yowane 1:3,4),
- (2) iya mamoe natuna tanoubu yona ba'aya tauhaigabaeina (Yowane 1:29),
- (3) iya Yaubada Natuna yo Isalaela yodi wasawasa (Yowane 1:49),
- (4) iya waila maumaulina tauhaiyamana (Yowane 4:10, 7:37-38),
- (5) iya ba'aya taunuwatugabaedi (Yowane 8:11).

Yowane Yesu yona laulau gigigibwalidi badodi haligigi-labui (7) ye hasilidi na udiyedi hinage ye hekatada Yesu iya kaiteya (Yowane 2:1–12:50). Hinage Yesu tamowai maiyanao yodi hedehede ye kulidi na udiyedi Yesu kana kao mamohoina ye hedehemasalaha kalidiwai (Yowane 3:1-21, 4:5-26, 14:6, yo hekadiyo).

Na peina 13 ye lau 21 udiyedi Yesu yona mauli mayadaina gehegehedi, yona boita yo tolo'uyo wasadi ye kulidi. Teina buka ta luwana ne unai hinage Yaluwa Tabuna ye hedehesunuma na yona paisowa ye hedehemasalaha yona hekahekatao kalidiwai (Yowane 14:15-27, 16:4-15). Yowane hinage ye hekatada idohagi Yesu yona hekahekatao yodi ye tapwalolo (Yowane 17).

Wasa Namwanamwana kaniyona Yesu ye hedehemasalaha lausoiso kesega unai, iya ede Yowane 3:16,

“Yaubada tanoubu ye gadosisikaliliyei, ede natukesekesegana ye mosegabaei. Unai kaiteya iya ye sunumaei, meta taba nige hekamkamna ye lobai, na mauli nige kana siga kabo ye hai.”

Buka ta hedehedena lakilakidi

- Yesu hedebasaeina 1:1-18
- Yowane Babatiso wasana 1:19-34
- Yesu yona hekahekatao bagubagunadi ye kaisunuwaidi 1:35-51
- Yesu yona laulau gigigibwalidi, siya kana kao se hemasalaha, yo ye bom ye hedehemasalaha'uyoi 2:1–12:50
- Yesu yona mauli mayadaina gehegehedi, iya se helauhetala yo se unuhemwaloi 13:1–19:42
- Yesu ye tolo'uyo 20:1–21:25

Yaubada yona Hedehede ye hemala tamowai

¹ Ginauli maudoidi huyahetubudi unai Yaubada yona Hedehede wa ye miyamiya, yo Hedehede wa Yaubada maiyana, yo Hedehede wa ede Yaubada. ² Ginauli maudoidi huyahetubudi wa unai Hedehede wa meta Yaubada maiyana.

³ Ginauli maudoidi Yaubada ye hetubudi wa iya maiyana se hetubudi, yo Hedehede wa meta ginauli maudoidi tauhetubudi. ⁴ Iya mauli yona kabalaoma ede, na mauli ne

ye hemala tamowai yodi mala. ⁵ Na mala wa ye sina masigili unai, na masigili nige gonowana ye saedikwai.**

⁶ Yaubada tamowai hesau ye hetamaliyama, hesana ede Yowane. ⁷ Iya ye laoma meta mala wa tauhededehemasalahana. Na yona hedehedede debanawai tamowai maudoidi bena se kawamamohoi. ⁸ Iya nige mala wa, na ye laoma mala wa ye hededehemasalaha. ⁹ Na mala mamohoina kabo ye laoma tanoubu ta unai, na Yaubada kana kao mamohoina ye hededehemasalaha tamowai maudoidi udiyedi.

¹⁰ Iya Yaubada maiyana tanoubu se hetubu, yo ye miya tanoubu ta unai, na iyamo tanoubu ta tamowaidiyao nige se kitalobai. ¹¹ Ye laoma yona tanoubu ye ginauli'usei wa unai, na iyamo yona tamowai wa nige se hailobai. ¹² Na kaiteyadi iya se hailobai yo hesana se sunumaei, meta dudulai ye moseidi se hemala Yaubada natunao. ¹³ Na nige tamowai yodi labalaba unai, o tamowai yodi gadosisiwai o maitawasola loheya yona nuwatuwai, na Yaubada yona hineli unai se hemala Yaubada natunao.

¹⁴ Hedehedede wa ye hemala tamowai, na maiyama ka miya. Yo kana kao saesaena mamohoina ka kitayako, iya ede Yaubada natukesekesegana mo kana kao saesaena mamohoina. Natu ta meta Tamana Yaubada unai ye laoma yo kalinawai kabinamwa yo mamohoina se mwayau.

¹⁵ Yowane ma kalina lakilakina ye hededehemasalaha ye wane, "Tamowaina ede teina lahinaidi ya hededehemasalahayako wa, 'Iya ede dagelagu ne unai kabo ye laoma, iya meta ye saekalili na kabo yau, matawuwuna iya ye tububaguna.'" ¹⁶ Iya kalinawai kabinamwa ye mwayau. Na iya unai kita maudoida kabinamwa ta haidi na sola ta haihai'uyoidi. ¹⁷ Mose unai laugagayo wa se laoma, na Yesu Keliso unai kabinamwa yo mamohoina se laoma.

¹⁸ Sola nige tamowai hesau Yaubada ye kita, na natukesekesegana ye bom mo. Iya meta Yaubada, yo Tamana maiyana se kawakeha, yo iya Tamana ye hemasalahayako kalidawai.

Yowane Babatiso ye hedede meta iya nige Keliso

(Mataiyo 3:11-12, Maleko 1:7-8, Luka 3:15-17)

¹⁹ Dius tauwoyaidi Yelusalema unai taumiya miya wa, taukaitalasam yo Lewi tamowaidiyao se hetamalidi se lau Yowane unai na se henamaiyei iya meta kaiteya. Teina ta meta Yowane yona hededehemasalaha. ²⁰ Iya nige ye uhala na ye hededehe-masalaha'uyoi ye wane, "Yau nige Keliso."

²¹ Na se henamaiyei, "Ena kowa nige Keliso, meta kowa kaiteya? Kowa Eliya?"

Ede ye wane, "Yau nige."

"Nuwana kowa peloweta ka nayanayai'usei wa?"**

Na ye wane, "Nige."

²² Na kabo se wane, "Na kowa kaiteya? Yoma henamai ta buina ku leyama, na kabo ka uyo tauhetamaligai wa yodi ka hedehedede. Taba ku bom ku hededehe-masalaha'uyoigo meta kowa kaiteya."

²³ Ede Aisaiya peloweta yona hedehedede unai Yowane ye hededebui ye wane, "Yau tamowaina ede tauyogayoga balabala ne unai ya wane, 'Guiyau yona keda kwa kabinonohai.'" *(Aisaiya 40:3)*

²⁴ Kobo Paliseya tamowaidiyao hekadi se hetamalidima wa ²⁵ Yowane se henamaiyei se wane, "Ena kowa nige Keliso, nige Eliya, yo nige tenem peloweta ne, matawuwuna saha to ku hebahebabatiso?"

** **1:5:** Ye saedikwai: Kalina Giliki unai hedehedede ta kaniyona labui. Bagubagunana ede ye saedikwai, na helabuina ede kabina ye kata. Unai buka hekadiyo se kulibui doha teina: na masigili iya nige kabina ye kata.

** **1:21:** Peloweta ka nayanayai'usei wa: Yaubada yona hededehe-sunuma Dius tamowaidi kalidiwai meta yodi peloweta hesau doha Mose kabo ye laoma (Dutelonomi 18:18). Na Yesu yona huya unai peloweta ne sola se nayanayai.

²⁶ Yowane ye wane, “Waila unai ya hebahebabatiso. Na tamowai hesau meta nige kabina kwa kata ye totolo luwamiu ne unai. ²⁷ Iya ede muligu ne unai kabo ye laoma, na yau nige ya namwakalili kabo gonowagu kana sendolo mainadi ya yailidi.”**

²⁸ Teina laulau maudoidi ta se tubu Yowane yona kabahebahebabatiso Betaniya, Yolidani sagasagana hali sanakawasina unai.

*Yaubada yona mamoe natuna ede Yesu
(Mataiyo 3:13-17, Maleko 1:9-11, Luka 3:21-22)*

²⁹ Na mayadai hesauna unai Yowane Yesu ye kitalaei ye laolaoma hesabana ede ye wane, “Kwa kitalau, Yaubada yona mamoe natuna ye laolaoma. Iya tanoubu yona ba'aya tauhaigabaeina. ³⁰ Teina iya ede lahinaidi ya hedehededei wa ya wane, ‘Tamowai hesau yau dagelagu unai kabo ye laoma meta ye saekalili na kabo yau, matawuwuna iya ye tububaguna.’ ³¹ Yau nige ya kitalobai meta iya Keliso. Na ya laoma ya hebabatisoigomiu waila unai meta bena iya ya hemasalaha Isalaela tamowaidiyao kalimiuwai.”

³² Kabo Yowane ye hededehehemasalaha ye wane, “Yaluwa Tabuna ya kita doha bunebune galewa ne unai ye dobima na ye talu iya kewana ne unai. ³³ Iyamo iya meta nige ya kitalobai, na Yaubada ye hetamaligau ya laoma waila unai ya hebahebabatiso na ye hededelaoma kaliguwai ye wane, ‘Tamowai hesau kabo ku kita Yaluwa kabo ye dobima na kalinawai ye talu meta iya Yaluwa Tabuna unai kabo ye hebahebabatiso.’ ³⁴ Ya kitayako yo ya hemamohoiyei meta iya Yaubada Natuna.”

Yesu yona hekahekatao bagubagunadi

³⁵ Mayadai hesauna unai Yowane maiyana hekahekatao labui se totolo Yowane yona kabahebahebabatiso magaina wa unai. ³⁶ Na Yowane ye kaikaikewalau Yesu ye kita ye laulau ede ye wane, “Kwa kita, tenem meta Yaubada yona mamoe natuna!”

³⁷ Yona hekahekatao labui wa yona hedehedede se lapui ede Yesu se hemuliwatani. ³⁸ Na Yesu ye kaikewabui ye kitadi se hemuhemuliwatani, ede ye henamaiyeidi ye wane, “Saha kwa henuwa?”

Se hededelau unai se wane, “Labi, haedi ku miyamiya?” (Labi [*meta kalina Hebelu na*] kaniyona ede Taulauhekata.)

³⁹ Kabo ye hededelau udiyedi ye wane, “Kwa laoma na kabo kwa kita!”

Unai se lau yona kabamiya wa se kita. Na yodi huyalau ne meta meimeilahi mahanana 4 kiloki unai. Na tenem mayadaina ne unai iya maiyadi se miya.

⁴⁰ Simona Petelo kana kaha Andeleya, iya Yowane yona hekahekatao labui wa hesauna, na Yowane yona hedehedede wa ye lapui ede Yesu ye hemuliwatani. ⁴¹ Na kabo Andeleya ye lau kana kaha Simona ye lobai na yona ye hedehedede ye wane, “Mesaiya wa ka lobaiyako.” (*Mesaiya Giliki kalinadi unai kaniyona ede Keliso.*) ⁴² Ede ye woyaiyama Yesu unai.

Yesu ye kitalau iya unai na ye wane, “Kowa Simona, Yowane natuna. Kabo hesam se katai Kipasi.”** (Na kalina Giliki unai se wane Petelo.)

Yesu Pilipo yo Natanaela ye yoganeidi

⁴³ Mayadai hesauna unai Yesu nuwana ye hineli bena kabo ye lau Galili. Na Pilipo ye lobai ede ye hededelau unai ye wane, “Ku laoma ku hemuliwatanigau.”

⁴⁴ Pilipo meta Betesaida unai ye miyamiya doha hinage Andeleya yo Petelo.

⁴⁵ Pilipo ye lau Natanaela ye lobai na yona ye hedehedede ye wane, “Kulikuli tabuna unai Mose yo peloweta tamowai se hetahetala'usei wa ka lobaiyako. Hesana ede Yesu, Nasaleta tamowaina, iya Yosepa natuna.”

** **1:27:** Sendolo mainadi ya yailidi: Teina meta heyayai tauhaidi dobidobidi yodi paisowa. ** **1:42:** Kipasi meta kalina Alamaiki, na kaniyona ede weku.

⁴⁶ Na Natanaela ye henamai ye wane, “Mamohoi Nasaleta tamowaina? Ginauli saha namwanamwana kabo Nasaleta unai ye laoma?” Pilipo ye wane, “Ku laoma na ku kita.”

⁴⁷ Huyana Yesu Natanaela ye kita ye laolaoma ede iya ye hededehemasalaha ye wane, “Teina tamowai ta meta Isalaela tamowaina mamohoina, iya nige gonowana tamowai hesau ye lupoi.”

⁴⁸ Kabo Natanaela ye henamai ye wane, “Idohagi na kabigu ku kata?”

Yesu ye hededebui ye wane, “Huyana kaiwa** guninawai ku miyamiya meta ya kitagoko, na kabo Pilipo ye yoganeigo.”

⁴⁹ Ede Natanaela ye hededelau unai ye wane, “Labi, kowa Yaubada Natuna, Isalaela yoma wasawasa.”

⁵⁰ Yesu ye wane, “Yom kawamamohoi ne matawuwuna ede ya hededelaowa kalimwai meta ya kitago kaiwa guninawai ku miyamiya. Na sola kabo ginauli saesaedi ku kitadi na kabo teina.” ⁵¹ Yesu yona hedehedede ye tubei ye wane, “Ya hededemamohoi kalimiuwai: Kabo galewa kwa kita ye tasoke, na Yaubada yona anelu se dobidobima Tau Natuna unai yo se seuseuyo.”**

2

Yesu waila ye bui ye hemala waina

¹ Mayadai labui mulidiwai, teha Galili unai magai hesau hesana Kana unai tawasola kaikaigogona se ginauli. Yesu sinana meta iya menai, ² yo hinage Yesu maiyana hekahekatao se kaibwadaidi se laoma tawasola kaikaigogona ne unai. ³ Huyana waina ye gehe ede Yesu sinana ye hededelau iya unai ye wane, “Kadi waina wa ye gehe.”

⁴ Yesu ye hededebui ye wane, “Sinagu, idohagi to ku hededelaoma kaliguwai? Sola nige yogu huya ye lagema.”

⁵ Na sinana wa ye hededelau heyayai tauhaidi udiyedi ye wane, “Saha ye hedededi ne meta bena kwa ginauliwatanidi.”

⁶ Numa ne unai waila pakuna haligigi-kesega. Paku ne weku unai se tadidi, na hekadi gonowana waila 80 lita yo hekadi 120 lita unai se hemwayaudi. Na waila wa se hepaisowadiko Dius yodi kaidui yo yodi kaikai gogodiyao kaideulidi kabikabidi hesabadi.

⁷ Na Yesu ye hededelau heyayai tauhaidi wa udiyedi ye wane, “Paku ne waila unai kwa hemwayaudi”, ede se inihemwayaudi.

⁸ Kabo ye wane, “Kabo gagilina kwa yaihai na kwa bahelaei kaikaigogo tauloinaena unai.”

Siya kabo se bahelaei ⁹ na waila ye hemala waina wa ye numatonogi. Yodi kabayaina meta nige kabina ye kata, na yona heyayai tauhaidi mo se bom kabina se kata. Kabo kaikaigogo tauloinaena wa tautawasola loheyana ye yoganeyama ¹⁰ na ye hededelau unai ye wane, “Yoda kabikabi kabina ku katakalili, meta waina namwanamwana ta mosebagunai taumana udiyedi. Na huyana se numa se lau na nige gonowana ginauli hesau kamnana se lapulobai kabo waina maisana gagilina ta moseidi. Na idohagi to waina namwanamwakalilina ta ku hemulitayama?”

¹¹ Teina ta meta laulau gigigigibwalina bagubagunakalilina teha Galili unai magai hesana Kana unai Yesu ye ginauli. Na teina laulau ta unai iya kana kao saesaena mamohoina ye hemasalaha, unai yona hekahekatao iya se sunumaei.

Yesu Numa Tabuna unai taulokulokune ye henakudi (Mataiyo 21:12-17, Maleko 11:15-19, Luka 19:45-46)

** **1:48:** Kaiwa ta kalina Dimdim unai se wane fig kaiwana. Kalinada unai bosibosi unai ta lauhedamaiyei.

** **1:51:** Anelu se dobidobima ... yo se seuseuyo: Genese 28:12 unai ta hasili meta Yaubada yona anelu se dobidobima Yakobo unai yo se seuseuyo. Na kaniyona ede, Yaubada yona hededehe sunuma kabo ye hemamohoiyeidi.

¹² Tawasola kaikaigogona mulinawai Yesu ma sinana, kana kahao yo yona hekahekatao wa se dobi Kapelenauma, na menai se miya mayadai hisa mo. ¹³ Kabo Dius tamowaidi yodi Taukiuli Henuwaisinina huyana ye hanahanauma, ede Yesu ye sae Yelusalema. ¹⁴ Na Numa Tabuna bakubakuna unai tamowai hekadi ye lobaidi siya bulumakau, mamoe yo bunebune se lokulokuneidi, yo siya moni taulaulauhedudu** meta hatahata kabatulidi udiyedi se tutuli. ¹⁵ Yesu kabu maina udiyedi wipi ye ginauli na kabu Numa Tabuna bakubakuna wa unai tamowai, bulumakau yo mamoe maudoidi wa ye henakuhepesadi. Moni taulaulauhedudu yodi moni ye kuyahe'uludi yo yodi hatahata ye buidi. ¹⁶ Na ye hededelau bunebune taulokulokuneidi wa udiyedi ye wane, “Manuwa ta kwa bahehepesadi! Idohagi to tamagu yona Numa Tabuna ta kwa hai ye hemala kabalokulokune numana!”

¹⁷ Na kabu yona hekahekatao kulikuli tabuna beyabeyana se nuwatui doha ye wane, “Yom Numa Tabuna ya gadosisikaliliyei, na unai kabu se heyababagau.” (*Same 69:9*)

¹⁸ Na Dius tauwoyaidi se hededelau Yesu unai se wane, “Laulau gigigigibwalina saha kabu ku ginauli kalimawai, na unai kabu kabina ka kata yom tanuwaga gigibwalina ta meta Yaubada unai ye laoma?”

¹⁹ Yesu ye hededebui ye wane, “Numa tabuna ta kwa lopagwaligwali, na mayadai haiyona unai kabu ya ginauli'uyoi.”

²⁰ Na kabu Dius tauwoyaidi wa se hededebui se wane, “Teina Numa Tabuna ta meta bolimai badona 46 unai se ginauli. Idohagi to bena mayadai haiyona unai kabu ku ginauli'uyoi?” ²¹ Na Numa Tabuna Yesu ye hetahetala'usei ta meta iya ye bom tauna. ²² Unai huyana Yesu ye boita na ye tolo'uyo meta yona hekahekatao saha ye hededediko wa se nuwatuidi, ede kulikuli tabuna yo Yesu yona hedehedede wa se kawamamohoiyeidi.

²³ Huyana Yesu iya Yelusalema unai Taukiuli Henuwaisinina hesabana na menai laulau gigigigibwalidi ye ginaulidi wa meta tamowai gwaudi se kitadi, ede iya hesana unai se sunuma.

²⁴ Na Yesu nige ye sunumaeidi, matawuwuna tamowai maudoidi nuwadi kabidi ye katakalili. ²⁵ Bwagana Tamowai yodi nuwanuwatu nige se hededehemasalahadi Yesu unai, iyamo kadi kao kabidi ye katako.

3

Yesu Nikodemo ye hekata

¹ Yelusalema unai meta Paliseya tamowaina hesau, hesana ede Nikodemo, na iya hinage Sunedeli bodana tamowaina hesau.

² Boniyai hesau unai ye lau Yesu kalinawai na ye wane, “Labi, kabim ka kata meta kowa taulauhekata Yaubada unai ku laoma. Laulau gigigigibwalidi ku ginaulidi wa nige tamowai hesau gonowana ye ginaulidi. Teina unai ye hemasalaha meta Yaubada iya maiyam.”

³ Yesu ye hededebui ye wane, “Ya hededemamohoi kalimwai: Ena tamowai hesau nige labasi helabuina ye hai, meta nige gonowana Yaubada yona basileiya ye kita.”

⁴ Na Nikodemo ye hededelau Yesu unai ye wane, “Idohagi kabu tamowai tau-taubadana ye luwu'uyo sinana bogana unai na labasi helabuina ye hai?”

⁵ Yesu ye hededelau unai ye wane, “Ya hededemamohoi kalimwai: Ena tamowai hesau nige labasi helabuina ye hai waila yo Yaluwa udiyedi, meta taba nige ye lusolalau Yaubada yona basileiya unai. ⁶ Tamowai wawayao se labasidi buluma unai meta buluma mo maulina unai se miya, na Yaluwa meta gonowana mauli nige kana siga ye mosei kalidiwai. ⁷ Kowa taba nige yogu hedehedede ta udiyedi ku siliyata doha

** **2:14:** Taulaulauhedudu wa yodi paisowa meta dagela monidiyao se hai na yodi moni unai se hedudu, iya ede sekeli yo lepetona.

wau ya wane, 'Taba labasi helabuina kwa hai.' ⁸ Yaumai** ye towama kabo yasasana mo ta lapui, na nige kabina ta kata haedi ye laolaoma o haedi kabo ye laulau. Unai gonogonowana doha siya Yaluwa unai labasi helabuina tauhaina ne."

⁹ Nikodemo ye henamai'uyo ye wane, "Teina ta meta idohagi?"

¹⁰ Na Yesu ye wane, "Kowa meta Isalaela tamowaidiyao yodi laugagayo taulauhekataena, na idohagi to teina nuwanuwatu ta nige ku nuwatulobaidi? ¹¹ Ya hededemamohoi kalimwai: Saha kabidi ka kata meta ka hedehededeidi, yo saha ka kitadi meta ka hedehemasalahadi kalimiuwai. Na iyamo yoma hedehedede ta nige kwa haidi. ¹² Tanoubu ginaulidi ya hedehededeidi kalimiuwai, na nige kwa kawamamohoiyeigau. Na idohagi kabo kwa kawamamohoiyeigau taba galewa ginaulidi ya hedehededeidi? ¹³ Nige tamowai hesau ye sae galewa, na kesega mo galewa ne unai ye dobima, iya ede Tau Natuna. ¹⁴ Doha Mose mwata ye lausini balabalagaibu unai wa,** meta gonogonowana doha tenem kabo Tau Natuna hinage se lausini, ¹⁵ na unai tausunumaena maudoidi kabo mauli nige kana siga se lobai. ¹⁶ Matawuwuna Yaubada tanoubu ye gadosisikaliliyei, ede natukesekesegana ye mosegabaei. Unai kaiteya iya ye sunumaei, meta taba nige hekamkamna ye lobai, na mauli nige kana siga kabo ye hai. ¹⁷ Yaubada Natuna ye hetamaliyama nige bena tanoubu ta tamowaidi ye hekilainodi, na bena ye gilihaidi. ¹⁸ Ena kaiteya Yaubada Natuna ye sunumaei, meta Yaubada taba nige ye hegilu. Na kaiteya nige ye sunumaei, meta Yaubada iya ye hegilunonohaiyako, matawuwuna Yaubada natukesekesegana hesanawai nige ye sunuma. ¹⁹ Yaubada yona hekasa nuwanuwatuna ede doha teina: Mala wa ye laomako tanoubu ta unai, na tamowai yodi laulau meta se yababakalili, unai masigili se henuwakaliliyei na kabo mala. ²⁰ Na kaiteyadi yodi laulau se yababa meta mala wa se subu, yo taba nige se laoma mala ne unai, matawuwuna nige se henuwa bena yodi ba'aya se hemalahadi. ²¹ Na kaiteyadi yodi laulau se dudulai meta se laoma mala ne unai. Na kabo tamowai maudoidi se kitadi meta saha se ginaulidi ne Yaubada ye henuwadi."

Yowane Babatiso Yesu ye hedehemasalaha

²² Na kabo Yesu maiyana hekahekatao Yelusalema se laugabae se lau Yudeya magaina hesau unai. Menai se miya huyana ye katuloha, na Yesu ye hebahebabatiso. ²³ Na Yowane meta teha hesau unai hinage ye hebahebabatiso. Na iya Aenona unai Salim dedekanawai, matawuwuna temenai waila lakilakina yo tamowai se bado se laolaoma bena se babatiso. ²⁴ Tenem huyana ne unai Yowane sola nige se tole numatutugudu unai. ²⁵ Yowane yona hekahekatao yo Dius tamowaina hesau Dius yodi lauhe'a'a kabik-abina debanaena se haikawayagala. ²⁶ Ede se laoma Yowane unai na se wane, "Labi, tamowai wa maiyam Yolidani hali sanakawasina unai na ku hedehemasalaha'usei wa meta hinage ye hebahebabatiso, na tamowai maudoidi se laulau iya kalinawai."

²⁷ Yodi hedehedede wa unai Yowane ye hededebui ye wane, "Nige gonowana tamowai hesau paisowa ye haigaibui, na paisowa ye hai ne meta Yaubada ye mosei. ²⁸ Yogu hedehedede wa komiu kwa lapuidiko na gonowana kwa hemamohoiyeidi doha ya wane, 'Yau nige Kelisona ede, na yau meta Yaubada ye hetamalibagunaigau ya laoma.'

²⁹ Tautawasola waihiuna meta iya tautawasola loheyana yona. Na tautawasola loheyana tausaguina meta ye nayanaya yo ye lapulapui. Na huyana tautawasola loheyana kalinana ye lapui meta ye gwauyalalakili. Tenem gwauyala ne meta yau yogu, matawuwuna tautawasola loheyana ede ye masalahako. ³⁰ Iya hesana meta bena ye saekalili, na yau hesagu bena ye dobi.

** **3:8:** Yaumai meta kalina Giliki unai kaniyona hesau hinage, iya ede yaluwa. ** **3:14:** Mose mwata ye lausini wasana ku hasili Numela 21:4-9 unai.

³¹ Iya galewa ne unai ye dobima wa meta tamowai maudoidi ye saedikwaidi. Na kaiteya tanoubu ta unai ye tubuma** meta tanoubu ta yona, yo yona hedehedede doha tanoubu ta tamowaina. Na galewa ne unai taudobima wa meta tamowai maudoidi ye saedikwaidi. ³² Saha ye kitadi yo ye lapuidi wa ye hededehehemasalahadi. Na iyamo nige hesau ye lapulau yona hedehedede wa udiyedi. ³³ Na kaiteyadi yona hedehedede wa se hai meta se hemamohoiyei ede Yaubada yona hedehedede wa ye mamohoi. ³⁴ Matawuwuna Yaubada Keliso ye hetamaliyama yo Yaluwa Tabuna unai iya ye hemwayaukaliliyei, ede Yaubada yona hedehedede ye hededehehemasalahadi. ³⁵ Tamana meta Natuna ye gadosisiyei, unai ginauli maudoidi ye tolegabaeidi iya nimanawai. ³⁶ Na kaiteya iya Natuna ne ye kawamamohoiyei meta mauli nige kana siga ye hai, na kaiteya iya Natuna ne ye subu, taba nige mauli nige kana siga ye hai na Yaubada yona kouyalayala unai ye miya.”

4

Yesu maiyana Samaliya waihiuna se hedehedede

¹⁻³ Paliseya tamowaidi wasa se lapui meta Yesu iya yona hekahekatao se bado ye haidi yo ye hebabatisoidi, na kabo Yowane. Na iyamo mamohoina ede Yesu nige ye hebahebabatiso, na yona hekahekatao mo se hebahebabatiso. Huyana Yesu wasa ye lapui meta Paliseya tamowaidiyao yona kabikabi wa kabina se kata, ede Yudeya ye laugabae na ye uyo Galili. ⁴ Na yona lau ne unai meta ye lau teha Samaliya unai ⁵ na ye lage Samaliya magaina lakilakina hesana Saeka unai. Na menai tano gagilina hesau beyabeyana Yakobo ye mosei natuna Yosepa unai. ⁶ Na temenai meta Yakobo kana wailakeli. Na Yesu yona taihile wa unai kamnana ye yababa, ede ye tuli na ye kaiyawasi wailakeli wa dedekanawai. Na mahanana wa meta mayamayadailaki yona tupwa unai. ⁷⁻⁸ Na yona hekahekatao se lauko magai wa unai bena kadi kai se hemaisa.

Na kabo Samaliya waihiuna hesau ye laoma bena waila ye yai, na Yesu ye hededelau unai ye wane, “Waihiu, taba gonowana waila ku haiyama ya numa?” ⁹ Kabo Samaliya waihiuna wa ye hededelau unai ye wane, “Kowa Dius tamowaina, na yau meta Samaliya waihiuna, na idohagi to ku kaibwadaigau bena waila ya leyawa ku numa?” Yona henamai wa kaniyona ede Dius tamowaidiyao nige gonowana Samaliya tamowaidi maidadiyao se hebodakesega.

¹⁰ Kabo Yesu ye hededebui ye wane, “Ena taba Yaubada yona kainauya kabina ku kata yo taukaibwadawaila kalimwai ta ku kitalobai, kabo gonowana ku kaibwadaei na waila maumaulina ye leyawa.”

¹¹ Na waihiu wa ye wane, “Taubada, nige kam waila kabayaiyaina, na wailakeli ne duhana ye dobikalili. Na haedi kabo waila maumaulina ta ku hai? ¹² Bena kowa ku saekalili na kabo tamamai Yakobo? Iya wailakeli ta tauleyamana ede. Na iya yo natunao yo yona suisui maudoidi hinage unai se numanuma.”

¹³ Na Yesu ye hededelau unai ye wane, “Kaiteya teina waila ta ye numa, meta kabo gonowana ye gadomagu'uyo. ¹⁴ Na kaiteya waila ya mosei ne ye numa, meta taba nige gonowana ye gadomagu'uyo. Waila ya mosei ne kabo ye hemala bonobonowasi kalinawai na ye miya ye lau yo mauli nige kana siga ye mosei.”

¹⁵ Kabo waihiu wa ye hededelau unai ye wane, “Taubada, waila ta ku leyama, to taba nige ya gadomagu'uyo yo hinage taba nige ya uyoma inai waila ya yaiyai.”

¹⁶ Yesu ye wane, “Ku lau mwanem ku woihai na kwa laoma inai.”

¹⁷ Waihiu wa ye hededebui ye wane, “Yau nige mwanegu.” Kabotaki Yesu ye wane, “Ku hedededudulai ede ku wane, ‘Yau nige mwanegu.’ ¹⁸ Mamohoi, yom hedehedede

** **3:31:** Na kaiteya tanoubu ta unai ye tubuma: Tausononoga hekadi yodi nuwatu meta teina hedehedede ta iya Yowane Babatiso hedehededena. Na hekadi yodi nuwatu meta hedehedede ne ye lau tanoubu tamowaidi maudoidi hedehedededi.

ne ye dudulai. Na iyamo kowa mwanemwao haligigi ku haidiko, na loheya maiyam ne meta iya nige mwanem.”

¹⁹ Kabo waihiu wa ye hededelau unai ye wane, “Taubada, ya nuwatulobai meta kowa peloweta. ²⁰ Kama mumugao teina kuduli ta unai Yaubada se tabataba'ohui, na komiu Dius tamowaidi kwa wane, ‘Kabataba'ohu mamohoina ede Yelusalema unai.’ ”

²¹ Yesu ye hededelau waihiu wa unai ye wane, “Waihiu, saha ya hedehehedeidi ta taba ku kawamamohoiyeidi. Huyana kabo ye laolaoma meta taba nige Tamamai kwa taba'ohui teina kuduli ta unai o Yelusalema unai. ²² Na komiu Samaliya tamowaidiyao kaiteya kwa taba'ohui ne meta nige kabina kwa kata, na kai Tamamai kabina ka kata na ka taba'ohui, matawuwuna ede kabihemauli meta kai Dius kalimaiwai ye laoma. ²³ Huyana sola ye laolaoma yo iya ede ye laomako na tautaba'ohu mamohoidi kabo Tamamai se taba'ohui yaluwa yo hedehehedemamohoi udiyedi,** matawuwuna tautaba'ohu doha tenem meta Tamamai iya ye henuwa'useidi ede. ²⁴ Yaubada meta iya yaluwa, unai tautaba'ohuina bena yaluwa yo hedehehedemamohoi udiyedi se taba'ohui.”

²⁵ Na waihiu wa ye wane, “Kabina ya kata meta Mesaiya kabo ye laoma. Hinage hesana se hedede ede Keliso. Na huyana ye laoma meta ginauli maudoidi kabo ye hedehehemasalahadi kalidawai.” ²⁶ Na kabo Yesu ye hedehehemasalahadi'uyoi ye wane, “Yau ya hedehehedelaowa ta meta yau Kelisona ede.”

Yesu yona hekahekatao se uyoma

²⁷ Na huyana yona hekahekatao wa se uyoma meta se kita waihiu hesau maiyana se hedehehede, ede se siliyata.** Na nige hesau bena ye henamaiyei ye wane, “Saha ku henuwa waihiu ne unai?” o, “Idohagi to waihiu ne maiyam kwa hedehehede?”

²⁸ Kabo waihiu wa kana waila pakuna wa ye laugabaei na ye uyo magai wa unai, na tamowai maudoidi yodi ye hedehehede ²⁹ ye wane, “Kwa laoma ta lau tamowai hesau kwa kita. Ginauli maudoidi ya ginaulidiko wa meta ye hedehehemasalahadi. Nuwana iya Keliso?” ³⁰ Na kabo tamowai gwaudi magai wa unai se laoma na se lau Yesu hesabana.

³¹ Waihiu wa ye lauko, na kabo Yesu yona hekahekatao wa se hededelau unai se wane, “Labi, taba kai hesau ku kai.” ³² Na ye hededelau udiyedi ye wane, “Yau kagu kai meta komiu nige kabina kwa kata.”

³³ Unai se bom se henahenamai'uyoidi se wane, “Nuwana tamowai hesau kai ye moseiyako ye kai.”

³⁴ Yesu ye wane, “Kagu kai ede bena tauhetamaligau yona nuwatu ya ginauliwatanidi na yona paisowa ya ginaulihegehedi. ³⁵ Yomi hedehehede hesau meta doha teina kwa wane, ‘Nawalai hasi mo na kabo witi huyabolina ye lage.’ Yau ya hededelaowa ya wane, kwa kaikewalau koya ne udiyedi! Witi ye sunako yo ye posiposi, na huyabolina ede ye lageko.** ³⁶ Na witi tautanogogoina kabo yona paisowa maisana ye hai yo witi ye tanogogoi. Witi ne meta siya ede tamowai se laoma mauli nige kana siga se hai. Unai bena witi tumana tauhesuluna** yo witi tautanogogoina kabo se gwauyalakesega. ³⁷ Teina unai hedehehede ta, ‘Hesau ye hesulu na hesau ye tanogogoi’ meta mamohoi.

** **4:23:** Se taba'ohui yaluwa yo hedehehedemamohoi udiyedi: Hedehehede ta kaniyona ede tautaba'ohu mamohoidi bena Yaluwa Tabuna ye hemwayaudi yo Yesu se sunumaei, na kabo Yaubada se taba'ohui. ** **4:27:** Se siliyata matawuwuna Dius yodi kabikabi unai yodi taulauhekata nige gonowana waihiu nige kabina se kata maiyana se hedehehede. ** **4:35:** Witi huyabolina ede ye lageko: Teina hedehehede ta meta palabole, na kaniyona ede Yesu yona hekahekatao bena se kitalau tamowai udiyedi. Tamowai ne se nonoha na Yaubada wasana se lapui yo se kawamamohoiyei. ** **4:36:** Witi tumana tauhesuluna: Witi hedehehemasalahana ku hasili.

³⁸ Ya hetamaligomiu bena kwa lau witi nige kwa hesuludi wa kwa tanogogoidi. Tamowai hekadiyo paisowa lakilakina se ginauliyako, na komiu kabo yodi paisowa wa yona namwanamwa kwa hai.”

Samaliya tamowaidi gwaudi Yesu se kawamamohoiyei

³⁹ Samaliya tamowaidi gwaudi magai lakilakina unai taumiya wa Yesu se sunumaei matawuwuna waihiu wa yona hedehedede se lapui ye wane, “Ginauli maudoidi ya ginaulidiko wa meta ye hededehemasalahadi kaliguwai.” ⁴⁰ Se laoma Yesu unai na se kaibwadai taba menai sola maiyadi se miya, ede ye miya mayadai labui. ⁴¹ Na Yesu yona hedehedede debanawai ede tamowai hekadi'uyo se laoma se hemala tausunumaena.

⁴² Na se hededelau waihiu wa unai se wane, “Huya bagubagunana unai meta yom hedehedede wa debanawai ka sunuma. Na mahana ta unai meta kai ka bom yona hedehedede ta ka lapuidi, unai kabina ka kata meta kita tanoubu ta tamowaidi Tauhemaulida mamohoina ede iya.”

Yesu gabemani yodi tamowai lakilakina natuna ye henamwanamwa (Mataiyo 8:5-13, Luka 7:1-10)

⁴³ Mayadai labui wa mulidiwai Yesu ye dalahai ye sae Galili. ⁴⁴ Na Yesu ye hedehemasalahayako meta peloweta yona magai tamowaidiyao iya nige gonowana se hekasisiyei, na iyamo ye sae Galili. ⁴⁵ Huyana ye lage Galili, meta Galili tamowaidi iya se hailobai, matawuwuna ede Taukiuli Henuwaisinina mayadaidi wa udiyedi siya Yelusalema unai na saha ye ginaulidi wa maudoidi se kitadiko.

⁴⁶ Kabo Yesu ye uyo magai gagilina hesana Kana, Galili tehana unai. Magai ta unai meta lahinaidi waila ye bui ye hemala waina. [Na Galili unai magai hesau hesana] Kapelenauma, na temenai gabemani yodi tamowai lakilakina hesau, natuna loheya meta ye kasiyebwakalili. ⁴⁷ Na huyana tamowai wa Yesu wasana ye lapui meta Yudeya unai ye saemako Galili, ede ye lau unai na ye kaibwadai bena taba ye laoma Kapelenauma na natuna ne ye henamwanamwa. Wawaya ne meta boita ye hanahanawui.

⁴⁸ Yesu ye hededelau unai ye wane, “Idohagi, kowa yo tamowai maudoidi, ena nige hekihekinoi yo laulau gigigigibwalidi kwa kitadi meta nige gonowana kwa kawamamohoi!”

⁴⁹ Na gabemani yodi tamowai lakilakina wa Yesu ye kaikaibwadai ye wane, “Guiyau, ku laoma ta lau, madai natugu ne ye boita.”

⁵⁰ Na Yesu ye hededelau unai ye wane, “Ku uyo yom magai. Natum ne kabo ye namwanamwa.”

Tamowai wa Yesu yona hedehedede ye sunumaei ede ye uyo. ⁵¹ Sola ma laulauna na yona heyayai tauhaidi hekadi se laoma ede yona se hedehedede meta natuna loheya wa ye namwanamwako. ⁵² Na ye henamaiyeidi ye wane, “Mahana saha unai ye namwanamwa?”, na se wane, “Lahi meimeilahi mahanana 1 kiloki unai taugwagwama wa ye laugabaei.”

⁵³ Kabo loheya wa tamana wa nuwana ne unai ye sae meta tenem mahanana ne unai Yesu ye wane, “Natum ne kabo ye namwanamwa.” Ede tamowai wa yo yona numa tamowaidi maudoidi Yesu se sunumaei.

⁵⁴ Huyana Yesu Yudeya ye laugabae na ye uyo Galili, meta teina ta yona laulau gigigigibwalina helabuina ede.

5

Waila kipuna dedekanawai Yesu taukasikasiyebwa hesau ye henamwanamwa

¹ Mayadai hisa mulidiwai kabo Yesu ye sae Yelusalema Dius yodi kaikaigogo hesau hesabana. ² Na Yelusalema unai meta waila kipuna hesau keda hesau hesana Mamoe Kedana dedekanawai. Kipuna wa hesana kalina Alamaiki unai se katai Beteseta. Na

kabalaulauna numadi haligigi meta waila kipuna wa se tauhetakikili.** 3 Temenai meta taukasiasiyebwa doha taumatagibugibu, kae yabayababadi yo taubunibuni bodadi se kenokeno [na waila hekahekasina ne se nayanayai. 4 Matawuwuna huya hekadi anelu hesau ye dobi kabo waila kipuna ne ye hekasihetakikili, na ena taukasiasiyebwa hesau ye gayodobibaguna waila hekahekasina ne unai kabo ye namwanamwa.]**

5 Temenai tamowai hesau ye kasiyebwa bolimai badona 38. 6 Yesu taukasiasiyebwa wa ye kita ye kenokeno na ye nuwatulobai meta ye kasiyebwa huyalohaloha, ede ye henamaiyei ye wane, “Kowa ku henuwa bena ku namwanamwa?” 7 Na tamowai wa ye wane, “Taubada, huyana anelu waila ne ye hekasihetakikili na ya kaipate bena ya gayodobi meta tamowai hesau ye gayodobibagunako, matawuwuna ede nige tausaguigau hesau.” 8 Na Yesu ye hededelau unai ye wane, “Ku tolo yom lauwese ne ku bahei na ku laulau.” 9 Tenem mahana ne unai tamowai wa ye namwanamwa, na yona lauwese wa ye noku, ye bahei na ye hetubu ye laulau.

Na teina laulau gigigigibwalina ta mayadai Sabati unai ye tubu. 10 Ede Dius tauwoyaidi hekadi se hededelau taunamwanamwa wa unai se wane, “Teina mayadai ta meta Sabati, na laugagayo ye hedede meta tabu yom lauwese ku bahei na ku taitaihile'usi.”

11 Na tamowai wa ye hededebui ye wane, “Tauhenamwanamwagau ye hededelaoma kaliguwai ye wane, ‘Yom lauwese ne ku bahei na ku lau.’ ”

12 Unai se henamaiyei se wane, “Kaiteya ye hedede bena ku bahei na ku lau?”

13 Taunamwanamwa wa nige kabina ye kata, matawuwuna ede temenai boda wa luwadiyena Yesu ye luwukwadaleleko.

14 Na muliyena Yesu iya ye lobai Numa Tabuna unai, ede ye hededelau unai ye wane, “Kowa ku namwanamwako, na tabu yababa ku ginauli'uyoi, madai yababalakilaki kabo ku hekalo.” 15 Tamowai wa Yesu ye laugabaei na ye lau Dius tauwoyaidi wa yodi ye hedehedede meta tauhenamwanamwana wa Yesu.

Yaubada Natuna mauli ye leyama

16 Mayadai Sabati udiyedi Yesu laulau gigigigibwalidi wa ye ginaginalidi, unai Dius tauwoyaidi se hetubu se hewaiunu. 17 Na Yesu ye hededelau udiyedi ye wane, “Tamagu meta mayadai badobado ye paipaisowa ye laoma ee teina, unai yau hinage bena ya paipaisowa.” 18 Unai Dius tauwoyaidi wa se kaipatebayaokalili bena se koihemwaloi, matawuwuna ede mayadai Sabati laugagayona ye utu'utusi, yo hinage ye hedede meta tamana ede Yaubada. Na teina hedehedede ta unai ye hemasalaha meta maiyana Yaubada gonogonowadi.

19 Ede Yesu ye hededelau udiyedi ye wane, “Ya hededemamohoi kalimiuwai: Natu nige gonowana saha ye bom ye ginauli, na saha Tamana ye ginauli ye kita kabo ye ginauliwatani. Matawuwuna Tamana ginauli saha ye ginauli, Natuna hinage kabo ye ginauliwatani. 20 Tamana iya Natuna ye gadosisiyei, unai ginauli maudoidi ye ginaulidi meta ye hekita. Mamohoi, Tamana ginauli saesaekalilidi kabo ye hemasalahadi Natuna unai, na kabo teina saha ye ginaulidi ta. Unai kabo kwa noko. 21 Tamana tauboiboita ye hetolo'uyoidi yo mauli ye moseidi, gonogonowana hinage Natuna mauli ye moseidi kaiteyadi ye henuwadi ne udiyedi. 22 Tamana nige hekasa hesau ye ginauli, na kitahekasa maudoina ye moseiyako Natuna unai, 23 matawuwuna ye henuwa bena tamowai maudoidi Natuna se hekasisiyei doha hinage Tamana se hekasisiyei. Kaiteya Natuna nige ye hekasisiyei meta hinage Tamana nige ye hekasisiyei, na iya Natuna ta tauhetamaliyamana.

** 5:2: Kabalaulauna numadi haligigi: Kipu wa meta teha labui, na kabalaulau numana hesau meta duwaduwalidiyena, na numana hasi kipu labui wa dedekadi hasi wa udiyedi. ** 5:4: Lausoi 3b yo 4 kulikuli beyabeyadi hisahisadi mo udiyedi ta hasilidi, na kulikuli beyabeyakalilidi udiyedi meta nige se kulidi.

²⁴ Ya hededemamohoi kalimiuwai: Kaiteya yogu hedehedede ta ye lapuidi yo tauhetamaligau ye sunumaei, iya meta mauli nige kana siga ye hai, yo Yaubada yona hekasa taba nige ye hekalo. Na boita yona tupwa ye laugabaeyako na mauli nige kana siga kabo ye lobai. ²⁵ Ya hededemamohoi kalimiuwai: Huyana sola ye laolaoma yo iya ede ye laomako kabo tauboiboita** Yaubada Natuna kalinana se lapui. Na kalinana taulapuina ne kabo se mauli. ²⁶ Tamana iya mauli wuwuna ede, na mauli wa ye mosehekawayako Natuna unai, ede iya hinage ye hemala mauli wuwuna. ²⁷ Yo hinage gigibwali ye mosehekawayako iya unai kabo kitahekasa ye ginauli, matawuwuna iya meta Tau Natuna.

²⁸ Teina unai tabu kwa siliyata. Huyana ye laolaoma kabo bwayabwaya udiyedi taukenokeno maudoidi Yaubada Natuna kalinana se lapui ²⁹ na se pesahaima. Na laulau namwanamwadi tauginaulidi kabo se tolo'uyo na se mauli. Na laulau yabayababadi tauginaulidi kabo hinage se tolo'uyo, na se lau kamkamna nige kana siga unai.

³⁰ Yau nige gonowana ya bom saha hesau ya ginauligaibui. Na saha ya lapui, kabo unai ya hekasa. Na yogu hekasa ne meta ye dudulai, matawuwuna nige yau yogu nuwatu, na tauhetamaligau yona nuwatu ya lauwatani.”

Yesu hededehehemasalaha hedehedededi

³¹ “Ena taba ya bom ya hededehehemasalaha'uyoigau, meta yogu hededehehemasalaha ne nige kaniyona. ³² Na Tamagu, iya hinage tauhededehehemasalahagau ede, na kabina ya kata meta yona hedehedede ne mamohoidi.

³³ Komiu tamowai hekadi kwa hetamalidi se lau Yowane unai bena se henamaiyei. Na yau kagu kao mamohoina ye hededehehemasalaha kalidiwai. ³⁴ Tamowai yodi hededehehemasalaha nige ya henuwadi, iyamo Yowane yona hededehehemasalaha wa ya hededededi kalimiuwai, bena udiyedi kabo mauli kwa lobai. ³⁵ Yowane kana kao meta doha lampa ye kalakalasi, na komiu dawayana ne unai bena kwa gwayuala huyakubwakubwa mo.

³⁶ Na kabahemasalahagau hesauna kaliguwai, iya meta ye saekalili na kabo Yowane yona hedehedede wa, iya ede yogu paisowa Tamagu ye ledima bena maudoidi ya ginaulidi. Kabo yogu paisowa ne se hemamohoiyeigau meta Tamagu ede tauhetamaligau. ³⁷ Yo hinage Tamagu tauhetamaligau meta ye hemamohoiyeigauko. Na komiu nige gonowana kalinana kwa lapui yo kana kao kwa kita, ³⁸ yo yona hedehedede nige se miya nuwamiu ne udiyedi, matawuwuna ede yau Yaubada ye hetamali'useigau wa nige kwa sunumaeigau. ³⁹ Na komiu meta kulikuli tabuna kwa hasilinamwanamwakaliliyei, matawuwuna yomi nuwatu ede unai kabo mauli nige kana siga kwa lobai. Mamohoi, kulikuli tabuna wa hinage ye hededehehemasalahagau. ⁴⁰ Na iyamo nige kwa henuwa bena taba kwa laoma kaliguwai na mauli kwa hai.

⁴¹ Yau tamowai yodi hedebasae meta nige ya henuwadi. ⁴² Na kabimiu ya kata meta Yaubada gadosisina** kalimiuwai nigele. ⁴³ Yau Tamagu hesanawai ya laoma, na iyamo nige kwa lapulaoma kaliguwai. Na nuwana taba tamowai hesau ye bom hesanawai ye laoma, kabo kwa lapulau unai. ⁴⁴ Maidamiu kwa hedehedebasae'uyoigomiu, na Yaubada, iya ye bom Yaubada, yona kitahenamwa meta nige kwa henuwa. Idohagi na kabo kwa sunumaeigau?

⁴⁵ Tabu yomi nuwatu bena Tamagu matanawai kabo yau ya tolo na ya hegiligomiu. Tauhegiligomiu ede Mose, na komiu yomi nuwatu ede bena iya unai kabo sagu kwa

** **5:25:** Tauboiboita: Tausonoga yodi nuwatu meta teina hedehedede ta kaniyona ede, Yaluwa yona teha unai tauboita. Siya nige Yaubada yona tamowai, matawuwuna ede nige Yesu se sunumaei, unai nige Yaluwa Tabuna se hai yo mauli nige kana siga nige kalidiwai. ** **5:42:** Yaubada gadosisina: Teina hedehedede ta kalina Giliki unai meta kaniyona labui. Bagubagunana ede lausoi unai ka kuliyako, Yaubada gadosisina, na helabuina ede Yaubada yona gadosisi.

lobai. ⁴⁶ Ena taba Mose kwa kawamamohoiyei, yau hinage bena kwa kawamamohoiyeigau. Matawuwuna wasagu wa Mose ye kuli yako. ⁴⁷ Na ena saha ye kuli wa nige kwa kawamamohoiyei, meta idohagi kabo yau kwa kawamamohoiyeigau?”

6

*Yesu tamowai 5,000 ye hekaidi
(Mataiyo 14:13-21, Maleko 6:30-44, Luka 9:10-17)*

¹ Mayadai hisa se laoko mulidiwai Yesu ye gelu waga hesau unai na Galili Gabwana unai ye kawasi ye lau hali sanakawasina unai. (Na teina waila ta hesana hesau ede Tibeliya Gabwana). ² Na yona kabalau maudoidi ne udiyedi meta bodalakilaki se hemuhemuliwatani, matawuwuna ede laulau gigigigibwalidi ye ginaulidi taukasikasiyebwa udiyedi wa se kitadiko. ³ Kabo Yesu ye sae kuduli hesau unai, na temenai yona hekahekatao maiyanao se tuli. ⁴ Na Dius yodi Taukiuli Henuwaisinina huyana meta ye hanahanaumako.

⁵ Na Yesu ye kaikewalau meta bodalakilaki ye kitadi se laolaoma hesabana, ede Pilipo ye henamaiyei ye wane, “Haedi kabo pwalawa ta hemaisa na boda ne ta hekaidi?” ⁶ Na yona henamai ta unai meta bena Pilipo ye laukita, na kabina ye katako meta saha kabo ye ginauli.

⁷ Pilipo ye hededebui ye wane, “Taba moni lakina denali 200** unai pwalawa ta hemaisa, meta nige gonowana kabo tamowai kesega kesega kana teha gagilina mo ye hai.”

⁸ Na kabo yona hekahekatao wa hesauna hesana Andeleya, Simona Petelo kana kaha wa, ye hededelau Yesu unai ⁹ ye wane, “Wawaya loheya hesau inai, na bali pwalawadi haligigi yo yama gagilidi labui ede kalinawai. Na idohagi udiyedi kabo bodalakilaki ta ta hekaidi?”

¹⁰ Menai meta lagaulakilaki ye kini na kabatulidi se namwakalili, ede Yesu ye wane, “Kwa hededelau tamowai ne udiyedi na se tulidobi lagau ne unai.” Na tautuli ne bodana wa luwadi ne unai meta loheloheyao badodi ede 5,000. ¹¹ Kabo Yesu pwalawa wa ye haidi na ye lautoki Yaubada unai, na ye soiyeidi taututuli wa udiyedi. Yo hinage yama wa ye haidi na ye soiyeidi. Na yodi nowonowoiyena kadi pwalawa yo yama se haidi, na maudoidi wa kabo kai lakilakina se kai.

¹² Se kaikai ye lau ee kadi siga bogadi wa se sese. Kabo Yesu ye hededelau yona hekahekatao wa udiyedi ye wane, “Kaitole maudoina ne kwa tanogogoi, na tabu kwa gabagabagaibuidi.” ¹³ Unai pwalawa haligigi wa taukaidi wa udiyedi kaitole maudoina se tanogogoi, ede bosa badona saudoudoi-labui se hemwayaudi. ¹⁴ Na laulau gigigigibwalina Yesu ye ginauli tamowai wa se kita ede se wane, “Mamohoi, peloweta ta nayanaya'usei bena kabo ye laoma tanoubu ta unai wa, ** iya ede teina.”

¹⁵ Yesu ye nuwatulobai meta kabo se muyowui bena se hetolo yodi wasawasa, unai ye laugabaedi na ye bom ye sae kuduli wa tehana hesau unai.

*Yesu ye laulau Galili Gabwana kewana unai
(Mataiyo 14:22-27, Maleko 6:45-52)*

¹⁶ Ye meimeilahi ede yona hekahekatao se dobi Galili Gabwana unai, ¹⁷ na waga hesau unai se gelu bena se kawasilau Kapelenauma. Ye masigiliko, na Yesu sola nige ye laoma udiyedi. ¹⁸ Yaumai lakilakina ede ye towatowa, unai gabwa wa ye wowoli. ¹⁹ Na se yale se lau keda lohana doha maela haiyona o hasi, na kabo Yesu se kita Gabwa wa kewana unai ye laolaoma waga wa hesabana. Ede se matausikalili. ²⁰ Na ye hededelau udiyedi

** 6:7: Denali 200 unai gonowana tamowai 2,000 kadi kai se hemaisadi mayadai kesega hesabana. ** 6:14: Peloweta ta nayanaya'usei ne hedehededen meta Dutelonomi 18:15 unai.

ye wane, “Tabu kwa matamatausi. Yau Yesu.” ²¹ Unai se henuwa bena taba ye gelu waga wa unai, na nige bayaona na waga wa ye dunasae yodi kabalau magaina wa unai.

Yesu iya ede mauli pwalawana

²² Mala ye tom ede boda se laugabae'useidi Galili Gabwana hali sanakawasina ne unai wa se nuwatulobai meta meimeilahi wa unai waga kesega mo se kita menai, na Yesu yona hekahekatao se bom mo waga wa unai se gelu se lau, na Yesu nige maiyadi.

²³ Kabo waga hekadi magai Tibeliya unai se laoma na se dunasae Guiyau yona lautoki kabaginaulina yo boda pwalawa yodi kabakaina magaina wa dedekanawai. ²⁴ Na huyana boda wa se nuwatulobai meta Yesu maiyanao hekahekatao wa nige menai, ede waga wa udiyedi se gelu na se lau Kapelenauma Yesu se wasenei.

²⁵ Na Gabwa hali sanakawasina wa unai se lobai ede se henamaiyei se wane, “Labi, kaiuyana ku laoma?”

²⁶ Yodi henamai wa Yesu ye bui ye wane, “Ya hededemamohoi kalimiuwai: Kwa wase-waseneigau ta meta nige laulau gigigigibwalidi kwa kitadi wa debadiwai, na pwalawa kwa kaidi na bogamiu se sese wa debadiwai. ²⁷ Tabu kwa paisowa kai pwasapwasana mo hesabana, na bena hinage kwa paisowa kai miyatahitahina hesabana. Iya kabo mauli nige kana siga ye leyawa. Teina kai ta kabo Tau Natuna ye leyawa, matawuwuna Tamana Yaubada gigibwali ye moseyako kabo gonowana kai ta ye leyawa.”

²⁸ Na kabo se henamaiyei se wane, “Idohagi na kabo Yaubada yona paisowa ka ginauli?”

²⁹ Yesu ye hededebui ye wane, “Yaubada saha ye henuwagomiu bena kwa ginauli ede teina: Yona lauhetamali tamowaina ne kwa sunumaei.”

³⁰ Na se henamai'uyo se wane, “Laulau gigigigibwalina saha ku ginauli ka kita na unai kabo ka kawamamohoiyeigo? Saha kabo ku ginauli? ³¹ Kama kulutubuwa meta balabala wa unai ‘mana’ se kai doha kulikuli tabuna unai se kuliyako se wane, ‘Iya** meta galewa pwalawana ye moseidi se kai.’” (Same 78:24)

³² Yesu ye hededelau udiyedi ye wane, “Ya hededemamohoi kalimiuwai: Galewa pwalawana meta Mose iya nige ye leyawa, na Tamagu iya galewa pwalawana mamohoina tauleyawana ede. ³³ Kaiteya galewa ne unai ye dobima na mauli ye mosei tanoubu ta udiyedi, iya meta pwalawa Yaubada unai ye laoma.”

³⁴ Kabo se wane, “Taubada, pwalawa ta bena huya badobado kamai ku haihaiyama.”

³⁵ Ede Yesu ye hededelau udiyedi ye wane, “Yau mauli pwalawana ede. Na kaiteya ye laoma kaliguwai meta taba nige ye hasali, yo kaiteya ye sunuma kaliguwai taba nige gadona ye magu. ³⁶ Na ya hededeyako kalimiuwai meta laulau gigigigibwalidi ya ginaulidi wa kwa kitadiko, na iyamo nige kwa kawamamohoiyeigau. ³⁷ Na kaiteyadi tamagu ye ledima, siya kabo se laoma kaliguwai. Na taulaoma kaliguwai ne, meta taba nige ya subudi. ³⁸ Matawuwuna yau galewa ne unai ya dobima, meta nige bena yau yogu nuwatu ya ginauli, na Tamagu tauhetamaligau yona nuwatu mo bena ya ginaulidi.

³⁹ Na tauhetamaligau yona nuwatu ede teina: Kaiteyadi ye ledima kaliguwai, meta tabu hesauna ya hetaukwadalele, na hekasa mayadaina unai maudoidi kabo boita unai ya hetolo'uyoidi. ⁴⁰ Na Tamagu yona nuwatu ede bena siya kaiteyadi taुकitalau Natuna unai yo se sunumaei, meta mauli nige kana siga kabo se lobai, yo hekasa mayadaina unai kabo ya hetolo'uyoidi.”

⁴¹ Teina unai Dius tamowaidi hekadi se hetalapili, matawuwuna Yesu ye wane, “Yau pwalawa mamohoina ede galewa ne unai ya dobima.” ⁴² Ede se wane, “Teina tamowai ta, iya meta Yesu, Yosepa natuna, tamana yo sinana meta kabidi ta kata. Na idohagi to ye wane, ‘Yau galewa ne unai ya dobima?’”

** **6:31:** Iya ne meta Mose, matawuwuna Dius tamowaidi yodi nuwatu meta Mose balabala unai mana ye moseidi kadi kulutubuwa udiyedi, doha lausoiso 32 unai ta hasili.

⁴³ Yesu ye hededelau udiyedi ye wane, “Saha ya hedededi ta udiyedi tabu kwa heta-hetalapili. ⁴⁴ Taba nige tamowai hesau ye laomagaibu kaliguwai, na Tamagu tauheta-maligau kabo ye laeyama kaliguwai, na huyagehena ne unai kabo ya hetolo'uyoi. ⁴⁵ Doha peloweta hesau ye kuliyo ye wane, ‘Yaubada kabo tamowai maudoidi ye hekatadi.’

(*Aisaiya 54:13*) Na kaiteyadi se lapulau Tamagu unai yo se nuwatuwatani, kabo se laoma kaliguwai. ⁴⁶ Nige tamowai hesau Tamagu ye kita, na Yaubada unai taudobima ta, iya ye bom mo Tamana ye kita. ⁴⁷ Ya hededemamohoi kalimiuwai: Kaiteya ye sunuma kaliguwai meta iya mauli nige kana siga ye hai. ⁴⁸ Yau mauli pwalawana ede. ⁴⁹ Kami kulutubuwo balabala unai wa mana se kai, na iyamo maudoidi se boitageheko. ⁵⁰ Na yau pwalawana ede galewa ne unai ya dobima, na kaiteya pwalawa ta ye kai meta taba nige ye boita.

⁵¹ Yau pwalawa maumaulina ede, galewa ne unai ya dobima. Ena tamowai hesau teina pwalawa ta ye kai, mauli nige kana siga kabo ye hai. Teina pwalawa ta iya ede yau bulumagu ta, kabo ya mosegabaei tanoubu ta tamowaidiyao yodi mauli hesabana.”

⁵² Na kabo Dius tamowaidi se hetahetalapili'uyoidi se wane, “Idohagi na kabo teina tamowai ta bulumana ye leyama ta kai?” ⁵³ Yesu ye hededelau udiyedi ye wane, “Ya hededemamohoi kalimiuwai: Ena Tau Natuna bulumana nige kwa kai yo kwasinana nige kwa numa, taba nige mauli kwa hai. ⁵⁴ Na kaiteya bulumagu ye kai yo kwasinagu ye numa, iya meta mauli nige kana siga ye hai na huya gehena unai yau kabo ya hetolo'uyoi. ⁵⁵ Matawuwuna yau bulumagu ta, iya kai mamohoina yo kwasinagu ta numanuma mamohoina ede. ⁵⁶ Na kaiteya bulumagu ye kai yo kwasinagu ye numa, iya kabo ye miyakesegai yau kaliguwai, yo yau kabo ya miya iya kalinawai. ⁵⁷ Tamagu tauhetamaligau wa, iya mauli wuwuna na iya unai yau ya maumauli, na kaiteya bulumagu ne unai ye kaikai yo kwasinagu ne unai ye numanuma, kabo ye mauli yau debaguwai.

⁵⁸ Na pwalawa ta galewa ne unai ye dobima iya ede yau. Teina pwalawa ta meta udoikalili, nige doha kami mumugao se kai'usei wa. Siya mana se kai, na iyamo se boita. Na kaiteya teina pwalawa ta ye kai kabo mauli nige kana siga ye hai.”

⁵⁹ Yesu hedehedede maudoidi ta ye hedededi huyana Kapelenauma unai sunago kalonawai ye lauhekata.

Yesu yona hekahekatao gwaudi iya se laugabaei

⁶⁰ Yona hekahekatao gwaudi** hedehedede wa se lapui ede se wane, “Teina lauhekata ta ye pilipikalili. Kaiteya gonowana ye miyawatani?” ⁶¹ Yesu kabina ye kata meta yona hekahekatao wa se hetahetalapili, ede ye hededelau udiyedi ye wane, “Teina hedehedede ta se hetausi'olologomi? ⁶² Na yomi nuwanuwatu kabo doha saha, ena taba Tau Natuna kwa kita ye seuyo yona kabalaoma ne? ⁶³ Yaluwa Tabuna iya mauli tauleyawana ede, buluma nige gonowana mauli ye leyawa. Na hedehedede ya hedededi kalimiuwai ta, meta Yaluwa mauli tauleyawana unai se laoma na mauli se leyawa. ⁶⁴ Na komiu luwamiu ne unai hekadi meta nige se sunumaeigau.” Yesu ye hedede doha tenem matawuwuna huya bagubagunana unai na ye laoma meta kabidi ye katako kaiteyadi kabo nige se sunumaei yo hinage kaiteya kabo kana tauwalohai ede.

⁶⁵ Kabo Yesu ye hedehedede'uyo ye wane, “Tamowai hekadiyo meta nige yodi sunuma, unai ede ya hededelaowako kalimiuwai meta nige gonowana tamowai se bom yodi nuwanuwatuyena na se laoma kaliguwai, kana sigana ena Tamana ye talamyeyidi kabo se laoma kaliguwai.”

⁶⁶ Teina hedehedede ta mulidiwai meta yona hekahekatao gwaudi se kaiyawasi na nige se hemuliwatani'uyoi.

** **6:60:** Yona hekahekatao gwaudi, siya ede Yesu tauhemuhemuliwatanina maudoidi, na lausoisoi ta unai Yowane ye kataidi, Yesu yona hekahekatao.

⁶⁷ Kabo Yesu ye hededelau yona hekahekatao saudoudoi-labui wa udiyedi ye wane, “Na komiu hinage kwa henuwa bena kwa laugabaegau?” ⁶⁸ Ede Simona Petelo ye hededebui ye wane, “Guiyau, kabo ka lau kaiteya unai? Kowa ku bom mo mauli nige kana siga hedehedededi wa kalimwai. ⁶⁹ Ka kawamamohoiyeigo yo kabim ka kata meta kowa Tabuna, Yaubada unai ku laoma.”

⁷⁰ Na Yesu ye hededebui ye wane, “Komiu saudoudoi-labui ta ya kaisunuwaigomiu, na iyamo luwamiu ne unai meta kesega iya diyabolo yona taupaisowa.” ⁷¹ Teina unai Yesu meta Simona Isakaliyota** natuna Yudasi ye hetahetala. Iya saudoudoi-labui wa hesau, na muliwai kabo iya Yesu kana ye walohai.

7

Yesu kana kahao nige yodi sunuma

¹ Saha se tubu ta mulidiwai kabo Yesu ye tautakikili Galili magaidiyao udoi'udoi udiyedi. Yona nuwatu bena tabu ye laulau Yudeya, matawuwuna temenai Dius tauwoyaidi iya se nayanayaei bena kabo se unui. ² Na Dius yodi Gwau Miyaidi Henuwaisinina huyana ye hanahanauma, ³ ede Yesu kana kahao se hededelau unai se wane, “Kowa taba ku lau Yudeya, na temenai laulau gigigigibwalidi kabo ku ginaulidi na yom hekahekatao se kitadi. ⁴ Ena tamowai hesau ye henuwa bena tamowai maudoidi iya kabina se kata, meta saha ye ginaginaulidi ne taba nige ye ginauli wadawadamyena. Ena kowa laulau gigigigibwalidi ku ginaginaulidi, bena ku hemasalah'uyoigo na tamowai maudoidi se kitago.” ⁵ Yodi hedehedede wa kaniyona ede iya nige se kawamamohoiyei.

⁶ Na Yesu ye hededelau udiyedi ye wane, “Yau yogu huya sola nige ye lage bena taba ya lau. Na komiu meta huya maudoina udiyedi gonowana kwa lau. ⁷ Tanoubu ta tamowaidiyao taba nige gonowana se subugomiu, na yau meta se subugau, matawuwuna laulau saha se ginaulidi wa, ya hededehemasalahadi meta laulau ta se yababa. ⁸ Komiu kwa lau gwayuala ne unai, na yau taba nige ya lau, matawuwuna yogu huya dudulaina sola nige ye lage.”

⁹ Teina doha ye hedehedede na ye miyamiya teha Galili unai. ¹⁰ Iyamo huyana kana kahao wa se laoko gwayuala ne hesabana, kabo iya hinage ye lau, na yona lau ne unai meta tamowai nige kabina se kata. ¹¹ Na gwayuala ne unai Dius tauwoyaidi Yesu se wasewasenei na se henahenamai se wane, “Tamowai wa, iya ede haedi?”

¹² Boda maudoidi iya se hetahetalagadigadiguguyei. Hekadi se wane, “Iya tamowai namwanamwana.” Na hekadi se wane, “Nigele! Iya boda taulupolupoidi.” ¹³ Na iyamo nige tamowai hesau ye bom yona nuwanuwatu ye hededehemasalahadi boda kalidiwai, matawuwuna ede siya Dius tauwoyaidi wa se matausiyeidi.

Gwau Miyaidi Henuwaisinina unai Yesu ye lauhekata

¹⁴ [Yesu ye miyamiya wadawadamyena ye lau ee] gwayuala mayadaidi duwaduwalidi unai, na kabo Yesu ye mwalaesae Numa Tabuna bakubakuna unai na ye hetubu ye lauhekata. ¹⁵ Ede Dius tauwoyaidi se noko na se wane, “Teina tamowai ta kulikuli tabudi nige se hekata. Na idohagi to kabidi ye katakalili?”

¹⁶ Yesu ye hededebui ye wane, “Yogu lauhekata ta nige yau ya bom yogu nuwatu, na tauhetamaligau yona nuwatu. ¹⁷ Ena tamowai hesau ye henuwa bena Yaubada yona nuwatu ye miyawatani, kabo gonowana yogu hedehedede ta ye nuwatulobaidi meta ya bom yogu lauhekata o Yaubada yona lauhekata. ¹⁸ Ena tamowai hesau ye bom yona nuwanuwatu unai ye hedehedede, meta ye henuwa bena taba tamowai iya se hededetausaei. Na yau yogu nuwatu ede bena tauhetamaligau wa tamowai se

** **6:71:** Isakaliyota kaniyona meta magari Kaliyota tamowaina. Isalaela unai magari labui hesadi Kaliyota. Na Yudasi yona kabalaoma magari ede teha Yudeya unai, magari Hebelona unai ta lau teha yawana, keda lohana nuwana 16 kilomita.

hededetausaei. Unai ya hedehededemamohoi, na nige ya kaikailupolupo. ¹⁹ Mose laugagayo ye leyawa, na nige tamowai hesau luwamiuyena laugagayo ta maudoidi ye miyawatanidi. Na ye saha to kwa henuwa bena kwa unuhemwaloigau?”

²⁰ Boda wa se hededebui se wane, “Yaluwa yabayababana ye luwuigo. Kaiteya ye henuwa bena ye unuhemwaloigo?” ²¹ Yesu ye hededelau udiyedi ye wane, “Laulau gigigigibwalina kesega ya ginauli [*Sabati mayadaina unai*] na maudoimiu kwa siliyata. ²² [*Sola pelitome kabikabina kwa nuwatui:*] Mose pelitome kabikabina ye hekatagomiu, na kabina kwa kata meta nige Mose unai ye laoma, na kada mumugao udiyedi ye laoma. Na komiu Mose yona lauhekata wa kwa ginauliwatani meta huya hekadi mayadai Sabati unai kwa hepehepelitome. ²³ Mayadai Sabati unai tamowai kwa hepelitomedi, na yomi nuwatu bena tabu Mose yona laugagayo kesega kwa utusi. Na yau meta mayadai Sabati unai tamowai hesau yaluwana yo tauna ya henamwanamwadi. Na ye saha to kwa koipiliyeigau? ²⁴ Tabu ginauli kadi kao mo udiyedi kwa kitadi na yomi hekasa kwa ginaginulidi, na yomi hekasa bena se dudulai.”

Dius tamowaidiyao yodi nuwapwanopwano

²⁵ Na Yelusalema tamowaidiyao hekadi se hedede se wane, “Teina tamowai ta meta se wasewasenei bena taba se unuhemwaloi. ²⁶ Na ye laoma ede boda matadiwai ye hedehedede, na idohagi to tauwoyaeda nige saha hesau se ginauli kalinawai? Nuwana kabina se kata meta iya Keliso? ²⁷ Na teina tamowai ta yona kabalaoma meta kabina ka katako. Taba iya Keliso meta yona kabalaoma nige gonowana tamowai hesau kabina ye kata.”

²⁸ Yesu sola Numa Tabuna bakubakuna wa unai ye laulauhekata na ye kalinalakilaki ye wane, “Kabigu kwa katako yo yogu kabalaoma hinage kabina kwa katako. Iyamo ya laoma ta meta nige yau ya bom yogu nuwatuwai, na tauhetamaligau ne meta iya mamohoina. Na iya nige kabina kwa kata, ²⁹ na yau meta kabina ya kata, matawuwuna ede iya unai ya laoma yo iya hinage ye hetamaligau.”

³⁰ Kabo Yesu bena se kabihekahini, na iyamo nige tamowai hesau ye kabilau unai, matawuwuna yona huya sola nige ye lage. ³¹ Na boda wa luwadi ne unai meta tamowai gwaudi Yesu se sunumaei na se wane, “Huyana Keliso ye lagema meta yona laulau gigigigibwalidi ne se bado na kabo teina tamowai ta? Nigele! [*Nuwana teina iya Keliso ye lagemako ede.*]”

Yesu tauhaina se hetamalidi

³² Bodalakilaki wa Yesu yona gigibwali wa se hetahetala, na Paliseya tamowaidiyao yodi hedehedede wa se lapui ede maiyadiyao taukaitalasam tauwoyaidi kabo Numa Tabuna yona polisi hekadi se hetamalidi se lau bena Yesu se hai na se laeyama kalidiwai.

³³ Yesu yona lauhekata ye tubei ye wane, “Huyakubwakubwa mo yau kabo maiyamiu na kabo ya uyo tauhetamaligau wa unai. ³⁴ Komiu kabo kwa waseneigau, na taba nige kwa lobaigau, yo komiu nige gonowana kwa laoma yogu kabamiya ne unai.”

³⁵ Dius tauwoyaidi se bom se henahenamai'uyoidi se wane, “Teina tamowai ta kabo haedi ye laulau, unai taba nige ta lobai? Nuwana kabo ye lau kehadao se haimiyamiyaidi Giliki tamowaidiyao luwadiyena wa udiyedi, na menai kabo Giliki tamowaidiyao ye hekatadi? ³⁶ Yona hedehedede ta kaniyodi ede saha? Doha ye wane, ‘Komiu kabo kwa waseneigau, na taba nige kwa lobaigau. Yo komiu nige gonowana kwa laoma yogu kabamiya ne unai.’ ”

Waila maumaulina bonobonowasina

³⁷ Gwau Miyaidi Henuwaisinina mayadaina gehegehena yo saesaena unai kabo Yesu ye tolo na kalinana lakilakina unai ye wane, “Ena tamowai hesau gadona ye magu, meta bena ye laoma kaliguwai kabo waila ye numa. ³⁸ Doha peloweta hesau kulikuli

tabuna unai ye kuliwako ye wane, *[Ena kaiteya ye sunuma kaliguwai,]* kabo iya unai waila maumaulina ye bonobonowasima.’ ”**

³⁹ Teina hedehedede ta, “waila maumaulina”, meta Yesu Yaluwa Tabuna hedehedede na kaiteyadi Yesu se sunumaei kabo Yaluwa ne se hai. Huyana ne unai meta Yaluwa wa sola nige se hai, matawuwuna ede Yesu kana kao saesaena mamohoina Yaubada sola nige ye hemasalaha.

Boda wa se hekasa matawuwuna ede Yesu

⁴⁰ Boda wa teina hedehedede ta se lapui, ede hekadi se wane, “Mamohoi, teina tamowai ta meta iya Peloweta** wa.” ⁴¹ Hekadi se wane, “Teina Keliso wa”, na hekadi se wane, “Nige! Kabina ka katako meta Keliso taba nige Galili unai ye laoma. ⁴² Na kulikuli tabuna unai ye hemasalaha meta Keliso ne, iya wasawasa Dawida kana isimulita hesau na Dawida yona magai Betelehemu unai kabo ye laoma.” ⁴³ Unai tamowai wa se hebodalabuiyedi Yesu debanaena. ⁴⁴ Na hekadi se henuwa bena se kabihekahini, na iyamo nige tamowai hesau ye kabilau Yesu unai.

Dius tauwoyaidi Yesu nige se sunumaei

⁴⁵ Numa Tabuna yona polisi wa *[Yesu yona hedehedede wa se lapuidi]* ede se uyo taukaitalam tauwoyaidi yo Paliseya tamowaidiyao wa udiyedi. Kabo tauwoyayoya wa se henamailau udiyedi se wane, “Matawuwuna saha to iya nige kwa hai na kwa woyaiyama?” ⁴⁶ Numa Tabuna yona polisi wa se hededelau udiyedi se wane, “Sola nige tamowai hesau yona hedehedede ka lapui doha iya.” ⁴⁷ Paliseya tamowaidiyao wa se hededelau udiyedi se wane, “Nuwana komiu hinage ye lupohaigomiu? ⁴⁸ Tauwoyayoya maudoidi yo hinage kai Paliseya meta nige hesau tamowai me ye sunumaei. ⁴⁹ Nigekalikalili! Na teina boda ta meta Mose yona laugagayo nige kabina se kata, unai Yaubada yona hededeheyababa kabo ye talu kalidiwai.”

⁵⁰ Na Nikodemo, iya nabada wa unai ye lau Yesu ye kita wa yo iya tauwoyayoya ne kadi kaha hesau, iya ye hededelau udiyedi ye wane, ⁵¹ “Yoda laugagayo ye hedede meta taba nige tamowai hesau ta hegilugaibui, na bena ta lapulau unai yo saha ye ginauli wa wasana ye hedede ta lapubagunaei, na kabo ta nuwatuhekasa.” ⁵² Ede se hededebui se wane, “Nuwana kowa hinage Galili unai ku laoma? Kulikuli tabuna bena ku hasilinamwanamwaei, na kabo unai ku lobai meta taba nige peloweta hesau Galili unai ye laoma.” ⁵³ Na kabo maudoidi wa se dalahaigwaligwali se lau yodi numa.

8

Waihiu ganawali unai se lobai na se woyaiyama Yesu unai

¹ Na Yesu ye lau Olibe kudulina unai ye keno, ² na malatomtom gabilina hesauna unai ye uyo Numa Tabuna bakubakuna wa unai. Temenai tamowai gwaudi se tupagogoima iya unai, ede ye tuli na ye hekatadi.

³ Na laugagayo taulauhekataedi yo Paliseya tamowaidiyao waihiu hesau se woyaiyama. Iya meta se lobai maiyana loheya hesau se ganawali. Na boda matadiwai se hetolo. ⁴ Kabo se hededelau Yesu unai se wane, “Taulauhekata, teina waihiu ta meta ka lobai maiyana loheya hesau se ganawali. ⁵ Na Mose yona laugagayo unai ye wane sinesineo doha teina meta bena ta lauwekuidi. Na kowa kabo saha ku hedede?” ⁶ Teina henamai ta se tole meta iya kabalaukitana, na saha ye hedede kalidiwai unai kabo iya se hegilu.

** **7:38:** Waila maumaulina: Hedehedede ye hetala ta meta nige kabina ta kata haedi ye hai. Buka Bagubagunana unai ma hisa waila maumaulina se hedehededei, doha Aisaiya 44:3-4 yo 58:11, Yelemaiya 2:13, 17:13, yo Sakaliya 14:8 udiyedi. Waila maumaulina meta tamowai tauhemaulidi yo tausaguidi yo Yaubada yona hesaguhai heyaheyasonina. ** **7:40:** Peloweta se hetala ta meta Mose ye hededenonohai kabo ye laoma huya gehegehedi mayadaidi ne udiyedi (Dutelonomi 18:15).

Na Yesu ye dunedobi na nimagigina unai bwatano wa unai ye hetubu ye kulikuli. ⁷ Na se henamai se muyomuyou, ede ye tolo'uyo na ye wane, “Kaiteya nige ba'aya hesau kalimwai kabo weku ku hai na ku tuubagunaei waihiu ne unai.” ⁸ Na ye dunedobi ye kulikuli'uyo bwatano wa unai.

⁹ Waihiu tauhegiluna wa Yesu yona hedehedede se lapui ede se hetubu se dalahai, kesega kesega tautaubadao se baguna ye lau ee maudoidi se dalahaigehe, na Yesu yo waihiu wa se bom se laugabaedi boda wa luwadiyena. ¹⁰ Na kabo Yesu ye dunetolo'uyo, na ye henamailau waihiu wa unai ye wane, “Waihiu, maudoidi wa haedi? Hesau ye hegilugo o nige?”

¹¹ Waihiu wa ye wane, “Guiyau, nige hesau.” Ede Yesu ye hededelau unai ye wane, “Yau hinage nige ya hegilugo. Ku lau na tabu ku ba'aba'aya'uyo.”

Yesu iya tanoubu ta malana ede

¹² Na kabo Yesu ye hedehedede'uyo boda wa udiyedi ye wane, “Yau tanoubu ta malana ede. Ena tamowai hesau ye hemuliwatanigau, taba nige masigili unai ye laulau, na iya kabo mauli malana unai ye laulau.”

¹³ Paliseya tamowaidiyao se hededebui se wane, “Yom hedehedede ta udiyedi meta kowa ku bom ku hededehehemasalaha'uyoigo, unai yom hedehedede ta meta nige mamohoidi.”

¹⁴ Yesu ye hededebui ye wane, “Mamohoi, yau ya hededehehemasalaha'uyoigau, na iyamo hedehedede ta meta mamohoidi. Matawuwuna ede kabina ya kata haedi ya laoma yo hinage haedi kabo ya lau. Na teina nuwanuwatu ta meta komiu nige kabidi kwa kata. ¹⁵ Komiu tamowai yodi sonoga udiyedi kabo tamowai kwa kitahekasadi, na yau meta nige tamowai hesau ya kitahekasa. ¹⁶ Na ena yau tamowai ya kitahekasadi meta yogu hekasa ne se dudulai, matawuwuna ede yau nige ya bom ya kitahekasadi, na Tamagu tauhetamaligau wa meta maiyagu. ¹⁷ Na komiu yomi laugagayo unai ye hededehehemasalaha ye wane, ‘Tamowai labui nuwatu kesega se hededehehemasalaha na se yaliyei meta hedehedede ne mamohoina.’ ¹⁸ Na yau ya bom ya hededehehemasalaha'uyoigau yo Tamagu tauhetamaligau wa iya hinage ye hededehehemasalahagau.”

¹⁹ Ede se henamaiyei se wane, “Kowa tamam ede haedi?” Yesu ye hededebui ye wane, “Komiu nige yau kabigu kwa kata yo hinage tamagu nige kabina kwa kata. Ena taba yau kabigu kwa kata meta hinage Tamagu kabina kwa kata.”

²⁰ Huyana ne unai Yesu Numa Tabuna bakubakuna unai na moni kaba'usa'usa kabatolena dedekanawai ye laulauhekata na teina hedehedede ta ye hedededi. Na iyamo iya nige se kabihekahini, matawuwuna ede yona huya meta sola nige ye lage.

Yesu yona boita ye hededehehemasalaha

²¹ Na kabo yona hedehedede wa ye hedede'uyoidi kalidiwai ye wane, “Yau kabo ya laugabaegomiu, na kabo kwa wasewaseneigau, na yomi ba'aya debadiwai kabo kwa mwaloi. Yau yogu kabalau ne meta komiu nige gonowana unai kwa lau.”

²² Teina unai Dius tauwoyaidi se henahenamai'uyoidi se wane, “Idohagi, tamowai ta kabo ye bom ye unui'uyoi? Nuwana teina unai ede ye wane, ‘Yogu kabalau ne meta komiu nige gonowana unai kwa lau?’”

²³ Kabo Yesu yona hedehedede wa ye tubei ye wane, “Komiu tehadobidobi** ta unai kwa laoma na yau galewa ne unai ya laoma. Komiu tanoubu ta unai kwa laoma, na yau meta nige tanoubu ta unai ya laoma. ²⁴ Ya hededeyako kalimiuwai meta yomi ba'aya

** **8:23:** Tehadobidobi meta teina tanoubu ta, iya ede tamowai Yaubada nige se kawakabiyei na yodi miyamiya se yababa.

debadiwai kabo kwa boita. Ena nige kwa kawamamohoiyeigau meta Yau ede Iya,** mamohoikalili yomi ba'aya debadiwai kabo kwa mwalo.

²⁵ Ede se henamaiyei se wane, “Na kowa meta kaiteya?” Ye wane, “Yau huya badobado ya hededehehemasalah'useigau wa. ²⁶ Yau kaliguwai meta hedehededemi se bado kabo udiyedi ya hegilugomiu. Na tauhetamaligau wa meta mamohoina, yo saha ya lapuhaidi kalinawai meta ya hededegabaedi tanoubu tamowaidiyao kalimiuwai.” ²⁷ Na iyamo nige se nuwatulobai meta iya Tamana ye hetahetala.

²⁸ Ede Yesu ye wane, “Huyana Tau Natuna kwa lausini, metai kabo kwa kitalobai meta Yau ede Iya, yo yau nige saha hesau ya bom yogu nuwatu ya lauwatani na ya ginauli, na Tamagu saha ye hekatagau wa kabo ya hedededi. ²⁹ Na tauhetamaligau wa meta iya maiyagu. Iya taba nige ye laugabaegau, matawuwuna ede huya badobado laulau sahasahadi iya nuwana se henamwa meta ya ginaulidi.” ³⁰ Teina doha Yesu ye hedehedede na tamowai gwaudi iya se sunumaei.

Dius tamowaidiyao kadi kao mamohoidi Yesu ye hededehehemasalahadi

³¹ Kabo Yesu ye hededelau Dius tamowaidi siya tausunumaena wa udiyedi ye wane, “Ena komiu yogu lauhekata ta kwa miyawatanidi, komiu meta yogu hekahekatao mamohoidi, ³² na mamohoina kabo kabina kwa kata yo mamohoina ne unai kabo yailihai kwa hai.”

³³ Se hededebui se wane, “Kai Abelahama kana isimulitao, yo sola nige tamowai hesau ye haigai ka hemala yona heyayai tauhaina. Idohagi to kowa ku wane, ‘Komiu kabo yailihai kwa hai?’” ³⁴ Yesu ye hedede'uyo ye wane, “Ya hededemamohoi kalimiuwai: Ba'aya tauginaginulidi maudoidi siya meta ba'aya yona heyayai tauhaidi. ³⁵ Heyayai tauhaina meta iya nige kana tanuwaga yona numa ne bodana unai taumiyatahitahi, na numa ne tanuwagana natuna loheya meta iya numa ne bodana unai taumiyatahitahi ede. ³⁶ Unai, ena Natuna ye yailihaigomiu, komiu kabo yailihai mamohoina kwa hai. ³⁷ Kabimiu ya kata meta komiu Abelahama kana isimulitao. Iyamo kwa nonohakalili bena kwa koihemwaloigau, matawuwuna yogu lauhekata ta meta nige yodi kabamiya nuwamiu ne udiyedi. ³⁸ Yau saha ya kita Tamagu unai ede ya hededehehemasalahadi kalimiuwai, na komiu tamamiu saha ye hedehedededi kalimiuwai wa kwa ginaginawatlanidi.”

³⁹ Na se hededelau unai se wane, “Kai tamamai meta Abelahama.” Yesu ye hededebui ye wane, “Taba ena komiu Abelahama natunao, saha ye ginaulidi wa kabo kwa ginawatlanidi. ⁴⁰ Iyamo kwa henuwa bena kwa koihemwaloigau, na yau hedehedede mamohoidi Yaubada unai ya lapulidi wa ya hedehededeidi kalimiuwai. Abelahama nige gonowana Yaubada yona tamowai hesau ye koihemwaloigaibui. ⁴¹ Komiu meta tamamiu yona laulau kwa ginaginawatlanidi.”

Ede se hededelau unai se wane, “Kai nige ka tubusaema doha llobalobai, na tamamai kesega mamohoina ede Yaubada.” ⁴² Kabo Yesu ye hededelau udiyedi ye wane, “Ena taba Yaubada komiu tamamiu mamohoina, kabo kwa gadosisiyeigau. Matawuwuna ede yau Yaubada unai ya laoma na ya dobima teinai ya miyamiya. Nige ya bom yogu nuwatuwai ya dobima, na iya ye hetamaligauma. ⁴³ Matawuwuna saha to yogu hedehedede nige kwa lapulobaidi? Kaniyona ede yogu lauhekata ta nige gonowamiu bena kwa lapulau udiyedi. ⁴⁴ Komiu tamamiu ede diyabolo, yo yona nuwatu yabayababadi kwa henuwa bena kwa ginawatlanidi. Iya taukaiunu huyabagubaguna unai na ye laoma ee teina, yo iya hinage taukailupolupo, matawuwuna ede mamohoina wa nige kalinawai. Huyana ye hededelupolupo, meta iya kana kao mamohoina ye hemahehemasalahadi, matawuwuna ede iya taulaulupolupo, yo laulaulupolupo maudoidi

** **8:24:** Yau ede Iya: Tausonoga gwaudi yodi nuwatu meta teina hedehedede ta kaniyona bena, Yau ede Yaubada. Na hisa mo yodi nuwatu bena kaniyona ede, Yau ede Keliso.

tamadi ede iya. ⁴⁵ Na komiu nige kwa kawamamohoiyeigau, matawuwuna ede yau hedehedede mamohoidi ya hedehededeidi. ⁴⁶ Hage, komiu luwamiu ne unai kaiteya gonowana ye hegilugau meta ya ba'aya? Na ena hedehedede mamohoidi ya hedehededeidi, ye saha to nige kwa kawamamohoiyeigau? ⁴⁷ Na Yaubada yona tamowai meta saha Yaubada ye hedededi kabo ye lapuidi. Na komiu saha Yaubada ye hedededi meta nige kwa lapuidi, matawuwuna ede komiu nige iya yona tamowai.” ⁴⁸ Kabo Dius tamowaidiyao wa se hededelau Yesu unai se wane, “Na kai ka hedede ta meta ye dudulai ka wane, kowa Samaliya tamowaina yo yaluwa yababana hesau ye luwu kalimwai.”

⁴⁹ Yesu ye hededebui ye wane, “Yaluwa yabayababana nige kaliguwai, na yau meta Tamagu ya hekasisiyei, na iyamo komiu nige kwa hekasisiyeigau. ⁵⁰ Yau nige hedebasaegau ya wasenei, na hesau meta hedebasaegau ne ye henuwa, na iya meta tauhekasa ede. ⁵¹ Ya hededemamohoi kalimiuwai: Ena kaiteya yogu hedehedede ye miyawatani, meta iya taba nige boita ye hekalo.”

⁵² Teina unai Dius tamowaidiyao se hededelau unai se wane, “Teina unai kabim ka kata meta yaluwa yababana luwam ne unai. Abelahama ye boitako doha hinage peloweta maudoidi, na iyamo ku hedede ku wane, ‘Ena kaiteya yogu hedehedede ta ye miyawatani, meta taba nige boita ye hekalo.’ ⁵³ Na idohagi? Kowa bena ku saekalili na kabo tamamai Abelahama? Iya ye boitako, yo peloweta maudoidi hinage se boitako. Na yom nuwatu meta bena kowa kaiteya?”

⁵⁴ Yesu ye hededebui ye wane, “Ena taba ya bom ya hedebasae'uyoigau, meta yogu hedebasae'uyoigau ne nige kaniyona, na tauhedebasaegau ede Tamagu. Na Tamagu ede kwa hedehedede meta komiu yomi Yaubada. ⁵⁵ Na iyamo iya nige kabina kwa kata, na yau kabina ya kata. Yo ena taba ya wane bena iya nige kabina ya kata meta yau taulaulaulupolupo doha komiu. Yau meta kabina ya kata yo yona hedehedede ya miyawatanidi. ⁵⁶ Tamamiu Abelahama ye henuwa bena yogu laoma mayadaina ne ye kita, na ye kitayako, ede ye gwaualakalili.”

⁵⁷ Kabo Dius tamowaidiyao wa se hededelau unai se wane, “Kowa sola nige yom bolimai 50, na idohagi to ku hedede bena Abelahama ku kitayako?”

⁵⁸ Na Yesu ye wane, “Ya hededemamohoi kalimiuwai: Abelahama sola nige ye tubu na yau meta Yaubada maiyagu.” ⁵⁹ Teina debanawai weku se haidi na Yesu bena se lauwekui, na ye taukenokenowadam na Numa Tabuna wa ye pesagabaei na ye lau.

9

Yesu taumatagibugibu matana ye helaladi

¹ Huyana Yesu kedawai ye laulau meta tamowai hesau matagibugibuna ye kita. Tamowai ta huyalabasina unai meta matagibugibuna. ² Yona hekahekatao se henamaiyei se wane, “Labi, kaiteya yona ba'aya debanawai na tamowai ta matana se gibu? Iya o tamana yo sinana yodi ba'aya debadiwai?”

³ Yesu ye hededebui ye wane, “Teina tamowai ta o tamana yo sinana siya nige yodi ba'aya debadiwai. Na huyalabasina unai meta matagibugibuna, bena unai kabo Yaubada yona kabikabi ye hemasalaha. ⁴ Tauhetamaligau yona paisowa mayadaiyena bena ta ginaulidi. Nige bayaona kabo ye masigili, na masigili ne unai nige gonowana tamowai hesau ye paisowa. ⁵ Tanoubu ta unai yogu miya ta unai meta yau tanoubu ta malana ede.”

⁶ Yesu ye hedehededegehe ede ye kaisodobi bwatano ne unai na bwatano gagilina ye hebigabiga, na kabo ye hai na ye sausae taumatagibugibu wa matana wa udiyedi. ⁷ Kabo ye hededelau unai ye wane, “Ku lau Silowama wailana kipuna unai matam ne ku deulidi.” (Silowama kaniyona ede *hetamali*.) Kabo tamowai wa ye lau matana wa ye deulidi, na ye uyoma meta matana wa se lalako.

⁸ Tamowai wa dedekanaena taumiya tamowaidiyao yo tamowai hekadi, huyabagubagunawai se kitayako meta iya taukaikaibwada, ede se henahenamai'uyoidi se wane, “Tamowai ta, iya lahinaidi ye tutuli na ye kaikaibwada'usi wa, o udoi?” ⁹ Na hekadi se wane, “Iya tamowaina ede.” Na hekadi se wane, “Nige! Kana kao ne meta doha iya.” Na iya ye bom mo ye hedehedehemasalaha'uyoi ye wane, “Yau tamowaina ede.”

¹⁰ Ede iya se henamaiyei, se wane, “Idohagi na matam ne se lala?”

¹¹ Na ye hededelau udiyedi ye wane, “Tamowai hesau hesana ede Yesu ye kaiso bwatano ne unai, ye hebigabiga, ye hai na ye sausae matagu ta udiyedi, na ye hedede-laoma ede ya lau Silowama wailana kipuna unai ya deulidi. Unai ya lau matagu ta ya deulidi ede se lala.”

¹² Kabo se henamaiyei se wane, “Tamowaina ede haedi?” Na ye wane, “Nige kabina ya kata.”

Paliseya tamowaidiyao taunamwanamwa wa se henahenamaiyei

¹³ Kabo huyabagubaguna unai tamowai matana se gibu'usi wa se woyalae Paliseya tamowaidiyao udiyedi. ¹⁴ Mayadaina Yesu bwatano ye hebigabiga na ye sausae tamowai matana udiyedi na se lala wa meta Sabati unai. ¹⁵ Na Paliseya tamowaidiyao se henamaiyei se wane, “Idohagi na matam ne se lala?” Tamowai wa ye hededebui ye wane, “Bwatano ye hai ye hesau matagu ta udiyedi na ya deulidi, ede se lala.”

¹⁶ Paliseya tamowaidi hekadi se wane, “Tamowai ne nige Yaubada unai ye laoma, matawuwuna iya mayadai Sabati nige ye hekasisiyei.” Na hekadi se wane, “Idohagi to ba'aya tamowaina laulau gigigigibwalidi doha teina ye ginaulidi?” Ede menai Paliseya wa se hekasalabuiyedi, hekadi yodi nuwanuwatu udoi, yo hekadi yodi nuwanuwatu udoi.

¹⁷ Kabo Paliseya tamowaidiyao wa tamowai wa se henamaiyei'uyoi se wane, “Tamowai kowa matam ne ye helaladi wa, ku hedehemasalaha kalimaiyena meta iya kaiteya! Hage, yom nuwanuwatu saha?” Tamowai wa ye wane, “Iya meta peloweta hesau.”

¹⁸ Na mahana ne unai Dius tauwoyaidi wa sola nige se kawamamohoi bena huya bagubagunana unai tamowai ne matana se gibu na muliyena kabo se lala, ede tamana yo sinana se tauwasaidima ¹⁹ na se henamaiyeidi se wane, “Mamohoina teina tamowai ta iya natumiu? Na komiu kwa hedede bena huyalabasina unai meta matagibugibuna. Na idohagi to matana se lala?”

²⁰ Tamana yo sinana wa se hededebui se wane, “Kabina ka kata meta iya kai natumai, yo hinage huyalabasina unai meta iya matagibugibuna. ²¹ Na idohagi na matana se lala yo kaiteya matana ne ye helaladi meta nige kabina ka kata. Na iya tamowai lakilakina, unai kwa henamaiyei kabo yomiu ye hedehedede.” ²² Tamana yo sinana doha teina se hedehedede matawuwuna ede Dius tauwoyaidi se matausiyeidi. Matawuwuna tauwoyawoya wa se hededeyako meta kaiteya Yesu ye hedehemasalaha iya Keliso, kabo sunago unai se hepesa. ²³ Teina debanawai ede tamana yo sinana se wane, “Iya tamowai lakilakina, unai gonowana kwa henamaiyei!”

²⁴ Ede tamowai matana se lalako wa se yoga'uyoiyama na se hededelau unai se wane, “Bena Yaubada ku hekasisiyei na ku hededemamohoi! Kai kabina ka kata meta tamowai wa iya ba'aya tamowaina.”

²⁵ Na ye wane, “Yau nige kabina ya kata meta iya ba'aya tamowaina o nige. Na saha kabina ya kata ede huyabagubaguna unai matagu se gibu, na teina huya ta meta matagu se lalako.”

²⁶ Ede se henamaiyei se wane, “Saha ye ginauli kalimwai? Idohagi na matam ne ye henamwanamwadi?”

²⁷ Na ye hedede bui ye wane, “Teina ta ya hedede yako kalimiuwai, na nige kwa lapulau yogu hedehede wa udiyedi. Matawuwuna saha to bena kwa lapu'uyoidi? Kwa henuwa bena kwa hemala iya yona hekahekatao?”

²⁸ Kobo se hedede heya heyababa se wane, “Kowa teina tamowai ta yona hekahekata, na kai meta Mose yona hekahekatao. ²⁹ Kai kabina ka kata meta Yaubada ye hedehedelau Mose unai, na teina tamowai ta yona kabalaoma nige kabina ka kata.”

³⁰ Kobo tamowai wa ye hededelau udiyedi ye wane, “Idohagi to komiu kwa nuwapwanopwano? Iya matagu ye helaladi, na iyamo nige kabina kwa kata meta haedi ye laoma. ³¹ Kita kabina ta kata meta Yaubada nige ye lapulapulau ba'aya tamowaidiyao udiyedi, na ye lapulapulau tautaba'ohuina yo yona nuwatu tauginaulidi udiyedi. ³² Huyabagubaguna unai ye laoma ee teina sola nige wasa hesau ta lapui meta tamowai hesau se labasi matagibugibuna na gonowana matana ne tamowai hesau ye kabihelala'uyoidi. ³³ Ena taba teina tamowai ta nige Yaubada unai ye laoma, taba nige gonowana laulau gigigigibwalidi doha teina ye ginaulidi.”

³⁴ Yona hedehede wa udiyedi ede se wane, “Huyana se labasigo ye laoma ee teina meta kowa yababa tamowaina, na idohagi to bena ku hekatagai?” Ede iya sunago unai se hepesa.

Tauwoyawoya yodi matagibugibu

³⁵ Yesu wasa ye lapui meta tamowai wa sunago unai se hepesa, ede ye lau ye kita na ye henamaiyei ye wane, “Tau Natuna ku sunumaei?”

³⁶ Tamowai wa ye henamai ye wane, “Guiyau, Tau Natuna ede kaiteya? Taba ku hekitagau, kobo ya sunumaei.”

³⁷ Yesu ye hededelau unai ye wane, “Tamowaina ede ku kitayako. Iya ede teina maidam kwa hedehede ta.”

³⁸ Tamowai wa ye hedede ye wane, “Guiyau, ya sunuma!”, na Yesu ye taba'ohui.

³⁹ Na kobo Yesu ye wane, “Hekasa hesabana ya laoma tanoubu ta unai, bena kaiteyadi matadi se gibu, kobo matadi se lala, na kaiteyadi matadi se lala, kobo matadi se gibu.”

⁴⁰ Paliseya tamowaidi hekadi siya Yesu dedekanawai na yona hedehede ta se lapui, ede se henamaiyei se wane, “Idohagi? Saha ku hedede? Kai matamai ta nige se gibu.”

⁴¹ Yesu ye hedede bui ye wane, “Taba ena komiu matamiu se gibu, kobo nige yomi ba'aya. Na komiu kwa hedede kwa wane, ‘Matamai se lala,’ unai yomi ba'aya meta sola kalimiuwai.”

10

Yesu iya taukitahetteda namwanamwana

¹ Yesu yona hedehede ye tubei ye wane, “Ya hededemamohoi kalimiuwai: Ena tamowai hesau mamoe yawoina ganana nige ye mwalaekawakedana unai, na tupwa hesau unai ye mwalaedikwa, meta iya taukabigaibu yo taukaiwahali. ² Kaiteya kawakeda ne unai ye mwalaesae iya meta mamoe taukitahettedi mamohoina ede. ³ Kawakeda taukitahetteda kobo kawakeda guduna ye soke mamoe taukitahettedi hesabana, yo mamoe ne se lapulapulau taukitahettedi ne kalinana unai. Iya yona mamoe hesadi ye kataidi na ye woyahesepadi. ⁴ Huyana yona mamoe ne ye woyahesepadi, meta ye bagunaedi na iya se hemuliwatani, matawuwuna iya kalinana kabina se katakallili. ⁵ Taba nige tamowai udoi se hemuliwatani, na se wasabugabaei, matawuwuna ede kalinana nige kabina se kata.” ⁶ Teina palabole ta Yesu ye hedede-gabaei, na kaniyona saha bena ye hekatadi wa meta nige se nuwatulobai.

⁷ Unai Yesu ye hedede'uyo ye wane, “Ya hededemamohoi kalimiuwai meta yau Yaubada yona mamoe yodi kawakeda ede, unai kobo se mwalaesae Yaubada yona

mamoe yawoina ganana unai.**⁸ Kaiteyadi se bagunama wa meta siya taukabigaibu yo taukaiwahali, na mamoe ne nige se lapulau udiyedi.⁹ Yau kawakedana ede. Kaiteyadi se laoma yau kaliguwai kabo se lusolalau Yaubada yona basileiya unai na mauli se lobai. Yo yodi kabalau maudoina udiyedi kabo Yaubada ye kitahettedi.¹⁰ Taukaiwahali ye laoma ye kaiwahali, ye kaiunu yo ye heyababagomiu, na yau ya laoma bena mauli kwa hai na mauli mamohoina maudoina kwa haihegehe.¹¹ Yau Yaubada yona mamoe taukitahettedi namwanamwana ede. Taukitahettedi namwanamwana ta yona mauli kabo ye mosegabaei yona mamoe hesabadi.

¹² Taupaisowa maisa tauhaihaina meta iya nige mamoe ne taukitahettedi mamohoina, na huyana kedewanukula hesau ye kita ye laoma mamoe ne hesabadi meta kabo ye wasabugabaedi. Na kedewanukula ne kabo mamoe ne ye henakudi, ye kalasidi na ye hetatagwaligwalidi.¹³ Taupaisowa maisa tauhaihaina wa ye wasabu, matawuwuna iya taupaisowa mo, unai nige ye modekalili mamoe ne udiyedi.

¹⁴ Yau mamoe taukitahettedi namwanamwana ede, yo yogu mamoe kabidi ya kata yo siya hinage kabigu se kata,¹⁵ doha Tamagu kabigu ye kata yo hinage iya kabina ya kata. Yo yau yogu mauli kabo ya mosegabaei yogu mamoe hesabadi.¹⁶ Yau yogu mamoe hekadiyo hinage, siya meta nige teina yawoi ta unai, na bena taba ya woyaidima kabo hinage se lapulaoma kaliguwai. Kabo se hemala yawoi kesega yo hinage taukitahettedi kesega.¹⁷ Tamagu ye gadosisiyeigau, matawuwuna yogu mauli kabo ya mosegabaei bena kabo ya hai'uyoi.¹⁸ Nige gonowana tamowai hesau yogu mauli ye haigabaei, na yau ya bom yogu nuwayaliwai kabo ya mosegabaei. Yau yogu gigibwali unai ya mosegabaei yo yogu gigibwali gonowana kabo ya hai'uyoi. Teina ta meta Tamagu ye hedede bena ya ginauli.”

¹⁹ Teina lauhekata ta udiyedi ede Dius tamowaidiyao wa luwadiyena meta nuwanuwatu labui.²⁰ Bodalakilaki se wane, “Yaluwa yababana ye luwu kalinawai, ede ye bwadebwade. Idohagi to ta lapulapulau unai?”²¹ Na hekadi se wane, “Taba yaluwa yababana ye luwu tamowai unai, teina hedehedede ta nige gonowana ye hedededi. Yo yaluwa yababana nige gonowana taumatagibugibu matana ye helala.”

Dius yodi tauwoyawoya Yesu se subu

²² Na kabo Dius yodi Numa Tabuna Hetabu'uyoina Henuwaisinina Yelusalema unai se ginauli. Tenem huyana ne meta huyagwagwama.²³ Na Yesu Numa Tabuna teha hesauna hesana Solomona yona Logulogu unai ye taitaihile.²⁴ Na Dius tauwoyaidi Yesu se tolohetakikili na se henamaiyei se wane, “Huya lohana doha saha kabo ku henuwanuwatugai? Ena kowa Keliso, meta ku hededehemasalaha.”²⁵ Yesu ye hededebui ye wane, “Ya hededelaowako kalimiuwai, na nige kwa kawamamohoi. Na saha ya ginaginulidi tamagu hesanawai, siya se hemasalahagau.²⁶ Na komiu nige kwa kawamamohoiyeigau, matawuwuna ede komiu nige yau yogu mamoe.²⁷ Yau yogu mamoe se lapulau kalinagu unai, yo kabidiyao ya kata, yo hinage se hemuliwatanigau.²⁸ Yau mauli nige kana siga ya moseidi, unai taba nige se lau yababa unai na se boita, yo tamowai hesau nige gonowana nimagu ta unai se haigabaedi.²⁹ Tamagu meta mamoe ne tauledima ede, iya ye saekalili na kabo tamowai yo ginauli maudoidi. Unai Tamagu nimanawai nige gonowana se haigabaedi.³⁰ Tamagu maidagu kai meta kesega.”

³¹ Na Dius tauwoyaidi wa weku se haidi bena Yesu se lauwekui.³² Na Yesu ye hededelau udiyedi ye wane, “Yau Tamagu yona kabikabi namwanamwadi gwaudi ya hemasalahadiko kalimiuwai. Na kabikabi sahasahana debanawai bena kwa lauwekuigau ta?”

** **10:7:** Mamoe yawoina ganana meta Yaubada yona basileiya heyahayasonina, na mamoe meta tamowai heyahayasonidi.

³³ Dius tauwoyaidi wa se hedede bui se wane, “Kai nige bena ginauli namwanamwadi ku ginaulidi ne debadiwai ka lauwekuigo, na matawuwuna ede Yaubada ku hedede-heyahayababa. Kowa tamowaimolosi na ku hedede meta kowa Yaubada.”

³⁴ Yesu ye hedede bui ye wane, “Na yomi kulikuli tabuna unai Yaubada ye hedede ye wane, ‘Komiu yaubada.’”^{**} ³⁵ Kulikuli tabuna nige ye lupu, na kulikuli ne unai ta hasili meta Yaubada yona hedehedede tauhaidi ne ye kataidi siya yaubada. ³⁶ Na yau ya hedede ya wane, yau Yaubada Natuna. Na matawuwuna saha to kwa hegilugau meta Yaubada ya hededeheyahayababa? Tamagu ye kaisunuwaigau [*yogu paisowa ta hesabana*] na ye hetamaligau ya laoma tanoubu ta unai. ³⁷ Ena yau nige Tamagu yona paisowa ya ginaulidi, tabu kwa kawamamohoiyeigau. ³⁸ Na ena Tamagu yona paisowa ya ginaulidi, na iyamo nige kwa kawamamohoiyeigau, takiyede saha ya ginaginaulidi ne udiyedi kwa kawamamohoi. Teina unai kabo kabina kwa kata yo kwa nuwatulobai meta Tamagu iya ede kaliguwai yo yau ede Tamagu kalinawai.” ³⁹ Ede se kaipate'uyo bena se kabihekahini, na ye wasabugabaedi.

⁴⁰ Na kabo Yesu ye lau Yolidani sagasagana ye kawasi ye lau teha hesauna ne unai, iya ede lahinaidi Yowane yona kabahebahebabatiso bagubagunana wa, na temenai ye miyamiya. ⁴¹ Na tamowai gwaudi se laoma iya unai. Na se bom yodi se hedehedede se wane, “Yowane nige laulau gigigigibwalidi ye ginaulidi, na teina tamowai ta hedehededen maudoidi Yowane ye hedede hemasalahadi wa meta mamohoidi.” ⁴² Ede tenem teha ne unai tamowai gwaudi Yesu se sunumaei.

11

Lasalo yona boita

¹ Betaniya tamowaina hesau hesana Lasalo ye kasiyebwa. Betaniya meta Maliya ma kana kaha Maleta yodi magari. ² Maliya ta iya ede yausi panepanena tau'inina Guiyau unai, na kuluna unai kaena ne ye saudi wa.^{**} Na iya louna Lasalo ye kasiyebwa. ³ Kabo Maliya ma kana kaha kalina se hetamali ye lau Yesu unai se wane, “Guiyau, tamowai ku gadosisi'usei wa ye kasiyebwa.”

⁴ Huyana Yesu wasa wa ye lapui ede ye wane, “Teina kasiyebwa ta taba nige ye lau ee boita, na Yaubada kabo kana kao saesaena mamohoina ye hemasalaha, na bena unai Yaubada Natuna kana kao saesaena mamohoina hinage ye hemasalaha.”

⁵ Yesu iya Maleta ma kana kaha Maliya yo loudi Lasalo ye gadosisiyeidi. ⁶ Iyamo huyana wasa ye lapui meta Lasalo ye kasiyebwa kabo sola mayadai labui ye miya'uyo yona kabamiya wa unai.

⁷ Na kabo Yesu ye hededelau yona hekahekatao wa udiyedi ye wane, “Kwa laoma ta uyo Yudeya.”

⁸ Yona hekahekatao wa se wane, “Labi, lahinaidi Dius tauwoyaidi bena se lauwekuigo. Idohagi na bena ta uyo temenai?”

⁹ Yesu ye hedede bui ye wane, “Mayadai kesega kesega unai mala yona sina meta mahana saudoudoi-labui. Ena tamowai hesau mayadai unai ye laulau, taba nige ye kalabesibesi, matawuwuna ede tanoubu ta dawayana wa unai ye laulau. ¹⁰ Na ena tamowai hesau boniyai unai ye laulau kabo ye kalabesibesi, matawuwuna ede dawaya wa nige kalinawai.”

¹¹ Teina hedehedede ta mulinawai Yesu ye wane, “Kada kaha Lasalo ede ye kenokeno, na yau ya lau kabo ya hanoi.”

^{**} **10:34:** Same 82:6 unai Yaubada yona tamowai tauwoyaidi ye kataidi siya yaubadao yo Yaubada Saesaekalilina natunao. Hedehedede ta kaniyona ede ye kaisunuwaidi bena yona tamowai yodi tautolo yo yodi tauhekasa.

^{**} **11:2:** Maliya yona kabikabi wasana wa ku hasili Yowane 12:1-8 unai.

¹² Yona hekahekatao wa se hededelau unai se wane, “Guiyau, ena ye keno, kabo ye namwanamwa'uyo.” ¹³ Yesu yona hedehedede ne kaniyona ede, meta Lasalo ye boitako, na yona hekahekatao yodi nuwatu meta Yesu ye wane, iya ye kenokeno.

¹⁴ Ede Yesu ye hedehedehedulai ye wane, “Lasalo meta ye boitako. ¹⁵ Na komiu debamiuwai meta ya gwaunya. Ye namwakalili ede yau nige temenai. Unai kabo kwa kawamamohoi. Na kwa laoma ta lau.” ¹⁶ Ede Tomasi (hesana hesau Didimasi, [*kaniyona ede godegode*]) ye hededelau yona hali hekahekatao wa udiyedi ye wane, “Kwa laoma ta lau, kabo iya maiyada ta boita.”

Yesu Lasalo ye hetolo'uyoi

¹⁷ Na huyana Yesu ye lage ede wasa ye lapui meta Lasalo se toleyako bwayabwaya unai, na mayadai hasi se laoko. ¹⁸ Betaniya meta Yelusalema dedekanawai, na kedana lohana meta doha maela labui. ¹⁹ Na Dius tamowaidiyao gwaudi Yelusalema unai se laoma Maleta yo Maliya udiyedi bena loudi yona boita nuwayababana wa unai nuwadiyao se hedehetaludi. ²⁰ Huyana Maleta wasa ye lapui meta Yesu ye laoma, ede numa wa ye pesagabaei na ye lau ye hailobai, na Maliya ye miyamiya.

²¹ Maleta ye hededelau Yesu unai ye wane, “Guiyau, taba kowa bena inai, lougu ta taba nige ye boita. ²² Na kabina ya kata meta saha ku kaibwadai Yaubada unai, kabo ye leyawa.”

²³ Yesu ye wane, “Loum ne kabo boita unai ye tolo'uyo.”

²⁴ Ye wane, “Kabina ya kata ede huya mulumulitana unai boita tolo'uyona unai kabo ye tolo'uyo.”

²⁵ Kabo Yesu ye hededelau unai ye wane, “Yau tolo'uyona yo maulina ede. Kaiteya ye sunuma kaliguwai, kabo boita unai ye tolo'uyo na ye mauli. ²⁶ Na kaiteya ye maumauli na ye sunuma kaliguwai, taba nige boita helabuina ye hekalo, na mauli nige kana siga kabo ye hai. Yogu hedehedede ta ku kawamamohoiyei?”

²⁷ Ede Maleta ye hedehedebui ye wane, “Aa! Guiyau, [*yom hedehedede ne ya kawamamohoiyei. Yo hinage*] ya kawamamohoi meta kowa Keliso, Yaubada Natuna, iya ede ye dobima tanoubu ta unai.”

²⁸ Na teina hedehedede ta mulinawai ede ye uyo numa na kana kaha Maliya ye yogahesuwala na ye wane, “Taulauhekata wa, iya ede teinai na ye henuwa bena ye kitago.” ²⁹ Maliya hedehedede ta ye lapui ede ye tolongwayamwayau ye lau Yesu unai. ³⁰ Na Yesu sola nige ye lagelau kasa wa unai, iya meta Maleta yona kabahailobaina wa unai. ³¹ Dius tamowaidiyao se laoma bena Maliya ma kana kaha nuwadiyao se hedehetaludi wa, meta siya Maliya maiyadi numa wa unai. Na huyana Maliya se kita ye tolongwayamwayau ye pesa ye lau, ede se hemuliwatani. Yodi nuwatu bena kabo ye lau bwayabwaya wa unai ye doudou.

³² Huyana Maliya ye lage Yesu unai na ye kita, ede matana wa unai ye tulibonodobi na ye wane, “Guiyau, taba kowa teinai, lougu ta nige gonowana ye boita.”

³³ Na Maliya yo tauhemuliwatanina wa Yesu ye kitadi se doudou, meta nuwana ye kamkamnalili, ³⁴ na ye henamaiyeidi ye wane, “Haedi iya kwa hekeno?” Se hedehedebui se wane, “Ku laoma ta lau na kabo ka hekitago.”

³⁵ Kabo Yesu ye dou. ³⁶ Ede Dius tamowaidiyao wa se wane, “Kwa kita ne, iya ye gadosikaliliyei.” ³⁷ Na hekadi se bom se hedehedede se wane, “Na teina tamowai ta taumatagibugibu wa matana ye helala. Na idohagi to nige saha hesau ye ginauli kabo unai Lasalo taba nige ye boita?”

³⁸ Yesu sola ma nuwakamkamnana na ye laoma ye lage bwayabwaya wa unai. Bwayabwaya wa meta weku duhana, na weku lakilakina hesau unai kawamatana wa se buigudui. ³⁹ Yesu ye wane, “Buigudu wekuna ne kwa hesigihesuwala.”

Na Maleta, iya taubaita wa louna, ye wane, “Guiyau, lougu ye boitako na mayadai hasi se laoko, debanawai kabo panena ye yababa.”

⁴⁰ Na Yesu ye hededelau unai ye wane, “Idohagi, nige ku lapui meta ya hededeyako kalimwai, ena taba ku sunuma, Yaubada kana kao saesaena mamohoina kabo ku kita.”

⁴¹ Ede weku wa se buihesuwala, na Yesu ye kaikewasae galewa ne na ye wane, “Tamagu, ya lautokiyeigo, matawuwuna ede kowa ku lapulapulaoma kaliguwai. ⁴² Kabina ya kata meta kowa huya maudoina ku lapulapulaoma kaliguwai, na teina ya hededeheleki ta tautolohetakiligau ta hesabadi, unai kabo se kawamamohoi meta kowa tauhetamalgau ede.”

⁴³ Teina hedehedede ta mulinawai Yesu kalinalakilakina unai ye yoga ye wane, “Lasalo, ku pesama!”

⁴⁴ Ede tamowai boiboitana wa ye pesama, nimana yo kaena meta kaleko tupwadiyao lohalohadi udiyedi se sumadi yo kuluna hinage kaleko hesau unai se suma. Yesu ye hededelau tamowai wa udiyedi ye wane, “Tauna sumadi ne kwa yailihaidi na ye laulau.”

*Tauwoyawoya yodi hineli bena Yesu se koihemwaloi
(Mataiyo 26:1-5, Maleko 14:1-2, Luka 22:1-2)*

⁴⁵ Dius tamowaidiyao Maliya maiyadi taulau wa Yesu yona kabikabi wa se kita ede gwaudi iya se sunumaei.

⁴⁶ Na hekadi se lau Paliseya tamowaidiyao udiyedi, na Yesu saha ye ginauli wa wasana yodi se hedehedede. ⁴⁷ Ede taukaitalasam tauwoyaidi yo Paliseya tamowaidi Sunedeli koigogona se heyoga. Se laomagogoi na se henahenamai'uyoidi se wane, “Teina tamowai ta meta laulau gigigibwalidi gwaudi ye ginaulidi. Na saha kabo ta ginauli? ⁴⁸ Ena taba ta kitagabaei doha teina meta tamowai maudoidi kabo iya se sunumaei. Unai kabo Loma tamowaidi** yoda Numa Tabuna yo yoda basileiya ta se heyababa.”

⁴⁹ Na luwadi wa unai hesau hesana ede Kaiyapasi, iya tenem bolimai ne unai meta taukaitalasam saesaena, na ye wane, “Komiu nige saha hesau kabina kwa kata. ⁵⁰ Na nuwamiu ne nige se masalaha. Ye namwakalili taba tamowai kesega ye boita tamowai maudoidi hesabadi, na kabotaki basileiya maudoina ta se heyababa.”

⁵¹ Kaiyapasi tenem nuwatu ne nige ye hededegaibui, na tenem bolimai ne unai meta iya taukaitalasam saesaena, unai ede ye hededepeloweta meta Yesu kabo ye boita Dius tamowaidiyao hesabadi. ⁵² Na nige bena Dius se bom hesabadi, na Yaubada natunao se tatagwaligwali teha udoi'udo udiyedi wa hinage hesabadi. Teina unai kabo Yaubada natunao maudoidi se hemala boda kesega.

⁵³ Ede tenem mayadai ne unai ye lau meta yodi hineli se ginauli taba idohagi na Yesu kabo se koihemwaloi. ⁵⁴ Unai Yesu nige ye taumasalahalau'uyo Dius tamowaidiyao udiyedi, na ye dalahai ye lau teha hesau balabalana dedekanawai, na menai magari gagilina hesau hesana Epelaima unai maiyanao hekahekatao wa se miya.

⁵⁵ Na Taukiuli Henuwaisinina huyana ye hanahanauma, ede Dius tamowaidi gwaudi teha udoi'udo udiyedi taumiya se sae Yelusalema bena yodi lauhe'a'a kabikabidi se ginaulibagunaidi, na kabo Taukiuli Henuwaisinina. ⁵⁶ Na Yesu se wasewasenei, na Numa Tabuna bakubakuna unai se totolo na se henahenamai'uyoidi se wane, “Kwa nuwatui meta kabo ye laoma gwauyala ta unai, o nige?” ⁵⁷ Na taukaitalasam tauwoyaidi yo Paliseya tamowaidi meta hedehedede se toleyako tamowai maudoidi udiyedi, ena taba hesau Yesu ye kita, kabo ye laoma tauwoyawoya ne ye hekatadi, na kabo Yesu se kabihekahini.

** **11:48:** Loma tamowaidi: Tenem huyana ne unai Dius tamowaidiyao meta Loma tamowaidiyao yodi lolina guninaena se miya. Yodi hedehedede wa unai, Loma tamowaidi ne ede gabana Loma yodi gabemani teha Yudeya unai se hetolo wa, yo yona tau'iyala.

12

Maliya Yesu kaena ye heyausidi (Mataiyo 26:6-13, Maleko 14:3-9)

¹ Mayadai haligigi-kesega mo matadi ne unai na kabo Taukiuli Henuwaisinina huyana, na Yesu ye lagelau Betaniya, teina meta Lasalo boita unai ye hetolo'uyoi wa yona magari. ² Ede temenai kaikaigogo gagilina se ginauli Yesu hesabana. Maleta meta kadi haitala wa ye kabinonohai, na Lasalo maiyanao Yesu ma kana bodao wa se kaikaigogoi. ³ Na Maliya yausi panepanena pakuna ye hai ede ye ini Yesu kaena ne udiyedi na kuluna ne unai ye sauhepitalidi, na panena meta numa wa ye laugililai. Na yausi ne nadi unai se ginauli, lakina ede lita kesega tehana, na maisana ye lakikalili.

⁴ Na Yudasi Isakaliyota, iya Yesu yona hekahekata wa hesau na iya kabo kana tauwalohai, iya ye wane, ⁵ “Idohagi to teina yausi panena namwanamwana ta nige ku lokunei? Kabo maisana denali 300 ku hai, na monina ne kabo ye lau taudehadeha udiyedi.” ⁶ Yudasi saha ye hedede ta meta nige taudehadeha ye nuwatukaliliyeidi, na matawuwuna ede iya taukabikabigaibu. Iya meta yodi moni tobwana taukitahetetena, na yona laulau ede moni tobwana ne unai hekadi ye haihaigaibuidi.

⁷ Yesu ye hededebui ye wane, “Waihiu ne ku kitagabaei! Saha ye ginauli ne meta yau kabo se tolegau bwayabwaya ne unai kabinonohana. ⁸ Huya badobado taudehadeha kabo maiyamiao, na yau meta taba nige huya badobado maiyamiu.”

⁹ Na Dios tamowaidiyao bodalakilaki wasa se lapui meta Yesu iya ede Betaniya unai. Ede se lau temenai bena Yesu se kita, na nige Yesu ye bom mo, na Lasalo hinage, iya ede ye boita na Yesu ye hetolo'uyoi'usei wa. ¹⁰ Unai ede taukitalasam tauwoyaidi wa yodi hineli se ginauli meta bena kabo Lasalo hinage se koihemwaloi. ¹¹ Matawuwuna Lasalo yona tolo'uyo ne debanawai, Dios bodalakilaki yodi tauwoyawoya wa se laugabaedi na se lau Yesu se sunumaei.

Yesu se hailobai yo se hedebasae Yelusalema unai (Mataiyo 21:1-11, Maleko 11:1-11, Luka 19:28-40)

¹² Mayadai hesauna kabo Yesu ye lau Yelusalema. Tenem mayadaidi ne udiyedi bodalakilaki teha maudoidi udiyedi se laoma Yelusalema Taukiuli Henuwaisinina hesabana. Boda wa Yesu wasana se lapui meta ye laolaoma ¹³ ede tutube bagadi se baheidi na se lau se hailobai yo se heyoheyoga se wane,

“Hosana!”**

“Ka hedebasaego, kowa Guiyau hesanawai ku laoma.”

“Ka hedebasaego, kowa Isalaela yoma wasawasa.”

¹⁴ Yesu donki saehauna ye lobai ede ye gelusae unai, doha peloweta hesau ye kuliyako ye wane,

¹⁵ “Saiyona tamowaidi, tabu kwa matausi!

Kwa kitalau! Yomi wasawasa wa donki saehauna unai ye tutuli na ye laolaoma.”

(Sakaliya 9:9)

¹⁶ Na tenem huyana ne unai hekahekatao wa nige se nuwatulobai meta kulikuli ta Yesu hedehedena. Na muliyena, huyana Yesu ye tolo'uyo yo ye sae galewa ne unai na yona hekahekatao wa kana kao saesaena mamohoina se kita, kabo se nuwatulobai meta kabikabi maudoidi ta siya ede hedehedede maudoidi kulikuli tabudi udiyedi se kulinonohaidiko wa.

¹⁷ Na huyana Yesu Lasalo ye yogahepesa bwayabwaya unai yo boita unai ye hetolo'uyoi wa meta bodalakilaki maiyanao. Na saha ye ginauli wa se kita meta sola se hewahewasa. ¹⁸ Na tamowai gwaudi laulau gigigibwalina ye ginauli wa wasana se

** **12:13:** Hosana: Kalina Hebelu unai hedehedede hosana kaniyona bagubagunana ede, Ku gilihaigai. Hedehede ta unai Yesu se hedebasaei se wane iya meta taugilihaidi yo yodi wasawasa.

lapui, ede se lau Yesu se hailobai. ¹⁹ Na Paliseya tamowaidi se bom yodi se hedehedede se wane, “Sola kwa kita! Nige gonowana saha hesau kabo ta ginauli kalinawai. Kaniyona ede tanoubu maudoina iya se hemuhemuliwatani.”

Yesu yona boita ye hedehededei

²⁰ Na tausae Yelusalema Taukiuli Henuwaisinina unai tautaba'ohu wa luwadi ne unai meta Giliki tamowaidi hekadi. ²¹ Na se lau Pilipo unai, iya meta magai Betesaida teha Galili ne tamowaina, na se hededelau unai se wane, “Taubada, ka henuwa bena Yesu ka kita.” ²² Ede Pilipo ye lau Andeleya yona ye hedehedede, na kabo taudi labui se lau Yesu yona se hedehedede.

²³ Na Yesu ye hededebui ye wane, “Mahanana wa ye lageko, Tau Natuna kabo kana kao saesaena mamohoina ye masalaha. ²⁴ Ya hededemamohoi kalimiuwai: Ena witi tumana nige ye beku bwatano ne unai na ye mwaloi, kabo ye miyamiya mo. Na ena ye bekudobi na ye mwaloi, meta kabo kaniyona gwaudi ye hetubudi. ²⁵ Na kaiteya yona mauli tanoubu ta unai ye gadosisiyei, kabo ye kabisapuli. Na kaiteya yona mauli tanoubu ta unai ye nuwagabaei, kabo mauli nige kana siga ye hai. ²⁶ Ena tamowai hesau ye henuwa bena yogu ye paisowa, meta bena ye hemuliwatanigau. Yau haedi ya miya meta yogu heyayai tauhaina hinage kabo temenai. Na yogu heyayai tauhaina ne meta kabo Tamagu iya ye hekasisiyei.

²⁷ Mahana ta unai yau meta nuwagu ta unai ya hekohekoidada, na kabo saha ya hedede? Taba gonowana ya kaibwada Tamagu unai ya wane, ‘Mahana ta unai ku gilihaigau?’ Taba nige! Ya dobima ta meta bena kamkamna matagu ne unai ya hekalo.”

²⁸ [Na kabo ye wane], “Tamagu, hesam ku hesaekaliliyei.” Kabo kalina hesau galewa ne unai ye dobima ye wane, “Yau hesagu ya hesaeyako na kabo ya hesae'uyoi.” ²⁹ Na bodalakilaki temenai se totolo wa kalina ta se lapui ede yodi nuwatu bena tulutululu. Na hekadi se wane, “Nuwana anelu hesau ye hedehededelau Yesu unai.” ³⁰ Na Yesu ye hededebui ye wane, “Tenem kalina ne meta komiu hesabamiu, yau nige. ³¹ Na teina mahana ta unai Yaubada kabo tanoubu ta ye hekasa, yo tanoubu ta yodi wasawasa** yona gigibwali kabo ye hetatagwaligwali. ³² Na huyana se lausinigau,** kabo tamowai maudoidi ya yogagogoidi se laoma kaliguwai.”

³³ Yesu ye hedede doha teina meta bena yona boita kana kao ye hededehemasalaha.

³⁴ Ede boda wa se henamaiyei se wane, “Kai laugagayo unai ka lapui meta Keliso kabo ye miya ye lau ee huya nige kana siga. Na idohagi to ku wane, “Tau Natuna kabo se lausini”? Na teina Tau Natuna ta meta kaiteya?”

³⁵ Na kabo Yesu ye hededelau udiyedi ye wane, “Mala** ta kabo maidamiu kwa miya huyakubwakubwa mo. Na mala maidamiu ta unai ne bena kwa laulau, na tabu masigili ye taukasinigomiu. Na kaiteya masigili unai ye laulau meta nige kabina ye kata haedi ye laulau. ³⁶ Na mala maidamiu ta unai ne bena kwa sunumaei, ede kabo kwa hemala mala natunao.”

Teina hedehedede ta mulinawai ye laugabaeidi na ye lau ye kenowadamyeidi.

Dius tamowaidi nige tausunuma hedehedededi

³⁷ Yesu laulau gigigigibwalidi gwaudi ye ginaulidi Dius tamowaidiyao matadiwai, na iyamo nige se kawamamohoiyei. ³⁸ Teina ta meta Aisaiya peloweta yona hedehedede wa ye hemamohoiyei, doha ye wane,

“Guiyau, yoda wasa wa kaiteya ye kawamamohoiyei?

Na kaiteya unai Yaubada yona gigibwali ye hemasalaha?”

(Aisaiya 53:1)

** **12:31:** Tanoubu ta yodi wasawasa iya ede Satani. ** **12:32:** Se lausinigau: Kalina Giliki unai Yowane ye kuli, tano unai se lausinigau, na teina meta Yesu sataulo unai na se lausini. ** **12:35:** Mala meta Yesu heyahayasonina.

³⁹ Na Dius tamowaidiyao wa nige gonowana se kawamamohoi, matawuwuna ede teha hesau unai peloweta Aisaiya wa ye hedede ye wane,

⁴⁰ “Guiyau tamowai matadiyao ye hegibugibudi,
yo nuwadiyao ye hekwillolodi,

unai taba nige matadi udiyedi se kita,

yo taba nige nuwadi udiyedi se nuwatulobai,

yo taba nige nuwadi se buidi na unai kabo ya henamwanamwadi.” (*Aisaiya 6:10*)

⁴¹ Aisaiya teina ye kulihemasalaha, matawuwuna Yesu kana kao saesaena mamohoina ye kita, na Yesu hedehededenena ye hedehededei.

⁴² Na iyamo tamowai gwaudi Yesu se sunumaei, luwadi ne unai hekadi meta Dius tauwoyaidi. Iyamo Paliseya tamowaidi debadiwai ede yodi sunuma wa nige se hemasalaha, kaniyona ede se matausi madai sunago unai se hepesadi. ⁴³ Matawuwuna se henuwakalili taba tamowai se hededetausaeidi, na Yaubada yona kitahenamwadi ne nige se nuwatukaliliyei.

⁴⁴ Na kabo Yesu kalinana lakilakina unai ye wane, “Kaiteya ye sunumaeigau, meta nige yau ya bom mo ye sunumaeigau, na hinage tauhetamaligau wa ye sunumaei. ⁴⁵ Yo kaiteya ye kitagau, meta tauhetamaligau wa ye kita. ⁴⁶ Yau ya dobima tanoubu ta yona mala, unai kaiteyadi se sunumaeigau taba nige masigili unai se miya. ⁴⁷ Na ena tamowai hesau yogu hedehedede ta ye lapuidi na nige ye miyawatanidi, taba nige yau yona ya hekasa. Matawuwuna yau ya dobima ta nige bena tanoubu ta ya kitahekasa, na bena ya hemaui. ⁴⁸ Tausubugau yo yogu hedehedede nige taukabihekahinidi, tauhekasadi nonohana ede ye miya. Hedehedede ya hededediko wa, siya kabo kabahegiludi huyagehena ne unai. ⁴⁹ Matawuwuna yau nige ya bom yogu nuwatu unai ya hedehedede, na Tamagu iya tauhetamaligau wa ye hekatagau saha kabo ya hedede yo idohagi kabo ya hedededi. ⁵⁰ Na kabina ya kata meta yona hedehedede ne kabo maui nige kana siga ye leyama. Unai teina saha ya hedededi ta meta gonogonowana doha saha Tamagu ye hedededi kaliguwai wa bena kabo ya hededehemasalahadi.”

13

Yesu yona hekahekatao kaedi ye deulidi

¹ Mayadai kesega mo na kabo Taukiuli Henuwaisinina mayadaina, na Yesu kabina ye kata meta yona huya ye lagemako kabo tanoubu ta ye laugabaei na ye seuyo Tamana unai. Yesu yona hekahekatao siya tanoubu ta unai, meta huya maudoina ye gadosisiyeidi, na tenem huyana ne unai meta yona gadosisi lakilakikalilina ye hekitadi.

² Meimeilahi kaina se kabinonohaiyako, na diyabolo yona nuwatu meta ye toleyako Yudasi Isakaliyota, Simona natuna unai, iya kabo Yesu kana ye walohai. ³ Na Yesu kabina ye kata meta ginauli maudoidi Tamana ye tolediko iya yona gigibwali unai, yo iya Yaubada unai ye laoma na kabo ye seuyo Yaubada unai. ⁴ Ede kabakaikai hatahatana wa ye tologabaei, na yona likwakewa kwamana ye haigabaei, na sawwela ye hai ede duwaduwalina wa unai ye pai.** ⁵ Na kabo waila ye ini disi hesau unai, na ye hetubu yona hekahekatao wa kaediyao ye deulidi, na duwaduwalina unai sawwela ye pai wa unai ye saudi.

⁶ Huyana ye laoma Simona Petelo unai, ede Petelo ye hededelau unai ye wane, “Guiyau, kabo kaegu ta hinage ku deulidi?”

⁷ Yesu ye hededebui ye wane, “Saha ya ginaginauli ta sola nige ku nuwatulobai, na mulinawai kabo ku nuwatulobai.”

⁸ Petelo ye wane, “Tabu kaegu ta ku deudeulidi!”

** **13:4:** Sawwela ye hai ede duwaduwalina wa unai ye pai: Teina unai Yesu kitakitana meta doha Dius yodi heyayai tauhaina dobidobina hesau.

Yesu ye hededebui ye wane, “Na ena taba [*kaem ne*] nige ya deulidi, meta kowa nige gonowana yogu tamowai.”**

⁹ Kabo Simona Petelo ye wane, “Guiyau, besi, nige kaegu ta se bom, na nimagu yo kulugu hinage ku deulidi.”

¹⁰ Yesu ye hededebui ye wane, “Kaiteya ye duiko meta tauna maudoina ne se a'ako, unai taba nige ye dui'uyo, na kaena se bom mo taba ye deulidi. Komiu maudoimiu ne kwa a'ako, na kesega mo meta nigele.”

¹¹ Yesu kabina ye kata meta kaiteya kabo kana ye walohai, ede ye hedede ye wane, “Komiu maudoimiu ne kwa a'ako, na kesega mo meta nigele.”

¹² Yesu kaediyao wa ye deulidi ye gehe, ede yona kwama wa ye luwui'uyoi na ye uyo yona kabakaikai wa unai, na ye henamaiyeidi ye wane, “Saha ya ginauli ta kwa nuwatulobai e nige? ¹³ Komiu hesagu kwa katai Taulauhekata yo Guiyau. Meta ye dudulaikalili. Temeta kagu kao ede. ¹⁴ Na ena yau, yomi Guiyau yo Taulauhekata, kaemiyao ta ya deulidi, bena komiu hinage kami kahao kaedi kwa deulidi yo siya hinage kaemiu se deulidi. ¹⁵ Saha ya ginauli ta meta yomi kabakitahai. Unai saha ya ginauli kalimiuwai ta, hinage bena kwa ginauliwatani.

¹⁶ Ya hededemamohoi kalimiuwai: Heyayai tauhaina nige ye saekalili na kabo kana tanuwaga. Yo wasa taulaena nige ye saekalili na kabo tauhetamalina. ¹⁷ Na komiu teina nuwatu ta kabidi kwa katako, na ena kwa ginaulidi, meta kabo gonowana kwa gwauyala. ¹⁸ Yau nige komiu maudoimiu ta ya hetahetalagomiu. Kaiteyadi ya kaisunuwaidi meta kabimiu ya kata. Na teina ta meta bena kulikuli tabuna ye hemamohoyei, doha ye wane, ‘Na kaiteya maiyagu pwalawa kesega ka kai, meta kabo ye hemala kagu waiunu.’ (Same 41:9)

¹⁹ Teina ta ya hededenonohaidi, na kabo se tubu. Na huyana se tubu, unai kabo kwa kawamamohoi meta Yau ede Iya.** ²⁰ Ya hededemamohoi kalimiuwai: Ena tamowai hesau ya hetamali na se yogaisini meta yau se yogaisinigau. Yo kaiteya ye yogaisinigau meta iya tauhetamaligau wa ye yogaisini.”

Yesu kana tauwalohai ye hededenonohai

(Mataiyo 26:20-25, Maleko 14:17-21, Luka 22:21-23)

²¹ Yesu teina ye hedede na mulinawai nuwana ye pilipili, ede ye hedede ye wane, “Ya hededemamohoi kalimiuwai: Luwamiu ta unai hesau kabo kagu ye walohai.”

²² Yona hekahekatao wa se haibaibaiwa'uyoidi yo nuwadi se dagugu teina meta kaiteya hedehededena. ²³ Yesu yona hekahekata hesau iya ye gadosisikaliliyei wa meta dedekanawai ye kenokeno. ²⁴ Ede Simona Petelo nimana unai hekahekata wa ye sikwatagu na ye hededelau unai ye wane, “Ku henamaiyei, kaiteya hedehededena.”

²⁵ Kabo ye duihasalilau Yesu unai** na ye henamaiyei ye wane, “Guiyau, kabo kaiteya?”

²⁶ Yesu ye hededebui ye wane, “Teina pwalawa ta kabo ya hedakwa disi ne unai na ya mosei tamowai hesau unai meta iya tamowaina ede.” Na kabo pwalawa tehana wa ye hedakwa na ye mosei Yudasi Isakaliyota unai, iya Simona natuna. ²⁷ Huyana Yudasi pwalawa wa ye hai meta Satani ye luwu kalinawai. Ede Yesu ye hededelau unai ye wane, “Saha bena ku ginauli ne ku ginaulimwamwayauei.”

²⁸ Taututuli yodi kabakaikai wa unai nige hesau kabina ye kata idohagi to Yesu doha tenem ye hedede kalinawai. ²⁹ Na hekadi yodi nuwatu bena Yesu yona hedehedede ta kaniyona ede, “Ku lau na saha gwauyala ta unai ta henuwadi kabo ku hemaisadi.” Na

** **13:8:** Kowa nige gonowana yogu tamowai: Teina meta Yesu yona hedehedede wa kaniyona, na Yesu kalinana mamohoina ede, kabo kowa nige yom tupwa kaliguwai. ** **13:19:** Yau ede Iya: Tausonoga gwaudi yodi nuwatu meta teina hedehedede ta kaniyona bena, Yau ede Yaubada. Na hisa mo yodi nuwatu bena kaniyona ede, Yau ede

Keliso. ** **13:25:** Ye duihasalilau Yesu unai: Kaikaigogo hedehemasalahana ku hasili.

hekadi yodi nuwatu bena ye lau taudehadeha yodi ye kainauya. Matawuwuna Yudasi meta iya yodi moni tobwana taukitahetetenana ede. ³⁰ Yudasi pwalawa wa ye kai na mulinawai ede ye pesa ye lau. Na tenem mahanana ne meta ye tauhemasigiliyako.

Laugagayo hauhauna

³¹ Yudasi ye laoko, na Yesu ye wane, “Yaubada Tau Natuna kana kao saesaena mamohoina bena ye hemasalaha, yo saha kabo ye tubu Tau Natuna kalinawai ne, meta unai kabo Yaubada kana kao saesaena mamohoina ye hemasalaha. ³² Natuna Yaubada kana kao saesaena mamohoina ye hemasalahahegehe, kabo Yaubada yona kabikabi unai hinage Natuna kana kao saesaena mamohoina ye hemasalaha, na taba nige ye pahili.**

³³ Natuguwao, huyakubwakubwa mo yau maiyamiu kabo ta miya. Na komiu kabo kwa wasewaseneigau. Na Dius tauwoyaidi meta yodi ya hedehededeko, na komiu hinage teina yomiu ya hedehedede: Yau yogu kabalau ne meta komiu taba nige gonowana unai kwa lau.

³⁴ Teina ta laugagayo hauhauna ya leyawa: Bena kwa haigadogadosisi'uyoigomiu, doha yau ya gadosisiyeigomiu ne. Unai komiu bena kwa haigadogadosisi'uyoigomiu.

³⁵ Ena komiu kwa haigadogadosisi'uyoigomiu, kabo tamowai maudoidi kabina se kata meta komiu yau yogu hekahekatao.”

Yesu Petelo yona uhala ye hededenonohai

(Mataiyo 26:31-35, Maleko 14:27-31, Luka 22:31-34)

³⁶ Simona Petelo Yesu ye henamaiyei ye wane, “Guiyau, kowa kabo haedi ku lau?” Yesu ye hededebui ye wane, “Yogu kabalau ne meta teina mahana ta unai nige gonowana ku hemuliwatanigau, na muliwai kabo ku hemuliwatanigau.” ³⁷ Petelo ye henamaiyei ye wane, “Guiyau, idohagi to teina mahana ta unai taba nige gonowana ya hemuliwatanigo? Yau meta ya nonohako kabo ya boita kowa hesabam.” ³⁸ Na kabo Yesu ye hededebui ye wane, “Mamohoi, kabo ku boita yau hesabagu? Ya hededemamohoi kalimwai: Teina boniyai ta unai pwaole hakiyana sola nige ye dou, na kabo ku uhalaeigau ma haiyona.”

14

Yesu meta kedana, na unai ta lau ta lage Yaubada yona tehawai

¹ “Tabu kwa nuwadubu, Yaubada kwa sunumaei yo yau hinage kwa sunumaeigau.

² Tamagu yona numa unai meta dahala gwaudi. Ena taba teina ta nige mamohoi, meta nige gonowana ya hedede bena ya lau temenai kabo yomi dahala ya kabinonohaidi.

³ Na ena ya lau yomi dahala ya kabinonohaidi, kabo hinage ya uyoma ya haigomiu, na yau haedi yogu kabamiya meta komiu hinage kabo temenai. ⁴ Yo idohagi kabo kwa lau magaina ne unai meta kedana kabina kwa katako.”

⁵ Tomasi ye hededelau Yesu unai ye wane, “Guiyau, yom kabalau ne nige kabina ka kata. Idohagi kabo kedana kabina ka kata?”

⁶ Yesu ye hededebui ye wane, “Yau kedana ede, yo yau mamohoina ede, yo yau maulina ede. Nige gonowana hesau ye bom ye lau Tamagu unai, na yau ya bom mo kedana ede. ⁷ Ena taba mamohoi komiu kabigu kwa kata, komiu hinage tamagu kabo kabina kwa kata. Teina mayadai ta unai ye lau ne meta iya kabina kwa kata yo hinage kwa kitayako.”

⁸ Pilipo ye wane, “Guiyau, taba tamam ku hekitagai, na kabo takiyede.”

** **13:32:** Yaubada yona kabikabi unai hinage Natuna kana kao saesaena mamohoina ye hemasalaha: Hedehedede ta kaniyona ede huyana Yesu kabo ye uyo Tamana unai meta yona kabaloina saesaena wa ye mose'uyoi kalinawai. (Yowane 17:5)

⁹ Yesu ye hededebeu ye wane, “Pilipo, huyalohaloha yau maiyamiu ta miyamiya. Na idohagi to nige kabigu ku kata? Kaiteya ye kitagau meta Tamagu ye kita. Na idohagi to ku wane, “Taba tamam ku hekitagai?” ¹⁰ Kana kao doha nige ku kawamamohoi meta yau ede Tamagu unai, yo Tamagu ede yau kaliguwai. Hedehedede maudoidi ya hedehedede ne meta nige yau ya bom yogu hedehedede, na Tamagu kaliguwai ye miya ta meta iya yona paisowa ne tauginaulidi ede. ¹¹ Bena kwa kawamamohoi meta yau ede Tamagu unai, yo Tamagu ede yau kaliguwai. Ena nige gonowana yogu hedehedede ta kwa kawamamohoiyeidi, takiyede, na laulau gigigigibwalidi ya ginaulidiko wa debadiwai kwa kawamamohoiyeigau. ¹² Ya hededemamohoi kalimiuwai: Kaiteya ye sunuma kaliguwai kabo saha ya ginaulidiko wa hinage ye ginaulidi. Yo kabikabi hekadi ye ginaulidi kabo se saekalili na kabo saha yau ya ginaulidi wa. Matawuwuna ede yau meta ya laulau Tamagu unai. ¹³ Na saha kwa kaibwadaidi yau hesaguwai, kabo ya ginaulidi. Tenem unai kabo Tamagu hedebasaena ya helaki. ¹⁴ Mamohoi, yau hesaguwai ginauli saha kwa kaibwadaidi, kabo ya ginaulidi.”

Yaluwa Tabuna hededehe sunumana

¹⁵ “Ena kwa gadosisiyeigau, bena yogu laugagayo kwa kawakabiyeidi. ¹⁶ Na yau kabo Tamagu ya kaibwadaidi na kami sagu hesau ye hetamaliyawa, na iya kabo maiyamiu ye lau ee huya nige kana siga. ¹⁷ Iya ede hedehedede mamohoina Yaluwana.** Tanoubu ta tamowaidiyao nige gonowana iya se hai, matawuwuna ede nige se kita yo nige kabina se kata. Na komiu iya kabina kwa kata, matawuwuna ede iya maiyamiu na huya matada ne unai kabo nuwamiu ne unai ye miya. ¹⁸ Yau taba nige ya laugabaegomiu doha dabudabule, na kabo ya uyoma kalimiuwai. ¹⁹ Huyakubwakubwa mo na mulinawai tanoubu ta kabo taba nige se kitagau, na komiu kabo kwa kitagau. Yau ya mauli, unai komiu hinage kabo kwa mauli. ²⁰ Tenem mayadaina ne unai** komiu kabo kwa nuwatulobai meta yau ede Tamagu unai, yo komiu ede yau kaliguwai, yo yau ede komiu kalimiuwai. ²¹ Kaiteya yogu laugagayo ye hai yo ye kawakabiyei meta iya taugadosisiyeigau ede. Na kaiteya ye gadosisiyeigau, Tamagu kabo iya ye gadosisiyei, yo yau hinage kabo ya gadosisiyei yo ya hemasalahagau iya kalinawai.”

²² Na kabo Yudasi (iya nige Yudasi Isakaliyota) ye wane, “Guiyau, matawuwuna saha to bena ku hemasalahago kai ka bom kalimaiwai na nige bena tanoubu maudoina kalidiwai?” ²³ Na Yesu ye hededebeu ye wane, “Ena tamowai hesau ye gadosisiyeigau, iya kabo yogu lauhekata wa ye kawakabiyeidi. Tamagu kabo ye gadosisiyei, yo Tamagu maiyagu kabo ka laoma iya maiyamai ka miya. ²⁴ Na kaiteya nige ye gadosisiyeigau, taba nige yogu lauhekata wa ye kawakabiyeidi. Na yogu lauhekata meta nige yau yogu, na Tamagu iya tauhetamaligau wa yona lauhekata.

²⁵ Yau teina sola ma miyagu maidamiu ta na ginauli maudoidi ta ya hedede di kalimiuwai. ²⁶ Na yau hesaguwai Tamagu kabo kami sagu ye hetamaliyawa. Iya ede Yaluwa Tabuna. Iya kabo ginauli maudoidi udiyedi ye hekatagomiu yo ginauli maudoidi ya hedede di wa kabo nuwamiu ne udiyedi ye henuhenuwaisinidi. ²⁷ Nuwadaumwali ya tole kalimiuwai, yogu nuwadaumwali ta ya leyawa. Yau nuwadaumwali ya leyawa ta nige doha tanoubu ye leyawa ne. Tabu nuwamiyao kwa hepilipilidi yo kwa matausi.

²⁸ Saha ya hedede di wa komiu kwa lapuidiko doha ya wane, ‘Ya laugabaegomiu, na kabo ya uyoma kalimiuwai.’ Ena taba kwa gadosisiyeigau, kabo kwa gwauyala meta ya laulau Tamagu unai, matawuwuna iya ye saekalili na kabo yau. ²⁹ Saha kabo se tubu meta ya hededenonohaidiko kalimiuwai. Na huyana se tubu kabo kwa sunumaeigau. ³⁰ Yau taba nige gonowana ya hedehedede kalili kalimiuwai, matawuwuna ede tanoubu

** **14:17:** Hedehedede mamohoina Yaluwana meta Yaluwa Tabuna kana paisowa ye hedede hemasalahana, iya ede Yesu hedehedede na mamohoina tauhedede hemasalahana. Matawuwuna Yesu iya mamohoina ede (Yowane 14:6).

** **14:20:** Tenem mayadaina ne unai: Tausonoga hekadi yodi nuwatu meta teina hedehedede ta kaniyona bena, Yesu yona tolo'uyo mayadaina wa.

ta kana tanuwaga ye laolaoma. Iya nige yona gigibwali gonowana bena kabo ye saedikwaigau. ³¹ Na tanoubu maudoina bena kabina se kata meta yau Tamagu ya gadosisiyei, unai ede Tamagu saha ye hedededi wa ya ginauliwatanidi.

Kwa laoma, ta pesa ta lau.”

15

Yesu wine mamohoina ede

¹ “Yau wine mamohoina ede, na Tamagu iya wine ta taukitahetetena. ² Ena laga hesau kaliguwai na nige ye kaniyo meta kabo ye bolihai. Na laga kanikaniyodi ne ye boliyawasidi kabo se kaniyonamwanamwa. ³ Na komiu kwa a'ako** yogu hedehedede ya hedededi kalimiuwai wa debadiwai. ⁴ Kwa miyatahitahi kaliguwai, na kabo ya miyatahitahi kalimiuwai. Taba laga hesau ye miyasuwala, meta taba nige kaniyona. Na bena ye miya wine ne unai, kabo ye kaniyo. Gonogonowana doha komiu bena kwa miyatahitahi kaliguwai, kabo kwa kaniyo. ⁵ Yau winena ede na komiu meta laganao. Ena tamowai hesau ye miyatahitahi kaliguwai na yau iya unai, kabo ye kaniyo namwanamwakalili. Ena nige kwa patu kaliguwai, meta taba nige kwa kaniyo. ⁶ Ena tamowai hesau nige ye miyatahitahi kaliguwai, iya meta kabo doha wine lagana se gabaeihesuwala na ye pogi. Wine lagadi pogipogidi ne kabo se tanogogoidi na se gabalaedi kaiwa kalakalasina unai na se kalasi. ⁷ Ena komiu kwa miyatahitahi kaliguwai yo yogu hedehedede se miya kalimiuwai, meta saha kwa henuwadi na kwa kaibwadaidi, Tamagu kabo ye lediwa. ⁸ Ena komiu kwa kaniyonamwanamwa, unai kabo kwa hemasalaha'uyoigomiu meta komiu yogu hekahekatao mamohoidi. Teina unai kabo Tamagu hedebasae lakilakina ye hai.

⁹ Tamagu ye gadosisiyeigau, gonogonowana doha yau hinage ya gadosisiyeigomiu. Bena yogu gadosisi ne unai kwa miyatahitahi. ¹⁰ Ena komiu yogu laugagayo ta kwa kawakabiyeidi, komiu kabo yogu gadosisi ne unai kwa miyatahitahi, doha hinage yau Tamagu yona laugagayo ya kawakabiyeidi na yona gadosisi ne unai ya miyatahitahi. ¹¹ Teina hedehedede ta ya hedededi kalimiuwai matawuwuna ya henuwa bena yogu gwauyala kabo ye miya kalimiuwai na yomi gwauyala ne meta kabo ye lakikalili. ¹² Yogu laugagayo ede teina: Bena kwa haigadogadosisi'uyoigomiu doha ya gadosisiyeigomiu ta. ¹³ Gadosisi lakilakikalilina kabahemasalahana ede bena taba tamowai hesau ye boita kehanao hesabadi. ¹⁴ Ena yogu hedehedede ta kwa ginauliwatanidi, meta komiu kehaguwao mamohoidi. ¹⁵ Yau taba nige huya hesau'uyo ya kataigomiu yogu heyayai tauhaidi, matawuwuna ede heyayai tauhaina nige kabina ye kata saha kana tanuwaga ye ginaginulidi ne. Na ya kataigomiu kehaguwao, matawuwuna ede ginauli maudoidi Tamagu unai ya lapuidi wa meta ya hemasalahadiko kalimiuwai. ¹⁶ Komiu nige kwa kaisunuwaigau, na yau ya kaisunuwaigomiu, bena kwa lau kaniyomiu kwa toledi, na kaniyomiu ne kabo se miyahai. Yo ya kaisunuwaigomiu bena saha kwa kaibwadai yau hesaguwai ne, Tamagu kabo ye leyawa. ¹⁷ Teina ta yau yogu laugagayo ede: Bena komiu kwa haigadogadosisi'uyoigomiu.”

Tanoubu ta yodi hewaiunu hekahekatao udiyedi

¹⁸ [Na Yesu yona hedehedede wa ye tubei ye wane,] “Ena tanoubu tamowaidiyao ta se subugomiu, kabo kwa nuwatui meta yau se sububagunaegauko. ¹⁹ Ena taba komiu tanoubu ta yona, kabo ye gadosisiyeigomiu doha iya yona mamohoidi. Na komiu meta nige tanoubu ta yona, na tanoubu ta unai ya kaisunuwaigomiu. Debanawai tanoubu ta ye subugomiu. ²⁰ Hedehedede ya hedededi kalimiuwai wa bena kwa nuwanuwatuidi,

** 15:3: Kwa a'ako: Huyana koya taukitahetetena laga kanikaniyodi ye boliyawasidi meta se wane, laga ye he'a'a. Na hekahekatao wa Yesu yona hedehedede wa se lapuidi yo se miyawatanidi na teina unai Yesu ye he'a'adi na se kaniyonamwanamwa, iya ede yodi mauli se namwa yo se dudulai.

doha ya wane, ‘Heyayai tauhaina meta nige ye saekalili na kabo kana tanuwaga.’ Ena se hekamkamnagau, meta komiu hinage kabo se hekamkamnagomiu. Ena yogu lauhekata se kawakabiyeidi, hinage komiu yomi lauhekata kabo se kawakabiyeidi. ²¹ Yau hesagu debanawai kabikabi ne kabo se ginaulidi kalimiuwai, matawuwuna ede tauhetamaligau nige kabina se kata. ²² Taba ena nige ya dobima yo ya hededelau kalidiwai, siya yodi ba'aya taba nige giluna kalidiwai. Na ya dobima yo ya hededelau kalidiwai, ede siya nige gonowana yodi ba'aya ne se kaihalei. ²³ Na kaiteya ye subugau, iya hinage Tamagu ye subu. ²⁴ Yau laulau gigigigibwalidi ya ginaulidi doha nige tamowai hesau gonowana ye ginaulidi. Na ena taba nige ya ginaulidi kalidiwai, kabo siya yodi ba'aya taba nige giluna kalidiwai. Na laulau gigigigibwalidi ta se kitadiko, iyamo yau yo Tamagu se subugai. ²⁵ Na se subugau, ede Dawida saha ye kuli yodi kulikuli tabudi udiyedi wa meta se hemamohoiyei, doha ye wane, ‘Siya yodi subugau ne meta nige kaniyona.’ *(Same 35:19, Same 69:4)*

²⁶ Yau kabo kami sagu** Tamagu unai wa ya hetamaliyama kalimiuwai. Iya ede hedehedede mamohoina Yaluwana, kabo Tamagu unai ye dobima. Iya kabo kagu kao maudoina tauhemasalahana. ²⁷ Na komiu hinage bena kwa hededehehemasalahagau tamowai kalidiwai, matawuwuna yogu paisowa huyahetubuna unai ye laoma teina meta komiu maidaguwao.

16

¹ Teina ginauli maudoidi ta ya hedededi kalimiuwai, to taba nige [*ginauli saha hesau debanaena na*] sunuma kwa lausuwalaei. ² Dius tamowaidi kabo sunago udiyedi se hepesagomiu. Yo hinage huyana ede ye laolaoma kabo se koihemwaloigomiu. Na laulau ta tauginaulina meta kabo yodi nuwatu bena unai Yaubada se kaihelahui. ³ Na ginauli yababadi ta se ginaulidi, matawuwuna ede Tamagu yo yau nige kabimai se kata. ⁴ Teina nuwatu ta ya hededediko kalimiuwai, na huyana se tubu kabo kwa nuwatulobai meta ya hededediko kalimiuwai. Huya bagubagunana unai ye laoma ee teina meta nuwatu ta nige ya hedededi kalimiuwai, matawuwuna yau ede sola maidamiu.”

Yaluwa Tabuna yona paisowa

⁵ [*Kabo Yesu ye wane,*] “Nige bayaona kabo ya laugabaegomiu na ya lau tauhetamaligau wa unai, na iyamo komiu nige hesau bena ye henamaiyeigau ye wane, ‘Kowa kabo haedi ku laulau?’ ⁶ Kwa nuwadubukalili, matawuwuna ede teina nuwatu ta ya hededediko kalimiuwai. ⁷ Na yau meta hedehedede mamohoina ya hedede: Ya laugabaegomiu ne meta komiu yomi namwanamwa hesabana. Taba ena yau nige ya laugabaegomiu, kami sagu meta nige gonowana ye laoma. Na ena yau ya lau, kabo kami sagu ne ya hetamaliyama. ⁸ Huyana ye laoma kabo tamowai maudoidi tanoubu ta unai nuwamasalaha ye moseidi na ba'aya yo miyamiyadudulai yo hekasa se nuwatulobaidi. ⁹ Ba'aya unai kabo ye hemasalaha kalidiwai meta [*yodi ba'aya mamohoina ede*] nige se kawamamohoiyeigau. ¹⁰ Miyamiyadudulai unai kabo ye hemasalaha kalidiwai meta [*yau miyamiya dudulaina tamowaina,*] matawuwuna ede yau ya lau Tamagu unai, yo taba nige gonowana kwa kita'uyoigau. ¹¹ Yo Yaubada yona hekasa unai kabo ye hemasalaha kalidiwai [*meta Yaubada kabo hinage tamowai ye hekasadi,*] matawuwuna ede tanoubu ta yona wasawasa** ye hekasayako.

¹² Yau kaliguwai nuwanuwatu se bado bena kabo ya hedededi kalimiuwai. Na se badokalili, unai nige gonowana maudoidi kwa nuwatuhekahinidi. ¹³ Na huyana hedehedede mamohoina Yaluwana ne ye laoma, iya kabo hedehedede mamohoidi maudoidi udiyedi ye henuwatulobaigomiu. Iya taba nige ye bom yona nuwatuwai

** 15:26: Kami sagu, iya ede Yaluwa Tabuna Yesu ye hededehegunumayako Yowane 14:16-18,26 udiyedi.

** 16:11: Tanoubu ta yona wasawasa meta Satani.

ye hedehedede, na saha Yaubada unai ye lapuidi kabo ye hedededi, yo saha kabo se tubu matada ne udiyedi ye hekatagomiu. ¹⁴ Saha ya hedededi hedehedede mamohoina Yaluwana kalinawai, kabo ye hemasalahadi kalimiuwai. Tenem unai kabo hedebasae-gau ye helaki. ¹⁵ Ginauli maudoidi Tamagu kalinawai ne meta yau yogu. Unai ede ya wane, 'Yaluwa ne kabo kaliguwai yogu hedehedede ye haidi na ye hemasalahadi kalimiuwai.' ”

Nuwadubu ye bui ye hemala gwauyala

¹⁶ [Na Yesu yona hedehedede wa ye tubei ye wane,] “Huyakubwakubwa mo mulinawai taba nige kwa kitagau, yo huyakubwakubwa mo na mulinawai kabo kwa kita'uyoigau.”

¹⁷ Yona hekahekatao hekadiyo se henahenamai'uyoidi se wane, “Teina yona hedehedede ta kaniyodi saha? Doha ye wane, 'Huyakubwakubwa mo mulinawai taba nige kwa kitagau, yo huyakubwakubwa mo na mulinawai kabo kwa kita'uyoigau.' Yo hinage ye wane, 'Matawuwuna ya laulau Tamagu unai.' ” ¹⁸ Siya sola se henahenamai'uyoidi se wane, “Teina hedehedede ta 'Huyakubwakubwa mo' meta kaniyona ede saha? Saha ye hedehedededi ne nige ka nuwatulobaidi.”

¹⁹ Yesu ye kitadi meta se henuwa bena se henamaiyei ede ye wane, “Kabina ya kata meta yogu hedehedede ta kwa hetahetaladi, doha ya wane, 'Huyakubwakubwa mo mulinawai taba nige kwa kitagau, yo huyakubwakubwa mo na mulinawai kabo kwa kita'uyoigau.' Yo kwa henuwa kaniyona bena kabina kwa kata. ²⁰ Ya hededemamohoi kalimiuwai: Kabo kwa dou yo kwa nuwadubu, na tanoubu ta tamowaidiyao kabo se gwauyala. Komiu kabo kwa nuwadubukalili, na iyamo yomi nuwadubukalili ne kabo ye bui na ye hemala yomi gwauyala. ²¹ Waihiu diyadiyakana bena ye labalaba meta kabo ye kamkamnakalili, matawuwuna yona labalaba mahanana ye lage. Na huyana natuna ye labasi meta yona kamkamna wa ye nuwaluluhiyei, matawuwuna ede natuna wa ye labasiyamako tanoubu ta unai. Teina ta meta ye hemala yona gwauyala. ²² Doha hinage komiu: Teina ta meta yomi nuwadubulakilaki huyana. Na huya hesau kabo ya kita'uyoigomiu. Kabo kwa gwauyala, na yomi gwauyala ne taba nige hesau ye haigabaei kalimiuwai. ²³ Tenem mayadaina ne unai komiu taba nige saha hesau kwa kaibwadai'uyoi kaliguwai. Ya hededemamohoi kalimiuwai: Saha kwa kaibwadai Tamagu unai yau hesaguwai kabo ye leyawa. ²⁴ Na ye laoma ee teina, komiu sola nige saha hesau kwa kaibwadai yau hesaguwai. Kwa kaibwada Yaubada unai, kabo kwa hai, unai kabo kwa gwauyalakalili.

²⁵ Ye laoma ee teina hedehedede palabole udiyedi ya hedede kalimiuwai. Na mayadaina ede ye laolaoma unai taba nige ya hededepalabole'uyo, na unai kabo Tamagu ya hededehemasalahamamohoiyei kalimiuwai. ²⁶ Tenem mayadaina ne unai yau hesaguwai kabo kwa kaibwada. Nige ya wane, kabo yau ya kaibwada Tamagu unai komiu hesabamiu. ²⁷ Taba nige! Tamagu iya ye gadosisiyeigomiu, matawuwuna ede komiu kwa gadosisiyeigau yo kwa kawamamohoi meta yau Yaubada unai ya laoma. ²⁸ Mamohoikalili, yau Yaubada unai ya laoma, na ya laomako tanoubu ta unai. Na tanoubu ta kabo ya laugabaei ya uyo Tamagu unai.”

²⁹ Kabo Yesu yona hekahekatao wa se wane, “Teina yom hedehedede ta meta se masalahakalili, nige doha palabole udiyedi ku hedehedede. ³⁰ Na ka nuwatulobai meta kowa ginauli maudoidi kabidi ku katakalili. Unai nige gonowana kai taba bena henamai hesau unai ka henamaiyeigo. Teina debanawai ka kawamamohoi meta kowa mamohoi Yaubada unai ku laoma.”

³¹ Yesu ye hededelau udiyedi ye wane, “Na kabotaki kwa kawamamohoi! ³² Na huyana ede ye laolaoma, na iya ede ye lagemako, na unai kabo kwa tatagwaligwali, hesau hesau ye lau yona kabamiya unai. Kabo kwa laugabaeigau na yau ya bom. Na iyamo yau nige ya bom, na Tamagu meta iya ede maidagu. ³³ Teina nuwanuwatu ta ya hededededi kalimiuwai, unai kabo nuwadaumwali kwa hai yau kaliguwai. Tanoubu

ta unai komiu kabo pilipili kwa hekalodi. Na nuwamiu se bayao! Matawuwuna yau tanoubu ta wasawasana ya saedikwaiyako.”

17

Yesu yona tapwalolo lakilakina

Yesu ye bom yona ye kaibwada

¹ Teina hedehehede ta mulidiwai Yesu ye kaikewasae galewa ne unai na ye tapwalolo ye wane,

“Tamagu, huyana wa ye lagemako. Natum kana kao saesaena mamohoina ku hemasalaha, na unai kabo Natum hinage kam kao saesaena mamohoina ye hemasalaha. ² Kowa gigibwali ku leyama, unai ya hemala tamowai maudoidi kadi tanuwaga. Kaniyona ede mauli nige kana siga bena kabo ya moseidi tamowai maudoidi ku ledima wa kalidiwai.

³ Teina meta mauli nige kana siga ede: Kowa ku bom Yaubada mamohoina yo yau, Yesu Keliso, yom hetahetamali tamowaina, bena kabida se kata. ⁴ Paisowa ku ledima wa ya ginaulihegehediko. Na teina paisowa ta udiyedi kam kao saesaena mamohoina ya hemasalaha tanoubu ta unai. ⁵ Huyana tanoubu sola nige ye tubu, meta yau maidam na yogu kabaloina saesaena wa kaliguwai. Unai ya kaibwadaigo huyana ya lage kowa kalimwai bena yogu kabaloina saesaena wa ku hai'uyoiyama kaliguwai.”

Yesu yona hekahekatao yodi ye kaibwada

⁶ “Tamagu, tanoubu ta unai tamowai hekadi ku kaisunuwaidi bena yogu tamowai. Siya kowa yom tamowai, na ku ledima kaliguwai, na yom hedehehede se kawakabiyedi. Siya kalidiwai meta kowa kam kao mamohoina** ya hemasalaha. ⁷ Kabina se kata meta ginauli maudoidi ku ledima wa, siya kowa kalimwai se laoma. ⁸ Matawuwuna hedehehede ku ledima wa ya moseidi kalidiwai na se haidi. Yo kabina se katakalili meta kowa kalimwai ya dobima. Yo se kawamamohoi meta kowa ku hetamaligau. ⁹ Siya yodi ya tapwalolo. Nige tanoubu ta maudoina yodi ya tapwalolo, na siya kaiteyadi ku ledima wa yodi, matawuwuna ede siya kowa yom. ¹⁰ Siya maudoidi kaliguwai ne kowa yom, yo maudoidi kalimwai ne meta yau yogu. Na yodi miyamiya ne udiyedi kagu kao saesaena mamohoina se hemasalaha tamowai kalidiwai. ¹¹ Yau kabo tanoubu ta ya laugabaei, na ya laolaowa kalimwai, na siya meta kabo sola tanoubu ta unai se miyamiya. Tamagu, kowa tabuna. Hesam ku leyama wa debanaena ede ta nuwakesega. Na ya kaibwadaigo bena yom gigibwali unai** yodi ku laugudugudu, to se nuwakesega doha kowa yo yau. ¹² Huyana yau maiyadi meta yababa udiyedi ya tolotaunidi yo ya kitahetetenamwanamwaedi hesa ku leyama wa unai. Nige hesau ya hetaukwadalele, na iya hekamkamna tauhekalona ne ye bom mo. Teina unai ede kulikuli tabuna wa ye hemamohoiyei.

¹³ Yau meta ya laolaowa kalimwai, na sola tanoubu ta unai ma miyagu, na teina nuwatu ta ya hedededi kalidiwai, na bena yogu gwauyalalakilaki unai se miya. ¹⁴ Yau yom hedehehede wa ya moseidiko kalidiwai, na tanoubu tamowaidi meta siya se subudi, matawuwuna siya nige tanoubu ta yona doha yau nige tanoubu ta yona. ¹⁵ Yau nige ya kaibwadaigo bena tanoubu ta unai ku haigabaeidi, na ya kaibwadaigo bena tauyababa yona gigibwali unai kowa ku lauguduguidi. ¹⁶ Siya nige tanoubu ta yona, doha yau nige tanoubu ta yona. ¹⁷ Taba hedehehede mamohoina unai

** **17:6:** Kam kao mamohoina: Kalina Giliki unai se kuli, hesam. ** **17:11:** Yom gigibwali unai: Yowane ye kuli, yodi ku laugudugudu hesam unai. Buka Dimdim hekadi hedehehede ta yodi kulibuina udoi, ede se kuli, yodi ku laugudugudu na kalimwai se miyatahitahi.

ku saguidi na se hemala yom tamowai mamohoidi.** Kowa yom hedehehede meta hedehehede mamohoina ede. ¹⁸ Kowa ku hetamaligau ya dobima tanoubu ta, unai yau hinage ya hetamalidi se lau tanoubu ta unai. ¹⁹ Siya debadiwai ede yau ya mosegabaei'uyoigau kowa kalimwai, unai bena siya kabo hinage ya moseidi kalimwai na siya mamohoi yom tamowai.”

Yesu tausunumaena maudoidi yodi ye kaibwada

²⁰ “Tamagu, yogu kaibwada ta nige yogu hekahekatao se bom hesabadi, na hinage wasa ta yodi hewasana unai na kaiteyadi se kawamamohoiyeigau meta yodi ya kaibwada. ²¹ Na ya kaibwadaigo meta maudoidi kabo se nuwakesega, doha kowa ede kaliguwai yo yau ede kalimwai. Siya hinage bena kalidawai, unai tanoubu maudoidi kabo se kawamamohoi meta kowa ku hetamaligau. ²² Yogu kabaloina saesaena gigibwalina maudoina ku haiyama wa ya hekawalaei kalidiwai. Tenem unai bena siya se nuwakesega doha kita meta kesega. ²³ Ede yau kalidiwai yo kowa ede kaliguwai. Taba siya se nuwakesegamamohoi, na unai bena tanoubu maudoina kabina se kata meta kowa ku hetamaligau, yo ku gadosisiyeidi gonogonowana doha yau ku gadosisiyeigau.

²⁴ Tamagu, ya henuwa bena tamowai ku ledima wa maidaguwao yogu kabamiya ne unai, to yogu kabaloina saesaena wa se kita. Yogu kabaloina saesaena wa ku leyama, matawuwuna ku gadosisibagunaegau na kabo tanoubu ta ye tubu.

²⁵ Tamagu, kowa ku dudulaikalili. Tanoubu ta kowa nige kabim se kata, na yau kabim ya kata, yo siya tausunumaegau kabina se kata meta kowa ku hetamaligauma. ²⁶ Ye laoma teina ede kam kao ya hemasalaha kalidiwai, na sola kabo ya hemahe-masalaha'uyoigo kalidiwai, na unai ede bena se haigadogadosisi'uyoidi doha kowa ku gadosisiyeigau, yo yau kabo kalidiwai.”

18

Yesu se kabihekahini

(Mataiyo 26:47-56, Maleko 14:43-50, Luka 22:47-53)

¹ Huyana Yesu ye tapwalologehe maiyana hekahekatao se dalahai na Kidilona gonuna unai se taukawasi se lau teha hesau unai. Na temenai meta olibe yaowana hesau, ede maiyana hekahekatao wa se lulau unai.

² Yudasi iya Yesu kana tauwalohai wa meta tenem teha ne kabina ye kata, matawuwuna ede Yesu maiyana hekahekatao huya hekadi temenai se laolaomagogoi.

³ Ede ye laoma na tau'iyala bodadi yo taukaitalasang tauwoyaidi yo Paliseya yodi taupaisowa hekadi maiyanao. Na osili, lampa yo kaba'iyala gogodi se baheidi, na ye woayaidi se lau se lage tenem olibe yaowana ne unai.

⁴ Ginauli maudoidi kabo se tubu Yesu kalinawai ne kabidi ye katako, ede ye lau na ye henamaiyeidi ye wane, “Kaiteya hesabana kwa laoma?”

⁵ Se hededebui se wane, “Yesu Nasaleta tamowaina wa.”

Yesu ye wane, “Yau tamowaina ede.” Na Yesu kana tauwalohai Yudasi meta menai maiyanao se totolo. ⁶ Huyana Yesu ye wane, “Yau tamowaina ede,” taulaoma wa se mulisigisigi yo se gulidobi bwatano wa unai.

⁷ Yesu ye henamai'uyoidi ye wane, “Kaiteya hesabana kwa laoma?”

Ede se wane, “Yesu Nasaleta tamowaina wa.”

⁸ Yesu ye wane, “Ya hededeyako kalimiuwai meta yau tamowaina ede. Ena yau ya bom kwa wasewaseneigau, yogu tamowai ta kwa kabigabaeidi se lau.” ⁹ Teina ye tubu meta iya yona hedehehede wa ye hemamohoiyei, doha ye wane, “Tamowai ku ledima wa ya kitahetetenamwanamwaedi na nige hesau ya hetaukwadalele.”

** **17:17:** Se hemala yom tamowai mamohoidi: Hetabu hedehehemasalahanana ku hasili.

¹⁰ Na Simona Petelo iya yona kelepa kalinawai ye lausini ede taukaitalasam saesaena yona heyayai tauhaina beyakahatuna ye boli'utusi. Heyayai tauhaina wa hesana ede Malakasi. ¹¹ Kabo Yesu ye hededelau Petelo unai ye wane, “Yom kelepa ne ku tole'uyoi kabahaina ne unai! Matawuwuna ede kamkamna keyakana Tamagu ye leyama ta, taba unai ya numa.”

Yesu se woyalaei Anase unai

(Mataiyo 26:57-58, Maleko 14:53-54, Luka 22:54)

¹² Na kabo tau'iyala bodadi maiyadi kadi tanuwaga yo Dius tauwoyaidi yodi tau-paisowa wa Yesu se hai yo nimana se paidi. ¹³ Na bagubaguna meta se woyalaei Kaiyapasi bwasiyana Anase unai. Kaiyapasi iya taukaitalasam saesaena tenem bolimaina ne unai. ¹⁴ Na iya ede ye hededelau Dius tauwoyaidi udiyedi ye wane, “Ye namwakalili taba tamowai kesega ye boita tamowai maudoida hesabada.”

Petelo yona uhala bagubagunana

(Mataiyo 26:69-70, Maleko 14:66-68, Luka 22:55-57)

¹⁵ Simona Petelo yo hekahekata hesau Yesu se hemuliwatani. Na hekahekata hesau wa Yesu ye hemuliwatani se mwalae taukaitalasam saesaena yona bakubaku ne unai, matawuwuna taukaitalasam saesaena wa** tenem hekahekata ne kabina ye kata. ¹⁶ Na Petelo meta dagela ne unai ye nayanaya, ede hekahekata hesau wa iya taukaitalasam saesaena kabina ye kata'usi wa ye uyo kawakeda wa na ye hededelau kawakeda taukitahetetena waihiuna kalinawai bena taba Petelo ye mwalae.

¹⁷ Waihiu kawakeda taukitahetetena wa Petelo ye henamaiyei ye wane, “Na kowa hinage Yesu yona hekahekata hesau?”

Iya ye hededebui ye wane, “Yau nige.”

¹⁸ Huyana ne meta huyagwagwama, ede heyayai tauhaidi hekadi yo tauwoyawoya yodi taupaisowa wa kaiwa se yuhi na se tolohetakikili se kaikaimwaiga. Na Petelo hinage ye tololau ede maiyadi se kaimwaiga.

Taukaitalasam saesaena bagubagunana wa Yesu ye henamaiyei

(Mataiyo 26:59-66, Maleko 14:55-64, Luka 22:66-71)

¹⁹ Na kabo taukaitalasam saesaena Yesu yona hekahekatao yo yona lauhekata debadiwai ede ye henamaibuibui.

²⁰ Ede Yesu ye hededebui ye wane, “Yau huya badobado sunago yo Numa Tabuna udiyedi ya laulauhekata. Menai kita Dius yoda tamowai se laolaomagogoi, na ya laulauguguyamasalaha tamowai maudoidi kalidiwai. Nige ginauli hesau ya hedede-wadawadamyeyi. ²¹ Idohagi to ku henamaiyeigau? Yogu hedehedede taulapuidi ne ku henamaiyeidi. Yogu hedehedede meta kabidi se katakalili.”

²² Na taukaitalasam saesaena wa yona taupaisowa hesau Yesu dedekanawai ye totolo na yona hededebui wa ye lapui ede nimanawai ye laupapali, na ye wane, “Idohagi to taukaitalasam saesaena unai ku hedede doha teina?”

²³ Yesu ye hededebui ye wane, “Ena taba hedehedede ta ya hedede ne unai ya laupwano, yogu laupwano saha bena ku hededehemasalaha. Na taba saha ya hedededi ne mamohoi, ye saha to ku laupapaligau?” ²⁴ Yesu meta nimana sola ma paipaidi, na Anase iya ye hetamalilae taukaitalasam saesaena Kaiyapasi unai.

Petelo yona uhala helabuina yo hehaiyonana

(Mataiyo 26:71-75, Maleko 14:69-72, Luka 22:58-62)

** **18:15:** Taukaitalasam saesaena wa, iya ede Anase. Iyamo lausoiso 13 unai ta hasili meta tenem bolimaina ne unai taukaitalasam saesaena ede Kaiyapasi. Na Anase meta iya taukaitalasam saesaena bagubagunana, na sola hesa ne ye kabikabihekahini na Yesu se woyalae unai. Iya teinai Yesu ye henamaibuibui. (Yowane 18:19,24, Luka 3:2, yo Apostolo 4:5).

²⁵ Simona Petelo ye tolo na ye kaikaimwaiga, na taukaimwaiga hekadi wa se henamaiyei se wane, “Kowa hinage yona hekahekatao wa hesauna?”

Petelo ye uhala ye wane, “Yau nige.”

²⁶ Na tamowai beyana Petelo ye boli'utusi'usei wa kehana hesau iya hinage taukaita-lasam saesaena yona heyayai tauhaina, ye hededebayao ye wane, “Ya nuwatui meta kowa ya kitago Yesu maiyam olibe yaowana wa unai.” ²⁷ Na Petelo ye uhala'uyo, na mahanana ne unai meta pwaole hakiyana ye dou.

Yesu Pilato matanawai ye tolo

(Mataiyo 27:1-2,11-14, Maleko 15:1-5, Luka 23:1-5)

²⁸ Na kabo Dius tauwoyaidi wa Yesu maiyadi Kaiyapasi yona numa se pesagabaei na se lau Loma yodi gabana yona kabaloina numana lakilakina unai. Mala ye tom na malatomtom gagilina unai, na Dius tauwoyaidi nige se mwalae Loma yodi gabana yona numa wa unai, matawuwuna Dius yodi laugagayo meta ena se mwalae numa ne unai kabo ye hebikidi Yaubada matanawai. Na nige se mwalae, matawuwuna ede se henuwa bena Taukiuli kaina se kai. ²⁹ Ede Gabana Pilato ye pesa ye laoma kalidiwai na ye henamaiyeidi ye wane, “Yababa saha unai teina tamowai ta kwa hegilu?”

³⁰ Na se wane, “Ena taba iya nige laugagayo hesau ye utusi, taba nige ka woyaiyama kalimwai.”

³¹ Pilato ye hededelau udiyedi ye wane, “Kwa hai na kabo yomi laugagayo ne unai kwa bom kwa hekasa.”

Dius tauwoyaidi wa se hededelau unai se wane, “[*Komiu Loma tamowaidi yomi laugagayo kwa tole meta*] kai nige gonowana tamowai hesau ka hekasa na ka unuhemwaloi.”** ³² Teina ye tubu ta meta Yesu yona boita kana kao ye hededehemasalahayako wa ye laoma ye hemamohoiyei.

³³ Na kabo Pilato ye mwalaeseuyo yona kabaloina numana lakilakina wa unai na Yesu ye yoganei ye lau unai na ye henamaiyei ye wane, “Kowa Dius tamowaidi yodi wasawasa?”

³⁴ Yesu ye henamailau unai ye wane, “Teina ta kowa ku bom yom henamai, o tamowai hekadi se hededehemasalahagauko kowa kalimwai?”

³⁵ Pilato ye hededebui ye wane, “Yau nige Dius tamowaina. Yom tamowai yo taukaita-lasam tauwoyaidi se woiaigo na kwa laoma kaliguwai. Yababa saha ku ginauli?”

³⁶ Yesu ye wane, “Yau yogu basileiya ne nige tanoubu ta yona. Ena taba tanoubu ta yona, yogu taupaisowa maudoidi ne kabo yogu se laugudugudu, na Dius tamowaidi ne taba nige gonowana se haigau. Na yogu basileiya ne meta iya teha hesau yona.”

³⁷ Na Pilato ye hededelau iya unai, ye wane, “Unai kowa meta wasawasa!”

Yesu ye hededebui ye wane, “Kowa ku hedede meta yau wasawasa. Mamohoikalili, se labasigau yo ya dobima tanoubu ta unai bena hedehedede mamohoina ya hemasalaha tamowai udiyedi. Na kaiteyadi hedehedede mamohoina se henuwa, siya kabo se lapulaoma kaliguwai.” ³⁸ Ede Pilato ye henamai ye wane, “Mamohoina bena saha?”

Teina unai ye pesa ye lau Dius udiyedi na ye wane, “Nige kabahegiluna saha hesau ya lobai. ³⁹ Na komiu yomi laulau meta bolimai badobado Taukiuli Henuwaisinina huyana unai kabo numatutugudu unai taumiya tamowaina hesau kwa kaibwadai bena ya yailigabaei. Unai hage, kwa henuwa bena Dius yodi wasawasa ne ya yailigabaei?”

⁴⁰ Na maudoidi se yogahilakilaki se wane, “Nige, iya nige! Balabasi iya ku yailigabaeiyama ede.” Na Balabasi iya meta Loma gabemani unai tauhaikabi tamowaina.

** **18:31:** Kai nige gonowana... ka unuhemwaloi: Loma tamowaidi siya se bom mo yodi dudulai bena tamowai se hesataulo.

19

*Se hekasa meta Yesu kabo se hesataulo
(Mataiyo 27:15-31, Maleko 15:6-20, Luka 23:13-25)*

¹ Na kabo Pilato Yesu ye hai ye moselaei tau'iyala udiyedi na wipi unai se sapi-heyababakaliliyei. ² Na kabo kaiwa gwaligwalina laganao se heidi doha kolona na se tole Yesu kuluna unai, yo kwama pulupululuna** se hai se heluwui. ³ Na se sae kalinawai na se talatalawasiyei se wane, “O Dius yodi wasawasa, ka hedebasaego.” Yo nimadiwai se laupapali.

⁴ Pilato ye pesa'uyo na ye hededelau Dius tauwoyaidi wa udiyedi ye wane, “Kwa lapui, kabo ya woyaiyama na bena kabina kwa kata meta iya kalinawai nige kabahegiluna hesau ya lobai.” ⁵ Na Yesu kabo ye pesama, na maimaina gwaligwalina se heihepo'opo'o wa kuluna ne unai yo tauna ne unai meta kwama pulupululuna. Ede Pilato ye hededelau udiyedi ye wane, “Tamowai wa iya ede teina!”

⁶ Huyana taukaitalasam tauwoyaidi yo yodi taupaisowa lakilakidi Yesu se kita meta se yogahilakilaki se wane, “Ku hesataulo! Ku hesatauloyawa!”

Na Pilato ye hededelau udiyedi ye wane, “Komiu kwa hai na kwa hesataulo. Yau nige kabahegiluna hesau ya lobai.”

⁷ Na Dius tauwoyaidi se hededebui se wane, “Kai meta yoma laugagayo hesau, na laugagayo ne debanawai iya taba ye boita, matawuwuna ede ye hedede meta bena iya Yaubada Natuna.”

⁸ Huyana Pilato teina hedehedede ta ye lapui meta ye matausikalili. ⁹ Kabo ye mwalaeseuyo numa lakilakina wa unai, na iya Yesu ye henamaiyei ye wane, “Kowa haedi ku laoma?” Na Yesu nige kalinana. ¹⁰ Ede Pilato ye henamai'uyo ye wane, “Idohagi to nige kalinam? Nuwana kowa nige kabina ku kata meta yau yogu gigibwali gonowana kabo ya yailihaigo o ya hesataulogo?”

¹¹ Yesu ye hededebui ye wane, “Yau yom tanuwaga gigibwalina ta unai ya miyamiya matawuwuna ede yom gigibwali ne Yaubada ye leyawa. Unai tamowai ne** ye mosegabaeigau kalimwai ta, iya yona yababa ye lakikalili na kabo kowa.”

¹² Teina hedehedede ta unai ede Pilato ye kaipatekalili bena Yesu ye yailigabaei, na Dius tauwoyaidi se yogalau unai se wane, “Ena taba teina tamowai ta ku yailigabaei meta kowa nige Sisa yona taupaisowa namwanamwana. Teina tamowai ta ye hedede bena iya wasawasa, na teina hedehedede ta ye hemasalaha meta Sisa unai ye haikabi.”

¹³ Pilato teina hedehedede ta ye lapui ede Yesu ye woyahepesadobiyei hekasa kabaginaulina bakubakuna unai, na ye tuli hekasa kabaginaulina kabatulina unai. Teha ta hesana kalina Alamaiki unai ede Gabata,** kaniyona ede weku unai se matui.

¹⁴ Teina saha se tubu ta meta Taukiuli kaina kabinonohana mayadaina mayamayadailakina unai.

Kabo Pilato ye hededelau Dius tauwoyaidi wa udiyedi ye wane, “Yomi wasawasa wa iya ede teina.”

¹⁵ Na siya se yogalau unai se wane, “Ku laehesuwala! Ku laehesuwalayawa! Ku hesatauloyawa!”

Pilato ye henamaiyeidi ye wane, “Kwa henuwa bena yomi wasawasa ne ya hesataulo?”

Taukaitalasam tauwoyaidi se yogabui se wane, “Yoma wasawasa kesega ede Sisa! Kai nige yoma wasawasa hesau!”

** **19:2:** Kwama pulupululuna ne kana kao mamohoina meta Dimdim unai ta wane *purple*. Na kaniyona ede wasawasa kabakitalobaina hekihekinoina. Na kalinada unai nige *purple*, unai pulupululuna ta hepaisowa.

** **19:11:** Tamowai ne: Tausonoga gwaudi yodi nuwatu meta teina tamowaina ede Kaiyapasi. ** **19:13:** Gabata: Tehana ta unai meta bwatano ne unai weku taditadidi tabatabadi udiyedi matuna se ginauli na hekasa kabaginaulina kabatulina unai se tole kewana ne unai.

16a Na kabo Pilato Yesu ye moselaie tau'iyala tamowaidi kalidiwai bena se hesataulo.

Yesu se hesataulo

(Mataiyo 27:32-44, Maleko 15:21-32, Luka 23:26-43)

16b Ede Yesu se woyaei se laei. 17 Na Yesu kana sataulo ye bom ye bahei na ye lau tupwa hesauna unai hesana ede Mwayalu Magaina. Kalina Alamaiki unai se wane, Golagota. 18 Temenai Yesu yo tamowai labui maiyanao se hesataulodi. Yesu se heduwaduwali na tehakahatuna ne unai hesau yo tehaseuseulina ne unai hesau.

19 Pilato hededehemasalaha kubwakubwana ye kuli na se tutuhepatu sataulo wa kewanawai. Ye kuli ye wane, “YESU NASALETA TAMOWAINA, DIUS YODI WASAWASA.”**

20 Dius tamowaidi gwaudi kulikuli wa gonowana se hasili, matawuwuna ede yodi kabahehataulona ne meta magailaki wa dedekanawai. Na hededehemasalaha wa meta kalina Alamaiki, Latini yo Giliki udiyedi ye kuli. 21 Na Dius yodi taukaitalasam tauwoyaidi se hededelau Pilato unai se wane, “Tabu ku kuli ku wane, ‘Dius tamowaidi yodi wasawasa,’ na taba ku kuli ku wane, teina tamowai ta ye hedede ye wane, ‘Yau Dius tamowaidi yodi wasawasa.’”

22 Na Pilato ye hededebui ye wane, “Saha ya kuli ne meta temeta ya kuli ede!”

23 Yesu se hesataulo, na kabo tau'iyala tamowaidi wa taudi hasi, siya kana kwama se haidi na se bolidi na se soiyeidi se bom mo kalidiwai, na kana likwaguni kwamana wa nige se boli, matawuwuna teina kwama ta meta kewana unai ye dobi guni ne meta se halukesegai mo, nige kababoditubeina hesau. 24 Ede tau'iyala wa se bom se hedehedede se wane, “Tabu kwama ta ta iga'igali. Ta tole na ta kaiheyai kabo kaiteya ye hai.” Teina ye tubu ta meta kulikuli tabuna ye hemamohoiyei doha ye wane, “Yogu kwamana se soiyeidi kalidiwai,

yo yogu likwaguni kwamana daisi unai se kaiheyai.”

(Same 22:18)

Na teina laulau ta ede tau'iyala tamowaidi wa se ginaulidi.

25 Yesu yona sataulo dedekanawai meta iya sinana, sinana kana kaha, Maliya iya Kolopasi mwanena yo Maliya Magadala waihiuna se totolo. 26 Huyana Yesu ye kaikewadobi na sinana ye kita yo yona hekahekata ye gadogadosisi'usei wa dedekana unai ye totolo, ede ye hededelau sinana wa unai ye wane, “Sinebada! Temeta me kowa natum.”

27 Na yona hekahekata wa unai ye wane, “Kowa sinam ede temeta.” Tenem huyana ne unai ye lau meta yona hekahekata wa Yesu sinana wa ye woyai ye laei yona numa na ye kitahetete.

Yesu yona boita

(Mataiyo 27:45-46, Maleko 15:33-41, Luka 23:44-49)

28 Na Yesu kabina ye kata meta yona paisowa maudoidi wa ye hegehediko. Ede ye wane, “Yau gadogu ye magu.”

(Same 69:21) Na teina unai kulikuli tabuna

kabo ye hemamohoiyei. 29 Winega ma pakuna meta temenai, ede tau'iyala hesau balo ye hai ye hedakwa winega wa unai na hisopa lagana unai balo wa ye gwalihekahini na ye helelesae Yesu kawana ne unai. 30 Yesu winega wa ye numa, na kabo ye wane, “Yogu paisowa maudoidi wa ya hegehediko.” Na kabo kuluna ye laudobiyei na yawasina ye mosegabaei.

31 Na tenem meta Dius yodi Sabati kabinonohana mayadaina wa unai, yo mayadai hesauna ne kabo Sabati. Na tenem mayadaina ne meta mayadai saesaena. Na Dius tauwoyaidi nige se henuwa bena sinale ne se kabakabasi sataulo ne udiyedi ye lau ee Sabati ye lobai. Ede Pilato se kaibwadai na tamowai wa kaedi bena se yatugodudi yo sinaledi ne se haigabaeidi. 32 Ede tau'iyala tamowaidi se lau tamowai labui Yesu maiyanao se hesataulodi wa kaedi se yatugodudi. 33 Na huyana se lau Yesu unai na se

** 19:19: Yesu Nasaleta Tamowaina, Dius Yodi Wasawasa meta Loma kalinadiyena ede Iesus Nazarenus Rex Iudaeorum. Tautau se bado udiyedi hedehedede ne se kulihekubwa se kuli I-N-R-I.

kita meta ye boitako, ede nige kaena wa se yatugodudi. ³⁴ Na tau'iyala tamowaina hesau wamali unai Yesu lisilisina ye gwalilapai, na kwasina yo waila se didipesama.

³⁵ Yau wasa ta taukulina na teina saha se tubu ta ya kitadi na ya kulihemasalahadi. Na saha ya kulihemasalahadi ta meta mamohoidi. Kabina ya kata meta ya hededemamohoi. Na ya kulihemasalahadi bena komiu hinage unai kabo kwa kawamamohoi. ³⁶ Teina saha se tubu ta bena kulikuli tabuna se hemamohoiyei, doha ye wane, “Nige siyadana hesau kabo se yatugodu.” (Esodo 12:46, Numela 9:12, yo Same 34:20) ³⁷ Yo kulikuli tabuna teha hesau unai ye wane, “Iya lisilisina se gwalilapai wa, kabo se kitalau unai.” (Sakaliya 12:10)

Yesu se tole bwayabwaya unai

(Mataiyo 27:57-61, Maleko 15:42-47, Luka 23:50-56)

³⁸ Teina saha se tubu ta mulidiwai, Yosepa, iya Alimatiya tamowaina, ye kaibwadalau Pilato unai bena Yesu sinalena ye hai. Yosepa meta iya Yesu tauhemuliwatanina wadawadamna hesau na nige ye hemasalahai'uyoi, matawuwuna ede Dius tauwoyaidi hekadiyo wa ye matausiyeidi. Pilato yona yali wa unai ede Yosepa ye lau Yesu sinalena ye hai, ³⁹ iya maiyana Nikodemo. Na Nikodemo, iya ede boniyaiyena Yesu taukaitaumaena wa, iya meta yausi panepanena** ye bahei, polohena doha 33 kilo. ⁴⁰ Siya taudi labui Yesu sinalena wa se hai se heyausi na kaleko posiposina tupwadi lohalohadi udiyedi se suma. Teina ta meta Dius tamowaidi yodi toletoletau kabikabidi. ⁴¹ Yesu yodi kabahehataulona wa dedekanawai meta koya hesau, na unai bwayabwaya hauhauna sola nige tamowai hesau unai se tole. ⁴² Tenem mayadai ne Dius yodi Sabati kabinonohana mayadaina yo bwayabwaya wa meta kabahehataulona wa dedekanawai, ede temenai Yesu se tole.

20

Yesu ye tolo'uyo

(Mataiyo 28:1-10, Maleko 16:1-8, Luka 24:1-12)

¹ Sabati hesauna mayadaina bagubagunana unai, malatomtom gagilina sola ma masimasigilina, kabo Maliya Magadala waihiuna wa ye lau bwayabwaya wa na ye kita meta kana gudu wekuna wa se buihesuwalayako. ² Ede ye heloi ye lau Simona Petelo yo hekahekata hesauna Yesu iya ye gadosisi'usei wa udiyedi na yodi ye hedehedede ye wane, “Guiyau sinalena wa bwayabwaya wa unai se haigabaei na nige kabina ka kata** haedi se toleyako!”

³ Kabo Petelo yo hekahekata hesauna wa se heloi se lau bwayabwaya wa unai. ⁴ Taudi labui se heloi na hekahekata hesauna wa Petelo ye heloigabaei na ye lagebaguna bwayabwaya wa unai. ⁵ Ye dunedobi ye kitalau kaleko posiposidi tupwadi lohalohadi wa ye kitadi se bawabawa, na nige ye lusae kalo ne. ⁶ Na Simona Petelo ye mulitama wa ye lage meta ye lusae kalo wa na suma kaleko tupwadi wa ye kitadi se bawabawa, ⁷ yo hinage Yesu kuluna kana suma kalekone wa ye kita meta nokunokuna, na sinale kana suma kalekodi wa tupwa hesau unai na kuluna kana suma wa hinage tupwa hesau unai. ⁸ Na kabo hekahekata hesauna taulagebaguna wa hinage ye lusae bwayabwaya wa unai. Na ginauli maudoidi wa ye kitadi ede ye kawamamohoi. ⁹ Na siya sola nige kulikuli tabuna se nuwatulobai meta Yesu kabo boita unai ye tolo'uyo.

Yesu ye taumasalahai Maliya Magadala waihiuna unai

(Maleko 16:9-11)

** **19:39:** Yausi panepanena: Dius tamowaidi mulo yo aloi se kililidi. Teina ginauli labui panedi namwanamwadi paudadi se hebwalidi na se hepaisowadi toletoletau udiyedi, to taba nige sinale panena ye masalahai. ** **20:2:** Nige kabina ka kata: Hedehedede ta unai ta hasililobai meta Maliya nige ye bom ye lau bwayabwaya wa, na sinesineo hekadi maiyanao se lau (Mataiyo 28:1, Maleko 16:1-2, yo Luka 23:55–24:1).

10 Kabo hekahekatao wa se uyo yodi numa. 11 Na Maliya iya bwayabwaya wa dagelana unai ye totolo na ye doudou. Iya ye doudou na ye dune ye kitalau bwayabwaya kalona wa unai, 12 na anelu labui ye kitadi. Kadi kwama posiposidi, na se tutuli Yesu yodi kabahekenona wa unai, hesau kulubawa unai ye tuli na hesau kaegigi unai ye tuli.

13 Maliya se henamaiyei se wane, “Waihiu, matawuwuna saha to ku doudou?”

Maliya ye wane, “Yogu guiyau se hai se laehesuwala, na nige kabina ya kata haedi se tole.” 14 Teina hedehedede ta mulina ne unai Maliya ye tolobui, meta Yesu ye kita ye totolo, na nige ye kitalobai meta iya Yesu.

15 Yesu ye wane, “Waihiu, saha sabina ku doudou? Yo kaiteya ku wasewasenei?” Maliya yona nuwatu bena koya taupaisowaina, ede ye wane, “Taubada, ena ku hai na ku tolehesuwala meta taba ku hededehehemasalaha haedi ku tole, na kabo gonowana ya lau ya hai.”

16 Yesu ye hededelau unai ye wane, “Maliya.” Ede ye kitalau Yesu unai na ye wane, “Laboni!” Kalina Alamaiki unai kaniyona ede taulauhekata.

17 Yesu ye hededelau unai ye wane, “Tabu ku kabikabilaoma kaliguwai, matawuwuna yau sola nige ya sae tamagu unai. Na ku lau kagu kahao yodi ku hedehedede meta yau ya seuseuyo Tamagu iya ede Tamamiu, yo yogu Yaubada iya ede hinage yomi Yaubada unai.” 18 Maliya Magadala waihiuna ye lau ede hekahekatao wa yodi ye hedehedede ye wane, “Guiyau wa ya kita!” Yo saha Yesu ye hedededi kalinawai wa hinage ye hedededi.

*Yesu ye taumasalaha yona hekahekatao udiyedi
(Mataiyo 28:16-20, Maleko 16:14-18, Luka 24:36-49)*

19 Tenem mayadaina ne sabati luwana ne unai mayadai bagubagunana, na boniyaina ne unai kabo hekahekatao wa se tupagogoi numa hesau unai na kawakeda se gudui, matawuwuna ede Dius tauwoyaidi se matausiyeidi. Na Yesu ye laoma ede luwadi wa unai ye tolo na ye wane, “Nuwadaumwali kwa hai!”

20 Ye hedede, na mulinawai kabo nimana yo lisilisina wa ye hekitadi. Yona hekahekatao wa yodi Guiyau se kita meta se gwauyalakalili.

21 Yesu ye hedehedede'uyo ye wane, “Nuwadaumwali kwa hai! Yau Tamagu ye hetamaligauma, unai komiu hinage kabo ya hetamaligomiu.” 22 Na kabo ye yahuwalau udiyedi na ye wane, “Yaluwa Tabuna kwa hai. 23 Ena tamowai hesau yona ba'aya kwa nuwatugabaei, kabo nuwatugabae ne ye hai, na ena tamowai hesau yona ba'aya nige kwa nuwatugabaei, taba nige nuwatugabae ne ye hai.”

Yesu ye taumasalaha Tomasi unai

24 Na Tomasi, hesana hesau Didimasi** yo iya saudoudoi labui wa hesauna, huyana Yesu ye taumasalaha wa iya nige maiyadi. 25 Ede hekahekatao hekadi wa se hededelau unai se wane, “Kai Guiyau ka kita!”

Na Tomasi ye hededelau hekahekatao hekadiyo wa udiyedi ye wane, “Ena yau nige nimana udiyedi pawati gaidi ne ya kitadi, yo nimagigigu nige ya tole pawati gaidi ne udiyedi, yo nimagu nige ya tole iya lisilisina gaina ne unai, meta taba nige ya kawamamohoi.”

26 Sabati kesega mulinawai, hekahekatao wa numa wa unai se tupagogoi'uyo na Tomasi meta maiyadi. Keda wa se guduyako, iyamo Yesu ye laoma luwadi wa unai ye tolo na ye wane, “Nuwadaumwali kwa hai!” 27 Kabo ye hededelau Tomasi unai ye wane, “Nimagigim ne inai ku tole na nimagu gaidi ta ku kabitonogidi. Yo nimam ne ku heleleyama na lisilisigu ta unai ku kabi. Na tabu ku nuwalabulabui na ku sunuma mo.”

28 Tomasi ye hededelau unai ye wane, “Kowa yogu Guiyau yo yogu Yaubada.”

** 20:24: Hesa Tomasi meta kalina Alamaiki, na hesa Didimasi kalina Giliki. Hesa labui ne kaniyodi ede godegode.

²⁹ Ede Yesu ye hededelau unai ye wane, “Ku kitagau, na unai ede ku kawamamohoi. Kaiteyadi nige se kitagau na iyamo se kawamamohoi, siya gonowana se gwaunya.”

³⁰ Yesu laulau gigigigibwalidi gwaudi ye ginaulidi yona hekahekatao wa matadiwai, na teina buka ta unai nige maudoidi ya kulidi. ³¹ Na saha ya kulidi ta, udiyedi bena kabo kwa kawamamohoi meta Yesu iya Keliso, iya Yaubada Natuna. Na yomi sunuma debadiwai kabo iya hesanawai mauli kwa hai.

21

Yesu ye taumasalaha yona hekahekatao udiyedi Galili Gabwana dedekanawai

¹ Teina saha se tubu wa mulidiwai Yesu ye taumasalaha'uyo yona hekahekatao wa udiyedi Tibeliya Gabwana** dedekanawai. Na yona masamasalaha wa ede doha teina:

² Simona Petelo, Tomasi, hesana hesau ede Didimasi, Natanaela, iya meta magari Kana teha Galili ne tamowaina, Sebedaiyo natunao yo hekahekatao labui hinage, maudoidi ta meta se miyagogoi. ³ Na Simona Petelo ye hededelau udiyedi ye wane, “Ya lau ya yama.” Na hekadiyo wa se talam se wane, “[Ye namwa,] kabo ta lau.” Ede se dobi se lau yodi waga unai se gelu, na tenem boniyaina ne unai meta se yamakasaya.

⁴ Malatomtom gagilina kabo Yesu nagali wa unai ye tolo, na yona hekahekatao wa nige se kitalobai.

⁵ Yesu ye yogadobi udiyedi ye wane, “Natuguwao, yama e nige?” Na se hededebui se wane, “Nige saha hesau ina!” ⁶ Ye wane, “Yomi hinaya ne kwa gabalaei waga teha kateyani unai, kabo yama hekadi kwa hekonadi.” Na hinaya wa se gabaei meta nige gonowana se tabeisini, matawuwuna ede yama wa meta se badokalili.

⁷ Na hekahekata Yesu iya ye gadosisikaliliyei'usei wa ye hededelau Petelo unai ye wane, “Iya Guiyaunem!” Huyana Simona Petelo ye lapui meta tenem ne Guiyau, na iya meta tugaibuna, ede yona likwakewa kalekona ye hai ye likwa na ye kausihiyei na ununa ye hesabwayahisi kana dagilolo unai, na ye kamposidobi gabwa unai. ⁸ Na hekahekatao hekadi waga unai wa se hemuliwatani, na hinaya ma yamana wa se niuli se sae, matawuwuna ede siya nagali wa dedekanawai, lohana meta doha nimakala 50.** ⁹ Na huyana se lage nagali wa unai meta kaiwa ye kalakalasi se kita. Unai yama, yo dedekanawai meta pwalawa hinage.

¹⁰ Yesu ye hededelau udiyedi ye wane, “Yama kwa galaidi wa hekadi kwa baheidima.”

¹¹ Ede Simona Petelo ye gelusae na hinaya wa ye tabeisae salagomgom wa unai. Hinaya wa meta yama lakilakidi se hemwayau badodi ede 153. Yama wa se badokalili, na iyamo hinaya wa nige se pulisi. ¹² Yesu ye hededelau udiyedi ye wane, “Kwa laoma kwa kaikai!” Na hekahekatao wa nige se nuwabayao bena se henamaiyei se wane, “Kowa kaiteya?” Matawuwuna kabina se kata meta iya yodi Guiyau wa. ¹³ Yesu ye laoma pwalawa yo yama ye haidi na kadi ye moseidi. ¹⁴ Yesu yona tolo'uyo na mulinawai teina ta meta huya hehaiyonana ye taumasalaha yona hekahekatao udiyedi.

Yesu Petelo ye hetolo'uyoi yona paisowa unai

¹⁵ Se kaikaigehe kabo Yesu ye hededelau Simona Petelo unai ye wane, “Simona, Yowane natuna, kowa mamohoi ku gadosisikaliliyeigau, na kabo kam kahao ta?”

Petelo ye wane, “Mamohoi, Guiyau, kabina ku kata meta ya gadosisiyeigo.”

Kabo Yesu ye wane, “Yogu mamoe ne ku hekaidi.”

¹⁶ Yesu ye hedede'uyo ye wane, “Simona, Yowane natuna, kowa mamohoi ku gadosisiyeigau?”

Iya ye hededebui ye wane, “Mamohoi, Guiyau, kabina ku kata meta ya gadosisiyeigo.”

Yesu ye wane, “Yogu mamoe ku kitahetedi.”

** **21:1:** Tibeliya Gabwana meta Galili Gabwana hesana hesau. nowoina ne meta kubita handele labui (200), meta 90 mita o kala 50.

** **21:8:** Nimakala 50: Kalina Giliki unai

¹⁷ Hehaiyonana unai Yesu ye wane, “Simona, Yowane natuna, kowa ku gadosisiyeigau?”

Petelo nuwana ye kamkamna, matawuwuna ma haiyona meta Yesu iya ye henamaiyei ye wane, “Kowa ku gadosisiyeigau?”, na ye wane, “Guiyau! Ginauli maudoidi kabidi ku kata, yo kabina ku katakalili meta ya gadosisiyeigo.”

Yesu ye wane, “Yogu mamoe ku hekaidi. ¹⁸ Ya hededemamohoi kalimwai: Yom huyahewali unai meta ku bom ku hekalekogo na ku bom yom nuwatu udiyedi ku sae ku dobi. Na yom huyatautaubada unai kabo nimam ku lausinidi na ku heledi, na tamowai hesau kabo ye hekalekogo** na ye woyalaeigo kabalau nige ku henuwa ne unai.” ¹⁹ Teina unai Yesu ye hededehemasalaha meta idohagi kabo Petelo ye boita, na yona boita ne unai kabo hedebasae lakilakina ye mosei Yaubada unai. Na kabo Yesu ye wane, “Ku hemuliwatanigau!”

Yowane hedehedena

²⁰ Na Petelo ye kitabui na hekahekata Yesu iya ye gadosisi'usei wa ye kita ye hemuhemuliwatanidi. (Teina hekahekata ta iya kaiteya tauduihasalilau Yesu unai** huyakaikaigogo wa unai, na ye wane, “Guiyau, kabo kaiteya kam ye walohai?”) ²¹ Na Petelo tauhemuliwatanidi wa ye kita ede Yesu ye henamaiyei ye wane, “Guiyau, na iya kabo idohagi?”

²² Yesu ye hededelau unai ye wane, “Ena ya henuwa bena ye miyamiya ye lau ee kana siga ya uyoma, tabu ku nuwanuwatulu unai. Na kowa bena ku hemuliwatanigau.”

²³ Teina unai ede wasalupolupo ye tadada ye lau kadi kahao se lapui meta bena teina hekahekata ta taba nige ye boita. Iyamo Yesu nige ye wane taba nige ye boita, na ye wane, “Ena ya henuwa ye miyamiya ye lau ee kana siga ya uyoma, tabu ku nuwanuwatulu unai.”

²⁴ Teina hekahekata ta, iya ede yau. Ginauli maudoidi ta ya hededehemasalahadi yo ya kulidobiyeidi. Na kabina ta kata meta yogu hedehedede ta mamohoidi.

²⁵ Yesu meta ginauli gwaudi hinage ye ginaulidi. Ena ginauli maudoidi se kulidobiyeidi, ya nuwatui meta tanoubu maudoina ta lakina nige gonowana bena unai buka maudoidi ne kabatoledi ta lobai.

** **21:18:** Kabo ye hekalekogo: Teina hedehedede ta kalina Giliki unai nuwanuwatuna meta labui. Bagubagunana ede, kabo ye hekalekogo, na helabuina ede kabo ye paigo. ** **21:20:** Tauduihasalilau Yesu unai wasana ede Yowane 13:23-25 unai ku hasili.

Apostolo Apostolo yodi paisowa bukana Buka ta hededehemasalahana

Teina buka ta taukulina meta Luka. Iya nige Dius tamowaina, na beyabeyana ekalesiya bodana yodi tauwoyawoya labui se kuli meta iya Antiyoka Suliya magaina unai ye laoma. Kana paisowa meta iya doketa, yo iya hinage apostolo Paulo tausaguina hesau (Kolose 4:14, Apostolo 16:10, Pilemona 24, 2 Timoti 4:11).

Luka yona buka hesau meta Yesu wasana, na temenai ye kulihemasalaha meta Yesu yona mauli unai saha ye tubutubu wa ye kuli (Apostolo 1:1-2). Na Apostolo Yodi Paisowa bukana ta meta yona buka bagubagunana wa ye tubei, iya ede Yesu wasana bukana. Yesu yona tolo'uyo mulina ne unai ye hetubu, na kabo ye hededehemasalaha idohagi ekalesiya bodadi Yaluwa Tabuna se hai na idohagi Yesu yona basileiya wasana se helaki se laei teha maudoina, Yelusalema yo Antiyoka magaidi yo teha Eisiya yo Masedoniya yo Akaiya (o Giliki) udiyedi na ye lau ee apostolo Paulo ye lage Loma magaina lakilakina unai. Yodi paisowa unai hinage hewaiunu yo helauhetala yo sapisapi yo numatutugudu se hekalu, yo huyana se bado se kaiboita yodi kadau udiyedi. Na iyamo Yesu wasana se bahelaei teha maudoina.

Luka yona buka labui ta ye kulidi tamowai lakilakina hesau hesana Teopilo hesabana (Luka 1:1, Apostolo 1:1). Hesa Teopilo kaniyona ede Yaubada taugadosisiyeina.

Luka yona buka labui ta nige ye kuligaibuidi, na ginauli sahasahadi se tubu wa ye wasenamwanamwaedi. Nuwana apostolo yo ginauli wa taukitadi hekadiyo ye henamaiyeidi. Na Paulo yona kadau hekadiyo udiyedi Luka iya maiyana (Apostolo 16:10, 20:6–21:15, 27:1–28:16). Unai kabina ta kata meta yona kulikuli ta meta mamohoidi.

Buka ta hedehedena lakilakidi

- Yesu ye seuyo galewa *1:1-26*
- Yaluwa Tabuna ye taluma ekalesiya udiyedi na dubu ye laki ye lau Yelusalema unai *2:1–6:7*
- Setepano se unuhemwaloi *6:8–8:3*
- Pilipo ye lauguguya dagela tamowaidiyao udiyedi *8:4-40*
- Saulo ye nuwabui *9:1-31*
- Petelo yo tamowai hekadiyo yodi paisowa Yudeya yo hinage dagela tamowaidiyao udiyedi *9:32–12:25*
- Paulo yona lauwasu kadauna bagubagunana teha Eisiya unai *13:1–14:28*
- Yelusalema unai dubu babadadiyao taunuwabui dagela tamowaidiyao udiyedi yodi se hineli, yodi sunuma kabikabina bena doha saha *15:1-35*
- Paulo yona lauwasu kadauna helabuina teha Eisiya unai na ye lau ee teha Masedoniya yo Giliki tanona udiyedi *15:36–18:22*
- Paulo yona lauwasu kadauna hehaiyonana teha Eisiya yo Masedoniya yo Giliki udiyedi na ye uyo ye lau Yelusalema *18:23–21:16*
- Yelusalema unai Paulo se hewaiunu na se helauhetala, na kabo se laei Sisaliya unai se helauhetala *21:17–26:32*
- Paulo yona kadau ye lau Loma magaina lakilakina yo yona miya Loma unai *27:1–28:31*

¹ Taubada Teopilo, yogu buka bagubagunana unai ginauli maudoidi Yesu ye ginaulidi yo ye lauhekataedi wa ya kulidobiyeidiko, meta huyana Yesu yona paisowa ye hetubu
² ye lau ee mayadaina Yaubada iya ye hai na ye sae galewa. Sola nige ye sae galewa,

na Yaluwa Tabuna yona gigibwaliyena hededehehanapu ye moseidi yona kaisunuwa tamowaidiyao udiyedi, siya ede yona apostolo.

Yesu Apostolo kadi hededehehanapu ye moseidi

³ Yona boita mulina ne unai Yesu ye taumasalaha yona apostolo udiyedi na kabikabi udoi'udo udiyedi ye hemamohoiyei meta boita unai ye tolo'uyo na ye mauli. Mayadai 40 solasoladi ne unai ye tautauomasalaha udiyedi na Yaubada yona basileiya hedehededenya ye hedehededei.

⁴ Huya hesau se lagegogoi na yodi kaikaigogo luwana ne unai ye hededelau udiyedi ye wane, “Sola tabu Yelusalema kwa laulaugabaei, na kwa nayanaya ye lau ee tamagu yona hededehehanuma kainauyana ye leyawa kalimiuyena. Doha yau hinage yomiu ya hedehedede, ⁵ meta Yowane waila unai ye hebahebatiso, na mayadai hisa mo kabo Yaubada Yaluwa Tabuna unai ye hebatisoigomiu.”

⁶ Huya hesau kabo Yesu yona apostolo maiyanao yodi lagegogoi gehegehena [*Olibe kudulina unai*] na se henamaiyei, “Guiyau, teina mayadai ta unai gonowana ku hemala Isalaela yoma wasawasa, doha beyabeyana yoma wasawasa bagubagunadi?” ⁷ Na Yesu yodi bui ye moseidi ye wane, “Mayadaina yo mahanana meta komiu nige gonowana kabina kwa kata, na tamagu yona gigibwaliyena ye hineliyako. ⁸ Na Yaluwa Tabuna yona huyadobima unai kabo yona gigibwaliyena ye hebayaogomiu. Na komiu kabo tauwasaduwaiyeigau Yelusalema unai, yo Yudeya yo Samaliya udiyedi, yo tanoubu teha maudoina udiyedi.”

Yesu ye sae galewa (Luka 24:50-53)

⁹ Yesu yona hedehedede wa ye hedededi na kabo Yaubada iya ye hai na matadiyena ye sae galewa na yada unai ye tauwadam. ¹⁰ Iya ye laoko na sola se kaikaikewasae. Nige bayaona na tamowai labui kadi kwama posiposidi se taumasalaha udiyedi ¹¹ na se wane, “Galili tamowaidi, idohagi to temetai kwa totolo na kwa kaikaikewasae yada ne unai? Yaubada Yesu ye hai ye saeko galewa, na kabo ye dobi'uyoma doha yona saesae galewa ne.”

Mataiyasi se kaisunuwai Yudasi lauhedamaina

¹² Na kabo apostolo wa Olibe kudulina se laugabaei se uyo Yelusalema, meta nige kedalo. ^{**} ¹³ Yodi kabamiya numana unai se lage kabo se mwalaesae numa wa heisi helabuina unai. Teina hesadiyao ede: Petelo, Yowane, Yamesi, Andeleya, Pilipo, Tomasi, Batolomaiyo, Mataiyo, Yamesi Alepaiya natuna, Simona Tauhaikabi yo Yuda Yamesi natuna. ¹⁴ Maudoidi ne nuwadi kesega na huya maudoina se miyagogoi na se tapwatapwalolo, na sinesineo hekadi maiyadiyao, yo Maliya Yesu sinana, yo hinage Yesu kana kahao.

¹⁵ Tenem mayadaidi ne udiyedi kabo yodi koigogo hesau unai taukawamamohoi badodi 120 se laomagogoi, kabo Petelo ye tolo na ye hedehedede ¹⁶ ye wane, “Kagu kahao, huyana ye lohakalili na Yaluwa Tabuna nuwatu ye mosei Dawida unai na ye hedede meta Yudasi kabo Yesu tauhaina ye woyaidi. Na iya hedehedede wa ye ginauli. ¹⁷ Iya meta kada kaha hesau yo tauhaisagusagu yoda paisowa ta unai. ¹⁸ Na iyamo yababa wa ye ginauli. Na yababa wa maisana monina ye hai na unai tano hesau

** **1:12:** Nige kedalo: Keda wa lohana Luka ye hededehehanapala meta Sabati laugagayona ye hedede meta gonowana keda wa se laui. Yoda nowonowoiyena meta 1.1 kilomita.

ye hemaisa.** Temenai ye beku ede bogana ye talupulisi na sinaena ye tatapesa.**
¹⁹ Yelusalema unai taumiya maudoidi wasana wa se lapui ede tano wa hesana se tole Akeledama, kaniyona ede 'kwasina tanona'. ²⁰ Same bukana unai Dawida ye kuliyo, 'Taba yona numa ne nige tamowaina,

yo nige gonowana hesau unai ye miya,' (Same 69:25)
 yo hinage,

'Yona paisowa kabo tamowai hesau ye hai.' (Same 109:8)

²¹ Unai taba tamowai hesau ta kaisunuwai. Tamowaina ne bena maiyada huya maudoina, yo Guiyau Yesu maiyada ta sae yo ta dobi, ²² meta huyana Yowane Yesu ye hebatisoi unai ye hetubu, ye lau ee Yaubada Yesu ye hai ye sae galewa. Kabo iya yo kita ta hemala Yesu yona tolo'uyo tauhedehemasalahana."

²³ Kabo tamowai labui se hetolodi ede Yosepa hesana hesau Basabasi (yo hinage se katai Diyasitasi), yo Mataiyasi, ²⁴ na se tapwalolo se wane, "Guiyau, tamowai maudoidi nuwadi kabidi ku katakalili. Unai tamowai labui ta udiyedi kaiteya ku kaisunuwai na ku hemalahayama. ²⁵ To iya ye hemala apostolo hesau Yudasi lauhedamaina, matawuwuna ede Yudasi yona paisowa ye laugabaei, na ye lauko yona kababawa unai." ²⁶ Unai tamowai labui wa se kaisunuwaidi** ede kaisunuwa wa ye lau Mataiyasi ye hai. Unai kabo iya apostolo saudoudoi-kesega (11) wa kadi kaha hesau.

2

Yaluwa Tabuna yona huyalaoma mayadaina

¹ Na kabo Pentekosi mayadaina ne unai meta taukawamamohoi maudoidi se lagegogoi numa kesega unai. ² Makesega na dagugu lakilakina galewa ne unai ye dobima doha yaumailakilaki ye lotalu. Yodi kabamiya numana wa meta dagugu ye hemwayau. ³ Na ginauli hesau se kita kana kao doha kaiwa kalapulupululuna ye dobima na ye tatagwaligwali ede ye talu tamowai kesega kesega unai. ⁴ Na Yaluwa Tabuna maudoidi wa ye hemwayaudi na yona gigibwaliyena se hetubu kalina udoi'udoi udiyedi se hedehede.

⁵ Na [*Pentekosi mayadaina hesabana ede*] tanoubu teha udoi'udoi udiyedi Dios tamowaidi se laoma Yelusalema, meta siya yodi laugagayo taumiawatanidi ma nuwamaudoidi. ⁶ Huyana dagugu wa se lapui meta bodalakilaki se lagegogoi na tausunuma wa yodi hedehede se lapulapuidi meta se nuwapwanopwano, matawuwuna ede taulaoma maudoidi kalinadi udoi'udoi udiyedi se hedehede. ⁷ Siliyata yo nuwapwanopwanoyena se wane, "Teina tauhedehede ta Galili tamowaidiyao. ⁸ Idohagi to maudoida ta lapulobai meta kalinada mamohoidi udiyedi se hedehede? ⁹ Kita meta Patiya, Mediya yo Elama, Mesopotamiya, Yudeya yo Kapadosiya, Pontasi yo Eisiya, ¹⁰ Pilidiya, Pampiliya yo Aikupito tamowaidiyao. Hekadiyo Libiya tehana Sailini dedekanaena se laoma. Hekadi meta taumana Loma unai se laoma, ¹¹ siya meta Dios yo hinage dagela tamowaidiyao se nuwabui na se patulau Dios bodadi udiyedi. Na hekadi meta Kiliti bwanabwanaluwana yo Alabiya tamowaidiyao. Na iyamo yodi hedehede ta lapuidi meta kalinada udiyedi Yaubada yona laulau namwanamwadi se hedehemasalahadi." ¹² Na se noko, yo nuwadi se pwanopwano, na se bom se henahenamai'uyoidi, "Teina meta kaniyona ede saha?"

** **1:18:** Tano hesau ye hemaisa: Mataiyao 27:5-6 ye hedehemasalahana meta Yudasi moni wa ye tulaei Numa Tabuna kalona unai. Iyamo taukaitalam tauwoyaidi nige gonowana moni wa se hai se tole Numa Tabuna monina unai, matawuwuna moni wa yababa maisana. Unai moni wa sola Yudasi yona moni, na unai tano wa se hemaisa.

Unai Petelo ye wane, Yudasi tano ye hemaisa. ** **1:18:** Sinaena ye tatapesa: Yudasi yona boita wasana meta Mataiyao 27:3-10 unai ta hasili. Ye gadosoha ede tano wa ye heyababa na Dios tamowaidi nige gonowadi unai se miyamiya. ** **1:26:** Tamowai ... se kaisunuwaidi: Yodi kaisunuwa wa se ginauli meta tamowai hesadi se kulidi weku udiyedi, na se usaidi higuhiyo unai, na se nukui. Yaubada yona kaimasi tamowaina hesana kabo ye masalaha.

¹³ Na hekadiyo meta taukawamamohoi wa se talatalawasiyeidi se wane, “Tamowai ta nuwana se numayauyaule!”

Petelo yona hedehehede Pentekosi mayadaina wa unai

¹⁴ Na kabo [Petelo yo] apostolo [hekadiyo] saudoudoi-kesega wa se tolo na kalinalakilaki unai Petelo ye hedehehede ye wane, “Yogu hali Dius, yo Yelusalema unai taumiya, kwa lapulapui na ginauli maudoidi ta kaniyodi kabo ya hedehehemasalahadi. ¹⁵ Teina tamowai ta meta nige se numayauyaule matawuwuna ede teina ta meta sola ma malatomtomna. ¹⁶ Saha se masalaha kwa kitadi ta meta peloweta Yoela ye hedehehede, ¹⁷ ‘Yaubada ye wane, “Mayadai gehegehediyo udiyedi kabo Yaluwagu ya inidobiyei tamowai maudoidi udiyedi.

Natumiyao loheloheyao yo sinesineo kabo se hedehepeloweta.

Yomi hewahewaliyo kabo tautau tabudi se kitadi.

Yomi tautaubadao meta kabo kenosuwai tabudiyao se kenosuwaiyedi.

¹⁸ Yo hinage kabo Yaluwagu ya inidobiyei yogu heyayai tauginaulidi tatao yo sinesineo udiyedi na kabo se hedehepeloweta.

¹⁹⁻²⁰ Yada ne unai kabo laulau gigigibwalidi se masalaha.

Mahana kabo ye masigili na nawalai kabo ye bui doha kwasina.

Na kaiyaulina unai kabo hekihekinoi se masalaha, meta kwasina, kaiwa, yo kasu lakilakina.

Mulina ne unai Guiyau yona mayadai wasawasana yo didididigana kabo ye lage.

²¹ Na kaiteyadi se yogasae Guiyau unai, meta kabo ye gilihaidi.” ’ ’ ” (Yoela 2:28-32)

²² [Petelo yona hedehehede wa ye tubei ye wane,] “Isalaela tamowaidiyao, kwa lapulapui! Komiu kabina kwa kata meta Yesu Nasaleta tamowaina laulau gigigibwalidi ye ginaulidi kalimiuyena. Laulau wa udiyedi Yaubada ye hemasalahadi yo ye hemamohoiyei meta iya Yesu ye hetamaliyama. ²³ Teina tamowai ta meta Yaubada ye hineli yo ye kaisunuwanonohaiyako na ye mosegabaei kalimiuyena. Na komiu yomi nuwatuyena dagela tamowaidiyao kwa haidi na maidamiyao kwa hesataulo, na ye boita. ²⁴ Na Yaubada iya ye gilihaidi boita unai na ye hetolo'uyoi, matawuwuna boita nige gonowana Yesu ye kabihekahini. ²⁵ Dawida hinage Yesu hedehehedena ye hedehehede ye wane, ‘Huya maudoina Guiyau ya kitakita.

Iya nimatutuguyena, unai nige gonowana ya matausi.

²⁶ Unai nuwagu ye namwakalili, na ya hedehehede meta ma gwauyalagu, yo taugu ta kabo hinage sunuma yo nuwabayao unai ye miya,

²⁷ matawuwuna nige gonowana yaluwagu ta ku nuwagabaei Hade unai, yo taba nige yom tamowai tabuna ku talamyeyi na bwayabwayaena ye pwasa.

²⁸ Mauli kedana wa ku hekitagauko, na yau dedekamyena, kabo ku hegwauyalakaliliyeigau.’ (Same 16:8-11)

²⁹ Kagu kahao, kabina ta katakalili meta kada kulutubu Dawida ye boita na se tole, na mayadai ta unai bwayabwayana ede yoda magari ta unai. ³⁰ Dawida meta peloweta, na kabina ye kata Yaubada saha ye hedehehesunuma yo ye kaigwala, meta kana isimulita tamowaina hesau kabo ye hemala wasawasa doha iya. ³¹ Ginauli saha kabo se tubu Dawida matana ne unai wa ye kitadi, na Keliso yona tolo'uyo hedehehedena ye hedehe meta Yaubada nige iya ye nuwagabaei Hade unai, yo tauna nige se pwasa bwayabwayaena. ³² Yaubada Yesu ye hetolo'uyoi boita unai, na kai maudoimai meta tauhemamohoiyena ede. ³³ Na iya ye seuyoko Yaubada nimatutunaena ye tuli, na tamana yona hedehehedehesunuma Yaluwa Tabuna ye hai na ye inidobiyeiyama kalimaiyena. Iya ede wau teina kwa kita yo kwa lapui ta. ³⁴ Kaniyona ede Dawida meta nige ye sae galewa, na iyamo ye hedehe ye wane, ‘Guiyau Yaubada ye hedehehede yogu guiyau unai, “Nimatutuguyena ku tuli,

³⁵ ye lau ee kam waiunu ya toledi kaem guninaena, se hemala kaem kabatoleli.”

(Same 110:1)

³⁶ Unai, Isalaela tamowaidiyao, maudoimiu bena kwa nuwatulobainamwanamwai, Yesu kwa hesataulo'usei wa meta Yaubada iya ye hetolo Guiyau yo Keliso.”

³⁷ Hedehedede wa se lapuidi ede se nuwagwali na se henamai Petelo yo apostolo hekadiyo wa udiyedi se wane, “Kama kahao, saha kabo ka ginauli?” ³⁸ Kabo Petelo ye hededelau udiyedi ye wane, “Kesega kesega bena ku nuwabui yo ka hebabatisoigo Yesu Keliso hesanaena, unai kabo Yaubada yom yababa ye nuwatugabaeidi, yo yona kainauya Yaluwana Tabuna kabo ku hai. ³⁹ Teina hedehedede hesunuma ta Yaubada ye haiyawa komiu yo natumiyao yo dagela tamowaidi, yo kaiteyadi siya hinage Guiyau yoda Yaubada kabo ye yoganeidi meta siya yodi.”

⁴⁰ Na kabo Petelo hedehedede hekadiyo udiyedi ye guguyaidi ye wane, “Kwa nuwabui yo Yesu kwa sunumaei, kabo teina tamowai yabayababadiyao ta udiyedi ye gilihaigomiu.” ⁴¹ Mayadaina ne unai meta bodalakilaki Petelo yona hedehedede wa unai se kawamamohoi na siya se hebabatisoidi, na badodi ede 3,000 se lusae ekalesiya bodana unai. ⁴² Se patulau taukawamamohoi wa udiyedi na se hebodakesega. Se lapulapui apostolo yodi lauekata wa udiyedi yo se koikoigogoi, yo Guiyau yona kaikaigogo henuwaisinina unai se kaikaigogoi, yo se tapwatapwalologogoi.

Taukawamamohoi se hebodakesega

⁴³ Apostolo wa laulau gigigigibwalidi yo hekihekinoi kadi kao udoi'udoi se ginaulidi. Unai tamowai maudoidi Yaubada se matausiyei yo se hededetausaei. ⁴⁴ Taukawamamohoi wa se lagelagegogoi na yodi gogo se kaikainauya'uyoidi. ⁴⁵ Yodi gogo yo yodi tano hekadiyo se lokunegabaeidi na monidiyao se haidi na kadi boda wa unai tamowai hekadiyao se saguidi. ⁴⁶ Mayadai kesega kesega se lagelagegogoi Numa Tabuna bakubakuna unai. Yo hinage yodi numa udiyedi Guiyau yona kaikaigogo henuwaisinina se ginauli, yo se kaikaigogoi ma gwaugwauyaladi yo ma nuwamaudoidi, ⁴⁷ yo Yaubada se hedehedebasaei. Na boda maudoidi taukawamamohoi wa se kitahenamwadi. Na mayadai badobado Guiyau tamowai ye gilihaidi na ye tolelaedi taukawamamohoi bodana wa unai.

3

Petelo taubunibuni hesau ye henamwanamwa

¹ Mayadai hesau meimeilahi yona tehaena tapwalolo mahanana** ne unai Petelo yo Yowane se lau Numa Tabuna unai. ² Na Numa Tabuna kawamatana hesana “Keda Namwanamwana” unai meta taubunibuni hesau. Iya sinana ye labasi meta bunibunina, na mayadai maudoina tamowai ta se baheiyama se hetuli kawamata wa unai na ye kaikaibwadamoni taumwalamwalae wa udiyedi. ³ Huyana Petelo yo Yowane bena se mwalae na ye kitadi ede hinage udiyedi ye kaibwadamoni. ⁴ Taudi labui wa se kitalau iya unai, na Petelo ye wane, “Sola ku kitalaoma kai kalimaiyena.” ⁵ Ede tamowai wa ye kitalau udiyedi, na yona nuwatu bena kabo yona kainauya saha hesau se mosei. ⁶ Na Petelo ye hededelau unai ye wane, “Yau nige moni hesau kaliguyena, na saha kaliguyena ta meta kabo ya leyawa. Yesu Keliso Nasaleta tamowaina hesanaena ya hededelaowa, ku tolo na ku laulau.” ⁷ Na Petelo ye kabilau tamowai wa nimatutuna unai na ye kabihetolo. Mahanana ne unai kaena tubeidiyao wa se bayao, ⁸ ede ye tolomwamwayau na ye hetubu ye laulau. Na maiyadi se lusae Numa Tabuna wa unai na ye laulau yo ye kamkamposi na Yaubada ye hedehedebasae. ⁹ Na boda wa iya se kita ye laulau yo Yaubada ye hedehedebasaei ¹⁰ na se kitalobai meta iya taukaikaibwada Numa Tabuna kawamatana unai ye tutuli wa, meta se siliyata yo se nokokalili.

** 3:1: Meimeilahi yona tehaena tapwalolo mahanana meta 3 kiloki.

Petelo ye hedehegedelau boda wa udiyedi

¹¹ Na kabo taubunibuni se henamwanamwa'usei wa Petelo yo Yowane maidanao se hainimakabi na Numa Tabuna wa unai se pesa se lau teha hesauna hesana “Solomona yona Logulogu” unai. Na boda maudoidi saha se tubu wa se kita yo wasana se lapui ede se siliyata na se heloigogoi se lau udiyedi. ¹² Petelo ye kitadi ede ye hedehegedelau udiyedi ye wane, “Isalaela tamowaidiyao, idohagi to kwa siliyatakalili? Yo idohagi to kwa kaikewaigai kana kao doha ka bom yoma gigibwali yo yoma laulau namwanamwana debanaena tamowai ta ye laulau. ¹³ Abelahama, Isako, Yakobo yo kada kulutubu maudoidi yodi Yaubada yona taupaisowa Yesu ye lausini [*na kabatuli didididigana unai ye tuli.*] Huyana Yesu sola tanoubu ta unai meta komiu iya kwa mosegabaei na se unuhemwaloi. Pilato ye henuwa bena ye yailigabaei, na komiu kwa hedehe meta Yesu nige kwa henuwa. ¹⁴ Tamowai tabuna yo dudulaina kwa subu na kwa kaibwada bena taba taukaikaiunu wa ye yailigabaei. ¹⁵ Mauli wuwuna tamowaina kwa unui, na boita unai Yaubada iya ye hetolo'uyoi, na tauhemamohoiyena ede kai.

¹⁶ Tamowai [*mai yada ta totolo*] ta kwa kitalobai meta iya taubunibuni wa. Na Yesu iya ye hebayao matawuwuna ede Yesu ka sunumaei. Mamohoi, yoma sunuma Yesu unai debanaena tamowai ta ye namwanamwa matamiuyena.

¹⁷ Na kehaguwao, kabina ya kata meta komiu yo tauwoyaigomiu Yesu nige kabina kwa kata meta iya Keliso ede, unai iya kwa unuhemwaloi. ¹⁸ Na teina laulau ta udiyedi meta Yaubada kalinana peloweta se hededehedehaidiko wa se laoma se mamohoi, doha ye wane Keliso meta kabo ye kamkamna. ¹⁹ Unai taba kwa nuwabui na kwa lau Yaubada unai, na yomi yababa kabo ye deuligabaedi yo yaluwamiu ye hehauhau ²⁰ na yona kaisunuwa tamowaina Keliso ye hetamali ye uyowa kalimiuyena, tamowaina ede Yesu. ²¹ Na Yesu sola kabo ye miya galewa ne unai kana siga Yaubada ye hetubu bena ginauli maudoidi ye hehauhau'uyoidi, doha beyabeyana ye hedehehedehesunuma yona peloweta tabudiyao yodi hedehegedede udiyedi. ²² Doha peloweta Mose ye hedehe ye wane, ‘Guiyau Yaubada kabo luwamiuyena peloweta hesau ye kaisunuwai doha yau. Kwa lapulapulau yona hedehegedede maudoidi udiyedi! ²³ Ena kowa kaiteya nige ku lapulapulau peloweta ne unai meta kabo Yaubada yona tamowai luwadiyena ye boligabaeigo na ye tolehesuwalakaliliyeigo.’

(*Dutelonomi 18:15, 18, 19*) ²⁴ Yo hinage Samuwela unai ye hetubu ye laoma meta peloweta maudoidi ginauli sahasahadi se tubutubu mayadai ta udiyedi meta se hedehebagunaidiko. ²⁵ Yo hinage Yaubada yona talam ye ginauli na ye hedehehesunuma Abelahama unai ye wane, ‘Kam isimulita kabo tanoubu ta tamowaidiyao yodi kabanamwa.’

(*Genese 22:18, 26:4*) Peloweta yodi hedehegedede wa yo Yaubada yo Abelahama yodi talam wa kaniyodi tauhaidi ede komiu kadi isimulita. ²⁶ Huyana Yaubada yona heyayai tauhaina ye hetolo meta ye hetamalibagunaiyawa komiu Dius tamowaidiyao kalimiuyena, na unai ye henuwa bena ye hedehehenamwagomiu yo ye saguigomiu bena yomi miyamiya kwa buidi na yomi laulau yabayababadi kwa hekaiyawasidi.”

4

Petelo yo Yowane Sunedeli unai se helauhetaladi

¹ Petelo yo Yowane sola ma hedehegedede boda wa udiyedi na taukaitalasam hekadi yo Numa Tabuna yona polisi kadi tanuwaga yo Sadusiya tamowaidiyao hekadi se lage.

² Se koipilikalili matawuwuna apostolo labui wa se lauguguya na se lauhekata tamowai wa udiyedi meta Yesu boita unai ye tolo'uyoko, yo tauboiboita kabo hinage boita unai se tolo'uyo. ³ Se haidi, na mahana ye laoko ede se toledi numatutuguduyena ye lau ee mala ye tom. ⁴ Na iyamo Petelo yona lauguguya wa taulapuina tamowaidiyao gwaudi meta se kawamamohoi. Na loheloheyao taukawamamohoi maudoidi badodi ye sae ede nuwana 5,000 ye lobai.

⁵ Mala wa ye tom meta Dius tauwoyaidi yo tamowai lakilakidiyao yo laugagayo taulauhekataena tamowaidi se lagegogoi Yelusalema unai.** ⁶ Luwadi ne unai meta taukaitalasam saesaena Anase, yo Kaiyapasi, Yowane, Alekisenda yo taukaitalasam saesaena kehanao tatao hekadiyo. ⁷ Se hedede meta Petelo yo Yowane se woyaidima na se hetolodi duwaduwali wa unai, na se henahenamaiyeidi se wane, “Kaiteya yona gigibwali yo hesana unai laulau ta kwa ginauli?” ⁸ Yaluwa Tabuna Petelo ye hesibasiba ede ye hededebui ye wane, “Tauwoyawoya yo babadao! ⁹ Kwa helauhetalagai laulau namwanamwana ka ginauli taubunibuni wa debanaena. Na kwa henuwa bena kabina kwa kata idohagi na ye namwanamwa. ¹⁰ Unai bena ya hemasalaha kalimiuyena yo Isalaela maudoidi udiyedi: Tamowai ta matamiuyena ye totolo ta, iya Yesu Keliso Nasaleta tamowaina yona gigibwaliyena ye namwanamwa. Yesu meta kwa hesataulo na ye boita, na Yaubada iya ye hetolo'uyoi boita unai. ¹¹ Na kulikuli tabuna unai Yesu hedehededenata ta hasili ye wane,

‘Iya meta weku taukabinuma se subu'usei wa,

na iyamo ye hemala kabakabinuma wekuna namwanamwana yo saesaekalilina.’

(Same 118:22)

¹² Nige tamowai hesau gonowana ye hemauidi, matawuwuna kaiyaulina ta unai Yaubada nige hesa hesau ye leyama unai kabo gonowana ye gilihaida.”

¹³ Tauwoyawoya wa Petelo yo Yowane se kitadi se hedehede ma nuwabayaodi, yo hinage kabina se kata meta siya tamowaigaibu nige se sonoga, meta se siliyata. Na se nuwatulobai meta taudi labui wa Yesu tauhemuhemuliwatanina. ¹⁴ Na nige gonowana saha hesau se hedede, matawuwuna ede tamowai se henamwanamwa'usei wa Petelo yo Yowane maiyadi se totolo. ¹⁵ Na se hededelau udiyedi Sunedeli numana wa se pesagabaei se lau dagela, na kabo se bom se koitalaliu ¹⁶ se wane, “Kabo saha ta ginauli tatao ta udiyedi? Yelusalema maudoina unai meta laulaugigibwali saesaena se ginauli wa kabina se katako, na nige gonowana ta uhalaei. ¹⁷ Na sunuma ta hedehededenata bena ta hekaiyawasi tabu ye laki ye lau boda udiyedi. Unai kabo ta hededebayao yodi labui ta udiyedi tabu Yesu hesanaena se hedehede'uyo tamowai hesau unai.”

¹⁸ Na kabo se yoganei'uyoidima na se hededelau udiyedi bena tabu Yesu hesanaena se hedehede yo se laulauhekata. ¹⁹ Na Petelo yo Yowane se hedede se wane, “Komiu kwa bom kwa hineli saha ye dudulai Yaubada matanaena, yomi hedehede ta ka lauwatani o Yaubada? *[Taba Yaubada mo ka kawakabiyei!]* ²⁰ Unai nige gonowana ka mwanomwanou, na ginauli namwanamwadi ka kitadi yo ka lapuidi wa kabo ka hedehemasalahadi.” ²¹ Na kabo tatao lakilakidiyao wa apostolo wa se hedehemahematausidi na se hetamalidi se lau. Na nige keda hesau se lobai taba unai kabo se hekamkamnadi, matawuwuna laulau saha ye tubu wa unai ede tamowai maudoidi Yaubada se hedehedebasaei. ²² Yodi hedehedebasae kaniyona ede taubunibuni se henamwanamwa'usei wa yona bolimai meta 40 ye laugabaeiyako.

Taukawamamohoi yodi tapwalolo

²³ Huyana Petelo yo Yowane se hededegabaedi ede se uyo kadi boda wa udiyedi, na taukaitalasam tauwoyaidi yo tamowai lakilakidiyao yodi hedehede wa se hedehemasalahadi udiyedi. ²⁴ Na wasa wa se lapui ede taukawamamohoi maudoidi ma nuwakesegadi se tapwalologogoi se wane, “Guiyau saesaekalilina, kowa galewa, tanoubu, gabwa, yo ginauli maudoidi tauginaulidi. ²⁵ Yaluwa Tabuna yona hekata unai yom heyayai tauhaina kama kulutubu Dawida ye hedede ye wane,

‘Idohagi to dagela tamowaidiyao se koipilikalili,

yo boda lakilakidiyao nuwanuwatu yabayababadi se koitalaliugaibuidi?

²⁶ Tanoubu wasawasadiyao se nonoha,

** 4:5: Se lagegogoi Yelusalema unai: Taulagegogoi wa siya ede Sunedeli bodana.

yo tauwoyawoya se lagegogoi
bena Guiyau se lului

yo se haikabi yona kaisunuwa tamowaina unai.'

(Same 2:1-2)

²⁷ Ye mamohoikalili, Heloda yo Pontiusi Pilato yo Isalaela yo dagela tamowaidiyao maudoidi se tupagogoi magai ta unai bena yom heyayai tauhaina tabuna Yesu unai se haikabi. Iya ede yom kaisunuwa tamowaina. ²⁸ Saha se ginauli wa meta yom gigibwaliyena beyabeyana ku hinelinonohaiyako meta kabo ye tubu. ²⁹ Unai ede ka kaibwadaigo, Guiyau, bena yodi hedehedehemahematausi wa ku nuwatuidi na yom taupaisowa ta ku hebayaodi bena wasam se duwai ma nuwabayaodi. ³⁰ Nimam ku heleledobiyeiyama na ku hegigibwalidi to taukasiyebwa se henamwanamwadi yo laulau gigigibwalidi se ginaulidi yom heyayai tauhaina tabuna Yesu hesanaena."

³¹ Tapwalolo wa ye gehe meta yodi kabakoigogo numana wa ye nukunuku na Yaluwa Tabuna ye hemwayaudi, na kabo se lau Yaubada wasana se duwai ma nuwabayaodi.

Taukawamamohoi se haihaisagusagu'uyoidi

³² Taukawamamohoi maudoidi wa nuwadi kesega. Yodi gogo wa udiyedi meta se haihaisagusagu'uyoidi, na nige hesau ye hedede bena ye bom mo yona gogo. ³³ Na apostolo wa Guiyau Yesu yona tolo'uyo boita unai wasana se hedehedehemasalaha ma gigibwalidi. Na Yaubada yona kabinamwa meta taukawamamohoi maudoidi wa udiyedi.

³⁴ Taukawamamohoi wa udiyedi nige hesau ye deha, matawuwuna ede kaiteyadi yodi tano yo numa, meta se lokuneidi ³⁵ na monidiyao wa se baheidima na se moseidi apostolo wa udiyedi, kabo se soiyeidi kaiteyadi se deha wa udiyedi.

³⁶ Taukainauya hesau meta Yosepa. Iya Lewi kana isimulita hesau, Saipulusi bwanabwanaluwana unai ye laoma. Na apostolo wa hesana se tole ede Banaba, kaniyona ede tauhedehedehebaya. ³⁷ Iya yona tano hesau ye lokunegabaei na monina wa ye baheiyama na ye mosegabaei apostolo wa udiyedi.

5

Ananiya yo Sapila se kailupolupo

¹ [Ekalesiya bodadi wa luwadiyena] tamowai hesau hesana Ananiya, yo mwanena Sapila. Siya hinage yodi tano tehana se lokunegabaei. ² Mwanena maiyana yodi nuwatu kesega ede monina tehana se kabinuwahi na kabitolena wa se baheiyama se mosei apostolo wa udiyedi. Ede Ananiya ye lau Petelo unai na ye hedede bena moni maudoina ye baheiyamako. ³ Na Petelo ye wane, "Ananiya, idohagi to Satani nuwam ne ye hemwayau, na Yaluwa Tabuna ku lupoi bena moni maudoina ede ku baheiyama ta, na iyamo moni wa tehana ede ku kabinuwahiyako. ⁴ Tano ne meta kowa yom, na yom nuwatuyena ku lokunei. Ku lokunei na monina ne hinage kowa yom, ku kabihekahini o ku kainauyaei. Idohagi to nuwamyena ku hineli na ku kailupolupo? Ku hedede bena moni maudoina ku baheiyama ta. Nige tamowai udiyedi ku kailupolupo, na Yaubada unai." ⁵⁻⁶ Hedehedede wa ye lapui ede ye gulidobi meta ye boita. Na kabo hewahewaliyo hekadi se laoma ede sinalena wa se suma na se lau se tole bwayabwaya unai. Wasa wa taulapuina maudoidi meta se siliyata yo se matausi.

⁷ Awa haiyona mulidiyena kabo Sapila ye mwalaesaema, na mwanena wa unai saha ye tubu meta nige kabina ye kata. ⁸ Na Petelo ye henamaiyei ye wane, "Yogu ku hedehedede, teina te kowa yo mwanem yomi tano wa maisana kwa hai wa lakina ede?" Ye talam ye wane, "Aa, teina lakina ede." ⁹ Petelo ye wane, "Ye saha to kowa yo mwanem nuwamiu kesega na Guiyau Yaluwana kwa lupoi? Mahana te unai meta mwanem wa tautolena siya ede kawakeda ne unai, kowa hinage kabo se bahelaeigo."

¹⁰ Mahanana ne unai ye gulidobi Petelo matana wa unai na ye boita. Hewahewaliyo wa se mwalaesaema na se kita meta ye boitako, ede se bahehepesalae na mwanena dedekanaena se tole. ¹¹ Na saha ye tubu wa unai meta taukawamamohoi bodadi yo wasana taulapuina maudoidi hinage se matausikalili.

Apostolo wa taukasikasiyebwa se henamwanamwadi

¹² Apostolo wa laulau gigigigibwalidi se ginaulidi se badokalili tamowai luwadiyena. Taukawamamohoi maudoidi se lagelagegogoi Numa Tabuna tehana hesau hesana Solomona Yona Logulogu unai. ¹³ Magai tamowaidiyao maudoidi meta se kita-henamwakaliliyeidi, iyamo nige hesau ye nuwabayao bena taba ye lusae boda wa luwadiyena, matawuwuna Dius yodi tauwoyawoya wa se matausiyeidi. ¹⁴ Na iyamo bodalakilaki, sinesineo yo tatao, se kawamamohoi Guiyau unai, ede se patulau taukawamamohoi bodadi wa udiyedi.

¹⁵ Apostolo wa yodi paisowa debanaena ede Yelusalema tamowaidiyao yodi taukasikasiyebwa se baheidima keda wa udiyedi se hekenodi diyadiyali yo dam udiyedi. Se henuwa bena Petelo ye henamwanamwadi, o taba Petelo ye laulau na loguloguna tautauna ye kabikitadi na se namwanamwa. ¹⁶ Yo hinage magai hekadiyo Yelusalema dedekanaena udiyedi boda se laoma, yodi taukasikasiyebwa se baheidima yo kaiteyadi se kamkamna yaluwa bikibikidi udiyedi, meta maudoidi se namwanamwa.

Apostolo wa se hewaiunudi yo se hekamkamnadi

¹⁷ Na taukaitalasam saesaena ma kana bodao Sadusiya tamowaidiyao, siya se kaikalomagigilikalili. ¹⁸ Ede apostolo wa se haidi se toledi numatutuguduyena. ¹⁹ Na boniyaina ne unai Guiyau yona anelu hesau numatutugudu wa kamwasadiyao ye sokedi na apostolo wa ye woahapesadi na ye wane, ²⁰ “Kwa lau kwa mwalaesaema Numa Tabuna bakubakuna ne unai kwa tolo na mauli hauhauna wasana maudoina kwa duwai tamowai udiyedi.”

²¹ Mala ye tom kabo apostolo wa se mwalaesaema Numa Tabuna bakubakuna wa unai se tolo na se hetubu se lauguguya. Na taukaitalasam saesaena ma kana bodao se lage Sunedeli numana unai. Ede Sunedeli tamowaidiyao yo Isalaela yodi babadao maudoidi se yogagogoidi. Na kabo wasa se hetamalilaei bena apostolo wa se woyaidima. ²² Na Numa Tabuna yona polisi se lau numatutugudu wa unai meta apostolo wa se dalahaiko, ede se uyo kadi tanuwaga yo taukaitalasam tauwoyaidi yodi se hedehedede ²³ se wane, “Numatutugudu wa guduguduna, yo taukitakitahetetena se totolo, na keda wa ka soke meta nige tamowai hesau ka kita.” ²⁴ Numa Tabuna yona polisi kadi tanuwaga yo taukaitalasam tauwoyaidi wasa wa se lapui meta se nuwapwanopwano yo se nuwanuwatu saha kabo ye tubu.

²⁵ Na kabo tamowai hesau ye laoma ede ye wane, “Numatutugudu unai tamowai kwa guduidi wa, meta siya ede Numa Tabuna ne unai se laulauguguya boda udiyedi!” ²⁶ Ede polisi kadi tanuwaga wa maiyadi se lau apostolo wa se woyaidima, na nige se kabi-henayaidi, matawuwuna ede se matausi tamowai wa udiyedi madai se hekalawekudi.

²⁷ Apostolo wa se woyaidima Sunedeli unai se hetolodi na taukaitalasam saesaena wa ye henamaiyeidi ye wane, ²⁸ “Ka laugagayoigomiu bena tabu Yesu hesana unai kwa laulauhekata, na iyamo yomi lauhekata wa Yelusalema ye hemwayauyako. Yo hinage tamowai ne yona boita giluna bena kwa tole kalimaiyena.”

²⁹ Petelo yo apostolo wa se wane, “Nige gonowana tamowai ka kawakabiyeidi, na Yaubada mo ka kawakabiyei. ³⁰ Komiu Yesu kwa hekabasi sataulo unai na ye boita, na boitaena tamadao yodi Yaubada iya ye hetolo'uyoi. ³¹ Yaubada iya ye hai na ye tole nimatutuna unai. Ye hemala wasawasa yo tauhemahemaui, bena Isalaela ye saguidi na se nuwabui na yodi yababa kabo Yaubada ye nuwatugabaedi. ³² Ginauli ta

tauhemamohoyedi ede kai yo hinage Yaluwa Tabuna. Iya ede Yaubada yona kainauya taukawakabiye na udiyedi.”

³³ Hedehedede wa se lapui ede se koipikalili na se henuwa bena se koihemwaloidi. ³⁴ Na Sunedeli unai Paliseya tamowaina hesau hesana Gamaliyela, iya meta laugagayo taulauhekataena saesaena hesau tamowai maudoidi se hekasisikaliliyei. Iya ye tolo na ye hedede bena mahana kubwakubwa mo tatao ne se hepesadi dagela ne unai. ³⁵ Na kabo ye hetubu ye hedehedede, ye wane, “Isalaela tataodi, bena kwa nuwanuwatu-namwanamwa saha bena kwa ginauli tatao ne udiyedi. ³⁶ Bolimai hisa se lauko Tudasi ye taumasalaha na ye hedede bena iya tamowai lakilakina hesau, ede tamowai badodi 400 se hemuliwatanina. Na Loma yodi tau'iyala iya se unui na tauhemuliwatanina wa se hailauyedi. Ede yona woyawoya wa nige kaniyona. ³⁷ Iya mulinaena, hasiliyawasi huyana ne unai, Yudas Galili tamowaina ye tolosaema na boda ye woyaidi bena Loma tamowaidiyao se iyalaedi. Na iya hinage se unui, na tauhemuliwatanina wa hinage se hailauyedi. ³⁸ Unai ya hekatagomiu: Tabu saha hesau kwa ginauli taulauhetala ne udiyedi. Kwa kabigabaeidi na se lau. Taba yodi nuwatu yo yodi paisowa ne tamowaigaibu hesau yona nuwatu, kabo ye kaiyawasi. ³⁹ Na ena Yaubada unai ye laoma, meta nige gonowana kwa hekaiyawasidi, na ena kwa hekaiyawasidi meta komiu Yaubada unai tauhaikabi.”

[40] **Yona hedehedede wa se lauwatani ⁴⁰ na apostolo wa se yoganeidi se mwala. Na se hededelau yodi taupaisowa udiyedi na wipi unai se pidilidi. Na kabo hedehedede bayabayaona se moseidi tabu huya hesau Yesu hesanaena se lauguguya'uyo. Na kabo se kabigabaeidi na se lau.

⁴¹ Apostolo wa Sunedeli unai se dalahai ma gwaugwaualadi, matawuwuna Yaubada ye kitahenamwadi na Yesu hesanaena se kamkamna. ⁴² Mayadai badobado Numa Tabuna bakubakuna unai yo hinage taukawamamohoi yodi numa udiyedi yodi lauhekata wa nige ye kaiyawasi yo wasa namwanamwana se duwaduwai meta Yesu iya Yaubada yona kaisunuwa tamowaina ede.

6

Apostolo tausaguidi haligigi-labui se kaisunuwaidi

¹ Mayadai ne udiyedi tauhemuliwatanina kadi boda wa ye laki ye lau. Luwadiyena, hekadiyo meta Dius tamowaidiyao taukalina Giliki, yo hekadiyo siya taukalina Hebelu. Mayadai kesega kesega meta kai se giyagiyahi, na taukalina Giliki yodi wabu wabu wa se soisohemulidi. Unai taukalina Giliki wa se hetalapili taukalina Hebelu wa udiyedi.

² Ede apostolo saudoudoi-labui wa tauhemuliwatanina maudoidi se yogagogoidi na se wane, “Nige ye namwa bena Yaubada kalinana paisowana ka hekaiyawasi na ka kitalau kai giyahina unai. ³ Unai, kagu kahao, bodamiu ta udiyedi tamowai haligigi-labui kwa kaisunuwaidi, siya meta bena tamowai maudoina yodi hekasisi tamowaidiyao, yo tamowai sibasibadiyao, yo hinage Yaluwa Tabuna ye hemwayaudi. Paisowa ne kabo ka moselaei udiyedi, ⁴ na kai apostolo kabo ka kitalau tapwalolo yo wasaduwai mo unai.”

⁵ Boda maudoina apostolo yodi nuwatu wa se kawanamwanamwaei. Unai ede Setepano se kaisunuwaei, iya tausunumabayao yo Yaluwa Tabuna ye hemwayau. Na kabo Pilipo, Polokolasi, Nikenowa, Timona, Palamenasi, yo Nikolasi. Na Nikolasi iya Antiyoka tamowaina nabada wa unai ye nuwabui ye hemala Dius. ⁶ Kabo tamowai wa se laedi apostolo wa udiyedi, na nimadi se tolesaedi kewadiyena na yodi se tapwalolo.

⁷ Kabo Yaubada wasana wa ye laki ye lau, na Yelusalema unai Yesu tauhemuliwatanina boda wa ye laki ye lau, yo hinage taukaitalasam bodana lakilakina Yesu se sunumaei yo se kawakabiyei.

** 5:39: Buka hekadiyo udiyedi, lausoisoina 40 ye hetubu inai.

Dius tamowaidiyao hekadi Setepano maiyadi se haikawayagala

⁸ Na Yaubada yona kainauya ye mosei Setepano unai meta ye hegigibwali, ede laulau gigigigibwalidi saesaedi ye ginaulidi boda luwadiyena. ⁹ Na tamowai hekadi maidadi Setepano se haikawayagala, siya meta sunago hesau tamowaidiyao, na sunago wa hesana ede “Yailihai Tamowaidiyao”. Tauhaikawayagala wa yodi kabalaoma ede Sailini yo Alesandiliya yo teha Silisiya yo teha Eisiya. ¹⁰ Yodi haikawayagala wa unai nige gonowana Setepano se saedikwai matawuwuna ede Yaluwa Tabuna ye hesibasiba.

¹¹ Kabo nuwatuwadawadamyena tamowai hekadiyo se nuwakoidi bena kabo se hedede se wane, “Setepano yona hedehedede ka lapui meta Mose yo Yaubada ye hededeheyababadi.” ¹² Na kabo boda yo yodi tamowai lakilakidiyao, yo hinage laugagayo taulauhekataena nuwadiyao se hesaedi, na Setepano se kabihekahini na se woyalaei Sunedeli unai. ¹³ Na tamowai hekadiyo se woyaidima na hedehededelupolupo maudoidi se hedededi, se wane, “Teina tamowai ta meta huya maudoina Numa Tabuna yo hinage Mose yona laugagayo ye hedehededeheyababadi. ¹⁴ Matawuwuna ede yona hedehedede ka lapui meta ye wane, Yesu Nasaleta tamowaina kabo Numa Tabuna ta ye hetatagwaligwali na kabikabi beyabeyadi Mose ye haidima wa kabo ye buidi.” ¹⁵ Na Sunedeli yona koigogo unai taututuli wa se kaikewadudulai Setepano se kita, na kana kao se kita meta doha anelu.

7

Setepano yona hedehedede Sunedeli unai

¹ Na taukaitalam saesaena Setepano ye henamaiyei, “Hedehedem ta meta mamohoi?” ² Na Setepano ye wane, “Kagu kahao yo tamaguwao, kwa lapulapui. Yoda Yaubada didididigana ye taumasalaha kada kulutubu Abelahama unai huyana sola ye miyamiya Mesopotamiya unai, nige sola ye dalahai ye lau Halana. ³ Yaubada ye hededelau unai ye wane, ‘Kam bodao yo yom magai ku laugabaedi na ku lau magai hesau kabo ya hekitago.’ ⁴ Kabo teha Mesopotamiya yo yona magai** wa ye laugabaei na ye lau Halana unai ye miya, kana siga Abelahama tamana ye boita. Na kabo Yaubada ye hetamali ye laoma teina yoda magai ta unai ye miya. ⁵ Na Yaubada nige tano hesau ye mosei Abelahama, nige bena teuna. Na ye hededehesunumamoei meta kabo tano ne ye mosei iya yo kana isimulitao udiyedi. Na huyana ne unai sola nige Abelahama natuna. ⁶ Yo hinage Yaubada ye hededenonohai meta Abelahama kana isimulita kabo se lau tamowai hekadiyo yodi magai unai se miya na menai kabo se hemala laolaoma. Temenai kabo se hemala magai ne tamowaidiyao yodi heyayai tauhaidi na se kabihenayaidi bolimai 400.

⁷ Na kabo Yaubada yona hedehedede ye tubei ye wane, ‘Magai ne tamowaidiyao kabo ya hekamkamnadi, na mulina ne unai kabo kam isimulita magai ne se laugabaei na se laoma teina teha ta unai kabo se taba'ohu kaliguwai.’ ⁸ Na kabo pelitome ye mosei Abelahama, meta yodi talam wa** se hemamohoiyei. Na kabo Abelahama natuna Isako ye labasi, na mayadai hehaligigi-haiyonana (8) unai ye hepelitome. Na kabo Isako iya natuna Yakobo ye labasi, na iya natunao ede tamadao saudoudoi-labui, na maudoidi se hepelitome.

⁹ Yakobo natunao wa kadi kaha Yosepa se kaikalomagigiliyei na se lokunegabaei ye lau Aikupito na ye hemala yodi heyayai tauhaina. Na Yaubada meta iya maiyana ¹⁰ na ye gilihai yona pilipili maudoidi udiyedi, yo hinage ye hesonoga. Ede Aikupito

** **7:4:** Yona magai: Abelahama yona magai mamohoina meta Ulu, iya ede Kaladiya tamowaidi yodi tehaena. Teha ne hesana hesau ede Mesopotamiya (Genese 11:28,31 yo 15:7). ** **7:8:** Yodi talam wa wasana meta Genese 17 unai ta hasili.

yodi wasawasa Palao kabo Yosepa ye tolesae ye hemala Aikupito maudoina yo hinage wasawasa wa yona numa** kadi tanuwaga.

¹¹ Na kabo hasahasali ye tubu Aikupito yo Kanana udiyedi meta kamkamna laki-lakina, na tamadao meta nige gonowana kai se lobai. ¹² Na Yakobo wasa ye lapui meta Aikupito unai sola kai maudoina, ede kada kulutubu iya natunao ye hetamalidi se lau menai bena kai se hemaisa. ¹³ Yodi huyakaitaumana helabuina unai Yosepa ye hededehemasalaha'uyoi kalidiyena meta iya kadi kaha. Menai kabo Palao Yosepa kana bodao kabidi ye kata. ¹⁴ Na kabo Yosepa kalina ye hetamali tamana Yakobo yo kana bodao maudoidi se laoma Aikupito, badodi meta 75. ¹⁵ Ede Yakobo ma kana bodao se lau Aikupito unai se miya. Temenai Yakobo ye boita, na kabo tamadao hinage se boita. ¹⁶ Tauboita wa sinalediyao se baheidi se uyo Sekema magaina unai. Temenai, Abelahama beyabeyana Hamala natunao udiyedi duha hesau ye hemaisa, yona bwayabwaya. Unai kabo se toledi.”**

¹⁷ [Na kabo Setepano ye hedehedede ye wane,] “Mayadaina ye hanahanau Yaubada yona hededehe sunuma Abelahama unai kabo ye hemamohoiyei meta kabo tano ye mosei kana isimulita udiyedi, ede kada boda Aikupito unai wa meta ye laki ye lau. ¹⁸ Na kabo wasawasa hesau ye tolo Aikupito ye kitahetete. Na iya meta nige Yosepa kabina ye kata. ¹⁹ Teina wasawasa ta kada bodao wa ye lupoidi yo ye hekamkamnadi, na ye lauhelilidi natudiyao labahauhaudi numa dageladi udiyedi se toledi na bena kabo unai se boita.

²⁰ Huyana ne unai Mose se labasi,** na iya meta wawaya namwanamwana Yaubada matanaena. Nawalai haiyona udiyedi tamana yona numaena se kitahetete. ²¹ Huyana Mose se tolehesuwala dagelaena Palao natuna sine ye lobai na ye hai ye kabihelaki ye hemala natuna. ²² Mose meta Aikupito yodi sonoga yo yodi sibasiba maudoidi se hekata na ye haidi, na ye hemala taukulukulu namwanamwana.

²³ Huyana Mose yona bolimai 40, meta nuwana ye hineli bena yona hali Isalaela tamowaidiyao ye kitadi. ²⁴ Mayadaina ne unai Mose matanaena Aikupito tamowaina hesau ye tolo na Isalaela tamowaina ye kabihenayai. Ede ye gilihai na Aikupito tamowaina wa ye koihemwaloi. ²⁵ Mose yona nuwatu bena kana bodao wa kabo se kitalobai meta Yaubada iya ye hepaisowa na kabo ye gilihaidi. Iyamo nige se kitalobai.

²⁶ Mayadai hesauna kabo Isalaela tamowaidi labui ye kitadi se haihaikabi, ede ye hededelau udiyedi bena nuwadi ye hededehetaludi ye wane, ‘Tatao, teina ta ma kam kaha. Tabu kwa hewahewaiunu'uyoigomiu!’ ²⁷ Na hesauna, kana kaha ye kabihenayai'usei wa, Mose ye kabitepanei na ye hededelau unai ye wane, ‘Kaiteya ye hetologo kama tanuwaga yo tautolehedudulaigai?’ (Esodo 2:14) ²⁹ Mose hedehedede wa ye lapui ede ye wasabu na Aikupito ye laugabaei ye lau Midiyana unai ye miya, meta ye hemala laolaoma. Menai ye tawasola na natunao loheloheyao labui ye labasidi.

³⁰ Bolimai 40 se lau, na Mose meta balabala hesau unai Sinai kudulina dedekanaena. Na anelu ye taumasalaha kaiwa hesau unai, na kana kao doha kaiwa ye kalapululu.

³¹ Mose kaiwa wa ye kita ede ye siliyata. Ye sigilau dedekana wa unai bena ye kitanamwanamwaei, na Yaubada kalinana ye lapui ye wane, ³² ‘Yau meta kam kulutubu yodi Yaubada, Abelahama, Isako, yo Yakobo yodi Yaubada.’ (Esodo 3:6) Mose ye matausi

** **7:10:** Yona numa wa Palao yo mwanenao yo natunao yo yona taupaisowa yodi kabamiya magaina. ** **7:16:** Setepano hedehedede labui ne ye tolekesegaidi. Sekema unai Yakobo tano hesau ye hemaisa Hamala natunao udiyedi (Genese 33:19). Na Abelahama Hebelona unai duha hesau ye hemaisa Epelona Hito tamowaina unai, bena yona bwayabwaya (Genese 23:15-18). Setepano yona hedehedede taulapuina wa, siya wasa maudoina wa kabina se katako, yo hinage kabina se kata meta Yakobo se tole Abelahama yodi kabatolena duhana unai (Genese 50:13), na Yosepa se tole Sekema unai (Yosuwa 24:30). ** **7:20:** Mose se labasi wasana ede Esodo 1–2 udiyedi ku hasili.

yo ye tabutabubu, na nige ye henuwa ye kaikewalau. ³³ Na Guiyau ye hededelau unai ye wane, 'Kam sendolo ne ku haigabaeidi, matawuwuna ede teina meta tano tabuna. ³⁴ Kagu bodao ya kitadi meta se kamkamnakalili Aikupito unai. Yodi dou ya lapuidi na ya dobima bena ya gilihaidi. Unai, Mose, kabo ya hetamaligo ku uyo Aikupito.' (*Esodo 3:5,7,8,10*)

³⁵ Mose iya tamowaina ede Isalaela tamowaidi se hededehesuwala se wane, 'Kaiteya ye hetologo kama tanuwaga yo tautolehedudulaigai?' Na Yaubada yona anelu ye taumasalaha kaiwa kalakalasina wa unai, na Mose ye hetamali ye uyo Isalaela bodadi kadi tanuwaga yo taugilihaidi. ³⁶ Iya Aikupito unai Isalaela bodana wa ye woyahaidi, meta laulau gigigigibwalidi ye ginaulidi Aikupito unai yo Gabwa Pulupululuna unai yo hinage balabalaena bolimai 40 luwadiyena.

³⁷ Teina Mose ta, iya ede tamowaina ye hededehehemasalaha Isalaela udiyedi ye wane, 'Yaubada kabo peloweta hesau ye hetamaliyama doha yau. Iya meta kada boda ta unai kabo ye tubusaema.' (*Dutelonomi 18:15*) ³⁸ Yo iya tamadao bodadi maiyadi se miya balabalagaibuyena, yo hinage anelu maiyana se hedehedede Sinai kudulina unai. Anelu wa hedehedede maumaulina ye mosei Mose unai bena kabo ye hekawadima kalidaena.

³⁹ Na kada kulutubu nige se henuwa Mose se kawakabiyeyi, na iya se subu na nuwadi se uyo Aikupito. ⁴⁰ Ede se hededelau Aloni unai se wane, 'Yoda yaubada ku ginaulidi kabo se kedabagunaida, matawuwuna teina Mose ta Aikupito unai ye woyahaida ta, nige kabina ta kata saha ye tubu kalinawai.' (*Esodo 32:1*)

⁴¹ Mayadaidiyao ne udiyedi koitau se ginauli kana kao doha bulumakau natuna, na unai se kaitalagam, yo nimadi unai saha se ginauli wa meta unai se gwauyalakalili. ⁴² Ede Yaubada ye miyasuwalaedi na ye mosegabaedi na mahana, nawalai, yo kipwala udiyedi se taba'ohu. Doha peloweta yodi buka unai se kulihemasalahayako: 'Isalaela tamowaidi, balabalaena kwa sae kwa dobi bolimai 40, na yau kaliguyena kwa kaitalagam e nige?'

⁴³ Moleki** yona kabataba'ohu kwa lausini, yo yomi yaubada Lepani** yona kipwala hinage, meta koitau kwa bom kwa ginaulidi bena kwa taba'ohu udiyedi.

Unai kabo ya hetamaligomiu kwa lau Babiloni unai kabo kwa miya.' (*Amosi 5:25-27*)

⁴⁴ Balabalaena tamadao yodi kabalau maudoina unai meta Yaubada kabataba'ohuina tentina se bahei maiyadi. Kabataba'ohu wa Mose ye ginauli meta tautau Yaubada ye hekita wa unai ye ginauliwatani. ⁴⁵ Na tamadao Yaubada kabataba'ohuina wa se bahei na Yosuwawa ye woyaidi se laoma inai na tano ta tamowaidiyao Yaubada ye henakuhepesadi na siya tano ta se hai. Na Yaubada kabataba'ohuina wa inai se hepaisowa ye lau ee Dawida yona huyaena. ⁴⁶ Na Dawida meta Yaubada yona nuwanamwa tamowaina, na ye kaibwada Yaubada unai taba ye talam na Yakobo yona Yaubada** yona kabamiya numana ye ginauli. ⁴⁷ Na numa wa tauginaulina ede Solomona.**

⁴⁸ Na iyamo Yaubada saesaekalilina taba nige tatao nimadiyena numa se ginauli unai ye miya. Doha peloweta ye hededeyako ye wane,

⁴⁹ 'Yaubada ye hedede ye wane,
"Yogu kabatuli ede galewa,
na kaegu kabatolena ede tanoubu.

** **7:43:** Moleki meta Kanana tamowaidi yodi yaubada hesau. Yodi taba'ohuina kana kao ede koitauna yona numa gagilina se ginauli na diyadiyali unai se bahei. ** **7:43:** Lepani hinage yaubadalupolupo hesau, meta Aikupito tamowaidiyao unai se tabataba'ohu. ** **7:46:** Yakobo yona Yaubada meta Yaubada kesegana iya ede Dawida ye kaibwada unai na yona kabamiya numana ye ginauli (2 Samuwela 7). ** **7:47:** Numa Tabuna ginaulina wasana meta 1 Kin 6–8 udiyedi.

Unai numa sahasahana bena ku ginauli yogu kabamiya?

Yo haedi bena yogu kabakaiyawasi?

⁵⁰ Matawuwuna ginauli maudoidi ta tauginaulidi ede yau.” ’ ’ ” (Aisaiya 66:1-2)

⁵¹ [Kabo Setepano yona hedehehede wa ye tubei ye wane,] “Komiu nuwamiu se kwailokalili! Nuwamiu yo beyamiu nige kwa hepelitomedi. Komiu doha tamamiyao wa: Huya maudoina Yaluwa Tabuna kwa laukwatakwataei. ⁵² Tamamiyao wa meta peloweta maudoidi se hewaiunudi yo Tamowai Dudulaina yona laoma tauhedede-hemasalahana tamowaidiyao se unuhemwaloidi. Na komiu hinage Keliso kana kwa walohai na kwa unuhemwaloi. ⁵³ Komiu Yaubada yona laugagayo tauhaina ede. Anelu udiyedi ye laoma, na nige kwa kawakabiyei.”

⁵⁴ Setepano yona hedehehede wa unai Sunedeli numana unai taumiya wa se koipikalili na kadi kao se heyababadi. ⁵⁵ Na Yaluwa Tabuna Setepano ye hemwayau, na ye kaikewasae galewa ne meta Yaubada yona didiga ye kita, yo Yesu ye tolo Yaubada nimatutuna wa unai. ⁵⁶ Na ye wane, “Kwa kaikewasae, galewa kamwasana ne meta sokesokena, na Tau Natuna ya kita ye tolo Yaubada nimatutuna ne unai.”

⁵⁷ Setepano yona hedehehede wa unai se yogahigudugudui na beyadiyao se kabiguduguduidi. Na maudoidi nuwadi kesega, se heloi se lau hesabana ⁵⁸ na se tabehesalaei magai wa dagelana unai, na se hetubu se hekalaweku. Na taulauhegilulupolupo wa kadi kwama se haigabaedi na se toledi hewali hesau hesana Saulo kaena wa unai.

⁵⁹ Tatao wa Setepano se hekahekalaweku na ye tapwalolo, “Guiyau Yesu, yaluwagu ta ku hai!” ⁶⁰ Kabo ye tulibono na kalinalakilakiyena ye wane, “Guiyau, tatao ta yodi yababa ta unai tabu ku hegiludi.” Na ye gulidobi ede ye boita.

[8:1] Na Saulo Setepano yona boita ye kawanamwanamwaei.**

8

Dius yodi tauwoyawoya taukawamamohoi wa se kabihenayaidi

¹ Mayadaina ne unai Dius tamowaidiyao se hetubu taukawamamohoi bodana wa Yelusalema unai se hekamkamnadi.** Ede maudoidi se wasabugwaligwali se lau Yudeya yo Samaliya magaidi udiyedi, na apostolo wa se bom mo se bawabawa. ² Na tausunuma namwanamwadi hekadi se laoma Setepano se bahei se lau se toletoletau yo sabina se dou.

³ Na Saulo taukawamamohoi bodadi wa ye hetubu ye kabihenayaidi. Ye lau numa kesega kesega unai tatao yo sinesineo ye tabehesepadi na numatutugudu unai ye toledi.

Pilipo ye lauguguya Samaliya unai

⁴ Taukawamamohoi Yelusalema se wasabugabaei wa Yesu wasana se duwaduwai yodi kabalauyena. ⁵ Na Pilipo ye dobi magai lakilakina Samaliya unai, na wasa ye hedehehemasalahana meta Yesu Yaubada yona kaisunuwa tamowaina ede. ⁶ Boda wa laulau gigigigibwalidi ye ginaulidi se kitadi ede se lapulapuinamwanamwa yona hedehehede wa unai. ⁷ Tamowai gwaudi udiyedi yaluwa bikibikidi se pesa na se douyogayogahi, yo hinage tamowai bunibunidi se bado se namwanamwa. ⁸ Unai magai maudoina wa se gwauyalalakili.

Taukobakoba Simona wasana

⁹ Tamowai hesau hesana Simona Samaliya unai ye bawabawa. Iya taukobakoba hesau, na tamowai maudoidi iya se nokoei. Na ye bom ye hedehehesae'uyoi bena iya tamowai lakilakina hesau. ¹⁰ Samaliya tamowaidi maudoidi yodi nuwatu se lau iya unai,

** **7:60:** Na Saulo Setepano yona boita ye kawanamwanamwaei: Hedehehede ta buka hekadi se tole peina 8 lausoisoina 1 unai. ** **8:1:** Taukawamamohoi siya ede Dius tamowaidiyao Yesu tausunumaena, na tauhekamkamnadi ede Dius hekadiyo nige Yesu tausunumaena.

hekadi tamowaigaibu, hekadi tamowai saesaekalilidi, na se hedede se wane, “Iya meta Yaubada yona gigibwali, iya ede ta wane gigibwali lakilakina.” ¹¹ Huya lohalohakalili yona laulau gigigibwalidi debadiyena se noko, unai se hemuhemuliwatani.

¹² Na huyana Pilipo Yaubada yona basileiya yo Keliso Yesu wasana namwanamwana ye hedehededei kabo sinesineo yo tatao wa se kawamamohoiyei, na kabo Pilipo ye hebatisoidi. ¹³ Simona hinage ye kawamamohoi ede ye babatiso. Na kabo Pilipo ye hemuhemuliwatani, na Pilipo laulau gigigibwalidi ye ginaulidi ye kitadi meta ye nokokalili.

¹⁴ Kabo apostolo Yelusalema unai wasa se lapui meta Samaliya tamowaidi Yaubada wasana se kawamamohoiyei, ede Petelo yo Yowane se hetamalidi se lau kalidiyena. ¹⁵ Apostolo labui wa se lage magai ne unai, ede taukawamamohoi yodi se tapwalolo bena Yaluwa Tabuna kabo se hai. ¹⁶ Kaniyona ede Yaluwa Tabuna sola nige ye dobima kalidiyena, na Guiyau Yesu mo hesanaena se babatiso. ¹⁷ Petelo yo Yowane se tapwalolo ye gehe, kabo nimadi se tolesaedi taukawamamohoi wa udiyedi, ede Yaluwa Tabuna se hai.

¹⁸ Na Simona apostolo wa ye kitadi nimadi se tolesaedi tamowai wa kuludi udiyedi na Yaluwa Tabuna se hai, ede ye hededelau apostolo wa udiyedi bena kabo gigibwali wa ye hemaisa moniyena, ¹⁹ na ye wane, “Hinage gigibwali ne kwa haiyama, na kabo nimagu ta ya tolesae tamowai kewadi ne udiyedi na Yaluwa Tabuna se hai.” ²⁰ Na Petelo ye wane, “Idohagi to yom nuwatu bena Yaubada yona kainauya moni unai ku hemaisa. Unai yom moni ne ku hai na ye namwa mo ku mwaloi! ²¹ Nige yom tupwa hesau teina paisowa ta unai, matawuwuna ede Yaubada matanaena nuwam ne nige ye dudulai. ²² Ku nuwabui yo yom nuwatu yabayababana ne ku hekaiyawasi, na Yaubada unai ku tapwalolo taba yom nuwatu yabayababana wa ye nuwatugabaei. ²³ Na ya kitago meta kaikalomagigili ye nuhuligo, yo yababa ye kabihekahinigo.” ²⁴ Ede Simona ye hedehedelau Petelo yo Yowane udiyedi ye wane, “Yogu kwa kaibwada Guiyau unai, na ginauli saha kwa hetahetaladi wa kabo taba nige se tubu kaliguyena.”

²⁵ Kabo Petelo yo Yowane Guiyau wasana se guguyaei yo se hededehemasalaha magai lakilakina Samaliya unai, na huyana se gehe kabo se dalahai se uyo Yelusalema, na yodi kabalauyena Yaubada wasana se duwai magai hekadiyo udiyedi teha Samaliya unai.

Pilipo ye wasaduwai Itiyopiya tamowaina unai

²⁶ Kabo Guiyau yona anelu hesau ye hededelau Pilipo unai ye wane, “Ku lau tupwa yawana balabala ne unai na keda ye lau Yelusalema unai na ye dobi Gasa ku lobai.”

²⁷ Unai Pilipo ye dalahai ye lau. Keda wa unai Itiyopiya tamowaina hesau ye lobai. Iya meta yunika, na iya tamowai lakilakina yo gigigibwalina hesau, Itiyopiya yodi wasawasa sinena Kendeisi** yona moni yo gogo hekadi taukitahetetedi. Ye lauko Yelusalema unai Yaubada ye taba'ohui, ²⁸ na ye uyo'uyo yona magai, meta yona kaliyota** unai ye gelu ye laulau na peloweta Aisaiya yona buka ye hasihasili.

²⁹ Na Yaluwa Pilipo yona ye hedehedede ye wane, “Ku lau tenem kaliyota ne dedekana ne unai.” ³⁰ Ede Pilipo ye heloi ye lau kaliyota wa dedekana ne unai, na tamowai wa kalinana ye lapui peloweta Aisaiya yona buka ye hasihasili. Ede ye henamai ye wane, “Saha ku hasihasili ne nuwam ne unai ye masalaha?” ³¹ Na tamowai wa ye wane, “Idohagi na kabo kabina ya kata? Kabo kaiteya ye hededehebasibagau?” Ede Pilipo ye kaibwadai na ye mwalaesae kaliyota wa unai maiyana se tuli. ³² Na buka ye hasili wa ede teina:

** **8:27:** Kendeisi meta nige waihiu ne hesana, na Itiyopiya kalinadiyena kaniyona ede wasawasa sinena. Dimdim unai se kuli Candace yo Kandake, na Suau unai se kuli Kanaki. ** **8:28:** Kaliyota: Dimdim unai ta wane chariot, meta kabakadau hosi ye tabetabei keda lakilakidi udiyedi.

Iya se woyai se laei se unui doha mamoe,**
na ye mwanomwanou doha mamoe natuna ye mwanomwanou na wiyana se
bolihai, nige saha ye hedede.

³³ Iya se toledobiyei,
nige yona dudulai hesau se mosei.

Nige kana isimulita hesau,
matawuwuna yona mauli tanoubu ta unai se hekaiyawasi. *(Aisaiya 53:7-8)*

³⁴ Yunika wa ye henamai Pilipo unai ye wane, “Taba gonowana yogu ku hedehedede? Peloweta ne meta iya ye bom ye hetahetala'uyoi o tamowai hesau?” ³⁵ Na Pilipo Aisaiya yona kulikuli wa unai ye hetubu na Yesu wasana namwanamwana yona ye hedehedede.

³⁶⁻³⁷ Yodi kabalau wa unai waila kipuna hesau unai se lage. Na yunika wa ye hedehedede ye wane, “Waila ede teina. Taba gonowana ku hebabatisoigau?”**

³⁸ Kabo ye hedede kaliyota wa se hekaiyawasi. Na se dobi waila wa unai ede Pilipo iya ye hebabatiso. ³⁹ Waila wa unai se gayosae ede Guiyau Yaluwana Pilipo ye haigabai. Yunika wa Pilipo nige ye kita'uyoi, na iyamo yona kabalau wa unai meta ma gwaugwauyalana.

⁴⁰ Na Pilipo ye bom ye taumasalaha Asotasi unai na ye dalahai'uyo Sisaliya hesabana na yona kabalau wa unai Yesu wasana namwanamwana ye wasaduwaiyei magai wa udiyedi. Ye lauguguya ye lau ee Sisaliya unai ye lage.

9

Saulo ye nuwabui

¹ Yelusalema unai Saulo sola Guiyau tauhemuliwatanina wa ye hededehehemahe-matausidi bena ye koihemwaloidi. Ye lau taukaitalasam saesaena unai ² na ye kaib-wadai taba yona talam ye ginauli na leta ye kuli na ye mosei Saulo kabo ye laei Damaseko Dius tamowaidiyao ye hekitadi, na ena menai Guiyau tausunumaena hekadi ye lobaidi meta kabo ye haidi ye laedi Yelusalema na ye toledi numatutugudu unai.

³ Saulo ye dalahai ye lau Damaseko hesabana. Magai wa ye hanahanawui, na makesega mala lakilakina galewa ne unai ye sinadobima Saulo kewana ne unai. ⁴ Ede ye gulidobi bwatano wa unai na kalina hesau ye lapui ye wane, “Saulo! Saulo! Idohagi to ku hekamkamnagau ta?” ⁵ Saulo ye wane, “Guiyau, kowa kaiteya?” Na kalina wa ye hedehedede'uyo ye wane, “Yau ede Yesu ku hekamkamnagau ta. ⁶ Ku tolo na ku lau Damaseko, menai kabo tamowai hesau ye hededelaowa saha bena kabo ku ginauli.”

⁷ Saulo kana bodao wa se siliyatakalili na nige gonowana saha hesau se hedede, matawuwuna kalina wa daguguna se lapui na tamowaina nige se kita. ⁸ Saulo se kabihetolo na matana ye helaladi, iyamo nige gonowana saha hesau ye kita. Ede se kabinimai na se woyai se lau Damaseko. ⁹ Menai mayadai haiyona unai nige gonowana saha hesau ye kita, nige kai ye kai, yo nige waila ye numa.

¹⁰ Damaseko unai Yesu tauhemuliwatanina hesau hesana Ananiya. Kenosuwaiyena Guiyau ye hedehededelau unai ye wane, “Ananiya!” Na Ananiya ye wane, “Guiyau, yau ede teina.” ¹¹ Na Guiyau ye wane, “Ku tolo! Keda Dudulaina** unai ku lau Yudasi yona numa, na menai kabo Tasusi tamowaina hesau hesana Saulo ku kita. Iya ede menai ye tapwatapwalolo. ¹² Saulo yona tapwaloloyena na tautau hesau ya hekita meta tamowai hesau hesana Ananiya kabo ye lau iya unai na nimana ye tolesaedi kewana ne unai,

** **8:32:** Doha mamoe: Mamoe yodi laulau meta huyana tamowai hesau se laei bena kabo wiyana se boli o se unui meta nige gonowana ye koipili. ** **8:36-37:** Lausoiso 37 kulikuli beyabeyadiyao maudoidi udiyedi nige se kuli, na hisahisadi mo se kuli: Na Pilipo ye wane, “Ena ku kawamamohoi nuwam maudoina, kabo ku babatiso.” Ede yunika wa ye wane, “Ya kawamamohoi meta Yesu Keliso iya Yaubada Natuna.” ** **9:11:** Keda Dudulaina meta keda lakilakina hesana, magai Damaseko unai.

kabo matana wa se namwanamwa'uyo.” ¹³ Na Ananiya ye wane, “Guiyau, tamowai se bado udiyedi hedehedede ya lapuidi meta teina tamowai ta Yelusalema unai laulau yabayababadi udoi'udo'i ye ginaulidi yom tamowai** kalidiyena. ¹⁴ Na taukaitalasang tauwoyaidi udiyedi gigibwali ye hai na ye laoma Damaseko bena hesamyena tauyogayogasaewa** maudoidi kabo ye haidi na ye toledi numatutugudu unai.” ¹⁵ Guiyau ye hedehededelau Ananiya unai ye wane, “Ku lau, matawuwuna ede yau yogu kaisunuwa tamowaina ede iya, kabo wasagu ta ye laei dagela tamowaidiyao yo yodi wasawasa udiyedi, yo hinage Isalaela tamowaidiyao udiyedi. ¹⁶ Na iya kabo ya hekita meta hesagu ta debanaena kabo ye kamkamna.”

¹⁷ Ede Ananiya ye lau Yudasi yona numa unai ye mwalae na nimana ye tolesaedi Saulo kewanaena na ye wane, “Kagu kaha Saulo! Guiyau Yesu, yom laoma wa unai ye taumasalaha kalimyena wa, iya ye hetamaligau ya laoma kalimwai ta, kabo matam ta se namwanamwa'uyo yo hinage Yaluwa Tabuna kabo ye hemwayaugo.” ¹⁸ Mahanana ne unai ginauli hesau kana kao doha yama konahidi Saulo matana wa udiyedi se bekuhai, na gonowana ye kaikewa'uyo. Ede ye tolo na ye babatiso. ¹⁹ Ye kaikai kabo yona bayao ye hai'uyoi.

Saulo Damaseko yo Yelusalema unai

Kabo Damaseko unai Yesu tauhemuliwatanina wa maidadi Saulo se miya mayadai hisa, ²⁰ na Saulo ye hetubu ye lauguguya sunago udiyedi ye wane, “Yesu meta iya Yaubada Natuna.” ²¹ Taulapulapui maudoidi wa se siliyata yo se nuwapwanopwano na se wane, “Teina tamowai ta meta Yelusalema unai taukawamamohoi Yesu unai ye kabikabiheyaidi, yo hinage ye laoma inai bena Yesu tauhemuliwatanina ye haidi na ye laedi taukaitalasang tauwoyaidi udiyedi.” ²² Na Saulo yona guguya ye bayao ye lau, na ye hedehemasalahanamwanamwaei meta Yesu iya Yaubada yona kaisunuwa tamowaina. Ede Dius Damaseko unai taumiya wa nuwadiyao se pwanopwano na nige gonowana kalinana se bui.

²³ Saulo ye babawa huyalohaloha, na kabo Dius tamowaidiyao se koitalaliu bena iya se koihemwaloi. ²⁴ Na iya yodi talaliu wasana ye lapui. Mayadai yo boniyai magari wa kedadiyao se kaikaikewaguidi bena unai kabo Saulo se unuhemwaloi. ²⁵ Ede boniyai hesau unai Saulo tauhemuliwatanina hekadiyo se hededelau iya unai na bosaena ye gelu. Kabo magari wa ganana windona unai se hedalolodobiyei na ye dalahai ye lau Yelusalema.

²⁶ Saulo ye lage Yelusalema na ye kaipate bena ye lusae tauhemuliwatani wa udiyedi, iyamo se matausei matawuwuna ede nige se kawamamohoiyei meta iya tauhemuliwatani hesau. ²⁷ Na Banaba Saulo ye woyaiyama apostolo wa udiyedi yo ye hedehemasalaha kalidiyena meta Damaseko kedana unai Saulo Guiyau ye kita yo Guiyau ye hededelau iya unai. Yo hinage ye hedehemasalaha meta Damaseko unai Yesu hesanaena ye lauguguya ma nuwabayaona. ²⁸ Ede Saulo maiyadi se miya. Na Yelusalema magari maudoina ye tauhetakikili, na Guiyau hesanaena ye laulau-guguya. ²⁹ Yo hinage Dius hekadi taukalina Giliki maiyanao se haikawayagala. Na se koitalaliu bena se koihemwaloi. ³⁰ Na taukawamamohoi hedehedede wa se lapui ede se woyai se laei Sisaliya na menai se hetamali ye lau yona magari Tasusi.

³¹ Kabo Yudeya, Galili yo Samaliya udiyedi ekalesiya meta nuwadiyao se talu na daumwaliyena se miya. Yaubada yodi sunuma wa ye hebayaodi. Na Guiyau matausina unai se miya yo Yaluwa Tabuna ye henuwabayaodi, ede kadi boda wa ye laki ye lau.

Petelo Eneyasi ye henamwanamwa

** **9:13:** Yom tamowai ne meta siya Yesu tauhemuliwatanina. Kalina Giliki unai Luka yona kulikuli meta tamowai tabudi. ** **9:14:** Hesamyena tauyogayogasaewa: Guiyau hesanaena tauyogayogasaewa meta hinage ta hedede ta wane, taukawamamohoi.

³² Na Petelo ye taihile ye lau teha maudoina udiyedi taukawamamohoi ye kaitau-manai. Yona taihile wa unai ye lage magai hesau hesana Lida, unai Guiyau yona tamowai ye kitadi. ³³ Na temenai tamowai hesau bunibunina ye lobai hesana ede Eneyasi. Bolimai haligigi-haiyona (8) unai nige gonowana yona kabakeno ye pesagabaei. ³⁴ Petelo ye hededelau Eneyasi unai ye wane, “Yesu Keliso ye henamwanamwago. Ku tolo na yom kabakeno ne ku gwaugogoi.” Mahanana ne unai ye namwanamwa. ³⁵ Unai boda maudoidi Lida yo Salona udiyedi taumiya Eneyasi se kita ede se kawamamohoi Guiyau unai.

Petelo Dolekasi ye hetolo'uyoi boita unai

³⁶ Yopa unai tauhemuliwatani sinena hesau hesana ede Tabita (kalina Giliki unai ta wane Dolekasi).** Huya maudoina yona laulau se namwa tamowai udiyedi yo taudehadeha ye sagukaliliyeidi. ³⁷ Na ye kasiyebwa ede ye boita. Na sinalena wa se deuli na se tole numa wa heisi helabuina bilina hesau unai. ³⁸ Lida meta Yopa dedekanaena. Na tauhemuliwatani wa wasa se lapui meta Petelo iya Lida unai, ede tatao labui se hetamalidi se lau Petelo unai se wane, “Ku laoma ta laumwamwayau!” ³⁹ Ede Petelo maiyadi se lau se lage meta se woyaei se sae bili wa unai. Na wabuwabu hekadi Petelo se tolohetakikili na se doudou yo kadi kwama yo kaleko hekadi Dolekasi ye ginaulidi wa se hekita.

⁴⁰ Petelo maudoidi ye hetamalidi bili wa se pesagabaei, na ye tulibono na ye tapwalolo. Kabo ye kaikewalau Dolekasi unai na ye wane, “Tabita, ku tolo!”, na sinebada wa matana ye helaladi na Petelo ye kita ede ye tolo na ye tuli. ⁴¹ Kabo Petelo ye kabilau nimana wa unai na ye kabihetolo, na taukawamamohoi yo wabuwabu wa ye yoganeidi se mwalae na se kita meta Dolekasi boita unai ye tolo'uyoko na ye mauli. ⁴² Yopa unai taumiya maudoidi wasa wa se lapui na tamowai se bado se kawamamohoi Guiyau unai. ⁴³ Na Petelo kabo Yopa unai ye miya, Simona yona numa unai. Simona kana paisowa ede suisui dahidiyao se kopadi na se moseidi iya ye he'a'adi yo ye kabinonohaidi.

10

Koniliyasi Petelo ye yoganei

¹ Sisaliya unai tamowai hesau hesana Koniliyasi. Iya meta Loma yodi tau'iyala bodana Italiya unai taulaoma yodi sentuliyo hesau. ² Koniliyasi yo yona numa tamowaidiyao Yaubada se hekasisiyei ma nuwakohihaidi. Yona kaikainauya se lakikalili taudehadeha udiyedi, na ye tapwatapwalolo Yaubada unai. ³ Mayadai hesau meimeilahi yona tehaena** Koniliyasi yona nuwanuwatu unai Yaubada tautau hesau ye hemasalaha unai, meta Yaubada yona anelu hesau ye taumasalaha na ye wane, “Koniliyasi!” ⁴ Na Koniliyasi ye kitalau anelu wa unai meta ye matausi na ye wane, “Guiyau, idohagi?” Anelu wa ye wane, “Yom kainauya taudehadeha udiyedi yo yom tapwalolo se hemala kabahenuhenuwaisini Yaubada matanaena. ⁵ Unai tatao hekadi ku hetamalidi se lau Yopa unai tamowai hesau hesana Simona Petelo se woyaiyama. ⁶ Iya maiyana heliyam Simona se miyamiya. Simona hesauna ne meta suisui dahidi taupaisowaidi,** na yona numa meta gabwa dedekanaena.”

⁷ Anelu wa ye dalahai, kabo Koniliyasi yona tau'iyala tamowaina, iya meta tausaguina yo Yaubada tausunumaena hesau, yo hinage yona heyayai tauhaidi labui ye yoganeidi. ⁸ Saha se tubu wa yodi ye hedehehede na ye hetamalidi se lau Yopa.

** **9:36:** Tabita meta kalina Alamaiki. Tabita yo Dolekasi kaniyodi kesega, iya ede Dimdim unai ta hedede gazelle, meta suisui hesau lagau taukaikaina, na kana kao ye namwakalili, doha gouti lakilakina. ** **10:3:** Meimeilahi yona tehaena meta 3 kiloki. Iya ede Dius yodi huyatapwalolo mahanana (Apostolo 3:1). ** **10:6:** Suisui dahidi taupaisowaidi: Simona kana paisowa wasana meta Apostolo 9:43 unai ku hasili.

Petelo ginauli hesau ye kita galewa ne unai ye dobima

⁹ Mayadai helabuina mayamayadailakiyena tatao wa Yopa se hanahanawui. Mahanana ne unai Petelo ye mwalaesae numa kewana ne unai ye tapwalolo. ¹⁰ Na ye hasali ede ye kaibwada bena kana kai se mosei na ye kai. Kai wa se kabik-abinonohai na Yaluwa Tabuna Petelo ye taukasini. ¹¹ Ede ye kita meta galewa ye tasoke na ginauli hesau kana kao doha kabobo lakilakina isu hasi ne unai se kabi na se hedadolodobiyeiyama tanoubu ta hesabana. ¹² Luwana ne unai meta mwata yo manuwa yo hinage suisui kaekaediyao hasi kadi kao udoi'udo. ¹³ Na kalina hesau ye hededelau unai ye wane, “Petelo, ku tolo! Suisui ta ku koihemwaloidi, ku ligadi na ku kaidi.” ¹⁴ Na Petelo ye wane, “Taba nige, Guiyau! Yogu mauliyena sola nige suisui bidabidana yo siusiuna hesau ya kai.”** ¹⁵ Na kalina wa ye hedehehede'uyo ye wane, “Saha Yaubada ye he'a'adiko meta tabu ku kawayabayababaedi.” ¹⁶ Hedehehede wa ye tubu ma haiyona, na kabo kabobo wa se tabehai ye seuyo galewa.

¹⁷ Petelo sola ye nuwanuwatu tautau wa kaniyona ede saha, na Koniliyasi tamowai ye hetamalidi wa Simona yona numa se lobai ede se lage numa wa kawamatana unai. ¹⁸ Na se yogasae na se henamai se wane, “Simona, hesana hesau ede Petelo, teina numa ta unai ye miyamiya?”

¹⁹ Petelo sola ma nuwanuwatuna, na Yaluwa Tabuna ye hededelau unai ye wane, “Simona, tatao haiyona se wasewaseneigo. ²⁰ Ku pesa ku dobi na tabu ku kitahinelidi, na maiyamwao kwa lau, matawuwuna ede yau ya hetamalidima.”

²¹ Petelo ye pesa ye dobi na ye hededelau udiyedi ye wane, “Tamowai kwa wasewasenei wa, iya ede yau. Na saha hesabana kwa laoma?”

²² Se wane, “Sentuliyo Koniliyasi ye hetamaligai ka laoma hesabam. Iya meta tamowai namwanamwana Yaubada tauhekasisiyena, yo Dius tamowaidi maudoidi se kitahenamwakaliliyei. Yaubada yona anelu hesau ye hededelau Koniliyasi unai bena taba ye yoganeigo na ku lau yona numa unai, na bena saha ku hedehehede na ye lapuidi.”

^{23a} Ede Petelo tamowai wa ye yogaisinidi.

Petelo Koniliyasi ye kaitaumanai

^{23b} Mala ye tom ede Petelo maiyadi se dalahai se lau, na Yopa unai taukawamamohoi hekadiyo se hemuliwatanidi. ²⁴ Na mayadai helabuina wa unai se lage Sisaliya. Na Koniliyasi kehanao yo kana kahao hekadiyo ye yogagogoidi na yona numa unai Petelo se nayanayai. ²⁵ Petelo ye lage ede Koniliyasi ye laoma ye hailobai, na ye tulibono yo ye taba'ohu Petelo unai. ²⁶ Na Petelo ye kabilau ye kabihetolo na ye wane, “Ku tolo, yau meta tamowai doha kowa.”

²⁷ Petelo maiyana Koniliyasi se hedehehede na se mwalai numa kalona wa unai meta bodalakilaki temenai. ²⁸ Na Petelo ye hededelau udiyedi ye wane, “Komiu kabina kwa katakalili kai Dius yoma laugagayo meta nige gonowana dagela tamowaidi ka kaitaumanaidi yo maiyamai ka hebodakesega. Na Yaubada ye hekatagau meta tabu tamowai hesau ya kawayabayababaei. ²⁹ Unai huyana wasa ku hetamaliyama meta nige ya laukwatakata. Na bena ya henamaiyeigo matawuwuna saha to ku yoganeigau ya laoma ta.”

³⁰ Ede Koniliyasi ye wane, “Mayadai hasi se lau ku huyana ne unai yogu numaena ya tapwatapwalolo meimeilahi yona tehaena, na makesega tamowai hesau kana kwama namanamalina ye taumasalaha matagu wa unai ye totolo ³¹ na ye wane, ‘Koniliyasi! Yom tapwalolo wa Yaubada ye lapuidi yo yom kaikainauya taudehadeha udiyedi wa ye kitadiko. ³² Unai tamowai hesau ku hetamali ye lau Yopa bena Simona, hesana hesau

** **10:14:** Suisui bidabidana yo siusiuna: Suisui bidabidadi yo siusuidi Petelo ye hetaladi ta, siya ede suisui Mose yona laugagayo unai ye laugagayoidi wa, nige gonowana Dius se kaidi. Na ena se kaidi, kabo se bida na nige gonowana se lau Numa Tabuna unai se taba'ohu. Suisui bidabidadi wa ede mwata, puwaka, yama nige konahidi, kumakala, kedewa, yo suisui hekadiyo hinage.

ede Petelo, ye woyaiyama. Iya ede ye miyamiya Simona suisui dahidi taupaisowaidi yona numa unai. Yona numa ne meta gabwa dedekanaena.’³³ Ede kalina ya hetamal-imwamwayauyeiyawa hesabam, na ye namwakalili to ku laoma. Mahana te unai meta maudoimai Yaubada matanaena, na ginauli saha Guiyau ye hedededi kalimyena bena ku hedededi ka lapuidi.”

³⁴ Kabo Petelo ye hetubu ye hedehedede ye wane, “Mamohoi ya nuwatulobai meta Yaubada nige ye gadosisihineli.³⁵ Teha udoi'udoi udiyedi tautaba'ohu Yaubada unai yo yodi laulau se dudulai meta ye henuwadi.³⁶ Wasa namwanamwana Yaubada ye hetamaliyama Isalaela tamowaidiyao udiyedi wa kabina kwa katako, meta nuwadaumwali kedana ede Yesu Keliso. Iya meta tamowai maudoidi yodi Guiyau.³⁷ Yowane kabina kwa kata meta babatiso hedehededena ye hedehededei. Yo yona huyalauhekata ye lau ye gehe mulina ne unai ginauli sahasaha se tubu Galili yo Yudeya maudoina unai hinage kabina kwa kata:³⁸ Idohagi Yaubada Yesu Nasaleta tamowaina ye hemwayau Yaluwa Tabuna yo gigibwali unai, yo idohagi Yesu ye takikili na laulau namwanamwadi ye ginaulidi yo tamowai diyabolo yona gigibwali unai taukamkamna wa ye henamwanamwadi, matawuwuna Yaubada iya maiyana.

³⁹ Sahasaha ye ginaulidi Dius yodi tano yo Yelusalema unai tauhemamohoiyedi ede kai. Se hekabasi kaiwaena** na se koihemwaloi,⁴⁰ na mayadai hehaiyonana unai Yaubada iya ye hetolo'uyoi boita unai na ye hetaumasalaha.⁴¹ Nige ye tau-masalaha tamowai maudoidi udiyedi, na Yaubada yona kaisunuwa tamowaidiyao siya se bom mo iya se kita yo se hemamohoiyei. Tamowaidiyao ede kai, yona tolo'uyo mulina ne unai iya maiyamai ka numa yo ka kaikaigogoi.⁴² Na ye hededelaoma bena ka lauguguya tamowai udiyedi yo bena ka hemamohoiyei meta iya Yaubada yona kaisunuwa tamowaina, bena tausilasilawa yo tauboiboita tauhinelidi yo tau-tolehekasadi.⁴³ Peloweta maudoidi se hededehehemasalaha meta Yesu taukawamamohoiyeina maudoidi kabo yodi yababa ye nuwatugabaedi iya hesanaena.”

⁴⁴ Petelo sola ma hedehededena, na Yaluwa Tabuna ye taludobi wasa wa taulapuina maudoidi udiyedi.⁴⁵ Dius tamowaidiyao siya taukawamamohoi Petelo maiyanao se laoma wa, se siliyata meta Yaubada yona kainauya Yaluwa Tabuna hinage ye inidobiyei dagela tamowaidi udiyedi,⁴⁶ matawuwuna ede se lapui meta Yaluwa yona hekataena kalina udoi'udoi** udiyedi se hedehedede yo Yaubada se hedehedebasaei. Kabo Petelo ye hededelau [*yona hali Dius wa udiyedi*] ye wane,⁴⁷ “Yaluwa Tabuna se haiyako gonogonowana doha kita. Unai nige gonowana tamowai hesau ye hededenuwahidi tabu babatiso waila unai se haihai.”⁴⁸ Ede ye hedede se hebabatisoidi Yesu Keliso hesanaena. Na kabo Petelo se kaibwadai maiyadi se miya mayadai hisa.

11

Petelo yona paisowa wa ye hededehehemasalahadi Yelusalema unai

¹ Apostolo yo taukawamamohoi hekadi Yudeya unai taumiya wasa se lapui meta dagela tamowaidi hinage Yaubada wasana se hai.² Na huyana Petelo ye seuyo Yelusalema meta taukawamamohoi hekadi, siya pelitome tauhaidi, maidadi Petelo se haikawayagala³ se wane, “Kowa idohagi to ku lau dagela tamowaidiyao udiyedi na yodi numaena maidamwao kwa kaikai.”

⁴ Na Petelo ye hetubu ginauli maudoidi ye hededehehemasalahanamwanamwaedi kalidiyena, ye wane,⁵ “Magai Yopa unai ya tapwatapwalolo na Yaluwa ye taukasinigau, ede Yaubada tautau ye hekitagau. Ginauli lakilakina hesau ya kita kana kao doha kabobo lakilakina, isu hasi ne unai se kabi na galewa ne unai se hedalolodobiyeiyama

** **10:39:** Kaiwa ta iya ede sataulo, na Petelo ye hededehekahekasisi. ** **10:46:** Kalina udoi'udoi meta hinage gonowana ta bui kalina nige kabina se kata, iya ede kalina Yaluwa Tabuna ye moseidi.

kaliguwai. ⁶ Ya kitalau luwana ne unai meta suisui kaekaediyao hasi kadi kao udoi'udo, suisui kaikaikalasidiyao, yo hinage mwata yo manuwa ya kitadi. ⁷ Na kabo kalina hesau ya lapui ye hedehedelaoma ye wane, 'Petelo, ku tolo. Ku koihemwaloidi ku ligadi na ku kaidi.' ⁸ Ya hededebui ya wane, 'Taba nige, Guiyau! Yogu mauliyena sola nige suisui bidabidana yo siusiuna hesau ya kai.' ⁹ Kalina wa galewa ne unai ye hedehedede'uyo ye wane, 'Saha Yaubada ye he'a'adiko meta tabu ku kawayabayababaedi.' ¹⁰ Hedehedede wa ye tubu ma haiyona, na kabo kabobo wa se tabehai ye seuyo galewa.

¹¹ Mahanana ne unai tamowai haiyona Sisaliya unai se hetamalidima se laoma ee se lage yogu kabamiya numana wa unai. ¹² Na Yaluwa Tabuna ye hededelaoma kaliguyena bena tabu ya kitahinelidi na maiyaguwao ka lau. Na teina kada kahao haligigi-kesega ta hinage maidamaiyao ka lau, na taudi haiyona wa tauhetamalidima yona numa unai ka mwalae. ¹³ Na yomai ye hedehedede idohagi anelu hesau ye taumasalaha yona numa ne unai na ye wane, 'Kalina ku hetamali ye lau Yopa, Simona, hesana hesau ede Petelo, iya bena ye laoma. ¹⁴ Iya kabo yom wasa ye leyawa, unai kabo kowa yo kam bodao maudoidi mauli kwa lobai.'

¹⁵ Ya hetubu ya hedehedede, na Yaluwa Tabuna ye taludobi udiyedi, doha huya bagubagunana unai ye laoma kalidawai wa. ¹⁶ Na kabo Guiyau yona hedehedede wa nuwaguyena ye sae, doha ye wane, 'Yowane waila unai ye hebahebabatiso, na komiu kabo Yaluwa Tabuna unai kwa babatiso.' (*Apostolo 1:5*) ¹⁷ Unai, ena Yaubada yona kainauya ye mosei dagela tamowaidi udiyedi doha ede kita taukawamamohoi Guiyau Yesu Keliso unai, meta yau kaiteya na bena Yaubada yona paisowa ya gudugudui?"

¹⁸ Hedehedede wa se lapui meta yodi haikawayagala wa se hekaiyawasi, na Yaubada se hedebasaei se wane, "Ye masalaha ede Yaubada yona talam ye ginauli meta dagela tamowaidi hinage gonowana se nuwabui yo se mauli."

Ekalesiya Antiyoka unai

¹⁹ Huyana Setepano se hekalaweku mulina ne unai hewahewaiunu ye tubu, ede taukawamamohoi wa se hailauyedi. Na hekadi se lau teha Penisuya, hekadi Saipulusi bwanabwanaluwana, yo hekadi se lau magari Antiyoka, na Yesu wasana se duwai Dius mo udiyedi. ²⁰ Na hekadiyo, siya Saipulusi yo Sailini tamowaidiyao, se lau Antiyoka na se hetubu Giliki tamowaidiyao udiyedi hinage Guiyau Yesu wasana namwanamwana se lauguguyaei. ²¹ Guiyau yona gigibwali wa maiyadi, ede bodalakilaki se kawamamohoi yo se nuwabui Guiyau unai.

²² Saha ye tubu wasana wa ye lau ekalesiya Yelusalema unai se lapui. Ede Banaba se hetamali ye lau Antiyoka. ²³⁻²⁴ Iya meta tamowai namwanamwana. Yaluwa Tabuna iya ye hemwayau, yo yona sunuma ye bayao. Ye lage na ye kitalobaidi meta Yaubada ye hemauidiko, ede ye gwayuala na ye hededehebayaodi bena se tolobayao ma nuwakohihaidi. Na bodalakilaki se patulau Guiyau unai.

²⁵ Na Banaba ye lau Tasusi bena Saulo ye loyai, ²⁶ na ye lobai ede ye woyai se lau Antiyoka. Na bolimai kesega menai se miya na ekalesiya boda lakilakina maiyadiyao se koikoigogo na se hekatadi.

Na Antiyoka unai tamowai se hetubu kabo Guiyau tauhemuliwatanina hesadi se katai Kilisitiyani.**

²⁷ Huyadi ne unai peloweta hekadiyo Yelusalema unai se dobima Antiyoka. ²⁸ Hesauna hesana Agabasi ye tolo na Yaluwa Tabuna yona gigibwaliyena ye hedede-nonohai meta hasahasali lakilakina kabo ye tubu Loma yodi kabaloina magaidiyao udiyedi. Hasahasali ne ye tubu meta Loma yodi wasawasa Kolodiyasi yona huyaloina unai. ²⁹⁻³⁰ Hasahasali huyana wa unai tauhemuliwatani Antiyoka unai yodi nuwatu

** **11:26:** Kilisitiyani meta kalina Giliki, na kaniyona ede Keliso tamowaina o Keliso tauhemuliwatanina, matawuwuna yodi laulau wa gonogonowana doha Keliso wa. Na kalina Saliba unai ta wane ekalesiya.

se ginauli bena heledi taukawamamohoi Yudeya unai taumiya se saguidi. Na kesega kesega yona bayaoyena saha ye lobai meta yona kainauya ye tole. Kabo Banaba yo Saulo se hetamalidi na kainauya wa se bahelaei Yelusalema na se mosegabaei ekalesiya yodi tamowai lakilakidiyao udiyedi.

12

Anelu hesau Petelo ye woyahepesa numatutugudu unai

¹ Huyana ne unai Heloda** wasawasa ekalesiya tamowaidiyao hekadiyo ye haidi bena kabo ye hekamkamnadi. ² Ye hededelau yona tau'iyala udiyedi na Yowane kana kaha Yamesi se koihemwaloi kelepa unai. ³ Ye kita meta saha ye ginauli wa Dius tamowaidiyao se kitahenamwa, ede hinage Petelo ye hai. Yona huyahaina meta Pwalawa nige Yistina Henuwaisinina unai. ⁴ Na Petelo ye pai na ye tole numatutugudu unai. Na tau'iyala boda hasi ye hetolodi, yo udiyedi tatao hasi hasi, na iya se kitakita-hetete. Heloda yona nuwatu bena Taukiuli Henuwaisinina mulina ne unai Petelo ye woyahepesa na ye helauhetala boda matadiyena. ⁵ Unai Petelo numatutugudu unai ye miyamiya, na ekalesiya wa yona se tapwatapwalolo Yaubada unai ma nuwakohihaidi.

⁶ Sola nige lauhetala mayadaina ye lage, na boniyaina ne unai meta Petelo nimana labui ne seni udiyedi se paidi na iyala tamowaidiyao labui duwaduwalidiyena ye kenokeno, yo hinage iyala tamowaidiyao hekadi bili wa kedana se tologudui.

⁷ Makesega kabo Guiyau yona anelu ye taumasalaha, na mala ye sina bili wa unai. Anelu wa Petelo lisilisina ye koitagu na ye hanoi, ye wane, “Ku tolomwamwayau!” Ede Petelo nimana udiyedi seni wa se bekuhai. ⁸ Na anelu wa ye hededelau unai ye wane, “Kam dagilolo me ku paimomosi yo kam sendolo ku likwadi!” Na Petelo ye ginauli-watanidi. Kabo anelu wa ye wane, “Kam kwama ku likwa, na ku hemuliwatanigau.” ⁹ Petelo anelu wa ye hemuliwatani na numatutugudu wa se pesagabaei. Na saha ye tubutubu wa yona nuwatu bena tautaugaibu ye kita, na nige mamohoina. ¹⁰ Na keda bagubagunana yo helabuina tautologuidi wa se laugabaeidi ede keda ye lau magai wa kedana guduna bayabayaona unai se lage. Na ye bom ye tasoke ede se pesa na se sigilau, kabo anelu wa ye tauwadam.

¹¹ Kabo saha ye tubu wa Petelo nuwana wa unai ye sae, na ye wane, “Kabo ya nuwatu-lobai meta mamohoi Guiyau yona anelu ye hetamaliyama na ye gilihaigau Heloda yona gigibwali yo Dius tamowaidiyao yodi nuwatu yababadi maudoidi udiyedi.”

¹² Mulina ne unai ede ye lau Yowane sinana Maliya yona numa unai. Yowane hesana hesau se katai Maleko. Na numa wa unai bodalakilaki se lagegogoi na se tapwatapwalolo. ¹³ Petelo numa ganana guduna wa unai ye koikoi ede heyayai tauhaina sinena hesau hesana Loda ye lau keda wa unai na ye henamai ye wane, “Kowa kaiteya?” ¹⁴ Na Petelo kalinana wa ye lapulobai meta ye gwauyalalakili. Yona gwauyala wa debanaena ede nuwana ye luluhi na keda wa nige ye soke, na ye heloi ye uyo tamowai hekadi wa yodi ye hedehedede ye wane, “Petelo ede dagela ne unai!”

¹⁵ Na se hededelau waihiu wa unai se wane, “Ku yauyaulekalili!” Na iyamo ye hedehedede'uyo ye wane, “Ya hededemamohoi!” Kabo se wane, “Nuwana Petelo yona anelu meta.”

¹⁶ Na Petelo sola ma koikoina. Keda wa se soke ede iya se kita meta se siliyata. ¹⁷ Na Petelo nimana ye lausini ede se mwanou. Na kabo yodi ye hedehedede idohagi Guiyau yona woyawoyahepesana numatutugudu wa unai. Na ye wane, “Saha ye tubu ta bena Yamesi** yo kada kahao hekadiyo yodi kwa hedehedede.” Na kabo ye dalahai ye lau teha hesau.

** 12:1: Heloda ta meta Agilipa Bagubagunana.

** 12:17: Yamesi ta, iya Yesu kana kaha mamohoina.

18 Mala ye tom meta nuwapwanopwano lakilakina tau'iyala tamowaidiyao wa udiyedi, matawuwuna Petelo unai saha ye tubu wa nige kabina se kata. 19a Na Heloda ye hedede bena se loyanamwanamwaei, iyamo nige gonowana Petelo se lobai. Unai tauk-itakitahetetena wa ye henamaibuibuidi, na ye hedede meta kabo se koihemwaloidi.

Heloda yona boita

19b Muliyena Heloda Yudeya ye laugabaei ye lau Sisaliya unai ye miya.

20 Heloda meta Taiya yo Sidona tamowaidiyao ye koikoipiliyeidi. Na magari labui wa tamowaidiyao se hebodakesega na se kaipate bena Heloda se kita na se kaibwada bena nuwadaumwali unai se miya, matawuwuna kadi kai wa iya yona kabaloina unai se laolaoma. Na se lau Heloda yona taupaisowa lakilakina Balasitasi se kita ede ye saguidi na mayadai ye tole kabo se lau wasawasa wa se kita.

21 Yodi kaisunuwa mayadaina wa unai Heloda kana kwama wasawasadi ye likwadi na yona kabatuli unai ye tuli, na ye hedehededelau magari labui wa tamowaidiyao udiyedi. 22 Kabo kalinalakilakiyena se hededeyogayogahi se wane, "Teina ta meta yaubada hesau, na nige tamowaigaibu!" 23 Mahanana ne unai Guiyau yona anelu Heloda ye koiheguli na mwatamwata se kai na ye mwaloi, matawuwuna nige Yaubada ye hekasisiyei.

24 Na huya maudoina Yaubada wasana wa ye laki ye lau.

25 Banaba yo Saulo yodi paisowa Yelusalema unai ye gehe ede maiyadi Yowane, hesana hesau Maleko, se uyo Antiyoka.

13

Banaba yo Saulo se hetamalidi se lau

1 Antiyoka unai ekalesiya luwadi wa unai peloweta yo taulauhekata hekadiyo:

Banaba,
Saulo,

Simiyona, iya se katai Duba, **

Lusiyasi Sailini tamowaina,

yo Manaen, iya Heloda wasawasa maiyana se tubusae.

2 Huyana se tabataba'ohu Guiyau unai yo se kaikaihudi meta Yaluwa Tabuna ye wane, "Yogu kaisunuwa tamowaidiyao Banaba yo Saulo kwa hetamalidi se lau na yogu paisowa ya moseidiko wa se ginauli." 3 Se kaihudi yo yodi se tapwalolo na nimadi se tolesaedi taudi labui wa udiyedi na se hetamalidi se lau.

Saipulusi unai

4 Yaluwa Tabuna Banaba yo Saulo ye hetamalidi ede se dalahai se dobi Selusiya na se gelu se lau Saipulusi bwanabwanaluwana unai. 5 Na Yowane meta maiyadi na yodi paisowaena ye saguidi. Se lage Saipulusi magari hesau hesana Salamisi, ** na Yaubada wasana se wasaduwaiyei Dius yodi sunago udiyedi.

6 Taudi haiyona wa kabo bwanabwanaluwa maudoina se tauhetakikili ye lau ee se lage Paposi. ** Temenai meta Dius tamowaina hesau se lobai hesana ede Bala-Yesu. Iya meta taukobakoba yo pelowetalupolupo, 7 yo gabana maiyana se miya. Gabana wa hesana ede Segiusi Paulo, na iya tausonoga hesau. Ye henuwa bena Yaubada wasana ye lapui, unai yona taupaisowa hesau ye hetamali ye lau Banaba yo Saulo hesabadi. 8 Na Elimasi - hesa te meta Bala-Yesu hesana kalina Giliki unai, kaniyona ede taukobakoba - ye hededeguduguidi yo ye kaipate bena gabana ye hekaiyawasi tabu Yesu ye kawamamohoiyei. 9 Na Saulo, meta kalina Giliki unai hesana ede Paulo,

** 13:1: Duba: Dimdim bukadi hesa ta se kuli Niger, kaniyona ede Duba. Nuwana Simiyona dahina ye duba.

** 13:5: Salamisi meta magari lakilakina Saipulusi bwanabwanaluwana tehasaena unai. ** 13:6: Magai Paposi meta Saipulusi bwanabwanaluwana tehadobina ne unai.

Yaluwa Tabuna iya ye hemwayau ede ye kaikewadudulai Elimasi unai na ye wane, ¹⁰“Kowa diyabolo natuna, yo laulauludulai maudoidi tauhewaiunudi. Laulaulupolupo maudoidi kalimyena se mwayau. Idohagi to nige ku kaiyawasi na Guiyau yona nuwatu dudulaidi ku toletolebuidi? ¹¹ Unai Guiyau kabo ye hekamkamnago, na matam ne ye hegibudi mahana kubwakubwa, meta nige gonowana mahana dawayana ku kita.” Mahanana ne unai matana se kamumu nige gonowana saha hesau ye kita, na ye kabikabidada taba tamowai hesau ye kabilobai to nimana ne unai ye kabi na ye woyai.

¹² Na gabana wa ye nokokalili Guiyau hedehededena wa unai, na saha ye tubu wa ye kita, ede ye kawamamohoi.

Antiyoka Pisidiya magaina unai

¹³ Paulo ma kana kahao Paposi unai se gelu se lau Pega teha Pampiliya unai. Menai, Yowane ye laugabaeidi na ye uyo Yelusalema. ¹⁴ Na Banaba yo Paulo Pega unai se dalahai na se luwu se sae Antiyoka teha Pisidiya magaina unai. Na Sabatiyena kabo se mwalae Antiyoka yodi sunago unai na se tuli. ¹⁵ Na tamowai hekadiyo se tolo na Mose yona laugagayo yo peloweta yodi buka se hasilidi ye gehe ede sunago wa babadadi wa yodi taupaisowa se hetamali ye lau Paulo yo Banaba udiyedi na ye wane, “Kama kahao, ena yomi hededeheisagusagu hesau tatao ta udiyedi, gonowana kabo kwa hedehedede.”

¹⁶ Unai Paulo ye tolo na nimana ye lausini na kabo ye hedehedede ye wane, “Isalaela tamowaidiyao yo komiu dagela tamowaidiyao Yaubada tauhekasisiyeina, kwa lapulapui. ¹⁷ Kita Isalaela tamowaidiyao yoda Yaubada, iya tamadao** ye kaisunuwaidi. Na huyana kadi isimulitao siya laolaoma Aikupito unai, Yaubada ye kitahetetedi ede kadi boda ye tadada. Na yona gigibwaliyena Aikupito unai ye woyahepesadi ¹⁸ na bolimai 40 balabala wa unai yodi laulau yabayababadi ye nuwakasinidi. ¹⁹ Kanana unai meta basileiya haligigi-labui tamowaidiyao ye unuhemwaloidi na yodi tano ye mosei yona tamowai wa udiyedi. ²⁰ Saha se tubutubu ta meta bolimai badona 450.

Mulina ne unai kabo Yaubada yodi tautolehedudulai** ye moseidi ye lau ee Samuwela yona huyapeloweta. ²¹ Na kabo se kaibwada bena yodi wasawasa, ede Yaubada Saulo** ye moseidi, Kisa natuna, iya meta Beniyamina kana isimulita hesau, na ye woyaidi bolimai 40, ²² kabo Yaubada Saulo ye haigabaei. Mulina ne unai Dawida ye kaisunuwaei ye hemala yodi wasawasa. Yaubada Dawida ye hededehehemasalaha ye wane, ‘Ya kita meta Dawida, Yese natuna, iya tamowai namwanamwana yau ya henuwa ede. Yogu nuwatu maudoidi kabo ye ginaulidi.’

²³ Dawida kana isimulita hesau Yaubada ye kaisunuwai bena Isalaela taugilihaidi, iya ede Yesu. Teina unai Yaubada yona hededehehesunuma ye hemamohoiyei.

²⁴ Sola nige Yesu ye laoma na Yowane Babatiso ye lauguguya Isalaela tamowaidiyao udiyedi bena se nuwabui yo se babatiso. ²⁵ Na huyana Yowane yona paisowa bena ye gehe kabo ye wane, ‘Yomi nuwatu bena yau kaiteya? Yau nige tamowaina kwa nayanayai'usei wa.** Na iya meta muliguyena kabo ye laoma, na yau nige gonowagu taba kana sendolo mainadi ya yailidi.**

²⁶ Kagu kahao, komiu Abelahama natunao yo hinage komiu dagela tamowaidiyao Yaubada unai tautaba'ohu, bena kwa lapulapui, kabihemauli wasana ta meta ye laoma kita kalidawai. ²⁷ Tamowai maudoidi Yelusalema unai taumiya yo yodi tauwoyawoya

** **13:17:** Tamadao ne kaniyona ede kada kulutubu, siya ede Abelahama yo Isako yo Yakobo ma natunao wa.

** **13:20:** Tautolehedudulai ne wasadi ta hasili Tautolehedudulai bukadi (Judges) unai. Siya meta Isalaela yodi tauwoyawoya Yosua yona boita mulina ne unai na ye lau ee Samuwela yona huyapeloweta. ** **13:21:** Saulo meta Isalaela yodi wasawasa bagubagunana. Iya wasana ta hasili 1 Samuwela 8 unai ye hetubu ye lau ee 2 Samuwela

1. ** **13:25:** Tamowaina Yowane ye hetala ta iya ede Keliso Isalaela tamowaidi se nayanayai'usei wa. ** **13:25:** Yowane yona hedehedede ta meta hinage Luka 3:16 unai ku hasili.

nige se nuwatulobai meta Yesu ede Yaubada yona kaisunuwa tamowaina, na iyamo peloweta yodi hedehedede Sabati kesega kesega udiyedi se hasihasilidi wa se hemamohoiyeidi na iya se hegilu yo se hekamkamna. ²⁸ Nige kana mata hesau se lobai kabo unai se unuhemwaloi, na iyamo se kaibwada Pilato unai taba Yesu ye talangabaei na ye boita. ²⁹ Yesu hedehededena maudoidi peloweta se kulidi wa se hemamohoihegehedi, kabo sataulo unai se haigabaei na se tole bwayabwayaena. ³⁰ Na boita unai Yaubada Yesu ye hetolo'uyoi ³¹ na mayadai 40** solasoladi ne unai ye tautaumasalaha kaiteyadi iya maiyanao Galili unai tusaema Yelusalema wa udiyedi. Unai siya tauhemamohoina ede kada boda Isalaela udiyedi.

³² Na kai yoma laoma inai meta wasa namwanamwana ta ka leyawa kalimiuyena: Yaubada yona hededehegunuma kama kulutubu udiyedi wa ³³ ye hemamohoiyei kadi isimulita kita kalidaena meta Yesu ye hetolo'uyoi boita unai. Doha Same helabuina unai se kuli,

'Kowa yau natugu,

mayadai ta unai ya hemala tamam.'

(Same 2:7)

³⁴ Yaubada yona hededehegunuma meta boita unai kabo ye tolo'uyo nige gonowana ye pwasa bwayabwayaena. Hedehedede ta buka tabuna unai ye hededeyako, ye wane, 'Yogu hededehegunuma mamohoidiyao ya hededehegunumadi Dawida unai wa kabo ya lediwa kalimiuyena.'

(Aisaiya 55:3)

³⁵ Na Same hesau unai ye hemasalaha ye wane,

'Taba nige yom tamowai tabuna ku talamyeyi na bwayabwayaena ye pwasa.'

(Same

16:10)

³⁶ Teina ta meta nige Dawida hedehededena, matawuwuna ede Dawida yona huyaena Yaubada yona nuwatu maudoina ye ginauli ye gehe kabo ye boita, na kana kulutubu bwayabwayadi unai se tole na tauna wa ye pwasa. ³⁷ Na tamowai Yaubada ye hetolo'uyoi boita unai wa, iya tauna nige ye pwasa.

³⁸ Unai, kagu kahao, ya henuwa bena kabina kwa kata meta Yesu debanaena ka wasaduwai kalimiuyena meta Yaubada yababa ye nuwatugabaedi. ³⁹ Mose yona laugagayo nige gonowana yoda yababa ye haigabaedi. Na kaiteyadi se kawamamohoi iya unai meta se dudulai na nige kabahegiludi hesau. ⁴⁰ Unai, bena kwa kitakitamwanamwa saha peloweta se hedehededei wa tabu se tubu kalimiuyena:

⁴¹ 'Komiu tautalatalawasi, kwa kitanamwanamwa,

kabo kwa siliyata na kwa boita,

matawuwuna yomi huyaena kabo ya hekamkamnagomiu,

na taba tamowai hesau yogu nuwatu ta ye hededehegunumalaha kalimiuyena,

meta nige gonowana kwa kawamamohoiyei.'

(Habakuku 1:5)

⁴² Sunago wa unai Paulo yo Banaba se daladalahai na tamowai wa se wane, "Ka henuwa bena Sabati hesau taba kwa uyoma hedehedede ta hekadiyo kwa hedede'uyoidi." ⁴³ Koigogo wa ye gehe kabo Dius bodadiyao yo dagela tamowaidiyao Yaubada taukawamamohoiyena maiyadiyao se lau. Na Paulo yo Banaba boda wa se nuwakoidi bena Yaubada yona kabinamwa unai se miyakesegai.

⁴⁴ Sabati hesau unai magari wa bodana se lagegogoi bena Guiyau wasana se lapui, na hisahisadi mo se miyasuwala. ⁴⁵ Huyana Dius tamowaidiyao boda wa se kitadi meta se kaikalomagigili na Paulo se hededeheyababa yo saha ye hedede wa se kawalupolupoei.

⁴⁶ Na Paulo yo Banaba se hedehededebyao se wane, "Komiu Dius tamowaidiyao, ye namwa mo Yaubada wasana namwanamwana ta yomiu ka hedehededebyaguna. Iyamo nige kwa henuwa, na kwa bom kwa toledobiyei'uyoigomiu na mauli nige kana siga kwa

** 13:31: Mayadai 40: Kalina Giliki unai se kuli mayadai se bado, na Apostolo 1:3 unai ta hasili ede mayadai wa badodi 40.

laukwatakwataei. Unai kabo ka lau dagela tamowaidiyao udiyedi. ⁴⁷ Matawuwuna Guiyau yomai ye hedehededeke ye wane, 'Ya tolego dagela tamowaidiyao yodi dawaya, kalimyena kabo tanoubu tehana maudoina mauli nige kana siga se lobai.' ” (*Aisaiya 49:6*)

⁴⁸ Dagela tamowaidiyao hedehedede wa se lapui meta se gwauyala yo Yaubada kalinana wa se nokoei yo se kawanamwanamwaei. Na kaiteyadi Yaubada ye kaisunuwaidi bena mauli nige kana siga tauhaina, meta siya se kawamamohoi.

⁴⁹ Na Yaubada wasana wa Antiyoka tehana maudoina ye hetakikili. ⁵⁰ Na Dius tamowaidiyao wa se tolo ede magai wa unai sinesinebadao saesaedi Yaubada tausunumaena yo magai wa babadadiyao se henuwasaedi na Paulo yo Banaba se hekamkamnadi na se hetamalidi magai wa tehana maudoina se laugabaei. ⁵¹ Ede Paulo yo Banaba kaedi mukalidi se koinihinihiyedi, na magai wa se laugabaei se lau Ikoniya. ⁵² Na Antiyoka Pisidiya magaina unai tauhemuliwatani wa Yaluwa Tabuna ye hemwayaudi yo se gwauyalalakili.

14

Ikoniya unai

¹ Ikoniya unai hinage Paulo yo Banaba se lau Dius yodi sunago unai na yodi hedehede wa se namwakalili, ede Dius yo dagela tamowaidiyao** meta bodalakilaki se kawamamohoi. ² Na Dius hekadiyo, siya nige taukawamamohoi Yesu unai, kabo se tolo na magai wa unai taumiya tamowaidi nige se sunuma Yaubada unai meta se henuwasaedi na taukawamamohoi Yesu unai wa se koipiliyeidi. ³ Na apostolo wa menai se bawa huyalohaloha na Guiyau wasana se duwai ma nuwabayaodi. Na Guiyau yona kabinamwa wasana wa ye hemamohoiyei meta gigibwali ye mosei udiyedi na laulau gigigigibwalidi se ginaulidi. ⁴ Na Ikoniya tamowaidiyao maudoidi wa se bom se hebodalabuiyedi, ede hekadi se lau Dius na hekadi se lau apostolo wa udiyedi. ⁵ Na dagela tamowaidiyao hekadi yo Dius tamowaidiyao yodi tauwoyawoya maiyadiyao nuwatu se ginauli bena Paulo yo Banaba se hekamkamnadi yo se hekalawekudi. ⁶ Na taudi labui yodi koitalaliu wa wasana se lapui ede se wasabu se lau Likeoniya magaidiyao Lisitila yo Debi udiyedi. Na magaidiyao wa maudoina se tauhetakikili ⁷ na wasa namwanamwana se laulauguguyaei.

Lisitila yo Debi udiyedi

⁸ Na Lisitila unai tamowai hesau sinana ye labasi meta kaeyabayababana na nige gonowana ye laulau. ⁹ Ye tutuli na ye lapulapui Paulo yona lauguguya wa unai. Paulo ye kitalau unai ede ye kitalobai meta Yesu ye sunumaei gonowana kabo ye henamwanamwa. ¹⁰ Na kalinalakilakiyena ye hededelau unai ye wane, “Ku tolo!” Ede tamowai wa ye tolomwamwayau na ye hetubu ye laulau.

¹¹ Paulo saha ye ginauli wa boda wa se kita meta se yogahi na kalina Likeoniya unai se hedehedede se wane, “Yoda yaubadao wa se hemala doha tamowaimolosi na se dobima kalidaena!” ¹² Banaba hesana se tole Suus,** na Paulo Hemesi,** matawuwuna ede iya meta tauhedehedede. ¹³ Suus yona numa tabuna meta magai wa ganana dagelana ne unai. Yona taukaitalasam bulumakau ye woyaidima yo pasa heiheigogoidiyao ye baheidima magai wa kawamatana unai na boda wa maiyanao se henuwa bena yodi kaitalasam se ginaulidi apostolo wa udiyedi.

** **14:1:** Dagela tamowaidiyao ta siya meta nige Dius tamowaidi, na iyamo siya Yaubada taukawamamohoiyena na sunago unai se tapwatapwalolo. ** **14:12:** Suus meta Giliki yodi yaubada saesaena hesana. Dimdim unai hesana se kuli Zeus. ** **14:12:** Hemesi meta Giliki yodi yaubada hesau hesana. Iya kana paisowa ede tautauwasa. Dimdim unai se kuli Hermes.

¹⁴ Apostolo labui Banaba yo Paulo yodi nuwatu wa wasana se lapui kabo yodi kaleko se pulisidi na se heloi se dobi ede se lulau boda wa udiyedi na se yogahi se wane, ¹⁵ “Kama bodao, idohagi to doha teina kwa ginauli? Kai meta tamowaigaibu doha komiu. Na wasa namwanamwana ka leyama yo ka hededelaowa bena yomi laulau nige kaniyodi ta kwa tolehesuwaladi na kwa nuwabui Yaubada maumaulina unai. Galewa yo tanoubu yo gabwa yo hinage ginauli maudoidi udiyedi se bawa, ginauli maudoidi ta tauginaulidi ede iya. ¹⁶ Beyabeyana meta boda maudoina ye kabigabaedi na se bom nuwadi se lauwatanidi. ¹⁷ Na iyamo kabahemasalahana tanoubu ta unai, meta yona kabinamwa ye hekitada, iya ede galewa ne unai nabu ye hetaluyama na yomi koya ye hekinidi, yo kai ye haidiwa na nuwamiu ye henamwadi.” ¹⁸ Hedehedede ta udiyedi se kaipatebayaokalili boda wa udiyedi, ede se hekaiyawasidi tabu se kaikaitalasamlau kalidiyena.

¹⁹ Kabo Dius tamowaidiyao hekadi Antiyoka yo Ikoniya unai se laoma ede boda wa se nuwakoidi na Paulo se hekalaweku. Na yodi nuwatu bena ye boitako, ede magari wa unai se niulihepesa se lae dagela. ²⁰ Na tauhemuliwatani wa se laoma Paulo se tolohetakikili, na ye tolo ede ye uyo magari wa unai. Mala ye tom kabo Paulo yo Banaba se lau Debi.

Paulo yo Banaba se uyo yodi kadau kabahetubuna magari wa unai

²¹ Debi unai Paulo yo Banaba wasa namwanamwana se lauguguyaei, na tauhemuliwatani bodalakilaki se haidi. Na mulina ne unai se uyo Lisitila, Ikoniya yo Antiyoka teha Pisidiya unai ²² na magari maudoidi udiyedi tauhemuliwatani wa se hededehebayaodi bena yodi sunuma se tolekesegai Yaubada unai, se wane, “Pilipili yo yababa udoi'udoi udiyedi ta kamkamna, na kabo ta lusae Yaubada yona basileiya unai.” ²³ Na kabo dubu kesega kesega udiyedi Guiyau tausunumaena tamowaidiyao hekadi se kaisunuwaidi yodi tauwoyawoya, na se kaihudi yo yodi se tapwalolo Guiyau unai kabo ye kitahetetedi. ²⁴ Kabo teha Pisidiya se laugabaei se uyo teha Pampiliya. ²⁵ Wasa namwanamwana wa Pega unai se lauguguyaei na kabo se lau Ataliya.

²⁶ Ataliya unai se gelu se uyo Antiyoka teha Siliya magari wa. Huyana Antiyoka unai yodi kadau wa se hetubu meta ekalesiya tauwoyaidi Paulo yo Banaba yodi se tapwalolo Yaubada unai bena kabo ye kitahetetedi na kabo se lau paisowa wa se ginauli, ye lau ye gehe ede se uyoma.

²⁷ Se lage Antiyoka unai, kabo ekalesiya bodadi wa se yogagogoidima na paisowa maudoidi Yaubada yona gigibwaliyena se ginaulidi wa se hededehemasalahadi, yo idohagi sunuma kedana ye soke dagela tamowaidiyao udiyedi na se kawamamohoi.

²⁸ Na menai tauhemuliwatani wa maiyadiyao se miya huyalohaloha.

15

Dubu babadadiyao se koigogo Yelusalema unai

¹ Paulo yo Banaba sola Antiyoka unai na tamowai hekadi Yudeya unai se laoma na se hetubu se lauhekata ekalesiya wa udiyedi se wane, “Nige gonowana Yaubada ye gilihaigomiu kana siga pelitome kwa hai Mose yona kabikabi unai.” ² Na yodi lauhekata wa unai Paulo yo Banaba tamowai wa maiyadiyao se haikawayagalakalili. Debanaena ekalesiya Antiyoka unai Paulo yo Banaba maiyadiyao taukawamamohoi hekadiyo se kaisunuwaidi bena se lau Yelusalema apostolo yo tamowai lakilakidiyao se henamaiyeidi.

³ Dubu wa ye hetamalidi se lau Yelusalema ede yodi lau ne unai Penisiya yo Samaliya magariyao udiyedi ekalesiya yodi se hedehedede meta dagela tamowaidiyao se nuwabui. Na wasa wa se lapui ede se gwauyalakalili.

⁴ Huyana se lage Yelusalema kabo dubu tamowaidiyao, apostolo yo tamowai lakilakidi se hailobaidi, na paisowa maudoidi Yaubada yona gigibwaliyena se ginaulidi wa

se hededehemasalahadi. ⁵ Kabo taukawamamohoi hekadi, siya Paliseya kadi boda, se tolo na se wane, “Dagela tamowaidi ne taba se pelitome yo Mose yona laugagayo se miyawatanidi.”

⁶ Ede apostolo yo tamowai lakilakidiyao se lagegogoi na pilipili wa se hetalahe-dudulai. ⁷ Se hedehedede huyalohaloha, na kabo Petelo ye tolo ede ye wane, “Kagu kahao, kabina kwa kata meta luwamiu ne unai beyabeyana Yaubada ye kaisunuwaigau kabo dagela tamowaidiyao udiyedi wasa namwanamwana ya lauguguyaei se lapui na se kawamamohoi. ⁸ Yaubada, iya tamowai nuwadiyao kabidi taukata, meta dagela tamowaidi ye haidi na Yaluwa Tabuna ye moseidi gonogonowana doha ye leyama kita kalidaena. ⁹ Iya nige ye hinelidi, siya yo kita gonogonowada. Na yodi sunuma debanaena nuwadi ye deulihe'a'adi. ¹⁰ Unai, idohagi to Yaubada kwa laukita na bena tauhemuliwatani ne Mose yona laugagayo polohena kwa hebaheidi? Taba nige! Polohe ta kada kulutubu yo kita nige gonowada ta bahei. ¹¹ Na ta kawamamohoi meta yoda Guiyau Yesu yona kabinamwa unai mauli ta lobai, gonogonowana doha siya.”

¹² Kabo boda wa se mwanou na se lapulapui Paulo yo Banaba udiyedi na se hedehedede idohagi Yaubada yona gigibwali unai laulau gigigigibwalidi hekihekinoidi se ginaulidi dagela tamowaidiyao udiyedi.

¹³ Se hedehededegehe ede Yamesi ye tolo na ye wane, “Kagu kahao, kwa lapulapui. ¹⁴ Simiyona** ye hededehemasalahayako idohagi Yaubada huya bagubagunana unai dagela tamowaidiyao ye nuwatuidi na udiyedi hekadi ye haidi yona tamowai. ¹⁵ Na Petelo yona hedehedede ta meta peloweta yodi hedehedede unai se hemamohoiyei, doha se kulinonohaiyako se wane,

¹⁶ ‘Muliyena kabo ya uyoma na Dawida yona numa ye guli wa ya hetolo'uyoi.

Ye tatagwaligwali wa kabo ya ginauli yo ya hebayao'uyoi.

¹⁷ Debanaena kabo tamowai hekadiyo bena Guiyau se loyai, yo dagela tamowaidiyao kaiteyadi hesagu ya moseidi bena Guiyau se wasenei.

Teina ta meta Guiyau kalinana. Iya ginauli maudoidi ta tauginaulidi,

¹⁸ doha ye hededehemasalahadiko nabada wa unai.’ ” *(Amosi 5:11, Aisaiya 45:21)*

¹⁹ [Na Yamesi yona hedehedede wa ye tubei ye wane,] “Unai yogu hineli ede teina: Dagela tamowaidiyao se nuwabui Yaubada unai, tabu ta henuwapilipilidi Mose yona laugagayo maudoina unai. ²⁰ Na taba ta kulikulilau udiyedi bena laugagayo hisahisadi mo se lauwatanidi, meta tabu koitau kaitalasamdi kaidiyao se kaikaidi kaniyona ede kai ne se biki, ganaganawali tabu se miyamiyaedi, ena suisui gadona se sipwakiki na ye mwaloi meta tabu se kaikai, yo suisui kwasinadiyao tabu se numanumadi. ²¹ Ye namwa mo laugagayo ta se lauwatanidi, matawuwuna ede huya bagubagunana unai ye laoma yoda huya ta unai Sabati kesega kesega Mose yona laugagayo se hasihasili yo se lauguguyaei magari maudoidi yodi sunago udiyedi.”

Dubu babadadiyao wasa se kulilaei Antiyoka

²² Kabo apostolo yo tamowai lakilakidiyao maiyadiyao dubu maudoina wa se hineli bena se bom yodi tamowai hekadi se kaisunuwaidi na se hetamalidi maiyadi Paulo yo Banaba se lau Antiyoka. Tamowai labui se kaisunuwaidi ede Yudasi (hesana hesau ede Basabasi) yo Sailasi, siya meta tauwoyawoya taukawamamohoi luwadiyena. ²³ Na leta se kuli na se mosei udiyedi, se wane,

“Kai kami kahao apostolo yo tamowai lakilakidiyao yomiu ka kulikuli.

Yoma lautoki ka leyawa dagela tamowaidi tausunuma Antiyoka, Siliya yo Silisiya udiyedi taumiya kalimiuyena.

** **15:14:** Simiyona meta Petelo hesana bagubagunana (Mataiyu 4:18), na inai hesa ne ye katai kalina Hebelu unai. Giliki kalinadiyena se katai Simona.

²⁴ Ka lapui meta tamowai hekadiyo kalimaiyena se laowa na yodi hedehedede wa unai nuwamiu se hepilipilidi. Tamowai ne kai nige ka hetamalidiwa, na se bom yodi nuwatuyena se laowa. ²⁵ Unai maudoimai yoma talam ka ginauli na tamowai hekadiyo ka kaisunuwaidi na ka hetamalidiwa yoma gadosisi tamowaidiyao Banaba yo Paulo maiyadiyao. ²⁶ Taudi labui ta yodi mauli se talamgabaeidi yoda Guiyau Yesu Keliso yona paisowa debanaena. ²⁷ Yoma kaisunuwa tamowaidiyao ede Yudasi yo Sailasi. Ka hetamalidiwa kabo kawadiyena wasa ka kulikuli ta hedehededena yomiu se hedehedede. ²⁸ Yaluwa Tabuna yona nuwatu yo kai yoma nuwatu meta tabu polohe hagahagadi ka hebahebaheigomiu, na ye namwa mo taba laugagayo lak-ilakidiyao ta kwa miyawatanidi: ²⁹ Tabu koitau kaitalasamdi kaidiyao kwa kaikaidi, tabu suisui kwasinadiyao kwa numanumadi, tabu suisui gadona se sipwakiki na ye mwaloi kwa kaikai, yo tabu kwa ganaganawali. Taba laugagayo ta kwa miyawatanidi meta ye namwa.

Kaiyoni.”

³⁰ Na se dalahai se dobi Antiyoka, na kabo ekalesiya bodadi se yogagogoidima na leta wa se moselaei udiyedi. ³¹ Ekalesiya bodana leta wa se hasili na ye henuwabayaodi, ede se gwauyalakalili. ³² Yudasi yo Sailasi siya meta hinage peloweta. Yodi hedede-hais-agusagu maudoidi udiyedi ekalesiya bodana wa se hebayaodi.

³³⁻³⁴ Mayadai hisa se lau, na kabo taukawamamohoi wa Yudasi yo Sailasi se lautokiyeidi na se hetamalidi ma nuwadaumwalidi na se uyo tauhetamalidima wa udiyedi.** ³⁵ Na Paulo yo Banaba Antiyoka unai se miyamiya na siya maiyadiyao tamowai hekadi Guiyau wasana se lauhekataei yo se laulauguguyaei.

Paulo yo Banaba se hebodalabuiyei

³⁶ Yodi bawa Antiyoka unai wa mayadai hisa se lau na kabo Paulo ye hededelau Banaba unai ye wane, “Taba yoda kadautakikili helabuina ta ginauli. Ta uyo lahinaidi Guiyau wasana yoda kabalauguguyaena magaidiyao wa udiyedi, na kada kahao wa ta kitadi.” ³⁷ Banaba ye talam na ye henuwa bena Yowane maiyadi, hesana hesau ede Maleko.** ³⁸ Na Paulo ye nuwatui nige ye namwa taba iya maiyadi, matawuwuna lahinaidi Pampiliya unai nige ye saguidi, yodi paisowa wa sola ye laulau na ye laugabaeidi. ³⁹ Se haikawayagalakalili ede se hebodalabuiyei. Banaba Maleko ye hai, ede maidana se gelu se lau Saipulusi, ⁴⁰ na Paulo yona kaisunuwa tamowaina ede Sailasi. Antiyoka unai taukawamamohoi wa Paulo yo Sailasi yodi se tapwalolo bena Guiyau ye kitahettedi, na kabo se dalahai ⁴¹ se lau Siliya yo Silisiya magaidiyao udiyedi ekalesiya bodadiyao wa se hededehebayaodi.

16

Timoti ye hetubu ye paisowa Paulo yo Sailasi maidanao

¹ Se lau Debi, na kabo se lage Lisitila. Temenai Yesu tauhemuliwatanina hesau hesana Timoti. Iya sinana meta Dius sinena yo Yesu taukawamamohoiyena hesau, na tamana meta Giliki tamowaina. ² Taukawamamohoi Lisitila yo Ikoniya udiyedi Timoti se kawanamwanamwaei. ³ Paulo ye henuwa Timoti bena maiyadi se lau se kadau, ede Timoti ye hepelitome, matawuwuna Dius tamowaidiyao tenem teha ne unai taumiya Timoti tamana kabina se kata iya meta Giliki tamowaina.**

** **15:33-34:** Kulikuli beyabeyadi hisahisadi mo lausoi 34 hinage se kuli: Na Sailasi yona nuwatu ye ginauli bena ye babawa Antiyoka unai. ** **15:37:** Maleko wasana ede Apostolo 12:12 unai. ** **16:3:** Timoti tamana meta Giliki tamowaina: Timoti sinana iya Dius sinena, unai Dius tamowaidi Timoti se kitalobai meta iya Dius tamowaina hesau. Iyamo tamana nige ye hepelitome huyana iya ma gagilina. Dius yodi hali Dius nige se pelitome meta se kitadobidobiyeidi yo nige se lapulau udiyedi. Na Paulo yona laulau meta magari maudoidi udiyedi kabo se bagunalau sunago udiyedi se lauguguya. Unai Timoti ye hepelitome.

⁴ Se dalahai se lau magai lakilakidiyao maudoidi wa udiyedi, na apostolo yo dubu babadadiyao Yelusalema unai yodi hineli leta unai se kuli wa se hededegabaedi ta ukawamamohoi wa udiyedi bena se kawakabiyeidi. ⁵ Unai ekalesiya tamowaidiyao wa yodi sunuma unai se bayao, yo mayadai badobado kadi boda wa ye laki ye lau.

Yaubada Paulo ye yoganei bena se lau Masedoniya

⁶ Paulo ma kana kahao se kadau se lau teha Pilidiya yo teha Galatiya magaidiyao udiyedi, matawuwuna Yaluwa Tabuna ye hekatadi taba nige se lau se wasaduwei teha Eisiya unai. ⁷ Se lage teha Misiya unai na se henuwa bena se sae teha Bitiniya, na Yesu Yaluwana ye hekatadi tabu se sae temenai. ⁸ Unai se uyo Misiya na se lau se dobi Tolowasi magaina.** ⁹ Yodi huyalage Tolowasi unai boniyaina ne unai Paulo yona nuwanuwatu unai Yaubada tautau hesau ye hemasalaha unai meta Masedoniya tamowaina hesau ye kita ye totolo na ye hededelau Paulo unai ye kaibwada ye wane, “Ku laoma Masedoniya na ku saguigai.” ¹⁰ Unai ka nuwatulobai** meta Yaubada ye yoganeigai bena ka lau Masedoniya Yesu wasana namwanamwana ka wasaduwaiyei udiyedi. Ede ka kabinonoha na ka gelu.

Pilipi unai Lidiya ye nuwabui

¹¹ Tolowasi unai ka gelu na ka dudulai ka lau Samotelesi. Na mayadai helabuina unai kabo ka lage Niyapolisi. ¹² Temenai waga wa ka pesagabaei na ka yona ka lau Pilipi. Pilipi meta magai lakilakina Loma tamowaidiyao se hetubu, yo Loma yodi kabatanuwaga magaina teha Masedoniya ne unai.

Pilipi unai ka miya mayadai hisa, ¹³ na Sabatiyena magai wa ka pesagabaei ka lau sagasaga dedekanaena. Yoma nuwatu meta tenem teha ne unai kabo Dius tamowaidiyao yodi kabatapwatapwalolo. Ka lobai ede ka tulidobi na ka hetubu ka hedehededelau sinesineo hekadi se lagegogoima wa udiyedi.

¹⁴ Taulapulapui wa hesau hesana ede Lidiya, iya meta Tiyatila waihiuna. Kana paisowa ede kaleko namwanamwadi ye lokulokuneidi. Lidiya meta Yaubada ta ukaihelahuina,** na Yaubada iya nuwana ye hemasalaha, ede ye lapulapuinamwanamwa yo ye kawamamohoi Paulo yona lauguguya wa unai. ¹⁵ Iya ma kana bodao ka hebatisoidi, na kabo ye kaibwadaigai bena ka lau yona numa, ye wane, “Ena kwa kawamamohoiyeigau yau Guiyau tausunumaena, kabo kwa laoma yogu numa unai kwa miya.” Ye kaibwadaigai ede ka lau yona numa wa unai ka miya.

Paulo yo Sailasi numatutugudu unai

¹⁶ Mayadai hesau ka laulau kabatapwalolo magaina wa unai na heyayai tauhaina waihiuna hesau ye lobaigai. Yaluwa yabayababana waihiu ne unai ye luwu na ye hesonoga, na kana paisowa ede saha sola nige se tubu meta ye hedehedehemasalahadi. Na paisowa ne unai kana tanuwagao yodi moni lakilakina ye ginauli. ¹⁷ Waihiu wa Paulo maidamai ye hemuhemuliwatanigai na ye heyoheyoga ma kalinalakilakina ye wane, “Teina tamowai ta Yaubada saesaekalilina yona taupaisowa. Siya kabo se hedehedehemasalahala kalimiuyena idohagi na kabo mauli kwa lobai.” ¹⁸ Mayadai badobado waihiu wa yona hedehedede kesekesegana. Unai Paulo ye tausi'ololo yo ye kouyalayalakalili, ede ye hededelau yaluwa yabayababana wa unai ye wane, “Yesu Keliso hesanaena ya hededelaowa, waihiu ta ku pesagabaei.” Mahanana ne unai yaluwa yabayababana waihiu wa ye laugabaei.

** **16:8:** Tolowasi meta magai lakilakina gabwa dedekanaena, teha Misiya unai. ** **16:10:** Ka nuwatulobai: Buka te taukulina Luka **ka** ye kuli meta ta nuwatulobai Tolowasi unai Luka Paulo ye hailobai na maiyana se kadau se lau Pilipi. Lausoiso 8 unai Luka sola nige maiyana, unai ye kuli, **se** uyo Misiya. ** **16:14:** Yaubada ta ukaihelahuina kaniyona ede iya dagela sinena, na ye nuwabuiko Yaubada ye kaihelahui gonogonowana doha Dius tamowaidiyao.

¹⁹ Waihiu wa kana tanuwagao wa se nuwatulobai meta yodi gogo kabahaidi kamwasana se heyababa, unai Paulo yo Sailasi se haidi se laedi kabalokulokune unai, gabemani tamowaidiyao udiyedi bena se helauhetaladi. ²⁰ Na kabo se hededelau tautolehedudulai tamowaidiyao udiyedi se wane, “Teina Dius tamowaidiyao ta debadiyena yoda magari ta tamowaidiyao maudoidi se hetalagegaga! ²¹ Siya laulau se lauhekataedi ta meta kita Loma tamowaidiyao yoda laugagayo unai nige gonowana ta kawanamwanamwaedi yo ta ginaulidi!” ²² Bodalakilaki waihiu kana tanuwagao wa se saguidi na Paulo yo Sailasi se hegiludi, unai tautolehedudulai tamowaidiyao se hedede kadi luwuluwu se haigabaisinasinakalaedi na se sapidi. ²³ Se sapidi ye gehe kabo se laedi numatutugudu unai se toledi na se hededelau numatutugudu wa taukitahetetena unai bena ye kitahetetenamwanamwaedi na tabu se wasawasabu. ²⁴ Ede Paulo yo Sailasi ye haidi numatutugudu luwamolosina unai ye toledi na kaedi se koiyahisihekahinidi kaiwa tehadiyao polopolohedi udiyedi.

²⁵ Boniyai duwaduwalina unai taudi labui wa se tapwalolo yo se wanawana yo Yaubada se hedehedebasae, na numatutugudu wa unai kadi kahao wa meta se lapulapui. ²⁶ Mahanana ne unai mwanikuniku lakilakina, na numatutugudu wa yona kabatolo ye nukunuku. Makesega keda gududi maudoidi se tasoke na numa wa unai tamowai maudoidi kaedi yo nimadi senidiyao se bekuhai. ²⁷ Numatutugudu taukitahetetena wa ye kenosiliyatama na ye kaikewadobi meta keda gududiyao wa se tasokeko, ede ye siliyatalakili na yona nuwatu bena Paulo ma kana kahao wa se wasabuko. Unai yona kelepa ye hai bena ye bom ye unuhemwaloi'uyoi. ²⁸ Na Paulo ye yogalau iya unai ye wane, “Tabu ku unu'unuhemwaloi'uyoigo! Kai maudoimai ede teinai!” ²⁹ Ede numatutugudu taukitahetetena wa ye yoga ede osili se baheyiyama na ye dobi, na ma matausina ye tulibono Paulo yo Sailasi talanuwadi wa unai. ³⁰ Na kabo ye woyahepesadi na ye henamaiyeidi ye wane, “Tautaubadao, taba saha ya ginauli kabo ya mauli?” ³¹ Se hededelau iya unai se wane, “Guiyau Yesu ku kawamamohoiyei yo ku sunumaei na kabo ku mauli, kowa yo yom numa tamowaidiyao maudoidi hinage.” ³² Na kabo Paulo yo Sailasi Guiyau wasana se hededehehemasalahi iya yo yona numa tamowaidiyao wa udiyedi. ³³ Boniyaina ne unai ye haidi ye laedi, taudi gaidiyao wa ye deulidi, na kabo Paulo yo Sailasi numatutugudu taukitahetetena wa yo yona numa tamowaidiyao maudoidi se hebabatisoidi. ³⁴ Kabo Paulo yo Sailasi ye woyalaedi yona numa unai na kai ye moseidi se kai. Iya yo yona numa tamowaidiyao maudoidi wa se gwauyalakalili, matawuwuna se nuwabui yo Yaubada se kawamamohoiyei.

³⁵ Mala ye tom kabo tautolehedudulai tamowaidiyao wa yodi taupaisowa se hetamalidi se lau numatutugudu taukitahetetena wa unai se hededelau kabo Paulo yo Sailasi ye hepesadi. ³⁶ Numatutugudu taukitahetetena wa Paulo yona ye hedehedede ye wane, “Tautolehedudulai tamowaidiyao wa se hedede meta kabo ya yailigabaegomiu. Unai kwa pesa na daumwaliyena kwa lau.” ³⁷ Na Paulo ye hededelau tautolehedudulai yodi taupaisowa wa udiyedi ye wane, “Kai meta Loma yona laugagayo logulogunaena taumiya. Unai nige gonowana se sapigai boda matadiyena yo se tolegai numatutugudu unai, na nige kama mata hesau se lobai. Na bena wadawadamyena se hetamaligai ka lau. Taba nige! Siya taba se laoma na se woyahepesagai!”

³⁸ Tautolehedudulai tamowaidiyao yodi taupaisowa wa se uyo na se hededelau udiyedi meta Paulo yo Sailasi Loma yodi laugagayo logulogunaena taumiya. Hedehedede wa se lapui meta se siliyatalakili. ³⁹ Unai se laoma Paulo yo Sailasi udiyedi yodi hedehedudulai se ginauli. Ye gehe kabo se woyahepesadi se laedi na se hededebiga-bigalau udiyedi taba magari ne se laugabaei. ⁴⁰ Na Paulo yo Sailasi se lau Lidiya yona numa unai na taukawamamohoi wa se kitadi ede se hededehebayaoyoyoidi, na kabo se dalahai se lau.

17

Paulo yo Sailasi Tesalonika unai

¹ Se dalahai ede se lau Ampipolisi. Na mala ye tom kabo se lau Apoloniya se laugabae, na kabo se lau Tesalonika unai se lage. Temenai meta Dius yodi sunago hesau. ² Paulo yona miyamiya unai mayadai Sabati haiyona udiyedi ye lau sunago wa unai ye mwalae, na Dius tamowaidiyao maidanao kulikuli tabudi kaniyodi wa se hedehededeidi. ³ Ye hededehemasalaha meta Yaubada yona hineli unai Keliso ye kamkamna yo ye tolo'uyo, yo ye wane, "Yesu ya hetahetala'usei ta, iya ede Keliso." ⁴ Dius tamowaidi hekadi nuwadiyao se haidi, yo Giliki tamowaidiyao siya Yaubada taukaihelahuina** yo sinesinebadao lakilakidi gwaudi hinage se patulau Paulo yo Sailasi udiyedi.

⁵ Na Dius tamowaidiyao wa Paulo yo Sailasi se kaikalomagigiliyeidi. Unai taulaulau-gaibu yo tauwalobabayayao hekadi se yogagogoidima, na se kabiboda yo magai tamowaidiyao maudoidi se hekoipilidi. Kabo se lau Yasona yona numa unai Paulo yo Sailasi se waseneidi bena se woyaidima boda wa udiyedi. ⁶ Na nige se lobaidi ede Yasona yo taukawamamohoi tamowaidiyao hekadi se tabekokokokolidi se laedi magai wa taukitahetetena lakilakidiyao udiyedi, na se heyoheyoga se wane, "Paulo yo Sailasi tanoubu maudoina tamowaidiyao se hekouyalalayaladiko yo hinage se laomako inai, ⁷ na Yasona iya tauhemiyadi ede. Teina maudoidi ta siya Sisa yona laugagayo tau'utu'utusina matawuwuna se wane tamowai hesau meta iya wasawasa, hesana ede Yesu." ⁸ Hedehedede wa se lapui ede boda wa yo magai taukitahetetena tamowaidiyao wa meta se kouyalayalakalili ⁹ na se hedede Yasona ma kana kahao wa moni lakilakina se tole kabahematausidi,** na kabo se kabigabaedi se lau.

Paulo yo Sailasi Beleya unai

¹⁰ Boniyaina ne unai taukawamamohoi wa Paulo yo Sailasi se hetamalidi se lau Beleya. Se lage menai kabo se lau Dius yodi sunago unai se lauguguya. ¹¹ Na Dius tamowaidiyao Beleya unai taumiya wa meta se lapulapuinamwanamwakalili Paulo yo Sailasi udiyedi, na kabo siya Tesalonika unai taumiya wa. Mayadai badobado kulikuli tabudiyao se kitahekasadi, Paulo yo Sailasi saha se lauguguyaei wa meta mamohoi o nige. ¹² Na se lobai meta yodi lauguguya wa mamohoina, unai Dius tamowaidiyao gwaudi Yesu se kawamamohoiyei, yo Giliki tamowaidiyao, siya sinesineo hekahekasi-sidi yo hinage tatao hekadi.

¹³ Na Dius Tesalonika unai taumiya wa wasa se lapui meta Paulo ede Beleya unai Yaubada wasana ye laulauguguyaei. Unai kabo se laoma boda maudoidi wa se henuwasaedi bena Paulo se hewaiunu. ¹⁴ Unai taukawamamohoi tamowaidiyao wa kadi kahao hekadiyo maiyadi Paulo se hetamalidi se dobi gabwa. Na Sailasi yo Timoti meta Beleya unai se miyamiya. ¹⁵ Na taudobi wa se lulage se dobi na waga hesau unai se gelu se lau Ateni. Ateni unai se lage kabo Paulo ye hededelau maidanao taulau wa udiyedi bena taba se uyo na Sailasi yo Timoti se hetamalimwamwayauyeidi se laoma iya unai.

Paulo Ateni unai

¹⁶ Paulo Ateni unai kana kahao wa ye nayanayaidi, na ye kita meta magai wa unai koitau se badokalili, ede ye nuwayababakalili. ¹⁷ Unai ye lau sunago unai ye hedehedelau Dius yo dagela tamowaidiyao Yaubada taukaihelahuina udiyedi. Yo

** **17:4:** Yaubada taukaihelahuina kaniyona ede iya dagela tamowaina, na ye nuwabuiko Yaubada ye kaihelahui gonogonowana doha Dius tamowaidiyao. ** **17:9:** Moni lakilakina se tole kabahematausidi: Ena Yasona ma kana kahao pilipili hesau se ginauli, kabo gabemani moni wa se kabihekahini, na ena daumwaliyena se miyamiya ye lau ee Paulo yo Sailasi se hetamalidi se lau, kabo moni ne se hai'uyoi.

hinage mayadai maudoina ye lau kabalokulokune unai na ye hedehededelau tau-tupagogoi wa udiyedi, ¹⁸ meta Yesu yo yona tolo'uyo wasana namwanamwana ye wasaduwaiyei. Unai tausonoga tamowaidiyao Paulo maiyanao se hedehedede yo yodi kawamamohoi wa se hetala. Tausonoga wa meta boda labui tamowaidiyao. Hekadi ede Epikulasi kana bodao, yo hekadi Sitoiko bodadiyao.** Hekadi se wane, “Teina tauhedehededegaibu ta saha bena ye lauhekataei?” Na hekadi se wane, “Teina kana kao doha magai hekadi yaubadadiyao** lauhekataedi unai bena ye hekatada.” ¹⁹ Ede Paulo se hai se laei Aliyopagasi** unai na se hededelau unai se wane, “Taba gonowana yom lauhekata hauhauna wa ku hededehehemasalahan kalimayena. ²⁰ Matawuwuna yom hedehedede hauhaudi te ka lapuidi, unai ka henuwa bena kaniyodi kabidi ka kata.” ²¹ Ateni tamowaidiyao maudoidi yo magai hekadi tamowaidiyao menai taumiya mayadai maudoina kadi paisowa ede hedehedede hauhaudi se lapulapuidi yo udiyedi se hedehedede.

²² Na Paulo ye tolo yodi koigogo wa unai na ye hededelau udiyedi ye wane, “Ateni tataodiyao! Ya kita meta yomi taba'ohu unai kwa taubigakalili. ²³ Yogu taihile unai yomi kabataba'ohu ginaulidi ya kaikewaidi na kabakaitalasang hesau ya kita unai teina kulikuli ta ye masalaha: YE LAU YAUBADA NIGE KABINA KA KATA UNAI. Na saha kwa taba'ohui ta nige kabina kwa kata, unai kabo ya hededehehemasalahan kalimiuyena.

²⁴ Yaubada kaiyaulina yo ginauli maudoidi tauginaulidi, iya galewa yo tanoubu Guiyauna. Unai numa tamowai nimadiyena se ginaulidi, meta iya nige udiyedi ye miyamiya. ²⁵ Yo tamowai nige gonowana se sagui matawuwuna nige ginauli hesau unai ye deha, na iya tamowai maudoidi yodi mauli yo yawasidi yo ginauli maudoidi ye moseidi. ²⁶ Tamowai kesega ye ginaulibagunai, na unai boda udoi'udo'i ye ginaulidi, na siya bena tanoubu maudoina se miyahemwayau. Na yodi huya yo yodi teha ye hinelidi udiyedi bena se miya. ²⁷ Yaubada ginauli maudoidi ta ye ginaulidi na ye henuwa tamowai bena iya se wasenei na yodi kaikaipate unai bena iya se lobai, matawuwuna iya maudoida dedekadaena. ²⁸ Doha hinage yomi taukulikuli hekadiyo se hedede se wane, ‘Iya unai ta miya, ta sae yo ta dobi yo ta maumauli.’ Yo hinage se wane, ‘Kita iya natunao.’ ²⁹ Mamohoi, kita Yaubada natunao. Unai taba nige ta nuwatui meta iya kana kao doha koitau, tamowai yodi sonogaena se ginauli gole o siluba o weku unai. ³⁰ Beyabeyana tamowai wa Yaubada nige kabina se kata na iyamo yodi nuwapwanopwano wa unai iya nige saha hesau ye ginauli. Na teina huya ta unai ye hededelau teha maudoidi tamowaidiyao maudoidi udiyedi bena se nuwabui. ³¹ Matawuwuna mayadai ye toleyako unai kabo yona kaisunuwa tamowaina tanoubu maudoina ye hinelidi, na yona hineli ne kabo dudulai unai. Teina ye hemamohoiyei tamowai maudoidi udiyedi matawuwuna Yesu boita unai ye hetolo'uyoi.”

³² Tauboiboita yodi tolo'uyo hedehededena wa se lapui ede hekadiyo Paulo se talatalawasiyei, na hekadiyo se wane, “Ka henuwa bena huya hesau hedehedede ta ku hedede'uyoi ka lapui.” ³³ Na teina unai kabo Paulo koigogo wa ye laugabaei. ³⁴ Na tamowai hekadi se patulau Paulo unai na Yesu se kawamamohoiyei. Kadi boda wa unai

** **17:18:** Epikulasi ma kana bodao se hedede meta tanoubu ta ye bom ye tubu, nige tauginaulina. Yo hinage se wane, taba tamowai hesau ye boita, kabo yaluwana hinage ye boita. Unai tamowai yona mauli namwanamwana ede huya maudoina se bom yodi gadosisi mo se laulauwatanidi yo ye gwaugwauyala mo. Sitoiko bodadiyao hinage se hedede meta tamowai yona huyaboita unai yaluwana hinage ye boita. Na iyamo se hedede meta tamowai bena yona nuwatu mo ye lauwatani, na tauna yona kamkana yo yona namwa taba nige ye modei. Kaniyona ede tamowai nuwana bena iya tauna ye tanuwagai. ** **17:18:** Yaubadadiyao: Tamowai wa Paulo yona hedehedede se lapupwanoli, iya ede, Yesu yo Tolo'uyo wasadi bena ye hededehehemasalahan. Unai hedehedede tolo'uyo se nuwatui

beni yaubada hesau hesana. ** **17:19:** Aliyopagasi kaniyona ede Alesi yona kuduli. Alesi meta Giliki yodi yaubada hesau, iyala yo tulutululu tanuwagadi. Kuduli wa unai meta Ateni yodi tausonoga tamowaidiyao wa yodi kabakoigogo numana. Na yodi koigogo hinage hesana se katai Aliyopagasi.

Daiyanisiyasi, iya meta Aliyopagasi unai taukoikoigogo wa tamowaina hesau, yo hinage waihiu hesau hesana Damalisi, yo hinage tamowai hekadi.

18

Paulo Kolinito unai

¹ Na kabo Paulo Ateni ye laugabaei na ye lau Kolinito. ² Temenai Dius tamowaina hesau hesana Akuila. Iya Pontasi tamowaina, na beyabeyana ye lau teha Italiya magaina lakilakina Loma unai ye miya. Na Loma kadi tanuwaga saesaena Sisa Kolodiyasi ye hedede meta Dius tamowaidiyao maudoidi Loma se dalahaigabaei. Unai Akuila ma mwanena Pilisila se lau Kolinito unai se miya. Nige bayaona na Paulo ye lage, na yona taihile unai ye lobaidi. ³ Akuila ma mwanena kadi paisowa ede tenti** se laulauginauli, na Paulo hinage paisowa wa kabina ye kata. Unai maiyanao se miya na se paisowagogoi. ⁴ Na Sabati badobado Paulo ye lau sunago unai, na Dius yo Giliki tamowaidiyao maiyanao se hedehedede, na Paulo ye kaipate bena Yesu kabina se kata yo se sunumaei.

⁵ Na huyana Sailasi yo Timoti teha Masedoniya unai se laoma, kabo Paulo tentiginauli paisowana wa ye hekaiyawasi na huya maudoina ye laulauguguya. Dius tamowaidiyao udiyedi ye hededehemasalaha meta Yesu iya Keliso ede. ⁶ Ye lau ee Dius tamowaidiyao wa Paulo se hewaiunu yo se kawalupolupoi, kabo kana kaleko ye koinihinihiyeidi, na ye hededelau udiyedi ye wane, “Kwasinamiu giluna komiu kwa bom kalimiuyena! Yau nige kagu giluhesau. Unai kabo ya laugabaegomiu na ya lau dagela tamowaidiyao udiyedi ya lauguguya.” ⁷ Na kabo Paulo sunago wa unai ye pesa na ye lau tamowai hesau hesana Titiyasi Diyasitasi yona numa unai ye lauguguya. Iya meta Yaubada taukaihelahuina** hesau, na yona numa wa meta sunago dedekanaena. ⁸ Na sunago wa badana Kilipasi ma kana bodao maudoidi se kawamamohoi Guiyau unai. Yo hinage Kolinito tamowaidiyao gwaudi Yesu wasana se lapui yo se kawamamohoiyei, ede Paulo ma kana kahao tamowai wa se hebatisoidi.

⁹ Boniyai hesau unai Paulo yona nuwanuwatu unai Yaubada tautau hesau ye hemasalaha unai, meta Guiyau ye hededelau iya unai ye wane, “Tabu ku matausi, na yom lauguguya ne bena ye laulau! Tabu ku mwanomwanou, ¹⁰ matawuwuna yau ede maidam. Nige gonowana tamowai hesau ye hewaiunugo yo ye hekamkamnago. Kana kao ede magai ta unai yogu tamowai se bado.” ¹¹ Na bolimai kesega yo tehana Paulo Kolinito unai ye miya, na huya maudoina Yaubada yona hedehedede unai tamowai wa ye hekatadi.

¹² Huyana wa unai Galiyo yona huyatanuwaga teha Akaiya** unai. Na Dius tamowaidiyao se hebodakesega na Paulo se hewaiunu, na se hai se laei Galiyo yona kabahelahelauhetala unai. ¹³ Na se hegilu se wane, “Teina tamowai ta boda ye hekatadi Yaubada taba'ohuina kabikabina hauhauna unai, meta laugagayo ye utusi.”

¹⁴ Paulo bena kabo ye hedehedede, na Galiyo ye hededelau Dius tamowaidiyao wa udiyedi ye wane, “Dius tamowaidiyao! Taba tamowai ta laulau yababana o yababa lakilakina hesau ye ginauli, kabo gonowana ya lapulau yomi hetalapili ta unai. ¹⁵ Na iyamo hedehedede kaniyodi yo tamowai hesadiyao yo yomi laugagayo debadiyena kwa haikawayagala ta, unai komiu kwa bom kwa tolehedudulai'uyoigomiu. Yau taba nige nuwatu ta ya tolehedudulaidi.” ¹⁶ Kabo ye hedede kabalauhetala numana wa unai se hepesadi.

** **18:3:** Tenti meta tautaitaihile yodi numa, kaleko yo suisui dahidi udiyedi se bodidi. Kaikaiwa se hetolodi na tenti se toleisini kewadi unai, na mainaena se momosihakahinidi. ** **18:7:** Yaubada taukaihelahuina kaniyona ede iya dagela tamowaina, na ye nuwabuiko Yaubada ye kaihelahui gonogonowana doha Dius tamowaidiyao. ** **18:12:** Akaiya meta Loma yodi basileiya tehana hesana, na Kolinito ede Akaiya magaina lakilakina hesau. Yoda huya ta unai Akaiya meta Giliki basileiyana tupwana.

¹⁷ Na kabo boda maudoidi sunago badana Sositenisi se hai na se bibigwadagwadai kabalauhetala numana wa unai. Na Galiyo nige ye modelau udiyedi.

Paulo ye uyo Antiyoka na kabo yona kadau hehaiyonana ye hetubu

¹⁸ Na Paulo sola ye miyamiya Kolinito unai huyalohaloha. Na kabo kana kahao wa ye laugabaeidi na Pilisila yo Akuila maiyanao se dobi Senkiliya. Temenai Paulo yona hedehededekaigwala ye ginauliyako wa debanaena ede iya kuluna wa se yaligabae. Na kabo se gelu bena se lau Siliya.

¹⁹ Yodi kadau wa unai Epeso unai se duna, ede Pilisila yo Akuila temenai se miya.

Na Paulo meta mayadai hisa mo menai ye miya. Yona miya wa unai ye lau sunago unai na Dius tamowaidiyao maiyanao se hedehedede. ²⁰ Na se kaibwada bena maiyadi se babawa, na nige ye henuwa. ²¹ Na yona huyagelu mayadaina unai ye hededelau udiyedi ye wane, “Ena Yaubada yona nuwatuyena, kabo ya uyoma.” Na kabo wagaena ye gelu na Epeso ye laugabaei.

²² Se kadau se lau ee Sisaliya unai se duna. Na Paulo ye pesa ye sae Yelusalema unai ekalesiya bodadi ye hailobaidi. Na kabo ye dobi Antiyoka. ²³ Antiyoka unai mayadai hisa ye miya, na kabo ye dalahai'uyo ye lau Galatiya yo Pilidiya magaidiyao ye kaitaumanaidi na Yesu tauhemuliwatanina maudoidi wa ye hededehebayaodi.

Pilisila yo Akuila Apolosa se hekatanamwanamwae

²⁴ Huyana Paulo sola ma kadauna, na Alesandiliya tamowaina hesau hesana Apolosa ye laoma Epeso. Iya Dius tamowaina tausonoga hesau, na kulikuli tabudi kabidi ye katakalili, ²⁵ yo Guiyau wasana hinage kabina ye kata. Ye hedehedede ma nuwakohihaina yo Yesu wasana ye lauhekatanamwanamwaei. Na iyamo Yowane yona hebahebabatiso mo kabina ye kata, na babatiso Yesu hesanaena nigele. ²⁶ Iya ye hetubu ye hedehedede ma nuwabayaona sunago unai. Na Pilisila yo Akuila yona hedehedede wa se lapui ede se kaibwadai ye lau yodi numa unai, na Yesu wasana unai se hededehasahasai na se hekatanamwanamwaei idohagi Yaubada tamowai ye hemauidi.**

²⁷ Huyana hesau kabo Apolosa ye henuwa bena ye lau Akaiya, tausunuma bena ye saguidi. Ede tausunuma Epeso unai iya se hededehebayaona na leta se kuli ye lau tauhemuliwatani Akaiya unai taumiya wa udiyedi, bena iya se hailobai. Ye lage ede Yaubada yona kabinamwa unai taunuwabui wa ye sagukaliliyeidi. ²⁸ Meta tamowai maudoidi matadiyena ye hededehebayaokalili Dius tamowaidiyao udiyedi na kulikuli tabudi udiyedi ye hemamohoiyei meta Yesu iya Keliso ede.

19

Paulo Epeso unai

¹ Huyana Apolosa Kolinito unai ye babawa, kabo Paulo Pilidiya ye laugabaei na ye dobi Epeso unai ye lage. Temenai tauhemuliwatani hekadi ye lobaidi ² na ye henamaiyeidi ye wane, “Huyana kwa kawamamohoi, Yaluwa Tabuna kwa hai, o nige?” Na se wane, “Nige! Yaluwa Tabuna nige kabina ka kata, yo sola nige wasana ka lapui.” ³ Unai Paulo ye wane, “Na babatiso sahasahana unai se hebabatisoigomiu?” Se wane, “Yowane yona hebahebabatiso.” ⁴ Na Paulo ye wane, “Yowane yona hebahebabatiso meta nuwabui babatisona. Iya ye hededelau boda wa udiyedi meta tamowai hesau kabo ye mulitama, bena iya unai se kawamamohoi. Tamowaina ede Yesu.” ⁵ Hedehedede wa se lapui ede Paulo ye hebabatoidi Guiyau Yesu hesanaena. ⁶ Na huyana Paulo nimana ye tolesae kuludi wa udiyedi meta Yaluwa Tabuna ye

** **18:26:** Idohagi Yaubada tamowai ye hemauidi: Kalina Giliki unai Luka ye kuli, Yaubada yona keda se hekata, o, Yaubada kedana se hekata.

hemwayaudi, na kalina udoi'udoi udiyedi se hedehedede,** yo hinage Yaubada yona nuwatu ye moseidi na se hededehehasilahadi.** 7 Na taubabatiso wa nuwana badodi ede saudoudoi-labui (12).

8 Nawalai haiyona Paulo ye laulau sunago unai na ma nuwabayaona ye laulau-guguya. Na maiyanao se hedehedede yo Yaubada yona basileiya se hetahetala, na yona hedehedede wa unai Dius tamowaidi wa se nuwamasalaha na se nuwabui na Yesu se kawamamohoiyei. 9 Na hekadiyo se nuwakwailolokalili, na nige se henuwa bena se kawamamohoiyei, na boda matadiyena Guiyau wasana se hededeyababaei. Unai Paulo sunago wa ye laugabaei, na tauhemuliwatani maidanao se lau Tailenasi yona kabalauhekata numana unai se koikoigogo. Na mayadai badobado taulaoma maiyanao se hedehedede. 10 Teina paisowa te ye lau ee bolimai labui. Na Dius yo Giliki tamowaidi mauidi teha Eisiya unai taumiya Guiyau wasana se lapui.

Siba natunao Yesu hesana se hepaisowagaibui

11 Yaubada Paulo ye hepaisowa na laulau gigigigibwalikalilidi ye ginaulidi, 12 ede hinage Paulo yona hagesi yo kaleko hekadi ye hepaisowadiko wa se haidi se laedi taikasikasiyebwa udiyedi se hesaudi, ede se namwanamwa, yo hinage yaluwa yabayababadi tamowai se pesagabaedi.

13 Dius tamowaidiyao hekadi kadi paisowa se lau magai hekadi udiyedi yaluwa yabayababadi tamowai se luwuidi wa se hededehepesadi, na se kaipate bena Guiyau Yesu hesana se hepaisowa, na se wane, "Paulo Yesu ye lauguguyaei wa, iya hesanaena ya hededelaowa: Tamowai ta ku pesagabaei!"

14 Boda wa luwadiyena meta Siba natunao tatao haligigi-labui (7). Tamadi meta Dius yodi taukitalasam tauwoyaidi hesau. Taudi haligigi-labui ta tenem kabikabi ne se hepahepaisowa. 15 Na huya hesau yaluwa yabayababana ye hededelau udiyedi ye wane, "Yesu kabina ya kata, yo hinage Paulo kabina ya kata. Na komiu meta kaiteyadi?" 16 Na tamowai wa yaluwa yabayababana wa yona gigibwaliyena ye tolo ede Siba natunao haligigi-labui wa ye luluidi na yodi bayao ye saedikwaidi yo ye bibiheyababakaliliyeidi, na numa wa unai se heloipesa ma kadi gai yo ma taugaibudi. 17 Na wasa wa ye lau Dius yo Giliki tamowaidiyao taumiya Epeso unai na se lapui, meta se matausikalikalili, yo Guiyau Yesu se hededetausaei.

18 Taunuwabuihauhau wa gwaudi se tolo boda matadiyena na yodi yababa se hededehehasilahadi. 19 Na hekadi kukula tauhepahepaisowadi kadi kukula bukadiyao se baheidima na boda wa matadiyena se gabudi. Buka wa maisadiyao se tolegogoidi meta maisadi lakina ede moni siluba** badodi 50,000. 20 Teina doha yo Guiyau yona gigibwali unai iya wasana ye laki ye lau yo ye bayao.

Paulo yona kadau hinelina

21 Ginauli saha se tubutubu ta mulidiyena Yaluwa Tabuna Paulo ye hekata bena ye lau Masedoniya yo Akaiya, na kabo ye uyo Yelusalema. Na ye wane, "Yaubada ye henuwa meta kabo hinage ya lau Loma." 22 Na kabo tausaguina labui Timoti yo Elastasi ye hetamalidi se baguna se lau Masedoniya, na iya sola ye miya huyakubwakubwa teha Eisiya unai.

Epeso unai boda se hetalagegagaga

23 Na huyana ne unai pilipili lakilakina hesau ye tubu Epeso unai Guiyau wasana debanaena. 24 [Pilipili wa tamowai hesau hesana Dimitiliyasi unai ye tubu.] Iya meta siluba paisowana ye ginaginauli, yo hinage yona taupusapusa tamowaidiyao meta se bado. Epeso unai meta Giliki yodi yaubada Atemisi yona numa tabuna. Na Dimitiliyasi

** 19:6: Kalina udoi'udoi meta hinage gonowana ta bui ta wane kalina Yaluwa Tabuna ye moseidi. ** 19:6: Yaubada yona nuwatu se hededehehasilahadi: Iya ede se hededepeloweta. ** 19:19: Moni siluba wa meta dalakama.

maiyana taupaisowa kadi paisowa ede silubaena numa gagigagilidi se laulauginauli kadi kao doha numa tabuna wa, na se lokuneidi, meta unai moni lakilakina se haihai.

²⁵ Dimitiliyasi yona taupaisowa ye yogagogoidima, yo siluba taupaisowaina hekadi hinage, na ye wane, “Tatao, kabina kwa kata meta teina yoda paisowa ta unai moni yo gogo lakilakidi ta haihaidi. ²⁶ Na Paulo kwa kita yo wasana kwa lapuiyako meta ye wane, ‘Tamowai nimadiyena yaubada se ginaulidi meta siya nige yaubada mamohoi.’ Unai bodalakilaki se nuwabui yo Paulo se hemuliwatani, yoda magari ta Epeso unai, yo hinage teha Eisiya maudoina unai. ²⁷ Na yona yababa meta teha haiyona unai: Yoda nimapaisowa ta hesana namwanamwana ta kabo ye gehe, yo yoda yaubada saesaena Atemisi yona numa tabuna hekasisina tamowai kalidiyena kabo ye gehe, yo hinage Atemisi teha Eisiya yo tanoubu maudoina se kaihelahui ta yona didiga kabo se kitadobidobikaliliyei.”

²⁸ Hedehedede wa se lapui ede se koipikalili na ma kalinalakilakidi se heyohoyoga se wane, “Kita Epeso yoda yaubada Atemisi meta ye saekalikalili!” ²⁹ Nige bayaona na magari wa tamowaidi maudoidi meta se hetalagegagakilili. Boda wa Gaiyasi yo Alisitakasi siya Masedoniya tamowaidiyao Paulo maidanao se laoma wa se kabihekahinidi na se woyaidi se laedi konseti kabakaikewa numana unai. ³⁰ Paulo ye henuwa bena ye lau na boda wa matadiyena ye tolo na ye hedehededelau udiyedi, na tauhemuliwatani tamowaidiyao hekadiyo se hededehekaiyawasi. ³¹ Yo hinage magari ne babadadiyao hekadi, siya Paulo kehanao, wasa se hetamalilaei iya unai se kaibwadaei bena tabu ye laulau konseti kabakaikewa unai. Ede Paulo nige ye lau.

³² Konseti kabakaikewa numana unai bodalakilaki wa meta se nuwapwanopwano. Hekadiyo se yogahisae se wane doha teina, yo hinage tamowai hekadiyo ginauli hekadi hesabadi se yogayogahi, na boda wa luwanaena tamowai se bado meta nige kabina se kata matawuwuna saha to se laomagogoi. ³³ Dius tamowaidiyao wa Alekisenda se hededelau unai taba ye sae boda wa matadiyena ye tolo bena pilipili ta ye hededehe-dudulai meta nige Dius kadi giluhesau. Ye tolo na nimana ye lausinidi na ye koyedi bena taba boda wa se mwanou, na ye kaipate bena ye hededelau udiyedi. ³⁴ Na boda wa se kitalobai meta iya Dius tamowaina hesau, ede se koipikalili na mahanalohaloha unai se yogayogahigogoi ma kalinalakilakidi se wane, “Atemisi ye saekalili!”**

³⁵ Na kabo magari ne kadi tanuwaga lakilakina hesau boda wa ye hededehekaiyawasidi na ye wane, “Epeso tamowaidiyao! Tanoubu maudoina kabina se kata meta kita Epeso Atemisi yona numa tabuna yo koitauna galewa ne unai ye bekudobima wa taukitahetetena ede. ³⁶ Na saha kwa hetala'usei ta meta taba nige hesau ye uhalaei o ye nuwapwanopwano. Unai tabu kwa modekalili teina saha kwa lapui ta unai, yo tabu saha hesau yababana kwa ginaginauli. ³⁷ Teina tamowai kwa woyaidima inai ta meta nige numa tabuna unai saha hesau se kaiwahali, yo yoda yaubada nige se hededeheyababa. ³⁸ Ena Dimitiliyasi yo yona taupusapusa tamowaidi se henuwa bena tamowai hesau se hegilu, meta taba se laei tautolehedudulai udiyedi, kabo se hinelihekasa kaiteya yona dudulai. ³⁹ Na ena ginauli hesau bena kwa hedudulai, meta kwa lau magari tamowaidi yodi koigogo unai, na kabo se tolehedudulai. ⁴⁰ Yoda hetalagegagega ta debanaena ya matausikalili, matawuwuna Loma kadi tanuwaga ena taba ye lapui meta kabo se haida yo se hekamkamnada. Na ena taba se henamaiyeida kada mata wuwuna saha, meta nige gonowana saha hesau ta hedede.” ⁴¹ Yona hedehedede gehena wa unai boda wa ye hetamaligwaligwalidi.

** **19:34:** Atemisi ye saekalili! Yodi hedehedede mamohoina meta se yoga se wane, Kai Epeso yoma yaubada Atemisi meta iya ye bom ye saekalili! Kalina Giliki unai teina meta hedehedede kubwakubwana. Unai kalina Saliba unai bena hinage musamusana ye kubwa matawuwuna se yogayogahi.

20

Paulo ye lau teha Masedoniya yo teha Akaiya udiyedi taukawamamohoi wa ye hededehebayaodi, na ye uyo Tolowasi

¹ Huyana hetalagegaga wa ye gehe kabo Paulo tauhemuliwatani wa ye yogagogoidi na ye hededehebayaodi, na kabo ye laukaiyoniyedi na ye dalahai ye lau teha Masedoniya. ² Masedoniya maudoina ye tauhetakikili, na tausunuma tamowaidiyao wa ye hededehebayaodi, na kabo ye kadau ye dobi teha Akaiya. ³ Temenai ye miya nawalai haiyona, na kabo ye kabinonoha na bena ye gelu ye lau teha Siliya. Na ye lapui meta Dius tamowaidiyao se koitalaliu bena kabo se unui, ede nuwana ye hineli'uyoi bena ye yona ye uyo Masedoniya na ye lau Siliya. ⁴ Paulo maiyanao taukadau, siya ede teina:

Sopatelo meta Pilusi natuna, iya Beleya tamowaina,
Alisitakasi yo Sikandasi Tesalonika tamowaidiyao,
Timoti,**

Gaiyasi, iya Debi tamowaina, yo
Tikikasi yo Tolopimasi siya teha Eisiya tamowaidiyao.

⁵ [Se lulagama Pilipi na kabo Paulo kana hegelugelu wa] se baguna se lau Tolowasi unai se nayanayaigai. ⁶ Na Paulo maidagu meta sola Pilipi unai ka miyamiya,** na Pwalawa Nige Yistina Henuwaisinina mulinaena kabo ka gelu. Na mayadai haligigi ka kadauyei, kabo ka duna Tolowasi unai kama kahao wa ka lobaidi, ede temenai ka miya mayadai haligigi-labui.

Yutikasi boita unai ye tolo'uyo

⁷ Yoma miya Tolowasi unai mayadaina gehegehenana meta Sabati, na meimeilahina ne unai ka laomagogoi numa hesau unai bena Guiyau yona kaikaigogo henuwaisinina ka hai. Na Paulo ye lauguguya tamowai wa udiyedi, na ye hedehedede ye lau ee boniyai duwaduwalina, matawuwuna mala ye tom kabo ye dalahai'uyo. ⁸ Yoma kabakoigogo bilina meta numa wa heisina hehaiyonana unai, na lampa gwaudi se gabudi na se kalakalasi. ⁹ Na bili wa windona unai hewali hesau ye tutuli hesana ede Yutikasi. Paulo ye hedehedede ye lau ee hewali wa matana ye kenokeno ede ye keno. Na ye kenomwaloi ede ye beku ye dobi bwatano wa unai ye talu. Na se dobi se hai wa meta ye boitako. ¹⁰ Paulo ye pesadobi na ye gulidobi hewali wa kewanaena na ye sapwali, na kabo ye hededelau tamowai wa udiyedi ye wane, "Tabu kwa nuwadubu! Hewali ta ye silasilawa, nige ye boita." ¹¹ Na kabo Paulo maidanao tamowai wa se mwalae se seuyo bili wa unai na Paulo pwalawa ye hai ye kesi na mauidi se kaikaigogo. Na ye hedehedede ye lau ee mala ye tom. Kabo ye lautokiyeyidi na ye laugabaedi. ¹² Na hewali wa ye namwanamwa, unai nuwadi se talu na se lau magai.

Epeso yodi dubu babadadiyao Paulo ye laukaiyoniyedi

¹³ Tolowasi unai Paulo yona hineli ye ginauli meta ye bom ye yona ye lau Asosi, na kai meta wagaena ka gelu ka baguna ka lau magai wa unai iya ka nayanayai. ¹⁴ Asosi unai ye lobaigai ede ka usaei na ka lau Mitilini. ¹⁵ Mayadai helabuina Mitilini unai ka gelu na ka lau Kaiyosi bwanabwanaluwana ka laugabaei, na mayadai hesauna ne unai meta Samosi bwanabwanaluwana unai ka duna na ka kaiyawasi. Na mayadai hehasina unai Miletusi unai ka duna. ¹⁶ Paulo ye nuwatuhekanonohaiyako meta taba nige Epeso unai ka duna, matawuwuna ede nige ye henuwa mahana ye gabaei teha Eisiya ne unai, na ye henuwa bena ye laumwamwayau ye lau Yelusalema na kabo Pentekosi mayadaina henuwaisinina.

** **20:4:** Timoti wasana meta Apostolo 16:1-3 udiyedi. ** **20:6:** Ka miyamiya: Luka ye kuli, kai, gonogonowana doha Apostolo 16:10 unai. Kaniyona ede Luka nige ye lau teha Akaiya, na huyana Paulo ma kana bodao se laoma Pilipi, kabo Luka ye hailobaidi na kabo maiyanao se kadau.

¹⁷ Miletusi unai Paulo wasa ye hetamalisaei Epeso, bena dubu babadadiyao se dobima na maiyadi se hedehedede. ¹⁸ Se dobima Paulo se hailobai na kabo ye hededelau udiyedi ye wane, “Huya bagubaguna yogu lage teha Eisiya ta unai ye laoma ee teina mayadai ta unai meta yogu paisowa maudoidi kabidi kwa katako. ¹⁹ Guiyau yona paisowa ta ya ginauli ma nuwadobidobigu yo ma matasulugu. Na laukita ya hekalodi meta Dius tamowaidiyao hekadi se koitalaliu bena se unuigau. ²⁰ Yo hinage kabina kwa katako meta ma nuwabayaogu kabasaguigomiu, iya ede Guiyau wasana ta, ya lauguguyaei boda matadiyena yo numa kesega kesega udiyedi. ²¹ Huya maudoina ya hededelau Dius yo Giliki tamowaidiyao udiyedi bena taba se nuwabui yo se patulau Yaubada unai yo Guiyau Yesu Keliso se sunumaei.

²² Na Yaluwa Tabuna yona lauheligau ta unai kabo ya lau Yelusalema, na nige kabina ya kata menai kabo saha ye tubu kaliguyena. ²³ Na yogu kabalau magaidi lakilakidiyao maudoidi udiyedi meta Yaluwa Tabuna ye hekatagauko kabo Yelusalema unai se tolegau numatutugudu unai yo se hekamkamnagau. ²⁴ Na iyamo yogu mauli meta nige ya modei, na Guiyau Yesu paisowa ye haiyama ta taba ya hegehe. Na paisowana ede meta Yaubada yona kabinamwa wasana namwanamwana hededehehemasalahana tamowai maudoidi udiyedi.

²⁵ Teina huya ta kabina ya kata meta taba nige kwa kita'uyoigau, na komiu ede tamowaidiyao Guiyau yona basileiya wasana ya lauguguyaeiyako kalimiuyena. ²⁶ Unai ya hededelaowa maudoimiu kalimiuyena: Ena kaiteya ye boita na ye lau kaiwa kalakalasina unai, giluna meta yau nige kaliguwai, ²⁷ matawuwuna yau nige ya matausi yo nige ya talutolo, na Yaubada yona nuwatu maudoidi meta ya hededehehemasalahadiko kalimiuyena. ²⁸ Unai kwa kitahetete'uyoigomiu yo hinage Yaubada yona mamoe yawoina kwa kitahetetedi. Yaluwa Tabuna ye hetologomiu komiu tauwoyawoya, unai Yaubada yona ekalesiya bodadiyao kwa kitahetetedi, siya ede iya kwasinana unai ye hemaisadiko wa. ²⁹ Kabina ya katakalili meta yau ya laugabaeigomiu ta mulina ne unai kabo taulauhekatalupolupo doha kedewa kaikaikalasidiyao se laoma luwamiuyena, na Yaubada yona mamoe yawoina kabo se hetatagwaligwalidi. ³⁰ Yo hinage bodamiu ta unai kabo tamowai hekadi se tolosaema na hedehedelupolupo se ginaulidi bena Yaubada yona tamowai se woyahesuwaladi. ³¹ Unai bena matamiu se nega yo kwa kitanamwanamwakalili! Bena kwa nuwanuwatui meta bolimai haiyona udiyedi nige ya kaiyawasi na boniyai yo mayadai ya hedehedehasahasagomiu ma matasulugu.

³² Unai ya tolegomiu Yaubada nimanaena. Yona kabinamwa wasana bena kwa nuwanuwatui. Wasa wa gonowana ye hebayaogomiu yo yona kainauya** ye mosehekawa kalimiuyena doha hinage ye mosei yona tamowai*** maudoidi udiyedi.

³³ Yau sola nige tamowai hesau yona moni gole o siluba, yo kana kaleko ya henuwa na ya haigaibui. ³⁴ Komiu maudoimiu kabina kwa kata meta yau nimagu ta unai ya paisowa, na paisowa ya ginaulidi ta meta udiyedi yau yo kagu kahao ya saguigai. ³⁵ Ginauli maudoidi ya ginaulidi ta udiyedi ya hekatagomiu meta bena kwa paisowabayao na deha tamowaidiyao kwa saguidi. Ginauli ta kwa ginaulidi na Guiyau Yesu yona hedehedede kwa nuwanuwatuidi, doha ye wane, ‘Ta kaikainauya meta laulau namwanamwana, na kabo kainauya ta haidi.’***

³⁶ Paulo ye hedehededegehe kabo maiyanao se tulibono na ye tapwalolo. ³⁷ Ye tapwalologehe kabo se haitalagadoi yo se sumtai na se dou. ³⁸ Saha ye

** **20:32:** Kainauya ta meta Yaubada yona hededehegunuma maudoidi yona tamowai udiyedi, doha mauli nige kana siga, Yaluwa Tabuna, yababa nuwatugabaedi, galewa, yo yona henamwa maudoina. ** **20:32:** Yaubada yona tamowai: Guiyau yona tamowai hededehehemasalahana ku hasili. ** **20:35:** Yesu yona hedehedede ta kalina Giliki unai kaniyona hesau, iya ede, Taukaikainauya meta gonowana ye gwauyala na kabo kainauya tauhaina. Yesu wasana bukana hasi (4) udiyedi Yesu yona hedehedede ta nige se kuli.

henuwayababakaliliyeidi meta Paulo yona hedehedede ye wane, “Taba nige kwa kita'uyoigau.” Na kabo maiyanao se laulaugogoi se dobi waga.

21

Miletusi unai se kadau se lau Yelusalema

¹ Epeso yodi dubu babadadiyao wa ka laukaiyoniyeidi na kabo ka gelu na ka kuke ka dudulai ka lau Kosa bwanabwanaluwana unai. Mala ye tom kabo ka lau Lodosi bwanabwanaluwana, na kabo ka lau Patala. ² Menai waga hesau ka lobai ye laulau teha Penisiya ede unai ka gelukawa na ka kuke ka lau. ³ Saipulusi bwanabwanaluwana ka kitasaei tehaseuseulimai ne unai na ka laugabaei ka lau teha Siliya, na Taiya unai ka duna, iya ede waga wa kana kai'usa gogodiyao kabahepesadi magaina. ⁴ Tauhemuliwatani hekadi ka lobaidi ede menai maidamaiyao ka miya mayadai haligigi-labui (7). Na Yaluwa Tabuna tamowai wa ye hekatadi ede Paulo se kaibwadai bena tabu ye laulau Yelusalema.

⁵ Yoma miya mayadaina gehegehena wa unai tauhemuliwatani wa ma mwanediyao yo natudiyao maidamaiyao ka dobi kabagelu wa gadowana unai ka lulage, ede nagali wa unai ka tulibono na ka tapwalolo. ⁶ Mulina ne unai ka laukaiyoni na kabo ka dobi waga wa unai ka gelu, na siya se seuyo yodi magai.

⁷ Taiya ka laugabaei na ka lau Tolemaisi unai ka duna. Taukawamamohoi menai taumiya wa ka hailobaidi na maidamaiyao ka miya mayadai kesega. ⁸ Mala ye tom ede ka gelu'uyo ka lau Sisaliya. Menai Pilipo taulaulauguguya** yona numaena ka miya. Iya meta Yelusalema unai tamowai haligigi-labui (7) se kaisunuwai'useidi wa** kadi kaha hesauna. ⁹ Iya natunao sinesineo hasi nuwanuwasupudiyao. Siya meta se hedehededepeloweta.

¹⁰ Mayadai hisa menai ka miya na yoma miya wa unai tamowai hesau hesana Agabasi Yudeya unai ye dobima kalimaiyena, iya meta peloweta hesau. ¹¹ Iya kabo Paulo kana dagilolo ye hai na ye bom kaena yo nimana ye pai'uyoidi na kabo ye wane, “Yaluwa Tabuna ye hededelaoma ye wane, ‘Dius tamowaidiyao Yelusalema unai dagilolo ta tanuwagana kabo se pai doha teina na se mosegabaei dagela tamowaidiyao udiyedi.’ ”

¹² Hedehedede wa ye hedede na ka lapui, unai magai wa unai taukawamomohoi tamowaidiyao hekadi maidamaiyao Paulo ka hededenuwahi tabu ye saesae Yelusalema.

¹³ Na Paulo ye hededelaoma ye wane, “Saha douna kwa doudou ta? Yomi dou ta unai yau nuwagu ta kwa hebasabasa, na ya nonohakaliliko bena se paigau yo taba hinage Yelusalema unai se unuhemwaloigau Guiyau Yesu debanaena.” ¹⁴ Na nige gonowamai ka nuwakoi na ka hededenuwahi, unai ka wane, “Besi, na Guiyau yona nuwatu mo ta lauwatani.”

¹⁵ Yoma miya menai mayadaidi wa se gehe ede ka kabinonoha na ka sae Yelusalema.

¹⁶ Tauhemuliwatani hekadi Sisaliya unai maidamaiyao ka sae, na se woiaigai ka lau Menasona yona numa unai ka miyamiya. Iya meta Saipulusi bwanabwanaluwana tamowaina yo hinage tauhemuliwatani bagubagunana hesau.

Paulo ye lage Yelusalema unai

¹⁷ Yoma huyalage Yelusalema unai taukawamamohoi maudoidi se hailobaigai ma gwaugwauyaladi. ¹⁸ Mala ye tom kabo Paulo maidamai ka lau Yamesi ka kaitaumanai, na dubu babadadiyao maudoidi meta hinage se laomagogoi menai. ¹⁹ Paulo ye lautokiyeidi, na kabo yona paisowa yo saha Yaubada ye ginaulidi dagela tamowaidiyao udiyedi wa wasadi maudoidi ye hedededi dubu babadadiyao wa udiyedi.

** 21:8: Pilipo taulaulauguguya wasana ta hasili Apostolo 8:4-40 unai.

** 21:8: Tamowai haligigi-labui se

kaisunuwai'useidi wa wasadi ku hasili Apostolo 6:1-7 unai.

²⁰ Hedehedede wa se lapui ede se noko yo Yaubada se hedebasaei. Na se hededelau Paulo unai se wane, “Kama kaha! Ku kita, Dius tamowaidiyao bodalaki-laki se kawamamohoi Yesu wasana unai, na maudoidi meta Mose yona laugagayo udiyedi se kitalaukalili yo se miyawatanikaliliyeidi. ²¹ Na wasalupolupo se lapui meta yom paisowa wa unai Dius maudoidi, siya dagela magaidiyao udiyedi taumiya, ku hededehekaiyawasidi tabu se kitalau Mose yona laugagayo unai, yo tabu natudiyao loheloheyao se hepehepelitomedi, yo tabu Dius kada kulutubu kabikabidi maudoidi se miyamiyawatanidi. ²² Taba kabim se kata meta kowa ede inai, kabo saha ta ginauli? ²³ Unai kai yoma nuwatu ede teina: Tamowai hasi (4) ede inai siya yodi kaigwala huyadi wa se gehe.** ²⁴ Maidamwao kwa lau Numa Tabuna ne unai na lauhe'a'a kabikabidi kwa ginaulidi. Na ginauli saha kabo se hepaisowadi ne ku hemaisadi, na kabo kuludiyao wa se yaligabaedi. Teina unai kabo tamowai maudoidi se kitago yo kabim se kata meta kowa hinage Dius yoda laugagayo ta ku miyawatanidi na saha se lapuiyako wa meta nige mamohoina. ²⁵ Na dagela tamowaidiyao siya taukawamamohoi yodi ka kulikuliko na ka hededelau udiyedi meta nige Mose yona laugagayo maudoina bena se lauwatani, na laugagayo hisahisadi mo: Ena kai se kaitalasyedi koitau udiyedi, tabu se kaikaidi, tabu kwasina se numanuma, suisui gadona se sipwakiki na ye mwalo tabu se kaikai, yo hinage ganaganawali tabu se miyamiyaidi.”

²⁶ Yodi nuwatu wa Paulo ye kawanamwanamwaei, unai mala ye tom ede se hetubu lauhe'a'a kabikabina se ginauli. Na kabo ye mwalaesae Numa Tabuna unai na taukaitalasyam udiyedi ye hededehemasalah meta mayadai saha unai kabo taudi hasi wa yodi lauhe'a'a mayadaidi se gehe na yodi kaitalasyam se baheidima na se gabudi.

²⁷ Yodi lauhe'a'a mayadaidi haligigi-labui (7) sola nige se gehe, na Dius tamowaidiyao hekadiyo teha Eisiya unai se laoma. Siya Paulo Numa Tabuna wa unai se kita ede boda se henuwasaedi na iya se kabihekahini. ²⁸ Na se heyoheyoga kalina lakilakiyena se wane, “Isalaela tamowaidi maudoimiu, kwa saguigai! Teina tamowai ta meta teha maudoina udiyedi ye hededeheyaheyababada, yo tamowai maudoidi ye hededehekaiyawasidi bena Dius yoda laugagayo tabu se miyawatanidi, yo yoda Numa Tabuna ta ye hededeheyaheyababa. Yo hinage Giliki tamowaidi ye woyaidima Numa Tabuna ta unai na teha tabuna ta ye hebikikaliliyei!” ²⁹ Matawuwuna huya hesau unai Epeso tamowaina hesau hesana Tolopimasi, iya meta dagela tamowaina, maidana Paulo se kitadi se taitaihilelabulabui. Unai se nuwatugaibu meta bena Paulo tamowai ta ye woyahemwalaeyako Numa Tabuna ne unai.

³⁰ Yelusalema tamowaidi maudoidi Paulo se kouyalayalakaliliyei. Unai se laomagogoi Numa Tabuna wa unai na Paulo se tabehepesa, na kabo Numa Tabuna yona polisi gana gududiyao wa se guduidi. ³¹ Paulo se biteligwadagwadai na se kaipate bena se koihemwaloi. Na wasa wa ye lau Loma yodi iyala kapinana ye lapui meta Yelusalema unai hetalagegagaga ye lakikalili. ³² Unai tau'iyala hekadiyo yo yodi sentuliyo ye haidi na maidanao se heloigogoi se dobi tauhetalagegagaga bodadiyao wa udiyedi. Boda wa maudoidi tau'iyala tamowaidi ma kadi tanuwaga se kitadi ede Paulo se kabigabaei.

³³ Iyala kapinana wa Paulo ye hai na ye hededelau yona tau'iyala tamowaidiyao wa udiyedi na seni labui udiyedi se pai. Na kabo boda wa ye henamaiyeidi ye wane, “Teina tamowai ta kaiteya, yo saha yababana ye ginauli?” ³⁴ Boda wa luwadiyena tamowai hekadi ginauli hesau se heyoheyogaei, na hekadi hinage ginauli hesau se heyoheyogaei, na iyala kapinana wa nige gonowana hedehedede mamohoina ye lapulobai, matawuwuna ede hetalagegagaga wa ye lakikalili. Unai ye hededelau yona iyala tamowaidiyao udiyedi bena Paulo se laei yodi kabamiya numana wa unai. ³⁵ Se lage kaba'utu'utusae wa unai na boda wa yodi kabi wa ye saekalili ede iyala tamowaidiyao

** 21:23: Kaigwala ta meta Nasilaiti kaigwalana.

wa Paulo se lausini na se bahei se saei. ³⁶ Tauhemuliwatanidi bodana maudoidi wa se yogayogahilau ma kalinalakilakidi se wane, “Kwa koihemwaloi!”

³⁷ Tau'iyala tamowaidiyao wa bena kabo Paulo se bahehemwalae numa wa unai, na kalina Giliki unai ye wane, “Iyala kapinana, gonowana taba saha hesau ya hedede kalimyena?” Na iyala kapinana wa ye siliyata na ye hededelau unai ye wane, “Giliki kalinadi kabina ku kata? ³⁸ Kowa nuwana Aikupito tamowaina, e nige? Lahinaidi iyala ku hetubu yo hinage taukaikaiunu tamowaidiyao badodi 4,000 ku woyahaidi kwa lau balabalaena kwa miya?” ³⁹ Na Paulo ye hededebui ye wane, “Yau meta Dius tamowaina, na yogu magai Tasusi teha Silisiya unai meta tamowai maudoidi kabina se kata. Na taba gonowana ya hedehededelau tamowai ta udiyedi?” ⁴⁰ Iyala kapinana wa Paulo yona nuwatu wa ye kawanamwanamwaei, unai Paulo se hetolodobiyei kaba'utu'utusae wa unai, na nimanaena tamowai wa ye koihekaiyawasidi, tabu se gegagega. Ede maudoidi wa se mwanou, na kabo kalina Hebelu unai ye hedehededelau udiyedi.

22

¹ Paulo ye wane, “Tamaguwao yo kagu kahao, kwa lapulapuinanamwanamwa na ginauli saha se tubu wa bena ya hededehemasalahadi.” ² Na boda wa se lapulapui meta Paulo kalina Hebelu unai ye hedehedede ede se mwanou na se lapulapui. Na Paulo ye wane, ³ “Yau meta Dius tamowaina, teha Silisiya magaina hesau hesana Tasusi unai se labasigau, na Yelusalema unai ya lakilaki. Kada kulutubu yodi laugagayo udiyedi Gamaliyela ye hekatanamwanamwaegau. Huyana ne unai Yaubada yona paisowa ya ginauli ma nuwakohihaigu gonogonowana doha komiu wau teina mayadai ta. ⁴ Yesu Keliso tauhemuliwatanina ya hekamkamnadi yo ya unuhemwaloidi. Tatao yo sinesineo ya paidi yo ya toledi numatutugudu unai. ⁵ Taukaitalasang saesaena yo Dius babadadiyao bodadi meta gonowana se hemamohoiyei, matawuwuna hinage leta se haidima na ya baheidi ya lau kadi kahao Damaseko unai taumiya udiyedi, na ya dalahai bena kabo menai tamowai ya paidi na ya laedima Yelusalema, na ka toledi numatutugudu unai.

⁶ Ya laulau Damaseko ya hanahanawui mayamayadailakiyena, na kabo galewa ne unai mala lakilakina ye sinadobima kaliguyena. ⁷ Meta ya gulidobi bwatano ne unai, na kalina hesau ya lapui ye hedehededelaoma kaliguwai ye wane, ‘Saulo! Saulo! Idohagi to ku hekamkamnagau ta.’ ⁸ Na ya wane, ‘Guiyau, kowa kaiteya?’ Na kabo kalina wa ye wane, ‘Yau Yesu Nasaleta tauna, yau ede ku hekamkamnagau ta.’ ⁹ Na kagu kahao maidaguwao wa mala wa dawayana se kita, na kaiteya maidagu ka hedehedede wa meta nige kalinana se lapui. ¹⁰ Na ya henamai ya wane, ‘Guiyau, saha kabo ya ginauli?’ Na Guiyau ye hededelaoma ye wane, ‘Ku tolo na ku lau Damaseko. Temenai kabo tamowai hesau kam paisowa ye hedede kabo saha ku ginaulidi.’ ¹¹ Kagu kahao maidaguwao wa se kabinimaigau na se woiaigau ka lau Damaseko. Matawuwuna ede mala wa dawayana matagu wa ye heyababadi.

¹² Damaseko unai tamowai hesau hesana Ananiya ye kitagau. Iya meta laugagayo taulauwataninamwanamwaena yo hinage Dius tamowaidiyao menai taumiya meta iya se kitahenamwa. ¹³ Na dedekagu wa unai ye tolo na ye wane, ‘Kagu kaha Saulo, matam ku helala!’ Na mahanana ne unai matagu wa se lala'uyo, na gonowana ya kaikewa'uyo na Ananiya ya kita. ¹⁴ Na kabo ye hededelaoma ye wane, ‘Kada kulutubu yodi Yaubada ye kaisunuwaigo bena yona nuwatu kabidi ku kata yo [keda wa unai] Dudulai Tamowaina** ku kita yo yona hedehedede kawana unai ku lapuidi. ¹⁵ Kowa kabo saha ku kitadi yo ku lapuidi wa tauhedehemasalahadi teha maudoina tamowaidiyao udiyedi. ¹⁶ Unai saha ku nayanayai, ku lau ku babatiso na Yesu ku sunumaei na yom yababa ye deuligabaedi.’ ¹⁷ Na kabo ya uyo Yelusalema, na mayadai hesau ya lau Numa

** 22:14: Dudulai Tamowaina ne, iya ede Yesu.

Tabuna unai ya tapwatapwalolo na Yaluwa Tabuna ye taukasinigau, ¹⁸ na tautau hesau ye hekitagau meta Guiyau ye hedehededelaoma kaliguwai ye wane, 'Mwamwayau, Yelusalema ku laugabaei, matawuwuna ede yom hededehemasalahagau ta taba nige se kawamamohoiyeidi.' ¹⁹ Na ya wane, 'Guiyau, tamowai ta kabigu se katakalili meta ya lau sunago maudoidi udiyedi na taukawamamohoiyeigo ya haidi ya sapidi yo ya toledi numatutuguduyena. ²⁰ Yo hinage kabigu se kata meta huyana tauhededehemasalahago Setepano se koihemwaloi meta yau maiyadi yo ya talam, na taukoihemwaloina wa kadi kwama ya kitahettedi.' ²¹ Na kabo Guiyau ye hededelaoma kaliguyena ye wane, 'Nige! Yelusalema ku laugabaei, na kabo ya hetamaligo ku lau kedaloha dagela tamowaidiyao ne kalidiyena.' "

²² Boda wa se lapulau Paulo yona hedehedede wa unai ye laoma ee ye wane bena Guiyau iya ye hetamali dagela tamowaidiyao udiyedi. Hedehedede wa se lapui ede se kouyalalayalakalili na se yogahilakilakisae se wane, "Teina tamowai ta nige gonowana taba ye maumauli! Kwa laehesuwala na kwa koihemwaloi!"

²³ Na boda wa Paulo se yogayogahiyei yo kadi luwuluwu se haigabaedi na nagali se kabigagaloidi na se hesulusaedi. ²⁴ Kabo iyala kapinana wa ye hedede bena Paulo se woyahemwalae numa wa unai na se sapi yo se henamaiyei kana mata saha to boda wa ma kouyalalayadi na se yogayogahiyei. ²⁵ Paulo se paihekahinilaei duu hesau unai bena kabo se sapi, na ye hededelau sentuliyo temenai tautotolo wa unai ye wane, "Ku nuwatui ye dudulai meta Loma yona laugagayo logulogunaena taumiya tamowaina hesau, ena nige kana mata hesau kwa lobai, na kabo kwa sapigaibui?" ²⁶ Sentuliyo wa Paulo yona hedehedede wa ye lapui ede ye lau kana tanuwaga unai ye hededelau ye wane, "Saha kabo ku ginauli? Teina tamowai ta meta iya Loma yona laugagayo logulogunaena taumiya tamowaina hesau." ²⁷ Iyala kapinana wa ye lau Paulo ye henamaiyei ye wane, "Mamohoi kowa Loma yona laugagayo logulogunaena taumiya hesau?" Na Paulo ye talam ye wane, "Aa, iya ede." ²⁸ Iyala kapinana wa ye wane, "Yau meta moni lakilakina ya tole Loma taukitahetetenamowaidiyao udiyedi na kabo se talameigau ya hemala Loma yona laugagayo logulogunaena taumiya tamowaina hesau." Na Paulo ye wane, "Yau meta sinagu yo tamagu Loma yona kitahetete yo yona laugagayo logulogunaena se miya na unai se labasigau." ²⁹ Ede tamowai bena kabo Paulo se pidili yo se henahenamaiyei wa se sigisuwala. Na iyala kapinana wa ye siliyata yo ye matausikalili, matawuwuna ede Loma yona laugagayo logulogunaena taumiya tamowaina hesau ye senigaibui.

³⁰ Mala ye tom kabo iyala kapinana wa bena Paulo kana mata mamohoina ye loyai, idohagi to Dius tamowaidiyao se hegilu. Unai ye hedede nimana mainadi se yailigabaedi, na kabo ye hedede Dius yodi taukaitalasam tauwoyaidi yo Sunedeli tamowaidiyao maudoidi se laomagogo na kabo Paulo se woyaiyama matadiyena ye tolo.

23

¹ Paulo ye kitadudulailau Sunedeli bodadi udiyedi na ye wane, "Kagu kahao, ya nuwatui yogu miya yo yogu paisowa ta Yaubada matanaena ye dudulai yo ye namwa, ye laoma ee teina mayadai ta unai." ² Yona hedehedede wa unai ede taukaitalasam saesaena Ananiya ye hededelau kana kahao Paulo dedekanaena tautotolo wa udiyedi ede kawana wa nimadiyena se koigudugudui. ³ Paulo ye hededelau Ananiya unai ye wane, "Kowa meta taukailupolupo mamohoi, unai Yaubada kabo ye hekamkamnago. Yom kabatuli me unai ku tuli na Mose yona laugagayo unai bena ku tolehedudulaigau, na kowa meta laugagayo ta ku utusikaliliyei matawuwuna ede ku hedede na kam kahao kawagu ta se koigudugudui." ⁴ Na Paulo dedekanaena tautotolo wa se hededelau unai se wane, "Idohagi to Yaubada yona taukaitalasam saesaena ku dilamatai?" ⁵ Kabo Paulo ye hededelau udiyedi ye wane, "Kagu kahao, nige kabina ya kata meta iya taukaitalasam

saesaena. Doha kulikuli tabuna unai ye wane, ‘Tabu tauwoyawoya tamowaina hesau ku hededeheyaheyababa.’ ” *(Esodo 22:28)*

⁶ Na Paulo ye nuwatulobai meta Dius babadadiyao bodadi wa unai meta hekadi Sadusiya yo hekadi Paliseya. Unai ye hededelakilaki ye wane, “Kagu kahao, yau tamagu meta Paliseya tamowaina, na yau hinage Paliseya tamowaina hesau. Na yau kwa helauhetalagau ta matawuwuna ede yogu sunuma yo yogu kawamamohoi meta tauboiboita kabo se tolo'uyo.” ⁷ Yona hedehedede wa unai ede haikawayagala ye tubu Paliseya yo Sadusiya bodadi wa udiyedi, ede boda wa se hekoilabuiyei. ⁸ Kaniyona ede Sadusiya bodadi se wane, taba nige tauboiboita se tolo'uyo, nige anelu, yo hinage nige yaluyaluwa. Na siya Paliseya bodadi meta se wane tauboiboita kabo se tolo'uyo, yo hinage anelu yo yaluyaluwa meta mamohoi.

⁹ Na haikawayagalalakilaki ye tubu na laugagayo taulauhekataena hekadi siya Paliseya se tolo na se hededebayao se wane, “Tamowai ta unai nige yababa hesau ka lobai. Taba yaluwa o anelu hesau Yaubada yona nuwatuyena ye hededelau tamowai ta unai tabu ta haihaikawayagala unai.” ¹⁰ Haikawayagala wa ye lakikalili na Paulo se tabetabei'usei, ede iyala kapinana wa ye matausikalili madai Paulo se tabehemwaloi. Unai ede ye hededelau yona tau'iyala tamowaidiyao wa udiyedi na se dobi Paulo se gilihai se laei yodi kabamiya numana wa unai.

¹¹ Boniyaina wa unai, kenosuwaiyena Paulo Guiyau ye kita dedekana wa unai ye totolo na ye hedehedelau unai ye wane, “Paulo, tabu ku matausi, na ku nuwabayao! Yelusalema unai ku hededehehemasalahagauko, na gonogonowana doha kabo hinage Loma unai ku hededehehemasalahagau.”

Dius tamowaidiyao hekadi se koitalaliu bena Paulo se unuhemwaloi

¹² Mala ye tom kabo Dius tamowaidiyao hekadi se laomagogoi na se koitalaliuwadawadam na se hededekaigwala se wane, “Taba nige kai ta kai yo waila ta numa kana siga ee Paulo ta koihemwaloi.” ¹³ Badodiyao ede tatao-labui-se-mate (40) ye dikwai. ¹⁴ Maudoidi se lau taukaitalasam tauwoyaidi yo Dius babadadiyao udiyedi na se wane, “Ka kaigwalako meta taba nige kai ka kai yo waila ka numa, kana siga ee Paulo ka koihemwaloi. ¹⁵ Unai komiu yo Sunedeli maudoina maidamiyao kwa lau iyala kapinana kwa lupoi na kabo Paulo ye leyawa bena kabo kana mata kwa wasenamwanamwaei. Na kai kabo keda ne unai ka nayai na yona laoma ne unai kabo ka koihemwaloi.”

¹⁶ Yodi koitalaliu wa Paulo louna natuna ye lapui ede ye lau tau'iyala yodi kabamiya numana wa unai na yona bada wa yona ye hedehedede. ¹⁷ Ede Paulo sentuliyo hesau ye yoganeiyama na ye hededelau unai ye wane, “Teina hewali ta nuwatu hesau iya unai. Ku woyalaei iyala kapinana unai, na hewali ta kabo yona nuwatu ye hededehehemasalaha na ye lapui.” ¹⁸ Se lau ede sentuliyo wa ye hededelau kana tanuwaga unai ye wane, “Paulo, iya numatutugudu unai taumiya wa, ye hededelaoma ede hewali ta ya woyaiyama bena nuwatu hesau ye hededehehemasalaha kalimwai.” ¹⁹ Iyala kapinana hewali wa nimana ye kabi na ye woyahesuwala na ye henamaiyei ye wane, “Nuwatu saha bena ku hedede kaliguwai?” ²⁰ Hewali wa ye wane, “Dius tamowaidiyao se koitalaliuko meta kabo se lupoiyo na bena Paulo kabo ku hetamalidobiyei Sunedeli unai bena kana mata se wasenamwanamwaei. ²¹ Yodi nuwatu ta meta nige mamohoina, matawuwuna ede tamowai badodi tatao-labui-se-mate (40) yo hekadi hinage se nonohako yo se hededekaigwalako meta taba nige se kaikai yo waila se numa kana siga Paulo se koihemwaloi. Siya meta se nonohako, na se nayanaya mo kalimyena bena ku talamyai.” ²² Iyala kapinana wa ye hededelau hewali wa unai ye wane, “Tabu tamowai hesau unai ku hededelau meta yodi nuwatu ta ku hededehehemasalahagauko!” Na kabo hewali wa ye hetamali ye lau.

²³ Na kabo sentuliyo labui ye yoganeidima na ye wane, “Tau'iyala tamowaidiyao badodi 200 kwa haidi, yo hinage hosi taugeluidi badodi 70, yo taukabiwamali badodi 200, se kabinonoha na boniyai 9 kiloki kabo kwa dalahai kwa lau Sisaliya. ²⁴ Paulo yona kabagelu hosidi kwa kabinonohaidi na unai kabo kwa laei gabana Peliki** unai. Na Paulo kwa kitahetetenamwanamwaei.” ²⁵ Na kabo gabana Peliki yona leta ye kuli ye wane,

²⁶ “Yau Kolodiyasi Lisiyasi, ya kulikulilaowa kowa Peliki kalimwai: Yauwedolaki-laki yogu wasawasa.

²⁷ Teina tamowai ta meta Dius tamowaidiyao se hai na bena se koihemwaloi, na yau yo yogu iyala tamowaidiyao ka dobi ede ka gilihai, matawuwuna ede hedehedena ya lapui meta iya Loma yona laugagayo logulogunaena taumiya tamowaina hesau.

²⁸ Na ya henuwa bena kabina ya kata yababa saha ye ginauli to bena se koihemwaloi ne, unai ka laei Sunedeli unai na kana mata ka wasenei. ²⁹ Ya lobai meta Dius yodi laugagayo debanaena tamowai ta se hai, na nige kana mata hesau ya lobai unai taba se koihemwaloi o se tole numatutuguduyena. ³⁰ Na hedehedede ya lapui meta tamowai ta se koitalaliuyei bena kabo se koihemwaloi, unai ede ya hetamalimwamwayauyei ye laowa kalimwai, yo ya hedede meta tauhegiluna tamowaidiyao bena hinage se laowa na kadi mata saha se hededehe masalahadi kalimwai.

[Yauwedo yo kaiyoni.]

³¹ Unai tau'iyala tamowaidiyao meta iyala kapinana yona hedehedede wa se lauwatani na boniyaina ne unai Paulo maiyadi se lau ee magai hesau hesana Antipatilisi** unai se lage. ³² Mala ye tom kabo hosi taugeluidi wa maiyadi Paulo se lau Sisaliya, na hekadi wa se uyo Yelusalema. ³³ Se lage Sisaliya unai ede leta wa yo Paulo se moselaedi gabana Peliki unai. ³⁴ Leta wa ye hasili na Paulo ye henamaiyei ye wane, “Kowa kaiteya teha unai ku laoma?” Na Paulo ye wane, “Yau teha Silisiya tamowaina.” ³⁵ Na ye hededelau unai ye wane, “Tauhegilugo se laoma kabo kowa yo siya kwa lauhetala na ya lapulapui.” Kabo ye hedede Paulo se laei Heloda yona numa** unai se tole na se kitahetetenamwanamwaei.

24

Paulo yo tauhegiluna wa Peliki matanaena se lauhetala

¹ Mayadai haligigi mulidiyena kabo taukaitalasang saesaena Ananiya yo Dius babadadiyao hekadi yo yodi tauhedehededesonoga tamowaina Tetalusi maiyadi se dobi Sisaliya gabana Peliki unai, na Paulo kabahegiluna hedehedede maudoidi se hedehedede. ² Yodi koigogo wa unai Paulo se yoganeiyama na kabo Tetalusi kana mata wa ye hedede ye wane, “Yauwedolakilaki Peliki! Yom woyawoya sibasibadi ta udiyedi meta miyadaudaumwali yo namwanamwa ka lobaidi yoma magai maudoina ta unai. ³ Yom hineli namwanamwadiyao ta udiyedi kowa hekasisim ye lakikalili, unai ka lautokikaliliyeigo. ⁴ Nige ka henuwa bena ka hemodekaliliyeigo, na ya kaibwadaigo taba mahana kubwakubwana mo unai ku lapulaoma yoma hedehedede ta unai. ⁵ Teina tamowai ta ka lobai meta iya Dius tamowaidiyao teha maudoidi udiyedi yodi miya tauhepilipilina yo kadi hetalagegaga taukabihaina, yo hinage Nasaleta tamowaina hesau tauhemuliwatanina bodana tauwoyaina hesau ede iya. ⁶⁻⁷ Yo hinage *[dagela tamowaidi ye woyahemwalaedi Dius yodi Yaubada kabataba'ohuina numana unai, ede]*

** **23:24:** Gabana Peliki meta teha Yudeya kadi tanuwaga. Yona kabamiya magaina meta Sisaliya. ** **23:31:**

Antipatilisi unai meta Loma yodi tau'iyala yodi kabamiya magaina hesau. ** **23:35:** Heloda yona numa wa meta beyabeyana wasawasa Heloda Lakilakina ye hetolo yona kabamiya. Yona boita mulina ne unai kabo natunao numa wa nige unai se miya, ede Loma yodi tauwoyawoya se hepahepaisowa huyana se bawabawa Sisaliya unai.

Numa Tabuna wa ye hebiki. Unai iya ka hai.** 8 Taba iya ku henamaiyei kabo yoma kabahegiluna hedehedededi maudoidi ye hededehehemasalahadi kalimwai.”

9 Kabakoigogo wa unai Dius tamowaidiyao maudoidi se talam na se hededegogoi se wane, “Teina hedehedede maudoidi ta meta mamohoidi.”

10 Unai gabana wa nimanaena Paulo ye koihai ede ye tolo na ye hedehedede ye wane, “Yauwedolakilaki Peliki! Kabina ya kata meta bolimai lohaloha teha Yudeya tamowaidiyao yodi lauhetala kowa taulapuhekasadi yo tautolehedudulaidi. Unai ma nuwabayaogu ya bom yogu ya tolo na ya hedehedede. 11 Lahinaidi ya sae Yelusalema na yogu nuwatu bena Numa Tabuna unai ya taba'ohu Yaubada unai. Yogu huyalage mayadaina meta gonowana ku hemamohoiyei. Mayadaina ne unai ye laoma teina meta mayadai saudoudoi-labui (12) mo ta laugabaedi. 12 Tauhegilugau ta nige sola se kitagau Numa Tabuna unai tamowai hesau maidagu ka haikawayagala, yo sunago udiyedi o magari lakilakina maudoina ne unai nige boda kadi hetalagegagaga ya ginauli. 13 Yodi kabahegilugau hedehedededi maudoidi ta meta nige yodi kabahemamohoiyeidi. 14 Na ginauli kesega se hedede wa meta mamohoi: Kama kulutubu yodi Yaubada yogu taba'ohuina unai meta Yesu tauhemuliwatanina yodi kabikabi yo yodi laulau ya hemuhemuliwatanidi. Kabikabi yo laulau ta se hedede meta nige se dudulai. Na yau meta hinage Dius yoma laugagayo yo peloweta yodi kulikuli maudoidi ya kawamamohoiyeidi. 15 Yaubada ya sunumaei yo ya kawamamohoikaliliyei meta tamowai dudulaidi yo tamowai yabayababadi kabo boita unai ye hetolo'uyoidi, doha hinage teina tamowaidi ta Yaubada se sunumaei yo se kawamamohoiyei. 16 Unai ya kaipate bena yogu nuwanuwatu yo yogu miyamiya ya miyahedudulaidi Yaubada yo tamowai matadiyena.

17 Bolimai hisa yogu miyasuwala mulidi ne unai ya uyoma meta kainauya yo moni ya baheidima Yelusalema bena deha tamowaidiyao ya saguidi yo hinage yogu kaitalagam ya ginauli Yaubada unai. 18 Na huyana tauhegilugau ta se kitagau Numa Tabuna unai meta lauhe'a'a kabikabina ya ginaulidiko. Na menai nige boda hesau maiyaguwao, yo nige tamowai hesau maidagu ka haikawayagala o ka hetalagegagaga. 19 Na Dius tamowaidiyao teha Eisiya unai taulaoma, siya menai taukitagau ede. Na inai taba se toloma, na ena saha hesau unai se hegilugau kabo se hededehehemasalahadi kalimiyena. 20 O taba tamowai ta ku henamaiyeidi, huyana Sunedeli unai se helauhetalagau meta yababa saha se lobai kaliguyena. 21 Na nuwana ginauli kesega mo ta debanaena se hegilugau meta matadiyena ya tolo na ma kalinalakilakigu ya wane, “Tauboiboita kabo boita unai se tolo'uyo, unai ede kwa helauhetalagau ta!”

22 Na Peliki Yesu tauhemuliwatanina yodi kawamamohoi kabina ye katanamwanamwa. Kabo koigogo wa ye hekaiyawasi na ye wane, “Huyana Lisiyasi iyala kapinana ye lagema kabo yom lauhetala ta ya hineli'uyoi.” 23 Ye hededelau sentuliyō hesau unai ye wane, “Paulo ku laei na kwa kitahetetenamwanamwaei, na gonowana ye sae yo ye dobi numa kalona ne unai, yo hinage kana kahao kabo se laoma se kita na ena ginauli saha udiyedi ye deha kabo unai se sagui.”

24 Mayadai hisa mulidiyena Peliki ma mwanena Dulusila – iya Dius waihiuna hesau – se laoma [*Paulo kabatolena numana wa unai*]. Na kalina se hetamalilaei na Paulo se woyaiyama na Yesu Keliso kawamamohoiyeina yodi ye hedehedede. 25 Na Paulo ye hedehedede meta yoda miyamiya bena se dudulai Yaubada matanaena, yo tabu gadosisi yabayababadiyao yo nuwatu yabayababadiyao ta hemuhemuliwatanidi, yo ye hededehehemasalahadi meta lauhetala lakilakina sola kabo ye laoma. Peliki hedehedede

** 24:6-7: Kulikuli beyabeyadi maudoidi kalina Giliki unai se kulikulidi meta nige udiyedi lausoi 7, na mulidi wa unai hisahisadi mo lausoi 7 yo 8 tupwana se kuli, iya ede teina: “Unai ka hai bena ka helauhetala, 7 na iyala kapinana Lisiyasi ye laoma ede kalimaiyena tamowai ta ye hai na ye hetamalidobiyeiyama kalimwai. 8 Na tauhegiluna hinage ye hededelau udiyedi bena se dobima.”

wa ye lapuidi meta ye siliyata yo ye matausikalili, unai ye wane, “Paulo, nabada, na ku lau. Na ena solasola hesau ya lobai kabo ya hedede ku uyoma.” ²⁶ Peliki yona nuwatu meta Paulo kabo monilakilaki ye mosei na ye yailigabaei, unai huya maudoina Peliki ye hedede bena Paulo ye laoma na maiyana se hedehedede.

²⁷ Bolimai labui mulidiyena Peliki teha Yudeya yodi gabana wa meta Posiyasi Pesitasi unai se helauhedamai. Na Peliki ye henuwa bena Dius tamowaidiyao nuwadiyao ye henamwadi, ede numatutugudu wa unai Paulo ye laugabaei.

25

Paulo yo Dius babadadiyao Pesitasi unai se lauhetala

¹ Pesitasi iya teha Yudeya yodi gabana hauhauna ye lage Sisaliya unai yona paisowa ye hetubu, na mayadai haiyona mulidiyena kabo ye sae Yelusalema. ² Na temenai taukaitalasam tauwoyaidi yo Dius babadadiyao se laomagogoi na Paulo yodi kabahegiluna hedehedededi se hededegabaeidi Pesitasi unai, ³ yo hinage Pesitasi se kaibwadai bena taba Paulo Sisaliya unai se seuyoi Yelusalema. Na yodi nuwatu meta Paulo yodi saeyamana ne unai kabo kedaena se nayai na se koihemwaloi. ⁴ Na Pesitasi ye hededelau udiyedi ye wane, “Paulo meta Sisaliya unai numatutuguduyena se tole, na nige bayaona kabo ya dobi'uyo menai. ⁵ Taba yomi tamowai lakilakidiyao hekadi se laoma maidaguwao ka dobi menai kabo Paulo yomi kabahegiluna hedehededediyo udiyedi se hedehedede, na kabo ya lapuhekasa Paulo saha ye ginaulipwanoli o nige.”

⁶ Yona miya Yelusalema unai meta nuwana mayadai haligigi-haiyona (8) o saudoudoi (10) se gehe kabo ye dobi'uyo Sisaliya. Na mala ye tom kabo ye yogagogoidima kabalauhetala numana wa unai, na kabo ye hedede Paulo se woyaiyama. ⁷ Se woyahemasalahayama, na Dius tamowaidiyao Yelusalema unai taudobima wa Paulo se tolohetakikili na yodi kabahegiluna hedehedededi yabayababadi maudoidi wa se hedededi. Na iyamo yodi hedehedede maudoidi wa nige kabahemamohoiyeidi.

⁸ Kabo Paulo ye bom ye hededehemasalaha'uyoi na ye wane, “Yau meta nige Dius yodi laugagayo ya utusi yo nige Numa Tabuna laugagayona hesau ya utusi, yo Loma yodi laugagayo nige hesau ya utusi.”** ⁹ Pesitasi ye henuwa bena Dius tamowaidiyao ye henuwanamwadi ede Paulo ye henamaiyei ye wane, “Gonowana ku sae Yelusalema? Na ya saewa kabo lauhegilu hedehedededi maudoidi ta hesabadi kwa lauhetala kaliguwai.” ¹⁰ Na Paulo ye wane, “Ya totolo ta meta Loma yodi kabalauhetala numana unai, na ye namwa mo taba inai ku hekasagau. Na kabigu ku katakalili meta yau nige saha hesau yababana ya ginauli o Dius yodi laugagayo hesau ya utusi. ¹¹ Ena laugagayo hesau ya utusi na unai taba ya boita meta gonowana, yau nige boita ya laukwatakwataei. Na ena lauhegilu maudoidi kaliguyena ta nige hesau mamohoina meta nige gonowana kowa o tamowai hesau ye moselaeigau Dius ta udiyedi. Na ya henuwa taba ya lau Sisa ye helauhetalagau.”

¹² Pesitasi yo yona tamowai lakilakidiyao wa maidanao se hedehededegogoi, na se hededegehe kabo ye hededelau Paulo unai ye wane, “Kowa ku henuwa Sisa ye helauhetalago. Gonowana! Kabo ku lau Sisa unai.”

Wasawasa Agilipa ye laoma Pesitasi ye kaitaumanai

¹³ Mayadai hisa mulidiyena kabo wasawasa Agilipa** ma louna Benisi se dobi Sisaliya bena Pesitasi se kaitaumanai, matawuwuna iya gabana hauhauna. ¹⁴ Mayadai hisa maiyadi se miya, kabo Pesitasi Paulo wasana ye hededehemasalaha wasawasa Agilipa unai ye wane, “Peliki tamowai hesau numatutugudu ne unai ye tole na ye laugabaei kaliguwai. ¹⁵ Huyana ya sae Yelusalema meta taukaitalasam tauwoyaidi yo

** **25:8:** Loma yodi laugagayo nige hesau ya utusi: Nuwanuwatu ta Luka yona kulikulina wa meta Paulo ye wane, “Nige yababa saha hesau ya ginauli Sisa unai.” ** **25:13:** Agilipa meta Heloda Agilipa Helabuina.

Dius babadadiyao yodi lauhegilu hedehehedediyao se hedededi, yo se hededelaoma kaliguwai bena taba Paulo ya hekilaino. ¹⁶ Na ya hededelau udiyedi ya wane, ‘Teina nige Loma yodi laugagayo kabikabina.’ Na ya hedede bena tabu tamowai hesau ta mosegabaei na se hekilainogaibui, na bena tauhegiluna maidanao se lauhetalabaguna. ¹⁷ Huyana maidaguwao ka dobima inai ka lage yodi lauhetala wa hesabana, meta nige mahana ya gabaei, na mala ye tom ede ya yogagogoidima kabalauhetala numana wa unai, ya hedede Paulo se woyaiyama na ya helauhetaladi. ¹⁸ Huyana tauhegiluna wa se hedehehede, meta yogu nuwatu kabo laugagayo hesau utusina hedehehedena unai se hedehehede, na iyamo nige. ¹⁹ Na kadi mata ede siya Dius se bom yodi sunuma kabikabidi yo laugagayodi udiyedi se hedehehede, yo hinage tamowai hesau hesana Yesu, iya ye boitako, na Paulo ye hedede meta iya ye maumauli. ²⁰ Yodi hedehehede wa unai meta nige saha hesau gonowana ya nuwatulobai. Unai Paulo ya henamaiyei ya wane, ‘Taba gonowana ku sae Yelusalema na temenai lauhegilu ta udiyedi se helauhetalago?’ ²¹ Na Paulo ye hededelaoma ye wane, ‘Yau kabo ya lau Sisa unai ye helauhetalago!’ Unai ya hedede Paulo ka tole numatutuguduyena, na muliyena kabo ya hetamalilaei Sisa unai.” ²² Na Agilipa ye hededelau Pesitasi unai ye wane, “Ya henuwa taba tamowai ta yona hedehehede ya lapuidi.” Ede Pesitasi ye wane, “Ye namwa, malaitom kabo Paulo kalinana ku lapui.”

Paulo wasawasa Agilipa unai ye lauhetala

²³ Malaitom kabo Agilipa yo Benisi kadi leli didididigadi se likwadi yo yodi wasawasa hekihekinoidi se baheidi na se laoma boda yodi kabahekohekoikesega numana unai, na tau'iyala kadi tanuwaga lakilakidiyao yo magari wa babadadiyao maiyadiyao. Se tuli, na kabo Pesitasi ye hedede Paulo se woyaiyama. ²⁴ Na kabo ye hedede ye wane, “Wasawasa saesaena Agilipa yo boda maudoimiu inai maidamaiyao ta, teina tamowai ta kwa kita! Yelusalema yo Sisaliya unai Dius tamowaidiyao se kaibwada kaliguyena se wane, ‘Teina tamowai ta ye namwa mo tabu ye maumauli.’” ²⁵ Na ya nuwatulobai meta teina tamowai ta unai nige yababa hesau ye ginauli na debanaena bena taba se hekilaino na ye mwaloi. Na ye hededelaoma meta taba ya hetamalilaei Sisa unai. Ede ya hineli kabo ya hetamalilaei Loma. ²⁶ Na nige kabina ya kata saha kabo ya kuli ye lau yoda wasawasa saesaena Sisa unai na yona ya hedehehede, matawuwuna ede nige kabahegiluna hedehehedena mamohoina hesau ya lobai. Unai ya laeyama boda maudoimiu yo kowa wasawasa Agilipa kalimiuwai, bena kana mata mamohoina kwa wasenei na kwa lobai, kabo gonowana ya kulikulilau Sisa unai, na yona ya hedehehede. ²⁷ Ya nuwatui meta nige ye dudulai bena tamowai hesau nige kana mata mamohoina ya lobai na taba ya hetamaligaibuilaei Sisa unai bena ye helauhetala.”

26

¹ Na kabo Agilipa ye hededelau Paulo unai ye wane, “Gonowana kabo ku tolo na ku bom ku hedehehemasalaha'uyoigo.” Ede Paulo nimana ye lausini na ye koihekaiyawasidi na kabo ye hetubu ye hedehehede ² ye wane, “Wasawasa Agilipa! Ya nuwatui meta gonowana ya gwauyala, matawuwuna ya tolo matamyena na ya hedehehemasalaha'uyoigau na Dius yodi lauhegilu hedehehedediyao maudoidi ta udiyedi ya hedede. ³ Matawuwuna kabina ya kata meta kowa Dius kadi kulutubu kabikabidiyao yo Dius yodi laulauhetala kabidi ku katakalili. Unai ya kaibwadaigo bena ku lapulapuinaamwanamwa kaliguyena.

⁴ Dius tamowaidiyao maudoidi ma gagiligu unai yogu miyamiya yo yogu laulau maudoidi kabidi se katakalili, yogu magariyena yo hinage Yelusalema unai. ⁵ Huyalohaloha kabigu se katakalili, na ena se henuwa kabo se hedehehemasalaha'uyoigo meta yau Paliseya tamowaina hesau, unai huya maudoina Dius yodi laugagayo yo yodi kabikabi

ya ginauliwatanikaliliyeidi. ⁶ Na se helauhetalagau ta matawuwuna ede yogu kawamamohoi Yaubada yona hededehe sunuma kada kulutubu udiyedi wa ye hemamohoiyei. ⁷ Iya ede hededehe sunuma Isalaela bogana saudoudoi-labui se nayanayai bena ye laoma, na huya maudoina, mayadai yo boniyai, Yaubada se kaihelahui ma nuwakohihaidi. Yogu wasawasa, teina hededehe sunuma ta kawamamohoiyena debanaena Dius tamowaidiyao se hegilugau ta. ⁸ Idohagi to kwa nuwapwanopwano na nige kwa kawamamohoi meta Yaubada tauboiboita ye hetolo'uyoidi?

⁹ Yau hinage beyabeyana yogu nuwatu meta ye namwa mo ya kaikaipate Yesu Nasaleta tamowaina yona nuwatu ya hekaiyawasi. ¹⁰ Iya ede saha ya ginauli Yelusalema unai. Taukaitalasam tauwoyaidi yodi gigibwaliyena Yesu taukawamamohoiyena ya toledi numatutuguduyena, na ena yodi hineli se ginauli bena se koihemwaloidi, kabo yau hinage ya talam. ¹¹ Huya badobado ya lau sunago udiyedi Yesu taukawamamohoiyena ya hekilainodi yo ya lauhelilidi taba Yesu se hededehe yababai. Na ya kouyalayalakalili, ede ya lau magari hekadiyo udiyedi Yesu taukawamamohoiyena ya hekamkamnadi.

¹² Mayadai hesau taukaitalasam tauwoyaidi yodi gigibwali se leyama na se hetamaligau ya lau Damaseko. ¹³ Yogu wasawasa, mayamayadailakiyena keda wa unai mala hesau galewa ne unai ye sinadobima ma kagu kahao kalimaiyena. Mala wa ya kita meta ye dawayakalili na kabo mahana dawayana. ¹⁴ Mala wa dawayana unai maudoimai ka gulidobi bwatano wa unai, na kalina hesau ya lapui galewa ne unai kalina Alamaikiyena ye hedehededobima kaliguwai ye wane, 'Saulo, Saulo! Idohagi to ku hekamkamnagau ta? Nige gonowana yogu nuwatu ta ku laukwatakwataei.'

¹⁵ Na ya henamai ya wane, 'Guiyau, kowa kaiteya?' Na kalina wa ye hededelaoma ye wane, 'Yau Yesu ku hekamkamnagau ta. ¹⁶ Ku tolo! Ya taumasalaha kalimwai ta bena ya kaisunuwaigo ku hemala yogu taupaisowa yo tauwasaduwai, teina saha ku kita ta yo hinage muliyena ginauli hekadi kabo ya hekitago na ku wasaduwaiyedi. ¹⁷ Ku lau yom tamowai yo dagela tamowaidiyao udiyedi ku wasaduwai. Na ena se hewaiunugo, yau kabo ya gilihaigo. ¹⁸ Ya henuwa taba ku hededelau udiyedi na se kitalobai, na masigili se laugabae se lau mala unai, yo Satani yona gigibwali sunumadi se hekaiyawasidi na se nuwabui se lau Yaubada unai. Na yodi sunuma debanaena kabo yodi yababa ya nuwatugabaedi yo ya tolelaedi yogu tamowai udiyedi.'

¹⁹ Unai, wasawasa Agilipa, yau nige ya kawayagala, na saha Yaubada ye hekitagau wa ya ginauliwatani. ²⁰ Bagubaguna ya lauguguya Damaseko tamowaidiyao udiyedi, na kabo ya lau Yelusalema yo Yudeya tehana maudoina, yo hinage dagela tamowaidiyao udiyedi ya lauguguya, bena se nuwabui na se laoma Yaubada unai, na yodi kabikabi yo yodi miyamiya udiyedi se hemamohoiyei meta se nuwabuiko. ²¹ Yogu lauguguya ta debanaena Dius tamowaidiyao se kabihekahinigau Numa Tabuna bakubakuna unai, na bena se koihemwaloigau. ²² Na Yaubada ye kitahetetegau na ya maumauli ye laoma ee teina mayadai ta. Unai ya tolo matamiuyena na Yesu wasana ya lauguguyaei boda maudoimiu kalimiuiwai. Nige saha hesau wasana ya lauguguyaei na Peloweta yo Mose saha se hededenonohaiyako wa, ²³ meta Keliso kabo se hekamkamna yo ye boita, na kabo iya tamowai bagubagunana boita unai ye tolo'uyo, na iya kabo mala ye hemasalaha Dius yo dagela tamowaidiyao udiyedi.'

²⁴ Yona hedehedede wa unai Pesitasi ma kalinalakilakina Paulo ye yogahigudugudui na ye wane, "Paulo, ku yauyaule! Yom sonoga me se heyauyaulego." ²⁵ Na Paulo ye wane, "Wasawasa Pesitasi, yau nige ya yauyaule yo nige ya hedehededegaibu. Na saha ya hedede ta meta mamohoidi yo gonowana ta nuwatulobaidi. ²⁶ Ginauli maudoidi ta wasawasa Agilipa kabidi ye katako, unai gonowana ya hedehededelau unai. Kabina ya kata ginauli maudoidi ta ye nuwatulobaidiko, matawuwuna ginauli maudoidi ta nige se tubu wadawadamyena. ²⁷ Wasawasa Agilipa, peloweta yodi hedehedede ku

kawamamohoiyeidi? Kabina ya kata meta ku kawamamohoiyeidi.”²⁸ Na Agilipa ye hededelau Paulo unai ye wane, “Ku nuwatui bena huyakubwakubwa ta unai ku henuwabuigau na ya hemala Kilisitiyani tamowaina hesau?”²⁹ Ede Paulo ye wane, “Nuwana kabo ya guguya ne ye kubwa o ye loha, temeta unai nige ya mode. Na ya tapwalolo yo ya kaibwada mo Yaubada unai kowa yo boda maudoimiu taulapulapui teina mayadai ta, bena kwa nuwabui yo kwa hemala doha yau, na tabu se paigomiu doha teina nimagu ma paipaidi ta.”

³⁰ Kabo wasawasa Agilipa, gabana Pesitasi, Benisi, yo tamowai hekadi maiyadiyao se tutuli wa se tolo ede se pesa. ³¹ Kabahekohekoikesega numana wa se pesagabaei na se bom yodi se hedehedede se wane, “Teina tamowai ta nige saha hesau yababana ye ginauli na debanaena bena se koihemwaloi o se tole numatutugudu unai.”³² Na Agilipa ye hededelau Pesitasi unai ye wane, “Teina tamowai ta gonowana ku yailihai, na iyamo ye kaibwadako bena ye lau Sisa unai ye lauhetala.”

27

Paulo ye kadau ye lau Loma

¹ Yoma lau Italiya nuwatudi maudoidi Pesitasi ye hinelihedudulaidi ye gehe, kabo Paulo ye taulauhetala tamowaidiyao hekadi ye mosehekawalaedi sentuliyo hesana Diuliyasi unai, kabo ye kitahetetedi. Diuliyasi meta tau'iyala bodana hesau hesana “Sisa yona tau'iyala” kadi tanuwaga hesau. ² Ka dobi gadowa na temenai Adalamitiyam yodi waga hesau ka lobai. Waga wa bena kabo ye gelu ye lau teha Eisiya, na magaidiyao udiyedi bena ye lauhepehepesa, ede unai ka gelu. Alisitakasi, iya teha Masedoniya tamowaina, Tesalonika unai ye laoma, iya maidamai ka gelu ka lau. ³ Mala ye tom meta Sidona unai ka duna, na Diuliyasi Paulo ye katekamkamnaei ede ye talamyeyi na ye pesa kehanao ye kaitaumanaidi, na ginauli saha udiyedi ye deha meta kabo unai iya se sagui. ⁴ Menai ka gelu'uyo na yaumai wa ka taumatai ede Saipulusi bwanabwanaluwana woyona unai ka lau. ⁵ Silisiya yo Pampiliya gabwadi unai ka heulisikawasi na ka lau ede teha Lisiya magaina hesau hesana Maila unai ka duna. ⁶ Menai sentuliyo wa Alesandiliya yodi waga hesau ye lobai bena kabo ye lau teha Italiya, ede ye hedede na unai ka gelukawasi. ⁷ Na yaumai yona towapilipili debanaena mayadai lohaloha ka kadauyei. Mulidiyena kabo ka lage Nidasi bwanabwanaluwana, na dedekanaena ka heulisi ka lau. Yaumai wa ka taumatai, unai nige gonowana yoma kedakulu wa ka lauwatani, ede ka dobi Kiliti bwanabwanaluwana hesabana, na isutetena hesana Salamona unai ka giuli na bwanabwanaluwa wa woyonaena ka heulisihadihadidi. ⁸ Na woyona heulisina wa ye yababakalili unai ka kaipate ka lau ee bwanabwanaluwa wa magaina lakilakina hesana Laseya ka laugabaei na dedekanaena kalotauna hesana Gadowa Namwanamwana unai ka duna. ⁹ Na yoma kadau wa unai meta mayadai ka gabaedi se badokalili, ede yoma kadau huyana ye hetubu ye yababa ye lau. Matawuwuna gwagwama yo wowoli huyana ye hanauma.** ¹⁰ Unai Paulo ye hededelau waga wa taugeluina maudoidi wa udiyedi ye wane, “Tatao, ya nuwatui meta yoda kadau ta kabo ye pilipili yo ye yababakalili, kabo unai waga yo gogo maudoidi ta gabaedi yo hinage tamowai hekadi kabo se mwaloi.” ¹¹ Iyamo sentuliyo wa nige ye lapulau Paulo unai, na ye kitalau waga tauheyaisiyena yo waga tanuwagana yodi hedehedede wa udiyedi. ¹² Na huyagwagwama unai Gadowa Namwanamwana kabamiyana nige ye namwakalili. Unai waga wa taugeluina maudoidi wa se henuwa bena taba ka gelu'uyo ka dobi Peniki na menai ka miya kana siga wowoli yo huyagwagwama ta se gehe.

** 27:9: Gwagwama yo wowoli huyana ye hanauma: Kalina Giliki unai Luka ye kuli, Dius yodi kaihudi mayadaina ye lauko. Na Dius yodi kaihudi mayadaina meta Sepetemba o Okotoba unai, na yodi kabakadau tehana ne unai Sepetemba duwaduwalina unai wowoli huyana yo huyagwagwama ye hetubu. Na kabo Nowemba duwaduwalina unai kadau maudoidi se hekaiyawasidi ye lau ee Pebuwali.

Matawuwuna ede Kiliti unai Peniki meta gadowana ye namwa yo huyagwagwama yo wowoli gadowana ede, na gadowa ta meta ye sanalau teha yalugumini yo teha bulungai mo udiyedi.

Wowoli se hekalu

¹³ Na kabo yawana ye sibobo ede waga taupaisowaina wa yodi nuwatu meta gonowana se dobi Peniki. Unai lowo se tabeisini na bena ka heulisihadididi ka dobi. ¹⁴ Nige bayaona kabo yaumai bayabayaona hesau hesana wediliya** bwanabwanaluwa wa unai ye towadikwama. ¹⁵ Na waga wa wolewolena ye konai ede nige gonowana yaumai wa ka taumatai, unai ka boboyogabaei. ¹⁶ Ka dobi Kauda bwanabwanaluwana hesabana na woyona musamusana wa unai ka kaipate bena kabahekohekoitu wagana ka tabeisiniyama waga wa unai ka tolenamwanamwaei. ¹⁷ Se paihekahini ye gehe kabo waga taupaisowaina maina lakilakidiyao se haidi na waga wa sadaina** udiyedi se paidi na waga wa se momosihebayao. Se matausikalili matawuwuna ede nige se henuwa [*teha Sailini tahalina hesana*] Sitisi unai se heduna, ede wolewole hesau mainaena se pai na se gabadobiyei gabwa wa unai na bena waga wa ye tabetabenuwahi.

¹⁸ Yaumai yo bagodu wa se kotakesegaidi na waga wa ye ini'inipuluhi ye lau ee mala ye tom, unai waga wa kana kai'usa hekana se hesuluhepesadi. ¹⁹ Mayadai hehaiyonana unai ede se hetubu waga wa gogona hekadi se haidi na se hesuluhepesadi. ²⁰ Wowoli wa ye kotakesegai na ka kulolo huyalohalohakalili nige sola mahana o kipwala ka kitadi yo nige yoma kabalau kabina ka kata, unai maudoimai nuwamai se basabasa na ka nuwatui meta taba nige sagu ka lobai.

²¹ Mayadai hisa se lau na waga wa unai taugelu maudoimai nige hesau ye kaikai. Unai Paulo ye tolo na ye hedede ye wane, "Lahinaidi taba yogu hedehedede wa kwa lapuwatani na Kiliti bwanabwanaluwana unai sola ta miyamiya na nige ta kukegabaei, meta teina pilipili ta taba nige ta hekalu, yo gogo taba nige ta gabaedi. ²² Na nuwamiu ya hededehebayaodi meta mauidoidi kabo ta namwanamwa na waga gaibu mo kabo ta gabaei. ²³ Matawuwuna ede yogu Yaubada, iya kagu tanuwaga yo yau iya ya kaihelahui, boniyai wa unai iya yona anelu ye taumasalaha dedekaguyena ²⁴ na ye wane, 'Paulo, tabu ku matausi. Kabo Sisa matanaena ku tolo yo ye helauhetalago. Yo hinage Yaubada yona kabinamwa yo yona gadosisiyena ye hededehesunuma meta maidamwao taukadau mauidoidi waga me unai taba nige kwa mwaloi.' ²⁵ Unai ya hededelaowa, nuwamiu se bayao matawuwuna ede Yaubada ya sunumaei na saha ye hedededi wa meta kabo se tubu yo se mamohoi. ²⁶ Na iyamo bwanabwanaluwa hesau unai kabo ta heduna na ye koisinida."

Waga se heduna

²⁷ Boniyai hesaudoudoi-hasina (14) unai meta sola Adiliya gabwana wa unai ka kulukulolo'usi. Na boniyai duwaduwalina wa unai meta waga unai taupaisowa wa se nuwatui meta bena tano ka hanahanawuiyako. ²⁸ Unai kabanowonowoi ledina se hai na se heyoli, na gabwa wa lohana se liyei na se lobai meta gabwa lohana ede kala 20.** Ka kulukulolo nige bayaona na hinage gabwa wa se liyetonogi'uyoi meta lohana ede kala 15.** ²⁹ Nowonowoi wa ka kitadi meta ka hanahanaukaliliko, na ka matausi meta kabo ye koisingai dakwadakwaena. Ede lowo hasi se gabaedi waga yiuna wa unai, na waga wa ye tabetabehekahini. Na mauidoidi se tapwalolo yodi yaubada udiyedi meta taba idohagi na mala ye tom'mwamwayau. ³⁰ Na waga wa unai taupaisowa mauidoidi se koitalaliu na bena se wasabu. Unai kabahekohekoitu wagana wa se hedalolodobiyei

** **27:14:** Wediliya: Kalina Giliki unai yaumai wa hesana ede Eulakilon, na teha bwauli ye lau teha kaluwabu unai ye towadikwama. ** **27:17:** Waga sadaina kaniyona ede waga dedekadiyao labui. ** **27:28:** Kala 20 meta 37 mita. ** **27:28:** Kala 15 meta 27 mita.

gabwa wa unai. Na yodi helupodi bena kabo se sae waga isuna wa unai lowo hekadi se gabaeidi. ³¹ Na Paulo ye hededelau sentuliyo yo tau'iyala tamowaidiyao wa udiyedi ye wane, “Ena tamowai ta waga ta se wasabugabaei, taba nige ta namwanamwa.” ³² Unai tau'iyala tamowaidiyao wa kabahekohekoitu wagana mainana se boli'utusidi na ye kulolobasi.

³³ Mala ye hetubu ye uyali ye laoma, ede Paulo ye hededelau waga wa taugeluina maudoidi wa udiyedi meta taba se kaikai, na ye wane, “Mayadai saudoudoi-hasi (14) se laoko udiyedi meta kwa matausikalili, unai nige kai hesau kwa kai. ³⁴ Na teina maudoimiu ta meta taba nige hesau kulum maiyawana kesega ye taukwadalele. Unai ya hededebayao kalimiuyena bena taba kwa kaikainamwanamwa to kabo kwa maumauli.” ³⁵ Yona hedehedede ta mulinaena kabo pwalawa ye hai na maudoidi matadiyena ye tapwalolo yo Yaubada ye lautokiyei, na kabo ye kihi na ye kai. ³⁶ Unai kabo maudoidi wa nuwadi se talu yo se bayao na se kaikai. ³⁷ Waga wa unai taugelu maudoimai meta badomai ede 276. ³⁸ Ka kaikai ee ye gehe kabo waga wa kana usa'usa witi baikidi wa se hesuluhepesadi gabwa wa unai, bena waga wa ye kahaisae.

³⁹ Mala ye tom na waga unai taupaisowa magai nige se hekaolobai, na kalotau hesau naganagalina se kita. Unai yodi hekasa se ginauli meta bena ka sae unai ka hetatadunaduna. ⁴⁰ Ede lowo ma mainadiyao se boligabaeidi yo hinage heyaisi kabapaihekahinidi mainadi se yailigabaeidi. Na kabo wolewole waga isuna wa unai se kukei na ka boboyo ka sae nagali wa hesabana. ⁴¹ Ka sae ede waga wa ye heduna nituli hesau unai, na isuna wa ye talakahi tahali wa unai na nige gonowana ye sigi, na bagodu se guligulisae waga wa unai ye lau ee waga yiuna wa ye koigwaligwali.

⁴² Tau'iyala tamowaidiyao se koitalaliu bena taulauhetala tamowaidiyao wa se koihemwaloidi na tabu se tubasae na se wasawasabugabaeidi. ⁴³ Na sentuliyo wa ye henuwa bena Paulo ye sagui, ede yodi koitalaliu wa ye hekaiyawasi, na ye hededelau taugelu maudoidi wa udiyedi ye wane, “Kaiteyadi gonowana kabo se tuba, meta se kamposi na se tubabaguna se sae magai.” ⁴⁴ Na kadi kahao hekadi meta waga ye koigwaligwali wa molumoluna** tehadiyao se haidi na udiyedi se tuba se sae. Na maudoimai ka tubasae magai wa unai ma namwanamwamai.

28

Paulo yona miya Malita unai

¹ Ka sae, na magai wa tamowaidiyao yomai se hedehedede meta bwanabwanaluwa wa hesana ede Malita. ² Bwanabwanaluwa wa tamowaidiyao yodi laulau se namwakalili kalimaiyena. Kaiwa se yuhi na se yoganeigai ka lau ka kaimwaiga, matawuwuna ede nabu ye talu yo gwagwama huyana. ³ Ka kaikaimwaiga, na Paulo ye lau kaiwa lagalagadi ye bahema bena ye gabudi. Na kaiwa kalakalasina wa gigibwalina unai mwata hesau kaikaikalasina ye nenepesa ede Paulo nimana ye kalasi na unai ye kabakabasi. ⁴ Magai tamowaidiyao mwata wa se kita Paulo nimana unai ye kabakabasi, unai se wane, “Teina tamowai ta meta iya taukaikaiunu! Yodi yoli wa unai nige ye mwalo, na iyamo yoda yaubada waihiu Tautolehedudulai,** iya nige ye henuwa bena ye maumauli.” ⁵ Na Paulo nimana ye hekwade ede mwata wa ye koihebekudobiyei kaiwa kalakalasina wa unai, na kamnana ye lapui meta tauna nige se kamkamna. ⁶ Na tamowai wa yodi nuwanuwatu kabo Paulo tauna se loloni yo ye guli na ye mwalo, na iyamo se naya huyalohaloha na se kita meta nige saha hesau ye tubu kalinawai. Unai yodi nuwatu wa se bui'uyoi na se hedede meta iya yaubada hesau.

⁷ Yoma kabakaimwaiga dedekana unai meta bwanabwanaluwa tamowaidiyao kadi tanuwaga lakilakina hesana Pabiliusi yona tano. Ye yogaisinigai yona numaena

** **27:44:** Molumolu meta kaiwa tupwana se tadihetabataba. ** **28:4:** Tautolehedudulai meta yodi yaubada waihiu wa hesana.

ka miya na mayadai haiyona ye kitahetetenamwanamwakaliliyeigai. ⁸ Na Pabiliusi tamana ye kasiyebwa na ye kenokeno yodi numa wa unai. Kana kasiyebwa meta taugwagwama yo bogalau. Paulo ye sae numakalo wa unai na taubada wa yona ye tapwalolo, na nimana ye tolesaedi kewana ne unai ede ye namwanamwa.

⁹ Ye henamwanamwa ede taukasiyebwa maudoidi bwanabwanaluwa wa unai se laedima, na Yaubada yona gigibwaliyena Paulo tamowai maudoidi wa ye henamwanamwadi. ¹⁰ Unai tamowai maudoidi wa se hekasisikaliliyeigai yo se kaikainauyaigai. Na huyana kabo bena waga hesau unai ka gelu, ede yoma kabinonoha wa unai kadau gogodiyao udiyedi se saguigai.

Paulo ye lau ye lage Loma

¹¹ Huyagwagwama wowolina wa debanaena Alesandiliya yodi waga hesau bwanabwanaluwa wa unai ye miyahekila. Waga wa isuna unai Giliki yodi yaubada labui Kasita yo Polakisi tautaudi se pusaei na se tolehepatu.

Ka miya nawalai haiyona, na wowoli huyana wa ye gehe ede waga wa unai ka gelu na ka hetubu ka kadau ka lau Loma. ¹² Silakusi unai ka duna na menai ka miya mayadai haiyona. ¹³ Menai ka gelu'uyo ka sae Legiumu unai ka duna. Mala ye tom na yawana ye towa, ede ka gelu'uyo, na mayadai hesauna unai ka lage Puteyoli. ¹⁴ Temenai Yesu taukawamamohoiyena tamowaidiyao hekadi ka lobaidi, ede se yogaisinigai na menai ka miya mayadai haligigi-labui (7), mulidiyena kabo ka sae Loma. ¹⁵ Loma unai Yesu taukawamamohoiyena yoma sae wasana se lapui, ede se dobima Apiusi Yona Kabalokulokune yo Kabakaiyawasi Numana Haiyona magaidi udiyedi se launayanayaigai. Paulo tamowai ta ye kitadi meta nuwana ye bayao na tapwaloloyena Yaubada ye lautokiyei. ¹⁶ Loma unai ka lage ede iyala kapinana wa Paulo ye talamgabaei ye lau ye bom yona kabamiya, na tau'iyala tamowaina hesau ye laoma Paulo ye kitahetete.

Paulo yona miya Loma unai

¹⁷ Mayadai haiyona mulidiyena Paulo Dius babadadiyao Loma unai taumiya ye yogogoidima na ye hededelau udiyedi ye wane, “Kehaguwao, nige saha yababana hesau ya ginauli yoda tamowai yo kada kulutubu kabikabidi yo miyamiyadiyao udiyedi, na iyamo Dius babadadiyao Yelusalema unai se haigaibuigau na se moselaegau Loma yodi laugagayo taukitahetetena tamowaidiyao udiyedi. ¹⁸ Se henamaiyeigau meta nige kagu mata hesau yababana se lobai bena kabo unai se unuhemwaloigau, ede lauhetala wa unai bena se yailigabaeigau. ¹⁹ Na Dius babadadiyao wa nige se henuwa bena lauhetala unai se yailigabaeigau. Ede ya kaibwada taba bena ya laoma Loma, na Sisa kabo ye helauhetalagau. Na yogu laoma ta unai meta nige bena helegu Dius tamowaidiyao ya hegiludi. ²⁰ Teina nuwatu ta debanaena ede ya hedede kwa laomagogoi, na ya hedehedede kalimiuyena ta. Seni ta unai se paigau, matawuwuna ede kita Isalaela yoda sunuma saha kabo ye tubu huya matadaena.”

²¹ Unai Dius babadadiyao se hededelau Paulo unai se wane, “Nige sola leta hesau Yudeya unai se hetamaliyama na unai wasam ka hasili, o tamowai hesau metai ye laoma na wasam yababana hesau ye hedede kalimaiyena. ²² Na ka henuwa bena taba ka laomagogoi na yom nuwatu saha ku hededehemasalahadi na ka lapuidi, matawuwuna ede teha maudoina tamowaidiyao meta kada boda ta unai yom tapwalolo kabikabina ta se hededeheyaheyababa.”

²³ Unai yodi laomagogoi mayadaina se godu, ede bodalakilaki se laoma Paulo yona kabamiya wa unai na ye lauhekataeidi, malatomtomyena ye hetubu ye lau ee meimeilahi. Yaubada yona basileiya hedehededena ye hededehemasalahadi, na Mose yona laugagayo yo peloweta yodi kulikuli udiyedi ye hekitadi meta Yesu Yaubada yona kaisunuwa tamowaina ede. ²⁴ Yona hedehedede wa udiyedi meta tamowai wa

hekadi yodi talam se ginauli, na hekadi nige se kawamamohoi. ²⁵ Unai ede se bom se haihaikawayagala'uyoidi. Na bena kabo se dalahaigwaligwali se lau yodi magari, unai Paulo yona hedehedede gehegehedi ye hedededi kalidiyena ye wane, "Yaluwa Tabuna saha peloweta Aisaiya ye hekata na ye hededegabaeidi kami kulutubu udiyedi meta se laoma se mamohoi. ²⁶ Doha Yaubada ye hededelau Aisaiya unai ye wane,

'Ku lau tamowai ta udiyedi na ku hedede ku wane,
 "Yogu hedehedede kabo kwa lapulapuidi,
 na taba nige kwa lapulobaidi.
 Yogu kabikabi kwa kitadi,
 na taba nige kwa kitalobaidi."

²⁷ Matawuwuna tamowai ta nuwadiyao meta se kwailolokalili,
 beyadi se kolakola,
 yo matadi se gibu.

Na taba matadi se lala, kabo se kitalobai,
 yo taba beyadi se malapai, kabo hedehedede se lapulobaidi,
 yo taba nuwadi se masalaha, kabo se nuwatulobai,
 iyamo nigele.

Unai nige gonowana se nuwabui na ya henamwanamwadi.' *(Aisaiya 6:9-10)*

²⁸⁻²⁹ Unai ede ya henuwa bena kabina kwa kata meta Yaubada yona kabihemauli ye ginauliyako yo wasana ye laoko dagela tamowaidiyao udiyedi. Na siya kabo se lapulau Yaubada yona kabihemauli hedehededena ta unai."**

³⁰ Paulo yona numa** wa unai ye miya bolimai labui. Na kaiteyadi se laoma bena iya se kita meta ye yogaisinidi, ³¹ na ma nuwabayaona Yaubada yona basileiya wasana ye lauguguyaei yo Guiyau Yesu Keliso wasana ye lauhekataei udiyedi. Na yona paisowa wa unai meta nige tamowai hesau ye gudugudui.

** **28:28-29:** Kulikuli hekadiyo lausoiso 29 se kuli doha teina: Paulo yona hedehedede wa ye gehe ede Dius tamowaidiyao se pesa na se bom se haihaikawayagala'uyoidi. Tausonoga lausoiso ta nige se lobai buka beyabeyadiyao udiyedi, unai nige ka kuli buka ta unai. ** **28:30:** Paulo yona numa Loma unai ye miyai na nawalai kesega kesega ye hemahemaisa. Dimdim unai se kuli *rented house*.

Loma **Paulo yona leta ye lau ekalesiya Loma magaina lakilakina** **unai taumiya udiyedi** **Buka ta hededehehemasalahana**

Teina ta apostolo Paulo yona leta ye lau ekalesiya Loma magaina lakilakina unai taumiya udiyedi. Huyana ye kuli meta iya magai Kolinito unai ye miya, bolimaina nuwana 57 AD. Paulo ye henuwa bena ekalesiya Loma unai ye kaitaumanaidi na bena kabo se sagui na ye lau Sipaniya unai Yesu wasana ye lauguguyaei (Loma 1:9-12, 15:24,28).

Ekalesiya magai Loma unai taumiya wa hekadiyo kadi kulutubu siya Dius tamowaidi, na hekadiyo siya dagela tamowaidi. Dius wa hekadiyo yodi nuwanuwatu meta Yaubada wasana namwanamwana ye laoma se bom mo kalidiyena, na Paulo ye hekitadi meta hinage wasa ta bena ye lau dagela tamowaidiyao udiyedi (Loma 1:5, 15:9-12, 16:26).

Leta ta unai Paulo yona kabahedehedede haiyona. Kabahedehedede bagubagunana meta Loma 1–11, iya ede yoda sunuma wuwuna. Paulo ye hededehehemasalahana meta boda labui ne gonogonowadi Yaubada matanaena, matawuwuna maudoidi se ba'aya (Loma 1:18–3:20). Na maudoidi se sunuma Yesu unai na debanaena ede Yaubada unai tolehedudulai se hai (Loma 3:21–4:25). Ede tausunuma Yaubada maiyadi nuwadaumwaliyena se miya yo yodi miyamiya se namwa Yaubada yona sagu unai (Loma 5:1–8:39). Keliso taukawamamohoiyena, siya meta Yaubada yona tamowai mamohoidi, na nige bena keda udoi unai tamowai se mwalae Yaubada kehanao luwadiyena. Unai nige gonowana tamowai hesau ye nuwasaesae yona kawakeha Yaubada unai debanaena, yo nige tausunuma hesau bena iya Yaubada yona boda dagelanawai (Loma 9:1–11:36).

Kabahedehedede helabuina kabo peina 12 unai ye hetubu, na unai Paulo ekalesiya yodi mauli yo yodi kabikabi ye hededehehemasalahadi. Yona hedehedede lakilakina ye kulibagunaei, iya ede, yodi mauli sibasibadi udiyedi bena Yaubada se taba'ohui (Loma 12:1-2). Na kabo Paulo ye kuli idohagi bena se haihaisagusagu yo yodi miyagogoi se namwa (Loma 12:3-21), yo idohagi yodi miyamiya gabemani gunidiyena se namwa (Loma 13:1-7), yo yodi hali ekalesiya maiyadi bena se haigadogadosisi (Loma 13:8–15:13).

Gehegehena unai Paulo yona paisowa nuwatuna saesaedi ye hededehehemasalahadi (Loma 15:14-21) na yona koitalaliu hinage (Loma 15:22-33). Na kabo Paulo yo maiyana taupaisowa yodi lautoki se hetamalidi se lau Loma (Loma 16:1-27).

Buka ta hedehededena lakilakidi

- Paulo yo yona Wasa Namwanamwana 1:1-17
- Tamowai maudoidi se ba'aya 1:18–3:20
- Yaubada tamowai ye yogaisinidi se hemala yona tamowai 3:21–4:25
- Tausunuma yodi mauli hauhauna 5:1–8:39
- Kaiteya Yaubada yona tamowai mamohoidi 9:1–11:36
- Ekalesiya idohagi bena se miya gadosisi unai 12:1–15:13
- Paulo yona koitalaliu, yo hededelautoki 16:14–16:27

Lautoki

¹ [Leta ta taukulina meta] yau Paulo. Yau Keliso Yesu yona heyayai tauhaina, na Yaubada ye kaisunuwaigau yona apostolo na ye yoganeigau wasana namwanamwana lauguguyaeina hesabana. ²Wasa namwanamwana ta beyabeyana

ye hededehe sunuma yona peloweta yodi kulikuli buka tabuna unai wa udiyedi. ³ Iya meta Yaubada Natuna Yesu Keliso wasana. Huyana Keliso ye miya tanoubu ta unai meta iya Dawida wasawasa kana isimulita, ⁴ na tauboiboita luwadiyena yona tolo'uyo debanaena ede ye masalaha meta iya Yaubada Natuna ma gigibwalina, na Yaluwa Tabuna ye hemamohoiyei. Iya ede yoda Guiyau Yesu Keliso. ⁵ Iya unai Yaubada yona kainauya kaliguwai ede ya hemala apostolo na unai bena kabo tamowai maudoidi basileiya udoi'udoi udiyedi ya woyaidima na se kawamamohoi yo se kawakabi, Keliso hesana debanaena. ⁶ Yaubada ye yoganeidi se hemala Yesu Keliso yona tamowai. Na komiu hinage luwadiyena.

⁷ Ya kulikulilaowa komiu Loma unai taumiya kalimiuyena, kaiteyadi Yaubada yona gadosisi tamowaidi yo ye yoganeigomiu kwa hemala yona tamowai.

Taba Tamada Yaubada yo yoda Guiyau Yesu Keliso yodi kabinamwa yo yodi nuwadaumwali se lediwa kalimiuyena.

Paulo ye henuwa bena ye lau Loma ye kitadi

⁸ Bagubaguna, Yesu Keliso debanaena komiu maudoimiu hesabamiu yogu Yaubada ya lautokiyei, matawuwuna wasamiu se hedehedei tanoubu maudoina unai meta kwa sunumabayao Yesu Keliso unai. ⁹⁻¹⁰ Yaubada yona paisowa ya ginauli ma nuwako-hihaigu na Natuna wasana namwanamwana ya laulauguguyaei. Teina Yaubada ta, iya gonowana ye hemamohoiyeigau meta huya maudoina yogu tapwalolo udiyedi ya nuwanuwatuigomiu. Ya tapwatapwalolo taba gehena ta unai Yaubada kamwasa ye soke na ya laowa kalimiuwai. ¹¹ Matawuwuna yogu henuwa lakilakina ede taba ya laowa ya kitagomiu bena Yaluwa kainauyadi ya hekawalaeidiwa kalimiuwai, na unai bena kwa bayao, ¹² iya ede taba komiu yo yau yoda sunuma udiyedi ta haihebahe-bayao'uyoida.

¹³ Kagu kahao, ya henuwa taba kabina kwa kata meta huya se badokalili yogu hekasa ya ginauli bena taba ya laowa kalimiuwai, na iyamo ginauli udoi'udoi se guduguduigau.** Yogu nuwatu ede taba luwamiuyena yogu paisowa kaniyona ya lobaidi, gonogonowana doha dagela tamowaidiyao hekadiyo udiyedi.

¹⁴ Yogu paisowa ta nuwagigibwalina debanaena nige gonowana ya hekaiyawasi, na bena ya lau Giliki yo nige Giliki tamowaidi udiyedi, yo hinage tamowai sibasibadi yo supusupudi udiyedi. ¹⁵ Unai ede ya henuwakalili taba ya laowa komiu Loma unai taumiya ne kalimiuyena wasa namwanamwana ta ya lauguguyaei.

¹⁶ Matawuwuna teina wasa namwanamwana ta taba nige unai ya mwadine, kaniyona ede iya Yaubada yona kabihemauli gigibwalina, unai taukawamamohoi maudoidi mauli se lobai. Bagubagunana kabihemauli ne ye lau Dius tamowaidiyao udiyedi, na kabo ye lau dagela tamowaidiyao udiyedi. ¹⁷ Teina wasa namwanamwana ta unai Yaubada ye hemasalaha idohagi kabo tamowai ye tolehedudulai iya matanaena. Tolehedudulai ne nige saha hesau debanaena, na sunuma mo debanaena. Doha ye kuliyako wa,

“Tamowai yona sunuma debanaena Yaubada ye kitahedudulai meta kabo ye mauli.”
(Habakuku 2:4)

Dagela tamowaidi yodi ba'aya

¹⁸ Yaubada hinage ye hemasalaha meta tamowai yodi miyasuwalaena yo yodi miyamiya nige dudulaidi ye kouyalayalaedi. Siya yodi miyamiya yababadi ne udiyedi hedehede mamohoina se gudugudui. ¹⁹ Yaubada [yona kouyalayalaedi] matawuwuna ede iya kana kao saha ye masalaha ne meta gonowana kabina se kata, matawuwuna Yaubada ye hemasalaha'uyoi maudoidi kalidiyena. ²⁰ Na tanoubu ta huyahetubuna unai na ye laoma meta Yaubada kana kao wadawadamdi se masalaha,

** 1:13: Ginauli udoi'udoi se guduguduigau ne hesau ku hasili Loma 15:20-22 unai.

siya ede yona gigibwali nige kana siga yo iya mamohoi Yaubada. Ginauli maudoidi Yaubada ye ginaulidi wa udiyedi gonowana ta kitalobaidi. Unai nige gonowana tamowai hesau yona kabatauhililini hesau.

²¹ Bwagana Yaubada kabina se kata, na iyamo nige Yaubada se hededeheesae yo nige se lautokiyei. Debanaena ede yodi nuwanuwatu nige kaniyodi yo nuwadiyao ne se masigiliguidi. ²² Se hedede bena se sibasiba, na iyamo se hemala yauyaule. ²³ Na Yaubada miyamiyahaina yona didiga se tolehesuwala, na koitau se ginaulidi kadi kao doha tamowai kabo se boita ne, yo doha manuwa yo suisui yo mwata udoi'udoi.

²⁴ Tenem debanaena ede tamowadiyao ne Yaubada ye talamgabaeidi se lau nuwadiyao yodi gadogadosisi yababadi se ginaulidi na ma kadi kahao laulau nuwanuwamwadimwadinedi se ginaulidi. ²⁵ Yaubada hedehedena mamohoina se tolehesuwala na se lapulau hedehedelupolupo udiyedi. Na saha ye ginaulidi wa se taba'ohuidi na tauginaulidi wa nigele. Iya taba ta hededetausae huya maudoina nige kana siga. Mamohoi.

²⁶ Tenem debanaena ede Yaubada ye moselaedi laulau bikibikidi nuwanuwamwadimwadinedi udiyedi. Yodi sinesineo meta sine yo tau yodi kenokesega kabikabina wa se tolehesuwala na yodi hali sinesineo maiyadiyao se kenokesega. ²⁷ Gonogonowana doha, tatao hinage tawasola miyamiyadi dudulaidi se tolehesuwaladi na yodi henuwalakilaki ede taba yodi hali tatao maiyadiyao se kenokesega. Yodi miyamiya nuwanuwamwadimwadinedi ne udiyedi ede hekamkamna se lobaidi taudiyao ne udiyedi.

²⁸ Siya Yaubada nuwanuwatuna se tolehesuwala, unai ye kitagabaeidi na se bom yodi nuwatu yauyaule se hemuliwatanidi na ginauli saha bena tabu se ginaulidi wa meta se ginaulidi. ²⁹ Na yodi mauli meta yababa kadi kao udoi'udoi se hemwayaudi, nuwatu yabayabakalilidi, mahimahihi yo miyamiya yabayabakalilidi, yo siya meta kaikalomagigili ye hemwayaudi, yo kaiunu, haihaikabi, tamowai se lupohaidi na tamowai hekadi se hekamkamnagaibuidi. Se monumonunu, ³⁰ yo tamowai se hededeheyaheyababadi. Siya Yaubada tausbuna, nige se hekasasi, se nuwasaesae yo se hededeheesae'uyoidi, siya meta ginauli yabayabakalilidi ginaulidi kedadiyao udoi'udoi se waseneidi na se ginaulidi. Sina yo tama se kawayagalaeidi, ³¹ nige yodi sibasiba hesau, yodi hedehede nige se ginauliwatanidi, gadosisi yo katekamkamna meta nige kalidiyena. ³² Na siya meta Yaubada yona hedehede dudulaidi wa kabidi se katako ede tamowai yodi miyamiya doha teina meta ye namwa mo taba se boita. Iyamo siya meta teina miyamiyadiyao ta se miyamiyaidi yo tamowai hekadi teina miyamiya ta taumiyaiaeidi meta hinage se kawanamwanamwaeidi.

2

Yaubada yona hekasa se dudulai

¹ Unai komiu kaiteyadi kami kahao kwa kitahekasadi na kwa hedede ede siya yababa tamowadiyao meta komiu nige yomi kabatauhililini hesau. Kaniyona ede ginauli saha unai na kam kaha ne ku kitahekasadi meta unai kowa hinage ku bom ku hedede-hegilu'uyoigoko, matawuwuna ede kowa taukitahekasadi ne meta yababa kesegana ne hinage tauginaulina. ² Na Yaubada yababa tauginaulidi ne ye kitahekasadi, na kabina ta kata ede Yaubada yona kitahekasadi ne yona kabatolo ede hedehede mamohoina. ³ Na kowa meta kitahekasadi ku ginauli, iyamo kowa hinage yababa kesegana ne ku ginaginauli. Unai hage, ku nuwatui meta kowa kabo Yaubada yona kitahekasadi ne ku wasabugabaei? ⁴ O komiu meta Yaubada yona kabinamwa saesaedi yo yona nayatautaubiga yo yona kouyalayala kabihekahinina bena kwa kitadobidobiyedi? Taba kwa nuwatulobai meta Yaubada yona kabinamwa ne ye woiaigomiu kwa lau yomi nuwabui hesabana!

⁵ Iyamo yomi nuwakwailolo yo yomi nuwabuikasaya ne udiyedi ede komiu kwa bom kami hekamkamna kwa ginaulidi yo kwa kabinonohaidi Yaubada yona huya-hekamkamna hesabana. Tenem huyana ne unai kabo iya yona kitahekasa dudulaina ye hemasalaha. ⁶ Na Yaubada “kabo tamowai kesega kesega ginauli saha ye ginaulidiko wa unai maisadi ye moseidi.” *(Same 62:12, Hededesononoga 24:12)*

⁷ Kaiteyadi siya se tolokesegai na laulau namwanamwadi udiyedi hededehesaedi yo hekasisidi yo mauli nige yona kabagehe se waseneidi meta kabo mauli nige kana siga ye moseidi. ⁸ Na kaiteyadi siya se bom se nuwanuwatu'uyoidi yo hedehede mamohoina nige se henuwa na laulau yabayababadi se miyamiyaedi, siya kabo hekamkamna yo kouyalayala se hekalo. ⁹ Kabo pilipili yo nuwayabalakilaki se lau siya kaiteyadi miyamiya yababakalilidi tauginaginulidi maudoidi kalidiyena. Bagubaguna hekilaino ne ye lau Dius tamowaidiyao udiyedi na kabo ye lau dagela tamowaidiyao udiyedi. ¹⁰ Na hededetausae, hekasisi, yo nuwadaumwali se lau siya kaiteyadi miyamiya namwanamwadi taumiyaedi maudoidi kalidiyena. Bagubaguna kainauya ne ye lau Dius tamowaidiyao udiyedi na kabo ye lau dagela tamowaidiyao udiyedi. ¹¹ Matawuwuna Yaubada meta nige ye gadogadosihineli.

¹² [*Dagela tamowaidi ne,*] bwagana Mose yona laugagayo nige kalidiwai, na ena se ba'aya meta kabo kadi heyababa se lobaidi. Na [*Dius tamowaidi*], siya laugagayo guninaena taumiya, meta kabo laugagayo unai kadi hekasa se hai. ¹³ Matawuwuna ede kaiteyadi laugagayo se lapuimoei [*na nige se miyawatani*], meta Yaubada matanaena siya nige se dudulai. Na siya kaiteyadi laugagayo ne se miyawatani meta kabo ye kataidi siya tamowai dudulaidi.

¹⁴ Mamohoikalili, dagela tamowaidiyao meta laugagayo ta nige siya yodi. Na ena yodi miyamiyaena laugagayo saha ye hedede ne meta se miyawatanidi, kabo unai ye masalaha meta laugagayo ede nuwadi ne udiyedi, bwagana Mose yona laugagayo ta meta nige siya kalidiyena. ¹⁵ Se hemasalaha'uyoidi meta laugagayo ne ede nuwadiyena kabina se kata, na yodi nuwatulobai yo yodi nuwanuwatu se hemasalaha se bom kalidiyena ede huya hekadi se laupwano yo huya hekadi ginauli dudulaidi se ginaulidi.

¹⁶ Tamowai huyahekasadi ne yona huyatubu ede huyana Yaubada kabo Keliso Yesu ye hetolo iya tauhekasa na nuwatu wadawadamdi ye kitahekasadi. Teina nuwanuwatu ta meta yau wasa namwanamwana ya duwai ta unai ya hededehehemasalaha.

Dius yodi laupwano

¹⁷ Unai ena ku kataigo ede kowa Dius tamowaina yo ena ku midilau Mose yona laugagayo unai na yom kawakeha Yaubada unai ne debanaena ku hededesaesae, ¹⁸ yo ena kowa yona nuwatu yo miyamiya dudulaidi kabidi ku kata, kaniyona ede kowa meta Mose yona laugagayo unai se hekatago, ¹⁹ yo ena nuwam ne ye bayao meta kowa taumatagibugibu tauwoyaidi yo masigiliyena taumiya yodi dawaya ²⁰ yo tauyauyaule tauhedehesibasibadi yo wawayao gagilidi tauhekatadi, kaniyona ede laugagayo unai kata yo hedehede mamohoidi maudoidi kalimyena. ²¹ Kabo kowa idohagi? Tamowai hekadiyo ku hekatadi, na ku bom ku hekata'uyoigo o nige? Kaiwahali laugagayona ku lauguguyaei, na ku kaikaiwahali o nige? ²² Ku hedede meta tamowai tabu se ganaganawali, na kowa ku ganaganawali o nige? Koitau ku subukaliliyeidi, na iyamo yodi numa tabudi gogodi ku kaiwalididi o nige? ²³ Yo kowa Mose yona laugagayo debanaena ku hededesaesae, na laugagayo yom utusina ne unai meta Yaubada hekasisina ku heyababa o nige? ²⁴ Doha kulikuli tabuna unai se kuliyako se wane,

“Dagela tamowaidiyao kabo Yaubada hesana se hededeheyaheyababa matawuwuna ede komiu debamiyena.” *(Aisaiya 52:5, Hesekeyela 36:20,22)*

²⁵ Ena Mose yona laugagayo unai ku miya, kabo pelitome kabikabina kalimyena meta kabikabi namwanamwana. Na ena laugagayo ku utusi meta kabo kam kao ede doha

kowa nige pelitome tauhaina.** 26 Ena taba siya kaiteyadi nige pelitome tauhaina na laugagayo ne yona hedehedede se miyawatanidi, meta Yaubada ye kitadi ede doha pelitome se haiyako. 27 Na kowa Mose yona laugagayo kulikulina kalimwai yo pelitome ku hai na iyamo kowa laugagayo tau'utu'utusina, meta kaiteya iya tauna ne unai nige pelitome ye hai, iyamo laugagayo ye kawakabiyeyi, iya kabo kowa ye hededehegilugo.

28 Ena tamowai hesau dagela mo unai kana kao ye ginauli bena iya Dius tamowaina, meta iya nige Dius tamowaina mamohoina, yo hinage pelitome se ginauli loheya tauna mo unai meta iya nige pelitome mamohoina. 29 Nige! Na ena tamowai hesau nuwana ne unai iya Dius, meta iya Dius mamohoina. Na pelitome mamohoina meta tamowai nuwana ne unai, na tauginaulina ede Yaluwa Tabuna. Laugagayo kulikulina nige gonowana pelitome paisowana ye ginauli tamowai nuwana ne unai. Na tamowaina ne hededetausaeina meta taba nige tamowai udiyedi ye laoma, na kawanamwanamwa ne meta kabo Yaubada unai ye laoma.

3

Yaubada yona hedehedede se mamohoi

1 Unai, kita Dius tamowaidiyao kalidaena yoda namwa saha? Yo pelitome yona namwa saha? 2 Yoda namwanamwa meta teha udoi'udoi udiyedi na ye badokalili. Na saesaekalilina ede Yaubada yona hedehedede ye haidima kita Dius kalidaena.

3 Na ena taba Dius hekadi yona hedehedede ne nige se miyawatanidi, meta idohagi? Tenem ne unai kabo Yaubada se hekaiyawasi na saha ye hededehegunumadi wa taba nige ye ginaulidi? Nigekalikalili! 4 Nuwana tamowai maudoidi siya tauhedehededelupolupo, iyamo Yaubada yona hedehedede maudoidi meta mamohoidi. Doha kulikuli tabuna unai [*Yaubada hedehededen*] se kuliyako ye wane,

“Ena ku hedede meta yom hedehedede ne se hemamohoiyeidi ede se dudulai,**
na lauhetala unai se lobaigo ede ku dudulai.”

(*Same 51:4*)

5 Teina ta kabo tamowai yona nuwaturupwano unai ya hedehedede: Ena [*kita Dius*] yoda laupwano ne Yaubada yona miyamiya dudulaidi se hemasalahanamwanamwaeidi, saha kabo ta hedede? Yaubada yona hekilainoda ne unai meta yona hekasa ne bena nige se dudulai? 6 Nige! Se dudulaikalili! Ena Yaubada yona hekasa nige se dudulai, meta nige gonowana tanoubu ta ye kitahekasa.

7 Na tamowai hekadi kabo se wane, “Ena yogu laulaulupolupo ne unai ya masalahanamwanamwa meta Yaubada yona hededehegunuma ne udiyedi ye tolokesegai, na unai iya hekasisina ye laki ye lau, meta idohagi to sola ye hegihegilugau bena yau yababa tamowaina?” 8 Nuwana kabo hinage kwa wane, “Yababa ta ginauli na unai kabo namwa ye masala.” Tamowai hekadi se hegilugai bena tenem yoma hedehedede, na unai se hededeheyaheyababagai. Ye namwa mo taba hekamkamna se lobai!

Nige tamowai hesau ye namwa Yaubada matanaena

9 Unai kabo idohagi? [*Kita Dius*] yoda namwanamwa ede saha? Nige kalikalili! Ka hededehehemalahayako ede Dius tamowaidi yo Dagela tamowaidi maudoidi meta ba'aya yona gigibwali logulogunaena se miya. 10 Doha kulikuli tabuna unai se kuliyako ye wane,

“Nige tamowai hesau yona miyamiya se dudulai, nige kesega.

11 Nige hesau iya taunuwatulobai,
nige hesau iya Yaubada tauwaseneina.

12 Maudoidi meta Yaubada se tolodagedagelaei

** 2:25: Nige pelitome tauhaina meta nige Dius tamowaina yo nige Yaubada kana bodao hesau, na dagela tamowaina. ** 3:4: Ena ku hedede meta yom hedehedede ne se hemamohoiyeidi ede se dudulai: Same 51:4 unai Dawida ye hedede ye wane, Ena ku hegilugau meta yom hedehedede ne se dudulai.

na matanaena meta nige yodi namwanamwa saha hesau.

Nige hesau laulau dudulaina tauginaulina,

nige tamowai kesega.”

(Same 14:1-3 yo 53:1-3, Lauguguya 7:20)

¹³ “Kawadi meta doha bwayabwaya sokesokekaulina,

na memenadi kadi paisowa kesega ede hedehededelupolupo.”

(Same 5:9)

“Sopadi ne meta kaikailewa ye mwayau.”

(Same 140:3)

¹⁴ “Kawadiyao meta tamowai kadi hedehededeheyababa yo hedehedede nisanisadiyao se mwayau.”

(Same 10:7)

¹⁵ “Kwasina hebwalilina unai kaediyao meta se sagenakalili.

¹⁶ Yodi kabalau maudoidi ne unai meta yababa mo,

¹⁷ na daumwali kabikabina meta nige kabina se kata.”

(Aisaiya 59:7-8)

¹⁸ “Matadi ne unai meta Yaubada matausina nige.”

(Same 36:1)

¹⁹ Kabina ta kata ede laugagayo saha ye hedededi ne meta se lau siya laugagayo gunina unai taumiya ne kalidiyena. Tenem unai taba kawa maudoidi se mwanou na tanoubu maudoina kadi gilumeta se masalaha Yaubada matanaena na ye kitahekasadi.

²⁰ Matawuwuna laugagayo miyawatanina debanaena taba nige tamowai hesau ye dudulai Yaubada matanaena, na laugagayo meta yababa tautolehemasalahana.

Sunuma debanaena ta dudulai Yaubada matanaena

²¹ Na teina huya ta unai Yaubada ye hemasalahayama idohagi na ye tolehedudulaida. Tolehedudulai ne meta nige laugagayo kabikabina unai ye ginauli, doha Mose yo peloweta yodi kulikuli udiyedi tolehedudulai ne se hededenonohaiyako. ²² Yesu Keliso sunumaeina debanaena ede tausunuma maudoidi Yaubada ye tolehedudulaidi iya kalinawai. Teina unai Dios yo Dagela tamowaidiyao meta nige yodi udoi hesau, ²³ kaniyona ede maudoidi ne se ba'aya na nige yodi didiga hesau Yaubada matanaena. ²⁴ Na yona kabinamwa unai ede yababa unai ye yailihaidi Keliso Yesu debanaena na ye tolehedudulaidi. Tolehedudulai ta meta ye kainauyaidi na se haigaibui. ²⁵ Yaubada Keliso ye hemasalahayama ye hemala yababa kabahaigabaedi kaitalasangna, kaniyona ede yona mauli ye talamgabaei. Na Keliso sunumaeina unai kabo tolehedudulai ta se hai. Na teina doha Yaubada ye ginauli na ye hemasalahana ede huya bagubagunana unai meta iya yona laulau se dudulai na ye nayatautauyabiga yo tauba'aya yodi yababa ye nuwakasinidi. ²⁶ Yo hinage ye hemasalahana ede teina huya ta unai yona laulau se dudulai na Yesu taukawamamohoiyeina ye tolehedudulaidi.

²⁷ Saha debanaena na [kita Dios] bena ta nuwasaesae? Nige saha hesau, matawuwuna ede tolehedudulaida ne meta nige laugagayo yoda miyawatanina debanaena, na sunuma debanaena. ²⁸ Kaniyona ede kabina ta kata meta Yaubada tamowai ye tolehedudulai sunuma debanaena, na nige laugagayo kawakabiyeina debanaena. ²⁹ O idohagi, Yaubada bena kita Dios mo yoda Yaubada? Na dagela tamowaidi nige yodi Yaubada? Nige! Yaubada meta hinage dagela tamowaidi yodi Yaubada, ³⁰ matawuwuna Yaubada iya kesega mo, na iya pelitome tauhaidi kabo ye tolehedudulaidi yodi sunuma debanaena na tenem sunuma kesegana ne unai hinage nige taupelitome ne ye tolehedudulaidi. ³¹ Hage idohagi? Sunuma debanaena kabo laugagayo ne ka tolehesuwala? Nige kalikalili! Na sunuma unai laugagayo meta ka hemamohoiyei.

4

Abelahama yona sunuma debanaena Yaubada ye kitahedudulai

¹ Kita Dios kada mumuga Abelahama sola ta nuwatui, ginauli saha ye lobai teina hekasa ta unai? ² Ena taba mamohoina meta Abelahama saha ye ginaulidi wa debadiyena ede ye dudulai, kabo iya gonowana ye hededesaesae. Iyamo Yaubada

matanaena meta nige gonowana. ³ Na kulikuli tabuna wa saha ye kulihemasalaha? Ye wane,

“Abelahama Yaubada ye kawamamohoiyei, na debanaena ede Yaubada ye hedede meta ye dudulai.” *(Genese 15:6)*

⁴ Tamowai ye paisowa na saha ye ginauli ne maisana se mosei meta nige yona kainauya, na yona paisowa ne maisana. ⁵ Na tamowai nige ye paisowa na yona sunuma ye tole Yaubada unai, yona sunuma ne debanaena ede Yaubada ye hedede meta ye dudulai. Kaniyona ede Yaubada iya yababa tauginaginulidi tautolehedudulaidi.

⁶ Na Dawida hinage nuwanuwatu kesekesegana ta unai ye hedehehede meta kaiteyadi Yaubada ye tolehedudulaidi [*yona kabinamwa unai na*] nige bena yodi paisowa debadiyena, siya gonowana se gwauyala. Ede ye wane,

⁷ “Kaiteyadi laugagayo se utusi na yodi ba'aya wa Yaubada ye nuwatugabaeidi, yo yodi yababa taba nige ye nuwatu'uyoidi, meta gonowana se gwauyala.

⁸ Na kaiteyadi Guiyau nige ye hegiludi yodi yababa debadiyena, meta gonowana se gwauyala.”

(Same 32:1-2)

⁹ Kabagwauyala ta, iya bena pelitome tauhaina mo yodi, o hinage nige pelitome tauhaina yodi? Ta hededeyako meta Abelahama yona sunuma debanaena ede Yaubada tolehedudulai ye mosei kalinawai. ¹⁰ Huyana saha unai na tolehedudulai ye mosei kalinawai? Huyana pelitome ye haiyako wa unai o sola nige ye hai na unai? Nige bena ye haiyako ne unai, na sola nige ye hai wa unai na ye mosei kalinawai. ¹¹ Huyana sola nige pelitome ye hai na Yaubada ye toleheduduliyako yona sunuma debanaena, na muliyena kabo pelitome ye hai ye hemala tolehedudulai ne hekihekinoina yo dedelina. Unai ede tausunuma maudoidi siya nige pelitome tauhaina meta tamadi ede iya, na bena Yaubada kabo tolehedudulai ye mosei kalidiyena. ¹² Yo iya hinage pelitome tauhaina tamadi, na nige bena pelitome ne ye bom debanaena, na siya kaiteyadi tamada Abelahama huyana sola nige ye pelitome na yona sunuma kabikabina wa se miyawatani ne, meta siya tamadi.

¹³ Abelahama yo kana isimulitao Yaubada ye hededehesunumadi meta iya kabo tanoubu maudoina ye hai,** iyamo nige bena laugagayo yona miyawatanina debanaena. Na yona sunuma debanaena ede Yaubada ye tolehedudulai na hededehe-sunuma wa ye mosei. ¹⁴ Ena taba laugagayo taumiawatani ne siya hededehe-sunuma ne tauhaina, meta kabo sunuma ne nige yona namwanamwa hesau, na hededehe-sunuma wa nige kaniyona hesau. ¹⁵ Matawuwuna laugagayo meta hekilaino mo ye haiyama, [*kaniyona ede nige gonowana ta miyawataninamwanamwaei*]. Na haedi nige laugagayo meta menai nige laugagayo utu'utusiasina hesau.

¹⁶ Unai Abelahama hededehesunumana ne meta sunuma debanaena ye hai, kaniyona ede bena Yaubada yona kabinamwa unai ye hai. Hededehesunumana ne kabo ye masalahalau Abelahama natunao maudoidi udiyedi, nige bena siya kaiteyadi laugagayo loguloguna unai taumiya se bom, na ye lau hinage siya kaiteyadi Abelahama yona sunuma tauhemuliwatanina ne kalidiyena. Iya meta maudoida tamada. ¹⁷ Doha Yaubada yona hedehehede wa se kuliyako,

“Ya kaisunuwaigo kowa tamowai gwaudi tamadi, siya teha udoi'udoi tamowaidiyao.” *(Genese 17:5).*

** **4:13:** Abelahama ... kabo tanoubu maudoina ye hai: Paulo yona hedehehede ta yona kabalaoma meta Genese 22:17-18, ye wane, “tanoubu kabo siya yodi”. Yaubada yona hededehe-sunuma hekadiyo ede ye wane kabo Abelahama unai tamowai maudoidi hededehe-sunuma se lobai (Genese 12:2-3), yo Isalaela tanona kabo siya yodi (Genese 12:7 yo 17:8), yo kana isimulitao kabo se badokalili doha kipwala yo nagali (Genese 15), yo Abelahama kabo boda se bado tamadi (Genese 17:4-6), yo kana isimulitao kabo se hemala basileiya lakilakina yo bayabayaona (Genese 18:18).

Abelahama yona sunuma ye tole Yaubada unai na Yaubada matanaena ye hemala tamada. Yaubadana ne, iya ede tauboiboita tauhetolo'uyoidi yo ginauli saha sola nige se masalaha meta ye hetaladi doha se tubuko ne.

¹⁸ Abelahama yona nuwanuwatu meta iya kana siga ede, iyamo yona midi maudoina ye tole Yaubada unai, na debanaena ede ye hemala tamowai gwaudi tamadi. Iya ede doha Yaubada yona hedehedede kalinawai wa, ye wane,

“Kam isimulitao badodi kabo doha kipwala.” *(Genese 15:5)*

¹⁹ Abelahama yona bolimai meta handele kesega (100) ye hanahanawui na yona nuwanuwatu meta ye tautaubadakililiko nige gonowana natunao. Yo Sala meta ye sinesinebadako nige gonowana ye labalaba. Iyamo yona sunuma Yaubada unai nige ye basabasa. ²⁰ Nige ye nuwalabulabui Yaubada yona hededehesunuma ne udiyedi. Yona sunuma wa Yaubada ye hebayao ye lau na Yaubada ye hededetausaei. ²¹ Abelahama nuwana ye bayao meta Yaubada yona gigibwali gonowana yona hededehesunuma wa kabo ye ginauli. ²² Teina sunuma ta debanaena ede “Yaubada ye hedede meta ye dudulai.” ²³ Teina hedehedede ta meta nige Abelahama ye bom kana hedehedede, na se kulidobiyei bena ²⁴ hinage kita kada hedehedede. Yaubada kabo ye hedede meta kita ta dudulai matawuwuna yoda sunuma ta tole iya unai, iya ede yoda Guiyau Yesu boita unai ye hetolo'uyoi. ²⁵ Yaubada Yesu ye talamgabaei na ye boita yoda yababa hesabadi, na ye hetolo'uyoi tolehedudulaida hesabana.

5

Nuwadaumwali yo nayatautaubiga

¹ Unai ta kitayako meta sunuma debanaena na Yaubada tolehedudulai ye haiyama kalidaena. Ede Yaubada maiyada ta miya nuwadaumwaliyena, yoda Guiyau Yesu Keliso debanaena. ² Yoda sunuma debanaena ede Keliso keda ye sokeyama kalidawai na ta mwalaesae na Yaubada yona kabinamwa unai ta miya. Na ta gwauyala matawuwuna ta kitakitalau huya matada ne unai kabo Yaubada maiyada yona didiga unai ta miya. ³ Nige teina mo ye bom, na hinage ta gwauyala yoda hekamkamna udiyedi, kaniyona ede kabina ta kata hekamkamna udiyedi kabo tolobayao ye masalaha, ⁴ na tolobayao unai kabo ta hemasalaha'uyoida meta ta bayao, na yoda bayao unai kabo ta nayatautaubiga Yaubada yona hededehesunuma hesabana. ⁵ Yoda midi ta nige gonowana ye hemwadineda, matawuwuna Yaubada Yaluwa Tabuna ye haiyama kalidaena na yona gadosisi ye inidobiyeiyama nuwada ne udiyedi.

⁶ Sola kwa kita! Beyabeyana kita sola nige yoda bayao hesau, na kabo mahanana dudulaina unai Keliso ye boita Yaubada taukawayagalaeina hesabada. ⁷ Ena tamowai yona miyamiya se dudulai, *[na bena se unuhemwaloi,]* meta taba nige tamowai hesau yona mauli ye talamgabaei *[iya gilihaina]* hesabana, bwagana tamowai namwanamwana hesabana nuwana gonowana kabo tamowai hesau yona mauli ye talamgabaei. ⁸ Iyamo huyana kita sola ma ba'ayada na Keliso ye boita hesabada. Teina unai Yaubada yona gadosisi kalidaena ye hemasalaha.

⁹ Keliso kwasinana unai ye tolehedudulaidako, unai kabina ta katakalili meta Yaubada yona kouyalayala unai gilihai ta lobai Keliso debanaena. ¹⁰ Matawuwuna ede teina: Huyana kita sola Yaubada kana waiunu meta ye tolekesegaida iya kalinawai natuna yona boita debanaena, ede teina huya ta meta Yaubada maiyada ta miyakesega. Unai ye mamohoikalili meta Natuna yona mauli unai kabo ye hemauida. ¹¹ Nige teina ye bom mo, na hinage ta gwauyala Yaubada unai yoda Guiyau Yesu Keliso debanaena, kaniyona ede iya kalinawai miyakesega ne ta hai.

Mauli kainauyana yona kabalaoma

¹² Tamowai kesega unai na ba'aya ye laoma tanoubu ta, na yona ba'aya debanaena ede boita ye masalaha. Tenem unai ede boita ye lau tamowai maudoidi udiyedi, matawuwuna ede maudoidi ne se ba'aya. ¹³ Huyana Mose yona laugagayo sola nige ye masalaha meta ba'aya ede tanoubu ta unai, iyamo ena nige laugagayo meta nige gonowana tamowai se hededehegilu. ¹⁴ Iyamo boita meta tamowai ye tanuwagaidi Adama yona huya unai na ye laoma ye lau ee Mose yona huya unai, yo hinage ye lau kaiteyadi nige laugagayo hesau se utusi doha Adama ne kalidiyena.

Adama kana kao meta nige doha kaiteya sola kabo ye laoma ne.

¹⁵ Na Yaubada yona kainauya meta nige doha Adama yona laupwano wa, kaniyona ede tamowai *kesega* yona ba'aya debanaena na tamowai *boda* se boita, iyamo Yaubada yona kabinamwa yo yona kainauya se lakikalili na se lau *boda* kalidiwai, na teina meta tamowai *kesega* Yesu Keliso yona kabinamwa unai ye laoma. ¹⁶ Yo Yaubada yona kainauya yo tamowai kesega yona ba'aya wa meta nige gonogonowadi. Matawuwuna ba'aya *kesega* tolehekasana debanaena na hekilaino ye laoma, iyamo Yaubada yona kainauya ye laoma ede ba'aya *gwaudi* udiyedi tolehedudulai ye ginauli. ¹⁷ Tamowai *kesega* yona laupwano debanaena ede tamowai *kesegana* ne unai boita ye laoma ye tanuwagaida. Na Yaubada yona kabinamwa saesaena yo yona tolehedudulai kainauyana meta se saekalili, na tauhaidi ne meta kabo se tanuwaga mauli ta unai tamowai *kesega* debanaena, iya ede Yesu Keliso. ¹⁸ Unai ede tamowai kesega yona laupwano *kesega* debanaena hekilaino ye laoma *boda maudoidi* udiyedi, na gonogonowana doha hinage laulau dudulaina *kesega* debanaena tolehedudulai ye masalaha ede mauli ye mosei tamowai *maudoidi* udiyedi. ¹⁹ Hinage doha tamowai *kesega* yona kawayagala debanaena ede tamowai *gwaudi* se ba'aya, doha hinage tamowai *kesega* yona kawakabi debanaena ede tamowai *gwaudi* tolehedudulai se lobai.

²⁰ Na kabo Yaubada laugagayo ye haiyama na debanaena ede yababa ye laki ye lau tamowai kalidiyena.** Na haedi yababa ye laki ye sae meta temenai Yaubada yona kabinamwa ne ye laki ye saekalili. ²¹ Kaniyona ede yababa ye tanuwagaida na boita ye haiyama, meta doha hinage kabinamwa ye tanuwagaida tolehedudulai unai na mauli nige kana siga ye haiyama Yesu Keliso yoda Guiyau debanaena.

6

Ba'aya unai Keliso ye yailihaida

¹ Kabo saha ta hedede nem? Idohagi, bena yababa mo unai ta miyamiya, na unai kabo Yaubada yona kabinamwa ne ye laki ye lau? ² Nige kalikalili! Yoda miyamiya yabayababadi ne meta ta boitagabaeidiko, nige gonowana udiyedi ta miyakesegaida. ³ Yoda babatiso kaniyona bena ta nuwatui. Babatiso unai ta patulau Keliso Yesu unai, ede yona boita ne unai maiyada ta boita ⁴ na babatiso unai Keliso maiyada se puluhida. Na kabo Tamada yona gigibwali saesaena unai Keliso ye hetolo'uyoi na kita hinage ye hetolo'uyoida bena taba mauli hauhauna unai ta miya. ⁵ Keliso yona boita unai maiyada ta laomakesega. Unai kabo iya hinage maiyada Yaubada ye hetolo'uyoida.

⁶ Na kabina ta kata ede tauda beyabeyadi wa meta Keliso maiyadi se hesatauloke-segaidiko, na tenem unai kabo yababa yona tanuwaga kalidawai wa ye gehe. Unai ede kita nige gonowana sola ta miyamiya yababa yona heyayai tauhaina, ⁷ matawuwuna huyana Keliso maiyada ta boita meta yababa yona gigibwali unai ye yailihaida.

⁸ Ena Keliso maiyada ta boita meta ta kawamamohoiyei kabo hinage maiyada ta mauli. ⁹ Na kabina ta kata ede Yaubada Keliso boita unai ye hetolo'uyoi, meta nige gonowana ye boita'uyo na boita nige gonowana ye tanuwagai. ¹⁰ Yona boita wa,

** **5:20:** Yababa ye laki ye lau tamowai kalidiyena: Paulo yona kulikuli meta, yababa ye laki ye lau, na buka hekadiyo (doha New Living Translation) yodi hededehemasalahana ede, yababa nuwatulobaina ye helaki tamowai kalidiyena.

iya meta ba'aya hesabana na ma kesega mo ye boita. Na ye mauli meta Yaubada hedebasaeina hesabana.

¹¹ Gonogonowana doha hinage komiu, taba kwa kita'uyoigomiu meta yababa kwa boitagabaeiyako na Keliso Yesu unai kwa mauli Yaubada hedebasaena hesabana. ¹² Unai tabu ba'aya kwa talamyeyi na taumiu kabo ye pwasa ta ye tanuwagaidi na yona henuhenuwa yabayababadi kwa kawakabiyeidi. ¹³ Tabu taumiu kwa talamyeyi se hemala yababa kabaginalidi, na taba kwa talamyeyigomiu Yaubada unai, na kaniyona ede boita unai ye gilihaigomiuko na ye tolelaeigomiu mauli unai. Na taumiu yauidiyao ne kwa talamgabaeidi se hemala laulau dudulaina kabaginalidi. ¹⁴ Matawuwuna ede tabu yababa ye hemala kami tanuwaga, kaniyona ede komiu meta nige laugagayo loguloguna unai, na Yaubada yona kabinamwa loguloguna unai kwa miya.

Kita miyamiyadudulai yona heyayai tauhaidi

¹⁵ Unai hage idohagi, gonowana ta ba'aya matawuwuna kita nige laugagayo logulogunaena, na kabinamwa logulogunaena? Nige kalikalili! ¹⁶ Taba kwa nuwatulobai, ena kwa talamyeyigomiu tamowai hesau unai bena kwa kawakabiyei na kwa hemala yona heyayai tauhaina, meta komiu ne kaiteya kwa kawakabiyei'usei ne yona heyayai tauhaina. Ena komiu yababa yona heyayai tauhaina kabo ye woyaigomiu kwa lau boita, na ena komiu kawakabi yona heyayai tauhaina, kabo ye woyaigomiu kwa lau miyamiya dudulaidi unai. ¹⁷ Yaubada ta lautokiyei! Bwagana komiu beyabeyana meta yababa yona heyayai tauhaina, iyamo ma nuwakohihaimiu na lauhekata wa kwa kawakabiyeidi. ¹⁸ Yababa unai meta yailihai kwa haiyako na kwa laomako kwa hemala miyamiya dudulaina yona heyayai tauhaina.

¹⁹ Tanuwaga yo heyayai tauhaina heyaheyasonidi ya hepaisowa matawuwuna ede yomi nuwatulobai se pahilikalili. Beyabeyana komiu yaumiyao kwa talamgabaeidi laulau yabayababadi yodi heyayai tauhaidi, na unai laugagayo yomi utu'utusina wa ye yababa ye laki ye lau. Na teina huya ta bena yaumiyao ne kwa mosegabaeidi miyamiya dudulaina yona heyayai tauhaina, na unai kabo yomi miyamiya maudoidi se a'a na komiu Yaubada yona tamowai.

²⁰ Huyana komiu yababa yona heyayai tauhaina ede komiu nige miyamiya dudulaina logulogunaena. ²¹ Ginauli saha kwa ginaulidi wa meta huya ta kwa mwadineidi, na udiyedi namwanamwa saha kwa lobai? Tenem miyamiya ne yodi woyawoya ne ye lau boita nige kana siga unai. ²² Na teina huya ta meta yababa unai Yaubada ye yailihaigomiuko na kwa hemala iya yona heyayai tauhaina. Na yomi namwanamwa kwa lobai ede komiu Yaubada yona tamowai, na kaniyona ye masalaha ede mauli nige kana siga. ²³ Matawuwuna yababa maisana ede boita, na Yaubada yona kainauya meta mauli nige kana siga yoda Guiyau Keliso Yesu debanaena.

7

Laugagayo yona huyaloina kalidaena ye geheko

¹ Kagu kahao, teina kabo ya hededelaowa komiu laugagayo hedehededena kabina taukata kalimiuyena. Bena ya henuwaisinigomiu: Tamowai meta laugagayo yona gigibwali guninaena yona mauli huyadi maudoidi udiyedi ye lau ee ye boita, na kabo laugagayo yona gigibwali kalinawai ye gehe. ² Heyaheyasonina ede teina: Laugagayo unai waihiu maitawasola bena mwanena unai ye miyakesegai loheya ne yona mauli mayadaidi maudoidi udiyedi. Na ena loheya ne ye boita, meta waihiu ne tawasola laugagayona unai yailihai ye hai. ³ Ena waihiu ne mwanena sola ma miyana, na loheya hesau ye tawasolai, meta kabo se hedede ede ye ganawali. Na taba mwanena ne ye boitako, meta iya laugagayo ne unai yailihai ye haiyako, na ena ye tawasola'uyo meta tenem ne nige ganawali.

⁴ Unai, kagu kahao, huyana Keliso maiyamiu kwa boita meta laugagayo yona gigibwali kalimiuyena ye gehe. Na tamowai hesau bena ye tanuwagaigomiu, iya ede boita unai Yaubada ye hetolo'uyoi wa. Ede bena komiu gonowana kaniyo namwanamwadi kwa toledi Yaubada yona. ⁵ Huyana kita sola bulumada yodi miyamiya yabayababadi wa se tanutanuwagaida ede laugagayo meta nuwanuwatu yabayababadi ye henuwaisinidi na se paisowa tauda ta udiyedi, na kaniyodi ede boita nige kana siga. ⁶ Na huya ta, laugagayo ta boitagabaeiyako, iya ede ye paihekahinida wa, na laugagayo unai yailihai ta haiyako. Unai kabo Yaluwa Tabuna miyamiyana hauhauna unai Yaubada yona ta paisowa, nige bena miyamiya beyabeyana wa, iya ede laugagayo kulikulina wa.

Laugagayo yababa ye hemasalaha

⁷ Kabo saha ta hedede nem? Idohagi, laugagayo meta ba'aya? Nigekalikalili! Iyamo nige gonowana ba'aya ya kitalobai kana siga laugagayo kabina ya kata. Laugagayo hesau ye wane,

“Tamowai hesau yona gogo tabu ku henuwakaliliyeidi.” *(Esodo 20:17)*

Unai ye hekatagau ede laulau ne ye yababa. ⁸ Na ba'aya teina laugagayo ta ye hai ede unai henuhenuwa udoi'udo i ye hemasalahadi kaliguwai. Ena nige laugagayo meta ba'aya nige yona gigibwali.

⁹ Beyabeyana, yau meta laugagayo dagelana unai ya miya na ya maumauli. Na huyana laugagayo hedehededena ye masalahama ede ba'aya yona gigibwali ye laki na ya boita. ¹⁰ Unai ya lobai ede laugagayo ta bena kabo mauli ye haiyama wa, iya meta boita nige kana siga ye haiyama. ¹¹ Kaniyona ede ba'aya laugagayo hedehededena ne ye hepaisowadi na ye lupohaigau na debanaena ede ya boita.

¹² Unai ede laugagayo ye bom meta ye namwa,** na yona hedehedede ne se a'a** yo se dudulai yo se namwa.

¹³ Unai hage idohagi, ginauli namwanamwana ne ye hemala kababoita kaliguwai? Nigekalikalili! Na ba'aya bena ye masalahama, ede ginauli namwanamwana ne ye hai na unai ye unuhemwaloigau. Kaniyona ede laugagayo hedehededena ye heki-talobaigau meta ba'aya iya ginauli yabayababakalikalilina.

Laugagayo nige gonowana ye saguida miyamiya dudulaidi hesabadi

¹⁴ Kabina ta kata meta laugagayo iya Yaubada unai ye laoma, iyamo yau meta tamowaigaibu mo** na ba'aya ye tanuwagaigau na yau yona heyayai tauhaina.**

¹⁵ Saha ya ginauli meta nige ya nuwatulobai, matawuwuna laulau namwanamwadi ya henuwadi ne meta nige ya ginaulidi, na laulau ya subudi ne meta ya ginaulidi.

¹⁶ Na ena ginauli saha ya ginaulidi, haedi siya nige ya henuwa bena ya ginaulidi, meta ya talam ede laugagayo ne ye namwa. ¹⁷ Unai saha ya ginaulidi ta meta nige yau, na ba'aya kaliguyena ye miyamiya ta, iya ye ginaulidi. ¹⁸ Kabina ya kata meta nige namwa ye miyamiya kaliguwai, iya ede bulumagu unai. Matawuwuna ya henuwakalili bena laulau namwanamwadi ya ginaulidi, na nige gonowagu. ¹⁹ Matawuwuna saha ya ginaulidi meta nige kabikabi namwanamwadi ya henuwa bena ya ginaulidi wa. Nige! Na miyamiya yabayababadi nige ya henuwadi wa, siya ede ya ginaginauli'useidi

** 7:12: Ye namwa meta kalina Dimdimyena, *holy*. Tabu hededehehemasalaha ku hasili. ** 7:12: Se a'a meta kalina Dimdimyena, *holy*. Tabu hededehehemasalaha ku hasili. ** 7:14: Yau meta tamowaigaibu mo

meta kalina Giliki unai Paulo ye kuli ede, yau meta buluma unai. ** 7:14: Yau meta tamowaigaibu mo na ba'aya ye tanuwagaigau na yau yona heyayai tauhaina: Paulo laugagayo kabina ta ukata kadi hedehedede sola ye hedehededei (7:1), siya Mose yona laugagayo se kita ede bena tamowai ye saguidi na yodi miyamiya se tabu. Na Paulo ye bom ye heyaheyasoniyei laugagayo kabina ta ukata maudoidi udiyedi, unai ye kulikuli, yau, doha ye bom ye hededehehemasalaha'uyoi. Iyamo 7:14-25 ye hededehehemasalaha matawuwuna saha to laugagayo nige gonowana tamowai ye saguidi yodi laulaududulai miyamiyadi udiyedi.

ta. ²⁰ Na ena miyamiya saha nige ya henuwadi wa na ya ginaulidi, meta nige yau ya ginaulidi na ba'aya kaliguyena ye miyamiya ta, iya ye ginaulidi.

²¹ Unai ya lobai ede miyamiya ta kaliguyena ye paipaisowa: Ya henuwa bena namwa ya ginauli, iyamo yababa ginaulina nuwanuwatuna iya ede sola kaliguwai.

²² Nuwagu ta unai Yaubada yona laugagayo meta ya henuwakaliliyei, ²³ iyamo ya kita ede miyamiya udoi ye paipaisowa taugu ta unai na nuwagu yona henuhenuwa ye iyalai na ye haigau ya hemala ba'aya yona kaukau tamowaina, iya ede miyamiya ye paipaisowa taugu ta unai.

²⁴ Ahani mo yau! Taugu ta kabo ye laeigau ye heboitagau, na unai kaiteya kabo ye gilihaigau? ²⁵ Yaubada ya lautokiyei, yoda Guiyau Yesu Keliso unai ye gilihaigau. Unai kabo yau ya bom nuwagu ta unai yau meta Yaubada yona laugagayo yona heyayai tauhaina, na bulumagu ta unai ede yau ba'aya yona heyayai tauhaina.

8

Yoda mauli ede Yaluwa Tabuna unai

¹ [*Guiyau Yesu Keliso debanaena Yaubada ye gilihaida.*] Unai kaiteyadi se patulauko Keliso Yesu unai meta nige kabahededehgiludi hesau. ² Matawuwuna Keliso Yesu debanaena ede Yaluwa Tabuna, iya mauli tauhaiyamana, yona gigibwaliyena meta ba'aya yo boita yodi gigibwali udiyedi ye yailigabaeigomiuko. ³ Mose yona laugagayo nige gonowana ye saguida, matawuwuna bulumada debanaena ede ye basabasa. Unai Yaubada Natuna ye hetamaliyama yababa tamowaidi kadi kao unai na ye hemala yababa kaitalasamna. Ede Keliso tauna ne unai Yaubada ba'aya yona gigibwali kalidaena ye hekaiyawasi, ⁴ bena unai taba laugagayo hedeheedededi dudulaidi ta miyawataninamwanamwaeidi, kaniyona ede nige bulumada udiyedi ta miyamiya, na Yaluwa yona gigibwaliyena ta miyamiya.

⁵ Kaiteyadi siya buluma ne ye tanutanuwagaidi meta buluma ne yodi henuhenuwa mo se nuwatuidi. Na kaiteyadi siya Yaluwa ye tanuwagaidi meta Yaluwa yona henuhenuwa ginaulidi udiyedi se nuwatulau. ⁶ Kaniyona ede buluma yona nuwanuwatu kabo tamowai ye laeidi boita nige kana siga unai. Na tamowai yodi nuwanuwatu Yaluwa ye kitahetetedi ne meta kabo kalidiyena mauli yo nuwadaumwali. ⁷ Matawuwuna buluma yona nuwanuwatu meta Yaubada kana waiunu, kaniyona ede Yaubada yona laugagayo nige gonowana ye ginauliwatanidi yo taba nige ye kawakabiyeidi. ⁸ Na kaiteyadi buluma ne ye tanuwagaidi, siya nige gonowana Yaubada nuwana se henamwa.

⁹ Iyamo komiu meta nige buluma ne ye tanutanuwagaigomiu. Ena Yaubada Yaluwana ede kalimiuyena ye miyamiya, kabo Yaluwa Tabuna ye tanuwagaigomiu. Na ena kaiteya nige Keliso Yaluwana kalinawai, meta iya nige Keliso yona. ¹⁰ Ena Keliso ede ye miyamiya kalimiuwai, meta bwagana taumi ne boiboitadi ba'aya debanaena, iyamo yaluwamiu ne meta se maumauli matawuwuna ede Yaubada ye tohedudulaigomiuko. ¹¹ Na ena Yesu boita unai tauhetolo'uyoina wa Yaluwana ede ye miyamiya kalimiuwai, meta Keliso tauhetolo'uyoina wa kabo hinage taumi kabo se pwasa ne ye hesilawasae'uyoidi iya Yaluwana unai. Yaluwana ne, iya ede kalimiuyena ye miyamiya.

¹² Unai, kagu kahao, kita nige buluma yona gigibwali guninaena, ede tabu yona henuhenuwa ne ta miyawatanidi. ¹³ Matawuwuna ena kwa miyawatanidi, meta kabo kwa boita. Na ena Yaluwa yona gigibwali unai na buluma yona laulau kwa hekaiyawasidi meta kabo kwa mauli nige kana siga. ¹⁴ Kaniyona ede kaiteyadi siya Yaubada Yaluwana ye woyawoyaidi, meta siya Yaubada natunao. ¹⁵ Na komiu Yaluwa kwa hai'usei ne, nige ye haigomiu bena kwa hemala heyayai tauhaina, ede kabo matamatausiyena kwa miya doha beyabeyana wa. Na ye hegigibasiyeigomiu kwa

hemala Yaubada natunao. Na Yaluwana ne debanaena ta yogasae ta wane, “Aba, Tamamai!” ¹⁶ Yaluwa Tabuna yo yaluwada se hededehe masalaha ede kita Yaubada natunao. ¹⁷ Na ena kita Yaubada natunao, meta hinage yoda dudulai ede kabo yona wasawasa ta hai, gonogonowana doha Keliso. Na ena Keliso yona kamkamna unai ta kamkamnasagui meta kabo hinage iya maiyada yona didiga ta hai.

Kamkamna yo didiga

¹⁸ Na ya nuwatui meta teina mahana ta unai kamkamna saha udiyedi ta kamkamna ta meta nige se lakikalili, ena taba ta hekaigonogonowaidi didiga saesaena matada ne unai kabo ye masalahama ne unai. ¹⁹ Ginauli maudoidi Yaubada ye hetubudi wa meta se nayanayakalili taba Yaubada natunao ye hetaumasalahadi. ²⁰ Matawuwuna ginauli maudoidi meta se laoko Yaubada yona hededeheyababa unai, nige se bom yodi nuwatuyena, na Yaubada yona nuwatuyena. Se nayanayakalili taba ²¹ Yaubada natunao maiyadi yailihai yo didiga se hai na taba nige se boita yo se pwasa.

²² Kabina ta kata meta huya maudoina ye laoma teina, ginauli maudoidi ede se lepalepa doha waihiu labalaba kamkamnana unai ye lepalepa. ²³ Na nige se bom mo, na kita hinage nuwadaena ta lepalepa, na kita Yaubada uwayalayalahauna ta haiyako, iya ede iya Yaluwana. Unai ta nayanayakalili bena taba Yaubada yona hegigibasiyeida wa ye hemamohoiyei na tauda ta hinage ye hehauhaudi. ²⁴ Yaubada ye gilihaidako, iyamo yona hededehesunuma maudoina sola nige ta hai ede ta nayanayai. Kainauya saha ta kitadi yo ta haidiko wa meta nige gonowana ta nayaidi bena kabo se laoma. ²⁵ Na ena ginauli saha bena kabo ta hai na ta nayanayai, meta bena nayana ta nayatautaubigai.

²⁶ Na yoda basabasa udiyedi Yaluwa ye saguida. Kaniyona ede nige kabina ta kata idohagi kabo Yaubada yona nuwatu ta tapwalolowatanidi. Na Yaluwa yoda ye kaibwadadoudou na yona hedehede ne nige gonowana tamowai hesau ye hedede-watanidi. ²⁷ Na Yaubada meta tamowai nuwadiyao kabidi ye kata, yo Yaluwa yona nuwanuwatu hinage kabidi ye kata, matawuwuna Yaubada yona tamowai hesabadi na Yaluwa ye kaibwada meta Yaubada yona nuwatuyena.

²⁸ Kabina ta kata ede saha ta hekalodi maudoidi Yaubada ye hepaisowadi iya taugadosisiyeina yodi namwanamwa hesabana, siya ede kaiteyadi iya yona nuwatu unai ye yoganeidi. ²⁹ Kaiteyadi Yaubada kabidi ye katabagunako meta ye nuwatunonohaidiko kabo kadi kao ye buidi na se lau Natuna kana kao se hai. Unai kabo kana kahao maudoidi luwadiyena iya ye hemala kadi taubaguna. ³⁰ Na kaiteyadi ye nuwatunonohaidiko meta hinage ye yoganeidi. Na kaiteyadi ye yoganeidi meta hinage ye tolehedudulaidi. Na kaiteyadi ye tolehedudulaidi meta hinage ye toledi bena yona didiga saesaena unai kabo maiyanao se miyagogoi.

³¹ Hage, nuwanuwatu ta udiyedi saha kabo ta hedede? Ena Yaubada meta kita yoda tautolo, kaiteya kabo ye hekaiyawasida? ³² Yaubada natukesekesegana nige ye kabihekahini na ye mosegabaei maudoida hesabada. Idohagi to bena ginauli maudoidi hinage nige gonowana ye kainauyaidi kalidaena? Nige! Ye kainauyaida! ³³ Kaiteya kabo lauhegilu ye ginauli Yaubada yona kaisunuwa tamowaidiyao ne udiyedi? Nige hesau, matawuwuna Yaubada ye tolehedudulaidiko. ³⁴ Kaiteya kabo hekilaino ye mo-seidi udiyedi? Nige tamowai hesau. Keliso Yesu ye boita na Yaubada iya ye hetolo'uyoi, na iya meta Yaubada nimatutuna unai ye tutuli na hesabada ye kaikaibwada Yaubada unai. ³⁵ Na Keliso yona gadosisi unai kaiteya kabo ye tolehesuwalada? Bena polohe o pilipili o hewahewaiunu o hasahasali o deha o kababoita ginaulidiyao o iyala kelepana?

³⁶ Doha buka tabuna unai se kuli se wane,

“Kowa debamyena huya maudoina boita ka hekahekalodi.

Kai meta doha mamoe se woyaidi se laulau bena kabo se unuhemwaloidi.” (*Same 44:22*)

³⁷Iyamo nige gonowana saha hesau ye tolehesuwalada! Keliso iya taugadosisiyeida wa, unai ede ginauli maudoidi ta ta saedikwakaliliyeidi. ³⁸Nuwagu ta ye bayao meta nige gonowana ginauli hesau ye tolehesuwalada, nige boita o mauli, nige anelu o demoni, nige teina huya ta ginaulidi o huya matada ne ginaulidi, o gigibwali hesau, ³⁹nige yada ginaulidi o tanoubu ginaulidi, yo nige ginauli saha hesau Yaubada ye ginaulidi ne luwadiyena bena kabo ye tolehesuwalada Yaubada yona gadosisi unai, iya ede Keliso Yesu yoda Guiyau unai ye hemasalaha wa.

9

Yaubada yona tamowai ye kaisunuwaidi

¹ Keliso matanaena ya hededemamohoi, na Yaluwa Tabuna nuwagu ta unai ye hemamohoiyei meta nige ya laulupolupo: ²Yogu tamowai ne hesabadi na nuwagu ta ye yababakalili yo ya nuwanuwatukalili. ³Ya henuwakalili bena kehaguwao Dius tamowaidi taba gilihai se lobai. Ena taba gonowana unai sagu se lobai, meta ye namwa mo taba hesabadi na Yaubada ye kawagulaiyeigau yo Keliso unai ye boligabaeigau. Iyamo nige gonowana.

⁴ Siya meta Isalaela tamowaidi. Yaubada ye hegigibasiyeidi. Yona didiga ye hemasalaha udiyedi. Yona talam ye ginaulidi kalidiyena yo laugagayo yo Numa Tabuna unai taba'ohuina kabikabina yo yona hededehesunuma ye moseidi. ⁵Abelahama, Isako, yo Yakobo meta siya kadi mumugao, na kalidiyena meta Keliso hinage buluma unai ye tubuma, iya ede Yaubada na ginauli maudoidi kadi tanuwaga. Hedebasae ye sae kalinaena nige kana siga. Mamohoi.

⁶ Nige gonowana ta hedede meta Yaubada yona hededehesunuma kalidiyena wa ye kabihebekudi, matawuwuna Isalaela kana isimulitao ne meta nige maudoidi siya Isalaela tamowaidiyao mamohoidi. ⁷Yo hinage Abelahama kana isimulitao ne meta nige maudoidi iya natunao mamohoidi. Doha kulikuli tabuna unai se kuliyako,

“Kam isimulitao mamohoidi kabo Isako unai se tubuma.” *(Genese 21:12)*

⁸ Hedehedede ta kaniyona ede Abelahama natunao bulumaena se tubuma wa meta nige maudoidi Yaubada natunao, na yona hededehesunuma wawayadiyao Yaubada ye kataidi siya Abelahama kana isimulitao. ⁹Kaniyona ede hededehesunuma wa ye wane,

“Bolimai hesauna kabo Sala natuna loheya ye labasi.” *(Genese 18:10,14)*

¹⁰ Nige Sala ye bom mo [*Yaubada yona hededehesunuma debanaena na natuna ye labasi*], na Lebeke hinage. Natunao godegode tamadi meta tamada Isako. ¹¹⁻¹³ (11a) Huyana sola nige godegode wa ye labasidi o ginauli namwanamwana o yababana hesau se ginauli meta ⁽¹²⁾ Yaubada wasa ye mosei Lebeke unai ye wane, “Natun taubaguna kabo kana taumulita yona heyayai tauhaina.” *(Genese 25:23)* ⁽¹³⁾ Doha ede se

kuliyako, “Yakobo ya gadosisiyei, na Iso ya subu.” *(Malakai 1:2-3)* ^(11b) Teina unai Yaubada yona kaisunuwa wa unai yona nuwatu ye hemamohoiyei, doha ye wane, Yaubada tamowai ye kaisunuwaidi meta nige tamowai yodi paisowa debadiyena, na iya ye bom yona nuwatu unai.

¹⁴ Unai kabo saha ta hedede? Bena Yaubada yona kaisunuwa ne nige se dudulai? Nige! Se dudulai! ¹⁵ Matawuwuna ye hededelau Mose unai ye wane,

“Kaiteya yogu katekamkamna unai meta iya kabo ya katekamkamnaei, yo kaiteya yogu sagu unai, iya kabo ya sagusagui.” *(Esodo 33:19)*

¹⁶ Unai Yaubada yona kaisunuwa meta nige tamowai yodi henuhenuwa yo yodi kaikaipate debadiyena na iya ye bom yona katekamkamna debanaena. ¹⁷ Doha kulikuli tabuna unai Yaubada ye hededelau Palao unai ye wane,

“Ya hetologo Aikupito yodi wasawasa, kaniyona ede bena kowa kalimwai yogu gigibwali ya hemasalaha na hesagu se hewasa tanoubu maudoina unai.” *(Esodo 9:16)*

¹⁸ Unai, Yaubada kaiteya ye henuwa meta iya ye katekamkamnaei, na yona hekasa unai tamowai hekadi nuwadi ye hekwailolodi.

Yaubada iya tauhekasa

¹⁹ Nuwana kabo ku henamaiyeigau ku wane, “Unai kabo idohagi to Yaubada sola ye hegiluda? Nige gonowana hesau Yaubada yona nuwatu ye gudui!” ²⁰ Na bena kowa kaiteya to ku kawabui Yaubada unai? “Gonowana ginauli hesau ye hededelau tauginaulina wa unai ye wane, ‘Idohagi to doha teina ku ginauligau?’” *(Aisaiya 29:16)*

²¹ Gulewa tauginaulina yona dudulai meta gonowana bwatano gwauna kesega unai gulewa udoi'udo'i ye ginaulidi, hekadi paisowa namwanamwadi hesabadi na hekadi mosomoso kaba'usa'usa. ²² Gonogonowana doha, Yaubada yona dudulai ede bena yona kouyalayala yo yona gigibwali ye hemasalahadi. Tamowai hekadi Yaubada ye kouyalalayalaidi na se laulau kadi heyababa hesabana. Iyamo ye nayatautaubigakalili kalidiyena. ²³ Hinage ye henuwakalili bena yona didiga saesaena ye hemasalaha, na yona didiga kabakitalobaina ede yona katekamkamna tamowai udiyedi, siya ede ye kabinonohaidi yona didiga hesabana. ²⁴ Kita hinage Yaubada yona yoga tamowaidiyao ne luwadiyena, nige bena Dios se bom mo, na Dagela tamowaidi hinage. ²⁵ Doha Hoseya yona kulikuli unai Yaubada ye hededeyako ye wane,

“Kaiteyadi siya nige yogu tamowai kabo ya kataidi ede yogu tamowai, yo tamowai nige ya gadosisiyeidi wa meta kabo ya gadosisiyeidi.” *(Hoseya 2:23)*

²⁶ Hinage ye wane,

“Beyabeyana Yaubada ye hededelau udiyedi ye wane,
‘Komiu nige yogu tamowai!’,

iyamo kabakulihemasalaha kesekesegana ne unai kabo se kataidi
siya Yaubada maumaulina natunao.”

(Hoseya 1:10)

²⁷ Aisaiya kalinana lakilakina unai na Isalaela hedehehedededi ye hedehehede ye wane, “Bwagana Isalaela tamowaidi se badokalili doha salagomgom nagalina, iyamo hisahisadi mo Yaubada kabo ye gilihaidi.

²⁸ Matawuwuna Guiyau kabo tanoubu ta tamowaidi ye hekilainodi
ma sagenana yo nige hededeibuina hesau.”

(Aisaiya 10:22-23)

²⁹ Ede doha Aisaiya ye hededeyako wa ye wane,

“Ena taba Guiyau Gigibwali Saesaekalilina kada isimulitao tamowaidiyao hekadi nige
ye kabitolei

meta kita kabo gonogonowana doha magai Sodoma yo Gomola.” *(Aisaiya 1:9)*

Tolehedudulai tauhaina

³⁰ Unai kabo saha ta hedede? Dagela tamowaidi siya nige se modekalili bena taba laulau dudulaidi se miyawatanidi, iyamo yodi sunuma debanaena ede Yaubada ye tolehedudulaidi iya kalinawai. ³¹ Na Isalaela tamowaidi siya laugagayo ne se kaipate bena se miyawatawatani, iyamo tolehedudulai ne meta nige se hai. ³² Idohagi to nige se hai? Matawuwuna ede nige yodi sunuma unai na tolehedudulai se wasewasenei, na siya yodi laulau mo udiyedi se kaipate bena se hai. Ede kabakalabesibesi wekuna unai se kalabesibesi, ³³ doha kulikuli tabuna unai ye wane,

“Kwa kita ne, Saiyona unai weku hesau ya tole

iya tamowai tauhekalabesibesidi

yo iya kabo tamowai ye kosohebekudi.

Iyamo kaiteya iya ye sunumaei meta taba nige ye hemwadine.” *(Aisaiya 8:14 yo 28:16)*

10

¹ Kagu kahao, yogu henuwalakilaki yo yogu tapwalolo Yaubada unai Isalaela hesabadi ede taba kabihemaui se hai. ² Gonowana ya hededehehemasalahadi meta Yaubada se henuwakaliliyei, iyamo nige nuwatulobaina hesau kalidiyena. ³ Tolehedudulai Yaubada unai ye laoma ne nige se nuwatulobai na se kaipate bena se bom se tolehedudulai'uyoidi, na nige se modelau Yaubada yona tolehedudulai unai. ⁴ Laugagayo yona kabagehe ede Keliso. Unai ede tausunuma maudoidi gonowana tolehedudulai se hai.

⁵ Mose ye hededehehemasalaha meta idohagi kabo tolehedudulai ta hai laugagayo debanaena, ye wane,

“Kaiteya laugagayo maudoidi ta ye miyawataninamwanamwaeidi kabo maui ye hai.” *(Lewitikasi 18:5)*

⁶ Na tolehedudulai sunuma debanaena wa kulikuli tabuna hedehededena ye hedede ye wane,

“Tabu nuwamyena ku wane, ‘Kaiteya kabo ye sae galewa’”

benana kabo Keliso ye hai na ye dobiyeiyama? ⁷ Yo,

“tabu ku wane, ‘Kaiteya kabo ye dobi tanoubu gunimolosina ne unai’” *(Dutelonomi 30:13)*

na tauboiboita udiyedi Keliso ye baheisiniyama?

⁸ Na hage, saha ye hedede?

“Hedehedede wa iya ede dedekam ne unai. Iya ede kawam ne unai yo nuwam ne unai.” *(Dutelonomi 30:14)*

Teina hedehedede ta meta sunuma wasana, iya ede ka hewahewasa'usei ta. ⁹ Kaniyona ede, ena taba kawamyena ku hedede ede Yesu iya Guiyau, na nuwamyena ku kawamamohoi meta tauboiboita udiyedi na Yaubada ye hetolo'uyoi, kabo ye gilihaigo.

¹⁰ Kaniyona ede nuwamyena meta ku kawamamohoi na tolehedudulai ku hai, na kawamyena ku hededehehemasalaha na gilihai ku lobai. ¹¹ Doha kulikuli tabuna ye wane,

“Kaiteya Guiyau ye sunumaei meta taba nige ye hemwadine.” *(Aisaiya 28:16)*

¹² Kaniyona ede Dius yo Dagela tamowaidiyao meta nige yodi udoi hesau. Guiyau kesegana ne meta maudoidi yodi Guiyau, na tauyogasae iya unai maudoidi ne ye kainauyakaliliyeidi. ¹³ Doha kulikuli tabuna ye wane,

“Kaiteyadi se kaibwada sagu hesabana Guiyau unai meta kabo ye gilihaidi.” *(Yoela 2:32)*

¹⁴ Na idohagi kabo se yogasae iya unai ena nige se sunumaei? Na idohagi kabo iya se sunumaei ena wasana nige se lapui? Na idohagi kabo wasana se lapui ena nige tamowai hesau ye lauguguya kalidiyena? ¹⁵ Na idohagi kabo se lauguguya kana siga ena Yaubada ye hetamalidi? Doha kulikuli tabuna unai se kuliyako se wane,

“Huyana wasa namwanamwana se baheiyama meta ta hailobaidi ma gwaualada.”** *(Aisaiya 52:7)*

¹⁶ Iyamo nige Isalaela tamowaidiyao maudoidi wasa namwanamwana ta se kawakabiyei. Doha Aisaiya ye wane,

“Guiyau, kaiteya meta yoma wasa ta ye kawamamohoiyei?” *(Aisaiya 53:1)*

¹⁷ Unai, sunuma yona kabalaoma ede wasa namwanamwana lapuina unai, na wasa namwanamwana yodi kabalapuina ede ena tamowai hesau Keliso wasana ye hededehehemasalaha kalidiyena. ¹⁸ Kabo ya henamai, Dius tamowaidi wasa ne se lapui e nige? Se lapuiyako! Doha kulikuli tabuna unai se kuliyako se wane,

“Kalinadi ye laoko tanoubu maudoina unai

** **10:15:** “Huyana wasa namwanamwana se baheiyama meta ta hailobaidi ma gwaualada.” Paulo Aisaiya yona kulikuli ye katai na ye kuli, “Wasa namwanamwana taubaheiyamana kaedi ne se namwakalili.” Lausoiso unai hedehedede ta kaniyona ka kuli.

na yodi hedehedede meta tanoubu tehagehegehena ne udiyedi se lapuiyako.”
(*Same 19:4*)

¹⁹ Kabo ya henamai'uyo, nuwana Isalaela nige se nuwatulobai? Se nuwatulobai! Mose ye hededeyako ye wane,

“Boda hekadi siya nige yogu tamowai kabo ya saguidi na unai ya sinaligomiu, na namwa saha kalidiwai ne kabo kwa kaipatebayao bena hinage kwa hai, yo tamowai hekadi, siya nige nuwatulobai kalidiyena, na yogu kabi se namwa udiyedi na unai kabo ya hekouyalayalagomiu na kwa kouyalayalaeigau.” (*Dutelonomi 32:21*)

²⁰ Yo Aisaiya ma nuwabayaona na [*Yaubada kalinana*] ye hededehemasalaha ye wane, “Tamowai nige se waseneigau, iyamo se lobaigau.

Nige se kaibwada bena se kitagau, iyamo ya bom ya hemasalaha'uyoigau kalidiyena.” (*Aisaiya 65:1*)

²¹ Na kabo Isalaela hedehedededi hesau Aisaiya ye hededehemasalaha ye wane,

“Mayadai maudoina nimagu ya helelelaedi tamowai kalidiyena, iyamo se kawayagala yo nuwadi se kwailolokalili.” (*Aisaiya 65:2*)

11

Isalaela tamowaidi hisa mo mauli se lobai

¹ Hage ya henamai'uyo: Idohagi, Yaubada yona tamowai Isalaela ye subudi? Nige! Matawuwuna ede yau hinage Isalaela tamowaina, Abelahama kana isimulita yo Beniyamina bodana unai ya laoma. ² Yaubada yona tamowai siya haedi beyabeyana ye kaisunuwaidiko wa meta taba nige ye subudi. Kulikuli tabuna unai peloweta Eliya wasana saha se kuliyako wa sola kwa nuwatui. Isalaela tamowaidiyao yodi laulau debadiyena ede ye hetalapililau Yaubada unai ye wane,

³ “Guiyau, yom peloweta meta se unuhemwaloidiko yo yom kaitalasam miladiyao se hetatagwaligwalidi. Na yau meta yom peloweta gehegehena ede, na se kaipate bena se unuhemwaloigau.” (*1 Kin 19:10,14*)

⁴ Na Yaubada ye hededeuilau kalinawai meta saha? Ye wane,

“Tamowai badona 7,000 meta ya tolehesuwaladiko, siya meta nige huya hesau unai se tulibono Baala kalinawai.” (*1 Kin 19:18*)

⁵ Gonogonowana doha, teina huya ta unai meta Yaubada yona kabinamwa debanaena ede Isalaela tamowaidiyao hisahisadi mo ye kaisunuwaidi. ⁶ Na ena yona kabinamwa debanaena, meta nige gonowana ta wane, yodi miyamiya namwanamwadi debadiyena. Ena taba yodi miyamiya debadiyena, meta nige gonowana ta hedede bena Yaubada yona kabinamwa debanaena [*na ye kaisunuwaidi.*]

⁷ Unai kabo saha ta hedede? Isalaela tamowaidiyao hisahisadi mo tolehedudulai se wasewasenei wa se lobai, na maudoilaki meta nige. Na siya haedi Yaubada ye kaisunuwaidi wa meta ye tolehedudulaidi kalinawai. Na hekadiyo meta se nuwak-wailolokalili. ⁸ Doha kulikuli tabuna unai se kuli,

“Yaubada meta siya nuwadi ye heyauyauledi, matadiyao ye hegibugibudi na nige gonowana saha hesau se kita, yo beyadiyao ye hekolakoladi na nige gonowana saha hesau se lapui, beyabeyana unai ye laoma ee teina.” (*Dutelonomi 29:4, Aisaiya 29:10*)

⁹ Yo Dawida ye wane,

“Taba kadi kai hatahatana** ne ye hemala kabasipwaidi yo yodi kabakalabesibesi yo hekilaino yodi kabalobaina.

** **11:9:** Kai hatahatana meta heyahayasoni, kai yodi hepahepaisowana ye hetala. Doha se mahimahihi yo se kaitalasamyeyidi yodi koitau udiyedi.

¹⁰ Taba matadiyao se gaugau na unai kabo nige saha se kita na pilipili unai dageladiyao ne ye kaiheyoyouidi.”

(Same 69:22-23)

Dagela tamowaidiyao Yaubada ye hemwalaedi kana bodao udiyedi

¹¹ Na ya henamai'uyo: Idohagi, se kalabesibesi na se beku ede nige gonowana namwanamwa se lobai'uyoi? Nige! Gonowana kabo namwanamwa se lobai! Iyamo teina yodi laupwanolakilaki ta debanaena ede kabihemauli ye masalahalau dagela tamowaidiyao udiyedi na unai kabo Isalaela tamowaidi Yaubada ye sinalidi. ¹² Teina yodi laupwano ta kaniyona ede tanoubu maudoina ta yodi namwanamwa, yo yodi beku ne kaniyona ede dagela tamowaidiyao yodi namwanamwa. Na taba huya matadaena Isalaela tamowaidi maudoidi se nuwabui na se uyoma Yaubada unai, meta kabo namwanamwa yona laki doha saha ye masalahalaoma tanoubu maudoina ta kalidiyena?

¹³ Teina kabo ya hededelaowa komiu dagela tamowaidiyao kalimiuyena. Yau meta apostolo Yaubada ye kaisunuwaigau dagela tamowaidiyao hesabamiu. Yogu paisowa ta unai ya gwauyalakalili. ¹⁴ Na ya henuwakalili taba yogu tamowai ya henuwahesaedi, na unai kabo hekadi ya saguidi na mauli se lobai. ¹⁵ Matawuwuna ede, huyana Yaubada Isalaela ye miyadagedagelaedi meta tanoubu ta tamowaidi Yaubada maiyadi se uyoma se miyakesega. Na yona hai'uyoidi ne unai meta kabo saha? Kana kao kabo doha boita unai se mauli'uyo.

¹⁶ Ena witi haibagunana pwalawana tupwana kaitalasangna ye lau Yaubada unai meta pwalawa maudoina ne Yaubada yona. Yo ena olibe kaiwana lamna se namwa, kabo lagana maudoidi ne se namwa.** ¹⁷ Komiu dagela tamowaidiyao meta doha olibe nukula lagana. Olibe kaiwana namwanamwana wa lagana hekadi Yaubada ye gasihaidi na ye hekinihekawagomiu kaiwana ne unai, ede lagana hekadiyo wa maidamiu lamna ne udiyedi yomi bayao kwa hai. ¹⁸ Laga ye gasihaidi wa debadiyena tabu ku nuwasaesae, matawuwuna kowa nige kaiwa ne lamna tauhebayaona, na lamna ne kowa ye hebayaogo. ¹⁹ Nuwana kabo ku wane, “Laga wa ye gasihaidi matawuwuna ye henuwa bena yau ye hekinihekawagau.” ²⁰ Mamohoi. Na taba ku nuwatulobai meta siya nige se kawamamohoi na debanaena Yaubada ye gasihaidi, na kowa sunuma mo debanaena ku tolokesegai. Unai tabu ku nuwasaesae na bena ku matausi, ²¹ matawuwuna Yaubada kaiwa laganao mamohoidi wa ye gasihaidi, unai kabo kowa hinage gonowana ye gasihaigo.

²² Unai bena Yaubada yona kabinamwa yo yona kouyalayala ku nuwatuidi. Taubeku wa ye kouyalalayalaidi, na yona kabi se namwa kowa kalimwai, ena taba yona kabinamwa unai ku miyakesegai. Na ena ku miyasuwalaei, kabo ye boligabaego. ²³ Na siya ena se nuwabui na se sunuma Yaubada unai, kabo ye tolehepatu'uyoidi olibe kaiwana ne unai, matawuwuna iya gonowana ye haidi na ye hepatu'uyoidi. ²⁴ Taba nige tamowai hesau olibe nukula lagana ye hekinihekawalaei yona olibe kaiwana namwanamwana unai. Iyamo komiu olibe nukula laganao, na Yaubada ye haigomiu ye hekinihekawalaeigomiu yona olibe kaiwana namwanamwana unai. Unai Yaubada ye nonohakalili bena olibe namwanamwana laganao wa ye tolehepatu'uyoidi yodi kabalaoma kaiwana wa unai.

Isalaela maudoidi kabo gilihai se lobai

** **11:16:** Pwalawa yo olibe kaiwana heyaheyasonidi ta udiyedi Paulo Isalaela tamowaidi ye hetaladi. Pwalawa se kaitalasangna ye yo kaiwa lamdi wa, siya ede kadi mumuga Abelahama, Isako yo Yakobo, siya Yaubada tausunumaena. Na pwalawa maudoina ne yo kaiwa lagana maudoidi ne meta kadi isimulitao. Buka Tabuna unai kulikuli se bado Isalaela se heyaheyasoniyeyidi olibe kaiwana unai. Hedehedede Yaubada yona yo se namwa ne meta hedehedede kesega kalina Giliki yo Dimdim udiyedi, iya ede *holy*. Tabu hededehemasalahana ku hasili.

²⁵ Na kagu kahao, teina nuwanuwatu saesaena ta ya henuwa bena kabina kwa kata. Kabo nige gonowana kwa nuwasaesaegaibu. Nuwanuwatuna ede, Isalaela tamowaidi hekadi se nuwakwailolo meta kana siga ee dagela tamowaidi yodi patulaoma Keliso unai ne badodi ye lobai. ²⁶ Kabo Isalaela tamowaidi maudoidi gilihai se hai doha kulikuli tabuna unai se kuli,

“Taugilihai kabo Saiyona unai ye laoma.

Iya kabo Yakobo kana isimulita udiyedi kawayagala maudoina ye haigabaei.

²⁷ Teina meta yogu talam ya hededehe sunumaeiyako kalidiyena na kabo ye laoma ye mamohoi, huyana yodi yababa ya nuwatugabaeidi ne unai.”
(*Aisaiya 59:20-21, 27:9, Yelemaiya 31:33-34*)

²⁸ Isalaela tamowaidi se bado siya wasa namwanamwana tauhewaiununa, na unai komiu namwanamwa kwa lobai. Iyamo siya Yaubada yona kaisunuwa tamowaidi na kadi kulutubu wa debadiyena ede siya Yaubada yona gadosisi tamowaidi, ²⁹ matawuwuna Yaubada yona kainauya yo yona yoga meta nige gonowana ye haigabaei kalidiyena. ³⁰ Beyabeyana komiu Yaubada kwa kawayagalaei, na Isalaela yodi kawayagala debanaena ede komiu Yaubada ye katekamkamnaeigomiu. ³¹ Na teina huya ta yodi kawayagala unai meta siya hinage kabo yona katekamkamna se lobai komiu yona katekamkamnaeigomiu ne debanaena. ³² Matawuwuna Yaubada meta tamowai maudoidi yodi kawayagala unai ye kabihekahinidi, na unai bena kabo maudoidi ye katekamkamnaeidi.

Yaubada hedebasaena

³³ Mamohoi kalili! Yaubada yona sibasiba yo yona sonoga wasawasadi se gabwatumkalili,

yona hekasa meta nige gonowana ta nuwatulobaidi,
yo yona laulau nige gonowana ta hededehe masalahadi.

³⁴ “Kaiteya kabo Guiyau yona nuwanuwatu kabidi ye kata?
Yo kaiteya kabo iya tauhededehe sibasibana?”

(*Aisaiya 40:13*)

³⁵ “Na kaiteya bena kainauya ye mosei Yaubada unai,
na Yaubada kabo iya ye hemaisa'uyoi?”

(*Yobi 41:11*)

³⁶ Matawuwuna ginauli maudoidi iya unai se tubuma, yo iya debanaena ede se miyamiya, yo kabo se seuyo kalinawai.

Hedebasae nige kana siga ye sae iya kalinawai. Mamohoi!

12

Kaitalasang maumaulidi

¹ Unai, kagu kahao, ya kaibwadalakilaki kalimiuyena taba Yaubada yona katekamkamna debanaena, taumiya kwa mose'uyoidi se hemala kaitalasang maumaulidi yo a'adi** yo Yaubada ye kitahenamwadi. Teina meta yomi taba'ohu kabikabina mamohoina. ² Tabu tanoubu ta miyamiyana kwa miyawatanidi, na Yaubada kwa talamyeyi na bena yomi nuwanuwatu ye hehauhaudi na ye buigomiu kwa hemala tamowai hauhaudi. Kabo gonowana ginauli maudoidi kwa kitalobaidi na Yaubada yona nuwatu kwa nuwatulobai, iya ede ye namwakalili yo kitakitana ye namwa yo ye dudulaikalili.

³ Yaubada yona kabinamwa unai paisowa saha ye leyama wa debanaena kabo komiu kesega kesega ya hededelaowa kalimiuyeni: Tabu kwa kitahesaekaliliyeigomiu, na yomi nuwanuwatu dudulaidi udiyedi hekasa kwa ginauli na kwa kitalau sunuma nowonowoina saha Yaubada kalinawai kwa hai wa unai.

⁴ Kita kesega kesega tauda ne meta kesega, na unai yauda se bado. Na yauda kesega kesega ye bom yona paisowa. ⁵ Gonogonowana doha, kita ekalesiya ta bado,

** **12:1:** A'adi meta Dimdimyena se kuli, *holy*. Tabu hededehe masalahana ku hasili.

iyamo Keliso unai ta hemala tau kesega, na yau maudoidi ne se haihaisagusagu'uyoidi. ⁶Yaubada yona kabinamwa unai yoda kainauya udoi'udoj ye haidima. Ena tamowai hesau yona kainauya ede hededepeloweta, meta bena yona sunuma nowonowoina unai ye hepaisowa. ⁷Ena yona kainauya ede haisagusagu, meta bena ye haisagusagu. Ena iya taulauhekata, meta bena ye laulauhekata. ⁸Ena iya tauhededehebayaodi, meta bena tamowai nuwadiyao ye hededehebayaodi. Ena yona kainauya ede tamowai ye sagusaguidi yona gogo udiyedi, meta bena ye kaikainauya ma nuwamamohoina. Ena iya tauwoyawoya, meta bena ye woyawoyanamwanamwa. Ena yona kainauya ede katekamkamna, meta bena ye hepaisowa ma gwaugwauyalana.

Gadosisi miyamiyana

⁹ Bena gadosisi mamohoina unai kwa gadogadosisi. Yababa kwa subu na laulau namwanamwadi kwa kabihkahinidi. ¹⁰ Ma kami kahao kwa haigadogadosisi'uyoigomiu. Tamowai hekasisidi ye sae na kabo komiu. ¹¹ Taba kwa taubiga yomi paisowa udiyedi na tabu kwa kabikabikwaikwailolo. Yaubada yona kwa paisowa ma nuwakohihaimiu. ¹² Yomi midi Yaubada unai ne debanaena bena kwa gwauyala. Huyana pilipili kwa hekalo meta bena kwa nayatautaubiga. Yomi tapwalolo udiyedi bena kwa tolokesegai. ¹³ Yaubada yona tamowai ena se henuwasagu meta bena kwa saguidi. Yogayogaisini kabikabidi kwa miyamiyaeidi.

¹⁴ Tauhewaiunugomiu kwa hededehenamwadi. Tabu hededeheyababa kwa tole kalidiyena, na bena kwa hededehenamwadi. ¹⁵ Ena tamowai se gwauyala meta maidamiyao kwa gwauyala, na ena se siyayau meta maidamiyao kwa siyayau. ¹⁶ Tamowai maidamiyao bena nuwadaumwaliyena kwa miya. Tabu kwa nuwasaesae, na taba kwa nuwatalam bena tamowai se kitadobidobiyeidi ne kwa labinidi. Tabu kwa kitahesae'uyoigomiu bena kwa katakalili.

¹⁷ Ena tamowai hesau yababa ye ginauli kalimiuwai meta tabu kwa haigum. Taba yomi laulau se namwa tamowai maudoidi matadiyena. ¹⁸ Ena gonowamiu, bena yomi tupwa kwa ginauli na tamowai maudoidi maidamiyao nuwadaumwaliyena kwa miya.

¹⁹ Kehaguwao, tabu kwa haigum, na kwa tolegabaei Yaubada yona kouyalayala unai, matawuwuna Yaubada yona hedehedede se kuliyako, ye wane,

“Haigum meta yau yogu, yau kabo yona yababa ne maisana ya mosei.” (*Dutelonomi 32:35*).

²⁰ Na ye wane,

“Ena kam waiunu ye hasali meta kai ku mosei ye kai,

na ena gadona ye magu meta waila ku mosei ye numa.

Saha ku ginauli ta unai kabo ye nuwatulobai na ye mwadine.”** (*Hededesonosonoga 25:21-22*)

²¹ Tabu yababa ye saedikwaigo, na bena miyamiya namwanamwadi udiyedi yababa ku saedikwaei.

13

Gabemani bena ta kawakabiyeidi

¹ Tamowai maudoidi bena yodi gabemani se kawakabiyeidi, matawuwuna yodi gigibwali meta Yaubada unai ye laoma na yodi kabaloina gigibwalina ne meta Yaubada ye moseidi. ² Unai ena kaiteya tauloina ye kawayagalaeidi meta Yaubada saha ye hetubu wa ye kawayagalaei. Na kaiteyadi teina laulau ta se ginaulidi ne, unai meta se bom kadi heyababa se ginauli. ³ Matawuwuna tamowai yodi laulau se dudulai, siya nige gonowana tauloina ne se matausiyeidi. Na kaiteyadi yodi laulau se yababa meta

** **12:20:** Kabo ye nuwatulobai na ye mwadine: Paulo yona kulikuli unai buka wa ye katai ye kuli ede, Kabo ginaha kalakalasiidi kuluna kewana ne unai ku gwawuidi. Hedehedede ta kaniyona ede lausoi unai ka kulihemasalaha.

kabo se matausi. Unai, ena nige ku henuwa bena tauloina ku matausiyei meta bena yom miyamiya se dudulai, unai kabo ye kawanamwanamwaeigo. ⁴ Matawuwuna iya Yaubada yona taupaisowa yo kowa yom namwanamwa tauginaulina. Na ena yababa ku ginauli, bena ku matausi, kaniyona ede kabahekamkamna gigibwalina kalinawai ne nige ye haigaibui. Iya meta Yaubada yona, yo yona kouyalayala tauhemasalahana, na hekamkamna kabo ye tole yababa tauginaginulidi kalidiyena. ⁵ Unai taba tauloina ta kawakabiyeidi, nige bena hekamkamna matausiyeina debanaena, na hinage nuwada ye hekatada ede kawakabi laulauna meta ye dudulai.

⁶ Teina hinage debanaena ede takisi kwa toletole, kaniyona ede gabemani ne Yaubada yona taupaisowa na mahana maudoina se talamyeyi yodi paisowa hesabana. ⁷ Gabemani yodi taupaisowa maudoidi ne yodi dudulai unai na ena saha se henuwa bena kalimiuyena se hai meta bena kwa moseidi. Ena takisi, kabo takisi kwa moseidi. Ena ginauli saha hesau maisana, bena maisana ne kwa moseidi. Ena hekasisi, bena kwa hekasisiyeidi. Ena hedebasae, bena kwa hedebasaeidi.

Gadosisi meta laugagayo maudoidi tauhemamohoiyeidi

⁸ Tabu kami hagahaga hesau ye miya huyana ye loha, na hagahaga kesega nige gonowana ye gehe ede ta haigadogadosisi. Kaniyona ede, ena hesau kana kaha ye gadosisiyei, meta unai kabo laugagayo maudoidi ne ye miyawatanidi. ⁹ Laugagayodi ede,

“Tabu ku ganawali,”

(Esodo 20:14)

“Tabu ku kaikaiunu,”

(Esodo 20:13)

“Tabu ku kaiwahali,”

(Esodo 20:15)

“Tabu kam kaha hesau yona gogo saha hesau ku gadosisigaibui,” (Esodo 20:17)**

yo hinage laugagayo saha hekadiyo, meta teina laugagayo kesega ta unai ye kabi-gogoidi, iya ede,

“Helem taumiya ku gadosisiyei doha ku bom ku gadosisiyei'uyoigo.” (Lewitikasi 19:18)

¹⁰ Gadosisi nige gonowana helena taumiya ye hekamkamna. Tenem debanaena ede gadosisi meta laugagayo maudoidi ne tauhemamohoiyeidi.

Gililai mayadaina hesabana bena ta nonoha

¹¹ Unai gadosisi miyamiyadi ta kwa miyawatanidi, matawuwuna teina huya ta bena kwa nuwatulobai na yomi keno unai kwa kenotoloma. Matawuwuna ede yoda huyasunuma huyana bagubagunana unai na ye laoma meta gilihaida mayadaina ne ye hanahanaumako. ¹² Boniyai nige bayaona kabo ye gehe na mayadai ede ye hanahanauma. Unai taba masigili miyamiyadi ta tolehesuwaladi na dawaya yona iyala gogodiyao udiyedi ta henonohada. ¹³ Bena yoda miyamiya se namwa doha mayadaiyena ta miyamiya. Tabu gwauyala yauyaule udiyedi ta modemodegaibu yo tabu ta numanumayauyaule, tabu laulaubikibiki kabikabidiyao udoi'udo i ta ginaginulidi, tabu haihewahewaiunu yo kaikalomagigili udiyedi ta miyamiya. ¹⁴ Na bena yoda Guiyau Yesu Keliso yona miyamiya kwa miyahemasalahadi** na tabu yomi nuwanuwatu bena idohagi kabo buluma yona gadosisi yabayababadi kwa ginawatanidi.

14

Tausunumabasabasa bena ta saguidi

¹ Tamowai yona sunuma ye basabasa bena kwa talamyeyi ye laowa kalimiuyena, na tabu kwa haikawayagala yona nuwatulobai yo yona laulau ne debadiyena. ² Tamowai

** **13:9:** Laugagayo ne hinage Dutelonomi 5:17-21 udiyedi se kuli. ** **13:14:** Guiyau Yesu Keliso yona miyamiya kwa miyahemasalahadi: Nuwanuwatu ta Paulo ye heyaheyasoniyei kaleko unai na ye kuli, Guiyau Yesu Keliso unai taumiya kwa sumadi.

hesau yona sunuma unai meta gonowana kai maudoidi [*yo suisui bulumadi*] ** ye kaidi, na hesau ne yona sunuma unai ye basabasa, ede kaigaibu mo kabo ye kaidi. ³ Kai maudoidi taukaidi ne meta tabu taukaidabudabu ne ye kitadobidobiyei. Hinage taukaidabudabu ne tabu kai maudoidi taukaidi ne ye kitaheyababa, matawuwuna Yaubada meta iya ye kitahenamwa. ⁴ Kowa kaiteya to bena tamowai hesau yona heyayai tauhaina ku kitahekasa? Kana tanuwaga kabo yona ye hineli ede saha ye ginaulidi ne se namwa o nige. Na Guiyau kabo ye kitahenamwa, matawuwuna Guiyau gonowana yona laulau ye tolehedulaidi na ye kitahenamwa.

⁵ Tamowai hesau meta mayadai kesega ye kitahesaekaliliyei** na kabo mayadai hekadiyo, na hesau kalinawai ne mayadai maudoidi ne gonogonowadi. Unai tamowai kesega kesega taba yona nuwatulobaiyena na ye bom yona ye hineli na unai ye tolobayao. ⁶ Kaiteya mayadai kesega ye kitahesaeki meta unai Guiyau ye hekasisiyei. Kaiteya kai maudoidi taukaidi ne meta Guiyau hekasisina debanaena na kai ne ye kaidi na lautokidi ye mosei Yaubada unai. Na taukaidabudabu ne Guiyau hekasisina debanaena ye kaidabudabu, na iya hinage Yaubada ye lautokiyei. ⁷ Matawuwuna ma maumaulida ta nige bena ta bom hesabada, na ta boita meta nige ta bom hesabada. ⁸ Ma maumaulida ta meta Guiyau hesabana, yo ta boita hinage Guiyau hesabana. Unai ma maumaulida o ta boita meta kita Guiyau yona. ⁹ Teina debanaena ede Keliso ye boita na ye uyoma ye mauli'uyo, na unai kabo ye hemala tauboiboita yo tauyawayawasi yodi Guiyau.

¹⁰ Na idohagi to kam kaha ku kitahekasa? Yo ye saha to kam kaha ku kitadobidobiyei? Matawuwuna kita maudoida meta Yaubada yona hekasa mayadaina unai kabo ye kitahekasada. ¹¹ Doha se kuliyo wa ye wane, “Guiyau ye bom yona mauli unai ye hedede kaigwala ye wane, ‘Tuli maudoidi kabo mataguyena se tulibono, yo memena maudoidi kabo se hedede hemasalaha ede yau Yaubada.’ ” (*Aisaiya 45:23*)

¹² Ede kesega kesega kabo ye bom yona hedede hemasalaha ye ginauli Yaubada unai.

¹³ Unai taba haikitakitahekasa ne ta hekaiyawasidi. Na bena yoda nuwahuneli ta ginauli kabo taba nige kada kaha hesau yona kabakalabesibesi yo yona kabaheduna ta tole. ¹⁴ Guiyau Yesu debanaena ede kabina ya katakalili kai maudoidi udiyedi meta nige hesau ye biki. Iyamo, ena tamowai hesau ye hedede ede kai hesau nige ye a'a, meta tamowaina ne kalinawai kai ne ye biki. ¹⁵ Ena kai saha yom kaina ne debanaena ede kam kaha nuwana ku heyababa na ye nuwanuwatukalili, meta ye hemasalaha ede nige gadosisi unai ku miyamiya. Tabu kai saha yom kaina ne unai kam kaha ne yona sunuma ku heyababa, kaniyona ede iya hinage hesabana Keliso ye boita. ¹⁶ Yom kaikai ne unai tabu solasola hesau ku tole na unai kai saha ku hedede ede ye namwa ne bena se hedede ede ye yababa. ¹⁷ Matawuwuna Yaubada yona basileiya unai, ta kaikai yo ta numanuma ne nige se saekalili, na miyamiya dudulaina yo nuwadaumwali yo gwauyala Yaluwa Tabuna unai meta se saekalili. ¹⁸ Ena doha teina tamowai hesau Keliso yona ye paisowa, kabo Yaubada yo tamowai iya se kitahenamwa.

¹⁹ Unai taba yoda kaipatelakilaki ede bena nuwadaumwali ta ginauli na ma kada kahao ta haihebahebayao'uyoida. ²⁰ Tabu kai debanaena na Yaubada yona paisowa ne kwa hetatagwaligwali. Kai maudoidi ne se a'a, na saha ye yababa ede ena kai saha yomi kaina ne unai kami kaha kwa hekalabesibesi. ²¹ Ye namwa mo taba tabu suisui hesau

** **14:2:** Suisui bulumadi: Magai Loma unai nige tausunuma maudoidi meta suisui bulumadi se kaitalasamyeyidi koitau udiyedi, na kabo se kaidi o se lokuneidi maketi udiyedi. Nuwanuwatu ta hedehedena Paulo hinage ye kuliyo 1 Kolinito 8:1-13 yo 10:14-33 udiyedi. ** **14:5:** Mayadai kesega ye kitahesaekaliliyei kaniyona meta mayadaina ne ye hedede ede iya Yaubada yona mayadai na ye hekasisiyei.

bulumana kwa kai o waina kwa numa o ginauli saha hesau kwa ginauli na unai kami kaha hesau yona kababeku kwa ginauli.

²² Unai yom kawamamohoi saha teina ginaulidiyao ta udiyedi meta bena ku nuwatuhekahinidi kowa yo Yaubada kalimiuyena. Ginauli saha ta kitahenamwadi ne, ena nige se hemala kabahegiluda, meta gonowana ta gwauyala. ²³ Ena tamowai nuwana ye labulabui na ye kaikai, meta giluna ede ye bom kalinawai, matawuwuna ede saha unai ye kawamamohoi wa meta nige ye hemuliwatani. Na ena laulau saha hesau ku ginauli na yom kawamamohoi ede nige ye dudulai, meta ku ba'aya.

15

¹ Kita sunuma unai taubayao ne tabu ta bom mo ta nuwatu'uyoida na taba sunuma unai taubasabasa ne ta saguidi. ² Kita kesega kesega taba kada kahao ta nuwatuidi yodi namwanamwa hesabana na unai kabo ta hebayaodi. ³ Matawuwuna Keliso hinage nige ye bom ye nuwatu'uyoi, doha iya yona hedehedede se kuliako,

“Kowa tauhededeheyababago yodi hededeheyababa wa se talu kaliguwai.” *(Same 69:9)*

⁴ Kulikuli tabudi hedehedededi doha teina meta nabada wa unai se kulidi na udiyedi se hekatada bena ta tolobayao, yo se hededehebayaoda. Na unai kabo gonowana ta nayatautaubiga Yaubada yona hededehesunuma hesabadi.

⁵ Nayatautaubiga yo hededehebayaoda ne meta Yaubada unai se laoma. Na yomiu ya tapwatapwalolo taba maudoimiu ne nuwakesega unai kwa miya na unai Keliso Yesu yona miyamiya kwa miyawatanidi. ⁶ Na unai kabo nuwakesegaena yo kalina daguguna kesega unai Yaubada kwa hedebasaei, iya ede yoda Guiyau Yesu Keliso Tamana.

⁷ Kami kahao mauidi bena kwa talamyeyidi na maidamiyao kwa hebodakesega, doha Keliso yona talam ye ginauli na ye kabigogoigomiu. Teina unai kabo hedebasae ye sae Yaubada unai. ⁸ Bena ya henuwaisinigomiu meta Yaubada yona hedehedede mamohoidi debadiyena Keliso ye laoma Dius udiyedi na ye paisowa hesabadi. Ede Yaubada yona hededehesunuma kadi kulutubu udiyedi wa ye hemamohoiyeyidi, ⁹ yo hinage dagela tamowaidiyao bena kabo Yaubada se hedebasaei yona katekamkamnaedi ne debanaena. Doha se kuliako ye wane,

“Unai dagela tamowaidi luwadiyena kabo ya hedebasaego, wana yogu wanaidi unai kabo hesam ya hedebasaei.” *(2 Samuwela 22:50, Same 18:49)*

¹⁰ Teha hesau unai ye wane,

“Oo, dagela tamowaidiyao, yona tamowai Isalaela maidamiyao kwa gwauyala!” *(Dutelonomi 32:43)*

¹¹ Hinage teha hesau unai ye wane,

“Dagela tamowaidiyao maudoimiu, Guiyau kwa hedebasaei, yo teha maudoina tamowaidiyao, hedebasae wanadi kwa wanaeyidi se sae unai.” *(Same 117:1)*

¹² Hinage Aisaiya ye wane,

“Yese silina kabo ye kinisaema.

Tamowaina ne kabo ye tolosaema na ye hemala teha maudoina kadi tanuwaga. Na dagela tamowaidiyao kabo yodi midi se tole iya unai.” *(Aisaiya 11:10)*

¹³ Yoda kabamidi Yaubadana ya kaibwadaei taba yomi sunumaeyina ne unai gwauyala yo nuwadaumwali unai ye hemwayaugomiu. Teina unai Yaluwa Tabuna yona gigibwali debanaena ede yomi midi kabo ye lakikalikalili.

Paulo ye hemala dagela tamowaidiyao yodi taupaisowa

¹⁴ Kagu kahao, yau kabina ya katakalili ede komiu meta miyamiya namwanamwadi se hemwayaukaliliyeyomiu. Sonoga maudoina ede kalimiuyena na unai gonowana

kwa haihekata'uyoigomiu. ¹⁵ Iyamo yogu kulikuli ta unai meta ginauli hekadiyo hesabadi ya hededebayaolaowa kalimiuyena, na unai ya henuwa bena ya henuwaisini'uyoigomiu, matawuwuna Yaubada yona kabinamwa debanaena paisowa ye haiyama kaliguwai ¹⁶ bena yau Keliso Yesu yona taupaisowa dagela tamowaidi kalidiyena. Taukaitalasam paisowana Yaubada ye haiyama na iya wasana namwanamwana ya hededehehemasalahana, na unai kabo dagela tamowaidiyao se hemala kaitalasam namwanamwana, Yaluwa Tabuna ye he'a'a** na Yaubada ye kitahenamwa.

¹⁷ Unai Keliso Yesu yona hebayaoyena na paisowa saha ya ginaulidi Yaubada yona wa debadiyena ede ya hededesaesae. ¹⁸ Taba nige saha hesau hedehededenana ya hedehedede na ginauli kesega ede Keliso saha ye ginauli kaliguyena na yogu hedehedede yo saha ya ginaulidi ne udiyedi kabo dagela tamowaidi ya woyaidi se laoma Yaubada se kawakabiyei. ¹⁹ Matawuwuna Yaluwa Tabuna yona gigibwaliyena ede hekihekinoi yo laulau gigigigibwalidi ya ginaulidi. Na Yelusalema unai ya hetubu na ye lau ee teha Ililikum,** kalidiyena meta Keliso wasana namwanamwana ta ya lauguguyanamwanamwaei.

²⁰ Huya maudoina yogu henuwalakilaki ede bena ya lau haedi Keliso nige kabina se kata ne udiyedi na wasa namwanamwana ta ya lauguguyaei. Tenem unai kabo taba nige tamowai hesau yona paisowa ye ginauliyako na kewana ne unai paisowa hesau ya ginauli. ²¹ Kulikuli tabuna tehana hesau unai ye wane,

“Kaiteyadi siya sola nige wasana yodi se hedehedede kabo matadi se lala, yo kaiteyadi wasana nige se lapui, siya kabo se nuwatulobai.” *(Aisaiya 52:15)*

²² Teina unai ede yogu laowa kalimiuwai ne ye pahilikalili.

Paulo yona hekasa ye ginauli bena ye lau Loma

²³ Na magai maudoidi teina teha ta udiyedi meta kalidiyena yogu paisowa maudoidi ya hegehediko na bolimai ye lohakalili meta ya henuwakalili bena ya kitagomiu. ²⁴ Unai yogu hekasa ya ginauli ede bena huyana ya lau Sipaniya unai kabo ya kitagomiu. Na mayadai hisa metai ta miya na unai kabo kwa saguigau na yogu kadau ne unai ya lau.

²⁵ Na teina ta meta yau kedaena ya laulau Yelusalema. Menai meta bena Yaubada yona tamowai ya saguidi. ²⁶ Kaniyona ede Masedoniya yo Akaiya udiyedi ekalesiya yodi talam se ginauli ede moni se tanoi bena Yaubada yona tamowai luwadiyena taudeha Yelusalema unai kabasaguidi. ²⁷ Ma nuwamamohoidi na se kainauya, na unai Dius kalidiyena kadi hagahaga se hedudulai. Matawuwuna ede dagela tamowaidiyao ne Dius kalidiyena meta Yaluwa ginaulidiyao se haidiko, unai ye launamwanamwaedi taba kadi hagahaga ne kabo tanoubu ta gogodiyao udiyedi se hedudulaidi. ²⁸ Na huyana teina paisowa ta ya hegehe na ya hemamohoiyei meta moni maudoina wa ye lauko se hai, mulina ne unai kabo ya lau Sipaniya na yogu lau ne unai kabo ya kaitaumaigomiu. ²⁹ Na kabina ya kata meta huyana ya laowa kabo Keliso yona hededehehenamwa maudoina ya baheiyawa kalimiuwai.

³⁰ Kagu kahao, yoda Guiyau Yesu Keliso hesanaena yo Yaluwa Tabuna yona gadosisi unai ya kaibwadalakilaki kalimiuyena taba kwa kaipatesaguigau na yogu kwa tapwalolo Yaubada unai ³¹ bena Yudeya unai nige tausunuma kalidiyena ye gilihaigau na Yaubada yona tamowai Yelusalema unai ne yogu haisagusagu ta kabo se kitahenamwa.

³² Na ena Yaubada yona nuwatu, kabo ma gwaugwauyalagu ya laowa kalimiuwai na ta haihebahebayaoda. ³³ Yogu tapwalolo ede taba Yaubada, iya nuwadaumwali tauleyamana, ye miya maidamiu. Mamohoi!

16

Lautoki

** **15:16:** Ye he'a'a: Hetabu hededehehemasalahana ku hasili. ** **15:19:** Teha Ililikum meta Loma basileiyana unai, hesana hesau meta Dalematiya (2 Timoti 4:10), na iya meta teha Masedoniya dedekanaena.

¹ Louda Piibi ya kawanamwanamwaei. Iya ekalesiya bodadi Senkiliya unai yodi diyakona. ² Ya kaibwadaigomiu taba Guiyau hesanaena kwa yogaisini. Taba yomi kabikabina doha Yaubada yona tamowai ye launamwanamwaedi ne. Na sagu saha ye henuwa kalimiuwai ne taba unai kwa sagui, matawuwuna iya hinage tamowai se bado ye sagukaliliyeidi yo yau hinage ye saguigau.

³ Yogu lautoki kwa mosei Pilisila yo Akuila, ** siya helegu taupaisowa Keliso Yesu yona paisowa ne unai. ⁴ Yodi mauli se talamgabaeidi yau hesabagu. Ya lautokikaliliyeidi, na nige yau ya bom mo, na dagela tamowaidi luwadiyena ekalesiya bodadi maudoidi hinage. ⁵ Ekalesiya bodadi siya yodi numa ne unai taukoikoigogo ne hinage yogu lautoki kwa mosei kalidiyena.

Yo yogu gadosisi tamowaina Epenetasi unai yogu lautoki kwa mosei. Iya meta tamowai bagubagunana teha Eisiya unai ye kawamamohoi Keliso unai.

⁶ Yogu lautoki kwa mosei Maliya. Iya yomiu taupaisowabayaokalili.

⁷ Yogu lautoki se lau Andolonikasi yo Diuniyasi kalidiwai. Siya meta yogu hali Dius na lahinaidi maidaguwao numatutugudu unai se tolegai. Apostolo bodadi luwadiyena meta se kitahesaekaliliyeidi, yo siya Keliso unai se kawamamohoibaguna na kabo yau.

⁸ Yogu lautoki ye lau Ampiliyatasi, iya yogu gadosisi tamowaina Guiyau unai.

⁹ Yogu lautoki ye lau Ebanasi unai, iya yoma hali taupaisowa Keliso yona paisowa ta unai, yo kagu kaha namwanamwana Sitakisi unai.

¹⁰ Yogu lautoki ye lau Apelesi unai. Iya hewahewaiunu ye lobaidi, iyamo ye tolobayao na ye hemamohoiyei ede iya Keliso unai tausunumatahitahi.

Yogu lautoki ye lau Alistobulusi yona numa tamowaidiyao kalidiyena.

¹¹ Yogu lautoki ye lau Helediyoni, iya yogu hali Dius.

Yogu lautoki ye lau Guiyau taukawamamohoiyeina siya kaiteyadi Nasisasi yona numa unai ne kalidiyena.

¹² Yogu lautoki ye lau Tulupeina yo Tuluposa kalidiyena. Sinesinebadao labui ne meta Guiyau yona paisowa unai se paisowabayaokalili.

Yogu lautoki ye lau sinada Pesisu unai, iya sinebada hesau ye paisowabayaokalili Guiyau yona paisowa ta unai.

¹³ Yogu lautoki ye lau Lupasi, iya Guiyau yona kaisunuwa tamowaina, yo sinana unai, yau hinage ya kawasina kalinawai.

¹⁴ Yogu lautoki ye lau Asinikilitasi, Pelegonu, Hemesi, Patolobasi, Hemasi, yo kada kahao maidadiyao taumiya ne udiyedi.

¹⁵ Yogu lautoki ye lau Pilologasi, Diuliya, Neleusi ma louna, yo Olimpasi, yo Guiyau yona tamowai maudoidi maiyadiyao ne kalidiyena.

¹⁶ Bena gadosisi mamohoina unai ** kwa hailaulautokiyeigomiu.

Keliso taukawamamohoiyeina bodadi maudoidi yodi lautoki se hetamalidiwa kalim-iuyena.

Hedehedede gehegedi

¹⁷ Kagu kahao, ya kaibwadalakilaki kalimiuyena taba kwa kitanamwanamwa tamowai hekadiyo udiyedi, siya lauhekata kwa haidiko wa nige se miyawatanidi yo ekalesiya bodana unai haikawayagala yo kabahekalabesibesi se ginaulidi. Tamowaidi ne kwa kaihaleidi. ¹⁸ Matawuwuna tamowai doha tenem meta nige yoda Guiyau Keliso yona se paisowa na se bom mo yodi se paisowa. Yodi hedehedede se namwakalili yo tamowai se hedehesaegaibuidi, na tenem unai tamowai supusupudiyao se lupohaidi. ¹⁹ Boda maudoina yomi kawakabi wasana se lapuiyako na unai ya gwauyalakalili

** **16:3:** Pilisila yo Akuila wasadi kabo Apostolo Yodi Paisowa bukana peina 18 unai ku hasili. ** **16:16:** Gadosisi mamohoina unai: Paulo ye kuli, sumta tabuna unai bena se hailaulautokiyeidi, na sumta meta ekalesiya yodi gadosisi hekihekinoina.

komiu debamiuyena. Na ya henuwa taba kwa sibasiba nuwanuwatu namwanamwadi udiyedi na bena yababa nuwanuwatudi kwa kitalobaidi na kwa kaihaleidi.

²⁰ Nige bayaona kabo nuwadaumwali Yaubadana Satani ye saedikwaei na ye tole kaemiu ne gunidiyena.

Taba yoda Guiyau Yesu yona kabinamwa ye miya kalimiuyena.

²¹ Helegu taupaisowa Timoti yona lautoki ye hetamaliyawa kalimiuwai, gonogonowana doha Lusiyasi, Yasona, yo Sosipata, siya yogu hali Dius tamowaidi.

²² Yau Tetiyasi, Paulo yona leta ta taukulina, na Guiyau hesanaena yogu lautoki ya hetamaliyawa kalimiuwai.

²³⁻²⁴ Gaiyasi hinage yona lautoki ye hetamaliyawa. Iya meta yau yo ekalesiya bodana maudoina magai ta unai ye kitahetetegai.

Elastasi, iya magai lakilakina ta yodi moni taukitahetetedi, yo kada kaha Kwatasi yodi lautoki se hetamalidiwa hinage.**

Yaubada hedebasaeina

²⁵ Yaubada ta hedebasaei! Iya gonowana ye hebayaogomiu yogu wasa namwanamwana unai, iya ede Yesu Keliso wasana ya wasaduwaiyei ta. Huya bagubagunana unai na ye laoma meta Yaubada wasa ta ye tolewadam. ²⁶ Na Yaubada miyamiyahaina ne ye hedede yo peloweta se kulinonohaiyako bena teina huya ta unai ye masalaha tanoubu tamowaidiyao maudoidi udiyedi. Yona nuwatu ede taba maudoidi ne iya se sunumaei yo se kawakabiyei. ²⁷ Yaubada ye bom mo ye sibasiba, na Yesu Keliso debanaena ede yoda hedebasae ye sae iya unai nige kana siga. Mamohoi!

** **16:23-24:** Kulikuli beyabeyadi hekadi lausoisoi ta se kulitubei ede, Taba yoda Guiyau Yesu Keliso yona kabinamwa ye miya maudoimiu kalimiuyena. Mamohoi!

1 Kolinito

Paulo yona leta bagubagunana ye lau ekalesiya Kolinito unai taumiya udiyedi

Buka ta hededehemasalahana

Teina ta Paulo yona leta ye kuli ekalesiya magai lakilakina Kolinito unai taumiya udiyedi, na yona huyakulina meta bolimaina 54 o 55 AD.

Paulo yona kadau helabuina unai ye lau ee Kolinito unai, iya ede teha Akaiya unai. (Akaiya meta yoda huya unai iya Giliki basileiyana tupwana.) Kolinito unai Paulo ye miya bolimai kesega yo tupwana, Eipulu 50 AD unai ye lau ee Sepetemba 51 AD. Yona paisowa Kolinito unai wasana ta hasili Apostolo yodi paisowa bukana unai (Apostolo 18:1-16).

Paulo yona huyaena Kolinito meta magai lakilakina. Tamowai se bado yodi kaba-paisowa numadi, doha taukune, taupusapusa, taukabinuma, pawati hesana kopa unai sosipen yo ketele tauginaulidi, yo paisowa hekadi kadi kao udoi'udo'i tauginaulidi hinage. Kolinito unai hinage koitau udoi'udo'i yodi kabataba'ohuidi numadi, yo hinage unai ganawali ye lakikalili.

Paulo yona kadau hehaiyonana (3) unai ye lau magai lakilakina Epeso unai ye miya na bolimai haiyona (3) unai ye paisowa (Apostolo 19:1-40). Epeso unai Paulo yona leta bagubagunana ye kulilae Kolinito udiyedi, na leta wa nige kalidaena (1 Kolinito 5:9 wasana ku hasili). Na teina leta ta 1 Kolinito meta Paulo yona leta helabuina kalidiyena.

Tenem huyana ne unai ekalesiya Kolinito unai meta sola nige se bayao yodi sunuma miyamiyana unai, kaniyona ede luwadiyena se bado siya lahinaidi se nuwabui. Yodi mauli beyabeyadi laulaudi hekadi sola se ginaginaulidi, se haihaikawayagala yo se hinehneli yo sunuma nuwanuwatuna hekadiyo udiyedi nige se nuwamasalahakalili.

Paulo yona huyamiya Epeso unai, Kolinito unai dubu tamowaidi hekadiyo se laoma na Paulo se hekata meta pilipili sahasahadi se tubu ekalesiya bodana Kolinito unai taumiya luwadiyena (1 Kolinito 1:11, 5:1). Na Paulo yona hedede bui ta lobai 1 Kolinito unai. Pilipilidiyao ede teina:

(1) Dubu se hinehneli (1 Kolinito 1:10—4:21).

(2) Ganawali laulaudi se tubu dubu tamowaidiyao luwadiyena (1 Kolinito 5:1-13).

(3) Yodi helauhetala se ginaulidi nige Guiyau taukawamamohoidi yodi kabahe-lauhetala udiyedi (1 Kolinito 6:1-11).

(4) Tatao hekadiyo se laulau sinesineo taudiyao se lokuneidi moni hesabana udiyedi (1 Kolinito 6:12-20).

(5) Tapwalolo unai sinesineo hekadiyo yodi kulusuma kalekona se haigabaeidi (1 Kolinito 11:2-16).

(6) Guiyau yona kaikaigogoi gehegehena henuwaisinina se heyababa (11:17-34).

(7) Tamowai hekadiyo se hedede bena tauboiboita taba nige se tolo'uyo (1 Kolinito 15:1-58).

Hinage ekalesiya hekadi Kolinito unai leta se hetamali ye lau Paulo unai na yodi henamai hekadi se henamailau Paulo unai (1 Kolinito 7:1), siya ede,

(8) Idohagi bena tawasola kabikabina (1 Kolinito 7:1-40).

(9) Nige taukawamamohoi tamowaidiyao kai se kaitalasameyi yodi koitau udiyedi meta ekalesiya gonowana se kaidi (1 Kolinito 8:1—11:1).

(10) Kainauya Yaluwa Tabuna ye leyama ne, idohagi bena yodi kabikabidi (1 Kolinito 12:1—14:40).

(11) Idohagi bena monitole se ginauli (1 Kolinito 16:1).

Unai ede Paulo yodi leta ta ye kuli.

Buka ta hedehedena lakilakidi

- Paulo yona lautoki yo tapwalolo 1:1-9
- Tabu se hinehineli na bena se miyagogoi 1:10–4:21
- Laulaubiki yo lauhetala yo tawasola hedehedededi 5:1–7:40
- Yaubada bena se hekasisiyei yo se hedebasaei na tabu se taba'ohu koitau udiyedi 8:1–11:1
- Tapwalolo kabikabidi 11:2–14:40
- Tauboiboita yodi tolo'uyo lauhekata 15:1-58
- Monitole taudehadeha hesabadi 16:1-4
- Paulo yona kadau koitalaliudi 16:5-12
- Hededehebasiba saesaedi yo lautoki 16:13-24

Lautoki

¹ Yau Paulo, Yaubada yona nuwatuyena ye yoganeigau ya hemala Yesu Keliso yona apostolo, yo hinage kada kaha Sositenisi, iya ye saguigau na leta ta ka kuli.

² Leta ta ye laowa Yaubada tausunumaena bodana Kolinito unai taumiya kalimiyuena. Yesu Keliso unai kwa sunuma ede Yaubada ye tolehesuwalagomiu na ye yoganeigomiu kwa hemala yona tamowai, maidamiyao tausunuma maudoidi teha maudoina udiyedi. Se tapwalolo yoda Guiyau Yesu Keliso hesanaena, iya ede siya yo kita maudoida yoda Guiyau.

³ Tamada Yaubada yo yoda Guiyau Yesu Keliso taba yodi kabinamwa yo yodi nuwadaumwali se toledi kalimiuyena.

Paulo yona lautoki

⁴ Huya maudoina komiu debamiuyena Yaubada ya laulautokiyei matawuwuna yona kabinamwa ye leyawa kalimiuyena wa Keliso Yesu unai. ⁵ Iya unai ede Yaubada ye kainauyakaliliyeigomiu na kwa hedehededenamwanamwa yo ginauli maudoidi kwa nuwatulobainamwanamwaeidi. ⁶ Yaubada yona kainauya ta udiyedi Keliso wasana ya hededehemasalaha kalimiuyena wa ye hemamohoiyei. ⁷ Unai Yaluwa Tabuna yona kainauya udiyedi nige kwa deha, na ma nuwabayaomiu kwa nayanaya yoda Guiyau Yesu Keliso yona uyoma hesabana. ⁸ Iya kabo ye hebayaogomiu na kwa tolotahitahi ye lau ee huyagehena unai, na yoda Guiyau Yesu Keliso yona uyoma mayadaina ne unai meta nige kami giluhesau. ⁹ Yaubada saha ye hedede wa meta kabo ye hemamohoiyei. Iya ye yoganeigomiu kwa laoma iya natuna Yesu Keliso yoda Guiyau maiyamiu kwa hebodakesega.

Tabu hinehineli dubu luwanaena

¹⁰ Teina unai ya hededebayaolaowa, kagu kahao, taba yoda Guiyau Yesu Keliso hesanaena bena hedehedede maudoidi udiyedi kwa talamgogoi na tabu kwa hinehineli'uyoigomiu, na bena kwa hebodakesega yo nuwamiu kwa tolekesegaidi nuwanuwatu kesega unai. ¹¹ Kaniyona ede sinebada Kilo yona numa kalona tamowaidiyao hekadi yogu se hedehedede meta luwamiu ne unai kwa bom kwa haihaikawayagala'uyoigomiu. ¹² Yogu hedehedede ta kaniyona ede doha teina: Hesau ye wane, “Yau Paulo ya hemuliwatani,” na hesau ye wane, “Yau Apolosa** ya hemuliwatani,” na hesau ye wane, “Yau Kipasi** ya hemuliwatani,” na hinage hesau ye wane, “Yau Keliso ya hemuliwatani.”

¹³ Idohagi, Keliso bena kwa hekasahegagagili? Nuwana yau Paulo se hesataulogau komiu hesabamiu? O yau hesaguyena komiu se hebabatisoigomiu? Nige! ¹⁴ Yaubada ya lautokiyei meta nige hesau ya hebabatiso, na Kilipasi yo Gaiyasi se bom mo ya hebabatiso. ¹⁵ Unai nige gonowana hesau ye hedede meta yau hesaguyena ya hebabatiso.

** **1:12:** Apolosa wasana ede Apostolo 18:24-25 unai. ** **1:12:** Kipasi meta Petelo hesana kalina Alamaiki unai na kaniyona ede weku, gonogonowana doha kalina Giliki unai petros, kalinadaena ede Petelo.

¹⁶ Oo mamohoi, Setepanasi yona numa tamowaidiyao hinage yau ya hebabatisoidi. Tenem siya ede, na nige gonowana hesau'uyo ya nuwatu. ¹⁷ Matawuwuna Keliso ye hetamaligau ya laoma ta nige bena ya hebahebabatiso, na yogu laoma ta kaniyona ede wasa namwanamwana bena ya lauguguyaei. Nige bena hedehedede sonosonogadi udiyedi, matawuwuna ena sonoga unai ya lauguguya tamowai udiyedi meta Keliso yona boita sataulo ne unai kabo nige kaniyona hesau.

Yaubada yona sonoga ede Sataulo unai

¹⁸ Tamowai se laulau boita nige kana siga hesabana, kalidiyena meta Yesu yona boita sataulo ne unai wasana ne ye hemala hedehedede gaibu. Na kita Keliso ye gilihaida, wasa ta kalidawai ye masalaha ede Yaubada yona gigibwali. ¹⁹ Doha kulikuli tabuna unai ta hasili ye wane,

“Tausibasiba yodi nuwanuwatu kabo ya hetatagwaligwalidi,
tausonoga yodi sonoga ne kabo ya hekaiyawasidi.”

(Aisaiya 29:14)

²⁰ Na tausibasiba meta siya ede haedi? Yo buka taukitahekanamwanamwaena wa ede haedi? Yo hinage teina isi ta yodi tauhededesonoga wa ede haedi? Tanoubu ta tamowaidiyao yodi sibasiba meta Yaubada ye hemasalahadi ede siya yauyaule.

²¹ Na yona sibasibaena ye hineli meta tanoubu ta tamowaidiyao nige gonowana yodi sonogaena iya se wasenei na se nuwatulobai. Sataulo wasana ka lauguguyaei wa, tamowai hekadi se kawalupolupoei. Na iyamo Yaubada yona hineli ye ginauli meta kaiteyadi se kawamamohoiyei kabo ye gilihaidi. ²² Dius tamowaidiyao se henuwa bena laulau gigigigibwalidiyao se kitadi, na siya Giliki se henuwa ede bena hedehedede sonosonogadi se lapuidi. ²³ Na iyamo kai meta Keliso se hesataulo wa wasana ka wasaduwaiyei. Teina wasa ta meta Dius tamowaidiyao yodi kabakouyalayala, na dagela tamowaidiyao wa** udiyedi meta ye hemala hedehedede yauyaule. ²⁴ Iyamo Dius tamowaidiyao yo Giliki tamowaidiyao siya kaiteyadi Yaubada ye yoganeidi, kalidiyena Keliso meta Yaubada yona gigibwali yo yona sibasiba tauhemasalahadi. ²⁵ Matawuwuna ede Yaubada yona nuwatu tamowai se kawayauyaulei ne, iya ye saekalili na kabo tamowai yodi sibasiba, na se hedede bena Yaubada ye basabasa, iyamo ye bayaokalili na kabo tamowai yodi bayao.

²⁶ Kagu kahao, huyana Yaubada ye yoganeigomiu ne sola kwa nuwatu. Tamowai yodi nuwanuwatuyena meta tausibasiba nige kwa bado, yo tauwoyawoya meta nige kwa bado, yo hinage tamowai saesaedi meta nige kwa bado. ²⁷ Na Yaubada tanoubu ta unai tausupusupu tamowaidi ye kaisunuwaidi, na udiyedi bena kabo tausibasiba ye hemwadinedi, yo hinage tamowai nige yodi gigibwali Yaubada ye kaisunuwaidi, bena tamowai gigigigibwalidi ye hemwadinedi. ²⁸ Yo hinage tanoubu ta unai tamowai se kitakitadobidobiyei yo nige se henuwa na se hedede nige yona namwanamwa hesau, Yaubada ye kaisunuwai na unai tanoubu ta saha se kitahesae'usei wa ye hetatagwaligwali. ²⁹ Unai nige gonowana tamowai hesau Yaubada matanaena ye bom ye hededetausaei'uyoi. ³⁰ Yaubada debanaena kwa laoma Yesu Keliso unai, na Keliso ye hemala yoda sibasiba yona kabalaoma. Iya ye tolehedudulaida iya matanaena, ye hebayaoda na yoda laulau se dudulai, yo hinage yababa unai ye gilihaida. ³¹ Unai kulikuli tabuna unai ye wane,

“Kaiteya ye henuwa bena ye hededesaesae, ye namwa mo taba Guiyau debanaena ye hededesaesae.”

(Yelemaiya 9:24)

2

¹ Kagu kahao, huyana yau ya laowa kalimiuyena meta nige hedehedede lakilakidi yo tausibasiba yodi hedehedede ya hepaisowadi, na hedehedede masamalahadi udiyedi

** **1:23:** Dagela tamowaidiyao ta, siya ede Giliki tamowaidi lausoiso 22 unai Paulo ye hedehededeidi wa.

Yaubada yona nuwatu saesaedi ya lauguguyaeidi kalimiuyena. ² Unai huyana yau maiyamiu meta yogu hineli ya ginauli bena nuwatu maudoidi ya tolegabaedi na Yesu Keliso wasana yo yona boita sataulo ne unai wa wasana ya lauguguyaei.

³ Yo ya laowa kalimiuyena ne meta ma taubasabasagu, yo ma matausigu, yo hinage ma tabutabubugu. ⁴ Yogu wasaduwai yo lauguguya meta nige hedehedede sonosonogadi yo bayabayaodi ya hepaisowadi, na Yaluwa Tabuna iya yona gigibwali ye hemasalaha kalimiuyena. ⁵ Yogu nuwanuwatu ede tabu yomi sunuma kwa toletole tamowai yodi sibasiba unai, na yomi sunuma taba kwa tole Yaubada yona gigibwali unai.

⁶ Iyamo tamowai yodi sunuma se matuwako ne udiyedi sibasiba hedehedede udiyedi ya hedehedede. Na teina sibasiba ta meta nige teina huya ta tamowaidiyao yo tauwoyaidi yodi sibasiba, siya kabo se gehe. ⁷ Teina saha ta hedehededei ta meta Yaubada yona sibasiba. Yona nuwanuwatu saesaena ta beyabeyana ye tolewadam na ye hinelinonohaiyako yoda didiga hesabana. Na teina ta meta huyana tanoubu ta sola nige ye tubu na ye ginaulinonohaiyako. ⁸ Na Dius yodi tauwoyawoya nige se nuwatulobai. Taba ena se nuwatulobai kabo Guiyau saesaena taba nige se hesataulo.

⁹ Doha kulikuli tabuna unai ye kuli ye wane,

“Saha Yaubada ye kabinonohai taugadosisiyeina hesabadi
meta tamowai matadiyena nige se kita,
beyadiyena nige se lapui,
yo nige se nuwatulobai.”

(Aisaiya 64:4)

¹⁰ Na kalidawai Yaubada yona nuwatu wadawadamdi maudoidi Yaluwana Tabuna unai ye hemasalahaadima. Matawuwuna Yaluwa ginauli maudoidi ye kitasipwaidi, yo hinage Yaubada yona nuwanuwatu gabwagabwatumdi kabidi ye kata. ¹¹ Nige gonowana tamowai hesau yona nuwanuwatu kabina ta kata, na tenem tamowai ne yaluwana unai ye bom mo kabina ye kata'uyo. Gonogonowana doha, Yaubada yona nuwanuwatu meta nige gonowana tamowai hesau kabina ye kata, na Yaubada Yaluwana ye bom kabina ye kata'uyo. ¹² Na kita meta nige tanoubu ta yaluwana ta hai, na Yaubada iya Yaluwana ye haiyamako kalidawai. Unai gonowana Yaubada ginauli maudoidi ye haigaibuidima wa kabidi ta kata. ¹³ Hedehedede maudoidi ta meta nige tamowai yodi sibasibaena ta hedededi, na Yaubada Yaluwana ye hekatada na udiyedi ta hedehedede na Yaluwa nuwanuwatudi ta hededehemasalahaadi Yaluwa tauhaina tamowaidiyao udiyedi. ¹⁴ Yaluwa nige tauhaina nige gonowana Yaubada Yaluwana yona nuwanuwatu ye haidi, matawuwuna ede ye kawayauyauleidi. Yo nige gonowana ye nuwatulobaidi, kaniyona ede teina ta meta Yaluwa Tabuna yona hemasalaha nuwanuwatudi. ¹⁵ Kita Yaubada Yaluwana tauhaina meta ginauli maudoidi ta nuwatulobaidi, na tamowai hekadi nige gonowana se kitalobaida yo se nuwatulobainamwanamwaeida. ¹⁶ Doha kulikuli tabuna unai se wane,

“Kaiteya gonowana Guiyau yona nuwanuwatu kabidi ye kata
yo kaiteya gonowana kabo Guiyau ye hededehasahasai?”

(Aisaiya 40:13)

Na ginauli maudoidi ta gonowana ta nuwatulobaidi matawuwuna Keliso nuwana, iya ede kalidawai.

3

Hinehineli dubu luwanaena

¹ Kagu kahao, huyana yau maidamiu ta miyamiya wa nige gonowana ya hedehedede-laowa kalimiuyena doha Yaubada yaluwana tauhaidi udiyedi, na ya hedehedede-laowa doha tanoubu ta tamowaidiyao o doha wawayao labahauhaudi Keliso sunumana unai. ² Susu mo ya haiyawa kwa numa, na nige kai kwaikwailolona ya haiyawa, matawuwuna ede kai kwaikwailolona nige gonowamiu. Na teina huya ta ya kitagomiu meta hinage sola nige gonowana kai kwaikwailolona kwa kai, ³ matawuwuna ede

komiu sola tanoubu ta miyamiyadi udiyedi kwa miyamiya. Kwa kaikaikalomagigili yo kwa haihaikawayagala'uyoigomiu. Teina ta se hemasalahagomiu meta tanoubu ta nuwatudi sola kwa miyamiyawatanidi. Yomi laulau ta doha siya nige tausunuma yodi laulau. ⁴ Unai, ena hesau ye wane, “Yau Paulo ya hemuliwatani,” na hesau ye wane, “Yau Apolosa ya hemuliwatani,” teina yomi laulau ta ye hemasalahagomiu meta komiu doha tamowaigaibu.

⁵ Na Apolosa meta kaiteya, yo Paulo meta kaiteya. Kai meta heyayai mo tauhaina, na yoma paisowa debanaena ede kwa nuwabui. Na kai kesega kesega kama paisowa Yaubada ye haidima wa ka ginaulidi. ⁶ Yau like ya kumai na Apolosa iya tauhewahewailadi, na tauhekinidi ede Yaubada. ⁷ Unai like taukumaina yo like ne tauhewailana meta nige se sae, na Yaubada iya like tauhekinidi meta ye saekalili. ⁸ Na like ne taukumaina yo tauhewailana yodi paisowa nuwanuwatudi meta kesega, yo kesega kesega yona paisowa kana kao unai kabo maisana ye hai. ⁹ Matawuwuna yoma labui ta meta kai Yaubada yona taupaisowa, na komiu meta Yaubada yona koya.

Komiu hinage Yaubada yona numa. ¹⁰ Yaubada yona kainauya** unai ede ya hemala taukabinuma sonosonogakalilina na numa kabakabina bayabayaona ya ginauli, na tamowai hekadi ede unai se kabikabinuma. Na taukabinuma kesega kesega ne bena yona kabinuma ne ye kitanamwanamwaei. ¹¹ Matawuwuna nige gonowana tamowai hesau kabakabinuma udoi ye hetubu. Kabakabinuma wa meta ya henonohaiyako, iya ede Yesu Keliso. ¹² Taba ena taukabinuma hesau kabakabinuma ta unai numa ye kabi na yona wawali meta gole, siluba, weku maisalakilakidi, kaiwa o lei o didiyali ye hepaisowadi, ¹³ meta yona paisowa ne kabo ye masalaha, matawuwuna Yaubada yona lauhetala mayadaina ne unai kabo ye tolehemasalaha na kaiwa kalakalasina unai kabo ye lautonogi. Na kaiwa ne kabo tamowai kesega kesega yona paisowa kaniyona mamohoina ye hemasalaha. ¹⁴ Ena numa ye kabi wa nige ye kalasi na sola ye totolo meta kabo yona kainauya ye hai. ¹⁵ Na ena yona numa ne kaiwa kalakalasina unai ye kalasi meta yona paisowa kaniyona maudoina kabo se taukwadalele. Na iya kabo ye maumauli, doha tamowai hesau kaiwa kalapulupululuna ye wasabugabaei.

¹⁶ Taba kwa nuwatulobai meta komiu Yaubada yona Numa Tabuna na Yaubada Yaluwana ye miya kalimiuyena. ¹⁷ Ena tamowai hesau Yaubada yona Numa Tabuna ye heyababa, kabo Yaubada tamowai ne ye heyababa. Matawuwuna Yaubada yona Numa Tabuna ne ye a'a,** na komiu yona Numa Tabuna ede.

¹⁸ Unai tabu kwa bom kwa lupu'uyoigomiu! Ena tamowai hesau yona nuwanuwatu bena iya tanoubu ta sibasibana unai ye sibasibakalili, ye namwa mo taba tanoubu ta sibasibana ne ye tolehesuwala na tamowai iya se kawayauyaulei. Teina unai kabo ye hemala tausibasiba mamohoina. ¹⁹ Matawuwuna tanoubu ta sibasibana meta ye hemala nuwanuwatu yauyaulei Yaubada matanaena, doha kulikuli tabuna unai ye wane,

“Tamowai sibasibadi yodi kailupolupo udiyedi Yaubada gonowana kabo ye tolehemasalahadi.”

(Yobi 5:13)

²⁰ Yo hinage ye wane,

“Guiyau tamowai sibasibadiyao yodi nuwanuwatu kabidi ye kata meta siya nige kaniyodi.”

(Same 94:11)

²¹ Unai tabu tamowai debadiyena kwa nuwasaesae. Ginauli maudoina meta komiu hesabamiu: ²² Yau Paulo, yo Apolosa, yo Kipasi, yo ginauli maudoidi tanoubu ta unai Yaubada ye toledi ta meta kabasaguigomiu. Kwa maumauli o kabo kwa boita, teina mayadai ta udiyedi saha se tubutubu ta yo mayadai sola kabo se laoma udiyedi se tubu

** 3:10: Yaubada yona kainauya, iya ede Yaubada Yaluwana Paulo ye hesibasiba yona paisowa hesabana.

** 3:17: Ye a'a meta Dimdimyena se kuli, holy. Tabu hededehemasalahana ku hasili.

– maudoidi meta komiu hesabamiu. ²³ Na komiu meta Keliso yona tamowai, na Keliso iya Yaubada yona.

4

Tamowai yodi paisowa tabu kwa hekasagaibuidi

¹ Unai bena kwa kitagai meta kai Keliso yona heyayai tauhaina yo Yaubada yona nuwanuwatu saesaedi taukitahetetedi. ² Ena paisowa se mosei tamowai hesau unai meta kabo se henuwa bena yona paisowa ne ye ginaulinamwanamwaeidi. ³ Na yau nige ya modekalili ena komiu o tautolehedudulai tamowaidi hekadi yogu paisowa ta yona namwa yo yona yababa kwa kitasipwai, hinage yau nige ya bom ya kitasipwai'uyoigau. ⁴ Yogu paisowa ta unai ya nuwatui meta nige yababa hesau ya ginauli, na nige gonowana ya hedede ede bena ya dudulai. Na taukitasipwaigau yo tautolehedudulaigau ede Guiyau. ⁵ Unai tabu tamowai hesau yona paisowa kwa kawanamwanamwaeigaibui, matawuwuna Yaubada yona helauhetala mayadaina sola nige ye lage, na bena kwa nayanaya kana siga Guiyau ye uyoma. Na iya ginauli wadawadamdi teha masimasigilidi udiyedi kabo ye hemasalahadi yo hinage tamowai yodi nuwanuwatu wadawadamdi ye tolehemasalahadi. Na tenem mayadaina ne unai tausunuma kesega kesega yona paisowa debanaena kabo Yaubada unai kawanamwanamwa se hai.

⁶ Kagu kahao, yogu hedehedede maudoidi wa udiyedi Apolosa yo yau ka hemala yomi kabakita na bena kalimaiyena hedehedede ta kaniyona kabina kwa kata, doha se wane, “Saha se kuliyo wa** meta tabu kwa saesaedikwai.” Unai nige gonowana tamowai hesau debanaena na kwa hededsaesae, na hesau kwa hedededobidobiyei. ⁷ Na saha debanaena ku hedede bena kowa ku namwakalili na kabo tamowai hesau? Yom namwanamwa maudoina ne Yaubada ye leyawa. Na ena Yaubada ye leyawa, idohagi to ku hededetausae'uyoigo bena ku bom yom bayaoyena namwanamwa ne ku lobai?

Taba ta matuwa sunuma unai

⁸ Idohagi, yomi nuwanuwatu ede ginauli maudoidi kwa haidiko, yo kwa gogoko, yo kwa hemalawasawasako, na kai meta nigele? Yogu henuwa ede taba kwa hemalawasawasa, matawuwuna kai kabo maidamiu ta hemalawasawasagogo. ⁹ Na ya nuwatui kai apostolo meta Yaubada ye tolehemulitamolosiyeigai. Kama kao ede doha tamowai iyala unai se haidi se laeidi bena kabo boda matadiyena se unuhemwaloidi. Ka hemala kabatalatalawasi anelu yo tanoubu ta tamowaidiyao maudoidi kalidiyena. ¹⁰ Keliso debanaena kai kama kao doha yauyaule, na komiu yomi nuwatu bena Keliso debanaena kwa sibasibakalili. Kai ka basabasa, na komiu bena kwa bayaokalili. Komiu bena se hekasisiyeigomiu, na kai meta se kitadobidobiyeigai. ¹¹ Huya bagubagunana unai na ye laoma teina mayadai ta meta ka kaihasali yo ka gadomagu, kama kaleko se taputapulisi, se bibihemwahemwaloigai yo hinage nige yoma kabamiya mamohoina hesau. ¹² Hinage nimamaiyedi ka paisowabayao na udiyedi kai yo gogo ka lobaidi yoma miyamiya wa hesabadi. Ena se hededeheyababagai meta ka hededehenamwadi. Ena se hekamkamnagai meta ka nuwadobidobi. ¹³ Ena se hedededobidobiyeigai meta ka hededenamwanamwalau kalidiyena. Ye laoma ee teina mayadai ta unai meta kama kao ede doha tanoubu ta mosomona.

¹⁴ Ya kulikulilaowa kalimiuwai ta meta nige bena ya hemwadinegomiu. Na komiu natuguwao ya gadosisikaliliyeigomiu, unai bena ya hededehebasibanonohaigomiu. ¹⁵ Keliso wasana ta unai tauhekatagomiu nuwana se badokalikalili, na iyamo tamamiu

** **4:6:** Saha se kuliyo wa: Hedehedede ta nige ye masalahakalili. Tausonoga hekadi se wane kaniyona ede kulikuli tabudi, o, Yaubada yona laugagayo, na hekadiyo se wane bena Paulo yona kulikuli wa.

ne hisahisadi mo.** Na huyana Yesu Keliso wasana namwanamwana ya lauguguyaei kalimiuyena wa, unai yau ya hemala tamamiu. ¹⁶ Unai ya kaibwadaigomiu taba saha ya miyamiyaidi ta bena kwa miyawatanidi.

¹⁷ Yomi miyamiya debadiyena ede Timoti ya hetamaliyawa kalimiuwai. Iya meta Guiyau debanaena ye hemala yau natugu na ya gadosisikaliliyei, na yona laulau se namwakalili. Yesu Keliso yogu hemuliwatanina miyamiyadi maudoidi udiyedi kabo ye henuhenuwaisinigomiu. Siya ede saha ya lauhekataedi yogu kabalau maudoina yo dubu maudoidi udiyedi wa.

¹⁸ Hekamiyao kwa nuwasaesaekalili, kana kao doha taba nige ya uyowa kalimiuyena ne. ¹⁹ Na nige bayaona kabo ya laowa kalimiuwai, ena taba Guiyau ye yali. Kabo tauhededesaesae ta ya waseneidi, nige yodi hedehedede ta se bom mo, na gigibwali saha kalidiyena ne hinage. ²⁰ Matawuwuna Yaubada yona basileiya meta nige hedehedede mo, na Yaubada yona gigibwaliyena ye miyamiya. ²¹ Saha kwa henuwa'usei ede, kaipidipidili ya bahei na ya laowa kalimiuwai? O ya laowa ma gadosisigu yo ma nuwatalugu?

5

Laulaubikibiki ekalesiya luwadiyena

¹ Wasamiu ya lapui meta luwamiuyena tamowai hekadi ganawali miyamiyana se miyamiyaei. Tamowai hesau meta tamana mwanena maidana se keno. Saha se ginauli ta meta ye yababakalili na dagela tamowaidiyao hinage laulau ta se subu. ² Na komiu meta kwa nuwasaesae na nige kwa nuwayababa yo kwa mwadine, na laulau ta tauginaulina tamowaina ne nige kami boda ne unai kwa tolehesuwala.

³ Bulumaena yau nige maidamiu, na yaluwaena yau maidamiu, unai laulau ta tamowaina meta kana lina ya ginauliyako. ⁴ Huyana kwa laomagogoi yoda Guiyau Yesu hesanaena yo yau ede yaluwaena maidamiu na Guiyau Yesu yona gigibwali ede kalimiuyena, ⁵ meta tamowai ta kwa moselaei Satani unai, bena tauna ne ye hekamkamna na unai taba yona laulau yabayababadi wa ye hekaiyawasidi na Guiyau yona tolehedudulai mayadaina ne unai yaluwana taba ye hemaui.

⁶ Yomi hedehededesaesae ta nige ye namwa. Kabina kwa katakalili meta yisti gagilina gonowana pwalawa maudoina ye hesese. ⁷ Yisti beyabeyana ne kwa haigabaei to kabo kwa hemala pwalawa hauhauna nige yistina. Teina ta kami kao mamohoina ede! Bena yisti beyabeyana ta haigabaei matawuwuna ede Keliso yoda Taukiuli mamoaena meta se kaitalasyeyiyako. ⁸ Unai Taukiuli Henuwaisinina kaikaigogona ta unai tabu yisti beyabeyana pwalawana ta kai, iya ede laulau yabayababadi udoi'udoidi, na bena pwalawa hauhauna nige yistina ta kai, iya ede miyamiya dudulaidi yo hedehedede mamohoidi.

⁹ Yogu leta bagubagunana ya kuliyawa wa meta ya hedede bena tamowai yodi laulau bikibikidi tabu maidamiyao kwa miyamiyakesega. ¹⁰ Nige ya kuli bena dagela tamowaidiyao kwa subudi, siya laulau bikibikidi tauginaginalidi, se mahimahihi yo se kaikailupolupo yo hinage se tabataba'ohu koitau udiyedi. Ena kwa henuwa bena tamowai ne kwa kaihaleidi, meta ye namwa mo taba tanoubu ta kwa laugabaei. ¹¹ Na yogu kulikuli wa kaniyona ede teina: Ena tamowai hesau ye hedede bena iya kami kaha, na iyamo miyamiya bikibikidi ye miyamiyaeidi, ye mahimahihi, koitau ye tabataba'ohuidi, tamowai ye hedehededeheyaheyababadi, ye numanumayauyaule, o ye kaikailupolupo, teina tamowai ta meta tabu maidamiu kwa hebohebodakesega,

** **4:15:** Tauhekatagomiu se badokalikalili, na tamamiu ne hisahisadi mo: Paulo yodi tauwoyawoya ye hetaladi, meta se bado siya tauhekatadi, kaniyona ede se nuwasaesae na siya bena tamowai lakilakidiyao. Na hisahisadi mo kadi kao doha tama, siya ma nuwadobidobidi yo ma gadogadosisidi se saguidi.

yo tabu kwa kaikaigogoi.** 12 Matawuwuna kita nige kada paisowa bena dagela tamowaidiyao ta kitahekasadi yo ta hinelidi. Unai komiu yomi polohe ede taba dubu tamowaidi kwa kitahekasadi. 13 Dagela tamowaidiyao meta Yaubada kabo ye hinelidi. Doha kulikuli tabuna unai ye hedede ye wane,

“Ena luwamiuyena tamowai hesau yona miyamiya se yababa meta bena kwa tolehe-suwala.”
 (Dutelonomi 17:7)**

6

Lauhetala ekalesiya luwadiyena

1 Ena tamowai hesau luwamiuyena ma kana kaha se haikawayagala, idohagi to ye laei nige taukawamamohoi udiyedi bena se kitahekasadi yo yona se hneli, na nige ye leyama Yaubada yona tamowai udiyedi na yona se hneli. 2 Idohagi, nige kabina kwa kata meta Yaubada yona tamowai kabo tanoubu ta tamowaidiyao se kitahekasadi yo se hnelidi? Na ye saha to nige gonowana pilipili gagilidi ta kwa nuwatuhekasadi yo kwa hnelidi? 3 Nige kabina kwa kata meta kita kabo anelu ta kitahinelidi? Ye namwa mo taba kaiyaulina ta pilipilidiyao ta tolehedudulaidi. 4 Unai, ena pilipili doha tenem kwa lobaidi, idohagi to dagela unai tamowai kwa haidi bena se tolehedudulaigomiu? Na siya meta dubu unai nige yodi kabatolo hesau yo nige hekasisidi hesau. 5 Taba kwa mwadine! Nuwana kami boda ne unai nige tamowai hesau sibasibana iya gonowana kabo yomi haikawayagala ne ye tolehedudulaidi? 6 Na luwamiuyena tausunuma tamowaina hesau kana kaha ye hai na ye laei tautolehedudulai udiyedi na ye lauhetala. Na laulau ta meta nige taukawamamohoi matadiyena kwa ginauli.

7 Ena kwa helahelauhetala'uyoigomiu meta ye hemasalahagomiu ede yomi ekalesiya unai Satani ye saedikwaigomiuko. Ye namwa mo taba tamowai hesau ye toledobidobiyeigomiu yo ye lupohaigomiu na yomi namwanamwa ye kaiwahali. 8 Na iyamo komiu meta kwa laulaulupolupo yo laulau yababadi kwa ginaginaulidi, na hinage kwa ginaulidi kami kahao udiyedi. Saha kwa ginauli ta meta ye yababakalili. 9 Na kabina kwa katako meta laulau yabayababadi tamowaidiyao nige gonowana se lulau Yaubada yona basileiya unai. Tabu kwa lupu'uyoigomiu yababa ta udiyedi, siya ede laulau bikibikidi tauginaginaulidi, koitau udiyedi tautabataba'ohu, tauganganawali, tau yona hali tau maidana se keno yo sine hinage yona hali sine ye hai, 10 taukaikawaiwahali, taumahimahihi, taunumanumayauyaule, tamowai tauhedede-heyahayababadi, yo taukaikailupolupo. Laulau ta tauginaginaulidi maudoidi taba nige se lau Yaubada yona basileiya unai. 11 Lahinaidi hekamiyao meta teina miyamiya ta kwa miyamiyaidi. Iyamo Guiyau Yesu Keliso hesanaena yoda Yaubada Yaluwana ye deulihe'a'agomiu yo ye tolehesuwalagomiu yona tamowai yo ye kitahedudulaigomiu.

Tauda ta udiyedi bena Yaubada ta hedebasaei

12 Hekamiu kwa wane, “Miyamiya maudoidi kalimaiyena meta nige laugagayodi hesau.” Iyamo ya hededelaowa ede, ginauli maudoidi ta nige gonowana se saguida. Kwa wane, “Miyamiya maudoidi kalimaiyena meta nige laugagayodi hesau.” Iyamo ya wane, tabu se tanuwagaida. 13 Hinage kwa wane, “Kai ta kai meta iya bogada hesabana, yo bogada kana paisowa ede kai, na Yaubada kabo ye hetatagwaligwalidi na se gehe.”** Na ya wane, tauda ta kana meta nige laulau bikibikidiyao, na Guiyau tauda ta ye ginauli meta iya yona paisowa hesabadi, yo Guiyau, iya tauda ta tanuwagana ede.

** 5:11: Hebodakesega yo kaikaigogo meta tapwalolo hekoikesegana yo Guiyau yona kaikaigogo tabuna hedehedededi. ** 5:13: Hedehedede ta bukana hekadiyo meta Dutelonomi 19:19, 21:21, 22:21, 24, yo 24:7.

** 6:13: Kai ... yo bogada ... Yaubada kabo ye hetatagwaligwalidi: Kai unai se hedehedede, iyamo yodi nuwanuwatu meta laulau bikibikidi nige yodi yababa hesau, matawuwuna tauda kabo se gehe na galewa ne unai Yaubada kabo tauda hauhaudi ye haidima.

14 Na Yaubada yona gigibwaliyena boita unai Guiyau ye hetolo'uyoi, yo iya kabo hinage ye hetolo'uyoida.**

15 Idohagi, nuwamiu ne ye luluhi meta taumi ta, siya Keliso tauna? Hage, gonowana Keliso tauna ya hai na sine tauna ye lokulokunegabaei moni hesabana unai ya toleke-segai? Nige gonowana. 16 Idohagi, nige kabina kwa kata meta kaiteya ye patulau waihiu ye lokulokunegabae'uyoi moni hesabana ne unai, meta siya se hemala kesega?*

Matawuwuna ede kulikuli tabuna unai se wane,
 “Taudi labui kabo se laoma se hemala buluma kesega.” *(Genese 2:24)*

17 Na kaiteya iya ye patulau Guiyau unai meta iya maiyana siya yaluwa kesega.

18 Bena laulau bikibikidiyao kwa yabubugabaeidi! Yababa hekadi tamowai se ginaulidi meta nige taudi ta se hekalodi, na ena kaiteya laulau bikibikina ye ginauli meta tauna ta ye bom ye heyababa'uyoi. 19 Taba kwa nuwatulobai meta taumi ta iya Yaluwa tabuna yona Numa Tabuna, iya ede ye miyamiya kalimiuwai yo iya Yaubada unai kwa hai. Taumi ta meta nige kwa bom kwa tanuwagaidi. 20 Matawuwuna ede Yaubada meta maisa saesaena unai ye hemaisahaigomiuko. Debanaena taumi ta udiyedi Yaubada kwa hedebasaei.

7

Tawasola miyamiyadi hedehedededi

1 Yomi leta unai yogu kwa kulikuli kwa wane, “Ye namwa mo taba loheloheyao tabu waihiu gadosisina nuwadi ne unai.”** 2 Na yau ya hedede ede teina: Laulaubikibiki ye lakikalili, unai bena waihiu kesega kesega ye bom mwanena yo loheya kesega kesega ye bom mwanena. 3 Loheya bena tawasola unai mwanena waihiu tauna yona gadosisi ye ginauliwatanidi, yo hinage waihiu bena mwanena loheya tauna yona gadosisi ye ginauliwatanidi. 4 Maitawasola waihiu tauna ne meta nige ye bom ye tanuwagai na tauna ne meta tanuwagana ede mwanena, yo maitawasola loheya tauna ne meta nige ye bom ye tanuwagai, na tauna ne meta tanuwagana ede mwanena. 5 Waihiu, tabu taum ku nuwahi'uyoi, yo loheya, tabu taum ku nuwahi'uyoi. Na ena taba taumi labui kwa talam na bena yomi mahana kwa mosei tapwalolo unai, kabo gonowana kwa miyasuwala huyakubwakubwa. Mulina ne unai meta bena kwa laomakesega'uyo. Teina unai taumi ta yodi gadosisi udiyedi nige gonowana Satani ye nohoigomiu. 6 Miyasuwala huyakubwakubwa hedehededena ne meta unai talam ya haiyawa na tabu ye hemala yomi laugagayo. 7 Yogu henuwa ede taba tamowai maudoina se miyagologolowa doha yau. Iyamo tamowai kesega kesega meta ye bom yona kainauya Yaubada ye mosei. Hesau yona kainauya ye tawasola, hinage hesau yona kainauya ye miyagologolowa.

Sibasibauwa yo wabuwabu kadi hedehedede

8 Na teina meta sibasibauwa yo wabuwabu kadi hedehedede. Ye namwa mo taba se miyagologolowa doha yau. 9 Na ena nige gonowana taudi ne se nuwahi'uyoidi, ye namwa mo taba se tawasola, to unai kabo taba nige laulaubikibiki nuwadi ne ye laugilihaidi.

Inawase hedehededena

10 Teina ta hedehedede bayabayaona ya mosei maitawasola udiyedi, nige ya bom ya hedehedede, na Guiyau yona hedehedede, ye wane, waihiu tabu mwanena ye inawasei.

** 6:14: Ye hetolo'uyoida: Guiyau Yesu yona boita yo yona tolo'uyo unai ye hekitada meta tauda maudoina ye gilihai, nige yaluwa ye bom. ** 6:16: Se hemala kesega, iyamo nige se tawasola. ** 7:1: Tabu waihiu gadosisina nuwadi ne unai: Hedehedede ta tauhededena wa yodi nuwanuwatu meta tatao maudoidi, maitawasola o taumiagologolowa, taba tabu se kabilau waihiu unai. Teina unai se laupwano.

¹¹ Ena mwanena ye laugabaei meta bena ye miyagologolowa, o se tolehedudulaidi yo se lautoki na ye uyo mwanena unai. Na loheya hinage tabu mwanena ye inawasei.

Maitawasola taukawamamohoi yo nige taukawamamohoi

¹² Teina hedehedede ta hinage ya hedede kalimiuyena, nige Guiyau, na yau ya hedede ya wane, Ena taukawamamohoi loheya hesau mwanena meta iya nige taukawamamohoi, na waihiu ne ye henuwa bena maiyana se miyakesega, meta loheya ne tabu waihiu ne ye ina'inawasei. ¹³ Hinage ena taukawamamohoi waihiuna hesau mwanena meta iya nige taukawamamohoi, na loheya ye henuwa bena se miyakesega, meta waihiu ne tabu loheya ne ye ina'inawasei. ¹⁴ Matawuwuna loheya iya nige taukawamamohoi meta mwanena yona kawamamohoi ne debanaena Yaubada logulogunaena ye miya. Yo waihiu iya nige taukawamamohoi meta mwanena yona kawamamohoi ne debanaena Yaubada logulogunaena ye miya. Unai kabo Yaubada nige gonowana ye kitaheyababadi, na yona kitahenamwa ede natumiyao ne kalidiyena na Yaubada logulogunaena se miya.

¹⁵ Na ena loheya o waihiu iya nige taukawamamohoi ye hedede bena mwanena ye laugabaei, meta gonowana kwa talamyeyi na ye lau. Teina nuwanuwatu ta unai meta taukawamamohoi ne unai nige guduguduna hesau. Yaubada ye yoganeida bena nuwadaumwaliyena ta miya. ¹⁶ Na ena ku kabihekahini, kabo idohagi bena yom kata meta gonowana mwanem ne ku woyaiyama mauli ye hai na nuwadaumwali unai kwa miya?

Yoda mauli kana kao hekadi nige bena ta buigaibuidi

¹⁷ Na kesega kesega, kam kao sahasahana Guiyau ye leyawako wa na kabo Yaubada ye yoganeigo ne, bena unai ku miya. Teina ta meta yau yogu hedehedede dubu maudoidi udiyedi. ¹⁸ Ena loheya hesau se hepelitomeyako na kabo Yaubada ye yoganei, meta yona pelitome ne tabu ye uha'uhalaeyi. Yo kaiteya loheya sola nige ye pelitome na Yaubada ye yoganei, meta tabu se hepehepelitome. ¹⁹ Matawuwuna tamowai ye pelitome o nige ye pelitome meta nige kaniyona hesau. Na nuwanuwatu saesaekalilina ede Yaubada yona laugagayo miyawatanina.

²⁰ Tamowai kesega kesega miyamiya saha unai ku miya na kabo Yaubada ye yoganeigo ne meta bena unai ku miya. ²¹ Ena kowa heyayai tauhaina na kabo Yaubada ye yoganeigo meta tabu ku nuwapilipili. Na ena solasola hesau ye masalaha bena unai yom yailihai ku hai, bena ku hai. ²² Matawuwuna kaiteya tamowai iya heyayai tauhaina huyana Guiyau ye yoganei, meta iya yona yailihai tamowaina, yo hinage kaiteya tamowai iya yaiyailihaina na Guiyau ye yoganei meta iya Keliso yona heyayai tauhaina. ²³ Na komiu maisa lakilakina unai ye hemaisahaigomiuko, unai tabu kwa hemala tamowai yodi heyayai tauhaidi na se tanuwagaigomiu. ²⁴ Kagu kahao, kesega kesega beyabeyana kam kao sahasahana wa na Yaubada ye yoganeigo, bena unai ku miya Yaubada matanaena.

Hasala nuwanuwasupudiyao

²⁵ Hasahasalao meta nige kadi hedehedede hesau Yaubada ye leyama. Na yogu nuwanuwatu mo ya hededehemasalaha, matawuwuna Guiyau yona katekamkamna debanaena ede gonowana yau kwa sunumaegau. ²⁶ Teina mayadai ta meta hewahe-waiunu se masamasalaha, unai ya nuwatui ye namwa mo taba mauli miyamiyana saha unai kwa miya ne bena kwa miyamiyaei. ²⁷ Ena mwanem pagapaganina meta tabu ku ina'inawasei, na ena nige ku tawasola meta tabu tawasola nuwanuwatuna ku nuwanuwatui. ²⁸ Na ena ku tawasola meta nige yababana hesau, yo ena hasala nuwanuwasupuna ye tawasola meta hinage nige yababana hesau. Na ena kaiteyadi se tawasola, kabo yodi mauli ne unai pilipili se hekalodi. Unai ede teina ya hedehesahaigomiu ta, na tabu kwa lulau pilipili ne udiyedi.

²⁹ Kagu kahao, yogu hedehedede wa kaniyona ede teina: Huya ye kubwakaliliko. Unai, teina mayadai ta unai yo huya matada ne unai meta maitawasola tabu se kitakalili yodi tawasola miyana mo unai, ³⁰ yo kaiteya ye nuwadubu yona laulau bena doha nige ye nuwadubu, yo kaiteya ye gwauyala yona laulau bena doha nige ye gwauyala, yo kaiteya gogo hesau ye hemaisa yona laulau bena doha gogo ne nige ye kabihekahini. ³¹ Yo kaiteyadi tanoubu ta gogodiyao se hepahepaisowadi meta tabu udiyedi se modekalili. Matawuwuna tanoubu ta kabo ye tauwadam.

Tawasola yo Yaubada yona paisowa

³² Yomi mauli miyadi maudoidi udiyedi ya henuwa bena taba tabu kwa hepilipili'uyoigomiu. Kaiteya loheya nige ye tawasola meta gonowana yona mauli ye talamyeyi Yaubada yona paisowa ginaulina yo henuwanamwana unai. ³³ Na loheya maitawasola meta kabo ye mode tanoubu ginaulidi maudoidi udiyedi na ye kaipate bena mwanena nuwana ye henamwa. ³⁴ Unai ginauli labui kabo udiyedi ye nuwanuwatu: Mwanena henuwanamwana yo hinage Guiyau henuwanamwana. Na waihiu nige tawatawasolana yo sine nuwanuwatupuna sola nige ye tawasola meta tauna yo yaluwana ye mose'uyoi Yaubada unai na ye mode Yaubada yona paisowa ginaulina unai. Na waihiu maitawasola meta kabo ye mode tanoubu ta ginaulina maudoidi udiyedi yo kabo idohagi mwanena ye henuwanamwa. ³⁵ Yogu hedehedede ta udiyedi nige ya hekaiyawasigomiu na bena ya saguigomiu kabo laulaududulaiyena kwa miya yo Yaubada yona paisowa kwa ginauli ma nuwamiu maudoina.

Hewali yo hasala taba se tawasola o nige?

³⁶ Na ena tamowai hesau ye nuwatulobai meta yona laulau nige se dudulai waihiu se hededehepatu'usei wa unai, na ye henuwa bena waihiu ne ye tawasolai matawuwuna tauna ne yona gadosisi nige gonowana ye kabinuwahi,** meta ye namwa. Teina ta meta nige ba'aya, unai bena kwa talamyeyidi na se tawasola. ³⁷ Na ena tamowai hesau ye nuwabayao, na nige tawasola lelehina ye lelehi, yo gonowana tauna ne yona gadogadosisi ye kabinuwahidi, na yona hineli ye ginauli bena tabu waihiu se hededehepatu'usei wa ye tawasolai, meta saha ye ginauli ta hinage ye dudulai. ³⁸ Unai, kaiteya ye tawasola meta ye namwa, na kaiteya nige ye tawasola meta ye namwakalili.

Wabuwabu gonowana se tawasola'uyo?

³⁹ Waihiu maitawasola bena ma mwanena se miya ye lau ee mwanena ne ye boita. Na ena mwanena ne ye boita meta kabo gonowana ye tawasola'uyo, na bena Guiyau taukawamamohoiyeyina tamowaina hesau ye tawasolai. ⁴⁰ Na yau yogu kitahekasa unai meta ye namwa mo tabu ye tawatawasola'uyo. Na Yaubada Yaluwana Tabuna yau hinage kaliguwai, unai yogu hedehedede ta meta yona lauhekataena ya hedede-hemasalahadi.

8

Kai se kaitalasamyeyi koitau udiyedi gonowana ta kaidi e nige?

¹ Na yogu kwa kulikulilaoma wa unai meta kai se kaitalasamyeyidi koitau udiyedi** henamaidi kwa henamaiyegau. Kabina ta kata meta “kita maudoida nuwatulobaina

** **7:36:** Tauna ne yona gadosisi nige gonowana ye kabinuwahi: Kalina Giliki unai hedehedede ta kaniyona labui, na hesauna ede teina: waihiu ne tawasola bolimaina ye dikwaiyako. ** **8:1:** Kai se kaitalasamyeyidi koitau udiyedi ne meta nige tausunuma maudoidi suisui bulumadi se hetabuyeyidi koitau matadiyena, na kabo se kaikai. Huya hekadi yodi kaikaigogo se ginauli koitau ne yona numa tabuna unai o tamowai yodi numa udiyedi, na huya hekadi buluma ne hinage se lokunegabaei maketi unai.

kalidaena”.** Na sonoga ye henuwasaesaeda, iyamo gadosisi meta ekalesiya tauhebayaona ede. ² Kaiteya tamowai ye nuwatui bena ginauli maudoidi kabidi ye kata meta sola nige ye sibasibakalili. ³ Na kaiteya tamowai Yaubada ye gadosisiyei meta Yaubada iya kabina ye kata.

⁴ Unai kai se kaitalasyeidi koitau udiyedi meta doha teina. Kabina ta kata, “Tanoubu ta unai meta koitau siya ginauligaibu”, yo hinage, “Nige yaubada hesau na Yaubada kesega mo.” ⁵ Tanoubu ta yo galewa ne unai ginauli se bado tamowai se kataidi meta siya yaubada yo guiyau, yo tamowai se taba'ohulau udiyedi. ⁶ Na iyamo kita taukawamamohoi kalidawai meta Yaubada kesega mo, iya Tamada, yo iya ginauli maudoidi ta tauginaulidi, na kita meta iya hesabana. Yo Guiyau ne meta kesega mo ede Yesu Keliso, na iya kalinawai ginauli maudoidi ye ginaulidi yo iya kalinawai mauli ye leyama.

⁷ Na iyamo taukawamamohoi hauhaudi hekadi meta hedehedede ta kaniyona nige kabina se kata, na koitau taba'ohuidi kabikabidiyao ne udiyedi se manasakalili. Unai, ena kai doha teina se kai, kabo yodi nuwanuwatu ne unai se wane, “Kai ta se kaitalasyeyiko koitau udiyedi.” Na yodi nuwanuwatu meta kai ne ye hebikidi, na unai se bom se henuwapilipili'uyoidi, matawuwuna yodi nuwatulobai ne sola nige se masalahakalili. ⁸ Na kai ne nige gonowana ye laeida Yaubada dedekanaena. Ena nige ta kai meta nige gonowana ye tolehesuwalada, na ena ta kai, meta nige gonowana ta nuwasaesae, matawuwuna Yaubada taba nige ye kitahenamwakaliliyeida.

⁹ Iyamo bena kwa kitanamwanamwa yomi yailihai miyamiyana ta tabu ye hemala kabakalabesibesi tausunuma hauhaudi ne udiyedi, siya yodi nuwatulobai udiyedi se pahili. ¹⁰ Matawuwuna ena tamowai hesau yona nuwatulobai dobidobina ye kitago koitau kabataba'ohuidi numana unai ku kaikai, meta ye hemala kam kaha ne ku kabihekita na saha ku ginauliyako wa kabo ye ginauliwatanigaibui. ¹¹ Kam kaha yona sunuma dobidobina ta, Keliso ye boitako iya hesabana, na iyamo yom sonoga o kata ta debanaena kabo heyababa ye lobai. ¹² Ena yomi laulau ta unai ba'aya kwa ginauli kami kahao udiyedi yo yodi nuwanuwatu kwa hepilipilidi meta teina ta ye hemala yomi ba'aya Keliso unai. ¹³ Unai, ena saha ya kai ta kagu kaha hesau ye hekalabesibesi, meta taba nige suisui bulumana ya kai'uyoi. Teina unai kabo taba nige yona kababeku ya ginauli.

9

Apostolo yodi dudulai

¹ Ye masalahakalili meta yau yailihai tamowaina yo apostolo hesau. Yoda Guiyau Yesu ya kitayako, yo yogu paisowa ta debanaena kwa laoma yomi sunuma kwa tole iya unai. ² Nuwana tamowai hekadi se nuwatui meta yau nige apostolo, na iyamo ya hemala apostolo kalimiuwai. Matawuwuna komiu meta kabahemamohoiyeigau ede yau Guiyau yona apostolo.

³ Ena tamowai yogu paisowa ta se hededeheyaheyababa meta yogu hededehe-masalaha ede teina: ⁴ Idohagi, waila yo kai unai yoma dudulai hesau bena kwa saguigau o nige? ⁵ Yo hinage yoma dudulai gonowana taukawamamohoi waihiuna hesau ka tawasolai na maiyamai ka lau doha apostolo hekadi yo Guiyau kana kahao yo hinage Kipasi. ⁶ Unai nuwana yau yo Banaba hinage yoma dudulai ede taba yoma moni paisowana ne ka hekaiyawasi na yomi sagu mo unai ka miyamiya! ⁷ [*Kabakita ede teina:*] Iyala tamowaina meta nige gonowana ye bom ye hemaisa'uyoi. Yo nige tamowai hesau wine ye kumai na kaniyona nige ye kai. Yo hinage mamoe taukitahetetena nige

** **8:1:** Kita maudoida nuwatulobaina kalidaena meta ekalesiya Kolinito unai taumiya wa yodi hedehedede hesau. Yodi hedehedede hekadi Paulo ye kulidi lausoiso 4 unai.

gonowana ye kitakitahetete mo na miliki mamoe susuna unai se hai ne gonowana ye numa.

⁸ Yogu hedehedede ta meta nige tamowai yodi nuwanuwatugaibu, na Yaubada yona laugagayo unai hedehedede kesekesegadi ta ye hedehededeidi. ⁹ Matawuwuna Mose yona laugagayo unai ye kuliyo ye wane, “Ena bulumakau witi kaniyona kabakabiyawasina unai ye paipaisowa meta tabu kawana ne kwa sumasumagudui.”** (*Dutelonomi 25:4*) Na kwa nuwatui meta Yaubada bulumakau mo hesabana ye nuwanuwatu? ¹⁰ Nigele! Na hedehedede ta meta kita kada hedehedede, yo kulikuli tabuna ta se kuli kita hesabada, matawuwuna koya taupaisowaina yo witi tauhekasana se paisowa na yodi nuwatu ede kabo witi ne kaniyona soina tehana se hai ye hemala yodi paisowa maisana.

¹¹ Huyana Guiyau wasana ka hededehehemasalahaka kalimiuyena meta doha like ka kumai nuwamiu ne udiyedi. Hage idohagi, gonowana yoma paisowa kaniyona kalimiuyena ka hai o nige? Kaniyona ne, siya ede tanoubu ta gogodiyao. ¹² Ena tamowai hekadi yodi dudulai bena kwa saguidi meta ye namwa mo taba kwa sagukaliliyeigai.** Na iyamo nige huya hesau yoma dudulai unai ka tolo na ka hedede bena kwa saguigai, na pilipili maudoidi udiyedi ka hekalakasikasinigai na Keliso wasana namwanamwana ta tabu hetataguduguduina hesau ka ginauli.

¹³ Kabina kwa kata meta kaiteyadi Numa Tabuna unai taupaisowa kadi kai Numa Tabuna ne unai se haihai. Na hinage kaiteyadi kaitalasangabuna milana unai taupaisowa saha se kaitalasangamei ne tehana kabo se hai. ¹⁴ Gonogonowana doha, Guiyau ye hedede meta kaiteyadi wasa namwanamwana se laulauguguyaei bena hinage se saguidi wasa namwanamwana ta debanaena. ¹⁵ Na iyamo teina kabikabi ta nige ya hepaisowadi. Na yau ya kulikuli ta nige yogu nuwanuwatu bena saha hesau kwa ginauli na unai kwa saguigau. Nuwagu yona kabanamwa ede ya paisowa na nige maisana hesau ya hai. Ena unai ya hasali yo ya boita, iyamo taba nige tamowai hesau yogu kabagwayuala ne ye hekaiyawasi. ¹⁶ Na huyana wasa namwanamwana ta ya lauguguyaei meta nige gonowana ya hededetausae'uyoigau matawuwuna Yaubada ye lauheliligau na ya lauguguya. Ahani mo yau, ena wasa namwanamwana ta nige ya lauguguyaei kabo yababa ya lobai!

¹⁷ Ena ya bom yogu nuwatu unai ya talameigau na ya lauguguya, meta maisana kabo ya hai. Na ena nige ya talameigau meta Yaubada yona kaisunuwa yo paisowa polohena ye leyama wa bena ya ginauli. ¹⁸ Unai, yogu paisowa ta kainauyana ede saha? Kainauyana ede teina: Nige ya tolo yogu dudulai wa unai, na wasa namwanamwana ta ya lauguguyaei meta ya lauguguyaei mo na nige unai ya kawamaisa.

¹⁹ Yau meta yailihai tamowaina yo nige tamowai hesau ye tanuwagaigau, iyamo ya toledobiyeigau na ya hemala tamowai maudoidi yodi taupaisowa na unai bena tamowai se bado ya laeidima Keliso unai. ²⁰ Na yau ena Dius bodana udiyedi meta ya hemala doha Dius tamowaina hesau,** na unai bena Dius tamowaidiyao ya laeidima Keliso unai. Na ena Mose yona laugagayo logulogunaena taumiya bodadi udiyedi** meta yau ya hemala doha Mose yona laugagayo logulogunaena taumiya hesau, na unai bena kaiteyadi Mose yona laugagayo logulogunaena taumiya ne ya laeidima

** **9:9:** Bulumakau witi kaniyona kabakabiyawasina unai ye paipaisowa: Bulumakau witi ne se utu'utui yo kabakabiyawasi ginaulina se niuniuli, na unai witi kaniyona udiyedi dahidi se bekuhai. Ede witi kaniyona se kabiyawasi. ** **9:12:** Ye namwa mo taba kwa sagukaliliyeigai: Paulo ye hedede ede iya ma kana kahao yodi dudulai ede bena se sagukaliliyeidi, matawuwuna siya meta tamowai bagubagunadi wasa namwanamwana se bahei se laei Kolinito udiyedi. **

** **9:20:** Ya hemala doha Dius tamowaina hesau: Miyamiya Paulo ye hedehededeidi ta, siya ede kadi kaleko yo kadi kai yo yodi lauhe'a'a yo tapwalolo kabikabidi yo laulau hekadiyo doha. **

** **9:20:** Mose yona laugagayo logulogunaena taumiya: Siya nuwana dagela tamowaidiyao na se nuwabuiko yo se kawamamohoi Yaubada unai na Mose yona laugagayo se kawakabiyeidi.

Keliso unai. Na iyamo yau meta nige Mose yona laugagayo logulogunaena taumiya. ²¹ Na ena ya lau dagela tamowaidiyao siya nige laugagayo logulogunaena taumiya bodana udiyedi, meta yogu miyamiya doha dagela tamowaina hesau, unai bena dagela tamowaidiyao ne ya laeidima Keliso unai. Iyamo yau meta Yaubada yona laugagayo nige ya nuwaluluhiyei, na Keliso yona laugagayo logulogunaena ya miya. ²² Na ena ya lau tamowai yodi sunuma basabasadi** udiyedi, kabo ya miya doha tausunumabasabasa ne, na ya kaipate bena ya laeidima Keliso unai. Miyamiya ta kabo ya miyaidi tamowai maudoidi udiyedi na unai ya kaipate bena tamowai hekadi ya gilihaidi. ²³ Yogu miyamiya doha teina ta meta wasa namwanamwana debanaena, na unai bena tausunuma maudoidi maidaguwao kabo kainauyana ne ka hai.

²⁴ Kabina kwa katakalili meta heloikailakwa unai tauheloi maudoidi se heloi na iyamo kesega mo kabo kainauya ne ye hai. Unai bena kwa heloinamwanamwa na kabo kainauya ne kwa hai. ²⁵ Taukaiheya maudoidi ena se lau se kaiheya meta bena se kitahetete'uyoidi yo yodi lubulubui laugagayodi maudoidi bena se hemuliwatanidi. Se lubulubui na bena kabo kainauya** se hai, na kainauyana ne nige gonowana ye miyahai. Na kita ta lubulubui meta kabo yoda nuwatu ede taba kainauya miyamiyahaina ta hai. ²⁶ Unai ede ya heloidudulai na nige doha tauheloi hesau ye heloi na yona kabagehe nige kabina ye kata. Yo ya pwaiti meta nige doha tamowai hesau ye pwaiti na nimana ye tutugaibuidi. ²⁷ Ya kabinuwahi'uyoigau na taugu ta ye hemala yogu heyayai tauhaina, madai ya lauguguya tamowai hekadiyo udiyedi na muliyena kabo Guiyau ye tolehesuwalagau na taba nige kainauyana ne ya hai.

10

Tabu kwa laukwatakwata doha Isalaela huyana se kadau se lau Kanana hesabana

¹ Kagu kahao, saha ye tubu Dius kada kulutubu udiyedi wa tabu kwa nuwanuwaluluhiyei. Huyana Aikupito unai se pesahai meta siya maudoidi Yaubada yalohi ye hemasalaha wa logulogunaena, yo maudoidi se dobi gabwa wa ye taigali na tanona pitapitalina unai se kawasi. ² Maudoidi yalohi yo gabwa wa udiyedi se babatiso na se hemala Mose tauhemuhemuliwatanina. ³ Yo hinage Yaubada kai ye hemasalaha wa maudoidi se kai, ⁴ yo Yaubada numanuma ye moseidi wa maudoidi se numa, iya ede waila weku unai ye didima wa. Na weku mamohoina wa maiyadi se sae yo se dobi, iya ede Keliso. ⁵ Na iyamo tamowai se bado Yaubada nige nuwana se henamwa, unai se boita na sinalediyao wa balabalagaibu wa unai se toletolegaibuidi.

⁶ Ginauli saha se tubuko ta meta se hemala yoda kabakita na unai kabo nuwada tabu ta tolelaedi nuwanuwatu yabayababadi udiyedi doha siya saha se ginaulidi ne. ⁷ Yo tabu koitau kwa taba'ohuidi doha hekadi se taba'ohu koitau udiyedi. Doha kulikuli tabuna unai ye wane,

“Tamowai wa se tuli na se kaikai yo se numanuma, na kabo se tolo na koitau tautaba'ohuidi yodi taba'ohu laulaudi yabayababadi se ginaulidi.” *(Esodo 32:6)*

⁸ Yo tabu laulau bikibikidi ta ginaginalidi doha siya hekadi laulau bikibikidi se ginaginalidi wa na mayadai kesega unai meta badodi 23,000 se mwaloi.** ⁹ Hinage tabu Keliso ta lautonogi doha siya hekadi meta Guiyau se lautonogi na mwata se kalasidi ede se mwaloi.** ¹⁰ Yo tabu ta hetahetalapili, doha siya hekadi yodi hetalapili debanaena ede Yaubada yona taukaiunu aneluna ye unuhemwaloidi.** ¹¹ Laulau ta kalidiyena se tubu

** **9:22:** Tamowai yodi sunuma basabasadi: Ena taba koitau kabataba'ohuidi numadi udiyedi kai se kaidi kabo yodi nuwatu meta mauli se lausapuliyako. Nuwanuwatu ta meta peina 8 unai ta hasili. ** **9:25:** Kainauya meta kalina Giliki unai Paulo ye kuli ede, kolona. Kolona ne meta tauheloikailakwa ye baguna kabo kolona se kainauyaei, na kolona ne meta kaikaiwa ma lugudi se heihepo'opo'odi na nige gonowana ye bawa ye loha. ** **10:8:** Wasa wa ku hasili Numela 25:9 unai. ** **10:9:** Wasa wa ku hasili Numela 21:1-9 unai. ** **10:10:** Wasa wa ku hasili Numela 16:41-50 unai.

meta se hemala yoda kabakita. Na kulikuli tabuna unai se kulidobiyedi meta se hemala kita kada hededehebasiba, na kita ede tanoubu ta yona huyagehe mayadaidiyao udiyedi taumiya tamowaidi.

¹² Unai, taba ku nuwatui meta ku tolobayaoko, bena ku kitanamwanamwa tabu ku beku. ¹³ Noho kwa miyahekalodi ta meta hinage tamowai hekadi se miyahekalodiko. Na Yaubada nige gonowana ye nuwagabaeda. Taba nige noho hesau ye talamyeyi na yomi bayao ne ye saedikwaidi. Ena noho kwa hekalo meta iya kabo kabakaihale kedana ye hekitagomiu na yomi sunuma ne unai kwa tolobayao.

¹⁴ Unai, keaguwao, koitau taba'ohuidi bena kwa wasabugabaeidi.** ¹⁵ Yogu hedehede ta meta tausunuma maudoimiu kami hedehede, na komiu meta tamowai sibasibadiyao. Unai bena yogu hedehede ta kwa bom kwa hekasadi na kwa nuwatulobaidi. ¹⁶ Ena ta laomagogoi Guiyau yona kaikaigogo unai, na waina keyakana lautokina ta mosei Yaubada unai na maudoida ta numa, meta ta patulau Keliso kwasinana unai. Yo pwalawa ta kihi na ta kai meta unai hinage ta patulau Keliso tauna unai. ¹⁷ Na Guiyau yona kaikaigogo pwalawana meta kesega, unai kita maudoida meta boda kesega, kaniyona ede pwalawa ne maudoida ta kaigogoi.

¹⁸ Hage, Isalaela tamowaidi kwa nuwatuidi. Kaiteyadi kaitalasam ne tupwana se kai, meta siya hinage se patulau kaitalasam kabagabuna milana** ne unai. ¹⁹ Yogu hedehede ta kaniyona ede saha, kaitalasam se mosei koitau unai meta kaniyona o nige? Na koitau meta yona gigibwali o nige? ²⁰ Nige! Na koitau tautaba'ohuidi ne yodi kaitalasam meta se kaitalasamyeyidi demoni udiyedi na nige Yaubada unai. Nige ya henuwa bena taba komiu kwa patulau demoni udiyedi. ²¹ Nige gonowana Guiyau yona kaikaigogo keyakana unai kwa numa, yo hinage demoni yodi kaikaigogo keyakana unai kwa numa. Nige gonowana kwa patulau Guiyau yona hatahata unai kwa kaikai, yo hinage demoni yodi hatahata unai kwa kaikai. ²² Idohagi, bena Guiyau kwa hekouyalayala? Nuwana kwa bayaokalili na kabo iya?

Taukawamamohoi yona yailihai miyamiyana

²³ Hekamiu kwa wane, “Miyamiya maudoidi kalimaiyena meta nige laugagayodi hesau.” Iyamo ya hededelaowa ede, laulau maudoidi ta nige gonowana udiyedi sagu ta lobaidi. Kwa wane, “Miyamiya maudoidi kalimaiyena meta nige laugagayodi hesau.” Iyamo yoda sunuma unai meta nige gonowana laulau maudoidi ta se hebayaoda. ²⁴ Tabu komiu kwa bom yomi namwanamwa kwa nuwatui, na bena kami kahao yodi namwanamwa kwa nuwatuidi.

²⁵ Suisui yaudi kabalokulokune unai se lokuneidi gonowana kwa hemaisadi na kwa kaidi, meta tabu yomi nuwanuwatuyena kwa wane, “Teina ta gonowana ya kai o nige?”

²⁶ Matawuwuna ede, “kaiyaulina ta yo ginaulina maudoidi meta Guiyau iya yona.” (Same 24:1)

²⁷ Ena tamowai hesau iya nige tausunuma na ye kaibwadaigomiu bena kwa lau maidamiu kwa kaikai, na kwa henuwa bena kwa lau, meta saha ye kabinonohai ne kwa haidi kwa kaidi, na tabu kwa henahenamaibuibu haedi kai ta se laolaoma. ²⁸ Na ena taba tamowai hesau ye hededelaowa kalimiuyena ede, “Kai ta se kaitalasamyeyidiko!”, meta tabu kwa kaikaidi, tauhededelaowa ne debanaena yo iya yona nuwatulobai debanaena. ²⁹ Teina ta tamowai hesau ne yona nuwatulobai, nige kowa.

Taba ku wane, “Idohagi to tamowai hesau yona nuwatulobaiyena bena yogu yailihai miyamiyana ye hededegudugudui? ³⁰ Ena taba kai ne lautokina ya lautoki Yaubada unai na ma gwaugwaualagu kai ne ya kai, idohagi to kai ne debanaena bena se

** **10:14:** Koitau taba'ohuidi bena kwa wasabugabaeidi: Paulo ye hedede ede tabu se laulau koitau tautaba'ohu tamowaidiyao yodi kaikaigogo udiyedi, matawuwuna ede ena se lau meta se hemasalaha'uyoidi ede siya kadi boda hesau.

** **10:18:** Kaitalasam kabagabuna milana meta heyaheyasoni, kaniyona ede Yaubada.

hededeheyaheyababagau?” ³¹ Unai ya hededelaowa ya wane, ena saha hesau ku kai, ku numa, o ku ginauli, meta bena ku ginauli Yaubada hedebasaeina hesabana. ³² Tabu tamowai hesau ku henuwapwanopwano, taba iya Dius o Giliki tamowaina, o Yaubada yona dubu tamowaina hesau, ³³ doha yau hinage yogu kaipate ede bena taba yogu miya yo ginauli maudoidi ya ginaulidi ta udiyedi tamowai maudoidi ya henuwanamwadi. Kaniyona ede nige ya bom mo yogu namwanamwa ya nuwatui, na boda yodi namwanamwa ya ginauli, na unai kabo mauli se lobai.

11

¹ Yogu miyamiya ta kwa miyawatanidi, doha ede yau Keliso yona miyamiya ya miyawatanidi ta.

Tatao yo sinesineo yodi laulau tapwalolo koigogona udiyedi

² Ya kawanamwanamwaegomiu matawuwuna ede ginauli maudoidi udiyedi kwa nuwanuwatuigau, yo hinage saha se hekatagau na ya hekawalaeidiwa kalimiyuena wa kwa kabihekahinidi yo kwa miyawatanidi. ³ Na ya henuwa bena kwa nuwatulobai meta loheloheyao yodi taukulukulu ede Keliso, waihiu yona taukulukulu ede loheya, na Keliso yona taukulukulu ede Yaubada. ⁴ Ena loheya hesau ye tapwalolo yo ye hededepeloweta na ma kulusumasumana, meta ye hemasalaha ede yona taukulukulu Keliso meta nige hekasisina hesau kalinawai. ⁵ Na ena waihiu hesau ye tapwalolo yo ye hededepeloweta na kuluna ne nige ye suma meta iya yona taukulukulu** nige ye hekasisiyei, kitakitana gonogonowana ede doha waihiu ne kuluna meta yaliyalina. ⁶ Ena taba waihiu hesau kuluna nige ye suma meta kuluna ne taba se yaligabaei. Na kuluyali ne waihiu kalinawai meta ye nuwanwadimwadine, unai ye namwa mo taba kuluna ne ye suma.** ⁷ Loheya nige gonowana kuluna ye suma matawuwuna ede iya meta Yaubada kana kao yo kabahededehenamwana, na waihiu meta loheya kabahededehenamwana. ⁸ Matawuwuna loheya bagubagunana wa nige waihiu unai ye tubuma, na Yaubada loheya yauna tupwana ye hai na waihiu ye ginauli. ⁹ Nige waihiu debanaena Yaubada loheya ye ginauli, na loheya debanaena ede waihiu ye ginauli. ¹⁰ Tenem debanaena, waihiu bena kuluna ye suma na unai ye hemasalaha'uyoi

** **11:5:** Iya yona taukulukulu: Waihiu maitawasola udiyedi meta iya ede mwanena, na hasahasalao udiyedi, tamadi. ** **11:6:** Ye namwa mo taba kuluna ne ye suma: Leta ta unai meta Paulo nige ye kulihemasalahakaliliyei matawuwuna saha to sinesineo ye henuwadi bena kuludiyao se sumadi huyana se tapwalolo yo se hededepeloweta dubu koigogona udiyedi. Unai bena Paulo yona huya tamowaidiyao yodi laulau ta nuwatuidi. Kolinito unai sinesineo se bado siya meta yodi yaubada waihiu Apolodaiti yona taupaisowa. Apolodaiti meta tau yo sine taudiyao yodi gadogadosisi kabikabina maudoina yaubadana, na yona taupaisowa wa yodi taba'ohu kabikabina meta taudi se lokulukuneidi moni hesabana. Giliki yo Dius tamowaidi yodi kabikabi meta sinesineo maudoidi ne kulusumasumadi. Na Apolodaiti yona taupaisowa waiwaihiudi se bom mo kuludiyao meta nige sumadi. Nuwana dubu unai ekalesiya waiwaihiudi se nuwatulobai meta Yesu debanaena siya yailihai tamowaidi, nige laugagayo hesau guninaena se miya. Ede kulusuma laugagayona se hekaiyawasi. O nuwana udoi, na se nuwatulobai meta huyana Yaubada taba'ohuina unai bena tabu kuludi se sumasumadi, gonogonowana doha Apolodaiti yona taupaisowa wa. Na nige se nuwatulobai meta yodi tapwalolo yo yodi hededepeloweta ne nuwanuwatuna udoi, nige doha Apolodaiti taba'ohuina. O nuwana udoi, doha teina: Huyana se tapwalolo yo se hededepeloweta na kuludi nige se sumadi meta kabo tamowai se henuwapwanopwanodi, kabo se henahenamai yodi taba'ohu laulauna ta saha. Unai Paulo ye kuli ede sinesineo yodi huyatapwalolo yo hededepeloweta unai bena kuludiyao se sumadi.

meta iya mwanena yona lolina guninaena. Yo hinage gabemani yodi taukitasipwa** debadiyena bena ye kulusuma.

¹¹ Na Guiyau yona nuwanuwatu unai meta waihiu nige ye bom ye tubugaibu yo loheya nige ye bom ye tubugaibu. ¹² Nuwanuwatuna ede, waihiu yona kabalaoma ede loheya, yo hinage loheloheyao yodi kabatubuma ede waihiu, na ginauli maudoidi ta yodi kabalaoma ede Yaubada. ¹³ Hage kwa nuwatuhekasa, taba waihiu kuluna nige ye suma na ye tapwalolo Yaubada unai, kabo kwa kitahenamwa o nige? ¹⁴ Waihiu yo loheya kadi kao udiyedi gonowana nuwanuwatu maudoidi ta kwa kitalobaidi. Taba loheya kuluna ye dau meta kitakitana kalinawai ne ye taumwadimwadinekalili. ¹⁵ Na taba waihiu kuluna ye dau meta iya kana kao kabahenamwana, matawuwuna ede kulu daudauna Yaubada ye mosei waihiu unai, meta kulukuluna ne kana suma. ¹⁶ Kita yo Yaubada yona dubu maudoidi yoda kabikabi ta meta nige yona udoi hesau, unai nige gonowana tamowai hesau teina nuwanuwatu ta unai ye hededehaikabi.

Guiyau yona kaikaigogo kabikabina

¹⁷ Yogu hedehedede hekadi'uyo ta udiyedi meta nige gonowana ya hededehtausaegomiu, kaniyona ede yomi laolaomagogoi ne udiyedi yomi laulau se yababa, ede nige namwa hesau kwa lobai. ¹⁸ Saesaekalilina ede teina nuwatu ta: Ya lapuiyako meta yomi huyalaolaomagogoi ne udiyedi kwa hinehineli'uyoigomiu. Na hedehedede ta yogu lapuina unai meta nuwana mamohoi. ¹⁹ Ye namwa ede hinehineli ta ye tubu kalimiuyena, unai kabo ye hemasalagomiu meta kaiteyadi siya tausunumamamohoi yo kaiteyadi nige.

²⁰ Yomi laolaomagogoi ne udiyedi meta Guiyau yona kaikaigogo nige nuwanuwatuna hesau kalimiuyena. ²¹ Matawuwuna ede taulagebaguna siya se bom kadi kai se kaidi na nige gonowana kadi kahao se nayaidi yo maiyadiyao se kaikaigogoi. Debanaena ede kami kahao hekadi meta se hasali na hekadi se numayauyaule. ²² Hage idohagi, nige yomi magai kabo udiyedi gonowana kwa kaikai yo kwa numa? O idohagi, bena kwa hedede meta Yaubada yona dubu ne nige kaniyona hesau, na deha tamowaidiyao kwa toledobidobiyeidi? Yomi nuwatu bena kabo ya hatogomiu? Nige gonowana!

²³ Na Guiyau saha ye hekatagau meta hinage bena ya hekawayawa kalimiuyena. Yoda Guiyau Yesu kana walohaina boniyaina wa unai pwalawa ye hai ²⁴ na ye lautoki ye gehe ede ye kihi na ye wane, "Teina ta taugu, komiu hesabamiu. Kabikabi ta bena kwa ginaginauli kabahenuhenuwaisinigau." ²⁵ Kaikai gehena unai kabo hinage waina keyakana ye hai na ye wane, "Waina keyakana ta meta yau kwasinagu. Teina ta meta talam hauhauna kabahemamohoiyeina. Kabikabi ta bena kwa ginaginauli, na waina keyakana ta yomi huyanumana unai meta ye hemala yau kabahenuhenuwaisinigau."

²⁶ Teina unai, yomi huyakaikaigogoi udiyedi pwalawa ta kwa kai yo waina keyakana ta kwa numa meta Guiyau yona boita kwa hedehededehemasalaha ye lau ee kana sigana ye uyoma. ²⁷ Unai, ena tamowai hesau pwalawa ta ye kai yo waina keyakana ta ye numa na nige nuwanuwatu dudulaina unai, meta tamowaina ne Guiyau tauna yo kwasinana ye kitakitadobidobiyei, ede unai kana gilulu yo ye ba'aya. ²⁸ Tenem debanaena ede kesega kesega bena ye bom ye kitasipwanamwanamwaei'uyoi na kabo pwalawa

** **11:10:** Gabemani yodi taukitasipwa meta kalina Giliki unai Paulo ye kuli, *angelosi*, iya ede *angel* kalina Dimdim unai yo anelu kalinadaena. Na kalina Giliki unai kaniyona bagubagunana meta tamowai o gabemani yodi hetamali tamowaidi o yodi tauhewasa. Na taukitasipwa gabemani se hetamalidi meta hinage se katai ede *angelosi*. Paulo yona huyaena sinesineo maitawasola hekadi mwanedi se kouyalayalaeidi matawuwuna se laulau waihiu hekadi udiyedi, na se laukwatakwataedi. Unai sinesineo ne se heboda'uyoidi na hesadi se tole waihiu hauhaudi. Yodi laukwatakwata wa kabakitana se ginauli meta kuludi nige se sumadi. Na gabemani yodi anelu o taukitasipwa se lohei haedi waihiu hauhauna hesau se lobai, kabo se hekamkamnadi. Na Paulo nige ye henuwa bena dubu se heyababa waihiu tausunuma yodi kabikabi debanaena, unai ye hineli taba tausunuma sinesineo maudoidi se kulusuma.

ta ye kai yo waina keyakana ta ye numa. ²⁹ Matawuwuna ede taba tamowai hesau ye kaigaibu yo ye numagaibu na nige ye nuwatulobai meta teina ta Keliso tauna,** Yaubada kabo iya ye hekamkamna, na kabahegiluna ede ye kai yo ye numa ne. ³⁰ Tenem miyamiya ne debadiyena ede kwa bado meta kwa basabasa yo kwa kasiyebwa, yo hekadiyo ede se boitako. ³¹ Na ena taba ta kitasipwanamwanamwae'uyoida meta nige gonowana Yaubada ye hekamkamnada. ³² Na huyana Guiyau ye hekamkamnada meta ye hesibasibada, unai taba nige tanoubu ta maiyadao ye heyababada.

³³ Unai, kagu kahao, ena kwa laomagogoi kaikaigogoi hesabana meta bena kami kahao kwa nayanayaidi. ³⁴ Ena kwa hasalikalili meta bena yomi magaiyena kwa kaikai, unai kabo nige gonowana kabahegilugomiu hesau ye masala yomi laomagogoi ne unai.

Tenem iya ede, na yogu huyalaowa unai kabo nuwanuwatu hekadiyo ya hedededi kalimiuwai.

12

Yaubada Yaluwana kainauya ye leyama

¹ Na kagu kahao, Yaluwa Tabuna yona kainauya henamaina kwa henamaiyeigau wa bena ya hededeheemasalaha kalimiuwai.

² Kabina kwa kata meta huyana komiu sola nige Yaubada kwa sunumaei, unai tamowai se woyahesuwalagomiu na koitau nige kalinadi kwa taba'ohuidi. ³ Unai bena ya hekatagomiu: Ena tamowai hesau Yaubada Yaluwana yona gigibwaliyena ye hedehedede, meta nige gonowana Yesu ye hededeheyababa. Yo nige gonowana hesau ye wane, "Yesu iya Guiyau," kana siga ena Yaluwa Tabuna ede kalinawai.

⁴ Na Yaluwa yona kainauya kadi kao meta udoi'udo, na yodi kabalaoma ne kesega, iya ede Yaluwa Tabuna. ⁵ Dubu luwanaena paisowadi ne meta udoi'udo, iyamo Guiyau kesega mo yona ta paipaisowa. ⁶ Na Yaubada yona paisowa kalidawai kadi kao udoi'udo, iyamo Yaubada kesega ne ye hebayaoda na paisowa ne ta ginaulidi.

⁷ Na Yaluwa Tabuna yona kainauya ye haidima kesega kesega kalidawai meta bena ekalesiya bodadi kabasaguidi. ⁸ Yaluwa Tabuna yona kainauya ye mosei tamowai hesau unai meta sibasiba hedehedededi, yo Yaluwa Tabuna kesegana ta hinage tamowai hesauna unai meta hededesonoga kainauyana ye mosei, ⁹ na tamowai hesauna unai meta sunuma kainauyana, yo hesauna unai meta kabikabihenamwanamwa kainauyana. ¹⁰ Yaluwa Tabuna kesegana ta hinage tamowai hesau unai meta laulau gigigibwalidi kabaginalidi gigibwalina ye mosei, na hesau unai meta hedepeloweta kainauyana, yo tamowai hesau unai meta gonowana yaluwa yababana yo yaluwa namwanamwana yodi paipaisowa ye kitalobaidi. Hinage hesau yona kainauya meta gonowana kalina Yaluwa ye mosei unai ye hedehedede, yo hinage hesau yona kainauya meta kalina Yaluwa ye ledima wa ye hededeheemasalahadi. ¹¹ Teina kainauya maudoidi ta meta Yaluwa kesekesegana ta yona paipaisowa, na yona kaisunuwayena na kainauya ne ye moseidi tamowai kesega kesega udiyedi.

Keliso tauna kesega na yauna se bado

¹² Keliso tauna, iya ede yona dubu, meta kana kao gonogonowana doha tamowai tauna maudoudoina. Tamowai tauna meta kesega, iyamo tauna ne yau udoi'udo udiyedi Yaubada ye ginauli ede ye hemala tamowai kesega. ¹³ Hinage doha, kita maudoida meta Yaluwa kesega ta unai se hebatisoida, ede ta hemala boda kesega. Kita hekada meta Dios yo hekada meta dagela tamowaidi yo hekada meta heyayai tauhaidi, hekada hinage yailihai tamowaidiyao, na kita maudoida meta Yaluwa kesegana ta kalidawai.

** **11:29:** Nige ye nuwatulobai meta teina ta Keliso tauna: Hedehedede ta kalina Giliki unai kaniyona helabuina, iya ede, Ekalesiya bodana nige ye nuwatui.

¹⁴ Yo tamowai yauna ne meta se badokalili na nige yau kesega mo. ¹⁵ Taba kae ye wane, “Yau nige nima, unai yau meta nige tauda ta yauna hesau.” Na iyamo nige gonowana tauda ta unai ye bom ye tolehesuwala'uyoi. ¹⁶ Yo taba beya ye wane, “Yau nige mata, unai yau meta nige tauda ta yauna hesau.” Na iyamo nige gonowana tauda ta unai ye bom ye tolehesuwala'uyoi. ¹⁷ Ena tauda ta yauna maudoina ne meta mata, kabo haedi kabalapulapui ede? Yo ena tauda ta yauna maudoina ne beya, meta kabo haedi pane yoda kabapanelobaidi ede? ¹⁸ Na iyamo Yaubada tauda ta ye ginauli meta yauda ta ye tolehekahekasadi, na yau kesega kesega yona kabamiya ye nuwatui meta unai ye tole. ¹⁹ Ena taba yau maudoidi ta siya yau kesega meta tauda ta kana kao kabo yona namwa doha saha? ²⁰ Mamohoi, tamowai yauna ne se bado, na iyamo tauna ne kesega mo.

²¹ Na nige gonowana mata ye hededelau nima unai ye wane, “Nige ya henuwago”, yo kulukulu nige gonowana ye hededelau kae unai ye wane, “Nige ya henuwago.” ²² Na tauda ta yauna hekadi meta se basabasa yo se gagilikalili na iyamo tauda ta ye henuwakaliliyeidi. ²³ Yo hinage yauda hekadi nige ta kitahenamwadi meta ta hekasisiyeidi yo ta kitahetetenamwanamwaeidi. Na yauda hekadi wadawadamdi meta ta sumanamwanamwaeidi. ²⁴ Na yauda hekana masamasalahadi na nige ta modekalili bena ta sumadi. Iyamo Yaubada tauda ta ye ginauli na yauda ta ye tolegogoidi na yau gagilidi nige ta kitahenamwa'useidi wa meta Yaubada ye hekasisikaliliyeidi. ²⁵ Unai bena tabu hinehineli ye masalaha tauda ta unai, na yau maudoidi ne bena se haikitakitahetete'uyoidi. ²⁶ Ena tauda yauna kesega ye kamkamna meta yau maudoina ne se kamkamna. Na ena tauda ta yauna hesau se hekasisinamwanamwaei meta tauda ta yauna maudoidi ne se gwauyalagogo.

²⁷ Na komiu maudoimiu ta meta Keliso tauna, na kesega kesega meta Keliso tauna tupwano. ²⁸ Ekalesiya bodana luwadiyena meta Yaubada yona tamowai ye toledi. Bagubagunana meta apostolo, helabuina ede peloweta, hehaiyonana meta taulauhekata, na kabo laulau gigigigibwalidi tauginaulidi yo hinage siya kaiteyadi kabikabihenamwanamwa kainauyana kalidiyena, siya kaiteyadi gonowana tamowai se saguidi, yo dubu kitahetetena kainauyana tauhaina, yo hinage Yaluwa kalina ye ledima udiyedi tauhedehede. ²⁹ Na idohagi, bena maudoidi ta siya apostolo, o maudoidi ta peloweta, o maudoidi ta taulauhekata, o maudoidi ta laulau gigigigibwalidi tauginaulidi? ³⁰ Maudoidi ta kabikabihenamwanamwa kainauyana kalidiyena, o maudoidi ta kalina Yaluwa ye ledima udiyedi se hedehede? O bena maudoidi ta kalina Yaluwa ye ledima taulapulobaidi yo tauhedehemasalahadi? Nige! ³¹ Na taba Yaluwa yona kainauya saesaedi kwa henuwakaliliyeidi bena kwa haidi. **

Gadosisi ye saekalili

Teina kabo laulau namwanamwakalilina hesau ya hedehemasalaha kalimiuyena.

13

¹ Ena taba tamowai kalinadi udoi'udoj yo anelu kalinadi udiyedi ya hedehede na nige tamowai ya gadosisiyeidi, meta kagu kao ede doha pate se koi na ye dagudaguga-gaibu, o doha taukaiheya yodi kabakaiheya peleiden^{**} se koi na dagugugaibuna mo ye laki. ² Ena hedepeloweta kainauyana ede kaliguyena yo gonowana nuwanuwatu saesaedi yo sonoga maudoidi ya nuwatulobaidi, yo ena yogu sunuma meta ye lakikalili unai gonowana kuduli ya hedehesigi, na nige tamowai ya gadosisiyeidi meta nige kaniyogu. ³ Ena taba yogu gogo maudoidi ya kainauyaidi taudehadeha udiyedi yo

** **12:31:** Yaluwa yona kainauya saesaedi meta Paulo ye hetala peina 14:1 unai.

** **13:1:** Kabakaiheya peleiden^{**} meta kana kao doha peleide po'opo'odi aeyani unai se ginaulidi. Taukaiheyamusiki yodi huyakaiheya unai kabo peleide labui se haidi na se koikohedagugudi.

hinage taba ya talamyegau kaiwa kalakalasina unai se gabugau [*bena yogu kabahed-edsaesae*], na nige tamowai ya gadosisiyeidi, meta nige gonowana namwanamwa hesau ya hai.

⁴ Gadosisi meta nayatautau biga yo kabinamwa. Gadosisi meta nige kaikalomagigili, nige hededetausae'uyoi yo nige nuwasaesae. ⁵ Gadosisi meta nige yona laulau se yababa, nige nuwatu'uyoi, nige tautausi'olologaibu yo tamowai yababa se ginauli kalinawai meta nige ye nuwatuhekahinidi. ⁶ Gadosisi meta nige ye nuwanamwa yababa udiyedi, na ye gwauyala miyamiya yo hedehedede mamohoidiyao udiyedi. ⁷ Iya polohe maudoidi gonowana ye baheidi, yo ye sunumatahitahi, yo ye nayatautau biga, yo pilipili udoi'udo i udiyedi ye hekalakasikasini.

⁸ Gadosisi nige gonowana ye gehe, na taba hededepeloweta kalimwai, kabo ye gehe. Yo taba kalina Yaluwa ye leyawa unai ku hedehedede, kabo hinage ye gehe. Yo taba sonoga kalimwai, meta hinage kabo ye gehe. ⁹ Matawuwuna yoda sonoga wa tupwadi mo, yo yoda hededepeloweta wa nige se masalahakalili. ¹⁰ Na huyana Yaubada ginauli namwanamwakalilidi kabo ye hemasalahadi meta ginauli nige se namwakalili ta ye tolehesuwaladi. ¹¹ Huyana ma wawayagu meta yogu hedehedede yo yogu gadogadosisi yo yogu nuwanuwatu meta doha wawaya. Na huyana ya laoma ya tamowailakilaki meta yogu miyamiya yo yogu nuwanuwatu doha wawaya wa ya tolehesuwaladi.

¹² Teina mahana ta unai ginauli maudoidi yoda kitadi meta doha galasi gaugauna unai tautauda ta kitakita, na muliyena kabo matadaena ta kitanamwanamwaedi. Mahana ta unai ginauli tupwadiyao mo kabidi ta kata, na muliyena kabo ginauli maudoidi kabidi ta katahegehedi, doha Yaubada kabida ye katako wa. ¹³ Teina ginauli haiyona ta kabo se miyahai: sunuma, nayatautau biga, yo gadosisi. Na saesaekalilina ede gadosisi.

14

Hededepeloweta yo kalina Yaluwa ye haidima

¹ Bena gadosisi miyamiyadi kwa haidi se hemala yomi miyamiya saesaedi. Yo hinage Yaluwa yona kainauya taba kwa henuwakaliliyeidi, na saesaekalilina taba kwa hai ede hededepeloweta kainauyana. ² Matawuwuna kaiteya tamowai kalina Yaluwa ye mosei ne unai ye hedehedede meta nige ye hedehededelau tamowai udiyedi na Yaubada unai. Yona hedehedede ta nige gonowana tamowai se nuwatulobaidi, na Yaluwa Tabuna yona gigibwaliyena ede Yaluwa yona hedehedede wadawadamdi ye hedededi. ³ Iyamo kaiteyadi tauhededepeloweta meta yodi hedehedede ne udiyedi tamowai yodi sunuma se hededehebayaodi, se hededehebasibadi yo hinage nuwadiyao se hededehetaludi. ⁴ Kaiteya tamowai kalina Yaluwa ye mosei unai ye hedehedede meta ye bom mo yona sunuma ye hebayao'uyoi, na kaiteya tamowai ye hededepeloweta meta ekalesiya bodana yodi sunuma ye hededehebayaodi. ⁵ Ya henuwa bena maudoimiu kalina Yaluwa ye lediwa udiyedi kwa hedehedede, iyamo ya henuwakalili meta bena kwa hededepeloweta. Na tauhededepeloweta meta ye saekalili na kabo kalina Yaluwa ye ledima udiyedi tauhedehedede ne. Iyamo gonowana kalina Yaluwa ye mosei ne unai ye hedehedede, ena yona hedehedede ne ye hededehe masalahadi na udiyedi kabo ekalesiya bodana yodi sunuma udiyedi ye hebayao.

⁶ Unai kagu kahao, ena ya laowa kalimiuwai na kalina Yaluwa ye leyama wa unai ya hedehedede meta yona namwanamwa saha kabo kwa hai? Na ena hededehe-masalahadi o hesibasiba o hededepeloweta o hededehasahasa guguyadi ya hedededi kalimiuwai, kabo unai gonowana sagu kwa lobai. ⁷ Gonogonowana doha ginauli nige yahuyahuwadiyao doha higo yo hapu yo wana kabakaiheyaidi hekadiyo. Ena dagugudi ne nige ye masalahadi meta kabo idohagi bena wana saha se kaikaiheyai ne tamowai se lapulobai? ⁸ Yo hinage, ena bwagigi daguguna nige ye laki yo ye masalahadi meta

kaiteya kabo ye kabinonoha iyala hesabana? ⁹ Unai gonogonowana doha komiu, ena yomi hedehedede nige kwa hededehemasalahanamwanamwaeidi kalinamiu ne udiyedi meta kabo idohagi na tamowai yomi hedehedede ta se nuwatulobaidi? Yomi hedehedede ta kabo kwa hededegaibuidi mo.

¹⁰ Tanoubu ta unai kalina se badokalili, na nige hesau bena nige kaniyona. ¹¹ Na ena tamowai hesau yona hedehedede kaniyodi nige ya nuwatulobaidi meta ya hemala laolaoma kalinawai yo iya ye hemala laolaoma kaliguyena. ¹² Unai gonogonowana doha komiu. Kwa henuwakalili bena Yaluwa yona kainauya kwa haidi, unai taba kwa kaibwada Yaubada unai na dubu kabasaguidi kainauyadi ye haidiwa na hepaisowadi udiyedi bena kwa namwakalili.

¹³ Unai, ena kaiteya kalina Yaluwa ye mosei wa unai ye hedehedede, bena ye tapwalolo na saha ye hedededi wa taba ye hededehemasalahadi. ¹⁴ Matawuwuna ede, taba ya tapwalolo kalina Yaluwa ye leyama wa unai meta yaluwagu ta ye tapwalolo, na nuwagu ta nige yona paisowa hesau. ¹⁵ Kabo saha ya ginauli? Bena ya tapwalolo yaluwagu ta unai kalina Yaluwa Tabuna ye leyama wa unai, yo hinage nuwagu ta unai ya tapwalolo yau kalinagu unai. Gonogonowana doha, huya hekadi kalina Yaluwa Tabuna ye haiyama wa unai ya wana yaluwagu ta unai, yo huya hekadi kabo hinage nuwagu ta unai ya wana tamowai kalinadi udiyedi. ¹⁶ Taba yaluwam unai Yaubada ku hedehedebasaei kalina Yaluwa Tabuna ye haiyawa wa unai, meta idohagi kabo tamowai hekadiyo siya kainauya ne nige tauhaina se nuwatulobai na maidamwao Yaubada kwa hedebasaei? Idohagi kabo se saguigo Yaubada laulautokiyeina ta unai, ena taba saha ku hedehededeidi ne meta nige se nuwatulobaidi? ¹⁷ Yom laulautoki ne nuwana ye namwakalili, na iyamo nige gonowana sagu ye masalaha tamowai maiyamwao ne udiyedi. ¹⁸ Ya lautoki Yaubada unai meta yau kalina Yaluwa ye haidima wa udiyedi ya hedehedekalili na kabo maudoimiu ne. ¹⁹ Iyamo ekalesiya bodana luwadiyena ya henuwa bena hedehedede haligigi masamasalahadi udiyedi tamowai ya hededeahasasaidi na kabo kalina Yaluwa ye leyama ne unai hedehedede badona ten tausani ya hedehededeidi.

²⁰ Kagu kahao, nuwanuwatu ta yomi nuwatulobaidi udiyedi komiu tabu doha wawayao. Yababa ginaulidi udiyedi komiu taba doha wawayao labahauhaudi, na yomi nuwanuwatu ne udiyedi bena doha tamowai lakilakidiyao. ²¹ Kulikuli hesau laugagayo bukana unai meta,

“Guiyau ye wane, ‘Kalina udoidiyao udiyedi yo laolaoma tamowaidiyao kalinadiyena kabo ya hededelau tamowai ta udiyedi, iyamo nige gonowana se lapulapulaoma kaliguwai.’”

(Aisaiya 28:11-12)

²² Unai Yaluwa kalina ye moseidi wa meta hekihekinoi** nige taukawamamohoi hesabadi, na Yesu taukawamamohoiyeina udiyedi meta nige. Na hedepeloweta meta Yesu taukawamamohoiyena hesabadi, na kaiteyadi Yesu nige se kawamamohoiyei meta nige. ²³ Unai, ena ekalesiya bodana se laomagogoi na maudoimiu ne kalina Yaluwa ye haidiwa wa udiyedi kwa hedehedede, na luwamiu ne unai nige taukawamamohoi yo tamowai hekadiyo siya laulau ta nige kabina taukata, kabo se hedede ede kami kao meta doha yauyaule. ²⁴ Na ena maudoimiu kwa hedehedepeloweta na nige taukawamamohoi o laulau ta nige kabina taukata tamowaina hesau ye lulaowa luwamiuyena, meta kabo yomi hedehedede wa udiyedi ye nuwamasalaha yo kabo yona ba'aya ye kitalobai. ²⁵ Na yona lapulapui ne unai meta kabo yona nuwanuwatu wadawadamdi ne se masalaha na ye tulibono yo ye taba'ohu Yaubada unai na ye hedehemasalaha ye wane, “Mamohoi, Yaubada ede luwamiuyena!”

** **14:22:** Hekihekinoi ne meta Yaubada yona hekamkamna hekihekinoina. Kaniyona ede, ena Yaubada kalinana nige ta lapulobaidi, meta nige gonowana ta nuwabui, na ta lau hekamkamna hesabana.

Idohagi kabo Yaluwa yona kainauya ta hepaisowadi tapwalolo unai

²⁶ Kagu kahao, saha ya hedehedede wa nuwamasalahadi ede teina: Ena kwa laomagogoi, hesau kabo ye wana, hesau kabo ye lauhekata, hesau kabo nuwatu wadawadamdi Yaubada ye moseidi wa ye hededehemasalahadi, hesau kabo Yaluwa kalina ye mosei wa unai ye hedehedede, na hesau kabo yona hedehedede wa kaniyodi ye hededehemahemasalahadi. Na ginauli maudoidi kwa ginaulidi ne meta bena ekalesiya bodana kabahebayaodi. ²⁷ Ena tamowai hekadi se henuwa bena kalina Yaluwa ye moseidi ne udiyedi se hedehedede meta bena tamowai labui o haiyona, na bena kesegakesega yona huyahedehedede, na tamowai hesau meta bena hedehedede ne ye hededeyaiyaili. ²⁸ Ena dubu ne unai nige tauhededeyaiyaili, ye namwa mo taba Yaluwa kalina ye moseidi udiyedi tauhedehedede ne se mwanou na yodi kabatuliyena bena se hedehededenogowai se bom kalidiyena yo Yaubada unai.

²⁹ Tauhededepeloweta meta bena yodi labui o yodi haiyona se hededepeloweta, na hekadiyo ne meta bena yodi hedehedede ne se nuwatuhekanamwanamwaeidi.

³⁰ Na ena Yaubada nuwatu hesau ye hemasalahaha taututuli tamowaina** hesau unai meta bena tauhedehedede bagubagunana ne ye kaiyawasi. ³¹ Unai bena kesegakesega yona huya ye hededepeloweta, na unai gonowana kabo maudoimiu hededehebasiba yo hededehebayao kwa haidi. ³² Na tauhededepeloweta ne meta gonowana se bom yaluwadi ne se kabihekahini na yodi huyahedehedede huyana se nayai. ³³ Matawuwuna Yaubada meta iya nige hegwapilesi Yaubadana. Iya meta nuwadaumwali Yaubadana.

Ya henuwa taba Yaubada yona tamowai dubu maudoidi udiyedi yodi laulau ne kwa miyawatanidi ³⁴ na sinesineo meta bena se mwanou dubu koigogodi udiyedi na tabu se gegagega.** Na bena se hekasisi, doha laugagayo saha ye hededeyako wa. ³⁵ Ena nuwanuwatu hesau henamaina bena se henamai, meta bena se bom yodi numaena mwanediyao se henamaiyeidi, matawuwuna sinesineo dubu udiyedi se hedehedede meta kitakitana ne nige ye namwa.

³⁶ Hage idohagi, yomi nuwatu bena Yaubada kalinana ta kalimiuyena ye tubuma, o ye lage komiu kwa bom mo kalimiuyena? Nige! ³⁷ Ena taba tamowai hesau ye nuwatui meta bena iya peloweta o Yaluwa Tabuna yona kainauya tauhaidi hesau, meta bena ye hemamohoiyei ede saha ya kulikulidi ta meta Guiyau yona hedehedede bayabayaodi. ³⁸ Ena taba hedehedede ta ye tolehesuwaladi meta Yaubada kabo hinage iya ye tolehesuwala.

³⁹ Unai kagu kahao, bena kwa henuwakalili taba kwa hededepeloweta, na kalina Yaluwa ye lediwa ne udiyedi tauhedehedede ne tabu kwa hekahekaiyawasidi. ⁴⁰ Na ginauli maudoidi ne bena kwa ginaulidi kabikabi mamohoidi yo dudulaidiyao udiyedi.

15

Wasa namwanamwana nuwanuwatuna saesaena ede Keliso yona tolo'uyo

¹ Kagu kahao, wasa namwanamwana ya lauguguyaeiyako kalimiuyena wa, iya ede kwa haiyako yo unai kwa tolobayao wa, ya henuwa bena unai ya henuwaisinogomiu. ² Teina wasa namwanamwana ta iya taugilihaigomiu, ena wasa ya lauguguyaei wa unai kwa sunumatahitahi. Ena nige, meta kabo yomi kawamamohoi ne nige kaniyona.

** **14:30:** Taututuli tamowaina: Siya ede taulapulapui. Tauhededepeloweta wa se tolo na se hedede. ** **14:34:** Sinesineo ... bena se mwanou dubu koigogodi udiyedi: Hedehedede ta kaniyona nige ye masalahakalili. Tausonoga hekadi se wane sinesineo tabu se gegagega na unai se hededegudugudu, doha ka kulihemasalahaha wa. Hekadiyo se wane sinesineo tabu tauhededepeloweta se nuwatuhekasadi, na hekadiyo se wane tabu huya hesau se hedehedede dubu luwanaena. Yoma kulihemasalahana ne matawuwuna ede Paulo yona hedehededehasahasaidi lausoi soi 35 unai ye kuli, tabu koigogo unai se henahenamai, na bena yodi numa udiyedi mwanediyao se henamaiyeidi.

³ Matawuwuna wasa saha ya haidi wa meta ya hededehekawadiko kalimiuyena, na teina meta hedehede saesaedi: Keliso ye boita yoda yababa hesabadi, doha kulikuli tabudi udiyedi se kulinonohaiyako wa. ⁴ Ye boita na kabo se tole bwayabwayaena, na mayadai hehaiyonana unai Yaubada ye hetolo'uyoi, doha kulikuli tabudi udiyedi se kulinonohaiyako wa. ⁵ Ede ye taumasalaha Kipasi** unai na kabo ye taumasalaha'uyo saudoudoi-labui wa udiyedi. ⁶ Na huya hesau unai kabo hinage ye taumasalaha kada kahao badodi paihandele (500) yo hagahagana udiyedi. Teina tamowaidi ta meta se bado sola se miyamiya, na hekadi meta se boitako. ⁷ Na kabo ye taumasalaha Yamesi unai, na kabo ye taumasalaha'uyo apostolo maudoidi wa udiyedi. ⁸ Na gehegehena meta hinage ye taumasalaha yau kaliguyena, na yau meta doha wawaya sola nige yona huyalabasi mahanana dudulaina ye lagema na se labasi.** ⁹ Kaniyona ede apostolo maudoidi luwadiyena yau meta ya mulitakalili. Nige ya namwa taba kwa hedede ede yau apostolo hesau, matawuwuna yau meta Yaubada yona dubu ya kabihenahenayaikaliliyeidi. ¹⁰ Na Yaubada yona kabinamwa debanaena ede ya laoma teina kao ta unai, na yona kabinamwa kaliguyena meta nige ye gabaegaibuidi, na ya paisowabayaokalili na kabo kagu kahao hekadiyo ne. Na nige yau, na Yaubada yona kabinamwa kaliguyena wa debanaena. ¹¹ Unai siya yo yau yoma lauguguya ne meta nige yona udoi hesau, na wasa saha ka laulauguguyaei wa meta kwa kawamamo-hoiyeyako.

Tauboiboita yodi tolo'uyo

¹² Yoma lauguguya wa udiyedi ka wane, Keliso meta tauboiboita luwadiyena Yaubada ye hetolo'uyoiyako. Na idohagi to hekamiyao kwa hedede bena tauboiboita taba nige se tolo'uyo? ¹³ Na ena taba tauboiboita nige gonowana se tolo'uyo, hinage Keliso meta nige gonowana ye tolo'uyo. ¹⁴ Taba Keliso nige ye tolo'uyo meta kabo yoma lauguguya yo yomi sunuma ne nige kaniyodi. ¹⁵ Nige tenem mo ye bom na hinage se lobai ede bena kai Yaubada wasalupolupona tauhedehedehemasalahana, matawuwuna ede Yaubada ka hededehemasalaha meta iya Keliso tauboiboita udiyedi ye hetolo'uyoiyako. Ena taba tauboiboita nige gonowana se tolo'uyo meta kabo Keliso yona tolo'uyo wasana ne nige mamohoina. ¹⁶ Matawuwuna, ena taba tauboiboita nige gonowana se tolo'uyo meta Keliso hinage nige gonowana ye tolo'uyo. ¹⁷ Na taba ena Yaubada Keliso nige ye hetolo'uyoi meta yomi sunuma ne kabo nige kaniyona, yo komiu meta kabo sola yababa unai ma miyamiu, ¹⁸ yo hinage kabo siya kaiteyadi Keliso unai tausunuma na se boitako meta se taukwadalelekaliliko. ¹⁹ Taba yoda mauli tanoubu ta unai mo hesabana na yoda midi ta tole Keliso unai, kabo tamowai maudoidi luwadiyena meta kita ta katekamkamnakalili.

²⁰ Na mamohoikalili Keliso meta boita unai ye tolo'uyoko. Tauboiboita maudoidi luwadiyena ye hemala taubagunaidi, yo iya meta doha koya kaidi kaniyona bagubagunana. ²¹ Tamowai kesega unai na boita ye laoma kaiyaulina ta unai, unai tauboiboita yodi tolo'uyo meta hinage tamowai kesega unai ye laoma. ²² Adama debanawai ede maudoida ta boita, na Keliso debanawai ede maudoida ta mauli. ²³ Na iyamo tolo'uyo ta meta ma huyadiyao. Keliso meta Yaubada yona kelikeli kaniyona bagubagunana, na yona huya'uyoma unai kabo yona tamowai maudoidi hinage se tolo'uyo. ²⁴ Na huyagehena kabo ye laoma, na unai Keliso kabo tauloina maudoidi yo gigibwali yo dudulai maudoidi ye hetatagwaligwalidi na yona basileiya kabo ye mosehekawalaei

** 15:5: Kipasi meta Petelo hesana kalina Alamaiki unai, kaniyodi gonogonowadi, iya ede weku. ** 15:8: Yau meta doha wawaya sola nige yona huyalabasi mahanana dudulaina ye lagema na se labasi: Beyabeyana Paulo ekalesiya ye hewaiunudi. Na iyamo Yesu ye taumasalaha iya unai na ye labasi'uyoi na ye hetolo yona apostolo (Apostolo 9). Paulo kabina ye katakalili meta nige yona dudulai saha hesau na Yesu ye gilihai na apostolo paisowana ye mosei iya unai, gonogonowana doha wawaya lelehiyena se labasi meta nige gonowana ye mauli.

Tamana Yaubada unai. ²⁵ Matawuwuna ede Keliso bena ye loina ye lau ee kana siga kana waiunu maudoidi ye utukalakalateidi. ²⁶ Waiunu gehegehena kabo ye hekaiyawasikalikaliliyei ede boita. ²⁷ Na ginauli maudoidi meta Yaubada ye tolediko kaena guninaena. Na kulikuli tabuna ye wane,

“Ginauli maudoidi ede ye tolediko yona gigibwali guninaena.” *(Same 8:6).*

Hedehedede ta unai ye masalahakalili meta nige ye wane, Yaubada hinage, matawuwuna ede Yaubada meta ginauli maudoidi ye toledi Keliso yona gigibwali guninaena. ²⁸ Huyana Yaubada ginauli maudoidi ye laeidima Keliso yona loina guninaena, kabo natuna ne ye laoma na Yaubada yona loina guninaena ye miya. Na kabo Yaubada, iya ede gigibwali ye mosei Natuna unai na ye tole ginauli maudoidi tanuwagadi wa, iya ye bom ye saekalili ginauli maudoidi kewadiyena yo teha maudoina udiyedi.

²⁹ Ena taba tauboiboita nige gonowana se tolo'uyo, na hesabadi kwa babatiso ne meta kaniyona ede saha? Taba Yaubada nige gonowana tauboiboita ye hetolo'uyoidi, idohagi to tauboita ne hesabadi tamowai se hebabatisoidi? ³⁰ Yo hinage, matawuwuna saha to mayadai badobado udiyedi ma kagu kahao yoma mauli ka talamgabaedi? ³¹ Mayadai badobado meta boita ya hekahekalo. Yogu hedehedede ta meta mamohoina, doha hinage ya gwauyala debamiuyena, matawuwuna ede yoda Guiyau Yesu Keliso saha ye ginauli yomi mauli udiyedi wa. ³² Ena taba kaiyaulina ta nuwanuwatuna mo debanaena na Epeso unai tamowai hekadiyo kadi kao doha suisui kaikaikalasidi maiyaguwao ka haikawayagala meta kabo namwanamwa saha unai ya lobai? Ena taba tauboiboita nige gonowana se tolo'uyo, meta ye namwa mo tamowai hekadiyo maiyadao ta hedede ta wane, “Nige bayaona kabo ta boita. Unai kwa laoma, ta kaikai yo ta numanuma.” ³³ Tabu se lupohaigomiu matawuwuna ede yoda labini yababana kabo yoda nuwanuwatu namwanamwadi ye heyababadi. ³⁴ Saha ya hedede ta meta yomi kabamwadine: Hekamiu nige Yaubada kabina kwa kata. Taba yomi nuwanuwatu se dudulai'uyo, yo taba yababa ginaulidi kwa hekaiyawasidi!

Tautolo'uyo taudiyao

³⁵ Na tamowai hesau kabo ye henamai ye wane, “Idohagi kabo tauboiboita ne Yaubada ye hetolo'uyoidi? Taudi kadi kao kabo doha saha?” ³⁶ Yomi henamai ne taki ye yababa! Saha kwa kumai meta taba nige hauhauna ye kini kana sigana ena tumana ne ye pwasa. ³⁷ Huyana witi o kai hesau tumana likena kwa kumai meta taba nige kana kao gonogonowana doha kai ne kinikini lakilakina kana kao, na saha kwa kumai ede tuma gaibuna. ³⁸ Na tuma ne kana kao sahasahana unai kabo ye kinima ne meta Yaubada yona nuwatuhekasa unai na ye moseidi tuma ne kesegakesega udiyedi. ³⁹ Hinage tamowai yo suisui maudoidi kadi kao meta nige gonogonowadi. Tamowai kadi kao udoi, suisui kadi kao udoi, manuwa kadi kao udoi, yo yama hinage kadi kao udoi. ⁴⁰ Na nige tanoubu ta ginaulidiyao se bom mo na hinage yada ginaulidiyao. Tanoubu ginaulidiyao yodi didiga meta udoi, yo yada ginaulidiyao yodi didiga ne udoi. ⁴¹ Mahana yona didiga meta kao udoi, na waikena yona didiga ne kao udoi, yo kipwala yodi didiga kadi kao udoi. Na kesega kesega kadi kao meta udoi'udo.

⁴² Tauboiboita yodi tolo'uyo ne meta gonogonowana doha saha ya hededediko wa. Tamowai tauna se tole bwayabwayaena meta kabo ye pwasa, na Yaubada saha kabo ye hetolo'uyoi ne meta nige gonowana ye pwasa. ⁴³ Tauda ta se tole'useidi ne meta kadi kao nige se namwa, na Yaubada ye hetolo'uyoida ne meta ma didigada. Tauda ta se toledi

** **15:29:** Tauboita ... hesabadi tamowai se hebabatisoidi: Kolinito tamowaidiyao yodi nuwanuwatu meta se babatiso tauboiboita hesabadi na kabo unai tauboiboita ne mauli nige kana siga se lobai. Yodi kabikabi ta unai se hemasalaha'uyoidi ede se kawamamohoi meta tauboiboita kabo se tolo'uyo. Yodi laulau ta Paulo ye hedede ede yodi kabakita tolo'uyo yona teha unai, iyamo nige ye kawanamwanamwaei, yo nige teha hesau unai ye hedede'uyoi.

meta basabasadi, na se tolo'uyo meta ma gigibwalidi. ⁴⁴ Tauda tanoubu ta yona meta kabo se tole, na ye tolo'uyo meta yaluwa yona. Ena tanoubu ta unai na tauda, hinage yaluyaluwa unai meta tauda.

⁴⁵ Doha se kuliyako, tamowai bagubagunana, Adama, “ye hemala tamowai mau-maulina” (*Genese 2:7*). Na Adama gehegehena wa ede Keliso, iya meta yaluwa, na iya mauli tauhaihayamana ede. ⁴⁶ Unai ta kita ede yaluwa nige ye bagunama, na buluma ye bagunama. Yaluwa tamowaina wa meta ye mulitama. ⁴⁷ Tamowai bagubagunana wa Yaubada ye ginauli meta bwatano unai, na helabuina ne meta galewa ne unai ye laoma. ⁴⁸ Tanoubu ta tamowaina maudoida tauda kadi kao meta gonogonwana doha tamowai bagubagunana bwatano unai Yaubada ye ginauli wa. Na galewa tamowaidiyao taudi kadi kao ne hinage doha tamowai galewa ne unai ye dobima wa. ⁴⁹ Doha ede kita, kada kao ta meta doha tanoubu ta tamowaina bagubagunana wa, na huya hesau kabo hinage kada kao gonogonwana doha galewa tamowaina wa.

⁵⁰ Kehaguwao, yogu hedehedede ta kaniyona ede teina: Buluma unai tauda ta nige gonowana se mwalaesae Yaubada yona basileiya unai, yo ginauli kabo se taukwadalele ta meta nige gonowana yodi tupwa ginauli miyamiyahaidi ne udiyedi.

⁵¹ Kwa lapulaoma kaliguwai, kabo nuwanuwatu saesaena hesau ya hededehe-masalaha kalimiuyena: Taba nige maudoida ta boita, na kabo maudoida Yaubada ye buida ⁵² mahanakubwakubwa unai, doha mata laugoduna. Na huya gehegehena ne unai teina ta kabo ye tubu, iya ede bwagigi gehegehena kabo se yuhi. Kaniyona ede bwagigi kabo se yuhi, na daguguna ne unai tauboiboita kabo se tolo'uyo na taudi hauhaudi nige gonowana se pwasa meta kabo se haidi, yo kita taumiya miya ta Yaubada kabo ye buida na tauda ta kabo ye hehauhaudi. ⁵³ Matawuwuna ede tauda kabo ye pwasa ta bena ye bui kabo taba nige gonowana ye pwasa, na tauda kabo ye boita ta bena ye bui kabo taba nige gonowana ye boita. ⁵⁴ Na huyana teina ginauli maudoidi ta se tubu meta kabo kulikuli tabuna yona hedehedede hesau ye laoma ye masalaha, ye wane,

“Yaubada boita ye saedikwaiyako.”

(*Aisaiya 25:8*)

⁵⁵ Yo hinage ye wane,

“Boita, kamwasa saha unai bena ku saedikwaigai? Na haedi yom kabahekamkamnagai ede?”

(*Hoseya*

13:14)

⁵⁶ Boita yona gigibwali ede yoda laulau yababadi, siya doha gwaligwali ye hekamkamnada, na yababa ne yona bayao meta laugagayo unai ye laoma. ^{**} ⁵⁷ Na Yaubada ta lautokiyei! Iya ye hebayaoda na yoda Guiyau Yesu Keliso debanaena ede gonowana boita ta saedikwai.

⁵⁸ Unai kagu kahao, bena kwa tolobayao na tabu kwa sigisigi! Yaubada yona paisowa taba bena kwa ginauli ma nuwakohihaimiu. Na bena kabina kwa kata meta Guiyau hesanaena yomi paisowa maudoidi ne nige kwa gabagaibuidi.

16

Monitole Yaubada yona tamowai hesabadi

¹ Na yomi henamai bena idohagi kabo Yelusalema unai ekalesiya yodi moni yomi tanotanoina wa ^{**} meta ya hedede ede taba teha Galatiya unai kabikabi saha ya hekatadiko wa kwa hemuliwatani. ² Unai taba sabati maudoidi mayadaidi bagubagunadi udiyedi

^{**} **15:56:** Yababa ... yona bayao meta laugagayo unai ye laoma: Loma 7:8 unai Paulo ye hededehe-masalaha meta yababa kabakitalobaina ede laugagayo, na ba'aya laugagayo ye hai na ye lupoida na henuhenuwa yabayababadi udoi'udo'i ye hemalahadi kalidawai. ^{**} **16:1:** Moni yomi tanotanoina: Yodi monitano wa kaniyona ede Yelusalema unai hasahasali lakilakina se hekalo na moni ne unai bena ekalesiya se saguidi.

bena kesegakesega moni lakina saha ye lobai ne unai tupwana ye toletolehesuwala ye bom yona numaena. Na tabu moni tanoina hesabana kwa nayanayaigau. ³ Na yogu lagewa ne unai kabo tamowai kwa kaisunuwai'useidi wa kabahemamohoiyeidi pepwana ya kulidi na ya moseidi, na kabo yomi kainauya ne se baheidi na ta hetamalidi se lau Yelusalema. ⁴ Na ena taba kwa nuwatui meta ye namwa, kabo maidaguwao ka lau.

Paulo yo Timoti yodi kadau

⁵ Yogu nuwatu bena kabo ya lau Masedoniya na menai kabo ya laowa kalimiuyena. ⁶ Na nuwana kabo metai yau maidamiu ta miya huyana ye katuloha, o kabo huyagwagwama nawalaidi maudoidi ne metai ta miyai, na kabo kwa hetamaligau ya lau haedi yogu kabalau ne unai. ⁷ Na teina huya ta nige ya henuwa bena ya laowa kalimiuyena mahana kubwakubwa mo na ya laugabaeigomiu, na ya henuwa taba yau maidamiu ta miya huyana ye katuloha, ena taba Guiyau yona talam. ⁸ Na yau meta sola kabo Epeso unai ya miyamiya ye lau ee Pentekosi mayadaina, ⁹ matawuwuna ede paisowa ma gigibwalina kamwasana meta ye tasokema kaliguwai. Iyamo inai meta tauhewaiunugau se bado.

¹⁰ Ena Timoti ye laowa kalimiuwai meta bena kwa kitalau unai kabo taba nige saha hesau ye matausei. Matawuwuna iya hinage Guiyau yona taupaisowa, gonogonowana ede doha yau. ¹¹ Unai tamowai tabu iya se kitakitadobidobiyei. Na yona huyadalahai mayadaina ne unai taba kwa sagui na nuwadaumwaliyena ye uyoma kaliguwai. Matawuwuna ya nayanayakalili bena taba maiyanao taukadau ne ya kitadi.

¹² Na kada kaha Apolosa meta ya hededelau unai bena taba kami kahao taulaoma wa maidanao se laowa, iyamo nige ye henuwa. Na ena taba yona solasola ye lobai, kabo ye laowa.

Hededehebasiba

¹³ Bena kwa kitanamwanamwa. Sunuma ta unai kwa tolobayao. Bena nuwamiu se bayao! Bena kwa bayao! ¹⁴ Na ginauli maudoidi kwa ginaulidi ne meta bena gadosisiyena.

¹⁵ Kagu kahao, kabina kwa kata meta Setepanasi yo yona numa tamowaidiyao siya taunuwabui bagubagunadi teha Akaiya unai, na siya ma nuwakohihaidi na Yaubada yona tamowai udiyedi se haihaisagusagu. ¹⁶ Ya kaibwadaigomiu meta tamowai doha teina, yo tamowai hekadiyao, siya paisowa ta unai taupatulau yo taupaisowabayao, meta bena kwa kawakabiyeidi. ¹⁷ Huyana Setepanasi yo Potunatasi yo Akaikasi se laoma se kitagau na se labinigau meta ya gwauyalakalili. Kaniyona ede ginauli saha udiyedi nige gonowana kwa saguigau wa meta udiyedi se saguigau. ¹⁸ Siya meta nuwagu se hebayao doha komiu hinage se hebayaogomiu. Tamowai doha teina taba ta hekasisiyeidi.

Lautoki

¹⁹ Ekalesiya bodadiyao teha Eisiya unai yodi lautoki se hetamaliyawa kalimiuwai, yo hinage Akuila yo Pilisila yo yodi numaena ekalesiya bodana taulaolaomagogo meta se lautokiyeigomiu Guiyau hesanaena. ²⁰ Kada kahao maudoidi inai meta hinage yodi lautoki se hetamalidiwa kalimiuyena. Bena gadosisi mamohoina unai** kwa hailaulautokiyeigomiu.

²¹ *Yau Paulo lautoki ta meta ya bom nimaguyena ya kuliyawa.*

²² *Taba tamowai hesau Guiyau nige ye gadosisiyei meta hededeheyababa kabo iya kalinaena. Malanata! ***

²³ *Ya tapwalolo taba Guiyau Yesu yona kabinamwa ye miya kalimiuyena.*

** **16:20:** Gadosisi mamohoina unai: Paulo ye kuli, sumta tabuna unai, na sumta meta ekalesiya yodi gadosisi hekihekoina. ** **16:22:** Malanata meta kalina Alamaiki, na kaniyona ede, "Oo Guiyau, ku laumwamwayauma."

²⁴*Yogu gadosisi ye laowa Yesu Keliso tausunumaeina maudoimiu kalimiuyena. Mamohoi.*

2 Kolinito

Paulo yona leta helabuina ye lau ekalesiya Kolinito unai taumiya udiyedi

Buka ta hededehehemasalahana

Teina leta ta apostolo Paulo ye kuli, bolimaina 55 AD, huyana iya teha Masedoniya unai. Teina meta yona leta hehasina (4) ye lau Kolinito. Paulo yona leta helabuina wa (1 Kolinito) ye kuli na mulinaena ye lau ye kitadi, na huyana wa unai meta ma nuwapilipilidi (2 Kolinito 13:2). Ede nige ye miya huyalohaloha na ye uyo Epeso. Kabo yona leta hehaiyonana ye kuli kalidiyena (2 Kolinito 7:8 unai ye katai), iyamo leta wa nige Buka Tabuna unai se kuli. Leta wa unai Paulo ekalesiya Kolinito udiyedi wa ye hededehehesibadi bena yodi laulau yabayababadi se hekaiyawasidi, unai leta ne hesana se tole “Nuwadubu letana”. Taitasi leta wa ye bahelaei Kolinito. Se hasili ede nuwadi se buidi. Leta wa unai Paulo hinage ye hedede bena kabo ye kaitaumanaidi (2 Kolinito 1:15-16), iyamo leta wa ye hetamali na mulina ne unai yona nuwatu ye ginauli'uyoi na ye lau teha Masedoniya unai bena Taitasi ye hailobai (2 Kolinito 2:12-13). Na huyana Kolinito wasadi namwanamwana ye lapui Taitasi unai, kabo yodi leta hehasina ye kuli, iya ede teina leta ta, 2 Kolinito.

Teina leta ta unai Paulo yona kabahedehedede lakilakidi haiyona:

- (1) Paulo yona koitalaliu yo yona kadau kaniyodi ye hededehehemasalaha (2 Kolinito 1:12–2:13 yo 7:5-16).
- (2) Ye hekatadi taba monitole Yelusalema udiyedi ekalesiya dehadehadi hesabadi wa se laei se hegehe (2 Kolinito 8:1–9:15).
- (3) Ye hededehehemasalaha matawuwuna saha to iya apostolo mamohoina na taulauhekata hekadiyo Kolinito unai wa, siya taulauhekata lupolupodi (2 Kolinito 2:14–7:4 yo 10:1–13:14). Hedehedede ne luwanawai hinage ye hededehehemasalaha idohagi na yoda basabasa unai Yaubada yona paisowa ta ginauli na Yaubada ye paisowabayao (2 Kolinito 12:7-10).

Buka ta hedehededena lakilakidi

- Paulo yona lautoki Yaubada unai *1:1-11*
- Paulo ye hededehehemasalaha matawuwuna saha to yona nuwatu ye bui na leta hehaiyonana wa ye kuli *1:12–2:13*
- Paulo yona apostolo paisowana *2:14–7:1*
- Taitasi Kolinito unai wasadi namwanamwana ye mosei Paulo *7:2-16*
- Monitole ekalesiya Yelusalema hesabadi *8:1–9:15*
- Paulo ye hededehehemasalaha'uyoi meta iya apostolo mamohoina *10:1–13:10*
- Lautoki *13:11-14*

Lautoki

¹ Yau Paulo, maidagu kada kaha Timoti leta ta ka kuli. Yau meta Yaubada yona nuwatuyena ye yoganeigau na ya hemala Yesu Keliso yona apostolo. Na Timoti ye saguigau na leta ta ka kuli ye laowa Yaubada yona dubu Kolinito unai kalimiuyena yo teha Akaiya unai Yaubada yona tamowai maudoidi kalidiyena.

² Tamada Yaubada yo yoda Guiyau Yesu Keliso taba yodi kabinamwa yo yodi nuwadaumwali se toledi kalimiuyena.

Paulo ye lautoki Yaubada unai

³ Hedebasae ye sae Yaubada unai, iya yoda Guiyau Yesu Keliso Tamana, iya Tama katekatekamkamnana yo henuwabiga maudoidi Yaubadana. ⁴ Yoma pilipili maudoidi udiyedi iya tauhenuwabigagai na Yaubada unai henuwabiga ta ka hai ede gonowana

tamowai hekadi yodi pilipili udiyedi ka henuwabigadi. ⁵ Matawuwuna ede, Keliso hesabana kama hekamkamna se laki, unai Yaubada kalinawai kabahenuwabigagai ka haidi ne meta hinage se lakikalili. ⁶ Ena nuwakamkamna ka hekalodi meta komiu henuwabigagomiu yo yomi mauli gilihaidi hesabana. Na ena henuwabiga ka lobaidi, meta komiu henuwabigagomiu hesabana, ede kalimiuyena nuwatalu ye hemasalaha na hekamkamna kesekesegadi ka hekalodi wa udiyedi kwa tolotohitahi na kwa kamkamnasaguigai. ⁷ Na nuwanuwatumiu unai meta nuwamaiyao se bayao matawuwuna ede kabina ka kata meta hekamkamna ka hekalodi ta udiyedi komiu hinage kwa kamkamnasaguigai, unai hinage henuwabiga ka lobaidi wa meta komiu hinage kabo kwa lobaidi.

⁸ Kama kahao, ka henuwa bena taba ka hekatagomiu meta teha Eisiya unai kamkamna lakilakidi ka hekalodi, na udiyedi yoma bayao wa nige gonowadi taba bena ka hekalakasikinigai, unai yoma nuwanuwatu ede bena kabo ka mwaloi. ⁹ Mamohoikalili, nuwamai ta udiyedi meta kamnana ka lapui ede boita ka hana-hanawui. Na saha se tubu kalimaiyena ta udiyedi meta bena taba nige ka bom ka midiyeigai, na taba yoma midi mo ka tole Yaubada unai, iya ede tauboiboita tauhetolo'uyoidi. ¹⁰ Iya hinage yababa yo boita luwadiyedi ye gilihagai. Unai nuwamai ka toledi iya kalinawai na huya maudoina kabo ye giligilihagai. ¹¹ Na komiu yomi tapwalolo ne udiyedi kwa saguigai ede debamaiyena kabo tamowai se bado se lautoki Yaubada unai, matawuwuna ede boda yodi tapwalolo debadiyena na kabinamwa ye leyama kalimaiyena.

Paulo yona hekasa ye buidi wa ye hededehehemalahadi

¹² Unai yoma gwauyala lakilakina ede teina: Yoma nuwatulobai ye hededehe-masalaha meta yoma miyamiya kaiyaulina ta unai yo komiu yo kai yoda kawakeha ne udiyedi meta yoma miya ne se a'a yo ka miyaidi ma nuwamamohimai. Teina ta Yaubada unai se laoma. Ginauli ka ginaulidi ta meta nige kaiyaulina ta sibasibana unai na Yaubada iya yona kabinamwa unai ka ginauliwatanidi. ¹³ Teina unai ede yogu kulikuli wa udiyedi yogu nuwanuwatu maudoidi ya kulihemasalahadi na nige nuwatu hesau ya tolewadam. ¹⁴ Musamusana kabimai kwa katako, na yogu henuwa ede taba kabimai kwa katanamwanamwakalili na Guiyau Yesu yona mayadai unai kabo kwa hededetausaeigai, gonogonowana doha kai hinage kabo ka hededetausaeigomiu.

¹⁵ [Huyana yogu hineli ya ginauli bena ya laowa meta] nuwagu ye bayao bena maudoimiu kwa kitahenamwagau. Unai yogu hekasa ya ginauli bena ma labui ya kaitaumanaigomiu, unai kabo kaliguwai ma labui yogu hededehehaisagusagu kwa hai. ¹⁶ Yogu hekasa wa meta yogu lau Masedoniya ne unai kabo ya kaitaumanaigomiu na yogu uyoma ne unai kabo hinage ya kaitaumana'uyoigomiu, na metai kabo komiu kwa hetamaligau ya lau Yudeya. ¹⁷ Huyana yogu hekasa ta ya ginauli meta idohagi, ya ginauligaibui? O nuwana kaiyaulina ta kabikabina unai ede yogu hekasa ya ginaulibui'uyoidi, ede unai gonowana ya wane, "Aa, kabo ya ginauli!" Yo hinage ya wane, "Nige, taba nige!"

¹⁸ Iyamo mamohoikalili: Yaubada yona hedehedede meta nige ye buibuidi. Unai yoma hedehedede kalimiuyena wa nige bena kaniyona ede "Aa" yo "nige". ¹⁹ Yau, Siluwanusi** yo Timoti Yaubada Natuna Yesu Keliso wasana ka lauguguyaei kalim-iuyena, na iya meta nige bena "Aa!" yo "Nige!", na Yesu Keliso kalinawai huya maudoina ne meta "Aa!" mo ye bom. ²⁰ Kaniyona ede Yaubada hededehehenuma badodi hisa ye ginaulidiko wa, maudoidi ne Yesu Keliso kalinawai meta "Aa!" Na iya debanaena ta wane, "Mamohoi!", na hededetausae ye sae Yaubada unai. ²¹ Na komiu yo kai tauhetolohebayaoda Keliso unai ede Yaubada. Iya ye kaisunuwaida ²² na yona

** 1:19: Siluwanusi meta Sailasi hesana Loma kalinadi Latini unai.

tanuwaga dedelina ye tole kalidawai, yo Yaluwana ye tole nuwada ne udiyedi, iya ede kabahemamohoi meta ginauli hekadiyo ede sola kabo se laoma.

²³ Ya yogasae Yaubada unai bena yogu hedehedede ta ye hemamohoiyei na matawuwuna saha to nige ya uyowa Kolinito. Yogu miyasuwala wa kaniyona ede nige ya henuwa bena yomi laupwano debanaena na ya hekamkamnagomiu. ²⁴ Yau nige ya henuwa ya laowa na yomi laugagayo bayabayaodi ya ginaulidi. Na yogu henuwa ede taba komiu yo kai ta paisowagogo yomi gwauyala hesabana, matawuwuna ede sunuma debanaena na kwa tolobayao.

2

¹ Unai yogu nuwatuhekasa ya ginauli ede taba nige ya uyowa ya kaitaumanau'uyoigomiu kaniyona ede nige ya henuwa bena taba nuwamiyao ya hekamkamna'uyoidi. ² Matawuwuna taba nuwamiyao ya heyababadi meta kaiteya kabo ye hegwauyalagau, na tauhegwauyalagau wa meta siya ede nuwadiyao ya heyababadiko. ³ Debanaena ede lahinaidi leta ya kuli ye laowa kalimiuwai na ena ya laowa meta siya kaiteyadi bena kabo se hegwauyalagau ne taba nige se henuwayabagau. Na ya sunumaeigomiu bena yogu gwauyala ne unai ta gwauyalakesega. ⁴ Yogu huyakulikulilaowa unai meta ma nuwayababagu yo ma nuwakamkamnakaliligu yo hinage ma nuwadoudougu, nige unai bena kabo nuwamiyao ya heyababadi na bena unai kabo gadosisimiu kaliguwai ta yona laki ne kabina kwa kata.

Yababa wa tauginaulina bena se tolehedudulai

⁵ Ena tamowai hesau kabanuwayababa laulauna ye ginauli meta yau nige ya bom ye henuwayababagau na komiu ye henuwayababakaliliyeigomiu. Hedehedede ta nige unai ya tolokalili. Yogu hedehedede ede nige maudoimiu nuwamiyao se yababa na hisa mo se nuwayababa. ⁶ Na tamowai ne kabatolehedudulaina saha na luwamiuyena boda katubadona se talamyeyi na kwa ginauli unai wa, temeta ne ye launamwanamwaei. ⁷ Unai yona yababa kwa nuwatugabaeidi na nuwana kwa hededehtalu, to kabo taba nige nuwanuwatugaibu hekadiyo nuwana se heyababakaliliyei. ⁸ Unai ya kaibwadakaliliyeigomiu taba yomi gadosisi unai kwa hekitalobai meta iya kwa gadosisiyei.

⁹ Yogu kulikulilaowa kalimiuwai wa nuwatuna hesau ede ya henuwa bena ya kita meta gonowana kabalaukitagomiu ta udiyedi kabo kwa bayabayao yo ginauli maudoidi udiyedi kwa kawakabi o nige. ¹⁰ Ena tamowai hesau yona yababa kwa nuwatugabaeidi meta yau hinage ya nuwatugabaeidi, na saha ya nuwatugabaeidi, o ena ginauli saha hesau bena taba nuwatugabaeidi, meta komiu hesabamiu ya nuwatugabaeidiko Keliso matanaena. ¹¹ Teina unai kabo taba nige Satani yona solasola ta mosei na unai ye lupohaida matawuwuna ede yona nuwatu wadawadamdi meta kabidi ta katako.

Paulo iya talam hauhauna taupaisowaina

¹² Huyana ya lau Tolowasi bena Keliso wasana namwanamwana ya lauguguyaei meta ya lobai ede Guiyau yogu keda ye sokeyako hesabagu. ¹³ Iyamo menai meta nige nuwadaumwali hesau kaliguyena, matawuwuna ede kagu kaha Taitasi nige ya lobai. Ede [ekalesiya Tolowasi unai wa] ya laukaiyoniyeidi na ya lau Masedoniya.

¹⁴ Na Yaubada ka lautokiyei. Keliso meta kana waiunu ye saedikwaidiko, na huya maudoina iya yona bayaoyena Yaubada ye woyagai ka laulau. Kalimaiyena ede Keliso sonogana panena namwanamwana na ye kawalau teha maudoina kalidiwai. ¹⁵ Kaniyona ede Yaubada kalinawai meta kai ka hemala Keliso yona pane namwanamwana ye lau tamowai maudoidi luwadiyena, siya kaiteyadi kabihemauli se lobaiyako yo hinage kaiteyadi se laulau boita hesabana. ¹⁶ Ye lau hesau kalinawai na pane ye panelobai ede boita panena, na ye lau hesau kalinawai na pane ye panelobai ede mauili kabahaina panena namwanamwana. Na kaiteya kabo teina paisowa ta

gonogonowana? ¹⁷Na kai nige Yaubada wasana ta ka taunumayei yoma namwanamwa hesabadi, doha tamowai hekadiyao yodi laulau. Kai meta Yaubada yona hetamali tamowaidi, unai ede Keliso yona gigibwaliyena yo Yaubada matanaena ka hedehedede. Yoma hedehedede ne se dudulai.

3

¹Hage idohagi, bena ka hetubu'uyo na ka bom ka hededehesae'uyoigai kalimiuyena? Nige! O bena doha tamowai hekadiyao yodi laulau ne, ede taba kabahededehesaegai pepwana kulikulina ka baheidi na ka laowa kalimiuyena o ka kaibwadaigomiu na yomai kwa kulidi? Nigekalikalili! ²Na komiu meta kai nuwamai ta udiyedi doha yoma pepwa kulikulidi ede, na tamowai maudoidi se hasilidiko ede kabidi se kata. ³Na komiu meta yoma paisowa ta kaniyona ede, unai tamowai kwa hekitadi meta komiu pepwa kulikulina Keliso unai ye laoma, nige inikiyena ye kuli, na Yaubada maumaulina Yaluwana unai, nige kabakulikuli wekuna unai ye kuli na tamowai nuwadi udiyedi ye kulidi.

⁴Nuwatu maudoidi ta udiyedi meta ka nuwabayao Keliso debanaena Yaubada matanaena. ⁵Yoma nuwabayao ta kaniyona ede nige bena ka bom yoma sonoga, na Yaubada ye hesonogagai na ka paisowanamwanamwa. ⁶Iya ye hesibasibagai na ka hemala talam hauhauna yona taupaisowa. Nige talam kulikulina beyabeyana wa, na talam Yaluwa unai ye laoma, matawuwuna talam kulikulina beyabeyana meta tamowai ye heboitadi, na talam Yaluwa unai ye laoma meta mauli ye mosei tamowai udiyedi.

Talam hauhauna yona didiga saesaena

⁷Laugagayo hekasadi beyabeyadi weku tabatabadi udiyedi se kulidi ne, iya boita taulaeyamana, iyamo ye paisowa ne meta ma didigana. Unai Isalaela tamowaidiyao nige gonowadi taba bena Mose kana kao wa se kaikewai, matawuwuna ede ye didigakalili, iyamo didigana ne meta ye taukwadalele ye laulau. ⁸Na talam hauhauna paisowana Yaluwa unai ye laoma ne meta kabo ye didigakalili. ⁹Taba talam beyabeyana paisowana ne iya tamowai tauhededehegiludi na ye didiga, meta ta nuwatulobai ede kita yoda talam hauhauna paisowana ne iya tautolehedudulaida Yaubada unai, meta ye didigakalili. ¹⁰Matawuwuna ede huya bagubagunana unai ginauli saha ye didiga wa ta hekaigonogonowai didiga saesaekalilina ta unai meta huya ta unai iya nige didigana hesau. ¹¹Na ena taba talam beyabeyana paisowana ne ma didigana na iya ede ye taukwadalele ye laulau meta ta nuwatui ede ginauli saha miyamiyahaina ne meta kabo ye didigakalili.

¹²Talam hauhauna ne nuwabayao ye haiyama, unai talam hauhauna paisowana ka ginauli ma nuwabayaomai. ¹³Kita meta nige doha Mose iya kana kao ne kaleko unai ye koigudugudu na unai kabo Isalaela tamowaidiyao nige gonowadi kaodidigana ye taukwadalele ye laulau wa se kitakita. ¹⁴Iyamo tamowai wa nuwadiyao meta se masigili ye laoma teina mayadai ta unai. Na huyana talam beyabeyana wa se hasiligabaei meta sola koigudugudu kalekona wa iya ede ma miyana, na Keliso mo gonowana kabo ye haigabaei. ¹⁵Hinage teina mayadai ta unai, ena Mose yona kulikuli se hasili, meta koigudugudu kalekona wa nuwadiyao ne ye koiguduguidi. ¹⁶Na ena kaiteya ye kitalau Guiyau unai, meta koigudugudu kalekona wa kabo ye haigabaei. ¹⁷Guiyau meta Yaluwa. Na haedi Guiyau Yaluwana ye miya meta yailihai ede menai. ¹⁸Na kita kaiteyadi kada kao ta nige kadi koigudugudu meta kita maudoida Guiyau yona didiga tauhemasalahana. Kita meta ye buida ta lau kana kao ta hai yona didiga saesaena nige kana siga ne unai, yona kabalaoma ede Guiyau, iya meta Yaluwa.

4

Paulo ye tolobayao yona apostolo paisowana unai

¹ Yaubada yona katekamkamna unai ede teina paisowa ta ka hai na nige ka nuwabasabasa. ² Ede miyamiya wadawadamdi yo nuwamwadimwadinedi ka hekaiyawasidi, nige hededelupolupo ka hepaisowadi o Yaubada yona hedehehede ka tolebuidi. Na Yaubada matanaena kai hedehehede mamohoina ta ka tolehemasalaha na unai tamowai maudoidi se kitagai meta kai tauhedehededemamohoi. ³ Na ena taba wasa namwanamwana ka lauguguyaei ta nige ye masalaha meta tamowai se laulau boita helabuina hesabana ne, siya kalidiyena nige ye masalaha. ⁴ Teina kaiyaulina ta yaubadana meta nige tausunuma tamowaidi matadiyao ye hegibugibudi, unai nige gonowana Keliso didigana wasana namwanamwana dawayana se kita, meta iya Yaubada kana kao mamohoina ede. ⁵ Na kai meta nige ka bom wasamai ka lauguguyaei, na Yesu Keliso wasana, iya ede Guiyau. Na kai meta Yesu debanaena ka hemala yomi heyayai tauhaidi. ⁶ Yaubada tanoubu ta ye hetubu na ye hedede ye wane, “Dawaya bena masigili unai ye sinapesama”, na yona dawaya ye hesina nuwada ta udiyedi. Unai nuwasibasiba dawayana ye haiyama na Yaubada didigana Keliso kana kao unai ne ta nuwatulobai.

⁷ Na teina wasawasa ginaulidiyao kai kalimaiyena ta meta doha gulewa bwatano unai se ginaulidi ne kalodiyena. Ye hemasalaha ede teina gigibwali saesaekalilina ta meta Yaubada unai ye laoma na nige kai kalimaiyena ye laoma. ⁸ Pilipili teha maudoina unai se laoma, iyamo nige se koikesikesigai. Ka nuwapwanopwano, iyamo nige ka nuwabasabasa. ⁹ Se kabihenahenayaigai, iyamo Guiyau nige ye laugabaeigai. Se koiheguligai, iyamo nige se hetatagwaligwaligai. ¹⁰ Huya maudoina Yesu yona boita taumai ta udiyedi ka bahei na ka sae yo ka dobi, na unai kabo hinage Keliso yona mauli bena taumai ta udiyedi ka miyahemasalaha. ¹¹ Matawuwuna kai taumaumauli na Yesu hesabana huya maudoina kabo se moselaegai boita unai, na unai kabo yona mauli ne ye masalaha taumai kabo se pwasa ta udiyedi. ¹² Unai, boita ede ye paipaisowa kalimaiyena, na kalimiuyena meta mauli ye paipaisowa.

¹³ Doha kulikuli tabuna unai se kuliyako wa,

“Ya kawamamohoi ede ya hedehehede.” (Same 116:10)

Tenem sunuma kesegana ne unai ede kai hinage ka kawamamohoi na unai ka hedehehede. ¹⁴ Matawuwuna ede kabina ka kata meta Guiyau Yesu boita unai na tauhetolo'uyoina wa, iya hinage kabo ye hetolo'uyoigai na Yesu maidamai yo komiu kabo ye hemasalahalaeida iya kalinawai. ¹⁵ Ginauli maudoidi ta meta komiu yomi namwanamwa hesabadi, na unai kabo Yaubada yona kabinamwa ye lau bodalakilaki ye haidi na hekana ye hai'uyoidi. Unai kabo lautokilakilaki yo hedebasae ye sae Yaubada unai, na Yaubada didigana ye laki ye lau.

¹⁶ Tenem debanaena ede nige gonowana ka nuwabasabasa. Kwa kitagai meta taumai ta yodi namwanamwa yo yodi bayao se gehe se laulau, iyamo yaluwamai ta meta hehauhau se lobalobaidi mayadai kesega kesega udiyedi. ¹⁷ Matawuwuna huyakubwakubwa udiyedi pilipili gagilidi ta lobalobaidi ne udiyedi meta kabo yoda didiga miyamiyahaina ta lobai na iya meta ye saekalili. ¹⁸ Unai tabu ta kitakitalau ginauli saha ta kitakitadi ne udiyedi na bena ta kitalau ginauli saha nige ta kitakitadi ne udiyedi. Matawuwuna ede ginauli saha ta kitakitadi ta meta huyakubwakubwa mo ginaulidiyao, na ginauli saha nige ta kitakitadi ne meta siya ginauli miyamiyahaidi.

5

Galewa ne unai Yaubada kabo tauda hauhaudi ye haidima

¹ Kabina ta kata ede ena teina kaiyaulina numana ta ye tatagwaligwali meta yoda kabamiya numana hauhauna miyamiyatahitahina ede galewa ne unai. Numa ta meta

nige tamowai nimadiyena se ginauli, na Yaubada kabo ye haiyama. ² Na kamkamna udiyedi sola ta lepalepa, ede yoda nuwanuwatulakilaki meta taba galewa ne unai yoda kabamiya wa se heluwuida doha kaleko. ³ Kaniyona ede, ena ta luwui meta taba nige se lobaida ma taugaibuda. ⁴ Huyana kita sola teina kabamiya numana ta unai, ede ta lepalepa yo ta kamkamna. Kaniyona ede nige ta henuwa bena ma taugaibuda, na taba galewa kabamiyana ne unai se heluwuida. Teina unai mauli nige kana siga kabo tauda ye laulau boita hesabana ta ye suma. ⁵ Na Yaubada iya meta taukabinonohaida mauli miyamiyahaina hesabana na Yaluwana ye tole kalidawai na ye hemamohoiyei ede ginauli hekadiyo meta sola kabo se laoma.

⁶ Tenem debanaena huya maudoina kita nuwada se bayao yo kabina ta kata ede teina tauda ta unai yoda huyamiya mayadaidi ta udiyedi meta kita Guiyau kalinawai ta kedaloa. ⁷ Matawuwuna kita meta sunumaena ta miyamiya na nige ta kitakitalau ginauli saha ta kitakitadi ta udiyedi. ⁸ Unai nuwada se bayao na yoda henuwalakilaki ede taba tauda ta ta laugabaeidi na ta lau yoda kabamiya mamohoina unai Guiyau kalinawai. ⁹ Unai teina tauda ta sola udiyedi ta miyamiya o ta laugabaeidiko, iyamo yoda nuwanuwatu lakilakina ede bena iya nuwana ta henamwa. ¹⁰ Matawuwuna ede maudoida kabo ta masalahalau Keliso yona kabahekasa kabatulina unai, na kesegake-sega tauna ta unai ye miyamiya wa na saha ye ginaginawidi ne, namwanamwadi o yababadi, kabo maisadi ye haidi.

Tolehedululai yo kao hauhauna

¹¹ Na kai meta Guiyau matausina kabina ka kata, unai ka kaipate na tamowai ka nuwakoidi. Kai kama kao Yaubada unai meta se masalahakalili, na yogu henuwalakilaki taba komiu yomi nuwanuwatu ne udiyedi hinage se masalaha. ¹² Kai meta nige bena ka kaipate taba kalimiuyena ka hededetausae'uyoigai, na ka henuwa bena nuwanuwatu hesau ka leyawa na debamaiyena komiu kwa hededesaesae. Tamowai hekadi ginauli saha masamasalahadi se kitadi meta yodi kabanuwasaesae, na tamowai nuwana kana kao meta nige kabina se kata. Na ka henuwagomiu bena gonowana tamowai ne yodi hedehedede buina kwa moseidi. ¹³ Ena yoma miya yo yoma hedehedede kadi kao doha ka yauyaule, temeta ne meta Yaubada hededetausaeina hesabana. Na ena kai ka hedehedede ma nuwadudulaimai, meta temeta ne komiu yomi namwanamwa hesabana. ¹⁴ Matawuwuna Keliso yona gadosisi iya ye lauheliligai, kaniyona ede ka nuwatulobai meta tamowai kesega ye boita tamowai maudoidi hesabadi, ede tamowai maudoidi hinage se boita. ¹⁵ Na tamowai maudoidi hesabadi ye boita, na yona nuwatu meta taumaumauli maudoidi ne taba tabu yodi mauli ne se miyaeidi se bom mo hesabadi, na bena se miyaeidi Keliso hesabana, iya hesabadi ye boita na Yaubada ye hetolo'uyoi.

¹⁶ Unai teina huya ta meta nige gonowana tanoubu ta nuwanuwatuna unai tamowai hesau ta kitahekasa. Doha beyabeyana Keliso yoda kitahekasana meta tanoubu ta nuwanuwatuna unai, iyamo teina huya ta tenem nuwanuwatu ne ta hekaiyawasiyako. ¹⁷ Tenem debanaena, ena tamowai hesau iya Keliso yona, meta iya ye hemala tamowai hauhauna. Mauli beyabeyana wa ye laoko na mauli hauhauna ye haiyako. ¹⁸ Teina mauli hehauhauna maudoina ta meta Yaubada unai ye laoma, iya Keliso debanaena ye tolekesegaida iya kalinawai, na tamowai toletolekesegaidi Yaubada kalinawai paisowana ye haiyama kalidaena. ¹⁹ Na Yaubada iya Keliso unai na kaiyaulina ta tamowaidiyao ye toletolekesegaidi iya kalinawai na yodi yababa nige udiyedi ye nuwanuwatulau na ye haidi se patulau iya kalinawai, na tamowai toletolekesegaidi Yaubada unai hedehededenena ye haiyama kalimaiyena bena tamowai ka hekatadi. ²⁰ Unai kai meta Keliso wasana tauwasaduwaiyeina, Yaubada ye hepaisowagai yona tauhedehedede. Na Keliso hesanaena ka kaikaibwada bena kwa patulau Yaubada

kalinawai. ²¹ Keliso iya nige yona yababa, na Yaubada ye hai ede ye tolelai yababa unai kita hesabada, na iya debanaena kita ta laoma ta dudulai Yaubada matanaena.

6

¹ Kai meta Yaubada yona hali taupaisowa, ka kaibwadaigomiu taba tabu Yaubada yona kabinamwa ne kwa haigaibui na nige kaniyona. ² Matawuwuna iya ye wane, “Yogu kabinamwa mahanana dudulaina unai ede ya lapulaowa, na gilihai mayadaina unai ede ya saguigo.” (Aisaiya 49:8)
Kwa kita ne, teina ta meta Yaubada yona kabinamwa mahanana ede, teina ta meta Yaubada yona gilihai mayadaina ede.

Paulo ye hemasalaha'uyoi meta iya apostolo mamohoina

³ Kai meta nige tamowai hesau yona kabakalabesibesi ka tole, kaniyona ede nige ka henuwa bena yoma paisowa ta se kawayababaei. ⁴ Na kai Yaubada yona heyayai tauhaidi, unai ka hemasalahagai yoma laulau maudoidi udiyedi meta yoma paisowa se dudulai: Yoma tolobayao unai, pilipili yo polohe yo hekamkamna udiyedi, ⁵ se bibigai, se tolegai numatutugudu unai, taukoyalalayalakalili bodana luwadiyena, paisowa se bayao, nige keno namwanamwadi, yo hasali luwadiyena, ⁶ nuwamaiyao se a'a, yoma sonoga, yoma nayatautaubiga, yoma kabinamwa, Yaluwa Tabuna kalimaiyena, yo yoma gadosisi mamohoina unai, ⁷ hededehemasalaha mamohoidiyao udiyedi, Yaubada yona gigibwali unai, yoma iyala gogodiyao nimakahatu yo seuseulimai ne udiyedi, ^{**} siya ede yoma miyamiya dudulaidi, ⁸ tamowai se hekasisiyeigai o se hedededobidobiyeigai, wasamai se heyababadi o se henamwadi. Hedehedede mamohoidi ka hedehedededi, iyamo se hedede ede kai taukailupolupo. ⁹ Kabimai se kata, iyamo se hedede'uha'uhalaeigai. Huya ye bado boita ka hanahanawui, iyamo sola ma miyamai. Se bibigai, iyamo nige se koihemwaloigai. ¹⁰ Se hedede bena nuwamaiyao se kamkamna, iyamo huya maudoina ka gwaugwauyala. Se hedede bena ka deha, iyamo Yaubada sunumana unai tamowai ka hegogodi. Nige saha hesau kai yomai, iyamo sunuma ginaulidiyao maudoidi meta ka tanuwagaidi. [*Laulau maudoidi ka hekalodi wa udiyedi ka hemasalahagai meta yoma paisowa se dudulai.*]^{**}

¹¹ Kolinito tamowaidiyao, ka hedehededenamwanamwako kalimiuyena yo nuwamaiyao ka sokediko kalimiuyena. ¹² Kai yoma gadosisi komiu yomiu meta nige ka kabihekahinidi, na iyamo komiu yomi gadosisi yomai meta kwa kabihekahinidi. ¹³ Unai saha ka ginaulidiko kalimiuwai hinage bena kwa ginaulidi kalimaiwai. Ya hededelaowa ta meta doha ya hedehededelau natuguwao mamohoidiyao udiyedi ya wane, komiu bena hinage nuwamiyao kwa sokedi kalimaiyena.

Yaubada maumaulina yona Numa Tabuna

¹⁴ Tabu kwa haihaisagusagu nige taukawamamohoi tamowaidiyao saha se ginaginaulidi ne udiyedi. Idohagi, gonowana miyamiya namwanamwadi yo miyamiya yabayababadi se laomakesega? Gonowana dawaya yo masigili se miyakesega? ¹⁵ Gonowana Keliso yo Beliyela talam kesega se ginauli? Idohagi, gonowana taukawamamohoi yo nige taukawamamohoi yodi nuwanuwatu kesega? ¹⁶ Gonowana Yaubada yona Numa Tabuna yo koitau yodi talam kesega se ginauli na se laomakesega? Nigele! Na kita meta Yaubada maumaulina yona Numa Tabuna. Iya ede doha Yaubada ye hedede ye wane,
“Yau kabo maidaguwao ka miya

^{**} **6:7:** Iyala gogodiyao nimakahatu yo seuseulimai ne udiyedi: Heyaheyasoni ne Loma yodi tau'iyala yodi kaba'iyala gogodiyao, nimakahatudi unai wamali o kelepa, na nimaseuseulidi ne unai yesi. ^{**} **6:10:** Laulau maudoidi ka hekalodi wa udiyedi ka hemasalahagai meta yoma paisowa se dudulai: Teina hedehedede ta meta nige lausoisoi 10 unai Paulo ye kuli, na teina meta lausoisoi 4 tupwana na ka kuli'uyoi.

yo luwadiyena ya sae yo ya dobi.
Yau kabo siya yodi Yaubada

na siya kabo yau yogu tamowai.”

(Lewitikasi 26:12)**

¹⁷Tenem debanaena Guiyau ye wane,

“Tamowai ne kwa pesagabaedi

na kwa tolehesuwalagomiu.

Tabu kwa kabilau ginauli bikibikidiyao udiyedi,

kabo gonowana ya haigomiu.”

(Aisaiya 52:11)**

¹⁸Yo ye wane,

“Yau kabo ya hemala tamamiu yo komiu kabo kwa hemala natuguwao,’

teina ta Guiyau Gigibwali Saesaekalilina yona hedehedede.” (2 Samuwela 7:14, 7:8).

7

¹ Na kehaguwao, teina hededehegunuma ta ta haidiko, unai ginauli saha siya tauda yo yaluwada se hebikidi meta bena ta haigabaedi na yoda miyamiya bena se dudulai na ye laki ye lau, matawuwuna ede Yaubada ta hekasisiyei.

Ekalesiya se nuwabui na unai Paulo se hegwayyala

² Ya henuwa bena nuwamiyao ne kwa sokedi hesabamai. Kai meta nige laupwano hesau ka ginauli tamowai hesau unai, nige tamowai hesau ka woyalaei yababa unai, nige tamowai hesau ka lupohai ka bom yoma namwanamwa hesabana. ³ Saha ya hedede di ta udiyedi nige bena ya hegilugomiu, na lahinaidi ya hedede yako meta komiu ede kai nuwamai ta udiyedi. Unai, ena ka maumauli o ka boita meta komiu ede maidamaiyao. ⁴ Yogu nuwabayao meta ye lakikalili kalimiuwai na ya hedede-hesaekaliliyeigomiu. Kwa hebayaokaliliyeigau na yoma pilipili maudoidiyao udiyedi yogu gwayyala ta nige kadi sigasiga.

⁵ Matawuwuna huyana ka lage Masedoniya unai meta nige yoma kaiyawasi hesau. Teha maudoidi udiyedi se hepilipiligi. Dagela ne udiyedi meta hekasiwolewole, na nuwamaiyao udiyedi meta matamatausi. ⁶ Na Yaubada meta taunuwanuwayababa nuwadiyao tauhedede hetaludi. Huyana Taitasi ye laoma kalimiyena meta unai nuwamai ye hedede hetaludi. ⁷ Na nige bena yona laoma ne ye bom, na hinage ye hekatagai idohagi iya nuwana kwa hedede hetalu, na unai nuwamaiyao ye hebayaodi. Yo hinage yomai ye hedehedede meta yomi henuwalakilaki ede taba kwa kitagau, yomi katekamkamna yau yogu, yo hesabagu kwa nuwanuwatukalili. Hedehedede ta ya lapuidi meta ya gwayyalakalili.

⁸ Nuwana yogu leta wa unai ya henuwayababagomiu, iyamo ye namwa mo ya kuliyawa. Leta bagubagunana wa ya kuliyawa na mulinaena meta ya nuwakuhali, kaniyona ede yogu kulikuli wa kabo ye henuwayababagomiu. Na mamohoi ye henuwayababagomiu, iyamo kwa nuwayababa huyakubwakubwa mo. ⁹ Na teina mahana ta unai meta ya gwayyala, nige bena ya henuwayababagomiu, na kaniyona ede yomi nuwayababa ne ye woyaigomiu kwa lau kwa nuwabui. Na nuwayababa ye henuwabuigomiu wa meta Yaubada yona henuwa, unai yoma leta wa nige gonowana ye heyababagomiu. ¹⁰ Yaubada debanaena na nuwayababa ta hekalodi meta unai nuwabui ye haiyama na ye woyaida ta lau kabihemauli ta lobai na unai nige kabanuwakuhali hesau. Na kaiyaulina ta debanaena nuwayababa ta hekalodi ne debadiyena kabo boita ta lobai.

¹¹ Yaubada yona nuwatuyena kwa nuwayababa, na unai namwa saha kwa lobaidi ne sola kwa kitadi. Ye hekatagomiu na ma nuwamamohoiyomi yomi miyamiya kwa

** 6:16: Nuwanuwatu ta meta hinage Yelemaiya 32:38 yo Hesekiyela 37:27 udiyedi se kuli.
Nuwanuwatu ta hinage Hesekiyela 20:34,41 unai ye kuli.

** 6:17:

hedudulai'uyoidi. Gilu ne udiyedi kwa hekaihaleigomiu, yo Yaubada matausina ye laki kalimiuyena. Hinage kwa nonohakalili bena yababa tauginaulina wa kwa tolehedudulai. Yo hinage ginauli maudoidi ne udiyedi ede komiu kwa hemamohoiyeigomiu meta yababa tauginaulina wa yona laulau wa unai nige kami giluhesau.

¹² Bwagana ya kulikulilaowako kalimiuwai, iyamo yogu kulikulilaowa ne nige bena kaiteya iya yababa ye ginauli wa** hesabana yo hinage nige kaiteya iya yababa unai ye hekankamna ne hesabana, na ya kulikulilaowa ne kaniyona ede taba Yaubada matanaena na yomi mose'uyoigomiu kalimayena ne kabo kwa bom kwa kitadi.

¹³ Ginauli maudoidi ta debadiyena ede ka nuwabayao. Yo hinage huyana Taitasi ka kita meta ye gwauyala ede kai nuwamayiyo se namwakalili matawuwuna ede komiu maudoimiu iya nuwana kwa henamwa. ¹⁴ Huyana sola nige ye dalahai ye laowa meta iya kalinawai komiu ya hededehesaekaliliyeigomiu, na komiu meta nige kwa hemwadinegau [*kaniyona ede yogu hedehedede wa kwa hemamohoiyei.*] Ginauli maudoidi ka hededediko kalimiuyena wa meta mamohoi, na gonogonowana doha hinage yoma hededesaesae hesabamiu Taitasi unai wa ede se mamohoi. ¹⁵ Na maudoimiu yomi kawakabi yo yomi hailobaina ma matausimiu yo ma tabutabubumiu wa huyana ye nuwatuidi meta yona gadosisi komiu hesabamiu wa kabo ye lakikalili kalinawai.

¹⁶ Nuwagu ye namwakalili ede gonowana yogu sunuma maudoina ya tole kalimiuyena.

8

Yelusalema unai ekalesiya kabasaguidi

¹ Kagu kahao, ka henuwa bena Yaubada yona kabinamwa ye moseiyako teha Masedoniya dubudiyao udiyedi wa taba kabina kwa kata. ² Yodi pilipili lakilakidiyao udiyedi meta se gwauyalalalili na yodi deha udiyedi ye hegwauyaladi na se kaikainauyakalili. ³ Na ya hededehemasalaha ede se kainauya meta ginauli saha gonowana se kainauyaeidi wa se moseidi yo hinage ginauli saha se kainauyaeidi wa kewadi ne udiyedi se koihepwata'uyoidi. Ginauli maudoidi ta se ginaulidi meta siya se bom yodi nuwatalamyena se ginaulidi, ⁴ na se kaibwadakaliliyeigai bena taba talam ka moseidi na se haisagusagu Guiyau yona tamowai [*Yelusalema udiyedi*] wa kalidiyedi. ⁵ Yo saha se ginauli wa meta ye saekalili na kabo kai ginauli saha ka nuwatuidi wa, na bagubaguna siya se bom se mose'uyoidi Guiyau unai na kabo Yaubada yona nuwatuyena se mose'uyoidi kalimayena. ⁶ Unai ka hededekeibwadakalili Taitasi unai, iya yomi haisagusagu paisowana ta tauhetubuna, unai taba ye laowa kalimiuyena na yomi haihaisagusagu paisowana wa kwa hegehegabaei. ⁷ Na komiu meta kwa namwakalili ginauli maudoidi udiyedi, yomi sunuma unai, yomi hedehedede unai, yomi kata unai, yomi nuwayali unai yo hinage gadosisi ka hekatagomiu ne unai. Hinage bena kwa namwa haisagusagu paisowana ne unai.

⁸ Nige bena ya lauheliligomiu, na ya henuwa taba yomi gadosisi yona mamohoi ya kita, unai tamowai hekadi yodi nuwayali haisagusagu unai ta udiyedi ya hekaigonogonowaeigomiu. ⁹ Matawuwuna yoda Guiyau Yesu Keliso yona kabinamwa wa meta kabina kwa kata. Iya ye gogokalili, iyamo komiu hesabamiu ede ye hemala deha tamowaina, na yona nuwatu bena iya yona deha ne debanaena komiu kabo [*galewa gogodiyao udiyedi*] kwa gogo.

¹⁰ Na teina hekasa ta unai yogu hededehebasiba kalimiuyena ede teina: Bolimai ta laugabaei wa unai komiu meta tamowai bagubagunadi kwa haisagusagu. Na nige bena tenem mo unai, na komiu meta hinage hekasa ta unai taunuwayalibaguna. ¹¹ Unai yomi lobai saha kalimiuyena ne udiyedi yomi paisowa ne taba kwa hegehe, na teina kwa ginauli ne unai kabo yomi talam bagubagunana wa yo paisowa yomi hegehegabaeina

** **7:12:** Kaiteya iya yababa ye ginauli wa: tamowaina ne wasana ku hasili 1 Kolinito 5:1 unai.

ne maidana gonogonowadi. ¹² Ena taba yomi nuwatalam mamohoina unai na yomi lobai saha kalimiuyena ne udiyedi kwa kainauya meta Yaubada ye kitahenamwadi, na nige ye nuwatukalili ginauli saha nige gonowana kwa lobaidi ne udiyedi.

¹³ Yoma nuwanuwatu ta meta nige bena tamowai hekadiyo mo sagu se lobai na komiu ka hepolohegomiu, nige! Na bena komiu yo siya ne gonogonowamiu. ¹⁴ Ede mahana ta unai ginauli se bado kalimiuyena, kabo unai gonowana kwa saguidi, na huya hesau hinage kabo kalidiyena ginauli hekadi se bado na unai se saguigomiu. Nuwanuwatuna ede taba komiu yo siya kabo gonogonowamiu. ¹⁵ Doha kulikuli tabuna unai ye wane, “Ena hesau kana mana ye tanohebado, meta nige gonowana kalinawai yona lobai ne se badokalili, yo ena hesau kana mana hisahisadi mo ye tanoidi meta yona lobai kalinawai ne nige se gagilikalili.” *(Esodo 16:18)*

Haisagusagu paisowana bena se ginaulinamwanamwaei

¹⁶ Yaubada ya lautokiyeyi, matawuwuna komiu nuwanuwatumi kalguyena na nuwanuwatuna kesegana ta meta Yaubada ye tole Taitasi nuwana ne unai. ¹⁷ Debanaena ede Taitasi meta yoma hedehedede ta ye kawanamwanamwaei na yona henuwalakilakiyena ye laowa kalimiuyena ye bom yona nuwayaliyena. ¹⁸ Ka hetamaliyawa ta meta kana kaha hesau maidana, iya meta se hededetausaei dubu maudoidi ta udiyedi kaniyona ede yona paisowa wasa namwanamwana ta debanaena. ¹⁹ Hinage tamowai ta meta dubu siya se kaisunuwai ede ye saguigai na maidamai kainauya ka bahei ka lau. Teina paisowa ta bena ka ginaulinamwanamwaei na unai kabo hededetausae ye lau Guiyau unai, yo hinage yoma nuwayali mamohoina haisagusagu unai wa ka hemasalaha. ²⁰ Ka henuwa bena kainauya lakilakina kitahetetena paisowana ne hededeheyaheyababana ka kaihaleidi, ²¹ matawuwuna ka kaipatebayao bena yoma paisowa ka ginaulihedudulaidi, nige bena Guiyau ye bom mo ye kitagai, na tamowai hinage se kitagai.

²² Na taudi labui ka hetamalidiwa ta meta hinage kabo kama kaha hesau maidadi, iya meta miya maudoina udiyedi ye hemamohoiyeyi kalimaiyena meta sunuma ta unai ye kawamamohoikalili yo hinage ye nuwatalamkalili. Kaniyona ede komiu debamiuyena na yona nuwabayao ne ye laki. ²³ Taitasi meta iya taupaisowasaguigau yo yogu halitaupaisowa komiu luwamiuyena, na kada kahao labui ta siya meta dubu hesadiyena taupaisowa yo Keliso hedebasaena se helaki'uyoi. ²⁴ Tenem debanaena teina tamowai ta kalidiyena bena yomi gadosisi ne kana kao kwa hemamohoiyeyi yo yoma hededehesaegomiu ne kaniyona kwa hemasalaha kalidiyena, unai kabo dubu maudoidi se kita.

9

¹ Yomi haisagusagu ye lau Yaubada yona tamowai Yelusalema udiyedi wa hedehedena taba tabu yomi ya kulikuli'uyo. ² Matawuwuna ede kabimiu ya kata meta kwa nuwayalikalili bena kwa haisagusagu, na saha kwa ginauli wa unai meta ya hededetausaeigomiu Masedoniya kalidiyena, ede bolimai ye laoko wa unai meta komiu Akaiya tamowaidiyao kwa nonohako bena kwa haisagusagu na yomi kita-henuwana wa unai ede tamowai hekadi ye henuwahesaeidi, ede se henuwa bena se haisagusagu. ³ Na kada kahao ya hetamalidi kabo se laowa ta meta bena unai kabo yoma hededetausaeigomiu nuwatu ta debanaena wa tabu se lobaidi meta nige kaniyona, na bena unai kwa nonoha, doha komiu hedehededemiya ya hededediko wa. ⁴ Matawuwuna ena Masedoniya tamowaidiyao maidaguwao ka laowa na se lobai ede nige kwa nonoha, yoma hedehedede wa debanaena ede kabo ka mwadine, na komiu kabo kwa mwadinekalili. ⁵ Unai ya nuwatu ye namwa ede kada kahao ta ya kaibwadaidi na se baguna se laowa kalimiuwai na yomi haisagusagu kainauyana kwa hededehesunumagaiko wa kabinonohaina kwa hegehe. Kabo ye nonoha na ye

hemala yomi nuwatalam kainauyana, nige bena kai yoma muyowuigomiu na unai kwa kainauya.

Taba kwa kaikainauya ma nuwakohihaimiu

⁶ Hedehedede ta taba kwa nuwatui: Ena tamowai hesau like hisa mo ye kumaidi meta kelikeli unai kabo kaniyodi hisa mo ye lobaidi, na ena like se bado ye kumaidi meta kabo kaniyodi se bado ye lobaidi. ⁷ Tamowai kesegakesega bena ye bom nuwana unai ye hineli saha kabo ye kainauyaei, na tabu bena kowa nige yom nuwatalam o tamowai hesau yona lauheliliyena na kainauya ne ku tole, kaniyona ede taukainauya ye kainauya ma nuwagwauyalana ne meta Yaubada iya ye gadosisiyei. ⁸ Na Yaubada gonowana kainauya maudoidi ye hebadodi kalimiuwai, ede gonowana ginauli maudoidi udiyedi yo huya maudoina ginauli maudoidi kwa henuwadi wa siya ede kalimiuwai, na unai kabo gonowana yomi haisagusagu ye lakikalili tamowai hekadiyo kalidiwai. ⁹ Doha kulikuli tabuna unai se kuliako se wane, “Iya yona kainauya ye mosegabaeidi deha tamowaidiyao udiyedi na yona miyamiya dudulaidi se miya se lau ee nige kadi siga.” *(Same 112:9)*

¹⁰ Unai, Yaubada iya like ye moseidi taupaisowa ne udiyedi yo pwalawa ye moseidi kadi kai, iya hinage kabo like ye haidiwa yo yomi sanala likediyao ye hebadodi na yomi miyamiya namwanamwadi ne kabo ye helakidi. ¹¹ Yo teha maudoina udiyedi kabo ye hegogogomiu na unai kabo hekasa maudoidi ne udiyedi gonowana kwa kaikainauya na yomi kainauya se laoma kalimiyena na ka mosegabaeidi tamowai udiyedi na tenem unai ede lautoki se mosei Yaubada unai.

¹² Unai teina haisagusagu kwa ginaulidi ta meta nige bena Yaubada yona tamowai yodi deha kabasaguidi mo ye bom, na hinage kabo boda yodi lautoki se mosei Yaubada unai. ¹³ Na haisagusagu kwa ginauli wa unai, ede kwa bom kwa hemamohoiyei'uyoigomiu tamowai kalidiyena, kabo Yaubada se hedebasaei yomi kawakabi yo Keliso wasana namwanamwana yomi hededehemasalahana yo yomi kaikainauya siya kalidiyena yo tamowai maudoidi udiyedi wa debadiyena. ¹⁴ Na yodi tapwalolo hesabamiu ne udiyedi nuwadiyao kabo se tuudi se laowa kalimiyuena, matawuwuna ede kabinamwa saesaekalilina Yaubada ye haiyawa kalimiyuena. ¹⁵ Lautoki ye lau Yaubada unai yona kainauya saesaena wa debanaena!

10

Guiyau kaiteya ye kawanamwanamwaei meta iya yona taupaisowa namwanamwana ede

¹ Keliso yona nuwadobidobi yo taubiga udiyedi yau, Paulo, ya kaibwadalakilaki kalimiuwai. Na [*kabina ya kata meta yomi hedehedede kwa wane*] huyana yau maidamiu meta ya hededebigabigalaowa kalimiuwai, na huyana yau teha hesau unai ede yogu hedehedede ya hebayaodi kalimiuwai. ² Ya kaibwadaigomiu ede ena huyana ya laowa meta tabu kwa muyowuigau na yogu hedehedede ya hebayaokaliliyeidi kalimiuwai. Iyamo ya nuwatui ede kabo ya hededebayaolau tamowai hekadiyo ne udiyedi, siya yodi nuwatu meta bena kai kaiyaulina ta nuwanuwatuidiyao udiyedi ka miyamiya. ³ Mamohoi, kai kaiyaulina ta unai ka miyamiya, iyamo kai meta taba nige ka iyala doha kaiyaulina ta tamowaidiyao. ⁴ Matawuwuna yoma kaba'iyala madadiyao meta nige siya kaiyaulina ta yona kaba'iyala madadiyao. Na kaba'iyala madadiyao ta meta Yaubada yona gigibwaliyena se gigibwalikalili na udiyedi kabo tamowai yodi kabatolo bayabayaodi ka hetatagwaligwalidi. ⁵ Na haikawayagala yo kaokaolupolupo se kaipate bena tamowai se hetataguduguidi tabu Yaubada kabina se kata, na nuwasaesae nuwanuwatudi maudoidi ne kabo ka hekaiyawasidi. Hinage nuwanuwatu maudoidi ka kabihekahinidi na ka hekawakabidi se laoma Keliso unai. ⁶ Ena taba

komiu yomi kawakabi se namwakalili, meta ka nonohakalili na taukawayagala yodi miyamiya yababadi maudoidi debadiyena kabo ka hekilainodi.

⁷ Komiu taba ginauli masamasalahadiyao mo kwa kitadi!** Ena taba tamowai hesau ye bom ye hedede'uyoi meta iya Keliso yona, taba ye nuwatulobai meta kai hinage Keliso yona, doha ede iya. ⁸ Guiyau gigibwali ye haiyama ne meta kabasaguigomiu na nige unai ka hetatagwaligwaligomiu. Ena taba debanaena na ya hededesaesae kalili meta unai [*ya hededemamohoi, ede*] nige yogu kabamwadine hesau. ⁹ Nige ya henuwa bena ya hematausigomiu yogu leta ne udiyedi. ¹⁰ Matawuwuna tamowai hekadi se wane, “Yona leta hedehedededi ne se polohe yo se bayao na tamowaina ne meta nige kitahenamwana hesau yo kalinana ne nige kaniyona.” ¹¹ Tamowaidi ne bena se nuwatulobai meta yoma huyamiasuwala unai kao saha ka hemasalaha yoma leta ne udiyedi, huyana kai maidamiu kabo kao kesekesegana yoma kabikabigomiu ne udiyedi ka hemasalaha.

¹² Tauhedededobidobiyeigau ne se bom se hededetausaei'uyoidi. Na ena siya mamohoi tamowai saesaedi, meta kai taba nige ka hekaigonogonowaigai kalidiyena. Iyamo siya meta se bom mo se nowonowoi'uyoidi yo se bom mo se hekaigonogonowai'uyoidi. Teina unai se hemasalaha'uyoidi meta siya nige se sibasiba. ¹³ Kai meta nige gonowana kama sigasiga ka dikwai na unai ka hededesaesae, na yoma hededesaesae ne kabo ka tolekesekesegai Yaubada paisowa saha ye haiyama wa unai. Na yoma paisowa ta ye laowa ee kalimiuwai. ¹⁴ Yoma hededesaesae wa udiyedi meta nige ka hedededikwakalili, bena doha nige ka laowa kalimiuwena ne, iyamo kai meta tamowai bagubagunadi Keliso wasana namwanamwana ta ka bahei na ka laowa ee kalimiuwena. ¹⁵ Hinage kai meta nige kama sigasiga ne ka dikwai na ka lau tamowai hekadiyo paisowa se ginaulidi na udiyedi ka hededesaesae. Na yoma nuwanuwatu ede yomi sunuma ne kabo ye kini ye laki ye lau na yoma paisowa ka ginaulidi luwamiuwena ne kabo hinage ye tadada ye laki ye lau. ¹⁶ Unai kabo gonowana ka laugabaeigomiu na ka lau teha hekadiyo udiyedi wasa namwanamwana ta ka lauguguyaei. Matawuwuna nige ka henuwa bena tamowai hesau yona tehaena paisowa se ginauliyako na debanaena ka hededesaesae. ¹⁷ Na

“kaiteya ye henuwa bena ye hededesaesae, ye namwa mo taba Guiyau saha ye ginaulidi ne debadiyena ye hededesaesae” *(Yelemaiya 9:24).*

¹⁸ Matawuwuna ede, tamowai ye bom ye hededetausaei'uyoi meta nige gonowana se hemamohoiyei, na ena Guiyau iya tamowai ye hededetausaei, meta iya tau-paisowanamwanamwa.

11

Paulo yona paisowa yo apostolo lupolupo yodi paisowa ye hededehehemasalahadi

¹ Bena musamusana mo taba kwa nayatautaubiga na kwa lapulaoma na sola ya hededetausae'uyoigau doha tauyauyaule ne. Sola kwa lapulaoma! ² Komiu hesabamiu ya nuwanuwatukalili, gonogonowana doha Yaubada. Matawuwuna ya hededehe-sunumaeigomiuko Keliso unai yo iya ye bom mo kalinawai ya hededehepatugomiu na unai kabo ya tolehehemasalahagomiu kalinawai doha hasala nuwanuwawapuna a'ana. ³ Na mwata lakilakina wa yona nuwatugilogilo unai ede Ewa ye lupohai, tenem unai ede ya matausi, unai tabu yomi nuwamamohoi yo yomi gadosisi a'ana bayabayaona Keliso hesabana ne unai na tamowai nuwamiu ne se woyahesuwaladi. ⁴ Na taba tamowai hesau ye laowa kalimiuwai na Yesu lauguguyana ye lauguguyaei nige doha kai Yesu ka lauguguyaei ta, o taba yaluwa udoi kwa hai nige doha Yaluwa kwa hai'usei wa, o taba wasa namwanamwana udoi nige doha bagubagunana kwa hai'usei wa, iyamo

** **10:7:** Komiu taba ginauli masamasalahadiyao mo kwa kitadi: Kalina Giliki unai Paulo yona kulikuli wa hinage gonowana ta bui ede, Komiu meta ginauli kewadiyao mo kwa kaikewaidi na udiyedi kwa hedehedede.

tamowaidiyao ta udiyedi meta kwa nayatautaubigakalili. ⁵ [Taulauhekatalupolupo ne se bom se hededetausaedi bena] siya apostolo saesaekalilidi, na ya nuwatui ede yau meta nige ya dobikalili na kabo siya. ⁶ Yau nige se hekatagau bena tauhedehede, iyamo sonoga ede kaliguwai, doha teha maudoidi udiyedi ka tolehemasalahanamwanamwaediko kalimiuwai.

⁷ Yau meta Yaubada wasana namwanamwana ya lauguguyaei kalimiuyena na nige maisana ya hai. Teina unai ya bom ya toledobidobiyei'uyoigau, na unai bena kabo komiu ya toleisinigomiu. Hage, kwa nuwatui tenem ne unai ya laupwano? ⁸ Dubu hekadi yodi haisagusagu kainauyadi ya haigaibuidi na ya haidi ne udiyedi kabo gonowana yomiu ya paisowa. ⁹ Na huyana yau maidamiu na ginauli saha hesau ya henuwa meta nige unai tamowai hesau ya hepolohe, matawuwuna kada kahao Masedoniya unai taulaoma wa, siya se saguigau ginauli saha ya henuwadi wa udiyedi. Yogu hineli ya ginauliyako ede taba nige ya hepolohegomiu na saha ya hedededi ta meta kabo sola ya miyamiyawatanidi. ¹⁰ Teina ye hemala yogu kabahededesaesae. Kabina kwa kata meta Keliso wasana mamohoina ede kaliguwai. Na hinage ya hededemamohoi, taba nige gonowana tamowai hesau teha Akaiya unai yogu hededesaesae ta unai ye hekaiyawasigau. ¹¹ Na idohagi? Bena nige ya gadosisiyeigomiu? Yaubada kabina ye kata meta ya gadosisiyeigomiu.

¹² Na yogu paisowa nige maisana ne meta sola kabo ya ginaginauli. Na teina unai kabo gonowana taulauhekatalupolupo ne yodi kabatolo ya koigwaligwalidi, siya se henuwa bena taba solasola hesau se lobai na ginauli saha se ginaulidi ne udiyedi se hededesaesae na kabo se hedede ede siya yo kai gonogonowamai. ¹³ Matawuwuna tamowai doha teina meta apostolo lupolupodi yo taupaisowa laulaulupolupodi, na kadi kao se ginaulidi doha siya bena Keliso yona apostolo. ¹⁴ Na nige nuwapwanopwanona hesau, matawuwuna Satani, iya hinage ye kaohaihai na ye hedede meta iya mala aneluna. ¹⁵ Unai nige gonowana ta siliyata ena taba yona taupaisowa se kaohaihai na se hedede bena siya miyamiya dudulaina yona taupaisowa. Na yodi mauli gehena ne unai meta saha se ginaulidi ne udiyedi kabo maisadi se haidi.

Paulo yona kamkamna hedehedededi udiyedi ye hededesaesae

¹⁶ Ya hedede'uyo kalimiuyena: Tabu tamowai hesau yona nuwatu bena yau yauyaule. Na taba komiu yomi nuwatu ede doha tenem na kwa lapulapulau yauyaule udiyedi, ye namwa mo taba yau hinage kwa haigau kalimiuyena doha siya, na unai kabo hededesaesae gagilina hinage ya ginauli. ¹⁷ Teina ya bom yogu nuwabayao ta unai na ya hededesaesae ta meta nige ya hedehedede doha Guiyau ye hedehedede, na doha yauyaule ye hedehedede. ¹⁸ Tamowai se bado meta buluma hekasadi yo hinelidi udiyedi se hededesaesae, unai yau hinage kabo ya hededesaesae. ¹⁹ Komiu kwa sibasibakalili, iyamo tamowai yauyaule meta kwa gwaualakaliliyeidi yo udiyedi kwa taubigakalili. ²⁰ Na komiu meta kwa taubigakalili tamowaigaibu udiyedi na kwa talamyeyidi gonowana se haigomiu yodi heyayai tauhaidi, gonowana se lupohaigomiu na yomi gogo se haidi, gonowana se hepaisowagomiu na unai namwanamwa se lobaidi, gonowana se bom se toleisini'uyoidi, yo gonowana hinage debam ne se kaikaisoi.**
²¹ Saha se ginaulidi ne se nuwamwadimwadinekalili, unai nige yogu bayao gonowana taba bena ya ginaulidi.

Saha tamowai se nuwatuidi na udiyedi se hededesaesae, meta yau hinage gonowana udiyedi ya hededesaesae. Hage, sola musamusana taba ya hedehedede doha yauyaule. ²² Idohagi, siya Hebelu tamowaidiyao? Yau hinage! Idohagi, siya Isalaela tamowaidiyao? Yau hinage! Na idohagi, siya Abelahama kana isimulitao? Yau hinage! ²³ Idohagi, siya Keliso yona heyayai tauhaina? Yau meta yona heyayai tauhaina

** **11:20:** Debam ne se kaikaisoi: Kalina Giliki unai Paulo ye kuli, se koipapaligomiu, na kaniyona ede tamowaina ne se hedededobidobiyei.

saesaena na kabo siya. Yogu hedehedede doha teina ne meta doha ya hedehedede-gaibu. Yau yona ya paisowabayaokalili na kabo siya, hesabana ya lau numatutugudu hegahegagili, se sapiheyaheyababakaliliyeigau, yo huya se badokalili meta ya lau boita ya hanahanawui. ²⁴ Ma haligigi Dius yodi tauwoyawoya tamowaidiyao udiyedi sapisapi badona 39 ya haidi. ²⁵ Ma haiyona kaisapisapi kaikaiwana unai se koihemwahemwaloigau, ma kesega se lauwekuigau, ma haiyona yoma waga se hedunalapaidi, na boniyai kesega yo mayadai kesega gabwagaibu ne unai ya kulokulolo. ²⁶ Yogu kadau maudoidi ne udiyedi, kabamwaloi udiyedi ya lulau meta se bado. Sagasaga kabaitadi se nuwamatamatausi, iyamo ya lau. Tauhenahenayagudu se henayaguduigau, iyamo ya lau. Yogu hali Dius tamowaidiyao se kabihenahenayaigau, iyamo ya lau. Dagela tamowaidiyao se kabihenahenayaigau, iyamo ya lau. Magai lakilakidi udiyedi bena kabo se unuigau, iyamo ya lau. Balabala se nuwamatamatausi, iyamo ya lau. Gabwa unai kabo boita, iyamo ya lau. Yo kada kahao lupolupodiyao meta se hewaiunugau. ²⁷ Paisowa lakilakidi ya ginaulidi yo paisowa udiyedi kamnagu se yababa. Huya se badokalili nige gonowana ya keno. Hinage hasali yo gadomagu kamnadi ya lapuidi yo huya hekadiyo meta ya wohi. Huya hekadiyo meta nige yogu kabobo na ya gwaugwau. ²⁸ Na ginauli maudoidi ta luwadiyena na mayadai maudoina meta dubu maudoidi hesabadi ya nuwanuwatukalili. ²⁹ Ena kaiteya ye basabasa, idohagi, kabo basabasa kamnana nige ya lapui? Ena tamowai hesau se woyalaei yababa unai, idohagi, debanaena kabo nige gonowana ya kouyalayala?

³⁰ Na ena taba bena ya hededsaesae, meta kabo ginauli saha yogu basabasa ne tauhemasalahana wa debadiyena ya hededsaesae. ³¹ Yaubada, iya yoda Guiyau Yesu Tamana, iya bena huya maudoina ta nokonokoei, iya meta kabina ye kata yau nige ya laulaulupolupo.

³² [*Yogu huyabasabasa mayadaina hesau meta*] huyana yau Damaseko unai na yodi gabana, iya meta wasawasa Aletasi yona lolina guninaena taupaisowa, na iya ye hedede ede Damaseko magaina lakilakina kawakedadiyao maudoidi se tologuidi na unai bena kabo se kabihekahinigau. ³³ Unai magai ganana kewamolosina unai bosaena ya gelu na gana bolilapaina unai kagu kahao se hedalolodobiyeigau, ede ya wasabugabaeidi.

12

Paulo tautau ye kita yo yona basabasa ye hededehemasalahadi

¹ Yogu hededsaesae ta udiyedi kabo sola ya hededsaesae. Bwagana yogu hededsaesae ta udiyedi meta taba nige saha hesau namwanamwana ya lobai, iyamo bena tautau saha ya kitadi yo saha Yaubada ye hemasalahadi kaliguwai wa hedehedededi ya hedehedede. ² Tamowai hesau kabina ya kata iya Keliso unai, na bolimai 14 se laoko wa unai meta se hai ye sae galewa hehaiyonana** ne unai, nige kabina ya kata tamowai ne meta tauna maudoudoina ye sae o yaluyaluwagaibuna ye sae, Yaubada ye bom mo kabina ye kata. ³⁻⁴ Hinage kabina ya kata ede tamowai ta se hai ye sae paladaisi, na tamowaina ne maudoudoina ye sae o yaluyaluwagaibuna ye sae meta nige kabina ya kata, Yaubada ye bom mo kabina ye kata. Menai nuwanuwatu se bado ye lapuidi meta nige gonowana tamowai yona nuwanuwatuyena ye hededehemahemasalahadi yo hinage nige se talamyeyi bena taba ye hededededi tamowai udiyedi. ⁵ Tamowai doha tenem meta kabo ya hededetausaei, na yau nige gonowana ya bom ya hededetausaeigau. Na saha kabo unai ya hededsaesae ede yogu basabasa ta. ⁶ Na taba ya henuwa bena ya hededsaesae meta yau kabo taba nige yauyaule, kaniyona ede yau kabo hedehedede

** **12:2:** Galewa hehaiyonana: Kalina Giliki unai se hedede galewa bagubagunana meta manuwa yo yalohi tehana, yo galewa helabuina ede mahana yo nawalai yo kipwala yodi kabasigisigi. Na galewa hehaiyonana meta Yaubada yona kabamiya.

mamohoidi ya hedededi. Na ya kabihekahini'uyoigau. Nige ya henuwa taba tamowai hesau ye nuwatuhesaegaibuigau, na taba yogu miyamiya yo yogu hedehedede ne ye kitasipwabagunaidi. ⁷ Na ginauli saesaekalilidi Yaubada ye hekitagau wa debadiyena na bena tabu udiyedi ya nuwasaesae, ede kadi laugudugudu Yaubada ye haiyama, unai Satani yona tautauwasa ye laolaoma na taugu ta kabahekamkamnana ye toletole. ⁸ Ma haiyona meta ya kaibwadadoudou Guiyau unai bena taba kamkamna kaliguwai ta ye haigabaeidi. ⁹ Na ye hededelaoma kaliguyena ye wane, “Yogu kabinamwa ta ye launamwanamwaeigo. Matawuwuna ede yogu gigibwali ta yona huyapaisowa dudulaina ede yom basabasa mahanana.” Tenem debanaena ede kabo ma gwaugwauyalakaliligu na yogu basabasa ta hedehedede udiyedi ya hededesaesae. Kaniyona ede Keliso yona gigibwali bena ye miya kaliguwai. ¹⁰ Tenem unai Keliso debanaena ede huyabasabasa yo dila yo huya yabayababadi, yo hekamkamna yo pilipili huyadi udiyedi meta ya gwauyalakalili. Matawuwuna ede, ena ya basabasa meta unai kabo Yaubada yona sagu unai ya bayao.

Hededeaisagusagu hekadiyo

¹¹ Yogu hedehedede wa udiyedi kagu kao meta doha yauyaule, na komiu yomi miya wa debadiyena ede doha tenem ya ginauli. Ye namwa mo komiu taba yau kwa hededehesaegau, matawuwuna ede yau meta nige ya dobikalili na kabo siya apostolo saesaedi ne, bwagana kabo kwa kitagau meta nige kaniyogu. ¹² Apostolo kabakitalobaidi ginaulidiyao ede hekihekinoi saesaedi, kabanoko ginaulidi yo laulau gigigigibwalidi. Ginaulidiyao ta meta ma nuwabayaogu na ya ginaulidiko kalimiuwai. ¹³ Unai, Ginauli maudoidi ya ginaulidi dubu hekadiyo udiyedi ne meta maidamiyao gonogonowamiu. Na ginauli kesega mo, meta nige ya kaibwadamoni kalimiuyena. Nuwana teina ta yogu kabatoledobiyeigomiu ede, taba kwa nuwatugabaei.

¹⁴ Teina ta meta ya nonohako kabo huya hehaiyonana ya kaitaumanaigomiu, na unai taba nige ya hepolohegomiu, kaniyona ede yogu laowa ne nige bena yomi gogo hesabadi, na komiu hesabamiu. Matawuwuna ede wawayao gagilidi meta nige gonowana tama yo sina kadi yo yodi se gwaugogo, na tama yo sina bena natudiyao kadi yo yodi se gwaugogo. ¹⁵ Teina unai kabo ma gwauyalagu na ginauli maudoidi kaliguyena ta ya hegehedi kalimiuwai yo hinage ya bom ya talamyegau hesabamiu. Hage idohagi, ena yogu gadosisi kalimiuwai ta ya helaki'uyoi, bena kabo yomi gadosisi kaliguwai ne ye gagili?

¹⁶ Nuwana kwa hemamohoiyeigau ede mamohoi yau taba nige ya hepolohegomiu, iyamo kabo yomi nuwatu ede bena ya lupohaigomiu. ¹⁷ Idohagi, tamowai ya hetamalidi se laowa kalimiuyena wa meta yomi namwanamwa saha hesau se haigaibui yau hesabagu? ¹⁸ Taitasi ya muyowui ede ye laowa kalimiuwai, yo hinage kada kaha hesau meta maidana se laowa. Hage idohagi, Taitasi meta ye hepaisowagomiu yona namwanamwa hesabana? Nige gonowana, matawuwuna kai meta yaluwa kesega unai ka paisowa yo nuwatu kesega ka hemuliwatani.

¹⁹ Tabu yomi nuwatu bena yoma hedehedede maudoidi ta udiyedi kai yomai ka laulaugudugudu. Kai meta Yaubada matanaena ka hedehedede doha siya Keliso unai tausunuma tamowaidiyao, yo ginauli maudoidi ka ginaulidi meta komiu, kehamaiyao, kabahebayaogomiu hesabana. ²⁰ Matawuwuna yogu matausi ede taba ya laowa meta taba nige saha yau ya henuwa ne unai ya lobaigomiu, yo yau hinage taba nige saha kwa nuwanuwatui ne kwa lobai kaliguyena. Ya matausi tabu na kalimiuyena meta haikawayagala, kaikalomagigili, koukouyalayala, mahimahihi, hededeheyaheyababa, monumonunu, nuwanuwasaesae yo miyamiyapilipili ede metai. ²¹ Yogu matausi ede ena ya uyowa, Yaubada kabo ye henuwadobidobiyeigau matamiuyena, na tamowai hekadi debadiyena kabo ya nuwayababakalili, kaniyona ede huya bagubagunana unai

miyamiya nige se a'a, laulau bikibikidi yo miyamiya yabayababadi udiyedi se lulau na udiyedi se ba'aya meta sola nige se nuwabui.

13

Hededehebasiba gehegedi

¹ Buka Tabuna unai ta hasili ye wane,

“Pilipili maudoidi tolehedudulaidi udiyedi meta tamowai labui o haiyona yodi hemamohoi ne unai kabo ta tolehedudulaidi.” *(Dutelonomi 19:15)*

Na teina ta meta kabo yogu kaitaumaigomiu hehaiyonana. ² Huya helabuina yau maidamiu wa unai meta ya hededelaowako kalimiuyena, na teina ta yau nige maidamiu na hedehede wa ya hedede'uyoidi kalimiuyena. Na yogu uyowa ne unai meta siya kaiteyadi huya bagubagunana unai se ba'aya wa yo tauba'aya hekadiyo hinage taba nige ya katekamkamnaedi. ³ Kwa henuwakalili bena kaliguyena hemamohoi kwa lobai ede Keliso meta ye hededelaoma kaliguwai na ya hedehede. Tolehedudulaigomiu ne unai iya nige ye basabasa, na ye bayaokalili komiu luwamiuyena. ⁴ Mamohoi, sataulo kewanaena Keliso ye basabasa, iyamo Yaubada yona gigibwaliyena ye maumauli. Doha hinage kai, ka basabasa doha iya, iyamo Yaubada yona gigibwaliyena meta kabo ka maumauli na ka tolehedudulaigomiu.

⁵ Kwa kitasipwaigomiu yo kwa lautonogigomiu, komiu sunuma ne unai kwa babawa e nige? Taba kwa nuwatulobai meta Keliso Yesu ede kalimiuwai. Iyamo ena kwa lautonogigomiu na nige sunuma ne unai kwa miyamiya meta Keliso Yesu ede nige kalimiuyena. ⁶ Na ya nuwatui meta ena kwa lautonogigai kabo kwa lobai ede kai apostolo mamohoidi.

⁷ Ka tapwalolo Yaubada unai kabo taba nige ginauli hesau kwa ginaulipwanoli. Yoma tapwalolo ta kaniyona bena saha? Nuwana tamowai bena se kitagai ede kai apostolo mamohoidi? Nige! Tamowai yoma apostolo paisowana se kitaheyababa meta nige ya modei, na saha ya henuwakaliliyei ede taba komiu ginauli saha se dudulai ne kwa ginaulidi. ⁸ Matawuwuna kai nige gonowana ginauli hesau ka ginauli bena mamohoi ta kabaguduina, na bena taba mamohoi ta ka sagui na ye laki ye lau. ⁹ Ka gwauyala huyana kai ka basabasa iyamo komiu kwa bayao. Na ka tapwalolo taba Yaubada kwa talamyeyi bena ye saguigomiu na yomi miyamiya ne se dudulaikalili. ¹⁰ Teina debadiyena ede huyana yau nige maidamiu meta nuwanuwatu ta ya kulidi, na huyana ya laowa kalimiuwai na yogu apostolo gigibwalina ya hepaisowa meta tabu ya sinakalalili. Teina gigibwali ta Guiyau ye haiyama meta komiu yomi sunuma kabaginaulidi na nige kabahetatagwaligwaligomiu.

Lautoki

¹¹ Gehegehena ta unai, kagu kahao, kwa gwauyala! Kwa kaipatebayao na kwa uyo yomi miyamiya dudulaidi wa udiyedi. Kwa haihebahebayao'uyoigomiu. Bena nuwamiu kesega yo kwa miya daumwaliyena. Na gadosisi yo nuwadaumwali Yaubadana, iya kabo maidamiu.

¹² Kwa hailaulautokiyeigomiu gadosisi mamohoina unai. ^{**} ¹³ Yaubada yona tamowai maidaguwao ta yodi lautoki se hetamalidiwa kalimiuwai.

¹⁴ [Ya tapwalolo] taba Guiyau Yesu Keliso yona kabinamwa yo Yaubada yona gadosisi yo Yaluwa Tabuna yona labini maudoimiu kalimiuwai.

** **13:12:** Gadosisi mamohoina unai: Paulo ye kuli, sumta tabuna unai, na sumta meta ekalesiya yodi gadosisi hekihekinoina.

Galatiya

Paulo yona leta ye lau ekalesiya Galatiya unai taumiya udiyedi

Buka ta hededehemasalahana

Teina kulikuli ta meta leta Paulo ye kuli ekalesiya teha Galatiya unai taumiya udiyedi, iya ede yona leta bagubangunana, bolimai 48 o 49 AD unai ye kuli, Antiyoka unai.

Galatiya unai Paulo ekalesiya bodadi ye hetubudi Ikoniya, Debi, yo Lisitila magaidi udiyedi, yona lauwasu kadauna bagubangunana unai (Apostolo 14:1-23), na kabo ye uyo yona kabadalahai magaina Antiyoka unai (Apostolo 14:26-28). Tenem huyana ne unai Yelusalema ye kaitaumanai na ekalesiya babadadiyao maiyanao se hedede (Galatiya 2:1-2).

Paulo yona huyamiasuwala wa unai taulauhekata hekadiyo se lage na ekalesiya se henuwapwanopwanodi (Galatiya 1:7). Siya meta Dius luwadiyena se tubu, na tausunuma wa se hekatadi taba laugagayo se miyawatanidi. Iya ede laugagayo Yaubada ye mosei Isalaela tamowaidiyao udiyedi, doha kai yo mayadai yo kabikabi udoi'udoil laugagayodi, yo pelitome laugagayona.

Teina leta ta unai Paulo ekalesiya teha Galatiya unai wa ye hededehebasibadi. Ye hededebyaolau udiyedi meta wasa namwanamwana kesega mo, yo keda kesega mo ye lau mauli hesabana, iya ede sunuma Yesu Keliso unai (Galatiya 2:16). Tamowai hekadiyo wa yodi lauhekata meta lauhekatalupolupo na tabu se kawamamohoyei (Galatiya 4:17).

Leta ta unai, Paulo yona hedehede hekadiyo meta se bayaokalili (Galatiya 5:12), matawuwuna taulauhekatalupolupo wa ye kouyalayalaeidi.

Buka ta hedehedena lakilakidi

- Apostolo mamohoina yo wasa mamohoina 1:1-10
- Wasa Paulo ye lauguguyaei wa meta mamohoina 1:11–2:10
- Laugagayo miyawatanina nige ye tolehedululaida, na sunuma mo 2:1–4:31
- Yailihai miyana 5:1-26
- Tauwoyaida ede Yaluwa Tabuna yo gadosisi 6:1-10
- Paulo yona guguya yo lautoki 6:11-18

Lautoki

¹⁻² Yau Apostolo Paulo yo Guiyau tauhemuliwatanina maudoidi maiyaguwao, leta ta ka kuli na ka hetamali ye laowa Guiyau taukawamamohoyena maudoimiu teha Galatiya unai taumiya kalimiuyena.

Nige tamowai se kaisunuwaigau bena ya hemala apostolo, na Yesu Keliso yo Tamana Yaubada, iya Yesu boita unai ye hetolo'uyoi wa, se kaisunuwaigau.

³ Taba Tamada Yaubada yo Guiyau Yesu Keliso yodi kabinamwa yo yodi nuwadaumwali se lediwa kalimiuwai. ⁴ Keliso Yaubada Tamada ye kawakabiyei na ye talamgabaei'uyoi ye hemala kaitalagam yoda yababa hesabadi, yo ye gilihaida tanoubu yabayababana ta unai. ⁵ Lautoki yo hedebasae ta mosei Yaubada unai huya maudoina ye lau ee nige kana siga. Mamohoi!

Nige wasa hesau namwanamwana

⁶ Keliso yona kabinamwa debanaena Yaubada ye kaisunuwaigomiu. Ya siliyatalilili matawuwuna huyana nige ye loha na taukaisunuwaigomiu wa kwa laugabaeiyako na wasa udoi tamowai se hedede bena wasa namwanamwana ede kwa kawamamohoyei.

⁷ Na iyamo wasa me meta nige wasa namwanamwana, nigeikalilili! Na tamowai

hekadi se henuwa bena Keliso wasana namwanamwana se tolebui na nuwamiyao se hepwanopwanodi. ⁸ Na ena taba kai o apostolo hesau o galewa aneluna hesau wasa udoi ye lauguguyaei kalimiuwai nige doha saha ka lauguguyaei wa, meta taba hekamkamna lakilakina ye lobai. ⁹ Saha ka hedede-yako wa meta kabo ya hedede-uyoi: Ena tamowai hesau wasa namwanamwana ye lauguguyai kalimiuyena nige doha wasa kwa haiyako wa, meta taba hededeheyababa ye miya tamowaina ne unai.

¹⁰ Hage, yogu kwa hedehedede: Yogu hedehedede ta unai nuwana ya kaipate bena tamowai kabo se kitahenamwagau, o Yaubada? Nuwana ya kaipate bena tamowai ya henuwanamwadi? Taba nige! Ena ya kaipate bena tamowai ya henuwanamwadi, meta yau nige Keliso yona taipaisowa.

Wasa Paulo ye lauguguyaei wa yona kabalaoma ede Yaubada

¹¹ Kagu kahao, ya henuwa bena kabina kwa kata meta wasa namwanamwana ya lauhekata'usei ta, iya nige tamowai yodi nuwanuwatuyena ye laoma. ¹² Nige tamowai hesau unai ya hai o ye hekatagau, na yogu kabahaina ede Yesu Keliso ye hemasalaha kaliguwai.

¹³ Beyabeyana Dius yodi miyamiya yo yodi tapwalolo kabikabidi udiyedi ya miya, na yogu mauli wa wasana kwa lapuiyako, idohagi Yaubada yona dubu tamowaidiyao ya hekamkamnadi yo hinage bena ya unuhemwaloihegehedi. ¹⁴ Kagu isi maudoidi luwadiyena meta yau Dius yodi tapwalolo kabikabidi maudoidi kabidi ya katakalili, yo hinage ya kaipatebayaokalili bena taba kagu kulutubu kabikabidi ya hebayaodi tamowai udiyedi.

¹⁵ Sola nige se labasigau na Yaubada ye kaisunuwaigau na yona kabinamwaena ye yoganeigau. Na huyana ye hineli ¹⁶ bena natuna ye hemasalayahama kaliguyena na bena kabo yau dagela tamowaidiyao** udiyedi Keliso wasana ya lauguguyaei, meta nige tamowai hesau ya henamaiyei, ¹⁷ yo hinage nige ya sae Yelusalema bena apostolo bagubagunadiyao ya kitadi na se hekatagau. Na yau meta ya dudulai mo ya lau teha Alabiya, na menai muliyena kabo ya uyo Damaseko.

¹⁸ Kabo bolimai haiyona mulidiyena ede ya sae Yelusalema, Kipasi ya kita na menai maidagu ka bawa sabati labui yo mayadai kesega. ¹⁹ Menai apostolo hekadiyo wa nige ya kitadi, na Guiyau** kana kaha Yamesi ye bom mo menai ya kita. ²⁰ Yaubada matanaena ya hededemamohoi kalimiuyena: Ginauli saha wasadi ya kulidi ta meta nige ya lupoigomiu.

²¹ Na muliyena kabo ya lau teha Siliya yo Silisiya udiyedi. ²² Na Yudeya unai Keliso taukawamamohoiyena bodadi meta yau nige kabigu se kata. ²³ Na wasagaibugu mo se lapui, "Tamowai ta, iya beyabeyana ye hekamkamnada yo Keliso sunumana bena ye hekaiyawasi, iya ede Keliso sunumana ye laulauguguyaei." ²⁴ Na saha ye tubu kaliguyena wa debanaena Yaubada se hedebasaei.

2

Yelusalema unai apostolo wa Paulo se kawanamwanamwaei

¹ Bolimai 14 mulidiyena ede ya seuyo Yelusalema. Yogu sae ne unai meta Banaba maiyagu, yo hinage Taitasi maidamai ka sae. ² Yaubada yona hededehehemasalaha kaliguyena debanaena ede ya sae, na wasa namwanamwana saha ya lauhekataei dagela tamowaidiyao udiyedi wa meta ya hededehehemasalaha kalidiyena. Na tauwoyawoya tamowaidiyao se bom mo ya lau ya kitadi, yogu hedehedede wa kabo se hemamohoiyeidi e nige. Ya matausikalili matawuwuna saha ya ginaulidiko yo saha

** **1:16:** Dagela tamowaidiyao ta, siya meta nige Dius tamowaidiyao. Na tabu ta nuwapwanopwano matawuwuna yoda hedehedede unai nige ekalesiya ta kataidi ede siya dagela tamowaidiyao. ** **1:19:** Guiyau ta meta Yesu. Na Yamesi meta Yesu kana kaha mamohoina.

kabo ya ginaulidi,** madai nige kaniyodi. ³ Na tauwoyawoya wa se talamyeigau. Hinage nige saha hesau se hedede Taitasi unai bena taba ye pelitome. Na iya meta Giliki tamowaina** na maidagu ka sae Yelusalema. ⁴ Pelitome nuwatuna wa nige ye masalahama ye lau ee tamowai hekadiyo se mwalaegaibuma luwamaiyena. Siya meta nige kada kahao mamohoidiyao, na bena yoda yailihai miyamiyana Keliso Yesu unai se kaikewasipwai. Yodi nuwatu bena Dius yodi laugagayo maudoidi udiyedi se kauda na ta miyawatanidi. ⁵ Na nige ka henuwa bena taba ka lapulapulau udiyedi, matawuwuna ka henuwa bena wasa namwanamwana mamohoina tabu se bui na bena ye miya kalimiuyena.

⁶ Na dubu babadadiyao tamowai siya se kitahesae'useidi wa meta nige saha hesau se hededetubeilaei yogu lauhekata wa unai. Yodi sae ta meta nige yona udoi hesau kaliguyena, matawuwuna Yaubada nige tamowai kana kaoyena ye kitahenamwagaibui. ⁷ Na se kitalobai meta wasa namwanamwana hededehemasalahana paisowana ta Yaubada ye leyama bena ya ginauli dagela tamowaidi udiyedi, doha Petelo yona paisowa ye mosei Dius tamowaidiyao udiyedi wa. ⁸ Matawuwuna Yaubada Petelo ye hepaisowa na wasa namwanamwana ye duwai Dius tamowaidi udiyedi wa, na Yaubada kesegana ta meta hinage yau ye hepaisowagau na paisowa ta ya ginauli dagela tamowaidi udiyedi. ⁹ Ede Yamesi, Kipasi yo Yowane, siya tautolobaguna tamowaidiyao, se kitalobai meta Yaubada yona kabinamwa debanaena paisowa ta ye haiyama. Unai yau yo Banaba se lautokiyeigai yo se talam meta kai yodi hali taupaisowa. Na kabo se hededehebayaogai bena sola ka laulau dagela tamowaidiyao udiyedi na siya se lau Dius tamowaidiyao udiyedi. ¹⁰ Na yodi kaibwada kalimaiyena ede taba taudehadeha** ka nuwatuidi, na teina hekasa ta meta yau yogu nuwanuwatu lakilakina ede.

Paulo Kipasi yona laupwano ye hekita

¹¹⁻¹² Muliyyena, Kipasi Yelusalema unai ye dobima Antiyoka. Bagubaguna meta tausunuma siya nige Dius tamowaidi maidanao se kaikaigogoi, na huyana Yamesi kana bodao hekadiyo se laoma kabo ye bom ye tolehesuwala'uyoi matawuwuna ede taupelitome tamowaidiyao wa** ye matausiyeidi. Kipasi saha ye ginauli wa ye yababa, unai ya dilamatai. ¹³ Yona kailupolupo ta Dius tamowaidi hekadiyo Antiyoka unai taumiya wa se kita ede se hemuliwatani, yo hinage unai Banaba se woyahesuwala.

¹⁴ Na ya kita meta wasa namwanamwana miyamiyana mamohoina nige se miyamiyai, ede maudoidi matadiyena ya hededelau Kipasi unai ya wane,

“Kowa Dius tamowaina, na iyamo yom miyamiya meta doha dagela tamowaidiyao, na nige doha Dius tamowaidiyao. Idohagi to bena dagela tamowaidiyao ku muyowuidi na bena Dius yodi miyamiya se miyamiyaaidi?

¹⁵ Kita meta nige ba'aya tamowaidi doha dagela tamowaidiyao, matawuwuna ede se labasida meta kita Dius tamowaidi. ¹⁶ Na iyamo kabina ta kata meta Yaubada tamowai nige laugagayo lauwatanina unai ye toletolehedudulaidi, na yodi sunuma Yesu Keliso unai debanaena ye tolehedudulaidi. Unai kita hinage yoda sunuma ta tole Yesu Keliso unai, to kabo Keliso sunumana unai Yaubada ye tolehedudulaidi, na nige

** **2:2:** Saha ya ginaulidiko yo saha kabo ya ginaulidi: Yona kulikuli unai Paulo yona paisowa ye heyaheyasoniyei heloikailakwa unai na ye kuli, na tabu ya kailakwa nige kaniyona, o huya maudoina ye laoma teina ya kailakwagaibu. Na kalina Saliba unai nige gonowana yoda paisowa ta heyaheyasoniyei kailakwa unai, unai ede heyaheyasoni ta kaniyona ka kulihemasalaha lausoiso ta unai. ** **2:3:** Giliki tamowaina: Giliki loheloheyaodi meta nige pelitome se haihai. Unai Taitasi hinage nige se hepelitome. ** **2:10:** Taudehadeha ta, siya ede Yesu tausunumaena Yelusalema unai taumiya nige gonowana se bom se sagu'uyoidi. ** **2:11-12:** Taupelitome tamowaidiyao wa se lauhekata meta ekalesiya tatao maudoidi bena pelitome se hai yo hinage Dius yodi laugagayo maudoidi se miyawatanidi. Se hedede ede nige taupelitome meta nige gonowana siya Keliso tausunumaena mamohoidi.

laugagayo miyawatanina debanaena. Matawuwuna ede nige gonowana tamowai hesau laugagayo mo miyawatanina debanaena Yaubada kabo iya ye kitahenamwa.

¹⁷ Huyana ta kaipate bena Yaubada ye tolehedulaida Keliso debanaena, meta ta masalaha ede kita Dius tamowaidiyao hinage ma yababada. Unai kaniyona ede saha, Keliso iya ye woyaida ta lau yababa unai? Nige kalikalili! ¹⁸ Na ena taba laugagayo beyabeyana wa miyamiyana ya hekaiyawasi, na muliyena ya miyawatani'uyoi, kabo ya hemasalah'uyoigau meta yau laugagayo tau'utusina.** ¹⁹ Matawuwuna laugagayo debanaena ya boitako na yona gigibwali kaliguwai ye gehe.** Unai taba bena ya mauli Yaubada yona. ²⁰ Keliso yona boita sataulo unai meta yau hinage maidagu ka boita. Unai nige yau ya maumauli, na Keliso kaliguyena ye miya.** Taugu ta unai ya miyamiya ta meta Yaubada Natuna sunumana unai ya miyamiya, iya ye gadosisiyeigau na yona mauli ye mosegabaei yau hesabagu. ²¹ Na yau taba nige Yaubada yona kabinamwa ya tolehesuwala, matawuwuna ede, ena taba Yaubada tamowai ye tolehedulaidi laugagayo miyawatanina debanaena, meta Keliso yona boita ne nige kaniyona.”

3

Kabatoledudulaida ede saha - laugagayo o sunuma?

¹ Komiu Galatiya meta tamowai yauyaulediyao. Kaiteya ye lupohaigomiu? Komiu kalimiuyena meta Yesu Keliso yona boita Sataulo ne unai kaniyona maudoina ya hedehemasalahakaliliyei, kana kao doha matamiuyena kwa kita. ² Ya henuwa bena yogu kwa hedehede: Idohagi na Yaluwa Tabuna kwa hai, laugagayo miyawatanina debanaena, o Keliso wasana kawamamohoiyeina debanaena? ³ Sola ma yauyaulemiu? Yomi ekalesiya maulina Yaluwa yona gigibwali unai kwa hetubu, na idohagi to kwa kaipate bena kwa bom yomi bayaoyena kwa miyai? ⁴ Beyabeyana wasa namwanamwana debanaena kwa kamkamnakalili. Mamohoi kwa kamkamnagaibu e nige? Ya nuwatui nige. ⁵ Hage, yogu kwa hedehede: Yaubada iya Yaluwana Tabuna ye haiyawa yo laulau gigigigibwalidi ye ginaulidi kalimiuyena meta laugagayo miyawatanina debanaena, o Keliso wasana kawamamohoiyeina debanaena?

⁶ Gonogonowana doha Abelahama wasana ta hasili kulikuli tabuna unai, ye wane, “Iya Yaubada ye sunumaei, debanaena Yaubada ye hedede meta iya miyamiyadudulai tamowaina.” *(Genese 15:6)*

⁷ Unai bena kwa nuwatulobai meta Abelahama natunao mamohoidi ede Yaubada tausunumaena. ⁸ Beyabeyana kulikuli tabuna ye hededenonohaiyako meta dagela tamowaidiyao Yaubada kabo ye tolehedulaidi yodi sunuma debanaena, doha wasa namwanamwana hedehededena ye hedehemasalahanonohai Abelahama unai ye wane,

“Debamyena kabo tanoubu maudoina hededehenamwa se hai.” *(Genese 12:3, 18:18, 22:18)*

⁹ Unai siya tausunuma meta Yaubada ye hededehenamwadi gonogonowana doha Abelahama sunuma tamowaina wa.

** **2:18:** Ena taba laugagayo beyabeyana wa ... ya miyawatani'uyoi: Nuwatu ta Paulo heyaheyasoni unai ye kuli: Ena ginauli hesau ya hetatagwaligwali na muliyena ya ginauli'uyoi ... Na hedehede hesau ne, kabo ya hemasalah'uyoigau meta yau laugagayo tau'utusina, kaniyona meta, yogu laulau wa ye yababa. ** **2:19:** Laugagayo... yona gigibwali kaliguwai ye gehe: Laugagayo ye hemasalahada meta kita yababa tauginaulidi, na yababa maisana ede boita. Na laugagayo nige gonowana tauboiboita ye tanuwagaidi. ** **2:20:** Unai nige yau ya maumauli, na Keliso kaliguyena ye miya: Hedehede ta kaniyona ede, Paulo nige ye bom yona nuwatu ye miyawatani, na yona miyamiya maudoidi tautanuwaegaedi meta Keliso.

¹⁰ Kaiteyadi se kitalau laugagayo miyawatanina unai bena kabatolehedudulaidi, siya meta hededeheyababa logulogunaena se miya. Matawuwuna kulikuli tabuna unai ye wane,

“Laugagayo bukana unai ginauli maudoidi se kulidi ne, ena tamowai hesau nige ye miyawataninamwanamwaeidi, meta iya hededeheyababa logulogunaena ye miya.”
(*Dutelonomi 27:26*)

¹¹ Ye masalahakalili meta laugagayo nige gonowana tamowai hesau ye tolehedudulai Yaubada matanaena, matawuwuna ede,

“Taumiyamiyadudulai meta sunuma debanaena kabo se mauli.” (*Habakuku 2:4*)

¹² Na laugagayo meta nige sunuma unai ye tolo, iya meta udoi. Na buka unai ta hasili meta

“Laugagayo hedehedededi taumiyawatanidi, iya yona laulau debadiyena kabo ye mauli.”
(*Lewitikasi 18:5*)

¹³ Laugagayo ye hegiluda na kita hededeheyababa logulogunaena. Na huyana Keliso se hekabasi sataulo unai meta kada hededeheyababa wa iya ye haidi, ede unai ye hemaisahaida. Doha kulikuli tabuna unai se kuliako se wane,

“Ena tamowai hesau sataulo unai se hekabasi meta iya hededeheyababa tamowaina.”
(*Dutelonomi 21:23*)

¹⁴ Yesu Keliso ye hemaisahaida na iya debanaena hededehehenamwa ye mosei Abelahama unai wa bena ye laoma dagela tamowaidiyao udiyedi. Kaniyona ede bena sunuma debanaena Yaluwa Tabuna, iya ede Yaubada ye hededehehesunuma wa, kabo ta hai.

Yaubada yona hededehehesunuma Abelahama unai meta laugagayo ye saedikwai

¹⁵ Kagu kahao, mayadai maudoina maulina miyamiyana heyahayasonina hesau ya hai na ya hedehedei: Taba tamowai labui ginauli saha hesau se koitalaliuyei na se talamyeyi, meta nige gonowana tamowai hesau yodi nuwatu ne ye tolehesuwala o unai saha hesau ye hedede. Gonogonowana doha Yaubada yona hededehehesunuma:

¹⁶ Hededehehesunuma wa ye hedede Abelahama maidana kana isimulita kalidiyena. Nige ye hedede ye wane, “kam isimulitao udiyedi”, kabo hededehehesunuma tauhaina ne se bado, na ye wane, “kam isimulita tamowaina unai”.** Hedehede ta kaniyona ede tamowai kesega mo, iya ede Keliso. ¹⁷ Yaubada yona hededehehesunuma Abelahama unai na bolimai 430 se lau, kabo laugagayo ye masalahama. Laugagayo ta ye mulitama, unai nige gonowana hededehehesunuma wa ye tolehesuwala. ¹⁸ Taba ena Yaubada yona kainauya ta hai laugagayo yoda miyawatanina debanaena, meta nige gonowana Yaubada yona hededehehesunuma debanaena kainauya ne ta lobai. Iyamo huyana yona kabinamwa unai Yaubada yona kainauya wa ye mosei Abelahama, meta [*nige laugagayo unai, na*] hededehehesunuma unai.

¹⁹ Ena doha teina, kabo laugagayo ne kana paisowa saha? Yaubada ye leyama kabo ye hekitalobaida meta yababa ta ginauli. Laugagayo yona paisowa ta ye ginauli ye lau ee kana siga Yaubada yona hededehehesunuma tamowaina wa ye lagema.

Laugagayo ta meta Yaubada ye mosei anelu udiyedi na se mosehekawalaei Mose unai, iya meta Yaubada yo tamowai duwaduwalidiyena tautolo. ²⁰ Ena tamowai labui bena yodi talam se ginauli, meta tautoloduwaduwali se henuwa. Na huyana Yaubada hededehehesunuma ye mosei Abelahama, meta iya ye bom ye ginauli.**

²¹ Ta hededehehesunuma meta Yaubada yona hededehehesunuma debanaena tamowai ye tolehedudulaidi na mauli se lobai. Unai ede hage idohagi, laugagayo meta Yaubada yona hededehehesunuma ye tolehesuwala? Nige kalikalili! Ena taba Yaubada laugagayo hesau

** **3:16:** Yaubada yona hededehehesunuma wa ku hasili Genese 12:7, 13:15, yo 24:7. ** **3:20:** Iya ye bom ye ginauli: Yaubada laugagayo ye mosei Isalaela tamowaidi meta Mose ye hepaisowa iya tautoloduwaduwali. Na huyana yona hededehehesunuma ye mosei Abelahama meta ye hedehededudulai Abelahama unai. Unai ta kita meta Yaubada yona hededehehesunuma wa ye saekalili na kabo laugagayo wa.

ye leyama unai kabo mauli ta lobai, meta kabo kabatolehedudulaida ede laugagayo. ²² Na kulikuli tabuna ye hededehe masalaha meta tanoubu maudoina ta yababa yona kaukau tamowaidiyao. Unai Yaubada saha ye hededehe sunuma wa meta bena Yesu Keliso ta sunumaei na ta hai, na tausunumaena maudoidi gonowana yona kainauya ne se hai.

²³ Huyana sola nige sunuma ta ye masalahama meta kita laugagayo kaukauna unai ta miyamiya. Ye kabihekahinida ye lau ee kana siga sunuma ta ye masalahama. ²⁴ Laugagayo wa ye tole meta kabo ye kitaheteteda na ye woyaida ta lau Keliso unai, na kabo Yaubada ye tolehedudulaida sunuma debanaena. ²⁵ Na sunuma wa ye laomako, debanaena meta kita nige laugagayo yona kitahetete unai ta miyamiya, ²⁶ matawuwuna komiu maudoimiu ta Yaubada natunao Yesu Keliso yomi sunumaena debanaena. ²⁷ Kaniyona ede maudoimiu ta Yesu Keliso unai se hebabatisoigomiu meta Keliso kwa luwui doha luwuluwu. ²⁸ Unai ede bodamiuyena meta nige hekasana hesau, bena Dius o Giliki, heyayai tauhaina tamowaina o yailihai tamowaina, loheya o waihiu, matawuwuna ede Yesu Keliso unai maudoimiu ta meta boda kesega. ²⁹ Ena komiu Keliso yona, meta komiu Abelahama kana isimulitao yo [*Yaubada yona*] kainauya tauhaina [*yona*] hededehe sunuma debanaena.

4

¹ Saha ya hedede'usei ta meta doha teina: Ena tamowai hesau ye boita meta natuna kabo iya tamana lauhedamaina yo yona gogo maudoidi tanuwagadi. Na ena iya sola ma gagilina na tamana ye boita meta iya yo yona taupaisowa tamowaidiyao maidanao gonogonowadi. ² Wawaya ne meta iya taukitahetetena yo gogo ne taukitahetetedi yodi gigibwali logulogunaena ye miyamiya kana siga ye lakilaki yo tamana yona hekasa mayadaina ye tole wa ye sae ye lobai. ³ Gonogonowana doha hinage, huyana kita sola nige Keliso kabina ta kata na kada kao doha wawayao supusupudi, meta kita kaiyaulina ta miyamiyadiyao logulogudiyena ta miyamiya.

⁴ Na huyana Yaubada yona kaisunuwa mayadaina mamohoina ye lage meta Yaubada Natuna ye hetamaliyama. Waihiu unai ye tubu na ye labasi laugagayo logulogunaena, ⁵ bena laugagayo logulogunaena taumiya maudoida ye hemaisahaida, yo hinage bena natu yona dudulai mamohoina ta hai. ⁶ Komiu meta Yaubada natunao, unai Yaubada Natuna yaluwana ye hetamaliyama nuwada ta udiyedi na ye hekatada na ta yogayogasae Yaubada unai ta wane, "Aba, Tamagu!" ⁷ Unai komiu meta nige taupaisowa tamowaidiyao, na komiu meta natu. Na kwa hemala natu ta unai ede Yaubada ye hetologomiu yona hededehe sunuma tauhaidi.

Tabu kwa uyo'uyo

⁸ Huyana sola nige Yaubada kabina kwa kata meta komiu kaiyaulina ta yaubadadi** yodi taupaisowa tamowaidiyao, siya nige yaubada mamohoidi. ⁹ Na teina huya ta komiu Yaubada kabina kwa katako, o taba ya wane, Yaubada kabimiu ye katako. Na idohagi to kwa kitakitabui'uyo kaiyaulina ta yona kabikabi basabasadi ta udiyedi. Idohagi, kwa henuwa bena kwa uyo kwa hemala siya yodi heyayai tauhaidi? ¹⁰ Komiu meta mayadai, nawalai, huya yo bolimai saesaedi hekasisidi yo kabikabidi sola udiyedi kwa miyamiya. ¹¹ Debamiuyena ya matausikalili matawuwuna kana kao doha yogu paisowabayao kalimiuyena meta kabo nige kaniyona. ^{12a} Kagu kahao, ya hedehede-bayao kalimiuyena bena yomi mauli kwa buidi doha yau, matawuwuna huyana ya lagewa meta yau yogu mauli doha komiu.**

** **4:8:** Kaiyaulina ta yaubadadi: Galatiya tamowaidi meta koitau udoi'udo se tabataba'ohuidi, bena udiyedi sagu se lobai. ** **4:12a:** Yau yogu mauli doha komiu: Huyana Paulo ye lage teha Galatiya unai meta yona laulau ye buidi ye hemala doha dagela tamowaidi, na nige ye tolobayao Mose yona laugagayo unai. Lausoiso ta unai ye wane taba tausunuma Galatiya unai wa hinage tabu se kitakitalau laugagayo unai.

12b-13 Kabina kwa kata meta yogu huyalage bagubagunana unai ya kasiyebwa, na debanaena ya miya kalimiuwai na wasa namwanamwana wa ya lauguguyaei kalimiuyena. Na iyamo nige saha yababana hesau kwa ginauli kaliguyena. ¹⁴ Kagu kasiyebwa ta ye henuwatupilipiligomiu, iyamo nige debanaena na kwa subugau o kwa kitaheyababagau, na kwa yogaisinigau doha Yaubada yona anelu hesau, o yau doha Yesu Keliso ede. ¹⁵ Beyabeyana yomi gwauyala maudoina meta haedi se lauko. Huyana ne unai yomi gadosisi ye lakikalili. Ena gonowamiu meta kabo hinage matamiu kwa lamohaidi na kwa haidima – saha ya hedede ta meta mamohoi! ¹⁶ Hage idohagi, hedehedede mamohoina yogu hededehemasalahana ta unai ede ya hemala kami waiunu?

¹⁷ Siya taulauhekatalupolupo ne meta se kaipatekalili bena se henuwanamwagomiu na bena kwa patulau udiyedi, iyamo nige yomi namwa o dudulai hesau hesabana. Saha se henuwa ede bena kalimaiyena komiu se tolehesuwalagomiu, na kabo kwa patulau siya udiyedi. ¹⁸ Ye namwa mo taba huya maudoina kwa kitakitalaoma kaliguwai, huyana yau maidamiu ta miyagogoi yo hinage yogu miyasuwala udiyedi.**

¹⁹ Natuguwao, debamiuyena meta kamkamna lakilakina ya hekalo'uyoi doha labalaba kamkamnana, na kamkamna ta kabo ye lau ee Keliso kana kao ye masalaha yo ye tubu kalimiuyena. ²⁰ Na ya henuwakalili bena yau taba maidamiu metai, to kabo gonowana ya hedehededenamwanamwa kalimiuwai, na iyamo kedagu ye lohakalili. Unai nuwagu ye pwanopwano yo nige kabina ya kata saha kabo ya ginauli hesabamiu.

Hega yo Sala meta talam beyabeyana yo hauhauna heyahayasonidi

²¹ Hage, yogu kwa hedehedede, komiu kaiteyadi kwa henuwa bena Mose yona laugagayo logulogunaena kwa miya, na laugagayo** wa hedehededena maudoidi kabidi kwa kata o nige? ²² Matawuwuna kulikuli tabuna unai ta hasili meta Abelahama natunao labui. Natuna hesau meta heyayai tauhaina waihiuna Hega ye labasi, na natuna hesauna ne meta Abelahama mwanena mamohoina Sala, iya ye labasi. ²³ Na heyayai tauhaina waihiuna wa natuna ye labasi meta Abelahama yona nuwatu unai ye tubu, na Abelahama mwanena mamohoina meta hededehesunuma debanaena natuna ye labasi.**

²⁴ Teina sinesinebadao labui ta meta Yaubada yona talam labui heyahayasonidi. Hega meta ye hemala talam bagubagunana Yaubada ye mosei Mose Sinai kudulina unai wa, na teina talam ta unai meta tamowai maudoidi laugagayo ye heyayaiyedi. ²⁵ Hega heyahayasonina ede Sinai kudulina teha Alabiya unai, na teina huya ta unai kana kao doha Yelusalema magaina lakilakina, matawuwuna iya yo natunao laugagayo unai meta ma kaukaudi. ²⁶ Na sinebada Sala, iya nige heyayai tauhaina wa, meta iya sinada. Iya meta Yelusalema hauhauna galewa ne unai ye heyahayasoniyei. ²⁷ Iya ede kulikuli tabuna unai se kuliyako se wane,

“Kowa waihiu kobokobosina nige natum,
bena ku gwauyala.

Kowa nige labalaba kamkamnana hesau kamnana ku lapui,
iyamo bena ku wana yo ku gwauyala,

matawuwuna waihiu miyamiyagologolwana natunao kabo se badokalili

** **4:18:** Lausoiso ta unai Paulo yona nuwanuwatu nige ye masalahakalili. Kai taubuibui yoma nuwatulobaina ede ku hasili lausoiso unai. Na tausonoga hekadiyo se wane hedehedede ta kaniyona bena doha teina: Ye namwakalili ena taba huya maudoina taunikahetetegomiu maidamiu kwa miyamiya na se paisowa ma nuwakohihaidi, ena se paisowa yomi namwa hesabana, doha yau huyana maidamiu wa. ** **4:21:** Laugagayo: Hedehedede laugagayo Paulo yona huyaena se hepaisowa teha labui udiyedi: (1) laugagayo Yaubada ye moseidi Sinai kudulina unai, yo

(2) Genese, Esodo, Lewitikasi, Numela, yo Dutelonomi bukadiyao. Inai laugagayo kaniyona ede Genese bukana.

** **4:23:** Hega yo Sala ma natudi wa wasadi kabo ku hasili Genese 16:1-4, 17:15-21, yo 18:10-14.

na kabo waihiu tawatawasolana.”**

(Aisaiya 54:1)

²⁸ Unai kagu kahao, komiu meta doha Isako, Yaubada yona hededehe sunuma wa unai kwa tubu. ²⁹ Abelahama yona huya unai wawaya buluma unai ye tubuma wa meta wawaya Yaluwa yona gigibwali unai ye tubuma wa ye hekamkamna. Teina laulau ta iya ede gonogonowana doha teina kalidaena. ³⁰ Na kulikuli tabuna unai saha ta hasili?

Ye wane,

“Heyayai tauhaina waihiuna ne ma natuna ku tolehesuwaladi, matawuwuna waihiu yaiyailihaina ne natuna meta tamana yona dudulai maudoina kabo ye haidi, na heyayai tauhaina waihiuna ne natuna taba nige saha hesau ye hai.” (Genese 21:10)

³¹ Unai kagu kahao, kita meta nige heyayai tauhaina waihiuna natunao, yo nige laugagayo logulogunaena ta miya. Na kita meta waihiu yaiyailihaina natunao, yoda sunuma debanaena Yaubada ye kawanamwanamwaeda yo ye haida ta hemala natunao.

5

Keliso unai yailihai miyana unai bena ta miya

¹ Keliso iya ye yailihaidako, unai kita meta yailihai tamowaidiyao. Unai kwa tolobayao na tabu tamowai hesau ye hepilipili'uyoigomiu laugagayo miyamiyadi udiyedi.

² Kwa lapulapui, yau Paulo ya hededelaowa: Ena kwa henuwa bena se hepelitomegomiu, meta Keliso nige gonowana ye saguigomiu. ³ Na ya hedede'uyo kalimiuyena: Ena tamowai hesau ye henuwa bena se hepelitome, meta iya bena laugagayo kabikabidi maudoidi ye miyawatanidi. ⁴ Ena ku henuwa bena Yaubada ye kitahenamwago laugagayo miyawatanina debanaena, meta kowa Keliso ku patugabayako yo yona gadosisi yo kabinamwa udiyedi meta kowa nige. ⁵ Na kai Yaluwa unai taumiya meta ma nuwabayaomai ka nayanayakalili bena Yaubada yona hededehe sunuma kalidawai wa ye hemamohoiyei na ye tolehedudulaigai sunuma debanaena. ⁶ Matawuwuna Yesu Keliso unai pelitome o nige pelitome meta nige yona udoi hesau. Na saha ye saekalili ede sunuma, na sunuma ta kabahemasalahana ede gadosisi miyamiyana unai.

⁷ Yomi huyanuwabui unai ye laoma meta kwa paisowanamwanamwakalili,** na kaiteya ye hededelaowa bena wasa mamohoina hemuliwatanina ta kwa hekaiyawasi? ⁸ Temeta hedehede me meta Yaubada tauyoganeigomiu, iya nige yona nuwatu. ⁹ Taba pwalawa lakilakina na yisti gagilina unai ta hebwali meta kabo pwalawa ne maudoina ye sese. [Unai, taba luwamiuyena lauhekatalupolupo gagilina, meta maudoimiu kabo ye woyahesuwalogomiu.] ¹⁰ Iyamo yau nuwagu ta ye bayao Yaubada unai meta nige gonowana komiu kabakitalau hesau unai kwa kitalau. Na tauhenuwapwanopwanogomiu ne meta kabo hekamkamna ye lobai, matawuwuna Yaubada nige gonowana tamowai hesau ye hekasisigaibui.

¹¹ Kagu kahao, taulauhekatalupolupo wa se hedede bena yau hinage pelitome kabikabina ya lauguguyaei. Na ena taba pelitome kabikabina ya laulauguguyaei, meta idohagi to Dius tamowaidiyao se hekamkamnagau? Na ena taba pelitome kabikabina ya laulauguguyaei, meta sataulo lauhekata ne nige koipilina hesau. ¹² Na siya taupelitome tamowaidiyao se henuhenuwasaegomiu ne, ye namwa mo taba se lau se nigwahaimolosiyei.**

** 4:27: Waihiu miyamiyagologolowana natunao kabo se bado: Buka Beyabeyana hedehedena ta Paulo ye hasili na nuwanuwatuna ede tamowai se bado kabo Yaubada ye gilihaidi sunuma debanaena, meta yodi kabagwauyala.

** 5:7: Yomi huyanuwabui unai ye laoma meta kwa paisowanamwanamwakalili: Nuwatu ta meta Paulo heyahayoni unai ye kuli ye wane, Beyabeyana kailakwa unai kwa heloinamwanamwa. ** 5:12: Taba se lau se nigwahaimolosiyei: Hedehede ta meta Paulo ye koipili na ye hedede. Na hedehede ta kaniyona ede tamowai kuhina se nigwahi. Dius yodi laugagayo unai ye wane, ena tamowai kuhina se boligabaei meta tamowai ne Dius bodadi udiyedi se tolehesuwaladi (Dutelonomi 23:1).

¹³ Kagu kahao, laugagayo unai Keliso ye yailihaigomiu. Na tabu yomi yailihai yona dudulai ne kwa hepaisowa na buluma nuwanuwatudi kwa ginaulidi. Ye namwa mo taba gadosisiyena kwa haisagusagu'uyoigomiu. ¹⁴ Laugagayo maudoidi meta hedehehede lakilakina kesega ye kabigogoihegehedi, iya ede,

“Kam kaha ku gadosisiyei doha kowa ku bom ku gadosisi'uyoigo.” (*Lewitikasi 19:18*)
¹⁵ Ena kwa bom kwa hewahewaiunu'uyoigomiu, doha suisui se bom se lulululu'uyoidi, bena kwa kitakitanamwanamwa, matawuwuna ede kami boda kabo kwa hetatagwaligwali.

Tauda gadosisidi laulaudiyao

¹⁶ Unai ya hededelaowa bena Yaluwa Tabuna yona hesibasiba unai kwa miya, kabo taba nige gonowana buluma yona gadosisi kwa lauwatanidi. ¹⁷ Matawuwuna buluma yona gadosisi meta ye kaipate bena Yaluwa yona gadosisi ye hekaiyawasi, yo Yaluwa yona gadosisi meta ye kaipate bena buluma yona gadosisi ye hekaiyawasi. Se hewahewaiunu'uyoidi, unai nige gonowana kwa bom yomi nuwatu namwanamwadi kwa ginauliwatanidi. ¹⁸ Na ena Yaluwa ye woyawoyaigomiu meta komiu nige laugagayo logulogunaena kwa miya.

¹⁹ Buluma yona gadosisi ginaulidiyao se masalahakalili, siya ede teina: nuwatubiki kabikabidiyao yo laulau yabayababadiyao udoi'udo, ²⁰ koitau taba'ohuidi, kalawai yo taubalau yo kabikabidiyao udoi'udo, haihewahewaiunu, miyagegagaga, kaikalomagigili, koukouyalayala, mahimahihi, haihaikawayagala, kabikabiboda, ²¹ gadolelehi, numanumayauyaule, gwauyalabikibiki, yo laulaudiyao se bado. Lahinai ya hededelaowako kalimiuyena, na teina hinage ya hedede'uyoi kalimiuyena: Ena tamowai hesau miyamiya ta udiyedi ye miyamiya meta taba nige ye lusola Yaubada yona basileiya unai.

Yaluwa Tabuna yona woyawoya kaniyodi

²² Na Yaluwa kaniyona ede teina: gadosisi, gwauyala, nuwadaumwali, nuwatalu, kabinamwa, haisagusagu, tolotahitahi, ²³ nuwadobidobi, yo kitahetete'uyoida. Teina nuwanuwatu maudoidiyao ta meta nige laugagayodi hesau. ²⁴ Na kaiteyadi se patulau Yesu Keliso unai meta buluma nuwatudi yabayababadi yo yona lelehi bikibikidi se hesataulodiko. ²⁵ Na kita Yaluwa unai taumiya meta bena Yaluwa yona nuwatu maudoidi udiyedi ta laulau. ²⁶ Tabu ta haihaisaesae, tabu ta hekohekoipili'uyoida, yo tabu hesau yona gogo ta gadolelehiyeidi.

6

Taba ta haisagusagu

¹ Kagu kahao, ena luwamiuyena tamowai hesau ba'aya hesau ye hekalu meta komiu Yaluwa unai tautolobayao bena nuwadobidobiyena kwa sagui na kwa tolehedudulai. Na kwa kitahetete'uyoigomiu tabu na yababa kesekesegana ta unai hinage kwa kalabesibesi. ² Yomi pilipili udiyedi bena kwa haisagusagu'uyoigomiu na teina kabikabi ta unai Keliso yona laugagayo kwa hemamohoiyei.

³ [Na tabu ta nuwasaesae,] matawuwuna ede, ena tamowai hesau ye nuwatui meta iya ye saekalili, na iyamo nige yona dudulai hesau, meta ye bom ye lupu'uyoi. ⁴ Tamowai kesega kesega bena yona miyamiya unai ye bom ye kitasipwai'uyoi na tabu yona mauli ne tamowai hesau unai ye hekaigonogonowa. Ena yona laulau se namwa kabo gonowana ye gwauyala. ⁵ Matawuwuna tamowai kesega kesega bena ye bom polohena ye bahei.

⁶ Ena tamowai hesau Yaubada wasana unai se hekahekata yo se hedehehedehehesisiba meta yona gogo maudoidi udiyedi bena tauhekatana ne ye sagusagui.

Saha ta kumai meta kaniyona kabo ta keli

⁷ Tabu kwa lupu'uyoigomiu. Yaubada nige gonowana ta lupoi. Like saha ta kumai meta kabo like ne kaniyona ta keli. ⁸ Kaiteya buluma miyamiyana unai ye miya meta kabo yona laulau ne kaniyona ye lobai, iya ede kana heyababa. Na kaiteya yaluwa miyamiyana unai ye miya kabo Yaluwa unai yona laulau ne kaniyona ye hai na ye lau mauli nige kana siga unai. ⁹ Unai miyamiya namwanamwadi udiyedi tabu kamnada se yababa, matawuwuna mahana dudulaina ye lagema unai kabo namwa ta lobai, ena nige paisowa ta ta hekaiyawasi. ¹⁰ Unai teina yoda huya namwanamwana ede bena yoda laulau se namwa tamowai maudoidi udiyedi, na iyamo tausunuma bodana meta bena ta nuwatukaliliyeidi.

Paulo wasa ta ye bom nimanaena ye kuli: Pelitome nige kaniyona, na Yaubada bena ye hehauhauda

¹¹ Nuwanuwatu gehegehediyo ta udiyedi meta kulikuli lakilakidiyo ya hepaisowadi na yomi leta ta ya bom nimaguyena kabo ya kulihegehe.

¹² Kaiteyadi se henuwagomiu bena taba pelitome kwa hai, siya meta buluma nuwanuwatuna se miyawatanidi na yodi nuwatu ede taba tamowai se kitahenamwadi, yo hinage nige se henuwa bena Yesu Keliso yona sataulo lauguguyana debanaena se hewaiunudi. ¹³ Na siya taupelitome ne meta Mose yona laugagayo nige se miyawatanidi, na iyamo se henuwagomiu bena taumiye ne udiyedi pelitome kwa hai. Na teina unai kabo se hededsaesae. ¹⁴ Na yau meta nige ya henuwa bena ginawili hesau debanaena ya hededsaesae, na saha kabo ya hededetausae'usei ede Guiyau Yesu Keliso yona sataulo. Sataulo ta debanaena kaiyaulina ta nuwanuwatudi maudoidi kaliguwai se gehe, na sataulo ta wasana ya laulauguguyaei debanaena kaiyaulina ta nige se modelaoma kaliguwai. ¹⁵ Keliso yona sataulo mo ya hededetausaei matawuwuna pelitome o nige pelitome meta nige kaniyona hesau, na sahaye saekalili ede bena Yaubada ye hehauhauda.

¹⁶ Nuwamiye se daumwali yo Yaubada yona katekamkamna yo gadosisi ye laowa teina laugagayo hauhauna ta tauhemuliwatanina maudoimiye kalimiuwai - komiye Yaubada yona Isalaela tamowaidiyao ede.**

¹⁷ Gehena ta unai, nige ya henuwa bena tamowai hesau ye hepilipiligau laugagayo nuwanuwatudi ta udiyedi, matawuwuna Yesu Keliso debanaena hekammkamna ya hekalo, na leleyadi wa siya ede taugu ta unai.

¹⁸ Kagu kahao, yoda Guiyau Yesu Keliso yona kabinamwa taba maudoimiye nuwamiye ne udiyedi ye miya. Mamohoi!

** 6:16: Komiye ... Isalaela tamowaidiyao: Paulo tausunuma ye heyaheyasoniyedi Isalaela unai, kaniyona ede siya Yaubada yona basileiye tamowaidiyao.

Epeso

Paulo yona leta ye lau ekalesiya Epeso unai taumiya udiyedi Leta ta hededehehemasalahana

Teina buka ta meta apostolo Paulo yona kulikuli ye lau ekalesiya Epeso magaina lakilakina unai taumiya kalidiyena. Paulo yona huyaena, Epeso meta kune magaina saesaena teha Eisiya unai. Huyana Paulo leta ta ye kuli meta iya numatutugudu unai (Epeso 4:1, 6:20) Loma magaina lakilakina unai, na bolimaina meta 61 o 62 AD.

Leta ta unai nuwanuwatu bagubagunana meta dubu o ekalesiya bodadi kadi kao doha saha. Paulo ye hededehehemasalahana meta dubu iya Keliso kana kao kabakitalobaina tanoubu ta unai (Epeso 1:23). Yo hinage ekalesiya ye hededehehenuwaisinidi bena maudoidi ne se nuwakesega, matawuwuna ede Keliso yona gilihai paisowana, na tabu se mode ena kadi kulutubu Isalaela, o nige (Epeso 2:11-21). Keliso Yesu debanaena maudoidi gonogonowadi na maudoidi siya Yaubada yona tamowai (Epeso 2:19,22), unai taba se haigadogadosisi (Epeso 4:2,16, 5:2, 6:23).

Leta ta nuwanuwatuna helabuina (Epeso 4:1–6:20) ye hededehehemasalahana mauli beyabeyana yo hauhauna yodi udoi saha. Mauli beyabeyana iya ede yababa luwanaena wa, na mauli hauhauna Yaluwa Tabuna ye mosei Yesu Keliso unai tausunumatahitahi udiyedi (Epeso 2:1-5, 3:16). Paulo ekalesiya ye hededehehesibasibadi bena Guiyau yona gigibwali unai se bayao na se nonoha bena tauyababa se iyalaei yo laulau yabayababadi se hekaiyawasidi (Epeso 6:10-17).

Buka ta hedehededenana lakilakidi

- Lautoki 1:1-2
- Yaubada yona kainauya ekalesiya kalidiyena, Keliso debanaena 1:3–3:21
- Keliso maiyana ekalesiya yodi mauli hauhauna nuwakesega unai 4:1–6:20
- Lautoki 6:21-24

Lautoki

¹ Yau Paulo, Yaubada yona nuwatu unai ya hemala Yesu Keliso yona apostolo. Leta ta ya kuli ye lau Yaubada yona tamowai Epeso unai taumiya udiyedi, siya tautolobayao Yesu Keliso unai.

² Taba Yaubada Tamada yo yoda Guiyau Yesu Keliso yodi kabinamwa yo nuwadaumwali se lediwa.

Yaubada yona kainauya

³ Yaubada, yoda Guiyau Yesu Keliso tamana, ta hededetausaei! Yaluwa ginaulidiyao udiyedi ye kainauyaeda, siya ede galewa ne unai, na Keliso debanaena ta haidi.

⁴ Huyana tanoubu ta sola nige ye hetubu meta ye kaisunuwaida Keliso debanaena, na Yaubada matanaena bena ta namwa yo nige yababa hesau kalidawai. Iya yona gadosisi unai ⁵ yona nuwatu ye ginauliyako bena kabo ye hegigibasiyeida na ta hemala natunao, Yesu Keliso debanaena. ⁶ Unai yona kabinamwa namwanamwana yo saesaena hede-basaena bena ye laki. Yona kabinamwa wa ye leyama kalidaena yona gadosisi tauna Yesu Keliso unai.

⁷ Keliso unai meta Yaubada ye hemaisahaida iya kwasinana unai yo yoda yababa ye nuwatugabaedi yona kabinamwa lakilakina debanaena. ⁸ Na yona kabinamwa unai meta sibasiba yo nuwatulobai maudoina ye kainauyaida ma nuwakohihaina ⁹ na yona nuwanuwatu saesaedi ye hekatada. Yona nuwanuwatu wa ye hineli ye bom yona henuhenuwa unai, na Keliso unai bena ye masalaha. ¹⁰ Yaubada yona hineli mayadaina dudulaina unai kabo galewa yo tanoubu ginaulidiyao maudoidi ye tolegogoidi na kadi tanuwaga kesega, iya ede Keliso.

¹¹⁻¹² Yaubada yona nuwatu ye hekasanonohaiyako kai Dius hesabamai ede ye kaisunuwaigai yona kainauya tauhaidi, kai tamowai bagubagunadi yoma midi ka toleyako Keliso unai, na saha ye hineli yo ye gadosisiyei meta kabo maudoina ne ye ginauli. Na yona henuwalakilaki ede yoma miyamiya udiyedi bena Yaubada ka hededetausaei.

¹³ Huyana hedehedede mamohoina ta kwa lapui, iya ede gilihai yomi kabahaina wasana namwanamwana, na kwa kawamamohoiyei ede komiu hinage Yaubada ye tolelaeigomiu Keliso unai, na Keliso yona hekihekinoi, iya Yaluwana Tabuna, ye tole kalimiuwai na ye dedeliguduguduigomiu. Yaluwa Tabuna meta Yaubada yona hedehededehesunuma. ¹⁴Yaubada ye gilihaidako na Yaluwa Tabuna ye tole kalidawai meta kabahemamohoina ede yoda kainauya lakilakina sola kabo ta hai. Unai taba Yaubada saesaekalilina ta hedebasaei.

Paulo yona tapwalolo

¹⁵⁻¹⁶ Teina nuwatu ta debanaena Yaubada lautokina nige ya hekaiyawasi na huya maudoina ya nuwanuwatuigomiu yogu tapwalolo udiyedi. Matawuwuna wasamiu ya lapui meta yomi sunuma yoda Guiyau Yesu unai ye bayao yo Yaubada yona tamowai maudoidi kwa gadosisiyeidi. ¹⁷Sola ya kaikaibwada na Yaubada, iya ede yoda Guiyau Yesu Keliso yona Yaubada yo Tamada saesaekalilina, iya bena sibasiba yo hemasalaha yaluwana ye leyawa na kabo unai iya kabina kwa katanamwanamwa. ¹⁸Yo nuwamiyao bena se masalaha na yona hededehesunuma kabina kwa kata, iya ede ye leyawa huyana ye yoganeigomiu na kwa nayanayai bena kabo ye hemamohoiyei. Yo yona kainauya saesaena lakina bena kabina kwa kata. Kainauya ne ye tolenonohaiyako komiu yo yona tamowai maudoidi yomiu. ¹⁹Yo hinage bena yona gigibwali saesaena kabina kwa kata. Nige gigibwali hesau doha Yaubada yona gigibwali. Na unai kita tausunuma ye saguida. Iya ede yona bayao saesaena ye hepaisowa ²⁰na Yesu Keliso ye hetolo'uyoi boita unai yo ye hetuli nimatutuna unai galewa ne unai ²¹na ye saekalili na kabo tauwoyawoya yo tauloina yo gigibwali tamowaidiyao yo guiyau maudoidi, yo hesa saha hesau se moseidi tamowai yo yaluyaluwa udiyedi, maudoidi ne ye saedikwaidi, teina mayadai ta unai yo hinage huya matada ne unai. ²²Na ginauli maudoidi Yaubada ye toledi kaena gunidiyena, yo iya ye tole dubu unai ginauli maudoidi taukulukuluyeidi. ²³Na dubu meta Keliso tauna, na Keliso meta ginauli maudoidi udiyedi yo tanoubu maudoina ye nuhuli, na dubu meta Keliso kabakitahe'udoina.

2

Mauli hauhauna Keliso unai

¹Na komiu beyabeyana meta boita unai, matawuwuna laugagayo kwa utu'utusidi yo yababa udoi'udo'i kwa ginaginalidi. ²Yababa wa unai kwa miyamiya huyana tanoubu ta miyamiyadi yo yadagaibu ne tanuwagana yona nuwatu kwa miyawatanidi. Teina yaluwa ta meta ye paipaisowa Yaubada taukawayagalaeina udiyedi. ³Huya bagubagunana unai maudoida meta luwadiyena ta miya buluma gadosisidi udiyedi. Bulumada yo nuwada kadi henuhenuwa ta miyamiyaidi na yoda laulau wa udiyedi kita Yaubada yona kouyalayala tamowaidi gonogonwana doha maudoidi ne.

⁴Iyamo Yaubada yona katekamkamna ye saekalili, yo yona gadosisi kalidaena ye lakikalili. ⁵Unai ye hemauida Keliso maiyada, huyana kita sola boita unai matawuwuna laugagayo ta utusi. Yaubada yona kabinamwa debanaena ye gilihaida. ⁶Yaubada ye hetolo'uyoida Keliso maiyada yo ye hetulida galewa ne unai, Keliso Yesu debanaena, ⁷na yona nuwatu ede bena huya matada ne unai kabo yona kabinamwa saesaekalilina ye hemasalaha, ede yona laulau kalidawai se namwakalili Keliso Yesu unai. ⁸Yona kabinamwa unai ye gilihaigomiu yomi sunuma debanaena, na teina ta nige kwa bom yomi bayaoyena, na teina meta Yaubada yona kainauya. ⁹Nige komiu

yomi paisowa debadiyena, unai nige gonowana tamowai hesau ye hededetausae'uyoi. ¹⁰ Kita meta Yaubada nimana ginaulidiyao. Keliso Yesu unai ye ginaulida paisowa namwanamwadiyao hesabadi. Na paisowa ta meta huya bagubagunana unai Yaubada ye kabinonohaidiko bena ta ginaulidi.

Keliso hebodakesega ye ginauli

¹¹ Tabu nuwamiyao se luluhi huyana se labasigomiu meta komiu dagela tamowaidiyao, na pelitome tauhaina tamowaidiyao se hedede ede komiu “nige taupelitome”. Na yodi pelitome ta meta taudi mo unai se hai. ¹² Yo tabu nuwamiyao se luluhi meta beyabeyana Keliso nige kabina kwa kata, yo komiu nige Isalaela tamowaidiyao. Yaubada yona talam yo hededehesunuma ye ginaulidi wa meta udiyedi nige yomi tupwa hesau, yo tanoubu ta unai meta nige yomi kabamidi hesau, yo Yaubada mamohoina nuwatulobaina meta nige kalimiuwai. ¹³ Beyabeyana kwa kedalohakalili. Na Keliso Yesu unai yo iya kwasinana debanaena Yaubada ye haigomiu kwa laoma kwa hanahanawui.

¹⁴⁻¹⁵ Matawuwuna iya meta yoda nuwadaumwali tauhetubuna. Huyana iya tauna sataulo ne unai meta tauda lauhe'a'adi laugagayodi yo kabikabidi ye hekaiyawasidi na boda labui wa ye hekoikesegaidi yo kabahewahewaiunu ganana wa ye hetatagwaligwali. Yona nuwatu meta iya kalinawai boda labui ta udiyedi boda hauhauna kesega ye ginauli na unai nuwadaumwali ye masala. ¹⁶ Na boda kesega ta unai bena boda labui wa ye tolehedudulaidi na se kawakeha'uyo Yaubada unai. Na sataulo ne unai yodi hewahewaiunu wa ye hekaiyawasi. ¹⁷ Keliso ye laoma na nuwadaumwali wasana ye lauguguyaei komiu taumiyakedaloha kalimiuyena yo hinage Yaubada dedekanaena taumiya** kalidiwai. ¹⁸ Yona nuwatu meta taba Keliso debanaena maudoida yoda dudulai ta hai na Yaluwa kesega yona sagu unai gonowana ta laoma Tamada Yaubada unai.

¹⁹ Unai ede komiu nige laolaoma yo magari udoi tamowaidiyao, na komiu meta Yaubada yona boda tamowaidiyao yo hinage Yaubada yona numa tamowaidiyao, maidamiyao Yaubada yona tamowai maudoidi. ²⁰ Apostolo yo peloweta yodi lauhekata se hemala doha kabakabinuma nokunokuna, na unai Yaubada ye kabigomiu, na Keliso Yesu meta iya kabinuma wekuna saesaena. ²¹ Iya kalinawai numa mwadalena maudoina se patugogoi na numa ne ye sae ye hemala Numa Tabuna Guiyau unai. ²² Iya unai Yaubada yona tamowai maudoidi yo komiu hinage kwa laomagogoi na kwa hemala kabamiya numana, na unai Yaubada Yaluwana Tabuna ye miya.

3

Yaubada yona nuwatu wadawadamdi Paulo ye hededehemasalahadi

¹ Teina nuwanuwatu ta unai, yau Paulo [*ya tulibono Tamada Yaubada matanaena*].** Keliso Yesu debanaena yau ya hemala numatutugudu tamowaina, komiu dagela tamowaidiyao hesabamiu. ² Nuwana Yaubada yona nuwatu hedehededeni kwa la-puiyako meta Yaubada yona kabinamwa unai kainauya** saha ye leyama hesabamiu, ³ iya ede nuwanuwatu saesaena ye hemasalahi na ye hekatagau, doha saha ya kulidiko wa.** ⁴ Yogu kulikuli wa yomi hasilidi ne unai kabo gonowana kabina kwa kata

** **2:17:** Yaubada dedekanaena taumiya ta, siya meta Dius tamowaidiyao, matawuwuna siya Yaubada yona tamowai bagubagunadiyao. ** **3:1:** Ya tulibono Tamada Yaubada matanaena: Lausoisi 1 unai Paulo yona hedehedede nige ye hededehegehe, na yona nuwatu hesau ye saema nuwana ne unai ede nuwatu bagubagunana wa ye hekaiyawasi na hesauna wa ye hededebagunaei. Yona nuwatu bagubagunana wa kabo lausoisi 14 unai ye tubei. Kulibui ta unai lausoisi 14 tupwana ne ka hai ka kulinonohai, bena kabo hedehedede kaniyona ye masala.

** **3:2:** Kainauya ta meta Paulo yona lauguguya paisowana boda hesabadi. ** **3:3:** Saha ya kulidiko wa: Nuwatu saha Paulo ye kuliyako wa, iya ede Epeso 1:9-14 yo 2:11-22 udiyedi.

meta Keliso Yesu nuwanuwatuna saesaedi nuwasibasibadi ede kaliguwai. ⁵ Teina nuwanuwatu ta meta nige ye masalaha isi hekadi tamowaidiyao udiyedi, doha saha mayadai ta unai Yaluwa Tabuna ye hemasalah Yaubada yona apostolo tabudi yo peloweta udiyedi. ⁶ Teina nuwatu wadawadamna ta meta dagela tamowaidiyao yodi dudulai gonowana Yaubada yona hededehehemamwa se hai, gonogonowana doha Isalaela, se hemala boda kesega tamowaidiyao yo Yaubada yona hededehehemunuma tauhaidi. Yodi dudulai se hai ta meta Keliso Yesu unai, huyana wasa namwanamwana se kawamamohoiyei.

⁷ Yaubada yona gigibwaliyena yona kabinamwa debanaena ede yona kainauya ye leyama na ya hemala wasa namwanamwana ta tauwasaduwaiyeina. ⁸ Yau meta ya dobikalili na kabo Yaubada yona tamowai dobidobidiyao maudoidi, na iyamo yona kainauya ye leyama na Keliso Yesu yona namwanamwa saesaedi ya lauguguyaei dagela tamowaidi udiyedi, ⁹ yo Yaubada yona nuwanuwatu saesaedi ya hededehehemalahadi tamowai maudoidi kalidiyena. Beyabeyana unai ye laoma ee teina nuwanuwatu wadawadamdi ta meta Yaubada, iya ginauli maudoidi tauginaulidi, ye kabihekahinidi ye bom mo kalinawai. ¹⁰ Na teina huya ta unai Yaubada ye henuwa bena yona sibasiba nuwanuwatudi udoi'udo'i ye hemalahadi galewa ne unai tauloina yo gigibwali udoi'udo'i udiyedi, na tauhemalahadi ede ekalesiya bodana. ¹¹ Teina yona nuwatu ta meta beyabeyana ye hinelinonohaiyako na yoda Guiyau Keliso Yesu unai ye hemamohoiyei. ¹² Keliso debanaena ede gonowana ta lau Yaubada ta hanahanawui ma nuwabayaoda yo ma katepatuda, matawuwuna Keliso ta sunumaei. ¹³ Unai ya kaibwadaigomiu tabu nuwamiyao se basabasa yogu kamkamna ta debadiyena. [*Numatutugudu unai kamkamna ya hekalodi ta*]** meta yomi namwanamwa hesabana.

Paulo Epeso yodi ye tapwalolo

¹⁴ Teina unai ya tulibonodobi Tamada Yaubada matanaena. ¹⁵ Iya kalinawai sulu maudoidi galewa ne yo tanoubu ta unai se tubuma. ¹⁶ Ya kaibwada taba yona gigibwali saesaena didididigana unai ye hegigibwaligomiu yo Yaluwana Tabuna unai nuwamiu ye hebayaodi. ¹⁷ Kabo Keliso nuwamiu ne udiyedi ye miya yomi sunuma debanaena na sowomiu se dobi Yaubada yona gadosisi unai na kwa tolobayao. ¹⁸ Na ya kaibwada taba maiyamiyao Yaubada yona tamowai maudoidi, Keliso yona gadosisi lakina, lohana, saena yo yona gabwatum ne nuwatulobaina kalimiuyena. ¹⁹ Ya henuwa taba Keliso yona gadosisi ne kabina kwa kata, na iyamo nige gonowada ta nuwatulobai. Yo taba Yaubada yona namwanamwa maudoidi kalinawai ne ye haidiwa kalimiuyena.

²⁰ Yaubada gonowana ginauli maudoidi ye ginaulidi, na yona gigibwali kalidaena ye paipaisowa ta unai yona sagu ne ye saekalili na kabo yoda kaibwada yo yoda nuwatulobaina. ²¹ Teina unai dubuyena Keliso Yesu hesanaena lautoki yo hedebasae ye lau Yaubada unai, isina to isina ye lau ee nige kana siga. Mamohoi.

4

Keliso tauna bena se nuwakesega

¹ Yau Paulo, na Guiyau yona paisowa ginaulina ta unai ede numatutuguduyena se tolegau, na yogu kaibwada lakilakina kalimiuwai ede, Yaubada yona yoganeigomiu ta unai bena taba yomi laulau yo yomi miyamiya kwa miyahedudulaidi. ² Bena kwa nuwadobidobi, yomi kabi se namwa tamowai udiyedi, yo kwa nuwatalu, na kwa haihekahekasisi'uyoigomiu ma gadosisimiu. ³ Yaluwa Tabuna ye kabigogoigomiu, unai taba kwa kaipatebayao na kwa miyagogoi nuwadaumwaliyena. ⁴ Kaniyona ede maudoimiu meta Keliso tauna kesega, yo Yaluwa kesega kalimiuyena, yo kabakitalau

** **3:13:** Numatutugudu unai kamkamna ya hekalodi ta: Hedehedena meta Epeso 3:1 unai ta lobai, na inai ka kuli'uyoi tauhasili kabasaguina.

yo nayanaya ginaulina kesega hesabana ye yoganeigomiu, ⁵ Guiyau meta kesega, sunuma kesega yo babatiso kesega, ⁶ Yaubada kesega iya maudoida Tamada, iya meta kita maudoida kewadaena, ye hepaisowada yo ye miya kalidaena.

⁷ Na kita kesega kesega meta Keliso yona nowonowoiyena yoda kainauya ye haidimako kalidaena. ⁸ Teina debanaena ede kulikuli tabuna unai ye wane,

“Huyana ye sae kewa ne

meta kana waiunu maudoidi ye kaudi na ye woyaidi

na yona kainauya ye soiyeidi tamowai udiyedi.”

(Same 68:18)

⁹ Ye sae kewa ne kaniyona ede Keliso hinage ye dobi teha dobidobina ta unai.**

¹⁰ Taudobi teha dobidobina ta unai ne, iya hinage ye sae teha saesaekalilina unai, na bena teha maudoina ye nuhuli.

¹¹ Iya meta [*ekalesiya bodadi tausaguidi*] ye moseidi, hekadi apostolo, hekadi peloweta, hekadi wasa namwanamwana tauwasaduwaiyeina, hekadi mesinale yo taulauhekata. ¹² Yodi paisowa ye moseidi na ye hewaueyidi Yaubada yona tamowai se kabinonohaidi yodi paisowa hesabana, unai kabo Keliso tauna se kabihebayao.

¹³ Paisowa ta bena se ginaginali ye lau ee maudoida sunuma unai ta laomagogoi ta hemala boda kesega, yo Yaubada Natuna kabina ta kata. Teina unai kabo ta matuwa na ta bayao ta sae Keliso yona mauli nowonowoina mamohoina ta hai. ¹⁴ Unai kita kabo taba nige doha wawayao gagilidi, kita nige tauhemuhemuliwatanigaibu tamowai yodi lauhekatalupolupo yo nuwakoi udoi'udo'i yo hedehedede mamohoidi tautolewadamdi, yo koitalaliu wadawadamdi tauginaulidi ta hemuliwatanidi, doha bagodu se baheida ta lau yo ta uyoma yo yaumai ye towa na ye baheida ta sae yo ta dobi. ¹⁵ Ye namwa taba hedehedede mamohoidi ta hedehededeidi ma gadosisida, na miyamiya maudoidi udiyedi kabo ta kini ta sae iya unai, na iya meta kulukulu, iya ede Keliso. ¹⁶ Iya unai tauna yaudi maudoidi se patulau na wanowanogaladiyao se kabihekahinigogoidi na se kininamwanamwa ma gadosisidi na kabo yau kesega kesega kana paisowa unai ye paisowa.

Mala tamowaina yodi miyamiya

¹⁷ Unai teina ya hededelaowa kalimiuwai, na Guiyau hesanaena ya hededebayao kalimiuwena, tabu kwa miyamiya doha dagela tamowaidiyao. Siya meta nuwanuwatugaibu udiyedi se bom se henuwapwanopwano'uyoidi. ¹⁸ Yodi nuwatulobai meta se masigilikalili yo Yaubada yona mauli miyamiyana unai meta se tolehesuwala'uyoidi, kaniyona ede nuwadiyao meta se kwailolokalili. ¹⁹ Unai namwa yo yababa nuwatulobaina kalidiyena meta nigele, na siya meta se mosegabae'uyoidi miyamiya bikibikidiyao udiyedi. Na huya maudoina yodi nuwanuwatu ede taba yababa mo se ginaginali.

²⁰ Na Keliso wasana unai komiu ka lauhasahasaigomiu wa meta nige doha tenem ka hekatagomiu. ²¹ Na komiu Yesu wasana mamohoina kwa lapuiyako yo mamohoina ne unai meta ka hekatagomiuko. ²² Yomi miyamiya beyabeyadi wa debadiyena ede ka hekatagomiu meta bena kwa tolehesuwaladi. Matawuwuna kami henuhenuwa bikibikidiyao wa se woyalaegomiu yababa unai, ede kami kao beyabeyadi wa se heyababadi. ²³ Hinage ka hekatagomiu bena taba yomi nuwanuwatu yo yomi miyamiya ne Yaluwa Tabuna ye hehauhau, ²⁴ na taba kao hauhauna kwa miyahe-masalaha. Kao hauhauna ne meta Yaubada kana kaoyena ye ginauli'uyoiyako bena mamohoi miyamiya dudulaidi yo tabudi udiyedi ta miya.

** **4:9:** Teha dobidobina: Tausonoga se bado se wane teina meta Hade, na hekadi se wane nuwanuwatuna meta tanoubu ta, matawuwuna galewa ne unai ye dobikalili.

²⁵ Unai komiu taba yomi laulaulupolupo maudoidi ne kwa tolehesuwaladi, na taba kwa hedehededemamohoi maidamiyao taumiya ne kalidiyena, matawuwuna ede kita maudoida ta meta Yesu Keliso tauna wa yaudiyao ede.

²⁶ Ena kwa koipili, tabu ye woyalaigomiu na unai kwa ba'aya. Tabu yomi kouyalayala ne kalimiuyena ye miya ye lau ee mahana ye dui. ²⁷ Tabu diyabolo yona solasola kwa mosei.

²⁸ Ena kaiteya ye kaikaiwahali meta bena kaiwahali ne ye hekaiyawasi na ye paisowa, kabo nimanaena ginauli namwanamwadi ye bom ye ginaulidi, ye haidi, na udiyedi kabo deha tamowaidi ye saguidi.

²⁹ Hedehedede yabayababadi tabu kawamiyao ne udiyedi kwa hedehedededi na taba kabasagu hedehedededi mo udiyedi kwa hedehedede, kabo gonowana taulapulapui ne kwa saguidi. ³⁰ Yo tabu Yaubada Yaluwana Tabuna nuwana kwa heyababa. Iya unai meta ye dedeliguduguduigomiu gilihai mayadaina hesabana. ³¹ Kaokaoyababa, kouyalayala yababana, lulugegagagaibu boda matadiyena, hedehededemonumunu yo nuwanuwatu yababadi maudoidi kwa hekaiyawasidi.

³² Bena taba yomi kabi se namwa, tamowai kwa katekamkamnaedi yo kami kahao yodi yababa kwa nuwatugabaedi, doha ede Keliso debanaena na yomi yababa Yaubada ye nuwatugabaedi.

5

¹ Komiu meta Yaubada natunao, ye gadosisikaliliyeigomiu. Unai bena yona mauli miyamiyadi kwa miyawatanidi ² yo gadosisi miyamiyadi bena kwa miyamiyaidi, doha Keliso ye gadosisiyeida na ye bom ye mosegabaedi hesabada ye hemala kainauya yo kaitalagam panena namwanamwana ye sae Yaubada unai.

³ Na luwamiuyena meta bena taba tabu nuwatubiki kabikabina gagilina hesau ye miyamiya, yo samagogo nuwanuwatuna yo nuwanuwatu hekadi tauhebikigomiu nuwanuwatudi, matawuwuna teina miyamiya ta meta Yaubada yona tamowai nige se launamwanamwaeidi. ⁴ Hinage taba tabu hekehekenoyaugogo yo hedehedede yauyauledi yo talawasi bikibikidi luwamiuyena, matawuwuna teina ta nige se launamwanamwaeigomiu. Na ye namwakalili taba kalimiuyena meta bena laulautoki mo. ⁵ Na bena kabina kwa katakalili ede miyamiya yabayababadi yo nuwatubiki yo samasamagogo tamowaidi, siya nige yodi tupwa hesau Keliso yo Yaubada yodi basileiya unai. Matawuwuna laulau haiyona ne meta yaubada lupolupo taba'ohuidi.** ⁶ Tabu tamowai hesau yona hedehedede nige kaniyodi na udiyedi ye lupohaigomiu na laulau yabayababadi kwa ginaulidi. Teina debadiyena Yaubada yona hekamkamna kabo ye hetaludobiyei siya taukawayagalaeina ne kewadiyena. ⁷ Unai teina tamowaidiyao ta tabu maidamiyao kwa hebodakesega.

⁸ Beyabeyana komiu meta kwa masigili, na teina huya ta komiu meta mala, Guiyau unai. Unai kwa miya doha mala natunao. ⁹ Matawuwuna mala kaniyona ede laulau namwanamwadi yo miyamiya dudulaina yo hedehededemamohoi. ¹⁰ Yo hinage ginauli saha kabo unai Guiyau nuwana kwa henamwa meta bena kwa waseneidi. ¹¹ Na masigili yona paisowa nige kaniyodi meta tabu kwa patulau udiyedi, na bena kwa tolehemasalahadi dawayaena. ¹² Kaniyona ede tamowai kawakawayagaladi ginauli saha se ginauliwadamdi ne meta nige gonowana ta hedehemasalahadi, kaniyona ede se taumwadimwadinekalikalili. ¹³ Na ginauli maudoidi mala dawayana unai meta se masalaha na gonowana ta kitadi ¹⁴ matawuwuna mala dawayana meta ginauli maudoidi wadawadamdi tautolehemasalahadi ede. Teina unai ede ta wane, "Taukeno, ku tolo, boitaena ku toloma

** 5:5: Laulau ... ne meta yaubada lupolupo taba'ohuidi, matawuwuna tauginaulidi ne nige Yaubada se hekasisiyei yo nige se kitalau iya unai yodi sagu hesabadi, na tamowai hekadi yo yodi gogo mo se hemala yodi yaubadao na sagu se wasenei udiyedi.

na Keliso dawayana kabo ye sinalaowa kalimwai.”

¹⁵ Unai yomi miyaena bena kwa kitanamwanamwakalili, na yomi miya meta bena doha tamowai sibasibadi na nige doha tamowai yauyaule. ¹⁶ Na yomi miya mayadaidi maudoidi bena kwa hepaisowanamwanamwaedi, matawuwuna ede teina mayadai ta unai meta yababa se lakikalili. ¹⁷ Unai komiu tabu doha tamowai yauyaule, na Guiyau yona nuwatu bena kwa nuwatulobaidi. ¹⁸ Tabu waina unai kwa numanumayauyaule na unai kabo ye woyalaegomiu laulau bikibikidiyao udiyedi. Ye namwa mo taba Yaluwa Tabuna ye hemwayaugomiu, ¹⁹ na ma kami kahao bena hedebasae wanadi, tapwalolo wanadi, yo Yaluwa Tabuna yona hemasalaha wanadi udiyedi kwa hai-hekahekata'uyoigomiu. Na nuwamiuyena bena kwa wana yo kwa hedebasae Guiyau unai. ²⁰ Huya maudoina bena yoda Guiyau Yesu Keliso hesanaena kwa laulautokisae Yaubada Tamada unai, ginauli maudoidi ye ginaulidiko wa hesabadi.

Maitawasola kadi hedehedede

²¹ Keliso hekasisina debanaena bena kwa haikawakawakabi'uyoigomiu.

²² Maitawasola sinesineo, mwanemiyao loheloheyao bena kwa kawakabiyeidi doha ede Guiyau kwa kawakabiyei ne. ²³ Matawuwuna ede waihiu yona taukulukulu ede loheya, doha dubu yona taukulukulu ede Keliso. Na iya tauna ede dubu ne, na iya meta dubu ne taugilihaina. ²⁴ Na dubu meta Keliso ye kawakabiyei, unai hinage komiu maitawasola sinesineo mwanemiyao loheloheyao yodi hekasa maudoidi udiyedi bena kwa kawakabiyeidi.

²⁵ Maitawasola loheloheyao, mwanemiyao bena kwa gadosisiyeidi doha ede Keliso dubu ye gadosisiyei na hesabana ede yona mauli ye mosegabaei. ²⁶ Yona nuwatu meta dubu ne ye deulihe'a'a waila unai, iya ede Yaubada kalinana, na ye hai Yaubada yona ²⁷ na bena se hemala yona dubu kana kao namwanamwakalilina, nige unai masi hesau o wowoyana hesau o unai kitaheyababana hesau, na dubu ta meta ye a'a** yo nige kabahegiluna hesau. ²⁸ Teina nuwatu kesegana ta unai ede maitawasola loheloheyao bena mwanemiyao kwa gadosisiyeidi doha kwa bom taumiyao kwa gadosisiyeidi ne. Kaiteya mwanena waihiu ye gadosisiyei meta ye bom ye gadosisiyei'uyoi. ²⁹ Nige sola tamowai hesau ye bom tauna ye subu na ye kabihenahenayai. Taba nige! Na tauna ne kabo ye hekai na ye kitahetetenamwanamwaei. Kabikabina kesegana ede doha saha Keliso ye ginauli dubu hesabana wa. ³⁰ Na kita meta Keliso tauna ne bodana ede.

³¹ “Teina hekasa ta unai ede loheya kabo tamana yo sinana ye laugabaedi na ye lau mwanena maiyana se miyakesega, na yodi labui kabo se hemala buluma kesega.”

(Genese 2:24)

³² Hedehedede ta nuwanuwatuna meta ye saekalili, iyamo yogu hedehedede ta kaniyona ede dubu yo Keliso hedehedede. ³³ Na ya hedede'uyo kalimiuyena ede loheloheyao bena mwanemiyao kwa gadosisiyeidi doha ede kwa bom kwa gadosisiyeigomiu, na sinesineo meta bena mwanemiyao loheloheyao kwa hekasisiyeidi.

6

Wawayao yo tama kadi guguya

¹ Wawayao, komiu meta Guiyau yona, unai sinamiyao yo tamamiyao kwa kawakabiyeidi. Teina ta meta miyamiya dudulaina. ² “Tamam yo sinam ku hekasisiyeidi.” Teina ta meta laugagayo bagubagunana ma hededehesunumana, iya ede ye wane, ³ “Yom miya kabo ye namwa na tanoubu ta unai kabo yom miya ye loha.”

⁴ Na komiu tama, tabu natumiyao kwa henuwayababadi yo kwa hekouyalalayadi, na ye namwa mo taba Guiyau yona hedehedede unai kwa hekatadi yo kwa lauhasahasaidi.

Heyayai tauhaidi yo kadi tanutanuwagao kadi guguya

** 5:27: Ye a'a: Tabu hededehehemalahana ku hasili.

⁵ Heyayai tauhaidi, kaiyaulina ta unai kami tanuwaga bena kwa hekasisiyeidi ma matausimiu yo ma nuwamamohoimiu, doha hinage Keliso kwa kawakabiyei. ⁶ Kwa paisowanamwanamwa, ena se kaikaikewaigomiu o nige se kaikaikewaigomiu, na tabu yomi nuwatu bena se kitahenamwagomiu. Na komiu yomi laulau taba doha Keliso yona heyayai tauhaidi na Yaubada yona nuwatu kwa ginauliwatanidi ma nuwatalammiu. ⁷ Paisowa kwa ginaulidi meta bena ma nuwakohihaimiu kana kao doha Guiyau yona kwa paipaisowa na nige kaiyaulina ta tamowaidiyao, ⁸ matawuwuna ede kabina kwa katako meta tamowai maudoidi ginauli namwanamwadi se ginaulidi na debadiyena Guiyau kabo maisadi ye moseidi, tamowaidiyao ta meta lolina guninaena taupaisowa, o yayailihaina.

⁹ Unai taupaisowa kadi tanuwaga maudoimiu, yomiu taupaisowa meta tabu kwa kabikabihenahenayaidi, kaniyona ede siya yo komiu kami tanuwaga kesega ede galewa ne unai, na taupaisowa yo kana tanuwaga, Yaubada matanaena meta komiu ne kesega.

Yaubada yona iyala gogodiyao

¹⁰ Kagu kahao, yogu hedehedede gehena ede teina: Bena Guiyau unai kwa tolobayao na yona gigibwali saesaena unai ye hebayaogomiu. ¹¹ Hinage Yaubada yona iyala gogodiyao maudoidi udiyedi bena kwa henonohagomiu. Unai kabo gonowamiu diyabolo yona hekasalupolupo maudoidi kwa guduguidi. ¹² Matawuwuna ede yoda haikabi ta meta nige buluma yo kwasina unai ta haikabi. Na yoda haikabi ta meta kaiyaulina masigilina taukitahetetena kana lolina tauginaulina, yo gigibwalina saesaediyao udoi'udo, yo hinage yaluyaluwa yabayababadi siya galewa dimwadi taukitahetetedi maiyadao ta haikabi. ¹³ Teina debanaena ede Yaubada yona iyala gogodiyao maudoidi udiyedi bena kwa henonohagomiu, na mayadai yabayababana unai meta gonowana kwa tolobayao na yababa maudoidi ta kwa saedikwaidi, na mulidiyena meta komiu ede sola kwa totolo ma bayaomiu.

¹⁴ Unai bena kwa tolobayao, na hedehedede mamohoina ye hemala kami dagilolo kwa kauhekahini duwaduwalimiu ne unai, yo miyamiya dudulaina ye hemala nuwapoumiu kana laugudugudu, ¹⁵ na kaelaulaumi kana suma ede nuwadaumwali wasana namwanamwana kwa hai, meta kwa nonohakalili. ¹⁶ Teina ginauli ta mulidiyena meta sunuma kwa hai ye hemala yomi yesi na unai kabo gonowana tauyababa yona wamali kalapulupululudi kwa hebosodi. ¹⁷ Na Yaubada yona kabihemauli kwa hai kulumiu ne kadi laugudugudu, yo Yaluwa Tabuna yona kelepa kwa hai, iya ede Yaubada kalinana tabuna.

¹⁸ Na Yaluwa Tabuna ye saguigomiu na huya maudoina yomi tapwalolo yo kaibwada maudoidi kwa ginaginalidi. Na teina nuwatu ta debanaena bena kwa nonoha yo kwa silisiliyata na huya maudoina kwa tapwatapwalolo Yaubada yona tamowai maudoidi hesabadi. ¹⁹ Hinage yogu kwa tapwalolo, to huyana ya hedehedede meta Yaubada kabo hedehedede ye haidima, na udiyedi kabo wasa namwanamwana nuwanuwatudi saesaedi maudoidi ya hededehehemasalahadi ma nuwabayaogu. ²⁰ Yau meta wasa ta tauhededehehemasalahana na seniye na se kaugau. Yogu kwa tapwalolo kabo taba nige ya matausi na yogu hededehehemasalahana ya ginaulidi, matawuwuna kagu paisowa ede teina.

Laukaiyoni hedehedededi

²¹ Tikikasi, iya kagu kaha ya gadosisiyei yo Yaubada kana paisowa ta unai tau-paisowatahitahi, iya kabo ginauli maudoidi wasadi ye hededededi kalimiuwai, unai kabo yogu miyamiya ta yo saha ya ginaginalidi kabidi kwa kata. ²² Teina nuwatu ta hesabana ede ya hetamaliyawa, unai kabo kao saha unai ka miyamiya ta kabidi kwa kata yo kabo hedehedede ta udiyedi ye hededehebayaogomiu.

²³ Kagu kahao, [*gehena ta unai*], nuwadaumwali yo gadosisi ma sunumana Yaubada Tamada yo yoda Guiyau Yesu Keliso udiyedi se laowa kalimiuwai. ²⁴ Yoda Guiyau Yesu

Keliso taba yona kabinamwa ye tole komiu taugadosisiyeina yomi gadosisi nige kana siga ne kalimiuwai.

Pilipi

Paulo yona leta ye lau ekalesiya Pilipi unai taumiya udiyedi Leta ta hededehemasalhana

Teina buka ta meta apostolo Paulo yona leta ye lau ekalesiya Pilipi magaina unai taumiya kalidiyena. Paulo yona huyaena Pilipi meta magai saesaena teha Masedoniya unai. Bolimai 46 o 48 AD unai Paulo dubu ye hetubu Pilipi unai (Apostolo 16:12-40). Teina leta ta Paulo ye kuli bolimai 61 AD unai, huyana iya se kabihekahini magai lakilakina Loma unai (Apostolo 28:16,30, Pilipi 1:13).

Lahinai di ekalesiya Pilipi unai Paulo se sagui kai yo gogo udiyedi (Pilipi 4:18), yo hinage yona se tapwatapwalolo (Pilipi 1:19). Na leta ta unai Paulo ye lautokiyeyidi, yo hinage ye hededehemasalaha meta ye gadosisikaliliyeyidi (Pilipi 4:1). Nuwanuwatu hekadiyo leta ta unai meta teina:

(1) Paulo ye hekatadi nuwadobidobi mamohoina kana kao doha saha (Pilipi 2:3-4).

(2) Lauhekatalupolupo debadiyena Paulo ye guguyaidi (Pilipi 3:2).

(3) Paulo ye hededehebayaodi bena yodi sunuma se tolekeseagai Yesu unai (Pilipi 1:29).

Buka ta hedehededena lakilakidi

• Lautoki yo tapwalolo 1:1-11

• Paulo yona henuhenuwa saesaena meta taba Yesu wasana ye laulau 1:12-30

• Keliso ye hekitada nuwadobidobi meta saha 2:1-18

• Timoti yo Eapolodaitasi wasadi 2:19-30

• Idohagi kabo Yaubada ye kitahenamwada 3:1-4:9

• Paulo ye lautokiyeyidi yodi kainauya hesabana 4:10-20

• Lautoki 4:21-23

Lautoki

¹ Paulo yo Timoti, kai meta Keliso Yesu yona heyayai tauhaidi na leta ta ka kuli ye lau Keliso Yesu taukawamamohoina kalidiyena, siya dubu babadadi yo dubu diyakonadi yo Yaubada yona tamowai maudoidi Pilipi unai taumiya.

² Taba Yaubada Tamada yo Guiyau Yesu Keliso yodi kabinamwa yo nuwadaumwali se laowa kalimiuwai.

Paulo yona lautoki yo yona kaibwada Yaubada unai

³ Huyana ya nuwatuigomiu meta Yaubada ya laulautokiyeyi hesabamiu. ⁴ Maudoimiu yomiu ya tapwatapwalolo na yogu tapwalolo maudoidi udiyedi ne meta ya tapwatapwalolo ma gwaugwauyalagu, ⁵ matawuwuna ede yomi haisagusagu wasa namwanamwana paisowana ta unai meta huya bagubaguna wa unai na ye laoma ee teina. ⁶ Yaubada kalimiuwai paisowa namwanamwana ye hetubu, na nuwagu ta ye bayao meta iya kabo paisowa ne ye hekesegai ye lau ee gehena ne, yo ye lau ee Keliso Yesu yona uyoma mayadaina ye lage.

⁷ Ye dudulai ede maudoimiu ne doha teina ya nuwatuigomiu, kaniyona ede komiu meta nuwagu ta unai, huyana numatutugudu unai ya miyamiya ta o wasa namwanamwana ya laulaugudugudui yo ya hedehedehemasalaha. Huya maudoina meta komiu yo yau Yaubada yona kabinamwa unai ta miyakesega. ⁸ Yaubada kabigu ye kata ede Keliso Yesu yona gadosisiyena meta ya nuwanuwatukaliliyeigomiu.

⁹ Na yogu tapwalolo ede teina, taba yomi haigadogadosisi ne ye laki ye lau yo yomi nuwatulobai yo nuwanuwatu gabwagabwatumdi nuwamasalahadi kalimiuwai.

¹⁰ Unai kabo gonowana kwa hekasa ginauli saha se namwakalili. Kabo yomi miyamiya se a'a yo nige kabahegilugomiu hesau Keliso yona huya'uyoma mayadaina ne unai,

¹¹ na miyamiya dudulaidi Yesu Keliso unai se laoma ne se hemwayaugomiu. Unai kabo noko yo hedebasae se sae Yaubada unai.

Paulo se tole numatutugudu unai wa meta wasa namwanamwana ye sagui

¹² Kagu kahao, ya henuwa bena kabina kwa kata, saha ye tubu kaliguwai ta meta kabo unai wasa namwanamwana lauguguyaeina ta ye laki ye lau. ¹³ Na inai tau'iyala tamowaidiyao siya Sisa yona numa taukitahetetena** yo tamowai maudoidi wasagu kabina se kata ede yau ta meta Keliso sunumaeina debanaena se tolegau numatutugudu ta unai. ¹⁴ Numatutugudu unai se tolegau ta debanaena ede kagu kahao se bado yodi bayao se lobai Guiyau unai na Yaubada kalinana ta se hedehedehemasalaha na kalidiyena meta nige matausi hesau.

¹⁵ Na luwadiyena meta tamowai hekadi Keliso wasana se lauguguyaei ma kaikalo-magigilidi yo ma haihaikabidi, na hekadiyo meta laulau namwanamwadi yo dudulaidi udiyedi se lauguguya. ¹⁶ Tamowai ta meta se lauguguya ma gadosisidi, kabigu se kata meta yau ede numatutuguduyena, matawuwuna wasa namwanamwana ta kabalauguduguduina debanaena. ¹⁷ Na tamowai bagubagunadiyao wa meta se bom se nuwatu'uyoidi, nige ma nuwamamohoidi na Keliso wasana se lauguguyaei, na yodi nuwanuwatu ede numatutugudu ta unai ya miyamiya na bena taba se hepilipiligau. ¹⁸ Na yau meta nige ya modekalili. Kabo taulaulupolupo o tauhedehededemamohoi, na nuwanuwatu saesaena ede Keliso wasana se lauguguyaei. Unai ede ya gwaunya.

Na yau meta taba ya gwaugwaunya huya maudoina, ¹⁹ matawuwuna kabina ya kata meta saha ye tubu kaliguyena ta meta ye hemala kabayailihaigau, yomi tapwalolo debadiyena yo Yesu Keliso yaluwana ye saguigau. ²⁰ Yogu henuwa lakilakikalilina ede taba tabu ya mwadine, na ya nuwabayao doha huya maudoina, na Keliso ya hedebasaei taugu ta unai, yogu maumauli ta unai o yogu boita unai. ²¹ Matawuwuna yau meta Keliso unai ya miyamiya, na ya boita ede kabo namwanamwa ya lobai. ²² Na ena taba sola ma maumauligu teina taugu ta unai, kabo yogu paisowa ta sola ma kaniyona ye laulau.

Unai saha bena ya kaisunuwai? ²³ Nuwanuwatu labui ta udiyedi meta nuwagu ta ye haikabikalili: Ya henuwakalili bena taba ya lau Keliso unai - iya meta ye namwakalili ede. ²⁴ Iyamo ye namwakalikalili ede taba komiu hesabamiu yau bena ya maumauli. ²⁵ Teina kabina ya katakalili, unai ede kabo sola ya miyamiya na lauhekata ta unai ya hebahebayaogomiu na maudoimiu kwa kini kwa sae yo kwa gwaunya sunuma ta unai. ²⁶ Na yogu henuhenuwa ede taba yogu uyowa yo yogu miya kalimiuyena ne unai kabo kwa gwaunaladikwakalili Keliso Yesu yona sagu debanaena.

Ekalesiya yodi miyamiya bena se namwa

²⁷ Na nuwatu saesaena ede teina: Bena yomi miyamiya kwa miyahedudulaidi na unai kabo Keliso wasana namwanamwana ta kawanamwanamwaeina yo hekasisina ye masalaha. Ena kabo ya laowa ya kitagomiu o yogu miyabasi ta unai na wasamiu mo ya lapui, meta kabo kabina ya kata ede komiu kwa tolobayao yaluwamiu kesega yo nuwamiu kesega, na maudoimiu kwa iyalagogoi wasa namwanamwana sunumana ta hesabana, ²⁸ yo tauhewaiunugomiu yodi hineli maudoidi meta nige gonowana kwa matausiyeidi. Teina unai kabo se kitalobai'uyoidi meta se laulau yodi heyababa hesabana, na komiu meta kabo kabihemauli kwa lobai Yaubada unai. ²⁹ Yaubada ye kainauyaigomiu ede yomi sunuma kwa tole Keliso unai, na nige tenem ye bom mo, na hinage Keliso hesabana kwa kamkamna. ³⁰ Matawuwuna haikabi kesekesegadi udiyedi

** **1:13:** Siya Sisa yona numa taukitahetetena: Magai Loma unai, yodi wasawasa Sisa yona numa gunina ne unai meta numatutugudu hesau, na Paulo se tole temenai. Unai numatutugudu wa tautologuduina wa, siya ede Sisa yona numa taukitahetetena.

kwa haihaikabi ta meta kwa kitadiko siya ede hinage kaliguwai yo wasa kwa lapui meta yau ede sola udiyedi ya haihaikabi.

2

Bena ta nuwadobidobi doha Keliso

¹ Wasamiu meta ye namwakalili: Keliso unai kwa patulau ne unai hededehebayao kwa hai, yona gadosisi ne unai henuwabiga kwa lobai, Yaluwa unai kwa labini-namwanamwa, yo gadosisi yo katekamkamna kalimiuwai. ² Na ya henuwa bena yogu gwauyala kwa helaki nuwakesega unai, yo gadosisi kesegana ta unai yo yaluwamiu kesega yo nuwanuwatu kesega unai. ³ Tabu kwa bom nuwanuwatumiu yo nuwasae-saegaibu unai na saha hesau kwa ginauli, na bena nuwadobidobiyena kami kahao kwa nuwatukaliliyeidi na kabo komiu. ⁴ Tabu komiu kwa bom yomi namwanamwa hesabadi kwa modekalili, na taba kami kahao yodi namwanamwa modedi bena kwa kitalau udiyedi.

⁵ Yomi miyamiya meta taba gonogonowadi ede doha Keliso Yesu yona miyamiya.

⁶ Keliso Yesu meta Yaubada,
na iyamo nige ye tolobayao unai na taba iya maiyana Yaubada gonogonowadi.

⁷ Yona dudulai maudoina ye tolehesuwala
na ye hemala heyayai tauhaina.

Kana kao gonogonowana doha tamowai hekadiyo
na se kitalobai meta iya tamowaimolosi.

⁸ Teina unai ye toledobidobiyei'uyoi
na ye kawakabi ye lau ee ye boita,
iya sataulo unai ye boita.

⁹ Tenem debanaena Yaubada ye toleisini kabatuli saesaekalilina unai
na hesana ye mosei meta hesa maudoidi ye saedikwaidi,

¹⁰ na galewa ne unai yo kaiyaulina ta yo gunina ne unai meta
Yesu hesanaena tuli maudoidi kabo se tulibono,

¹¹ yo memena maudoidi kabo se hededehehemasalahi ede Yesu Keliso iya Guiyau,
na unai noko yo hedebasae ye sae Yaubada Tamada unai.

Ekalesiya meta doha mala tanoubu ta unai

¹² Kehaguwao, huyana yau maidamiu ta miya meta huya maudoina kwa kawakabi, na huyana ya miyasuwalaegomiu meta kwa kawakabikalili. Unai bena Yaubada kwa matausiyeyi yo kwa hekasisiyeyi na taba yomi mauuli unai kwa hemasalahi'uyoigomiu meta ye gilihaigomiu, ¹³ matawuwuna Yaubada iya kalimiuyena ye paipaisowa, unai ede yona nuwatu kwa talamyeyi yo hinage kwa ginauliwatanidi.

¹⁴ Ginauli maudoidi kwa ginaulidi meta tabu ma hetahetalapilimiu yo tabu ma haihaikawayagalamiu. ¹⁵ Unai kabo nige gonowana kabahededehegilugomiu, yo kwa a'a, yo komiu Yaubada natunao nige yomi laupwano hesau, na kwa miyamiya tamowai yodi nuwanuwatu gewagewadiyao yo yodi miyamiya se yababakalili luwadiyena. Teina unai kabo yomi mala kwa hesinadi kalidiyena doha kipwala masigili unai, ¹⁶ matawuwuna ede mauuli hedehededena unai kwa tolobayao. Kabo gonowana unai ya gwauyala Keliso yona mayadai ne unai, kaniyona ede yogu paisowa** luwamiuyena meta nige ya ginauligaibuidi. ¹⁷ Na ena taba yau doha numanuma kaitalasamna

** **2:16:** Paisowa: Paulo heyaheyasoni ye hepaisowa, iya ede ya kailakwa, yo hinage hedehedede dudulaina ye hepaisowa ede, ya paisowabayao. Na nuwanuwatudi meta kesega, unai hedehedede dudulaina mo ka kuli lausoiso ne unai.

se inigabaei yomi sunuma yo yomi paisowa kaitalasamdi kewadiyena,** meta unai kabo nuwagu ye namwa na ya henuwa bena yau yo komiu ta gwauyalagogoi. ¹⁸ Yo gonogonowana doha hinage komiu bena nuwamiyao se namwa na komiu yo yau ta gwauyalagogoi.

Timoti yo Epapolodaitasi wasadi

¹⁹ Teina nuwatu ta debanaena yogu midi ya tole Guiyau Yesu unai na nige bayaona kabo Timoti ya hetamaliyawa kalimiuyena. Na ya henuwa ede taba ye uyoma ne unai kabo wasamiu yogu ye hedehedede na unai nuwagu ye hebayao. ²⁰ Matawuwuna kaliguwai ta nige tamowai hesau doha Timoti. Iya meta yomi miyanamwanamwa nuwanuwatuna ye lakikalili kalinawai. ²¹ Na tamowai maudoidi meta se bom mo se nuwatu'uyoidi na nige se modelau Yesu Keliso yona nuwanuwatu udiyedi. ²² Na Timoti yona hemasalaha'uyoina kalimiuyena meta kabina kwa kata iya taupaisowa namwanamwana. Matawuwuna maiyagu ka paisowagogoi na wasa namwanamwana ka lauguguyaei doha natu ma tamana se paisowagogoi. ²³ Unai yogu nuwanuwatu ede, ena saha kabo se tubu kaliguwai ne kabidi ya kata, kabo iya ya hetamaliyawa. ²⁴ Na yau yogu nuwabayao Guiyau unai meta nige bayaona kabo hinage ya laowa ya kitagomiu.

²⁵ Na ya nuwatui taba Epapolodaitasi ya hetamali ye uyowa kalimiuwai. Iya kagu kaha yo maiyagu taupaisowa yo tau'iyala, yo hinage wasamiu iya yogu tauhedehedede ede, kwa hetamaliyama bena yogu deha unai ye saguigau. ²⁶ Ye nuwayababa matawuwuna kwa lapui meta iya ye kasiyebwa, na ye henuwakalili bena taba ye kitagomiu. ²⁷ Na mamohoina meta ye kasiyebwa ye lau ee musamusana kabo ye mwalo, na Yaubada iya ye katekamkamnaei. Nige iya ye bom mo, na yau hinage ye katekamkamnaeigau, matawuwuna nige ye henuwa bena nuwakamkamna lakilakina hesau ya hekalo'uyoi. ²⁸ Unai ede ya henuwakalili bena taba ya hetamaliyawa kalimiuyena, na kwa kita'uyoi meta kwa gwauyala na yau kabo nuwagu ye talu. ²⁹ Guiyau hesanaena Epapolodaitasi taba kwa hailobai yo kwa yogaisini ma gwauyalamiu. Tamowai doha iya taba kwa hekasisiyeidi, ³⁰ matawuwuna Keliso yona paisowa unai musamusana kabo ye boita. Komiu ye lauhedamaigomiu na yona mauli ye talamgabaei na ye saguigau.

3

Taba Yesu sunumaeina ta kabihakahini ye lau ee ta lage yoda kabakitalau unai

¹ Kagu kahao, Guiyau debanaena bena kwa gwauyala. Nuwanuwatu kesekesegadi ya kulidiko wa na ya kuli'uyoidi se laowa kalimiuyena meta nige yona pilipili hesau kaliguwai. Teina ta meta kabasaguigomiu.

² Kwa kitahetetegomiu tamowai bikibikidi kadi kao doha kedewa yo yababa tauginaulidi udiyedi, siya tatao yaudi taunigwanigwahaidi.** ³ Matawuwuna kita meta pelitome dudulaina tauhaina ede. Kita meta Yaubada ta taba'ohui Yaluwanaena, yo

** **2:17:** Ena taba yau doha numanuma kaitalasamna se inigabaei yomi sunuma yo yomi paisowa kaitalasamdi kewadiyena: Numa Tabuna unai Dius yodi kaitalasam meta suisui se unuhemwaloi na se gabu, maiyana pwalawa yo oela yo waina. Ginaulidi ne nowonowoidi meta Yaubada ye hinelinonohaidi Numela 15:3-10 unai. Na Paulo ye wane, ekalesiya Pilipi unai yodi kainauya meta doha kaitalasam suisuina, na iya yona apostolo paisowana ye heyaheyasoniyei waina unai, na ginauli labui se paisowagogoi meta kabo kaitalasam namwanamwana Yaubada matanaena na unai Yaubada se hedebasaei. **

** **3:2:** Tamowai bikibikidi kadi kao doha kedewa: Paulo ma kouyalayalana na hedehedede bayabayaona ye tole taulauhekatalupolupo wa udiyedi. Ye kataidi siya kedewa, kaniyona ede tamowai bikibikidi. Dius tamowaidi kalidiyena kedewa meta suisui siusiuna, na hesa kedewa se tolelai nige Dius tamowaidi kalidiwai. Paulo nuwanuwatu ta ye bui na ye hedede taulauhekatalupolupo Dius tamowaidi udiyedi se laoma wa, siya bena kedewa. Yo hinage ye wane siya tatao yaudi taunigwanigwahaidi. Teina unai yodi pelitome lauhhekataena yo kabikabina ye hededeheyaheyababa. Matawuwuna se lauhhekata ena dagela tamowaina loheya hesau ye nuwabui meta nige gonowana iya Yaubada yona tamowai kana siga pelitome ye haibagunaei.

Keliso Yesu saha ye ginauliyako hesabada wa unai ta gwauyala. Na nige ta nuwabayao tauda yodi kabikabi namwanamwadi ne udiyedi.

⁴ Iyamo yau gonowana ya nuwabayao taugu yona kabikabi namwanamwadi ne udiyedi. Ena tamowai hesau ye nuwatui meta iya gonowana yona sunuma ye tole tauna yona kabikabi udiyedi, meta yau ya bagunakalili. ⁵ Matawuwuna mayadai hehaligigi-haiyonana unai se hepelitomegau, yau Isalaela bodana hesau, kagu kulutubu ede Beniyamina, unai yau Hebelu tamowaina mamohoina. Laugagayo yona tehawai meta yau Paliseya bodana ⁶ na ya kaipatekalili bena laugagayo maudoidi ya miyawatanidi. Unai ekalesiya bodadi ya hekamkamnadi. Laugagayo miyawatanina laulauna dudulaina unai meta nige kabahegilugau hesau.

⁷ Na ginauli maudoidi ne ya kitahesae'useidi wa meta Keliso debanaena ya kitadobidobiyeidi. ⁸ Yo hinage ya kitadi meta nige gonowana se saguigau, matawuwuna saha ye saekalili kaliguwai ede bena yogu Guiyau Keliso Yesu kabina ya kata. Iya debanaena ginauli maudoidi wa ya kabigabaeidi. Nuwanuwatudi kaliguyena meta se hemala mosomosogaibu, na saha ya henuwakaliliyei ede Keliso, ⁹ yo bena ya patunamwanamwa iya unai. Nige bena laugagayo unai ya tolo na ya bom yogu bayaoyena yogu miyamiya se dudulai Yaubada matanaena, na yogu sunuma Keliso unai debanaena Yaubada ye kitahenamwagau. Teina meta Yaubada yona kainauya kaliguwai Keliso sunumaeina** debanaena. ¹⁰ Ya henuwa bena Keliso kabina ya kata yo yona tolo'uyo gigibwalina kabina ya kata yo hinage bena Keliso ya kamkamnasagui na yogu mauli ya talamgabaei na ya boita doha iya, ¹¹ na unai taba boita unai kabo Yaubada ye hetolo'uyoigau. ¹² Nige doha bena [*tolo'uyo kainauyana ya haiyako o ginauli hekadiyo ne se masalahako*] o ya lageko yogu kabakitalau unai. Na sola ya kaikaipate na saha Yaubada ye kabinonohai wa hesabana ya heloi na bena ya hai, matawuwuna teina hesabana Keliso Yesu ye haigauko. ¹³ Kagu kahao, nige ya kita'uyoigau doha heloi kainauyana ne ya haiyako. Na ginauli kesega kabo ya ginauli ede, nuwanuwatu beyabeyadi ya nuwagabaeidi na ya heloi ya lau saha matagu ne unai hesabana. ¹⁴ Ya kaipate yo nuwagu ya tolekesegai yogu heloi ta unai. Kaniyona ede Keliso Yesu debanaena Yaubada ye yoganeigau bena kainauyana ne ya hai, iya ede mauli nige kana siga galewa ne unai.

¹⁵ Na kaiteyadi komiu kwa matuwako bena ginauli ta yomi nuwatulobaidi doha yau. Na ena nuwanuwatu hekadi kwa nuwatu'udoiyeyidi, meta Yaubada kabo hinage ye hemasalahadi kalimiuwai. ¹⁶ Na saha kabina ta katako wa meta bena udiyedi ta miya.

Paulo yona miyamiya bena se miyawatanidi

¹⁷ Kagu kahao, kwa haihebahebayao'uyoigomiu na saha ya miyamiyaeyidi ta kwa miyawatanidi. Yo tamowai miyamiya saha se kitahaidi kalimaiyena na udiyedi se miyanamwanamwa hinage kwa miyawatanidi. ¹⁸ Beyabeyana yomiu ya hedehe-edeke na teina hinage ya hedehehede'uyoi ma matasulugu, meta tamowai se bado Keliso yona sataulo ne se hewaiunu yodi miyamiya udiyedi. ¹⁹ Siya se laulau kadi heyababa hesabadi. Yodi yaubada meta bogadi, yo yodi didiga ede yodi laulau nuwamwadimwadinedi udiyedi. Yodi nuwanuwatu ede tanoubu ta ginaulidiyao mo udiyedi.

²⁰ Na kita yoda magari mamohoina ede galewa ne unai. Ta nayanaya bena temenai kabo taugilihaida ye laoma, iya ede yoda Guiyau Yesu Keliso. ²¹ Yona gigibwaliyena kabo ginauli maudoidi ye laedima yona lina guninaena.** Gigibwali ta unai kabo tauda dobidobidi yo basabasadiyao ta ye ginauli'uyoidi doha iya tauna didididigana ne.

** **3:9:** Keliso sunumaeina: Hedehehede ta kalina Giliki unai kaniyona hesau hinage, iya ede, Keliso yona kawakabi. Lausoiso unai hedehehedena kabo doha teina: Teina meta Yaubada yona kainauya kaliguwai Keliso yona kawakabi debanaena. ** **3:21:** Pilipi 2:10-11 ku hasili.

4

Paulo ekalesiya ye hededehebayaodi

¹ Kagu kahao, ya gadosisiyeigomiu yo ya henuwakalili bena ya kita'uyoigomiu. Komiu meta yogu kabagwauyala yo yogu kolona.** Kehaguwao, taba kwa tolobayao na tabu Guiyau kwa sigisigigabaei.

² Yodiya yo Sinitiki ya kaibwadaidi bena se nuwakesega Guiyau debanaena. ³ Na kowa, Sisigasi,** ya henuwa taba sinesineo labui ta ku saguidi, matawuwuna maid-aguwao ka paisowagogoi na Yesu wasana namwanamwana wa ka wasaduwaiyei – yodi labui ta yo Kelementi yo maidagu taupaisowa hekadiyo wa. Hesadi ede mauli bukana unai.

⁴ Guiyau debanaena taba kwa gwaugwauyala huya maudoina. Kabo ya hedede'uyoi ya wane, kwa gwauyala.

⁵ Huya maudoina yomi miyamiya bena se namwa yo kwa gadogadosisi tamowai matadiyena.

Guiyau yona laoma ede ye hanahanauma.

⁶ Tabu ginauli saha hesau hesabana kwa nuwanuwatukalili, na ginauli maudoidi udiyedi kwa tapwalolo na kwa kaibwada ma laulautokimiu na ginauli saha kwa henuwadi ne kwa hemasalahasaeidi Yaubada unai. ⁷ Na nuwadaumwali Yaubada unai ye laoma na kita maudoida nige gonowana ta nuwatulobai ne, iya kabo nuwamiu yo yomi nuwanuwatu ne ye kitahetetedi Keliso Yesu debanaena.

⁸ Kagu kahao, yogu guguya hedehedededi gehegehedi ede teina: Nuwanuwatu mamohoidi, hekahekasisi, nuwanuwatu dudulaidi, nuwanuwatu a'adi, tamowai kaba-henuwanamwadi nuwanuwatudi, miyamiya tamowai kabo se kitahenamwadi, yo mauli miyamiyadi hekadi se namwakalili yo gonowana ta nokoeidi, meta bena kwa nuwatulobaidi yo kwa nuwanuwatuidi. ⁹ Na saha ya hekatagomiu o kaliguyena kwa hai o kwa lapuhai o kwa kitahai meta bena kwa haidi na kwa kaipate bena kwa miyawatanidi. Na nuwadaumwali Yaubadana meta iya kabo maidamiu.

Paulo ye lautokiyeidi yodi kainauya hesabana

¹⁰ Guiyau debanaena meta ya gwauyalalakalili, kaniyona ede gonowana kwa nuwatu'uyoigau. Mamohoikalili, hesabagu meta kwa nuwanuwatukalili, iyamo nige yomi solasola gonowana unai kabo bena kwa saguigau. ¹¹ Teina ta ya hedede nige bena kaniyona ede ya henuwasagu, matawuwuna ginauli saha kaliguwai o nige kaliguwai meta miyamiyadi udiyedi ya manasako. ¹² Deha meta kamnana kabina ya kata, yo huyagogo meta kamnana kabina ya kata. Hinage miyamiya udoi'udo'i yodi namwa yo yababa meta kabidi ya kata, ya kaikai bogagu ye sese o ma hasaligu, yogu gogo se bado o ya deha. ¹³ Yau gonowana ginauli maudoidi ta ya ginaulidi Keliso debanaena, iya yogu bayao tauhaiyamana ede.

¹⁴ Iyamo komiu kwa namwakalili ede yogu pilipili ta udiyedi kwa saguigau.

¹⁵ Na komiu Pilipi kabina kwa kata meta lahinaidi wasa namwanamwana ta ya laeyawa kalimiuyena yo huyana teha Masedoniya ya laugabaei meta nige dubu hesau kaliguyena ye haisagusagu na komiu kwa bom mo kwa saguigau. ¹⁶ Hinage huyana yau Tesalonika unai na sagu ya henuwadi meta komiu kabasaguigau kwa hetahetamalidima. ¹⁷ Nige yogu nuwatu ede bena kabo tamowai se kainauyaigau, na yau ya henuwa ede bena yomi kaikainauya ne maisana namwanamwana kwa hai. ¹⁸ Na yau meta ginauli maudoidi ya henuwadi wa ya haidiko yo hinage hagahagadi. Epa-polodaitasi unai yogu kainauya kwa hetamalidima wa ya haidi meta udiyedi ede yogu

** **4:1:** Kolona meta heloikailakwa unai taulagebaguna, iya yona kainauya. Paulo yona leta tauhaina Pilipi unai kolona unai ye heyaheyasoniyeidi matawuwuna siya meta yona paisowa namwanamwana tauhemasalahana.

** **4:3:** Hesa Sisigasi kaniyona ede, helegu taupaisowa. Buka hekadiyo hesa ne nige se hai doha tamowai hesana, na kaniyona mo se kuli lausoi unai.

lobai wa kwa koisinikaliliyeidi. Na se hemala kaitalasang panena namwanamwana na Yaubada ye kawanamwanamwaei yo ye henuwanamwa. ¹⁹ Na yogu Yaubada kabo iya yona gogo saesaedi udiyedi kami henuhenuwa maudoidi ne ye haidiwa Keliso Yesu debanaena.

²⁰ Noko yo hededetausae taba se sae Yaubada Tamada unai huya maudoina ye lau ee nige kana siga. Mamohoi.

Lautoki gehegehed

²¹ Yogu lautoki se lau Yaubada yona tamowai maudoidi udiyedi, siya Keliso Yesu unai tausunuma.

Yo hinage kada kahao siya maidaguwao taumiya yodi lautoki se laowa kalimiuwai.

²² Yaubada yona tamowai maudoidi yodi lautoki se hetamalidiwa yo siya Sisa yona numa tamowaidiyao hinage.

²³ Yoda Guiyau Yesu Keliso yona kabinamwa bena yaluwamiu ne udiyedi. Mamohoi.

Kolose Paulo yona leta ye lau ekalesiya Kolose unai taumiya udiyedi

Buka ta hededehemasalahanana

Kolose meta magai lakilakina teha Eisiya unai. Kolose unai Yesu wasana tauwasaduwai bagubagunana nige Paulo, na Epapalasi (Kolose 1:7). Iya Paulo yo Timoti maiyanao, huyana ekalesiya Kolose unai taumiya yodi leta ta se kuli (Kolose 4:12-13, Pilemona 23). Leta ta yona huyakulina bolimaina nuwana 64 AD, na Paulo meta numatutugudu unai ye miya, magai lakilakina Epeso unai.**

Kolose unai dubu luwadiyena ekalesiya se badokalili siya dagela tamowaidi udiyedi se tubu na se nuwabui na Yesu se sunumaei (Kolose 1:27). Na muliyena taulauhekata hekadiyo se laoma na se lupoidi na se hekatadi bena Dius yodi Sabati laugagayona yo kaihekahekasisi laugagayodi se miyawatanidi (Kolose 2:16). Hinage se hedede bena Yaubada yo tamowai duwaduwalidiyena meta yaluyaluwa bayabayaodi, hekadi namwanamwadi doha anelu, yo hekadi yabayababadi doha demoni, na mauidi ne tamowai yodi mauli udiyedi se paipaisowa. Debanaena ekalesiya taba bena hinage yaluyaluwa ne se taba'ohuidi yo se henuwanamwadi (Kolose 2:18). Unai ede Kolose unai tausunuma hekadiyo se nuwapwanopwano yodi sunuma wuwuna ede saha, yo miyamiya dudulaina saha, yo taba'ohu dudulaina kana kao saha (Kolose 2:20-23).

Unai Paulo leta ta unai ye kulihemasalahanana meta Yesu ye saekalili (Kolose 2:9-10), yo ye guguyaidi taba se kitalau Yesu ye bom mo unai (Kolose 1:27-29, 2:6-7), yo tabu se taba'ohu anelu yo yaluyaluwa udiyedi, yo tabu se kitalau Dius yodi kabikabi udoi'udoi udiyedi. Yo Paulo hinage laulau dudulaidi ye hededehemasalahadi (Kolose 3:1–4:6).

Buka ta hedehededenana lakilakidi

- Lautoki 1:1-2
- Paulo Kolose yodi ye tapwalolo 1:3-14
- Keliso kana kao yo yona paisowa 1:15–2:23
- Ekalesiya mauidi miyamiyadi 3:1–4:6
- Paulo yo maiyana taumiya yodi lautoki se hetamalidi 4:7-18

Lautoki

¹ Yau Paulo, Yaubada yona nuwatu unai ye kaisunuwaigau Yesu Keliso yona apostolo. Kada kaha Timoti maiyagu leta ta ka kuliyawa ² komiu tausunuma Kolose unai taumiya kalimiuwai. Komiu meta Yaubada yona tamowai yo kama kahao Keliso sunumana debanaena, yo kwa tolobayao sunuma unai. Taba Tamada Yaubada yona kabinamwa yo yona nuwadaumwali ye lediwa kalimiuwai.

Lautoki yo tapwalolo

³ Huya mauidina yomiu ka tapwatapwalolo meta Yaubada, iya Guiyau Yesu Keliso Tamana, ka laulautokiyei, ⁴ matawuwuna ede wasamiu ka lapui meta yomi sunuma Yesu Keliso unai ye bayao, yo yona tamowai mauidi kwa gadosisiyeidi. ⁵ Yomi sunuma yo yomi gadosisi ta wuwudi ede kainauya Yaubada ye tolenonohaiyako galewa ne unai na kwa nayanayai ma nuwabayaomiu. Kainauya ta wasana kwa lapuiyako huyana wasa mamohoina ye laowa kalimiuwai, iya ede wasa namwanamwana.

** :: **Paulo ... magai lakilakina Epeso unai:** Tausonoga hekadiyo se kaimasi nuwana magai Loma o Sisaliya unai, matawuwuna kabina ta kata meta temenai Paulo numatutugudu unai se tole (Apostolo 23–25, 28:16), na nige wasa hesau ta hai meta Paulo bena Epeso unai se tole numatutugudu unai. Iyamo Paulo yona huyakadau ka nuwatuidi ede ka kaimasi meta iya Epeso unai na leta ta ye kuli. Hinage huya se bado magai udoi'udoi udiyedi Paulo se tole numatutugudu unai (2 Kolinito 11:23).

⁶ Tanoubu ta maudoina unai wasa namwanamwana ta ye kini ye laki ye lau, yo ye kaniyo, doha ede saha ye tubu komiu kalimiuyena ta. Yona kabahetubu meta huyana wasa namwanamwana ta kwa lapui na Yaubada yona kabinamwa wasana mamohoina kwa nuwatulobai. ⁷ Wasa ta tauhekatagomiu ede Epapalasi, yoma hali taupaisowa namwanamwana, na ka gadosisiyei. Iya meta Keliso yona taupaisowatahitahi tamowaina hesau, iya ede yomai ye paipaisowa. ⁸ Yomi gadosisi Yaubada Yaluwana ye haiyawa wa iya ye hededehehemasalaha kalimaiyena.

⁹ Unai ede huyana wasamiu ka lapui na ye laoma meta nige ka kaiyawasi, na huya maudoina yomiu ka tapwatapwalolo. Ka kaikaibwadasae Yaubada unai bena Yaluwa Tabuna yona sibasiba yo nuwamasalaha maudoina unai ye hemwayaugomiu na Yaubada yona nuwatu kabina kwa kata. ¹⁰ [*Yoma tapwalolo ta kaniyona ede*] bena yomi mauli miyamiyana maudoina kwa miyahedudulai Guiyau yona kitahenamwa unai, na iya nuwana kwa henamwa yomi laulau udoi'udoi udiyedi, [*kana kao ede doha teina:*]

Yomi paisowa namwanamwadi udiyedi bena kaniyodiyao se tubu, yo Yaubada nuwatulobaina kalimiuyena bena ye laki ye lau.

¹¹ Yona gigibwali saesaena unai bena ye hebayaogomiu na kwa nuwabayao yo nuwamiu se talu.

Na ma gwaugwauyalamiu ¹² Tamada kwa laulautokiyei.

Iya dudulai ye leyawa na yona kainauya yona tamowai udiyedi gonowana kabo kwa hai galewa ne unai. ¹³ Yo hinage iya masigili yona gigibwali unai ye gilihaida na ye tolelaeda Natuna ye gadosisi'usei wa yona basileiya unai [*na yona kitahetete yo yona woyawoya unai ta miyamiya*]. ¹⁴ Na Natuna yoda yababa ye nuwatugabaeidi na ye yailihaida.

Keliso ye saekalili

¹⁵ Yaubada nige gonowana ta kita, na Natuna mo gonowana ta kita. Iya kana kao gonogonowana doha Tamana, ye baguna na kabo Yaubada nimana ginaulidi maudoidi, ¹⁶ matawuwuna Yaubada ginauli maudoidi iya kalinawai ye hetubudi, galewa yo tanoubu ginaulidiyao, ginauli masamasalahadiyao yo ginauli wadawadamdi, doha wasawasa yo gigibwali yo tanutanuwagao yo tauloina udoi'udoi. Ginauli maudoidi ta iya ye ginaulidi, yo ginauli maudoidi meta iya yona. ¹⁷ Iya ye tububaguna na kabo ginauli maudoidi, yo iya debanaena ginauli maudoidi se miyamiya yo se namwanamwa.

¹⁸ Iya meta kulukulu, na iya tauna ede ekalesiya bodana. Iya mauli kabahetubuna, yo tauboiboita udiyedi ye tolo'uyobaguna, bena ginauli maudoidi udiyedi ye baguna, ¹⁹ kaniyona ede Yaubada ye hineli bena iya ye bom kana kao mamohoina maudoina ye miyahai Keliso unai, ²⁰ yo iya unai ginauli maudoidi tanoubu ta yo galewa ne udiyedi ye uyoidima kalinawai, na nuwadaumwali ye ginauli Keliso kwasinana unai, iya ede sataulo ne unai ye didima wa.

²¹ Huya bagubagunana unai meta komiu Yaubada kwa miyasuwalaei yo nuwamiu ne unai kwa hemala kana waiunu, kabahemasalahagomiu ede yomi laulau yabayababadi wa udiyedi. ²² Na Keliso meta tauna ne unai ye boita, na teina unai Yaubada ye kawakeha'uyoigomiu. Yona nuwatu ede bena ye haigomiu na matanaena kwa hemala yona tamowai,** nige yababa hesau, yo nige kabahegilugomiu hesau, ²³ ena yomi sunuma unai kwa tolodayao na wasa namwanamwana hededehesunumana wa nige kwa sigigabaei. Teina wasa namwanamwana ta, iya ede kwa lapuiyako yo se lauguguyaeyako tanoubu ta tamowaidiyao maudoidi udiyedi. Na yau Paulo wasa ta taupaisowaina yo tauwasaduwaiyaina ede.

Paulo yona paisowa dubu debanaena

** 1:22: Yona tamowai hededehehemasalaha meta Guiyau yona tamowai unai.

²⁴ Ya gwauyalalakili meta taugu ta unai hesabamiu ya kamkamna. Kamkamna udoi'udoit ta, siya meta Keliso debanaena, na ya hekalodi kana siga hekamkamna ta se gehe, na unai Keliso tauna ya saguidi, siya ede yona dubu. ²⁵ Yau dubu yodi taupaisowa. Na Yaubada paisowa ta ye leyama bena iya wasana maudoina ya hededehe masalahamwanamwaei kalimiuyena. ²⁶ Yaubada wasana ta, iya ede yona nuwanuwatu saesaena nige ye hemasalaha isi bagubagunadi udiyedi, na teina mayadai ta unai ye hemasalaha yona tamowai udiyedi. ²⁷ Yaubada ye henuwa bena yona nuwanuwatu saesaekalilina yo wasawasana ye hemasalaha siya kalidiyena. Yona nuwatu ta meta komiu dagela tamowaidiyao nuwanuwatumiu, iya ede: Keliso meta hinage komiu dagela tamowaidiyao maidamiu. Na Keliso debanaena komiu hinage gonowana kwa nuwabayao meta kabo Yaubada unai didiga kwa hai.

²⁸ Na kai meta Keliso wasana ta ka hededehe masalahaha, na sibasiba Yaubada ye leyama ta unai tamowai maudoidi ka guguyaidi yo ka hekatanamwanamwaedi, bena maudoidi se hemala tamowai lakilakidi sunuma unai, Keliso debanaena. ²⁹ Teina nuwatu ta unai ya kaipatebayao na Keliso yona bayaoyena ya paisowa, iya ede yogu mauli unai ye paipaisowa ma bayaona.

2

¹ Komiu yo Laodisiya unai taumiya yo hinage tamowai hekadiyo siya sola nige kagu kao se kita, ya henuwakalili bena kabina kwa kata meta ya kaipatebayao hesabamiu, ² bena nuwamiyao se bayao yo gadosisi unai kwa hebodakesega, yo bena ginauli maudoidi kwa nuwatulobainamwanamwaedi, na Yaubada yona nuwanuwatu saesaena kabina kwa kata, iya ede Keliso. ³ Iya kalinawai meta sibasiba yo sonoga maudoidi doha wasawasa wadawadamdi.

⁴ Nuwatu ta ya hededehe kalimiuyena, na tabu tamowai hesau yona hededesonoga udiyedi ye lupohaigomiu. ⁵ Buluma unai ya miyasuwalaegomiu, na iyamo yogu nuwanuwatu ta unai yau ede maidamiu. Ya gwauyala matawuwuna ya kitagomiu meta yomi miyamiya se dudulai yo yomi sunuma Keliso unai ye bayao.

Mauli mamohoina ede Yesu unai

⁶ Yesu Keliso kwa haiyako yomi Guiyau, unai iya bena kwa hemuhemuliwatani. ⁷ Kaiwa lamdi se dobi bwatano unai na kabo kaiwa ne se kinilakilaki, meta doha komiu bena Keliso unai kwa tolodayao.** Yomi sunuma se hekatagomiu wa unai bena kwa bayao, yo huya maudoina kwa laulautoki Yaubada unai.

⁸ Kwa kitakitanamwanamwa tabu tamowai hesau tanoubu ta sonogadi hedehededehe lupolupodi udiyedi ye woyahaigomiu. Yodi lauhekata ta meta kulutubu kabikabidiyao yo tanoubu ta laugagayodi lakilakidiyao udiyedi se tolo na nige Keliso unai. ⁹ Iyamo Keliso unai meta Yaubada ye miya. Iya kana kao maudoina ede ta kita Keliso tauna unai. ¹⁰ Na komiu meta Keliso ye miyahemwayaugomiu, na iya gigibwali yo tanuwaga maudoidi ye saedikwaidi. [*Taba nige ginauli saha hesau kwa henuwa'uyoi.*] ¹¹ Keliso unai komiu pelitome kwa haiyako,** kaniyona ede yomi mauli buluma ye tanuwagai wa, iya kwa tolehesuwala. Pelitome ta meta nige tamowai nimadiyena se ginauli, na Keliso ye ginauli ¹² huyana babatiso unai Keliso maidamiu se puluhike-segaigomiu.** Yo iya maidamiu kwa tolo'uyo matawuwuna yomi sunuma Yaubada yona gigibwali unai, iya Keliso boita unai ye hetolo'uyoi.

** **2:7:** Lausoisoit ta meta Paulo yona kulikulina doha teina: Lammiu bena se dobi Keliso unai na iya unai kwa kinilakilaki. ** **2:11:** Pelitome kwa haiyako: Taulauhekatalupolupo se laoma Kolose unai, yodi lauhekata meta bena ekalesiya loheloheyao maudoidi se hepelitomedi. Unai Paulo pelitome mamohoina ye hededehe masalahaha.

** **2:12:** Babatiso: Paulo yona huyaena babatiso yodi kabikabina ede waila unai se kabiheyolidobiyeidi na se kabihetolo'uyoidi.

¹³ Beyabeyana komiu meta boita unai, yomi laulau yabayababadi debadiyena, matawuwuna yomi mauli beyabeyana nige kwa hekaiyawasi.** Na huyana komiu boita unai meta Yaubada Keliso maidamiu ye hemaugomiu, na yoda yababa maudoidi ye nuwatugabaedi. ¹⁴ Yoda kaihagahaga pepwana ye hegiluda, kaniyona ede unai ta talam meta kita laugagayo guninaena, [*na laugagayo wa ta utu'utusi*]. Iyamo pepwa wa Yaubada ye hai na [*Yesu maiyana*] ye tutuhepatulaei sataulo unai, na unai kada haga-haga maudoina ye sokehai. ¹⁵ Tenem unai ede tanoubu ta gigibwalidiyao yo tanuwagadiyao yodi gigibwali Yaubada ye haigabaedi. Boda matadiyena ye hemwadinedi, matawuwuna sataulo wa unai ye saedikwaidiko.

Tabu kwa kitalau miyamiya yo kabikabi laugagayodi udiyedi

¹⁶ Unai tabu kwa lapulau tamowai udiyedi ena se hegilugomiu kabikabi udoi'udo debadiyena, doha kai yo numanuma hekahekasididi, yo henuwaisini mayadaidi udoi'udo, yo nawalai ye poehauhau kaikaigogodi yo Sabati mayadaina hekasidina unai. ¹⁷ Teina laulau ta meta tautaugaibu yo ginauli matadaena se laolaoma ne kabakitadi. Na mamohoina ede Keliso unai. ¹⁸ Tamowai hekadi kadi kao se ginaulidi doha taunuwadobidobi, yo se taba'ohu anelu udiyedi. Se hedede meta nige gonowana yomi kainauya kwa hai. Tabu kwa lapulapulau udiyedi! Siya tautau udiyedi ginauli maudoidi se kitadi meta se hedehedehemasalahadi, na nuwadiyao ne tanoubu ta nuwanuwatudi yauyauledi udiyedi se mwayau ede se nuwasaesae. ¹⁹ Siya nige se patulau kulukulu unai, iya ede Keliso. Na kulukulu unai ye dobi yauna maudoidi meta iya wanowanogalana bayabayaodi udiyedi ye kabihekahinidi, na se patukesega kulukulu unai, na se hemala tau kesega na se kini Yaubada yona gigibwaliyena.

²⁰ Komiu Keliso maidamiu kwa boitakesegako, unai tanoubu ta laugagayona meta nige yodi gigibwali kalimiuyena. Na idohagi to sola kwa miyamiyawanididi kana kao doha komiu sola tanoubu ta tamowaidiyao? Yodi laugagayo doha se wane, ²¹ "Tabu ku hepahapaisowa! Tabu ku kaikai! Tabu ku kabikabitonogi!" ²² Teina laugagayo ta meta tamowaigaibu yodi sonoga yo yodi lauhekata. Na tanoubu ginaulidi se laugagayoidi wa meta ta hepaisowadi na kabo se gehe. ²³ Laugagayo ne kadi kao doha sonoga, matawuwuna ede se hedehemasalaha meta idohagi bena ta taba'ohu Yaubada unai, yo idohagi bena ta nuwadobidobi, yo idohagi bena tauda ta hekamkamna na unai kabo yoda laulau se dudulai. Iyamo laugagayo maudoidi ta nige yodi namwa hesau, kaniyona ede buluma gadosididi nige gonowana se hekaiyawasidi.

3

Mauli hauhauna miyamiyana

¹ Keliso maidamiu Yaubada ye hemaugomiuko. Unai nuwamiu kwa tuudi se lau galewa ginaulidiyao udiyedi. Temenai Keliso ye tuli Yaubada nimatutuna unai. ² Galewa ginaulidiyao kwa nuwanuwatuidi, na tabu yomi nuwatu se lau tanoubu ta ginaulidiyao udiyedi, ³ matawuwuna kwa boitako na yomi mauli mamohoina ede wadawadamyena Keliso unai, iya ede Yaubada maiyana. ⁴ Keliso iya yomi mauli mamohoina ede, na huyana ye masalaha'uyoma meta komiu kabo hinage maidamiu kwa masalaha yona didiga unai.

⁵ Unai bena tanoubu laulaudi kalimiuyedi ne kwa hekaiyawasikaliliyeidi, siya ede: ganawali, laulaubiki, nuwatubiki, gadosisi yabayababadi, yo gogo gadosididi kalimiuyena ye lakikalili, iya meta yaubadalupolupo taba'ohuidi. ⁶ Teina laulau ta debadiyena Yaubada taukawayagala ne ye kouyalayalaedi yo kabo ye hekamkamnadi, ⁷ na yomi mauli beyabeyana unai meta teina miyamiya ta udiyedi kwa miyamiya.

** 2:13: Yomi mauli beyabeyana nige kwa hekaiyawasi: Yona kulukulu kalina Giliki unai, Paulo pelitome hedehededenya ye hepaisowa ye kuli, bulumamiu nige kwa hepelitome.

⁸ Iyamo teina huya ta meta laulau doha teina bena kwa hekaiyawasidi: kouyalayala, kabikabisokosoko, yababa ta ginauli tamowai hesau unai, tamowai ta hededeheya-heyababagaibui, yo tabu hedagwaliyababa kawamiuyedi kwa hedehedeidei. ⁹ Tabu kami kahao udiyedi kwa laulaulupolupo, matawuwuna taumi beyabeyadi yo yodi kabikabi maudoidi kwa tolehesuwaladiko, ¹⁰ na taumi hauhaudi kwa luwuidi. Taumi hauhaudi ta meta huya maudoina Yaubada ye hehauhaudi ye lau ee kami kao doha tauhetubugomiu, yo hinage iya kabo kabina kwa katanamwanamwa. ¹¹ Unai taba nige tamowai ta hinelidi bena siya Giliki o Dius tamowaidi, taupelitome o nige taupelitome. Tabu laolaoma yo bubutuma tamowaidi** ta kitadobidobiyeidi. Yo tabu heyayai tauhaina tamowaidi o tamowai yaiyailihaidi** ta hinelidi. Na nuwanuwatuna lakilakina ede Keliso, na iya meta maudoida kalidaena ye miya.

¹² Komiu meta Yaubada yona kaisunuwa tamowaidiyao, ye tolehesuwalagomiu komiu iya yona,** yo ye gadosisikaliliyeigomiu. Unai teina laulau ta kwa miya-hemasalahadi:** Katekamkamna, kabinamwa, nuwadobidobi, hedehededebigabiga, yo nayatautaubiga. ¹³ Bena kwa nuwatalu na tabu kwa tautausi'olologaibu, yo yababa saha kalimiuwai se ginaulidi bena kwa nuwatugabaedi. Yababa kwa nuwatugabaedi gonogonowana doha Guiyau yomi yababa ye nuwatugabaediko. ¹⁴ Na laulau namwanamwadi maudoidi ta kewadiyena meta gadosisi kwa hai. Matawuwuna iya laulau maudoidi ta ye kabigogoinamwanamwaedi.**

¹⁵ Maudoimiu ta meta Keliso tauna. Ye yoganeigomiu bena nuwadaumwali unai kwa miya. Unai Keliso yona nuwadaumwali bena nuwamiu ye tanuwagaidi, yo bena kwa laulautoki. ¹⁶ Keliso hedehededena bena nuwamiu ye hemwayaudi. Kwa lauhekata yo kwa guguya'uyoigomiu, na unai bena kwa sibasiba. Yo hedebasae wanadi, tapwalolo wanadi, yo Yaluwa Tabuna yona hemasalahana wanadi kwa wanadi ma laulautokimiu Yaubada unai. ¹⁷ Na ginauli maudoidi kwa ginaulidi yomi hedehede yo laulau udiyedi, bena kwa ginaulidi Guiyau Yesu hesanaena, na iya unai Yaubada Tamada kwa laulautokiyei huya maudoina.

Ekalesiya yodi numa laugagayodi

¹⁸ Sinesineo maitawasola, bena mwanemiyao kwa hekasisiyeidi. Laulau ta meta Guiyau tauhemuliwatanina yodi miyamiya dudulaina ede.

¹⁹ Tatao maitawasola, mwanemiyao bena kwa gadosisiyeidi, na tabu kwa sinasinakalaedi.

²⁰ Wawayao, sinamiyao yo tamamiyao kwa kawakabiyeidi ginauli maudoidi udiyedi, matawuwuna laulau ta Yaubada ye kitahenamwa.

²¹ Tama, tabu huya maudoina natumiyao kwa henuhenuwayababadi, na madai nuwadiyao se basabasa.

²² Heyayai tauhaidi, kami tanuwagao tanoubu ta unai kwa kawakabiyeidi huya maudoina ginauli maudoidi udiyedi, ena se kitakitagomiu o nige se kitagomiu, yo nige bena unai kabo se kitahenamwagomiu. Na kwa kawakabiyeidi ma nuwamamohomiu yo Yaubada hekasisina unai. ²³ Yomi paisowa maudoidi bena kwa ginaulidi ma nuwakohihaimiu, doha Yaubada yona kwa paipaisowa, na nige tamowai mo yodi,

** **3:11:** Bubutuma tamowaidi: Kalina Giliki unai Paulo ye kuli, Sikitiya tamowaidi. Giliki tamowaidi Sikitiya tamowaidi ne se kitadobidobiyeidi na se hedede meta siya nige saha hesau kabina se kata. ** **3:11:** Heyayai tauhaina tamowaidi meta taupaisowa se hemala kana tanuwaga yona gogo, nige yodi gigibwali yo nige yodi dudulai hesau. Tamowai yaiyailihaidi ede se bom yodi se paipaisowa, na nige gonowana tamowai hesau ye heyayaiyeidi.

** **3:12:** Komiu iya yona: Guiyau yona tamowai hedehemasalahana ku hasili. ** **3:12:** Teina laulau ta kwa miyahemasalahadi: Paulo laulau namwanamwadi ne ye heyahayasoniyedi kaleko udiyedi na ye kuli bena laulau namwanamwadi ne udiyedi se hekalekodi. **

** **3:14:** Iya laulau maudoidi ta ye kabigogoinamwanamwaedi: Buka hekadi se kuli, Iya ede ye kabigogoida na ta miya nuwakesega unai.

²⁴ matawuwuna kabina kwa kata meta yomi paisowa maisana kabo Guiyau unai kainauyana kwa hai. Kaniyona ede Guiyau Keliso yona kwa paipaisowa. ²⁵ Na ena tamowai hesau laulau yababana ye ginauli kabo yona laulau yababana ne maisana ye hai, matawuwuna Yaubada nige tamowai ye gadosisihneli yo ye kitahenamwagaibui.

4

¹ Tanutanuwagao, yomi heyayai tauhaidi kwa kitahetetenamwanamwaedi yo kwa hemiyanamwanamwaedi, matawuwuna komiu hinage kami Tanuwaga ede galewa ne unai.

Guguya udoi'udo

² Yomi tapwalolo bena se laulau, na udiyedi kwa silasilawa yo kwa laulautoki. ³ Yomai hinage kwa tapwatapwalolo bena Yaubada keda ye soke na wasa namwanamwana ka wasaduwaiyei, iya ede Keliso wasana saesaena. Teina wasa ta debanaena se kaugau na numatutuguduyena se tolegau. ⁴ Yo taba kwa tapwalolo bena wasa ta ya hedehemasalahanamwanamwaei tamowai udiyedi, matawuwuna teina ta yogu paisowa ede.

⁵ Na komiu, yomi laulau bena se namwa yo se sibasiba nige taukawamamohoi udiyedi. Maiyamiyao yomi miya mahanadiyao bena kwa hepaisowanamwanamwaedi na Keliso wasana kwa wasaduwaiyei. ⁶ Yomi hedehedede udiyedi tamowai bena kwa katekamkamnaedi, yo yomi hedehedede bena se namwa yo se sibasiba.** Na bena kabina kwa kata yodi hedehedede idohagi kabo hededebuinanamwanamwaedi kwa moseidi.

Lautoki

⁷ Wasagu maudoina meta Tikikasi kabo yomiu ye hedehedede. Iya meta kada kaha ka gadosisiyei, yo iya taupaisowatahitahi yo yoma hali taupaisowa Guiyau yona paisowa ta unai. ⁸ Iya ya hetamali ye laowa kalimiuwai, na bena wasamai yomiu ye hedehedede, yo hinage bena nuwamiu ye hededehebayaodi. ⁹ Onesimo** maidana kabo se laowa. Iya kada kaha, sunuma unai taumiyatahitahi yo iya ka gadosisiyei. Siya kabo wasamai maudoidi se hededededi kalimiuwai.

¹⁰ Alisitakasi, iya ede maidagu numatutugudu ta unai, yo hinage Maleko, iya Banaba nubaina, yodi lautoki se hetamalidiwa kalimiuwai. Maleko hedehededena ye laowako kwa lapui, na ena ye laowa meta kwa hailobai. ¹¹ Kada kaha Yesu, hesana hesau ede Diyasitasi, iya hinage ye lautokiyeigomiu. Dius tamowaidi** udiyedi nige hesau maidagu taupaisowa Yaubada yona basileiya paisowana ta unai, na Alisitakasi, Maleko, yo Diyasitasi se bom mo. Yodi haisagusagu kaliguyena meta nuwagu se hebayaokaliliyei.

¹² Kami kaha Epapalasi, iya Yesu Keliso yona taupaisowa hesau, hinage yona lautoki ye hetamaliyawa. Iya meta huya maudoina hesabamiu ye tapwalolobayao, bena taba Yaubada yona nuwatu maudoidi kabidi kwa katanamwanamwa na unai kwa tolobayao. ¹³ Komiu yo Laodisiya yo Hiyalapolisi udiyedi taumiya, ya hededemamohoi kalimiuuyena meta iya yomiu ye paisowabayao. ¹⁴ Doketa Luka, iya yoda gadosisi tamowaina, yo Demasi, siya hinage yodi lautoki se hetamalidiwa. ¹⁵ Yogu lautoki kwa mosei kada kahao Laodisiya unai taumiya udiyedi, yo hinage louda Nimpa unai yo yona numaena tauhekohekoikesega udiyedi.

** **4:6:** Yomi hedehedede bena se namwa yo se sibasiba: Paulo kalina Giliki unai ye kuli, yomi hedehedede bena kalita unai kwa hekamnadi. ** **4:9:** Onesimo meta heyayai tauhaina hesau kana tanuwaga Pilemona ye wasabugabaei na ye laoma Paulo unai. Paulo iya ye sagui na ye nuwabui, na kabo Paulo Onesimo ye hetamali ye uyo kana tanuwaga unai. Wasana ta hasili Paulo yona leta ye lau Pilemona unai. **

** **4:11:** Dius tamowaidi: Paulo yona kulikuli meta, pelitome tauhaidi tamowaidi, na siya ede Yesu tausunumaeina Dius luwadiyena se tubuma wa.

¹⁶ Leta ta kalimiuyena se hasiligabaei ye gehe kabo hinage kwa laei Laodisiya unai ekalesiya bodana ne udiyedi se hasili, na hinage leta ya kulilaei Laodisiya udiyedi wa bena se haiyawa na kwa hasili.

¹⁷ Na kwa hededelau Akipasi unai kwa wane, “Paisowa saha Guiyau ye haiyawa wa taba ku ginaulihegehenamwanamwaei!”

¹⁸ *Yau Paulo, lautoki ta yau nimaguyena ya kuli. Kwa nuwatuigau yau ede numatutuguduyena. Yaubada yona kabinamwa komiu kalimiuyena!*

1 Tesalonika

Paulo yona leta bagubagunana ye lau ekalesiya Tesalonika unai taumiya udiyedi

Buka ta hedehedemasalahana

Teina leta ta Paulo maidana Sailasi yo Timoti se kuli bolimai 51 AD unai na se hetamali ye lau ekalesiya bodana magai Tesalonika unai taumiya udiyedi.

Paulo yona huyaena Tesalonika meta magai saesaena teha Masedoniya unai. Nuwana bolimai 51 AD unai Paulo yona lauwasu kadauna helabuina unai ye lau Tesalonika unai ye paisowa na Dius tamowaidi hekadiyo yo hinage dagela tamowaidi se bado se nuwabui (Apostolo 17:1-4). Unai Dius bodana kadi tanutanuwagao hekadiyo se kaikalomagigili na Paulo maiyana Sailasi se hewaiunudi, unai magai wa se laugabaei na Timoti maidadi se lau magai Beleya (Apostolo 17:10). Paulo ye henuwa bena ye uyo Tesalonika, na nige gonowana (1 Tesalonika 2:17-18). Kabo Paulo kana kahao labui wa ye laugabaeidi na ye bagunalau magai lakilakina Ateni na ye hedede bena se mulitama (Apostolo 17:15). Se lagema na Ateni unai Timoti se hetamali ye uyo Tesalonika na taunuwabuihauhau ne ye saguidi (1 Tesalonika 3:1-4), na Sailasi hinage ye uyo Masedoniya. Kabo Paulo ye lau magai lakilakina Kolinito (Apostolo 18:1). Iya temenai na kabo Sailasi yo Timoti se uyoma kalinawai (Apostolo 18:5) na Timoti ye hekata meta Tesalonika unai ekalesiya wa hewaiunu se hekalo na iyamo se tolobayao (1 Tesalonika 3:6), na nuwanuwatu hekadiyo mo udiyedi nige se dudulai. Yodi laupwano lakilakidi ede, hekadiyo se paisowakaiyawasi matawuwuna se wane, Guiyau yona huya'uyoma mayadaina ye hanahanaumako (1 Tesalonika 4:11-12), na hekadiyo se matausi kehadiyao se boitako wa hesabadi, matawuwuna Keliso sola nige ye uyoma na se boitabaguna (1 Tesalonika 4:13-15). Unai Paulo maiyanao Sailasi yo Timoti yodi leta bagubagunana ta se kuli. Apostolo 17 unai ta hasili.

Buka ta hedehedena lakilakidi

- Lautoki 1:1-3
- Tesalonika unai ekalesiya yodi sunuma 1:4–3:13
- Ekalesiya miyamiyadi 4:1-12
- Tauboiboita kabo se tolo'uyo 4:13–5:11
- Hedehesibasiba hekadiyo yo lautoki 5:12-28

Lautoki

¹ Paulo, Siluwanusi** yo Timoti leta ta ka kuli ye lau Tesalonika unai tausunuma bodana udiyedi, siya yoda Yaubada Tamada yo Guiyau Yesu Keliso udiyedi taumiya. Kabinamwa yo nuwadaumwali se laowa kalimiuwai.

Paulo ye lautoki ekalesiya wa yodi sunuma hesabana

² Huya maudoina yomiu ka tapwatapwalolo na hesabamiu Yaubada ka laulautokiyei.

³ Yaubada Tamada matanaena yomi sunuma unai paisowa kwa ginaulidi ne ka nuwautuidi, yo kwa paisowabayao ma nuwakohihaimiu yomi gadosisi debanaena, yo hinage yomi tolokesegai ka nuwatui, tauhebayaona ede yomi midi yoda Guiyau Yesu Keliso unai.

⁴ Kama kahao, komiu Yaubada yona gadosisi tamowaidi. Kabina ka kata meta Yaubada ye kaisunuwaigomiu, ⁵ matawuwuna ede yoma wasa namwanamwana ye laowa kalimiuwai wa meta nige hedehedede mo unai, na ye laowa ma gigibwalina yo Yaluwa Tabuna yo nuwagwali hinage.

** 1:1: Siluwanusi meta Sailasi hesana Loma kalinadi Latini unai.

Yoma miyamiya luwamiu unai ne kabina kwa kata, ede komiu hesabamiu. ⁶ Na kwa hemala tauhemuhemuliwatani ede kai yo Guiyau kwa hemuliwatanigai. Hinage hekamkamna lakilakidi kwa lobaidi, na iyamo wasa ta kwa hai ma gwauyalamiu, na yomi gwauyala ne meta Yaluwa Tabuna unai ye laoma.

⁷ Yomi miyamiya namwanamwadi debadiyena ede teha Masedoniya yo Akaiya udiyedi tausunuma maudoidi ne meta komiu yodi kabakita. ⁸ Kaniyona ede Guiyau wasana meta komiu kalimiuwai ye pesahai ye lau Masedoniya yo Akaiya yo teha maudoina udiyedi, unai ede yomi sunuma Yaubada unai ne teha maudoina udiyedi meta kabina se kata. Tenem unai ede nige gonowana wasamiu saha hesau ka hedede tamowai udiyedi, ⁹ matawuwuna ede idohagi yomi kabikabigai wa wasadi meta siya se bom se hededehehemasalahadi kalimaiyena, yo idohagi na koitau taba'ohuina kwa hekaiyawasi na kwa patulau Yaubada unai na Yaubada maumaulina yo mamohoina ne kwa taba'ohui ¹⁰ na Natuna kwa nayanayaei, iya kabo galewa ne unai ye laoma. Yaubada iya boita unai ye hetolo'uyoiyako – iya ede Yesu, kouyalayala lakilakina ye laolaoma ne unai iya taugilihaida.

2

Paulo yona paisowa yo yona mauli Tesalonika unai

¹ Kama kahao, kabina kwa kata ede ka kaitaumanaigomiu ne meta nige ka laowa-gaibu. ² Kabina kwa kata ede huyana sola nige ka laowa na Pilipi unai se hekamkam-nagai yo se kabihenahenayaikaliliyeigai. Bwagana tauhededeguduguduigai se bayao, iyamo Yaubada yona sagu unai ede ka nuwababayao na wasa namwanamwana yomiu ka hedehedede. ³ Matawuwuna ede yoma hedehedede kalimiuwai ne meta nige laupwano hesau unai o nuwatu yababadi udiyedi ye laoma, yo nige bena taba ka kaipate na ka lupohaigomiu. ⁴ Nige kalikalili! Na ka hedehedede doha tamowai siya Yaubada ye hemamohoiyeidi na wasa namwanamwana polohena ye tole kalidiyena. Kai nige bena tamowai nuwadi ka henamwadi, na bena Yaubada nuwana ka henamwa, na iya nuwamai ta kadi kao kabidi ye kata. ⁵ Kabina kwa kata meta kai nige hededehehetausaeigomiu ka hepaisowa na unai kabo ka lupohaigomiu, yo nige bena mahimahihi kalimaiyena na kaolupolupo unai ka suma. Kai yomai tautolo ede Yaubada. ⁶ Kai meta nige noko ka wasenei bena tamowai kalidiyena, nige kalimiuwenya yo nige tamowai hekadiyo kalidiyena. ⁷ Na kai meta Keliso yona apostolo, unai yoma gigibwali gonowana kabo taba kami lina ka leyawa. Iyamo luwamiyena meta ka taubigakalili.** Yo kai meta doha sina natunao gagilidiyao ye kitahetetenamwanamwaedi. ⁸ Ka gadosikaliliyeigomiu, unai Yaubada wasana namwanamwana ka hededehehemasalaha kalimiuwenya. Na nige tenem ye bom mo na hinage yoma mauli ka talamyeyidi kalimiuwai.

⁹ Kama kahao, lahinaidi yoma paisowabayao wa taba kwa nuwatuidi. Huyana Yaubada wasana namwanamwana ka lauguguyaei kalimiuwai wa meta nige ka henuwagomiu taba polohemai kwa bahei na unai ka hepolohegomiu. ¹⁰ Komiu yo hinage Yaubada meta yomai tautolo ede komiu tausunuma luwamiyena ka miya ne meta ka tabu yo yoma miyamiya se dudulai yo nige kama giluhesau. ¹¹ Matawuwuna kabina kwa kata ede kesega kesega ka kabigomiu wa meta doha tama iya natunao mamohoidi yona kabikabidi ne. ¹² Ka hededehebayaogomiu, nuwamiu ka hedede-hetaludi yo ka hededekalili kalimiuwai taba miyamiya namwanamwadi kwa miyaidi Yaubada matanaena. Iya ye yoganeigomiu kwa laoma yona basileiya yo yona didiga ne unai.

¹³ Hinage huya maudoina Yaubada ka lautokiyeyi kaniyona ede huyana iya wasana kalimaiyena kwa lapui na kwa hai meta nige doha tamowaigaibu yodi hedehedede,

** **2:7:** Ka taubigakalili: Kulikuli pepwadi beyabeyadi hekadi se kuli ede ka taubigakalili, na hekadi se kuli, kai doha wawayao gagilidi.

na kwa hai ede mamohoina iya Yaubada yona hedehedede, iya ede ye paipaisowa komiu taukawamamohoi luwamiuyena. ¹⁴ Matawuwuna, kama kahao, hekamkamna kwa lobaidi yomi magai tamowaidiyao udiyedi. Teina unai kwa hemala Yaubada yona dubu Yudeya unai, siya Yesu Keliso unai tausunuma, yodi miyamiya taumiyawatanidi. Kaniyona ede siya hinage yodi hali Dius tamowaidi udiyedi hekamkamna se hekalodi doha komiu ne. ¹⁵ Dius tamowaidi hekadi yoda Guiyau Yesu se koihemwaloi, yo hekadi hinage peloweta se koihemwaloidi. Na yomi magai unai Dius hekadi se henakuhepesagai.** Siya Yaubada nige nuwana se henamwa na se hemala tamowai maudoidi kadi waiunu, ¹⁶ matawuwuna se kaipate bena se hekaiyawasigai kabo taba nige ka hededelau dagela tamowaidiyao udiyedi na mauli se lobai. Teina yodi laulau ta unai ede yodi ba'aya meta se koihepwata'uyoidi. Na Yaubada yona kouyalayala ede ye laomako kewadiyena.

Paulo ye henuwakalili bena Tesalonika ye kitadi

¹⁷ Na kama kahao, huyana kalimiuwai se tolehesuwalagai mahana kubwakubwa na ka bom mo ka miya meta taumai mo ta udiyedi, iyamo komiu ka nuwanuwatuigomiu yo nuwamai ta se gigibwalikalili na ka kaipatebayao taba ka laowa ka kitagomiu. ¹⁸ Ka henuwakalili bena ka laowa, na yau Paulo huya maudoina ya kaikaipate taba ya laowa, iyamo Satani ye hekaiyawasigai. ¹⁹ Kaniyona ede komiu meta yoma kabamidi yo yoma kabagwayu yala yo yoma kolona,** na debamiuyena kabo ka gwayu yala Guiyau Yesu matanaena yona huya'uyoma ne unai. ²⁰ Mamohoikalili, komiu meta yoma didiga yo yoma gwayu yala.

3

¹ Na huyana ka nuwatukasaya ede ka nuwatu meta ye namwakalili taba Ateni magaina unai ka bom ka miyamiya ² na Timoti ka hetamali ye laowa. Iya meta kama kaha yo Yaubada yona taupaisowa hesau Keliso wasana namwanamwana lauguguyaeina ta unai. Ka hetamali ye laowa bena ye hebayaogomiu yo yomi sunuma ne udiyedi ye saguigomiu ³ na tabu tamowai hesau laukita ta udiyedi ye nuwabasabasa. Kabina kwa katakalili meta kita tausunuma maudoida kabo pilipili doha teina nige gonowana ta kaihaleidi. ⁴ Doha huyana kai maidamiu na ka hedehedelaowako meta kita kabo tamowai se hekamkamnada. Na saha ka hedede wa meta ye laoma ye mamohoi, iya ede komiu kabina kwa katakalili. ⁵ Teina nuwatu ta debanaena na nige gonowana ya naya huyana ye loha ede kagu kaha** ya hetamaliyawa kabo yomi sunuma ne ye kitasipwai. Yogu matausi ede taba kamwasa hesau unai na taunohonoho ne ye nohoigomiu, kabo yoma paisowa wa kana kao doha ka gabagaibui.

Tesalonika wasadi namwanamwadi Timoti ye hededehemasalaha Paulo unai

⁶ Na Timoti meta kaboina ta kalimiuuyena ye uyomako na yomi sunuma yo yomi gadosisi wasadi namwanamwadi ye baheidima kalimiuwai. Yomai ye hedehedede meta huya maudoina kwa nuwanuwatuigai yo yomi nuwanuwatulakilaki ede taba kwa kitagai, gonogonowana doha kai, ka henuwakalili bena ka kitagomiu. ⁷ Tenem debanaena, kama kahao, yoma nuwayababa yo hekamkamna maudoidi udiyedi meta kai nuwamai se bayao komiu debamiuyena, kaniyona ede yomi sunuma debanaena. ⁸ Na teina ta unai kabo yawasimai, kabina ka kata ede komiu kwa tolobayaoko Guiyau unai. ⁹ Komiu debamiuyena meta ka gwayualakalili Yaubada matanaena na yoma lautoki ye seuyo Yaubada unai ne nige gonogonowana. ¹⁰ Boniyai yo mayadai ka

** **2:15:** Se henakuhepesagai: Wasana ku hasili Apostolo 16:5-9 unai. ** **2:19:** Kolona ne meta heloikailakwa unai taulagebaguna, iya yona kainauya. ** **3:5:** Kagu kaha: Teina tamowai ta meta Timoti (1 Tesalonika 3:6).

tapwalolo ma nuwagehemai bena taba ka kita'uyoigomiu na ena teha hesau unai yomi sunuma ne se basabasa, meta unai kabo ka saguigomiu.

¹¹ Unai Yaubada Tamada yo yoda Guiyau Yesu siya taba yoma kamwasa se hemasalaha na ka laowa kalimiuwai. ¹² Taba Guiyau yomi gadosisi ne ye helaki'uyoidi yo se laki se lau nige kadi siga, na udiyedi kwa haigadogadosisiyeigomiu yo tamowai maudoidi kwa gadosisiyeidi, doha kai yoma gadosisi ka ginauli kalimiuyena ne. ¹³ Taba iya nuwamiyao ye hebayaodi na udiyedi kabo nige kabahegilugomiu yo kwa a'a** Yaubada Tamada matanaena, huyana yoda Guiyau Yesu ye uyoma yo yona tamowai maudoidi maidanao.

4

Bena Yaubada nuwana ta henamwa

¹ Unai, kama kahao, nuwanuwatu hekadiyo udiyedi meta ka hededehebasibagomiuko idohagi bena kwa miya na unai Yaubada nuwana kwa henamwa. Na mamohoi miyamiyadi ede teina udiyedi kwa miyamiya ta. Na Guiyau Yesu hesanaena yoma kaibwada yo yoma henuwalakilaki kalimiuyena ede taba teina miyamiya ta kwa miyahelakidi se lau. ² Matawuwuna ede hedehedede saha bayabayaodi Guiyau Yesu yona gigibwaliyena ka haidiwa wa meta kabidi kwa katako. ³ Na Yaubada yona nuwatulakilaki ede bena taba kwa a'a,** kaniyona ede, laulau bikibikidiyao bena kwa kaihaleidi, ⁴ yo komiu kesegakesega taba kwa kaipate na kwa bom taumiu kwa kitahetete'uyoidi na miyamiya a'adi yo hekahekasina udiyedi kwa miya. ⁵ Tabu kwa lelelelehigaibu laulau bikibikidiyao udiyedi doha siya dagela tamowaidiyao ne, siya meta nige Yaubada kabina se kata. ⁶ Na teina nuwanuwatu ta unai meta tabu ekalesiya hesau kana kaha hesau ye lupohai na mwanena ye gilihai. Teina yababa ta debadiyena Guiyau kabo tamowai ye hekilainodi, doha lahinaidi ka hededelaowako yo ka hededehebasibagomiuko. ⁷ Matawuwuna Yaubada ye yoganeida nige bena miyamiya bikibikidi hesabadi na bena miyamiya a'adi ta miyamiyaedi. ⁸ Unai, ena tamowai hesau teina hedehedede bayabayaona ta ye laukwatakataei meta nige tamowai ye laukwatakataei na Yaubada, iya meta Yaluwana Tabuna tauhaiyawana ede.

⁹ Na yomi hali ekalesiya gadosisiyeidi hesabana meta nige gonowana yomiu ka kulikuli, matawuwuna ede komiu meta Yaubada ye hekatagomiuko bena kwa haigadogadosisiyeigomiu. ¹⁰ Na mamohoikalili, ekalesiya bodana Masedoniya luwanaena meta kwa gadosisiyeidi. Iyamo ka hededelaowa kalimiuwai, kama kahao, teina miyamiya ta bena kwa miyamiyai ye laki ye lau. ¹¹ Taba yomi henuwalakilaki ede bena miya daudumwalinaena kwa miya na kwa bom yomi mode udiyedi kwa kitalau yo nimamiu udiyedi kwa paisowa doha saha ka hededediko kalimiuyena wa. ¹² Kaniyona ede bena mayadai maudoina yomi miyamiya ta udiyedi kabo dagela tamowaidiyao nuwadiyao kwa haidi na se hekasisiyeigomiu, yo hinage taba nige kwa duihasalilau tamowai hesau unai.

Tausunuma se boitako wa kabo se tolo'uyo

¹³ Kama kahao, nige ka henuwa bena taba yomi nuwatulobai ne ye gagili siya tauboitako ne hesabadi na kwa siyayaukalili doha tamowai maudoidiyao ne, siya meta tolo'uyo nuwanuwatuna nige kalidiyena. ¹⁴ Ta kawamamohoi meta Yesu ye boita na ye tolo'uyo, unai ta kawamamohoi meta siya Yesu tausunumaena na se boita wa, yona huya'uyoma mayadaina unai Yaubada kabo hinage ye hetolo'uyoidi. ¹⁵ Na Guiyau ye bom kalinana unai ka hededelaowa meta kita kaiteyadi sola ma yawayawasida na sola ta miyamiya ye lau ee Guiyau yona huya'uyoma, meta nige gonowana tauboitako ne ta

** 3:13: Kwa a'a: Tabu hededehehemasalaha ku hasili. ** 4:3: Kwa a'a: Tabu hededehehemasalaha ku hasili.

bagunagabaeidi. ¹⁶ Matawuwuna Guiyau, iya kabo galewa ne unai ye dobima maiyana lauhelili daguguna lakilakina yo anelu saesaena kalinana daguguna yo Yaubada yona yoga bwagigina maiyanao, na kabo Keliso unai tausunuma se boitako wa kabo se tolo'uyobaguna. ¹⁷ Mulina ne unai kabo kita sola ta maumauli na kaiyaulina ta unai ta miyamiya meta kabo maiyada tautolo'uyo ne ye kabisinida yada ne unai, kabo menai Guiyau ta hailobai na unai kabo Guiyau maiyada nige kana siga. ¹⁸ Tenem debanaena teina hedehedede ta udiyedi kwa hededehebahebayao'uyoigomiu.

5

¹ Na kama kahao, mahana yo mayadai hedehedede udiyedi meta nige gonowana saha hesau ka kuliwawa kalimiuwai, ² matawuwuna ede kabina kwa katakalili meta Guiyau yona mayadai kabo ye laoma doha taukaiwahali boniyaiyena. ³ Tamowai kabo se wane, “Ye daumwali yo ka namwanamwa, nige saha hesau!” Na make-sega kabo heyababa ye taludobi kewadi ne unai doha labalaba kamkamnana waihiu diyadiyakana ye hesiliyata, na nige gonowana se wasabu.

⁴ Na kama kahao, komiu meta nige masigili unai, na unai tenem mayadaina ne nige gonowana ye hesiliyatagomiu doha taukaiwahali. ⁵ Komiu maudoimiu meta dawaya yo mayadai natunao. Kita meta nige boniyai o masigili tamowaidiyao. ⁶ Tenem unai kita tabu doha tamowai hekadiyo, siya kaiteyadi se kenoko ne. Na kita bena ta silisiliyata yo matada se nega. ⁷ Matawuwuna ede siya kaiteyadi taukeno meta boniyaiyena se keno, yo kaiteyadi taunumayauyaule meta boniyaiyena se numayauyaule. ⁸ Na kita meta mayadai yona, unai yoda nuwanuwatu bena se dudulai na sunuma yo gadosisi ta likwadi nuwapouda kana laugudugudu, na yababa unai gilihai ta lobai wa nuwabayaona ta hai ye hemala kuluda kana laugudugudu. ⁹ Matawuwuna ede Yaubada ye kaisunuwaeida nige bena yona hekamkamna unai ta kamkamna, na bena taba kabihemauli ta hai yoda Guiyau Yesu Keliso debanaena. ¹⁰ Ye boita hesabada, unai gonowana kita ma maumaulida o ta boitako ne taba maiyada ta miyakesega. ¹¹ Tenem unai kwa haihebahebayao'uyoigomiu yo kwa haihaisagusagu'uyoigomiu doha ede miyamiya saha udiyedi kwa miyamiya ne.

Hededehebasiba gehegediyao

¹² Na kama kahao, ka kaibwadaigomiu bena taba luwamiuyena siya kaiteyadi tau-paisowabayao yo taubagunaigomiu yo tauhededehebasibagomiu, taba kwa heka-sisiyeidi. ¹³ Yodi paisowa ta debadiyena ede bena kwa kitahesaekaliliyeidi ma gado-sisimiu. Bena ma kami kahao nuwadaumwaliyena kwa miya. ¹⁴ Na kama kahao, yoma kaibwada lakilakina kalimiuwai ede bena kaiteyadi taumiya miyagaibu taba kwa hededebayao udiyedi. Taunuwabasabasa kwa hededehebayaodi, taubasabasa bena kwa saguidi, yo yomi kabikabi tamowai maudoidi udiyedi bena ma nuwatalumiu. ¹⁵ Kwa kitasipwanamwanamwa, ena tamowai hesau yababa ye ginauli kalimiuuyena, tabu yababa hinage kwa ginauli kalinawai, na bena yomi kabi se namwa kami kahao udiyedi yo hinage tamowai maudoidi kalidiyena.

¹⁶ Huya maudoina bena kwa gwaugwauyala, ¹⁷ huya maudoina bena kwa tapwat-apwalolo, ¹⁸ yo miya kana kao doha saha na huya maudoina bena lautoki kwa mosei Yaubada unai, matawuwuna ede teina ta Yaubada yona nuwatu komiu Keliso Yesu tausunumaena hesabamiu.

¹⁹ Yaluwa Tabuna tabu kwa hekahekaiyawasi.** ²⁰ Peloweta yodi hedehedede tabu kwa kitakitadobidobiyeidi, ²¹ na hedehedede maudoidi bena kwa lautonogidi na namwanamwadi bena kwa kabihakahinidi. ²² Yababa maudoidi kwa kaihaleidi.

** **5:19:** Yaluwa Tabuna tabu kwa hekahekaiyawasi: Paulo ye kuli meta, Yaluwa tabuna tabu kwa heboso. Kaniyona ede Yaluwa Tabuna ye heyaheyasoniyei kaiwa kalakalasina unai.

²³ Yaubada iya nuwadaumwali Yaubadana, na taba ye saguigomiu na yomi laulau maudoidi se namwakalili.** Taba yaluwamiu yo nuwamiu yo taumi maudoina ne ye kitahetetedi na nige kabahegiludi hesau yoda Guiyau Yesu Keliso yona huya'uyoma mayadaina ne unai. ²⁴ Tauyoganeigomiu ne yona hedehedede meta udiyedi ye toloke-segai na saha ye hedededi ne kabo ye ginaulidi.

²⁵ Kama kahao, yomai kwa tapwalolo. ²⁶ Yaubada yona tamowai maudoidi kwa hailobaidi gadosisi mamohoina unai.** ²⁷ Guiyau matanaena ya hededebayaolaowa kalimiuwai ede bena pepwa kulikulina ta kwa hasiligabaei kada kahao maudoidi udiyedi.

²⁸ Yoda Guiyau Yesu Keliso yona kabinamwa taba komiu maudoimiu kalimiuyena.

** **5:23:** Ye saguigomiu na yomi laulau maudoidi se namwakalili kalina Giliki unai hedehedede kubwakubwana, nuwana gonowana ta bui ede taba ye hetabuyeigomiu. Hetabu hededehehemasalahana ku hasili. ** **5:26:** Kwa hailobaidi gadosisi mamohoina unai: Paulo ye kuli, kwa hailobaidi sumta tabuna unai, na sumta meta ekalesiya yodi gadosisi hekihekinoina.

2 Tesalonika

Paulo yona leta helabuina ye lau ekalesiya Tesalonika unai taumiya udiyedi

Buka ta hededehemasalahana

Apostolo Paulo maiyana Sailasi yo Timoti yodi leta bagubagunana se kuli ekalesiya magai Tesalonika unai taumiya kalidiyena (1 Tesalonika). Na huyana nige ye loha kabo Tesalonika wasadi se lapui meta pilipili yo nuwatupwano hesau ye tubu kalidiyena. Unai teina leta helabuina ta (2 Tesalonika) hinage se kulilaei udiyedi. Yodi huyakulina bolimaina wa meta 51 o 52 AD. Huyana ne unai taudi haiyona wa se miyamiya magai lakilakina Kolinito unai.

Teina leta ta nuwanuwatuna meta siya Tesalonika unai ekalesiya wa yodi nuwapwanopwano, kaniyona ede tamowai hekadiyo se hededepeloweta bena Guiyau yona huya'uyoma mayadaina ye laomako (2 Tesalonika 2:2), yo hinage taulaulaugaibu tamowaidiyao wa sola luwadiyena se miyamiya (1 Tesalonika 5:14 yo 2 Tesalonika 3:6-15). Unai teina leta ta Paulo ye kuli na ye hededebayaolau kalidiyena. Yona kabahedehedede haiyona:

- (1) Guiyau yona heksa mayadaina meta sola matadiyena, na mayadaina ne unai yona heksa ne kabo se dudulai (2 Tesalonika 1:5-10).
- (2) Kawayagala lakilakina kabo ye tububaguna, na mulina ne unai kabo Guiyau yona huya'uyoma mayadaina ye laoma (2 Tesalonika 2:1-12).
- (3) Taba tabu se miyamiyagaibu, na bena se bom yodi se paisowa (2 Tesalonika 3:6-15).

Buka ta hedehededena lakilakidi

- Lautoki 1:1-2
- Guiyau yona huya'uyoma ne unai kabo tamowai ye hekasadi 1:3-12
- Guiyau sola nige ye uyoma 2:1-12
- Taba se tolobayao 2:13-17
- Taba se tapwalolo yo se paisowa 3:1-15
- Kabagehe tapwalolona 3:16-18

Lautoki

¹ Teina kulikuli ta meta Paulo, Siluwanusi,** yo Timoti, kai ka kuli ye laowa Tesalonika yona dubu tamowaidiyao, komiu kaiteyadi Yaubada Tamada yo Guiyau Yesu Keliso udiyedi taumiya wa kalimiuwai.

² Taba Yaubada Tamada yo Guiyau Yesu Keliso yodi kabinamwa yo nuwadaumwali se lediwa kalimiuwai.

Paulo yodi ye lautoki yodi sunuma hesabana

³ Kama kahao, hesabamiu na huya maudoina taba Yaubada ka laulautokiyei. Teina ta ye namwakalili matawuwuna ede yomi sunuma meta ye kini ye laki ye laulau na yomi haigadogadosisi'uyoigomiu ne meta huya maudoina ye laki ye lau. ⁴ Unai ma nuwanamwamai na wasamiu ka hedehedehemasalaha Yaubada yona tamowai bodadi maudoidi udiyedi, kaniyona ede hewaiunu yo pilipili udoi'udo'i kwa hekalodi ne udiyedi kwa tolotahitahi yo kwa sunumabayao.

Paulo ye hededehebayaodi hewahewaiunu luwanaena ye wane, Yaubada yona heksa kabo se dudulai

** 1:1: Siluwanusi meta Sailasi hesana Loma kalinadi Latini unai.

⁵ Ginauli maudoidi ta meta se hemamohoi ede Yaubada yona kitahekasa ne se dudulai, na teina unai ede Yaubada ye kitahenamwagomiu yona basileiya hesabana. Basileiya ne debanaena ede teina kamkamna ta udiyedi kwa kamkamna. ⁶ Yaubada yona hekasa ne se dudulai, na kaiteyadi se hemiyapilipiligomiu, iya kabo ye hemiyapilipilidi, ⁷ na komiu taupilipili kabo ye hesaguhaigomiu yo kai kabo hinage. Teina ta kabo ye masalaha huyana yoda Guiyau Yesu galewa ne unai ye masalahama kaiwa kalapulupululuna** luwanaena, yo yona anelu gigigibwalidi maidanao. ⁸ Na kaiteyadi siya Yaubada nige kabina se kata yo yoda Guiyau Yesu Keliso wasana namwanamwana nige se kawakabiyei meta iya kabo ye hekamkamnadi. ⁹⁻¹⁰ Guiyau yona huya'uyoma mayadaina ne unai kabo heyababa nige kana siga unai ye hekamkamnadi yo Guiyau matanaena yo yona gigibwali didigana unai ye tolehesuwaladi. Mayadaina ne unai kabo yona tamowai se hededetausaei yo se nokoei, siya kaiteyadi taukawamamohoiyeina maudoidi. Yo teina ta meta komiu kabo maidamiyao, matawuwuna ede yoma hededehemasalaha kalimiuyena wa kwa kawamamohoiyei.

¹¹ Unai huya maudoina yomiu ka tapwatapwalolo taba yoda Yaubada ye henonohaigomiu na yona yoganeigomiu ne kwa miyahedudulai, yo taba yona gigibwaliyena ye saguigomiu na laulau namwanamwadi kwa gadosisikaliliyeidi ne se masalaha kalimiuwai na yomi sunuma paisowana kwa ginaulinamwanamwaeidi. ¹² Unai kabo tamowai maudoidi yoda Guiyau Yesu hesana se hekasisiyei komiu debamiuyena, na komiu hinage se hededetausaeigomiu iya debanaena. Teina ta yona kabalaoma ede yoda Yaubada yo Guiyau Yesu Keliso yodi kabinamwa.

2

Ginauli sahasahadi bena kabo se tububaguna na kabo Guiyau Yesu yona huya'uyoma mayadaina ye lage

¹ Teinai kabo yoda Guiyau Yesu Keliso yona uyoma nuwanuwatuna unai ka hedehede yo idohagi kabo ye haida kalinawai. Nuwanuwatu ta debadiyena ka kaibwadaigomiu, kama kahao, ² tabu kwa nuwapilipili yo tabu kwa silisilyata ena se hedede bena Guiyau yona mayadai ye laomako. Se hedede bena yaluwa hesau [hededepeloweta] ye moseidi o kalimaiyena wasa o leta hesau se hai, iyamo tabu kwa kawakawamamohoiyeidi. ³ Tabu tamowai hesau ye lupohaigomiu hedehede udoi'udoi udiyedi, kaniyona ede tenem mayadaina ne taba nige ye laoma kana siga ee kawayagala lakilakina ye tubu na laugagayo tau'utu'utusina ye masalaha, iya ye laulau kana heyababa hesabana. ⁴ Ginauli maudoidi se kawayaubadayeidi yo se taba'ohuidi kabo ye hewaiunudi yo ye bom ye toleisini'uyoi kewadiyena, na kabo yona kabatuli ye hai Yaubada yona Numa Tabuna unai na ye hededehemasalaha'uyoi meta iya Yaubada.

⁵ Taba kwa nuwatui, huyana yau maidamiu meta teina ginauli ta ya hededediko kalimiuwai. ⁶ Unai kabina kwa katako saha laugagayo tau'utu'utusina ne ye kabihekahini ye lau ee yona mahana dudulaina unai kabo ye masalahama. ⁷ Kaniyona ede laugagayo utu'utusina yona gigibwali wadawadamna ede ye paipaisowa, iyamo taukabihekahinina Yaubada ye tole. Na ye kabihekahinikesegai kana siga ee Yaubada iya ye haigabaei. ⁸ Na kabo laugagayo tau'utu'utusina ye taumasalaha, iyamo Guiyau Yesu kawana yahuwana yo yona laoma didigana unai kabo tamowaina ne ye heyababa. ⁹ Na huyana laugagayo tau'utu'utusina ye laoma meta yona paisowa kabo gonogonowana doha Satani. Kabo laulau gigigibwalidi lupolupodiyao, hekihekinoi yo kabanoko ye hemasalahadi, ¹⁰ yo ginauli yabayabadiyao udoi'udoi udiyedi meta tamowai se laulau boita hesabana ne ye lupohaidi. Se boita matawuwuna ede nige se henuwa bena wasa mamohoina se gadosisiyei na unai kabo gilihai se lobai. ¹¹ Teina

** **1:7:** Kaiwa kalapulupululuna ta meta nige hekilaino kaiwana kalakalasinna, na Yesu yona didiga yo gigibwali hekihekinoidi.

debanaena ede Yaubada ye kitagabaedi na hededelupolupo se kawamamohoiyei, ¹² na unai maudoidi kabo hekamkamna se lobai, siya ede kaiteyadi nige wasa mamohoina ne se kawamamohoiyei na miyamiya yabayababadi udiyedi se gwaugwauyala.

Taba kwa tolobayao

¹³ Na kai taba huya maudoina hesabamiu Yaubada ka laulautokiyei, kama kahao, komiu Guiyau yona gadosisi tamowaidiyao. Yoma lautoki ne matawuwuna ede Yaubada ye kaisunuwaigomiu bena komiu tamowai bagubagunadi ye hemaugomiu.** Yona nuwatu bena Yaluwa Tabuna yona paisowa yo wasa mamohoina yomi kawamamohoiyeina ne udiyedi ye kabinonohaigomiu yona tamowai. ¹⁴ Kai yoma wasa namwanamwana wa unai ye yoganeigomiu kwa laoma yona kabihemauli ne unai, bena kabo Guiyau Yesu Keliso yona didiga saesaena ne komiu hinage yomiu.

¹⁵ Unai, kama kahao, kwa tolobayao na kwa kabibayao lauhekata maudoidi ka hekawalaediwa wa udiyedi. Lauhekatadi ne meta kawamaiyedi ka hedededi yo leta udiyedi ka kulidi.

¹⁶⁻¹⁷ Yaubada Tamada, iya ye gadosisiyeida, yo yona kabinamwa unai nuwahebayao miyamiyahaina yo kabamidilau namwanamwana ye haidiwa. Iya yo yoda Guiyau Yesu Keliso, siya taba nuwamiu se hededehebayaodi na se hebayaogomiu ginauli namwanamwadi maudoidi kwa ginaulidi yo kwa hedededi ne udiyedi.

3

Yomai kwa tapwalolo

¹ Gehena ta unai, kama kahao, yomai kwa tapwalolo kabo Guiyau wasana ta wasaduwaiyeina gonowana ye sarena yo se hekasisiyei, gonogonowana doha huyana ye laowa kalimiuyena wa. ² Yo yomai kwa tapwalolo bena kabo tamowai yodi miyamiya yabayababadi yo yodi nuwanuwatu yababakalilidi luwadiyena gonowana gililai ka lobai, matawuwuna ede nige tamowai maudoina ne se sunumagehe. ³ Na Guiyau yona nuwatu meta nige ye buibuidi yo iya kabo ye hebayaogomiu na tauyababa unai kabo ye lauguduguduigomiu. ⁴ Guiyau unai nuwamai se bayao meta ginauli saha ka hedededi wa kwa ginaginulidi yo kabo kwa ginaulidi kwa laeidi. ⁵ Taba yoda Guiyau Yaubada yona gadosisi nuwamasalahana ye leyawa yo taba ye saguigomiu na kwa nayatautauyaga yo kwa tolobayao gonogonowana doha Keliso.

Tabu kwa laulaugaibu

⁶ Guiyau Yesu Keliso hesanaena, kama kahao, ka hededehebayaolaowa kalimiuyena bena taba kami kahao, siya kaiteyadi taumiyamiyagaibu yo lauhekata kalimaiyena kwa hai wa nige se miyawatani, meta tabu kwa patulau udiyedi. ⁷ Matawuwuna ede komiu kabina kwa kata taba yoma miyamiya wa kwa miyawatanidi. Huyana kai maidamiu meta nige ka miyamiyagaibu. ⁸ Hinage sola nige tamowai hesau kana kai ka kaigaibui na bena nige maisana. Iyamo kai meta ka paisowabayaokalili boniyai yo mayadai, kaniyona ede nige ka henuwa bena ka hepolohegomiu. ⁹ Saha ka ginaulidi ta, nige bena kaniyona ede kai nige yoma dudulai hesau yomi haisagusagu kaidi yo gogodi ne udiyedi, na saha ka ginaulidi ne meta bena se hemala kabakitalau na kabo kwa hemuliwatanidi. ¹⁰ Matawuwuna ede huyana kai maidamiu meta teina laugagayo ta ka haiyawa, “Ena taba tamowai hesau nige ye paisowa meta tabu kai ye kaikai.”

** **2:13:** Ye kaisunuwaigomiu bena komiu tamowai bagubagunadi ye hemaugomiu: Buka beyabeyadiyao hekadi udiyedi se kuli, Huyabagubaguna unai Yaubada ye kaisunuwaigomiu bena ye hemaugomiu.

¹¹ Ka lapui meta tamowai hekadi luwamiuyena ne se miyamiyagaibu, nige se paipaisowa, na siya meta taumodemodegaibu. ¹² Tamowai doha teina meta ka hedede-bayao yo ka hededekalili Guiyau Yesu Keliso hesanaena, taba se tulinogowai na kadi kai paisowana se paisowa. ¹³ Na komiu, kama kahao, ginauli namwanamwadi ginaulidi unai tabu kamnamiyao se yabayababa.

¹⁴ Ena taba tamowai hesau yoma hedehedede teina leta ta unai nige ye kawakabiyeidi meta bena taba kwa kitakitanamwanamwa, na tabu maidamiu kwa labilabini. Teina unai kabo kwa hemwadine. ¹⁵ Nige bena yomi kitana ede iya kami waiunu, na bena kwa guguyanamwanamwaei doha kami kahao yomi kabikabidi ne.

Lautoki

¹⁶ Na daumwali Guiyauna iya ye bom bena daumwali ye haiyawa huya maudoina yo yomi mauli maudoina udiyedi, na Guiyau bena maudoimiu ne maidamiu.

¹⁷ *Yau, Paulo, teina hededelautoki ta ya bom nimaguyena ya kulidi.** Teina ta yogu kulikuli maudoidi kabakitalobaidi, teina doha metayau yogu kulikuli.* ¹⁸ *Yoda Guiyau Yesu Keliso yona kabinamwa taba ye laowa maudoimiu kalimiuyena.*

** **3:17:** Paulo yona laulau unai leta maudoina ta ye hededegabaei taukulikuli hesau ye kulidobiyei, iya nuwana Sailasi, na gehegehena unai hededelautoki mo ye bom nimanaena ye kulidi.

1 Timoti

Paulo yona leta bagubagunana ye lau Timoti unai Buka ta hededehehemasalahana

Paulo leta ta ye kuli ye lau Timoti, iya natuna sunuma unai (1 Timoti 1:2) yo Paulo maiyana taupaisowa (Loma 16:21, 1 Kolinito 16:10, Pilipi 2:19). Leta ta yona huyakulina bolimaina wa nuwana 63 AD.**

Magai lakilakina Loma unai Paulo se kau bolimai labui (Apostolo 28:16,30-31) na kabo se helauhetala na se kabigabaei. Teina ta bolomaina meta 62 AD unai. Kabo ye lau Kiliti bwanabwanaluwana unai ye paisowa, na kabo ye lau Epeso. Temenai nige ye miya ye loha na kabo Timoti ye laugabaei na ye lau Masedoniya (1 Timoti 1:3) bena ekalesiya Pilipi udiyedi ye kitadi (Pilipi 2:24). Kabotaki kehiwe huyana bolimai 63 ye lau 64 AD unai meta iya Nikopolisi unai (Taitasi 3:12).

Epeso unai, Timoti yona paisowa meta bena tausunuma ye saguidi na lauhekatalupolupo tamowai hekadiyo se hemwalaeyidi ekalesiya bodana udiyedi wa ye hekaiyawasidi (1 Timoti 1:3-7). Paulo yona nuwatu bena iya hinage ye lau Epeso, na nige kabina ye kata kabo gonowana ye lau o nige (1 Timoti 3:14-15), unai leta ta ye kuli.

Paulo yona leta ta unai Timoti ye hededehebayao yo ye hededehebasiba yona paisowa saha. Hinage dubu kabikabidi kadi kao doha saha ye hededehehemasalahadi. Yona kabahedehede lakilakidiyao ede teina:

- (1) Lauhekata dudulaina (1 Timoti 1:15, 3:16–4:5, 4:10,16)
- (2) Ekalesiya yodi miyamiya dudulaidi (1 Timoti 2:1-15, 6:17-19)
- (3) Yesu wasana wasaduwaiyeina (1 Timoti 4:13, 6:2)
- (4) Dubu taukitahetedi yodi miyamiya bena se namwakalili (1 Timoti 3:1-13)

Nuwanuwatu ne, buka ta maudoina unai lausoi se bado na udiyedi Paulo ye hedehedeidi.

Buka ta hedehededenakilakidi

- Lautoki 1:1-2
- Ekalesiya bodadi yodi miyamiya 1:3–3:13
- Sunuma nuwanuwatuna lakilakina 3:14–4:5
- Paulo yona hededehebasiba Timoti unai 4:6–6:21

Lautoki

¹ Yau Paulo. Yaubada taugilihaida yo Yesu Keliso, iya yoda midi tamowaina, siya yodi hedehede bayabayaona debanaena ya hemala Yesu Keliso yona apostolo.

² Leta ta ya kuliwau Timoti kalimwai. Sunuma ta debanaena kowa meta natugu mamohoina.

Taba Yaubada Tamada yo Yesu Keliso yoda Guiyau yodi kabinamwa, yodi katekamkamna yo yodi nuwadaumwali se lediwa kalimwai.

Taulauhekata lupolupodiyao hedehedededi

³ Yogu huyalau Masedoniya wa meta ya hededelaowako, na teina ya hedede'uyo kalimwai bena taba Epeso unai ku miya na metai tamowai hekadi ku hededehekaiyawasidi tabu lauhekatalupolupo se laulauhekataedi ⁴ yo tabu huya maudoina se modemode pilipilidai beyabeyadi yo kadi kulutubu dedediyao udiyedi. Ginauli doha teina meta haikawayagala yodi kabatubu, na nige gonowana tamowai se saguidi

** :: 63 AD: Loma unai Paulo numatutugudu unai se kabigabaei bolimaina 62 AD, na kabo ye lau Kiliti bwanabwanaluwana unai ye paisowa, Taitasi maiyana, ye lau ee bolimai 63 AD duwaduwalina ne unai, na kabo ye bom ye lau Epeso bena Timoti ye kita. Tausonoga hekadiyo se hedede Paulo Loma unai se kabigabaei 62 AD unai na kabo ye bagunalau Sipaniya. Mulina ne unai kabo ye lau Kiliti bwanabwanaluwana. Yodi nuwatuyena kabo leta ta ye kuli bolimai 65 o 66 unai.

benabada yona kabihemauli se hai sunuma debanaena. ⁵ Na yoda lauhekata ta kaniyona lakilakina ede gadosisi, na gadosisi yona kabalaoma ede nuwa a'ana yo nuwasibasiba dudulaina** yo sunuma mamohoina. ⁶ Tamowai hekadi meta teina miyamiya ta se laugabaediko na se modesuwalalau hedehehede nige kaniyodi udiyedi. ⁷ Se henuwa bena se hemala Mose yona laugagayo taulauhekataena, iyamo nige kabina se kata saha unai se tolobayao na se hedehehede ne.

⁸ Kabina ta kata Mose yona laugagayo ne meta ye namwa, taba ena ta hep-aisowanamwanamwaei ⁹ na ta nuwatulobai meta laugagayo ne nige laulaududulai tamowaidiyao kabatolehedudulaidi, na yababa tamowaidiyao kabatolehedudulaidi. Siya ede laugagayo tau'utu'utusiyo yo taukawakawayagala tamowaidiyao, tamowai Yaubada nige se nuwatu yo yababa tauginaginalidi, tamowai yodi laulau nige se namwa yo Yaubada nige se hekasisiyei, tama yo sina taukoihemwaloidi, taukaikaiunu, ¹⁰ tauganaganawali yo laulau bikibikidiyao udoi'udoi tauginaginalidi,** tamowai taulokulokunegabaedi,** taulaululupolupo, tau'uha'uhahalupolupo, yo kaiteyadi lauhekata dudulaina nige se miyamiwatanidi. ¹¹ Lauhekata dudulaina ne, iya ede Yaubada saesaekalilina wasana namwanamwana, ye haiyama kaliguwai na ya laulauhekataei ta.

Lautoki Yaubada yona katekamkamna debanaena

¹² Yoda Guiyau Yesu Keliso ya lautokiyei matawuwuna yona sunuma ye tole kaliguyena na ye hetologau yona taupaisowa na ye hebayaogau. ¹³ Beyabeyana yau meta Keliso hesana tauhededeheyababana yo yona tamowai ya hewaiunudi, hinage yau meta tamowai sinasinakalana. Iyamo Yaubada ye katekamkamnaeigau matawuwuna ede saha ya ginaulidi ne udiyedi meta nige yogu nuwatulobai yo nige yogu kawamamohoi hesau. ¹⁴ Na yoda Guiyau yona kabinamwa ye inigabaeiyama kewaguyena meta ye lakikalili, yo hinage sunuma yo gadosisi Keliso Yesu kalinawai ne udiyedi ye hemwayaugau.

¹⁵ Teina ta meta hedehehede mamohoina, na ye namwa mo taba tamowai maudoidi bena se kawamamohoiyei: Yesu Keliso ye dobima tanoubu ta unai kaniyona ede bena yababa tamowaidi ye gilihaidi. Na luwadiyena yau meta ya yababakalili. ¹⁶ Iyamo Yaubada ye katekamkamnaeigau. Yau ya yababakalili, na yona nuwatu ede bena kabo kaliguyena Yesu Keliso yona nayatautaubiga nige yona kabagehe ne ye hemasalaha. Bena ya hemala tamowai maudoidi yodi kabakita, na unai kabo se nuwatulobai meta siya hinage gonowana iya se sunumaei na unai mauli nige kana siga se hai. ¹⁷ Huya maudoina nige kana siga bena hekasisi yo hededetausaei se sae yoda wasawasa miyamiyahaina ne unai. Iya nige gonowana ye boita yo nige gonowana ta kita, iya ye bom mo Yaubada. Mamohoi.

Timoti kana hedehebayao

¹⁸ Natugu Timoti, teina ta meta yogu hedehehesibasiba kalimwai. Hedehehede ta wuwudi ede Yaubada yona hedehehemasalaha hesabam tauhededepeloweta hekadi se hedededi kalimyena wa. Yodi hedehehede ne bena ku miyawatanidi na udiyedi ku iyalanamwanamwa. ¹⁹ Bena yom sunuma Keliso unai ne ku kabihakahekahini, yo huya maudoina laulau dudulaidi mo ku miyaidi. Tamowai hekadi meta nuwanuwatu ta se subu na unai ede yodi sunuma wa se tolegabaedi. ²⁰ Luwadiyena meta Himiniyasi yo Alekisenda. Ya talamyeyidi Satani unai bena ye hekamkamnadi na unai kabo se nuwatulobai na tabu Guiyau se hedeheheyababa.

** **1:5:** Nuwasibasiba kaniyona ede namwa yo yababa nuwatulobaidi. ** **1:10:** Laulau bikibikidiyao udoi'udoi tauginaginalidi ne, tamowaidi ede tau yona hali tau yo sine yona hali sine maidadiyao se kenokesega. ** **1:10:** Tamowai taulokulokunegabaedi meta kabalokulokune udiyedi heyayai tauhaidi taulokulokunegabaedi.

2

Tapwalolo hedehehedena

¹ Bagubaguna ya henuwa taba tapwalolo** yo lautoki paisowana se laulau tamowai maudoidi hesabadi. ² Wasawasa maudoidi yo lolina gigibwalidi taukitahetetedi tamowaidiyao yodi kwa kaibwada, taba gonowana ta miyanamwanamwa mauli dau-daumwalina unai na Yaubada yona nuwatu ta miyawatanidi na yoda laulau se dudulai. ³ Tapwalolo doha teina meta se namwa na Yaubada taugilihaida ye henuwadi. ⁴ Iya ye henuwa bena tamowai maudoidi kabihemauli se hai yo bena hedehehede mamohoina se nuwatulobai, ⁵ iya ede teina: Yaubada meta kesega, yo Yaubada yo tamowai duwaduwalidiyena tautolo ne meta kesega mo, iya ede Yesu Keliso, ye laoma ye hemala tamowai. ⁶ Iya ye bom ye mosegabae'uyoi na tamowai maudoidi ye hemaisahaidi. Teina wasa ta Yaubada ye leyama kalidaena huyana dudulaina unai. ⁷ Wasa ta debanaena yau ye kaisunuwaigau meta tauwasaduwai yo apostolo - teina ta meta hedehehede mamohoina, nige lupu. Ye kaisunuwaigau bena sunuma mamohoina ta ya lauhekataei dagela tamowaidiyao udiyedi.

⁸ Yomi laomagogoi maudoidi teha udoi'udo'i udiyedi meta ya henuwa taba tatao nimadi se lausinidi na se tapwalolo Yaubada unai, nige bena ma koipilidi o ma hetalopilidi, na yodi miyamiya taba se namwa Yaubada matanaena.

⁹ Yo ya henuwa hinage bena taba sinesineo hekasisi yo nuwatu dudulaina unai se kalekonamwanamwa. Nige bena kuludiyao se heidi, o gole yo giniuba matapouna udiyedi taudi se hepasadi, o kaleko didididigadi se likwadi. ¹⁰ Taba yodi laulau namwanamwadi udiyedi kadi kao se henamwadi. Sinesineo se hedede bena Yaubada se hekasisiyei, siya yodi laulau dudulaina ede teina.

¹¹ Sinesineo bena se tulitautaubiga yo se lapulapuinaamwanamwa na unai kabo sonoga se hai. ¹² Nige ya talam bena taba sinesineo se lauhekata tatao udiyedi na yodi gigibwali se saedikwaidi, na bena se tautaubiga.** ¹³ Matawuwuna ede Yaubada Adama ye ginaulibagunai na mulina ne unai kabo Ewa ye ginauli. ¹⁴ Na Satani meta nige Adama ye nohoi, na waihiu wa, ede yababa ye masalaha iya unai. ¹⁵ Iyamo Yaubada kabo waiwaihiu ye hemauidi yodi labalaba debanaena, ena taba se miyamiya ma sunumadi yo ma gadosisidi, yo Yaubada yona nuwatu se miyamiyawatanidi, yo se kitahetete'uyoidi.

3

Dubu yodi tauwoyawoya yo diyakona hedehehededi

¹ Teina ta meta hedehehede mamohoina hesau: “Ena taba tamowai hesau ye henuwa bena iya tauwoyawoya dubu unai, meta yona henuhenuwa ede taba paisowa saesaekalilina ye hai.” ² Unai dubu yona tauwoyawoya meta bena yona laulau se dudulai na nige kabahegiluna hesau, bena mwanena kesega, nuwanuwataluna, ye kitahetete'uyoi, yona miyamiya ye sibasibaeidi, ye kabikabitaumana, yo gonowana tamowai ye hekatadi. ³ Iya tabu tamowai numanumayauyaulena, tabu koukouyalayalana, na bena yona kabi se namwa, nige ye lulululu, nige bena moni gadosisina nuwana ye laugilihai. ⁴ Bena yona numa hekasana ye tolenamwanamwaei yo ye kita meta bena natunao iya se kawakabiyei yo se hekasisiyei. ⁵ Matawuwuna, ena

** **2:1:** Tapwalolo: Paulo hedehehede haiyona ye hepaisowadi, siya ede kaibwada, tapwalolo, yo kaibwadabayao tamowai hesabadi. Na kalinada unai ta kabigogoidi ta wane tapwalolo. ** **2:12:** Sinesineo... bena se tautaubiga: Siya yodi huyaena sinesineo hekadi mwanediyao se kawayagalaeidi na nige se henuwa bena yodi lolina gunidiyena se miya. Siya dubu dagelana tamowaidi, na hesadi Sinesineo Hauhaudi. Gabemani ye hewaiunudi. Na Paulo nige ye henuwa bena ekalesiya sine hesau yona kabikabi doha Sinesineo Hauhaudi ne.

taba tamowai hesau yona numa kitahetetena nige kabina ye kata, meta idohagi kabo Yaubada yona dubu ye kitahetete?

⁶ Tauwoyawoya tamowaina meta nige bena tau'ekalesiyahauhau tamowaina, kaniyona ede yodi kaisunuwa mwamwayauyeina ne unai kabo ye nuwasaesae, na nuwasaesae ne unai kabo hekamkamna ye lobai gonogonwana doha diyabolo. ⁷ Iya meta bena dagela tamowaidiyao se kawanamwanamwaei, na kabo taba nige kabahemwadineina se lobai, yo nige gonowana diyabolo iya ye lupohai.

⁸ Hedehedede ta hinage ye lau diyakona udiyedi, taba yodi miyamiya se sibasibaeidi, tabu se memenalagalaga, tabu se numanumayauyaule, yo tabu kalidiyena moni gadosisina ye laki. ⁹ Siya meta bena se tolobayao sunuma ta nuwanuwatudi saesaedi udiyedi yo nuwadi se a'a. ¹⁰ Bena ku lautonogibagunaidi paisowa hekadi udiyedi, na ku kitasipwaidi, na ena ku kitadi meta se namwa, teina unai kabo gonowana ku toledi se hemala diyakona.

¹¹ Hinage mwanediyao meta bena yodi miyamiya se sibasibaeidi, nige tamowai tauhedehededeheyababadi, bena se nuwanuwatalu, yo gonowana tamowai se sunumaedi paisowa maudoidi udiyedi.

¹² Diyakona meta bena mwanena kesega, natunao ye hekatanamwanamwaedi yo yona numa kana lina ye ginaulinamwanamwaei. ¹³ Kaiteyadi diyakona unai se paisowanamwanamwa meta yodi paisowa ne udiyedi kabo tamowai se kitahenamwadi, yo hinage Yesu Keliso sunumana unai kabo se bayao.

Yoda sunuma wuwuna meta Yesu

¹⁴ Ya henuwa taba bena ya laowa mwamwayau kalimwai, na hededehehesisiba ta ya kulibagunaediwa. ¹⁵ Na ena ya pahili meta gonowana kabo tamowai ku hekitalobaidi miyamiya sahasahadi namwanamwadi kabo se miyaidi Yaubada yona numa tamowaidiyao luwadiyena. Numana ede Yaubada maumaulina yona dubu, na dubu ne meta hedehedede mamohoidi taupatuduuidi ede. ¹⁶ Maudoida ta hemamohoiyei, yoda sunuma nuwanuwatuna Yaubada ye hemasalajahi kalidaena wa, siya meta se saekalili, siya ede:

Iya** buluma unai ye masalahama,
 Yaluwa Tabuna iya ye hemamohoiyei,
 anelu iya se kita,
 dagela tamowaidiyao udiyedi se lauguguyaei,
 tanoubu maudoina iya se kawamamohoiyei,
 Yaubada ye hai'uyoi na yona didiga unai ye miya.

4

Hekadi kabo sunuma se lausuwalaei

¹ Yaluwa Tabuna ye hededehehemasalaha meta huya mulimulitadi udiyedi tamowai hekadi kabo sunuma ta se laugabaei na se lapulau yaluyaluwa laulaulupolupodi yo demoni yodi lauhekata udiyedi. ² Taulauhekataeidi ede taukaikailupolupo kadi kao doha ekalesiya, na iyamo siya meta nige. Yodi nuwanuwatu udiyedi nige gonowana namwa yo yababa se nuwatulobaidi, kana kao doha yodi nuwatulobai se mwaloiko. ³ Tamowai se hededehekaiyawasidi tabu se tawatawasola, yo kai hekadiyo tabu se kaikaidi.** Na iyamo kai ne Yaubada ye ginaulidi meta iya tausunumaena yo hedehedede mamohoidi kabidi taukata bena se kaidi ma laulautokidi. ⁴ Matawuwuna ginauli maudoidi Yaubada ye ginaulidi meta se namwa, na nige gonowana kai hesau ta subu,

** **3:16:** Iya: Teina meta Yesu Keliso hedehededena. ** **4:3:** Kai hekadiyo tabu se kaikaidi: Kai se laugagayoidi wa, siya meta Mose yona laugagayo unai Yaubada ye laugagayoidi wa, doha puwaka yo mwaedo yo wadala. Na kai namwanamwadi hekadiyo hinage se hededeheyababagaibuidi.

ena lautokina ta ginauliyako Yaubada unai. ⁵ Kaniyona ede Yaubada kalinana unai ye hedede-yako meta se a'a, na yoda tapwalolo unai ta mose'uyoidi Yaubada unai.**

Timoti kana paisowa

⁶ Ena hededehe-sibasiba ne ku hedehedehemasalahadi kada kahao udiyedi, meta kowa kabo Yesu Keliso yona taupaisowa namwanamwana. Sunuma hedehededenya yo lauhekata namwanamwadi ku miyawatani'useidi wa meta siya tauhebayaogo. ⁷ Na tanoubu ta hedehedededi lupolupodi yo hedehedede yauyaulediyao tabu ku lapulau udiyedi, na ku kaipatebayao bena Yaubada yona nuwatu ku miyawatanidi. ⁸ Doha hededesonoga hesau se wane, "Ena ta lubulubui kaiheya hesabana meta tauda ta yona namwanamwa hesabana, na Yaubada yona nuwatu miyawatanidi meta se namwakalikalili, na udiyedi tanoubu ta unai yo hinage huya matadaena kabo mauli ta lobai." ⁹ Teina ta meta hedehedede mamohoina, na ye namwa mo taba tamowai maudoidi bena se lapui na se miyawatani. ¹⁰ Debanaena ede ta paisowa yo ta kaipatebayao, matawuwuna ede yoda midi ta toleyako Yaubada maumaulina unai. Iya meta tamowai maudoidi taugilihaidi, iyamo kaiteyadi iya se sunumaei meta se bom mo iya taugilihaidi ede. ¹¹ Teina nuwanuwatudi ta ku lauhekataedi tamowai udiyedi bena se miyawatanidi.

¹² Tabu tamowai hesau ye kitadobidobiyeigo matawuwuna ede kowa hewali, na saha ku miyamiyaidi ne bena se hemala tausunuma yodi kabakita, yom hedehedede, yom miyamiya, yom gadogadosisi, yom sunumatahitahi, yo yom nuwa'a'a udiyedi. ¹³ Huya maudoina bena kulikuli tabuna** ku hasihasiligabaei tamowai udiyedi, ku hededehebayaodi, yo ku lauhekataedi, ye lau ee ya laowa kalimwai. ¹⁴ Yaluwa yona kainauya kalimwai tabu ku nuwaluluhiyei, na bena ku hepaisowa. Iya ede tauwoy-awoya tamowaidiyao nimadiyao se tolesaedi kewamyena na se hededepelowetaei kalimwai wa.

¹⁵ Paisowa ta udiyedi bena ku taubiga yo ku ginaulidi ma nuwakohihaim. Udiyedi bena tamowai maudoidi se kitago meta yom sunuma ne ye bayao ye laulau. ¹⁶ Yom miya yo yom lauhekata ne unai bena ku kitanamwanamwaei'uyoigo na udiyedi ku tolobayao, matawuwuna saha ku ginaulidi ta udiyedi kabo kowa yo taulapulapulaowa tamowaidiyao hinage mauli kwa lobai.

5

Idohagi Timoti bena dubu tamowaidiyao ye kabinamwanamwaeidi

¹ Tabu ku hededesinasinalalau tautaubadao udiyedi na bena ku hekasisiyeidi na ku hededebigabiga doha kowa tamam. Ku hedehededelau kam isi loheloheyao udiyedi meta doha kowa kam kahao. ² Sinesinebadao ku kabidi doha sinamwao, yo sinesineo hekadiyo doha kowa loumwao, ma nuwa'a'am.

³ Kwabukwabuli bena ku hekasisiyeidi yo ku kitahetetedi, ena siya nige taukitahetetedi hesau. ⁴ Na ena kwabuli hesau natunao o wahanao, meta yodi sunuma miyamiyana unai bena se kaipate na sinadi o wahadi ne se kitahetete. Na saha se ginauli ta ye hemala yona taubiga wa maisana. Laulau ta Yaubada kalinawai meta ye namwakalili. ⁵ Na kwabuli mamohoina nige taukitahetetena meta yona sunuma ye tole Yaubada unai na mayadai yo boniyai ye tapwatapwalolo yo ye kaikaibwadasagu Yaubada unai. ⁶ Na ena kwabuli hesau gwaualagaibu mo udiyedi ye miyamiya, iya yona huyamaumauli ne unai meta yaluwana ne ye boitako. ⁷ Hedehedede ta unai ku hedehedebayao kwabuli ma kehanao udiyedi, kabo tamowai nige gonowana

** **4:5:** Se a'a yo ta mose'uyoidi Yaubada unai hedehedededi kalina Giliki unai meta hetabu. ** **4:13:** Kulikuli tabuna ta meta Talam Bagubagunana bukana kalina Giliki unai se kulubui. Buka ne hesana ede *Septuagint*, kaniyona ede 70, matawuwuna taukulibuina badodi 70.

hesau se kitaheyababa. ⁸ Na ena ekalesiya hesau iya kehanao o yona numa kalona tamowaidiyao nige ye kitahetetedi, meta yona sunuma wa ye laugabaeiyako na yona laulau ne ye yababakalili na kabo nige tausunuma tamowaina.

⁹ Tabu kwabuli maudoidi dubu yona sagu ne unai kwa hasilikesegaidi na dubu bena ye saguidi. Na kaiteya iya yona bolimai 60, yo iya mwanena kesega kana siga ye kwabuli, ¹⁰ yo laulau namwanamwadi ye ginaulidi wa debadiyena kabo tamowai iya se kitahenamwa, doha wawayao ye kitakitahetetedi, ye kabikabitaumana, ye kabikabिताubiga Yaubada yona tamowai udiyedi, tamowai yodi miyapilipili udiyedi ye saguidi, yo laulau namwanamwadi udoi'udoj ye miyamiyaidi, unai dubu gonowana iya se sagui.

¹¹ Tabu kwabulihahasala ku hasilikesegaidi, kaniyona ede taudi lelehina yo yona kamna ye lakikalili ede Keliso unai yodi talam wa se laugabaei na se henuwa bena se tawasola'uyo. ¹² Na unai yodi talam se ginauliyako wa se utusi. Teina unai se bom kabahededehegiludi se ginauli. ¹³ Na nige tenem ye bom. Na ena se tautaunuma kabo miyamiyagaibu unai se manasa. Na nige miyamiyagaibu ye bom mo, na hinage se mon-umonunu yo se modemodegaibu, na hedehedede saha bena tabu se hedehedededi wa iyamo se hedededi. ¹⁴ Unai ye namwa mo taba kwabulihahasala ne se tawasola'uyo, se natulaba, yo se bom yodi numa se kitahetetedi, matawuwuna nige ya henuwa bena waiunu yona solasola hesau ta mosei na unai kabo tamowai se hededeheyababada. ¹⁵ Na hekadiyo meta yoda sunuma ta se laugabaeiyako se lau Satani se hemuliwatani.

¹⁶ Ena tausunuma waihiuna hesau yona numaena meta kwabuli se miyamiya, iya bena ye saguidi. Na tabu dubu se hepolohekaliliyei, kabo gonowana dubu ye kitalau taukwabuli siya nige gonowana sagu hesau haedi se lobai ne udiyedi.

Dubu babadadiyao hedehedededi

¹⁷ Dubu babadadiyao siya tauwoyoyanamwanamwa, yo kaiteyadi siya taulau-guguyabayao yo taulauhekatanamwanamwa, meta ye namwa mo taba ta heka-sisikaliliyeidi. ¹⁸ Matawuwuna kulikuli tabuna ye wane, “Ena bulumakau witi kaniyona kabakabiyawasina unai ye paipaisowa meta tabu kawana ne kwa sumasumagudui.”** (*Dutelonomi 25:4*) Yo hinage ye wane, “Taupaisowa yona dudulai meta bena taba yona paisowa maisana ye hai.” (*Luka 10:7*)

¹⁹ Ena tamowai hesau dubu badana hesau ye hegilu, tabu ku lapulau tamowai ne unai, kana sigana ena tamowai labui o haiyona lauhegilu ne se hemamohoiyei. ²⁰ Ena dubu babadadiyao ta hesau ye ba'aya, meta bena tamowai matadiyena ku dilamatai. Teina ta ye hemala hekadiyo kabahehasibadi. ²¹ Yaubada yo Yesu Keliso yo anelu saesaedi matadiyena ya hededelaowa bena yom paisowa ta ku ginaulinamwanamwaei, na yom hineli ku kitasipwanamwanamwaeidi yo tabu gadosisihineli unai yom hekasa ku ginaginaulidi.

Hededehehasiba udoi'udoj

²² Tabu ku sagenakalili na tamowai ku kabibolubolui,** madai tenem unai ku patulau tamowai ne yona yababa udiyedi. Na ku kitakitanamwanamwa bena kowa yom laulau maudoidi se a'a yo se dudulai.

²³ Tabu wailagaibu mo ku numanuma, na bena waina gagilina hinage ku numa, kaniyona ede bogam yo yom kasiyebwa hegahegagili ne hesabadi.

²⁴ Tamowai hekadi yodi yababa meta se masalahakalili na se woayidi se laulau hekilaino hesabana. Na tamowai hekadi yodi yababa meta nige gonowana ta kitamwamwayauyeidi, na muliyena kabo se masalaha. ²⁵ Hinage doha, laulau

** **5:18:** Bulumakau witi kaniyona kabakabiyawasina unai ye paipaisowa: Witi hededehehasalahana ku hasili.

** **5:22:** Tamowai ku kabibolubolui: Tausonoga yodi hededehehasalahana ye lau teha labui udiyedi: (1) Tamowai ne se hetolo bena dubu unai taupaisowa, o (2) tamowai ne ye beku na ye uyoma dubu unai.

namwanamwadi hekadi meta se masalahakalili, na hekadiyo nige se masalaha ne meta nige gonowana se wadamdi.

6

Ekalesiya siya heyayai tauhaidi hededehehisibasibadi

¹ Siya kaiteyadi tamowai yodi heyayai tauhaidi na kadi tanuwagao yodi lolina bayabayaodi gunidiyena taumiya meta bena kadi tanuwagao ne se hekasisinamwanamwaeidi. To taba nige Yaubada hesana yo yoda lauhekata ta tamowai se hededeheyaheyababa. ^{2a} Na kaiteyadi kadi tanuwagao meta siya taukawamamohoi, tabu kadi tanuwagao ne se kitakitadobidobiyeidi, matawuwuna sunuma ta unai se hemala kadi kahao. Ye namwa mo taba taubiga mamohoina unai kadi paisowa ne se ginaulidi, kaniyona ede paisowa ne unai yodi hali taukawamamohoi ne se gadosisikaliliyeidi meta se saguidi.

Gogo gadosisidi

^{2b} Timoti, teina nuwatu ta ku hekatadi na ku hededehehisibasibadi bena se miyawatanidi. ³ Ena tamowai hesau lauhekatalupolupo ye lauhekataedi, na yoda Guiyau Yesu Keliso yona hedehedede dudulaidi yo Yaubada yona nuwatu miyawatanidi lauhekatadi ye subudi, ⁴ meta temeta tamowai ne taunuwasaesaegaibu yo nige yona nuwatulobai hesau. Tamowai doha teina meta yona gadosisi ede bena ye haikawayagala mo na hedehedede kaniyodi ye hetahetalagaibuidi. Teina ta unai kabo haikawayagala ye hetubudi na udiyedi kabo kaikalomagigili, lulu, hedehededeheyaheyababa, yo hegihegilugaibu se laoma. ⁵ Teina tamowai ta meta huya maudoina pilipili se ginaginulidi, yodi nuwanuwatu meta se yababa yo hedehedede mamohoidi nige kabina se kata. Yodi nuwanuwatu ede Yaubada yona nuwatu miyawatanidi ta debanaena kabo se gogo. ⁶ Na ena nige ta henuwa bena ta gogo, meta Yaubada yona nuwatu miyawatanidi unai kabo namwa ta lobai. ⁷ Matawuwuna huyalabasida unai meta nige saha hesau ta baheiyama tanoubu ta unai, hinage yoda boita unai meta nige gonowana saha hesau ta bahei. ⁸ Na ena kada kai yo kaleko ede kalidawai, meta udiyedi bena ta gwauyala. ⁹ Na tamowai se henuwa bena se gogo meta kabo se lulau noho luwanaena, yo gadosisi yauyauleidi se hemala kadi sipwasipwa na udiyedi yababa se hekalodi, na se woyaidi se lau hekamkamna unai. ¹⁰ Matawuwuna moni gadosisina meta yababa udoi'udoi wuwudi ede. Tamowai hekadiyo moni gadosisina debanaena ede Yaubada sunumana se laugabaei na nuwayababa udoi'udoi udiyedi se bom se hekamkamna'uyoidi.

Timoti kana hededehehisibasiba

¹¹ Na kowa, Timoti, meta Yaubada yona tamowai. Unai yababa maudoidi ne ku yabubugabaedi. Taba ku kaipatebayaokalili bena yom miyamiya se dudulai yo Yaubada yona nuwatu ku miyawatanidi, ma sunumam yo ma gadosisim yo ma nuwatalum, yo ku tolobayao. ¹² Bena sunuma iyalana unai ku iyalabayao. Huyana ku hededehemasalahago boda matadiyena meta yom sunuma ku tole Keliso unai, ede Yaubada ye kaisunuwaigo na mauli nige kana siga ye haiyawa. Mauli ne taba ku kabihekahini! ¹³ Yaubada, iya mauli ye mosei ginauli maudoidi udiyedi, yo Yesu Keliso, iya Pontiusi Pilato matanaena hededehemasalahaga namwanamwana tauginaulina wa, siya matadiyena ya hededelaowa ¹⁴ bena lolina ne ku kawakabinamwanamwaei yo tabu kabahegilugo hesau, ye lau ee yoda Guiyau Yesu Keliso yona huya'uyoma. ¹⁵ Yona huya'uyoma ne meta Yaubada ye bom yona mahanaena kabo ye hemamohoiyei. Yaubada ede tauwoyawoya saesaena kesegana, wasawasa yodi wasawasa yo guiyau yodi Guiyau, ¹⁶ iya ye bom mo miyamiyahaina yo yona kabamiya dawayana nige gonowana ta lau ta hanahanawui, sola nige tamowai hesau iya kana kao ye kita, yo taba

nige gonowana tamowai hesau iya ye kita. Taba huya maudoina hekasisi yo gigibwali se sae iya unai. Mamohoi.

Gogo tamowaidi kadi hedehedede

¹⁷ Tanoubu ta unai taugogo tamowaidiyao ku hededebayaolau udiyedi tabu se nuwasaesae yo tabu yodi sunuma se toledi yodi gogo ne udiyedi, matawuwuna gogo ne kabo se gehe. Na bena yodi sunuma se tole Yaubada unai, iya taukainauyaida yo ginauli maudoidi ye haidima bena udiyedi ta gwauyala. ¹⁸ Ku hededelau taugogo ne udiyedi bena tamowai hekadi yodi namwanamwa se ginaulidi, na miyamiya namwanamwadi se haidi na se hemala yodi gogo. Bena se kaikainauya ma nuwakohihaidi. ¹⁹ Miyamiya ta udiyedi meta galewa ne unai yodi gogo kabinonohana se kabikabinonoha, ye hemala yodi kaba'utubayao huya matada ne unai hesabana, na bena mauli mamohoina se hai na se kabihekahini.

²⁰ Timoti, Yaubada saha ye haiyawa wa bena ku hepaisowa yo ku kitahetete-namwanamwaei. Tanoubu ta yona koitalaliugaibu yo tamowai hekadi yodi haihaik-awayagala hedehedededi ku kaihaleidi. Tamowai ne yodi nuwatu bena se sonoga, na iyamo yodi sonoga ne meta nige sonoga mamohoidi. ²¹ Tamowai hekadiyo se hedehemasalaha'uyoidi meta sonoga yauyauleidi ne se hemuliwatanidi. Teina unai Yaubada sunumana wa se laugabaei.

Yaubada yona kabinamwa bena maudoimiu kalimiuyena.

2 Timoti

Paulo yona leta helabuina ye lau Timoti unai Buka ta hededehe masalahana

Apostolo Paulo yona leta bagubagunana ye lau Timoti unai (1 Timoti) ye kuli Masedoniya unai na mulina ne unai ye lau Kolinito yo Miletusi (2 Timoti 4:20) yo magari hekadiyo, ye lau ee Loma yodi gabemani Paulo se hai'uyoi na se pai na se laei magari lakilakina Loma unai se tole numatutuguduyena (2 Timoti 1:8,16-17, 2:9), iya ede bolimai 65 AD unai. Tenem huyana ne unai Loma yodi wasawasa Sisa Nelo ekalesiya ye hewaiunudi, na hewahewaiunu wa ye pilipikalili. Numatutugudu unai Paulo kabo leta ta ye kuli yona hali taupaisowa Timoti unai (2 Timoti 1:2). Leta ta yona huyakulina bolimaina tausonoga se kaimasi nuwana 66 AD. Tenem huyana ne unai kabina ye katako meta kabo se unuhemwaloi (2 Timoti 4:6,18).

Leta ta unai Paulo yona nuwanuwatu lakilakidi labui ye kulidi:

- (1) Paulo ye nuwayababa na ye henuwa bena Timoti ye kita, matawuwuna yona hali taupaisowa hekadiyo wa iya se laugabaei na maidana taumiya kesega mo, iya ede Luka (2 Timoti 4:9-13).
- (2) Hewahewaiunu lakilakina debanaena ede Paulo ye nuwanuwatukalili taba ekalesiya ne se tolobayao, na yona nuwatulakilaki ede bena ye hededehebayaodi (2 Timoti 4:3-4).

Buka ta hedehedena lakilakidi

- Lautoki yo tapwalolo 2 Timoti 1:1-2
- Tabu mwadimwadine Guiyau debanaena 1:3-18
- Bena Keliso yona taupaisowa namwanamwana 2:1-26
- Huya gehegehedi ne udiyedi tamowai yodi miyamiya doha saha 3:1-9
- Taba tolobayao 3:10–4:8
- Hededehebasiba yo lautoki 4:9-22

Lautoki

¹ Yau Paulo leta ta ya kuli. Yau Yesu Keliso yona apostolo Yaubada yona nuwatuyena. Ye kaisunuwaigau bena mauli hededehesunumana wasana ta ya wasaduwaiyei. Iya ede Yaubada yona hededehesunuma meta kabo mauli ye leyama Yesu Keliso debanaena.

² Kulikuli ta ye lau Timoti kalimwai, kowa natugu ya gadosisikaliliyeigo.

Taba Yaubada Tamada yo Yesu Keliso yoda Guiyau yodi kabinamwa, katekamkamna, yo nuwadaumwali se toledi kalimwai.

Timoti kana paisowa yo yona sunuma hededehebayaona

³ Boniyai yo mayadai maudoidi ya nuwanuwatuigo yogu tapwalolo udiyedi na Yaubada ya laulautokiyei. Iya ede yau yogu kabataba'ohu gonogonowana doha kagu kulutubu hinage, na yogu paisowa ta unai ya nuwatulobai meta nige kagu giluhesau.

⁴ Huyana ya laugabaeigo yom kabimatasulu wa ya nuwatuidi na ya henuwakalili taba ya kita'uyoigo. Metai kabo ya gwaualakalili, ⁵ matawuwuna nuwagu ta unai ye sae na ya nuwatui meta yom sunuma ne mamohoina. Bagubaguna, sunuma ta meta waham Loisi unai ye miya, na kabo hinage sinam Yunisi unai, na ya nuwatulobai meta iya ede kowa hinage kalimyena ye miyamiya. ⁶ Unai ya henuwaisinigo: Huyana nimagu ya tolesaedi kewamyena na Yaubada yom kainauya ye leyawa wa meta bena ku hepaisowa yo ku hegigibwali'uyoi. ⁷ Matawuwuna Yaluwa Tabuna Yaubada ye leyama kalidaena wa meta nige matausi Yaluwana, na gigibwali, gadosisi yo miyamiya namwanamwadi yaluwadi.

⁸ Unai tabu ku mwadine na yoda Guiyau wasana bena ku wasaduwaiyei tamowai udiyedi. Yo hinage yau Keliso debanaena numatutugudu unai ya miyamiya ta, tabu ku mwadineigau, na bena ku nonohakalili na wasa namwanamwana ta debanaena na Yaubada yona gigibwaliyena kabo ku kamkamasaguigau. ⁹ Iya ye gilihaida yo ye yoganeida ta hemala yona tamowai. Nige bena yoda laulau namwanamwadi debadiyena, na iya yona nuwatu yo yona kabinamwa debanaena ye gilihaida. Huyana tanoubu ta sola nige ye tubu na yona nuwatu ye ginauliyako meta kabinamwa ta kabo Yesu Keliso unai ye haiyama. ¹⁰ Na taugilihaida Yesu Keliso yona laoma wa unai kabinamwa wa ye hekitada. Iya boita yona gigibwali ye heyababa na mauli nige gonowana ye gehe meta ye hemasalaha wasa namwanamwana unai. ¹¹ Na Yaubada ye kaisunuwaigau tauwasaduwai yo apostolo yo taulauhekata, bena wasa namwanamwana ta ya hededehehemasalaha. ¹² Yogu paisowa ta debanaena ede ya kamkamna ta. Na nige ya mwadine, matawuwuna kabina ya kata kaiteya unai yogu sunuma ya tole, yo ya nuwatulobai meta gonowana saha ya mosei iya kalinawai wa** kabo ye ganaganaei ye lau ee mayadai gehegehena ne unai.

¹³ Lauhekata dudulaidi ku lapuhaidiko kaliguwai wa bena ku kabihekahinidi na se hemala yom kabakita na ku paisowawatanidi ma sunumam yo ma gadosisim, siya ede Keliso Yesu ye haidiwa wa. ¹⁴ Yaluwa Tabuna kalidawai ye miyamiya ta, iya yona sagu unai bena hedehede saesaekalilidi ya hededegebadeidi kalimyena wa ku kitahetedi.

¹⁵ Kabina ku kata meta teha Eisiya unai kada kahao maudoidi se laugabaegauko, maidadi Paigilasi yo Hemogenesi.

¹⁶ Onesepa maiyana yona numa tamowaidiyao taba Guiyau ye katekamkamnaeidi na ye saguidi, matawuwuna ede iya tausagusaguigau na numatutugudu unai yogu miya ta meta nige ye mwadinei ¹⁷ na huyana ye laoma Loma meta ye wasebayao ye laoma ee ye lobaigau. ¹⁸ Na [*lahinaidi*] Epeso unai yona sagu lakidi meta kabidi ku katakalili. Taba Guiyau yona katekamkamna ye lakikalili kalinaena hekasa mayadaina ne unai.

2

Guiyau yona taupaisowa namwanamwana

¹ Natugu, taba Yaubada yona kabinamwa unai bayao ye haiyawa. Yona kabinamwa ne tauhemasalahana meta Yesu Keliso, na unai gonowana ta hai. ² Yogu hedehede boda matadiyena ya hedede wa meta ku lapuidiko. Ya henuwa bena ku hededegebadeidi tamowai haedi ta sunumaeidi udiyedi, kabo gonowana se kata na tamowai hekadiyo se hekatadi.

³ Kowa meta Yesu Keliso yona tau'iyala namwanamwana, unai taba ku kamkamasaguigau yoda paisowa ta unai. ⁴ Tau'iyala tamowaina meta nige gonowana ye mode-modegaibu paisowa hekadi udiyedi, na ye kaipatebayao mo taba idohagi tauwoyaina nuwana ye henamwa. ⁵ Gonogonowana doha, tauheloikailakwa nige gonowana yona kainauya ye hai ena kailakwa ne laugagayona nige ye hemuliwataninamwanawaei. ⁶ Na koya unai taupaisowabayao, iya kabo koya ne kaina taukaibagunaina. ⁷ Saha ya hedede ta bena ku nuwanuwatuidi, na Guiyau kabo nuwanuwatu maudoidi ta ye hemasalahadiwa na ku nuwatulobaidi.

⁸ Huya maudoina tabu Yesu Keliso ku nuwaluluhiyei, iya Dawida kana isimulita na boita unai Yaubada ye hetolo'uyoi. Teina ta meta wasa namwanamwana ya wasaduwai'usei ede, ⁹ yo wasa ta debanaena ya kamkamna ye lau ee se tolegau numatutuguduyena na seniye se kaugau doha yababa tauginaginulina hesau. Iyamo Yaubada wasana meta nige gonowana se paihekahini. ¹⁰ Na Yaubada yona kaisunuwa

** **1:12:** Saha ya mosei iya kalinawai wa meta Paulo yona paisowa maudoina yo wasa namwanamwana yo taunuwabui yo dubu maudoidi, na ye mose'uyoidi Yaubada unai bena ye kitahetedi, matawuwuna Paulo meta numatutuguduyena ye babawa na nige gonowana saha hesau ye ginauli.

tamowaidiyao debadiyena pilipili maudoidi udiyedi ya hekalakasikasinigau, bena kabo siya hinage gilihai se lobai Yesu Keliso unai na se lagelau galewa magaina didididigana nige kana siga ne unai.

¹¹ Teina ta meta hedehedede mamohoina:

“Ena iya maiyada ta boita,
meta kabo maiyada ta maulikesega;

¹² ena ta tolotahitahi,
kabo maiyada ta loinakesege.

Ena ta uhalaei,
meta iya kabo hinage ye uhalaeida;

¹³ ena ta miyasuwalaiei,
iya taba nige ye miyasuwalaeda,
matawuwuna iya nige gonowana kana kao ye bui.”**

¹⁴ Nuwanuwatu ta udiyedi bena tausunuma tamowaidiyao ne ku henuhenuwaisinidi na Yaubada matanaena ku hededebayao udiyedi tabu hedehededegaibu udiyedi se haihaikawayagala'uyoidi. Yodi haikawayagala ta nige kaniyodi hesau, na taulapuidi tamowaidiyao meta kabo yababa se lobai.

¹⁵ Taba ku kaipatebayao na Yaubada bena ye kawanamwanamwaego meta kowa taupaisowa namwanamwana, nige yom kabamwadine hesau, yo kowa hedehedede mamohoina ta taulauhekataena namwanamwana. ¹⁶ Na hedehedede yaulyauledi bena ku kaihaleidi. Matawuwuna hedehedede ta udiyedi taumodelau meta kabo miyamiya yabayababadi udiyedi se yababakalili. ¹⁷ Tamowai ta yodi lauhekata meta doha bonu na ye kalahelaki ye lau. Taulauhekatalupolupo ne luwadiyena meta Himiniyasi yo Piletasi, ¹⁸ siya hedehedede mamohoina ta se laugabaeyako, na se hedede meta yoda boita tolo'uyona ede ye tubuko. Yodi lauhekata ta unai ede tamowai hekadi yodi sunuma se heyababadi. ¹⁹ Iyamo yoda sunuma yona kabatolo Yaubada ye ginauli wa ye bayao, iya ede teina: “Guiyau meta yona tamowai kabidi ye kata”, yo, “Kaiteyadi Guiyau hesana se hededehemasalaha meta taba laulau yabayababadi maudoidi se laugabaeyadi.”

²⁰ Numa lakilakidiyao udiyedi gogodiyao meta kadi kao udoi'udo. Hekadi gole yo siluba udiyedi se ginaulidi, na hekadi meta kaiwa yo bwatano udiyedi se ginaulidi. Hekadi meta kabakabitaumana gogodiyao, na hekadi paisowagaibu hesabadi.

²¹ Ena yababa ku miyasuwalaiei, meta kowa kabo doha numa gogona paisowa namwanamwana hesabana. Kabo ku a'a** na ku nonohakalili Tanuwaga yona paisowa namwanamwadi maudoidi hesabadi.

Miyamiya namwanamwadi

²² Hewali miyadi yabayababadiyao ku miyasuwalaedi, na ku kaipatebayao bena yom miyamiya se dudulai, yo sunuma, gadosisi, yo nuwadaumwali udiyedi ku miya. Yo kaiteyadi ma nuwa'a'adi se yogayogalau Guiyau unai meta ku labinidi.

²³ Haikawayagala yaulyauledi tabu udiyedi ku hededesagusagu, matawuwuna kabina ku kata meta siya lulu yodi kabatubu. ²⁴ Na Guiyau yona taupaisowa meta tabu ye lulululu, na yona kabikabi bena se namwa tamowai maudoidi udiyedi. Iya bena taulauhekata namwanamwana yo tamowai nuwanuwataluna. ²⁵⁻²⁶ Tamowai hekadi siya wasa mamohoina tauhewaiununa meta diyabolo yona sipwasipwa unai ye kabihekahinidi na yona nuwatu se ginaulidi. Siya bena ku guguyanamwanamwaedi yo ku hededebigabiga kalidiyena. Nuwana kabo Yaubada ye henuwamasalahadi na se

** **2:13:** Iya nige gonowana kana kao ye bui: Hedehedede ta kaniyona meta Yaubada yona hededehegunuma wa nige gonowana ye hai'uyoidi. ** **2:21:** Ku a'a: Kalina Giliki unai hedehedede ta ede doha tabu.

nuwabui yo hedehedede mamohoina kabina se kata, na unai kabo diyabolo yona sipwasipwa se wasabugabaei.

3

Tamowai yodi miyamiya mayadai gehegehedi ne udiyedi

¹ Timoti, bena kabina ku kata meta huya gehegehedi ne udiyedi kabo pilipili udoi'udoi ta hekalodi. ² Taukawayagala tamowaidiyao meta kabo se bom se gadosisi'uyoidi, moni gadosisina kalidiyena ye laki, se hededetausae'uyoidi, se nuwasaesae, Yaubada se hededeheyaheyababa, tama yo sina se kawayagalaedi, nige se laulautoki, yodi miyamiya nige se dudulai Yaubada matanaena, ³ nige gadosisi kalidiyena, nige nuwatu-gabae kalidiyena, tamowai se hededeheyaheyababadi, nige gonowana se bom se kabihekahini'uyoidi, tamowai se kabihenahenayaidi, laulau namwanamwadi nige se henuwadi, ⁴ tamowai kadi tauwalohai, kabamwaloi nige se nuwatuidi, se bom se kitah-esaedi, iyamo nige kaniyodi, yo tanoubu ta gwauyalana se gadosisikaliliyei, na Yaubada meta nigele. ⁵ Kadi kao se ginaulidi doha Yaubada yona nuwatu taumiyawatanidi, iyamo yodi miyamiya udiyedi Yaubada yona gigibwali nige gonowana ta kita. Tamowai doha teina meta tabu ku modemodelau udiyedi. ⁶ Matawuwuna taukailupolupo hekadiyo doha teina se lulau tamowai luwadiyena na sinesineo talatalamgaibudi se lupohaidi. Sinesineo ne meta miyamiya yabayababadi udoi'udoi se mwayau na yodi gadosisi yabayababadi se woyaidi na se sae yo se dobi. ⁷ Sinesineo doha tenem meta huya maudoina se henuwa bena lauhekata hauhaudi se lapulapuidi, na iyamo hedehedede mamohoina nige gonowana se nuwatulobai. ⁸ Taulauhekatalupolupo ne hedehedede mamohoina se hewaiunu gonogonowana doha Yanesi yo Yambelesi, ** siya taukailupolupo Mose tauhewaiununa wa. Taulauhekatalupolupo ne yodi nuwanuwatu nige se dudulai, yo sunuma ta unai siya taukaikailupolupo. ⁹ Na iyamo saha se ginagin-auli ta meta huyana taba nige ye loha, matawuwuna yodi nuwanuwatu yauyauledi ta kabo se masalaha tamowai udiyedi, gonogonowana doha Yanesi yo Yambelesi.

Timoti bena ye tolobayao lauhekata dudulaina unai

¹⁰ Na kowa, Timoti, meta tauhemuhemuliwatanigau, unai kabigu ku katakalili, yogu lauhekata, yogu miyamiya, yogu mauli paisowana kaniyona, yogu sunuma, yogu taubiga, yogu gadosisi yo yogu tolobayao, ¹¹ yo idohagi se kabihenahenayaigau, yo hinage yogu kamkamna. Hewahewaiunu udoi'udoi ta ya hekalodi Antiyoka, Ikoniya yo Lisitila magaidiyao udiyedi, na pilipili maudoidi wa udiyedi meta Guiyau ye gili-haigau. ¹² Mamohoikalili, kaiteya Yesu Keliso sunumana unai ye miyamiya na ye henuwa bena Yaubada yona nuwatu ye miyawatanidi meta kabo se hewaiunu. ¹³ Na yababa tamowaidiyao yo taukaokaolupolupo yodi kabikabi kabo se lau se yababakalili. Laulaulupolupo se ginaulidi tamowai hekadi udiyedi, na tamowai kabo taulaulupolupo wa hinage se lupohaidi. ¹⁴ Na kowa taba ku tolotahitahi lauhekata saha ka hekatago wa udiyedi. Lauhekata ne ku kawamamohoiyeidi matawuwuna tauhekatago wa kabidi ku katako. ¹⁵ Ma gagilim na ye laoma meta kulikuli tabudi udiyedi se hekatago. Kulikuli tabudi ta gonowana se hesibasibago na Yesu Keliso sunumana unai kabihemaui ku hai. ¹⁶ Kulikuli tabudiyao maudoidi meta Yaubada yona hesibasiba unai se tubu. Siya meta kabahekatada, kabaguguyaida, kabatolehedudulaida, yo laulau dudulaidi miyamiyaidi se hekatada, ¹⁷ na udiyedi bena kabo Yaubada yona tamowai ye kabinonohaidi paisowa namwanamwadi maudoidi hesabadi.

** **3:8:** Yanesi yo Yambelesi, siya Aikupito tamowaidiyao laulau gigigigibwalidi tauginaulidi wa, huyana Mose ye tolo Palao matanaena. Wasadi ta hasili Esodo 7:11-12, na iyamo hesadi nige se kuli lauhasili ne unai.

4

Paulo Timoti kana paisowa ye mosei

¹ Yaubada yo Yesu Keliso, iya kabo yona huya'uyoma mayadaina ne unai taumau-mauli yo tauboiboita ye tolehedudulaidi yo yona basileiya ye hemasalaha kalidaena, siya matadiyena kam paisowa ya haiyawa. Paiswana ede teina: ² Bena ku nonoha na Yaubada wasana ku lauguguyaei huya maudoina, kana huya unai o nige kana huya unai. Tamowai yodi yababa ku hededehehemalahadi kalidiyena. Ku guguyaidi yo ku hededehebayaodi ma taubigam yo lauhekata namwanamwadiyao udiyedi ku hekatadi. ³ Matawuwuna mahanana kabo ye laoma meta tamowai taba nige se lapulau hedehedede dudulaidi udiyedi. Siya kabo yodi gadosisi se hemuliwatanidi na kadi henuhenuwa tamowaidiyao kabo se waseneidi, bena taba kabo se lauhekata na kalidiyena kadi lapuhenuhenuwa se hedededi na se lapuidi. ⁴ Hedehedede mamohoina unai kabo beyadiyao se tolehesuwaladi na se lapulapulau pilipilidaigaibu udiyedi. ⁵ Mauli saha ku hekahekalodi udiyedi meta bena matam se nega. Ena pilipili ku hekalodi bena ku nuwabayao. Wasa namwanamwana bena ku wasaduwaiyei. Kam paisowa maudoidi bena ku ginaulinamwanamwaedi. ⁶ Matawuwuna yau yogu mauli ta meta ya mosegabaeyako Yaubada yona paisowa unai, kana kao doha waina se inigabaei kaitalasam hesabana, na yogu boita mayadaina meta ye hanahanaumako. ⁷ Yau yogu iyala unai meta ya iyalanamwanamwa, yo yogu heloikailakwa unai ya laoma kana siga unai ya lageko. Yaubada sunumana meta ya kabihekahini ye laoma ee yogu mauli sigana ta unai. ⁸ Yogu miyamiya dudulaidi kolonana** ede ye nonohako. Guiyau, iya tautolehedudulai namwanamwana, huyagehena mayadaina ne unai kabo kainauya ne ye haiyama kaliguyena. Na nige yau ya bom mo, na hinage siya kaiteyadi se nayanayakalili Guiyau yona huyataumasalaha mayadaina hesabana, maudoidi meta hinage kainauya ne kabo se hai.

Paulo yona hedehedede gehegehedi

⁹ Timoti, bena ku sagemama kaliguyena, ¹⁰ matawuwuna Demasi tanoubu ta gadosisina debanaena ye laugabaegau ye laoko Tesalonika. Kelesenisi ye laoko teha Galatiya, yo Taitasi ye laoko teha Dalematiya,** menai se paisowa. ¹¹ Luka ye bom mo ede maidagu. Bena taba Maleko maidam kwa laoma, matawuwuna ede iya meta tausagukaliliyeigau paisowa ta unai. ¹² Tikikasi ya hetamali ede kabo ye laowa Epeso. ¹³ Yom laoma ne unai bena kagu kouti ku baheiyama. Iya ede Tolowasi unai, Kapasi yona numa unai ya laugabaei. Yogu buka bena ku baheidima hinage, yo yogu pepwa tabu ku nuwanuwaluluhiyeidi. ¹⁴ Na Alekisenda, iya pawati paisowana tauginaginalina wa, meta pilipili lakilakidi ye ginaulidi kaliguwai na udiyedi ye hekamkamnagau. Na takiyede, Guiyau kabo yona yababa ne maisana ye mosei. ¹⁵ Yoda wasaduwai wa unai Alekisenda meta tauhewaiunuda lakilakina ede. Unai kowa hinage bena ku kitakitanamwanamwa!

¹⁶ Yogu lauhetala bagubagunana unai meta nige tamowai hesau yogu ye tolo, na maudoidi se laugabaegau. Yodi yababa ne Yaubada taba ye nuwatugabaedi. ¹⁷ Iyamo Guiyau dedekaguyena ye tolo na ye hebayaogau, bena yau kaliguyena kabo wasa namwanamwana ta ye masalahalau dagela tamowaidiyao udiyedi. Debanaena ede yau boita luwanaena** na Yaubada ye gilihaigau. ¹⁸ Guiyau kabo yababa udoi'udoiluwadiyena ye gilihaigau na ma namwanamwagu ye laeigau yona basileiya galewa ne unai. Lautoki yo hedebasae maudoidi se sae kalinawai nige kana siga. Mamohoi!

** **4:8:** Kolona meta heloikailakwa unai taulagebaguna, iya yona kainauya. ** **4:10:** Dalematiya meta Loma basileiyana tehana hesau, Masedoniya teha bwauli ne unai. ** **4:17:** Yau boita luwanaena: Paulo boita ye heyahayasoniyei laiyni kawana unai, ye kuli, laiyni kawana unai Yaubada ye gilihaigau.

Laukaiyoni

¹⁹ Yogu lautoki ku moseidi Pilisila yo Akuila, yo hinage Onesepa yona numa kalona tamowaidiyao udiyedi. ²⁰ Elasitasi Kolinito unai ya tauhemiya, yo Tolopimasi ye kasiyebwa ede Miletusi unai ya laugabaei. ²¹ Yubulusi maiyanao Pudenis, Linusi, Kolodiya ^{**} yo kada kahao maudoidi yodi lautoki hinage se hetamalidiwa.

Na kowa taba ku kaipatebayao na inai ku lage na kabo kehiwe kana huya.

²² Ya kaibwadasae Guiyau unai taba iya maidam yo taba yona kabinamwa ye leyawa maudoimiu kalimiuyena.

^{**} **4:21:** Pilisila yo Kolodiya meta waiwaihiu, na hekadiyo ne tatao.

Taitasi Paulo yona leta ye lau Taitasi unai Buka ta hededehe masalahana

Teina ta Apostolo Paulo yona leta ye lau yona hali taupaisowa Taitasi unai. Huyakulina bolimaina meta 63 AD, na huyana ne unai Paulo ye miya teha Masedoniya o magari Nikopolisi unai (Taitasi 3:12).

Bagubaguna, Taitasi maidana Paulo se paisowa teha Giliki yo teha Eisiya udiyedi (2 Kolinito 2:13, 7:6,13, 8:6,16,23, 12:18, Galatiya 2:3). Bolimai 60 AD kabo Paulo se laei magari saesaena Loma unai se kabihekahini. Tenem ye lau ee bolimai 62 AD unai kabo se kabigabaei. Mulina ne unai kabo Paulo yo Taitasi se lau Kiliti bwanabwanaluwana unai se paisowa (Taitasi 1:5), ede magari hekadiyo udiyedi tamowai se nuwabui. Paisowa wa sola ye laulau na Paulo Kiliti ye laugabaei. Na teina leta ta unai Paulo ye hededehe-masalahana Taitasi unai yona paisowa saha bena ye ginauli Kiliti bwanabwanaluwana unai, idohagi kabo tauwoyawoya ye hetolodi dubu maudoidi udiyedi, yo idohagi bena ye hekatadi (Taitasi 1:5). Na tauwoyawoya ne kadi paisowa bena taulauhekatalupolupo se hekaiyawasidi (Taitasi 1:9-11).

Leta ta unai Paulo hinage ye hededehe masalahana meta Keliso yona boita yo tolo'uyo debanaena kita tausunuma gonowana yoda laulau beyabeyadi ta hekaiyawasidi na mauli hauhauna unai ta miyamiya (Taitasi 2:11–3:11).

Buka ta hedehedena lakilakidi

- Lautoki yo tapwalolo 1:1-4
- Dubu yodi tauwoyawoya kadi hedehedede 1:5-16
- Ekalesiya maudoidi kadi hedehedede 2:1–3:11
- Hededehasahasa yo lautoki 3:12-15

Lautoki

¹ Yau Paulo, Yaubada yona taupaisowa yo Yesu Keliso yona apostolo, leta ta ya kuli. Kagu paisowa meta bena Yaubada yona kaisunuwa tamowaidi ya saguidi sunuma unai yo hedehedede mamohoina ya hekatadi. Hedehedede mamohoina ne ye saguida na Yaubada yona nuwatu ta miyawatanidi. ² Miyamiya ne matawuwuna meta mauli nige kana siga ta nayanayai ma nuwabayaoda. Mauli ne Yaubada ye hededehe sunumayako, huyana sola nige tanoubu ta ye hetubu. Na Yaubada iya nige taukailupolupo! ³ Yona kaisunuwa mayadaina ta unai yona hededehe sunuma wa hedehedede ye hemasalahadi. Na Yaubada Taugilihaida paisowa saesaena ta ye leyama bena ya hededehe masalahadi yogu lauguguya udiyedi.

⁴ Ya kulikulilaowa Taitasi kalimyena, kowa natugu mamohoina yoda sunuma ta unai. Taba Yaubada Tamada yo Taugilihaida Yesu Keliso yodi kabinamwa yo nuwadaumwali se lediwa kalimyena.

Kiliti bwanabwanaluwana unai Taitasi bena dubu kesega kesega taukitahetetedi ye hetolodi

⁵ Kiliti bwanabwanaluwana unai ya laugabaego, kaniyona ede paisowa saha ta kabitoledi wa bena ku hegededi. Magai kesega kesega udiyedi dubu taukitahetetedi bena ku hetolodi doha saha ya hededediko kalimyena wa. ⁶ Taukitahetete ne meta tabu kana giluhesau. Iya bena tawasola miyamiyana ye miyanamwanamwae.** Natunao

** **1:6:** Iya bena tawasola miyamiyana ye miyanamwanamwae: Hedehedede ta kalina Giliki unai hinage gonowana ta bui ta wane, Iya bena mwanena kesega mo.

bena se kawamamohoi Guiyau unai** , yo yodi mauli bena se dudulai, to kabo tamowai hekadiyo tabu se hegiludi miyamiya yababadi yo kawagabae udiyedi. ⁷ Dubu taukita-hetetena ne Yaubada yona paisowa tauginaulina. Unai iya tabu kana giluhesau. Tabu ye nuwasaesae, tabu ye koikoipilimwamwayau, tabu tamowai numanumayaulyaulena, tabu ye laulauhelili, tabu moni gadosisina ye lakikalili kalinawai. ⁸ Na iya meta bena tamowai ye yogayogaisinidi, yo saha ye namwa bena ye gadosisiyei, yo ye bom ye kitahetete'uyoi, yo yona nuwanuwatu yo yona miyamiya bena se dudulai yo hinage se namwa Yaubada matanaena, yo paisowa huyadiyao bena ye lauwatanidi.

Dubu babadadi taba taulauhekatalupolupo se hekaiyawasidi

⁹ Dubu taukitahetetena ne bena lauhekata dudulaina ta lauhekata'usei wa ye kabihakahini, kabo gonowana tamowai hekadiyo ye henuwabayaodi yona lauhekata namwanamwadi ne udiyedi, yo hinage lauhekata dudulaina taukawayagalaena kabo ye hekitalobaidi meta se lausapuli. ¹⁰ Matawuwuna ede tauhaikawayagala se bado. Se hedehededegaibu na yodi kailupolupo ne udiyedi tamowai se woyahesuwaladi. Tauhaikawayagala wa udiyedi tamowai se bado se lauhekata meta mauli kamwasana ede taba tamowai pelitome ye hai. ¹¹ Ginauli se laulauhekataedi ta taba tabu se hekahekataedi. Taba ku hekaiyawasidi, matawuwuna numa se bado tamowaidiyao meta se henuwapwanopwanodi. Na taulauhekatalupolupo ne yodi nuwatu bena se laulaumoni.

¹² Doha Kiliti yodi tauhededepeloweta hesau ye hedede-yako, ye wane, “Kiliti tamowaidiyao kadi paisowa ede hededelupolupo. Yodi laulau se yababakalili doha suisui kaikaikalasidi. Se miyamiyaheboni, yo siya meta tamowai botabotaidi.” ¹³ Peloweta ne yona hedehede meta mamohoi. Unai ku hededebayao udiyedi meta se lausapuli, na bena se sunumanamwanamwa. ¹⁴ Tabu se lapulapulau Dius kadi pilipilidai yo hedehede mamohoina tautolehesuwalana yodi kaihekahekasisi laugagayodi udiyedi. ¹⁵ Tamowai nuwadiyao se a'a meta kalidiyena kai yo ginauli maudoidi se laugagayoidi ne se a'a. Na kaiteyadi nuwadiyao se bida yo nige se kawamamohoi, meta kalidiyena nige ginauli hesau ye a'a. Yodi nuwanuwatu ne se bida, yo yababa saha se ginauli ne nige gonowana se nuwatulobai. ¹⁶ Se hedede bena Yaubada kabina se kata, na yodi laulau udiyedi meta se uhalaei. Tamowaidiyao ne meta taba ta subukaliliyeidi. Se kawagabae, yo nige gonowana laulau namwanamwadi se ginaulidi.

2

Taitasi bena tausunuma ye hekatadi laulau dudulaidi udiyedi

¹ Na kowa, Taitasi, yom guguya maudoina unai bena lauhekata dudulaina mo ku lauwatani. ² Tautaubadao ku hekatadi bena se bom se kitahetete'uyoidi, yo bena yodi miyamiya se dudulai yo se nuwanuwatusibasiba. Yo hinage yodi sunuma yo yodi gadosisi bena se namwa, yo bena se nuwabayao.

³ Gonogonowana doha, sinesinebadao ku hekatadi bena yodi miyamiya unai Yaubada hekasina unai se miya. Tabu tamowai se hededeheyaheyababadi, yo numanuma bayabayaona tabu ye tanuwagaidi. Na bena ginauli namwanamwadi mo se lauhekataedi. ⁴ Kabo gonowana natudiyao sinesineo se hekatadi bena mwanediyao yo natudiyao se gadosisiyeidi, ⁵ yo se bom se kitahetete'uyoidi, yo yodi nuwanuwatu yo yodi laulau bena se namwa yo se dudulai. Bena yodi numa se kitahetetededi, yodi kabikabi se namwa tamowai udiyedi, yo mwanediyao se hekasisiyeidi. Kabo tamowai hekadi nige gonowana Yaubada wasana se hededeheyababa.

** **1:6:** Se kawamamohoi Guiyau unai meta Paulo yona kulikuli kalina Giliki unai kaniyona hesau hinage, iya ede, Natunao bena tamadi yo sinadi se hekasisiyeidi, yo yodi laulau bena se namwa.

⁶ Hinage bena tatao ku henuwabayaodi na se bom se kitahetete'uyoidi. ⁷ Yom kabikabi bena se namwa na tatao se kitadi to kabo se hemuliwatanigo. Saha ku lauhekatae ne bena hinage ku miyawatani. Ku lauhekata ma nuwamamohim. ⁸ Yom hedehedede tamowai udiyedi bena se dudulai, kabo nige gonowana hedehedede ne se hetaladi. Teina unai kada waiunu kabo se mwadine, matawuwuna nige saha hesau se lobai na unai kabo se kawayababaida.

⁹ Heyayai tauhaidi tamowaidiyao ku hekatadi bena kadi tanutanuwagao se kawakabiyeidi ginauli maudoidi udiyedi. Bena se kaipate na nuwadi se henamwa, yo tabu se kawakawabui, ¹⁰ tabu se kaikaiwahali, na yodi laulau ne udiyedi se hemasalahadi meta gonowana kadi tanutanuwagao siya se sunumaedi. Unai kabo tamowai maudoidi Yaubada Taugilihaida lauhekata na se kitahenamwa.

¹¹ [*Lauhekata na bena se miyawatani*], matawuwuna Yaubada yona kabinamwa Keliso ye hemasalaha tamowai maudoidi udiyedi, na kabinamwa wa ye gilihaidi. ¹² Kaniyona ede kabinamwa ne ye hekatada meta laulau Yaubada nige ye henuwadi yo tanoubu gadosisidi bena ta hekaiyawasidi na yoda laulau ta sibasibaidi yo yoda laulau se dudulai yo laulau Yaubada ye kitahenamwadi bena udiyedi ta miya, teina yoda huya ta unai. ¹³ Na huya maudoina ta nayanaya ye lau ee Yaubada yona hededehesunuma saesaena wa ye hemamohoiyei na Yesu Keliso, iya yoda Yaubada saesaena yo Taugilihaida, ye taumasalaha ma didididigana. ¹⁴ Yesu Keliso ye bom ye mosegabaei'uyoi kita hesabada na yona nuwatu meta bena ye yailihaida yababa maudoidi udiyedi yo ye he'a'ada na ta hemala ye bom mo yona tamowai na laulau namwanamwadi ta ginaginalidi ma nuwakohihaida. ¹⁵ Huya maudoina teina lauhekata ta bena ku laulauhekataedi, yo ku hededebayao tamowai udiyedi bena se kawakabiyeidi. Nige taukawakabi bena ku hekitalobaidi meta se laupwano. Paisowa ta gigibwalina ede kalimwai, unai tabu tamowai hesau ye kitadobidobiyeigo.

3

Taukawamamohoi laulau namwanamwadi bena se miyamiyaidi

¹ Taukawamamohoi bena ku henuhenuwaisinidi gabemani yo tauwoyawoya hekadi bena se hekasisiyeidi yo se kawakabiyeidi, na se nonoha huya maudoina bena kabikabi namwanamwadi se ginaginalidi. ² Tabu tamowai hesau se hededeheyababa. Tabu se haihaikawayagala. Na bena se nuwatalu, na se nuwadobidobi yo yodi laulau se namwa tamowai maudoidi udiyedi.

³ Beyabeyana kita hinage ta yauyaule yo ta kawagabae, yo nuwanuwatu yababadi udoi'udo'i se lupohaida. Gwauyala yo gadosisi udoi'udo'i mo se tanuwagaida. Huya maudoina yoda nuwatu bena tamowai ta heyababadi. Ta kaikalomagigili. Tamowai se subuda yo kita hinage ta subudi.

⁴ Na huyana Yaubada Taugilihaida yona kabinamwa yo yona gadosisi ye hemasalaha kalidaena, ⁵ meta ye gilihaida. Nige yoda laulau dudulaidi debadiyena, na yona katekamkamna debanaena ye gilihaida, meta ye labasi'uyoida na unai ye deulida, yo Yaluwa Tabuna unai mauli hauhauna ye leyama. ⁶ Yaubada Yaluwa Tabuna ye haiyama ma nuwakohihaina, Yesu Keliso iya taugilihaida debanaena. ⁷ Yona kabinamwa debanaena ye tolehedudulaida, na hededehesunuma ye leyama meta mauli nige kana siga kabo ta hai. ⁸ Teina hedehedede ta meta hedehedede mamohoina.

Ya henuwa bena teina hedehedede maudoidi ta ku hebayao'uyoidi, na bena Yaubada tausunumaena se kaipate na huya maudoina miyamiya namwanamwadi udiyedi se miya. Lauhekata ta se namwa na udiyedi tamowai maudoidi sagu se lobai.

⁹ Na haikawayagala yauyaule di yo kulutubu dededi** yo laugagayo haikawayagaladi ku kaihaleidi, matawuwuna nige kaniyodi yo nige gonowana se saguida. ¹⁰ Ena tamowai hesau koigwaligwali ye ginauli, kabo ku hededehekaiyawasi. Na ena nige ye kawakabi, kabo ku hedede'uyo unai. Na mulina ne unai meta tamowai ne tabu ku modelau unai, ¹¹ matawuwuna tamowai doha tenem hedehedede mamohoidi se laugabaeidiko. Yababa se ginaulidi udiyedi se bom se hegilu'uyoidi.

Hededehasahasa yo Lautoki

¹² Atemasi o Tikikasi bena kabo ya hetamali ye laowa kalimwai. Huyana ye lagewa meta mwamwayau ku laoma kaliguyena Nikopolisi unai, matawuwuna yogu hineli ya ginauliyako kabo temenai gwagwama huyana ya miyahekila. ¹³ Sinasi, iya laugagayo tauhekasadi, maiyana Apolosa yodi kadau ne unai, na ena se henuwasagu meta bena kwa saguidi. ¹⁴ Yoda tamowai Kiliti unai tabu se miyamiyagaibu, na bena ku hekatadi na kabikabi namwanamwadi udiyedi se miya, na ena tamowai hekadiyo kai yo gogo udiyedi se deha, meta bena se saguidi.

¹⁵ Maidagu taumiya maudoidi yodi lautoki se hetamalidiwa. Yogu lautoki ku mosei kaiteyadi tausunuma se gadosisiyeida udiyedi.

Na Yaubada yona kabinamwa maudoimiu kalimiuyena!

[Yauwedo yo kaiyoni.]

** **3:9:** Kulutubu dededi: Tamowai se kaipatekalili bena taba kadi kulutubu ne udiyedi tamowai hesau se lobai meta iya Dius tamowaina, na debanaena kabo se hedede meta siya ekalesiya mamohoidi.

Pilemona Paulo yona leta ye lau Pilemona unai Buka ta hededehehemasalahana

Pilemona meta ekalesiya yodi tauwoyawoya tamowaina hesau magai Kolose unai, yo iya yo Paulo se kawakehanamwanamwa. Iya gogo tamowaina, na yona numa lakilakina unai dubu tamowaidi se koikoigogo.

Pilemona meta yona heyayai tauhaidi hekadi, na luwadiyena hesau hesana ede Onesimo. Na Onesimo nuwana kana tanuwaga unai ginauli saha hesau ye kaiwahali ede ye wasabu ye lau Paulo unai, iya numatutugudu unai magai Epeso unai.** Paulo Yesu wasana ye hededehehemasalahana Onesimo unai, ede ye nuwabui. Kabo Paulo ye hineli meta laulau dudulaina ede taba Onesimo ye uyo kana tanuwaga Pilemona unai.

Loma yodi laugagayo ye wane, ena heyayai tauhaina kana tanuwaga ye wasabugabaei na ena se lobai, meta kana tanuwaga yona dudulai gonowana kabo ye koihemwaloi. Unai Paulo leta ta ye kuli ye lau Pilemona unai na ye kaibwada taba taba Onesimo ye hekamkamna, na ye hai'uyoi na ye kabinamwanamwaei doha kana kaha hesau Keliso unai.

Leta ta taubaheina ye lau Pilemona, siya meta Tikikasi yo Onesimo (Kolose 4:7-9). Na leta huyakulina bolimaina nuwana 64 AD.

Buka ta hedehedena lakilakidi

- Lautoki 1-3
- Pilemona yona gadosisi tausunuma kalidiwai 4-7
- Paulo yona kaibwada Onesimo debanaena 8-22
- Hedehedede gehegehedi 23-25

Lautoki

¹ Yau Paulo, Yesu Keliso debanaena numatutugudu unai taumiya. Maidagu kada kaha Timoti leta ta ka kuli ye laowa kowa yoma hali taupaisowa Pilemona kalimwai. Kowa meta kama kaha ka gadosisiyeigo. ² Yoma lautoki se lau loumai Apiya unai, yo Akipasi kalinawai, iya sunuma hesabana ye kaipatesaguigai doha tau'iyala hesau. Yoma lautoki hinage ye lau ekalesiya taulaolaomagogoi yom numa unai ne kalidiyena. ³ Taba Tamada Yaubada yo Guiyau Yesu Keliso yodi kabinamwa yo nuwadaumwali se lediwa kalimiuyena.

Pilemona yona gadosisi tausunuma kalidiwai

⁴ Kagu kaha Pilemona, huya maudoina yogu tapwalolo udiyedi ya nuwanuwatuigo, meta Yaubada ya laulautokiyei, ⁵ matawuwuna wasam ya lapulapui meta kowa Guiyau Yesu tausunumaena yo Yaubada yona tamowai maudoidi taugadosisiyeidi. ⁶ Tamowai ku saguidi yom sunuma debanaena. Ya tapwatapwalolo bena yom haisagusagu paisowana ne ye bayao ye lau, na unai bena ku nuwatulobai ginauli namwanamwadi sahasahadi Yaubada ye ledima Keliso debanaena bena ta ginaulidi. ⁷ Kagu kaha, yom gadosisi debanaena ya gwauyalakalili yo nuwagu ye bayao, matawuwuna ede Yaubada yona tamowai ku henuhenuwabayaodi.

Kaibwada Onesimo debanaena

⁸⁻¹⁰ Unai kabo nuwatu hesau bena yom ya hedehedede. Ya kaibwadaigo bena yom heyayai tauhaina Onesimo ku hai'uyoi. Iya doha natugu, matawuwuna numatutuguduyena ya woyalaei Guiyau unai.** Keliso debanaena ya dudulai meta ya

** :: Magai Epeso unai: Tausonoga hekadi yodi nuwanuwatu ede, magai Loma o Sisaliya unai. ** **1:8-10:** Ya woyalaei Guiyau unai: Numatutugudu unai Paulo Yesu wasana ye hededehehemasalahana Onesimo unai, ede ye nuwabui. Unai ye hemala doha Paulo natuna.

nuwabayao na ya hedede bena saha ku ginauli, yau Paulo, ya tautaubadako yo Yesu Keliso debanaena numatutugudu unai ya miyamiya. Na iyamo taba nige apostolo gigibwalina ya hepaisowa na ya hededelaowa. Na yoda haigadogadosisi'uyoida wa debanaena ede ya kaibwadaigo.

¹¹ Onesimo meta yom heyayai tauhaina. Beyabeyana iya nige yom ye paipaisowanamwanamwa, na teina huya ta unai iya *taupaisowa namwanamwana* kowa yo yau kalidaena.** ¹² Iya ya hetamali ye uyowa kalimyena, na iya yogu gadosisi tamowaina ede. ¹³ Ya henuwa bena taba Onesimo sola maidagu ka miya, to kabo ye lauhedamaigo na ye saguigau huyana Yesu wasana namwanamwana debanaena ya miyamiya numatutugudu ta unai. ¹⁴ Na nige gonowana saha hesau ya ginauligaibui kana siga ku talambaguna, matawuwuna nige ya henuwa bena ya lauheliligo na laulau namwanamwadi ku ginaulidi, na bena yom gadosisi mamohoina unai ku ginaulidi.

¹⁵ Nuwana huyakubwakubwa mo Onesimo ye miyasuwala na bena kabo ye uyowa maidam kwa miya ye lau ee nige kana siga. ¹⁶ Iya yom heyayai tauhaina, na sunuma debanaena ye hemala kada kaha. Iya ya gadosisiyei, na nuwana yom gadosisi iya unai kabo ye lakikalili, matawuwuna iya yom hali tamowai yo hinage kam kaha Guiyau debanaena.

¹⁷ Unai, ena ku nuwatui meta yau kam kaha, kabo Onesimo ku yogaisini doha hinage yau ku yogaisinigau. ¹⁸ Ena laupwano saha hesau ye ginauli o ginauli hesau unai ye kaihagahaga kalimyena, polohena ne ku tole kaliguyena. ¹⁹ Yau Paulo, ya bom nimagu ta unai ya kulikulilaowa kalimyena:

Kabo ya hemaisago.

Na yom mauli unai ku kaihagahagakalili kaliguyena,** na iyamo taba nige ya hetala. ²⁰ Kagu kaha, Guiyau debanaena yogu kaibwada ta bena taba ku ginauli. Unai kabo nuwagu ta ku hebayao Keliso unai.

²¹ Teina ta ya kulikuli na ya nuwatui meta yogu kaibwada ta kabo ku ginauli, yo kabina ya kata meta yom laulau ne kabo se namwakalili na kabo yogu kaibwada ta.

Hedehedede gehegedi

²² Na ginauli kesega mo ede teina: Ya nuwatui meta Yaubada yomi tapwalolo wa ye lapuidi ede kabo ya uyowa kalimiuyena. Unai bili hesau ku kabinonohai yau hesabagu.

²³ Epapalasi meta iya hinage maiyagu numatutugudu unai Yesu Keliso debanaena. Yona lautoki ye hetamaliyawa kalimyena. ²⁴ Yo Maleko, Alisitakasi, Demasi yo Luka, siya meta yogu hali taupaisowa, se lautokiyeigo.

²⁵ Guiyau Yesu Keliso yona kabinamwa bena nuwamiuyena ye miya.

** **1:11:** Taupaisowa namwanamwana kowa yo yau kalidaena: Hesa Onesimo kaniyona ede taupaisowa namwanamwana. ** **1:19:** Ku kaihagahagakalili kaliguyena: Paulo Pilemona ye henuwabui ede mauli nige kana siga ye lobai, na hagahagana ede ye lakikalili.

Hebelu

Kulikuli ye lau Hebelu tamowaidiyao udiyedi Buka ta hededehehemasalhana

Teina leta ta ye lau Yesu Keliso tausunumaena udiyedi, kaiteyadi siya Hebelu tamowaidi, o ta wane, kaiteyadi kadi mumuga ede Abelahama. Hinage ta hedede ede siya Dius tamowaidi.

Na leta ta tauhaina wa, siya nuwana Italiya unai taumiya. Teina tausonoga yodi kaimasi, matawuwuna Italiya unai taulaoma yodi lautoki ye kulilae leta ta tauhaina ne udiyedi (Hebelu 13:24).

Leta ta taukulina meta hesana nige ye kulihemasalaha, unai nige kabina ta kata iya kaiteya. Bagubagunana tausibasiba gwaudi yodi nuwatu bena Paulo leta ta taukulina ede, matawuwuna Timoti wasana ye hededegebaei (Hebelu 13:23). Iyamo mulinawai tausibasiba hekadiyo yodi nuwatu udoi. Na ye masakalili meta leta taukulina wa, iya Dius tamowaidiyao yodi taba'ohu kabikabidiyao kabidi ye katakalili (Hebelu 8:3-5, 9:1-10:18), unai iya nuwana Dius tamowaina hesau. Huyana leta ta ye kuli meta Yelusalema unai Numa Tabuna wa sola ma totolona. Loma yodi tau'iyala Numa Tabuna se heyababa bolimai 70 AD unai.

Leta ta kaniyona ede Dius tamowaidiyao Yesu tausunumaena bena tabu se uyo'uyo yodi taba'ohu beyabeyana unai na laugagayo yo kabikabi Yaubada ye moseidi Mose unai na ye laoma Dius tamowaidiyao udiyedi meta tabu se miyawatani'uyoidi. Huyana leta ta se hai meta ekalesiya hekamakna lakilakina se hekalo, ede hekadiyo se hetubu se nuwabasabasa na Yesu Keliso bena se kitagabaei (Hebelu 6:11-12, 12:1-3).

Leta ta taukulina Dius tamowaidi siya Yesu tausunumaena wa ye henuwaisinidi meta Keliso iya ede Yaubada Natuna. Yesu ye saekalili, na kabo anelu, Mose yo peloweta hekadiyo (Hebelu 1:5-4:14). Yo iya yoda taukaitalasam saesaena, na yona kabihemauli hesabada wa ye saekalili na kabo Aloni yo taukaitalasam maudoidi yodi kabikabi wa (Hebelu 9:23-10:18). Yesu iya talam hauhauna tauhaiyamana. Na talam ne ye saekalili na kabo talam bagubagunana (Hebelu 4:14-5:10) yo iya yoda tauhedehede Yaubada matanawai doha Dius yodi taukaitalasam saesaedi (Hebelu 7:1-8:13). Leta ta hinage ye hekatada meta sunuma iya ginauli saesaekalilina (Hebelu 11:1-12:29).

Buka ta hedehedena lakilakidi

- Keliso meta Yaubada yona tauhedehede na iya ede Yaubada Natuna 1:1-3
- Keliso ye saekalili na kabo anelu 1:4-2:18
- Keliso ye saekalili na kabo Mose 3:1-4:13
- Keliso ye saekalili na kabo Aloni yo taukaitalasam maudoidi 4:14-7:28
- Keliso yona kaitalasam ye saekalili na kabo kaitalasam hekadiyo 8:1-10:39
- Hededehebayao ye lau Keliso tausunumaena udiyedi 11:1-12:29
- Hededehebayao gehegehena 13:1-25

Yaubada Natuna Yesu iya ye saekalili

¹ Huya bagubagunana unai Yaubada hedehede ye moseidi peloweta udiyedi huya udoi'udoi udiyedi yo laulau udoi'udoi udiyedi, na kabo se hededegebaedi kada mumugao udiyedi. ² Na teina huya mulimulitana ta unai Yaubada yona hedehede ye mosei Natuna unai, na iya ye hedelaoma kalidawai. Natuna iya ede Yaubada maiyana tanoubu maudoina ta se hetubu wa,** yo Yaubada iya ye kaisunuwai kabo ginauli maudoidi ye mosehekawadi unai. ³ Natuna Tamana yona didiga yo hinage

** 1:2: Tanoubu maudoina ta se hetubu: Yowane 1:1-3 unai Yowane ye hededehehemasalaha idohagi Yaubada tanoubu ta ye hetubu.

kana kao dudulaina ye hemasalahadi kalidawai yo ginauli maudoidi ye hebayaodi yona hedehedede gigibwalina unai, to bena se miyapai. Ba'aya kabahe'a'ana ye ginauli, na mulinawai kabo ye tulidobi Wasawasa Saesaena nimatutunaena galewa unai.

Yesu ye saekalili na kabo anelu

⁴ Teina unai ye masalaha meta Natuna ye saekalili na kabo anelu, yo hinage gonogonowana doha iya hesana ye saekalili na kabo anelu hesadiyao.

⁵ Matawuwuna Yaubada nige ye hededelau anelu hesau unai ye wane,
“Kowa yau natugu,
mayadai ta unai ya hemala tamam.”

(Same 2:7)

o hinage,

“Yau kabo tamana na iya kabo natugu.”

(2 Samuwela 7:14)

⁶ Yo huyana Yaubada Natuna taubaguna** ye hetamaliyama tanoubu ta unai, iya hedehededenya ye hedehededei ye wane,

“Yaubada yona anelu maudoidi taba se kaihelahui.”

(Dutelonomi 32:43)

⁷ Yona anelu hedehededei ye wane,

“Yona anelu ye ginaulidi [*yodi sarena*] doha yaumai,**
yo yona heyayai tauhaidi [*yodi gigibwali*] doha kaiwa pulupululuna.”

(Same 104:4)

⁸ Na Yaubada ye hededelau Natuna unai ye wane,

“Yaubada, yom kabatuli kabo ye miya nige kana siga,
yo yom basileiya ne kabo laulaududulai unai ku tanuwagai.

⁹ Kowa laulau dudulaina ku henuwa na laulau yabayababadi ku subudi.

Unai Yaubada, iya yom Yaubada, ye heyausigo gwauyala yausina unai.

Teina unai ye kitahesaego kam kahao maudoidi luwadiwai.”

(Same 45:6-7)

¹⁰ Hinage [*ye hededelau Natuna unai ye wane*],

“Guiyau, huya bagubagunana unai kowa tanoubu wuwuna ku tole
yo hinage galewa meta nimam ginaulina.

(Same 8:6, Sakaliya 12:1)

¹¹ Siya kabo se tauwadani, na kowa ku miyapai.

Kabo se beyabeya doha kaleko beyabeyana.

¹² Kabo ku nokudi doha kaleko,

yo doha luwuluwu beyabeyana kabo ku haigabaedi na hauhaidi ku toledi.

Na kam kao gonogonowana mo

yo yom bolimai taba nige kadi siga.”

(Same 102:25-27)

¹³ Yo Yaubada nige anelu hesau unai ye hededelau ye wane,

“Nimatutugu ta unai ku tuli,

kana siga kam waiunu ya toledi kaem kabatoledi.”

(Same 110:1)

¹⁴ Na anelu meta siya yaluyaluwa yo heyayai tauhaina mo, na Yaubada ye hetaheta-malidi bena mauli tauhaidi se saguidi.

2

Wasa namwanamwana ta bena ta lapunamwanamwaei

¹ Unai teina wasa namwanamwana Yesu ye leyama ta, taba ye namwa mo bena ta lapunamwanamwaei, madai ta sigisuwala. ² Huya bagubagunana Yaubada yona laugagayo anelu se mosei Mose unai Sinai koyana unai wa meta ma gigibwalina. Na ena

** **1:6:** Yaubada Natuna taubaguna: Kalina Giliki unai taubaguna kaniyona ede, ye saekalili, o, hekahekasina. Gonogonowana doha, Dios tamowaidiyao taubaguna se kita meta iya ye saekalili na kabo yona gologolowao.

** **1:7:** Yaumai yo **yaluyaluwa** lausoi 14 unai meta hedehedede kesega kalina Giliki unai. Unai lausoi ta hinage gonowana ta bui, Anelu ye ginaulidi ede siya yaluyaluwa.

tamowai hesau laugagayo wa ye utusi yo nige ye kawakabiyei kabo hekamkamna dudulaina ye lobai. ³Unai, ena Yesu yona kabihemauli saesaena ta ta kitahegagili, taba nige Yaubada yona hekamkamna lakilakina ta kaihalei! Teina kabihemauli ta bagubaguna unai Guiyau ye hededegabaei na kaiteyadi se lapui meta se hemamohoiyei kalidawai, ⁴yo hinage Yaubada ye hemamohoiyei hekihekinoi yo laulau gigigigibwalidi udoi'udoi udiyedi, yo kabahemamohoiyena hesau ede Yaluwa Tabuna ye mosei tamowai udiyedi yona hineli unai.

Yesu ye hemala doha kita

⁵Tanoubu hesau matada ne unai ta hetahetala ta Yaubada taba nige ye mosei anelu se tanuwagai. ⁶Buka Tabuna tehana hesau unai tamowai hesau ye hededelau Yaubada unai ye wane,

“Tamowai nige ye sae, na iyamo ku nuwatui,
yo tamowai natuna ku kitahetete.

⁷Huyakubwakubwa unai iya ku tole anelu gunidiwai,
na kabo hedebasae yo hekasisi unai ku hepasa.

⁸Ginauli maudoidi ku moseidiko iya ye tanuwagaidi.” *(Same 8:4-6)*

Na teina hedehedede ta, “ginauli maudoidi”, kaniyona ede, “nige ginauli hesau ye kabihebeku”. Na sola nige ta kita meta tamowai ginauli maudoidi ye tanuwagaidi.

⁹Na saha ta kita ede Yesu. Huyakubwakubwawai Yaubada iya ye toledobiyei anelu gunidiwai, na kabo hedebasae yo hekasisi udiyedi ye hepasa, matawuwuna ede Yesu ye boita kita hesabada. Mamohoi, Yaubada yona kabinamwa unai Yesu ye boita tanoubu maudoina hesabadi.

¹⁰Ginauli maudoidi Yaubada ye hetubudi na yona kitahetete unai se miya na ye henuwa taba natunao se bado ye haidi se laoma yona didiga ne unai. Unai ye namwa mo taba Yaubada hesaguhai tauhetubuna wa ye laei kamkamna ye hekalo na teina unai kabo kana kao saesaena ye hai. ¹¹Ede Yesu iya tamowai tautolehesuwaladi na siya Yaubada yona, yo kaiteyadi ye tolehesuwaladi ne meta siya maidadi tamadi kesega. Temeta unai Yesu nige ye mwadine bena ye kataidi kana kahao yo lounao. ¹²Doha ye hededelau Yaubada unai ye wane,

“Kabo kam kao namwanamwana ya hededehehemasalahaga kagu kahao udiyedi.

Yo yogu wana udiyedi kabo ya hedebasaego yom tamowai bodadi luwadiwai.”

(Same 22:22)

¹³Iya hinage ye wane,

“Yogu sunuma kabo ya tole iya unai.”

(Aisaiya 8:17)

Na nuwanuwatu gonogonowana ta unai ye wane,

“Yau ede teina, na Yaubada natunao ye ledima wa maiyaguwao.”

(Aisaiya 8:18)

¹⁴Yaubada natunao ne buluma yo kwasina unai ye ginaulidi, unai Yesu hinage ye hemala buluma yo kwasina gonogonowana doha siya, meta kabo gonowana yona boita unai boita tanuwagana, iya ede diyabolo, yona gigibwali ye koigwaligwali ¹⁵na tamowai ye yailihaidi, siya yodi mauili maudoina unai yona heyayai tauhaidi, boita yodi matausiyeina debanaena. ¹⁶Ye laoma nige bena anelu ye saguidi, na bena Abelahama kana isimulitao ye saguidi. ¹⁷Teina debanaena ede Yesu ye hemala tamowai doha kita, bena iya taukaitalasam saesaena namwanamwana. Unai iya ye katekamkamnaeda yoda basabasa udiyedi, yo hinage Yaubada yona ye paisowanamwanamwa, na kaitalasam ye ginauli tamowai yodi yababa kabanuwatugabaedi. ¹⁸Iya laukita ye hekalo na unai ye kamkamna, unai gonowana ye saguida huyana laukita ta hekalo.

3

Yesu ye saekalili na kabo Mose

¹ Kagu kahao, Yaubada yona tamowai, galewa yogana taulapuina doha yau, ya henuwa bena nuwamiu se lau Yesu unai, iya ede ta hedehedede meta iya Yaubada yona hetahetamali tamowaina yo yoda taukaitalasam saesaena. ² Iya nuwana ye tolekesegai taukaisunuwaina unai na yona paisowa ye ginauli gonogonowana doha Mose hinage yona paisowa ye ginaulikesegai Yaubada yona numa** unai. ³ Na Yesu hedebasae saesaena ye hai na kabo Mose, doha hinage numa namwanamwana tauginaulina hedebasae lakilakina ye hai na kabo numa ne. ⁴ Numa kesega kesega tauginaulidi udoi'udo, na Yaubada ye bom ginauli mauidi tauginaulidi. ⁵ Mose nuwana ye tolekesegai Yaubada yona numa paisowana unai, na iya meta heyayai tauhaina mo. Yona paisowa wa meta saha kabo Yaubada huya matadawai ye hemalahadi ne tautaudi. ⁶ Na Keliso nuwana ye tolekesegai Yaubada unai, na iya Yaubada Natuna yo yona numa tanuwagana. Numa ne ede kita, ena ta tolokesegai na ma nuwabayaoda ta nayataubiga ye lau ee Yaubada yona hedehesunuma ye hemamohoiyeidi, siya ede yoda kabagwauyala.

Hedehedede bayabayaona ye lau taukawayagala udiyedi

⁷ Unai Yaluwa Tabuna yona hedehedede bena kwa lapui, doha ye wane, “Teina mayadai ta unai, ena kalinana kwa lapui,
⁸ tabu nuwamiu kwa hekwaailodi iya unai,
doha Isalaela tamowaidiyao se tolodagedagelaei huyana Yaubada se laukita balabala unai.

⁹ Temenai kami mumugao yogu kabinamwa kalidiwai bolimai 40 luwadiwai se kitadi na sola [*yodi laulau udiyedi*] se laulautonogigau.

¹⁰ Unai tenem isi ne ya koipiliyeidi
na ya wane, ‘Siya huya badobado nuwadi se toletolehesuwaladi kaliguwai.
Saha ya hedede bena se ginaulidi wa se kawayagalaei.’

¹¹ Unai ede yogu kouyalayala unai ya hededekaigwala,
‘Taba nige se lusola yogu kabakaiyawasi magaina** unai.’ ” *(Same 95:7-11)*

¹² Bena kwa kitanamwanamwa, kagu kahao. Kwa kitahetete'uyoigomiu tabu nuwamiu se yababa yo se labulabui, yo tabu Yaubada Maumaulina kwa nuwagabaei.

¹³ Komiu ma kami kahao bena kwa haihedehededehebaya'uyoigomiu mayadai kesega kesega udiyedi. Na teina mayadai kesega kesega Yaubada ye katai “teina mayadai ta”. Unai kabo taba nige yababa ye lupoigomiu na nuwamiu se kwailolo Yaubada unai. ¹⁴ Ena nuwada ta tolekesegai Yaubada unai ye lau ee yoda huya kana siga yo ta tolobayao yoda sunuma unai doha huya bagubagunana yoda nuwabui mayadaina wa, kabo ta hemala Keliso kana kahao yo lounao mamohoidiyao. ¹⁵ Na tabu teina hedehedede bayabayaona ta nuwamiu se luluhidi:

“Teina mayadai ta unai ena kalinana kwa lapui,
tabu nuwamiu kwa hekwaailodi iya unai
doha Isalaela tamowaidiyao huyana se tolodagedagelaei.” *(Same 95:7-8)*

¹⁶ Na tamowai Yaubada kalinana se lapui na iyamo se kawayagalaei wa, siya kaiteyadi? Siya ede Aikupito unai Mose ye woyahepesadi wa. ¹⁷ Na bolimai 40 luwadi wa unai Yaubada tamowai ye kouyalayalaedi wa, siya kaiteyadi? Tamowaidiyao ne meta se yababa na balabala unai se boita. ¹⁸ Yo siya kaiteyadi Yaubada ye hetahetaladi yo ye hededekaigwala meta taba nige yona kabakaiyawasi magaina unai se lusola? Siya ede taukawayagalaena wa. ¹⁹ Unai ta nuwatulobai meta siya taba nige se lagelau Yaubada yona kabakaiyawasi magaina wa unai, matawuwuna nige se kawamamohoi.

** **3:2:** Numa ne, iya ede Isalaela tamowaidi heyaheyasonidi, na Mose iya kadi boda hesau. ** **3:11:** Yogu kabakaiyawasi magaina: Yaubada yona huyahedede wa unai, teina hedehedede ta kaniyona ede Kanana tanona. Hebelu 4:3 yo 4:6 udiyedi buka ta taukulina wa kabo kabakaiyawasi magaina ye heyaheyasoniyei galewa unai.

4

Yaubada natunao yodi kabakaiyawasi hededehe sunumana

¹Yaubada yona kabakaiyawasi magaina lusolana hededehe sunumana sola ye tolo, unai kita bena ta kitanamwanamwa, madai hesau luwadaena Yaubada ye kitalobai taba nige gonowana ye lusola. ²Na wasa namwanamwana meta Yaubada kabakaiyawasi magaina ye kabinonohaiyako, kita hinage ta lapuiyako gonogonowana doha siya. Na wasa se lapui wa meta nige ye saguidi, matawuwuna saha Yaubada ye hedede kalidiwai wa nige se kawamamohoiyei. ³Na kita taukawamamohoi gonowana ta lusola yona kabakaiyawasi magaina unai. Na [*kaiteyadi nige se kawamamohoi, kalidiwai*] Yaubada ye wane,

“Yogu kouyalayala unai ya hededekaigwala,

‘Taba nige se lusola yogu kabakaiyawasi magaina unai.’ ” *(Same 95:11)*

Iyamo Yaubada yona kabakaiyawasi magaina ye nonohaiyako huyana tanoubu yona huyahetubuna wa unai. ⁴Doha kulikuli tabuna teha hesau unai mayadai hehaligigilabuina (7) ne hedehededenya ye hedede ye wane,

“Yaubada yona paisowa maudoidi udiyedi ye kaiyawasi mayadai hehaligigilabuina (7) unai.” *(Genese 2:2)*

⁵Na kulikuli hesauna wa unai ye wane,

“Taba nige se lusola yogu kabakaiyawasi magaina unai.”

⁶Tamowai bagubagunadi wasa se lapui wa nige se lusola yodi kawayagala debanawai, na kabakaiyawasi magaina wa sola ye totolo tamowai hekadi hesabadi bena se lusola. ⁷Tenem unai Yaubada huya hesau ye tole kabakaiyawasi magaina lusolana hesabana na hesana ye katai ede, “Teina mayadai ta”, huyana yona hedehedede ye mosei Dawida unai. Na Dawida ye hedede ye wane, doha ya kuliya wa:

“Teina mayadai ta unai, ena kalinana kwa lapui, tabu nuwamiu kwa hekwa ilolodi iya unai.”

⁸Ena taba Yosua Isalaela tamowaidi wa ye woyalaediko kabakaiyawasi magaina ne unai,** meta Yaubada huya mulinawai taba nige mayadai hesau ye kaisunuwai'uyoi.

⁹Unai kaiyawasi mayadaina wa sola ye totolo Yaubada yona tamowai yodi. ¹⁰Na ena tamowai hesau ye lagelau Yaubada yona kabakaiyawasi unai, meta kabo ye kaiyawasi yona paisowa maudoidi udiyedi, doha ede Yaubada yona paisowa maudoidi mulidiyena hinage ye kaiyawasi. ¹¹Unai bena ta kaipatebayao na ta lusola kabakaiyawasi magaina ne unai, na tabu Yaubada ta kawayagalaei doha Isalaela tamowaidiyao wa. Ena yoda laulau doha siya meta kabo ta beku na nige ta lusola.

¹²Matawuwuna Yaubada yona hedehedede meta maumaulina yo gigigigibwalina yo ye matakalili na kabo kelepamatatehalabulabui. Nuwada ye bolilapaidi ye luwu ye lau yoda nuwanuwatu yo yoda hineli mamohoidiyao udiyedi ye lage na ye hinelidi yo ye kitasipwaidi. ¹³Yaubada matanawai ginauli maudoidi nige hesau wadawadamna, na se masalahakalili matanawai. Laulau sahasahadi ta ginaulidi meta bena ta hededehe-malahadi iya kalinawai.

Yesu yoda taukaitalasam saesaena

¹⁴Yoda sunuma hedehedehemasalahana ta unai bena ta tolobayao, matawuwuna yoda taukaitalasam saesaena ye saeko galewa. Iya ede Yesu, Yaubada Natuna. ¹⁵Yoda taukaitalasam saesaena ta yoda basabasa maudoidi kabidi ye katalalili, matawuwuna laukita maudoidi ta hekalodi ta meta iya hinage ye hekalodi. Na iyamo nige ye ba'aya. ¹⁶Unai bena ta laoma Yaubada yona telona ta hanahanawui ma nuwabayaoda, kabo

** **4:8:** Yosua iya Mose lauhedamaina na Isalaela bodadi ye woyahemwalaedi Kanana tanona unai na ye hemala yodi tano. Yosua mulinawai kabo isi se bado na kabo Dawida ye tubu, na Dawida ye hededehe-malahada ede yodi huyakaiyawasi sola matadiyena.

yona katekamkamna yo kabinamwa ta lobaidi na yoda huyayababa unai kabo ye saguida.

5

¹ *Dius tamowaidi yodi* taukaitalasam saesaena tamowai luwadiwai Yaubada ye hetolo na yona paisowa meta tamowai yodi tautolo Yaubada matanawai na kainauya yo kaitalasam ye mosei tamowai yodi yababa hesabadi. ² Iya gonowana ye taubigakalili tausu-pusupu yo taugegege tamowaidiyao kalidiwai, matawuwuna ede iya taubasabasa hesau. ³ Teina debanaena ede kaitalasam ye ginaulidi iya ye bom yona yababa hesabadi yo kabo hinage tamowai maudoidi yodi yababa hesabadi.

⁴ Nige tamowai hesau teina paisowa hekahekasina ta yona nuwahineliwai ye hai, na Yaubada yona yoga mo unai, doha Aloni. ⁵ Unai Keliso hinage nige ye bom ye hesae'uyoi na ye hemala taukaitalasam saesaena, na Yaubada iya ye toleisini na ye wane, “Kowa yau natugu,

mayadai ta unai ya hemala tamam.”

(Same 2:7)

⁶ Yo kulikuli tehana hesau unai ye wane,

“Kowa taukaitalasam tamowaina ye lau ee huya nige sigana doha Melekisedeka.”**

(Same 110:4)

⁷ Huyana Yesu tanoubu ta unai ye miyamiya meta tapwalolo yo kaibwada ye moseidi Yaubada unai ma kalina lakilakina yo ma matasuluna, na Yaubada gonowana boita unai ye hemauli. Na Yaubada Yesu kalinana ye lapui matawuwuna Yesu iya ye hekasisiyei yo yona gigibwali unai ye miya. ⁸ Iya Yaubada Natuna mamohoina, na iyamo kamkamna unai nuwamasalaha ye hai idohagi na ye kawakabi. ⁹ Na huyana nuwanuwatu maudoina ye haihegehe ede ye hemala iya taukawakabiyeina tamowaidi maudoidi yodi kabihemauli nige sigana yona kabalaoma. ¹⁰ Na Yaubada iya ye kaisunuwai taukaitalasam saesaena doha Melekisedeka.

Hedede bayabayaona ye lau Yaubada tautolehesuwalana udiyedi

¹¹ Teina nuwanuwatu ta hedehedededi meta se bado taba ka hededededi, na hekatagomiu ye pilipikalili, matawuwuna ede yomi lapulobai ne se pahili. ¹² Kwa kawamamohoi huyalohaloha, unai komiu taba taulauhekata hekadiyo, na nige gonowamiu, na Yaubada yona hedehedede wa udiyedi taba kabahetubu lauhekataka unai ka hekata'uyoigomiu. Komiu sola doha wawayao gagilidi meta susu mo kwa numanuma, na nige gonowana kai kwaikwailolona kwa kai. ¹³ Ena hesau susu mo ye numanuma, iya sola wawaya gagilina, na laulaududulai lauhekataka sola nige kabina ye kata. ¹⁴ Na kai kwaikwailolona meta tamowai lakilakidi siya kadi. Yodi kaikaipate debanawai gonowana namwa yo yababa se kitahinelidi.

6

¹ Unai bena yoda sunuma Keliso unai yona kabahetubu lauhekata bagubagunadi ta laugabaeidi, na ta dudu ta lau bena nuwamasalaha saesaena ta hai. Na tabu yoda sunuma kabahetubuna lauhekata ta lauhekata'uyoidi, siya ede: nuwabui laulau yabayababadi udiyedi yo yoda sunuma Yaubada unai, ² babatiso yo kabibolubolu, taubaita yodi tolo'uyo yo hekasa mayadaina. ³ Yaubada yona yali unai ta sigilau nuwamasalaha saesaena ta hai.

⁴⁻⁶ Tamowai hekadiyo nige gonowana se nuwabui'uyo. Siya wasa namwanamwana se lapuiyako, galewa kainauyadi se miyalobaidiko, Yaluwa Tabuna unai yodi tupwa se haiyako, yo Yaubada yona hedehedede yona namwa yo basileiya ye laolaoma matadawai gibwalina se nuwatulobaidiko. Na ena Yaubada se lausuwalaei meta

** **5:6:** Melekisedeka wasana ede Genese 14:18-20 unai ku hasili.

nige gonowana se uyoma se nuwabui'uyo, matawuwuna yodi lausuwala ne unai siya Yaubada Natuna se hesahesataulo'uyoi na tamowai matadiwai iya se hemwadine'uyoi.

⁷ Bwatano namwanamwana unai meta ena nabu ye taludobi kewanawai kabo ye mumusi na koya kaidi kaniyodi ye toledi na koya tanuwagana unai namwa ye lobai. Tano ne Yaubada unai henamwa ye hai. ⁸ Na bwatano unai gwaligwali yo lagau mo se kini na nige yona namwa saha hesau, koya ne tanuwagana kabo tano ne ye hededeheyababa. Na gehena unai kabo ye gabu.

⁹ Kehamaiyao, ka hededebayaolaowa kalimiuwai doha teina, na iyamo kabina ka kata meta komiu laulau namwanamwadi kwa ginaginalidi, siya ede Keliso yona kabihemauli unai se masamasalaha. ¹⁰ Yaubada yona hekasa se dudulai, unai yomi paisowabayao yo yomi gadosisi kalinawai taba nige ye nuwaluluhiyeidi. Yomi gadosisi ne kabakitalobaina ede Yaubada yona tamowai meta beyabeyana kwa saguidi yo iya ede sola kwa sagusaguidi. ¹¹ Laulauna gonogonowana ka henuwagomiu bena komiu kesega kesega kwa miyamiyanamwanamwaei ye lau ee huya ta kana siga, to Yaubada yona hededehegunuma kwa nayatautaubigaidi ne taba se laoma se mamohoi. ¹² Nige ka henuwagomiu bena kwa miyagaibu. Sunuma yo taubiga tamowaidi kabo saha Yaubada ye hededehegunumaedi wa se haidi. Unai ka henuwa bena yodi laulau kwa miyawatanidi.

Yaubada yona hededehegunuma taba nige ye bui

¹³ Huyana Yaubada yona hededehegunuma ye mosei Abelahama unai, meta ye bom hesanawai ye hededekaigwala, matawuwuna nige hesau ye saekalili doha iya. Na ye kaigwala ¹⁴ ye wane, “Mamohoi, yau kabo ya kainauyaigo na kam isimulita ya hebadodi.” (*Genese 22:17*) ¹⁵ Na Abelahama ye nayatautaubiga na mulinawai saha Yaubada ye hededehegunuma wa ye lobai.

¹⁶ Tamowai maudoidi meta tamowai saesaedi hesadiyao udiyedi se hededekaigwala. Na tamowai hesau taba saha ye hededeyako, meta hededekaigwala unai ye hemamohoiyei. Unai kabo haikawayagala maudoidi ye hekaiyawasidi. ¹⁷ Yaubada ye henuwa bena yona hededehegunuma tauhaidi kalidiwai ye hemasalaha meta taba nige yona hineli ye bui, unai kaigwalawai ye hemamohoiyei. ¹⁸ Teina ginauli labui ta, Yaubada yona hededehegunuma yo yona hededekaigwala, kabo nige gonowana ye buidi, matawuwuna nige gonowana ye kailupolupo. Kita taulaoma Yaubada unai sagu ta lobai, iya ede teina ginauli labui ta udiyedi ye henuwa bena ye hebayaoda na yona hededehegunuma udiyedi bena ta tolobayao. ¹⁹ Na yoda tolobayao Yaubada yona hededehegunuma udiyedi meta doha lowo, yaluwada taukabihekahinina bayabayaona. Yoda sunuma ta woyo ye kabigigili na ye lusolalau teha tabukalilina unai.** ²⁰ Menai Yesu taukedabagunaeda debadawai ye lusolalaoko yo ye hemala yoda taukaitalasam saesaena ye lau ee nige sigana doha Melekisedeka.

7

Melekisedeka iya taukaitalasam namwanamwana na kabo Lewi tamowaidiyao

¹ Teina Melekisedeka ta iya magari Salema yodi wasawasa yo Yaubada Saesaekalilina yona taukaitalasam tamowaina. Huyana Abelahama wasawasa ye saepwaidi gehena** na yona uyoma magari unai, meta Melekisedeka iya ye hailobai na hededehegunuma ye mosei Abelahama unai. ² Na Abelahama iyala unai gogo ye hai'uyoidi wa maudoidi

** **6:19:** Woyo yo teha tabukalilina: Teina ginauli ta meta Isalaela yodi Logologu Tabuna wa unai (Hebelu 9:1-3). Yoda sunuma ta woyo ye kabigigili na ye lusolalau teha tabukalilina unai: Hedehede ta meta Yaubada yona kabamiya galewa ne unai heyaheyasonina, na kaniyona ede yoda sunuma ye kabihakahinida Yaubada unai.

** **7:1:** Abelahama wasawasa ye saepwaidi wasana ku hasili Genese 14:1-16 unai.

luwadiwai yona taiti ye hai na ye mosei Melekisedeka.** Hesa Melekisedeka kaniyona ede *laulaududulai wasawasana*, yo hesa Salema kaniyona ede *nuwadaumwali*, unai iya hinage “nuwadaumwali wasawasana”. ³ Iya nige tamana yo sinana yo kana mumugao yo yona huyatubu yo yona mauli sigana wasadi, na iya meta taukaitalasam tamowaina ye lau huya nige sigana, doha Yaubada Natuna. ⁴ Na tamada Abelahama iyala unai gogo ye haidi wa udiyedi yona taiti ye mosei Melekisedeka, unai ta nuwatulobai meta tamowai ta ye saekalili.

⁵ Laugagayo ye hedede meta taukaitalasam siya ede Lewi kana isimulitao hekadiyo, bena Isalaela tamowaidi maudoidi udiyedi taiti se tanoi. Tamowaidi ta meta siya kadi kahao, na maudoidi Abelahama unai se tubuma. ⁶ Teina Melekisedeka ta, iya nige Lewi kana boga hesau, na iyamo taiti ye hai, yo hinage Abelahama, iya hededehe-sunuma tauhaina wa, ye hededehehenamwa. ⁷ Nige gonowana ta nuwapwanopwano, matawuwuna maudoida kabina ta kata meta tamowai dobidobina hededehehenamwa ye hai tamowai saesaena unai. ⁸ Taiti tautanotano ne, siya kabo se boita. Na taiti tauhaina hesau ede Melekisedeka, na Yaubada ye hedehedede meta iya kabo ye miya ye lau nige kana siga. ⁹ Unai gonowana kabo ta wane, Abelahama taiti yona tolona ta meta Lewi hinage taiti ye tole, ¹⁰ matawuwuna ede huyana Melekisedeka Abelahama ye hailobai, meta Lewi iya sola kana mumuga Abelahama tauna luwanawai.

Yesu taukaitalasam saesaena doha Melekisedeka

¹¹ Taukaitalasam Lewi unai tautubuma wa yodi paisowa yona kabalaoma ede Mose yona laugagayo. Na iyamo taukaitalasam ne nige gonowadi tamowai yodi yababa udiyedi se tolehedulaidi. Unai Yaubada taukaitalasam hesau ye hetamaliyama, iya ede doha Melekisedeka, na nige doha Aloni. ¹² Teina unai Yaubada taukaitalasam yona paipaisowa ye bui, ede laugagayo hinage ye bui. ¹³ Teina hedehedede maudoidi ta tamowaina wa meta iya nige Lewi kana isimulita hesau, na iya boda udoi. Na tenem boda ne unai meta nige tamowai hesau kaitalasam paisowana ye ginauli. ¹⁴ Ye masalaha meta yoda Guiyau iya Yuda kana isimulita, na Mose nige saha ye hedede bena taukaitalasam hesau Yuda kana boda unai kabo ye tubuma. ¹⁵ Yo saha ka hedede ta ye masalahakalili, ena taukaitalasam hesau doha Melekisedeka ye masalahama. ¹⁶ Nige kana mumuga laugagayona debanawai na ye hemala taukaitalasam, na yona mauli nige yona kabagehe yona gigibwali debanawai. ¹⁷ Matawuwuna Yaubada ye hededeyako ye wane,

“Kowa taukaitalasam miyamiyahaina doha Melekisedeka.”

(Same 110:4)

¹⁸ Laugagayo yo kabikabidi bagubagunadi wa Yaubada ye tolehesuwaladi matawuwuna ede se basabasa yo nige kaniyodi, ¹⁹ matawuwuna laugagayo ta nige gonowana tamowai se tolehedulaidi. Na Yaubada hededehe-sunuma namwanamwadi ye ledima, se saguida na udiyedi kabo gonowana ta sigilau Yaubada unai.

²⁰ Laugagayo yo kabikabi hauhauna ta Yaubada ye hetubu na hededekaigwala ye ginauli Yesu unai. Na nige hededekaigwala hesau ye ginauli taukaitalasam tamowaidiyao bagubagunadi udiyedi. ²¹ Na huyana Yesu ye hemala taukaitalasam, Yaubada hededekaigwala ye ginauli ye wane,

“Guiyau ye kaigwalako,

yo iya taba nige nuwana ye bui:

Kowa kabo taukaitalasam ye lau ee huya nige sigana”

(Same 110:4)

²² Teina hededekaigwala ta debanawai Yesu ye hemala talam namwanamwana tauhaiyamana yo tauhebayaona. Talam ne ye namwakalili na kabo talam beyabeyana.

²³ Taukaitalasam Lewi unai tautubuma wa meta se badokalili, matawuwuna boita ye

** 7:2: Taiti ... ye mosei Melekisedeka wasana ku hasili Genese 14:17-20 unai.

hekaiyawasidi, unai kadi paisowa nige se laei sigana unai. ²⁴Iyamo Yesu ye miya ye lau nige sigana, unai iya ye hemala taukaitalasam miyatahitahina. ²⁵Unai iya gonowana tamowai ye hemaulidi, siya ede tamowaidiyao Yesu debanawai se laoma Yaubada unai. Matawuwuna iya ye miya ye lau nige kana siga na huya maudoina kabo yodi ye kaikaibwada.

²⁶Ye namwakalili to yoda taukaitalasam saesaena ede Yesu, matawuwuna iya tabuna, nige kana giluhesau, ye a'a, iya tamowai yodi yababa nige ye patulau udiyedi, yo galewa ne unai ye saekalili. ²⁷Taukaitalasam saesaedi Lewi kana isimulitao, siya bena mayadai badobado kaitalasam se ginaginulidi, bagubaguna se bom yodi yababa hesabadi na kabo tamowai maudoidi yodi yababa hesabadi. Na Yesu meta udoi. Iya tamowai yodi yababa maudoidi debadiwai kaitalasam kesega mo ye ginauli huyana ye mose'uyoi sataulo ne unai.

²⁸Tamowai se basabasakalili, na iyamo laugagayo debanawai se hemala taukaitalasam saesaedi. Na laugagayo mulinawai hededekaigwala ye laoma, na unai Yaubada Natuna ye kaisunuwai ye hemala taukaitalasam saesaena. Yaubada iya ye tolehedudu-laimamohoiyei ye lau ee nige kana siga.

8

Yesu yoda taukaitalasam saesaena talam hauhauna wa unai

¹Kai saha ka hedehededei ta meta iya ede teina: Kita yoda taukaitalasam saesaena ye tutuli Yaubada didididigakalilina yona telona nimatutunawai galewa ne unai, ²yo kabataba'ohu unai ye paipaisowa. Kabataba'ohu ta Logulogu Tabuna mamohoina Guiyau ye ginauli na nige tamowai se ginauli.

³Laugagayo ye hedede meta bena taukaitalasam saesaedi maudoidi yodi kainauya yo kaitalasam se moseidi. Gonogonowana doha hinage teina yoda taukaitalasam saesaena ta bena kaitalasam hesau ye mosei Yaubada unai. ⁴Ena taba iya tanoubu ta unai, taba nige ye hemala taukaitalasam, matawuwuna tanoubu ta unai meta taukaitalasam tamowaidiyao nonohadi, siya ede kaitalasam se moseidi Yaubada unai, doha laugagayo ye hededehehemalahayako wa. ⁵Yo siya yodi kabakaihelahui, iya ede Logulogu Tabuna ne, meta galewa ne unai Logulogu Tabuna mamohoina kabakitana yo tautauna. Unai ede huyana Mose bena Logulogu Tabuna ta ye ginauli, Yaubada ye hededehebayaolau unai ye wane, “Ku kitalau kabikabina tautauna maudoina kuduli ne unai ya hekitago wa meta ku ginauliwatani.”

(Esodo

25:40) ⁶Na taukaitalasam saesaena paisowana Yesu ye hai wa ye namwakalili na kabo Lewi tamowaidiyao yodi paisowa, gonogonowana doha talam iya ye haiyama wa ye namwakalili na kabo talam bagubagunana wa. Na talam hauhauna ta yona kabatolo ede hededehehesunuma namwanamwadiyao. Hededehehesunuma ta se namwakalili na kabo hededehehesunuma bagubagunadi wa.

⁷Taba ena talam bagubagunana wa unai nige laupwano, meta Yaubada taba nige talam helabuina ye leyama. ⁸Na Yaubada Isalaela tamowaidi udiyedi laupwano ye lobai ede ye wane,

“Guiyau ye wane, Huyana ye laolaoma,
yau kabo talam hauhauna ya ginauli
Isalaela yo Yuda tamowaidiyao udiyedi.

⁹Kadi mumugao nige yogu talam beyabeyana wa se sunumaei,
ede ya lausuwalaedi.

Unai talam hauhauna ta kabo nige doha siya udiyedi ya ginauli wa,
huyana nimadi udiyedi ya kabi na Aikupito unai ya woyahepesadi wa.

¹⁰Na Guiyau ye wane, Teina talam ta kabo ya ginauli Isalaela tamowaidi udiyedi,
tenem huyana ne mulinawai.

Yau yogu laugagayo kabo ya toledi kuludi ne udiyedi
yo ya kulidi nuwadi ne udiyedi.

Yau kabo yodi Yaubada,
yo siya yau yogu tamowai.

¹¹ Huyana ne taba nige tamowai hesau helena taumiya ye hekata
yo taba nige ye hededelau kana kaha unai ye wane, 'Guiyau taba kabina ku kata,'
matawuwuna siya maudoidi gagilidi ye sae lakilakidi
kabo kabigu se kata.

¹² Yau yodi laulau yabayababadi kabo ya hededegigilidi
yo yodi ba'aya taba nige ya nuwatu'uyoidi." *(Yelemaiya 31:31-34)*

¹³ Na teina talam ta Yaubada ye katai talam hauhauna, unai talam bagubagunana wa
ye beyabeyako. Na saha ye beyabeyako yo nige yona gigibwali meta kabo ye tauwadam.

9

Yaubada kaihelahuina Logulogu Tabuna unai

¹ Talam bagubagunana wa meta yona kaihelahui laugagayodi yo kabikabidi, yo
hinage tanoubu ta unai kabataba'ohu se ginauli. ²⁻³ Kabataba'ohu ta meta Logulogu
Tabuna kaleko unai se ginauli, na kalona ne unai meta kaleko unai se woyo'utusi na
ye hemala dahala labui. Na dahala bagubagunana wa unai meta lampa haligigi-labui
(7) yodi kabatolo ye totolo, yo hinage pwalawa tabudi ma hatahatana menai.** Teina
dahala ta hesana ede teha tabuna. Na woyo kalekona dagelanawai meta dahala hesau
hesana ede teha tabukalikalilina.** ⁴ Dahala ta unai kabakaitalasam hatahatana gole
unai se ginauli, meta inisenisi kabagabuna. Yo talam keisina** gole unai se suma
wa hinage temenai. Teina keisi ta kalonawai meta mana kaba'usaidi gole unai se
ginauli wa, yo Aloni yona tuke ye bwagu wa**, yo laugagayo saudoudoi (10) wekudi
tabatabadiyao labui** wa. ⁵ Keisi wa kewanawai selubim didididigadi labui se tutuli.
Pepedi se kaladi na ba'aya kabahededegigilina tehana wa se helogulogu. Na ginauli
maudoidi ta hedehedededi se badokalili, na nige gonowana ta hetalahegedi.

⁶ Huyana ginauli maudoidi se tolehekanonohaidi doha teina, kabo taukaitalasam
se mwalamwalae dahala bagubagunana unai, mayadai badobado temenai yodi kaihe-
lahui kabikabidi se ginaginulidi. ⁷ Na taukaitalasam saesaena ye bom mo kabo bolimai
kesega kesega luwadiwai mayadai kesega mo unai ye mwalaesae teha tabukalikalilina
unai, na yona mwalaesae ne unai meta bena kwasina ye bahei. Teina kwasina ta
meta iya yo tamowai maudoidi yodi yababa nige se nuwatulobaidi wa hesabadi na
menai Yaubada matanawai ye lausibusibuyei. ⁸ Taukaitalasam saesaena ye bom mo
gonowana ye mwalaesae dahala tabukalikalilina unai. Teina unai Yaluwa Tabuna ye
hemasalaha kalidawai meta huyana Logulogu Tabuna bagubagunana sola ye totolo
meta kabalusae teha tabukalikalilina kedana nige sola ye tasoke. ⁹ Teina talam baguba-
gunana kabikabidiyao ta meta teina huya ta kita yoda kabakita. Ye hekitada meta
tautaba'ohu yodi kainauya yo kaitalasam se mosemoseidi Yaubada unai wa, meta taba
nige gonowana nuwadiyao se he'a'adi. ¹⁰ Matawuwuna teina kainauya yo kaitalasam
ta meta siya ede kai, numanuma, taudi yo gogo deulihe'a'adi kabikabidi mo. Tamowai
teina kabikabi ta se ginaulidi meta dagelagaibudi mo se he'a'adi, *[na nuwadiyao meta*

** **9:2-3:** Dahala bagubagunana gogona hedehedededi ku hasilidi Lewitikasi 24:5-9, Maleko 2:26, yo Esodo 25:23-30
udiyedi. ** **9:2-3:** Teha tabukalikalilina hesana ta se tole matawuwuna iya ede Yaubada yona kabamiya tanoubu
ta unai. ** **9:4:** Talam keisina: Kalina Dimdim unai se hedehedede *ark of the covenant*. Teina hedehedede ta
ark kaniyona ede keisi. ** **9:4:** Aloni yona tuke ye bwagu wa wasana meta Numela 17 unai ku hasilidi. ** **9:4:**
Laugagayo saudoudoi ... wekudi tabatabadiyao labui wasadi meta Esodo 34:1 unai.

nige se buidi.] Na Yaubada yona nuwatu meta bena tamowai tenem kabikabi ne se ginaginulidi ye lau ee kabikabi hauhauna ta ye lage.

Keliso kwasinana hedehedena

¹¹ Na Keliso ye laoma ye hemala ginauli namwanamwadi se laomako wa yodi taukaitalasam saesaena, na Logulogu Tabuna unai ye lusola. Teina Logulogu Tabuna ta ye saekalili yo ye namwakalili na kabo tanoubu unai ta. Nige tamowai nimadiwai se ginauli, yo iya meta nige doha tanoubu ta ginaulina hesau. ¹² Yesu yona lusola wa unai meta nige gouti o bulumakau natuna hakiyana kwasinana ye hepaisowa, na ye bom kwasinana mo ye bahei na ma kesega mo ye lusola teha tabukalikalilina wa unai, na unai yoda kabihemauli miyatahitahina ye ginauli. ¹³ Kabikabi bagubagunana unai, ena Yaubada matanawai tamowai nige se a'a,** meta kabo taukaitalasam ne gouti o bulumakau hakiyadi kwasinadi unai se lausibusibuyei, o bulumakau baisinana saehauna kahusana se hesulusae kewadiwai. Unai kabo se he'a'a'uyoidi. Iyamo teina ta meta dagelagaibudi mo se a'a. ¹⁴ Na Yaluwa Tabuna Miyamiyahaina Yesu ye hebayao na ye bom ye mose'uyoi Yaubada unai. Na iya meta nige yababana hesau. Unai ede Keliso kwasinana ye gigibwalikalili na kabo suisui kwasinadi. Kabahemwaloida laulaudiyo udoi'udo udiyedi Keliso kwasinana nuwadao ye he'a'adi, to bena Yaubada Maumaulina ta kaihelahui. ¹⁵ Keliso yona kaitalasam debanawai ede iya talam namwanamwakalilina tauhetubuna. Talam bagubagunana wa unai na tamowai saha se ginaulipwanolidi wa ba'ayadi maudoidi hesabadi ye boita na unai ye hemaisahaidi yo yailihai ye moseidi. Unai talam hauhauna ta meta kaiteyadi Yaubada ye yoganeidi wa bena yona hededehesunuma gogodi miyamiyahaidiyao se haidi.

¹⁶ Na huyana tamowai hesau yona gogo hekasana pepwana ye kulikauli na ye boitagabaei, meta nige gonowana tamowai hesau ye kabilau gogo ne udiyedi kana siga se hemamohoiyei meta pepwa ne taukulina ede ye boitako. ¹⁷ Ena taukulina ta ma miyana meta nige gonowana tamowai hesau gogo hekasana pepwana ta ye hepaisowa na unai ginauli saha ye hededehesunuma wa ye hai. Teina pepwa ta nige gonowana ye paisowa kana siga ee taukulina ta ye boita. ¹⁸ Doha hinage talam bagubagunana wa nige yona gigibwali ye lau ee kwasina unai se hemamohoiyei. ¹⁹ Mose Yaubada yona laugagayo maudoidi ye hededegebaedi tamowai udiyedi, na muliyena bulumakau natudiyao yo gouti kwasinadi yo waila ye haidi na mamoe wiyana pulupululuna yo hisopa lagadi ye hepaisowadi na Yaubada yona laugagayo bukana yo tamowai maudoidi udiyedi ye lausibusibuidi ²⁰ na ye wane, "Teina kwasina ta meta Yaubada yona talam kalimiuwai wa kabahemamohoiyena."

(Esodo 24:7-8) ²¹ Laulau kesekesegana unai kwasina ye lausibusibuyei Logulogu Tabuna unai yo kabakaihelahui gogodi maudoidi udiyedi. ²² Mamohoi, laugagayo ye hedede meta ginauli se bado bena kwasina unai se he'a'adi. Taba bena kwasina nige ye bwalili, nige yababa kabahededegegilina hesau.

²³ Teina ginauli ta meta siya ede galewa gogodiyao tautaudi, yo kabahe'a'adi meta suisui kwasinadi. Na galewa ginaulidi kabahe'a'adi meta ye saekalili na kabo suisui kwasinadi, ²⁴ matawuwuna Keliso nige ye lusae Logulogu Tabuna tamowai nimadiwai se ginauli wa unai. Na ye lusae galewa ne unai Logulogu Tabuna mamohoina ne unai. Temenai ye masalahalau Yaubada matanawai kita hesabada. ²⁵ Hinage ye lusae galewa ne unai nige bena huya badobado ye bom ye kaikaitalasamyeyi'uyoi, doha taukaitalasam saesaena bolimai kesega kesega ye lusae teha tabukalikalilina unai ye kaikaitalasam, na kwasina ye bahei wa meta nige iya ye bom kwasinana. ²⁶ Ena taba Keliso yona kaitalasam ne ye ginaginauli'uyoi, meta huyana Yaubada tanoubu yona

** **9:13:** Yaubada matanawai tamowai nige se a'a kaniyona ede tamowai wa nige gonowana se mwalae Logulogu Tabuna bakubakuna unai se kaitalasam yo se tapwalolo, matawuwuna yababa saha hesau se ginauli o laugagayo hesau se utusi.

hetubuna wa unai ye laoma ee teina kabo ye kamkamna ma gwauna. Na huya gehena ta unai ye laoma ma kesega mo ye kaitalasang'uyoi bena ba'aya ye tolehesuwaladi. ²⁷ Doha ede tamowai ye boita ma kesega mo na mulinawai kabo ye masalaha hekasa mayadaina unai, ²⁸ hinage Keliso ye boita ma kesega mo na kaitalasang ye ginauli tamowai gwaudi yodi yababa kabalaehesuwaladi. Na kabo ye uyoma nige bena tauba'aya hesabadi, na tenem huyana ne unai kabo mauli nige kana siga ye moseidi iya taunayanayaina tamowaidiyao ne udiyedi.

10

Keliso ma kesega mo ye kaitalasang

¹ Laugagayo Mose unai se laoma wa meta ginauli namwanamwadi se laolaoma ne tautaudi mo, nige mamohoidiyao. Unai ede kaitalasang kesekesegadi tamowai se ginaginauli'uyoidi bolimai badobado, na udiyedi taba nige gonowana taukaihelahui ne se hedudulaidi. ² Ena taba laugagayo wa tamowai se hedudulaidi kabo gonowana kaitalasang wa se kaiyawasi. Matawuwuna ena taba kaitalasang kesega mo unai taukaihelahui wa se a'ako, kabo nige gonowana yodi yababa se nuwatu'uyoidi. ³ Na tenem kaitalasangdi ne meta ba'aya kabahenuhenuwaisinidi bolimai badobado, ⁴ matawuwuna bulumakau yo gouti hakiyadi kwasinadi nige gonowana ba'aya se haigabae.

⁵ Tenem unai, huyana Keliso ye dobima tanoubu ta unai meta ye wane, “Kaitalasang yo kainauya nige ku henuwadi, na yau taugu ta ku kabinonohai yogu.

⁶ Kaitalasang gabugabudi yo ba'aya kabahededegigilina kainauyadi nuwam nige se henamwa.

⁷ Na kabo ya wane, ‘Yaubada, yau ede te, doha buka unai se kuliyako, ya laoma kowa yom nuwatu bena ya ginauli.’ ”

(Same 40:6-8)

⁸ Bagubaguna Keliso ye hedede ye wane, “Kaitalasang yo kainauya, siya ede kaitalasang gabugabudi yo kaitalasang ba'aya hesabadi, meta nige ku henuwadi yo nige nuwam se henamwadi.” Iyamo laugagayo ye hedede bena se ginaulidi ⁹ Na ye hedede'uyo ye wane, “Yau ede te, ya laoma kowa yom nuwatu bena ya ginauli.” Teina hedehedede ta udiyedi talam bagubagunana wa ye tolehesuwala na helabuina ye haiyama. ¹⁰ Na Yaubada yona nuwatu unai ye haida yona tamowai, Yesu Keliso tauna kaitalasangna kesega wa debanawai.

¹¹ Talam bagubagunana wa unai mayadai kesega kesega taukaitalasang maudoidi yodi paisowa se ginaginaulidi. Kaitalasang kesekesegadi se moseidi Yaubada unai na nige gonowana udiyedi ba'aya se haigabaeidi. ¹² Na teina taukaitalasang saesaena ta ba'aya kaitalasangna ma kesega mo ye ginauli, na mulina ne unai ye sae Yaubada nimatutuna unai ye tuli. ¹³ Temenai ye nayanaya ye lau ee kana siga kana waiunu Yaubada ye toledi kaena kabatoledi. ¹⁴ Matawuwuna tenem kaitalasang kesega ne unai kaiteyadi ye tolehesuwaladi siya Yaubada yona tamowai ne meta ye tolehedudulaimamohoiyeidi ye lau nige kana siga.

¹⁵ Yaluwa Tabuna teina ta hinage ye hemasalahayako kalidawai. Doha bagubagunawai ye wane,

¹⁶ “Guiyau ye hedede ye wane, ‘Teina talam ta kabo ya ginauli Isalaela tamowaidi udiyedi, tenem huya ne mulinawai.

Yau yogu laugagayo kabo ya toledi kuludi ne udiyedi yo ya kulidi nuwadi ne udiyedi.’ ”

(Yelemaiya 31:33)

¹⁷ Na kabo ye hedede'uyo ye wane, “Yodi ba'aya yo laulau yabayababadi meta

yau taba nige ya nuwatu'uyoidi.”

(*Yelemaiya 31:34*)

¹⁸ Na huyana Yaubada ba'aya ye hededegegilidi meta tamowai nige gonowana kaita-lasam hekadi se ginauli'uyoidi.

Sunuma hededehebayaona

¹⁹ Kehaguwao, Yesu kwasinana debanawai ta nuwabayao na ta lusae galewa teha tabukalikalilina ne unai. ²⁰ Yesu teina keda hauhauna ta ye sokeyako kita hesabada yo gonowana unai kabo maui ye leyama kalidawai. Woyo taigalina ne iya ede Yesu tauna, unai kabo gonowana ta lau Yaubada unai. ²¹ Yo hinage yoda taukaitalasang saesaena iya Yaubada yona tamowai taukitahetedi. ²² Tenem nuwatu maudoidi ta debadiyena taba kwa laoma ta sigi ta lau Yaubada unai ma nuwamamohoida yo ma sunumada. Matawuwuna yoda nuwatu yabayababadi Keliso kwasinana unai ye lausibusibuyeidiko na ye he'a'ada, yo tauda waila a'ana unai ye deulidiko. ²³ Taba ta tolobayao na Yaubada yona hededehesunuma ta hededehehemalahadi tamowai udiyedi ta, bena ta kabihkahinidi, matawuwuna Yaubada saha ye hededehesunuma kalidawai wa kabo ye hemamohoyei. ²⁴ Na bena ta nuwanuwatu kabo idohagi na ta haihebahebayaoyoida gadosisi yo laulau namwanamwadi udiyedi. ²⁵ Tabu yoda tapwalolo koikoigogodi ta miyasuwalaedi doha tamowai hekadi yodi miyamiya ne. Bena yoda sunuma unai ta haihebahebayaoyoida, matawuwuna kabina ta kata meta yoda Guiyau yona uyoma mayadaina ye hanahanauma.

²⁶ Ena kita Yaubada yona hedehedede mamohoina ne kabina ta kata na sola ba'aya unai ta miyamiya, meta nige kaitalasang hesau'uyo kabo ba'aya ne ye haigabaedi, ²⁷ na ma matamatausida hekasa mayadaina yo Yaubada kana waiunu kabaheyababadi kaiwana kalakalasinana ta nayanayaidi. ²⁸ Ena tamowai hesau Mose yona laugagayo ye laukwatakwataei na tamowai labui o haiyona se kita yo se hemamohoyei, kabo se unuhemwaloi, nige gonowana se katekamkamnaei.** ²⁹ Yomi nuwatu idohagi? Ena tamowai hesau Yaubada Natuna nige ye hekasisiyei yo talam kwasinana wa ye hai doha ginauligaibu, yo nige ye mode meta teina kwasina ta gonowana yona yababa ye deuligabaedi Yaubada matanawai, yo Yaluwa iya ginauli namwanamwadi ye kainauyaida ye hededeheyababa meta kabo kamkamna sahasahana ye hai? ³⁰ Tauhedehededen kabina ta katako, ye hedede ye wane, “Yau kabo ya haigum, yo hekamkamna meta yau ya ginauli,” (*Dutelonomi 32:35*) yo ye hedede'uyo ye wane, “Guiyau kabo yona tamowai ye hekasadi.” (*Dutelonomi 32:36, Same 135:14*) ³¹ Unai ginauli nuwamatamatausikalilina ede hekamkamna Yaubada Maumaulina nimana unai kabo tamowai se hai ne.

³² Na huya bagubagunana unai Keliso wasana kwa hai wa kwa nuwanuwatui. Tenem huyana ne unai kamkamna lakilakina kwa hekalo, na iyamo yomi sunuma unai kwa tolobayao. ³³ Huya hekadiyo komiu Yesu tausunumaena se haigomiu na boda matadiwai se hededeheyababagomiu yo se hekamkamnagomiu, yo huya hekadiyo kamkamna kesekesegadi tauhaidi wa kwa saguidi. ³⁴ Kami kahao numatutugudu unai se toledi wa kwa katekamkamnaedi, yo huyana yomi gogo se haidi wa meta kwa gwauyala, matawuwuna kabina kwa kata meta yomi gogo namwanamwadi yo miyamiyahaidi, siya ede galewa ne unai.

³⁵ Unai tabu yomi sunuma kwa gabaegaibui. Kainauyana lakilakina kabo Yaubada unai kwa hai. ³⁶ Yomi sunuma unai taba kwa tolobayao, yo huyana Yaubada yona nuwatu kwa ginaulihegehedi sigana unai, saha ye hededehesunuma wa kabo kwa hai.

³⁷ Na huyakubwakubwa mo

“kabo taulaoma ne ye lagema na taba nige ye pahili.

³⁸ Na yogu tamowai dudulaina sunuma debanaena kabo ye miya.

** **10:28:** Laugagayo ne Dutelonomi 17:6 unai ku hasili.

Na ena ye mulisigisigi

yau taba nige nuwagu ye namwa kalinawai.”

(Habakuku 2:3,4)

³⁹ Na kita meta nige taumulisigisigi tamowaidiyao. Ena tamowai hesau ye mulisigisigi, Yaubada kabo ye heyababa. Na kita meta tausunuma tamowaidiyao, mauli nige kana siga tauhaidi.

11

Tausunuma tamowaidiyao wasadi

¹ Yoda sunuma kaniyona ede ta kawamamohoi yo nige nuwadao se labulabui meta Yaubada yona hededehe sunuma ta nayanayaidi ne kabo se tubu, yo ginauli saha sola nige ta kitadi kabo se masalaha. ² Kada mumugao yodi sunuma kana kao ede doha teina, unai Yaubada ye hededetausaedi.

³ Sunuma debanawai ta nuwatulobai meta *Yaubada ginauli maudoidi ye hetubudi* yona hedehedede unai. Na saha ta kita ne meta ginauli nige masamalahadi udiyedi ye masalaha, Yaubada yona hedehedede unai.

⁴ Sunuma debanawai *Abela* kaitalasang namwanamwana ye mosei Yaubada unai, na kabo Kaina yona kaitalasang. Na Yaubada Abela yona kainauya ye kitahenamwa na yona sunuma debanawai ye hededetausae meta iya tamowai dudulaina. Abela ye boitako, na iyamo yona sunuma wasana sola iya ede ta lapulapui.

⁵ Sunuma debanawai Yaubada *Enoka* ye hai ye saei galewa, ede iya nige boita ye lobai. Makesega ye tauwadam, matawuwuna Yaubada iya ye haiyako. Na huyana sola nige ye sae galewa, Yaubada iya ye hededetausae meta iya nuwana ye henamwa. ⁶ Na ena nige yoda sunuma, meta nige gonowana Yaubada nuwana ta henamwa. Matawuwuna nige gonowana tamowai hesau ye laoma Yaubada unai kana siga ye kawamamohoi meta Yaubada iya maumaulina yo miyamiyahaina, yo hinage bena ye kawamamohoi meta Yaubada iya tauwaseneina ye kainauyaidi.

⁷ Sunuma debanawai ginauli sahasahadi sola nige se masalaha wa Yaubada ye hededehe masalahanonohaidi *Nowa* unai, na *Nowa* Yaubada ye hekasisiyei yo yona sunuma debanawai ake** ye ginauli bena yona numa tamowaidi ye hemauidi. Saha ye ginauli ta unai *Nowa* tanoubu tamowaidiyao kadi gilul ye hemasalahana, na ye hemala laulaududulai tamowaina Yaubada matanawai.

⁸ Sunuma debanawai *Abelahama* Yaubada ye kawakabiyei, huyana ye yoganei bena ye lau tano hesau unai. Tano ne Yaubada ye hededehe sunuma bena huya mulinawai kabo ye hemala yona tano mamohoina. Yaubada ye kawakabiyei na ye lau, na nige kabina ye kata haedi ye laulau. ⁹ Yona sunuma debanawai hededehe sunuma tanona unai ye miya doha laolaoma. Yo tenti unai ye miyamiya doha hinage natuna Isako yo wahana Yakobo, na siya meta hededehe sunuma kesekesegana tauhaina. ¹⁰ *Abelahama* teina laulau ta ye ginaulidi matawuwuna magari miyamiyahaina ye nayawatani. Magai wa taunuwatuhekasana yo tauginaulina ede Yaubada.**

¹¹ Huyana *Abelahama* ye tautaubadakaliliko yo mwanena Sala ye kobosi, meta *Abelahama* yona sunuma debanawai Yaubada ye hebayao na ye hemala tama, matawuwuna ye kawamamohoi meta saha Yaubada ye hededehe sunumayako wa kabo ye ginauli.

¹² Unai tamowai tautaubadakalilina ta kana isimulitao meta se badokalili doha galewa kipwaladi yo salagomgom nagalidi. Nige gonowana ta hasilidi.

¹³ Teina tamowai ta ma sunusunumadi na se boita. Na saha Yaubada ye hededehe sunumadi wa sola nige se haidi. Na kedalohalohawai mo se kitakitalaedi yo

** **11:7:** Teina hedehedede ta ake nige kalina Saliba, na kalina Hebelu unai ta hai. Na kaniyona ede keisi. *Nowa* waga ye kabi wa hinage ta hedede ake, iya meta keisi lakilakikalilina. *Nowa* wasana ede Genese 6:5 unai ye hetubu. Keisi hesau wasana ta hasili Hebelu 9:4 unai, iya ede talam keisina. ** **11:10:** Magai wa hededehe masalahana ku hasili Hemasalahana 21:10-14 unai.

se gwauyalaedi. Yo se hededehe masalaha'uyoidi meta siya laolaoma yo yodi magai mamohoina nige tanoubu ta unai. ¹⁴ Tamowai yodi hedehede doha teina ye hemasalaha meta basileiya hesau se wasewasenei bena kabo se hai yodi. ¹⁵ Ena taba tano se laugabaei wa se nuwanuwatui, meta kabo gonowana se uyoko hesabana. ¹⁶ Iyamo se henuwa magai namwanamwana se nayanayai iya ede galewa ne unai. Unai Yaubada nige ye mwadine bena iya se katai yodi Yaubada, matawuwuna yodi magai lakilakina ye kabinonohaiyako.

¹⁷⁻¹⁸ Huyana Yaubada *Abelahama* ye laukita kabo Abelahama iya natuna Isako ye kaitalasamei, matawuwuna yona sunuma. Yaubada ye hededehe sunumayako meta Isako unai kabo kana isimulitao se masalaha, na iyamo Abelahama Yaubada yona hededehe sunuma tauhaina wa ye yali bena natukesekesegana ye kaitalasamei. ¹⁹ Abelahama ye nuwatui meta taba Isako ye boita, Yaubada gonowana kabo ye hemauli'uyoi. Na saha ye tubu wa meta doha Abelahama natuna Isako boita unai ye hai'uyoi.

²⁰ Sunuma debanawai *Isako* iya natunao labui Yakobo yo Iso ye hededehe namwadi yo ye hededehe masalaha ginauli sahasahadi kabo se tubu kalidiwai. **

²¹ Sunuma debanawai *Yakobo*, huyana yona huyaboita ye hanahanauma, meta Yosepa natunao labui ye hededehe namwadi yo yona tuke unai ye kabi ye totolo na Yaubada ye kaihelahui. **

²² Sunuma debanawai *Yosepa* yona huyaboita ye hanahanauma ede ye hededehe masalaha meta Yaubada kabo Isalaela tamowaidiyao Aikupito unai ye woyahepesadi, yo saha ye henuwa bena siyadana ne unai se ginauli, meta ye hededenonohai.

²³ Huyana *Mose* se labasi, na sunuma debanawai *tamana yo sinana* iya se tolewadam waikena haiyona, matawuwuna iya se kita meta kana kao ye namwakalili, na Palao yona laugagayo nige se matausiyei.

²⁴ Sunuma debanawai huyana *Mose* ye tubusae meta nige ye henuwa bena se hededehe iya Palao natuna waihiu wa natuna, ** ²⁵ na ye henuwa bena Yaubada yona tamowai maiyanao se kamkamna, na nige bena huyakubwakubwa mo yababa gwauyalana ne unai ye gwauyala. ²⁶ Ye nuwatui meta ye namwa mo taba ye kamkamna Keliso debanawai na kabo Aikupito yona gogo wasawasadi gadosisidi ne, matawuwuna iya ye kitakitalau yona kainauya ye laolaoma ne hesabana. ²⁷ Sunuma debanawai *Mose* Aikupito ye laugabaei na wasawasa yona kouyalayala nige ye matausiyei. Yona sunuma unai ye tolokesegai, matawuwuna yona kamna ne unai doha Yaubada iya ede wadawadamna ye kita. ²⁸ Sunuma debanawai *Mose* ye hededelau Isalaela tamowaidi bena Taukiuli kabikabina yo kwasina hesaudi kawakeda duudi udiyedi se ginaulidi, unai taba nige taukaiunu aneluna Isalaela natudiyao tautaubaguna ye unuidi. **

²⁹ Sunuma debanawai *Isalaela tamowaidiyao* Gabwa Pulupululuna unai se kawasi kana kao doha tano pitapitalina. Na huyana Aikupito tamowaidiyao se kaipate bena se hemuliwatanidi ede siya mauidi se yoli.

³⁰ Sunuma debanawai *Isalaela tamowaidiyao* Yeliko ganana se tauhetakikili mayadai haligigi-labui na kabo gana wa ye ulugwaligwali.

³¹ *Lahaba*, iya Yeliko waihiuna yo tauna ye lokulokunegabaei, meta yona sunuma debanawai nige se koihemwaloi doha taukawayagala mauidi wa, huyana Isalaela tamowaidiyao Yeliko magaina se heyababa, matawuwuna Isalaela yodi taukaike-wasipwa ye yogaisinidi ma nuwadaudumwalidi. **

** **11:20:** Iso wasana ne ku hasili Genese 27:1-40 udiyedi. ** **11:21:** Ye totolo na Yaubada ye kaihelahui:

Tenem huyana ne unai tamowai se totolo na se tapwalolo. ** **11:24:** Mose wasana ne ku hasili Esodo 2:10 unai.

** **11:28:** Taukiuli bagubagunana wasana ku hasili Esodo 12 unai. ** **11:31:** Lahaba wasana ku hasili Yosuwa 2:1-21 yo 6:22-25 udiyedi.

³² Kabo saha hesau ya hedede'uyoi? Nige yogu mahana gonowana bena kabo Gidiyoni, Balaki, Samasona, Yepeta, Dawida, Samuwela yo peloweta maudoidi yodi sunuma wasadi ya hasilidi. ³³ Teina tamowaidiyao ta yodi sunuma debadiwai basileiya hekadi se saepwaidi, yo kabikabi dudulaidi se ginaulidi, yo Yaubada saha ye hedede-hesunumadi wa se haidi. Siya hinage laiyoni kawadi se koiguidi tabu se kaitau, ³⁴ yo kaiwa kalapulupululudi se hebosodi, yo iyala kelepana unai bena se unuidi na se wasabugabaei. Yaubada yodi basabasa ye buidi na se bayao, na iyala unai se bayaokalili na kadi waiunu se henakudi. ³⁵ Sinesineo kehadiyao yodi tauboitaa, boita unai se hai'uyoidi.**

Tamowai hekadiyo meta se hekamkamnakaliliyeidi, na iyamo nige se henuwayailihai, na se henuwa bena se boita matawuwuna kabina se kata meta boita mulinawai kabo se tolo'uyo na mauli namwanamwana se hai. ³⁶ Hekadi se talatalawasiyedi yo wipi udiyedi dageladi se sapikopadi, yo hekadiyo nimadi yo kaedi se senidi yo numatutugudu udiyedi se toledi. ³⁷ Hekadi se hekalawekudi, hekadi sowa udiyedi se boliduwaduwalidi, hekadi kelepa udiyedi se unuhemwaloidi. Na teina tamowaidiyao ta meta se dehakalili, ede mamoe yo gouti dahidi se likwadi na se sae yo se dobi, yo tamowai siya se hekamkamnadi yo se kabihenayaidi. ³⁸ Siya se namwakalili Yaubada matanawai, na tanoubu ta tamowaidiyao siya nige se kitahenamwadi. Unai se sae yo se dobi balabalagaibu yo koya tupidi udiyedi, na weku yo bwatano duhadi udiyedi se miyamiya.

³⁹ Yaubada teina tamowai maudoidi ta yodi sunuma debanawai ye kitahenamwadi, na iyamo saha ye hedede-hesunumadi wa sola nige se hai yodi mauli huyadiwai. ⁴⁰ Kaniyona ede ginauli namwanamwana hesau ye nuwatuhekasakauli kita hesabada, na ye henuwa taba siya yo kita kabo ta haigogoi, iya ede ye tolehedudulaimamo-hoiyeida.

12

Yaubada natunao ye guguyaidi

¹ Teina bodalakilaki tamowaidi ta yodi sunuma wasadi udiyedi se hekitada idohagi bena ta miya sunuma unai. Unai kabakabihekahinida maudoidi yo ba'aya kabahekal-
 abesibesida ta gabaedi, na ma nuwabayaoda ta heloikesegai yoda kailakwa ta unai.

² Bena ta kitakitalau Yesu unai. Iya yoda sunuma yona kabalaoma yo yona kabagehe. Yona nuwayali unai sataulowai boita nuwamwadimwadinena ye hai, matawuwuna ye nuwatui gwayalana kabo ye hai. Na teina huya ta Yaubada yona telona tehatutuna unai ye tutuli.

³ Yesu kwa nuwatui! Iya meta tamowai yabayabadiyao udiyedi yona hekamkamna ye haidi. Unai tabu kamnamiyao se yababa yo kwa nuwabasabasa yomi kamkamna ta udiyedi. ⁴ Huya maudoina ye laoma ee teina yomi kaipate ba'aya hewaiununa unai meta sola nige kwasinamiyao se hebwalilidi. ⁵ Nuwana Yaubada yona hededehebayao wa kwa nuwaluluhiyeidiko, doha ye kawanatuyeigomiu ye wane, "Natugu, huyana Guiyau ye guguyaigo, tabu ku nuwatuhegagili,

yo huyana ye dilaigo, tabu nuwam ye basabasa,

⁶ matawuwuna Guiyau tamowai ye gadosisiyeidi ne kabo ye guguyaidi,

yo kaiteyadi ye kawanatuyedi kabo ye hekamkamnadi." (*Hededesonosonoga*

3:11-12)

⁷ Pilipili udiyedi bena kwa hekalakasikasinigomiu, matawuwuna teina ta meta kami guguya Yaubada unai se laoma na yona kabikabigomiu meta doha komiu natunao mamohoidi. Tama namwanamwana meta natunao kabo ye guguyaidi. ⁸ Yaubada natunao maudoidi ye guguyaidi, na ena nige ye guguyaigomiu, meta komiu nige

** **11:35:** Sinesineo kehadiyao yodi tauboitaa, boita unai se hai'uyoidi: Wasadi ku hasili 1 Kin 17:17-24 yo 2 Kin 4:25-37 udiyedi.

natunao mamohoidi, na tama hesau natunao. ⁹ Kita tamadao tanoubu ta unai se guguyaida na unai ta hekasisiyeidi. Yo gonogonowana doha Tamada galewa ne unai yona guguya taba ta haidi, kabo ta mauli.

¹⁰ Tamadao se bom yodi nuwatuwai guguya sahasahadi se kawanamwanamwaedi wa udiyedi se guguyaida huyakubwakubwa, na Yaubada ye guguyaida kita yoda namwa hesabana bena kabo yoda miyamiya maudoidi se namwa doha iya. ¹¹ Guguya nige ta henuwadi, matawuwuna udiyedi kamkamna. Na muliwai guguya ta udiyedi taumiya kabo gonowana laulaududulai yo nuwadaumwali udiyedi se miya.

¹² Unai nimamiu basabasadi yo kaemiu megwamegwadi kwa hebayaodi.

¹³ Na keda kwa ginaulihedudulaidi kaemiyao hesabadi. Unai kabo tamowai kaeyabayababadi unai se lau na taba nige se guli, na kabo namwanamwa se lobai.

Yaubada tautolodagedelaina kadi guguya

¹⁴ Maudoimiu kwa kaipate bena nuwadaumwali unai kwa miya tamowai maudoidi maidamiyao, yo yomi mauli udiyedi bena kwa a'a.** Ena nige kwa a'a, meta taba nige Guiyau kwa kita. ¹⁵ Kwa kitakitanamwanamwa to taba nige Yaubada yona kabina namwa kwa kabisapuli. Na kwa kitasipwa'uyoigomiu madai kwa hemala doha lamlam nisanisana na tamowai kwa woyasapulidi na ginauli yabayababadi se ginaulidi. ¹⁶ Kwa kitanamwanamwa tabu laulau bikibikidi kwa ginaginalidi, yo tabu kwa hemala doha Iso. Iya Yaubada ye lausuwalaei huyana taubaguna yona dudulai maudoina ye mosegabaei louguguba kesega hesabana.** ¹⁷ Kabina ta kata meta mulinawai ye henuwa bena taubaguna hededehe namwana ye hai, na yona nuwatu wa meta tamana nige ye kawanamwanamwaei. Na Iso tamana ye kaibwadao yo ye dou, na nige gonowana saha hesau ye ginauli'uyoi.**

¹⁸ Komiu nige kwa laoma kuduli mamohoina unai doha Isalaela tamowaidiyao huyana Yaubada laugagayo ye moseidi. Kuduli wa unai kaiwa kalakalasila, masigili yo yaumai lakilakikalilidi. ¹⁹ Komiu nige bwagigi dagugulakilakina yo kalina lakilakina kwa lapuidi doha Isalaela tamowaidiyao. Saha se lapuidi wa ye nuwamatamatausi ede se kaibwada bena tabu Yaubada ye hedehedede'uyo kalidiwai. ²⁰ Matawuwuna ede Yaubada yona hedehedede wa unai meta se matausikalili doha ye wane, "Tabu kwa laulau kuduli ne dedekanawai, yo ena suisui hesau ye lau kuduli ne unai meta hinage kwa lauwekui." (*Esodo 19:12-13*) ²¹ Yo Mose saha ye kita wa hinage ye matausikalili ede ye wane, "Ya matausikalili yo ya tabutabubu." (*Dutelonomi 9:19*)

²² Na komiu kwa laoma Saiyona Kudulina unai, iya ede Yelusalema galewa ne unai, Yaubada Maumaulina yona magari lakilakina. Yo kwa laoma anelu bodalakilaki nige gonowana ta hasilidi yodi gwauyala koigogona unai, ²³ yo kwa laoma Yaubada natunao taubaguna siya hesadiyao ye kulidiko galewa ne unai yodi kaihelahui koigogona unai. Yo kwa laoma Yaubada unai, iya ede tamowai maudoidi tauhekasadi, yo hinage tamowai dudulaidi yaluwadi yodi teha unai, siya ede Yaubada ye tolehedudulaimamohoiyeidiko. ²⁴ Yo kwa laoma Yesu iya talam hauhauna tauhaiyamana unai, yo hinage kwa laoma iya kwasinana ye didi hesabada wa unai. Na iya kwasinana meta namwanamwakalilina, na kabo Abela kwasinana.

²⁵ Kwa kitanamwanamwa tabu Yaubada kwa kawayagalaei. Iya ede ye hededelaowa kalimiuwai. Sinai kudulina unai Yaubada ye hededelau Isalaela tamowaidiyao udiyedi, na huyadi ne unai yona hedehedede wa nige se kawakabiyei, ede ye hekamkamnakaliliyeidi. Na galewa ne unai ye hedededobima kalidawai. Na ena yona hedehedede nige ta kawakabiyei, kabo ye hekamkamnakaliliyeda na kabo Isalaela tamowaidiyao kadi hekamkamna wa. ²⁶ Huyana ye hededelau Isalaela tamowaidiyao udiyedi meta

** **12:14:** Kwa a'a: Hedehedede tabu hededehe masalahana ku hasili. ** **12:16:** Iso wasana ne Genese 25:29-34 unai ku hasili. ** **12:17:** Iso yona dou wasana ku hasili Genese 27:30-40 unai.

kalinana tanoubu ta ye hetabutabubu. Na huya ta yona hededehesunuma meta ye wane, “Kabo ma kesega'uyo tanoubu ta ya hetabutabubu, nige tanoubu ta ye bom na galewa kabo hinage.” *(Hagai 2:6)* ²⁷ Teina hedehedede ta “ma kesega'uyo” ye hemasalaha'uyoi meta ginauli se tabutabubu, Yaubada kabo ye haigabaedi, siya ede tanoubu yo galewa ginaulidi yona hedehedede unai se tubu wa. Unai ginauli saha nige se tabutabubu kabo se miyahai.

²⁸ Basileiya ta hai ta nige gonowana ye tabutabubu, unai ede bena ta laoma Yaubada unai ma lautokida na ta kaihelahui ma hekasisida yo ma matamatausida, ²⁹ matawuwuna yoda Yaubada kana kao doha kaiwa kalakalasina.**

13

Hededehebaya gehegehena

¹ Bena kami kahao maiyamiyao kwa haigadosisi'uyoigomiu na kwa miya. ² Tabu kwa nuwaluluhi laolaoma bena kwa yogaisinidi. Teina laulau ta unai tamowai hekadi anelu se yogaisinidi, na nige kabidi se kata meta siya anelu. ³ Numatutugudu taumiyaide yo kaiteyadi se kabihenayaidi kwa nuwatuidi doha komiu maiyamiyao kwa kamkamna-gogoi.

⁴ Maudoimiu bena yomi tawasola kwa hekasisiyeidi, yo tabu kwa ganaganawali. Matawuwuna Yaubada tauganawali yo laulaubikibiki tamowaidi kabo ye hekamkam-nadi. ⁵ Moni tabu kwa gadosisikaliliyei, na saha kwa hai gonogonowamiu wa unai kwa miya, matawuwuna Yaubada ye hedede ye wane, “Yau taba nige ya laugabaego
yo taba nige ya nuwagabaego.” *(Dutelonomi 31:6)*

⁶ Unai gonowada ma nuwabayaoda ta wane, “Guiyau iya tausaguigau ede. Nige gonowana ya matausi.
Tamowai meta kabo saha se ginauli kaliguwai?” *(Same 118:6,7)*

⁷ Yomi tauwoyawoya bagubagunadi kwa nuwatuidi. Siya Yaubada yona hedehedede tauhedededi kalimiuwai ede. Yodi mauli kaniyodi kwa kitadiko na yodi sunuma miyamiyadi bena kwa laulauyedi. ⁸ Yesu Keliso meta kana kao kesekesegana, lahi, wau teina, malaitom yo ye lau huya nige kana siga.

⁹ Na tabu lauhekata udoi'udoide se woyahesuwalagomiu. Ye namwa mo taba Yaubada yona kabinamwa unai nuwamiu ye hebayaodi. Na kaihekahekasisi udoi'udoide nige gonowana namwa hesau se haiyama. ¹⁰ Kita meta yoda kabakaitalasam milana hesau,** na siya Logulogu Tabuna** unai tautabataba'ohu ne, siya nige yodi dudulai gonowana bena kaina se kai.**

¹¹ *Dius yodi kabikabi unai* taukaitalasam saesaena suisui kwasinadi ye bahelaedi teha tabukalikalilina unai bena ba'aya kaitalasamdi, na suisui yaude se laedi magari dagelanawai se gabudi. ¹² Doha hinage Yesu magari lakilakina ganana dagelanawai ye kamkamna yo ye boita bena kwasinana unai tamowai ye haidi Yaubada yona. ¹³ Na kita taba ta lau kalinawai magari dagelana ne unai, to saha taumwadimwadina ye bahei wa hinage bena ta bahei. ¹⁴ Matawuwuna teina tanoubu ta kita nige yoda magari, na yoda magari lakilakina ta nayanayai meta iya ede sola kabo ye laoma.

¹⁵ Yesu debanawai huya maudoina bena hedebasae kaitalasamna ta mosemosei Yaubada unai, na sopada ta unai Yesu hesana ta hededehehemasalaha. ¹⁶ Kabinamwa yo tamowai hekadi kaikainauyaidi hinage tabu nuwamiu se luluhidi. Teina kaitalasam

** **12:29:** Yaubada kana kao doha kaiwa kalakalasina: Hedehedede ta meta Dutelonomi 4:24 ye katai. ** **13:10:** Kabakaitalasam milana hesau kaniyona ede Yesu yona kaitalasam sataulo unai. ** **13:10:** Logulogu Tabuna meta Numa Tabuna heyahayasonina, iya ede Yelusalema unai. ** **13:10:** Nige yodi dudulai gonowana bena kaina se kai kaniyona ede Yesu yona kaitalasam sataulo unai nige namwana se lobai.

ta udiyedi Yaubada nuwana kwa henamwa. ¹⁷ Yomi tauwoyawoya kwa kawakabiyeidi yo yodi lolina gigibwalidi udiyedi kwa miya. Se kitahetetegomiu na saha se ginaulidi wa meta bena kabo se tolehemasalahadi Yaubada unai. Kwa kawakabiyeidi, kabo yodi paisowa unai nuwadi se namwa. Tabu nuwadiyao kwa heyababadi. Ena nuwadiyao kwa heyababadi meta taba nige se sagunamwanamwaeigomiu.

¹⁸ Yomai kwa tapwalolo. Kabina ka kata meta nige kama gilun, yo yoma gadosisi ede bena ginauli maudoidi udiyedi dudulai mo unai ka miya. ¹⁹ Na ya kaibwadalakilaki kalimiuwai ede bena yogu kwa tapwalolo to kabo ya lagemwamwayauwa kalimiuwai.

²⁰ Nuwatalu Yaubadana yoda Guiyau Yesu boita unai ye hetolo'uyoi. Kita iya yona mamoe na iya taukitaheteteda saesaena, yo iya kwasinana unai Yaubada talam miyamiyahaina ye hemamohoiyei. ²¹ Na ka kaibwada Nuwatalu Yaubadana unai taba ginauli namwanamwadi maudoidi ye lediwa na udiyedi kabo yona nuwatu kwa ginauliwatanidi. Yo ginauli saha Yaubada nuwana se henamwa meta taba kalidawai ye ginaulidi Yesu Keliso debanawai. Lautoki yo hedebasae ta mosei Yesu Keliso unai ye lau huya nige kana siga. Mamohoi!

²² Kagu kahao, ya kaibwadaigomiu bena kwa lapulapuinaamwanamwa yogu hedede-hebayao ta unai, matawuwuna teina leta ta nige ye loha.

²³ Ya henuwa bena kabina kwa kata meta kada kaha Timoti numatutugudu unai se hepesayako. Ena ye lagemwamwayauma inai kabo maiyagu ka laowa ka kitagomiu.

²⁴ Yogu lautoki ye laowa yomi tauwoyawoya udiyedi yo hinage Yaubada yona tamowai maudoimiu kalimiuwai. Yo ekalesiya Italiya unai se laoma wa hinage yodi lautoki se hetamaliyawa kalimiuwai.

²⁵ Yaubada yona kabinamwa ye laowa maudoimiu kalimiuwai.

Yamesi Yamesi yona leta Buka ta hededehe masalahana

Buka ta taukulina ede Yamesi, iya Guiyau Yesu kana kaha hesau (Galatiya 1:19) yo hinage Yelusalema unai dubu kadi tanuwaga hesau (Apostolo 15, Galatiya 2:1-13). Yamesi leta ta ye kuli ye lau Yesu Keliso tausunumaena kalidiwai. Siya ede Dius tamowaidi kadi bodao na se haimiyamiyaidi basileiya udoi'udoi udiyedi (Yamesi 1:1).

Yamesi yona kulikuli kubwakubwana ta unai meta Yesu tausunumaena miyamiya namwanamwadi udiyedi ye hekatadi (Yamesi 2:1–5:6). Yo hinage yona nuwatu ye kulihemasalaha meta bena tamowai yodi sunuma se hemamohoiyeidi yodi paipaisowa udiyedi (Yamesi 1:19-27). Yo hededehe bayao ye tole ekalesiya udiyedi bena se tolobayao pilipili udiyedi yo yodi ekalesiya miyamiyadi udiyedi bena se kitahetete'uyoidi (Yamesi 5:7-20).

Buka ta hedehedena lakilakidi

- Lautoki 1:1
- Sunuma yo sibasiba maolina 1:2-18
- Yaubada yona hedehedede bena ta lapui yo ta ginauliwatanidi 1:19-27
- Tabu taugogogogo ta gadosisihinelidi 2:1-13
- Sunuma bena kabikabi udiyedi ye masalaha 2:14-26
- Sibasiba yo hedehedede 3:1-18
- Tabu tanoubu yabayababana ta maiyada ta kawakeha 4:1–5:6
- Nayatautaubiga, kabinamwa, yo tapwalolo 5:7-20

Lautoki

¹ Yau Yamesi, Yaubada yo yoda Guiyau Yesu Keliso yodi heyayai tauhaina. Ya kulikulilaowa komiu Yesu Keliso tausunumaena kalimiuwai. Komiu boda Isalaela saudoudoi-labui wa kadi bodao na kwa haimiyamiyaigomiu basileiya udoi'udoi udiyedi: Ya lautokiyeigomiu.

Laukita udiyedi bena ta tolobayao

² Kehaguwao, huyana laukita udoi'udoi kwa hekalodi, bena ma gwauyalamiu na kwa haidi. ³ Matawuwuna kabina kwa kata meta yomi sunuma lautonogina ne kabo ye hetolobayaogomiu. ⁴ Ena huya maudoina yomi kabatolo unai kwa tolokesegai kabo nuwamiu se bayao yo komiu kabo kwa namwakalili, yo taba nige ginauli hesau unai kwa deha. ⁵ Ena hesau sibasiba unai ye deha, taba ye kaibwada Yaubada unai, na iya kabo ye kainauyai. Yaubada kabo taukaibwada maudoidi ye kainauyaidi ma nuwakohihaina, na nige ye kitaheyababadi. ⁶ Na taukaibwada ne bena ye sunuma, na tabu ye nuwalabulabui. Matawuwuna kaiteya ye nuwalabulabui, iya kana kao kabo doha bagodu gabwa unai yaumai ye towa na ye bahesaei yo ye bahedobiyeyi. ⁷ Tenem tamowaina ne tabu yona nuwatu bena kabo Guiyau unai ginauli saha hesau ye lobai. ⁸ Iya meta nuwalabulabui tamowaina na nuwana ne ye haihaikabi, unai nige gonowana yona hineli ye ginauli.

Tausunuma tamowaina dobidobina yo gogo tamowaina

⁹ Tausunuma tamowaina dobidobina bena ye gwauyala, matawuwuna Yaubada matana ne unai ye saekalili. ¹⁰ Na tausunuma iya gogo tamowaina bena ye gwauyala, matawuwuna Yaubada ye toledobiyeiyako. Iya hinage kabo ye boita doha pasa se wowoya yo se gehe. ¹¹ Mamohoikalili, mahana kabo ye dalasae na gigibwalina ne unai pasa wa ye sinaidi, na laladi se wowoya yo kadi kao namwanamwadi se tauwadam.

Gonogonwana doha gogo tamowaina ne. Yona paisowa udiyedi ginauli maudoidi ye lobaidi wa maiyanao kabo se tauwadam.

¹² Kaiteya laukita luwanawai na ye tolobayao meta gonowana ye gwauyala, matawuwuna huyana laukita ne ye saedikwai, iya kabo mauli kolonana** ye hai. Mauli ne Yaubada ye hededehe sunumayako taugadosisiyeina udiyedi.

¹³ Huyana laukita kwa hekalo meta tabu kwa wane, “Yaubada ye laukitagau.” Kaniyona ede Yaubada ye namwakalili na laulau yabayababadi nige gonowana iya se laukita, yo Yaubada taba nige tamowai hesau laulau yabayababadi udiyedi ye laukita. ¹⁴ Na ena tamowai hesau laukita ye hekalo meta iya ye bom yona gadosisi yabayababadi se woyaei ede yababa hesabana. ¹⁵ Yo huyana yona gadosisi yabayababadi wa se tubu meta kabo se labalaba, ede yababa. Na yababa ne ye kinilakilaki na ye labalaba, ede boita.

¹⁶ Kehaguwao, tabu kwa lupu'uyoigomiu! ¹⁷ Yaubada, iya Galewa maladi tauhetubudi wa, iya kalinawai meta kainauya namwanamwakalilidi mo se dobidobima. Na iya nige gonowana kana kao ye bui doha ginauli hesau mahana ye sinai na tautauna ne ye buibui. [*Yaubada meta nige doha tenem.*] ¹⁸ Yona hineli ye ginauliyako meta yona hedehedede mamohoina unai kabo mauli hauhauna ye leyama kalidawai. Ede ginauli maudoidi ye hetubudi wa luwadiyena kita meta ye kaisunuwaida ta hemala kaniyo bagubagunadiyao.**

Yaubada yona hedehedede lapuina yo ginauliwatanina

¹⁹ Kehaguwao, bena kabina kwa kata meta tamowai maudoidi taba yodi lapulapui se sarena, na yodi hedehedede yo yodi kouyalayala bena se pahili. ²⁰ Matawuwuna ena tamowai ye kouyalayala, taba nige gonowana laulau dudulaidi Yaubada ye henuwadi ne ye ginaulidi. ²¹ Unai laulau yabayababadi yo nuwatu bikibikidi maudoidi luwamiu ne udiyedi kwa hekaiyawasidi. Yo ma nuwadobidobimiu Yaubada yona hedehedede kwa hai yo kwa sunumaei. Hedehedede wa iya ede Yaubada ye toleyako nuwamiu ne unai na gonowana ye hemaugomiu.

²² Na tabu Yaubada yona hedehedede ne kwa lapulapuimoei, na unai kwa bom kwa lupohaigomiu. Na saha ye hedede ne bena kwa ginauliwatani. ²³ Kaiteya hedehedede ne ye lapuimoei na nige ye ginauliwatani, iya kana kao doha tamowai hesau galasi unai kana kao ye kitasipwanamwanamwaei, ²⁴ na mulinawai ye laugabaei, na nige bayaona kabo kana kao ye kita'usei wa ye nuwaluluhiyei. ²⁵ Yaubada laugagayo hesau ye leyamako kalidawai, iya ede wasa namwanamwana, na unai meta yailihai ta hai. Ena tamowai hesau wasa namwanamwana ta hedehedede udiyedi ye lapulapulau-namwanamwa yo ye nuwanuwatuidi na saha ye lapuidi wa nige ye nuwaluluhiyeidi, na ye ginaginauliwatanidi, meta iya gonowana ye gwauyala yona laulau ne debadiyena.

²⁶ Ena tamowai hesau ye hedede meta iya tapwalolo kabikabidi ye ginauliwatanidi, na nige gonowana memenana ye kitahetetenamwanamwaei, kabo unai ye bom ye lupu'uyoi, na yona tapwalolo kabikabidi ne meta nige kaniyodi. ²⁷ Tapwalolo kabikabina Yaubada Tamada ye kitahenamwa meta ye a'a yo unai nige yababa, kabikabina ede teina: Bena wawayao dabudabuledi yo wabuwabu ta kitahetetedi yodi deha udiyedi, yo tanoubu yababana maudoidi udiyedi ta tolehesuwalada.

2

Gadosisihineli hedehededen

** **1:12:** Kolona ne meta tauheloikailakwa ye baguna kabo kolona se kainauyaei. ** **1:18:** Kaniyo bagubagunadiyao: Dius kalidiwai meta ena yodi koya kaidi se suna yo se nonohako, kabo kai se haibagunaei ne tupwana se mosei Yaubada unai. Yo hinage yodi suisui natudiyao bagubagunadi kabo se kaitalasamyeyidi Yaubada unai. Kai yo suisui se mosegabaeidi ta hesadi ede kaniyo bagubagunadi, na siya meta Yaubada yona (Lewitikasi 23:9-14 yo Dutelonomi 26:1-11).

¹ Kehaguwao, kita ede yoda Guiyau saesaena Yesu Keliso tausunumaena, unai tabu tamowai kwa kitakitahinelidi. ² Doha taba tamowai hesau ye laoma yomi koigogo unai na lin gole nimana unai yo kaleko namwanamwana ye likwa, yo tamowai hesau dehadehana kaleko beyabeyana ye likwa na hinage ye laoma, ³ kabo saha kwa ginauli? Nuwana nuwamiu ne kabo se lau tamowai kaleko namwanamwana ye likwa ne unai na kwa wane, “Ku laoma inai, kabatuli namwanamwana ta unai ku tuli”. Na kwa hededelau tamowai dehadehana wa unai kwa wane, “Metai ku totolo”, o kwa wane, “Ku tulidobi matu ne unai kaegu ne dedekanawai.” ⁴ Ena taba doha teina kwa ginauli meta tamowai kwa kitahinelidi na kwa hemala tauhekasa nuwatu yabayababadi udiyedi.

⁵ Kehaguwao, kwa lapulapui: Tanoubu tamowaidi matadiwai tamowai dehadehadi meta Yaubada ye kaisunuwaidi bena kabo yodi sunuma se namwakalili, yo Yaubada yona basileiya kabo siya yodi, iya ede yona basileiya ye hededehe sunumayako taugadosisiyeina udiyedi. ⁶ Na iyamo tamowai dehadehadiyao wa kwa hedededobidobiyeidi. Na tamowai gogogogodi ne, siya ede taukabihenayaigomiu yo kabo se laegomiu kwa lauhetala. ⁷ Siya meta kami tanuwaga Yesu hesana saesaena se hededeheyababa. [*Idohagi na yomi kabi se namwa kalidiwai na taudehadeha kwa kitagabaeidi?*]

⁸ Kulikuli tabuna unai laugagayo saesaekalilina se kuliyo se wane, “Helem taumiya ku gadosisiyei doha ku bom ku gadosisi'uyoigo.” (*Lewitikasi 19:18*) Ena komiu mamohoi laugagayo ne kwa miyawatani meta yomi laulau ne se dudulai. ⁹ Na ena tamowai kwa gadosisihinelidi meta kwa ba'aya, yo laugagayo ye hemasalahagomiu ede komiu laugagayo tau'utusidi. ¹⁰ Matawuwuna ede kaiteya laugagayo maudoidi ne ye miyawatanidi, na kesega ye utusi, meta ye hemala laugagayo maudoidi ne tau'utusidi. ¹¹ Yaubada ye wane, “Tabu ku ganawali”, yo hinage ye wane, “Tabu ku kaiunu”. Na ena kowa nige ku ganawali, na ku kaiunu, kowa meta laugagayo tau'utusidi.

¹² Yaubada laugagayo hesau ye leyamako kalidawai, [*iya ede wasa namwanamwana,*] na unai meta yailihai ta hai. Na laugagayona ne unai kabo ye tolehekasagomiu, unai yomi hedehedede yo yomi laulau taba kwa sibasibaidi. ¹³ Matawuwuna ede, ena tamowai hesau yona hali tamowai nige ye katekamkamnaei, kabo hekasa mayadaina ne unai Yaubada hinage tamowai ne taba nige ye katekamkamnaei, [*na ye hekamkamna*]. Na ena yoda hali tamowai ta katekamkamnaei, meta hekasa mayadaina ne unai taba nige hekamkamna ta hekalu.**

Sunuma miyahemasalahana

¹⁴ Kehaguwao, ena tamowai hesau ye hedede bena iya tausunuma, na nige sunuma miyamiyana ye miyawatani, kabo yona namwa ede saha? Sunuma nige paipaisowana ne kabo gonowana unai mauli ye lobai? ¹⁵ Doha taba kam kaha o loum hesau nige yona kaleko yo hinage mayadai kesega kesega nige kana kai, ¹⁶ na ku hededelau iya unai ku wane, “Ku lau ma nuwadaumwalim! Taba taum ne se gigibwali yo bogam ne ye sese!”, iyamo nige saha hesau ku ginauli tauna ne hesabana, kabo yona namwanamwa ede saha? ¹⁷ Teina meta doha sunuma ye bom. Ena yoda sunuma na unai nige paisowana hesau ta ginauli, meta nige kaniyona.

¹⁸ Ena tamowai hesau ye hededelaoma kaliguwai ye wane, “Tamowai hesau meta sunuma kalinawai, na hesau meta miyamiyana kalinawai,” kabo ya hededelau unai ya wane, “Yogu sunuma ya hekitago yogu paipaisowa ne udiyedi. Na idohagi kabo yom sunuma na unai nige paipaisowana ne ku hekitagau?” ¹⁹ Ku kawamamohoi meta Yaubada ne kesega mo. Ye namwa! Teina hedehedede ta unai hinage yaluwa yabayababadi se kawamamohoi, na se tabutabubu yo se matausikalili. [*Iyamo Yaubada yona nuwatu nige se ginauli.*]

** **2:13:** Na ena yoda hali tamowai ta katekamkamnaei, meta hekasa mayadaina ne unai taba nige hekamkamna ta hekalu: Teina hedehedede ta kalina Giliki unai Yamesi ye kulihekubwa, Katekamkamna meta hekilaino ye saedikwai.

²⁰ Tamowai yauyaulena, kabo ya hemasalaha kalimwai sunuma nige paipaisowana unai meta nige gonowana ye hemaulida. ²¹ Kada mumuga Abelahama natuna Isako ye kainauyaei kabakaitalasam milana unai, na yona kabikabi wa debanawai Yaubada ye hededehehemasalaha meta iya tamowai dudulaina. ²² Taba ku nuwatulobai meta Abelahama yona sunuma yo yona kabikabi se paipaisowakesega, na yona kabikabi wa unai yona sunuma ye hemamohoiyei. ²³ Yo saha se kuli buka tabuna unai meta ye hemamohoiyei, doha ye wane,

“Abelahama Yaubada ye sunumaei, unai Yaubada ye hededehehemasalaha meta iya tamowai dudulaina,” *(Genese 15:6)*

yo ye kawakehaei.** ²⁴ Taba kwa nuwatulobai meta Yaubada nige tamowai yona sunuma ye bom mo na hinage yona kabikabi udiyedi ye kitahedudulai.

²⁵ Gonogonowana doha hinage Lahaba, iya waihiu tauna ye lokulokunegabaei moni hesabana. Iya meta taukaikewasipwa ye tolewadamdi yona numa unai, na kabo teha hesau unai ye hetamalidi se lau.** Na yona kabikabi wa debanawai Yaubada ye hededehehemasalaha meta iya waihiu dudulaina. ²⁶ Ena tamowai hesau tauna nige mauli yahuwana unai meta iya mwalomwaloina, hinage gonogonowana doha sunuma unai nige paipaisowana meta sunuma ne mwalomwaloina.

3

Memena hemanasana hedehehedena

¹ Kehaguwao, taba nige maudoimiu kwa hemala taulauhekata dubu udiyedi. Matawuwuna kabina kwa kata meta kai taulauhekata Yaubada kabo yoma miyamiya ye kitasipwaikaliliyeidi na kabo tamowai hekadi. ² Kita maudoida ba'aya udoi'udoi udiyedi ta beku. Ena tamowai hesau yona hedehehedede maudoidi udiyedi nige ba'aya hesau ye hedede meta iya tamowai dudulaina na gonowana tauna maudoina ne ye kitahettedi.

³ Ena hosi kabaheyaisiyeina** ta tole kawana ne unai, na unai hosi ne ta heyaisiyei, kabo ye kawakabi. Teina kabaheyaisiyeina ta meta ginauli gagilina, na unai kabo hosi ne yona kabalau maudoina unai gonowana ta kitahetete. ⁴ Yo hage, wagakuke lakilakidi ta haidi se hemala yoda kabakita. Se lakikalili yo yaumai bayabayaona kabo ye baheidi se lau. Iyamo kana heyaisi gagilina ne unai kabo tauheyaisi ne ye bui haedi yona nuwatu ne unai, kabo ye lauwatani. ⁵ Gonogonowana doha memena. Ye gagilikalili tauda ta unai, iyamo kabo gonowana nuwasaesae hedehehededi ye hedede yo ye ginaulidi. Doha hinage kaiwa ginahana gagilina unai nukula lakilakina gonowana kabo ye kalasi. ⁶ Memena ne meta doha kaiwa ginahana. Iya meta ye gagilikalili yauda ta udiyedi, na iyamo gonowana yababa lakilakidi ye ginaulidi. Tamowai yona nuwanuwatu maudoina yo yona mauli maudoina gonowana ye heyababadi, na memena yona paisowayababa ne wuwuna ede diyabolo.

⁷ Tamowai gonowadi suisui kadi kao udoi'udoi, doha yada manuwadi, yo bwatano yo gabwa suisuidi se hemanasadi, ⁸ na memenadi meta nige gonowana se hemanasadi. Memena ne iya yababa tauginaginalina, iya nige yona kabakaiyawasi, yo kaikaile-walakilaki meta kalinawai ye mwayau.

⁹ Na memenada ta unai meta yoda Guiyau yo Tamada ta hedebasae, yo memenada kesegana ta unai tamowai ta hedeheheyababadi. Na siya meta Yaubada kana kao unai ye ginaulidi. ¹⁰ Kawa kesega ne unai hedebasae yo hedeheheyababa se pesama. Kehaguwao, tabu teina doha kwa ginaginali! ¹¹ Taba mamohoi gonowana waila namwanamwana yo waila kalikalitana bonobonowasi kesega unai se didipesama?

** **2:23:** Kawakeha hedehehedena meta Aisaiya 41:8 ye katai. ** **2:25:** Lahaba wasana ku hasili Yosuwu 2:1-15

unai. ** **3:3:** Hosi kabaheyaisiyeina meta pawati gagilina tehana hosi ne kawana unai se hekapuhekahini na isu labui ne udiyedi ne meta mainadi, unai kabo hosi ne se heyaisiyei.

¹² Kehaguwao, nige gonowana bosibosi kaiwana unai olibe kaniyona ye tole, yo wine kaiwana unai taba nige bosibosi kaniyona ye tole. Na doha hinage kalita bonobonowasina unai taba nige waila namwanamwana ye didipesa.

Sibasiba Yaubada unai ye laoma

¹³ Ena luwamiu ne unai tamowai hesau ye sibasiba, bena yona sibasiba ne ye hemasalaha yona miyamiya namwanamwana unai, na kabikabi ne meta nuwadobidobiyena ye ginaulidi. Na nuwadobidobi ne yona kabalaoma ede sibasiba.

¹⁴ Na ena komiu nuwamiu ne udiyedi kaikalomagigili yabayababakalilina yo kwa bom kwa nuwatu'uyoigomiu, tabu kwa hededetausae'uyoigomiu bena kwa sibasiba, yo hedehedede mamohoina tabu kwa uha'uhalaei. ¹⁵ Sibasiba doha teina ne meta nige galewa ne unai ye laoma, na tamowai yodi nuwanuwatu mo udiyedi. Iya nige Yaluwa Tabuna unai ye laoma, na yona kabalaoma ede diyabolo. ¹⁶ Ena kaikalomagigili nuwamiu ne udiyedi yo kwa bom kwa nuwatu'uyoigomiu, meta hinage kawayagala yo laulau yabayababadi kadi kao udoi'udoide kalimiuwai.

¹⁷ Na ena tamowai yodi sibasiba ne Yaubada unai ye laoma, kabo tamowai ne yodi laulau meta se a'akalili. Nuwadaumwali unai se miya, yo tamowai hekadi gadosisidi nuwanuwatuna kalidiwai. Siya meta gonowana se kawakabi yo se lapulapui, yo tamowai katekamkamnaedi yo haisagusagu meta kalidiwai. Siya nige tamowai se gadosisihinelidi, yo nige se kaokaolupolupo. ¹⁸ Na tauhenuhenuwadaumwali, siya nuwadaumwali se ginauli tamowai luwadiyena. Kana kao ede doha like se kumaidi, na se kinilakilaki, kabo se kaniyo. Na kaniyodi ede laulau dudulaidi ne.

4

Kwa uyo Yaubada yona gigibwali logulogunaena

¹ Na lulu yo haikawayagala luwamiu ne udiyedi meta yodi kabalaoma ede haedi? Yodi kabalaoma ede nuwamiu ne udiyedi kami henuhenuwa yabayababadi, se kaipatekalili bena taba se tanuwagaigomiu. ² Saha kwa henuwadi ne meta nige gonowana kwa haidi. Kwa kaikaiunu yo kwa kaikalomagigili, na yomi henuhenuwa ne nige kwa lobaidi. Maidamiyao kwa haikawayagala yo kwa lulu. Saha kwa henuwadi wa meta nige gonowana kwa haidi, matawuwuna ede nige kwa kaibwada Yaubada unai. ³ Na ena kwa kaibwada Yaubada unai, meta yomi kaibwada ne nige kaniyodi, matawuwuna ede yomi kaibwada ne nuwanuwatudi meta nige se dudulai. Kaniyona ede bena kabo kwa hepaisowadi komiu kwa bom yomi namwa hesabadi.

⁴ Doha tauganaganawali mwanena nige ye hekasisiyei, gonogonowana doha komiu hinage Yaubada nige kwa hekasisiyei. Bena kabina kwa kata, ena tanoubu kwa kawakehai, meta Yaubada hekasisina nige kalimiuwai. Unai kaiteya tanoubu ta ye kawakehai, iya meta Yaubada kana waiunu. ⁵ Tabu yomi nuwatu bena kulikuli tabuna yona hedehedede ne nige kaniyona, doha ye wane, “Yaluwa Tabuna, iya Yaubada ye hetamaliyama kalidawai ye miya ne meta kita ye gadosisikaliliyeida, na ye nuwanuwatukalili ena taba Yaubada ta laugabaei na tanoubu ta ta kawakehai.”

⁶ Yo hinage ye henuwakalili bena yona kabinamwa unai ye saguida, unai ede kulikuli tabuna yona hedehedede hesau ye wane,

“Yaubada taunuwasaesae ye hekaiyawasidi,

na taunuwadobidobi kabo yona kabi se namwa kalidiwai.” *(Hededesonosonoga 3:34)*

⁷ Debanaena bena kwa uyo Yaubada yona gigibwali logulogunaena, na diyabolo [yona laukita] kwa laukwatakwataidi, kabo ye wasabugabaeigomiu. ⁸ Bena kwa sigilau Yaubada kalinawai, na kabo iya hinage ye laowa kalimiuwai. Ya hedede-laowa komiu tamowai yabayababadi kalimiuwai, bena yomi laulau yabayababadi

kwa hekaiyawasidi,** yo ya hededelaowa komiu taunuwalabulabui kalimiuwai, bena nuwamiu ne kwa he'a'adi. ⁹ [Yomi ba'aya ne debadiwai meta] bena kwa nuwayababa, kwa nuwadubu, yo kwa dou. Yomi maluhi ne kwa hekaiyawasi na kwa nuwadubu, yo taba nige kwa gwaunya, na kwa nuwakamkamna. ¹⁰ Bena kwa nuwadobidobi Guiyau matana ne unai, na iya kabo ye kitahetausaegomiu.

¹¹ Kehaguwao, tabu kami kaha hesau kwa hededeheyaheyababa. Ena tamowai hesau kana kaha ye hededeheyaheyababa o ye kitahekasa, iya hinage Yaubada yona laugagayo** ye hededeheyaheyababa yo ye kitahekasa. Na ena laugagayo kwa kitahekasa, meta nige kwa hemuliwatani, na kwa hemala laugagayo tauhekasana. ¹² Iyamo laugagayo tautolena yo tauhekasana kesega mo, na iya gonowana kabo ye hemauida yo ye heyababada. Na kowa kaiteya to kam kaha ne bena ku hekasa?

Yoda koitalaliu bena ta ginauli nuwadobidobiyena

¹³ Bena kwa lapulapui, kaiteyadi komiu kwa hedede kwa wane, “Wau teina e malaitom kabo ta lau magai lakilakina hesau unai. Na menai ta miya bolimai kesega, na yoda kune paisowana ta ginauli na yoda moni ta helaki.” ¹⁴ Idohagi na kabina kwa kata meta malaitom kabo saha ye tubu? Yo yomi mauli ne kana kao kabo doha saha? Kana kao ede doha madagau ye taumasalaha huyakubwakubwa na kabo ye tauwadam. ¹⁵ Unai taba kwa wane, “Ena Guiyau yona nuwatu unai, meta kabo ta miya na yoda paisowa ne ta ginaulidi.” ¹⁶ Na komiu meta kwa bom yomi nuwanuwatu udiyedi kwa hededsaesae. Na hededsaesae mauidi doha tenem meta se yababakalili.

¹⁷ Unai, ena kaiteya ye nuwatulobaiyako meta laulau namwanamwadi saha bena ye ginaulidi, na iyamo nige ye ginaulidi, iya meta ye ba'aya.

5

Taugogogogo taupaisowa se kabihenayaidi kadi hededehebasiba

¹ Komiu tamowai gogogodiyao, kwa lapulapui! Kwa dou na kwa doulakilaki, matawuwuna kamkamna kabo kwa hekalodi. ² Yomi wasawasa gogodi ne se pwasako, yo yomi kaleko yane se kaidiko. ³ Yomi gole yo siluba wa se masiko. Masidiyao ne kabo se hegilogomiu Yaubada matanawai.** Kwa gwaugogoidi na se masi ne debadiwai Yaubada kabo ye heyababagomiu kana kao doha kaiwa kalakalasinai unai taumi ne ye gabudi. Matawuwuna saha to huya mulimulitana ta unai meta yomi wasawasa gogodi ne kwa tolehesuwaladi kwa bom yomi namwanamwa hesabadi? ⁴ Saha kwa ginauli wa bena kwa kitasipwai! Yomi koya unai witi taubolina nige kwa hemauidi. Na maisadi nige kwa moseidi wa meta se doudouhemasalahagomiu Yaubada matanawai. Yo witi tauboliboli wa yodi dou meta ye sae Guiyau Gigibwalikalilina ye lapui. ⁵ Tanoubu ta yona wasawasa yo yona gwaunyaigaibu udiyedi kwa miya. Komiu kwa bom nuwamiyao yodi gadosisi kwa hemuliwatanidi na kwa haidi. Na kami kao ede doha suisui ye kaikai mo na yona boita mayadaina meta nige ye nuwanuwatui. ⁶ Tamowai yodi miyamiya namwanamwadi kwa hekasadi na kwa laeidi kwa koihemwaloidi, na siya meta nige se laukwatakwata.

Kamkamna ta hai ma nuwabigada

** **4:8:** Yomi laulau yabayababadi kwa hekaiyawasidi: Hedehede ta Yamesi heyaheyasoni hesau unai ye kuli kalina Giliki unai, iya ede, Nimamiu kwa deulidi. ** **4:11:** Yaubada yona laugagayo meta taba heleda taumiya ta gadosisiyeidi (Yamesi 2:8). ** **5:3:** Masidiyao ne kabo se hegilogomiu Yaubada matanawai: Kadi gilumatawuwuna ede yodi gole yo siluba ne nige se hepaisowadi tamowai yodi namwanamwa hesabadi.

⁷ Kehaguwao, Guiyau yona uyoma mayadaina bena kwa nayanayatautaubigai. Koya taupaisowaina kwa nuwatuidi. Yaiulu nabuna yo yaikini nabuna se nayatautaubigaidi,** ye lau ee kana siga yodi koya kaidi namwanamwadi ne se suna. ⁸ Gonogonowana doha komiu hinage bena kwa nayatautaubiga na yomi sunuma udiyedi bena kwa tolobayao, matawuwuna Guiyau yona huyalaoma ede ye hana-hanaoma. ⁹ Kehaguwao, tabu kwa haigadigadigugu'uyoigomiu, kaniyona ede Guiyau kabo ye kitahekasagomiu meta kami gilul. Na Tauhekasa yona laoma mayadaina meta ye hanahanaomako na iya ede keda kawamatana ne unai ye totolo.

¹⁰ Kehaguwao, peloweta kwa haidi se hemala yomi kabakita. Siya Guiyau hesanaena se hededepeloweta, iyamo tamowai se tolo ede se kabihenayaidi, na hekamkamna ne se haidi meta ma nuwataludi. ¹¹ Kabina kwa katako meta sunuma unai tautolobayao ta kawanamwanamwaedi ta wane, siya gonowana se gwauyala. Yobi wasana kwa lapuiyako, idohagi ye tolobayao yona sunuma unai, yo idohagi yona kamkamna gehena ne unai Yaubada ginauli namwanamwadi ye kainauya'uyoidi. Guiyau meta gadosisi yo katekamkamna Guiyauna.

¹² Kehaguwao, ginauli saesaekalilina ede teina: Tabu kwa hededekaigwala galewa, o tanoubu, o ginauli hesau hesadiwai. Bena kwa hedededudulai! Ena kwa wane, "Nige" meta nige, na ena "mamohoi" meta mamohoi. Na ena yomi hedehedede ne nige mamohoidi, Yaubada kabo ye heyababagomiu.

Tapwalolo taukasiebwa hesabadi

¹³ Ena luwamiu ne unai hesau pilipili ye hekalo, iya bena ye tapwalolo. Na ena hesau ye gwauyala, iya taba hedebasae wanadi ye wanadi. ¹⁴ Na ena luwamiu ne unai hesau ye kasiyebwa, iya taba dubu babadadiyao ye kaibwadaidi na yona se tapwalolo yo bunama unai se heyausi Guiyau hesanawai. ¹⁵ Na ena babadao wa taukasiebwa ne yona se tapwalolo, na se sunuma meta Yaubada iya kabo tamowai ne ye henamwanamwa, kabo ye namwanamwa. Guiyau kabo tamowai ne tauna ye hebayaodi na yona namwanamwa maudoina ye hai'uyoidi. Na ena yona ba'aya, Yaubada kabo ye nuwatugabaei. ¹⁶ Unai bena ma kami kahao yomi ba'aya kwa haihed-edehemahemasalaha'uyoigomiu, yo kami kahao yodi kwa tapwalolo yo hinage yomiu se tapwalolo. Ena doha teina kwa ginauli, Yaubada kabo ye henamwanamwagomiu. Laulaududulai tamowaina yona tapwalolo meta ma bayaona na unai gonowana sagu ta lobai.

¹⁷ Yoda kabakita meta Eliya. Iya meta tamowai doha kita, na ye tapwalolo ma nuwakohihaina bena taba tabu nabu ye talutalu. Ede nabu nige ye talu Isalaela yodi tano kewanawai bolimai haiyona yo tehana. ¹⁸ Na ye tapwalolo'uyo, ede Yaubada nabu ye hetalu'uyoi tano wa kewanawai, yo koya kaidi kaniyodi se tole'uyoidi.

¹⁹ Kehaguwao, ena luwamiuyena kami kaha hesau Yaubada yona hedehedede mamohoina ta unai ye tausuwala, na kami kaha hesau tamowai ne ye woya'uyoiyama, ²⁰ bena nuwamiu ne ye lau teina hedehedede ta kwa nuwatui: Kaiteya ba'aya tamowaina hesau yona laupwano unai ye woya'uyoiyama, meta iya boita unai ye gililai, na saha ye ginauli ne debanawai Yaubada kabo ba'aya tamowaina ne yona ba'aya maudoidi ye nuwatugabaedi.

** 5:7: Yaiulu nabuna yo yaikini nabuna se nayatautaubigaidi: Isalaela tamowaidi witi tumana se hesuludi yaiulu huyana unai, iya ede Nowemba, na nabuna ne unai kabo se hetubu se kini. Na yaikini nabuna unai kabo witi se kinilakilaki na kaniyodi se toledi. Na kabo kaniyodi ne yodi huyasuna unai se henuwa taba mahamahana huyana. Kabo se suna yo se pogi, na kabo taupaisowa se laoma se bolidi, iya ede Eipulu yo Mei udiyedi.

1 Petelo

Petelo yona leta bagubagunana

Buka ta hededehehemasalahana

Teina leta ta Petelo ye kuli nuwana bolimai 63 AD unai, huyana Loma magaina lakilakina unai ye miyamiya (1 Petelo 5:13), na ye hetamali ye lau Yesu tausunumaena teha Pontasi, Galatiya, Kapadosiya, Eisiya yo Bitiniya udiyedi (1 Petelo 1:1-2). Teina tehadi ta siya ede yoda huya ta unai meta Teki basileiyana unai teha bwauli yo yalasi unai. Na ekalesiya ne, siya nige Dius udiyedi se laoma, na dagela tamowaidi udiyedi (1 Petelo 1:14,18). Na yodi kabamiya wa udiyedi tamowai maudoidi meta nige Yaubada se sunumaei na koitau udoi'udoi se tabataba'ohuidi.

Teina leta ta unai, Petelo ekalesiya kaona mamohoina ye hededehehemasalahana, iya ede, yoda ekalesiya wuwuna ede Yesu Keliso ye ginauli, huyana ba'aya debanaena na ye boita sataulo wa unai. Na kabo Petelo ye wane, yodi miyamiya bena se namwakalili kadi kao hauhauna ne debanaena, mayadai namwanamwadi udiyedi yo hinage huyana hewahewaiunu yo hekamkamna se hekalodi sunuma debanaena.

Buka ta hedehedena lakilakidi

- Lautoki yo tapwalolo *1:1-2*
- Tausunuma yodi mididi wuwuna *1:3-12*
- Yaubada tausunumaena yodi miyamiya *1:13–2:17*
- Hekamkamna Keliso ye hekalodi wa, siya meta yoda kabakita *2:18-25*
- Ekalesiya se kamkamna *3:1–4:19*
- Dubu yodi tauwoyawoya kadi hededehehebasiba *5:1-11*
- Lautoki *5:12-14*

Lautoki

¹ Yau Petelo, Yesu Keliso yona apostolo. Teina leta ta ya kuli ye laowa komiu Yaubada yona kaisunuwa tamowaidi kalimiuwai. Komiu kwa haimiyamiyaigomiu doha laolaoma teha Pontasi, Galatiya, Kapadosiya, Eisiya yo Bitiniya udiyedi.

² Yaubada Tamada huyabagubaguna unai ye nuwatunonohaiyako meta komiu yona kaisunuwa tamowaidi, ede Yaluwa Tabuna ye tolehesuwalagomiu bena Yesu Keliso kwa kawakabiyeyi, na iya kwasinana unai ye lausibusibuyeyigomiu.**

Yomiu ya tapwalolo meta Yaubada yona kabinamwa yo yona nuwadaumwali kabo ye helakidi kalimiuwai.

Yaubada tausunumaena yodi kabamidi

³ Yaubada yoda Guiyau Yesu Keliso Tamana ta hedebasaei! Iya yona katekamkamna lakilakina debanawai ye labasi'uyoida na Yesu Keliso yona boita tolo'uyona debanawai ta kawamamohoi meta saha Yaubada ye hededeheheheheunumaeida wa kabo ye ledima kalidawai. ⁴ Unai kabina ta kata saha Yaubada ye kabinonohai yoda, galewa ne unai meta taba nige ye tauwadam, ye yababa, o ye beyabeya. ⁵ Kita Yesu tausunumaena yoda sunuma debanawai, Yaubada yona gigibwali unai ye kitaheteteda ye lau ee kana siga kabihemauli ta hai. Iya ede Yaubada ye kabinonohaiyako na mayadai gehegehena ne unai kabo ye hemasalahana. ⁶ Unai ede gonowana kwa gwaualalalalaki, na iyamo huyakubwakubwa unai kwa kamkamna laukita udoi'udoi ta udiyedi. ⁷ Teina laukita udoi'udoi kwa hekalodi ta meta unai yomi sunuma kabahemamohoiyena. Gole kwa

** **1:2:** Yesu Keliso ... iya kwasinana unai ye lausibusibuyeyigomiu: Teina hedehedede ta meta heyaheyasoni, na teina kabikabi ta ta lobai Esodo 24 unai, huyana Yaubada yona talam ye ginauli Isalaela tamowaidiyao udiyedi. Kaniyona ede Yesu sataulo unai ye boita na kwasinana yona didi ne unai kabihemauli ta lobai na Yaubada ye haida ta hemala yona tamowai mamohoidi.

nuwatui! Kaiwa kalakalasina unai se gabuhe'a'a. Na gonogonowana doha Yaubada yomi sunuma ye lautonogi laukita udoi'udoi ta udiyedi. Na ena kwa tolokesegai meta yomi sunuma ye saekalili na kabo gole. Gole kabo ye tauwadam, na komiu yomi sunuma udiyedi tautolokesegai meta Yesu Keliso yona huyataumasalaha mayadaina ne unai kabo hedebasae, didiga yo hekasisi kwa haidi Yaubada unai.

⁸ Komiu iya sola nige kwa kita, na iyamo kwa gadosisiyei. Yo teina huya ta unai nige gonowana iya kwa kita, na iyamo kwa sunumaei, na kwa gwauyalakalili. Iya ede gwauyala namwanamwakalilina nige gonowana kabo ta hedeheedei. ⁹ Matawuwuna komiu yomi sunuma kaniyona kabo kwa hai, iya ede yaluwamiu kabihemaulina ne.

¹⁰ Teina kabihemauli ta nuwanuwatuna unai, ede peloweta huya bagubagunadi wa udiyedi se wasetautaubigai bena taba kabina se kata. Yo hinage se hedede peloweta meta Yaubada kabo kabinamwa lakilakina ye haiyawa kalimiuwai. ¹¹ Keliso Yaluwana meta iya ede peloweta wa kalidiwai, na ye hemasalaha kalidiwai kabo idohagi Keliso ye kamkamna na kabo mulinawai Yaubada ginauli saesaekalilidi ye ginaulidi iya kalinawai. Unai ede se kaipatekalili bena huyana yo idohagi kabo se tubu ne se lobaidi. ¹² Na Yaubada peloweta wa ye hekatadi meta teina ginauli saesaekalilidi ta nige siya hesabadi, na komiu hesabamiu. Na teina huya ta unai wasa namwanamwana taulauguguyaena teina ginaulidi ta se hedede hemasalaha diko kalimiuwai. Paisowa ta se ginauli Yaluwa Tabuna yona gigibwali unai, iya ede Yaubada galewa unai ye hetamaliyama wa. Teina ginaulidi ta meta anelu se henuwakalili bena kabidi se kata.

Yaubada tausunumaena yodi miyamiya

¹³ Tenem unai kwa kabinonohai'uyoigomiu meta yomi nuwanuwatu bena se dudu-laikalili, na yomi midi kwa tolekesegaidi meta Yaubada yona kabinamwa kabo kwa haidi, huyana Yesu Keliso yona taumasalahama ne unai. ¹⁴ Komiu Yaubada kwa kawakabiyei doha wawayao tamadiyao se kawakabiyeidi, tabu kwa uyo'uyo yomi henuhenuwa yabayababadi wa udiyedi. Siya ede Yaubada yona hedeheede mamohoidi nige kabidi kwa kata wa. ¹⁵ Na yomi laulau maudoidi bena se tabukalili, matawuwuna ede tauyoganeigomiu meta iya tabuna. ¹⁶ Doha kulikuli tabuna unai ye wane,

“Bena kwa tabu, matawuwuna yau tabuna”

(Lewitikasi 19:2).

¹⁷ Yaubada tamowai nige ye hekasisigaibui, na maudoidi yodi laulau udiyedi kabo ye hekasadi. Iya kwa katai Tamamiu. Unai yomi miyamiya tanoubu ta unai doha laolaoma ne meta Yaubada taba kwa hekasisikaliliyei. ¹⁸ Yomi miyamiya bagubagunadi kami kulutubu udiyedi kwa haidi wa nige kaniyodi. Na kabina kwa kata meta tenem miyamiya ne udiyedi Yaubada ye hemaisahaigomiuko nige ginauli tautaukwadalelediyao doha siluba o gole udiyedi, ¹⁹ na Yesu Keliso kwasinana saesaekalilina unai. Iya meta mamoe natuna nige gilulu yo yababa hesau kalinawai. ²⁰ Huyana sola tanoubu ta nige ye tubu wa unai, Yaubada iya ye kaisunuwaiyako meta iya kabo Keliso, iyamo ye hemasalaha huya mulimulitadi ta udiyedi komiu hesabamiu. ²¹ Yesu debanawai komiu Yaubada kwa sunumaei. Iya Keliso ye hetolo'uyoi boita unai, yo gigibwali yo didiga ye moseidi iya unai, to yomi sunuma yo yomi midi kwa toledi Yaubada unai.

²² Komiu nuwamiu kwa he'a'adiko mamohoina kawakabina unai, na gonowana kami kahao kwa gadosisimamohoiyedi. Unai bena kwa haigadosisi'uyoigomiu ma nuwa'a'amiu yo ma nuwakohihaimiu. ²³ Matawuwuna labasi'uyo kwa haiyako, na taulabasi'uyoigomiu ne, iya nige gonowana ye boita yo ye pwasa, na iya meta miyamiyahaina. Labasi'uyo ta yomi kabahaina ede Yaubada yona hedeheede mau-
maulina yo miyamiyahaina unai. ²⁴ Doha kulikuli tabuna unai ye wane,

Tamowai maudoidi kadi kao doha lagau,

yodi namwa maudoidi doha pasa koya udiyedi.

Lagau wa ye wowoya,

yo pasa lalana wa se ulu.

²⁵ Na Guiyau yona hedehedede mo ye miya ye lau nige kana siga. (Aisaiya 40:6-8)
Na teina hedehedede ta se guguyaeyako kalimiuwai.

2

¹ Tenem debanawai komiu taba laulau yabayababadi, laulaulupolupo yo kaolupolupo yo kaikalomagigili yo hededeheyababa maudoidi kwa tolehesuwaladi.
² Na doha wawayao labahauhaudi susu se henuwakaliliyei, gonogonowana doha komiu bena Yaubada yona hedehedede mamohoina kwa henuwakaliliyei, na unai kabo kwa matuwa yomi sunuma udiyedi, ³ matawuwuna Guiyau yona kabi namwanamwadi kwa haidiko.

Weku miyamiyahaina yo Yaubada yona kaisunuwa tamowaidi

⁴ Komiu kwa laoma Yesu unai, iya ede weku maumaulina. Tamowai se subu, na Yaubada iya ye kaisunuwaei yo kalinawai meta ye saekalili.

⁵ Na komiu hinage weku maumaulidi. Yaubada ye haigomiu na yona numa ye ginauli. Yo hinage kwa hemala iya yona taukaitalagam mamohoidi, na yomi kaitalagam ede Yaluwa Tabuna ye nonohaidi na Yaubada ye kawanamwanamwaeidi Yesu Keliso debanawai. ⁶ Doha kulikuli tabuna unai ye wane,

“Kwa kita, weku ya tole Saiyona unai,
iya kabakabinuma wekuna kaikaisunuwana yo saesaekalilina,
na kaiteya iya ye sunumaei kabo taba nige nuwana ye yababa.” (Aisaiya 28:16)

⁷ Na komiu teina weku ta tausunumaena meta iya ye saekalili kalimiuwai. Na siya nige tausunumaena meta kadi hedehedede doha teina:

“Teina weku ta taukabinuma se laukwatakwataei'usei wa meta
ye hemala kabakabinuma wekuna namwanamwana yo saesaekalilina”, (Same
118:22)

⁸ yo hinage,
“ye hemala tamowai yodi kabakalabesibesi
na unai se beku.” (Aisaiya 8:14)

Se kalabesibesi matawuwuna Yaubada wasana se kawayagalaei, doha saha Yaubada ye hineliyako hesabadi wa.

⁹ Na komiu meta Yaubada yona kaisunuwa tamowaidi bodana. Yo komiu hinage yona taukaitalagam mamohoidi, na iya meta wasawasa saesaena. Yo komiu hinage yona basileiya tamowaidi yo ye haigomiu yona tamowai. Unai Yaubada yona laulau namwanamwadi bena kwa hededehemasalahadi. Iya ye yogahepesagomiu masigili luwanaena na kwa laoma iya dawayana namwanamwana ne unai. ¹⁰ Huya bagubagunana unai komiu meta nige boda kesega, na teina huya ta unai komiu meta Yaubada yona tamowai bodana. Yo huya bagubagunana unai nige Yaubada yona katekamkamna unai kwa miya, na teina huya ta Yaubada yona katekamkamna wa kwa haidiko.

¹¹ Kehaguwao, komiu meta laolaoma na tanoubu ta nige yomi magai mamohoina. Ya hededebayao kalimiu yena bena nuwanuwatu yabayababadi udiyedi kwa tolehesuwala'uyoigomiu, matawuwuna siya meta yaluwamiu ne se hewaiunudi. ¹² Na komiu dagela tamowaidiyao luwadiyena kwa miyamiya, na se hegilugomiu bena yomi laulau ne nige se dudulai. Na iyamo komiu bena miyamiya namwanamwadi udiyedi kwa miya, na kabo unai yomi laulau namwanamwadi ne bena se kitadi na Yaubada se hededetausae huyana ye taumasalaha yona hekasa mayadaina ne unai.

Tanutanuwigao kawakabidi

¹³ Guiyau debanawai tanoubu ta unai kami tanutanuwagao maudoidi bena kwa kawakabiyeidi. Bagubagunana ede wasawasa iya tanuwaga saesaekalilina, ¹⁴ yo

hinage yona gabana bena kwa kawakabiyeidi. Siya taukitakitahetete saesaediyao wasawasa wa ye kaisunuwaidi bena yababa tauginaulidi se hekamkamnadi yo namwa tauginaulidi se hededehehenamwadi. ¹⁵ Yaubada ye henuwa bena miyamiya namwanamwadi kwa miyawatanidi na udiyedi Yaubada nige kabina taukata kabo kwa hekaiyawasidi na nige gonowana se hededeheyababagomiu.

¹⁶ Yaubada ye yailihaigomiuko, unai bena kwa miya doha yailihai tamowaidi, na tabu yomi yailihai miyamiyadi ne kwa haidi se hemala yomi kabatolo na laulau yabayababadi kwa ginaginaulidi. Na kwa miya doha Yaubada yona heyayai tauhaidi.

¹⁷ Tamowai maudoidi kwa hekasisiyeidi, yo ekalesiya bodana kwa gadosisiyeidi, na Yaubada kwa hekasisiyei ma matamatausimiu, yo yomi wasawasa kwa hekasisiyei.

Heyayai tauhaidi kadi hedehedede

¹⁸ Komiu heyayai tauhaidi, kami tanutanuwagao siya ede yodi miyamiya se namwa yo se dudulai, yo hinage siya kaiteyadi yodi laulau se yababa ne, bena kwa kawakabiyeidi ma hekasisimiu. ¹⁹ Ena tamowai hesau Yaubada yona nuwatu ginauliwatanina debanawai na kana tanuwaga unai hekamkamna ye hai na ye hekalakasikasini kamkamna ne unai, meta Yaubada iya kabo ye kitahenamwa. ²⁰ Ena yababa ku ginauli na unai hekamkamna ku hai na ku hekalakasikasinigo meta Yaubada taba nige ye kitahenamwago. Na ena laulau dudulaidi ku ginaulidi na unai hekamkamna ku lobai na ku hekalakasikasinigo meta Yaubada kabo ye kitahenamwago.

²¹ Yaubada ye yoganeigomiu bena kwa kamkamna. Matawuwuna ede Keliso ye kamkamna komiu hesabamiu, na yomi kabakita ye tole bena kwa hemuliwatani. [*Doha kulikuli tabuna unai ye wane,*]

²² “Iya nige yababa hesau ye ginauli,

yo nige hededelupolupo hesau kawana ne unai ye pesama.” *(Aisaiya 53:9)*

²³ Huyana iya se hededeheyababa meta nige saha hesau ye hedede kalidiwai, yo huyana ye kamkamna meta nige ye hededehemahematausidi. Na yona sunuma mo ye tole Yaubada unai, iya tamowai yona kitahekasadi meta se dudulaikalili. ²⁴ Huyana ye boita sataulo unai meta yoda ba'aya kamkamnana ye bom ye bahei tauna ne unai. Tenem unai kita bena ba'aya ta hekaiyawasidi na miyamiya dudulaidi ta miyawatanidi. Iya kana gai udiyedi meta henamwanamwa kwa lobaidi. ²⁵ Komiu kami kao doha mamoe gegegedi. Na teina huya ta kwa uyomako taukitahetetegomiu yo yaluwamiu tauwoyaidi wa unai.

3

Maitawasola kadi hedehedede

¹⁻² Gonogonowana doha komiu sinesineo maitawasola mwanemiyao bena kwa kawakabiyeidi. Nuwana hekadiyo meta Yaubada yona hedehedede nige se kawamamohoiyei, na yomi laulau namwanamwadi yo a'adi yo hinage Yaubada yomi hekasisiyeina miyamiyadi se kitadi. Nige bena yomi hedehedede, na yomi miyamiya wa udiyedi kabo nuwadi se buidi.

³ Kami kao namwanamwadi tabu kwa hemasalahadi taumi kadi leli ne udiyedi, siya ede doha kulumiu heiheidi yo taumi kabahepasadi gole unai se ginaulidi, yo yomi kaleko namwanamwadi ne. ⁴ Na kami kao namwanamwadi bena nuwamiu miyamiyadi udiyedi se laoma. Siya ede nuwatalu yo nuwadaumwali miyamiyadi. Teina leli ta taba nige se taukwadalele na Yaubada matanaena se saekalili.

⁵ Gonogonowana doha huya bagubagunana unai sinesineo Yaubada tausunumaena wa teina leli ta udiyedi se miya yo se mose'uyoidi mwanediyao udiyedi. ⁶ Sala kwa hai ye hemala yomi kabakita. Iya mwanena Abelahama ye kawakabiyei yo ye kawaguiyauyei. Ena saha kwa ginaulidi ne se dudulai na udiyedi nige kwa matausi, meta komiu kabo kwa hemala iya natunao.

⁷ Komiu tatao maitawasola hinage, laulau kesekesegana ne unai mwanemiyao bena kwa kabinamwanamwaeidi, matawuwuna siya meta se basabasa. Yo kwa hekasisiyeidi, matawuwuna siya maiyamiyao Yaubada yona kabihemauli ta kabo kwa hai. Ena doha teina kwa ginauli, taba nige saha hesau yomi tapwalolo ne se guduguidi.

Kamkamna laulau namwanamwadi debadiwai

⁸ Na teina ya hededelaowa komiu maudoimiu kalimiuwai: Taba bena kwa nuwake-sega, kami kaha kwa katekamkamnaei na bena kwa sagui, kwa haigadosisi'uyoigomiu, kabinamwa yo nuwadobidobi udiyedi kwa miya. ⁹ Ena tamowai se heyababagomiu, tabu kwa haigum. Ena se hededeheyababagomiu, komiu tabu kwa hededeheyababadi, na bena kwa hededehenamwadi, matawuwuna Yaubada ye yoganeigomiu bena hededehenamwa kalinawai kwa haidi.

¹⁰ Doha kulikuli tabuna unai ye wane,

“Ena kaiteya yona mauli ye gadosisiyei yo ye henuwa bena mayadai namwanamwadi ye kitadi,
meta tabu hedehedede yabayababadi yo lupolupodi ye hedehededeidi.

¹¹ Na iya bena laulau yabayababadi ye hekaiyawasidi na laulau namwanamwadi mo ye ginaginaulidi.

Yo iya bena nuwadaumwali ye wasenei yo ye kaipatekalili bena unai ye miya.

¹² Na Guiyau kabo laulaududulai tauginaginaulidi meta ye kitahetetedi yo ye lapulau yodi tapwalolo udiyedi.

Na Guiyau kabo laulau yabayababadi tauginaginaulidi meta ye kitagabaedi.” *(Same 34:12-16)*

¹³ Ena kwa henuwakalili bena laulau namwanamwadi kwa ginaulidi, kabo nige gonowana tamowai hesau ye heyababagomiu. ¹⁴ Iyamo, ena laulaududulai debadiwai kwa kamkamna, kabo gonowana kwa gwauyala. Na

“yodi hededehematausi udiyedi tabu kwa matausi yo tabu kwa nuwanuwatulau udiyedi.” *(Aisaiya 8:12)*

¹⁵ Na nuwamiu udiyedi bena kwa hemasalaha meta Keliso iya ede yomi Guiyau. Ena tamowai yomi sunuma kaniyona se henamaiyei, bena huya maudoina kwa nonohakalili na yodi hedehedede buidi kwa moseidi. Yomi hededebui ne udiyedi bena kawakeha namwanamwana yo hekasisi udiyedi kwa hedehedede ¹⁶ na kwa kaipate bena yomi nuwanuwatu se dudulai. Na ena tamowai yomi laulau dudulaidi Keliso unai ne se hededeheyababadi, kabo kabahegilugomiu ne udiyedi se bom se hemwadine'uyoidi. ¹⁷ Ena Yaubada yona nuwatuyena kwa kamkamna yomi laulau dudulaidi debadiwai meta ye namwa, na kabo yomi laulau yabayababadi debadiyena kwa kamkamna ne.

¹⁸ Keliso yoda ba'aya hesabadi ye kamkamna ma kesega mo. Iya ye dudulaikalili na tamowai maudoidi yodi laulau yabayababadi debadiyena ye boita. Na yona boita ne unai ye woyaigomiu kwa laoma Yaubada unai. Iya buluma unai ye boita na Yaubada Yaluwana unai ye mauli'uyo. ¹⁹ Na Yaluwa unai ye lau tauboiboita yaluwadi yodi magai unai na ye lauguguya kalidiyena.** ²⁰ Siya ede huya bagubagunana unai Nowa yona mayadai wa udiyedi tanoubu ta unai se miya na Yaubada se kawayagalaei. Na iya nige ye hekamkamnadi na ye nayatautaubiga kana siga Nowa ake wa ye ginaulihegehe. Na ake wa unai meta hisamo, siya ede taudi haligigi-haiyona (8), Yaubada ye gilihaidi waila wa unai.

** **3:19:** Lausoiso ta kulikulina meta ye kubwakalili kalina Giliki unai yo kaniyona nige ye masalaha. Petelo ye kuli ye wane, Yaluwa unai ye lau yaluyaluwa numatutuguduyena taumiya udiyedi ye lauguguya. Na tausonoga maudoidi yaluwa wa nige kabina se kata meta siya tamowai yaluwadi o yaluwa yabayababadi. Yo yodi kabamiya hinage nige ye masalaha, nuwana Yaubada siya haedi ye toledi? Yo hinage nige kabina se kata Yesu bena saha ye lauguguyaei udiyedi. Na lausoiso 19 yo 20 yoma nuwatulobaidi ede kewa ne unai ku hasili.

²¹ Teina waila ta babatiso ye heyaheyasoniyeyi. Na Yaubada komiu ye gilihaigomiu kabahebabatiso wailana ta unai. Teina kabahebabatiso wailana ta tauda ta bikidi nige ye deulihe'a'adi, na iya unai kabo Yaubada ta kaibwada meta yoda nuwanuwatu ye deulihe'a'adi Yesu Keliso yona tolo'uyo debanawai. ²² Iya ye saeko galewa yo temenai Yaubada nimatutuna unai ye tutuli. Yo anelu, tauloina yo gigibwali maudoidi yona gigibwaliyena se miyamiya.

4

Tausunuma yodi mauli miyamiyadi

¹ Keliso tauna unai ye kamkamna, unai ede komiu hinage yomi nuwahineli bena kwa ginaulidi doha Yesu ye ginauli wa yo kwa nonoha kabo hinage kwa kamkamna. Matawuwuna kaiteyadi taudi ne udiyedi se kamkamna Yesu Keliso yodi sunumaena debanawai, meta ba'aya yona gigibwali siya kalidiwai ye gehe. ² Kaniyona ede yodi mauli miyamiyadi tanoubu ta unai meta nige se henuwa bena laulau bikibikidi udiyedi se miya, na se henuwa bena Yaubada yona nuwatu mo se miyawatanidi. ³ Na komiu huya bagubagunana unai yomi huya kwa gabaedi laulau bikibikidi ta udiyedi doha dagela tamowaidi se miyamiyaedi wa. Siya ede laulau bikibikidi udoi'udo, nuwatu bikibikidi miyawatanidi, numayauyaule, gwauyala bikibikidi, yo koitau taba'ohuidi meta Yaubada ye subukaliliyeidi. ⁴ Kami kahao bagubagunadi se siliyata, matawuwuna ede komiu nige kwa patulau yodi laulau yo miyamiya bikibikidi wa udiyedi, ede se hededeheyababagomiu. ⁵ Unai kabo se hededehemasalaha'uyoidi Yaubada kalinawai. Iya meta ye nonohakalili kabo tamowai maumaulidi yo tauboiboita** ye hekasadi. ⁶ Tenem debanaena ede wasa namwanamwana se guguyaiyako yoda hali tausunuma se boitako wa udiyedi. Huyana siya sola ma maumaulidi tanoubu ta unai wasa ta se lapuiyako yo se haiyako na se boita doha tamowai maudoidi hinage kabo se boita. Iyamo siya hinage kabo Yaubada kalinawai mauli nige kana siga se hai.**

Yaubada yona kainauya hepahepaisowana

⁷ Na ginauli maudoidi tanoubu ta unai kadi siga ye hanahanaumako, unai ede bena kwa silasilawa yo nuwanuwatu dudulaidi udiyedi kwa miya, na unai gonowana kwa tapwalolo. ⁸ Ginauli saesaekalilina ede bena kwa haigadosisi'uyoigomiu ma nuwakohihaimiu, matawuwuna gadosisi meta gonowana yababa tamowai se ginaulidi kalidawai se bado ne ye tolehesuwaladi. ⁹ Na yogayogaisini laulaudi udiyedi kwa miya na tabu kwa hetahetalapili. ¹⁰ Na Yaubada yona kainauya kadi kao udoi'udo ye lediwako komiu tausunuma kalimiuwai. Bena kwa hepaisowanamwanamwaeidi na udiyedi bena kwa haisagusagu'uyoigomiu. ¹¹ Ena kaiteya lauguguya kainauyana kalinawai, bena Yaubada yona hedehedede udiyedi ye hedehedede. Kaiteya haisagusagu kainauyana kalinawai, bena Yaubada yona bayao ye mosei wa unai ye hepaisowa. Unai Yaubada kwa hedebasaei Yesu Keliso debanawai. Didiga yo gigibwali siya ede Yaubada kalinawai ye lau ee huya nige kana siga. Mamohoi!

Kamkamna Yesu sunumaena debanawai

¹² Kehaguwao, tabu kwa siliyata kamkamna lakilakidi kwa hekalodi ta udiyedi. Kana kao doha yababa hesau nige kwa nuwatui, iyamo ye tubu kalimiuwai. Na teina saha kwa lobaidi ta meta yomi sunuma kabalaukitana. ¹³ Na yomi kamkamna ne unai bena kwa gwauyala, matawuwuna ede kwa kamkamna gonogonowana doha Keliso ye kamkamna wa. Unai kabo kwa gwauyalakalili, huyana Keliso kana kao

** **4:5:** Tamowai maumaulidi yo tauboiboita meta Yesu yona huya'uyoma unai tamowai se silasilawa yo siya se boitako ne ye hetaladi. ** **4:6:** Teina lausoiso ta kaniyona nige ye masalahakalili kalina Giliki unai, na tausonoga yodi hededehehemasalaha udoi'udo, doha hekadi se wane bena Keliso ye lauguguya taumiya boita magaina unai kalidiwai.

saesaekalilina** ye hemasalaha yona huyataumasalahama ne unai. ¹⁴Ena tamowai se hededeheyaheyababagomiu Keliso yomi sunumaena ne debanawai, kabo gonowana kwa gwauyala, matawuwuna Yaubada Yaluwana didididigana meta iya ede kalimiuwai. ¹⁵Ena kwa kamkamna, meta tabu laulau yababana hesau debanawai, doha ede taukaikaiunu o taukaikaiwahali o laulau yabayababadi hekadi tauginaulidi o doha taumodemodegaibu. ¹⁶Na bena kwa kamkamna ne Yesu sunumaena debanawai, na tenem unai tabu kwa mwadine, na Yaubada kwa hedebasaei meta komiu Keliso yona tamowai. ¹⁷Matawuwuna huyana ye laomako na Yaubada ye hetubu tamowai ye hekasadi. Na Yaubada yona tamowai** udiyedi ye hetubu. Na ena kalidawai ye hetubu, siya Yaubada wasana namwanamwa taukawayagalaeina ne kadi kao kabo doha saha? ¹⁸[Doha kulikuli tabuna unai ye wane,]

“Ena taba tamowai yodi miyamiya dudulaidi na kabihemauli ta ye pilipili kalidiwai, siya kaiteyadi nige Yaubada tausunumaena yo ba'aya tauginaulidi ne meta kadi kao kabo doha saha?” *(Hededesonosonoga 11:31)*

¹⁹Unai kabo ta hedede doha teina: Yaubada iya ede yona hededehesunuma tauhemamohoiyeidi. Na siya kaiteyadi se kamkamna yona nuwatuyena, bena se mose'uyoidi iya tauginaulidi ne unai yo laulau namwanamwadi ginaulidi udiyedi se miyamiya.

5

Dubu babadadiyao yo ekalesiya kadi hedehedede

¹Yau helemiu dubu badana hesau, yo Keliso yona kamkamna wa taukitana hesauna, yo yona didiga yona masalaha ne unai yau hinage kabo maiyana. Unai ede ya hedede-bayao komiu dubu babadadiyao kalimiuwai: ²Bena Yaubada yona tamowai yomi dubu udiyedi kwa kitahetetenamwanamwaeidi. Bena kwa kitalau udiyedi, nige bena doha se lauheliligomiu na kwa paisowa, na yomi nuwatalam unai paisowa ta kwa ginauli. Iya ede saha Yaubada ye henuwa kalimiuwai. Na tabu yomi paisowa ta unai kwa bom yomi namwanamwa kwa wasenei, na bena kwa paisowa ma nuwakohihaimiu. ³Tabu bena kwa hemala tanuwaga sinasinakaladi, na bena yomi miyamiya namwanamwadi yomi dubu tamowaidi se kitadi na ye hemala yodi kabakita. ⁴Na huyana mamoe taukitahetetena saesaekalilina ye taumasalaha, meta kabo yomi kolona** didididigadi kwa haidi, na siya nige gonowana se taukwadalele.

⁵Na teina ta komiu saehau kami hedehedede: Bena yomi dubu babadadiyao kwa kawakabiyeidi. Na komiu maudoimiu bena nuwadobidobi unai kwa miya. Matawuwuna

“Yaubada taunuwasaesae ye hekaiyawasidi, na taunuwadobidobi kabo yona kabi se namwa kalidiwai.” *(Hededesonosonoga 3:34)*

⁶Tenem unai bena kwa nuwadobidobi Yaubada matanawai, na yona huya dudulaina unai kabo ye kabisinigomiu. ⁷Yomi nuwamodemode maudoidi kwa moseidi iya unai, matawuwuna iya gonowana kabo ye kitahetetegomiu.

⁸Bena kwa silisiliyata yo yomi nuwanuwatu se masalaha. Kami waiunu diyabolo kana kao doha laiyoni ye kalakalagaga, na ye sae yo ye dobi na ye kaikaikewa taba tamowai hesau ye lobai na ye unuhemwaloi. ⁹Na taba yona nuwatu maudoidi kwa laukwatakwataeidi na kwa tolobayao yomi sunuma udiyedi, matawuwuna kabina kwa kata meta helemiu tausunuma, siya ede kami kahao yo loumiyao tanoubu ta unai, meta kamkamna gonogonowana wa se hekalodi.

** **4:13:** Kana kao saesaekalilina hinage ta wane, yona didiga. ** **4:17:** Yaubada yona tamowai Petelo ye kuli Yaubada yona numa, iya ede Numa Tabuna na Yaubada yona tamowai heyaheyasonidi. ** **5:4:** Kolona ne meta tauheloikailakwa ye baguna kabo kolona se kainauyaei.

¹⁰ Na Yaubada iya kabinamwa maudoina tauleyamana, iya ye yoganeigomiu bena Keliso debanawai yona didiga nige kana siga ne unai komiu hinage kabo maiyamiu. Tenem unai yomi kamkamna huya kubwakubwana ta mulinawai Yaubada kabo ye hebayao'uyoigomiu na kabakabi bayabayaona unai ye hetologomiu na taba nige kwa sigisigi'usi. ¹¹ Gigibwali maudoina meta iya kalinawai ye lau ee huya nige kana siga. Mamohoi!

Hededelautoki gehegedi

¹² Na teina leta kubwakubwana ta Siluwanusi** ye saguigau na ya kuli. Iya meta kada kaha namwanamwana hesau. Na leta kubwakubwana ta ya kuli ye laowa kalimiuwai bena ya hededehebayaogomiu yo ya hededehemasalaha meta saha kwa hekalodi ta, iya ede Yaubada yona kabinamwa mamohoina. Na unai bena kwa tolokesegai. ¹³ Na dubu tamowaidi Babiloni** unai, siya hinage Yaubada yona kaisunuwa tamowaidi, na maiyadi natugu Maleko, meta yodi lautoki se hetamaliyawa kalimiuwai. ¹⁴ Komiu bena kwa hailaulautoki'uyoigomiu gadosisi mamohoina unai.** Na komiu Keliso tausunumaena maudoimiu bena nuwadaumwali kwa hai.

** **5:12:** Siluwanusi meta Sailasi hesana Loma kalinadi Latini unai. ** **5:13:** Babiloni: Tausonoga hekadi yodi nuwatu meta hesa Babiloni ta, iya Loma magaina lakilakina ye heyaheyasoniyei. ** **5:14:** Gadosisi mamohoina unai: Petelo ye kuli, gadosisi sumtana unai, na sumta meta ekalesiya yodi gadosisi hekihekinoina.

2 Petelo

Petelo yona leta helabuina

Buka ta hededehehemasalahana

Teina buka ta meta apostolo Petelo yona leta helabuina na ye lau yona leta bagubagunana tauhaina wa kalidiwai (2 Petelo 3:1, 1 Petelo 1:1-2). Ye kuli huyana iya Loma magaina lakilakina na numatutugudu unai na yona huyaboita ye hanahanaumako (2 Petelo 1:14). Bolimaina wa nuwana 65 AD.

Petelo iya Yaubada tausunumaena na saha Yaubada ye ginaulidi yodi wa unai kana kahao ye henuwaisinidi yo ye hededehebayaodi bena laulau dudulaina unai se miya. Ye hemamohoiyei meta Yesu wasana wa mamohoi. Petelo kabo tausunuma wa ye hededehebayaodi bena se kitanamwanamwakalili taulauhekatalupolupo kalidiwai, na tabu yodi lauhekata ne se lauwatanidi. Siya meta tamowai yabayababadi, unai Yaubada kabo ye hekamkamnadi (2 Petelo 2:3,9-22).

Petelo hinage ye kulihemasalaha ede Keliso yona huya'uyoma mayadaina ne meta mamohoi kabo ye laoma. Taulauhekatalupolupo wa se hedede mayadaina ne ye pahilikaliliko, iyamo Yaubada mayadaina ne ye tole'uyoi kaniyona ede bena tamowai yodi huya ye moseidi na se nuwabui (2 Petelo 3:1-13). Na ye hededelau tausunuma Keliso yona huya'uyoma taunayanayaeina wa udiyedi bena laulau dudulaina unai se miya, yo taba se kaipatebayao na Keliso kabina se katanamwanamwakalili (2 Petelo 3:14-18).

Buka ta hedehededena lakilakidi

- Lautoki yo tapwalolo 1:1-2
- Guiyau taumiyawatanina yodi mauli 1:3-15
- Peloweta yodi hedehedede se mamohoikalili 1:16-21
- Taulauhekata lupolupodi kabo kadi hekilaino se lobai 2:1-22
- Mamohoina, Guiyau kabo ye uyoma 3:1-18

Lautoki

¹ Yau Simiyona** Petelo, Guiyau Yesu Keliso yona heyayai tauhaina yo yona apostolo. Ya kulikulilaowa komiu yoda sunuma saesaena tauhaina kalimiuwai. Yomi sunuma ne gonogonowana ede doha hinage kai, na sunuma ta ta hai matawuwuna Yesu Keliso ye dudulaikalili, yo iya yoda Yaubada yo Tauhemaulida.

² [*Yomiu ya tapwalolo meta*] bena Yaubada yo yoda Guiyau Yesu kabidi kwa katanamwanamwakalili, na teina unai taba Yaubada yona kabinamwa yo yona nuwadaumwali kalimiuwai se laki se lau.

Bena ta hemamohoiyei meta Yaubada ye yoganeida yo ye kaisunuwaeida

³ Yaubada yona gigibwali saesaena unai ginauli maudoidi ye ledima kalidawai bena udiyedi ta maumauli na Yaubada yona nuwatu ta miyawatanidi. Doha teina ye ginauli, matawuwuna ede tauyoganeida meta kabina ta kata. Iya kana kao saesaena yo namwanamwana debadiwai ye yoganeida ta hemala yona tamowai. ⁴ Teina kana kao saesaena yo namwanamwana ta debadiwai yona hededehe sunuma namwanamwadi yo saesaekalilidi ye ledima, na udiyedi kabo gonowana gadosisi yabayababadi tamowai nuwadi ne udiyedi se laoma na tamowai se heyababadi ne kwa kaihaleidi na kwa hemala Yaubada yona nuwatu saesaedi tauginaginaulidi.

⁵ Na ginauli namwanamwadi Yaubada ye lediwa kalimiuwai wa debadiwai ede bena kwa kaipatebayao, nige bena yomi sunuma ye bom mo, na hinage yomi laulau

** **1:1:** Simiyona meta Petelo hesana bagubagunana (Mataiyu 4:18), na inai hesa ne ye katai kalina Hebelu unai. Hesa Simiyona kaniyona meta, Ye lapui. Giliki kalinadiyena se katai Simona.

namwanamwadi [*bena se masalaha*]. Na nige yomi laulau namwanamwadi se bom mo, na hinage Yaubada yona hineli nuwatulobaina [*bena ye masalaha*]. ⁶ Na nige nuwatu-lobai ye bom mo, na hinage bena kwa kitahetete'uyoigomiu. Na nige kitahetete'uyo ye bom mo, na hinage yomi sunuma unai bena kwa tolobayao. Na nige tolobayao ye bom mo, na hinage Yaubada yona nuwatu miyawatanina bena kalimiuwai. ⁷ Na nige Yaubada yona nuwatu miyawatanina ye bom mo, na hinage kami kahao gadosisidi bena ye masalaha kalimiuwai. Na nige kami kahao gadosisidi ye bom mo, na hinage tamowai maudoidi gadosisidi. ⁸ Ena teina laulau ta kwa haidi na ma nuwakohihaimiu udiyedi kwa miya, meta kabo yoda Guiyau Yesu Keliso kabina kwa katanamwanamwa na yomi sunuma kaniyodi kabo se masalaha. ⁹ Na ena tamowai hesau teina laulau ta nige ye haidi meta iya yaluwana unai yona kaikewa ne ye gaugau, na unai nuwana ye luluhi meta yona ba'aya ede Yaubada ye deuligabaediko.

¹⁰ Unai, kehaguwao, kwa kaipatebayao na yomi mauli udiyedi bena kwa miya-hemasalaha meta Yaubada ye yoganeigomiu yo ye kaisunuwaigomiu. Ena teina miyamiya ta kwa miyawatanidi, kabo taba nige kwa kalabesibesi. ¹¹ Na Yaubada kabo ye hailobaigomiu ma gwaugwayalana yoda Guiyau yo Tauhemaulida Yesu Keliso yona basileiya miyamiyahaina ne unai.

Petelo yona hedehenuwaisini

¹² Teina nuwanuwatu ta kabidi kwa katako yo Yaubada yona hedehedede mamohoina unai meta kwa tolobayaokalili. Iyamo huya maudoina teina nuwanuwatu ta udiyedi kabo ya henuhenuwaisinigomiu. ¹³ Na ya nuwatui meta ye dudulaikalili taba bulumaena ma miyamiyagu tanoubu ta unai na nuwanuwatu ta udiyedi ya henuhenuwaisinigomiu. ¹⁴ Matawuwuna kabina ya kata meta huyakubwakubwa unai kabo taugu ta ya laugabaei, doha yoda Guiyau Yesu Keliso saha ye hemasalaha hayako kaliguwai wa. ¹⁵ Unai ya kaipatebayaokalili bena ya hekatagomiu, na yogu huyalaugabaegomiu mulinawai kabo gonowana huya maudoina yogu lauhekata ta kwa nuwanuwatuidi.

Peloweta yodi hedehedede se mamohoikalili

¹⁶ Huyana yoda Guiyau Yesu Keliso yona gigibwali yo yona huya'uyoma hedehedede yomiu ka hedehedede wa, meta nige pilipilidai tamowai yodi sonoga udiyedi se ginaulidi wa ka hedehede. Na kai meta yoda Guiyau Yesu Keliso kana kao saesaena mamohoina wa taukitana yo tauhemamohoiyeina ede. ¹⁷⁻¹⁸ Na huyana kuduli tabuna** unai wa meta kai Yesu maiyamai na Yaubada kalinana ka lapui galewa ne unai ye dobima ye wane, "Teina yau Natugu ya gadosisiyei. Iya unai ya gwauyalalakili." Teina unai Yaubada Saesaekalilina Yesu ye hededetausaei yo kana kao saesaena mamohoina ye hemasalaha kalimaiyena.

¹⁹ Na saha kuduli ne unai ye tubu wa debanawai ede kabina ta kata meta peloweta yodi hedehedede wa se mamohoikalili. Na ye namwakalili bena kwa kitalau udiyedi, matawuwuna siya kadi kao doha mala ye dawadawaya masigililakilaki unai. Ye lau ee Mayadaina unai mala ye uyali na Sae Kubwana** ye dalasae na ye sina nuwamiu ne udiyedi. ²⁰ Na nuwanuwatu saesaena ede bena kabina kwa kata meta kulikuli tabuna unai peloweta saha se hededetole di wa meta nige kalidiwai se laoma. ²¹ Matawuwuna peloweta yodi hededetole ta meta nige tamowai yodi nuwanuwatu udiyedi se laoma. Na Yaluwa Tabuna yona woayaena ede Yaubada yona hedehedede se hededehemasalahadi.

** **1:17-18:** Yesu yona didiga ye hemasalaha wasana ede Maleko 9:7 unai ku hasili. meta Yesu Keliso heyahayasonina.

** **1:19:** Sae Kubwana

2

Taulauhekata lupolupodi hedehedededi

¹ Beyabeyana Isalaela tamowaidiyao luwadi ne udiyedi meta hinage peloweta lupolupodi, gonogonowana doha hinage komiu luwamiu ne udiyedi meta taulauhekata lupolupodi. Se hedede bena siya tausunuma, na yodi lauhekata ne udiyedi kabo tamowai se lupohaidi na yodi sunuma se heyababadi, yo hinage yoda Guiyau Sae-saekalilina, iya tauhemaisahaidi wa, se uhalaei. Na nige bayaona kabo Yaubada siya ye heyababadi. ² Tamowai ta kabo Yesu tausunumaena gwaudi se woyahesuwaladi na yodi laulau nuwamwadimwadinedi ne se lauwatanidi, na teina unai tamowai hekadi kabo miyamiya mamohoina wa se hededeheyaheyababa. ³ Teina taulauhekata lupolupodi ta huya maudoina se henuwa bena taba kadi yo yodi se bado, na yodi hededelupolupo udiyedi kabo yomi moni se lupohaidi. Na kadi hekamkamna meta beyabeyana Yaubada ye kabinonohaiyako na iya ede ye laolaoma hesabadi.

Yaubada yababa tauginaulidi ye heyababadi

⁴ Anelu se ba'aya wa meta Yaubada nige ye katekamkamnaedi na ye tolehesuwaladi na ye senidi duha masimasigilina unai. Na menai kabo se miyamiya ye lau ee hekasa mayadaina ye lage. ⁵ Hinage Yaubada tanoubu bagubagunana wa nige ye katekamkamnaedi na ye heyababa meta dibwali'utu'utu ye hetamaliyama ede Yaubada yona nuwatu nige taumiyawatanina maudoidi wa ye unuhemwaloidi. Na Nowa iya laulau dudulaina taulaulauguguyaina, debanawai ede maiyanao tamowai haligigi-labui ye gilihaidi.

⁶ Hinage magai lakilakidi Sodoma yo Gomola Yaubada ye heyababadi wa meta ye gabudi na se kalasi se lau ee kahusa gaibu. Teina ta meta Yaubada yona nuwatu nige taumiyawatanina wa yodi kabakitalobai. ⁷ Na Yaubada Lota ye gilihai. Iya laulau dudulaina tamowaina, na tamowai ta saha se ginaginaulidi wa ye kitadi meta nuwana nige ye namwa, matawuwuna ede tamowai meta Yaubada yona laugagayo nige se hemuliwatanidi, na laulau bikibikidiyao se ginaulidi. ⁸ Na teina tamowai dudulaina ta ye miya tamowai yabayababadi luwadi ne udiyedi. Siya meta Yaubada yona laugagayo nige se hemuliwatanidi, unai nuwana ye kamkamnakalili, matawuwuna ede mayadai badobado udiyedi yodi laulau yabayababadi wa ye kitadi yo wasadiyao ye lapulapuidi.

⁹ Teina ginaulidi ta se hekatada meta Yaubada kabina ye kata idohagi yona nuwatu taumiyawatanina yodi huyayababa udiyedi na ye gilihaidi. Yo kabina ye kata idohagi tamowai yabayababadi ye hekamkamnadi na ye kabihekahinidi ye lau ee kana siga hekasa mayadaina ye lage. ^{10a} Gonogonowana doha Yaubada kabo teina taulauhekata lupolupodi ta hinage ye heyababadi. Siya buluma yona nuwanuwatu yabayababadi mo se lauwatanidi na Yaubada yo tauloina tamowaidi maudoidi se subudi.

Taulauhekata lupolupodi hedehedededi hekadi

^{10b} Teina taulauhekata lupolupodi ta se nuwasaesaekalili yo se hededetausae'uyoidi, unai nige se matausi na galewa taumiyaidi se hededeheyaheyababadi. ¹¹ Na anelu meta se bayao yo se gigibwalikalili, na kabo teina taulauhekata lupolupodi ta. Iyamo anelu ne nige se henuwa bena galewa taumiyaidi ne se hededeheyaheyababadi Yaubada matanawai. ¹² Na tamowai ta meta galewa ginaulidi nige se nuwatulobaidi, na iyamo se hededeheyaheyababadi. Siya kadi kao ede doha suisui na saha se henuwa se ginauli meta se ginauli. Kabina ta kata meta suisui se labasidi na tanoubu ta unai se miya ye lau ee se koihemwaloidi. Na Yaubada kabo taulauhekata lupolupodi ta ye heyababadi doha suisui ne.

¹³ Yaubada kabo ye heyababadi yodi laulau yabayababadi debadiwai. Kalidiyena gwauyala kaniyona ede se numayauyaule yo se bom yodi nuwatu yabayababadi se ginauliwatanidi ne meta nige mwadinena hesau. Na yodi laulau yabayababadi ta udiyedi huyana maidamiyao kwa kaikaigogoi meta komiu Yesu tausunumaena se

hemwadinegomiyo yo yomi kaikaigogoi se heyababadi. ¹⁴ Na huya maudoina sinesineo se kitadi meta yodi nuwanuwatu ede taba se ganawali. Yodi laulau yabayababadi ne taba nige se hekaiyawasidi. Na ena Yesu tausunumaena hekadi yodi sunuma nige se bayaokalili, meta kabo se lupohaidi na se woyalaedi bena ba'aya se ginaulidi. Teina taulauhekata lupolupodi ta siya meta tamowai mahimahihikalilidiyao. Siya Yaubada yona heyababa luwanaena se miyamiya. ¹⁵ Yaubada yona laulau dudulaidi wa se laugabaeidi na Biyo natuna Balama yona laulau wa se lauwatani. Iya moni ye henuwakaliliyei, na yona nuwatu ede laulau yabayababana ginaulina ne unai kabo moni ye hai. ¹⁶ Na yona donki wa ye tolo ede Balama ye dilai na ye hededelau unai meta saha ye ginauli ne ye yababa. Kabina ta kata meta donki nige gonowana tamowai kalinana unai se hedehedede, na iyamo yona donki wa ye hededelau Balama unai, ede yona nuwatu yababana wa ye hekaiyawasi.**

¹⁷ Teina taulauhekata lupolupodi ta kadi kao ede doha bonobonowasi nige wailadi, yo doha yada nige nabudi, na yaumai bayabayaona ye towa ede ye yuhihesuwaladi. Yaubada meta teha masimasigilikalilina ye kabinonohaiyako siya hesabadi. ¹⁸ Yodi hedehedede dagugudi ne se namwakalili, na iyamo nige kaniyodi. Buluma yona gadosisi yabayababadi hedehedede se hepaisowadi na hedehedede ta udiyedi ede tausunumahauhau tamowaidiyao se nuwakoidi na se lupohaidi, siya ede lahinaidi miyamiya yabayababadi udiyedi taumiya tamowaidiyao se wasabugabaedi wa.

¹⁹ Na teina taulauhekata lupolupodi ta se hededelau tamowai udiyedi meta nige laugagayo hesau, na yodi lauhekata ta udiyedi kabo gonowana yailihai se lobai. Na iyamo siya meta laulau nuwanwadimwadinedi yodi heyayai tauhaidi. Tamowai ta nige gonowana yodi laulau yabayababadi wa se hekaiyawasidi, unai siya ede sola laulau yabayababadi wa yodi heyayai tauhaidi. ²⁰ Teina taulauhekatalupolupo ta meta lahinaidi tanoubu ta yona yababa maudoidi se laugabaediko na Yesu Keliso yoda Guiyau yo Tauhemaulida se sunumaei, iyamo se uyo ede yababa se laugabaediko wa se ginauli'uyoidi. Unai yodi yababa ta meta se lakikalili Yaubada matanawai, na kabo yodi yababa huya bagubagunana unai wa. ²¹ Ye namwa mo taba tabu Yaubada yona laulau dudulaina ta kabina se kata. Na kabina se katako, matawuwuna ede tamowai hekadi meta Yaubada yona hedehedede mamohoidi wa udiyedi se hekatadiko. Na iyamo Yaubada yona laugagayo namwanamwadi wa se tolehesuwaladi. ²² Teina hedehedede labui ta meta tamowai wa kadi kao mamohoidi se hemasalahadi, doha ta wane, “Kedewa ye uyo maliwaina ye kai'uyoi”, yo, “Puwaka ye duiko, na kabo ye uyo ede ye kwano'uyo.”

3

Guiyau yona mayadai

¹ Kehaguwao, teina ta yogu leta helabuina ya kuliyawa. Na leta labui ta udiyedi meta ya henuwaisinigomiyo yo nuwamiyo ya hebayaodi bena huya maudoina nuwanuwatu namwanamwadi ta kwa nuwanuwatuidi. ² Ya henuwagomiyo bena Yaubada yona peloweta yodi hedehedede huya bagubagunana udiyedi wa, yo hinage yoda Guiyau Tauhemaulida yona lauhekata ye moseidi yomi apostolo udiyedi wa kwa nuwanuwatuidi.

³ Na komiyo bena kabina kwa kata meta mayadai mulimulitadi ne udiyedi kabo tautalatalawasi se laoma. Yomi sunuma Yesu unai kabo se talatalawasiyei yo yodi henuhenuwa yabayababadi mo se laulauwatanidi. ⁴ Kabo se wane, “Yomi Guiyau yona uyoma ye hededehesunuma wa meta taba nige ye uyoma. Matawuwuna kada mumugao wa se boitako, na ginauli maudoidi tanoubu ta unai kadi kao meta nige se buidi. Kadi kao gonogonowadi mo doha huya bagubagunana tanoubu yona huyatubu

** 2:16: Balama yona donki wasana ede Numela 22:2-35 unai ku hasili.

wa unai na ye laoma teina yo ye lau ee huya nige kana siga.” ⁵ Na yodi hedehehede ne meta nige mamohoidi, matawuwuna saha kabidi ta kata ne nige se nuwatulobaidi. Kabina ta kata meta Yaubada yona hedehehede unai galewa ye tubu yo tanoubu ta waila unai ye ginauli na waila ne unai ye hepoesaeyama. ⁶ Na kabo waila wa ye hepaisowa ede tanoubu bagubagunana wa dibwali'utu'utu** unai ye heyababa. ⁷ Na Yaubada yona hedehehede kesegana ta unai kabo galewa** yo tanoubu ta se miya ye lau ee kana siga hekasa mayadaina. Tenem mayadaina ne unai Yaubada kabo kaiwa kalakalasina unai ye gabudi, yo tamowai yabayababadi maudoidi ye heyababadi.

⁸ Kehaguwao, teina ginauli saesaekalilina ta tabu nuwamiu ye luluhi: Mayadai kesega meta Guiyau kalinawai kana kao doha bolimai tausani, yo bolimai tausani kadi kao doha mayadai kesega. ⁹ Taba kabina kwa kata meta Guiyau yona uyoma hedehehesunumana unai ne nige ye pahili, doha tamowai hekadi yodi nuwanuwatu. Na iya ye taubigakalili kalimiuwai, nige ye henuwa bena tamowai hesau ye heyababa, na ye henuwa bena tamowai maudoidi nuwadi se buidi.

¹⁰ Na Guiyau yona uyoma ne kabo doha taukaiwahali. Na tenem mayadaina ne unai galewa ne kabo ye tauwadam ma dagugu lakilakina, yo Yaubada galewa ginaulidi maudoidi** kaiwa kalakalasina unai ye heyababadi. Na laulau maudoidi tamowai se ginaulidi tanoubu ta unai wa Yaubada kabo ye tolehemasalahadi.

¹¹ Doha tenem kabo Yaubada galewa ne yo tanoubu ta ye heyababadi, unai yoda miyamiya kadi kao ede kabo doha saha? Yoda miyamiya bena se a'a na kadi kao taba doha kita Yaubada natunao na yona nuwatu ta miyawatanidi, ¹² na ma gwauyalada yona uyoma mayadaina ne ta nayanayai, na ta kaipate taba yona laoma ne ta hesagena. Tenem mayadaina ne unai Yaubada kabo galewa ne kaiwa kalakalasina unai ye gabu na kaiwa kalakalasina gigibwalina ne unai galewa ginaulidi maudoidi kabo se kalawelo. ¹³ Na kita meta ta kitakitalau galewa yo tanoubu hauhaudi udiyedi. Siya ede Yaubada ye hedehehesunumaaidako, yo kabo se hemala laulau dudulaidi tauginaulidi yodi magai.

¹⁴ Kehaguwao, kabina ya kata meta komiu galewa yo tanoubu hauhaudi ne kwa nayanayaidi, unai kwa kaipatebayaokalili bena tabu ba'aya yo giluhesau kalimiuwai, na Yesu yona nuwadaumwaliyena kwa miya. ¹⁵ Taba kwa nuwatulobai meta Guiyau yona uyoma ne unai nige ye lelehi na ye taubigakalili, matawuwuna ye henuwa bena tamowai maudoidi nuwadi se buidi na se mauli. Teina nuwanuwatu ta hinage Yaubada yona hesonogaena na kada kaha Paulo ye kulidiwako kalimiuwai. ¹⁶ Teina nuwanuwatu ta kadi kao kesekesegadi na yona leta maudoidi udiyedi ye kulidi. Nuwanuwatudi hekadiyo yona leta udiyedi meta se pilipili, na tamowai hekadi supusupudi yo yodi sunuma nige se bayao meta Paulo yona hedehehede wa se tolebuidi, gonogonowana doha hinage hedehehede hekadiyo kulikuli tabudi udiyedi kaniyodi hinage se tolebuidi. Na tamowaidiyao ta Yaubada kabo ye heyababadi.

¹⁷ Kehaguwao, teina ta ya hededonohaiyako kalimiuwai: Kwa kitakitamwanamwa na laugagayo nige taumiyawatanina tamowaidi ne yodi lauhakata yabayababadi udiyedi taba tabu se lupohaigomiu na yomi kabatolo bayabayaona Keliso unai wa kwa sigisuwalaei.

¹⁸ Na yomi miyamiya udiyedi meta bena yoda Guiyau Tauhemaulida Yesu Keliso nuwana kwa henamwa. Unai kabo yona kabinamwa kalimiuwai ne ye helaki ye lau. Hinage taba kwa kaipate bena iya kabina kwa katakalili. Na teina huya ta unai ye lau ee nige kana siga meta yoda hedebasae maudoidi se lau iya unai. Mamohoi.

** **3:6:** Dibwali'utu'utu wasana ede Genese 6–9 udiyedi. Yo 2 Petelo 2:5 unai hinage Petelo ye katai. ** **3:7:** Galewa: Lausoiso ta unai hedehehede ta kaniyona ede, yadagaibu maudoina. ** **3:10:** Galewa ginaulidi maudoidi meta siya ede mahana, waikena yo kipwala maudoidi.

1 Yowane Yowane yona leta bagubagunana Buka ta hededehehemasalahana

Buka ta taukulina meta Yowane Sebedaiyo natuna (Maleko 1:19-20), iya ede Yesu yona hekahekatao wa hesau yo hinage Yesu wasana bukana hehasina (4) taukulina. Na teina leta ta huyakulina bolimaina tausonoga se kaimasiyei ede 85 yo 95 AD luwadiyena. Tenem huyana ne unai Yowane Epeso unai ye miya na iya ekalesiya yodi tauwoyawoya saesaena. Yowane ye kulikulilau teha Eisiya dubudiyao maudoidi udiyedi.

Yodi huya wa unai taulauhekatalupolupo se lulau ekalesiya bodadi luwadiyena na tamowai se nuwakoidi. Yowane ye hededehehemasalahadi meta

- (1) siya Yaubada yona hedehedede nige se kawakabiyeidi (1 Yowane 2:4-6, 3:4-6) yo yodi laulau nige se dudulai (1 Yowane 2:29, 3:3,6,8,10),
- (2) yodi hali ekalesiya nige se gadosisiyeidi (1 Yowane 3:14, 4:8) na se hewaiunudi (1 Yowane 2:9-11) yo se subudi (1 Yowane 3:15, 4:20-21),
- (3) nige se lapulau apostolo udiyedi (1 Yowane 4:6), yo
- (4) se hedede meta Yesu iya tamowai molosi, na iya nige Keliso (1 Yowane 2:22-23, 5:1,9-10) yo nige Yaubada Natuna (1 Yowane 4:15). Yo hinage se hedede meta Keliso, iya nige tamowai molosi, na iya meta yaluwa (1 Yowane 4:2-3), matawuwuna yodi nuwanuwatu ede yaluwa mo gonowana se namwa, na tauda ta se yababakalili.

Na Yowane ekalesiya ye hededehasahasaeidi bena tabu se lapulau taulauhekatalupolupo ne udiyedi, na bena se tolobayao sunuma ye hekatagabagunaediko wa unai. Yo hinage ekalesiya ye hededehehasibabadi bena se haigadogadosisi'uyoidi (1 Yowane 3:10-11,17,23 yo 4:11,21). Yaubada kana kao meta gadosisi (1 Yowane 4:8), unai gadosisi yona kabalaoma ede Yaubada (1 Yowane 4:7).

Na yona nuwatu saesaena ede ye hededehebayaodi meta Yesu ye gilihaidiko na mauli mamohoina ede siya yodi (1 Yowane 5:13).

Buka ta hedehededena lakilakidi

- Leta yona kabahedehedede: Mauli hedehededena 1:1-4
- Yaubada kabina taukata yodi miyamiya bena se namwa 1:5–2:17
- Yaubada natunao nige gonowana se ba'aya na se haigadogadosisi 2:18–3:24
- Taulauhekatalupolupo kabakitalobaidi meta Keliso 4:1–5:12
- Leta ta kabaguduna hedehedededi 5:13-21

Yowane Yesu ye hededehehemasalahana

¹ Teina kulikuli ta unai Yesu Keliso wasana ka kulihemasalahana kalimiuwai. Iya huya bagubagunana unai ye miya ye laoma ee teina, iya kalinana ka lapui, mata-maiyena iya ka kita, yona miyamiya ka kitadi, yo nimamaiyena iya ka kabitonogi. Iya meta Mauli Hedehededena.**

² Mauli wa ye laoma ye hemala tamowai na ka kita yo ka hemamohoiyei, yo mauli miyamiyahaina ta ka hededehehemasalahana kalimiuwai. Iya Tamana maiyana se miya, na ye masalahama kalimaiyena. ³ Saha ka kita yo ka lapui wa ka hededehehemasalahadi kalimiuwai kaniyona ede ka henuwa bena komiu yo kai ta hebodakesega. Na yoda hebodakesega ta meta Tamana yo Natuna Yesu Keliso maiyadao. ⁴ Teina hedehedede ta ka kulidiwa kalimiuwena, bena maudoida ta gwauyalagogoi.

Mala miyamiyana hedehededena

** **1:1:** Mauli Hedehededena: Yowane yona kulikuli wa hinage gonowana ta bui ta wane, Iya meta Hedehedede mauli tauhaiyamana kalidaena.

⁵ Teina wasa ta iya kalinawai ka lapuhai na ka hedede gaba ei kalimiuwai: Yaubada meta dawaya, iya unai nige masigili hesau.

⁶ Ena ta hedede bena Yaubada maiyada ta hebodakesega, na sola masigili unai ta miyamiya, meta kita tauhededelupolupo, na miyamiya mamohoidi meta nige ta miyaeidi. ⁷ Na ena dawaya unai ta miyamiya, gonogonowana doha iya dawaya unai ye miyamiya, kabo kada kahao maiyadao ta hebodakesega yo Yaubada Natuna Yesu kwasinana yoda yababa maudoidi ye deuligabaedi.

⁸ Ena ta wane, nige yoda yababa hesau, meta ta bom ta lupoi'uyoida, na hedehedede mamohoina ede nige kalidawai. ⁹ Na ena yoda yababa ta hedede hemasalahadi Yaubada unai, kabo ye nuwatugabaedi yo yoda miyamiya yabayababadi maudoidi ye deuligabaedi, matawuwuna yona hedede hesunuma wa ye nuwanuwatuidi yo yona laulau se dudulai kalidaena. ¹⁰ Ena ta hedede bena nige yoda yababa hesau, na teina unai yona hedehedede ta tolehesuwaladi, meta ta hedede ede Yaubada iya taulaulupolupo.

2

¹ Natuguwao, nuwanuwatu ta ya kulidiwa kalimiuyena na unai kabo taba nige kwa ba'aya. Na ena hesau yababa ye ginauli, meta taulausabilauyeida ede ye totolo Tamada matanaena, iya ede Yesu Keliso, iya dudulai tamowaina. ² Na iya meta yoda yababa kabanuwatugabaena kaitalasamna. Na nige bena ta bom mo yoda yababa, na tanoubu maudoina yodi yababa hinage.

Yaubada kabina taukata kabakitalobaidi

³ Ena Yaubada yona laugagayo ta kawakabiyeidi, kabo gonowana kabida ta kata ede kita meta iya kabina taukata.

⁴ Na kaiteya ye hedede bena iya Yaubada kabina ye kata, na Yaubada yona hedehedede nige ye kawakabiyeidi, meta iya tauhededelupolupo, yo hedehedede mamohoidi meta nige kalinaena. ⁵ Na ena tamowai hesau Yaubada yona hedehedede ye lauwatanidi, meta mamohoi iya Yaubada ye gadosisikaliliyei.

Teina unai kabo kabina ta kata meta ta patulauko kalinawai: ⁶ Ena tamowai hesau ye hedede iya ye patulauko Yaubada unai, bena taba yona miyamiya gonogonowana doha Yesu.

Gadosisi miyamiyana henuwaisinina

⁷ Kehaguwao, teina ta meta nige laugagayo hauhauna ya kuliyawa kalimiuwai, na beyabeyana wa, iya ede huya bagubagunana unai kwa haiyako wa. Teina laugagayo beyabeyana ta, iya ede Keliso wasana beyabeyana kwa lapuiyako wa. ⁸ Iyamo laugagayo ya kuliyawa ta meta laugagayo hauhauna, kaniyona ede ye masalaha Keliso yona mauli ne unai, yo hinage ye masalaha yomi laulau udiyedi. Matawuwuna masigili meta ye gehe ye laulau na dawaya mamohoina ede ye sinasina.**

⁹ Ena tamowai hesau ye hedede bena iya mala unai ye miyamiya, na iyamo kana kaha ye hewaiunu, meta iya ede sola masigili unai. ¹⁰ Na kaiteya kana kaha ye gadosisiyei meta mala unai ye miyamiya, ede nige gonowana tamowai hesau ye hekalabesibesi. ¹¹ Na kaiteya kana kaha ye subu, meta iya masigiliyena ye miyamiya yo unai ye sae ye dobi, na nige kabina ye kata haedi ye laulau, matawuwuna ede masigili ne ye hematagibugibu.

¹² Natuguwao, ya kulikulilaowa kalimiuyena

matawuwuna kabina ta kata meta Yaubada yomi yababa ye nuwatugabaediko
Keliso debanaena.

¹³ Tamaguwao, ya kulikulilaowa kalimiuyena

** **2:8:** Masigili ... ye gehe ye laulau na dawaya mamohoina ede ye sinasina: Nuwanuwatu ta kabo hinage Yowane 1:5 unai ku hasili.

matawuwuna ede Yaubada Tamada kabina kwa katako. Iya huya bagubagunana unai ye miyamiya na ye laoma ee teina.

Hewahewaliyo, ya kulikulilaowa kalimiuyena,
matawuwuna ede tauyababa kwa saedikwaiyako.

¹⁴ Natuguwao, ya kulikulilaowa

matawuwuna ede Tamada kabina kwa katako. **

Tamaguwao, ya kulikulilaowa kalimiuyena

matawuwuna ede Yaubada Tamada kabina kwa katako. Iya huya bagubagunana unai ye miyamiya na ye laoma ee teina.

Hewahewaliyo, ya kulikulilaowa kalimiuyena

matawuwuna kwa bayao yo Yaubada kalinana ye miyamiya kalimiuyena, na tauyababa wa kwa saedikwaiyako.

Tabu tanoubu ta kwa gadosisiyei

¹⁵ Tabu tanoubu ta yo tanoubu ginaulidiyao kwa gadosisiyeidi. Ena tanoubu ta kwa gadosisiyei, meta Tamada gadosisina nige kalimiuwai. ¹⁶ Kaniyona ede tanoubu ta miyamiyadi yababadi meta nige Tamada unai se laoma, siya ede buluma yona gadogadosisi yababadi yo matada yodi gadogadosisi bikibikidi yo nuwasaesae yababadi. Siya yodi kabalaoma ede tanoubu ta. ¹⁷ Tanoubu ta yo saha tamowai se henuwakaliliyeidi meta kabo se gehe, na kaiteya Yaubada yona nuwatu ye ginauliwatanidi meta kabo ye miya ye lau ee nige kana siga.

Keliso tauhewaiununa hedehedena

¹⁸ Natuguwao, teina ta huya gehegehena. Kwa lapuiyako meta Keliso tauhewaiununa kabo ye lagemo. Na mayadai ta unai Keliso tauhewaiununa gwaudi ede se masalahako. Unai kabina ta kata ede huya gehegehena meta ye lagemako. ¹⁹ Teina tamowaidiyao ta kada boda ta unai se pesahai, na siya meta nige kada bodao mamohoidi. Taba siya kada kahao mamohoidi, kabo sola maiyadao ta miyamiya. Na se laugabaedako, unai ye masalaha ede siya nige kada bodao mamohoidi.

²⁰ Na komiu meta Keliso ye heyausigomiu Yaluwa Tabuna unai na maudoimiu ne hedehedede mamohoina wa meta kabina kwa katako. ²¹ Tabu yomi nuwatu bena hedehedede mamohoina wa nige kabina kwa kata, ede unai na ya kulikulilaowa kalimiuyena. Na ya kulikuli ta kaniyona ede hedehedede mamohoina wa kabina kwa katako, yo hinage kabina kwa kata meta nige hedehededelupolupo hesau hedehedede mamohoina wa unai ye laoma.

²² Kaiteya meta taulaulupolupo? Iya ede kaiteya ye hedede bena Yesu iya nige Keliso. Tamowai doha tenem meta iya Keliso tauhewaiununa, yo Tamana yo Natuna ye uhalaedi. ²³ Ena kaiteyadi Natuna se uhalaei meta Tamana nige maiyadi. Na kaiteyadi Natuna se hededetausaei, siya meta Tamana hinage maiyadi.

²⁴ Na komiu yomi huyanuwabui unai na ye laoma wau teina na wasa saha kwa lapui wa bena nuwamiuyena ye babawa. Ena wasa wa ye babawa kalimiuyena, kabo huya maudoina Natuna yo Tamana kalidiwai kwa miyamiya, ²⁵ yo Yaubada yona hedehesunuma kalidawai wa ede mauli nige kana siga.

²⁶ Yogu kulikulilaowa ta meta bena tauwoyasapuligomiu ne hedehedededi. ²⁷ Na komiu Yesu unai Yaluwa Tabuna kwa haiyako, iya ede ye miyamiya kalimiuyena, unai ede nige gonowana taba taulauhekata hesau ye hekatagomiu. Matawuwuna ede Yaluwa ta ye hekatagomiu ginauli maudoidi udiyedi, na yona lauhekata ne meta

** **2:14:** Natu kadi hedehedede ta meta buka Dimdim hekadiyo se tole lausoisoi 13 unai, na buka se bado se tole lausoisoi 14 unai.

mamohoi, nige kailupolupo. Unai taba Yaluwa yona lauhekata wa udiyedi kwa miyamiya.**

Yaubada natunao se nuwabayao Yaubada matanaena

²⁸ Unai, natuguwao, yomi miya Keliso unai ne tabu kwa hekaiyawasi. Na yona huyataumasalahama unai kita kabo ma nuwabayaoda, na taba nige ta mwadine Keliso yona uyoma mayadaina ne unai. ²⁹ Ena kabina kwa kata ede Keliso iya dudulai tamowaina, kabo hinage gonowana kabina kwa kata meta kaiteyadi yodi laulau se dudulai, siya meta Yaubada unai labasi helabuina se hai.

3

¹ Hage, sola Tamada yona gadosisi lakina kalidaena ne kwa kita! Yona gadosisi debanaena ede iya ye kawanatuyeida. Na teina ta meta mamohoi. Unai ede tanoubu ta tamowaidiyao nige se kitalobaida, kaniyona ede Yaubada nige kabina se kata. ² Kehaguwao, mayadai ta unai kita meta Yaubada natunao, na kada kao mamohoina ede sola nige ye masalahama. Na kabina ta kata meta huyana Keliso ye uyoma, kabo kada kao se buidi ta hemala doha iya, matawuwuna iya kana kao mamohoina kabo ta kita. ³ Siya kaiteyadi se kitakitalau tenem mayadaina ne unai, bena yaluwadi se he'a'anamwanamwaeidi na se a'a, gonogonowana doha Keliso.

⁴ Ena kaiteya yababa ye ginauli meta Yaubada yona laugagayo ye kawayagalaei, matawuwuna ede yababa meta Yaubada yona laugagayo kawayagalaena. ⁵ Kabina kwa kata meta Keliso yona laoma tanoubu ta unai wa kaniyona ede yoda yababa ye haigabaedi, na iya unai nige yababa hesau. ⁶ Unai kaiteya Keliso ye kawakehaei meta nige gonowana yona yababa unai ye miyahekahini. Na kaiteya yona yababa unai ye miyakesegai, meta iya sola nige Keliso ye kita yo nige kabina ye kata.

⁷ Natuguwao, tabu kwa moselaegomiu tamowai hesau unai na ye lupohaigomiu. Kaiteya yona laulau se dudulai, iya meta dudulai tamowaina, gonogonowana doha Keliso. ⁸ Na kaiteyadi yababa unai se miyakesegai, siya meta diyabolo yona tamowai, matawuwuna kabahetubu wa unai na ye laoma ee teina diyabolo ede sola yababa ye ginaginulidi. Na Yaubada Natuna yona laoma wa kaniyona ede bena diyabolo yona paisowa ye hekaiyawasidi.

⁹ Yaubada natunao nige gonowana huya maudoina yababa unai se miyamiya, matawuwuna Yaubada yona miyamiya kaona ede kalidiwai. Iya unai labasi helabuina se hai, unai nige gonowana yababa unai se miyakesegai. ¹⁰ Kabo idohagi na kabina ta kata kaiteyadi meta Yaubada natunao yo kaiteyadi siya diyabolo natunao? Kaiteyadi laulau dudulaidi nige se ginaginulidi yo kaiteyadi yodi hali ekalesiya tamowaidiyao nige se gadosisiyeidi, meta siya nige Yaubada natunao.

Bena gadosisi miyamiyana unai kwa miyamiya

¹¹ Beyabeyana meta teina wasa ta kwa lapuiyako: Bena ta haigadogadosisi'uyoida. ¹² Tabu yomi laulau doha Kaina, iya tauyababa yona tamowai, ede kana kaha Abela ye koihemwaloi. Kaniyona saha to ye koihemwaloi? Matawuwuna ede yona laulau wa nige se dudulai, na kana kaha yona laulau wa se dudulai.

¹³ Kagu kahao, tabu kwa silisiliyata ena tanoubu ta tamowaidiyao se hewaiunugomiu. ¹⁴ Kabina ta kata meta boita ta laugabaeyako na ta laomako mauli unai, matawuwuna ede kada kahao ta gadosisiyeidi. Ena kaiteya kana kaha nige ye gadosisiyei, meta iya sola boita unai ye miyamiya. ¹⁵ Kaiteya kana kaha ye subukaliliyei, iya taukaiunu, na kabina kwa kata ede taukaiunu meta mauli miyamiyahaina nige kalinawai.

** **2:27:** Taba Yaluwa yona lauhekata wa udiyedi kwa miyamiya: Hedehedede ta nige ye masalahakalili kalina Giliki unai. Ede gonowana hinage ta kulibui ta wane, Unai kwa miyamiya Yesu kalinawai, doha Yaluwa ta ye hekatagomiu. Yo hinage nige ye masalahakalili ena Keliso unai se miyamiyako, o Yowane ye hedehesibasibadi taba Keliso unai se miya.

¹⁶ Gadosisi mamohoina kana kao saha meta kabina ta kata, kaniyona ede Yesu Keliso yona mauli ye mosegabaei kita hesabada. Unai kita hinage bena yoda mauli ta talamgabaeidi kada kahao hesabadi. ¹⁷ Ena tamowai gogogogona hesau kana kaha ye kita ye deha, na nige ye katekamkamnaei yo nige ye sagui, kabo idohagi na ye hedede meta Yaubada yona gadosisi ede kalinawai?

¹⁸ Natuguwao, yoda gadosisi tabu hedehedede yo kalina mo udiyedi, na bena kabikabi mamohoidi udiyedi gadosisi ta hemasalaha. ¹⁹⁻²⁰ Yoda kabikabi wa udiyedi kabo kabina ta kata ede kita miyamiya mamohoidi udiyedi ta miya. Na ena ginauli saha hesau unai nuwada se hegiluda, kabo gonowana Yaubada matanaena nuwada se talu, matawuwuna kabina ta kata ede Yaubada ye saekalili na kabo nuwada, yo iya ginauli maudoidi kabidi ye katakalili.

²¹ Kehaguwao, ena nuwada nige se hegiluda, meta gonowana ma nuwabayaoda ta lau Yaubada unai, ²² na saha ta kaibwada iya unai meta kabo ta lobai, matawuwuna yona laugagayo ta miyawatanidi yo yona kabanuwamwa ta ginaulidi. ²³ Na yona laugagayo ede teina: Bena iya Natuna Yesu Keliso ta sunumaei,** yo bena ta haigadogadosisi'uyoida doha laugagayo unai ye hededeyako wa. ²⁴ Kaiteyadi yona laugagayo se miyawatanidi meta iya unai se miyamiya, yo iya hinage kalidiyena ye miyamiya. Na Yaluwana ye haiyama wa debanaena ede kabina ta kata meta iya ede kalidaena.

4

Yaluwa kabakitahekasadi

¹ Kehaguwao, tabu yaluwa udoi'udo i yodi hedehedede kwa kawamamohoiyeidi. Bena kwa lautonogidi na kwa kitadi ena siya mamohoina Yaubada unai se laoma, e nige. Matawuwuna pelowetalupolupo gwaudi ede se laoko tanoubu tehana maudoidi udiyedi. ² Yaubada Yaluwana yomi kabakitalobaina ede teina: Ena yaluwa hesau ye hededehehemasalaha meta Yesu Keliso bulumaena ye laoma, yaluwa ne meta Yaubada unai ye laoma. ³ Na ena yaluwa hesau yona hededehehemasalaha meta Yesu iya nige bulumaena ye laoma, yaluwa ne meta nige Yaubada unai ye laoma. Yaluwana ne meta Keliso tauhewaiununa yaluwana. Kwa lapuiyako meta Keliso tauhewaiununa ye laolaoma, na mayadai ta unai iya ede ye lagemako tanoubu ta unai.

⁴ Natuguwao, komiu Yaubada yona tamowai, na pelowetalupolupo wa kwa saedikwaidiko, matawuwuna Yaluwa luwamiuyena taumiya ne, iya ye saekalili na kabo yaluwa tanoubu ta unai ne. ⁵ Teina pelowetalupolupo ta, siya meta tanoubu ta yona tamowai, unai ede tanoubu ta nuwanuwatudi udiyedi se hedehedede, hinage tanoubu ta tamowaidi se lapulapulau udiyedi. ⁶ Na kita meta Yaubada yona tamowai. Ena tamowai hesau Yaubada kabina ye kata, meta kabo ye lapulapulaoma kalidaena. Na kaiteya nige Yaubada yona tamowai, meta taba nige ye lapulaoma. Teina unai kabo hedehedede mamohoina yaluwana yo yaluwa lupolupona ta kitalobaidi.

Yaubada yona gadosisi kalidaena

⁷ Kehaguwao, bena ta haigadogadosisi'uyoida, matawuwuna gadosisi meta Yaubada unai ye laoma, na taugadogadosisi maudoidi meta siya Yaubada unai labasi helabuina se hai yo iya kabina se kata. ⁸ Yaubada iya meta gadosisi. Kaiteya nige ye gadogadosisi, iya nige Yaubada kabina ye kata. ⁹ Yaubada yona gadosisi ye hemasalaha kalidaena doha teina: Iya Natukesekesegana ye hetamaliyama tanoubu ta unai na bena iya debanaena mauli ta lobai. ¹⁰ Gadosisi mamohoina ede teina: Nige bena kita Yaubada ta gadosisibagunaei, na iya ye gadosisibagunaeida, ede iya Natukesekesegana ye hetamaliyama yoda yababa kabanuwatugabaeidi kaitalasamna.

** **3:23:** Yesu Keliso ta sunumaei: Kalina Giliki unai se kuli se wane, Yesu Keliso hesana ta sunumaei. Na kalina Giliki unai hedehedede hesa meta Yesu Keliso kana kao yo yona gigibwali heyaheyasonina, iya Yaubada Natuna.

¹¹ Kehaguwao, Yaubada ye gadosisikaliliyeida, unai kita hinage taba ta haigadogadosisi'uyoida. ¹² Nige sola tamowai hesau Yaubada ye kita, na ena ta haigadogadosisi'uyoida, meta Yaubada ede kalidaena ye miyamiya yo yona gadosisi ne kalidaena kabo ye masalahanamwanamwa. ¹³ Kabina ta kata meta iya unai ta miyamiya, yo hinage iya ede ye miyamiya kalidaena, matawuwuna Yaluwana ede ye haiyamako. ¹⁴ Ka kitayako yo ka hededeheemasalaha meta Tamana iya Natuna ye hetamaliyama bena iya kabo tanoubu ta Taugilihaina. ¹⁵ Ena kaiteya ye hededeheemasalaha meta Yesu iya Yaubada Natuna, meta Yaubada ede ye miyamiya iya kalinawai, yo iya ye miyamiya Yaubada unai. ¹⁶ Na Yaubada yona gadosisi hesabada ne kabina ta kata yo yoda mididi ta tole unai.

Yaubada iya gadosisi ede, na kaiteya gadosisi unai ye miyamiya, iya meta Yaubada unai ye miyamiya, yo Yaubada hinage kalinawai ye miyamiya. ¹⁷ Ena tanoubu ta unai yoda mauli meta doha Yesu, kabo gadosisi ye masalahanamwanamwa yoda mauli ta udiyedi. Unai kabo hekasa mayadaina ne unai nige gonowana ta matausi, na ta nuwabayao. ¹⁸ Gadosisi unai meta nige matausi, na gadosisi mamohoina matausi ye tolehesuwala. Ena ta matausi, meta kaniyona ede hekamakamna ta matausiyei. Unai kabo ta kita ede Yaubada yona gadosisi meta sola nige ye masalahanamwanamwa kalidaena.

¹⁹ Ta gadogadosisi, matawuwuna Yaubada ye gadosisibagunaeyida. ²⁰ Ena tamowai hesau ye wane, "Yaubada ya gadosisiyei!", na kana kaha ye subu, iya meta tauhededelupolupo. Ena kana kaha gonowana ye kita ne nige ye gadosisiyei, idohagi kabo Yaubada nige gonowana ye kita ne ye gadosisiyei? ²¹ Na Yaubada yona laugagayo ye haiyamako ede teina: Kaiteya Yaubada ye gadosisiyei, meta hinage bena kana kaha ye gadosisiyei.

5

Yoda sunuma Yaubada Natuna unai

¹ Kaiteyadi se kawamamohoi meta Yesu iya Keliso ede, siya labasi helabuina Yaubada unai se hai. Yo kaiteyadi Tamadi ne se gadosisiyei, meta natunao hinage kabo se gadosisiyeidi. ² Teina doha kabo kabina ta kata meta Yaubada natunao ta gadosisiyeidi: Bena Yaubada ta gadosisiyei yo yona laugagayo ta miyawatanidi. ³ Yaubada gadosisiyeina kaniyona ede bena yona laugagayo ta miyawatanidi. Na yona laugagayo ne nige se polohekalili, ⁴ matawuwuna ede Yaubada unai labasi helabuina tauhaina tamowaidi, siya meta tanoubu ta se saedikwai, na yoda sunuma debanaena ede tanoubu ta gonowana ta saedikwai. ⁵ Kaiteya gonowana tanoubu ta ye saedikwai? Tamowaina ede kaiteya ye kawamamohoi meta Yesu iya ede Yaubada Natuna.

⁶ Teina Yaubada Natuna ta, iya ede ye laoma waila yo kwasina udiyedi. Iya ede Yesu Keliso. Nige waila ye bom unai ye laoma, na waila yo kwasina udiyedi.** Na Keliso tauhededeheemasalahana ede Yaluwa, na iya meta hedehedede mamohoina Yaluwana. ⁷ Kaniyona ede iya tauhemamohoiyeina meta ginauli haiyona: ⁸ Yaluwa, waila, yo kwasina. Na ginauli haiyona ta meta nuwatu kesega unai se talam. ⁹ Tamowai yodi hedehedede ta kawamamohoiyeidi, iyamo Yaubada yona hededeheemasalaha meta ye saekalili, matawuwuna ede hededeheemasalaha ta Yaubada unai ye laoma. Na yona hededeheemasalaha wa meta Natuna hedehededena. ¹⁰ Kaiteyadi Yaubada Natuna

** **5:6:** Waila yo kwasina udiyedi: Hedehedede ta meta Yesu yona babatizo yo yona boita sataulo unai heyaheyasonidi. Kaniyona ede, Keliso meta tamowai mamohoina, gonogonowana doha tamowai hekadiyo hinage Yowane iya ye hebabatizoidi, yo hinage ye boita, iya ede sataulo kewanaena. Buka ta huyakulina wa unai tamowai hekadiyo se kawamamohoi meta Keliso iya yaluwa na ye lulau Yesu unai huyana ye babatizo, iyamo huyana Yesu ye boita sataulo unai meta Keliso yaluwana ne Yesu ye laugabaeyiko. Na Yowane ye hededeheemasalaha ede Yesu Keliso meta huya maudoina iya Yaubada yona hetamali tamowaina, yona huyalabasi unai na ye lau ee ye boita sataulo kewanawai.

unai se kawamamohoi meta teina hededehe masalaha ta se hai nuwadiyena. Na kaiteyadi nige Yaubada se kawamamohoiyei, meta iya se kawalupolupoi, matawuwuna saha Yaubada ye hededehe masalaha Natuna hesabana wa nige se kawamamohoiyei. ¹¹ Hededehe masalaha wa hedehedena ede teina: Mauli nige kana siga meta Yaubada ye haiyamako, na mauli ne iya ede Natuna unai. ¹² Ena kaiteya Yaubada Natuna ye hai nuwanaena, meta mauli ta ye haiyako. Na kaiteya nige Yaubada Natuna ye hai meta mauli ta sola nige ye hai.

Mauli nige kana siga kwa haiyako

¹³ Nuwanuwatu ta ya kulidiwa komiu kaiteyadi Yaubada Natuna hesanaena taukawamamohoi kalimiuwai, na udiyedi kabo kabina kwa kata meta komiu mauli nige kana siga wa kwa haiyako.

¹⁴ Gonowana ta nuwabayo Yaubada matanaena. Taba saha hesau ta kaibwadai iya kalinawai na yoda kaibwada ne iya yona nuwatuyena, kabo yoda tapwalolo ne ye lapuidi. ¹⁵ Na ena kabina ta kata meta iya ye lapulapulaoma kalidaena, kabo hinage kabina ta kata meta ginawai saha iya kalinawai ta kaibwadai wa kabo ye ledima.

¹⁶ Ena kam kaha hesau ku kita ye laupwano, na yona yababa ne unai nige gonowana ye boita,** meta bena yona ku tapwalolo, na Yaubada kabo mauli ye mosei. Teina ta meta ye lau siya kaiteyadi yodi yababa nige gonowana ye woyalaedi boita unai ne kalidiyena. Na yababa hesau meta gonowana tauginawina ye woyaei ye lau boita unai. Nige ya hedede bena tenem yababa ne debanaena na tamowai ne yona ku tapwalolo.

¹⁷ Laupwano maudoidi meta yababa, na iyamo yababa hekadi nige gonowana se woyalaedi boita unai.**

¹⁸ Kabina ta kata meta kaiteya ena Yaubada unai labasi helabuina ye hai, iya nige gonowana huya maudoina yababa unai ye miyamiya. Na Yesu** kabo tamowai ne ye kitahetete, na tauyababa nige gonowana heyababa hesau ye ginawai kalinawai.

¹⁹ Kabina ta kata ede kita Yaubada natunao, na tanoubu ta maudoina meta tauyababa yona tanuwaga guninaena se miya. ²⁰ Hinage kabina ta kata ede Yaubada Natuna ye laoma na nuwatulobai ye haiyama, na unai kabo gonowana Yaubada mamohoina ne kabina ta kata. Na kita ede iya mamohoina ne unai ta miyamiya, hinage kita ede iya Natuna Yesu Keliso unai ta miyamiya. Iya ede Yaubada mamohoina yo iya mauli nige kana siga tauhaiyamana.

²¹ Natuguwao, kwa kitahetete'uyoigomiu tabu kwa patulau yaubadalupolupo kalidiyena!

** **5:16:** Boita ne meta tausonoga se hedede bena yaluwaena se boita, kaniyona ede tamowai hesau ye bom mauli unai ye boligabaei'uyoi na nige ye henuwa bena ye nuwabui. Na Yowane yona nuwanuwatu ye lau pelowetalupolupo wa udiyedi, matawuwuna siya Yesu Keliso se uhalaei. Nige kabahededegilidi hesau. ** **5:17:** Yababa hekadi nige gonowana se woyalaedi boita unai: Hedehede ta kaniyona ede, sola gonowana ta nuwabui.

** **5:18:** Yesu: Yowane ye kuli, Yaubada unai labasi tauhaina, na iya ede Yesu.

2 Yowane Yowane yona leta helabuina Buka ta hededehemasalahana

Leta ta Yowane ye kuli, iya apostolo yo Yesu yona hekahekatao wa hesau. Huyakulina nuwana gonogonowana doha yona leta bagubagunana wa, bolimai 85 yo 95 AD luwadiyena.

Teina leta ta unai Yowane ekalesiya ye hededehehasibabadi bena se haigadogadosisi'uyoidi na se tolobayao sunuma unai. Yo ye guguyaidi tabu taulauhekatalupolupo se yogaisinidi yo se saguidi. Siya yodi laupwano meta se hedede ede Yesu yo Keliso, siya udoi udoi, na Keliso bena nige buluma unai ye laoma, na iya yaluwa (2 Yowane 7). Yodi nuwatupwanoli meta 1 Yowane bukana hededehemasalahana unai yo 1 Yowane 5:6 hededehemasalahana unai ka kuliyo.

Buka ta hedehedena lakilakidi

- Lautoki 1-3
- Taba ta haigadogadosisi 4-6
- Taba ta kitanamwanamwa lauhekata lupolupodi udiyedi 7-11
- Hedehede gehegedi 12-13

Lautoki

¹Leta ta tauwoyawoya unai ye laowa sinebada kaikaisunuwaina yo natunao kalimiyuena.** Ya gadosisikaliliyeigomiu, na nige yau ya bom mo, na hinage kaiteyadi hedehede mamohoina** kabina se kata, meta se gadosisiyeigomiu. ²Ka gadosisiyeigomiu matawuwuna hedehede mamohoina ye miya nuwadaena mayadai ta unai yo ye miya nige kana siga.

³Yaubada Tamana yo iya Natuna Yesu Keliso yodi kabinamwa, katekamkamna, yo nuwadaumwali kabo se miya kalidaena, maiyadi hedehede mamohoina yo gadosisi.

Taba ta haigadogadosisi

⁴Ya gwaualakalili matawuwuna natumwao hekadiyo ya lobaidi hedehede mamohoina unai se miyamiya, doha Tamada ye guguyaida. ⁵Na sinebada, mayadai ta unai ya kaibwadaigo bena ta haigadogadosisi'uyoida. Teina nige laugagayo hauhauna ya kuliyo kalimiyena. Laugagayona ne nabada wa unai ta lapuiyo. ⁶Gadosisi ta kaniyo ede Yaubada yona laugagayo bena ta kawakabiyeidi yoda laulau maudoidi udiyedi. Laugagayona ede huya bagubagunana unai kwa lapuiyo, meta gadosisiyena kwa miyamiya.

Taba ta kitanamwanamwa lauhekata lupolupodi udiyedi

⁷Yogu hedehede ta kaniyo ede taukailupolupo gwaudi se laoko tanoubu tehana maudoidi udiyedi, na se hedede meta Yesu Keliso iya nige buluma unai ye laoma. Tamowaidi ne, siya taukailupolupo yo Keliso tauhewahewaiununa. ⁸Kwa kitanamwanamwa, madai yoda paisowa maisana kwa palei, na bena yomi kainauya maudoina kwa haihegehe. ⁹Kaiteya Keliso wasana lauhekata ne dikwai na nige unai ye miya, meta nige Yaubada kalinawai. Na kaiteya lauhekata ne unai ye miya meta Tamana yo Natuna ye haidiko iya kalinawai. ¹⁰Ena tamowai hesau ye laowa kalimiyuwa, na nige lauhekata dudulaina ne ye baheyawa, tabu kwa woawoyasaei

** **1:1:** Yowane hedehede wadawadamna ye hepaisowa. Sinebada kaikaisunuwaina meta dubu Yaubada ye kaisunuwai wa, na natunao ede dubu tamowaidiyao. ** **1:1:** Hedehede mamohoina meta wasa namwanamwana o Yaubada wasana.

yomi numaena yo tabu kwa laulautokiyei. ¹¹ Matawuwuna ede ena kaiteya ye hailobai meta iya yona paisowa yabayababana ne unai tauhaisagusagu.

Hedehedede gehegedi

¹² Ginauli se bado bena yomiu ya hedehedede, na nige ya henuwa bena kulikuli unai. Na yogu nuwatu ede bena ya kaitaumaigomiu na ta haikitakita'uyoida na yoda ta hedehedede, to bena gwauyala lakilakina kalidaena.

¹³ Kam kaha kaikaisunuwaina natunao yodi lautoki se hetamalidiwa.

3 Yowane

Yowane yona leta hehaiyonana

Buka ta hededehehemasalahana

Leta ta taukulina meta Yowane, iya apostolo yo Yesu yona hekahekatao wa hesau. Huyakulina nuwana gonogonowana doha yona leta bagubagunana yo helabuina wa, bolimai 85 yo 95 AD luwadiyena.

Teina leta ta unai Yowane ekalesiya tamowaina hesau hesana Gaiyasi ye lautokiyei, matawuwuna taulauguguya hekadiyo ye yogaisinidi na ye saguidi yodi kadau udiyedi. Na kabo ye hededehebayao kabitaumana laulauna ta unai.

Hinage Yowane ekalesiya badana hesau hesana Diyotelepesi yona laulau yababadi ye hededehehemasalahadi (lausoiso 9-10).

Tamowai hesau hinage ye katai ede Dimitiliyasi (lausoiso 12), iya ye hededehehemasalahadi ede iya ekalesiya namwanamwana. Nuwana iya tauwasaduwai hesau (lausoiso 5-8) yo iya leta ta taubaheina.

Buka ta hedehededenalakilakidi

- Lautoki 1-4
- Taba taulauguguya ta saguidi 5-12
- Hedehedede gehegehedi 13-15

Lautoki

¹ Leta ta tauwoyawoya ye kuli ye lau Gaiyasi unai, kowa ede yogu gadosisi mamohoina tamowaina.

² Kagu kaha, ya tapwalolo meta kabo yom kamna se namwa yo ginauli maudoidi se dudulai kalimyena, gonogonowana doha yaluwam unai ku namwanamwa.

³ Ya gwaualakalili huyana kada kahao hekadi se laoma na yogu se hedehedede meta hedehedede mamohoina unai ku tolobayao yo huya maudoina ede unai ku miyamiya.

⁴ Yogu gwaualala saesakalilina ede wasa ya lapui meta natuguwao hedehedede mamohoina se miyamiyawatani.

Taba taulauguguya ta saguidi

⁵ Kagu kaha, huya maudoina yom paisowa unai ku miyakesegai na ekalesiya ku sagusaguidi, na siya meta laolaoma nige kabidi ku kata. ⁶ Dubu unai yom gadosisi se hedehededei. Ya kaibwadaigo taba kada kahao ta yodi kadau unai ku saguidi na se lau, na yom kabikabidi ne taba Yaubada ye launamwanamwaei. ⁷ Yodi kadau ne meta Keliso wasana debanaena se kadauyei, na nige sagu hesau se hai nige taukawamamohoi wa udiyedi. ⁸ Unai ye dudulai mo taba ta yogaisinidi yoda numaena. Kabikabi ta unai kabo yoda teha ta ginauli yodi paisowa unai na ta paisowagogo hedehedede mamohoina wasaduwaiyena unai.

⁹ Leta kubwakubwana ya kuli ye lau dubu udiyedi, na Diyotelepesi, iya ye henuwa bena yodi tauwoyawoya, meta nige ye henuwa ye lapulau yogu hedehedede wa unai.

¹⁰ Ena ya laowa kabo ginauli saha ye ginaginulidi ne ya hededehehemasalahadi, meta ye monumonunu yo ye hededeheyaheyababagai. Nige tenem se bom mo, na kada kahao yodi kadauyena nige ye henuwa ye hailobaidi yo hinage kaiteyadi se henuwa bena se saguidi meta ye hekaiyawasidi na dubu wa unai ye hepesadi.

¹¹ Kagu kaha, tabu laulau yabayababadi ne ku laulauwatanidi, na laulau namwanamwadi mo ku laulauwatanidi. Ena tamowai hesau yona laulau se namwa, meta iya Yaubada natuna. Na kaiteya tamowai yababa ye ginaginulidi, meta iya nige Yaubada kabina ye kata.

¹² Dimitiliyasi** meta ekalesiya bodana maudoidi se hedede iya tamowai namwanamwana. Yona miyamiya se namwakalili, kaniyona ede hedehedede mamohoina ye miyamiyawatani. Kai hinage iya ka kitahenamwa, yo kabimai ku kata meta ka hededemamohoi.

Hedehedede gehegedi

¹³ Ginauli se bado bena yom ya hedehedede, na nige ya henuwa bena pepwa kulikulina ta unai. ¹⁴ Na yogu nuwatu ede nige huyalohaloha kabo ya kitago, kabo yoda labui ta hedehedede.

¹⁵ Nuwadaumwali ye laowa kalimyena! Kada kahao inai taumiya yodi lautoki se hetamalidiwa. Na kada kahao kesega kesega metai bena yoma lautoki ku moseidi.

** **1:12:** Dimitiliyasi iya kana kao nige kabina ta kata. Tausonoga hekadi se hedede iya leta ta taubaheina, na hekadi se wane iya tamowai hesau Yowane ye henuwa bena Gaiyasi iya kabina ye kata.

Yuda Yuda yona leta Buka ta hededehehemasalahana

Leta ta taukulina meta Yuda. Ye kulihemasalaha'uyoi meta iya Yamesi kana kaha (Yuda 1), yo iya hinage Yesu kana kaha. Nuwana bolimai 60 AD unai leta ta ye kuli, na leta tauhaina wa nige ye kulihemasalahadi.

Yuda ekalesiya ye hededehebayaodi bena se kitanamwanamwakalili taulauhekatalupolupo kalidiwai na tabu yodi lauhekata ne se miyawatanidi, na sunumaena se tolo ma bayaodi (Yuda 3). Tamowai yabayababadi ne Yaubada kabo ye hekamkamnadi (Yuda 7-8). Leta ta yona kabagehe unai meta hedebasae lakilakina yo namwanamwakalilina ye lau Yaubada unai (Yuda 24-25).

Buka ta hedehedena lakilakidi

- Lautoki 1-2
- Taulauhekata lupolupodi hedehedededi 3-16
- Sunuma hededehebayaona 17-23
- Yaubada hedebasaena 24-25

Lautoki

¹ Yau Yuda, Yesu Keliso yona heyayai tauhaina yo Yamesi kana kaha.

Teina kulikuli ta ya kuli ye laowa komiu kaiteyadi Yaubada ye yoganeigomiu, Yaubada Tamada ye gadosisiyeigomiu yo Yesu Keliso yona kitahetete unai kwa miyamiya wa kalimiuwai. ² Ya kaibwada taba Yaubada yona katekamkamna, yona nuwadaumwali, yo yona gadosisi ye lediwa kalimiuwai na nige kana siga.

Taulauhekatalupolupo yodi laupwano yo kadi hekamkamna

³ Kehaguwao, yogu nuwatu bagubagunana bena yoda kabihemauli ta wasana yomiu ya kuli ye laowa kalimiuwai. Na yogu hineli ya bui, ede taba yomiu ya kulikuli meta ya hededehebayaogomiu bena yomi sunuma unai kwa tolobayao. Na yoda sunuma lauhekata maudoina meta Yaubada ye leyamako kita yona tamowai kalidawai. ⁴ [Ya kulikulilaowa ta] kaniyona ede tamowai hekadi meta se hedede bena siya tausunuma na se lulaowako ekalesiya bodana luwamiuwai. Huya bagubagunana unai kabahkamkamnadi wasana meta kulikuli tabuna unai se kulihemasalahayako. Siya meta Yaubada yona nuwatu nige taumiyawarantina. Yoda Yaubada yona kabinamwa se haigaibui na sola laulau bikibikidi se ginaginaulidi. Yo hinage Yesu Keliso, iya ye bom kada Tanuwaga yo yoda Guiyau wa, se uhalaei.

⁵ Teina nuwanuwatu maudoidi kabo ya kulidi ta meta kabidi kwa katako, na iyamo ya henuwa bena ya henuwaisinigomiu meta Guiyau Isalaela tamowaidiyao ye saguidi na Aikupito unai ye woyahepesadi, na mulinawai kaiteyadi nige se sunumaei wa ye heyababadi. ⁶ Yo anelu hekadi yodi kabaloina kana sigasiga Yaubada ye toledi wa nige se henuwa unai se miya, na yodi kabapaisowa maudoidi wa se laugabaedi. Ede Yaubada ye toledi teha masigili unai, na seni miyamiyahaidi udiyedi ye paidi. Na hekasa mayadaina se nayanayai. ⁷ Gonogonowana doha, Sodoma yo Gomola yo magai hekadi dedekadiwai, magaidiyao ne tamowaidiyao se mose'uyoidi laulaubikibiki udoi'udo'i udiyedi, yo tawasola kabikabina se bui na waihiu maiyana waihiu yo loheya maiyana loheya se tawasola. Tamowaidiyao wa meta kaiwa kalakalasin nige kana siga unai hekamkamna se lobai, na teina unai se hemala yoda kabakitalobai yo kada hededehehebasiba.

⁸ Teina miyamiya yabayababadi ta meta tausunumalupolupo tamowaidiyao wa se lu-laowako kami boda ne unai wa hinage se ginaginaulidi. Se hedede meta yodi kenosuwai

wa Yaubada unai se laoma, na se miyawatanidi, ede udiyedi se bom taudi se hebikidi, Yaubada yona tanuwaga gigibwalina se lausuwalaei, yo galewa taumiyaide didididigadi** se hededeheyaheyababadi. ⁹ Iyamo anelu kadi tanuwaga Maikeli meta nige ye nuwabayo to nige bena diyabolo ye hededeheyaheyababa hedehedede yabayababadi udiyedi. Huyana iya maiyana diyabolo Mose sinalena se hededeheyaheyababi meta ye hededelau unai ye wane, “Taba Guiyau ye heyababago!”

¹⁰ Na tenem tausunumalupolupo wa ginauli nige se nuwatulobaidi, iyamo se hededeheyaheyababadi. Na ginauli sahasahadi kabidi se kata, doha suisui nige gonowana se nuwatududulai na se miyamiyagaibu, tenem ginaulidi ne debadiwai kabo kadi heyababa se hekalu.

¹¹ Yababalakilaki kabo ye lau kalidiwai. Matawuwuna Kaina yona laulau se hemuliwatani,** yo moni debanawai laupwano se ginauli doha Balama.** Yaubada siya kabo ye heyababadi, gonogonowana doha Kola ma kana bodao yodi haikawayagala Mose unai** na ye heyababadi wa.

¹² Tenem tausunumalupolupo ne siya ede doha masi kaleko se hebikidi, na yomi kaikaigogo meta se heyababadi, nige mwadine kabina se kata na yomi kaikaigogo ne udiyedi se bom mo se nuwanuwatu'uyoidi. Kadi kao doha mamoe taukitakitahetete, iyamo mamoe ne nige se modeidi na se bom se kitahetete'uyoidi. Siya doha yada nige nabuna, na yaumai ye tepatepanei'useidi. Kadi kao doha kaiwa kaniyodi kaikaidi bena se kaniyo kabo ta kaidi, iyamo kaiwa ta nige kaniyodi, ede ta suluhihaidi, matawuwuna ede nige yodi namwanamwa hesau. ¹³ Kadi kao doha bagodu lakilakidi gabwa ne unai, na yodi laulau nuwamwadimwadinedi se hemasalahadi doha bagodu pulopulodi. Kadi kao doha kipwala kadakadaudi, na tamowai yodi kabalau mamohoina unai se woyasapulidi. Yaubada meta teha masimasigilikalilina ye kabinonohaiyako siya hesabadi, na temenai kabo se miya ye lau ee nige kana siga.

¹⁴ Enoka, iya Adama kana isimulita hehaligigi-labuina (7), teina tamowai ta hedehedede ye hededenonohaiyako ye wane, “Kwa kita! Guiyau kabo ye laoma maiyanao anelu tausani gwaudi, ¹⁵ bena tamowai maudoina ye hekasadi. Tamowai siya nige Yaubada yona nuwatu taumiyaawatanina, Yaubada kabo kadi gilulu ye hemasalahadi. Kadi gilulu ede Yaubada yona nuwatu nige se miyawatani, na laulau yabayababadi se ginaulidi yo Yaubada se hededeheyaheyababa.”

¹⁶ Teina tamowaidiyao ta meta siya ede taugadigadigugu yo taukitakitaheyababa. Siya se bom yodi henuhenuwa yabayababadi se lauwatanidi, yo yodi hedehedede udiyedi se bom se hededetausae'uyoidi, yo se bom yodi namwanamwa hesabadi ede hedehedede hekahekamna udiyedi tamowai se lupohaidi.

Sunuma hededehebayaona

¹⁷ Kehaguwao, yoda Guiyau Yesu Keliso yona apostolo saha se hedede wa bena kwa nuwanuwatuidi. ¹⁸ Se hedelawaowako kalimiwai se wane, “Huya gehegehedi udiyedi tautalatalawasi kabo se laoma, na yodi gadosisi yabayababadi kabo se lauwatanidi.”

¹⁹ Tamowai doha teina [*se lulaowako kami boda ne unai wa*] meta hinehineli se ginauli kalimiwai, matawuwuna ede Yaluwa Tabuna nige kalidiwai, na unai se bom yodi nuwanuwatu se lauwatanidi.

²⁰ Kehaguwao, bena yomi sunuma namwanamwakalilina unai kwa haihebahebaya'uyoigomiu, yo kwa tapwatapwalolo Yaluwa Tabuna yona sagu unai. ²¹ Yo Yaubada yona gadosisi unai kwa miyamiya, yo kwa nayatautaubiga ye lau ee yoda

** **1:8:** Galewa taumiyaide didididigadi: Siya ede anelu yo ginauli maumaulidi hekadiyo, galewa ne unai se miyamiya. Hemasalaha 4 unai hinage wasadi hesau ta lobai. ** **1:11:** Kaina yona kabi wa hedehedena Genese 4:7 unai ku hasili. ** **1:11:** Balama yona laupwano meta Numela 22:7,17 yo Numela 31:16 unai ku hasili.

** **1:11:** Kola yona haikawayagala wasana ede Numela 16 unai ku hasili.

Guiyau Yesu Keliso yona katekamkamna debanawai kabo mauli nige kana siga ye leyawa kalimiuwai.

²² Taunuwalabulabui bena kwa katekamkamnaedi yo kwa saguidi. ²³ Yo kaiteyadi se laulau Yaubada yona hekamkamna kaiwana kalakalasina hesabana meta bena kwa gilihaidi kabo mauli nige kana siga se hai. Yo tamowai hekadiyo hinage bena kwa katekamkamnaedi, na kwa kitahetete'uyoigomiu meta yodi laulau yabayababadi ne bena kwa subudi yo tabu kwa laulauwatanidi.

Hedebasae lakilakina ye lau Yaubada unai

²⁴ Yoda Yaubada ta hedebasaei. Iya gonowana ye kitahetetegomiu taba nige kwa kalabesibesi, na ye woyalaegomiu yona kabamiya saesaekalilina yo wasawasana unai, na ye hetologomiu matanawai meta nige ba'aya hesau kalimiuwai, na ma gwaug-wauyalamiu mo. ²⁵ Iya ye bom mo yoda Yaubada, yo yoda Guiyau Yesu Keliso debanawai ye hemauida. Iya ta hedebasaei, matawuwuna ede wasawasa, bayao yo gigibwali iya ye bom mo kalinawai huya bagubagunana unai ye laoma ee teina yo ye lau huya nige kana siga! Mamohoi!

Hemasalaha Hemasalaha bukana Buka ta hededehemasalahana

Hemasalaha bukana ta taukulina ede apostolo Yowane. Iya Sebedaiyo natuna na Yesu Keliso yona hekahekata tamowaina wa (Mataiyo 4:21). Teina buka ta ye kuli nuwana bolimai 95 unai. Buka ta meta leta ye kuli ekalesiya bodadi haligigi-labui teha Eisiya unai taumiya udiyedi. Teha Eisiya, iya ede yoda huya ta unai meta Teki basileiyana unai.

Yowane buka ta ye kuli na yona nuwatu meta bena ekalesiya bodadi ye kabinonohaidi hewaiunu ye hetubuko wa hesabana. Na ye hededehebayaodi bena se tolobayao na yodi sunuma Yesu unai se kabihekahini.

Hewaiunu Yowane ye kita ye laoma wa, iya meta Loma yodi gabemani nimadiyena. Nuwanuwatuna ne Yaubada ye hemasalaha kalinawai, na hinage ye hemasalaha meta hewaiunu ne kabo ye hekaiyawasi yo tauhewaiunu ne kabo ye hekilainodi.

Loma yodi gabemani se bom se kita'uyoidi meta gigibwali maudoina kalidiwai. Na ena tamowai hesau ye hedede meta basileiya hesau kabo ye saedikwaidi, kabo se hewaiunu. Hinage Loma tamowaidi yodi wasawasa se katai "Guiyau" yo "Tauhemauli" yo se taba'ohu unai. Yo se henuwa bena ekalesiya hinage se taba'ohu unai. Na ekalesiya nige gonowana se taba'ohui, unai se kitadi ede siya gabemani kadi waiunu, na se toledi numatutugudu unai o se unuhemwaloidi.

Unai ede Yowane nige gonowana buka ta nuwanuwatuna ye kulihemasalahadi hedehedede dudulaidi udiyedi, ede tautau yo heyaheyasoni udoi'udo'i ye hepaisowadi, doha Yaubada ye hekitadi kalinawai. Tautau yo heyaheyasoni se bado Talam Bagubagunana Bukana unai ta lobaidi na Yowane ye hepaisowadi, doha peloweta Daniyela yo Hesekeyela yodi buka udiyedi, yo buka hekadiyo hinage.

Heyaheyasoni hekadi hededehemasalahadi

Ginauli hekadi hinage bena ta nuwatulobaidi meta siya heyaheyasoni. Doha **gole** kaniyona ede "ye tabu", iya ede, "Yaubada yona", doha bili tabukalilina Numa Tabuna wa unai, na bili ne unai ginauli maudoidi gole unai se ginaulidi yo gole unai se sumadi. Yo **weku namwanamwakalilidi** (Hemasalaha 21:11 yo 21:19-20) kaniyodi ede se didiga yo se a'akalili.

Numela hinage nuwatu hekadi heyaheyasonidi.

◊ Numela **haiyona** (3) kaniyona meta "maudoina".

◊ Numela **haligigi-labui** (7) meta Yaubada yona numela, na kaniyona ede, ginauli maudoidi Yaubada ye haihegehedi, o, ginauli maudoidi ta iya kalinawai, o, "Yaubada yona". Ekalesiya bodadi haligigi-labui (Hemasalaha 1:4-5) kaniyona ede "ekalesiya bodadi maudoidi" yo "Yaubada yona boda", yo siya ede ekalesiya bodadi maudoidi tanoubu ta unai heyaheyasonidi. Yo Yaluwa haligigi-labui meta "Yaubada Yaluwana" o, "Yaluwa Tabuna" (1:4-5).

◊ Numela **hasi** (4) meta "tanoubu ta gogodiyao" yo "yababa tauginaulidi tamowaidiyao".

◊ **Saudoudoi-labui** (12) meta Yaubada yona gigibwali yo yona kabaloina ye heyaheyasoniyei, doha Isalaela bodadi saudoudoi-labui wa, yo apostolo saudoudoi-labui wa.

◊ Na numela **tausani** (1,000) kaniyona meta "boda" yo "ye badokalili". Unai "12 tausani" (12,000) kaniyona meta "boda Yaubada ye loinaedi", yo 144 tausani (144,000) meta "boda maudoidi Yaubada ye loinaedi", matawuwuna $144 = 12 \times$

12, siya ede Isalaela kadi mumugao badodi 12 yo apostolo ekalesiya taubagunaedi badodi 12.

Yowane tautau yo heyaheyasoni se bado ye hepaisowadi, nige gonowana inai ta hededeheemasalahahegehedi. Teina buka ta ye hededeheemasalaha saha yo saha kabo se tubu yo idohagi na kabo Yaubada tanoubu ta ye laei kana siga. Na buka ta ye henuwa bena ye kabinonohaida na tausunuma maudoidi yo kita hinage ta tolotahtahi huyahewaiunu kabo se laoma ne udiyedi.

Buka ta hedehededena lakilakidi

- Hedehedede bagubagunadi 1:1-20
- Ekalesiya bodadi haligigi-labui (7) yodi leta 2:1–3:22
- Matada ne unai ginauli sahasahadi kabo se tubu ne 4:1–22:5
 - Yaubada yona telona unai 4:1-11
 - Buka nokuna ma dedelina haligigi-labui 5:1–8:1
 - Bwagigi haligigi-labui 8:2–11:19
 - Delegoni yo suisui nuwamatamatausidi labui yo Mamoe Natuna 12:1–14:20
 - Gaeba haligigi-labui 15:1–16:21
 - Babeloni yo diyabolo yo suisui nuwamatamatausina yo pelowetalupolupo yodi heyababa 17:1–20:10
 - Hekasa gehegehena yo galewa yo tanoubu yo Yelusalema hauhau 20:11–22:6
- Buka kabaguduna hedehededena 22:7-21

Buka kabahetubuna hedehededena

¹ Teina buka ta unai meta ginauli maudoidi Yesu Keliso ye hemasalahadi wa yau yona heyayai tauhaina Yowane kaliguwai. Ginauli maudoidi nige bayaona kabo se tubu ne meta Yaubada gigibwali ye mosei Yesu unai bena ye hemasalahadi yona heyayai tauhaidi udiyedi. Ede Yesu yona anelu ye hetamali ye laoma bena teina ginaulidi ta ye hekitadi kaliguwai. ² Ginauli maudoidi ya kitadi wa ya kulitautaubigaidi teina buka ta unai, siya ede Yaubada unai wasa se laoma yo Yesu Keliso ginauli ye hemasalahadi kaliguwai wa wasadi. ³ Iya kaiteya hededepeloweta hedehedededi ta ye hasiligabaedi boda udiyedi meta iya gonowana ye gwauyala, yo siya kaiteyadi se lapuwatanidi yo buka ta kulikulina ta se kawakabiyeidi kabo hinage gonowana se gwauyala, matawuwuna ginauli kabo se tubu ne huyadi se hanahanauma.

Yowane yona lautoki yo Yesu hedebasaena

⁴⁻⁵ Yau Yowane, ya kulikulilaowa teha Eisiya unai ekalesiya bodadi haligigi-labui kalimiuwai.

Ya kaibwadasae Yaubada yo Yaluwa haligigi-labui** yo Yesu Keliso udiyedi. Yaubada iya ede wau teina, huya bagubagunana unai, yo huya sola kabo se laoma ne udiyedi. Yaluwa haligigi-labui wa, siya ede Yaubada yona telona talanuwanawai. ^[(5)] Yo Yesu Keliso, iya ede Yaubada yona nuwanuwatu mamohoidi tauhemasalahatautaubigaidi, yo boita unai iya tautolo'uyo bagubagunana, yo iya tanoubu ta unai wasawasa maudoidi kadi tanuwaga. ^[(4a)] Siya ya kaibwadaidi bena yodi kabinamwa yo yodi nuwadaumwali se toledi kalimiuyena.

Yesu ye gadosisiyeida, yo kwasinana unai yoda ba'aya udiyedi ye yailihaida. ⁶ Yo ye kaisunuwaida bena ta hemala yona basileiya bodana yo Yaubada yona taukaita-lasam.** Yaubada ne, iya ede Yesu yona Yaubada yo Tamana. Unai hedebasae yo gigibwali iya ye bom mo kalinawai, ye lau ee nige kana siga! Mamohoi!

** **1:4-5:** Yaluwa haligigi-labui (7) meta Yaluwa Tabuna kaina hesau. ** **1:6:** Yaubada yona taukaita-lasam ede ekalesiya maudoidi. Taukaita-lasam ne kaniyona ede Yaubada ye kaisunuwaidi na iya matanawai se miyamiya, yo maudoidi gonowana Yaubada maiyanao se hedehedede yo se kaikaibwadasae yo se lautokisae Yaubada unai. Iyamo yodi kaita-lasam nige suisui se gabudi, na yodi kaita-lasam ede Yaluwa ye nonohaidi (1 Petelo 2:5, Loma 12:1).

⁷ “Kwa kita ne! Iya galewa yadadi udiyedi ye laolaoma.” (*Daniyela 7:13*)

Yo “tamowai maudoidi, yo hinage kaiteyadi iya se gwali** wa, iya kabo se kita.
Yona masalaha debanawai
kabo boga udoi'udoi maudoidi tanoubu ta unai se dou ma kalinalakilakidi.”
(*Sakaliya 12:10*)

Doha teina kabo ye masalaha! Mamohoi.

⁸ Guiyau ye wane, “Yau Alepa yo Omega,** ginauli maudoidi yodi kabahetubu yo yodi kabagehe. Yau ede wau teina, huya bagubagunana unai, yo huya sola kabo se laoma ne udiyedi. Yau Guiyau Yaubada Gigibwalikalilina.”

Yowane ginauli hesau ye kita meta kana kao doha tamowai

⁹ Yau, Yowane, Yesu sunumaena ta unai meta kami kaha hesau. Yau hinage hekankamna ya hekaldo doha komiu Yesu tausunumaena maudoimiu. Maudoida meta Yaubada yona basileiya tamowaidi, yo hekankamna ta maudoidi udiyedi ta tolokesegai. Yaubada yona hedehedede yo Yesu wasana yogu lauguguyaidi wa debadiyena ede se tolegau Patimosi bwanabwanaluwana unai. ¹⁰ Temenai na Guiyau yona mayadai** unai Yaluwa Tabuna ye tanuwagaigau, na dagelagu ne unai kalina lakilakina ya lapui doha bwagigi daguguna, ¹¹ na ye hededelaoma ye wane, “Ginaulti maudoidi ku kitadi ne ku kulidobiyeidi buka unai na ku hetamali ye lau ekalesiya bodadi haligigi-labui siya ede Epeso, Simulina, Pegamumu, Tiyatila, Sadisi, Piladelepiya yo Laodisiya udiyedi.”

¹² Ya tolobui bena kaiteya ye hedehededelaoma wa ya kita. Na huyana ya tolobui meta lampa kabatoledi haligigi-labui gole unai se ginaulti wa ya kitadi. ¹³ Yo lampa kabatoledi luwadi wa unai ginaulti hesau ye totolo ya kita kana kao doha tamowai, kana kwama lohalohana ye luwui ye dobi kaena ne unai, yo kaleko tupwana katulohana gole unai se ginaulti wa ye paihetakikili duwaduwalina ne unai. ¹⁴ Kuluna maiyawana se posiposikalili doha bagodu se guli na pulopulodi, yo doha kaleko posiposina,** na matana doha kaiwa kalapulupululuna. ¹⁵ Kaena kadi kao doha bolonisi** kaiwa kalapulupululukalilina unai se gabuhe'a'adi na se namanamali, yo kalinana daguguna doha kabaita se didi na dagugudi. ¹⁶ Iya nimakahatuna unai meta kipwala haligigi-labui ye kabikabihekahinidi, na kawana ne unai iyala kelepana mata teha labulabui ye tatapesama, yo kana kao ne ye sina doha mayadailaki mahanana dawayana bayabayaona.

¹⁷ Huyana ya kita meta ya guliyaboyabomdobi talanuwana ne unai, kagu kao doha ya boitako. Kabo nima kahatuna wa unai ye kabilaoma na ye wane, “Tabu ku matausi! Yau ede Bagubagunana yo Mulimulitana. ¹⁸ Yau Miyamiyahaina ede. Ya boita, na ya mauli'uyo yo kabo ya maumauli ye lau ee huya nige kana siga! Yau meta boita yo Hade kadi kii ya kabihekahinidi.**

¹⁹ Unai saha ku kitadi ta taba ku kulidobiyeidi, siya ede ginaulti saha teina se tubutubu ta yo ginaulti saha muliyena kabo se tubu ne. ²⁰ Kipwala haligigi-labui nimakahatugu unai ku kitadi wa yo hinage lampa kabatoledi haligigi-labui wa kaniyodi wadawadamdi

** **1:7:** Se gwali: Hedehedede ta meta Sakaliya 12:10 ye katai, na nuwanuwatuna ede huyana Yesu se hesataulo meta tau'iyala tamowaina hesau wamali ye hai na iya ye gwalilapai (Yowane 19:37). Na nuwanuwatu ta nige taugwalina wa ye bom mo, na Dius yodi tauwoyawoya yo tamowai maudoidi, kaiteyadi se hedede bena Yesu se unui. ** **1:8:** Alepa meta leta bagubagunana yo Omega meta leta mulimulitana kalina Giliki yodi leta leleina unai. Unai Alepa yo Omega meta kabahetubu yo kabagehe heyahayasonidi. ** **1:10:** Guiyau yona mayadai nuwatulobaina ede Yesu yona tolo'uyo mayadaina, iya ede Sabati, o Dimdimyena se wane *Sunday*. ** **1:14:** Doha bagodu se guli na pulopulodi, yo doha kaleko posiposina: Lausoiso ta unai hedehedede mamohoidi meta, Kuluna maiyawana se posiposikalili doha mamoe wiyadi posiposina yo sinou, na ginaulti ta meta nige yoda tupwa ta unai.

** **1:15:** Bolonisi meta pawati kana kao hesau na ye pulupululu. ** **1:18:** Yau meta boita yo Hade kadi kii ya kabihekahinidi: Hedehedede ta kaniyona ede, yau boita yo Hade ya tanuwagaidi.

ede teina: Kipwala haligigi-labui wa meta siya ede ekalesiya bodadi haligigi-labui yodi anelu, yo lampa kabatoledi haligigi-labui wa meta siya ede ekalesiya bodadi haligigi-labui.”

2

Kulikuli ye lau ekalesiya bodana Epeso unai

¹ Na kabo ginauli hesau kana kao doha tamowai wa ye hededelaoma ye wane, “Ya henuwago bena ekalesiya bodana Epeso unai ne taubagunaedi** yona ku kulikulilau ku wane,

Teina yogu hedehedede ta se laowa kalimiuwai. Yau kipwala haligigi-labui nimakahatugu unai ya kabikabihekahinidi, yo lampa kabatoledi haligigi-labui gole unai se ginaulidi wa luwadiyena ya laulau. ² Yomi miyamiya, yomi paisowabayao yau debaguwai, yo pilipili kwa hekalodi na iyamo kwa tolokesegai ne kabidi ya kata. Yo hinage kabina ya kata meta tamowai yodi laulau yabayababadi nige kwa patulau udiyedi. Tamowai hekadi se hedede meta bena siya apostolo, na iyamo nige. Na kwa lautonogidi yo kwa lobaidi meta siya taukailupolupo. ³ Yo hinage kabina ya kata meta yau debaguwai kwa kamkamnakaliliko, na iyamo kwa tolokesegai, na nige nuwamiu se basabasa.

⁴ Na teina nuwanuwatu kesega mo ta unai kabo ya hegilugomiu: Huya bagubagunana unai yomi gadosisi laulaudi kwa nuwagabaediko. ⁵ Hage, huya bagubagunana unai yomi gadosisi miyamiyadi wa kwa hekaigonogonowaiyedi teina huya ta unai, na kwa kita! Unai bena kwa nuwabui na miyamiya bagubagunadi wa kwa ginauli'uyoidi. Ena nige kwa ginauli'uyoidi kabo ya laowa kalimiuwenya na yomi lampa kabatolena yona kabatolo wa unai ya haigabaei.** ⁶ Na iyamo miyamiya hesau kwa miyamiyai ne meta ye dudulai. Iya ede Nikolai tauhemuliwatanina** yodi miyamiya yabayababadi kwa subudi doha hinage yau ya subudi ne.

⁷ Kaiteya gonowana ye lapulapui meta bena Yaluwa Tabuna saha ye hededegabaedi ekalesiya bodadi udiyedi ne ye lapuidi. Yo kaiteya ye tolokesegai kabo yona dudulai ya mosei meta Yaubada yona paladaisi unai gonowana mauli kaiwana kaniyona ye kai.”

Kulikuli ye lau ekalesiya bodana Simulina unai

⁸ Na kabo ye hededelaoma ye wane, “Ya henuwago bena ekalesiya bodana Simulina unai ne taubagunaedi yona ku kulikulilau ku wane,

Teina yogu hedehedede ta se laowa kalimiuwai. Yau Bagubagunana yo Mulimulitana. Ya boita, na ya mauli'uyo. ⁹ Yomi kamkamna yo yomi deha ne kabidi ya kata, na iyamo Yaluwa Tabuna unai meta kwa gogokalili. Yo hinage kabina ya kata meta Dios hekadi siya nige Yesu tausunumaena se hededeheyaheyababagomiu. Yodi nuwatu meta bena siya Yaubada yona kaisunuwa tamowaidiyao, na iyamo siya meta Satani kana bodao. ¹⁰ Kamkamna matamiu ne udiyedi kabo kwa hekalodi, na tabu kwa matausi. Ya hededelaowa meta diyabolo kabo hekamiu ye haigomiu na ye tolegomiu numatutugudu unai bena ye lautonogigomiu. Na hekamkamna kabo kwa lobai se

** **2:1:** Ekalesiya bodana ... taubagunaedi: Buka ta Yowane ye kuli kalina Giliki unai, na inai yona hedehedede wa meta *angelos*, kaniyona ede tautauwasa. Ena Yaubada yona tautauwasa o yona taupaisowa kabo ta wane iya anelu. Na Hemasalaha bukana peina 2 yo 3 *angelosi* kaniyona ede ekalesiya bodadi taubagunaedi. ** **2:5:** Yomi lampa kabatolena yona kabatolo wa unai ya haigabaei: Teina hedehedede ta kaniyona ede hekamkamna kabo

se lobai, meta ekalesiya bodana ne ye hekaiyawasi. ** **2:6:** Nikolai tauhemuliwatanina meta nige kabidi ta katanamwanamwa siya kaiteyadi. Tausonoga hekadi yodi nuwatu bena yodi lauhekata unai meta tauda ta udiyedi laulau bikibikidi gonowana ta ginaginulidi, matawuwuna ede taba nige yoda ekalesiya maulina se heyababa.

lau ee mayadai saudoudoi (10).** Ena bena kabo unai kwa boita, iyamo bena kwa tolokesegai, na kabo mauli kolonana** ya leyawa.

¹¹ Kaiteya gonowana ye lapulapui meta bena Yaluwa Tabuna saha ye hedede-gabaedi ekalesiya bodadi udiyedi ne ye lapuidi. Yo kaiteya ye tolokesegai kabo taba nige boita helabuina yona hekamkamna ye lobai.”

Kulikuli ye lau ekalesiya bodana Pegamumu unai

¹² Na kabo ye hededelaoma ye wane, “Ya henuwago bena ekalesiya bodana Pegamumu unai ne taubagunaedi yona ku kulikulilau ku wane,

Teina yogu hedehedede ta se laowa kalimiuwai. Yau kawagu ta unai meta iyala kelepana mata teha labulabui. ¹³ Yomi kabamiya magaina ne kabina ya kata meta Satani yona kabatanuwaga magaina. Na iyamo yomi sunuma kaliguwai ne unai kwa tolokesegai, na nige kwa sunumakaiyawasi. Yo Antipasi yona miya mayadaina unai na saha ye tubu kalinawai wa meta kabina ya kata. Na yona hedehedede yo yona miyamiya udiyedi ye hemasalaha'uyoi meta iya tausunumaegau. Na se unui yomi magai ne unai, iya ede Satani yona kabamiya, iyamo komiu meta nige kwa sunumakaiyawasi kaliguwai.

¹⁴ Na nuwanuwatu hisa mo ta udiyedi kabo ya hegilugomiu: Tamowai hekadi luwamiu ne unai meta Balama yona lauhekata se lauwatanidi. Iya Balaki ye hekata, unai Isalaela tamowaidiyao ye woyahesuwaladi na se ba'aya meta suisui se kaita-lasamyedi koitau udiyedi na bulumadi se kaidi yo laulau bikibikidi se ginaulidi.**

¹⁵ Yo komiu hinage luwamiu ne unai tamowai hekadi meta Nikolai tauhemuliwatanina** yodi lauhekata yabayababadi se lauwatanidi. ¹⁶ Taba kwa nuwabui! Ena nige kwa nuwabui, meta nige bayaona kabo ya lage kalimiuwai na kelepa kawagu unai ta ya hepaisowa na tamowai me kabo ya iyalaidi.

¹⁷ Kaiteya gonowana ye lapulapui meta bena Yaluwa Tabuna saha ye hedede-gabaedi ekalesiya bodadi udiyedi ne ye lapuidi. Yo kaiteya ye tolokesegai kabo mana wadawadamna** ya mosei. Yo hinage weku posiposina unai meta hesa hauhauna kabo ya kuli na ya mosei. Na weku ta tauhaina ye bom mo kabo hesa ta kabina ye kata.”

Kulikuli ye lau ekalesiya bodana Tiyatila unai

¹⁸ Na kabo ye hededelaoma ye wane, “Ya henuwago bena ekalesiya bodana Tiyatila unai ne taubagunaedi yona ku kulikulilau ku wane,

Teina yogu hedehedede ta se laowa kalimiuwai. Yau Yaubada Natuna. Matagu doha kaiwa kalapulupululuna, yo kaegu kadi kao doha bolonisi, kaiwa kalapulupululukalilina unai se gabuhe'a'adi na se namanamali. ¹⁹ Yomi miyamiya kabidi ya kata, siya ede yomi gadosisi tamowai udiyedi, yomi sunuma kaliguwai, yomi paisowabayao yau debaguwai, yo pilipili luwadiyena na yomi tolokesegai ne. Yo hinage kabina ya kata meta miyamiya saha teina kwa ginaulidi ta se namwakalili na kabo huya bagubagunana unai wa.

** **2:10:** Mayadai saudoudoi kaniyona ede huyakubwakubwa mo. ** **2:10:** Kolona ne meta tauheloikailakwa ye baguna kabo kolona se kainaulyaei. ** **2:14:** Balama yona lauhekata wasana ede Numela 25:1-2 yo 31:16 udiyedi ku hasili. ** **2:15:** Nikolai tauhemuliwatanina ka hededehemasalaha Hemasalaha 2:6 hededehemasalahana ne unai. ** **2:17:** Mana: Dius tamowaidi kadi kulutubu mana se tanogogoidi kadi kai, na hekadi se usaidi kaba'usaidi hesau unai na se tole talam keisina unai (Esodo 16:32 yo Hebelu 9:4). Na Dius tamowaidiyao yodi nuwatu meta huyana Numa Tabuna yona huyatatagwaligwali bolimai 586 bc unai peloweta Yelemaiya mana kaba'usaidi wa ye hai na ye tolewadam Nebo kudulina na duhana unai. Temenai kabo ye miyamiya ye lau ee Mesaiya yona huyahemasalahana. Tenem huyana ne unai kabo Yaubada Dius tamowaidi mana ye hekai'uyoidi.

²⁰ Na nuwanuwatu kesega mo ta unai kabo ya hegilugomiu: Yomi talam kwa ginaulidi na sinebada Yesebela** yona laulau yabayababadi nige kwa hekaiyawasidi. Iya ye hedede'uyoi meta iya peloweta. Yona lauhekata unai tausunumaegau se bado ye woyahesuwaladi ede laulau bikibikidi se ginaulidi yo tamowai suisui se kaitalasamyeyidi koitau udiyedi na bulumadi se kaidi. ²¹ Yona huya ya mosei bena yona laulau bikibikidi udiyedi ye nuwabui, na nige ye henuwa. ²² Unai kabo ya hekasiyebwakaliliyei. Yo kaiteyadi maiyanao se ganaganawali** na yona laulau bikibikidi ne udiyedi nige se nuwabui, kabo ya hekamkamnakaliliyedi. ²³ Yo kababoita kasiyebwana ya tole iya yona lauhekata tauginauliwatanina maudoidi wa kalidiwai. Teina unai ekalesiya bodadi maudoidi kabo kabigu se kata meta yau tamowai yodi nuwanuwatu yo yodi henuhenuwa ne kabidi ya kata. Yo komiu hesau to hesau ba'aya saha kwa ginaginaulidi wa maisadi kabo ya lediwa.

²⁴ Na kabina ya kata Tiyatila unai meta komiu hagamiu na sinebada Yesebela yona lauhekata bikibikidi nige kwa ginauliwatanidi yo Satani yona nuwanuwatu wadawadamdi nige kwa henuwa bena kabidi kwa kata. Ede nige nuwatu hesau unai ya hepolohegomiu, na ginauli kesega mo ta ya hedede kalimiuwai ede ²⁵ taba yomi sunuma unai kwa tolokesegai ye lau ee kana siga ya laowa.

²⁶ Na kaiteya ye tolokesegai yo yogu nuwatu ye ginauliwatanidi ye lau ee kana siga tanoubu ta yona huyagehe unai, kabo gigibwali ya mosei na basileiya maudoidi ye tanuwagaidi.

²⁷ Iya kabo ye tanuwagaidi, na nige gonowana ye katekamkamnaedi, yo ye koikesikesidi doha gulewa. *(Same 2:9)*

²⁸ Na tautolokesegai ne kabo gigibwali kesegana Tamagu unai ya hai wa, iya hinage kabo ye hai yo Sae Kubwana** kabo ya mosei. ²⁹ Kaiteya gonowana ye lapulapui meta Yaluwa Tabuna saha ye hededegabaedi ekalesiya bodadi udiyedi ne bena ye lapuidi.”

3

Kulikuli ye lau ekalesiya bodana Sadisi unai

¹ Na kabo ye hededelaoma ye wane, “Ya henuwago bena ekalesiya bodana Sadisi unai ne taubagunaedi yona ku kulikulilau ku wane,

Teina yogu hedehedede ta se laowa kalimiuwai. Yau kaliguwai meta Yaubada Yaluwana haligigi-labui** yo kipwala haligigi-labui.

Yomi miyamiya kabidi ya kata. Tamowai matadiwai kami kao doha sola kwa sunusunumaegau, iyamo yomi sunuma kaliguwai meta kwa hekaiyawasidiko. ² Unai bena kwa kenotolo'uyo! Yomi miyamiya kabikabidi namwanamwadi hekadiyo sola kwa miyamiyaidi ne bena kwa hebayao'uyoidi, madai nige bayaona na se tauwadam. Matawuwuna saha kwa miyamiyaidi ta ya kitadi meta nige se dudulaikalili yogu Yaubada matanawai. ³ Unai saha se hekatagomiuko yo kwa lapuidiko ne bena kwa nuwanuwatuidi, na kwa ginauliwatanidi yo kwa nuwabui. Na ena nige kwa kenotolo, kabo ya laowa kalimiuwai na ya hekamkamnagomiu. Yogu laowa ne doha taukaiwahali, na nige kabina kwa kata kaiuyana kabo ya laowa.

⁴ Na yomi ekalesiya bodana ne Sadisi unai meta tamowai hisa yodi kaleko nige se hebikidi.** Unai kabo kaleko posiposidi ya moseidi yo maiyaguwao ka miya, matawuwuna yodi miyamiya namwanamwadi debadiwai ye launamwanamwaeidi.

** **2:20:** Yesebela meta Isalaela basileiyana yodi wasawasa Ahaba mwanena unai ye heyaheyasoniyei, na iya meta koitau tautaba'ohuidi yo yona laulau se yababa. Wasana ku hasili 1 Kin 16–21 udiyedi. ** **2:22:** Ganaganawali kaniyona hesauna ede koitau taba'ohuina. ** **2:28:** Sae Kubwana kaniyona ede saedikwai yo tanuwaga gigibwalina hekihekinoina. ** **3:1:** Yaubada Yaluwana haligigi-labui meta Yaubada Yaluwana Tabuna. ** **3:4:** Yodi kaleko nige se hebikidi: Hedehedede ta kaniyona ede yodi ekalesiya miyamiyadi yo yodi sunuma se namwa Yaubada matanawai.

⁵ Kaiteya ye tolokesegai, kabo kana kaleko posiposina ya mosei, gonogonowana doha siya Sadisi unai kadi kaleko posiposidi ya moseidi wa. Tautolokesegai ne hesana taba nige ya sokehai mauli bukana unai, na Tamagu yo yona anelu matadiwai kabo ya hededeheemasalaha meta iya hesana kabina ya kata. ⁶ Kaiteya gonowana ye lapulapui meta Yaluwa Tabuna saha ye hededegebaedi ekalesiya bodadi udiyedi ne bena ye lapuidi.”

Kulikuli ye lau ekalesiya bodana Piladelepiya unai

⁷ Na kabo ye hededelaoma ye wane, “Ya henuwago bena ekalesiya bodana Piladelepiya unai ne taubagunaedi yona ku kulikulilau ku wane,

Teina yogu hedehedede ta se laowa kalimiuwai. Yau Tabuna yo Mamohoina.** Yau meta wasawasa Dawida yona tanuwaga gigibwalina kiina kaliguwai.** Ena keda ya soke meta nige gonowana hesau ye gudui, yo ena ya gudui meta nige gonowana hesau ye soke. ⁸ Yomi miyamiya kabidi ya kata. Kwa kita! Matamiu ne unai kawakeda ya sokeyako, na nige gonowana hesau ye gudui. Kabina ya kata meta yomi bayao nige se laki. Iyamo yogu lauhekata kwa kawakabiyeidi yo nige kwa uhalaegau. ⁹ Kabina ya kata meta Piladelepiya unai Dius tamowaidi hekadi. Siya nige tausunumaegau, na siya Satani kana bodao. Se hedede bena siya Yaubada yona kaisunuwa tamowaidiyao, na yau ya hedede meta siya nige, na siya taukailupolupo. Kwa kita! Kabo ya woyaidima yo ya hedede na se guliyaboyabomdobi talanuwamiu ne udiyedi, unai kabo se nuwatulobai meta yau ya gadosisiyeigomiu. ¹⁰ Yogu hedehedede bena kwa tolokesegai wa meta kwa ginauliwataninamwanamwaei. Unai laukitalakilaki huyana ne unai yau kabo ya kitahetetegomiu. Laukitalakilaki ta kabo tanoubu maudoina se hekalo, na unai tanoubu ta tamowaidi maudoidi Yaubada kabo ye lautonogidi.

¹¹ Yau nige bayaona kabo ya laowa. Unai yomi sunuma unai bena kwa tolokesegai, to taba nige yomi kolona** ne kwa kabisapulidi. ¹² Kaiteya ye tolokesegai kabo ya hetolo ye hemala duu bayabayaona yogu Yaubada yona Numa Tabuna unai,** na taba nige numa ne ye laugabaei. Yo iya kalinawai yogu Yaubada hesana yo yona magari lakilakina hesana yo hinage hesagu hauhauna kabo ya kulidi. Magai lakilakina ta, iya ede Yelusalema hauhauna, galewa ne unai yogu Yaubada kalinawai kabo ye dobima. ¹³ Kaiteya gonowana ye lapulapui meta Yaluwa Tabuna saha ye hededegebaedi ekalesiya bodadi udiyedi ne bena ye lapuidi.”

Kulikuli ye lau ekalesiya bodana Laodisiya unai

¹⁴ Na kabo ye hededelaoma ye wane, “Ya henuwago bena ekalesiya bodana Laodisiya unai ne taubagunaedi yona ku kulikulilau ku wane,

Teina yogu hedehedede ta se laowa kalimiuwai. Yau hesagu hesau meta ‘Mamohoi’. Yau Yaubada yona nuwanuwatu tauhemasalahataubigaidi, yo yau Yaubada maid-
agu na ginauli maudoidi ka hetubudi. ¹⁵ Yomi miyamiya kabidi ya kata meta yomi

** **3:7:** Mamohoina meta Yesu hesana hesau, na kaniyona ede Yesu meta nige lupu hesau kalinawai, na yona hedehedede maudoina siya mamohoi. ** **3:7:** Dawida wasawasa, iya ede Yelusalema gana kawakedana kana kii taukitaheteten. Hinage gonogonowana doha Yesu galewa kiina ye kitahetete. ** **3:11:** Kolona ne meta tauheloikailakwa ye baguna kabo kolona se kainauyaei. ** **3:12:** Kabo ya hetolo ye hemala duu bayabayaona yogu Yaubada yona Numa Tabuna unai: Hedehedede ta kaniyona ede iya kabo tamowai saesaena galewa ne unai.

sunuma kaliguwai kwa kaokaobuibui.** Ya henuwa bena taba kwa mose'uyoigomiu kaliguwai yo kwa hemuliwatanigau. ¹⁶ Na komiu yomi sunuma kaliguwai meta kwa nuwalabulabui, unai kabo ya kaisogabaegomiu. ¹⁷ Komiu kwa wane, 'Kai gogo tamowaidiyao! Yoma gogo se bado yo nige saha hesau unai ka deha.' Na nige kabina kwa kata meta komiu nige yomi gwauyala hesau, yo tamowai meta se katekamkamnaeigomiu, yo kwa dehakalili, yo komiu meta ma matagibugibumiu yo ma taugaibumiu. ¹⁸ Unai ya hededehebasibagomiu ede teina: Gole mamohoina yo a'ana kwa hemaisa kaliguwai, unai kabo kwa wasawasa. Yo kaleko posiposidi kwa hemaisadi kwa likwadi, unai kabo taugaibumiu taumwadimwadinena ne kwa suma. Yo mata kana mulamula kwa hemaisa na matamiu ne udiyedi kwa saudi, unai kabo gonowana kwa kaikewanamwanamwa.**

¹⁹ Siya kaiteyadi ya gadosisiyeidi, ede ya dilaidi yo yodi miyamiya yabayababadi udiyedi ya tolehedululaidi. Unai kwa nuwabui yo kwa mose'uyoigomiu kaliguwai ma nuwakohihaimiu.

²⁰ Kwa lapulapui! Kawakeda kawamatana unai ya totolo na ya koikoi. Ena kaiteya kalinagu ye lapui na keda guduna ye soke yo ye yogaisinigau yona numaena, kabo ya mwalaesae yo maiyagu ka kaikai.

²¹ Kaiteya ye tolokesegai kabo yona dudulai ya mosei meta telona unai kabo ye tuli yogu telona dedekanawai. Teina ta gonogonowana doha yau kagu waiunu maudoidi ya saedikwaidi na yogu telona ya hai Tamagu dedekanawai. ²² Kaiteya gonowana ye lapulapui meta Yaluwa Tabuna saha ye hededegebaedi ekalesiya bodadi udiyedi ne bena ye lapuidi.”

4

Yowane Yaubada yona telona ye kita galewa ne unai

¹ Ginauli ya kitabagubagunaidi wa gehedi wa unai kabo ya kaikewa'uyo ede keda sokesokekaulina ya kita galewa ne unai. Yo kalina daguguna doha bwagigi ye hedehed-edelaoma ye wane, “Ku saema inai, na saha mulidiwai kabo se tubu ne ya hekitago.”

² Makesega kabo Yaluwa Tabuna ye tanuwagaigau na galewa ne unai telona ya kita na unai ginauli hesau ye tutuli. ³ Na telona unai tautuli wa yona namanamali meta doha weku saesaedi gesepa yo kaneliyeni yodi namanamali ne. Yo wali telona wa kewana unai na dawayana kana kao meta doha emeladi** dawayana telona wa ye sinahetakikili.

⁴ Telona ya kitabagunai wa meta telona badodi 24 udiyedi se hetakikili. Yo babadao badodi 24 se tutuli telona wa udiyedi. Siya kaleko posiposidi se likwadi, yo kadi kolona meta gole kuludiyao ne udiyedi.

⁵ Telona wa unai namanamali ya kitadi se silisili yo tulutululu se koikoi dagugudi se laoma ya lapuidi. Yo telona wa kawamatanawai meta osili haligigi-labui se kalakalasi. Siya meta yaluwa haligigi-labui Yaubada maiyanao wa. ⁶ Yo telona kawamatanawai

** **3:15:** Kwa kaokaobuibui: Yowane yona kulikuli unai hedehedededi meta, kowa nige ku gwagwama yo nige ku gigibwali. Yo kulikuli hesauna ne, taba kwa mose'uyoigomiu kaliguwai yo kwa hemuliwatanigau, Yowane ye kuli, taba kwa gwagwama o kwa gigibwali. Nuwanuwatuna ede, ena waila ye gwagwama o ye gigibwali, kabo ta kabitonogi na kamnana ta lapui. Na ena nige, kabo kamnana nige gonowana ta kabilobai matawuwuna kamnana doha ginauli maudoidi ne. Teina meta ekalesiya maulina heyaheyasonina: Tabu yoda miyamiya gonogonowana doha tanoubu maudoina, na bena se kitalobaida meta kita Yesu Keliso tausunumaena. ** **3:18:** Gole ... yo kaleko posiposidi ... yo mata kana mulamula: Teina gogodiyao ta meta magari Laodiseya yodi wasawasa gogodi, na Yesu ye haidi sunuma wasawasadi heyaheyasonidi: Wasawasa Yesu ye ledima meta se miya nige kana siga, yo ena Yesu ye deulihe'a'ada yo ye kabihenamwanamwada meta mamohoi ta a'a yo ta namwanamwa. ** **4:3:** Gesepa, kaneliyeni, yo emeladi siya weku saesaedi maisadiyao se laki, yo wasawasa tamowaidiyao kabo se hepaisowadi yodi pasa. Kadi kao ede, gesepa dubadubana doha bwatano maiyana posiposina, kaneliyeni ede pulupululuna, na emeladi meta kalakalawana.

ginauli hesau kana kao doha gabwa na kitakitana doha galasi na yona nega meta doha kilisito.**

Na ginauli maumaulidi hasi telona wa se tolohetakikili, na dageladi yo talanuwadi meta mata se hemwayaudi. ⁷ Ginauli maumaulina bagubagunana wa kuluna kana kao doha laiyou, helabuina kana kao doha bulumakau hakiyana, hehaiyonana kana kao doha tamowai, yo hehasina kana kao doha magesubu ye loiloi.

⁸ Ginauli maumaulidi hasi wa meta kesega kesega pepenao haligigi-kesega (6) yo taudi maudoina yo pepedi gunidiyao udiyedi meta mata se hemwayaudi. Mayadai yo boniyai udiyedi nige se kaiyawasi na se hedehedebasae se wane,

“Tabuna, tabuna, tabuna,
kowa Guiyau Yaubada Gigibwalikalilina.
Kowa ede huya bagubagunana unai,
wau teina,
yo huya sola kabo se laoma ne udiyedi.”

⁹ Na huyana ginauli maumaulidi hasi wa yodi hedebasae yo hekasisi yo lautoki se mosei iya telona unai tautuli yo miyamiyahaina wa kalinawai, ¹⁰ meta hinage babadao 24 wa se guliyaboyabomdobi na telona unai tautuli wa yo iya taumiya ye lau nige kana siga wa se taba'ohui. Yo kadi kolona se toledobiyedi telona kawamatanawai na se wane, ¹¹ “Yoma Guiyau, kowa ede yoma Yaubada.

Ku namwakalili,

unai ka hedebasaego yo ka hekasisiyego,
yo yom gigibwali debanawai ka taba'ohuigo.

Matawuwuna kowa ginauli maudoidi tauhetubudi
yo yom nuwanuwatu unai se tubu yo se miya.”

5

Buka nokunokuna yo Mamoe Natuna

¹ Na kabo telona unai tautuli wa ya kita na nimakahatuna ne unai buka nokuna, na teha labui ne udiyedi meta kulikulidiyao. Na buka nokuna wa unai dedeli haligigi-labui. ² Yo anelu gigigigibwalina ya kita kalina lakilakina unai ye uda'udai ye wane, “Kaiteya yona dudulai gonogonwana kabo dedeli haligigi-labui ne ye haigabaedi na buka nokuna ne ye soke?” ³ Na nige hesau galewa o tanoubu o tauboiboita yodi magari unai gonowana buka wa ye soke na ye hasili. ⁴ Ya doukalili, matawuwuna nige hesau yona dudulai gonowana buka nokuna wa ye soke na ye hasili. ⁵ Kabo babadao wa kadi kaha hesau ye hededelaoma kaliguwai ye wane, “Tabu ku doudou! Sola Laiyoni** ne ku kita! Yuda kana boga unai ye laoma, yo iya Dawida kana isimulita saesaekalilina. Iya kana waiunu maudoidi ye saedikwaidiko, unai gonowana dedeli haligigi-labui ne ye haigabaedi na buka nokuna ne ye soke.”

⁶ Kabo Mamoe Natuna ya kita kana kao doha se unuhemwaloiyako ye totolo duwaduwali ne unai telona wa kawamatanawai. Iya meta ginauli maumaulidi hasi yo babadao wa se tolohetakikili. Yo donana** haligigi-labui kuluna ne unai. Yo hinage matana** haligigi-labui, siya meta yaluwa haligigi-labui Yaubada ye hetamalidi se lauko tanoubu maudoidi udiyedi. ⁷ Ye sae ede telona unai taututuli wa nimakahatuna unai buka nokuna wa ye hai. ⁸ Na huyana ye hai meta ginauli maumaulidi hasi yo babadao 24 wa se guliyaboyabomdobi Mamoe Natuna matanawai. Na maudoidi

** **4:6:** Kilisito meta weku kana kao doha galasi ye negakalili. ** **5:5:** Laiyoni kaniyona ede iya tauwoyawoya

gigigigibwalikalilina. ** **5:6:** Donana haligigi-labui kaniyona ede Yaubada yona bayao yo yona gigibwali se

heyaheyasoniyei. ** **5:6:** Matana haligigi-labui meta udiyedi kabo gonowana ginauli maudoidi ye kitadi yo kabidi ye kata.

nimadiyena meta hapu yo gaeba gole, meta udiyedi inisenisi se mwayau. Inisenisi ta meta Yaubada yona tamowai yodi tapwalolo. ⁹Yo wana hauhauna se wanai se wane, “Mamoe Natuna! Kowa ku bom mo gonowana buka nokuna wa ku hai yo dedelina ne ku haigabaedi.

Matawuwuna kowa se unuhemwaloigo,
yo kwasinam unai tamowai ku hemaisahaidi se hemala Yaubada yona tamowai.
Siya meta boga, kalina, dahi, yo basileiya udoi'udoj udiyedi se laoma.

¹⁰Tamowai wa ku kaisunuwaidi bena se hemala yom basileiya bodana
yo yoda Yaubada yona taukaitalasang,**
yo tanoubu ta maudoina kabo se tanuwagai.”

¹¹Kabo hinage anelu gwaudi nige gonowana ta hasilihegehedi ya kitadi yo kalinadi ya lapuidi. Siya duwaduwaline unai telona yo ginauli maumaulidi yo babadao wa se tolohetakikilidi.

¹²Se wana ma kalinalakilakidi se wane,
“Mamoe Natuna! Kowa se unuhemwaloigo.

Kowa ku bom mo gonowana kabo yom gigibwali, wasawasa, sibasiba, yo bayao yo kam kao saesaena mamohoina debadiwai ka hedebasaego yo ka hekasisiyeigo.”

¹³Kabo ginauli maudoidi galewa, tanoubu ta yo tauboiboita yodi magari udiyedi yo gabwa luwadiyena, siya ede ginauli maudoidi maumaulidi Yaubada ye hetubudi wa, kalinadi ya lapuidi se wanawana se wane,

“Kowa telona unai tautuli yo Mamoe Natuna,

ka hedebasaegomiu yo ka hekasisiyeigomiu,

yo kami kao saesaedi mamohoidi yo yomi tanuwaga gigibwalina debadiwai ka taba'ohuigomiu ye lau ee nige kana siga.”

¹⁴Kabo ginauli maumaulidi hasi wa se wane, “Mamohoi”, yo babadao wa se guliyaboyabomdobi na Yaubada yo Mamoe Natuna wa se kaihelahuidi.

6

Dedeli bagubagunana - Saedikwai

¹Ya kaikaikewa na Mamoe Natuna wa buka nokuna dedeli haligigi-labui wa udiyedi bagubagunana ye haigabaei. Kabo ginauli maumaulidi hasi wa hesauna kalinana ya lapui doha tulutululu daguguna na ye wane, “Ku laoma!” ²Ya kaikaikewa na matagu ne unai hosi posiposina, na taugeluina wa pidu kabatuuna ye kabikabi. Yo Yaubada iya kana kolona ye mosei, na ye gelu ye lau bena kana waiunu maudoidi ye iyalaiddi yo ye saedikwaidi.

Dedeli helabuina - Iyala

³Huyana Mamoe Natuna buka dedelina helabuina ye haigabaei, meta ginauli maumaulina helabuina kalinana ya lapui ye wane, “Ku laoma!” ⁴Kabo hosi pulupululukalilina hesau ye pesama. Kabo Yaubada gigibwali ye mosei taugeluina wa unai bena tanoubu ta unai nuwadaumwali ye haigabaei, na unai tamowai se unu'unuhemwaloi'uyoidi. Yo iyala kelepana ye mosei iya unai.

Dedeli hehaiyonana - Hasahasali

⁵Huyana Mamoe Natuna dedeli hehaiyonana ye haigabaei, meta ginauli maumaulina hehaiyonana kalinana ya lapui ye wane, “Ku laoma!” Ya kaikaikewa na matagu ne unai hosi dubadubana ya kita, na taugeluina wa sikele ye kabikabi nimana wa unai. ⁶Na kabo dagugu doha tamowai kalinana ya lapui ginauli maumaulidi hasi wa luwadiwai ye laoma na ye hededelau hosi taugeluina wa unai ye wane, “Witi yo bali pwalawadi maisadi ne ku helakidi, kabo mayadai kesega unai tamowai ye paisowa na

** 5:10: Taukaitalasang nuwanuwatuna ku hasili Hemasalaha 1:6 hededehehemasalaha unai.

maisana ye hai ne unai kabo witi pwalawana 1 kilo mo o bali pwalawana 3 kilo mo ye hemaisa. Na tabu olibe oelana yo waina ne ku heyahayababadi!”**

Dedeli hehasina - Boita

⁷ Huyana Mamoe Natuna dedeli hehasina ye haigabaei, meta ginauli maumaulina hehasina kalinana ya lapui ye wane, “Ku laoma!” ⁸ Ya kaikaikewa, na matagu ne unai hosi kahukahusana ya kita! Na taugeluina hesana ede Boita, na Hade meta hosi taugeluina wa dagelana unai ye hemuhemuliwatani. Kabo Yaubada yodi gigibwali ye moseidi bena tanoubu teha hasi ta unai na teha kesega mo tamowaidiyao se unuhemwaloidi iyala kelepana unai, yo hasahasali unai, yo kasiyebwa hekahekawadi udoi'udo udiyedi, yo tanoubu ta suisuidiyao kaikaikalasidi udiyedi.

Dedeli hehaligigina - Yaubada wasana namwanamwana debanawai se boita

⁹ Huyana dedeli hehaligigina ye haigabaei, meta tamowai yaluwadi ya kitadi kabakaitalasam milana gunina ne unai. Tamowai wa meta se unuhemwaloidiko, matawuwuna ede Yaubada yona hedehehede se hedehehemasalaha yo se tolokese gaidi yodi sunuma ne udiyedi. ¹⁰ Na ma kalinalakilakidi se yogalau Guiyau unai se wane, “Guiyau Gigibwalikalilina, kowa tabuna yo mamohoina! Huya lohana saha na kabo tanoubu taumiya idi ku hekasadi yo kwasinamai kadi gum ku haidi?”

¹¹ Na kabo kesega kesega kana kwama posiposina Yaubada ye moseidi na ye hedeledau udiyedi bena se nayanaya huyakubwakubwa mo, kana siga kadi kahao hekadi siya yodi hali taupaisowa hinage se unuhemwaloidi gonogonowana doha siya, na unai Yaubada yona hasihasili nowonowoina ye lobai.

Dedeli hehaligigi-kesegana - Matausilakilaki

¹² Ya kaikaikewa na Mamoe Natuna dedeli hehaligigi-kesegana ye haigabaei meta mwanikunikulakilaki tanoubu ta unai ye tubu. Mahana ye bui ye dubaduba doha gulewa duumna.** Waikena ne ye bui ye pulupululu doha kwasina, ¹³ yo kipwala galewa ne udiyedi se bekudobima tanoubu ta unai, doha bosibosi kaiwana yaumai ye nukui na kaniyodi se ulu. ¹⁴ Yo galewa ye taunokunoku ye sae doha buka se noku. Yo kuduli yo bwanabwanaluwa maudoidi yodi kabamiya se sigigabaedi.

¹⁵ Kabo tanoubu wasawasadiyao, tamowai saesaediya, iyala kapinadiyao, tamowai gogogogodi, tamowai bayabayaodi, heyayai tauhaidi, yo yailihai tamowaidi, maudoidi meta weku duhadiyao yo kuduli wekudi udiyedi se kenowadam. ¹⁶ Na se yogalau kuduli yo weku udiyedi se wane, “Kwa bekudobima na kwa tolewadamgai kabo telona unai tautuli ne taba nige ye kitagai yo Mamoe Natuna yona kouyalayala kabo taba nige ka hekalu! ¹⁷ Matawuwuna yodi kouyalayala mayadaina lakilakina meta ye laomako. Yo kabo kaiteya gonowana ye lulau tenem hekamkamna mayadaina ne unai?”

7

Yaubada hekihekinoi tauhaidi badodi 144 tausani

¹ Ginauli ya kitabagunaidi wa na mulidiwai anelu hasi ya kitadi se totolo tanoubu teha hasi ta udiyedi, na yaumai hasi ne se guduguidi bena tabu hesau ye towalau tano o gabwa o kaiwa hesau unai. ² Kabo anelu hesau ya kita teha kaluwabu ne unai ye saesaema, Yaubada Maumaulina yona hekihekinoi kabatolena tamowai udiyedi ginaulina meta ye bahebahei. Na ma kalinalakilakina ye yogalau anelu hasi wa udiyedi, siya ede Yaubada gigibwali ye moseidi kabo bwatano yo gabwa se heyababadi, na ye wane, ³ “Yaumai kwa guduguidi kabo tabu tano o gabwa o kaiwa se heyababadi kana siga yoda Yaubada yona taupaisowa debadi udiyedi hekihekinoi ta ka toledi.” ⁴ Na kabo

** **6:6:** Witi yo bali ... olibe oelana yo waina: Teina kai hasi ta meta Yowane yona huyawai se hemala tamowai kadi kai saesaedi. ** **6:12:** Gulewa duumna meta Yowane ye kuli, baike gouti wiyana unai se ginauli, na baike ne meta dubadubana.

siya hekihekinoi wa tauhaidi badodi numelana ya lapui, meta 144 tausani. Siya ede Isalaela kana bogao maudoidi udiyedi se laoma:

⁵ Yuda kana boga unai hekihekinoi tauhaidi wa badodi 12,000,

Lubeni kana boga unai 12,000,

Gada kana boga unai 12,000,

⁶ Asa kana boga unai 12,000,

Napatali kana boga unai 12,000,

Manase kana boga unai 12,000,

⁷ Simiyona kana boga unai 12,000,

Lewi kana boga unai 12,000,

Isakala kana boga unai 12,000,

⁸ Sebulona kana boga unai 12,000,

Yosepa kana boga unai 12,000,

yo Beniyamina kana boga unai 12,000.

Bodalakilaki kwama posiposidi lohalohadi se luwuidi

⁹ Mulinawai ya kaikaikewa na matagu ne unai meta boda lakilakikalilina, na taba nige gonowana hesau ye hasilidi. Siya meta basileiya, boga, dahi, yo kalina udoi'udoi udiyedi se laoma na se totolo telona matanawai yo Mamoe Natuna talanuwana unai. Kwama posiposidi lohalohadi se luwuidi, yo tutube bagadi se kabikabidi nimadiwai.

¹⁰ Se wowo ma kalina lakilakidi se wane, “Yoda kabihemauli ta meta yoda Yaubada, iya telona unai ye tutuli ne, yo Mamoe Natuna kalidiwai se laoma!”

¹¹ Anelu maudoidi ya kitadi meta telona yo babadao yo ginauli maumaulidi hasi wa se tolohetakikilidi, na kabo se guliyaboyabomdobi telona wa talanuwanawai na Yaubada se kaihelahui ¹² se wane,

“Mamohoi!

Hedebasae, didiga,

sibasiba, lautoki, hekasisi,

gigibwali yo bayao

se laowa kowa, yoma Yaubada, kalimwai ye lau ee nige kana siga.

Mamohoi!”

¹³ Kabo babadao wa hesau ye henamaiyeigau ye wane, “Teina kwama posiposina tauluwuidi ta, siya meta kaiteyadi, yo haedi se laoma?” ¹⁴ Ya hededelau unai ya wane, “Tanuwaga, kowa kabina ku kata.” Kabo ye wane, “Tamowai ta meta hekamkamnalak-ilaki luwanawai na se tolokesegai wa, yo kadi kwama se deuliheposiposidiko Mamoe kwasinana unai. ¹⁵ Teina unai ede siya Yaubada yona telona talanuwanawai se totolo

yo mayadai yo boniyai yona Numa Tabuna** unai se tabataba'ohu, yo iya telona unai tautuli ne kabo loguloguna unai se miya.

¹⁶ Taba nige se hasali'uyo.

Taba nige se gadomagu'uyo.

Mahana taba nige ye sinaidi,

o gigibwalina ye gabudi.

¹⁷ Matawuwuna ede Mamoe Natuna, iya duwaduwali ne unai telona wa matanawai ye totolo ne kabo ye kitahetetedi,

na ye woyaidi se lau waila maumaulina bonobonowasidiyao udiyedi.

Yo Yaubada kabo matasulu maudoidi matadi ne udiyedi ye sauhaidi.”

8

Mamoe Natuna dedeli hehaligigi-labuina ye haigabaei

** 7:15: Yaubada ... yona Numa Tabuna ede galewa.

¹ Huyana Mamoe Natuna dedeli hehaligigi-labuina ye haigabaei, meta awa tehana solasolana unai galewa ne unai meta nige dagugu hesau.

² Kabo anelu haligigi-labui Yaubada talanuwanawai tautotolo ne ya kitadi meta bwagigi haligigi-labui Yaubada ye moseidi kalidiwai.

³ Hinage anelu hesau ye laoma kabakaitalasam milana wa dedekanawai ye tolo, na nimana ne unai meta inisenisi kabagabuna gole ye kabikabi, na inisenisi Yaubada ye mosehelaki kalinawai. Inisenisi yo Yaubada yona tamowai yodi tapwalolo ye kabikesegeidi na bena kabokaitalasam milana gole unai ye kaitalasameidi, iya telona talanuwanawai ye totolo wa. ⁴ Na anelu wa nimana ne unai meta inisenisi kasuna yo Yaubada yona tamowai yodi tapwalolo se sae Yaubada unai. ⁵ Na kabokaitalasam milana unai kaiwa kalakalasidi ye haidi na inisenisi kabagabuna wa ye hemwayau, na ye gabadobiyei tanoubu kewana unai. Na temenai kabokaitalasam dagugudi, namanamali se sili yo mwanikuniku se masalaha.

Bwagigi bagubagunadiyao hasi

⁶ Kabo anelu haligigi-labui siya ede bwagigi haligigi-labui se kabikabidi wa, se nonohaidi bena kabokaitalasam se yuhidi.

⁷ Anelu bagubagunana yona bwagigi ye yuhi, na aisi tupidi** yo kaiwa kalakalasina yo hinage kwasina se taumasalaha na se bekudobi tanoubu ta kewanawai. Na Yaubada tanoubu ta ye boli teha haiyona, na teha kesega ye kalasi, ede kaiwa yo lagau kalakalawadi maudoidi se kalasigehe.

⁸ Anelu helabuina yona bwagigi ye yuhi, na ginauli hesau kana kao doha kuduli lakilakina na ye kalapulupululu ye bekudobi gabwa ne unai. Na Yaubada gabwa ye boli teha haiyona, na teha kesega ye bui ye hemala kwasina, ⁹ yo tenem teha kesega ne unai ginauli maumaulidi gabwa ne unai meta se mwaloi, yo menai hinage waga maudoidi meta ye heyababadi.

¹⁰ Anelu hehaiyonana yona bwagigi ye yuhi, kabokaitalasam lakilakina ye kalapulupululu doha osili galewa ne unai ye bekudobi. Na Yaubada sagasaga yo waila bonobonowasidi maudoidi ye hekasadi teha haiyona, na teha kesega unai kipwala wa ye taludobi.

¹¹ Kipwala wa hesana ede Nisa. Na yona kabatalu wailana wa meta ye henisa, na waila wa taunumana gwaudi se boita, matawuwuna waila wa ye nisakalili.

¹² Kabo anelu hehasina yona bwagigi ye yuhi. Na Yaubada mahana ye hekasadi teha haiyona, na teha kesega ye heyababadi ede ye sinakaiyawasi. Gonogonowana doha waikena. Yo hinage kipwala maudoidi ye hekasadi teha haiyona, na teha kesega kipwalana ye heyababadi ede se sinakaiyawasi. Na mayadai yo boniyai ye hekasadi teha haiyona, na mayadai teha kesega yo boniyai teha kesega meta kalidiwai nige dawaya hesau.

¹³ Ya kaikaikewa, na magesubu ya kita kewamolosi ne unai ye loiloi'usi na ma kalinalakilakina ye heyoheyoga ya lapui ye wane, "Oo yababa! Oo yababa! Oo yababa! Nige bayaona kabokaitalasam anelu haiyona wa yodi bwagigi se yuhidi na dagugudi udiyedi yababadi lakilakidi se lau tanoubu taumiaina udiyedi!"

9

Yababa lakilakina bagubagunana

¹ Anelu hehaligigina yona bwagigi ye yuhi, na kipwala galewa ne unai ye bekudobimako tanoubu ta kewanawai wa ya kita. Na ebisi kabasokena kiina Yaubada ye mosei kalinawai. ² Duha wa ye soke, meta kasulakilaki ye pesama, kana kao doha kaiwa lakilakikalilina ye kalasi na kasupouna. Duha unai kasupou wa ye saesaema

** **8:7:** Aisi tupidi: Kalina Dimdim unai se hedede *hail*. Iya ede nabu tupidi se hemala aisi. Kadi kao doha weku gagilidi, na hekadiyo lakidi doha pou.

meta mahana yo galewa ne ye hemasigiliguidi. ³ Yo kasu wa unai mwadimwadi se tautauomasalahama na se dobi se talu tanoubu ta unai yo Yaubada yodi gigibwali ye moseidi doha gigidonadona tanoubu ta udiyedi ne. ⁴ Na ye hededelau udiyedi meta tabu tanoubu ta lagauna o ginauli hesau kinikinina o kaiwana hesau se heyababa, na siya kaiteyadi Yaubada yona hekihekinoi nige debadi ne udiyedi se bom mo kabo se hekamkamnadi. ⁵ Yaubada nige gigibwali ye moseidi bena unai kabo tamowai ne se unuhemwaloidi, na bena nawalai haligigi unai kabo se hekamkamnakaliliyeidi. Na hekamkamna ne kamnana meta doha gigidonadona tamowai ye kalasi. ⁶ Mayadaidi ne luwadiyena tamowai kabo boita se wasenei, na iyamo nige gonowana se lobai. Se henuwakalili bena se boita, na iyamo boita kabo ye wasabugabaedi.

⁷ Mwadimwadi wa kitakitadi meta doha hosi se henonohadi iyala hesabana. Kuludi ne udiyedi meta ginauli hesau kana kao doha kolona gole, yo kulukuludi kadi kao doha tamowai kuluna. ⁸ Kuludi maiyawadi doha sinesineo kuludi maiyawadi lohalohadi, yo kawadiyao mwakadi meta doha laiyni mwakadi. ⁹ Nuwapoudi kadi laugudugudu kadi kao meta doha pawati unai se ginaulidi, yo pepediyao balamumudi meta doha hosi gwaudi kaliyota se niulidi na se heloi se laulau iyala hesabana. ¹⁰ Siya ma giudi na udiyedi yodi kabakaikagwali doha gigidonadona, yo giudi ne udiyedi meta yodi gigibwali kabo unai gonowana tamowai se hekamkamnadi ye lau ee nawalai haligigi. ¹¹ Yodi wasawasa meta anelu, iya ede ebisi taukitahetetena. Kalina Hebelu unai hesana ede Abadon, na kalina Giliki unai ede Apoliyon.**

¹² Yababa bagubagunana ede ye tubuko, na yababa labui siya ede sola kabo se laoma.

Yababa lakilakina helabuina

¹³ Kabo anelu hehaligigi-kesegana yona bwagigi ye yuhi, na kabo kabakaitalasang milana gole iya Yaubada matanawai ye totolo ne donanao udiyedi kalina hesau ye laolaoma ya lapui. ¹⁴ Kalina wa ye hededelau anelu hehaligigi-kesegana iya bwagigi taukabikabina wa unai ye wane, “Anelu hasi Yaubada ye paipaihekahinidi Yupalata sagasagana lakilakina unai wa ku yailihaidi.” ¹⁵ Yo anelu hasi Yaubada ye kabinonohaidiko wa teina mahana ta yo mayadai ta yo waikena ta yo bolimai ta hesabana, Yaubada siya kabo ye yailigabaedi. Na tanoubu tamowaidi Yaubada ye hekasadi boda haiyona, na anelu wa kabo boda kesega ne se unuhemwaloidi. ¹⁶ Anelu wa yodi tau'iyala siya hosi taugeluidi badodi numelana ya lapui meta 200 miliyon.

¹⁷ Yogu kenosuwai wa unai meta hosi yo taugeluidi ya kitadi kadi kao doha teina: Taugeluidi nuwapoudi kadi laugudugudu kulikulidi meta pulupululudi, kalakalawadi yo yogeyogedi. Yo hosi wa kuludiyao kadi kao doha laiyni kuludiyao yo kawadi wa udiyedi meta kaiwa kalapulupululudi, kasu yo salpa panena se pesama. ¹⁸ Yaubada tamowai ye hekasadi boda haiyona na boda kesega mo se unuhemwaloidi kabaheyababadi haiyona wa udiyedi, siya ede kaiwa kalapulupululuna, kasu, yo salpa panena hosi kawadi udiyedi se pesapesama wa. ¹⁹ Hosi wa yodi gigibwali meta kawadiyao yo giudiyao ne udiyedi, na giudiyao ne kadi kao meta doha mwata ma kuludiyao, na se hepaisowadi na udiyedi tamowai se hekamkamnadi.

²⁰ Tamowai nige se unuhemwaloidi kabaheyababa haiyona ne udiyedi, siya meta nimaginaulidiyao taba'ohuidi ne se kabihkahinidi. Sola nige se nuwabui na demoni yo koitau taba'ohuidi meta nige se hekaiyawasidi. Koitau ta, siya gole, siluba, bolonisi, weku yo kaiwa udiyedi se ginaulidi na nige gonowana saha hesau se kita o se lapui o kaedi udiyedi se taihile. ²¹ Yo hinage yodi kaikaiunu, taubalau yo kalawai kabikabidi, laulau bikibikidi yo kaikaiwahali ne udiyedi meta nige se nuwabui.

** 9:11: Abadon meta hesa na kaniyona ede heyababa, na hesa Apoliyon kaniyona ede tauheyaheyababa.

10

Buka nokuna gagilina

¹ Na kabo anelu gigigigibwalina hesau ya kita galewa ne unai ye dobidobima. Kana kaleko meta yada ye luwui, na kuluna kewana ne unai meta wali, yo kana kao ne dawayana doha mahana, yo kaena kadi kao doha duu kalakalapulupululudi. ² Na nimana ne unai meta buka nokuna gagilina kalakalanonohana ye kabikabi. Na kaekahatuna meta ye utuyei gabwa ne kewana unai na kaeseuseulina ye utuyei tano ne kewana unai. ³ Na kabo ye yogahilakilaki doha laiyouni ye kalagagalakilaki. Huyana ye yogahi meta tulutululu haligigi-labui kalinadi se toledi. ⁴ Huyana tulutululu haligigi-labui wa se hedehedede meta bena ya hetubu ya kulikuli, na kalina hesau galewa ne unai ya lapui ye wane, “Saha tulutululu haligigi-labui se hedededi ta ku nuwatukasinidi na tabu ku kulikulidobiyedi.”

⁵ Kabo anelu wa ya kita ye totolo gabwa yo tano kewadi udiyedi wa nimakahatuna ye helelesae galewa ⁶ bena ye hededekaigwala Yaubada hesanaena. Yaubada meta iya miyamiyahaina, iya galewa, tanoubu, gabwa, na udiyedi ginaulidi maudoidi tauhetubudi wa. Anelu wa yona hededekaigwala unai ye wane, “Yaubada saha ye hinelidi bena kabo ye ginaulidi ne taba nige ye hepahilidi. ⁷ Na huyana bena kabo anelu hehaligigi-labuina wa yona bwagigi ye yuhi, mayadaidi ne udiyedi meta Yaubada yona nuwatu wadawadamdi maudoidi kabo ye hegehedi, doha ede ye hededehemasalahadiko yona heyayai tauhaidi peloweta wa udiyedi.”

⁸ Kabo kalina galewa ne unai ya lapui'usei wa ye hedede'uyo kaliguwai ye wane, “Ku lau anelu gabwa yo tano kewadi udiyedi ye totolo ne kalinawai, na nimana ne unai buka nokuna kalakalanonohana wa ku hai.” ⁹ Ede ya lau anelu wa unai na ya kaibwadai taba buka nokuna gagilina wa ye leyama. Na ye hededelaoma ye wane, “Ku hai na ku kai. Bogam ne unai kamnana kabo ku lapui ye nisakalili, na kawam ne unai kabo kamnana doha kamwakamwa.” ¹⁰ Buka nokuna gagilina anelu nimana unai wa ya hai na ya kai meta kawagu ne unai kamnana doha kamwakamwa, na ya tonoli ye dobi bogagu ne unai meta kamnana wa ye nisakalili. ¹¹ Kabo kalina wa ye hededelaoma kaliguwai ye wane, “Saha Yaubada ye hinelidiko boga, basileiya, kalina yo wasawasa gwaudi hesabadi wa bena ku hededehemasalaha'uyoidi.”

11

Yaubada yona hedehedede tauhededehemasalahana labui

¹ Kabo Yaubada didiyali hesau ye haiyama kaliguwai, kana kao doha kabanowonowoi, na ye hededelaoma ye wane, “Ku lau yogu Numa Tabuna yo kabakaitalasam milana ku nowonowoidi yo tautaba'ohu menai ne ku hasilidi. ² Na Numa Tabuna bakubakuna ne ku laugabaei na tabu ku nowonowoi, matawuwuna ya moseiyako dagela tamowaidiyao udiyedi. Na waikena badona 42** unai siya kabo yogu magai lakilakina ne se utukalakalatei. ³ Kabo yogu tauhededehemasalaha labui kabadoudou kalekodi se luwuidi yo gigibwali ya moseidi na mayadai badona 1,260 luwadiyena se hededepeloweta.” ⁴ Teina taudi labui ta siya ede olibe kaiwadi labui yo lampa kabatoledi labui se totolo Yaubada matanawai,** iya ede tanoubu ta Guiyauna. ⁵ Ena tamowai hesau ye kaipate bena ye heyababadi kabo kaiwa kalakalasina kawadi ne udiyedi se tatapesama na kadi waiunu ne se gabuhemwaloidi. Doha teina kabo tauhewaiunudi maudoidi se unuhemwaloidi. ⁶ Teina tauhededehemasalaha labui ta yodi huyahedede peloweta unai meta yodi gigibwali gonowana galewa se gudui, kabo

** 11:2: Waikena badona 42, iya meta bolimai haiyona yo tupwana, o mayadai badodi 1,260.

** 11:4: Olibe

kaiwadi labui yo lampa kabatoledi ne hedehedededi meta hinage Sakaliya 4:1-14 unai ku hasilidi.

taba nige nabu ye talu, yo hinage gonowana waila se buidi se hemala kwasina, yo ena se henuwa kabo gonowana yababa udoi'udoj se toledi tanoubu ta unai.

⁷ Huyana yodi hedepeloweta gehena ne unai kabo ebisi unai suisui yabayababana ye pesama ne kabo ye luluidi, na ye saedikwaidi yo ye unuhemwaloidi.

⁸ Sinalediyao kabo magai lakilakina kamwasalakina ne unai se balabala. Magai ta hesana wadawadamna se katai Sodoma o Aikupito. Teina meta siya hinage yodi Guiyau kabahesataulona magaina. ⁹ Mayadai haiyona yo tehana udiyedi meta tamowai siya dahi, boga, kalina, yo basileiya maudoidi udiyedi, tauhedehemasalaha wa sinaledi ne se kaikaikewaidi na nige se henuwa bena se toledi bwayabwaya unai. ¹⁰ Na tanoubu ta taumiyaena maudoidi kabo nuwadiyao se namwakalili, ede se gwayalalakilaki na se haikaikainauya'uyoidi. Matawuwuna ede tauboiboita labui wa meta tanoubu ta tamowaidiyao se hekamkamnadi.

¹¹ Na mayadai haiyona yo tehana mulinawai Yaubada mauli yahuwana ye moseidi, ede se mauli'uyo na kaedi udiyedi se tolo, na taukitadi meta se matausikalili. ¹² Kabo kalinalakilaki galewa ne unai ye dobima se lapui ye hedehehede lau taudi labui wa udiyedi ye wane, "Kwa saema inai." Kabo yada unai se sae galewa, na kadi waiunu wa meta se kaikaikewaidi.

¹³ Tenem mahanana ne unai mwanikunikulakilaki ye tubu. Na Yaubada magai lakilakina wa ye boli teha saudoudoi na teha kesega meta ye tatagwaligwali. Mwanikuniku wa unai meta tamowai badona 7,000 se boita. Na siya taumaumauli maudoidi se matausikalikalili, ede Yaubada galewa ne unai se kaihelahui.

¹⁴ Yababa lakilakina helabuina ede ye laomako, na nige bayaona kabo yababa hehaiyonana ye laoma.

Bwagigi hehaligigi-labuina

¹⁵ Na kabo anelu hehaligigi-labuina yona bwagigi ye yuhi, na kalina lakilakidi galewa ne unai se wane,

"Tanoubu ta basileiyana maudoidi meta se laomako se hemala yoda Guiyau yo yona kaisunuwa tamowaina yodi kabatanuwaga.

Yo Yaubada kabo ye tanuwagaidi ye lau ee huya nige kana siga."

¹⁶ Kabo babadao badodi 24 yodi telona udiyedi se tutuli Yaubada talanuwana unai wa se guliyaboyabomdobi na Yaubada se kaihelahui ¹⁷ se wane,

"Guiyau, kowa Yaubada Gigibwalikalilina.

Kowa ede wau teina yo huya bagubagunana unai.

Ka lautokiyeigo,

matawuwuna ede yom gigibwali lakilakikalilina unai ku hetubu tanoubu ta ku tanuwagai.

¹⁸ Tanoubu ta basileiyadi se koipikalikaliliko,

na yom huyakouyalayala mayadaina meta ye lagema.

Mahanana ye lagema bena tauboiboita ku tolehekasadi,

yo yom heyayai tauhaidi peloweta wa, yo yom tamowai, yo siya kaiteyadi hesam tauhekasisiyeina, gagilidi yo lakilakidi, kainauya kabo ku moseidi.

Yo mahanana ne unai kabo hinage tanoubu ta tauheyababana ku heyababadi."

¹⁹ Na kabo Yaubada yona Numa Tabuna galewa ne unai ye tasoke ede kalona ne unai talam keisina** ye taumasalaha. Na namanamali se silima, tulutululu dagugudi, yo mwanikuniku se masalaha, yo hinage aisi tupidi se taludobima doha nabu.

12

Waihiu yo delegoni

** 11:19: Talam keisina kaniyona Hebelu 9:4-5 unai ye hedehemasalaha.

¹ Kabo tautau hesau nuwanuwatuna ye saekalili ye masalaha galewa ne unai ya kita. Iya ede waihiu, kana kaleko meta mahana ye luwui, yo kaena gunina ne udiyedi meta waikena, yo kolona ma kipwalana saudoudoi-labui kuluna ne unai. ² Waihiu wa meta ye diyaka. Na yona huyalabalaba ye hanahanauma, na kamkamnana debanawai ede ye doudou.

³ Kabo tautau hesau'uyo galewa ne unai ye masalaha. Unai delegoni lakilakina pulupululuna ya kita. Kuluna meta haligigi-labui na maudoidi meta ma kadi kolona gagilidiyao, yo donana meta badodi saudoudoi. ⁴ Na delegoni kipwala maudoidi ye hekasadi teha haiyona, na giuna wa unai teha kesega kipwalana galewa ne unai ye kuyahebekudima tanoubu ta unai. Na waihiu wa nige bayaona kabo ye labalaba na talanuwana wa unai meta delegoni ye totolo na ye nayanaya bena waihiu ne natuna ye labasi kabo ye kai.

⁵ Na waihiu wa natuna ye labasi ede loheya. Wawaya ta kabo basileiya maudoidi tanoubu ta unai ye tanuwagaidi, na nige gonowana ye katekamkamnaedi. Na anelu hesau wawaya loheya wa ye gilihai, na ye bahesaei Yaubada yo yona telona galewa ne unai wa udiyedi. ⁶ Na waihiu wa ye wasabu ye lau balabala hesau unai. Na menai magai hesau Yaubada ye kabinonohaiyako, na unai kabo se kitahetete mayadai badona 1,260.

Iyala galewa ne unai

⁷ Na galewa ne unai iyala ye tubu. Iya ede Maikeli yo yona anelu bodana delegoni wa se iyalai, na delegoni wa yo yona anelu bodana, siya hinage Maikeli yo yona anelu bodana wa se iyalaedi. ⁸ Na delegoni wa nige yona bayao gonowana ye saedikwaidi, ede iya yo yona anelu bodana wa galewa ne unai se tuuhesepadi. ⁹ Delegoni lakilakina ta, iya ede mwata huya bagubagunana unai wa** yo iya diyabolo. Hesana ede Satani. Iya tanoubu ta maudoina taulupohaidi. Iya se gabadobiyeiyama tanoubu ta unai, yo yona anelu maudoidi maiyanao hinage.

¹⁰ Kabo kalina lakilakina hesau galewa ne unai ya lapui ye wane, “Teina mahana ta unai meta Yaubada yona kabihemauli yo yona wasawasa gigibwalina yo yona kaisunuwa tamowaina yona tanuwaga gigibwalina se masalaha. Matawuwuna ede kada kahao tauhegihegiludi wa ye gabadobiyeiyako tanoubu ta unai. Nabada wa unai iya meta yoda Yaubada matanawai ye totolo na ye hegihegiludi mayadai yo boniyai unai.

¹¹ Na tausunuma wa iya se saedikwai

Mamoe Natuna kwasinana unai yo Yaubada yona hedehedede yodi hededehe-masalhana unai.

Yodi mauli nige se gadosisikaliliyeidi,

unai boita matausina meta nige kalidiwai.

¹² Unai komiu galewa unai taumiya maudoimiu kwa gwauyalalakili.

Na ahani mo komiu tanoubu yo gabwa taumiyaedi, matawuwuna ede diyabolo wa ye dobiwako kalimiuwai!

Na iya ye kouyalayalakili,

matawuwuna ye nuwatulobaiyako yona mahana meta ye kubwakalili.”

¹³ Huyana delegoni wa ye kitalobai meta iya se gabadobiyeiyako tanoubu ta unai, ede wawaya loheya taulabasina wa ye henakuwatawatani. ¹⁴ Na Yaubada magesubu lakilakina pepena labui ye moseidi waihiu wa unai, bena kabo udiyedi ye loi ye lau balabala wa unai, Yaubada magai ye kabinonohaiyako wa unai. Na menai kabo se kitahetete bolimai haiyona yo tehana. Na teina unai kabo mwata wa taba nige gonowana ye lau ye lobai. ¹⁵ Na mwata wa kawana unai waila ye kalagabaei doha kabaita, ede waihiu wa ye didiwatani bena ye yaluhai. ¹⁶ Na tano waihiu wa ye sagui

** **12:9:** Mwata huya bagubagunana unai wa wasana meta Genese 3:1-15 unai ku hasili.

meta ye taigali na kabaita wailana delegoni ye kalagabaei wa ye dididobi luwana ne unai na ye tauwadam. ¹⁷ Kabo delegoni wa ye kouyalayalakalili waihiu wa unai. Ede ye lau kana isimulitao hekadi ye iyalaide. Siya meta Yaubada yona laugagayo taukawakabiyeina, yo Yesu yona hedehedede taumiyawatanina. ¹⁸ Na delegoni wa meta ye totolo gabwa salagomgomna unai.

13

Suisui nuwamatamatausina gabwa unai ye poesaema

¹ Kabo suisui nuwamatamatausina ya kita gabwa unai ye poesaema. Iya donanao saudoudoi yo kulunao haligigi-labui,** kolona saudoudoi gagilidi kuluna wa udiyedi, yo kulunao kesega kesega udiyedi meta hesa Yaubada kabahededeheyaheyababana. ² Suisui ya kita wa kana kao doha lepadi, na kaena kadi kao doha beya kaena yo kawana doha laiyni kawana.** Na delegoni wa iya yona bayao yo telona yo yona tanuwaga gigibwalina lakilakina ye mosehekawa suisui wa unai. ³ Suisui wa kuluna hesau kana kao doha kelepa unai se gedali na iyamo ye namwanamwa'uyo. Tamowai maudoidi se nokokalili na suisui wa se hemuliwatani. ⁴ Yo delegoni wa se kaihelahui, matawuwuna tanuwaga gigibwalina ye mosehekawayako suisui wa unai, yo hinage suisui wa se kaihelahui yo se wane, “Kaiteya kabo doha suisui ta?” yo “Kaiteya gonowana ye iyalaei?”

⁵ Suisui wa gonowana ye hededesaesae yo Yaubada ye hededeheyaheyababa, yo yona tanuwaga gigibwalina gonowana ye hepaisowa nawalai 42. ⁶ Ede kawana ye soke na Yaubada ye hededeheyababa meta unai hesana yo yona kabamiya magaina yo galewa ne taumiyaidi ye hededeheyaheyababadi. ⁷ Talam ye lau suisui wa unai bena Yaubada yona tamowai ye iyalaide yo ye saedikwaidi, yo yona tanuwaga gigibwalina ye hepaisowa kabo boga, tamowai, kalina yo basileiya maudoidi ye tanuwagaidi. ⁸ Tanoubu taumiyaidi maudoidi kabo suisui wa se kaihelahui. Siya meta kaiteyadi hesadiyao Yaubada nige ye kulidi mauli bukana unai huyana tanoubu sola nige ye hetubu wa unai. Buka wa meta Mamoe Natuna se unui'usei wa yona buka.

⁹ Iya kaiteya beya toletolena, bena ye lapulapui!

¹⁰ Ena kaiteya Yaubada yona kaisunuwa unai bena se tole numatutugudu unai, iya kabo menai se tole.

Ena kaiteya Yaubada yona kaisunuwa unai bena se unuhemwaloi kelepa unai, kabo kelepa unai se unuhemwaloi.

Teina unai Yaubada yona tamowai bena se tolokesegai ma taubigadi yo yodi sunuma unai se tolotahitahi.

Suisui nuwamatamatausina hesau bwatano unai ye poesaema

¹¹ Kabo suisui nuwamatamatausina hesau ya kita, bwatano ne unai ye poesaema, iya donanao labui doha mamoe natuna, na kalinana daguguna doha delegoni. ¹² Iya suisui bagubagunana wa yona tanuwaga gigibwalina maudoina unai ye tolo na ye paisowa, yo tanoubu ta taumiyaidi ye woyaidi na suisui bagubagunana wa se kaihelahui. Iya ede kuluna hesau kelepa unai se gedali na ye namwanamwa'uyo wa. ¹³ Yo suisui helabuina wa tamowai maudoidi matadiyena laulau gigigigibwalidi ye ginaulidi, doha hinage kaiwa kalakalasinna galewa ne unai meta ye hetaludobiyeiyama tanoubu ta unai. ¹⁴ Yaubada yona talam unai ede suisui helabuina ta suisui bagubagunana wa yona gigibwali unai laulau gigigigibwalidi ye ginaulidi, na udiyedi tanoubu taumiyaidi

** **13:1:** Suisui ... donanao saudoudoi yo kulunao haligigi-labui: Tausonoga hekadi yodi nuwanuwatu meta suisui ta Loma yodi gabemani ye heyaheyasoniyeyi, yo teina kulukulu haligigi-labui ta iya ede Loma magari lakilakina kuduli haligigi-labui udiyedi se ginauli ye heyaheyasoniyeyi, yo dona saudoudoi ta siya ede yodi wasawasa saudoudoi.

** **13:2:** Lepadi, beya, yo laiyni, siya ede suisui bayabayaodi yo kaikaikalasidi.

ye lupohaidi. Ye hededelau tanoubu taumiyaide udiyedi bena suisui bagubagunana wa koitauna se ginauli, iya ede kelepā unai kuluna se gedali'usei wa, na sola ma maumaulina. ¹⁵ Hinage gigibwali suisui helabuina wa kalinawai, unai bena suisui bagubagunana koitauna wa yawasina ye mosei. Unai kabo koitau wa ye hedehedede, yo siya kaiteyadi nige iya se taba'ohui ne kabo ye hededegabaedi na se unuhemwaloidi. ¹⁶ Na kabo tamowai dobidobidi yo tamowai saesaedi, tamowai gogogodi yo tamowai dehadehadi, yailihai tamowaidi yo heyayai tauhaidi, tamowai maudoidi ne suisui helabuina wa ye lauhelilidi bena kabo hekihekinoi se haidi nimakahatudi o debadi udiyedi. ¹⁷ Teina unai kabo nige gonowana tamowai hesau saha hesau ye hemaisa o ye lokunegabaei, na siya kaiteyadi suisui ta hesana, o hesana ne numelana tauhaidi ne se bom mo. ¹⁸ Siya kaiteyadi tausibasiba kabo teina nuwatu ta se nuwatulobai. Kaiteya tamowai iya sibasibana gonowana kabo ye kaipate numela ta nuwanuwatuna bena ye nuwatulobai. Numela ta meta tamowai yona numela. Iya ede 666.**

14

Mamoe Natuna yo tamowai 144 tausani

¹ Kabo ya kaikewalau, na Saiyona Koyana tupina unai Mamoe Natuna maiyanao tamowai 144 tausani se totolo ya kitadi. Siya debadiyao udiyedi meta Mamoe Natuna hesana yo Tamana hesana. ² Yo hinage galewa ne unai dagugu ya lapui doha kabaita lakilakina daguguna yo doha tulutululu daguguna. Dagugu ya lapui wa doha hapu taukaikaiheyaidi yodi hapu se kaikaiheyaidi. ³ Na tamowai 144 tausani wa wana hauhauna se wanai Yaubada yona telona yo suisui maumaulidi hasi yo babadao wa talanuwadiwai. Nige gonowana hesau wana ta ye wanai, na siya taudi 144 tausani tanoubu ta unai Yaubada ye yailihaidiko wa se bom mo gonowadi wana ta se wanai. ⁴ Teina ta meta siya ede kaiteyadi nige taudi se hebikidi waiwaihiuwo udiyedi.** Yodi laulau se a'akalili. Siya Mamoe Natuna se hemuliwatani yona kabalau maudoina udiyedi. Teina tamowaidi ta meta se mose'uyoidi Yaubada unai, ede tanoubu ta unai ye yailihaidiko na se hemala kaitalasam bagubagunadi Yaubada yo Mamoe Natuna udiyedi. ⁵ Siya nige hedehededelupolupo hesau kawadi ne unai ye pesa yo nige kabahegiludi hesau.

Anelu haiyona

⁶ Kabo anelu hesau ya kita yada duwaduwalinawai ye loilo, yo yona paisowa meta wasa namwanamwana miyamiyahaina ye wasawasaduwaiyei tanoubu unai taumiya kalidiyena, ye lau basileiya, boga, kalina, yo boda maudoidi udiyedi. ⁷ Ye hedehedede ma kalinalakilakina ye wane, “Yaubada bena kwa hekasisiyei yo kwa hededetausaei, matawuwuna hekasa mahanana ye lagemako. Galewa yo tanoubu yo gabwa yo waila bonobonowasidi tauhetubudi wa kwa kaihelahui.”

⁸ Anelu bagubagunana ye lau na kabo helabuina ye mulitama ye wane, “Ye tatagwaligwali, ye tatagwaligwali! Magai lakilakina Babiloni** ye tatagwaligwaliko. Iya yona gadosisi bikibikidi doha waina bayabayaona unai tamowai ye henumadi. Teina unai basileiya maudoidi ye woyahesuwaladi na se ba'aya.”

** **13:18:** Numela 666: Tenem huyana ne unai, tamowai kaiheya se ginauli na yodi tamowai saesaedi hesadi se buidi se hemala numela na se kaikunuwadawadaei. Yowane yona kulikuli ne unai ye masalaha meta 666 ede tamowai yabayababana yona numela. Iyamo nige kabina ta kata iya kaiteya. ** **14:4:** Siya ede kaiteyadi nige taudi se hebikidi waiwaihiuwo udiyedi: Hedehedede ta ye lau laulau bikibikidi kabikabidi udoi'udoi udiyedi yo

hinage ye lau koitau taba'ohuidi unai. ** **14:8:** Babiloni meta basileiya yo hinage magai lakilakina teha Pesiya unai, wauta iya ede *Irak* basileiyana. Babiloni tamowaidi Isalaela se iyalaedi na se woyalaedi yodi basileiya unai se miya. Tausonoga se wane, Hemasalaha bukana ta unai Babiloni meta Loma magaina lakilakina heyaheyasonina, iyamo nuwanuwatuna hinage ye lau basileiya hekadi udiyedi.

⁹ Anelu labui wa se lauuko na kabo hehaiyonadi ye mulitama, na ma kalinalakilakina ye wane, “Ena kaiteya suisui ne yo koitauna ye taba'ohuidi yo yona hekihekinoi debana o nimana unai ye hai, ¹⁰ kabo Yaubada yona kouyalayala lakilakina ye talu kalinawai. Yona kouyalayala ne meta doha waina bayabayaokalilina ye ini na unai kana waiunu tamowaidiyao ye henumadi. Kaniyona ede Yaubada yona anelu yo Mamoe Natuna matadiyena siya kabo hekamkamna se lobai salpa kaiwana kalakalasina gigigigibwalina unai. ¹¹ Yo kadi hekamkamna kaiwana kalakalasina kasuna nige gonowana ye kaiyawasi. Siya kaiteyadi suisui yo koitauna wa tautaba'ohuina ye hesana hekihekinoina tauhaina meta boniyai yo mayadai unai nige gonowana se kamkamnakaiyawasi.” ¹² Teina ta unai ede bena Yaubada yona tamowai se tolokesegai ma taubigadi, na Yaubada yona laugagayo se kawakabiyeidi yo Yesu sunumana unai se tolotahitahi.

¹³ Kabo kalina hesau galewa ne unai ye hedehededelaoma ye wane, “Teina ta ku kulidobiyedi: Tauboitaa, siya ede Guiyau tausunusunumaena na mahana ta unai yo huya kabo se laoma ne udiyedi se boita, meta gonowana se gwauyala.” Na Yaluwa ye wane, “Mamohoi, kamkamna maudoidi ta kabo se laugabaedi na se kaiyawasi, yo yodi tolokesegai maisana kabo se hai.”

Yaubada tamowai yona huyahekasadi

¹⁴ Kabo ya kaikewalau, na matagu ne unai meta yada posiposina ye taumasalaha, yo ginauli hesau meta kewana wa unai ye tutuli kana kao doha tau natuna.** Yona kolona gole kuluna ne unai yo nimanawai meta witi kababoliboli matamatana.** ¹⁵ Kabo galewa ne unai anelu hesau Numa Tabuna unai ye pesama, yo ma kalinalakilakina ye yogalau yada ne unai tautuli wa unai ye wane, “Tanoubu ta masulina meta ye pogalako. Yom kababoliboli ne ku hai na ku hetubu ku boli, matawuwuna masuli huyabolina mahanana ede ye lagemako.” ¹⁶ Kabo yada kewana unai tautuli wa yona kababoliboli wa ye hekwade tanoubu kewana unai, na tanoubu masulina wa ye bolidi.

¹⁷ Kabo galewa ne unai anelu hesauna'uyo Numa Tabuna wa unai ye pesama, yo iya hinage nimana ne unai meta witi kababoliboli matamatana. ¹⁸ Hinage anelu hesau kabakaitalasang milana unai ye laoma, iya kaiwa kalakalasina tanuwagana, na kalina lakilakina unai ye yogalau kababoliboli matamatana taukabikabina wa unai ye wane, “Yom kababoliboli matamatana ne ku hepaisowa na tanoubu winena kaniyodiyao ku bolidi, matawuwuna kaniyodi wa se buinako.” ¹⁹ Anelu wa yona kababoliboli wa ye hekwade tanoubu ta kewana unai, na kabo wine kaniyodi ye tanogogoidi yo ye gabadobiyedi waina kabatamtamna lakilakina unai, iya meta Yaubada yona kouyalayala. ²⁰ Na magai lakilakina dagelanawai wine kaniyodi wa waina kabatamtam unai se utukalalateidi na se tamdi, na waina kabatamtam ne unai kwasina ye didipesama doha kabaita, lohana meta 300 kilomita** yo gabwatumna ede mita kesega yo tehana.

15

Anelu haligigi-labui yo yababa lakilakidi haligigi-labui

¹ Kabo galewa ne unai kabasiliyata tautauna saesaena hesau ya kita meta unai anelu haligigi-labui na nimadiwai yababa lakilakidi haligigi-labui mulimulitakalilidi. Mulimulitakalilidi kaniyona ede ena yababa lakilakidi ta se gehe, kabo Yaubada yona kouyalayala hinage ye gehe. ² Yo ginauli hesau ya kita kana kao doha gabwa na yona nega meta doha galasi yo ye sidosidoli doha kaiwa kalakalasina. Yo tamowai ya kitadi se totolo dedekanawai. Teina tamowaidi ta, siya meta yodi sunuma udiyedi se tolobayao

** **14:14:** Tau natuna: Daniyela 7:13 ku hasili na unai ku lobai meta teina ta Mesaiya hedehededena. ** **14:14:** Witi kababoliboli matamatana kana kao doha kelepa youyouna. ** **14:20:** 300 kilomita meta Yowane Giliki tamowaidi yodi nowo ye hepaisowa na ye kuli ede 1,600 sitadiya.

na suisui wa yo koitauna nige se taba'ohuidi yo hesana numelana wa nige se hai. Siya maudoidi hapu Yaubada ye moseidi meta se kabikabidi. ³ Na Yaubada yona heyayai tauhaina Mose kana wana** yo Mamoe Natuna kana wana se wanaidi se wane, “Guiyau, kowa Yaubada Gigibwalikalilina!

Kowa ginauli lakilakidi yo saesaedi ku ginaulidi.

Yom laulau se dudulai yo se mamohoi.

Kowa basileiya maudoidi yodi wasawasa.

⁴ Oo Guiyau, tamowai maudoidi bena se hekasisiyego yo se hededetausaego, matawuwuna kowa ku bom ku tabu.

Basileiya maudoidi kabo se laoma se kaihelahuigo,

matawuwuna yom laulau dudulaidi ku hemasalahadi se kitadiko.”

⁵ Teina ya kitadi na mulidiwai ya kaikewa'uyo meta galewa ne unai Numa Tabuna, iya ede Yaubada kabataba'ohuina numana, meta sokesokena. ⁶ Numa Tabuna wa unai anelu haligigi-labui wa se pesama na yababa haligigi-labui wa meta nimadiyena. Siya kaleko posiposidi, a'adi, yo namwanamwadi se likwadi yo dagilolo gole se kauhetakikilidi duwaduwalidi ne udiyedi. ⁷ Kobo suisui maumaulidi hasi wa hesauna gaeba gole kesega kesega ye moseidi anelu haligigi-labui wa udiyedi. Teina gaeba ta meta Yaubada Miyamiyahaina yona kouyalayala udiyedi se mwayau. ⁸ Numa Tabuna wa Yaubada yona didiga yo yona gigibwali kasudi ye laugililai. Na nige gonowana hesau ye mwalaesae Numa Tabuna wa unai ye lau ee kana siga anelu nimadiwai yababa lakilakidi haligigi-labui wa se gehe.

16

Yaubada yona kouyalayala gaebana haligigi-labui

¹ Kobo kalina lakilakina ya lapui Numa Tabuna wa unai ye hedehededelau anelu haligigi-labui wa udiyedi ye wane, “Kwa lau, Yaubada yona kouyalayala gaebadi haligigi-labui wa kwa inigabaedi tanoubu kewana unai.” ² Anelu bagubagunana ye lau yona gaeba ye inigabaei tanoubu kewana unai, ede bonu yabayababadi yo kamkamnakalilidi se masalaha tamowai udiyedi, siya ede suisui wa yona hekihekinoi tauhaina yo koitauna tautaba'ohuina.

³ Kobo anelu helabuina yona gaeba ye inigabaei gabwa kewanawai, ede ye bui ye hemala tamowai boiboitadi kwasinadi, na unai ginauli maumaulidi maudoidi gabwa luwanawai se mwalo.

⁴ Na kobo anelu hehaiyonana yona gaeba ye inigabaei sagasaga yo waila bonobonowasidi udiyedi, na se buidi se hemala kwasina. ⁵ Kobo anelu hesau, iya ede waila tanuwagana, ya lapui ye wane,

“Yaubada, kowa Tabuna,

kowa ede wau teina yo huya bagubagunana unai.

Kowa meta ku dudulai,

matawuwuna yom hekasa ku ginaulidi ta.

⁶ Teina meta siya kaiteyadi yom tamowai yo peloweta wa kwasinadi se hebwalilidi, unai ede kwasina ku moseidi se numa yodi kawayagala maisana.”

⁷ Kobo kabakaitalasam milana unai kalina hesau ya lapui ye wane, “Mamohoi, Guiyau Yaubada Gigibwalikalilina, yom hekasa ne mamohoidi yo dudulaidi!”

⁸ Anelu hehasina yona gaeba ye inigabaei mahana kewanawai na unai gigibwali ye mosei bena gigibwalina wa unai kobo tamowai ye gabudi. ⁹ Unai mahana gigibwalina lakilakina wa tamowai ye gabuheyababadi, iyamo yodi laulau yabayababadi udiyedi

** 15:3: Mose kana wana meta Dutelonomi 32 unai ku hasili.

meta siya nige se nuwabui na Yaubada se hededetausae, na se tolo ede Yaubada, iya yababa lakilakidi tanuwagadi wa, hesana se hededeheyaheyababa.

¹⁰ Kabo anelu hehaligigina yona gaeba ye inigabaei suisui bagubagunana wa** yona telona unai, ede yona basileiya wa ye masigiligudui. Na tamowai se kamkamnakalili, unai memenadi se kapuyahisidi. ¹¹ Na yodi kamkamna yo bonudiyao wa debadiyena ede Yaubada, iya galewa ne unai taumiya wa, se hededeheyaheyababa. Na nige se henuwa bena saha yabayababadi se ginaulidi wa udiyedi se nuwabui.

¹² Kabo anelu hehaligigi-kesegana yona gaeba ye inigabaei Yupalata sagasagana** lakilakina kewanawai, ede wailana wa ye pitali, na unai wasawasa tamowaidiyao yo yodi tau'iyala tamowaidiyao tupwa kaluwabu unai yodi keda ye kabinonohai.

¹³ Kabo yaluwa bikibikidi haiyona ya kitadi kadi kao doha kwalukwalu. Hesau delegoni wa kawana unai ye pesama, hesau suisui bagubagunana wa kawana unai ye pesama, yo hesau pelowetalupolupo** wa kawana unai ye pesama. ¹⁴ Siya meta yaluwa bikibikidi yo laulau gigigigibwalidi udoi'udoi tauginaulidi. Na se pesa se lau tanoubu maudoina yodi wasawasa udiyedi, bena se woyagogoidima na Yaubada Gigibwalikalilina yona hekasa mayadaina unai kabo se iyalai.

¹⁵ Guiyau Yesu ye hedede ye wane,

“Kwa kita ne! Yogu laolaoma ne doha taukaiwahali! Kaiteya ye silasilawa yo kana kaleko tauna udiyedi ye kitahetetenamwanamwaeidi, kabo taba nige ma taugaibuna ye taitaihile na ye mwadine. Teina debadiyena ede iya gonowana ye gwauyala.”

¹⁶ Kabo yaluwa bikibikidi wa wasawasa maudoidi yo yodi tau'iyala se woyagogoidima magai hesau unai, kalina Hebelu unai magaina hesana ede Amagedon.

¹⁷ Na kabo anelu hehaligigi-labuina yona gaeba ye inidobiyei tanoubu yo galewa duwaduwalidi ne unai, na Numa Tabuna wa unai kalina lakilakina ye pesama Yaubada yona telona unai ye wane, “Ginauli maudoidi gehegedi ede teina!” ¹⁸ Kabo namanamali se sili, dagugu lakilakikalilidi, tulutululu dagugudi yo mwanikuniku lakilakikalilina. Tamowai yodi huyatubu unai ye laoma ee teina meta nige mwanikuniku hesau yabayababakalilina doha teina. ¹⁹ Magai lakilakina Babiloni** wa ye taigali teha haiyona, yo basileiya udoi'udoi udiyedi magai lakilakidi maudoidi se tatagwaligwali. Tenem unai Yaubada magai lakilakina Babiloni wa yona laulau yabayababadi ye nuwatuidi. Na yona kouyalayala ne meta doha waina bayabayaokalilina ye ini na unai ye henuma. ²⁰ Bwanabwanaluwa yo koya tupidi maudoidi se tauwadam. ²¹ Yo galewa ne unai aisi tupidi lakilakidi, polohedi nuwana 40 kilo, se bekudobima tamowai kewadiwai. Na aisi tupidi se taludobima ta meta se yababakalili, unai tamowai Yaubada se hededeheyaheyababa.

17

Waihiu ganaganawalina saesaena yo suisui bagubagunana wa

¹ Anelu haligigi-labui wa siya gaeba haligigi-labui se kabikabidi wa meta hesauna ye laoma na ye hededelaoma kaliguwai ye wane, “Ku laoma, waihiu ganaganawalina saesaena waila gwaudi dedekadiyena ye tutuli ne kana hekamkamna ya hekitago.**

** **16:10:** Suisui bagubagunana wa wasana ku hasili Hemasalaha 13:1-10 udiyedi. ** **16:12:** Yupalata sagasagana meta ye lakikalili, na ena waila unai ye didididi meta nige gonowana tau'iyala tamowaidiyao kabo se kawasi. ** **16:13:** Pelowetalupolupo iya ede suisui helabuina wa. ** **16:19:** Babiloni hededehehemasalhana ku lobai Hemasalaha 14:8 unai. ** **17:1:** Waihiu ganaganawalina saesaena waila gwaudi dedekadiyena ye tutuli meta magai lakilakina Babiloni ye heyaheyasoniyei, magaina wa sagasagana gwaudi dedekanawai. Na teina ta meta Loma magaina lakilakina wa ye heyaheyasoniyei, iyamo nuwanuwatuna hinage ye lau basileiya hekadi udiyedi.

² Na tanoubu ta yodi wasawasa maiyadi se ganawali, yo yona laulau bikibikidi** wa meta doha waina bayabayaona unai tanoubu tamowaidi se numayauyaule.”

³ Kabo Yaluwa Tabuna ye luwuigau yo anelu wa ye bahelaiegau balabalawai. Teme-nai waihiu ya kita meta suisui pulupululukalilina kewana unai ye tutuli. Na suisui ne tauna meta Yaubada kabahededeheyaheyababana hesadi se hemwayau, yo iya kulunao haligigi-labui yo donanao saudoudoi. ⁴ Waihiu wa yona kaleko meta pulupu-lulukalilina,** yo kana pasa meta gole, weku namanamalidi yo giniuba matapoudi. Iya keyaka gole ye kabikabi na kalona ne unai meta ginauli nuwamatamatausidi yo nuwamwadimwadinedi. Teina ta iya yona laulau bikibikidi ne udiyedi se laoma.

⁵ Debana wa unai meta hesa wadawadamna kulikulina doha teina:

“Babiloni,
magai saesaena,
kowa sinesineo ganaganawalidi
yo laulau nuwamatamatausidi sinadi.”

⁶ Yo waihiu wa ya kita meta Yaubada yona tamowai yo Yesu tausunumaena kwasinadi unai ye numayauyaule. Huyana ya kita meta ya siliyatakalili. ⁷ Kabo anelu wa ye hededelaoma kaliguwai ye wane, “Idohagi to ku siliyatakalili? Waihiu ne yo suisui kulukulunao haligigi-labui yo donanao saudoudoi unai ye gelu ne kaniyodi wadawadamdi kabo ya hededeheemasalahadi kalimwai. ⁸ Suisui ku kita wa, huya bagubagunana unai ye maumauli, na teina huya ta unai meta nige, yo nige bayaona kabo ebisi unai ye pesama na kana heyababa Yaubada ye kabinonohaiyako ne kabo ye lau unai. Tanoubu taumiyaide kaiteyadi hesadiyao Yaubada nige ye kulidi mauli bukana unai huyana tanoubu sola nige ye hetubu wa unai, siya suisui wa se kita meta se siliyatakalili. Iya huya bagubagunana unai ye maumauli, na teina huya ta meta nige, na nige bayaona kabo ye taumasalaha'uyo.”

⁹ Na anelu wa ye hedehede'uyo ye wane, “Teina ta tausibasiba se bom mo kabo se nuwatulobai: Kulukulu haligigi-labui wa meta kuduli haligigi-labui se heyaheya-soniyedi, udiyedi waihiu wa ye tutuli. ¹⁰ Siya meta hinage wasawasao haligigi-labui: haligigi se boitako, kesega ede iya sola ye tanutanuwaga, na mulimulitakalilina ede sola kabo ye laoma. Na ye laoma, kabo ye miya huyakubwakubwa mo. ¹¹ Na suisui wa huya bagubagunana unai ye maumauli, na teina huya ta unai meta nige, iya kabo ye hemala wasawasa hehaligigi-haiyonana. Iya meta haligigi-labui bodadi wa kadi kaha hesauna, na hinage kana hekamkamna Yaubada ye kabinonohaiyako ne kabo ye lau unai.

¹² Dona saudoudoi ku kitadi wa meta siya wasawasa saudoudoi sola nige basileiya hesau se tanuwagai. Na siya kabo tanuwaga gigibwalina se hai na suisui wa maidadi se hemala wasawasa awa kesega mo. ¹³ Siya meta nuwatu kesega unai, na yodi bayao yo yodi tanuwaga gigibwalidi se moseilaei suisui wa unai. ¹⁴ Wasawasa saudoudoi yo suisui wa kabo Mamoe Natuna se iyalai, na Mamoe Natuna kabo ye saedikwaidi, matawuwuna ede iya guiyau yodi Guiyau yo wasawasa yodi Wasawasa. Yo iya maiyanao meta yona yogayogahai yo kaisunuwa yo tautolotahitahi tamowaidi.”

¹⁵ Kabo anelu wa ye hededelaoma kaliguwai ye wane, “Waila ku kitadi dedekadiwai waihiu ganaganawalina saesaena ye tutuli wa, siya meta tamowai bodadi, boga, basileiya yo kalina udoi'udoit tamowaidiyao. ¹⁶ Dona saudoudoi yo suisui pulupululuna ku kitadi wa meta waihiu ganaganawalina saesaena wa kabo se hewaiunu. Yona gogo mauidoi kabo se haidi, yo yona kaleko kabo se pulisihaidi na ma taugaibuna. Kabo bulumana se kai yo kabitolei kabo kaiwa kalakalasi unai se gabudi. ¹⁷ Matawuwuna Yaubada nuwanuwatu ye toleyako nuwadi wa udiyedi bena yona nuwatu se ginauli-watanidi. Unai nuwadi se tolekesegaidi na yodi tanuwaga gigibwalina se moseilaei

** 17:2: Ganawali yo laulau bikibikidi kaniyona hesau ede koitau taba'ohuina.
pulupululukalilina meta wasawasa tamowaidi yodi kaleko yo maisadi se lakikalili

** 17:4: Kaleko ...

suisui wa unai ye lau ee kana siga Yaubada yona nuwatu maudoidi se hemamohoiyedi.
 18 Waihiu ku kita'usei wa meta iya magari lakilakina ye heyaheyasoniyei, iya ede tanoubu maudoina wasawasadiyao kadi tanuwaga.”

18

Magai lakilakina Babiloni ye tatagwaligwali

¹ Teina ginaulidi ta mulidiwai, anelu hesau ya kita galewa ne unai ye dobidobima. Iya yona tanuwaga gigibwalina meta ye saekalili, na namanamalina wa unai tanoubu maudoina ye hedawaya. ² Kalinalakilaki unai ye yoga ye wane,

“Ye tatagwaligwali, ye tatagwaligali!

Babiloni magari saesaena** ye tatagwaligwaliko!

Iya ye hemala demoni yo yaluwa bikibikidi maudoidi yodi kabamiya

yo manuwa bidabidadi yo suisui bidabidadi** yo nuwamatamatusidi maudoidi yodi kabamiya.

³ Yona laulau bikibikidi** doha waina bayabayaona

udiyedi basileiya maudoidi se numayauyaule,

yo tanoubu ta wasawasadiyao siya maiyadi se ganawali,

yo kana henuhenuwa udoi'udoj udiyedi ede tanoubu ta yona taukune tamowaidiyao yodi wasawasa se helakidi.”

⁴ Kabo kalina hesau galewa ne unai ya lapui ye wane,

“Yogu tamowai, komiu Babiloni magari lakilakina ne kwa pesagabaei,

kabo yona yababa ne udiyedi taba nige kwa kabisagusagu.

Teina unai kana hekamkamna ne kabo taba nige kwa hekalodi.

⁵ Yona yababa meta se laki yo se badokalili se sae ee galewa,

na yona yababa ne meta Yaubada nige gonowana ye nuwaluluhiyeidi.

⁶ Unai komiu tau'iyala** bena kwa hekamkamna gonogonowana doha kaiteyadi ye hekamkamnadiko wa.

Yababa saha ye ginaulidiko tamowai udiyedi taba maisadi ma labui ye haidi.

Ginauli nuwamatamatusidi yo nuwamwadimwadinedi ye moseidi tamowai udiyedi se numa wa meta

kana keyaka ne unai kwa inidi kwa hebayao'uyoidi na unai kwa henuma.

⁷ Hekamkamna yo doudoulakilaki kwa mosei unai

kana kao ede ye bom ye hededetausae'uyoi yo ye hewasawasa'uyoi,

matawuwuna ede nuwana ne unai ye wane, ‘Yau ta wasawasa waihiuna, yau ta nige kwabuli. Unai taba nige ya nuwadubu.’

⁸ Unai mayadai kesega unai kabo hekamkamna ye lobai,

siya ede boita, nuwadubu yo hasahasali.

Kabo kaiwa kalakalasi unai ye kalasi ye lau ee ye taukwadalele,

matawuwuna Guiyau Yaubada iya tauhekasana ne ye gigibwalikalili.”

⁹ Tanoubu ta wasawasadiyao, kaiteyadi iya maidanao se ganaganawali yo yona wasawasa gogodiyao se hepaisowadi wa, huyana Babiloni ye kalakalasi na kasuna se kita meta sabina se siyayau yo se doukalili. ¹⁰ Kedalohalohawai se totolo, matawuwuna

hekamkamna ye hekalodi wa se matausiyei, na se wane,

“Kapole! Kapole Babiloni, kowa magari lakilakina yo bayabayaona!

Iyamo mahana kubwakubwana mo unai kam heyababa ku lobai!”

** 18:2: Babiloni hededehemasalahana ku lobai Hemasalaha 14:8 unai. ** 18:2: Manuwa bidabidadi yo suisui

bidabidadi meta manuwa yo suisui Yaubada ye laugagayoidi wa. Lewitikasi 11 unai ta hasili. ** 18:3: Laulau

bikibikidi yo ganawali meta heyaheyasoni, na kaniyodi ede Yaubada ye sigigabaei na yona midi ye tole tamowai

lakilakidi yo gigibwali yo kabasaguina gogodiyao udiyedi. ** 18:6: Komiu tau'iyala: Nige ye masalaha meta

teina tau'iyala ta bena siya kaiteyadi.

¹¹ Tanoubu ta yona taukune tamowaidiyao kabo sabina se siyayau yo se doukalili, matawuwuna ede yodi gogo meta nige tauhemaisahaidi. ¹² Gogodiyao ede teina: Gole, siluba, weku namanamalidi, giniuba matapoudi, yo kaleko sapusapudi namwanamwakalilidi, kaleko pulupululukalilina, yo ginauli udoi'udoi kaiwa panena namwanamwakalilina yo aiboli** yo kaiwa maisa lakilakidi udiyedi se ginaulidi, yo bolonisi, aeyani yo weku kwaikwailolona hesau hesana mabolo. ¹³ Yo tauda kabahepahepanedi panena namwanamwakalilidi, yo yausi panepanedi udoi'udoi, mulamula panepanedi udoi'udoi doha inisenisi, yo waina, olibe bunamana, yo pwalawa namwanamwakalilina yo witi, yo bulumakau yo mamoe, yo hosi yo kaliyota, yo heyayai tauhaidi yo tamowai hekadiyo iyala unai se haidi hinage se lokunegabaedi.

¹⁴ Kabo se wane, “Ginauli namwanamwadi maudoidi ku henuwakaliliyeidi wa se tauwadamko. Yom wasawasa maudoidi yo gogo namwanamwadi maudoidi se tauwadam, taba nige se taumasalaha'uyo.”

¹⁵ Taukune tamowaidi tenem gogo ne se lokunegabaedi kalinawai na unai yodi wasawasa se haidi wa, siya kabo kedalohalohawai se totolo, matawuwuna hekamkamna ye hekalo wa se matausiyei. Siya kabo se siyayau yo se doukalili, ¹⁶ na se doulakilaki se wane,

“Kapole! Kapole Babiloni, kowa magari lakilakina yo saesaena!

Kaleko namwanamwadi yo maisadi se lakikalili doha kaleko sapusapudi yo pulupululukalilina ku luwuidi,
yo gole, weku namanamalidi yo giniuba matapoudi udiyedi taum ku hepasa.

¹⁷ Iyamo mahana kubwakubwana mo unai wasawasa maudoidi ta se tauwadam!”

Taukune yodi waga kapinadi, yo waga unai taugelu yo waga taupaisowaidi maudoidi, yo siya kaiteyadi gabwa ne unai yodi namwanamwa se haihaidi meta kedalohalohawai kabo se totolo. ¹⁸ Huyana ye kalakalasi na kasuna se kita, meta kabo se yogahilakilaki se wane, “Nige magari hesau yona wasawasa doha teina magari lakilakina ta!” ¹⁹ Kabo kahusa se hesulusaedi kuludi ne udiyedi, na se siyayau yo se doukalili na se wane, “Kapole! Kapole kowa magari lakilakina.

Kowa yom wasawasaena waga tanuwagadiyao se gogo!

Na huyakubwakubwa mo unai ku tatagwaligwali.”

²⁰ Komiu galewa unai taumiya yo komiu Yaubada yona tamowai, yo apostolo yo peloweta, bena kwa gwauyalakilili!

Matawuwuna Yaubada kami gum ye haiyako kalinawai.

²¹ Kabo anelu bayabayaona weku lakilakina ye lakaisini na ye tuudobiyei gabwa ne unai, na ye wane,

“Doha teina kabo Yaubada ma kouyalalayana na Babiloni magari lakilakina ne ye tuudobiyei,

na taba nige ye taumasalaha'uyo.

²² Babiloni, kowa kalimwai taba nige hapu taukaikaiheyaidi yo higo yo bwagigi tauyuhidi yo taukaiheya tohotohonadi hekadi yodi kaiheya dagugudi se lapu'uyoidi kalimwai.

Paisowa udoi'udoi taunimapaisowaidi taba nige se lobai'uyoidi,
yo witi kabagiligili wekuna daguguna taba nige se lapu'uyoidi kalimwai.

²³ Lampa dawayadi taba nige se kita'uyoidi kalimwai.

Taba nige loheya yo waihiu se tawasola kalinadi se lapu'uyoidi kalimwai.

Yababa maudoidi ta kabo se tubu kalimwai,

matawuwuna yom taukune tamowaidi meta tamowai saesaedi tanoubu ta unai,
iyamo se lupoidi,

na yom taubalau yo kalawai kabikabidi udiyedi basileiya maudoidi ku lupohaidi.

** **18:12:** Aiboli kaniyona ede elepanti donana, na kalina Dimdim unai se wane, *ivory*. Teina ginaulidi ta maisana ye lakikalili.

²⁴Yaubada yona tamowai yo peloweta kwasinadi
yo hinage tamowai maudoidi tanoubu ta unai ku unuidi wa kwasinadi ede
kalimwai.”

19

Hedebasaalakilaki galewa ne unai

¹Teina ginaulidi ta mulidiwai kabo dagugu hesau ya lapui doha bodalakilaki kalinadi
galewa ne unai se yogahilakilaki se wane,

“Haleluiya!** Kabihemauli yo didiga yo gigibwali meta yoda Yaubada iya yona,

²matawuwuna yona hekasa maudoidi ta se mamohoi yo se dudulai.

Iya meta waihiu ganaganawalina saesaena wa ye hekilainoyako.

Waihiu wa tanoubu ta tauheyababana yona laulau bikibikidi ne udiyedi,

yo Yaubada yona heyayai tauhaidi kwasinadi ye hebwalilidi.

Unai kadi gum Yaubada ye haidi.”

³Na kabo boda lakilakina wa se yogahi'uyo se wane,

“Haleluiya! Ye kalasi na kasuna wa ye sae nige kana siga.”

⁴Yo babadao 24 yo suisui maumaulidi hasi wa se guliyaboyabomdobi na Yaubada
yona telona unai ye tutuli wa se kaihelahui yo se yogahilakilaki se wane,

“Mamohoi! Haleluiya!”

⁵Kabo telona wa unai kalina hesau ye laoma ye wane,

“Yoda Yaubada kwa hedebasaei,

komiu yona heyayai tauhaidi yo tauhekasisiyeina,

komiu tamowai dobidobidi yo tamowai saesaedi.”

Mamoe Natuna yona hetahetawasola kaikaigogona

⁶Kabo dagugu hesau ya lapui doha bodalakilaki, yo doha kabaita, yo doha tulutululu
dagugulakilakidi, se yogayogahi se wane,

“Haleluiya! Yoda Guiyau Yaubada Gigibwalikalilina, iya ye wasawasa yo ye tanuwaga.

⁷Kwa laoma ta gwayuaya yo ta hededetausaei yo ta hedebasaei!

Matawuwuna Mamoe Natuna yona huyatawasola mayadaina ye lagemako yo

waihiu bena kabo ye tawasolai ne** meta ye nonohako.

⁸Talam ye lau iya unai meta kaleko posiposina, a'ana, yo namwanamwana ye likwa.”

Kaleko namwanamwana wa kaniyona ede Yaubada yona tamowai yodi laulau dudu-
laidi.

⁹Kabo anelu wa ye hededelaoma kaliguwai ye wane, “Teina ta ku kulidobiyeidi:
Siya kaiteyadi Yaubada ye kaibwadaidi se lau Mamoe Natuna yona hetahetawasola
kaikaigogona unai, meta siya gonowana se gwayuaya!”

Yo ye hedede'uyo ye wane, “Mamohoi, teina ta meta Yaubada yona hedehedede.”

¹⁰Kabo ya guliyaboyabomdobi talanuwana wa unai bena ya taba'ohui. Na ye
hededelaoma ye wane, “Tabu ku taba'ohuigau! Yau meta Yaubada yona heyayai
tauhaena hesau, doha kowa yo helem tausunuma, siya kaiteyadi Yesu yona hedehedede
taumiyawatanina. Yaubada ye bom mo ku taba'ohui. Matawuwuna hedehedede
mamohoidi Yesu ye hededehemasalahadi wa, gonowana kabo unai tamowai Yaubada
wasana se wasaduwaiyei.”

Hosi posiposina taugeluina ye lau ye iyala

¹¹Kabo galewa ya kita ye tasoke yo matagu ne unai hosi posiposina, yo taugeluina
hesana ede Taukawakabi yo Mamohoi. Yona hekasa yo iyala ye ginaulidi ta meta
se dudulai. ¹²Matana doha kaiwa kalapulupululuna yo kuluna ne unai meta kolona

** 19:1: Haleluiya kaniyona ede, “Yaubada ya hedebasaei.”

** 19:7: Mamoe Natuna waihiu bena kabo ye
tawasolai ne, nuwamasalahana ede ekalesiya bodana o dubu, siya kabo Yesu maiyanao se miyagogoi.

gwaudi. Kalinawai meta hesa kulikulina kaniyona nige hesau kabina ye kata na iya ye bom mo. ¹³ Yona kaleko ye likwa wa meta ye kwasinagudui. Yo iya hesana ede YAUBADA YONA HEDEHEDEDE. ¹⁴ Galewa ne unai iyala bodadi, siya ede Yesu tausunumaena, kaleko posiposidi a'adi namwanamwadi se likwadi yo hosi posiposidi se geluidi, na hosi posiposina taugeluina wa se hemuhemuliwatani. ¹⁵ Iya kawana ne unai meta iyala kelepana matamatana ye tatapesama na unai kabo basileiya maudoidi ye iyalaidei. Na kabo basileiya maudoidi tanoubu ta unai ye tanuwagaidi, na taba nige gonowana ye katekamkamnaedi. Na Yaubada Gigibwalikalilina yona kouyalayala unai kana waiunu kabo ye utukalakalateidi doha waina kabatamtamna unai wine kaniyodi se utukalakalateidi na se tamdi. ¹⁶ Iya lakwana unai na kana kaleko ne unai meta hesana hesau kulikulina. Iya ede:

WASAWASA YODI WASAWASA YO GUIYAU YODI GUIYAU.

¹⁷ Yo anelu hesau ya kita mahana kewana ne unai ye totolo. Iya ye yogalau ma kalinalakilakina manuwa kaikaitaudi maudoidi se loiloi'usi wa udiyedi ye wane, "Kwa laoma, kwa hebodakesegaigomiu Yaubada yona kaikaigogo saesaena ta unai. ¹⁸ Unai kabo wasawasa, iyala babadadi, yo tamowai bayabayaodi bulumadi kwa kaidi, yo hinage hosi yo taugeluidi yo tamowai maudoidi bulumadi kwa kaidi, siya ede yailihai tamowaidi yo heyayai tauhaidi, tamowai dobidobidi yo tamowai saesaedi!"

¹⁹ Kabo suisui bagubagunana wa** yo tanoubu ta wasawasadiyao yo yodi tau'iyala ya kitadi se laomagogo bena hosi posiposina taugeluina wa yo yona tau'iyala se iyalaidei. ²⁰ Na suisui wa se kelesesi, yo iya maiyana meta pelowetalupolupo wa, iya ede suisui wa yona gigibwali unai ye tolo na laulau gigigigibwalidi ye ginaulidi wa. Tenem laulau gigigigibwalidi ne udiyedi ede siya kaiteyadi suisui wa yona hekihekinoi tauhaidi yo koitauna tautaba'ohuina wa ye lupohaidi. Taudi labui ne kabo ma maumaulidi na se tuudobiyedi salpa kaiwana kalakalikalilina nige kana siga wa unai. ²¹ Na kadi kahao maudoidi wa meta hosi taugeluina kawana unai kelepa ye tatapesama ede ye unuhemwaloidi. Na bulumadiyao wa udiyedi manuwa maudoidi wa se kaikai ye lau ee bogadi se sese.

20

Yaubada Satani ye paipaihekahini bolimai tausani kesega

¹ Kabo anelu hesau ya kita galewa ne unai ye dobidobima, nimana ne unai meta ebisi kana kii, yo seni lakilakina ye kabikabi. ² Iya kabo delegoni wa ye kelesesi. Iya ede mwata huya bagubagunana unai wa** yo iya diyabolo yo hesana ede Satani. Anelu wa iya ye paipaihekahini, ³ na ye tuudobiyei ebisi unai na temenai kabo ye bawabawa bolimai tausani kesega. Anelu wa ebisi ye gudui yo ye guduyahisinamwanamwaei, kabo taba nige basileiya hesau ye lupohai'uyoidi kana siga bolimai tausani kesega se gehe. Na mulinawai Yaubada kabo iya ye yailigabaei huyakubwakubwa mo.

⁴ Kabo telona hekadi ya kitadi na udiyedi taututuli tamowaidiyao ne meta Yaubada gigibwali ye moseidiko bena se tanuwaga wa se tutuli. Yo hinage tamowai yaluwadi ya kitadi. Siya ede kaiteyadi gadodi se boli'utusediko wa Yesu wasana yo Yaubada yona hedehehede yodi hedehehemasalahana wa debadiyena. Yo hinage siya nige suisui wa o koitauna wa se taba'ohui yo yona hekihekinoi nige se henuwa se hai debadi o nimadi udiyedi. Siya meta se mauli'uyo yo Keliso maiyadi se tanuwaga bolimai tausani kesega. ⁵ Teina ta meta tolo'uyo bagubagunana. Na tauboiboita hekadiyo wa nige se mauli'uyo kana siga bolimai tausani kesega wa se gehe. ⁶ Siya kaiteyadi boita tolo'uyona bagubagunana unai se tolo'uyo meta siya Yaubada yona tamowai yo gonowana se

** 19:19: Suisui bagubagunana wa: Peina 13 unai kabo suisui ta wasana ku hasili.

** 20:2: Mwata huya bagubagunana unai wa wasana meta Genese 3:1-15 unai ku hasili.

** 20:2: Mwata huya

gwauyala. Boita helabuina taba nige se hekalu. Siya kabo se hemala Yaubada yo Keliso yodi taukaitalasam,** na kabo maiyadi se tanuwaga bolimai tausani kesega.

Yaubada Satani ye saedikwai

⁷ Bolimai tausani kesega wa se gehe Yaubada kabo Satani yona kabatutuguduina wa unai ye yailigabaei. ⁸ Iya kabo ye lau tanoubu maudoina ta unai bena basileiya maudoidi taumiyaidei ye lupohaidi. Teina basileiyadi ta hesadi ede Goga yo Magoga.** Satani kabo ye woyagogoidima iyala hesabana, yo tau'iyala badodi doha nagali salagomgom unai. ⁹ Kabo se laugogoi se lau ede Yaubada yona magari lakilakina se galahetakikili. Magari ta meta Yaubada ye gadosikaliliyei yo yona tamowai yodi kabamiya. Na galewa ne unai kaiwa kalakalasina ye taludobima ede tau'iyala maudoidi wa ye gabuhaidi. ¹⁰ Na Yaubada kabo diyabolo ye hai, iya tau'iyala wa taulupohaidi, na ye tuudobiyei salpa kaiwana kalakalasikalilina luwanawai. Iya ede suisui yo peloweta lupolupodi yodi kabatuudobiyei wa unai. Temenai mayadai yo boniyai se kamkamna ye lau ee nige kana siga.

Yaubada tauboiboita ye hekasadi

¹¹ Kabo telona lakilakina posiposina yo unai taututuli wa ya kitadi. Yona tau-masalaha unai meta tanoubu yo galewa se sigisuwala na se tauwadamkalikalili. ¹² Kabo tauboiboita maudoidi ya kitadi, tamowai saesaedi yo tamowai dobidobidi, siya telona talanuwana wa unai se totolo. Anelu buka se sokedi, yo buka hesau hinage se soke, iya ede mauli bukana. Tauboiboita ne saha se ginaulidi wa meta buka wa udiyedi Yaubada ye kulidobiyei, na saha se ginaulidiko wa debadiyena kabo ye hekasadi. ¹³ Gabwa luwanawai tauboiboita kabo ye kabigabaedi, yo Boita yo Hade udiyedi tauboiboita kabo se kabigabaedi. Yo tamowai kesega kesega saha ye ginaulidiko wa debadiyena kabo Yaubada iya ye hekasadi. ¹⁴ Kabo Boita yo Hade wa Yaubada ye tuudobiyei kaiwa kalakalasina wa unai. Teina ta meta boita helabuina. ¹⁵ Ena taba Yaubada tamowai hesau hesana nige ye lobai mauli bukana unai meta kabo ye tuudobiyei kaiwa kalakalasina wa unai.

21

Galewa hauhauna yo tanoubu hauhauna

¹ Kabo galewa hauhauna yo tanoubu hauhauna ya kitadi, matawuwuna galewa bagubagunana yo tanoubu bagubagunana wa se tauwadamko. Yo tanoubu hauhauna ta unai meta nige gabwa. ² Yo Yaubada yona magari, iya ede Yelusalema hauhauna, galewa ne unai ya kita ye dobidobima. Magaina wa Yaubada ye kabinonohai doha waihiu se kabinonohai tawasola hesabana. ³ Yo telona ne unai kalina lakilakina ye laolaoma ya lapui ye wane, “Kwa kita ne! Yaubada yona kabamiya ede tamowai luwadiyena. Kabo maiyanao se miya yo siya kabo yona tamowai. Yaubada, iya ede yodi Yaubada, iya kabo maiyadi. ⁴ Iya kabo matadi ne udiyedi matasulu maudoidi ye sauhaidi, yo taba nige boita'uyo o nuwadubu o doudou o kamkamna. Matawuwuna ginauli bagubagunadi wa se tauwadamko.”

⁵ Telona unai taututuli wa ye wane, “Ku kita ne, ginauli maudoidi ya ginaulidi ta meta hauhaudi!” Kabo ye wane, “Teina ta ku kulidobiyei, matawuwuna teina hedehedede ta meta mamohoidi yo gonowana kwa sunumaedi!”

⁶ Yo ye hedede'uyo ye wane, “Ginauli maudoidi ya ginaulihegediko! Yau Alepa yo Omega,** ginauli maudoidi yodi kabahetubu yo yodi kabagehe. Siya kaiteyadi gadodi

** **20:6:** Taukaitalasam nuwanuwatuna ku hasili Hemasalaha 1:6 hededehemasalahanana unai. ** **20:8:** Goga yo Magoga meta tanoubu ta tamowaidiyao se tupagogoima Yaubada bena se iyalaei ne heyahayasonidi. Buka Beyabeyana unai wasadi ta hasilidi Hesekeyela 38 yo 39 udiyedi. ** **21:6:** Alepa yo Omega hededehemasalahadi kabo Hemasalaha 1:8 unai ku hasili.

se magu kabo mauli wailana bonobonowasina unai waila nige maisana ya moseidi se numa. ⁷ Kaiteyadi se tolokeseagai, siya teina ginauli maudoidi ta kabo se haidi, yo yau kabo yodi Yaubada yo siya kabo yau natuguwao.

⁸ Na kaiteyadi yodi sunuma se uhalai hekamkamna matausina debanawai, yo kaiteyadi nige tausunuma, yo laulau bikibikidi tauginaulidi, yo taukaikaiunu, tau-taubalau yo taukalakalawai, koitau tautaba'ohuidi, yo tauhededelupolupo meta Yaubada kabo ye tuudobiyeidi salpa kaiwana kalakalasikalilina luwanawai. Tenem unai maudoidi ta kabo boita helabuina se lobai.”

Yelusalema hauhauna galewa ne unai ye dobima

⁹ Anelu haligigi-labui yababa lakilakidi mulimulitakalilidi gaebadi haligigi-labui taukabikabidi wa, siya kadi kaha hesau ye laoma kaliguwai ye wane, “Ku laoma, tautawasola waihiuna kabo ya hekitago. Iya ede Mamoe Natuna waihiu bena kabo ye tawasolai ne!” ¹⁰ Na kabo Yaluwa Tabuna ye luwuigau na anelu wa ye bahelaeigau kuduli hesau lakilakina yo tupina lohalohana unai. Yo menai Yelusalema ye hekitagau, Yaubada yona magai lakilakina, galewa ne unai ye dobidobima. ¹¹ Yaubada yona didiga unai ye hedawaya, yo dawayana meta doha weku maisalakikalilina, hesana ede gesepa, yo yona nega doha galasi kwaikwailolona. ¹² Magai wa ganana meta ye potopoto yo ye saekalili, yo kawakedana badodi meta saudoudoi-labui. Yo anelu saudoudoi-labui meta kesega kesega kawakedanao wa udiyedi. Yo Isalaela kadi bogao saudoudoi-labui wa meta kesega kesega hesadi kulikulidi kawakedana wa udiyedi. ¹³ Kawakeda haiyona teha kaluwabu, haiyona teha bwauli, haiyona teha yawana, yo haiyona teha yalasi unai. ¹⁴ Magai lakilakina wa ganana sowodiyao meta weku lakilakidi saudoudoi-labui, yo udiyedi Mamoe Natuna yona apostolo saudoudoi-labui wa hesadiyao se kulidi.

¹⁵ Anelu, iya ede maiyagu ka hedehedede wa, meta nimana ne unai kabanowonowoi kaikaiwana gole ye kabikabi bena magai lakilakina wa yo kawakedanao yo ganana ye nowonowoidi. ¹⁶ Magai lakilakina lohana yo magagana yo saena meta nowonowoi kesega.** Anelu wa magai lakilakina ye nowonowoi yona kabanowonowoi kaikaiwana unai na ye lobai meta lohana ede 2,200 kilomita,** na magagana yo saena meta gonogonowadi doha lohana wa. ¹⁷ Gana wa potopotona ye nowonowoi meta 65 mita.** Anelu wa tamowai yodi nowonowoi hepahepaisowana unai ye hepaisowa na ye nowonowoi. ¹⁸ Ganana wa gesepa unai se ginauli, yo magaina lakilakina wa meta gole mamohoina a'ana unai se ginauli, yo yona nega meta doha galasi. ¹⁹ Magai lakilakina wa ganana sowodi wekudi wa meta weku namwanamwadi** kadi kao udoi'udoi udiyedi se hepasadi. Weku bagubagunana meta gesepa unai, weku helabuina meta sapaiya unai, weku hehaiyonana meta kalsidoniya unai, weku hehasina meta emeladi unai, ²⁰ weku hehaligigina meta sadoniki** unai, weku hehaligigi-kesegana meta kaneliyeni unai, weku hehaligigi-labuina meta kilisolite unai, weku hehaligigi-haiyonana meta belilo unai, weku hehaligigi-hasina meta topasi unai, weku hesaudoudoina meta kilisopalase unai, weku hesaudoudoi-kesegana meta yasinite unai, yo weku hesaudoudoi-labuina meta ametiso unai se hepasadi. ²¹ Kawakeda

** **21:16:** Nowonowoi kesega: Buka Beyabeyana unai Yaubada yona kabamiya bilina Numa Tabuna unai hinage lohana yo magagana yo saena nowonowoi kesega. Bili wa hesana ede teha tabukalilina. Wasana kabo 1 Kin 6:20 yo Hebelu 9:3 udiyedi ku hasili. ** **21:16:** 2,200 kilomita: Magai nowonowoina Yowane ye kuli ede 12,000 sitadiya, iya ede Giliki tamowaidi yodi nowonowoiyena. ** **21:17:** Gana wa potopotona wa Yowane ye kuli

144 kubita. ** **21:19:** Weku namwanamwadi ne meta maisadi lakilakidi, tamowai gogogodi se hepaisowadi yodi pasa. Bena Isalaela yodi taukaitalasam saesaena nuwapouna kana pasa ta nuwatui. Ginauli wa unai weku namwanamwakalilidi badodi saudoudoi-labui se toledi, siya ede Isalaela bodadi saudoudoi-labui heyaheyasonidi (Esodo 28:15-30). ** **21:20:** Sadoniki hesana hesau meta oneki.

gududi saudoudoi-labui wa meta giniuba matapoudi udiyedi se ginaulidi, kawakeda kesega kesega meta giniuba matapouna kesega unai se ginauli. Magai lakilakina wa kedana lakilakina meta gole mamohoina a'ana unai se ginauli, yona nega meta doha galasi.

²² Magai lakilakina wa unai meta nige Numa Tabuna ya kita, matawuwuna Guiyau Yaubada Gigibwalikalilina yo Mamoe Natuna wa meta siya yona Numa Tabuna ede. ²³ Magai lakilakina ta unai nige mahana o waikena dawayadi, matawuwuna Yaubada yona didiga dawayana magai ne ye hedawayaya, yo Mamoe Natuna meta lampana ede. ²⁴ Dawayana unai basileiya maudoidi kabo se miyamiya yo tanoubu wasawasadiyao yodi gogo wasawasadi kabo se baheidi se laoma unai. ²⁵ Mayadaiyena taba nige kawakedanao ne se guduidi, matawuwuna temenai taba nige boniyai'uyo. ²⁶ Tamowai kabo basileiya maudoidi yodi gogo saesaedi yo wasawasadi se baheidima magai lakilakina wa unai, Yaubada hedebasaena hesabana. ²⁷ Na taba nige gonowana ginauli hesau bidabidana se baheiyama, yo koitau tautaba'ohuidi yo taukailupolupo taba nige gonowana magai ne unai se lusae, na siya kaiteyadi hesadiyao Yaubada ye kulidiko Mamoe Natuna yona mauli bukana unai meta siya se bom mo kabo menai se miya.

22

Waila maumaulina sagasagana

¹ Kabo anelu wa mauli wailana sagasagana ye hekitagau, na ye neganamwanamwakalili doha galasi. Na Yaubada yo Mamoe Natuna yodi telona unai ye didididima, ² yo ye didi ye dobi magai lakilakina wa kedana lakilakina duwaduwalina wa unai. Sagasaga wa dedeka labui udiyedi meta mauli kaiwadi se totolo, na bolimai kesega unai yodi huyakaniyo meta badodi saudoudoi-labui, iya ede waikena kesega kesega udiyedi meta se kanikaniyo. Yo lugudiyao meta basileiya maudoidi kabahenamwanamwadi. ³ Temenai taba nige tamowai o ginauli hesau Yaubada kabo ye kitaheyababa. Na Yaubada yo Mamoe Natuna yodi telona meta magai lakilakina wa luwanawai, na yona heyayai tauhaidi** kabo iya se taba'ohui. ⁴ Siya kabo kana kao se kita, yo Yaubada hesana meta debadi ne udiyedi. ⁵ Temenai taba nige boniyai'uyo. Taba nige lampa o mahana dawayadi se hepaisowadi, matawuwuna Guiyau Yaubada dawayana kabo ye hedawayadi. Na maiyanao kabo se tanuwaga ye lau ee nige kana siga.

⁶ Anelu wa ye hededelaoma kaliguwai ye wane, “Teina ta meta hedehedede mamohoidi yo gonowana kwa sunumaedi. Guiyau, iya ede peloweta tauhededehesibasibadi Yaubadana, meta yona anelu ye hetamali ye lau yona heyayai tauhaidi udiyedi na ginauli nige bayaona kabo se tubu ne ye hekitadi.”

Yesu yona uyoma

⁷ Guiyau Yesu ye hedede ye wane, “Ku kita! Nige bayaona kabo ya uyoma. Siya kaiteyadi buka ta unai saha ya hedededi ta se kawakabiyeidi, meta siya gonowana se gwauyala.”

⁸ Yau, Yowane, teina ginauli maudoidi ta ya lapuidi yo ya kitadi. Na huyana ya lapuidi yo ya kitadi meta ya guliyaboyabomdobi anelu iya ede ginauli maudoidi tauhekitagau wa kaena unai bena ya taba'ohui. ⁹ Na ye hededelaoma ye wane, “Tabu ku taba'ohuigau! Yau meta Yaubada yona heyayai tauhaina hesau doha kowa yo kam kahao peloweta wa yo kaiteyadi siya teina buka ta hedehededena tausunumawatanidi. Yaubada ye bom mo ku taba'ohui.”

¹⁰ Kabo ye hededelaoma ye wane, “Buka ta unai hededepeloweta maudoidi tabu hesauna ku tolewadam, matawuwuna ede buka ta hedehedededi maudoidi nige

** 22:3: Yona heyayai tauhaidi ne, siya ede tamowai maudoidi magai wa unai taumiya.

bayaona kabo se masalaha. ¹¹ Unai ena kaiteya yababa ye ginaginauli, taba yababa ne ye ginaginauli. Kaiteya laulau bikibikidi ye ginaginaulidi, taba laulau bikibikidi ne ye ginaginaulidi. Kaiteya miyamiya dudulaidi ye miyamiyaidi, taba miyamiya dudulaidi ne ye miyamiyaidi. Yo kaiteya miyamiya a'adi ye miyamiyawatanidi, taba miyamiya a'adi ne ye miyamiyawatanidi.”

¹² Na Yesu ye wane, “Ku kita ne! Nige bayaona kabo ya uyoma. Na maisa udoi'udoide nimaguwai, na tamowai ginauli saha se ginaulidiko wa maisadi kabo ya moseidi. ¹³ Yau Alepa yo Omega, Bagubagunana yo Mulumulitana, ginauli maudoidi yodi kabahetubu yo yodi kabagehe.

¹⁴ Siya kaiteyadi kadi kwama se deulihe'a'adi meta gonowana se gwauyala. Talam kabo ye lau siya kalidiwai na se mwalaesae magai lakilakina wa unai yo mauli kaiwana kaniyona se kai. ¹⁵ Na magai lakilakina dagelana ne unai meta kedewa,** doha tautaubalau yo taukalakalawai, laulau bikibikidi tauginaulidi, taukaikaiunu, koitau tautaba'ohuidi yo taulaululupolupo maudoidi.

¹⁶ Yau, Yesu, yau Dawida lamna yo kana isimulita. Yau Sae Kubwana dawadawayana. Yogu anelu ya hetamali ye laowa na ekalesiya bodadi wa kadi hedehedede ye hedededi kalimwai.”

¹⁷ Yaluwa yo waihiu, iya ede Mamoe Natuna bena kabo ye tawasolai ne, siya se wane, “Ku laoma!” Ena kaiteyadi teina hedehedede ta se lapuidi, taba se wane, “Ku laoma!” Ena kaiteya gadona ye magu, taba ye laoma mauli wailana nige maisana ta ye numa.

¹⁸ Yau, Yowane, teina hedehedede bayabayaona ta ya tole komiu maudoimiu kalimi-uwai: Ena kaiteya teina buka ta unai hedehedede hagahagana hesau ye tolelaei, meta Yaubada kabo yababa lakilakidi buka ta unai ya kulidi wa ye moseidi kalinawai. ¹⁹ Yo ena kaiteya teina buka ta unai hedehedede hesau ye haigabaei, meta kabo ginauli namwanamwadi teina buka ta unai Yaubada ye hededehehemasalahadi wa kalinawai kabo ye haigabaeidi. Iya kabo nige gonowana mauli kaiwana kaniyona ye kai yo Yaubada yona magai lakilakina unai taba nige ye lusae.

²⁰ Teina ginaulidi ta tauhededehehemasalahadi wa ye wane, “Mamohoi! Nige bayaona kabo ya laowa.”

Mamohoi! Ku laoma, Guiyau Yesu.

²¹ Ya tapwalolo taba Guiyau Yesu yona kabinamwa ye miya komiu Yaubada yona tamowai kalimiuyena. Mamohoi!

** **22:15:** Kedewa: Dius tamowaidi yodi kabikabi meta ena tamowai nige se kitahenamwadi meta se kataidi ede, siya kedewa.

Buka Tabuna hedehedena lakilakidi hededehemasalahadi

A a

Aba kaniyona ede *tamagu*. Yesu kalinana mamohoina meta kalina Alamaiki, na kalina ne unai wawayao tamadi se kawadedi se wane, “Aba” (Maleko 14:36, Loma 8:15).

Abela meta Adama yo Ewa natudi helabuina, Kaina yona golowa. Wasana ede ku hasili Genese 4:1-11.

Abelahama o *Abelama* meta Isalaela tamowaidi kadi mumuga. Huya bagubagunana unai hesana Abelama, kaniyona ede *Tama saesaena*. Huyana Abelama yona bolimai 99 meta Yaubada hesana ye bui Abelahama, kaniyona ede *Tamowai se bado tamadi*. Abelahama Yaubada ye sunumaei, ede Yaubada ye hededehesunuma meta iya ma mwanena Sala kabo natudi, yo kadi isimulitao kabo se bado, yo iya hesanaena kabo tamowai maudoidi namwa se lobai. Yaubada yona hededehesunuma wasadi ku hasili Genese 12:1-7 yo 17:1–18:15 udiyedi.

AD meta kalina Dimdim unai ta hai. Kaniyona ede *Anno Domini*. Teina ta meta Loma kalinadi Latini, na ta bui kalinada unai meta *Guiyau yona bolimai*, o ta wane, Guiyau Yesu yona huyalabasi bolimaina unai ta hasili ye laoma.

Hedehedede *Anno Domini* meta bolimai 525 AD unai se hetubu. Iyamo Yesu yona huyalabasi bolimaina se tolesapuli, matawuwuna Yesu se labasi Heloda Lakilakina yona huyawasawasa unai, na Heloda ye boita bolimai 4 BC unai. Unai Yesu yona huyalabasi bolimaina mamohoina ede 5 BC o 6 BC.

Adama meta tamowai bagubagunana Yaubada ye ginawili wa. Hesana kaniyona ede *tamowai*. Wasana ta hasili Genese 1:26–3:21 unai.

Agilipa meta wasawasa Heloda Lakilakina wahana.

Ake meta waga lakilakina Nowa ye ginawili na unai Yaubada iya yo natunao maiyadi mwanedi ye saguhaidi dibwali'utu'utu unai (Genese 6:5–9:17).

Alabasata meta weku posiposina yo yogeyogena kana kao ye namwakalili, unai paku gagilidi se tadidi yausi panepanedi hesabadi (Mataiyo 26:7, Maleko 14:3, Luka 7:37). Tenem paku ne meta maisadi se lakikalili.

Alamaiki meta teha Galili yo Yudeya tamowaidi kalinadi. Yesu hinage ye kalina Alamaiki, yo Buka Tabuna tupwana hekadi hinage Alamaiki unai se kulidi (Esila 4:8–6:18, 7:12-26 yo Daniyela 2:4b–7:28 yo Yelemaiya 10:11). Dius kalinadi beyabeyana meta Hebelu.

Aloi meta kaiwa gagilina hesau, luguna potopotodi, na masidi unai mulamula yo yausi panepanena se ginawili. Yausi ne Dius se hepaisowa toletoletau unai (Yowane 19:39).

Aloni meta Mose kana taubaguna. Iya yo kana isimulitao Yaubada ye hetolodi taukaitalasam Logulogu Tabuna unai, na Aloni ye hemala yodi taukaitalasam saesaena bagubagunana. Siya se bom mo gonowana Isalaela yodi kaitalasam se kaitalasamyeyidi (Esodo 4:14-16 yo 28:1, yo Numela 16:1–18:7).

Anelu Hedehedede ta meta kalina Giliki unai ta hai, na kalinadiyena kaniyona ede, *hetamali tamowaina*, o, *tauhehewasa*. Na Buka Tabuna unai hedehedede ta se tolelaei Yaubada yona taupaisowa yaluyaluwadiyao udiyedi. Kadi paisowa meta tausunuma se saguidi (Hebelu 1:14) yo paisowa hekadiyo hinage.

Hemasalaha 2 yo 3 udiyedi Yesu leta ye hetamalidi ekalesiya bodadi yodi *anelu* udiyedi, na anelu ne meta dubu yodi tautolo o taubagunaedi.

Na 1 Kolinito 11:10 unai apostolo Paulo hinage ye kuli *anelu*, na temenai nuwanuwatuna meta tamowai gabemani se hetamalidi bena ekalesiya se kitasipwaidi.

Apostolo Yesu yona hekahekatao ye kataidi ede apostolo (Maleko 3:14), kaniyona ede *hetamali tamowaina yo tautauwasa*. Yesu ye sae galewa na mulina ne unai apostolo wa Yudasi Isakaliyota lauhedamaina Mataiyasi se kaisunuwaei na ye hemala kadi kaha hesau, matawuwuna iya hinage Yesu maiyana se sae se dobi (Apostolo 1:15-26). Paulo hinage ye hedede iya apostolo, kaniyona ede Yesu ye kita (Apostolo 9:3-7, 1 Kolinito 15:9-10).

Asaliyona meta Loma yodi moni gagilina (Mataiyo 10:29 hededehemasalahana ku hasili). Asaliyona kesega unai tamowai kesega kana kai ye hemaisa mayadai kesega hesabana.

A'a Yaubada ginauli hekadi ye hedede siya se a'a, na hekadi se biki. Doha suisui a'adi, siya ede bulumakau yo mamoe yo gouti yo bunebune yo yama ma konahidi. Na suisui hekadi se biki, doha mwata yo magesubu yo kumakala yo puwaka yo kedewa (Mataiyo 15:26) yo mwaedo (Lewitikasi 11:1-47). Dius tamowaidi suisui a'adi mo se kaikaidi.

Tamowai hinage huya hekadi siya nige se a'a, doha sine labalabahauhauna (Lewitikasi 12:1-8) yo taukasiyebwa lepela (Lewitikasi 13:1-45), yo tauboitauk-abitonogina (Numela 19:11), yo kasiyebwa yo laulau hekadiyo debadiyena kabo hinage se biki. Tamowai nige se a'a meta nige gonowana se lusae tapwalolo unai ye lau ee kana siga taukaitalasam ye hetabudi o ye he'a'a'uyoidi (Hebelu 9:13).

Yesu yona huyaena Paliseya tamowaidi yodi nuwatu saesaena bena se a'a na se kitakitanamwanamwa tabu ginauli bikibikidi se kabitonogidi, yo laulau hekadi hinage se ginaulidi doha se nimadeuli (Maleko 7:2-4), yo Dius tamowaidi maudoidi gonogonowadi. Na Yesu ye lauhekata meta tamowai kabahebikina ede nuwana unai yababane (Maleko 7:11,17-20).

B b

Babatiso nuwanuwatuna labui. Kabikabi ta meta Dius udiyedi ye laoma. Dius bodadi hekadi huya badobado waila unai se duidobi ede nuwadi kabahe'a'adi, na kabo se lau se tapwalolo. Yowane Babatiso tamowai ye hebabatisoidi kaniyona ede se nuwabui na yodi laulau yabayababadi se hekaiyawasidi yo se patu'uyo Yaubada unai (Maleko 1:4). Na Yesu hinage ye hededelau yona apostolo udiyedi bena tausunuma se hebabatisoidi, yodi nuwabui hekihekinoina (Mataiyo 28:19). Na kita yoda huya ta unai meta teina ta babatiso kaniyona ede, yo hinage ta mwalaesae ekalesiya bodadi udiyedi.

Bali meta kai hesau doha witi, unai pwalawa se gabu (Yowane 6:9,13). Yesu yona huyaena, bali maisana ye gagili na kabo witi. Unai bali meta tamowai nige monimonidi kadi pwalawa.

Basileiya meta wasawasa o gabemani hesau yona kabaloina tanona. Dimdim unai se wane *kingdom o country*. Yaubada yona basileiya hededehemasalahana hinage ku hasili.

BC meta kalina Dimdim unai ye laoma, na kaniyona ede *before Christ*, o huyana sola nige Yesu ye tubu tanoubu ta unai. 100 BC kaniyona ede bolimaina ne mulina ne unai kabo bolimai badodi 100 na kabo Yesu se labasi. Iyamo Yesu yona huyalabasi bolimaina tausonoga ye hineli wa musamusana ye laupwano. Unai Yesu yona huyalabasi bolimaina mamohoina ede 5 BC o 6 BC. AD hededehemasalahana hinage ku hasili.

Belesebulu meta Satani hesana hesau (Mataiyo 12:24,27). Hesa ta meta dagela tamowaidi Ekeloni magaina unai taumiya yodi yaubada Baala-Sebubu hesana, na tausonoga se kaimasi kaniyona nuwana *numa kana tanuwaga*. Na Dius tamowaidi hesa ne se hai se tolelaei Satani unai.

Beliyela meta Satani hesana hesau kalina Hebelu unai (2 Kolinito 6:15), na kaniyona ede, *yababa*, yo, *nige yona namwanamwa saha hesau*.

Bida yo biki: A'a hededehemasalahana ku hasili.

Bosibosi meta buka ta unai kaiwa hesau hesana *fig* kulibuina. Papua New Guinea unai teina kaiwa *fig* meta nigele, na *bosibosi* ta hai, matawuwuna kaniyona se kamna doha hinage *fig* kaniyona. Iyamo kaiwa labui ne kadi kao udoi. Na kaiwa *fig* huyagwagwama unai luguna se ulu (Mataiyo 24:32) na bosibosi nige yona yaiulu, yo hinage bosibosi saliyana ye lohakalili na kabo *fig*, iya lohana gonowana ye sae 11 mita.

Fig lugudi lakilakidi, na kaniyodi lakidi doha waiwai gagilina, na se pulupululu na tumadi gagigagilidi se bado kalodiyena. Kaniyona ne se kamnakalili na tamowai se kaikaidi. Ma kidakidaidi se kaidi yo hinage se hekaimahanadi ye lau ee se pitali na se kaikaidi. Pitapitalidi ne kabo gonowana se bawa huyalohaloha na gonowana se kaikainauyaidi (1 Samuwela 25:18).

Buka Tabuna unai *fig* kaiwana meta Isalaela bodadi heyaheyasonidi (Luka 13:6-9), yo hinage tamowai yodi mauli namwanamwana heyaheyasonina (1 Kin 4:25, Maika 4:4).

Bwayabwaya Yesu yona huyaena, Dius yodi bwayabwaya nige bwatano unai duha se sala na lasi se tole na se wui, na yodi bwayabwaya meta duha lohalohana weku unai se tadi, kuduli dedekana unai (Mataiyo 27:60). Duha ne kedana gagilina na weku unai se buigudui. Duha ne kalonaena kabo tauboiboita hauhauna sinalena kabatolena se tadi doha kabakeno, yo hinage sinale kabatoledi duhadi gagilidi hekadi se tadidi duha lakilakina wa dedekana udiyedi. Tauboita yausi panenamwanamwadi (doha mulo yo aloi) udiyedi se heyausidi na kaleko posiposidi tupwadiyao lohalohadi udiyedi se sumadi na se toledi duha unai tauboita hauhaudi yodi kabatole ne unai (Yowane 19:39-40). Na yodi huyanuwadubu mayadaidi se gehe kabo sinale wa se tole kabatolena duhana gagilina hesau unai. Na ena kehadi hesau ye boita kabo duha kabaguduina wekuna wa se buihesuwala na tauboiboita wa hinage se tole duha kalona ne unai, meta kabatolena hesau unai se hekeno. Na taugogogogo hinage yodi kabikabi hesau: Huyana sinale hesau ye pwasagehe na ye pitali kabo weku unai lasi gagilina se tadi na tauboita wa siliyana unai se usaidi. Toletoletau hededehehemalahana hinage ku hasili.

D d

Dagela tamowaidi: Siya meta nige Dius tamowaidi, yo hinage nige Yaubada tausunumaeina (Mataiyo 5:47).

Dalakama meta Giliki tamowaidi yodi moni hesau (Mataiyo 17:27).

Dawida meta Yaubada ye hetolo iya Isalaela tamowaidi yodi wasawasa helabuina, wasawasa Saulo mulinawai. Dawida yona huyawasawasa meta bolimai 40, nuwana bolimai 1010-970 BC, na iya wasawasa saesaekalilina Isalaela udiyedi. Wasana ta hasili 1 Samuwela 16 unai ye lau ee buka gehena, yo 2 Samuwela, 1 Kin, yo 1 Kolonikele bukadiyao maudoidi udiyedi.

Dawida natuna kaniyona meta tamowaina ne kana mumuga ede Dawida, iya nabada wa unai Dius yodi kin saesaena. Yesu yona huyaena Dius hesa *Dawida Natuna* se tole Mesaiya unai (Mataiyo 9:27).

Demoni (1 Kolinito 10:20) meta yaluwa yabayababana hededehehemalahana ku hasili.

Denali meta Loma tamowaidi yodi moni hesau (Maleko 6:37, 12:15).

Didiga kaniyona bagubagunana meta ginauli hesau kana kao ye namwakalili, doha kaleko se didiga o mahana yo nawalai yo kipwala se didiga (1 Kolinito 15:41). Na Buka Tabuna unai hedehedede didiga se tolelai Yaubada unai se wane, Yaubada yona didiga. Teina luwana ne unai meta kana kao saesaena namwanamwana, yona gigibwali, yona bayao, yo yona gadosisi.

Yowane bukana unai didiga hedehededena meta “kana kao saesaena mamohoina” (Yowane 2:11).

Apostolo Paulo ye kuli meta tamowai Yaubada yona didiga se kabisapuli kaniyona ede se ba'aya (Loma 3:23).

Dius tamowaidi meta Abelahama kana isimulitao. Hesadi hekadi meta siya *Isalaela tamowaidi* o *Hebelu tamowaidi*.

Yaubada Abelahama ye kaisunuwai yona tamowai, iya ma kana isimulitao maudoidi. Siya Yaubada se kaihelahui. Kabakitalobaidi bagubagunana meta pelitome (Genese 17:9-14). Na huyana Yaubada Isalaela tamowaidi Aikupito unai ye woyahepesadi na se lage Sinai kudulina unai, kabo hinage laugagayo yo kabikabi udoi'udo'i ye moseidi se hemala kabakitalobaidi (Esodo 19:1-5, 20:1-19 yo hekadiyo).

Apostolo Paulo kabo ye hededehehemasalahana meta nige gonowana tamowai hesau ye hedede bena iya Dius tamowaina kana siga Yaubada yona laugagayo ye miyawatanidi (Loma 2:25-29).

Hedehedede *Dius* meta Dimdim katakataina ta hekawalaeyama kalinadaena. Hesa *Dius* yona kabalaoma meta Giliki kalinadiyena *Iudaios*, kaniyona ede Yudeya tanona tamowaina.

Diyabolo: Hedehedede ta kalina Giliki unai ta hai na ta bui kalinadaena. Kaniyona meta tauhededeheyaheyababa yo taulauhegilu, na kana paisowa ede tamowai ye hegihegiludi Yaubada matanaena (Yobi 1–2, Hemasalahana 12:10) yo tanoubu ta unai ye nohoidi (Mataiyo 4:1-11). Hinage Satani yo Belesebulu hededehehemasalahadi ku hasilidi.

Donki meta suisui lakilakina hesau. Isalaela tamowaidi donki se hepaisowadi na yodi bahebahe se usaidi, yo hinage tamowai se geluidi na se kadau (Luka 10:34, Maleko 11:7).

Dubu nuwanuwatuna Buka Tabuna unai meta Yesu Keliso yo Yaubada taukawa-mamohoiyaina bodadi, na nige yodi kabakoikoigogo numadi (Mataiyo 16:18, Apostolo 15:3 yo 20:17, yo hekadiyo). Ekalesiya bagubagunadi wa nige yodi dubu numadi se kabidi, na se koikoigogo Numa Tabuna bakubakuna unai yo yodi kabamiya numadiyao udiyedi (Apostolo 2:46, Loma 16:5). Yo hinage Paulo ye laulau Dius yodi sunago udiyedi ye lauguguya (Apostolo 9:20, 13:5, 14:1, yo hekadiyo).

Dudulai meta (1) tamowai yona laulau ye hetala. Tamowai dudulaina hededehe-masalahana ku hasilidi.

(2) tamowai yona dudulai ye hetala, iya ede saha ye namwa mo taba ye hai o ye ginauli, yo yona gigibwali.

E e

Ebisi meta duha lohalohana ye dobikalili nige yona kabagehe. Iya ede boita yo ginauli yabayababadi yo nuwamatamatausidi yodi kabamiya (Luka 8:31, Hemasalahana 9:1-2,11, 11:7-8, 20:1-3). Hedehedede *ebisi* meta kalina Dimdim unai ta hai (*abyss*), na siya meta kalina Giliki unai se hai (*abyssos*).

Ekalesiya Kalinadaena ekalesiya kaniyona meta Yesu Keliso tausunumaaina. Hedehedede ta meta kalina Giliki *ekklesia* unai ta hai. Kalina Giliki unai, kaniyona bagubagunana ede magari tamowaidi yodi koigogo, na muliyena hinage se tolelaei tausunuma yodi koigogo unai.

Ekalesiya yodi koigogo hinage ta katai dubu. Apostolo 11:26 unai Yesu tausunumaaina se kataidi siya *Kilisitiyani*, kaniyona ede *Keliso tamowaina* o *Keliso tauhemuliwatanina*, matawuwuna yodi laulau wa gonogonowana doha Keliso wa.

Eliya meta Isalaela yodi peloweta saesaena hesau. Wasana ede ta hasili 1 Kin 17–19, 21, yo 22, yo 2 Kin 1–2 udiyedi.

Ewaneliya kaniyona meta wasa namwanamwana. Hedehedede ta meta kalina Giliki unai ta hai.

G g

Galewa basileiyana meta Mataiyo yona kulikuli unai ye hepahepaisowa. Na kaniyona ede *Yaubada yona basileiya* o *Yaubada yona kabatanuwaga*. Dius yodi laulau meta

Yaubada hesana se hekasisikaliliyei, ede nige se hepaisowa. Laulau ta unai Mataiyo Yaubada hesana ye lauhedamai galewa unai. Hinage Yawe hededehehemasalaha ku hasili.

Galewa hekihekinoina: Mataiyo 16:1 yo Maleko 8:11 udiyedi Dius yodi tauwoy-awoya hekadi galewa hekihekinoina se kaibwadai Yesu unai, na yodi nuwatu bena Yaubada yona gigibwali unai laulau gigigigibwalina ye ginauli. Dius wa Yaubada hesana se hekasisikaliliyei ede nige se hepaisowa, na se wane, *galewa*.

Galili Gabwana meta waila lakilakina teha Galili unai, kana kao doha gabwa. Lohana teha bwauli unai ye lau teha yawana meta 21 kilomita, na magagana ede 13 kilomita. Waila wa yama unai ye mwayau, na tauyamayama se bado. Yesu waila lakilakina wa dedekanaena magai Kapelenauma unai ye miya (Mataiyo 4:13), doha hinage Petelo (Mataiyo 8:14) yo Andeleya yo Yamesi yo Yowane, siya Yesu yona hekahekatao.

Galili Gabwana hesana hesau meta *Tibeliya Gabwana* (Yowane 6:1,23 yo 21:1). Hesa ta unai Loma yodi Sisa Tibeliyasi hekasisina debanaena se tole.

Ganawali laulauna meta Yaubada ye laugagayoi (Esodo 20:14, Mataiyo 5:27-28). Buka Tabuna unai hedehedede ta meta laulau labui ye sumagogoidi: Ena maitawasola ye lau nige mwanena unai, yo ena hewali yo hasala nige tawatawasoladi se kenokesega. Kita Saliba kada kulutubu hewali yo hasala yodi kaiheya ne nige se kita bena yababa, unai nige laulau ne hesana se tole. Na Yaubada ye hekatada meta tau yo sine yodi miyagogoi bena Yaubada yona gadosisi miyamiyahaina heyaheyasonina (Epeso 5:32). Yaubada yona talam bagubagunana bukana unai hinage tawasola laugagayona ta lobaidi (Dutelonomi 22).

Yaubada yona tamowai maiyanao yodi miyagogoi ye heyaheyasoniyei tawasola unai. Na ena Dius o ekalesiya tamowaidi Yaubada se sigisuwalaei o se sunumakaiyawasi o se taba'ohu koitau yo yaubada hekadiyo udiyedi meta hinage hedehededena ede se ganawali (Yelemaiya 3:6-10, Mataiyo 12:39, Hemasalaha 14:8, 17:1-2).

Getesemani meta Olibe koyana hesau hesana, tamowai se ginauli Olibe kudulina padipadina unai (Mataiyo 26:36). Getesemani koyana unai gonowana ta kitakawasi na Yelusalema magaina maudoina ta kita.

Giliki meta boda lakilakina hesau. Siya nige Dius tamowaidi. Kalinadi meta Loma yodi basileiya maudoina unai kabina se kata, doha kita PNG tamowaidiyao ta bom kalinada na hinage ta kalina Dimdim o Tok Pisin. Talam Hauhauna bukadiyao maudoidi hinage Giliki kalinadiyena se kulidi. Kalina Suau Giliki hesadi hesau se hepaisowa ede *Heleni*, iya ede hesadi se bom se katai'uyoidi.

Gonowana ye gwauyala: Hedehedede ta meta Dius yodi hedehedede hesau na se hepaisowakaliliyei. Unai se hededehehemasalaha laulau saha tamowai se launamwanamwaeidi. Na huya hekadi hedehedede ne se tubei na se hededehehemasalaha meta tauginaulidi ne, siya namwa saha kabo se lobai. Doha Yesu hedehedede ta ye hepaisowa Mataiyo 5:3-10 yo Luka 6:20-22 udiyedi. Temenai taudehadeha yo tauhasahasali yo taudoudou yo nuwatalu tamowaidi yo kaiteyadi se kitalau Yaubada yona sagu unai, siya kadi hedehedede Yesu ye hedede meta gonowana se gwauyala, matawuwuna Yaubada unai ginauli namwnamwadi kabo se haidi. Kainauyadi ne, siya ede Yaubada yona basileiya, yo nuwanamwa, yo Yaubada yona katekamkamnaeidi, yo Yaubada ye kawanatuyeidi, yo Yaubada kabo se kita.

Na Mataiyo 13:16 unai Yesu ye hededelau yona hekahekatao udiyedi meta gonowana se gwauyala, kaniyona ede Yaubada yona basileiya nuwanuwatudi saesaedi se nuwatulobaidi.

Yo Mataiyo 11:6 unai Yesu hedehedede hesau ye hetamali Yowane Babatiso unai, iya numatutugudu unai na Yesu ye nuwalabulabuiyei, ye wane, “Na kaiteya nige ye nuwalabulabuiyeigau, meta iya gonowana ye gwauyala.” Teina unai ye hededehasahasai bena tabu Yesu ye nuwalabulabuiyei.

Guiyau meta Yawe hededehehemasalahana ku hasili.

Guiyau yona tamowai siya ede tausunuma Guiyau Yesu unai maudoidi yo se patulau iya unai, yo Yaubada ye he'a'adi na se dudulai iya matanaena. Kalina Giliki unai se kuli ede *hagios*, na mesinale bagubagunadi hedehedede *hagios* se bui se wane, tabuna. Iyamo kaniyona mamohoina ede *Yaubada yona, yo se a'a*.

Gwau Miyaidi Henuwaisinina meta Dius yodi gwauyala saesaena hesau. Bolimai badobado Okotoba unai, Gwau Miyaidi Henuwaisinina se ginauli na ye lau mayadai haligigi-labui. Gwauyala ta kaniyona ede bena kadi mumugao yodi huyamiya balabalagaibu unai bolimai 40 se henuwaisini. Yo hinage wine yo olibe kaniyodi se gigidiko wa meta lautokidi yo gwauyaladi se gwauyalakesegai. Gwauyala wa yodi kabikabina doha teina: Dius magaidiyao maudoidi udiyedi tamowai gwaudi se laoma Yelusalema na temenai kaiwa lagalagadiyao udiyedi yodi gwau se ginaulidi na udiyedi se miya mayadai haligigi-labui (Lewitikasi 23:33-36,39-43 yo Dutelonomi 16:13-16).

Hh

Hade: Hedehedede ta meta kalina Giliki unai ta hai. Giliki tamowaidi yodi sunuma bena *hade* iya tauboiboita maudoidi yodi kabamiya. Magai ne se hedede iya teha dobidobina unai. Na Buka Tabuna unai *hade* kaniyona ede tauboiboita nige Yaubada tausunumaena yodi kabanayanaya magaina (Luka 16:22-23). Temenai se nayanaya Yaubada yona huyahineli mayadaina hesabana (Hemasalaha 20:11-15).

Hapu meta wana kabakaiheyaidi hesau. Hapu mainadi se bado, na kesega kesega ye bom daguguna, na nima gigidi udiyedi se kipikipisi.

Hebelu: Bagubagunaena, Buka Tabuna unai Abelahama hesana se katai ede “Abelahama iya Hebelu” (Genese 14:13). Unai Hebelu meta Dius tamowaidi hesadi hesau (Genese 40:15, Esodo 3:18, 2 Kolinito 11:22, yo buka hekadiyo).

Tausonoga yodi nuwanuwatu meta Hebelu kaniyona bena “sagasaga halisanakawasina unai taukawasima”. Abelahama Yupalata sagasagana lakilakina halisanakawasina unai ye laoma ye lau Kanana tanona.

Kita yoda huyaena Isalaela kalinadi ta katai ede kalina Hebelu. Buka Tabuna unai Talam Bagubagunana bukadi kalina Hebelu unai se kulidi. Yesu yona huyaena kalina Hebelu meta taukaitalasam yo laugagayo taulauhekataena kalinadi (Apostolo 21:40).

Hededehenamwa: Ena tamowai ta hededehenamwa kabo kaniyona labui. Bagubagunana ede ta kaibwadalau Yaubada unai bena tamowaina ne ye sagui na namwa ye ginauli kalinawai, doha wawayao gagilidi ta hededehenamwadi (Mataiyo 19:14).

Helabuina meta tamowai se kabibolubolui na se mosei Yaubada unai bena yona taupaisowa, doha taukaitalasam se hededehenamwadi o se hetabuyedi, yo pasta o diyakona se hededehenamwadi (2 Timoti 1:6, 1 Timoti 5:22).

Nuwanuwatudi labui ne se lau gogo yo kai hinage ta hededehenamwadi.

Hededekaigwala meta kaigwala ku hasili.

Hekahekatao meta Yesu tatao badodi saudoudoi-labui (12) ye kaisunuwaidi bena ye hekatadi na se hemala yona tautauwasa. Bagubagunadi meta Simona Petelo ma kana kaha Andeleya, yo Yamesi ma kana kaha Yowane (Mataiyo 4:18-22). Na hekahekatao maudoidi hesadi Mataiyo 10:2-3 unai ku hasilidi.

Hekihekinoi: Buka Tabuna unai hekihekinoi meta laulau gigigigibwalina, haedi Yaubada yona didiga yo gadosisi yo kabinamwa yo gigibwali kabakitalobaidi. Katakataina hesau meta *galewa hekihekinoina*.

Buka Tabuna unai lausoisoi hekadi udiyedi *laulau gigigibwalidi yo hekihekinoi* se kulilabuilauiyedi (Maleko 13:22, Apostolo 2:43, 2 Tesalonika 2:9, yo hekadiyo hinage) na lausoisoi ne hekadiyo udiyedi yoda buka ta unai *laulau gigigibwalidi* ye bom mo ka kuli (Maleko 16:20, Apostolo 2:22 yo 5:12 yo hekadi hinage).

Heloda – Heloda bagubagunana meta **Heloda Lakilakina**. Bolimai 73 BC unai se labasi. Yona huyawasawasa meta 37 BC unai ye hetubu ye lau yona huyaboita bolimaina, iya ede 4 BC. Yona huyawasawasa unai Yesu se labasi (Mataiyo 2:1). Heloda nige Dius tamowaina mamohoina, na Edoma kana isimulita hesau. (Edoma meta Iso hesana hesau, Genese 25:30.) Heloda meta iyala tauwoyawoya saesaena, yo hinage numa lakilakidi ye kabidi, doha Numa Tabuna ginauli'uyoina ye hetubu. Na Dius ye lauhelilidi bena takisi lakilakidi se hemaisadi.

Bolimai 4 BC unai, Heloda Lakilakina natuna **Antipasi** ye hemala wasawasa teha Galili unai (Luka 3:1), na yona huyawasawasa ye lau ee 39 AD. Iya meta ye hedede na Yowane Babatiso gadona se boli (Mataiyo 14:3-12), na huyana Yesu se helauhetala Pilato matanaena meta Pilato ye hedede na Yesu se laei Heloda Antipasi unai (Luka 23:6-16).

Heloda Antipasi lauhedamaina meta kana kaha natuna **Agilipa Bagubagunana**. Teha Galili ye tanuwagai bolimai 39 ye lau 44 AD. Bolimai 41 AD unai Sisa Tibeliyasi iya ye tole teha Yudeya hinage yodi wasawasa. Yelusalema unai kabo Yamesi Sebedaiyo natuna ye unuhemwaloi yo Petelo ye tole numatutuguduyena (Apostolo 12:1-19), na ye nuwasaesaekalili ede anelu iya ye koiheguli na ye boita (Apostolo 12:19-23).

Ye boita kabo natuna **Agilipa Helabuina** iya ye lauhedamai. Buka Tabuna unai ta hasili meta Paulo yona hedehedede ye lapui huyana Paulo numatutugudu unai, magai Sisaliya unai (57-59 AD, Apostolo 25:13–26:32).

Hesa: Buka Tabuna unai hedehedede *hesa* meta tamowai udo'udoina ye haihegehe. Doha Yesu ye hekatada bena ta tapwalolo ta wane, “Kowa hesam ka hededetausaei.” (Mataiyo 6:9), iya ede, “Kowa ka hededetausaeigo.” Luka 1:49b hinage ku nuwatui. Yo hinage Yesu ye wane, “Tamagu, hesam ku hesaekaliliyei.” (Yowane 12:28), na kaniyona ede, “Tamagu, kam kao mamohoina saesaena ku hemasalaha!”

Na tabu yoda nuwanuwatu bena Yaubada hesana o Yesu hesana ta kataimoei na kabo tenem unai ede yona gigibwali ye masalaha. Yaubada laugagayo ye mosei Isalaela tamowaidi udiyedi yo ye laoma kalidawai hinage, ye wane, “Komiu tabu Guiyau yomi Yaubada hesana kwa hepaisowayababai” (Esodo 20:7), iya ede, tabu ta hepaisowagaibu, ta bom yoda nuwanuwatu unai yo yoda namwa mo hesabana. Apostolo 19:13-16 hinage ku nuwatui.

Na Yaubada hesana bena ta hepaisowa huyana ta tapwalolo na maiyada ta hedehede, yo ena ta hepaisowa iya hekasisiyeina yo hedebasaeina unai.

Hetabu: Buka Tabuna unai, kalina Giliki unai se kuli, *hagiatso*. Na *hagiatso* kaniyona bagubagunana ede, se mosei Yaubada unai, yona paisowa hesabana. Na nige yodi nuwatulobai bena gogo o tamowai ne *se hegigibwali*. Unai, ena tamowai o gogo o saha hesau se *hetabuyei*, meta kaniyona ede ye hemala Yaubada yona (Mataiyo 23:19). Kabo Yaubada yona dudulai ede ye hepaisowa yona nuwatuyena. Tamowai hetahetabuyei kabo bena Yaubada yona nuwatu ye miyawatanidi, na gogo ta hetabuyei ne meta siya Yaubada yona, na nige gonowana ta hepaisowagaibuidi.

Kaniyona helabuina ede, ena Yaubada tamowai ye *hagiatso*, meta tamowaina ne ye sagui na yona laulau se namwakalili (1 Tesalonika 5:23).

Kaniyona hehaiyonana ede, ena tamowai Yaubada se *hagiatso*, meta se hedede-tausaei (Mataiyo 6:9, Luka 11:2).

Tabu hededehemasalaha hinage ku hasili.

Heyayai tauhaina meta kalina Dimdim unai se wane *slave* yo *servant* (Apostolo 16:16, Yowane 2:5). Kita Saliba kada kulutubu unai meta nige *slave* kalidiwai. Buka Tabuna unai *heyayai tauhaina* meta taupaisowa, na kadi tanutanuwagao se hemaisadi

maketi unai na se hemala yodi gogo. Nige gonowana se bom nuwadi se lauwatanidi, yo nige gonowana kadi tanuwaga yona hedehedede se kawagabaei, yo nige gonowana se laugabaedi. Tamowaidiyao ta meta iyala unai na magai hekadiyo udiyedi se haidi se laedima, na kabo se lokunegabaedi. Ena *heyayai tauhaina* ne tamowai hesau yona ye paisowa na unai moni ye lobai meta gonowana ye bom maisana ye hemaisa'uyoi na kana tanuwaga wa kabo iya ye kabigabaei ye lau (1 Kolinito 7:21).

Lausoiso hekadi udiyedi ka kuli *taupaisowa* (Mataiyo 20:27, Galatiya 4:7).

He'a'a meta a'a hededehehemasalahana ku hasili.

He'a'a kaitalasamdi meta Talam Bagubagunana yona huyaena tamowai saha hesau se ginauli na se biki o se yababa Yaubada matanaena, na huyana bena se mwalaeseuyo tapwalolo unai kabo kaitalasam se gabudi, iya ede he'a'a kaitalasamna. Hinage lepela hededehehemasalahana ku hasili.

Hisopa meta kaiwa gagilina kuyakuyawana Isalaela tehadi udiyedi ye kinikini, na nige ye kini PNG unai. Kita nige yoda hesa, unai kabo kalina Giliki yo Dimdim udiyedi ta hai na ta wane hisopa. Kita kaiyalu lagana gagilina ta hepaisowa na unai ta lausibusibu. Taukiuli bagubagunana unai hisopa unai mamoe kwasinana se saulaei keda duudi udiyedi (Esodo 12:22, Hebelu 9:19). Yesu yodi huyahesataulona unai hisopa lagana se hepaisowa na numanuma se mosei Yesu unai (Yowane 19:29). Hisopa hinage taukaitalasam se hepaisowa ena tamowai dahina unai kasiyebwa hesau na ye namwanamwa na yona lauhe'a'a kabikabina se ginauli (Lewitikasi 14:1-7).

Ii

Inisenisi meta kaiwa hesau masina se hepitali na se tole ginaha kewadiyena na se gabu, na kasuna panena ye namwakalili. Numa Tabuna unai yodi huyatapwalolo udiyedi inisenisi kabagabuna kewana ne unai inisenisi se gabugabu (Mataiyo 2:11, Luka 1:9-10).

Isalaela meta Yakobo hesana hauhauna Yaubada ye tole (Genese 32:28). Hesa ta kaniyona ede, *Yaubada maiyana tauhaikabi*, yo, *Yaubada taukabihekahinina*, yo, *Yaubada tusaedikwaina*. Dius tamowaidi, siya Isalaela kana isimulitao, unai ede se kataidi siya Isalaela tamowaidi.

Iso meta Yakobo kana kaha, taudi labui meta godegode (Genese 25:19-26). Iso hesana hesau meta Edoma (Genese 25:30), na yodi teha meta Idumiya, iya ede Isalaela teha yawana unai.

Iyala kapinana meta Loma yodi tau'iyala bodana lakilakina taubagunaedi, badodi ede 600.

Iyala taubagunaena hekadi wasadi se kulidi Wasa Namwanamwana bukana udiyedi (Maleko 15:39). *Iyala taubagunaena tamowaina* katakataina hesau meta sentuliyoi. Iya Loma yodi tau'iyala badodi 100 ye bagunaedi. Loma yodi tau'iyala ku hasili.

Kk

Kabanoko meta siya ede laulau gigigigibwalidi. Na ena Buka Tabuna unai se kuli bena tamowai hesau kabanoko ye ginaulidi, meta se kitalau laulau gigigigibwalidi wa taukitadi yodi noko yo yodi siliyata unai. Buka Tabuna unai taba nige hedehedede *kabanoko* ye bom se kuli, na se kulikuli *hekihekinoi yo kabanoko* (Mataiyo 24:24, 2 Tesalonika 2:9).

Kabinamwa: Buka Tabuna unai hedehedede *kabinamwa* se tolelaei Yaubada unai, se wane, "Yaubada yona kabinamwa", yo, "Keliso yona kabinamwa." Doha hinage Paulo yona hededelautoki (Galatiya 1:3, Epeso 1:2, Kolose 1:2, Taitasi 1:4). Hedehedede ne kaniyona ede, Yaubada yona gadosisi debanaena namwa ye ginauli tamowai udiyedi na ye kainauyaidi yo ye saguidi. Kabinamwa ne meta nige tamowai yodi laulau namwanamwadi maisadi, na Yaubada yona kainauya.

Yaubada yona kainauya lakilakikalilina meta tamowai ye gilihaidi na ye kaisunuwaidi bena siya yona tamowai, na mauli nige kana siga ye moseidi (Epeso 2:4-9, Taitasi 2:11).

Kaedi mukalidi se koinihinihiyedi hededehe-masalahana meta mukali unai ku hasili.

Kaigwala meta unai tamowai yodi hedehedede se hebayaodi (Mataiyo 5:33-37).

Dius yodi kaigwala kao hesau meta Nasilaiti kaigwalana, doha apostolo Paulo (Apostolo 18:18) yo tamowai hekadi hinage se ginauli (Apostolo 21:23). Kaigwala ta laulauna meta, taba tamowai hesau ye kaiboita na Yaubada ye sagui yo ye gilihai, kabo tamowai wa ye kaigwala, meta ye hineli kabo huyakubwakubwa o huyalohaloha ye mose'uyoi Yaubada unai. Yona kaigwala ne huyana ye gehe, kabo he'a'a kaitalalamna ye ginauli yo kuluna se yaligabae. Nasilaiti kaigwalana laugagayona Numela 6 unai ku hasili.

Kaikaigogo saesaediyao udiyedi Dius tamowaidi nige se tulimolosi na se kaikai, na yodi kaikai huyana kabo hatahata ne se kenohetakikili. Teina ta nige se kenomamohoi na se kenolisilisi tupwaseuseulidi ne udiyedi na nima seuseulidi se bonohetolodi na kuludi ne se tupahekahini na kabo se kaikai. Yodi kabakaikai hatahatana ne kewana ne nige ye sae.

Kaisunuwa tamowaina meta Yaubada yona kaisunuwa tamowaina hededehe-masalahana ku hasili.

Kaitalalam meta suisui o kai o gogo hekadiyo tamowai se moseidi yodi yaubada udiyedi. Dius tamowaidiyao yodi kaitalalam se moseidi Guiyau Yaubada unai, meta bulumakau o mamoe o bunebune se gabudi Numa Tabuna unai (Maleko 12:33, Luka 2:22-24, na kaitalalam suisuidi Yowane ye kataidi Yowane 2:14 unai). Kaitalalam hekadiyo ede pwalawa, oela, waina, yo kalita.

Dius yodi kaitalalam kabikabidi udoi'udo. Hekadi meta suisui udo'udoina se gabuhegehe (Lewitikasi 1), na hekadi meta suisui taubaheiyamana wa suisui tupwana se kai na tupwana se gabu Yaubada kabahenuwanamwana hesabana (Lewitikasi 3:3-5). Na oela yo waina se inigabaedi kaitalalam kabagabuna Numa Tabuna unai dedekanaena, na pwalawa se gabu (Lewitikasi 2:1-3). Yo kaitalalam hekadi se kabisinidi ma hisa na kabo taukaitalalam se kaidi (Lewitikasi 7:32).

Kaitalalam yodi paisowa udoi'udo: Hekadi meta tamowai yodi yababa kabanuwatugabaedi (Lewitikasi 4), hekadi kabahe'a'adi (Lewitikasi 12:6-8), na hekadi Yaubada yodi kabalautokiyeina (Lewitikasi 3) yo kabahedebasaeina (Lewitikasi 7:11-14).

Kao saesaena mamohoina hinage ta wane Yaubada yona didiga.

Katekamkamna meta Buka Tabuna unai huyana se bado ye wane, Yaubada tamowai ye katekamkamnaedi (Mataiyo 5:7, 9:36, 17:15, Maleko 7:34, yo hekadiyo), o Yaubada iya katekamkamna yaubadana (2 Kolinito 1:3, Epeso 2:4, yo hekadiyo), o tamowai Yesu se kaibwadai bena ye katekamkamnaedi (Mataiyo 9:27, 14:36, Maleko 1:40, yo hekadiyo). Yaubada tamowai ye kitadi nuwana se deha o se kasiyebwa o saha hesau nige kalidiwai, na nuwana ye kamkamna hesabadi na debanaena ede ye saguidi yo heyababa unai ye gilihaidi.

Keliso meta kalina Giliki unai ta hai, na kalinadiyena kaniyona meta iya se heyausi paisowa hesau hesabana. Nuwanuwatuna kalina Hebelu unai se katai ede Mesaiya. Buka Tabuna unai Talam Bagubagunana bukana unai wasawasa yo taukaitalalam se heyausidi. Kaiteya se heyausi ne meta iya Yaubada yona kaisunuwa tamowaina. Unai, ena Yaubada Natuna Yesu ta katai iya Keliso o Mesaiya, meta ta hededehe-masalaha ede iya Yaubada yona kaisunuwa tamowaina yo iya yoda wasawasa yo yoda guiyau. Na teina unai hinage ta wane iya meta taugilihaida yo tausaguida.

Kipasi meta Simona Petelo hesana kalina Alamaiki unai. Kaniyona ede weku, gonogonowana doha hinage *Petelo* kalina Giliki unai.

Kodalansi meta Giliki tamowaidi yodi moni gagilina hesau.

Kolona meta kao labui: (1) Tauheloikailakwa ye baguna yona kainauya. Giliki yo Loma tamowaidi olibe lagana unai se heihepo'op'odi na se tole taubaguna kuluna unai. Teina meta apostolo Paulo yo apostolo hekadiyo yodi leta udiyedi se hetala (1 Kolinito 9:25, Pilipi 4:1, 1 Tesalonika 2:19, Yamesi 1:12, 1 Petelo 5:4).

(2) Wasawasa yona kolona meta gole unai se ginaulihepo'opo'o, iya ede yona gigibwali hekihekinoina. Kolona ta Hemasalaha bukana unai se hedehededei (Hemasalaha 2:10, 3:11, 4:4,10, 6:2, 14:4, yo hekadiyo).

Kubita meta ginauli lohadi nowonowoina, lohana ede 0.45 mita (45 cm o sentimita).

Kulikuli tabuna: Yaubada yona talam hauhauna bukana ta unai, *kulikuli tabuna* kaniyona ede Yaubada yona talam bagubagunana bukana. Bukadiyao ede Genese unai ye lau ee Malakai.

Kwama sinosinona meta Yaubada ye hededelau Dius udiyedi bena kadi kwama se hepasa sinosino hasi udiyedi. Sinosino ne kaniyodi ede bena se henuwaisinidi meta siya Yaubada yona tamowai na yona laugagayo bena se miyamiyaidi (Numela 14:37-40, Dutelonomi 22:12). Na Yesu yona huyaena kwama pasadiyao lohalohadi ne se hemala kabakitalobai meta tamowaina ne iya tamowai saesaena hesau yo iya tanuwaga. Na Yesu ye wane, tabu se nuwasaesae na kwama sinosinodi tabu se helohakaliliyeidi (Mataiyo 23:5).

Ll

Labi meta kalina Hebelu yo Alamaiki na kaniyona ede *taulauhekata yo tanuwaga*. Dius yodi labi wa se hekasisikaliliyeidi. Yesu yona hekahekatao yo iya tauhekasisiyeina hekadiyo se kawa Labi iya unai (Maleko 9:5 yo 10:51, Yowane 1:38, Mataiyo 26:49), na Paliseya yo Sadusiya yo Dius babadadiyao hekadiyo, siya nige se kawa Labi Yesu unai.

Laugagayo taulauhekataedi kadi paisowa meta Mose yona laugagayo kabina se katakalili na se hekataei tamowai udiyedi. Laugagayo taulauhekataedi hekadiyo siya Paliseya tamowaidiyao (Maleko 2:16) na hekadi Sadusiya tamowaidiyao (Mataiyo 3:7-10, 22:23). Hekadi hinage taukaitalasam. Na mauidi meta laugagayo sonogana se kaipate se hai taulauhekata saesaena hesau unai (Apostolo 22:3). Laugagayo taulauhekataena bagubagunana meta Esila (Esila 7:6,10-11,21).

Yesu laugagayo taulauhekataedi ye dilaidi matawuwuna se nuwasaesae na se henuwakalili taba tamowai siya se hekasisiyeidi, yo kwama lohalohadi se likwadi doha tamowai saesaedi, yo sunago yo kaikaigogo udiyedi kabatuli namwanamwadi se henuwadi (Mataiyo 23:5-7, Maleko 12:38-39, Luka 11:43), na iyamo yodi laulau hekadi nige se namwakalili (Luka 20:46). Yodi lauhekata Yesu nige ye henuwadi (Maleko 7:1-13). Siya hinage Yesu se hewaiunukaliliyei (Maleko 2:16, Luka 5:30 yo 15:2).

Laulau gigigibwalidi meta tamowai Yaubada yona gigibwaliyena laulau namwanamwadi se ginaulidi na tamowaigaibu nige yodi gigibwali gonogonowadi se ginaulidi. Laulau ne doha taukasikasiyebwa se henamwanamwadi, tauboibota se hetolo'uyoidi, yo yaluwa yabayababadi tamowai udiyedi se hededehepesadi. Laulau gigigibwalidi tauginaginalidi saesaena ede Yesu (Mataiyo 11:20, Yowane 10:38 yo 21:25). Talam Bagubagunana bukana unai peloweta hekadiyo hinage laulau gigigibwalidi hekadi se ginaulidi, doha Eliya pwalawa yo oela ye helaki yo wawaya ye boita wa ye hetolo'uyo (1 Kin 17:13-24).

Lepela meta kasiyebwa yabayababana hesau, iya ede tamowai dahina kasiyebwana. Yaubada laugagayo ye mosei Dius tamowaidiyao udiyedi meta taulepela taba se miya-suwala na tabu ye laulau boda luwadiyena na tabu se laulau Numa Tabuna (Lewitikasi 13:1-46). Taulepela se hededei meta se biki. Na taulepela ye namwanamwa'uyo meta se hedede ede, ye a'a (Maleko 1:40-41).

Huyana taulepela ye lobai meta lepela wa ye ulugehe kabo taukaitalasam hesau bena ye laoma na iya ye kitasipwai. Ena taukaitalasam ne ye hemamohoiyei ede ye a'ako, kabo taulepela wa kaitalasam ye mosei Yaubada unai (Lewitikasi 14:2-4, Luka 17:14).

Lepetona meta Dius yodi moni gagilina (Maleko 12:42 hededehehemasalahana). *Lepetona* badodi 15 udiyedi meta tamowai kesega kana kai ye hemaisa mayadai kesega hesabana.

Logulogu Tabuna hededehehemasalahana meta Numa Tabuna hedehededenana unai ku hasili.

Loma meta magai lakilakikalilina Italiya tanona unai. Loma tamowaidi yodi tau'iyala se bado yo se bayaokalili, ede Yesu yona huyaena, Loma wa teha lakilakina se tanuwagai, doha *France, Britain, Germany, Spain, Greece, Turkey, Syria, Israel, yo hinage Egypt*. Yodi kabatanuwaga tanodiyao tautauna ku kita buka ta gehegehena ne unai. Yodi kitahettedi unai huya hekadi se kabiyababaidi yo takisi se haihaidi wa se helakidi.

Loma tamowaidi (Apostolo 16:21) Loma yodi kabaloina tanona lakilakina unai magai saesaekalilina hesana hinage Loma, na magai wa tamowaidiyao meta ta kataidi Loma tamowaidi. Siya yodi dudulai hekadiyo, doha nige gonowana se tolegaibuidi numatutuguduyena, na taba kadi mata saha se wasebagunai (Apostolo 22:25). Na Loma tamowaidi mamohoidi meta yodi gabemani nige gonowana takisi se tano udiyedi (Mataiyo 17:25-26).

Bagubaguna Loma magaina unai taumiya se bom mo siya se kataidi Loma tamowaidi, na bolimai se loha se lau kabo Loma yodi gabemani dudulai se mosei magai hekadiyo udiyedi na siya hinage Loma tamowaidi yodi dudulai se haidi. Yo tau'iyala maudoidi hinage se hemwalaedi se hemala Loma tamowaidiyao. Teina tamowaidiyao ta ta hedede ta wane siya *Loma yona laugagayo logulogunaena taumiya*.

Loma yodi tau'iyala se bado yo se bayaokalili, na basileiya se bado se saedikwaidi na se laoma Loma yodi wasawasa (o Sisa) yodi loina guninaena. Tau'iyala bodana se hebodahegahegagilidi. Tatao badodi 6,000 meta hesadi se katai legiyona (Dimdim se kuli, *legion*). Legiyona hinage se hebodahegahegagilidi, meta tatao badodi 600 se katai kohoti (*cohort*), na yodi tauwoyawoya ede iyala kapinana (*commander*). Na kohoti udiyedi meta boda 6, tamowaidiyao badodi ede 100, na boda kesega kesega tauwoyaidi hesana ede iyala taubagunaena tamowaina, o, sentuliyo (*centurion*). Tau'iyala tau-tauna meta Epeso 6 unai ku kita.

Loma yona laugagayo logulogunaena taumiya meta nige magai lakilakina Loma unai se miya, iyamo Loma tamowaidi yodi dudulai se haidi. Hekadi dudulai ne se hai yodi paisowa debadiyena, doha tau'iyala, na hekadi moni lakilakina unai se hemaisa (Apostolo 22:26-29 yo 23:27)

Lota meta Abelahama kana kaha Halana natuna (Genese 11:27) na Abelahama maidana se lau Kanana tanona (Genese 12:5). Muliyena kabo yona bada ye laugabaei na magai lakilakina Sodoma unai ye miya (Genese 13:11-13) ye lau ee Yaubada magai wa ye heyababa (Genese 19).

M m

Mamohoi meta “Amen” kalina Hebelu yo Alamaiki udiyedi. Huyana ta kawa'ameni meta ta talam ta wane, “Hedehedede ta mamohoidi! Yau hinage yogu hedehedede.” (Galatiya 1:5, 2 Timoti 4:18, yo hekadiyo).

Mana meta Isalaela tamowaidi kadi kai Yaubada ye mosemoseidi balabala unai, huyana Aikupito se wasabugabaei. Kana kao doha laisi tumadiyao, se posiposi yo se gagilikalili, na se kamna (Esodo 16:13-16 yo 16:31-35). Mana hinage se katai galewa pwalawana (Same 78:24, Yowane 6:31-32).

Tenem huyana ne unai hinage mana hekadi se usaidi kaba'usaidi hesau unai na se tole talam keisina unai (Esodo 16:32, yo Hebelu 9:4). Na Dius tamowaidiyao yodi nuwatu meta huyana Numa Tabuna yona huyatatagwaligwali bolimai 586 BC unai, peloweta Yelemaiya mana kaba'usaidi wa ye hai na ye tolewadam Nebo kudulina na duhana unai. Temenai kabo ye miyamiya ye lau ee Mesaiya ye masalahama. Tenem huyana ne unai kabo Yaubada Dius tamowaidi mana ye hekai'uyoidi (Hemasalaha 2:17).

Manuwa kaikaitaudi: Isalaela unai meta manuwa lakilakidi suisui mwalomwaloidi taukaikaidi. Dimdimyena hesadi meta *vulture*. Manuwa ne nige Papua New Guinea unai, na manuwa suisui mwalomwaloidi taukaikaidi kesega meta ao'ao. Mataiyo 24:28 yo Luka 17:37 yo Hemasalaha 19:17 udiyedi manuwa ne se kataidi.

Mayadai: Kalidaena mayadai se hetubu malatomtom unai, yo Dimdim kalidiyena ye hetubu boniyai duwaduwalina 12:00 AM unai. Na Dius kalidiwai meimeilahi mahana yona huyadui mahanana unai ye hetubu, doha yodi Sabati mayadaina huyahetubuna meta Palaide meimeilahi mahana ye dui, na yodi huyakaiyawasi kana siga kabo Satade meimeilahi mahana ye dui.

Mesaiya meta kalina Hebelu na kaniyona ede iya wasawasa heyausina tauhaina yo iya Yaubada yona kaisunuwa tamowaina. Hinage ta hedede ede Keliso.

Moni Yesu yo apostolo yodi huyaena moni udoi udoi se hepaisowadi. Loma yo Giliki yodi moni se hepaisowakaliliyeidi, na Dius yodi moni hinage se hepaisowadi.

Loma yodi moni ede **denali** (Dimdimyena ta wane, *denarius*), meta siluba unai se ginauli. Teina meta taupaisowa mayadai kesega ye paisowa na maisana, na unai tamowai kesega kana kai se hemaisa mayadai saudoudoi (10). Yodi moni gagilina meta **asaliyona** (*assarion*) na bolonisi unai se ginaulidi. Asaliyona badodi 10 meta denali kesega.

Na Loma yodi moni gole se katai **talenti** (*talent*), na talenti kesega meta gonogonowana doha denali 6 tausani. Unai talenti ta katai ede **moni baikina** (Mataiyo 25:15).

Giliki yodi **dalakama** (*drachma*) (Luka 15:8-9) hinage se hepaisowadi. Dalakama lakina gonogonowana doha denali. Hinage siluba unai se ginaulidi. Yodi kabaginauli magaidi meta Antiyoka yo Taiya. Yodi moni gagilidi bolonisi se katai **kodalansi** (*kodrantis*) (Mataiyo 5:26, Maleko 12:42), na dalakama kesega luwanaena meta kodalansi badodi 40. Moni hekadiyo meta **didalakama** (*didrachma*) (Mataiyo 17:24), iya ede dalakama labui, yo **sitateli** (*stater*), iya ede dalakama hasi (Mataiyo 17:27)

Na Dius se bom yodi moni hesadi meta **sekeli** (*shekel*) yo **lepetona** (*lepton*). Dius tamowaidi bolimai kesega unai Numa Tabuna takisina lakina **sekeli tupwana** (*half-shekel*) se hemahemaisa. Yudasi Yesu kana ye walohai na maisana ede siluba 30, siya ede sekeli (Mataiyo 26:15). **Sekeli** kesega meta gonogonowana doha denali labui. Na **lepetona** bolonisi unai se ginaulidi na badodi 300 meta doha **sekeli** kesega. Dius yodi moni nuwana magai Sisaliya unai se ginaulidi.

Mose meta Isalaela yodi tauwoyawoya saesaena hesau. Yona huyalabasi wasana ta hasili Esodo 2 unai. Yaubada iya ye hetamali na Aikupito unai Isalaela bodana ye woyahesuwaladi (Esodo 3) yo iya hinage Yaubada yo boda duwalidiyena tautolo na Yaubada yona laugagayo ye hekawalaedi boda wa unai (Esodo 19–20 yo laugagayo se bado Lewitikasi, Numela, yo Dutelonomi bukadiyao udiyedi).

Mukali: Ena Dius tamowaidiyao se yona se lau dagela tamowaidiyao yodi tano na se uyo yodi magai, kabo *kaedi mukalidi se koinihinihiyedi*, matawuwuna nige se henuwa bena dagela tamowaidiyao wa yodi yababa hesau se baheiyama yodi magai. Kabikabi ta ye hemala hekihekinoi meta magai hesau tamowaidiyao siya yababa tamowaidi. (Mataiyo 10:14 yo Luka 9:6 yo Maleko 6:11, Apostolo 13:51).

Mulo meta mulo kaiwana unai se ginauli. Kaiwa ne se kinikini Alabiya yo Apelika tehana hekadiyo udiyedi. Mulo meta kaiwa ne masina se hepitali, na se hepaisowa mulamula udiyedi doha kamkamna kabahekaiyawasidi mulamulana (Maleko 15:23), yo hinage tauboiboita sinaledi se heyausidi mulo unai (Yowane 19:39).

Mustard meta kaiwa hesau Isalaela unai se kumakumai yodi koya udiyedi. *Mustard* tumana se hai kadi kai kabahepahepanedi, yo luguna hinage se ligadi na se kaidi. Yesu yona hedehedede udiyedi kaiwa ta ye katai (Mataiyo 13:31, 17:20, Maleko 4:31, Luka 13:19, 17:6). *Mustard* meta ye kinikinimwamwayau na saliyana nuwana kala kesega ye laugabaei, na manuwa unai se kabikabinoi. Iyamo kaiwa ne tumana se gagilikalili (Luka 17:6). Saliba unai teina kaiwa *mustard* ta meta nigele.

Nn

Nadi meta yausi panepanenamwanamwana yo maisana ye lakikalili (Maleko 14:3, Yowane 12:3). Teina yausi ta meta pasa nadi lamna masina unai se ginauli. Pasa ne meta teha *India* yo *Nepal* yo *China* udiyedi ye kinikini.

Nowa meta huya bagubagunana tamowaina hesau. Yaubada iya ye kaisunuwai na waga lakilakina ye ginauli. Ede dibwali'utu'utu unai nige ye boita, na iya maiyana mwanena yo natunao haiyona yo mwanediyao yo suisui maudoidi hinage ake unai ye hemauidi. Wasadi ku hasili Genese 6–9 udiyedi.

Numa: Isalaela tamowaidi yodi numa weku udiyedi se ginaulidi. Tamowai monididi weku taditadidi se hepaisowadi, na hekadiyo weku gaibu se haidi. Se saladobi ye lau ee se lage weku unai (Mataiyo 7:24-25), na kabo weku lakilakidi se talinidi ye sae numa kewana ne. Numa hekadi heisi labui o haiyona, na hekadi meta taumana yodi bili kesega se ginauli gatowa kewana ne unai. Gatowa meta tabatabana, na kaiwa yo didiyali yo bwatano udiyedi se ginaulidi. Numa dedekana unai kaikope se ginauli ye sae numa kewana ne unai. Lauyahi ne bwatano unai se hesapusapudi na pokahu unai se heposiposidi. Ena lauyahi wekudi se talini bwatano kewanaena na nige se saladobi, kabo huyanabu unai kabaita bwatano ne ye salahai na numa wekuna se ulugwaligwali (Mataiyo 7:26-27).

Numa Tabuna meta Yaubada kabataba'ohuina numana Yelusalema unai. Bagubaguna, huyana Dius Aikupito se laugabaei na se lage Sinai kudulina unai meta Yaubada ye hekatadi bena yodi kabatapwalolo tentina se ginauli, hesana kalinadaena ede *Logu-logu Tabuna* (Esodo 25–27). Logu-logu Tabuna se bahebahe'usei ye lau ee Dawida yona huyawasawasa. Kabo Dawida ye kaibwadalau Yaubada unai taba ye talamyeyi na yona Numa Tabuna ye kabi. Iyamo Yaubada paisowa wa ye mosei Dawida natuna Solomona unai (2 Samuwela 7, 1 Kin 6:37-38). Numa Tabuna wa kabo ye miya ye lau ee Babiloni yodi tau'iyala Dius se laedi Babiloni tanona unai. Na huyana Dius se uyoma yodi tano kabo Numa Tabuna hauhauna se ginauli bolimai 538 ye lau 515 BC udiyedi. Wasana ede Esila bukana unai ku hasili. Na bolimai ye loha ye miya ee wasawasa Heloda Lakilakina numa wa ye hetubu ye ginauli'uyoi bolimai 20 BC, na kabo numa wa unai se paipaisowa ye lau ee bolimai 24 AD. Numa Tabuna ne kana kao meta ye namwakalili (Mataiyo 24:1, Maleko 13:1, Luka 21:5-6). Tenem Numa Tabuna ne unai Yesu hinage ye taba'ohu na bakubakuna wa unai taulokulokune ye henakuhepesadi (Mataiyo 21:12-13), yo unai tamowai ye henamwanamwadi (Mataiyo 21:14), yo ye laulauhekata (Mataiyo 21:23). Numa Tabuna ne kabo Loma yodi tau'iyala se hetatagwaligwali bolimai 70 AD unai. Numa Tabuna se gabu na kaiwa gigibwalina unai gatowana gole ye welo na ye bwalili ye dobi na ye luwu numa wekuna duwaduwalidiyena. Unai weku maudoidi se tabegwaligwalidi, doha Yesu ye hededenonohaiyako wa (Mataiyo 24:2).

Numa Tabuna Hetabu'uyoina Henuwaisinina (Yowane 10:22): Bolimai 168 BC unai meta Antiyokasi Epipanesa teha Siliya yodi tau'iyala tamowaidi ye woyaidi na se lau Yelusalema se gilihahi na se tanuwagai. Na 16 Disemba 167 BC, Numa Tabuna

unai puwaka se kaitalasamyeyidi yodi yaubada saesaena hesana Siasi unai. Na teina kabikabi ta unai Numa Tabuna wa se hebikikaliliyei Yaubada matanawai. Bolimai haiyona mulidiwai Yudasi Makabiyasi kabo Dius yodi iyala tamowaidi ye woyaidi ede Yelusalema se gilihai'uyoi na Numa Tabuna yo kaitalasang milana wa se hetabu'uyoidi Yaubada unai. Bolimai badobado Disemba unai Dius tamowaidiyao teina gwauyala ta se ginaginauli. Na kalina Hebelu unai hesana se tole ede *Hanuka*, kaniyona ede *Hetabu'uyoi*. Hesana hesau ede Mala Gwauyalana, matawuwuna Dius tamowaidi kabo yodi lampa gwaudi se gabudi na yodi numa udiyedi gwauyala ta se gwauyalai.

Numa Tabuna takisina meta moni Dius babadadiyao se tanotano yodi hali Dius tamowaidiyao udiyedi, Numa Tabuna kabasaguina. Tamowai kesega kesega meta dalakama labui ye tole.

Numa Tabuna woyona kalekona meta Numa Tabuna duwaduwalina unai se hek-abasi na unai bili labui se ginaulidi. Bili bagubagunana hesana se tole *Teha tabuna*, na helabuina ede *Teha tabukalikalilina*. Hebelu 9:1-15 unai hededehemasalahana ku hasili.

Numa Tabuna yona polisi kadi paisowa meta Numa Tabuna se kitahetete. Doha keda se kitahetetedi yo nige Dius tamowaidi se hepesadi yo hetalagegagaga se hekaiyawasi yo tamowai se kabihekahinidi taukaitalasang hesadiyena (Apostolo 5:22-27).

Nuwadubu kalekona meta kaleko hesau kana kao doha baiki. Dius yo tamowai hekadiyo kaleko ne se likwa yodi nuwadubu yo yodi nuwabui kabahemasalahana, yo hinage kahusa se hesulu'isinidi kewadi ne udiyedi (Esita 4:1-3, Daniyela 9:3, Iyona 3:6, Mataiyo 11:21).

O o

Olibe meta kaiwa hesau Isalaela yo tenem teha ne basileiyadi maudoidi udiyedi. Yesu yona huyaena olibe koyadi se badokalili. Kaiwa ne saliyana nige ye lohakalili, nuwana 6 mita, na yona kini ne ye pahili. Iyamo huyana ta koi, kabo silina se kini'uyo na badodi nuwana hasi o haligigi.

Olibe nukula kaniyodi se gagilikalili na nige namwanamwa saha hesau kalidiyena. Na tamowai kabo olibe namwanamwana lagana se hekinihekawalaei kaiwa ne unai, kabo kaniyona namwanamwadi ye toledi.

Olibe kaniyodi se suna Nowemba unai. Kabo tamowai se koihebekudi na se tanoidi na se bahelaeyidi olibe kabatamtam unai na se tamdi. Masidi ne unai kabo oela se hai. Oela ne se tole kadi kai udiyedi yo hinage se ini lampa udiyedi na se gabudi na numa se hedawaya (Mataiyo 25:1-13). Oela hinage se hai kadi gai yausidi yo se sau dahidi unai (Luka 7:46), yo unai mulamula se ginauli (Luka 10:34, Yamesi 5:14).

P p

Palao Aikupito unai yodi wasawasa se kataidi ede *Palao*, doha *Palao Amenhotep* (bolimai 1541 ye lau 1520 BC), na kaniyona ede, *wasawasa Amenhotep*.

Paliseya meta siya Dius kadi boda hesau. Hesa Paliseya kaniyona ede *siya se bom se tolehesuwaladi*. Paliseya tamowaidi wa se kaikaipatebayao na laugagayo maudoina se hemuliwatani ye dobi gagilina unai (Mataiyo 23:23). Yodi nuwatu ede, ena nige tamowai maudoidi laugagayo maudoina se lauwatanidi, meta Yaubada kabo Isalaela ye hekamkamnadi. Unai se kouyalayala tamowai kalidiwai, ena Yaubada yona laugagayo se utusidi.

Pelitome meta Dius kabakitalobaidi meta siya Yaubada yona tamowai. Kabikabi ne Yaubada ye hededelau Abelahama unai bena loheloheyao maudoidi udiyedi se

ginaulidi, na yodi huyalabasi mayadaina mulina ne unai bena mayadai hehaligigi-haiyonana unai se hepelitomedi (Genese 17:10-12 yo Lewitikasi 12:3). Pelitome meta loheloheyao udiyedi dahi gagilina se nigwahai.

Paulo yona huyaena Dius tamowaidi nige taupelitome se kitadobidobiyeidi (Epeso 2:11) na se hedede ede siya tamowai bikibikidiyao na se miyasuwalaeidi.

Peloweta meta Yaubada tamowai ye kaisunuwaidi bena iya hesanaena se hedehed-edelau tamowai udiyedi. Na Yaubada yona nuwatu ye moseidi tamowai wa udiyedi na kabo se hededegabaedi tamowai udiyedi. Huya hekadi se hededenonohai saha huya matadi ne udiyedi kabo ye tubu, na huya hekadi ginauli sahasahadi se tubutubu wa kaniyodi se hededehemasalahadi. Na yodi hedehede mauidi meta Yaubada yona tamowai se guguyaidi bena yodi sunuma se tole Yaubada unai na iya se hedebasaei yodi mauli laulaudi udiyedi.

Pentekosi meta Dius yodi mayadai lakilakina hesau. Mayadaina ne unai Yaubada se lautokiyei kadi kai hesabana. Pentekosi kaniyona ede mayadai 50, iya ede Taukiuli Henuwaisinina mayadaina mulina ne unai. Pentekosi mayadaina unai bodalakilaki se lau Yelusalema unai se bawabawa.

Yesu yona boita yo tolo'uyo mulina ne unai kabo Pentekosi mayadaina unai Yaluwa Tabuna ye taludobima taukawamamohoi udiyedi (Apostolo 2:1-13).

Pilato hesana hinage se kuli ede **Pontiusi Pilato**. Iya meta gabana hesau Isalaela tanona unai, na iya Loma tamowaina. Loma yodi gabemani iya se hetolo Yudeya tanona taukitahetetena, na paisowana ne ye ginauli bolimai 26 AD ye lau ee 36 AD. Yona huyatanuwaga unai Dius tamowaidi ye kabiyabayababaidi (Luka 13:1). Ye matausi bena Dius tamowaidi se tolo na Loma se iyalaiddi.

Pwalawa Nige Yistina Henuwaisinina meta Isalaela tamowaidi yodi henuwaisini gwaualana hesau. Beyabeyana, huyana Dius sola Aikupito unai se miyamiya na bena kabo se laugabaei meta nige yodi mahana gonowana bena pwalawa yisti unai se hebwali na kabo se gabu, unai pwalawagaibu se gabu na se kai. *Pwalawa Nige Yistina Henuwaisinina* bolimai badobado se ginaginauli Yelusalema unai, Taukiuli Henuwaisinina mayadaina mulinaena. Unai henuwaisini labui ne se hemala gwaualala kesega. Taukiuli mamoaena wa mayadai bagubagunana meimeilahina unai se kai. Na kabo Pwalawa Nige Yistina Henuwaisinina ne ye lau ee mayadai haligigi-labui. Tenem mayadaidi ne udiyedi Dius kabo pwalawa nige yistina ye bom mo se kaikai doha kadi mumugao huyana Aikupito se pesagabaei na laulauna wa.

Ss

Sabati kaniyona ede kaiyawasi mayadaina. Huya bagubagunana unai Yaubada tanoubu ta ye ginauli mayadai haligigi-kesega udiyedi, na mayadai hehaligigi-labuina ye hetabuyei na hesana ye tole *Sabati* (Genese 2:2-3, Esodo 16:23-26 yo 20:10). Iya ede yoda Satade. Unai Dius Satade se hetabuyei yo unai se tapwalolo. Satade meta wiki kesega mayadaina gehegehena.

Sabati unai, Dius tamowaidi meta nige gonowana se paisowa. Nige gonowana se kadau, na keda kubwakubwana mo se lau, doha 1.2 kilomita. Yo laugagayo hekadiyo hinage se miyawatanidi (Maleko 2:24, Luka 13:14).

Kabinonoha mayadaina unai se kabinonoha Sabati hesabana (Maleko 15:42-43). Mayadaina ne meta yoda Palaide ye lau mahana ye dui. Na Sabati hekasisina ne ye hetubu Palaide mahana ye dui, na ye lau ee Satade mahana ye dui (Maleko 1:32, 16:1). Muliyena kabo gonowana se paisowa'uyo.

Teina huya ta ekalesiya se bado mayadai Sande (*Sunday*) se hetabuyei yo unai se tapwalolo, matawuwuna ede sabati kesega mayadaina bagubagunana unai Yaubada Yesu ye hetolo'uyoi (Mataiyo 28:1, Maleko 16:1, Luka 24:1, Yowane 20:1). Kalinadaena mayadaina ne ta katai Sabati, iyamo teina nige Dius yodi Sabati. Na ekalesiya hekadi

yodi huyakaiyawasi yo tapwalolo mayadaina se ginaginauli Sabati unai, iya ede yoda Satade. Mayadai hekasisidi hedehedena hekadi meta Loma 14:5-6, Kolose 2:16-17, yo 1 Kolinito 10:31-33 udiyedi.

Sadusiya meta Dius kadi boda hesau. Luwadiyena se bado siya Dius babadadiyao yo Sunedeli kadi tamowai (Apostolo 23:6). Huyana Sunedeli Yesu se hekasa meta taukaitalasam saesaena hinage Sadusiya kadi boda hesau (Apostolo 5:17).

Sadusiya se tolobayao Yaubada yona laugagayo bukadiyao haligigi udiyedi (Genese ye lau Dutelonomi) na Paliseya yodi hededehehemasalahi bukadiyao se subudi. Se kawamamohoi meta tamowai huyana ye boita meta yaluwana hinage kana siga, na tamowai nige gonowana ye tolo'uyo (Mataiyo 22:23), unai taba nige Yaubada tauboiboita ye hekasadi o ye hekilainodi. Hinage se hedede meta taba nige anelu o yaluyaluwa. Yo se wane, Yaubada taba nige saha hesau ye ginauli tanoubu maudoina yo basileiya udoi'udo'i udiyedi. Unai ede yodi nuwatu ye lau tanoubu ta unai na tanuwaga gigibwalidi se henuwakaliliyeidi.

Sadusiya tamowaidi Yesu se hewaiunu (Maleko 11:18, Luka 19:47), na Pentekosi mulina ne unai kabo hinage ekalesiya bodadi se hewaiunudi na se hekamkamnadi (Apostolo 4:1-3, 5:17-18).

Saiyona (kalina Dimdim unai ta wane, *Zion*) meta kuduli hesau Isalaela tanona unai yo Isalaela yodi Yaubada yona kabamiya kudulina, na temenai Numa Tabuna se ginauli. Saiyona kudulina saena meta 610 mita, na dedekana ne unai hinage kuduli se bado.

Wasawasa Dawida yona huyaena yo mulinaena, kuduli Saiyona unai magai lakilakina Yelusalema se kabi. Unai Saiyona meta Yelusalema hesana hesau.

Isalaela tamowaidiyao kalidiyena, hesa *Saiyona* kataina ye hemala yodi kabagwauyala, matawuwuna Yaubada yona kabamiya, yo hinage yona hededehehesunuma wasawasa Dawida unai se nuwatuidi meta kana isimulita hesau kabo tanoubu maudoina ye tanuwagai. Tenem huyana ne unai kabo Isalaela hesana ye saekalili tamowai maudoidi udiyedi, na maudoidi ne se laoma Saiyoni unai Yaubada se taba'ohui (Aisaiya 2:2-4)

Salpa meta weku yogeyogena gonowana ye kalasi, na kaiwana ne ye gigibwalikalili. Unai salpa kalakalasin meta Yaubada yona hekilaino heyaheyasonina (Luka 17:29, Hemasalahi 14:10, 21:8). Ena ye solusolu waila unai kabo panena ye yababakalili, doha pou ye pwasako bohana.

Samaliya meta Yesu yona huyaena iya tano hesau Yudeya yo Galili tehadi duwaduwalidi. Samaliya unai taumiya siya nige Dius na teha udoi'udo'i tamowaidi. Bagubaguna tano ne meta Isalaela bodadi saudoudoi yodi tano. Bolimai 721 BC, Asiliya yodi wasawasa Salagona yodi magai saesaena Samaliya ye hetatagwaligwali na tamowaidi ye laedi Asiliya tanona unai, na kabo teha hekadiyo tamowaidi ye haidi ye hemiyadi Samaliya tanona unai. Huyana se laoma meta Dius yodi Yaubada taba'ohuina se hai yodi, iyamo yodi taba'ohu kabikabidi beyabeyadi hinage sola se ginaginaulidi. Yesu yona huyaena, Dius tamowaidi Samaliya tamowaidi se kitadobidobiyeidi, na hesa "Samaliya tamowaina" ye hemala hededeheyababa kalidiyena (Yowane 8:48). Hinage yodi kadau udiyedi Samaliya tanona se kaihalei. Iyamo Yesu Samaliya tanona ye tauduwaduwali (Luka 9:51-52) yo Samaliya waihiuna kana keyaka unai waila ye numa yo maiyana se hedede (Yowane 4:1-26). Na Dius tamowaidi se hedede meta Samaliya kadi keyaka yo gaeba se bida. Yesu hinage Samaliya tamowaina katekatekamkamnana heyaheyasonina ye hasili, bena Dius tamowaina hesau yona kabakita (Luka 10:25-37).

Satani meta anelu hesau Yaubada ye laukwatakataei ede ye hemala anelu yabayababana na galewa unai Yaubada iya ye hepesa. Na iya meta demoni o yaluwa yabayababadi kadi tanuwaga. Hesa ta kalina Hebelu, na kaniyona ede *waiunu*. Hesana hekadi ede *Belesebulu* yo *Beliyela*, yo hedehedena hekadi ede *diyabolo* yo *tauyababa*.

Selapim meta anelu kao hesau. Siya pepedi haligigi-kesega na kadi paisowa meta yababa se gabugabaei (Aisaiya 6:2,6). Hesa Selapim meta kalina Hebelu, na wuwuna meta yodi hedehedede *salap*, kaniyona ede, ye kalasi. Hedehedede *salap* hinage se tole mwata kaikaikalasidi udiyedi (Numela 21:6,8, Dutelonomi 8:15, Aisaiya 14:29, 30:6).

Selubim meta anelu kao hesau, na kadi kao se hemasalahadi meta doha tamowai na ma pepedi yo kaedi yo hinage nimadi. Na siya yodi paisowa ede Yaubada yona kabamiya magaidi se kitakitahetetedi, doha Edena koyana (Genese 3:24) yo Talam Keisina sibugana, iya hesana ede Yaubada Yona Kabinamwa Kabatulina (Esodo 25:18-22, Hebelu 9:5). Yo Solomona Numa Tabuna bilina tabukalikalilina unai hinage Selubim koitaudi ye hetolodi (1 Kin 6:24). Na Selubim kewadiyena meta Yaubada yona kabamiya (Same 80:1, Aisaiya 37:16, Hesekeyela 9:3 yo 10:1-22).

Sentuliyo meta Loma yodi tau'iyala badodi 100 taubagunaidi (Apostolo 10:1). Buka unai hesa hesau hinage ta hepaisowa, iya ede *iyala taubagunaena tamowaina*.

Sisa: Loma yodi wasawasa saesaedi se kataidi ede Sisa, doha *Sisa Agastasi* (Luka 2:1) yo *Sisa Taibilyasi* yo *Sisa Nelo*.

Sodoma yo Gomola meta magai lakilakidi labui Yaubada ye hekilainodi se kalasigehe yodi laulau yabayababadi debadiyena. Unai hedehedede ta meta tamowai yabayababakalilidi ye heyaheyasoniyeyidi. Sodoma yo Gomola wasadi ku hasili Genese 18:15–19:29 unai.

Sunago meta Dius yodi kabakoikoigogo numana. Hesa ta kalina Giliki unai ta hai. Huyana Babiloni yodi tau'iyala Yudeya tamowaidiyao se woyalaedi Babiloni meta Dius wa se hetubu yodi kabakoikoigogo numadi se ginaulidi, na hesadi ede sunago. Sunago udiyedi se tapwatapwalolo, yo natudiyao se hesikuludi kalinadi Hebelu yo Mose yona laugagayo udiyedi, yo hinage koigogo udoi'udoi se ginaulidi numa wa udiyedi. Yodi huyamiya Babiloni unai ye gehe na se uyo Yudeya, meta Yelusalema unai nige Numa Tabuna. Unai yodi *sunago* se ginaulidi yodi kabakoikoigogo numadi, magai udoi'udoi udiyedi. Na nige Isalaela tanona ye bom mo unai, na teha maudoina haedi Dius tamowaidi se lau udiyedi se miya.

Sunedeli meta Dius yodi tauloina bodadi saesaekalilina. Dimdim unai se wane *Sanhedrin*, na Buka Suau unai se wane *Sunederi*. Boda wa kadi tanuwaga meta taukaita-lasam saesaena. Na Sunedeli tamowaina meta boda haiyona, siya ede (1) taukaita-lasam tauwoyaidi, (2) tamowai lakilakidi, yo (3) laugagayo taulauhekataena. Teina boda ta luwadi ne unai meta tautolo badodi 71. Siya Dius yodi pilipili tauhedudulaidi. Doha ta wane, huyana taba hesau ye tolo na ye lauhekata, siya kabo se hekasa meta yona lauhekata ne ye namwa o ye yababa. Yo huya hekadi Loma yodi gabana gigibwali ye moseidi bena laulau yababadi hekadiyo tauginaulidi se helauhetaladi, doha taukai-wahali yo tauhaikabi. Iyamo nige gonowana yababa tauginaulidi se unuheboitadi (Yowane 18:31). Yelusalema unai yodi kabakoikoigogo numana hesau, meta ta hedede ede, *Sunedeli numana*.

Tt

Tabu: Buka Tabuna ta unai, hedehedede *tabu* nige ta hepaisowakaliliyei. Beyabeyana, Giliki kalinadi *hagios* se bui *tabu*, iyamo kalina Saliba unai hedehedede *tabu* kaniyona udoi.

Buka Tabuna unai, hedehedede *hagios* se tolelaei Yaubada unai, na ka kulibui ede, “iya tabuna” (Lewitikasi 19:2, 1 Petelo 1:15-16). Kabo kaniyona ede ye a'a yo ye namwakalili yo nige yababa saha hesau kalinawai yo ye didiga. Yesu hinage iya tabuna (Hebelu 7:26).

Hedehedede *hagios* Buka Tabuna unai hinage se tolelaei tamowai udiyedi. Kabo kaniyona ede, se a'a (Loma 12:1, 1 Tesalonika 2:10 yo 3:13). Iyamo kaniyona hesau hinage, kabo teina gunina ne unai ku hasili.

Mose yona laugagayo yo Yaubada yona talam, siya hinage *hagios*, iya ede, se namwakalili na taba ta kawakabiyeidi (Loma 7:12, Luka 1:72).

Hagios kaniyona helabuina ede, **Yaubada yona**, doha ta wane, *Numa Tabuna*, iya ede Yaubada kabataba'ohuina numana Yelusalema unai, na nige gonowana paisowa-gaibu se ginauli unai.

Na ena *hagios* se tolelaei tamowai udiyedi kabo kaniyona hinage “Yaubada yona tamowai” (Epeso 1:1, Kolose 1:2), siya ede Yaubada yo Keliso tausunumaena maudoidi na se mose'uyoidi Yaubada unai. Gonogonowana doha, peloweta tabudi (Luka 1:70, 2 Petelo 3:2), anelu tabudiyao (Maleko 8:38, Luka 9:26), tano tabuna (Apostolo 7:33), yo pwalawa hetahetabudi (Mataiyo 12:4), maudoidi ne meta Yaubada yona.

Na hedehedede *hagios* kaniyona nige bena tamowai yona gigibwali ye hetala. Teina unai yoda hedehedede *tabu* meta udoi.

Taiti meta yoda gogo tupwana ta mosei Yaubada unai. Tupwa ne lakina ede doha teina: Ena tamowai hesau yona puwaka badodi 10, kabo kesega ye mosei Yaubada. Ena ye kelikeli na yona kwateya badodi 50, kabo 5 ye kainauyaidi. Ena ginauli saha hesau ye lokunegabai na moni lakina 100 Kina ye lobai, kabo taiti lakina ede 10 Kina. O ta wane, yoda lobalobai ta giyahiyeyi gwau badodi saudoudoi udiyedi na gwau kesega kabo ta hedede teina taiti.

Taiti tautole bagubagunana, iya ede Abelahama (Genese 14:20). Na muliyena Yaubada laugagayo ye mosei yona tamowai Isalaela udiyedi bena taiti se toletole (Lewitikasi 27:30). Yo hinage yona hededehehesunuma ye moseidi ye wane: Ena taiti kwa toletolenamwanamwa, kabo hinage namwa ya leyawa (Malakai 3:10). Beyabeyana Isalaela unai taiti se lau taukaitalasang yo Lewi kana isimulitao maudoidi udiyedi, siya Yaubada yona taupaisowatahitahi na nige se bom yodi tano o koya (Numela 18:24).

Taiti kaniyona mamohoina meta yoda sunuma yo yoda hekasisi Yaubada unai yo yoda gadosisi kalinawai kabakitadi. Unai Paulo ye kuli taba bena yoda kainauya ta helaki'uyoidi (2 Kolinito 8:7-8 yo 9:6-15), matawuwuna yoda gogo maudoidi siya ede Yaubada yona kainauya kalidawai (2 Kolinito 9:10).

Takisi kaniyona meta moni ta mosei gabemani udiyedi na se hepaisowa basileiya maudoudoina yona namwa unai. Yesu yona huyaena, Loma tamowaidi tano se bado se kitahetetedi, doha *Spain, France, Britain, Germany* tehana, Giliki yodi tano, yo Siliya yo Isalaela yo Aikupito hinage, na magai maudoidi ne tamowaidiyao udiyedi takisi se tanotano. Na Loma magaina lakilakina tamowaidiyao nige gonowana takisi se hemaisadi.

Loma yodi gabemani takisi tautanotano yodi kabikabidi doha teina: Magai tamowaidi hekadiyo, siya ede takisi tautanotano, se lau gabemani unai takisi se hemais-abagunai, na gabemani kabo dudulai yo gigibwali ye moseidi bena takisi se tano yodi magai udiyedi. Na huya se bado se tanodikwa. Unai Dius tamowaidi hekadiyo wa takisi tautanotano wa se subudi yo se hedede siya tamowai yabayababadi, matawuwuna Loma yodi gabemani yodi se paisowa.

Talam yo **talam tabuna** (Luka 1:72) meta Yaubada yona talam yona tamowai maiyanao. Talam ne meta Yaubada yona hededehehesunuma yona tamowai udiyedi bena ye kitahetetedi, na tamowai yodi hededehehesunuma kabo Yaubada se hekasisiyeyi yo se gadosisiyeyi.

Yaubada yona talam se bado: Ye hededehehesunuma Nowa unai meta taba nige tanoubu ye heyababa'uyoi dibwali'utu'utu hesau unai (Genese 9:1-17). Ye hededehehesunuma Abelahama unai bena kana isimulitao se bado (Genese 15 yo 17:4-6) yo yodi tano ye mosedi (Genese 12:7 yo 17:8). Sinai kudulina unai Yaubada yona talam ye ginauli Isalaela tamowaidiyao maiyanao meta iya yodi Yaubada yo siya yona tamowai (Esodo 19:5-6, Lewitikasi 26:12). Na kabo Yesu Yaubada yona talam hauhauna ye hemasalahayama (Luka 22:20, Hebelu 9:15, 2 Kolinito 3:4-6).

Tamowai dudulaina kaniyona labui: (1) Tamowai ne yona laulau se namwa yo se dudulai tamowai matadiyena (Genese 42:11, Maleko 6:20). (2) Yaubada tamowai ne ye kitahenamwa na maiyana se miyamiya. Iya Yaubada ye hekasisiyei yo yona nuwatu ye miyawatani. Tamowai bagubagunana Yaubada ye hedede meta iya tamowai dudulaina, iya ede Abelahama (Genese 15:6, 18:24-30, Hebelu 12:23 yo hekadiyo). Hedehedede ta hinage se tolelaei Yesu unai (Apostolo 3:14, 22:14, 1 Petelo 3:18). Abelahama yona sunuma debanaena ede Yaubada ye katai iya tamowai dudulaina. Na sunuma debanaena tamowai maudoidi, siya ede Dius tamowaidi yo dagela tamowaidi, Yaubada ye tolehedudulaidi (Loma 4:11-12).

Tamowai namwanamwana meta tamowai dudulaina hededehe masalahana ku hasili.

Tamowai tabudi: Guiyau yona tamowai hedehededena ku hasili. Talam Hauhauna bukana unai hedehedede ta nige se tolelaei pasta yo diyakona mo udiyedi, na Yesu tausunumaena maudoidi udiyedi.

Tau Natuna Yesu ye bom ye katai'uyoi ede iya Tau Natuna. Hesa ta hinage ta hasili Daniyela 7:13 unai. Na kaniyona ede, *tamowai mamohoina*. Yesu yona huyaena tamowai se nuwatulobai meta hesa *Tau Natuna*, iya Mesaiya o Keliso hesana.

Tauhaikabi meta boda hesau Yudeya unai hesana. Kalina Giliki unai hesadi ede *Zelotes*. Yodi nuwatu bena Yudeya se bom se kitahetete'uyoidi. Unai Loma tamowaidiyao se iyalaidi.

Yesu yona hekahekata hesau hinage se katai iya Simona Tauhaikabi (Mataiyo 10:4, Maleko 3:18, Luka 6:15). Tausonoga hekadi se hedede bena huyana Simona sola nige ye patulau Yesu unai, iya hinage Tauhaikabi wa kadi kaha hesau.

Tauhemuliwatani Huyana Yesu tanoubu ta unai ye miya meta yona hekahekatao yo hinage tamowai se bado maiyanao se sae yo se dobi na yona hedehedede se lapuidi, na hekadi hinage Yesu se sagui yona paisowa unai. Siya ta kataidi *Yesu tauhemuliwatanina*.

Na Yesu ye seuyo galewa, na mulina ne unai kabo tamowai Yesu tausunumaena hinage se katai tauhemuliwatani, kaniyona ede Yesu yona lauhekata se miyawatanidi yo hinage Yaluwa Tabuna kalidiyena ye miya.

Taukaitalasam meta Dius yodi tautolo Yaubada matanaena yo Yaubada yona tauhewahewasa tamowai udiyedi. Kadi mumuga meta Aloni (Esodo 28:1). Aloni kana mumuga Lewi kana isimulitao hekadiyo hinage Numa Tabuna unai se paisowa (Numela 1:50-53).

Taukaitalasam yodi paisowa hedehededena ta hasili Dutelonomi 33:9-10 unai. Yodi paisowa ede haiyona: (1) Yaubada yona hedehedede yo yona talam se kitahetetedi, (2) Yaubada yona laugagayo se lauhekataedi, yo (3) se kaitalasam, doha inisenisi se gabudi yo suisui se kaitalasamyeyidi Yaubada unai. Yodi paisowa hesau ede tamowai se kitasipwaidi meta se kasiyebwa o se namwanamwa, doha taulepela se kitasipwaidi (Lewitikasi 13:1-3).

Lewi kana isimulitao nige se bom yodi teha Isalaela tanona unai, na magari maudoidi udiyedi yodi numa se kabidi.

Talam Hauhauna bukana unai ekalesiya se kataidi siya taukaitalasam na yodi miyamiya namwanamwadi se hemala kaitalasam (1 Petelo 2:5,9 yo Loma 12:1-2). Keliso Yesu hinage yoda taukaitalasam saesaena, iya ede yoda tautolo Tamana matanaena (Hebelu 4:14-16 yo 8:1-2). Yo apostolo Paulo hinage ye hedede meta iya taukaitalasam paisowana ye ginauli na dagela tamowaidiyao ye henonohadi bena Guiyau ye hailobaidi (Loma 15:16).

Taukiuli Henuwaisinina meta Dius yodi gwauyala saesaena. Gwauyala ta kaniyona meta huyana Isalaela tamowaidi sola Aikupito unai na Yaubada bena ye woyahesepadi se henuwaisini. Huyana ne unai Yaubada yona taukaiunu aneluna ye hetamali bena numa maudoidi udiyedi loheya taubaguna ye unuhemwaloidi, na haedi numa kedana

duuna udiyedi kwasina se hesaudi meta kabo ye taukiulidi. Na numa duudi udiyedi nige kwasina meta wawayao loheloheyao yo suisui natudiyao bagubagunadi anelu wa kabo ye unuhemwaloidi (Esodo 12).

Taukiuli Henuwaisinina wa bolimai badobado se ginaginauli Yelusalema unai, Dius yodi nawalai bagubagunana hesana *Abib* (hesana hesau meta *Nisan*) na mayadaina hesaudoudoi-hasina (14) unai, iya ede yoda nawalai Eipulu. Numa kesega kesega yodi mamoe natuna se bahelaei Numa Tabuna unai se unuhemwaloi. Taukaitalasang mamoe momonadi se gabudi yo kwasinadi se inidi kabakaitalasang unai se hemala kaitalasang. Na kabo numa kesega kesega yodi mamoe mwalomwaloidi wa se bahelaedi yodi numa udiyedi, na kabo maudoudoina se gabu na se kai Taukiuli Henuwaisinina boniyaina ne unai. Malatomtom unai kabo mamoe wa kaitolena se gabuhegehedi. Na Taukiuli Henuwaisinina mulinaena kabo Pwalawa nige Yistina Henuwaisinina se ginauli mayadai haligigi-labui.

Taupaisowa yo **taupaisowatahitahi**: Heyayai tauhaina hededehehemalahana ku hasili.

Tauyababa meta Satani.

Tau'iyala Beyabeyana wasawasa yo basileiya maudoidi yodi tau'iyala na wasawasa hesanaena yodi magari se kitahetete yo hinage wasawasa kadi waiunu se iyalaedi. Yodi kaba'iyala gogodiyao Yesu yona huyaena meta kelepa, yesi, yo pidu, yo taudi lauguduguduidi gogodiyao (Epeso 6:14-17).

Loma yodi tau'iyala hededehehemalahana hinage ku hasili.

Tawasola Dius yodi kabikabi unai nige se tawatawasolagaibu, na wawayata tamadi se hededenonohaidi kaiteya to kaiteya kabo se tawasola. Unai wawayao wa se hededehepatunonohaidi, na nige gonowana se laomagogoi ye lau ee se lakilaki na kabinonoha kabikabidi maudoidi se gehe. Iyamo huyana waihiu se hededehepatulaei tau hesau unai meta se kitadi ede doha se tawasola. Doha ta kita Yesu tamana yo sinana udiyedi. Huyana Maliya yo Yosepa sola nige se miyagogoi na Maliya ye diyaka Yaluwa Tabuna unai meta tamowai matadiyena Maliya ye ganawali. Na Yosepa meta laulaududulai tamowaina, ede nige gonowana Maliya ye tawasolai, matawuwuna ye ganawaliko. Na iyamo nige ye henuwa bena Maliya ye hemwadinekaliliyei tamowai matadiyena, unai ye nuwatui bena kabo wadawadamyena ye laugabaei na Maliya gonowana natuna tamana ye tawasolai.

Toletotau Dius yodi miyamiya unai, ena tamowai hesau tamana yo sinana se tautaubada yo se sinesinebadakaliliko, meta iya kana paisowa bena ye kitahetetedi ye lau ee kana siga se boita. Yodi boita unai kabo natudi ta iya kana paisowa bena ye kita meta tamana yo sinana ta se kabinamwanamwaedi yo se laedi bwayabwaya duhana unai se tolenamwanamwaedi (Mataiyo 8:21). Kabikabi ne meta bwayabwaya hededehehemalahana unai ku hasili.

Dius yodi laugagayo unai tamowai yona huyaboita mayadaina unai bena se tole bwayabwaya duhana unai. Na yodi hyanuwadubu meta mayadai haligigi-labui.

W w

Waina meta wine hededehehemalahana ku hasili.

Waina pakuna Isalaela unai, Yesu yona huyamiya wa unai waina pakuna suisui hesau dahina unai se ginauli. Waina hauhauna bena paku hauhauna unai se hemwayau, matawuwuna waina hauhauna meta ye waiwaini unai paku hauhauna sola ma bigabigana kabo gonowana ye sese. Na paku beyabeyadi meta se kwailolo na nige gonowana se sese. (Mataiyo 9:17, Maleko 2:22, Luka 5:37-38)

Wasa namwanamwana nuwanuwatuna Buka Tabuna unai meta Yaubada idohagi na ye gadosisiyeida na yababa yo boita udiyedi ye gilihaida Keliso Yesu debanawai.

Wasa namwanamwana hedehededena hesau meta ewaneliya, iya ede kalina Giliki unai se hai.

Wine meta kaiwa hesau Isalaela unai se kumakumai na koyana se ginaginalidi. Koya ginaulina Yesu ye hasili Maleko 12:1 unai.

Tamowai wine kaniyodi se gigidi na se tamdi, meta kaedi se hepaisowa se utu'utui kabatamtam tehanawai. Masina wa se ini waina pakudi udiyedi na se tole ye lau ee ye bui na ye bayao. Numanuma ne hesana ede waina. Waina wa ye hemala mayadai badobado numanumana siya Dius kalidiwai.

Buka Tabuna unai wine koyana meta Isalaela bodadi heyahayasonidi (Mataiyo 21:33-41).

Winega meta kai hekadi yo waila kabahepanedi, na waina o kaiwa kaniyodiyao hekadi udiyedi se ginauli. Winega kamnana meta ye malulu. Loma yodi tau'iyala winega gagilina se ini kadi waila unai na ye hemala kadi numanuma, na tenem iya ede se mosei Yesu unai sataulo kewanaena (Mataiyo 27:48, Maleko 15:3, Luka 23:36, Yowane 19:29).

Wipi meta Loma yo tamowai hekadiyo yodi kaipidipidili. Wipi udiyedi yababa tauginalidi tamowaidiyao se pidilidi. Wipina ne se ginaulidi meta suisui dahina unai maina kubwakubwadi se bolidi na maina gwaudi se paigogoidi na siliya yo pawati matamatadiyao se hepatudi maina wa udiyedi. Na wipina ne unai tamowai dagelana se pidili meta dahina ye kopahai na ye kamkamnakalili (Mataiyo 20:19, Apostolo 5:40).

Wipi kao hesau se hepaisowa kati tautabetabe suisuidiyao se lauhelilidi na se heyaisidi, na wipidi se ginaulidi meta suisui dahidi udiyedi maina lohalohadi se bolidi na se heidi ye hemala maina bayabayaona lohalohana.

Huyana Numa Tabuna bakubakuna unai Yesu taulokulokune ye henakuhepesadi meta mainagaibu ye kabigogoidi na suisui ye henakuhepesadi (Yowane 2:15).

Witi meta Isalaela kadi kai saesaena. Witi kana kao doha lagau lohalohana, na tumana lakidi doha laisi. Witi koyana se ginauli meta nige witi likedi se kumakumaidi, na tumadi se hesuhesuludi koya unai. Na huyana witi se suna na se pogi kabo se bolidi na se toledi kabakabiyawasi tanona unai na yodi bulumakau se woyaidima. Siya kabo unai se takitakikili na molumolu se niuniuli. Molumoluna gunina ne unai weku tupitupidi se hepatudi. Teina unai witi kaniyodi tumadi dahidi se bekuhai. Kabo kabahesuluisini kaikaiwana se hai na witi ma mosomona se hesuluisinidi na yaumai kabo mosomoso ye yuhihesuwala, na witi tumadi se bekudobi. Kabo se haidi se toledi kaba'usaidi udiyedi. Witi tumadi se kutudi weku tabatabadi udiyedi na ye hemala pwalawa (Mataiyo 24:41), na unai kabo beledi tabatabadi se gabudi.

Yy

Yaluwa yabayababana meta yaluyaluwa iya tamowai ye heyababadi, yo iya meta Satani yona lolina guninaena. Hesana hesau meta **yaluwa bikibikina**.

Yaubada taukaihelahuina yo **Yaubada tausunumaena** (Apostolo 16:14), siya meta dagela tamowaidi na Yaubada se taba'ohui doha Dius tamowaidi. Maiyadi Dius se koikoigogo sunago udiyedi yo se tapwalolo yo hinage laugagayo se miyawatanidi, na iyamo Yaubada tausunumaena loheloheyao wa nige pelitome se hai. Dagela tamowaidi hekadi pelitome se hai na se hemala Dius mamohoidi, doha Nikolasi Antiyoka tamowaina (Apostolo 6:5).

Yaubada yona basileiya meta Yaubada yona kabaloina galewa ne yo tanoubu ta unai. Yo hinage Yesu unai tausunuma tamowaidi maudoidi, siya ede yona basileiya tamowaidiyao, matawuwuna Yaubada yona lolina guninaena se miyamiya (Maleko 1:15, 4:11, 4:26, yo 4:30).

Yaubada yona kaisunuwa tamowaidi meta Yesu taukawamamohoina tamowaidi maudoidi (Mataiyo 24:24, Luka 18:7, Kolose 3:12, Taitasi 1:1, 1 Petelo 2:9, yo hekadiyo).

Yaubada yona kaisunuwa tamowaina meta iya ede Keliso o Mesaiya.

Yaubada yona tamowai hededehehemasalahana ku hasili Guiyau yona tamowai hedehededenana unai.

Yawe meta Yaubada hesana ye hemasalahana Mose unai (Esodo 3:14). Hesa ta kaniyona tausonoga se hededehehemasalahana, iya ede, *Yau ede yau, o, yau ya miyamiya*.

Na Yaubada hesana laugagayona ye mosei Dius tamowaidiyao udiyedi tabu se katakatagaibui (Esodo 20:7), unai huyana Buka Tabuna se hasili kabo se katai ede *Adonai*, kaniyona ede *Guiyau*. Buka Dimdim hinage se bado *Jahweh* nige se kuli na *LORD* mo se kulikuli, na gonogonowana doha, kita hinage Talam Bagubagunana bukana unai GUIYAU ta hepahepaisowa, na nige YAWE. Na Dimdim bukadiyao hekadi se kuli ede *Jehovah*.

Yelusalema meta Dius yodi magari saesaena. Dawida yona huyawasawasa (nuwana bolimai 1010-970 BC) huyahetubuna unai Yelusalema ye hai yona kabawasawasa magari. Na kabo natuna Solomona yo mulinaena wasawasa magari wa se helahelaki yo gana weku unai se ganahetakikili. 586 BC Babiloni yodi tau'iyala Yelusalema se heyababa na tamowai se woyalaeidi Babiloni tanona unai. Dius yodi tauwoyawoya labui, Esila yo Nehemaiya, kabo Dius bodadi se laeidi se uyo Yudeya unai na Yelusalema yo Numa Tabuna se ginauli'uyoidi. Mulina ne unai teha udoi'udo'i yodi tau'iyala magari wa se heyababa na Numa Tabuna yo Dius yodi wasawasa yodi numa gogodiyao se kaiwahalidi.

Bolimai 63 BC unai na mulinaena, Loma yodi wasawasa yodi gabana se toledi Yelusalema yo Yudeya se tanuwagaidi. Na bolimai 66 AD unai Dius se tolo na tauwoyawoya Loma se tole wa yo yodi tau'iyala se iyalaedi. Tenem debanaena ede bolimai 70 AD Loma yodi tau'iyala Yelusalema magari yo hinage Numa Tabuna se heyababa.

Yisti meta ginauli namwanamwana pwalawa unai. Dius meta Yisti unai kadi pwalawa se hesese na kabo se gabudi. Iyamo Taukiuli Henuwaisinina yo mulina ne unai mayadai haligigi-labui (7) udiyedi pwalawa nige yistina se kaikaidi (Esodo 12:14-20). Unai pwalawa nige yistina meta miyamiya dudulaina heyaheyasonina, na pwalawa ma yistina ede lauhekata yabayababana heyaheyasonina (Mataiyo 16:5-12, Maleko 8:14-21, Luka 12:1, Galatiya 5:9). Yo huya hekadi Yesu yisti ye heyasoniyeyi Yaubada yona basileiya yona tadada unai (Mataiyo 13:33, Luka 13:20-21). Na apostolo Paulo yisti ye heyaheyasoniyeyi yababa unai (1 Kolinito 5:7-8).

Yona tamowai: Guiyau yona tamowai hededehehemasalahana ku hasili.

Yunika Beyabeyana Aikupito yo Alabiya yodi teha unai wasawasa mwanediyao taukitahettedi tatao meta nigwanigwa tauhaidi tabu natudi. Tatao ne kalina Dimdim unai se kataidi, *eunuch* (katakataina ede *yunik*), na unai yoda hedehedede yunika ta hai. Yunika hekadi wasawasa waihiu yodi taupaisowa. Kabo yodi gigibwali se moseidi, doha Apostolo 8:27 unai ta hasili. Na Dius meta laulau ne nige se ginaginauli matawuwuna laugagayo, yo yunika nige gonowana se lusae Numa Tabuna yo Dius yodi tapwalolo maudoidi unai.